


Tjukurpa Palya



Portions of the Holy Bible in the Pitjantjatjara language of
Australia

Tjukurpa Palya

Portions of the Holy Bible in the Pitjantjatjara language of Australia

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 18 Apr 2025 from source files dated 31 Aug 2023
b29b7786-0954-5b75-82cb-3657182b63d6

Contents

Matthew-ku	1
Markaku	107
Luke-aku	165
Johnku	269
Acts	339
Rome-aku	438
1 Karintjaku	487
2 Karintjaku	532
Kalaitjiyaku	563
Ipitjaku	582
Pilipaiku	597
Kalatjiku	611
1 Tjitja-lanikaku	624
2 Tjitja-lanikaku	636
1 Timitjiku	643
2 Timitjiku	657
Taitatjaku	668
Paalimanku	676
Iipuruku	680
Jamesaku	715
1 Peterku	727
2 Peterku	742
1 Johnku	750
2 Johnku	760
3 Johnku	762
Jude-aku	764
Revelation	768
Psalm	815

Tjukurpa Palya Matthew-lu Walkatjunkunyaja Matthew Nyangatja Nganmanyaja Nyakula Wangkanyajaku

Nyangatja Godaku tjukurpa wati ini Matthew-lu walkatjunkunyaja Jesunyatjara. Matthew-nya panya nganmanya wati mani mantjilpai nyinangi munu paluru anangu Jew tjutanguru mani mantjilpai wati mayatja pulka Rome-anya nguraraku tjunkunyajikitjangku.

Palu ngula Jesulu palunya iwarangka itingka nyakula ngurkantanu palumpa nintintja nyinanyajaku, ka paluru wara panya palunya wantikatingu munu Jesula tjanala junguringkula para-pitjalinangi yiya mankurpa munu palula tjukurpa tjuja kulira nintiringangi. Ka panya Jesunya ilunyatjanu wankaringkula pakannyangka malangka Matthew-lu kulu palunya nyangu wanka para-ngaranyangka.

Ka nyiri nyangangka Matthew-lu tjakultjunanyi Jesunya Wankarunkupainya, panya Godalu palunya nganmanyaja kalkunu Aipuramaku walytjapitinguru utiringkunyajaku, ka panya palunyaya wati wangkatjara tjutangka nyiringka iriti walkatjunangi. Munu Matthew-lu kulu alatja tjakultjunanyi panya Christanya Mayatja pulka nyinanyi anangu Godaku walytjapitiku munu paluru ngananyanya wangkanyi panya Christalulanya nintinu tjukaruru palyanyku nyinanyajaku.

Tjukurpa nyanganpa ngarinyi:

1:1—2:23 Jesunya iti ngarinyaja

3:1—4:11 Jesunya baptise-katinyaja munu Satantu palunya kurantjik-itjangku arkantja

4:12—18:35 Jesulu anangu tjutangka tjukurpa wangkara nintintja munu pikatjara tjuja palyarunguntja

19:1—20:34 Jesulu tjukurpa kutjupa tjuja wangkanyaja munu miracle kutjupa tjuja palyantja

21:1—23:39 Jesunya Jerusalemalakutu tangkiyingka tatira ankunytja, munu timpulangka tjarpara tjukurpa tjuja wangkanyaja

24:1—25:46 Jesulu palumpa nintintja tjutangka tjakultjunkunyaja ngula nyaaringkuku

26:1—27:66 Jesunya witintja munu punu katakutjarangka wakara utitjunkunyaja

28:1-20 Jesunya wankaringkula pakantja

Jesuku Walytjapiti

(Luke-aku 3:23-38)

¹ Tjukurpa nyangatja Jesunya Christanyatjara. Panya Aipuramalanguuru Isaacanya utiringu ka nyara palulanguru malatja malatja utiringkula wanara Davidanya utiringu. Ka Davidalanguuru malatja malatja ma-ngarala wanara malatjalta Jesunya utiringu. Uwa, Aipuramalanguuru ini nyanga paluru tjana ma-ngarala wanara Jesulalta wirkanu, ini nyanganpa

² Panya Aipuramaku katja ini Isaacanya, ka Isaacaku katja ini Jacobanya, ka Jacobaku katja tjuṭa wati ini Judah-nya tjana.

³ Ka Judah-lu minyama ini Taimanya alṭingu munu pula katja kutjara kanyinu ini Piritjinya pulanya Tjiranya. Ka Piritjiku katja ini Itjurangga, ka Itjuranku katja ini Raamanya.

⁴ Ka Raamaku katja ini Amina-tapanya, ka Amina-tapaku katja ini Naatjannga, ka Naatjanku katja ini Tjalmannga.

⁵ Ka Tjalmantu kungkawara ini Rayapanya alṭingu munu pula katja ini Pawatjanya kanyinu, ka Pawatjalu kungkawara ini Ruthanya alṭingu munu pula katja ini Uupitanya kanyinu. Ka Uupitaku katja ini Jesse-nya.

⁶ Ka Jesse-ku katja ini Davidanya, panya Godalu wati nyanga palunya ngurkantara tjunu anangu Israelkunu tjuṭa mayatjarira kanyintjaku.

Ka Davidaku katja ini Tjalamangga. Palu Tjalamanku ngunytju panya nganmanypa wati ini Yurayaku kuri nyinangi.

⁷ Ka Tjalamanku katja ini Raya-pawamanya, ka palumpa katja ini Apitjanya. Ka Apitjaku katja ini Atjanya,

⁸ Ka Atjaku katja ini Tjiya-tjapatanya, ka palumpa katja ini Tjawu-ramanya, ka Tjawu-ramaku katja ini Utjayanya.

⁹ Ka Utjayaku katja ini Tjatjanya, ka palumpa katja ini Ayatjanya, ka Ayatjaku katja ini Itjakayanya.

¹⁰ Ka Itjakayaku katja ini Manatjanya, ka palumpa katja ini Aimannga, ka palumpa katja ini Tjutjayanya.

¹¹ Ka Tjutjayaku katja tjuṭa wati ini Tjikanayanya tjana. Ka nyara palula arangkaya Papilangga ngurara tjuṭangku warmalangku pitjala tjananya ma-katingu Papilantakutu.

¹² Ka panya Tjikanayaku katja ini Tjiyaltilnga, ka palumpa katja ini Tjirapapilnga.

¹³ Ka Tjirapapilku katja ini Apiyutanya, ka palumpa katja ini Iliyakimanya, ka palumpa katja ini Aitjanya.

¹⁴ Ka Aitjuku katja ini Tjaitakanya, ka palumpa katja ini Akimanya, ka Akimaku katja ini Iliyutanya.

¹⁵ Ka Iliyutaku katja ini Iliyatjanya, ka palumpa katja ini Matjannga, ka palumpa katja ini Jacobanya.

¹⁶ Ka panya Jacobaku katja ini Josephanya Mary-ku panya kuri, ka panya Mary-lu kanyinu katja ini Jesunya ini kutjupa Christanya Godalu panya kalkuntjanya.

¹⁷ Uwa, walytjapiti nyanga tjanalanguru Jesunya iti ngaringu, panya Aipuramalanguru pakali malatja malatja 14 ma-nyinara wanara wiyaringu, ka Davidanyalta tjanalanguru utiringu. Ka panya Davidalanguru piruku nampa palu purunypatu pakali malatja malatja ma-nyinara wanara wiyaringu, kaya nyara palula ara tjananya warmalangku pitjala katingu ngura Papilantakutu. Ka nyara palulanguru piruku nampa palu purunypatu pakali malatja malatja 14 ma-nyinara wanara wiyaringu, ka palula tjanalanguru Jesunya ita ngaringu.

Jesunya Iti Ngarinytja

(Luke-aku 2:1-7)

¹⁸ Nyanga alatjiringu Jesunya Christanya Godalu panya kalkuntjanya iti wirkankunytjaku. Panya kungkawara ini Mary-nya wati ini Josephalu kalkuntja patara nyinangi palumpa ngunytjuku ngurangka

munu pula kuwaripatu tjunguringkunyitja wiya patupatu nyinangi ngula altinytjikitja. Ka Mary-nya nganmanypa pakuringu Kurunpa Milmitanguru, Josephalu altinytja kuwaripangka.*

¹⁹ Ka Josephalu Mary-nya nyakula kulinigi wati kutjupangu kampangkatu kurantja-palku panya paluru Kurunpa Milmitu palyantjijaku ngurpa. Panya Josephanya wati palya mulapa munu paluru Mary-nya kuntaringkunyitjaku-tawara tjuta mirangka wangkanytja wiyangu wantingi. Tjinguru tjutangka mirangka wangkanyangka kulira anangu tjutangu kungkawara palunya wati kutjupangka kampangkatu ngarinyangka-palku kulinma munuya palunya apungka atura iluntanama. Palula-tawara Josephalu kulinu, "Palyantina wantiku altiwiyangku, kanti ngunytjunga ma-nyinama."

²⁰ Ka alatji Josephalu unngu kulinnyangka Mayatja Godaku angelpa palula utiringu mungangka paluru ngarira tjukurmankunyangka, munu wangkangu, "Josephu, Davidakun katja, kulilani! Kuntaringkunyitja wiyangu wantima Mary-nya altira kanyintjikitjangu panya iti nyanga paluru Kurunpa Milmitanguru, wati kutjupanguru wiya.

²¹ Ka paluru iti katja kanyilku, ka kanyinnyangka nyuntu palunya inila Jesunya panya ini nyanga paluru wangkanyi alatji, 'Paluru palumpa walytja tjuta wankarunkuku Godalu tjananya kura tjuta palyantjijanguru pungkula wiyantjaku-tawara.' **

²²⁻²³ Panya tjukurpa nyanga palunya Mayatja Godalu nganmanytju wangkara kalkunu wati wangkatjara ini Aitjayala nyanga alatji, "Kungkawara nyitayi ititjararingkuku munu katja kanyilku, kaya palunya inilku 'Imanyuwalnga', panya ini nyanga paluru wangkanyi alatji,

'Godanya nganana tjungu nyinanytja.' ** *

Alatji angeltu Josephala wangkangi. Ka mulapatu Godalu panya iriti kalkuntjanya utiringu.

²⁴ Ka Josephanya kunkuntjanu wankaringu munu angeltu palula wangkanytja kulira palyanu munu Mary-nya altira palumpa walingka kanyiningi.

²⁵ Palu pula tjungu ngarinytja wiyatu iti ngarinytjaku patara. Munu pula ngula iti wirkankunyangka palunya ininu Jesunya.

2

Wati Ninti Mankurtu Jesunya Pitjala Nyakunyitja

¹ Ka Jesunya iti ngaringu ngura ini Bethlehemala manta panya Judeala, ka nyara palula ara wati ini Iratanya Judeaku mayatja pulka nyinangi. Kaya Jesunya iti ngarinyangka malangka wati ninti mankurpa kakararanguru pitjangu Jerusalemalakutu. Wati

* **1:18** Tjakangu wati Jew-ngku kungkawaraku mukuringkula nganmanytju kalkupai palunya kutju ngula altinytjikitjangu, ka kungkawara paluru palumparipai ka wati kutjupangu palunya putu altinyi. Palu wati paluru kalkuntjatjanu patu nyinapai palula tjunguringkunyitja wiya munu ngula kutju altira tjunguringkupai walytja tjutangu palunya pulanya inma pulkangka tjungunyangka. Nyara palula arangka kutju pula tjunguringkupai munu waji kutjunga nyinapai. Palu nyara palula kuwaripangka anangu tjutangu nintingku kulilpai kungkawara panya paluru watiku panya kalkuntja nyinanyangka. * **1:21** Psalm

nyanga paluru tjana panya titutjarangku kililpi tjuṭa nyinara nyakupai munuya nyara palulanguru ara tjuṭa kulilpai nyakunytjatjanungku.

² Munuya paluru tjana Jerusalemala wirkara anangu nguratja tjuṭangka tjapinu, “Yaaltjingka iti panya paluru wirkanu, panya Jew tjuṭaku mayatja pulka? Panya nganaṅa ngura nyara kakarara nyinara nyangu kililpi pulka kuwari kutju utiringkula nyinanyangka munula kililpi nyara palunya nyakunytjatjanungku kulinu, ‘Munta-uwa kunyu panyatja Jew tjuṭaku mayatja pulka iti wirkankunyangka alatjiriku.’ Munula nyangatja kuwari pitjangu palunya walkuntjikitja.”

³ Ka mayatja panya Iratalu kulinu wati panya paluru tjana iti mayatja pulkanmara ngurinnyangka, munu paluru nyararingangi kulira, “Tjinguru iti paluru pulkaringkula ngayula tungunpungkula ngayuku arangka mayatjariku.” Ka Iratanya nyararingkunyangka anangu Jerusalemala nyinanytja uwankara palumpa nguluringangi.

⁴ Ka palulanguru Iratalu tjapira kulintjikitjangku wati tjukurtjara kuranyitja tjuṭa altingu Moseku tjukurpa nintilpai tjuṭa kulu, munu tjanala tjapinu, “Yaaltjingka wanyu Christanya Godalu panya kalkuntjanya iti ngariku?”

⁵ Kaya wangkangu, “Ngura ini Bethlehemala paluru ngariku manta nyanga Judeala, panya wati wangkatjarangku iriti walkatjunu nyanga alatji,

⁶ ‘Kulilaya Bethlehemya ngurara tjuṭa! Panya nyura manta pala Judeala nyinanyi ngura tjukutjukungka, kaya anangu ngura pulkangka nyinanytja tjuṭangku nyuranya wiya kulilpai. Palu tjituru-tjitururinytja wiyangkuya wantima, panya ngura nyara palula mayatja pulka wirkankuku ngayuku walytja tjuṭa Israelkunu tjuṭa wati tjapata purunytju wirura atunymara kanyintjikitja, kaya ngura winkitjangku nyuranya kulilku munuya mirawaniku.’” *

Alatjia tjakultjunu Mayatja panya Iratala.

⁷ Ka palula malangka paluru wati panya ninti mankurpa kampankatu altira tjanala tjapiningi, “Yaalara kililpi panya paluru utiringu?” Kaya palula tjakultjunu.

⁸ Ka Iratalu wati panya palunya tjananya Bethlehemalakutu witunu munu tjanala pulkara wangkangu, “Ankulaya pulkara ngurinma tjitji panya palunya munuya palunya nyakulampa pitjala ngayula wangka kana ngayulu ngapartji ankula palunya walkula.”

⁹⁻¹⁰ Kaya mayatja palula kulintjatjanu anu wati panya ninti mankurpa. Munuya kililpi panya palunyaṭu nyangu panya tjana kakarara nyakunytjanya munuya nyakula pulkara alatjitu pukularingu. Ka kililpi panya tjanala ma-kuranyuringu munu wirkara ngarangu wali panya iti ngarinytjitjangka katu.

¹¹ Kaya wali unngu tjarpura nyangu tjitji panya tjukutjuku ngunytjangku ampura kanyinnyangka kungkawara panya Mary-lu. Munuya pupakatira tjitji palunya walkunu munuya palulanguru wiru tjuṭa alara ungangi tjana katinytjatjanungku, panya apu gold, munu tjau panti wirutjara kulu punu ini nyanga kutjaranguru *frankincense-guru* munu *muunguru* kulu.

¹² Palula malangkaya Iratalakutu malaku ankunytjikitjangku kuliningi, palu tjana mungangka kunkunarynyangka Godalu tjananya

* 2:6 Maikaku 5:2

wangkangu Iratalakutu malaku ankuwiyangku wantinytjaku. Kaya mungawinki ma-pakanu ngura walytjakutu iwara kutjupawanu Iratalakutu malaku ankunyitja wiya.

Iti Jesunya Itjipalakutu Irataku Ngulungku Katinytja

¹³ Ka tjana ankunyangka malangka Mayatjaku angelpa Josephala mungangka utiringu paluru tjukurmankunyangka munu wangkangu alatji, "Pakara warpungkula kati tjitji pala tjukutjuku ngunytju kulu manta nyara Itjipalakutu, panya Iratalu kuwari ngurini tjitji pala palunya iluntankunytjikitjangku. Ka ankula nyara palula rawa maninama piruku ngayulu altinytjaku patara."

¹⁴ Ka Josephanya munga pala palula mapalku pakanu munu palunya palunya ngunytjurara warpungkula ma-katingu Itjipalakutu.

¹⁵ Munu pula rawangku iti panya palunya ma-kanyiningi ngura nyara palula Iratanya ilunytjaku patara. Panya Itjipala ankula nyinanytjaku Mayatja Godalu iriti wangkangu wati wangkatjarangka, ka panya nyiringka walkatjunu nyanga alatji Godalu wangkanytja, "Ngayuku katja Itjipala ankula nyinaku,

kanu nyara palulanguru palunya altiku malaku pitjanytjaku." *

Iti Nyitayira Tjuta Iratalu Iluntankunytja.

¹⁶ Ka mayatja Iratalu wati panya ninti mankurku putu patara kulinu, "Munta, paluru tjana-manti wantira kampangkatu anu malaku tjanampa ngurakutu." Munu paluru pulkara alatjitu mirpanarira palumpa tjaultji tjuta witunu iti nyitayira uwankara iluntankunytjaku ngura nyara Bethlehemala nyinanytja tjuta munu ngura palula itingka nyinanytja tjuta kulukulu. Munu paluru wangkangu iti pulka-pulka tjuta kulu pungkunytjaku panya kuli kutjara nyinanytja tjuta kulu. Panya paluru wati panya ninti mankurta tjapintjatjanungku kulinigi, "Tjinguru paluru iti kulunypa, munta tjinguru tjitji pulka-pulka tjina ankupai." Kaya palumpa tjaultji tjutangu mulapatu tjitji palunya tjananya uwankara pungkula wiyanu.

¹⁷⁻¹⁸ Palu ara nyanga tjitji tjuta pungkula wiyantja palunya Mayatja Godalu nganmanytju wangkangu wati wangkatjarangka ini Jeremiah-la ka paluru nyiringka walkatjunu nyanga alatji,

"Ngura ini Raamalaya kulini anangu kutjupa pulkara ulanyangka.

Nyara paluru minyma panya Raitjilnga palumpa tjitji tjuta wiyaringkunyangka pulkara tjituru-tjitururira ulanyi,

kaya palunya putu pilunmananyi tjitji uwankara wiyaringkunyangka." *

Ka tjukurpa panya paluru mulapatu utiringu ngura Bethlehemala.

Josephalu Mary-nya Pulanya Malakungku Katinytja

¹⁹ Ka ngula Iratanya ilunyangka malangka Mayatjaku angelpa Josephala utiringu paluru tjukurmankunyangka ngura panya Itjipala.

²⁰ Munu wangkangu, "Ngura nyara Israelta panyaya wati kura tjutangu tjitji pala tjukutjuku iluntankunytjikitjangku kulinigi, munuya wati panya paluru tjana kuwari ilungu. Ka pakara pulanya ngunytjurara malakungku kati ngura panya Israeltakutu!"

* 2:15 Uutjiyaku 11:1 * 2:17-18 Jeremiah-ku 31:15

²¹ Ka mulapatu Josephalu pakara pulanya malakungku katingu ngura Israeltakutu.

²² Palu paluru wirkara kulinu Akila-yatjanya mayatja pulka nyinanytja manta panya Judeaku, panya palumpa mama Iratanya ilunyangka paluru palumpa arangka mayatjaringu. Ka nyara palunya kulira Josephanya nguluringangi manta nyara palula nyinanytjaku. Ka palulanguru angeltu piruku palunya tjukurmankunyangka wangkara witunu alinytjaralku ankula uru Galileela itingka nyinanytjaku.

²³ Ka paluru mulapatu anu munu wirkara nyinangi tawunu ini Nazarethala. Panya ara nyanga Nazarethala ankula nyinanytja Mayatja Godalu nganmanytju wangkangu wati wangkatjara tjutangka, kaya wakatjunu nyanga alatji,

“Wati nyara Godalu kalkuntjanya ngura ini Nazarethala nyinaku, kaya anangu tjutanku palunya wangkaku wati Nazarethanya ngurara.”

Ka Josephalu Jesunya Nazarethalakutu katinyangka tjukurpa nyanga paluru mulapatu utiringu.

3

John Baptistalu Tjukurpa Wangkanytja

(Markaku 1:1-8; Luke-aku 3:1-18; Johnku 1:19-28)

¹ Ka ngula kuli tjuta ngarala wiyaringkunyangka wati ini John Baptistalu manta panya Judeala ilytjingga anangu tjutangka Godaku tjukurpa tjakultjunangi.

² Munu paluru tjanala alatji wangkangi, “Kuntariwaya kura tjuta palyantjatjanu munuya kampa kutjuparira kura piruku palyantja wiyanku wantima, panya kuwari ilaringu Godalu anangu tjuta walytjanmara mayatjangku kanyintjaku.”

³ Johnnga wati panyatja, panya wangkatjara ini Aitjayalu iriti palunyatjara tjakultjunu alatji,

“Kutjupanku ilytjingga anangu tjutangka mirara wangkanyi alatji, ‘Mayatjakuya nganmanypa ritiriwa paluru pitjala tjukurpa wangkanyangka wanganarangku kulintjikitja.

Panya watingku iwara tjukarurulpai mayatja pulka malawanu pitjanytjaku,

palu purunypa nyura tjukarururingkula patanma Mayatjalu pitjala wangkanyangka wanganarangku kulintjikitja.’ ” *

⁴ Ka wati nyara palumpa mantara kamulaku intunguru palyantja, ka paluru karilpa karpinu piltangka kukaku miringuru palyantjitjangka. Munu paluru tjintilyka tjuta munu tjuratja kulu ngalkuningi.

⁵ Kaya anangu winki mulapa palulakutu pitjangu manta Judeala nyinanytja tjuta. Munu ngura Jerusalemalangu, munu ngura ititja tjutangu, karu Jordanta itinguru kulukuluya pitjangu winki mulapa.

⁶ Munuya paluru wangkanyangka kulira kuntaringkula kura palyantjatjanungku walytjangku tjakultjunangi. Ka tjananya kura tjananku walytjangku tjakultjunksunyangka kulira karu Jordanta urungka tjarpatjura baptise-katingi.

* 3:3 Aitjayaku 40:3

⁷ Kaya Paratji tjuṭa munu Tjatjutji tjuṭa kulū palulakutu pitjangu baptise-katinytjaku. Ka Johntu tjananya nyakula wangkangu alatji, “Nyaaku nyura baptise-katinytjaku pitjangu? Nyura wanyu mulapa kura wantira kampa kutjuparingu? Wiya, nyura uwankara liru tjuṭa anangu tjuṭa ngunti kuralpai! Nyura tjinguru ngunti kulini ngayulu nyuranya urungka tjarpatjunkunytjitjanguru Godanya nyurampa kalyparingkunytja-palku. Palu wiya, Godanya nyurampa pulkara mirpanarinyi.

⁸ Nyura uti mulamulangku kura wantira kampa kutjuparima munuya palya nyinara wiru tjuṭa kutju palyanma, ka nyara palulanguru wiru tjuṭa palyannyangka nyakula Godanya nyurampa pukulariku.

⁹ Palu nyura tjinguru kulini alatji, ‘Nganananya Godalu kura ngurkantankunytja wiyangku wantinyi panya nganana Aipuramaku pakalipiti. Palulangurulanya pikantankuwiyangku wantiku.’ Palu wiya, nyura ngunti kulini. Palu puli tjuṭa nyanga nyawa! Tjinguru Godalu mukuringkula apu nyangannguru Aipuramaku pakali tjuṭa palyanma.

¹⁰ Kulilaya! Panya wati kaana kanyilpaingku punu tjuṭa maitjararingkunytjaku pakaltjingalpai, palu punu kutjupa tjuṭa kuraringkula titutjara mai wiya ngaranyangka nyakula paluru katara wanipai warungka, ka palu purunypa Godalu anangu tjuṭa titutjara kura nyinanyangka nyakula tjananya paira iyalku warukutu. Ka pala palula-tawara nyura uti Godalawanu tjukaruru palyanyku nyinama.

¹¹ “Ka ngayula malangka wati kutjupa pitjanya. Nyara paluru pulka mulapa ngayula waintara alatjitu. Kana ngayulu tjukutjuku alatjitu nyinanyi mununa palula mirangka ngarala pulkara kuntaringkupai. Ngayulu panya nyuranya kura wantira kampa kutjuparingangka urungka baptise-katingi. Palu wati nyara paluru nyuranya baptise-katiku Kurunpa Milmilnga nyurala tjarpatjura, ka warungku purunytju nyuranya kampa tjukarurulu.

¹² Panya paluru kuwari riti ngaranyi anangu uwankara ngurkantara tjarantjikitja, panya minymangku mai kanira uninypa wiru mauntalpa tjunkupai munu unytjunytju ma-wanipai, palu purunypa paluru pitjala anangu tjuṭa tjaralku munu palumpa walytja tjuṭa palumpa ngurangka tjunkuku munu anangu kuralpai tjuṭa waru pulkangka waniku waru nyara titutjara kampaingka.”

Jesunya Johntu Baptise-katinytja
(Markaku 1:9-11; Luke-aku 3:21-22)

¹³ Ka nyara palula ara Jesunya Galileelanguru pitjangu karu Jordantakutu munu Johnta tjapinu palunya baptise-katinytjaku.

¹⁴ Palu Johntu puṭu nguwanpa kulinigi munu palula wangkangu, “Wiya, utin nyuntu ngayunya baptise-katima. Nyaakuna ngayulu nyuntunya baptise-katiku?”

¹⁵ Ka Jesulu palula wangkangu, “Wiya palya, nyuntu ngayunya urungka baptise-kati, panya Godanya mukuringanyi nyuntu ngayunya alatjingtjaku.”

Ka alatji wangkanyangka Johntu palya kulinu munu paluru Jesunya urungka tjarpatjura baptise-katingu.

¹⁶ Ka Jesunya urunguru ngalya-pakannyangka ilkari alaringu, ka paluru ira-nyakula nyangu Godaku Kurunpa kuukuuku purunypa ukalingkula palula nyinakatinyangka.

¹⁷ Ka ilkaringuru Godalu wangkangu alatji, "Nyangatja ngayuku katja, kana palumpa pulkara mukuringanyi mununa palumpa pulkaratu pukularinyi."

4

Jesunya Satantu Kurantjikitjangku Arkantja

(Markaku 1:12-13; Luke-aku 4:1-13)

¹ Ka nyara palula malangka Kurunpa Milmiltu Jesunya ma-katingu ilytijkutu Satantu palunya arkantjaku.

² Ka paluru rawa mai wiya nyinangi tjinu 40 munu palulanguru paluru paltjatjiratjaringu.

³ Ka Satangga palulakutu pitjangu palunya arkara Godalanguru mauntankunytjikitja munu palunya alatji wangkara mukumukuningi, "Nyuntu wanyu paltjatjiratja? Uti nyuntu Godaku Katja mulapa nyinarampa puli nyanganpa wangkama mairingkunytjaku."

⁴ Ka Jesulu wangkangu palula, "Wiya, panya nyiringka iriti walkatjunkunytja ngaranyi alatji,

'Anangungku mai kutju rawangku ngalkula puu wanka titutjara nyinaku Godala tjungu, palu tjukurpa Godalu wangkanytja uwankara wanganrangku kulira paluru wanka mulapa nyinaku.' "

*

⁵ Ka palulanguru Satantu Jesunya katingu ngura milmilpa Jerusalemalakutu munu palunya ngaratjunu timpulangka katu mulapa.

⁶ Munu alatji wangkara wituwituningi, "Nyuntu Godaku Katja ngaralampa wali nyanga katunguru wararakati panya nyiringka alatji walkatjunkunytja ngaranyi,

'Godalu palumpa angelpa tjuu witulku nyuntunya atunymankunytjaku,

kaya nyuntunya marangku katura kanyilku punkannyangka apungku tjina katantankunytjaku-tawara.' "

*

⁷ Ka Jesulu palula wangkangu, "Wiya, panya nyiringka iriti walkatjunkunytja alatji ngaranyi,

'Nyura uti Mayatja Godala ngunti tjapintja wiyangku wantima paluru witulya pulkangku palyannyangka unytjungku nyakunytjikitjangku.' "

*

⁸ Ka piruku Satantu palunya katingu puli murpu pulkakutu katu mulapa munu katunguru manta winki para-nintinu ngura uwankara wiru mulapa ngaranyangka anangu winki kulu. Munu paluru Jesula wangkangi,

⁹ "Kulila! Nyuntu ngayunya pupakatira walkunnyangkampa ngayulu ngura nyanganpa uwankara nyuntunya untkuku."

¹⁰ Ka Jesulu palunya paira wangkangu, "Ara ngayulanguru! Panya nyiringka iriti walkatjunkunytja ngaranyi alatji,

'Mayatja Godanya kutjuya walkunma munuya palula kutju wanganrangku kulinma.' "

*

* 4:4 Deuteronomy 8:3
Deuteronomy 6:13

* 4:6 Psalm 91:11-12

* 4:7 Deuteronomy 6:16

* 4:10

11 Ka Satantu palunya wantikatingu, ka angelpa tjuṭangku pitjala palunya aṭunytju kanyiningi.

Jesulu War̄ka Palyantja Uru Galileela Itingka

(Markaku 1:14-15; Luke-aku 4:14-15)

12 Ka Jesulu ilytjinguru pitjala kulinu mayatja panya Iratalu Johnnga tjailangka tjarpatjunkunytja, munu paluru kulintjatjanu ngurakutu ma-pakanu Galileelakutu.

13 Munu paluru Nazarethala wirkara ngura pala palula nyinanytja wiya waintara anu ngura ini Kapunimalakutu munu ngura nyara palula walingka ngura tjunu uru panya Galileela kantilytja. Manta nyara Galileenya panya wati ini Tjipulanku pulampa Napataliku pakalipitiku ngura ngarangi.*

14 Panya ara nyanga Jesunya manta Galileela nyinanytja Godalu nganmanytju wangkangu wangkatjara ini Aitjayala, ka panya paluru nyiringka walkatjunu nyanga alatji,

15 “Kulilaya Tjipulanku pakali puliripitingku munu Napataliku pakali puliripitingku kulu!

Panya iwara pulka ma-ngarinyi uru Galileela itiwanu, ka panya nyura iwara pala palula itingka nyinara wanani karu Jordanta wilurara.

Munuya Jew wiya tjuṭangku kulu kulila, panya nyura kulu manta pala Galileela nyinanyi Jew tjuṭangka tjungu.

16 Panya nyura Godaku ngurpa nyinara mungawalurungka nyinanyi, munu nyura ilunytjaku pulkara ngulurungkupai.

Palu ngula Godalu tili pulkangku nyuranya irnyara palurunku nintilku,

ka nyura mungawalurungka nyinara palunya pitalytji pulka nyakuku,

munu nyura nyakunytjatjanungku nintiringkuku munu palula wanganarangku kulilku.”*

Alatji Aitjayalu iriti walkatjunu, ka tjukurpa panya paluru mulapatu utiringu Jesunya Galileela wirkara nyinanyangka.

17 Uwa, nganmanytju panya John Baptistalu Godaku tjukurpa anangu tjuṭangka tjakultjunangi, palu nyanga palulanguru Jesulu tjukurpa para-tjakultjunangi. Munu paluru wangkangi alatji, “Kura palyantjatjanuya piiwiyariwaya munuya kampa kutjuparira kura piruku palyantja wiyangku wantima, panya kuwari ilaringu Godalu anangu tjuṭa mayatjangku walytjanmara kanyintjaku.”

Jesulu Wati Antipina Witilpai Kutjara Kutjara Palunya Wanantjaku Altinytja

(Markaku 1:16-20; Luke-aku 5:1-11)

18 Munu Jesunya uru Galileela kantilypa warara anangi munu paluru nyangu wati kutjara kutarara uru unngu ngaranyangka

* 4:13 Tjipulannga pula Napatalinya Jacobaku panya katja kutjara iriti nyinangi. Panya Jacobanya ini kutjupa Israelnga munu paluru katja 12 utinu, ka palula tjanalanguru Israelkunu tjuṭa mulararingu. Ka panya ngula Israelkunu tjuṭa Itjipalanguru pakara pitjala manta Israelta tjarpara nyinangi, ka nyara palula arangka Godalu manta panya palunya tjarara ungu Israelkunu tjuṭa ngurangkarira nyinanytjaku. Munu paluru Tjipulanku pulampa Napataliku pakali puliripiti manta nyanga palunya ungu uru Galileela wilurara paluru tjana ngura tjuṭa palyara nyinanytjaku. * 4:16 Aitjayaku 9:1-2

Simonnga, panya ini kutjupa Peternya, munu palumpa malanya Andrew-nya. Panya nyanga paluru pula kuka antipina witalpai kutjara munu pula ngarala net urungka waningi kuka tjuta witintjikitjangku.

¹⁹ Ka Jesulu palula pulala wangkangu, "Pitjala pula ngayula tjunguriwa, kana nyupalinya nintila waraka kutjupa. Panya nyupali ninti kuka antipina witintjaku, palu kuwarina nyupalinya nintini anangu tjuta altira ngayula tjunguntjaku tjana kulu tjungurinkula ngayunya wanantjaku."

²⁰ Ka pula mapalkungku net tjunkula wantikatira palula tjungurinkula anu.

²¹ Munuya palulanguru tjukutjuku ma-pitjala nyangu kutarara kutjupa Jamesanya pulanya Johnnga wati panya Tjipitiku katja kutjara. Panya paluru pula pauta unngu nyinangi pulampa mamangka tjungu, munuya net palyarunguningi antipinaku ankunytjikitjangku. Ka palunya pulanya Jesulu altingu palula tjungurinkunytjaku.

²² Ka pula mapalku pakara palula tjungurinkula anu mama panya pautangka wantikatira.

Jesulu Anangu Tjuta Nintintja Munu Pikatjara Tjuta Palyarunguntja (Luke-aku 6:17-19)

²³ Munu palulanguru Jesulu manta Galileela para-pitjalira ngura uwankarangka tawunu kutjupangka kutjupangka wali inmatja tjutangka tjarpara Godaku tjukurpa wangkangi anangu tjutangka. Munu paluru tjanala Tjukurpa Palya tjakultjunangi panya Godalu anangu tjuta mayatjangku walytjanmara kanyintja. Munu ngura winkingka pikatjara tjuta kulu palyarunguningi pika kutjupa kutjupa tjutatjara.

²⁴ Kaya ngura winkinguru kulinu Jesulu pikatjara tjuta palyarunguntja manta ini Tjiriyalanguru kulu.* Munuya kulintjatjanungku anangu tjuta mulatu pikatjara tjuta katingi palulakutu palyarunguntjaku pika kutjupa kutjupa tjutatjara. Kutjupa tjaraya mamutjara, ka kutjupatjara tjititinkula witaly-witalyarira punkalpai, ka tjara kutjupa nyumpu putu pakalpai. Ka Jesulu tjananya uwankara palyarungunu.

²⁵ Kaya anangu winkingku palunya rawangku wanangingi, panya paluru tjanaya ngura tjutanguru kulira pitjangu, ngura ilatja tjutanguru manta Galileelanguru, munu manta panya ngura tawunu 10-tjaranguru kulu. Munuya ngura pararitja tjuta kulu pitjangu manta panya Judealanguru, ngura Jerusalemalanguru, munu karu Jordanta kakaranguru kulukulu.

5

Nyaanguruya Pukulpa Mulapa Nyinaku? (Luke-aku 6:20-23)

¹ Ka palulanguru Jesulu anangu tjuta mulapa nyakula puli pantangka ma-tatira nyinakatingu, kaya palumpa nintintja tjutangu wanara palula tjunguringu.

² Ka Jesulu palula tjanala tjukurpa wangkara nintiningi alatji,

* 4:24 Manta panya ini Tjiriyanya Galileela alinytjara.

- 3 “Kutjupa tjuṭangkuya Godala mirangka ngarala walytjangku unngu kulira kunṭaringkupai.
 Palu nyanga palunya tjananya Godalu mayatja pulkangku walytjanmara kanyini, kaya palulanguru pukulpa mulapa nyinaku.
- 4 Kutjupa tjuṭaya tjituru-tjituru pulka nyinanyi.
 Palu nyanga palunya tjananya Godalu ampura pilunmankuku, kaya palulanguru pukulpa mulapa nyinaku.
- 5 Kutjupa tjuṭaya purkaranytju nyinanyi kanany-kanany pa wiya.
 Ka nyanga palunya tjananya Godalu wiru tjuṭa ungkuku kalkuntatjanungku, kaya palulanguru pukulpa mulapa nyinaku.
- 6 Kutjupa tjuṭaya Godala wanganarangku kulira tjukaruru nyinanytjikitja pulkara mukuringkupai kurunpa winki.
 Ka nyanga palunya tjananya Godalu alatjitu palyalku wanganara alatjitu nyinanytjaku, kaya palulanguru pukulpa mulapa nyinaku.
- 7 Kutjupa tjuṭaya ngaltunytju pulka nyinanyi anangu tjuṭaku kurunpa ngalturingkupai.
 Ka nyanga palumpa tjanampa kulu Godanya pulkara ngalturingkuku, kaya palulanguru pukulpa mulapa nyinaku.
- 8 Kutjupa tjuṭaya kurunpa winki mukuringkupai Godanya kutju pukulmankunytjikitja.
 Munu nyanga paluru tjana Godanya nyakuku, munuya palulanguru pukulpa mulapa nyinaku.
- 9 Kutjupa tjuṭangkuya pikaringkunyangka kalypara pilunmankupai munuya kanyilpai.
 Ka nyanga palunya tjananya Godalu walytjanmankuku palumpa tjitji mulapa nyinanytjaku, kaya palulanguru pukulpa mulapa nyinaku.
- 10 Kutjupa tjuṭangkuya Godala wanganarangku kulira tjukaruru nyinapai, kaya mirpantju tjuṭangku tjananya tjukaruru nyinanyangka nyakula kuralpai munu pungkupai.
 Palu Godalu tjananya mayatja pulkangku walytjanmara kanyini, kaya palulanguru pukulpa mulapa nyinaku.
- 11 “Panya nyura ngayuku walytja nyinanyangka anangu kutjupa tjuṭangku nyuranya warkira kuralku munu pungkuku munuya nyuranya ngunti kuranmankuku tjukurpa ngunti tjuṭa tjungura wangkara.
 Palu tjana alatjingannyangka nyura wantima munu nyara palulanguru nyura pukulpa mulapa nyinaku.
- 12 Uwa, pulkara pukularima Godanya kulira panya paluru nyurampa wiru mulapa ungkunyitjikitjangku patara kanyini ngura nyara ilkarangka. Panya nyurala kuwaripangkaya iriti anangu tjuṭangku palu purunypatu kuraningi wati panya wangkatjara nganmanyitja tjuṭa, ka panyaya tungunpungkula wantingi.

Tjaltu Mayu Wirutjara Purunypa Wanganara Nyinanytjaku
 (Markaku 9:50; Luke-aku 14:34-35)

- 13 “Panya kutjupangku tjaltu tjunkupai kukangka mayu palya ngaranytjaku, kaya anangu tjuṭa pulkara mukuringkupai. Ka palu purunypa nyura Godala wanganarangku kulira palyannyangkampa anangu tjuṭangku nyuranya nyakula pulkara mukuringkuku tjana kulu Godaku walytjaringkula wanganarangku kulira palyantjikitja.

Palu tjinguru tjaltu kuraringkuku, ka kukangka tjunkunyangka mayu kura ngaranyi, ka mayu kura arkara wantinyi. Ka tjaltu palunya mantangka waninyi anangu tjuṭangku paltjura tjinangku kantura kurantjaku. Ka palu purunypa nyura tungunpungkula Godalangu paturingkunyangka anangu tjuṭangku nyuranya nyakula Godanya wantiku palula tjunguringkunyjtikitja mukuringkunyjtja wiyangku. Palulanguru nyura ngayuku warka puṭu wirura palyalku.

Tili Purunypa Uti Palyanyku Nyinanytjaku

¹⁴ “Panya nyura tili purunypa nyinanyi anangu tjuṭaku. Panya mungangka tilingku iwara irnyara utilpai, kaya nyakula tjukaruru anukupai, palu purunytju nyura anangu manta winkitja iwara nintilpai Godalakutu wirkankunyjtaku. Panya tawunu pulka apungka katu palyantja uti ngarala irnyalpai anangu tjuṭangku nyakunyjtaku.

¹⁵ Ka palu purunypa anangungku wali unngu lampa tilira piti angapapatjukupai wiya uti tjukupai katu tili paluru irnyara utintjaku anangu tjuṭangku uti nyakunyjtaku.

¹⁶ Ka palu purunypa nyura palyanyku nyinama tjukaruru munu mukulyangku wiru tjuṭa palyanma anangu tjuṭaku, ka palulangurulta anangu tjuṭangku nyuranya utingku palyannyangka nyakuku tili purunypa irnyannyangka, munuya nyurampa Mama Ilkaritjanya waintara kulira palunya mirawanira walkulku.

Moseku Tjukurpa Tjukarurungku Kulintjaku

¹⁷ “Tjinguru nyura ngayunya alatji kulini, ‘Nyangatja-manti pitjangu tjukurpa panya Mosenya ungkunyjtja munu wati wangkatjara tjuṭa kulu ungkunyjtjanya wiyantjikitjampa.’ Palu wiya, ngayulu tjukurpa palunya tjananya wiyantjikitja pitjanytja wiya, palu panya tjana iriti wangkanyjtita palyantjikitjana pitjangu.

¹⁸ Mulamulangkuṅa nyurala wangkanyi, panya manta ilkari ngaranyangka, tjukurpa paluru tjana uwankaratu titutjara ngaraku, nyura rawangku wanganarangku kulintjaku, tjukurpa pulka tjuṭa, munu tjukutjuku tjuṭa kulu. Palu tjukurpa panya paluru tjana wangkanyjtja uwankara utiringkunyangka kutju, tjukurpa paluru tjana wiyaringkuku tjintu maṭatjangka.

¹⁹ Palulanguru tjukurpa palunya tjananya uwankara wanganarangku kulintjaku ngaranyi, ka tjinguru kutjupangku tjukurpa pulka tjuṭa, munu tjukutjuku tjuṭa kulu kulilwiyangku wantinyi, munu anangu kutjupa tjuṭa kulu nintini palu purunytjuṭu wantinytjaku, ka palunya Godalu nyakula pukularinytja wiyangku tjarulku, Godaku walytja uwankarangka maṭarku nyinanytjaku. Ka tjinguru kutjupangku tjukurpa nyanga palunya tjananya wanganarangku kulira palyani munu paluru anangu kutjupa tjuṭa nintini palu purunytjuṭu palyantjaku, ka anangu nyara palunya Godalu nyakula pukularira palunya kuranyu tjunkuku Godaku walytja kutjupa tjuṭangka waintara.

²⁰ Palu kulilaya! Nyura Godaku walytja nyinanytjikitja mukuringku-lampa, wati nyara Moseku tjukurpa nintilpai tjuṭa, munu Paratji tjuṭa kulu arkantja wiyangku wantima. Panya paluru tjana Moseku tjukurpa kanyira kanany-kananyaripai, tjukurpa nyara palulawanu kutju. Palu utiya kurunpa winki Godaku mukuringkula, palula

wanganarangku kulira, tjukurpa nyara palunya tjananya palyanma, kanany-kananyarinytja wiyangku. Ka nyura Godaku walytja nyinanytjikitja mukuringkula palu purunypatu palyanma kurunpa winki Godaku mukuringkula ka nyara palulanguru kutju Godalu nyuranya walytjanmankuku nyura palula tjunguringkula titutjara nyinanytjaku.

Mirpanariwiya Nyinanytjaku

²¹ “Panyatjaya kulila, panya Godalu nyurampa tjamu tjutangka iriti wangkanytja alatji,

‘Anangu kutjupa iluntankuwiyangku wantima, panya nyuntu anangu iluntankunyangkampa tjana nyuntunya kuutpangka katira ngaratjungkuku kura ngurkantankunytjaku.’

²² Palu kuwarina ngayulu nyurala wangkanyi alatji, nyuntu tjinguru malanypaku unngu kuraringkula mirpanarinyangka Godalu nyuntunya kura ngurkantankuku. Munu piruku tjinguru nyuntu malanypa ngunti kuranmankunyangkampa nyuntunya kuutpa pulkakutu katiku Jewku kantjulpa tjutangka ngurkantankunytjaku. Munta nyuntu tjinguru malanypa anara ngurpanmankunyangkampa Godalu palu purunypatu nyuntunya kura ngurkantankuku munu nyuntunya waru panya titutjara kampapaingka waniku.

²³⁻²⁴ Ka palula-tawara nyura uti walytja tjutaku kalypa nyinama. Tjinguru nyuntu timpula unngu patara ngaranyi Godanya kutjupa kutjupa ungunyitjikitja munu nyuntu tjinguru ngarala kulilku, ‘Munta-uwa! Ngayulu panyana ngayuku walytja kuraningi, ka tjinguru paluru ngayuku kuraringanyi. Wanyu kana ankula palumpa-warara kalypariwa nyanga ungunytja kuwaripangka.’ Alatji kulira nyuntu uti ankula palumpa kalyparingama munu palulangurulta malaku pitjala pitjilpangka tjunkula Godanya ungama.

²⁵ “Tjinguru nyuntu anangu kutjupa kurannyangka paluru nyuntunya mirpanarira kuutpakutu katiku. Ka katinyangka nyuntu uti palunya wirura purkarangku wangkakatima palumpa kalyparingkunytjikitjangu kuutpangka wirkankunytja kuwaripangka, kanta paluru tjinguru kalypangu wantiku kuutpangka tjunkunytja wiyangku. Palu tjinguru nyuntu wangkara palumpa kalyparingkunytja wiyangku wantinyangkampa paluru nyuntunya katiku alatjitu wati ngurkantankupaikutu, kanta paluru nyuntunya kura ngurkantara wangkaku maningka payamilantjaku munu paluru wati pulitjamunu altiku kanta pitjala nyuntunya witera katira tjailangka tjarpatjungkuku.

²⁶ Mununta nyara palula rawangku kanyilku nyuntu mani uwankara payamilara wiyantjaku patara. Nyangatjana mulamulangku wangkanyi.

Kuri Walytjarangka Ngariwiyangku Wantinytjaku

²⁷ “Munuya nyangatja kulu kulila, panya Godalu nyurala iriti wangkangu nyanga alatji,

‘Nyura uti kutjupangka ngunti ngariwiyangku wantima munuya kuri walytjanga kutju ngarima.’ *

²⁸ Palu kuwarina ngayulu nyurala wangkanyi alatji, tjinguru wat- ingku kungkawara kutjupa nyakula unngu alatji kulini, ‘Kuwarinatju kungkawara nyara wirungka ngarinyi.’ Ka nyura tjinguru kulini

* 5:27 Exodus 20:14

paluru kungkawara pala palula ngarinyangka kutju Godalu palunya kuranmankunytja-palku. Palu wiya, nyara paluru nyakula ngarinytjikitja unngu mukuringkunyangka kulū Godalu palunya kuranmankuku.

²⁹ “Uwa, uti nyura kura tjuta wantinytjikitjangku pulkara kulinma munu wantima alatjitu kuraku piruku mukuringkunyta wiyangku. Tjinguru nyuntu kurungku kutjupa kutjupa nyakula kura palyalku. Palu uti nyuntu kuru warpura wanima kura rawangku palyantjaku-tawara munu palya kurutjara nyinama, panya nyuntu tjinguru kuru winkingku kura rawangku palyannyangkampa Godalu nyuntunya ngura kurangka waniku waru pulkangka.

³⁰ “Munu palu purunypa tjinguru nyuntu marangku kura kutjupa kutjupa palyalku. Palu uti nyuntu mara katara wanima kura rawangku palyantjaku-tawara, munu palya mara wiya nyinama, panya nyuntu tjinguru mara winkingku kura rawangku palyannyangka Godalu nyuntunya ngura kurangka waniku waru pulkangka.

Kuri Wantikatiwiyangku Wantinytjaku

(*Matthew-ku 19:9; Markaku 10:11-12; Luke-aku 16:18*)

³¹ “Munuya nyangatja kulū kulila, panya nyiringka iriti walkatjungkunytja ngaranyi Godalu wangkanytja nyanga alatji, ‘Wati kuringku minyma kuri wantinytjikitja mukuringkulampa uti nyiringka walkatjunama minyma paluru palunya wantinytja nyakula ninti nyinanytjaku.’ *

³² Uwa, nyura ninti tjukurpa nyara palumpa, palu kuwarina nyurala alatji wangkanyi tjinguru watingku minyma kuri nyiri unganyi wantinytjikitjangku paluru mukuringkula, ka tjinguru minyma palunya wati kutjupangku ngula altinyi, ka nyara palulanguru wati panya kuri nganmanyitjangku minyma palunya wantira Godala tungunpungkunytjaku palyani, panya Godalu wangkangu kuri walytjangka kutju ngarinytjaku. Ka wati panya kuri mala altinytjanya kulū Godala tungunpunganyi minyma panya palula tjunguringkula. Palulanguru nyura uti minyma kuri kanyinma alatjitu wantinytja wiyangku, palu wati kutjupangka kampangkatu ngarinyangka nyakula kutju palya mukuringkula wantima.

Kalkuntjatjanungku Tjukururungku Palyantjaku

³³ “Munuya nyangatja kulū kulinma, panya Godalu nyurampa tjamu tjutangka iriti wangkangu nyanga alatji,

‘Nyura tjinguru Mayatja Godaku kutjupa kutjupa palyantjikitjangku kalkuntjatjanungku palyanma alatjitu mala wantinytja wiyangku.’

³⁴⁻³⁷ Ka nyura kalkuntjikitja mukuringkulampa kalkunma alatjitu ini kutjupa kutjupa-warara wangkara kalkuntja wiyangku. Panya nyura anangu kutjupa kalkuntjikitjangku ini kutjupa kutjupa-warara wangkapai tjinguru ini ilkaritja, tjinguru ini mantatja, tjinguru Jerusalemanya, ka anangu nyara paluru ini palu purunypa wangkanyangka kulira nyurampa mulamularingkupai. Palu kuwarina ngayulu nyurala wangkanyi alatji, nyura kalkuntjikitja mukuringkula tjukururungku wangkama ini kutjupa kutjupa tjuta tjungura wangkanytja wiyangku. Panya nyangatja mamu Satantu wituwituni ini tjutawanungku kalkuntjaku. Kaya ilkaritjawanungku kalkuntja

* 5:31 Deuteronomy 24:1

wiyangku wantima panya ngura nyara palulanguru Godalu uwankara mayatjangku kanyini. Munuya palu purunypatu mantawanungku kalkuntja wiyangku wantima panya manta nyangatja palumpa alatjitu. Munuya Jerusalemalawanungku kulu kalkuntja wiyangku wantima panya ngura nyara paluru kulu Godaku ngaranya mayatja panya pulkaku. Palu nyura kalkuntjikitja mukuringkulumpa kalkunma alatjitu ini kutjupa kutjupa wangkanytja wiyangku, munu kalkuntjatjanungku tjukarurungku alatjitu palyanma mala wantinytja wiyangku.

Ngapartji Pikaringkula Pungkunyitja Wiyangku Wantinytjaku
(Luke-aku 6:29-30)

³⁸ "Munuya nyangatja kulu kulila! Panya Moselu iriti walkatjuno alatji,

'Anangu kutjupangku nyuntunya kuru pungkunyangkampa palunya ngapartji kuru kutju pungama, munu tjinguru katiti pungkula katantankunyangkampa palunya ngapartji katiti kutju pungkula katantanama.' *

³⁹ Palu kuwarina ngayulu nyurala alatji wangkanyi, anangu kutjupangku nyuntunya kurannyangkampa ngapartji kuralwiyangku wantima. Tjinguru kutjupangku nyuntunya mitamita kampa waku pungkunyangkampa mitamita kampa kutjupa nintinma piruku pungkunytjaku.

⁴⁰ Ka tjinguru anangu kutjupangku nyuntunya kuutpakutu katiku nyuntu palula nganmanytju ngatjintjatjanungku palunya malakungku ungkunyitja wiyangka. Ka wati panya ngurkantankupaingku tjinguru nyuntunya wangkaku tjata araltjara anangu panya palunya ungkunyitjaku, ka nyuntu uti palunya tjata kutju ungkunyitja wiyangku nyuntumpa upukuta kulu ungama panya mani pulkatja. ⁴¹ Ka tjinguru tjaultjingku nyuntunya pauntjingara wangkaku palumpa yakutja tjalira katira palula tjungu ankunytjaku. Ka nyuntu uti wanganarangku tjalira katima munu ngula malakungku ungkunyitjaku wangkanyangka palula wangka, 'Wiya, palyana piruku katinyi.' Munu nyuntu munkara nguwanpa palula tjungu anama palumpa yakutja katira.

⁴² Ka tjinguru anangu kutjupangku nyuntunya kutjupa kutjupaku ngatjillku, ka palunya wantinytja wiyangku ngatjinnyangkampa ungama alatjitu.

Anangu Uwankaraku Mukulya Nyinanytjaku
(Luke-aku 6:27-28,32-36)

⁴³ "Nyura ninti panya kutjupangku iriti wangkangu alatji, 'Walytja tjutaku kutjuya mukulya nyinama munuya nyurampa mirpantju tjutaku kuraringama.'

⁴⁴ Palu kuwarina ngayulu nyurala nintini tjukurpa kutjupa alatji, 'Nyurampa mirpantju tjutakuya mukulya nyinama, munuya palumpa tjanampa Godala tjaminma nyuranya kuralpai tjutaku tjananya ngaltunytjungku atunymara kanyintjaku.'

⁴⁵ Ka nyura alatji palyannyangka Mama God ilkaritjangku nyuranya nyakula alatji kulilku, 'Munta mulapa nyanganpa ngayuku walytja

* 5:38 Exodus 21:24

mulapa nyinanyi ngayunya arkaṛa.' Uwa, nyura mirpaṅtju tjuṭaku Godala tjaṭinnyangka paluru tjananya ngaltunytjungku kulilku, panya paluru tjuṅtu pakaltjinggalpai anangu palya tjuṭa munu kura tjuṭa kulu irnyantjaku. Munu panya mina wiru iyalpai anangu wiru palyalpai tjuṭaku munu anangu ngunti palyalpai tjuṭaku kulu.

⁴⁶ Tjinguru nyura anangu kutjupaku mukulyangku wirura palyalku paluru nyurampa wirura palyannyangka kutju. Ka Godanya wanyu nyakula pulkara pukulariku nyurampa? Wiya, panya wati kamantaku mani mantjilpai tjuṭa palu purunypatu nyinanyi munuya ngapartji wirura palyannyangka kutju anangu kutjupaku mukulyangku wirura palyalpai.* Ka nyura uti kutjarakuṭu mukulya nyinama walytja tjuṭaku munu nyuranya kuralpai tjuṭaku kulu.

⁴⁷ Ka nyura walytja tjuṭangka kutju wirkara pukultu wangkanyangka nyakula wanyu Godanya nyurampa pukulariku? Wiya, anangu Godaku ngurpa tjuṭangku kuluya walytja kutjupa tjuṭangka wirura wangkapai. Ka nyura uti kutjarakuṭu nyakula pukularima walytja tjuṭaku munu walytja wiya tjuṭaku kulu.

⁴⁸ Uwa, nyura uti palya mulapa nyinama, panya nyurampa Mama Ilkaritjanya palya mulapa nyinanyi, palu purunypa."

6

Ngaltutjara Tjuṭa Ngaltunytjungku Ungkunyjtjaku

¹ "Nyura Godanya tjuṭarurungku walkuntjikitjangku kutjupa kutjupa tjuṭa palyalpai, panya nyura palula tjaṭilpai, munu ngaltutjara tjuṭa mani ungkupai, munu mai wantira nyinapai palunya kulintjikitja. Palu kutjupa tjuṭangku nyanga palunya tjananya palyalpai anangu tjuṭangka mirangka nyakula tjananya mirawaninytjaku. Ka nyura tjuṭangka mirangka palyalwiyangku wantima, panya alatji palyannyangka nyurampa mama ilkaritjangku nyakula nyuranya ngapartji wiru ungunytja wiyangku wantiku.

² "Kaya ngaltutjara tjuṭa ungunytjikitja mukuringkulampa anangu tjuṭangka mirangka ungunytja wiyangku wantima. Panya wati ngunti palya-palku kanany-kananypa nyinapai tjuṭangku ungkupai wali inmatja tjuṭangka anangu tjuṭangka mirangka nyakula tjananya mukulya-palku mirawaninytjaku.

"Munuya palu purunypatu iwarangka ankula anangu ngaltutjara tjuṭa nyakula ungkupai tjuṭangka mirangka kutju anangu tjuṭangku nyakula tjananya mukulya kulintjaku. Kana nyurala tjuṭarurungku wangkanyi, panya palunya tjananya Godalu nyakula mirawaninytja wiyangku wantiku, panya alatjituya anangu tjuṭangku tjananya nyakula mirawaningi.

³ Ka nyura ngaltutjara tjuṭa ungunytjikitja mukuringkulampa tjananya kampangkatu ungama kutjupa uwankarangku nyakula kulintjaku-tawara.

⁴ Uwa, nyura ungunytja uti kampangkatu alatjitu ngarama. Panya Mamanya kutju nyurampa ninti nyinanyi nyura panya kumpilpa

* 5:46 Wati nyanga paluru tjana anangu Jew tjuṭa, palu tjana wati nyara Rome-aku mayatjaku wararingi, munuya anangu Jew tjuṭangka tax mani mantjiningi mayatja panya palulakutu iyantjikitjangku. Kaya Jew tjuṭa palumpa tjanampa kuraringkupai warka nyanga palunya mayatja panya Jew wiyaku palyannyangka.

ungkunytjitjaku, munu paluru nyakunytjatjanungku nyuranya ngapartji wiru ungkuku.

Godala Tjukururungku Tjapintjaku

(Luke-aku 11:2-4)

⁵ “Kaya Godala tjapirampa wati ngunti palya-palku kanany-kanany pa nyinapai tjuṭa arkalwiyangku wantima panya paluru tjanaya mukuringkupai wali inmatja tjuṭangka ngarala Godala tjapintjikitja anangu tjuṭangku nyakula tjananya mirawaninytjaku. Munuya palu purunytjuṭu iwarangka itingka kulu ngarala tjapilpai anangu tjuṭangka mirangka tjana nyakula tjananya wiru kulintjaku. Kana nyurala tjukururungku wangkanyi, panya palunya tjananya Godalu nyakula mirawaninytja wiyangku wantiku, panya alatjituṭya anangu tjuṭangku tjananya nyakula mirawaningi.

⁶ Ka nyura Mama Godala tjapintjikitja mukuringkulampa nyurampa ngura walytjangka tjarpara tuwa patira kutjungku kumpiltu nyinara palula tjapinma. Panya Mamanya kutju nyurampa ninti nyinanyi nyura panya kumpilpa tjapintjitjaku munu paluru nyuranya nyakunytjatjanungku ngapartji wiru mulapa ungkuku.

⁷ “Uwa, nyura Godala tjapirampa anangu Godaku ngurpa tjuṭa purunytju wangkanytja wiyangku wantima. Panya paluru tjana tjanampa god tjuṭangka tjapira tjukurpa palunyaṭu palunyaṭu rawangku wangkapai alatji kulira, ‘Tjukurpa palunyaṭu palunyaṭu rawangku wangkara tjapinnyangka kutju nganampa godangku nganananya kulira ungkupai.’

⁸ Ka nyura palunya tjananya arkalwiyangku wantima paluru tjana purunypa rawangku tjapintjaku-tawara, panya nyurampa Mama ninti nyinanyi nyura mukuringkunytjitjaku munu nintingku alatjiṭu nyuranya kulini nyura kutjupa kutjupaku mukuringkula palula tjapinyangka.

⁹ Palulanguru nyura palula tjapirampa uti alatjingara wangkama, ‘Mama God ilkaritja! Nyuntun pulka mulapa nyinanyi uwankarangka waintarinytja.

¹⁰ Nintinmalanya nyuntunya tjukururungku walkuntjaku anangu uwankarangu.

Munulanya nyuntu mayatjangu uwankara walytjanmara kanyinma nyuntumpa walytja mulapa nyinanytjaku.

Nintinmalanya nyuntula wanganarangu kulintjaku anangu uwankarangu, panya angelpa tjuṭangku nyuntula ilkarangka kulilpai, palu purunypa.

¹¹ Kuwarilanya ungama mai kuka kulu kuwariku nganaṇa ngalkula palṭja nyinanytjaku.

¹² Palu nganaṇa nyuntunya kurannyangkampa nganananya kaly-pangku wantima pungkunytja wiyangku.

Panya kutjupangu nganananya kurannyangkampa nganaṇa palunya kaly-pangku wantipai, palu purunypa nganampa kaly-paringama.

¹³ Anga-kanyinmalanya nganaṇa ngunti mukuringkula kura palyantjaku-tawara.

Munulanya palu purunypaṭu mamungka-tawara atunymara kanyinma.’

Alatjiya tjaminma Mamala.

¹⁴ Tjinguru anangu kutjupangu nyuntunya kurannyangkampa nyuntu kalypangu kurantja wiyangu wantiku, ka palu purunytju tu nyuntu Mama Ilkaritjanya kurannyangkampa paluru nyuntunya kalypangu tu wantiku.

¹⁵ Palu nyuntu tjinguru anangu palumpa kalyparingkuntja wiyangu wantinyangkampa Mamalu palu purunytju tu nyuntumpa kalyparingkuntja wiyangu wantiku.

Godanya Walkuntjikitjangu Mai Wantira Nyinanytja

¹⁶ “Ka tjinguru nyura kutjupa-ara mai wantira nyinaku Godanya walkuntjikitja. Palu alatji palyaraya wati panya ngunti palyapalku kanany-kananya nyinapai tju ta arkantja wiyangu wantima. Panya paluru tjanaya mukuringkupai anangu tju tangu tjananya mai wantinyangka nyakula kulira mirawaninytjaku. Munuyanku yunpa tjunpangka nyitira para-kurakuralpai munuya ngunti tjituru-tjituru pulka-palku para-ngarapai anangu tju tangu tjananya nyakula kulintjaku, ‘Munta-uwa, mulapa nyangantu wiru tju tangu mai ngalkuwiyangu wantinyi Godanya walkuntjikitjangu.’ Palu ngayulu nyurala tju karurungku wangkanyi, panya palunya tjananya Godalu nyakula mirawaninytja wiyangu wantiku, panya alatji tju anangu tju tangu tjananya nyakula mirawaningi.

¹⁷ Palu nyura mai wantira nyinanytjikitja mukuringkulampa nyuranku mangka wirunma munuya yunpa minangka paltjinma.

¹⁸ Kaya kutjupa tju tangu nyuranya nyakula pu tu kulilku nyura mai ngalkuwiya nyinanyangka. Palu Mamanya kutju nyurampa ninti nyinaku nyura panya kumpilpa palyantjijtaku muni paluru nyuranya nyakunytjatjanungku ngapartji wiru ungkuku.

Mani Muni Mantatja Kutjupa Kutjupa Tju ta Wantira Godanya Waintara Kulintjaku

(Luke-aku 12:33-34; 16:13)

¹⁹ “Tjinguru nyura mantangka nyanga nyinara kutjupa kutjupa wiru tju ta mantjira utulura kanyini pukulpa nyinanytjikitjangu. Palu wantima alatji manyungku mantjira kanyintja wiyangu, panya akulyungku punu mantara kutjupa kutjupa tju ta ngalkula wiyalpai, ka ayana rawa ngarira ngarira arkalytjararingkula wiyaringkupai. Ka anangu kutitjungkupaingku pitjala wali katantara tjarpara kutjupa kutjupa wiru tju ta kutitjungkupai.

²⁰ Palu uti nyura mantangka nyanga nyinara waintara kulinma ngura panya ilkaritja, munuya Mayatja Godaku mulamularingkula palumpa wara titutjarangu palyanma, ka nyura rawangu palyalkatinyangka Godalu ngura nyara ilkaritjanga nyurampa kutjupa kutjupa wiru tju ta tjunkula wantiku. Ka paluru tjana palya titutjara ngaraku nyuntumpa patara, panya ngura nyara palula uwankara pu tu arkalytjararingkupai, ka akulyu tju ta ngaranytja wiya nyarangka tjananya ngalkula wiyantjikitja, ka wati kutitjungkupai kulunyananytja wiya nyarangka tjarpara kutitjungkunytjikitja.

²¹ Uwa, uti nyura ilkaritja tju taku kutju pulkara mukuringama. Tjinguru nyura mantatja tju taku pulkara mukuringkulampa nyura palunya tjananya kutju rawangu kulilku Godanya wantira. Palu

nyura ilkaritja tjuṭaku kurunpa winki mukuringkulampa nyura mantatja tjuṭa wantira waintara ilkaritja tjuṭa kutju rawangku kulilku munu Godala kutju wanganarangku kulintjikitja mukuringkuku.

22 “Panya anangu tjuṭa titutjarangku munytjangku ungkuyangkampa nyurala unngu waru tili purunypa ngaraku, panya Godalu nyuranya tili purunytju nintilku nyura tjukaruru palyanyku nyinanytjaku.

23 Palu tjinguru nyura manyungku kanyira ngaltutjara tjuṭa munytjangku ungkunyta wiyangku wantirampa, ka nyurala unngu mungawaluru purunypa ngaranyi munu nyuranya puntu winki kuralku. Pala palula-tawara nyura uti manyuringkuwiya munytja nyinama.

24 “Panya anangu kutju mayatja kutjarangka puṭu warakaripai. Paluru tjinguru kutjunga wanganarangku kulilku munu kutjupangka kulintja wiyangku wantira tungunpungkuku. Munu tjinguru kutjuku pulkara mukuringkula kutjupaku puṭu mukuringkula palumpa kuraringkuku. Ka pala palu purunypa nyura tjinguru maniku mukuringkulampa Godaku puṭu mukuringkuku. Panya nyura puṭu kutjara tjungura kulini Godanya munu mani kulu. Palu uti nyura Godanya kutju pulkara kulinma munu mani wantima.

Iluru-ilururinytja Wiya Nyinanytjaku

(Luke-aku 12:22-31)

25 “Tjinguru nyura kutjupa-ara tjituru-tjitururipai alatji kulira, ‘Mailanku yaaltjinguru mantjilku ngalkula paltja nyinanytjikitjangku, munula mantara kulu yaaltjinguru mantjilku tjarpara unytjunpa nyinanytjikitjangku?’ Palu ngayulu nyurala wangkanyi nyanga alatji kuliraya tjituru-tjitururinytja wiyangku wantima! Panya Godalulanya wanka nyinanytjaku palyanu mai kutju pulkara kulintjaku wiya, munulanya puntu wiru palyanu mantara kutju pulkara kulintjaku wiya, palu palunya waintara kulintjaku.

26 “Wanyuya tjulpu tjuṭa nyawa munuya kulinma panya paluru tjanaya ukiri kaanangka pakaltjingalpai wiya munuya mai kururingkunyangka mantjira utulura walingka ngulaku tjunkupai wiyatu, panya Mama God Ilkaritjalu tjananya titutjarangku paltjalpai tjiṅtu winki. Kaya kulinma panya nyura tjulpu tjuṭa purunypa wiya anangu pulka tjuṭa nyinanyi, ka panya Godanya nyurampa pulkara mulapa mukuringanyi tjulpu tjuṭangka mun kara.

27 “Palulanguruya maiku puṭu kulira tjituru-tjitururinytja wiyangku wantima, panya nyura tjituru-tjituru nyinarampa puṭu yiya tjuṭa maraṅi mantangka nyanga rawa wanka nyinanytjikitjangku.

28 “Munu nyura nyaaku mantara-tjiratja tjituru-tjitururinyi? Kulinmaya wanyu inuntji panya ilytjingka pakantja tjuṭa, panya paluru tjana wiru mulapa ngaranyi, palu tjananku warakarira mantara walytjangku palyara tjarpapai wiya alatjitu.

29 Panya Tjalamannga mayatja pulka iriti nyinara mantara wiru tjuṭangka tjarpapai, palu palumpa wiru tjuṭangka mun kara mulapa inuntji panya ilytjingka pakantja tjuṭa ngaranyi.

30 Ka nyura nyaaku mantara-tjiratja tjituru-tjitururinyi Godaku puṭu mulamularingkula? Panya Godalu alatjitu ukiri tjuṭa inuntjingka wirulpai, palu ukiri paluru tjana tjiṅtu mankurpa nguwanpa ngarala

piltiringkupai, ka tjananya warungku kampara wiyalpai. Kaya nyara palulanguru kulinma, panya Godalu ukiri tjuṭa rawangku inuntjingka wirulpai unytju ngarala wiyaringkunyjtaku, munu paluru nyuranya wantinytja wiyangku pulkara atunymankuku ukiringka munkara mulapa, panya nyura titutjara nyinapai ukiri purunypa wiya. Nyara palulanguru paluru nyurampa watarkurinytja wiya, munu nyuranya mantara tjuṭa ungkuku tjarpanytjaku.

³¹ “Ka palulanguru nyura alatji kulilwiyangku wantima, ‘Yaaltjingurula mantjira ngalkuku? Yaaltjingurula mantjira tjikilku? Yaaltjingurula mantara mantjira tjarpara unytjunariku?’

³² Nyanga alatjiya Godaku ngurpa tjuṭangku rawangku kulilpai mantjintjikitjangku. Palu Mama God Ilkaritjanya ninti nyinanyi nyura pala mukuringkunyjtija uwankaraku.

³³ Kaya kutjupa kutjupa tjuṭa-tjiratjangku tjituru-tjitururira puṭu kuli-kulintja wiyangku wantima, munuya palunya kutju rawangku kulinma paluru nyuranya mayatjangku kanyinnyangka pukulmankunyjtikitjangku, munuya paluru wangkanytja uwankara wanganarangku kulira tjukarurungku palyanma. Ka paluru nyuranya ungkuku mai, mantara, munu kutjupa kutjupa tjuṭa kulukuḷu nyura mukuringkunyangka.

³⁴ Munuya mungawinki mantjintjikitjangku kuḷu kulintja wiyangku wantima, ‘Yaaltjingurulanku mantjilku?’ Panya nyara palularangkaṭu Godalu nyuranya ungkuku, ka nyura palulanguru tjintju munkaritjaku pulkara tjituru-tjitururira puṭu kuli-kulintja wiyangku wantima, munuya tjintju nyanga kuwari mantjintjikitjangku kutju kulinma.”

7

Aṅangu Kutjupa Kuranmankuwiyangku Wantinytjaku

(Luke-aku 6:37-38,41-42)

¹ “Nyura uti aṅangu kutjupa tjuṭa wangkara kuranmankunyitja wiyangku wantima nyuranya kuḷu kuranmankunyitjaku-tawara.

² Panya nyura aṅangu kutjupa tjuṭa wangkara kuranmankunyangkampa Godalu palu purunytjuṭu nyuranya kuranmankuku. Palu nyura aṅangu tjuṭa wangkara pukulmankunyangka Godalu palu purunytjuṭu nyuranya pukulmankuku.

³⁻⁵ “Palu nyaaku nyura aṅangu kutjupa tjuṭa wangkara kuranmankupai? Tjinguru nyura nyanganyi Godaku walytja kutjupaku kurungka punu tjilpirpa tjukutjuku ngarinyangka. Palu nyurampa kurungka tjinguru punu pulka ngarinyi. Ka nyura kuru palyangku-palku wangkaku palula alatji, ‘Wanyu kaṅanta punu pala tjilpirpa tjukutjuku mantjira wani.’ Palu wiya, nyura ngunti kuru palyangku-palku kaṅany-kaṅanytju watarku wangkanyi. Uti nyura nyurampa kurunguru-warara punu pala pulkanya mantjira wanima munu palulanguru kuru palyaringkula utilta nyakuku aṅangu nyara kutjupaku kurunguru tjilpirpa tjukutjuku mantjira waninytjikitjangku.” Alatji Jesulu tjanala wangkangi tjana kura walytjangku-warara tjukarurungku ngurkantankunyitjaku munu palulanguru kutju aṅangu Godaku walytja kutjupa kura nyakula wangkanytjaku.

6 Munu piruku wangkangu, "Tjukurpa Palya Godaku wiru mulapa ngaranya milmilpa alatjitu. Ka kutjupa-ara nyuntu tjukurpa nyanga palunya wangkanyangka anangu kutjupa tjutangu kulira wantipai. Kaya wantinyangka piruku tjanala wangkanytja wiyangku wantima. Panya anangu nyara paluru tjana papa pikati tjuta purunypa munu tjinguru pikipiki tjuta purunypa. Panya nyura tjanala Tjukurpa Palya rawangku wangkanyangka tjana pina pati alatjitu nyinanyi kulintja wiya munuya nyurampa pikaringkuku, panya papa pikatingku anangu patjalpai, palu purunypa. Munuya tjukurpa nyura wangkanytja kurakuralku, panya pikipiki tjutangu mai ungunyangka tjinangku kantura tjulpirta tjarpatjunkupai, palu purunypa tjana tjukurpa kurakuralku. Palulanguru nyura uti tjanala Godaku tjukurpa wiru tjuta rawangku wangkanytja wiyangku wantima, panya tjukurpa paluru milmilpa."

*Godala Rawangku Tjapintjaku Wantinytja Wiyangku
(Luke-aku 11:9-13)*

7-8 Munu palulanguru Jesulu tjananya Godala tjapintjaku wangkara nintiningi alatji, "Rawangkuya Godala ngatjinma nyura mukuringkunyjtjaku, ka nyuranya ungu. Munuya Godala rawangku tjapinma nyuranya tjukurpa palumpa nintintjaku, ka paluru nyuranya nintilku. Uwa, rawangkuya Godala tjapinma, panya anangungku tuwa pati ngaranyangka rawangku pungku-pungkupai pakara alpamilantjaku, palu purunypa. Ka Godalu nyuranya kulilku, panya anangungku wali unngu nyinara tuwa pungku-pungkuyangka kulira alara unguapai, palu purunypa Godalu rawangku tjapinnyangka kulira unguapai munu nintilpai munu alpamilalpai wantinytja wiyangku.

9 "Wati mamangku wanyu katjangku maiku ngatjinnyangka apu unguapai?

10 Munu wanyu antipinaku ngatjinnyangka palunya liru unguapai?

11 Wiya, nyura panya kura tjutangu nintingu tjtji nyurampa wiru tjuta kutju unguapai ngatjinnyangka. Kaya palulanguru wanyu Mama Ilkaritjanya kulinma, paluru nyaa purunypa nyinanyi? Panya paluru wiru mulapa nyurala waintara alatjitu, munu paluru intjanungku wiru mulapalta unguapai nyura palula ngatjinnyangka.

12 "Uwa, panya nyura mukuringanyi anangu kutjupa tjutangu nyurampa wirura palyantjaku. Ka uti nyura alatjitu tjanampa palu purunypatu mukulyangku wirura palyanma wantinytja wiyangku. Panya ara nyanga palunya Moselu tjana wangkatjara kutjupa tjutangu kulu iriti wangkangi.

*Iwara Utju Ngurira Nyakula Wanantjaku
(Luke-aku 13:24)*

13-14 "Kulilaya! Iwara kutjara ngaranya anangu tjuta ankunytjaku. Kutju lipi kaita lipitjara, ka kutjupa utju kaita utjutjara. Ka panya iwara lipi karalypa wiru ngaranya, kaya nyara palulawanu anangu tjuta mulapa ankupai kaita lipiwanu tjarpara. Palu iwara nyara paluru ma-ngaranyi ngura kurakutu Godalanguru mauntalpa tjituru-tjituru titutjara nyinanytjaku. Ka iwara panya utju karalypa wiya wituwitu ngaranya, kaya iwara palunya anangu mankurtu kutju ngurira nyakula wanalpai kaita utjuwanu tjarpara. Palu iwara nyara paluru ma-ngaranyi ngura wirukutu Godala tjunguringkula pukulpa

tiūtutjara nyinanytjaku. Ka nyura uti kaita utjuwanu ma-tjarpara iwara pala utjungka anama.

Punu Maitjaranguru Ngurkantankunytja
(Luke-aku 6:43-45)

¹⁵ “Ngulu nyangamayanku wangkatjara ngunti tjuṭa, panya paluru tjanaya ngunti wiru-palku para-ngarapai tjiipi tjuṭa purunypa. Palu paluru tjana unngu mirpantju alatjitu tjitutja inura purunypa, munuya Godaku walytja tjuṭa kurantjikitjangku ngunti wangkapai.

¹⁶ Ka nyura palunya tjananya ngurkantankuku tjanampa war kanguru, tjana palyantjitjanguru, panya nyanga palu purunypa tjuṭa anangu palya tjuṭangku palyalpai wiya, kura tjuṭangku kutju palyalpai. Kulinmaya mai tjuṭanguru, panya mai kiripitji tjuṭa punu tjilka-tjilangka pakalpai wiya, ka mai ili tjuṭa punu tjilkaangka pakalpai wiyatu. Ka palu purunypa ngunti wangkapai tjuṭangku war ka wiru puṭu palyani.

¹⁷⁻¹⁸ Panya punu palyangka kutju mai wiru tjuṭa pakara pulkaringkupai mayu palyatjara, palu punu kurakurangka mai kura tjuṭa kutju pakalpai mayu kurakura. Ka palu purunypa punu palyangka mai kura tjuṭa pakalpai wiya, ka punu kurakurangka mai wiru tjuṭa pakalpai wiyatu. Kaya ara nyanga palulanguru kulira nintiringama panya wangkatjara palya tjuṭangku tjukarurungku kutju wangkapai, ka wangkatjara ngunti tjuṭangku anangu tjuṭa ngunti kuralpai. Ka palulanguru nyura wangkatjara kutjupa nyakula paluru wangkara palyantjitjanguru ngurkantankuku kura palumpa.

¹⁹ Panya wati kaana walytjangku punu mai kuratjara ngaranyangka nyakula katara warangka wanipai, palu purunypa Godalu wangkatjara ngunti tjuṭa rawangku wangkara ngunti kurannyangka paira iyalku warukutu.

²⁰ Uwa, nyura wangkatjara kutjupangku ngunti wangkara palyan-nyangka nyakula palunya tjukarurungku ngurkantankuku kulira, ‘Nyangatja Godalu iyantja wiya.’

*Tjintu Malatjangka Jesunya Anangu Kutjupataraku Ngurpar-
ingkunytja*

(Luke-aku 13:25-27)

²¹ “Kulilaya! Panya anangu tjuṭangkuniya mayatjanmankupai. Palu kutjupa tjarangkuniya unytjungku kutju mayatjanmankupai munuya Godalu wangkanytjitja uwankara tjana wanganarangku kulira palyalpai wiya. Ka nyara palulanguru Godalu tjananya puṭu walytjanmara mayatjangku kanyilku. Palu tjana Mama Ilkaritjanya mukuringkunytja tjuṭa wanganarangku kulinyangka kutju paluru tjananya walytjanmara kanyilku.

²² Panya tjintu malatjangka anangu panya tjuṭangku ngayunya mayatjanmara alatji wangkaku, ‘Mayatja! Nganana nyuntunya ini wangkara tjukurpa nyuntumpa tjakultjungkupai anangu tjuṭangka, munula palu purunypatu anangu tjuṭanguru mamu tjuṭa paira iyalpai nyuntunya ini wangkara, munula pirukutu nyuntunya ini wangkara miracle kutjupa kutjupa tjuṭa witulyangku palyalpai.’

²³ Alatjiya ngayula wangkaku kana tjanala ngapartji wangkaku, ‘Wiya, ngayulu nyurampa ngurpa alatjitu. Nyura panya rawangku

kura tjuṭa palyalkatipai Godala tungunpungkula. Araya ngayulan-guru!’

Tjukurpa Wali Palyalpai Kutjaratjara

(Luke-aku 6:47-49)

²⁴ “Kulilaya! Anangungku ngayulu wangkanytjitja kulintjatjanungku wanganarangku kulira palyarampa paluru wati panya wali puli walungka palyantjanya purunypa nyinanyi. Panya wati paluru nintingu wali palyantjikitjangku walu pulka ngurkantanu munu puli nyara palula purkarangku wali palyanu kunpu pulka ngaranytjaku.

²⁵ Ka ngula mina pulkangku pitjala puyiningi, ka karungka uru pulka ukalingkula lipiringu munu ilytjiwanu ukalingangi. Ka walpa pulkangku wali panya palunya pulkara untuningi, palu pilukatinytja wiya alatjitu ngarangi, panya wali nyanga palunya puli walungka palyanu, ka witu alatjitu ngarangi urinytja wiya. Ka palu purunypa nyura ngayuku tjukurpa kulintjatjanungku wanganarangku kulira palyarampa punkantja wiya kunpu ngaraku tjituru-tjituru kutjupa kutjupa nyurala wirkankunyangka.

²⁶ “Palu anangungku ngayulu wangkanytjitja kulira wantirampa paluru wati panya wali palyalpai kutjupa purunypa nyinanyi, panya wati paluru kawakawangku wali palyantjikitjangku manta tjula ngurkantanu karungka itingka munu manta pala palula warpungkula wali palyanu tartjangka.

²⁷ Ka ngula mina pulkangku pitjala puyiningi, ka karungka uru pulka ukalingkula lipiringu munu ilytjiwanu ukalingangi. Ka walpa pulkangku wali panya palunya pulkara untuningi, ka mapalku punkara pilukatingu munu uwankara alatjitu wiyaringu. Ka palu purunypa nyura ngayuku tjukurpa kulintjatjanungku wanganarangku kulintja wiyangku wantirampa nyura putu kunpu ngaraku munu tjituru-tjituru kutjupa kutjupa nyurala wirkankunyangka nyura punkalku. Kaya ara nyanga palula pulalanguru kulinma munuya ngayuku tjukurpa wanganarangku kulira palyanma alatjitu ngula kutjupa kutjupa tjuṭa nyurala utiringkunyangka kunpu ngaranytjikitjangku.”

²⁸ Ka Jesulu tjukurpa nyanganpa wangkara wiyaringkunyangka anangu tjuṭangku kulira nguwanwuringu munuya kuliningi, “Ai, wati nyangangku munkara alatjitu wangkapai tjukurpa pulka mulapa.”

²⁹ Panya paluru Godalu nintinnyangka tjanala wangkangi nintingu alatjitu, wati panya Moseku tjukurpa nintilpai tjuṭangku purunypa wiya.

8

Jesulu Wati Pikatjara Palyarunguntja

(Markaku 1:40-45; Luke-aku 5:12-16)

¹ Ka Jesulu apu paṅtangka tjukurpa tjuṭa wangkara wiyaringkula ukalingu, kaya anangu tjuṭa mulatu palunya wananu.

² Ka palulakutu wati kutju miri pikatjara pitjangu, panya pika nyara paluru kura pulka wiyaringkunytja wiya titutjara ngarapai. Munu paluru pitjala palula kuranyu tultjungarakatira alatji wangkara ngatjinu, “Mayatja nyuntu mukuringkulampaṇi pika nyangatja palyanma wirungku.”

³ Ka Jesulu marangku pampura wangkangu, “Uwa, ngayulu mukuringanyi nyuntu palyaringkunyjtaku.” Munu palulanguru wangkangu, “Palyariwa!” Ka mapalku pika panya wiyaringkula miri winki palyaringu.

⁴ Ka Jesulu wangkangu palula, “Kulila, anangu kutjupa tjutangka wangkawiyanku wantima nyuntu nyanga palyaringkunyjtatjanungku. Palu timpulakutu ankulanku nintila wati tjukurtjarangka, kanta paluru miri pala palyaringkunyjtja nyakula palyanmara. Ka palula malangka wati panya palunya tjulpu kutjara uwa Godanya ungkunyjtaku, panya iriti Moselu wangkangu miri palyaringkunyjtatjanungku alatjingantjaku. Kaya nyuntu ungkunyangka nyakula anangu tjutanku kulilku, ‘Munta-uwa, nyanganku mulapa palyaringkunyjtatjanungku unganyi.’” Alatji Jesulu wati panya palunya wangkara wituṅu.

Jesulu Wati Tjaultjiku Waraka Palyarunguntja.

(Luke-aku 7:1-10; Johnku 4:43-54)

⁵ Ka Jesunya ngura panya Kapunimala tjarpanyangka wati tjaultji kuranyitja palulakutu pitjangu. Wati panya paluru Rome-anya ngurara munu paluru tjaultji panya Rome-anya ngurara kutjupa tjuta nampa 100 mayatjangku kanyilpai ngura nyara Kapunimala. Munu paluru Jesula alatji wangkara ngatjinu,

⁶ “Mayatja ngayuku wati warakaripai pika pulka ngarinyi ngurangka urinytja wiya tiwilpa alatjitu putu pakara.”

⁷ Ka Jesulu palula wangkangu, “Uwa palya! Kuwarituṅa ma-pitjala palunya palyarungulku.”

⁸ Ka wati panya tjaultji tjutaku mayatjangku wangkangu, “Wiya Mayatja, nyuntu pulka kana ngayulu wati tjukutjuku munuṅa wiya nguwanpa ngaranyi nyuntu ngayuku walingka pitjala tjarpanytjaku. Nyuntu uti nyanganguru wangkama, ka paluru palyaringama nyuntu mayatjangku nyanga paṅunguru wangkanyangka.

⁹ Panya ngayulu ninti nyuntu Godaku warakaripai munu panyan paluru witunnyangka wanganarangku kulira palyalpai. Ka ngayulu palu purunypatu Rome-aku mayatjangku witunnyangka wanganarangku kulira palyalpai. Munuṅa ngayulu ngapartji mayatjangkuṅu tjaultji tjuta wangkara witulpai, kaya ngayula wanganarangku kulilpai. Panya ngayulu tjananya altipai, kaya mapalku pitjapai. Munuṅa tjananya wangkapai palyantjaku, kaya mapalku palyalpai wangka kutju kulira ngayulu witunnyangka. Ka panya nyuntu palu purunypa mayatjatu nyinanyi, kana kulini nyuntu nyanganguru wangkanyangka wati panya paluru palyaringkuku.”

¹⁰ Ka Jesulu nyangatja kulira nguwanringu munu anangu tjutangka wangkangi, “Tjukururungkuṅa nyurala wangkanyi, panya wati nyanga tjaultji tjutaku mayatja Jew wiya, munu paluru ngayuku mulamularinganyi pulkara alatjitu anangu Jew tjuta purunypa wiya. Panya ngura nyanga Israelta ngayulu Jew kutjupa wati nyangatja purunypa pulkara mulamularingkunyangka nyakunyjtja wiyatu.

¹¹ Tjukururungkuṅa nyurala wangkanyi, panya ngura uwankarangeruya anangu Jew wiya tjuta pitjaku kakarangeruru munu wilurarangeru kulu. Munuya paluru tjana pitjala Aipuramala, Isaacala, Jacobala tjanala tjunguringkula nyinaku Godaku walytja

kutjupa tjuṭangka kulu, munuya mai panya pulka pukuṭtu alatjitu tjungungku ngalkuku Godalu palunya tjananya uwankara mayatjangu kanyinnyangka.

¹² Palu panya anangu Jew kutjupajara tjanala tjunguringkunyitja wiya ngaraku. Panya Godalu tjananya iriti ngurkantanu palumpa walytja nyinanytjaku, palu tjana wantinyangka paluru tjananya paira iyalku ngura kurakutu, kaya ngura nyara palula mungawaluru pulkangka pika pulkatjara nyinara titutjara ulaku.”

¹³ Munu palulanguru Jesulu piruku wati panya tjaultji tjuṭaku mayatjanga wangkangu, “Palya, ngurakutu ma-pitja! Panya nyuntu mulamularingu wati panya nyuntumpa warṅka ngayulu palyarunguntjaku, kaṅa wati palunya kuwari palyanu.” Ka nyara palula ara alatjitu wati panya palumpa warṅka mapalku palyaringu Jesulu paṭunguru wangkanyangka.

Jesulu Pikatjara Tjuṭa Palyarunguntja
(Markaku 1:29-34; Luke-aku 4:38-41)

¹⁴ Ka Jesunya Peterku ngurakutu anu munu walangka tjarpara nyangu Peterku umari waruringkula pikatjara ngarinyangka.

¹⁵ Munu minyama palunya mara pampunu, ka mapalku alatjitu pika panya waru wiyaringu. Munu minyama paluru palyaringkula pakaṅu munu mai palyara Jesunya tjananya ungu ngalkuntjaku.

¹⁶ Ka tjiṅtu ma-tjarpanyangka anangu tjuṭangu Jesulakutu katingi anangu mamutjara tjuṭa pikatjara tjuṭa kulu.* Ka paluru wangkara mamu tjuṭa painingi anangu panya tjuṭanguru munu pikatjara panya tjuṭa kulu palyarunguningi.

¹⁷ Panya ara nyanga Jesulu anangu tjuṭa palyarunguntja Godalu nganmanytju wangkangu wangkatjara ini Aitjayala, ka panya nyiringka iriti walkatjunu nyanga alatji,

“Nyara paluru nganananya ngalkira nganampa pika tjuṭa mantjinu munulanya wankarunu.” *

Wati Kutjarangku Jesunya Wanantjikitjangku Kulintja
(Luke-aku 9:57-62)

¹⁸ Ka Jesulu anangu tjuṭa mulararinyangka nyakula palumpa nintintja tjuṭangka wangkangu, “Wanyula urangka munṅara pautangka tatira ma-itipiri nyara manta kutjupakutu!”

¹⁹ Ka ankunytjikitjangku wangkanyangka wati Moseku tjukurpa nintilpaingku palula pitjala wangkangu, “Nintilpai! Ngayuluna nyuntula tjungu para-pitjalinkunytjikitja mukuringanyi nyuntu ngura tjuṭakutu ankunyangka.”

²⁰ Ka Jesulu palula wangkangu, “Panya tuuka tjuṭaku nyarkalpa tjuṭa ngarinytjaku ngaranyi. Ka tjulpu tjuṭaku manngu tjuṭa ngaranyi tjana ngarinytjaku, palu Watiku Katjaku ngura ngaranytja wiya ngarikatira pakuwiyaringkunyitjaku. Panya ngayulu ngura wiyatjara rawa para-pitjalinkupai.”

²¹ Ka Jesuku nintintja kutjupangku palula wangkangu, “Mayatja! Wanyuni unytjungku wantiriyala, panya ngayuku mama tjilpi mulapa,

* **8:16** Tjaka panya anangu Jew tjuṭa Saturday-ngka nyinara pakuwiyaringkupai para-ngarapai wiya. Palu tjiṅtu tjarpanyangka milmilpa wiyaringkupai anangu tjuṭa para-ngaranytjaku. * **8:17** Aitjayaku 53:4

kana ngula tjtularira pitjala nyuntula tjunguringkula nyuntunya wanalku.”

²² Palu Jesulu palula wangkangu, “Wiya, ngayunya-warara kulinma mununi ngayula tjunguringkula wananma, kaya ngurpa tjtutanku nyuntumpa mama wiyaringkunyaangka tjunutjunkuku.”

Jesulu Walpa Atanmankunytja

(Markaku 4:35-41; Luke-aku 8:22-25)

²³ Munuya palulanguru pautangka tatinu Jesunya palumpa nintintja tjuta kulukulu munuya anu.

²⁴ Ka urungka ngururpa ankunyaangka walpa pulka mapalku pakanu rurku winki munu uru pulkara uritjinganingi, ka uru panya pulkara urira pautangka tjarpangi munu pauta panya palunya nguwanpa tjarura tjarpatjunangi urungka. Palu Jesunya pautangka kunkunpa ngaringi.

²⁵ Kaya palumpa nintintja tjtutanku nguluringkula palunya wankara wangkangu, “Mayatja, pakaralanya nyawa! Kuwarila ilunyi.”

²⁶ Ka Jesulu pakara wangkangu tjanala, “Nyaaku nyura nguluringanyi? Rapa wiyatu nyura?” Munu paluru pakara walpa panya wankara atanmanu munu uru kulu wangkangu tiwilarinytjaku, ka walpa panya atanaringu alatjitu munu uru kulu urinytja wiyaringkula tiwilaringu.

²⁷ Kaya nintintja panya tjtutanku nyakula uwankara nguwanpuringu munuyanku wankara kuliningi, “Wati nyaa nyangatja? Panya walpangku urungku kulu palula wanganarangku kulilpai.”

Jesulu Wati Mamutjara Kutjara Palyarunguntja

(Markaku 5:1-20; Luke-aku 8:26-39)

²⁸ Kaya nyara palula malangka urungka itipirira mantangka mawirkanu kampa kutjupa tawunu ini Katarala itingka. Ka nyara palula itingka wati mamu tjtutatjara kutjara nyinangi miri tjtutaku kulpingka. Kaya anangu tjuta pulampa nguluringkula ngura nyara palulawanu ankupai wiya, panya paluru pula mirpantju pulka mulapa munu pula anangu tjuta pitjanyangka ngulura wataparalpai. Munu pula pauta wirkankunyaangka nyakula Jesulakutu pitjangu.

²⁹ Munu pula mirara wangkangu, “Nyuntu ngalinya nyaantjikitja pitjangu? Ngali nyuntumpa ninti panya nyuntu Godaku Katja. Ngali nyuntunya kuliningi tjintu malatjangka pitjanytjaku-palku, palu pala mapalku pitjangun ngalinya ngura kurakutu paira iyantjikitja.”

³⁰ Ka nyara palula itingka patupatu nguwanpa pikipiki tjtutanku ngarala ukiri ngalkuningi.

³¹ Kaya mamu panya tjtutanku Jesula pulkara ngatjiningi alatji wankara, “Wanyulanya pairampa witula nyara pikipiki tjtutakutu kala palula tjanala tjarpa!”

³² Ka Jesulu tjananya wangkangu, “Palya, araya!” Kaya mulapatu mamu panya tjtutanku wati panya kutjara wantikatira wirtjapakara tjarpangu pikipiki panya tjtutangka. Kaya mamu tjuta tjarpanyangka pikipiki panya winki mulapa puli wararangka tjarukutu wirtjapakara uru ngati pulkangka wala winki tjarpangu munuya uwankara wiyaringu.

³³ Kaya wati panya pikipiki kanyilpai tjutangku nyangatja nyakula tawunukutu wirtjapakanu munuya anangu tjutangka uwankara tjakultjunu wati panya mamutjara kutjara palyarungunyangka tjana nyakunytjatjanungku.

³⁴ Kaya ngura nyara palunya ngurara uwankara anu Jesunya nyakunytjikitja munuya wirkara palunya nyakula ngulungku pulkara wangkangi tjanampa ngura wantikatinytjaku.

9

Jesulu Wati Wawanypa Palyarunguntja

(Markaku 2:1-12; Luke-aku 5:17-26)

¹ Ka palulanguru Jesunya pautangka tatira malaku anu ngura walytjakutu Kapunimalakutu palumpa nintintja tjuta kulu.

² Ka ngura nyara palula wati kutjara kutjarangku tjanampa malpa wati nyumpu wawanypa mantarangka ngaritjura tjatu-tjatungku katura katingu Jesulakutu. Ka Jesulu tjana ngalya-katinyangka nyakula kulinigi, "Nyanga tjana ngayuku mulamularinganyi ngayulu pikatjara nyanga palunya palyarunguntjaku." Munu wati panya pikatjarangka wangkangu, "Wati ngana, nguluringkunytja wiya! Panya Godalu nyuntunya kura tjuta palyantjitjanguru kaly pangku wantinyi pungkunytja wiyangku."

³ Kaya wati Moseku tjukurpa nintilpai tjutangku paluru alatji wangkanyangka kulira unngu kulinigi, "Ai! Tjingurunku nyan-gangku walytjangku Godanya-palku kulini."

⁴ Ka Jesulu nintingku kulinigi tjana unngu kulinnyangka munu wangkangu, "Nyaaku nyura ngayunya unngu kura kulini?"

⁵⁻⁶ Nyura kuwari nyangangi ngayulu wati nyanga palula wangkanyangka munu nyura kutjupa kutjupa nyakunytja wiya. Palulanguru nyura tjinguru kulini ngayunya ngurpa-palku, munu nyura ngayuku mulamularingkunytja wiyangku wantinyi. Palu kuwari nyangana ngayulu wati nyanga nyumpu wawanypa wangkara palyarunguni. Ka nyanga nyura nyakuku kuwari pakannyangka munu nyura palulanguru mulamularingkuku ngayulu panya nganmanytju wangkanytjtjaku, panya ngayulu Watiku Katjangku mantangka nyanga nyinara anangu kutjupa kura tjuta palyantjitjanguru kaly pangku wantinytjaku ngaranyi alatjitu." Munu palulanguru wati panya pikatjarangka piruku wangkangu, "Wati awa, pakaranku mantara pala mantjila munu ngurakutu ara!"

⁷ Ka mulapatu mapalku pakanu munu ngurakutu anu.

⁸ Kaya anangu winkingku ila ngaranytjatjanungku nyakula nguluringangi munuya Godanya mirawanira walkuningi kulira, "Ai! Wati nyangatja mulapa Godalu witulya ungu witulya pulkangku pikatjara palyarunguntjaku."

Jesulu Matthew-nya Altinytja

(Markaku 2:13-17; Luke-aku 5:27-32)

⁹ Munu nyara palulanguru Jesulu ngura panya palunya wantikatira anu munu ankula nyangu wati kamantaku mani mantjilpai iwarangka itingka wali tjukutjukungka nyinanyangka, panya paluru anangu tjuta iwara nyara palulawanu pitjanyangka nyakula tjanalanguru mani mantjilpai Rome-aku panya mayatjaku. Wati nyara paluru panya ini

Matthew-nya, ka Jesulu wangkangu palula alatji, “Pitjalani ngayunya wanala!” Ka Matthew-lu pakara palunya wananu nintintja tjutangka junguringkula.*

¹⁰ Munuya ankula palumpa walingka tjarpara mai ngalkuningi. Kaya mani mantjilpai kutjupa tjuta, munu wati kura palyalpai tjuta kulu palula tjanala junguringu munuya mai ngalkuningi,

¹¹ Kaya Paratji tjutangka palunya tjananya Jesula junguringkula ngalkunyangka nyakula nintintja tjutangka wangkangu, “Ai! Nyaaku wati pala nyurampa nintilpaingku wati pala mani mantjilpai tjutangka munu kura kutjupa tjutangka kulu junguringkula mai ngalkuni? Uti paluru tjanala junguringkuwiyangku wantira wati palya tjutangka kutju junguringama.”

¹² Ka Jesulu tjana kuraringkula wangkanyangka kulinu munu tjanala wangkangu, “Kulilaya! Anangu palya tjuta wanyu ngangkariiku mukuringkupai? Wiya, pikatjara tjuta kutjuya mukuringkupai.

¹³ Wanyu kana tjukurpa nyangatja nyurala tjakultjura, kaya kulira nintiriwa, panya nyiringka iriti walkatjunkunyta ngaranya Godalu wangkanytja alatji,

‘Palya nyura tjinguru kuka pungkula tiliwakara ngayunya ungama, palu nyangaku kuluna pulkara mukuringanyi nyura anangu kutjupa tjutaku ngalturingkula tjananya rawangku alpamilantjaku.

Nyanga alatji palyannyangka nyakulana pulkara pukulariku.’*
 Alatji Godalu iriti wangkangu, kana ngayulu nyanga palunya palyantjikitja mantakutu pitjangu anangu panya Moseku tjukurwanu nyinapai tjuta altinytjikitja wiya, palu anangu nyanga nyura nyakula wantipai tjuta altinytjikitjana pitjangu tjana ngayunya wanara Godala junguringkunyjtaku.”*

*Jesula Tjapira Kulintja Tjukurpa Panya Mai Wantinytja-tjara
 (Markaku 2:18-22; Luke-aku 5:33-39)*

¹⁴ Kaya nyara palula ara Johnku* nintintja tjutanku pitjala Jesula wangkangu, “Nganana munu Paratji tjutanku kulu kutjupa-ara mai ngalkuwiyangku wantipai Godanya walkuntjikitjangku. Kaya nyaaku nyuntumpa nintintja tjutanku titutjarangku mai ngalkuni kutjupa-ara wantinytja wiyangku?”

¹⁵ Ka Jesulu tjanala kampa kutjupara wangkangu alatji, “Wiya, nyura panya Moseku tjukurwanu nyinapai tjuta, palu ngayuku nintintja tjutaya ara kutjupawanu nyinanyi ara kuwaritjangka ngayulu nintintjitjangka, ka ara nyanga paluru pula titutitu ngaranya tjungu wiya. Wanyuya kulila ara panya watingku kuri altinytja, panya

* **9:9** Wati nyanga paluru wati Jew, palu paluru kamanta Rome-anya nguraraku warakaripai, munu anangu Jew tjutangka tax mani mantjilpai Rome-alakutu iyantjikitjangku. Kaya Jew tjuta palumpa kuraringkupai anangu Jew wiya tjutaku warakaringangka. * **9:13** Utjijyaku

6:6 * **9:13** Wati panya Paratji tjuta Moseku tjukurwanu nyinapai munuyanku palulanguru ngunti kulilpai tjana palya mulapa nyinara-palku. Munuya paluru tjana kutjupa tjuta kuranmankupai tjana Moseku tjukurwanu nyinanytja wiyangku wantinyangka. Palu Jesunya pitjangu anangu palunya tjananya altinytjikitja paluru tjana Godala junguringkunyjtaku, panya tjana altinyangka kura nyinanytjatjanungku nintingu kulira piiwiyaringkupai munuya kura wantira palunya wanalpai. Palu panya Paratji tjutangka altinyangka kulira wantipai piiwiyaringkunyta wiyangku, panya paluru tjana kanany-kananytju ngunti kulilpai alatji, “Wiya, nganana palya nyinapai tjuta.” * **9:14** Johnnga wati panyatja, panya anangu tjuta munu Jesunya kulu baptise-katingi, panya paluru.

nyara palula ara kuri altinyangka wati panya palumpa malpa tjuta palula tjunguringkula pulkara pukularipai, tjituru-tjitururinytja wiya alatjitu. Palu ngula wati panya palunya kutjupa tjtutangkku witera katinyangka malpa panya tjuta pulkara tjituru-tjitururiku munuya nyara palulanguru mai wantira nyinaku.*

¹⁶ “Munuya piruku ara kutjupa kulu kulila mantaratjara ngapartji, panya anangungku mantara irititja alaringkunyangka ala angatjunkunytjikitjangku mantara kuwaritjanguru tjukutjuku kataara mantara irititjangka tjungura wakantja wiyangukku wantipai paltjinnyangka katakatinytjaku-tawara. Panya paltjinnyangka mantara panya tjungura wakantjanya tjukutjukuringkupai munu mantara irititja ilara katantankupai, ka ala pulkaringkupai.

¹⁷ “Munuya piruku ara kutjupa kulu kulila palu purunypatu wainaku yakutjatjara. Panya watingku kukaku miringuru yakutja palyalpai waina kuwaritja tjutira kanyintjikitjangku. Palu paluru yakutja irititjangka waina kuwaritja tjutilpai wiya, panya waina kuwaritja tjutinnyangka wainaku panya wita yakutja unngu lipiringkupai, ka miri irititja pilti ngaranytjatjanu tjilpiraralpai, ka waina mantangka tjutira wiyaringkupai. Pala palula-tawara paluru waina kuwaritja yakutja miri kuwaritjangka tjutilpai tjulangka, ka wainaku wita lipiringkunyangka yakutja kulu lipiringkupai tjilpirarantja wiya, ka yakutja munu waina kulu palyalta rawa ngarapai.” Alatji Jesulu tjanala wangkangi tjana palumpa tjukurpa munu Moseku tjukurpa ngunti tjunguntjaku-tawara.

Jesulu Minyma Munu Tjitji Kungka Palyarunguntja.

(Markaku 5:21-43; Luke-aku 8:40-56)

¹⁸ Ka Jesulu palula tjanala wangkanyangka wati kutjupa palula wirkanu wali inmatjaku mayatja. Munu paluru Jesula kuranyu tultjungarakatira palula wangkangu, “Ngayuku untalpa kuwari wiyaringku. Wanyu pitjala nyawa, munu pampura palyarungula ka wankariwa.”

¹⁹ Ka Jesulu pakara wananu wati panya palunya, palumpa nintintja tjtutangkku kulu.

²⁰⁻²¹ Munuya wati panya palumpa ngurakutu anangi, ka ankunyangka minyma kutjupa pika milkalitjara pitjangitu tjanala tjungu anangu tjtutangka ngurur-ngururpa. Panya minyma nyara paluru pika nyara palunyatjara rawa alatjitu nyinangi yiya 12 tjintu winki wiyaringkuntja wiya. Munu paluru Jesulakutu ilaringkula kulinigi, “Wanti kanatju kampangkatu tjanawanungku palumpa mantara pampula mununa tjinguru palyaringkuku.” Munu paluru mulapatu pampunu mantara nyara tjarutja mulapa panya tapulara wakantjanya.

²² Ka Jesulu pinkurarara nyangu palunya munu wangkangu palula, “Minyma ngana! Nyuntu ngayuku mulamularingkunytjatjanun kuwari palyaringku.” Ka mulapatu minyma paluru pika panya mapalku wiyaringkula palyaringku alatjitu.

²³ Ka palulanguru Jesunya anu wati panya palumpa ngurakutu munu wirkara nyangu anangu tjuta pulkara ulara waninyangka munu kutjupa tjtutangkku puura wangkatjingara inma inkanyangka.

* **9:15** Nyanga alatji Jesulu palurunku wangkangi panya ngulaya palumpa mirpantju tjtutangkku palunya witera katingu munuya pungu, kaya palumpa nintintja tjuta pulkara tjituru-tjitururingu munuya mai ngalkuwiya wantira nyinangi.

²⁴ Munu paluru tjananya wangkangu, “Pakaraya ara urilkutu! Tjitji nyangatja ilunytja wiya kunkunpa ngarinyi.” Kaya alatji wangkanyangka kulira Jesunya anara ikaringangi ngunti wangkanyangka-palku.

²⁵ Ka wati panya tjitjiku mamangku tjananya uwankara urilkutu witunu, ka Jesunya tjarpangu tjitji panya ngarinytjitjakutu munu palunya mara witunu, ka tjitji paluru mapalku wankaringkula pakanu.

²⁶ Kaya anangu tjutangku tjitji panya wankaringkunyitja kulintjatjantungku ngura winkingka para-tjakultjunangi.

Wati Kuru Pati Kutjara Kuru Alantja

²⁷ Ka Jesulu ngura nyara palunya wantikatira ma-pakanu, ka iwarangka ankunyangka wati kuru pati kutjarangku palunya wanara rawangku mirara wangkangi alatji, “Davidakun katja! Ngalturiwalimpa!”*

²⁸ Ka Jesunya ngurangka wirkara walingka ma-tjarpangu, ka paluru pula malawanungku wanara tjarpangu, ka Jesulu pulala tjapinu, “Nyupali mulamularinganyi ngayulu kuru alantjaku nyupalinya?” Ka pula wangkangu, “Uwali.”

²⁹ Ka pulanya kuru pampunu munu wangkangu, “Palya, ngayuku mulamularingkunyangkana nyupalinya kuwari kuru alani.”

³⁰ Ka pula mulapatu kuru alaringkula nyangangi. Ka Jesulu pulanya wangkara painu kutjupa tjutangka wangkawiyangku wantinytjaku.

³¹ Palu pula kulilwiyangku wantira ankula ngura tjutangka pukultu para-tjakultjunangi Jesulu panya pulanya palyarunguntja.

Wati Tjaa Pati Alantja

³² Ka pula ma-pakara ankunyangka kutjupangku Jesulakutu Wirkakatingu wati mamutjara, mamungku tjaa patintja.

³³ Ka Jesulu mamu panya palunya painu, ka wati panya paluru tjaa alaringkula wangkapairingu. Kaya anangu tjutangku nyakula nguwanakuringu munuya wangkangu, “Ai! Ngurpangkula kuwari kutju nyanga purunypa nyanganyi, panya ngura nyanga nyanga Israelta nganaña nganmanyitju nyanga purunypa nyakunytja wiyatu.”

³⁴ Palu wati Paratji tjutangkuya wangkangu, “Wiya, mamu tjutaku mayatjangku palunya witulyankunyangka palangku mamu tjuta paini anangu tjutanguru.”

Jesunya Anangu Tjutaku Ngalturingkunyitja

³⁵ Uwa, Jesunya ngura winkingka para-ngarangi ngura tjukutjuku tjutangka munu pulka tjutangka kulu, munu paluru wali inmatja tjutangka tjarpura anangu tjutangka wangkara nintiningi, munu tjukurpa palya tjakultjunangi panya Godalu anangu tjuta mayatjangku walytjanmara kanyintja. Munu ngura winkingka pikatjara tjuta kulu palyarunguningi pika kutjupa kutjupa tjutatjara.

³⁶ Munu paluru anangu winki nyakula tjanampa pulkara ngalturingu, panya putuya kuliningi munuya tjiipi kawalirinytja tjuta purunypa watarku para-para-ngarangi tjapatangku tjananya atunymankunytja wiya.

* **9:27** Nyangatja paluru Jesunya Davidaku katjanmanu panya paluru kuliningi Jesunya Godalu kalkuntjanya Davidaku tjamu malatja ngula pitjanytjaku.

³⁷ Ka Jesulu anangu tjutaku ngalturingkula palumpa nintintja tjutangka wangkangu, "Awa! Anangu mungilyi mulapa nyangatja watarku nyinara-waninyi Godaku walytjaringkungnyitjikitja patara, palu anangu Godaku warakaripai mankurpa kutju ngaranyi palula tjanala ankula tjukurpa tjakultjungkunytjaku tjana kulu kulira Godaku walytjaringkungnyitjaku.

³⁸ Ka nyura Godala tjapila palumpa warakaripai kutjupa tjuta ngurkantara iyantjaku nyuranya alpamilara anangu ngura winkitjangka Tjukurpa Palya wangkanytjaku. Kaya kulira Godaku mulamularingkula palumpa walytjaringkuku."

10

Jesulu Nintintja 12 Altira Witulyankunytja

(Markaku 3:13-19; Luke-aku 6:12-16)

¹⁻⁴ Munu Jesulu nintintja panya 12 palunya tjananya altingu ini nyanganpa Simonnga ini kutjupa Peturnya, munu palumpa malannya Andrew-nya, munu Jamesanya pula Johnnga Tjipitiku panya katja kutjara, munu Philipanya, munu Patjalamunya, munu Thomasanya munu Matthew-nya wati panya kamantaku mani mantjilpainya, munu Jamesanya wati panya Alpi-yatjaku katja, munu Tjatiyatjanya, munu Simonnga panya paluru mayatja Rome-anya ngurara tjutaku pulkara kuraringkupai, munu Judas Kariyatanya panya paluru ngula Jesunya witintjaku nintinu Jewku mayatja tjutangka.

Nyanga palunya tjananya Jesulu altingu munu tjananya witulyanu mamu tjuta anangu tjutanguru paintjaku munu pikatjara tjuta kulu palyarunguntjaku pika kutjupa kutjupa tjutatjara.

Jesulu Nintintja Tjuta Iyantja

(Markaku 3:13-19; Luke-aku 6:12-16)

⁵ Munu paluru tjananya witunu anangu Israelkunu tjutakutu ankunytjaku munu wangkangu tjanala alatji, "Jew wiya tjutaku ngurakutu munu Tjamiriyanya ngurara tjutakutu kulu ankuwiyangkuya wantima!

⁶ Palu nyurampa walytja tjutakutu kutjuya ara anangu panya Israelkunu tjutakutu, panya paluru tjana tjiipi kawalirinytja tjuta purunypa nyinanyi kutjupangku atunymankunytja wiya.

⁷ Munuya tjanala ankula Godaku tjukurpa para-wangkama munuya tjanala tjakultjunama alatji, 'Kuware ilaringu Godalu nyuntunya nganaanya mayatjangku walytjanmara kanyintjaku.'

⁸ Munuya pikatjara tjuta kulu pampura palyarungunma, munuya anangu kutjupa ilunytja nyakula wankara pakaltjinganma, munuya miri pikatjara tjuta kulu palyarungunma, munuya mamu tjuta kulu anangu tjutanguru painma. Munuya palyaringkungangka palula tjanala maniku ngatjintja wiyangku wantima, panya ngayuluna nyuranya witulyanu anangu tjuta palyarunguntjaku, ka nyura ngapartji tjananya ngaltunytjungku palyanma manikitjangku wiya.

⁹⁻¹⁰ Munuya maralpa alatjitu anama mani kutjupa kutjupa tjuta katinytja wiya, munuya ulytja tjunkunytjikitjangku yakutja katinytja wiyangku wantima, munuya mantara kutjupa tjinatja kutjupa kulu ngulaku katinytja wiyangku wantima, tjukara kulu katinytja wiya maralpa alatjituya anama. Panya anangu kutjupa nyurampa

warkarinyangka nyura palunya ungupai, kaya palu purunypa nyura anangu tjuangka ngayuku warka palyannyangka paluru tjana uti ngapartji nyuranya pukularira ungama.

¹¹ “Munuya tawunu kutjupangka wirkarampa anangu kutjupa ngurira nyawa nyuranya altira mukulyangu kanyintjaku palumpa ngurangka. Munuya tawunu pala palula nyinara palumpa ngurangka kutju ngarima ngura kutjupangka kutjupangka para-ngarinytja wiya.

¹² Munuya palumpa walingka tjarpara wali pala palula nyinapai tjuangka alatji wangka, ‘Uwa, ngayulu Godala tjapini nyuranya kurunpa rapa kanyintjaku.’

¹³ Ka paluru tjana nyuranya pukultu tjarpatjura kanyinnyangka Godalu tjananya mulapatu kurunpa rapa kanyilku, palu tjana tjin-guru nyuranya tjunkuwiyangku wantinyangkampa Godalu tjananya kurunpa rapantja wiyangu wantiku.

¹⁴ Kaya nyuranya altira tjunkuwiyangku wantinyangka munu nyurala tjukurpa kulu kulilwiyangu wantinyangkampa nyura uti ngura nyara palunya wantikatima munuya wantikatinytjikitjangu ulpuru nyurampa tjinatanguru patapatala, kaya nyara palulanguru patapatannyangka nyakula kulilku Godanya tjanampa mirpanarinyangka.

¹⁵ Tjucarurungkuna nyurala wangkanyi, panya ngula Tjintu Malatjangka Godalu anangu uwankara manta winkitja ngurkantara tjaralku. Munu paluru ngura panya Tjatamanya pulanya Kumaranya ngurara tjuṭa paira iyalku ngura kurakutu pika pulkatjara nyinanytjaku. Munu paluru anangu panya nyuranya wantinytja tjuṭa kulu tjanala tjungu paira iyalku, palu ngura nyara palula tjana nyuranya wantinytjanungku pika pulka mulapa mantjilku Tjatamanya pulanya Kumaranya ngurara tjuṭangka waintara.”*

Jesulu Nintintja Tjuṭa Ngulutjungkunyitja

(Markaku 13:9-13; Luke-aku 21:12-17)

¹⁶ Munu Jesulu tjanala piruku wangkangu, “Uwa, ngayulu nyuranya ngura tjuṭakutu iyani ngayuku tjukurpa tjakultjungkunyitjaku. Palu kulilaya, panya nyura tjami tjuṭa ananyi tjiipi tjuṭa purunypa, kaya ngura nyara palula tjanala anangu pikati tjuṭa nyinanyi papa inura tjuṭa purunypa, munuya paluru tjana nyurampa pikaringkula nyuranya kuralku. Ka nyara palulanguru nyuranku uti purkarangku kulira walytjangu atunymanama munuya tjanampa ngapartji pikaringkuwiyangku wantira pilunpa nyinama. ¹⁷ Uwa, ngulu nyangamayanku, panya wati pikati tjuṭangu nyuranya witira katira kuutpangka tjunkuku ngayuku mulamularingkunyangka, munu nyuranya wali inmatjangka unngu wiipangka pulkara alkalku ngayuku tjukurpa wangkanyangka.

¹⁸ Uwa, nyura ngayula wanganarangku kulinnyangka tjana nyuranya katira mayatja ngura kutjupitja tjuṭangka kuranyu ngaratjungkuku, ka nyura tjanala Tjukurpa Palya ngayunyatjara tjakultjungkuku alatjitu, Jew wiya kutjupa tjuṭangka kulukulu.

* **10:15** Tjatamanya pula Kumaranya panya tawunu pulka kutjara iriti ngarangi Israelta itingka, ka panya anangu nyara palula pulala nyinapai tjuṭangu kura pulka mulapa rawangku palyannyangka Godalu tjananya uwankara pungkula wiyanu. Nyawa Genesis 18:20.

¹⁹ Munu paluru tjana nyuranya kuutpakutu katinytjikitjangu witin-nyangkaya kulira nguluringkunyitja wiya rapa ngarama. Tjinguru nyura mayatjangka wangkanytjikitjangu puṭu kulilku, 'Tjukurpa nyaanajtu wangkaku?' Palu alatji pulkara kulilwiyangku wantima, panya kuutpangka wirkara nyura Mama Godalu nintinnyangka kulilku wangkanytjikitjangu.

²⁰ Panya palumpa kuruntu nyuranya unngu nintilku tjukarurungku wangkanytjaku. Ka nyura walytjangu kulira wangkanytja wiyangku paluru nintinnyangka kutju wangkaku.

²¹⁻²² Uwa, anangu winki nyurampa kuraringkuku nyura ngayuku walytja nyinanyangka. Panya wati kutjupa ngayuku mulamularingkunyangka palumpa kutangu palunya ungkuku mayatja kura tjuṭangu palunya iluntankunyitjaku. Ka mamangu tjinguru palu purunypatu palyalku palumpa tjitji tjuṭa. Ka tjitjingu tjinguru palu purunypatu mama ngunyitju ngayuku walytja nyinanyangka wati mirpantju tjuṭangka nintilku pulanya iluntankunyitjaku. Palu nyura titutjarangu ilunytjakutu-wangkara ngayunya tungun-tunguntu wanannyangkampa Godalu nyuranya wankaru kanyilku palula tjungu titutjara nyinanytjaku.

²³ Tjinguru nyura ngura kutjupangka wirkankunyangka anangu tjuṭangu nyuranya ngayuku mulamularingkunyangka nyakula pungkuku, ka nyura uti ngura kutjupakutu wirtjapakanma. Palu tjukarurungkuna nyurala wangkanyi, panya nyura kuwaripankutu ngura nyanga Israeltawanungku tjukurpa ngayunyatjara paratjakultjunkunyangka ngayulu Watiku Katjanya pitjaku mayatja pulka nyinanytjikitja.

²⁴ "Kulilaya, panya mirpantju tjuṭangu ngayunya wangkara kuralpai, munuya paluru tjana ngayunya kurantjatjanungku nyuranya kulu ngayuku nintintja tjuṭa nyinanyangka pulkara kuralku ngayula munkara. Wanyuya tjukurpa nyangatja kulila,

'Panya wati nintiringkupai wati panya palunya nintilpaingka waintarinytja wiya, ka palu purunypa wati warkaripai palumpa mayatjangka waintarinytja wiyatu.'

²⁵ Ka nyara palulanguru nyura uti kulinma alatji, panya kutjupa tjuṭangu tjinguru wati nintilpainya pairampa palu purunypatu palula nintiringkupai tjuṭa kulu pailku. Munuya tjinguru mayatja kurara pungkulampa palu purunypatu palumpa warkaripai tjuṭa kulu kurara pungkuku. Panya tjana ngayunya mirpanarira wangkangi, 'Nyuntun mamu panya Piiltjipanya, panya mamu tjuṭaku mayatja.' Munuya ngayunya alatji wangkara wanyu ngayuku walytja tjuṭa wantima kurantja wiyangku? Wiya, tjana nyuranya kura mulapalta wangkaku ngayula munkara."

*Mama Godakuya Nguluringama Anangu Tjuṭaku Wiya
(Luke-aku 12:2-7)*

²⁶ "Kaya anangu palumpa tjanampa nguluringkuwiya nyinama, panya anangu tjuṭangu kampangkaṭu palyantjitja uwankara ngula utiringkuku, paluru tjana unngu kuraringkula kulintjitja tjuṭa kulu, panya kumpilitja uwankara mulapa utiringkuku, kaya uwankarangku kulilku.

²⁷ Kaya tjukurpa ngayulu nyurala mungangka kumpilpa wangkanytja kalala utingku wangkama anangu tjutangka, munuya tjukurpa ngayulu nyurala tjaalytju wangkanytja urilta mirara wangkama anangu winkingu uti kulintjaku.

²⁸ Uwa, anangu tjutakuya nguluringkunyntja wiya nyinama paluru tjana nyurampa pikaringkunyangka, panya tjana nyuranya puntu kutju pungkula iluntankuku, palu tjana nyuranya kurunpa putu wiyani. Panya Godalu kutjungku nyuranya puntu kurunpa winki wiyalku ngura kurangka wanira, kaya nyara palula-tawara palumpa kutjuku nguluringama anangu tjutaku wiya.

²⁹ Panya Godalu nyuranya titutjarangku mukulyangku kulini watarkurinytja wiyangku. Wanyuya tjulpu panya nyii-nyii kulinma. Tjinguru nyura tjulpu palu purunypa kutjara payamilalku mani kulunytja tjiilpa kutjungka. Palu Godanya tjulpu nyanga tjukutjuku tjutaku watarkuripai wiya. Nyara palunya tjananya paluru kutju kutju rawangku kulilpai uwankara alatjitu munu tjulpu kutju ilunyangka paluru nintingu kulira tjituru-tjitururipai.

³⁰⁻³¹ Munu palulanguru tjulpu tjukutjuku tjuta rawangku kulira paluru wanyu nyurampa pulka tjutaku watarkuriku? Wiya, paluru nyuranya rawangku mukulya pulkangku kulilpai tjulpu tjutangka mun kara, kaya palulanguru nguluringkuwiya rapa nyinama. Panya paluru nyuranya uwankara kutju kutju nintingu kulilpai. Munu paluru nyurampa mangkaku ninti yaaltjitu nyurampa katangka ngaranya. Kutjupangku putu kantamilani, palu Godanya kutju ninti, munu nyurampa kutjupa kutjupa uwankaraku kulu paluru ninti nyinanyi. Pala palulanguru nyura uti nguluringkunyntja wiya rapa nyinama.”

Jesuku Walytja Nyinanytjatjanungku Rapangku Wangkanytjaku
(Luke-aku 12:8-9)

³² “Tjinguru nyura anangu tjutangka mirangka rapangku wangkaku ngayuku walytja nyinanytjatjanungku, kana ngayulu ngapartji palu purunypatu nyuranya ngura ilkaritjangka wangkaku ngayuku mamangka mirangka alatji, ‘Nyanga paluru tjana ngayuku walytja nyinanyi.’

³³ Palu nyura tjinguru tjutangka mirangka ngayuku ngurparingkunyangkampa ngayulu ngapartji nyurampa ngurparingkukutu Mamala mirangka ngura nyara ilkaritjangka.

Jesuku Mulamularingkupai Tjutaku Kuraringkunyntja
(Luke-aku 12:51-53; 14:26-27)

³⁴ “Tjinguru nyura ngayunya kulini alatji, ‘Nyangatja-manti mantakutu pitjangu anangu tjuta kalypa nyinanytjaku palyantjikitjampa.’ Palu wiya, nyangatja nyura ngunti kulintja, panya ngayulu pitjanyangka anangu uwankara kalyparingkula tjungu nyinanytja wiya, palu kutjupa tjuta ngayuku mulamularingkuku, kaya kutjupa tjuta ngayuku mulamularingkuwiya nyinaku munuya paluru tjana anangu panya ngayuku mulamularingkupai tjutaku pikaringkuku.

³⁵ Panya wati kutjupa ngayuku mulamularingkunyangkampa wati nyara palumpa katja palumpa kuraringkuku, ka palu purunypatu minyma kutjupa ngayuku walytjaringkunyangkampa palumpa untalpa palumpa pikaringkuku. Ka palu purunypatu

minyama kutjupa palumpa mingkayiku kuraringkukuṭu ngayuku mulamularingkunyangka.

³⁶ Uwa, nyurampa walytjapiti nyurampa kuraringkuku nyura ngayunya waṅannyangka.

³⁷ Tjinguru nyura walytja tjutaku pulkara mukuringanyi maku ngunytjuku tjitji tjutaku kulu, nyaratja palya. Palu nyura ngayunya waṅantjikitja mukuringkulampa ngayuku pulkara mulapa mukuringama nyara palula tjanala munkara. Nyara palulanguru ngayunya-warara kulira kutju nyura ngayuku nintintja mulapa nyinaku.

³⁸ “Uwa, tjana tjinguru ngayunya punu katakutjarangka wakara utitjungkuku, ka nyura ngayuku nintintja tjuta nyinanytjikitja mukuringkulampa uti nyura titutjarangu ngayunya waṅanma nyuranya palu purunypa iluntankunytja kulira nguluringkunytja wiyangu. Palu nyura tjinguru punu katakutjarangka wakara utitjungkunytja kulira nguluringkulampa puṭu ngayuku nintintja mulapa nyinaku.

³⁹ “Uwa, aṅangu kutjupangu tjinguru alatji kulilku, ‘Wanyu kanatju ngayulu walytjangu atunyanama mantangka nyanga rawa wanka nyinanytjikitjangu.’ Palu alatji kulira paluru ngayunya wantinyi, ka Godalu palunya ngula ilunyangka puṭu wankani palula tjungurinkula titutjara nyinanytjaku. Ka aṅangu kutjupangu tjinguru alatji kulilku, ‘Wanyu kana nguluringkuwiyangu Jesunya titutjarangu waṅanma, kani palya kutjupangu ngayunya iluntankuku palunya waṅannyangka.’ Ka alatji kulinyangka Godalu ngula ilunyangka palunya wankara pakaltjingalku palula tjungu titutjara wanka nyinanytjaku.”

Godalu Ngapartji Ungkupai

(Markaku 9:41; Luke-aku 10:16; Johnku 13:20)

⁴⁰ “Ka tjinguru aṅangu kutjupangu nyuranya nyakula pukultu altira ngurangka tjunkula kanyilku, kana nyara palumpa ngayulu pulkara pukulariku munu ngayunya panya iyantjanya kulu. Panya aṅangu nyara paluru nyuranya pukultu altinyangkana kulilku, ‘Munta-uwa, tjinguru ngayulu palula wirkankunyangka paluru ngayunya palu purunypaṭu pukultu altira tjunkuku ngayunya iyantjanya kulu.’

⁴¹⁻⁴² Ka tjinguru aṅangu kutjupangu wati Godaku wangkatjara nyakula pukultu altira palumpa ngurangka tjunkula kanyilku, ka Godalu nyakula palunya ngapartji wiru unkkuku, panya Godalu wangkatjara tjuta kutjupa kutjupa wiru unkkupai palumpa tjukurpa tjukarurungku wangkanyangka, palu purunypaṭu Godalu palunya wiru unkkuku. Ka tjinguru kutjupangu aṅangu tjukaruru nyinapainya nyakula pukultu altira palumpa ngurangka tjunkula kanyilku, ka Godalu nyakula palunya ngapartji wiru unkkuku, panya Godalu aṅangu tjukaruru nyinapai tjuta kutjupa kutjupa wiru unkkupai tjukaruru nyinanyangka, palu purunypaṭu Godalu aṅangu palunya wiru unkkuku. Uwa, mulapa kutjupangu wati wangkatjara tjuta munu tjukaruru nyinapai tjuta kulu pukultu altinyangka Godalu palunya wiru unkkuku. Palu nyangatja nyura kulila, panya kutjupangu aṅangu tjukutjuku ngayuku walytja nyinanyangka nyakula

palunya ngaltunytjungku alpamilannyangka Godalu palunya ngapartji wiru mulapalta ungkuku. Tjinguru anangu paluru mina wari kutju tjikintjaku ungkuku, ka Godalu nyakula wantinytja wiyangku palunya ungkuku alatjitu palumpa pukularira. Nyangatjana mulamulangku wangkanyi." Alatji Jesulu tjananya iyantjikitjangku wangkara nintiningi palumpa panya nintintja 12.

11

Jesulu Johnngatjara wangkanytja
(Luke-aku 7:18-35)

¹ Munu paluru wangkara wiyaringkula manta Galileelawanu ngura ilatja tjutakutu anu anangu tjutangka Godaku tjukurpa para-wangkanytjikitja tjana kulu kulira nintiringkunytjaku.

² Ka wati panya Johntu* tjailanguru kulinu Christalu kutjupa kutjupa tjuta witulyangku palyannyangka munu palumpa nintintja tjuta witu Jesula ankula tjapintjaku.

³ Kaya ankula wirkara palula tjapinu alatji, "Mulapan nyuntu panya paluru, panya Johntu tjakultjunangi ngula wankarunkupainya pitjanytjaku? Munta tjinguru nyuntu kutjupa, kantila kuwaripa tu paanma."

⁴ Ka Jesulu wangkangu, "Ankulaya Johnta tjakultjura nyura nyakunytjatjanungku munu kulintjatjanungku kulu,

⁵ panya kurutjara tjutangu nyanganyi, nyumpu tjutaya pakanu, miri pikatjaraya palyaringu, pina pati tjutangkuya kulini, munuya anangu ilunytja tjuta kulu wankaringkula pakanu. Kaya ngaltutjara tjutangu kulu Tjukurpa Palya ngayulu tjakultjunkunyangka kulinu.

⁶ Uwa, ankulaya Johnta wangka ngayunya tjukarurungku kulintjaku, panya paluruna ngayulu. Panya anangumpa ngayuku pulkara mulamularingkunyangka Godalu palunya pulkara pukulmankupai." Alatji Jesulu tjananya wangkara malakungku iyanu Johntakutu.

⁷ Ka tjana ankunyangka Jesulu anangu tjutangka wangkangi tjukurpa Johnngatjara alatji, "Nyura panya mungatu ilytjikutu anu wati panya Johnnga nyakunytjikitja. Palu nyaaku nyura palunya nyakunytjikitja anu? Paluru wanyu wati upa, panya nyalpi walpangku uritjingannyangka uripai, palu purunypa? Wiya, wati paluru ngulunytju wiya rapangku alatjitu wangkapai.

⁸ Palu nyaaku nyura palunya nyakunytjikitja anu? Tjinguru nyura anu mantara wirutjara ngaranyangka nyakunytjikitja. Palu wiya, Johnnga palu purunypa wiya, panya wati mantara wirutjara mayatja pulkaku walingka kutju nyinapai ilytjingka wiya.

⁹ Tjakultjuranija! Nyaaku nyura palunya nyakunytjikitja panyatja anu? Wiya, Godaku wangkatjarangku wangkanyangka kulintjikitja nyura anu, panya paluru Godaku wangkatjara pulka mulapa nyinanyi kutjupa uwankarangka munkara.

¹⁰ Panya tjukurpa palunyatjaraya nyiringka iriti walkatjunu Godalu wangkanytja nyanga alatji,

'Ngayulunatju tjakulpa witura iyalku nyuntula kuranyu.

* 11:2 Wati nyangatja panya John Baptistanya panya paluru nganmanytju anangu tjuta urungka tjarpatjura baptise-katingi tjana kuranguru piwiyaringkunyangka.

Ka nyara paluru ankula kuranyungku nyuntumpa iwarankuku mayatja pulka pitjanytjaku.' " *"

11 Munu Jesulu piruku wangkangu tjanala, "Wati nyanga John Baptistanya pulka mulapa nyinangi, panya nyanga palu purunypa anangu kutjupa nganmanypa nyinanytja wiyatu. Palu nyanga palulanguru kuwari ara kutjupa ngarakatinyi panya Godalu anangu tjuta walytjanmara mayatjangku kanyini tjitji tjukutjuku tjuta kulu, kaya paluru tjana uwankara Johnta waintara pulka mulapa nyinanyi tjitji tjukutjuku tjuta kulu.

12 Johntu anangu tjutangka tjakultjunangi tjukurpa panya Godalu anangu tjuta walytjanmara mayatjangku kanyintjitja, kana ngayulu kulu palu purunypatu tjakultjunangi. Palu anangu mirpantju tjutangka tjukurpa nyangatja kulira wantingi munuya kampa kutjupa palyantjikitja mukuringanyi tjana waintara mayatjarinytjikitja.

13 "Panya nganmanytju Godalu tjukurpa pulka Mosenya ungu munu panya wati wangkatjara tjutangka kulu tjukurpa kutjupa tjuta tjakultjunu, kaya Moselu tjana uwankara walkatjunu anangu tjutangka wanganarangu kulira palyantjaku. Ka palulangurulta Johnnga mala pitjangu munu Godaku tjukurpa wangkangi.

14 Panya wangkatjara kutjupangu nganmanytju tjakultjunu ngula wati wangkatjara ini llaityanya malaku pitjanytjaku Mayatja panya kalkuntjala kuranyu.* Ka nyura uti tjukurpa nyara palumpa mularingama alatjitu, panya llaityanya purunypa wirkanu wati panya Johnnga.

15 Uwa, nyura nintiringkunyitjikitja mukuringkulampa purkarangu kulinma ngayulu panya kuwari nyurala wangkanytja."

16 Munu palulanguru Jesulu piruku tjanala wangkangu alatji, "Palu nyura kutjupa tjuta wanyu nyaa purunypa nyinanyi? Wiya, nyura tjitji tjuta purunypa nyinanyi, panya tjitji tjutangka utulu kutjupa utulu kutjupa ngarala mirara ngaparku wangkapai alatji,

17 'Inma wirula inkara wangkatjinganangi,

ka nyura pitjala nyanpinytja wiyangu wantingi.'

Kaya utulu kutjupangu ngapartji wangkapai,

'Uwa, kala nganaña ngapartji ulara inma tjituru-tjiturungku inkangi,

ka panya nyura kulira tjungurungkula ulanytja wiyangu wantingi.'

18-19 Uwa, tjitji pala utulu kutjarangu pika-pikangu tjananku ngaparku wangkangi, pala palu purunytju nyura Johnnga ngalinya ngaparku pikarungkula wangkapai. Panya Johnnga pitjangu munu paluru waina tjikintja wiya nyinangi munu kutjupa-ara mai wantira Godala tjapilpai palumpa waraka palyantjikitjangku. Ka panya nyura palunya ayinayini-palku nyakula mamutjaranmara wantingi. Ka ngayulu Watiku Katjanya pitjangu mununa mai ngalkula waina kulu tjikiningi Johnnga purunypa nyinanytja wiyangu, ka panya nyura ngayunya nyakula palu purunypatu kuranmanangi alatji wangkara, 'Palatja wati maiku manyu wainaku kulu, munu anangu kura tjutangka malparingkula tjungu nyinapai, panya wati kamantaku mani mantjilpai tjutangka munu anangu kura kutjupa tjutangka kulu.' Palu palya nyura alatji kanany-kananytju wangkapai palyangu-palku. Palu

* 11:10 Malakaiku 3:1 * 11:14 Malakaiku 4:5

nyangatjaya kulila, panya Godanya ninti pulka nyinanyi munu nint-
ingku iwara tjukaruru palyanu anangu tjutangku wanantjaku, kaya
iwara nyara palunya wanara kutju kulilpai, 'Munta-uwa, nyangatja
iwara Godalu kulira palyantja anangungku wiya.' "

*Ngura Manakurnguru Anangu Tjutangku Jesunya Wantinytja
(Luke-aku 10:13-15)*

²⁰ Ka panya Jesulu ngura tawunu ini Kuratjinta, Pitjaitala, Ka-
punimala tjanala para-pitjalira pikatjara tjuta palyarunguningi munu
miracle kutjupa kutjupa tjuta kulu tjanampa witulya pulkangku
palyaningi. Kaya palunya ngurara tjutangku paluru witulyangku
palyannyangka uti alatjitu nyangangi, palu tjana nyakula mulamu-
laringkunyitja wiyangku wantingi munuya paluru tjana kura tjuta
palyantjatjanu kuntaringkula Godalakutu aruringkunyitja wiyangku
wantingi. Ka Jesulu tjananya wantinyangka pulkara painingi alatji
wangkara,

²¹ "Nyurampa pika pulka mulapa ngaraku ngura Kuratjinta ny-
inanytja tjutaku munu Pitjaitala nyinanytja tjutaku kulu, panya
ngayulu nyurampa ngurangka pikatjara tjuta palyarunguningi munu
miracle kutjupa kutjupa tjuta kulu witulya pulkangku palyaningi,
ka nyura nyakunytjatjanungku kura tjuta wantinytja wiya alatjitu
munu panya nyura Godalakutu aruringkunyitja wiyangku wantingi.
Tjinguru ngayulu ngura panya Tayala pulala Tjaitanta palu purunypa
nganmanytulpi palyannyangka anangu ngura nyara palula pulala
nyinapai tjuta tjinguru mapalku kuranguru piiwiyaringama munuya
mantara walyku-walykungka tjarpara tjunpangka yunpa nyitinma
tjananku piiwiyaringkula kura wantinytja nintintjikitjangu.*

²² Kulilaya! Ngula tjiñtu malatjangka Godalu anangu uwankara
manta winkitja ngurkantara tjaralku, munu paluru anangu panya
Tayanya pulanya Tjaitangga ngurara tjuta paira iyalku ngura ku-
rakutu pika pulka mantjintjaku. Munu paluru nyuranya kulu tjanala
tjungu paira iyalku, palu ngura nyara palula nyura pika kutjupa pulka
mulapalta mantjilku anangu nyara palula tjanala munkara.

²³ Ka nyura Kapunimala nyinapai tjutangku yaaltji kulini? Godalu
wanyu nyuranya ilkarikutu katira pulkanmara tjunkuku? Wiya,
paluru nyuranya tjaru mulapa waniku ngati pulkakutu. Panya
nyurala mirangka miracle kutjupa kutjupa tjuta witulya pulkangku
palyaningi, ka nyura nyakula mulamularingkuwiyangku wantingi.
Tjinguru ngayulu iriti ngura panya Tjatamala palu purunypa
nganmanytulpi palyannyangkampa anangu nyara palula nyinapai
tjutangku nyakula ngayuku mulamularingama munu kuranguru
mapalku piiwiyaringama, ka Godalu tjananya kura wantinyangka
nyakula pungkuwiyangku wantima, ka tjinguru ngura paluru kuwari
ngarama warungku kampara wiyantja wiya.

²⁴ Palu ngula tjiñtu malatjangka Godalu anangu uwankara ngurka-
ntara tjaralku munu anangu Tjatamanya ngurara tjuta paira iyalku
ngura kurakutu pika pulka mantjintjaku. Munu paluru nyuranya
kulu tjanala tjungu paira iyalku, palu ngura nyara palula nyura pika

* **11:21** Panya ngura Tayala pulala Tjaitanta anangu Jew wiya tjuta nyinangi munuya kura
tjuta rawangku palyaningi, kaya Israeltanguru Godaku wangkatjara tjutangku ngura palunya
pulanya kuranmankupai.

kutjupa pulka mulapalta mantjilku ngayunya panya wantinytjatjanungku.” Alatji Jesulu tjanala wangkangi tjana wantinytjatanguru.

Jesulu Mama Godanya Walkuntja
(Luke-aku 10:21-22)

²⁵ Munu palulanguru Jesulu palumpa mamangka wangkangi alatji, “Uwa Mama, nyuntun mayatja pulka mulapa nyinanyi ilkariku mantaku anangu uwankaraku kulu, munun ilkaritja uwankaraku kulu mayatja pulka nyinanyi. Kana nyuntunya kuwari mirawanira walkuni, panya nyuntun tjukurpa nyanga wiru utinu anangu gurpa tjutangka munu panyan nintipuka tjutangka utintja wiyangku kumpilpa wantingu.

²⁶ Uwa Mama, mulapa panyan nyanga alatji palyanu nyuntu mukuringkula.”

²⁷ Munu palulanguru Jesulu nintintja tjutangka wangkangi alatji, “Panya Mamaluni uwankara alatjitu wangkara utinu. Ngayuluna palumpa katja ka paluru kutju ngayuku ninti nyinanyi, ka palu purunypa ngayulu kutju palumpa ninti mulapa nyinanyi. Palu ngayulu anangu kutjupa tjuta ngurkantara nintilku, kaya paluru tjana kulu Mamaku nintiringkula nyinaku ngayulu nintinnyangka kutju.

²⁸ “Uwa, nyura mantangka nyanga nyinara pulkara warkaripai munu titutjara pakuringkupai, panya wati Moseku tjukurpa nintilpai tjutanku nyuranya rawanku wangkara wituwitulpai ara kutjupa kutjupa tjuta palyantjaku, ka nyura uwankara tjukarurungku palyanjikitjanku putu kulilpai munu nyara palulanguru nyura pakuringkupai munu tjituru-tjitururipai. Palu kulilaya, munuya paku pulka nyinarampa ngayulakutu pitja kana ngayulu nyuranya pakuwiyala.

²⁹ Wanyuya ngayuku tjukurku nintiringama munuya ngayulu wangkanyangka wanganarangku kulinma, panya ngayuluna kurunpa ngaltunytju nyinanyi kanany-kanany pa wiya, ka nyura ngayula wanganarangku kulinnyangkampa ngayulu nyuranya pakuwiyalku pukulpa nyinanytjaku.

³⁰ Panya nyura ngayuku tjukurpa wanganarangku kulintjikitja mukuringkulampa nyura uti alatjitu kulilku, munu ngayulu wangkanyangka nyura pukultu alatjitu palyalku wantinytja wiyangku.” Alatji Jesulu tjanala wangkangi tjananya rapantjikitjanku.

12

Tjintu Milmilta Warkarinytja
(Markaku 2:23-28; Luke-aku 6:1-5)

¹ Munu nyara palulanguru ngula Jesunya tjana palumpa nintintja tjuta kulu Saturday-ngka anangi tjintu panya pakuwiyaringkupainangka. Munuya paluru tjana mai panya wiita tjutangka ngururwanu anangi. Kaya nintintja tjutanku paltjatjiratjarira waarangku mai wiita urara marangku unytjunytju kilinara uniny pa ngalkukatingi.

² Kaya Paratji tjutanku tjananya urannyangka nyakula Jesula wangkangu, “Ai, nyawa! Nyuntumpa nintintja tjutanku tjintu nyanga pakuwiyaringkupainangka kurangku mai mantjira unytjunytju kilinananyi, panya alatji palyara tjana nganampa ara anara upani,

panya Moseku tjukurta ngaranyi tjintu nyanga milmilta warka nyanga palu purunypa palyantja wiyangku wantinytjaku.”

³⁻⁴ Ka Jesulu wangkangu tjanala, “Palu nyura wanyu nyiringka nyakunyntja wiyatu panya iriti mayatja Davidalu paltjatjiratjarira Godaku tiinta milmilta tjarpara mai panya milmilma tjunkunytja ngalkunu munu palumpa tjungutja tjuta kulu ungu ngalkula paltjaringkunyntjaku. Palu panya tjukurpa ara ngaranyi tjukurta tjutangu kutju mai nyara palunya ngalkuntjaku. Ka paluru tjana tjukurpa ara nyanga palunya kulira wantingu, palu kutjupa tjutangu tjananya paintja wiyangku wantingi paltjatjiratjarira ngalkunnyangka.

⁵ “Munuya wanyu tjukurpa kutjupa kulu kulinma nyura Moseku tjukurta nyakunyntjatjanungku, panya tjintu pakuwiyaringkupainangka tjukurta tjutangu tiinta milmilta tjarpara warka palyalpai alatjitu, ka Godalu tjananya warkarinyangka nyakula paintja wiyangku wantipai.

⁶ Palu kuwarina nyurala tjukurpa kutjupa wangkanyi ara kuwaritja. Panya Godalu ngayunya iyanu tjukurpa pulka mulapa tjakultjunkunytjaku tjukurpa panya timpulatjarangka waintara.

⁷ Panya nyiringka iriti walkatjunkunytja ngaranyi Godalu wangkanyntja nyanga alatji,

‘Palyaya tjinguru kuka pungkula tiliwakara ngayunya ungama, palu nyangaku kuluna pulkara mukuringanyi nyura anangu kutjupa tjutaku ngalturingkula tjananya rawangku alpamilantjaku. Nyanga alatji nyura palyannyangka nyakulana pulkara pukulariku.’ *

Alatji nyiringka ngaranyi. Ka nyura uti tjukurpa nyanga palunya mulamulangku kulinma. Palu wiya, nyura wantingu munu pala palulanguru nyura ngayuku nyanga nintintja tjuta ngunti painingi kura palyannyangka-palku.

⁸ Uwa, nyura uti kulinma panya ngayulu Watiku Katjanya mayatja pulka mulapa nyinanyi, mununa ngayulu alatjitu wangkapai nyaa palyantjaku tjintu panya pakuwiyaringkupainangka.” Alatji Jesulu tjanala wangkangi Paratji panya tjutangka.

Jesulu Wati Mara Ngalturpa Palyantja Tjintu Milmilta

(Markaku 3:1-6; Luke-aku 6:6-11)

⁹ Munu palulanguru Jesunya tjana tawunungka ma-wirkanu munuya tjintu panya pakuwiyaringkupai ngaranyangka wali inmatjangka tjarpangu inmaku.

¹⁰ Ka nyara palula wati mara ngalturpa tjanala tjungu nyinangi anangu panya tjutangka. Kaya wati panya Paratji tjutangu Jesunya nyinara nyangangi paluru kutjupa kutjupa ngunti palyannyangka paintjikitjangku. Munuya wati panya mara ngalturpa nyinanyangka nyakula kuliningi, “Tjinguru kuwari palunya palyarungulku tjintu nyanga milmilta munu Moseku tjukurpa kuralku.”* Munuya palulanguru palula ngunti tjapinu alatji, “Yaaltji-yaaltji wanyu Moseku

* **12:7** Uutjiyaku 6:6 * **12:10** Panya Moseku tjukurta wangkanyi tjintu Saturday-ngka warka wiya nyinara pakuwiyaringkunyntjaku, ka paluru tjana kulilpai anangu palyarunguntja nyaratja warka, munuya palulanguru Jesulu anangu palyarunguntjaku patara nyangangi palunya paintjikitjangku.

tjukurta ngaranyi? Palya tjiñtu nyanga pakuwiyaringkupaingka anangu pikatjara palyarunguntjaku, munta wiya?"

¹¹ Ka Jesulu wangkangu tjanala ngapartji, "Palu wanyu nyura kuka tjiipi tjiiripi pakuwiyaringkupaingka pitingka wirulyarara tjarpanyangkampa ngulaku wantipai ilara pakaltjingantja wiyangku? Wiya, nyura ilara walatjunkturpai alatjiñtu mungawinkiku patara wantinytja wiyangku.

¹² Ka wati nyanga ngaltutjara tjiipi purunypa wiya anangu alatjiñtu, ka panya Moseku tjukurta ngaranyi nganana kutjupa tjuña titutjarangu ngalturingkula alpamilantjaku tjiñtu nyara palula kulu."

¹³ Munu Jesulu wati palunya wangkangu, "Maranku warala!" Ka mulapatu waranu, ka mara panya paluru palyaringu alatjiñtu mara panya kutjupa purunypa.

¹⁴ Kaya Paratji tjuña nyakunytjatjanu palumpa pulkara unngu mirpanaringi munuya ankula wangkara kuliningi Jesunya pungkunytjikitjangku.

Godalu Jesunya Ngurkantankunytja Palumpa Wara Palyantjaku

¹⁵ Ka Jesulu kulinu tjana palunya kukanymankunytja munu ngura nyara palunya wantikatira ngura kutjupakutu anu. Kaya anangu winkingku palunya wanañu, ka Jesulu pikatjara tjuña uwankara pampura palyarunguningi.

¹⁶ Munu tjananya painingi kutjupa tjutangka tjakultjunkuwiyanu wantinytjaku.

¹⁷ Palu tjukurpa nyanga Jesulu pikatjara tjuña palyarunguntja Mayatja Godalu nganmanyntju wangkangu wangkatjara ini Aitjayala, ka panya nyiringka iriti walkatjunu nyanga alatji Godalu wangkanytja,

¹⁸ "Nyanga palunyaña ngurkantanu munuña palunya witulyanu ngayuku wara palyantjaku.

Palumpana pulkara pukularinyi, munuña ngayuku kurunpa palula unngu tjarpatjungkuku.

Ka paluru ankula anangu manta winkitjanka tjakultjungkuku alatji, 'Godalu nyurampa palyalku nyura palumpa walytjaringkula tjukaruru nyinanytjaku.' Alatji paluru tjanala wangkaku.

¹⁹ Munu paluru piluntju alatjiñtu nyinaku ankula iwarangka itingka ngarala mirara wangkanytja wiya.

²⁰ Munu paluru anangu ngaltutjara tjuña nguwanpa ilunyangka nyakula wantinytja wiyangku tjananya ngalturingkula wankara pakaltjingalku,

panya watingku waru tili kulunypa kampanyangka nyakula purkarangu puulpai tili pulkaringkunytjaku,

palu purunypa paluru anangu tjuña wankaru kanyilku.

Munu paluru ngururpa pakuringkula wantinytja wiyangku titutjarangu wara ngayuku palyalku

munu ngula anangu tjuña ngayulu tjanampa palyantjitjaku mularingkungangka kutju wantira pakuwiyaringkuku.

²¹ Ka anangu ngura parari nyinanytja tjuña ala-ala patara nyinaku paluru pitjala tjananya nintintjaku." *

Alatji Mayatja Godalu iriti wangkangu, ka nyanga kuwari utiringulta.

* 12:21 Aitjayaku 42:1-4

Jesunya Munu Piiltjipalnga

(Markaku 3:20-30; Luke-aku 11:14-23; 12:10)

²² Ka kutjupa tjuṭangku Jesulakutu wirkakatingu wati mamutjara, mamungku tjaa munu kuru kulu patintja. Ka Jesulu mamu palunya painu, ka wati paluru palyaringu munu kuru alaringkula nyangu munu tjaa kulu alaringkula wangkapairingu.

²³ Kaya anangu tjuṭangku nyakula nguwanakuringu munuya wangkangi, "Wati nyangatja-manti Davidaku katjampa Godalu panya nganmanytju kalkuntjanyampa."

²⁴ Kaya Paratji tjuṭangku nyangatja wangkanyangka kulira tjanala wangkangu, "Wiya, mamu ini Piiltjipaltu wati nyanga palunya witulyankupai panya mamu tjuṭaku mayatja pulkangku, ka nyara palulanguru kutju paluru mamu tjuṭa pailpai anangu tjuṭanguru."*

²⁵ Ka Jesulu nintingku kuliningi tjana unngu kulintja munu kampa kutjupara wangkangu alatji, "Kulilaya! Panya anangu tjuṭa ngura kutjunguru walytjarara walytjararanku tjananku pikangku pungkula paṭuringkula tjungu utulu kutjunga nyinanytja wiyaringkupai. Ka palu purunypa anangu walytjarara walytjarara wali kutjunga nyinara rawa pikaringkula tjungu nyinanytja wiyaringkula mauntalparingkupai.

²⁶ Ka nyara palu purunypatu tjinguru Satantu mamu palumpa walytja tjuṭa anangu tjuṭanguru painnyangkampa paluru tjana palumpa kuraringkula palula tjungu nyinanytja wiyaringkuku, ka paluru tjananya puṭu wituwitura uparingkuku munu tjanampa mayatja wiyaringkuku.

²⁷ Ka panya nyura ngayunya wangkapai alatji, 'Mamu ini Piiltjipaltu wati nyanga palunya witulyankupai mamu tjuṭa paintjaku anangu tjuṭanguru.' Alatjini nyura wangkapai. Palu ngayulu tjinguru paluru witulyankunyangka mamu tjuṭa paini, ka nyuranya wanalpai tjuṭa wanyu nganalu witulyankupai mamu tjuṭa paintjaku? Mamu Satantu? Wiya, nyura alatji wangkanyangkaya nyuranya wanalpai tjuṭa nyurampa pikaringkuku, panya Godalu tjananya witulyankupai Satantu wiya. Ala palatja! Nyura ngayunya ngunti mamutjaranmananyi.

²⁸ Palu Godaku Kuruntu ngayunya witulyankupai mamu tjuṭa paintjaku, ka nyara palulanguru nyura uti nyakunytjatjanungku kulinma, 'Munta-uwa, mulapa Godanya pitjangu nganannya walytjanmara mayatjangku kanyintjikitja.'

²⁹ Munu Jesulu ara kutjupa tjanala wangkangi nintintjikitjangku alatji, "Watingku wanyu wati kunpu pulkaku ngurangka tjarpara kutjupa kutjupa tjuṭa kutitjungkupai? Wiya alatjitu. Palumpa ngaranyi wati nyara kunpu palunya-warara karpintjaku munu palulangurulta palumpa kutjupa kutjupa tjuṭa kutitjunktjaku.

³⁰ "Panya anangumpa ngayula tjungu nyinanytja wiya ngaralampa paluru Satanta tjungutja nyinanyi ngayuku mirpantju. Munu paluru anangu tjuṭa Godalakutu wirkakatinytja wiyangku wantirampa paluru Satanku warkarinyi munu tjananya ngayulanguru wililytjingani.

³¹ Palu kulinmaya nyangatja, panya nyura kura kutjupa kutjupa tjuṭanguru piiwiyaringkunyangka Godalu nyuranya kalypankungku

* 12:24 Piiltjipalnga panya mamu Satangga.

pungkuwiyangku wantiku. Munu nyura palunya anantjatjanu piiwiyaringkunyangka palu purunypatu nyurampa kalyparingkuku. Palu nyura tjinguru Kurunpa Milmilnga anara wangkanyangkampa Godalu nyurampa kalyparingkunyntja wiyangku nyuranya kukanyamankuku.

³² Uwa, ngayunya nyura Watiku Katjanya kurara wangkanytjatjanu piiwiyaringkunyangka Godalu nyuranya kalypangukungkuwiyangku wantiku. Palu Kurunpa Milmilnga nyura kurara wangkanyangka Godalu nyuranya kukanyamankuku nyurampa kalyparingkunyntja wiyangku, ka nyura titutjara alatjitu kukanyapa nyinaku tjirirpi malatjakutu-wangkara.*

Jesulu Mainguru Tjukurpa Kampa Kutjupara Wangkanyntja
(Luke-aku 6:43-45)

³³ “Wanyu kana tjukurpa ara kutjupatjara wangkama mai tjutatjara, panya punu wirungka mai wiru tjuta pakalpai mayu palyatjara, palu punu kurangka mai kura pakalpai mayu kurakura. Ka palu purunypa anangu wirungku wiru tjuta palyalpai, ka anangu kurangu kura tjuta palyalpai. Panya nyura anangu kutjupa ngurkantankuku paluru kutjupa kutjupa tjuta palyantjitjanguru.

³⁴ Palu nyura uwankara liru tjuta anangu tjuta ngunti kuralpai! Nyura wanyu kura tjutangu tjukurpa palya wangkapai? Wiya, panya anangungku tjaangku kutju wangkapai wiya, palu unngu kulintjitja uwankara wangkapai.

³⁵ Ka unngu wiru tjuta kulintjatjanungku paluru wiru tjuta kutju wangkapai, palu unngu kura tjuta kulintjatjanungku paluru kura kutju wangkapai.

³⁶ “Kaya kulinma nyangatja, panya ngula tjintu malatjangka Godalu anangu uwankara ngurkantara tjaralku munu paluru tjanala kutjunga kutjunga nintingu wangkaku, ‘Nyaaku nyuntu tjukurpa kura palunya tjananya wangkangi mantangka panya nyinara?’

³⁷ Uwa, tjintu nyara palula paluru nyuranya ngurkantankuku nyura wangkanytjitjanguru. Munu nyura tjukurpa palya wangkanytjitjanguru paluru nyuranya tjukurrunmankuku, palu nyura tjukurpa ngunti wangkanytjitjanguru paluru nyuranya kuranmankula ngura kurakutu paira iyalku.”

Jesunya Wituwituntja Witulya Pulkangku Palyantjaku
(Markaku 8:11-12; Luke-aku 11:29-32)

³⁸ Ka palulanguru Paratji tjutangu munu Moseku tjukurpa nintilpai tjutangu kulu Jesunya wangkangu, “Nintilpai! Wanyu nganana mirangka kutjupa kutjupa witulya pulkangku palyala nganana nyakula nyuntumpa mulamularingkunyntjaku.”

³⁹ Palu Jesulu wantingu munu tjanala wangkangu, “Alatjitu nyura kura tjuta nyinanyi Godanya kulira wantipai, panya nyura ngayuku putu mulamularingkula rawangku tjapini ngayulu miracle kutjupa kutjupa witulya pulkangku palyantjaku, panya ngayulu nyara palu purunypa palyannyangka nyakula kutju nyura kulilpai mulamularingkunyntjikitjangku. Palu wiya, Godalu kutjupa kutjupa nyura nyakunyntjaku palyantja wiyangku wantinyi, panya paluru

* **12:32** Panya Paratji tjutangu Jesunya mamutjaramara Kurunpa Milmilnga pulkara ananingi panya paluru mamu tjuta anangu tjutanguru pakaltjinganingi mamungku wiya.

nganmanytju wati wangkatjara ini Jonah-nya iyanu, ka nyura uti ara nyara palunya kulintjatjanumpa nintiringama.

⁴⁰ Panya wati paluru antipina pulkangka tjuni unngu nyinangi tjiñtu mankurpa munu panya palulanguru pakanu, ka palu purunypa ngayulu Watiku Katjanya tjiñtu mankurpa manta unngu ngariku mununa palulanguru pakalku.

⁴¹⁻⁴² Ka panya ngula tjiñtu malatjangka Godalu anangu uwankara ngurkantara tjaralku, ka nyara palula ara anangu Ninanya ngurara tjutangku nyuranya kuranmankuku ngayuku tjukurpa kulira wantinytjitjangu. Panya paluru tjana Jonah-lu Godaku tjukurpa wangkanyangka kulinu munuya piiwiyaringkula kura tjuta wantingu. Ka kuwari kutjupa Jonah-la waintara pulka mulapa nyurala tjungu nyinanyi nyura nyakula wanganarangku kulintjaku. Ka tjiñtu panya palulatu minyma panya mayatja ulpariranguru pitjanytjalu palu purunypatu nyuranya kuranmankuku ngayuku tjukurpa kulira wantinytjitjangka. Panya paluru ngura ulparira pararinguru pitjangu mayatja pulkangka Tjalamenta kulintjikitja paluru tjukurpa nintingu wangkanyangka.* Ka kuwari kutjupa Tjalamenta waintara pulka mulapa nyurala tjungu nyinanyi nyura tjukarurungku nyakula wanganarangku kulintjaku. Palu nyura ngayunya ngurkantankunytja wiya alatjiñtu.”

Mamu Anangunguru Painnyangka Malaku Pitjala Tjarpanytja
(Luke-aku 11:24-26)

⁴³ Ka Jesulu tjanala piruku wangkangu alatji, “Panya mamu anangunguru painnyangka pakara ankupai ngura piltikutu munu para-ngurilpai paluru nyinara pakuwiyaringkunytjikitjangu.

⁴⁴ Palu tjinguru mamu paluru ngura putu ngurira kulilpai, ‘Wiya, ngayulu malaku ankuku ngura panya ngayulu nganmanypa nyinanytjitjakutu.’ Munu mamu panya paluru pitjala nyakupai ngura panya paluru wiru kilina alatjiñtu ngaranyangka.

⁴⁵ Munu palulanguru malaku ankula paluru mamu 7 kutjupa altira katipai kura mulapalta, munuya paluru tjana palula tjarpara ngura palyara titutjara nyinapai. Ka anangu panya paluru ngula malangka pulkara mulapa kuraringkupai mamu panya paluru tjana unngu nyinara titutjarangku kurannyangka.” Alatji Jesulu tjanala wangkara nintiningi mamu tjutatjara.

Ngananya Tjana Wanyu Jesuku Walytjapiti?
(Markaku 3:31-35; Luke-aku 8:19-21)

⁴⁶ Ka paluru anangu tjutangka tjukurpa kuwaripankutu ngarala wangkanyangka palumpa ngunytju malannya tjuta kulu pitjangu, munuya walingka urilta ngarala wati kutjupa wituñu Jesunya altinytjaku pakara tjananya nyakunytjaku.

⁴⁷ Ka wati paluru ankula Jesula wangkangu, “Nyuntumpa ngunytju munu malannya tjuta kuluya urilta patani nyuntula wangkanytjikitja.”

⁴⁸ Ka Jesulu wangkangu, “Ngananya ngayuku ngunytju? Ngananya tjana ngayuku malannya tjuta?”

* 12:41-42 1 Kings 10:1

⁴⁹ Munu nintintja tjuṭa para-wilitjura wanara wangkangu, “Nyanga tjanaya ngayuku ngunytju malanypa tjuṭa nyinanyi.

⁵⁰ Panya ngayuku mamaku tjukurpa wanganarangku kulira palyalpai tjuṭa, nyara paluru tjanaya ngayuku ngunytju malanypa kulu nyinanyi walytja mulapa.”

13

Jesulu Tjukurpa Uninypatjara Wangkanytja

(Markaku 4:1-9; Luke-aku 8:4-8)

¹ Munu tjinṭu panya palulaṭu Jesunya pakara anu walinguru munu ankula uru kantilytja nyinakatingu anangu tjuṭangka tjukurpa wangkanytjikitja.

² Ka anangu winki mulapa palula kulintjikitja pitjangu munuya palunya utjuningi. Ka utjunnyangka paluru pauta uru tartjangka ngaranyangka nyakula tatira nyinakatingu katunguru tjukurpa wangkanytjikitja. Kaya anangu tjuṭangu uru kantilynguru wati-ngarala wanara kuliningi pautanguru tjukurpa wangkanyangka.

³ Ka Jesulu tjukurpa tjuṭa tjanala wangkangi ara kutjupa kutjupa tjuṭatjara, munu paluru nganmanytju tjukurpa nyangatja wangkangu alatji, “Wati kutju ma-pitjangu uninypa mantangka wanira wanantjikitja palumpa kaanangka.

⁴ Ka uninypa wanira wanannyangka tjara iwarangka itingka punkanu, ka tjulpu tjuṭangu pitjala ngalkula wiyanu.

⁵ Ka uninypa kutjupatjara punkanu manta pulitjarangka munu manta tartjangka mapalku pakanu.

⁶ Ka tjinṭungku pakara kampangu, ka mapalku piltiringkula wiyaringu iwiri wiyatjara.

⁷ Ka uninypa kutjupatjara punkanu manta tjilkatjarangka, ka tjilka tjuṭa pakara pulkaringu munu ukiri panya waninytjanya utjunu, ka puṭu pulkaringangi.

⁸ Ka uninypa kutjupatjara punkanu manta palyangka munu pakara pulkaringu munu mai pulkatjararingu, tjara kutjupa 100-tjararingu, tjara kutjupa 60-tjararingu, ka tjara kutjupa 30-tjararingu.

⁹ “Uwa, nyura nintiringkunyitjikitja mukuringkulampa purkarangku kulinma ngayulu nyanga kuwari nyurala wangkanytja.”

Jesulu Ara Kutjupa Kutjupa Tjuṭanguru Nintintja

(Markaku 4:10-12; Luke-aku 8:9-10)

¹⁰ Kaya nintintja tjuṭangu pitjala Jesula tjapiningi, “Nyaakun tjukurpa nyanga palu purunypa tjuṭa anangu tjuṭangka wangkapai ara kutjupa kutjupa tjuṭatjara?”

¹¹ Ka Jesulu tjanala wangkangu, “Wiya, ngayulu nyurala kutju Godaku tjukurpa kumpilitja utira wangkanyi, tjukurpa panya Godalu anangu tjuṭa walytjanmara mayatjangku kanyintjatjara. Palu anangu kutjupa tjuṭangkana wangkapai wiya.

¹² Kulilaya! Tjinguru anangungku wanganarangku palula kulinnyangkampa, Godalu palunya pulka mulapalta nintilku paluru kulira ninti mulararinytjaku. Palu tjinguru anangungku kulira wantinyangkampa, Godalu palunya kulintja kampa kutjupankuku palumpa watarkurinytjaku.

¹³ Uwa, ngayulu anangu tjutangka tjukurpa tjuṭa wangkapai ara kutjupa kutjupa tjuṭatjara, ka paluru tjana ngayulu wangkanyangka nyakula ngayunya puṭu ngurkantankupai munuya rawangku kulintjatjanungku puṭu tjukarurungku kulilpai.

¹⁴ Panya tjukurpa nyanga anangu tjutangu ngayunya puṭu ngurkantankunytja Godalu nganmanytju wangkangu wangkatjara ini Aitjayala, ka panya nyiringka iriti walkatjunu Godalu wangkanytja nyanga alatji,

'Nyura tjukurpa wangkanyangka rawangku kulilku, palu nyura kulira kulira puṭu alatjitu tjukurku nintiringkuku.

Munu nyura piruku kurungku rawangku nyakula nyakula puṭu alatjitu tjukarurungku ngurkantankuku.

¹⁵ Panya anangu nyanga paluru tjanaya kurunpa nganmanypa wituwitungu tjukurpa tjukaruru kulintjaku-tawara.

Munuya paluru tjana wangkanyangka puṭu kulilpai,

munuya kurungku kulu puṭu nyakupai kuru nganmanypa patir-
ingkunytjatjanungku.

Tjinguru tjana tjukarurungku kulirampa mulamularingama alatjitu kuru alangku nyakunytjatjanu, munu pinangku kulintjatjanu kulu.

Munu tjinguru paluru tjana kulintja palyangkumpa tjukurpa uwankara wangkanyangka tjukarurungku kulinma.

Munuya nyanga alatji tjukarurungku palyarampa, kampa kutju-
parinytjatjanu tjinguru ngayulakutu malaku aruringama.

Kana palulanguru tjananya palyarungunma.' " *

¹⁶ Munu Jesulu palumpa nintintja tjutangka wangkangu, "Palu nyura panya ngayunya kuru walytjangku nyanganyi, mununi ngayulu wangkanyangka pina walytjangku kulini. Pala palulanguru nyura pulkara pukularinyi.

¹⁷ Panya wati wangkatjara tjuṭa munu tjukaruru nyinapai tjuṭa kuluya pulkara mukuringangi nyura nyanga nyakunytjanya nyakunytjikitja, palu nyakunytja wiyatuya nganmanypa wiyaringu. Munuya nyura purunytju kulintjikitja mukuringangi palu kulintja wiyatuya wiyaringu."

Jesulu Tjukurpa Panya Uninypatjara Wangkara Utintja

(Markaku 4:13-20; Luke-aku 8:11-15)

¹⁸ Munu paluru tjanala wangkangu, "Kulinmaya, kana tjukurpa panya uninypatjara nyurala utira jakultjura!

¹⁹ Anangu kutjupa tjaraya nyinanyi uninypa panya iwarangka punkantja purunypa. Nyara paluru tjana panya tjukurpa kulilpai Godalu mayatjangku kanyintjatjara palu puṭuya kulini, panya mamu Satantu tjananya pina kuralpai tjukurpa kulintjaku-tawara.

²⁰ Kaya anangu kutjupatjara nyinanyi uninypa panya manta pulitjarangka punkantja purunypa. Panya tjana tjukurpa kulilpai munuya pulkara pukularingu.

²¹ Palu tjana mulamulangku kuruntu tjukurpa mantjintja wiya unytju kutju mulamularingkupai. Panya kutjupa tjutangu palunya tjananya ngayuku tjukurnguru kurara pungkanyangkaya mapalku paṭuringkula Godaku watarkuripai.

* 13:15 Aitjayaku 6:9-10

22 Kaya anangu kutjupa tjuṭa nyinanyi uninypa panya tjilangka punkantja purunypa, panya tjana tjukurpa kulira mulamularingkupai. Munuya mantatja kutjupa kutjupa tjuṭa pulkara kulira wiru tjuṭa kanyintjikitja mukuringkupai munuya nyanga palula tjanalanguru Godaku tjukurku watarkuripai munuya wiru tjuṭa Godaku puṭu palyalpai.

23 Kaya anangu kutjupatjara nyinanyi uninypa panya manta palyangka punkantja purunypa, panya tjana tjukurpa wanganarangku kulira pulkara mulamularingkupai. Munuya kulintjatjanungku wiru tjuṭa Godaku palyalpai tjarangku tjukutjuku nguwanpa palyalpai, ka tjara kutjupangku pulka nguwanpa palyalpai, ka tjara kutjupangku pulka mulapalta palyalpai Godanya pukularinytjaku."

Godalu Anangu Tjuṭa Walytjanmara Mayatjangku Kanyintja Ara Nyanga Paluru Tjana Purunypa

Ukiri Palya Munu Ukiri Kura

24 Munu Jesulu piruku tjukurpa ara kutjupatjara tjanala wangkangu nyanga alatji, "Godalu anangu tjuṭa mayatjangku walytjanmara kanyintja ara nyanga palu purunypa ngaranya, panya wati kaana kanyilpaingku manta runyuntjatjanungku uninypa wiita tjuṭa para-wanira wanaru.

25 Ka mungangka anangu tjuṭa kunkunpa ngarinyangka wati mirpantju pitjangu munu manta panya palulatu kampangkatu uninypa kura para-wanira wanaru.

26 Ka ngula uninypa panya wiita tjuṭa pakara maitjararingu, ka uninypa panya kura palula tjungutu pakara pulkaringu.

27 Kaya warkaripai tjuṭangku nyakula wangkangu tjanampa mayatjangka, 'Mayatja! Yaaltjinguru ukiri nyanga kura pakanu? Nyuntu panyan uninypa palya tjuṭa kutju waningu.'

28 "Ka wangkangu, 'Wiya, tjinguru wati ngayuku mirpantjungku pitjala kampangkatu waningu.'

"Kaya palula tjapiningi, 'Warpurala waniku?'

29 Ka wangkangu, 'Wiya, warpulwiyangkuya wantima! Tjinguru nyura ukiri kurakura tjuṭa warpurampa ukiri palya tjuṭa kulu warpulku.

30 Palula-tawaraya warpulwiyangku wantima tjungu pakara pulkaringkunyutjaku, ka ngula mai wiita kururingkunyangka ngayulu mai uralpai tjuṭa wangkaku uwankara tjungu katara urantjaku munu ukiri kura tjuṭa utulura warungka tilintjaku munu mai wiita tjuṭa mantjira tjunkunyutjaku wali mai tjunkupaingka.' Nyanga alatjiriku ngula tjintu malatjangka." Alatji Jesulu tjanala wangkangi.

Tjukurpa Uninypa Tjukutjukutjara

(Markaku 4:30-32; Luke-aku 13:18-19)

31 Munu paluru piruku tjukurpa ara kutjupatjara tjanala wangkangu alatji, "Godalu anangu tjuṭa mayatjangku walytjanmara kanyintja ara nyanga palu purunypa ngaranya, panya wati kaana kanyilpaingku uninypa ini matjata* kutju katira mantangka tjunkula tjuṭunu.

* 13:31 mustard

³² Uninypa nyara paluru tjuku mulapa palu paluru pakara pulkaringkula pulkunpa mulapa ngarapai. Kaya punu palula tjuḷpu tjuṭangku pitjala manngu palyara nyinapai.”

*Tjukurpa Yitjatjara
(Luke-aku 13:20-21)*

³³ Munu Jesulu pirukuṭu tjukurpa ara kutjupatjara tjanala wangkangu alatji, “Godalu anangu tjuṭa mayatjangku walytjanmara kanyintja ara nyanga palu purunypa ngaranyi, panya minymangku yitja tjukutjuku mai ulungka jungura uritjingalpai, ka panya yitja tjuku mulatu mai taltulpai warungka pauntjaku. Nyara palu purunypa Godaku walytja tjuṭaringkupai.”

*Jesulu Tjukurpa Tjuṭa Kampa Kutjupara Wangkanytja
(Markaku 4:33-34)*

³⁴ Uwa, Jesulu tjukurpa nyanganpa anangu tjuṭangka kampa kutjupara wangkangi utira wangkanytja wiyangku.

³⁵ Palu nyanga alatji tjukurpa tjuṭa ara kutjupa kutjupa tjuṭatjara wangkanytjaku Godalu nganmanytju tjakultjunu wati wangkatjara kutjupangka ka panya nyiringka iriti walkatjunu nyanga alatji, “Ngayulu nyurala tjukurpa tjuṭa wangkaku ara kutjupa kutjupa tjuṭatjara utira wangkanytja wiyangku.

Mununa tjukurpa kumpilitja tjuṭa nyurala tjakultjunkuku, panya Godalu kuwaripataranguru alatjitu kumpilpa kanyiningi.” *

Tjukurpa Panya Uninypa Kuratjara Utintja

³⁶ Munu palulanguru Jesulu anangu tjuṭa wantikatira anu munu walingka tjarpangu. Kaya nintintja tjuṭangku pitjala wangkangu, “Wanyu tjukurpa panya uninypa kutjaratjara nganana utira tjakultjura.”

³⁷ Ka Jesulu wangkangu, “Wati panya uninypa palya wanira wanalpainya, nyara paluru Watiku Katjanya.

³⁸ Ka palumpa panya kaanangku nintini ngura manta winkitja. Ka panya uninypa palya tjuṭa, nyara paluru tjana anangu Godaku walytjapiti. Ka panya uninypa kura tjuṭa, nyara paluru tjana anangu panya mamuku walytja tjuṭa.

³⁹⁻⁴⁰ Ka wati panya mirpantju uninypa panya kura tjunkupainya, nyara paluru mamu panya Satangga. Ka panya mai kururingkunyangka uralpai tjuṭa, nyara paluru tjana angelpa tjuṭa, panya paluru tjana ngula manta ilkaru wiyaringkunyangka anangu tjuṭa mantjilku. Munuya mamuku walytja tjuṭa ukiri panya kurakura tjuṭa purunypa utulura warungka waniku.

⁴¹ Panya nyara palula ara Watiku Katjangku palumpa angelpa tjuṭa witulku, kaya ankula anangu kura palyalpai tjuṭa mantjilku. Panya manta winkingka Godaku walytja tjuṭa nyinanyi, ka palula tjanala jungu nyinanyi anangu kura tjuṭa kulu panya tjana rawangku kura palyalpai munuya kutjupa tjuṭa kulu wituwitulpai kura palyantjaku. Kana palunya tjananya mantjintjaku ngayulu angelpa tjuṭa witulku.

⁴² Kaya mantjira tjananya waru pulkangka waniku, kaya pika pulkatjara nyinara titutjara ulaku.

* 13:35 Psalm 78:2

43 Ka palulanguru Mama Godalu palumpa walytja tjuṭa ngura wirungka kanyilku, kaya tjiṅtu purunypa irnyara uti alatjiṅtu ngaraku. Uwa, nyura nintiringkunyitjikitja mukuringkulampa purkarangku kulinma ngayulu nyanga kuwari nyurala wangkanytja.”

Tjukurpa Mani Pulkatja Tjawara Kutitjungkunyjanya

44 Ka Jesulu piruku tjukurpa ara kutjupatjara wangkangu alatji, “Godalu anangu tjuṭa mayatjangku walytjanmara kanyintja wiru mulapa ngaranyi ara nyanga palu purunypa, panya kutjupa kutjupa wiru tjuṭa mani pulkatja ngaringi manta unngu. Ka wati kutjupangku ngurpangku pitjala tjawara nyangu ngarinyangka, munu nyakunyitjatjanungku pulkara pukularira tjutura wantikatingu munu palulanguru ankula paluru kanyintja uwankara manikitjangku tjalamilara wiyara mani pulka mantjira manta panya palunyaṭa payamilanu wiru panya tjuṭatjara.”*

Tjukurpa Upula Wirutjara

45 Munu piruku tjukurpa kutjupa kampa kutjupara wangkangu alatji, “Godalu anangu tjuṭa mayatjangku walytjanmara kanyintja wiru mulapa ngaranyi ara nyanga palu purunypa, panya wati upula payamilalpaingku ngura winkingka upula wiru tjuṭa ankula paranguriningi payamilantjikitjangku.

46 Munu kutjupa-ara paluru upula wiru mulapa nyangu kutjupa tjuṭangka waintara mulapa. Munu paluru nyakula pukularira ankula paluru kanyintja uwankara manikitjangku tjalamilara munu mani panya palula upala panyaṭa payamilanu munu mantjintjatjanu pulkara pukularingu.”

Tjukurpa Antipinatjara

47 Munu paluru piruku tjukurpa kutjupa kampa kutjupara tjanala wangkangu alatji, “Godalu anangu tjuṭa mayatjangku walytjanmara kanyintja ara nyanga purunypa ngaranyi, panya wati tjuṭangku net uru ngati pulkangka wanira antipina kutjupa kutjupa tjuṭa witiṭpai.

48 Munu tjana urunguru ilara katira uru kantilytja nyinakatira wiru tjuṭa tjarara tjunkupai pitingka munuya kurakura tjuṭa wanipai.

49 Nyanga palu purunypa ngula ngaraku manta ilkari wiyaringkunyaṅka, panya nyara palula ara angelpa tjuṭangku ankula anangu kura palyalpai tjuṭa mantjilku tjukaruru nyinapai tjuṭangka tjungu nyinanyangka.

50 Munuya palunya tjananya waru pulkangka waniku panya waru titutjara kampapaingka, kaya nyara palula pika pulkatjara nyinara titutjara ulaku.”

Tjukurpa Kuwaritja Munu Irititja

51 Munu palulanguru Jesulu nintintja panya tjuṭangka tjapinu, “Nyura tjukurpa nyanga palunya tjananya tjukarurungku kulini?”

Kaya wangkangu, “Uwa, kulinila.”

* 13:44 Kutjupa kutjupa wiru tjuṭa manta unngu ngarinytja, nyaratja Godanya. Ka wati kutjupangku pitjala nyangu, nyara paluru nintini anangu kutjupangku watarkitjangku Godaku Tjukurpa kulira nintiringkunyja. Munu paluru nintiringkunyitjatjanu Godaku pulkara mukuringanyi munu palulanguru paluru kanyintja uwankara wantikatinyi Godanya wanantjikitjangku.

⁵² Ka wangkangu, “Uwa, ngayulu nintinnyangka nyura tjukurpa Godalu anangu tjuṭa mayatjangku walytjanmara kanyintjitjaku tjukururu nintiringangi. Munu nyura tjukurpa kutjaraku mukuringkupai, kuwaritjaku munu irititjaku kulu, panya ngayulu nyurala wangkanytjitjaku munu Godalu iriti Mosela tjanala wangkanytjitjaku kulu. Panya wati mani pulkatjarangku wiru tjuṭa pakutjangka kanyilpai palumpa walingka, irititja munu kuwaritja kulu tjungu. Munu paluru irititjaku munu kuwaritjaku kulu pulkara mukuringkupai. Ka nyanga palu purunypatu nyura ngayula nintiringkunyjtjanu nyura tjukurpa kutjarakutu mukuringkupai irititjaku munu kuwaritjaku kulu.”

Ngura Walytjangka Tjana Jesunya Wantinytja
(Markaku 6:1-6; Luke-aku 4:16-30)

⁵³⁻⁵⁴ Munu Jesulu tjukurpa nyanganpa wangkara wiyaringkula ngura palunya wantikatira anu ngura walytjakutu Nazarethalakutu. Munu nyara palula wirkara wali inmatjangka tjarpara ngura nyara palula anangu tjuṭangka tjukurpa wangkara nintiningi. Kaya kulira nguwanteringi, “Ai! Nganalu nyangatja nintinu tjukurpa nyanga wiru mulapa tjukururungku wangkara utintjaku? Ka nyangangu yaaltjiwanutjangku witulya pulkangku miracle kutjupa kutjupa tjuṭa palyani?”

⁵⁵ Wiyampal panyatja, nyangatja wati wali palyalpaiku katja, ka panya ngunyitju Mary-nya, ka malanypa tjuṭa ini nyanganpa Jamesanya, Josephanya, Simonnga, Judasanya tjana nyinanyi nyangangka.

⁵⁶ Kaya palumpa nyarumpa tjuṭa kulu nyangatja nyinanyi.”

⁵⁷ Alatji wangkaraya palumpa kuraringangi munuya paluru wangkanyangka kulira wantingi.

Ka Jesulu kulira wangkangu, “Anangu tjuṭangku wati wangkatjara ngura kutjupitjangku wangkanyangka kutju wanganarangku kulilpai, palu wangkatjara nguraritjangku wangkanyangkaya kulilwiyangku wantipai.”

⁵⁸ Munu ngura pala palula Jesulu miracle tjuṭa palyantja wiyangku wantingi tjana palumpa mulamularingkuwiyangku wantinyangka, palu mankurpa kutju palyanu.

14

John Baptistanya Iluntankunyitja
(Markaku 6:14-29; Luke-aku 9:7-9)

¹ Nyara palula ara wati panya Iratanya manta Galileeku mayatja nyinangi munu paluru kulinu Jesulu ngura tjuṭangka para-pitjalira kutjupa kutjupa tjuṭa palyannyangka.

² Munu paluru kulintjatjanungku palumpa warakaripai tjuṭangka wangkangu alatji, “Wiya, nyaratja wati panya John Baptistanya iluntjatjanu wankaringkula pakanu, munu nyara palulanguru tjinguru paluru miracle kutjupa kutjupa tjuṭa witulyangku palyani.”

³⁻⁴ Panya nganmanytju, Johnnga wanka nyinanyangkalpi, Iratalu palumpa malanypaku kuri altingu Philipaku panya ini Iratianya. Ka nyara palulanguru panya Johntu rawangku wangkangi palula alatji, “Kurangkun minyama palatja tjulyanu.” Ka alatji wangkanyangka

Iratalu tjaultji tjuṭa witunu Johnnga ankula witintjaku, kaya palunya ngalya-katira karpira tjailangka tjarpatjunu.

⁵ Ka Iratalu palunya iluntankunyjtikitjangu kuliningi, palu paluru anangu tjutaku nguluringkula wantingi, panya paluru tjanaya kulilpai Johnnga wati Godaku wangkatjara, munuya paluru wangkanyangka kulira mulamularingkupai. Ka nyara palulanguru Iratalu Johnnga iluntankuwiyangu wantingi.

⁶ Ka ngula Iratalu mai pulka palyanu munu palumpa malpa tjuṭa altingu tjunguringkula paluru iti ngarinytjita kulira ngalkula pukularinytjaku. Ka nyara palula ara minyma Iratiyaku unṭalpa pakara nyanpingi winkingka mirangka, ka wati panya Iratalu nyakula pulkara pukularingu.

⁷ Munu paluru palula wangkara kalkunu, “Nyuntu kutjupa kutjupaku mukuringkulampa ngayula tjapinma, ka ngayulu nyuntunya ungku alajtju. Nyangatjananta tjukarurungku kalkuni Godala mirangka.”

⁸ Ka kungkawara panya palumpa ngunytjungku palula tjaa-lymara wangkangu alatji, “Arkara wanyu ngatjila John Baptis-tanya kata katara ungkunyjtaku.” Ka kungkawara panya paluru Iratala wangkangu, “Mukuringanyina Johnnga kata katara pulitangka tjunkula ngayunya ungkunyjtaku.”

⁹⁻¹¹ Ka Iratalu nyangatja kulira unngu pulkara jtjuru-tjtjururingu munu paluru kuliningi, “Tjinguru paluru ngatjinnyangkaṅa unkuwiyangu wantima, palu ngayulu nganmanytju winkingka mirangka kalkuntjatjanungku puṭu wantinyi.” Munu paluru tjaultji tjuṭa witunu Johnnga kata katara katira kungkawara panya palunya ungkunyjtaku. Kaya tjailangka ankula kata katara pulitangka tjunkula katira kungkawara panya palunya ungu, ka paluru katira ngunytju ma-ungu.

¹² Kaya panya Johnku nintintja tjuṭangku kulinu munuya pitjala Johnnga puntu mantjira katira tjunutjunu munuya ankula Jesula tjakultjunu.

*Jesulu Anangu Winki 5,000 Maingka Paltjantja
(Markaku 6:30-44; Luke-aku 9:10-17; Johnku 6:1-14)*

¹³ Ka Jesulu Johnnga ilunytja kulira pakara pautangka tatira anu kutju maunṭalpa nyinanyjtikitja. Palu anangu tjuṭangku ngura tjuṭanguru paluru ankunyangka kulinu munuya uru kantilytja warara palunya para-wananu.

¹⁴ Ka Jesunya mantangka wirkara pautanguru ukalingu munu anangu palunya tjananya minga purunypa kuranyurira ngaranyangka nyakula tjanampa kurunpa pulkara ngalturingu, munu paluru pikatjara tjuṭa pampura palyarunguningi.

¹⁵ Kaya anangu paluru tjana kuwaripatu nyinara mungartjiringu ngurakutu ankunytja wiya, ka nintintja tjuṭangku pitjala wangkangu Jesula, “Ala, walangku tjananya wanyu witula, kaya ankula ngura nyara tjukutjuku tjuṭangka mai payamilara ngalkula paltjariwa! Alatjtuya nyinara mungartjiringu. Ilytji nyangatja ngura parari mulapa.”

¹⁶ Ka Jesulu tjanala wangkangu, “Nyaakuṅa witura iyalku? Uti nyura tjananya mai ungama!”

¹⁷ Kaya wangkangu, “Wiya, mai tjukutjukula nyangatja kanyini, mai nyuma kutjara mankurpa munu kuka antipina kutjara.”

¹⁸ Ka wangkangu, “Uwa, ngalya-katirani uwa!” Kaya mulapaṭu katira palunya ungu.

¹⁹ Ka paluru wangkangu anangu panya uwankara ukiringka nyinakatinytjaku, munu palulanguru mai panya kutjara mankurpa, kuka kutjara kulu mantjinu munu ilkari ira-nyakula maiku pukularira Godanya walkura wangkangu, “Wirungkulanyan mai kuka nyangatja ungu.” Munu paluru kaṭantara nintintja tjuṭa ungu anangu tjuṭa para-ungkunyjtaku.

²⁰ Kaya uwankarangku ngalkula paltjaringu. Kaya palula malangka nintintja tjuṭangu kuka mai lampi muṭun-muṭunpa tjuṭa tjana ngalkula wantinytja uwankara mantjira piti pulka 12-ngka tjaalyn-garatjunu.

²¹ Uwa, ngura nyara palula wati 5,000-tu mai palunya ngalkunu winki mulatu. Ka minyma tjitji kulukulu nyinangitu ngura pala palula munuya uwankarangku ngalkula paltjaringu.

*Jesunya Uru Katu Paltjura Ankunytja
(Markaku 6:45-52; Johnku 6:15-21)*

²² Nyanga palula malangka Jesulu palumpa nintintja tjuṭa wituṇu palunya wantikatira pautangka tatira kuranyu ma-itipirinytjaku uru kampa kutjupakutu. Munu paluru anangu panya tjuṭa kulu wituṇu ngurakutu malaku ankunytjaku.

²³ Munu tjananya witura iyantjatjanu paluru kutjuringkula pulingka katu nguwanpa ma-tatira nyinakatingu Godala tjapintjikitja. Munu paluru nyinara tjapira mungaringu kutjungku.

²⁴ Kaya nintintja panya tjuṭa pautangka urungka ngururpa mulpalta anangi, ka walpa pulka wangkangi munu pauta panya untura para-wanangi, kaya puṭuliringi ma-itipirira mantangka wirkankunytjikitja.

²⁵ Ka munga tjintukutu nguwanpa Jesulu uru panya pulkangka ngururpa tjananya tjinangu wanara wirkanu urungka katu paltjura.

²⁶ Kaya urungka katu paltjura pitjanyangka nyakula pulkara nguluringu munuya mirara wangkangu, “Mamu kurun-kurunpa palatja pitjanyi.”

²⁷ Ka Jesulu tjanala wangkangu, “Nguluringkunyitja wiyaya panya ngayuluna nyangatja, kaya raparingama!”

²⁸ Ka Peterlu wangkangu, “Mayatja! Mulapan wanyu nyuntu? Kani wanyu nyuntu mulapa ngaralampa alti kana ukalingkula ma-pitja nyuntulakutu urungka nyanga katu paltjura.”

²⁹ Ka wangkangu, “Uwa palya, ngalya-pitja ukalingkula!”

Ka paluru pautanguru ukalingkula uru katu paltjura ma-pitjangi Jesulakutu.

³⁰ Munu paluru ankula nyangangi walpangku uru uritjangan-nyangka munu nguluringkula ngururpaṭu urungka karalukatingu munu mirara wangkangu, “Mayatja! Wankarurani!”

³¹ Ka Jesulu mapalku minara katunu urunguru munu palula wangkangu, “Ai! Nyaakun ngayuku mulamularingkunyitja wiya pulkara nguluringanyi?”

³² Ka pula pautangka tatinnyangka walpa panya atanaringu.

³³ Kaya nintintja panya tjuṭangku pautangka nyinanytjatjanungku pupakatira Jesunya walkunu wangkara, “Mulapa nyuntu Godaku katja.”

*Jesulu Pikatjara Tjuṭa Palyarunguntja Ngura Ini Kina-tjaratala
(Markaku 6:53-56)*

³⁴ Munuya urungka pitjalira tjiṭuringkula ma-wirkanu mantangka ngura ini Kina-tjaratala.

³⁵ Kaya ngura nyara palunya ngurara tjuṭangku Jesunya nyakula ngurkantanu, munuya anangu kutjupa tjuṭa tjakulpa witura iyanu ngura kutjupa tjuṭakutu. Kaya ngura winkingka tjakultjunkunyangka anangu tjuṭangku kulira anangu pikatjara winki mulapa Jesulakutu ngalya-katingu.

³⁶ Munu paluru tjana Jesula ngatjiningi pikatjara tjuṭangku palumpa mantara pampuntjaku tjana pampura palyaringkunyjtaku, kaya mulapaṭu pikatjara uwankarangku pampuntjatjanu paluru tjana palyaringangi Jesulu tjananya palyarungunyangka.

15

*Jesulu Paratji Tjuṭa Munu Moseku Tjukurpa Nintilpai Tjuṭa Wangkara Paintja
(Markaku 7:1-13)*

¹ Kaya wati Paratji tjuṭa munu Moseku tjukurpa nintilpai tjuṭa kulu Jerusalemalangu pitjangu munuya Jesula tjaminu alatji,

² “Nyaakuya panyatja nyuntumpa nintintja tjuṭangku tjamuku tjanampa ara tjuṭa wanganarangku kulira palyantja wiyangku wantinyi munuya mara paltjilwiyangku ngalkuni?”

³ Ka Jesulu wangkangu tjanala, “Ka nyura kulu nyaaku wanyu Godalu wituntjtja tjuṭa kulira wantinyi? Panya nyura Godaku tjukurpa wantipai nyurampa tjamu tjuṭaku ara kutju kulira palyantjikitjangku.

⁴ Panya Godalu wangkangu alatji, ‘Mamangka ngunytjunga wanganarangku kulinma!’* Munu piruku wangkangu alatji, ‘Anangu kutjupangku mama ngunytju warkinyangkampa palunya pungkula iluntankunytjaku ngaranyi!’*

⁵ Palu nyura tjukurpa nyanganpa kampa kutjupankupai. Tjinguru anangungku kutjupa kutjupa kanyini munu kanyintjatjanungku palumpa mama ngunytju ngaltutjara nyinanyangka nyakula ungkunytjaku ngaranyi. Palu paluru tjinguru alatji wangkaku palula pulala, ‘Tjinguruna nyupalinya nyangatja ungama nyupali mantjira pukularinytjaku, palu putuna nyupalinya unganyi panya nganmanytjuna Godanya kalkunu nyangatja palumparinytjaku.’ Uwa, nyanga alatji nyura ngunti wangkapai mama ngunytju unguwiyangku wantinytjikitjangku.

⁶ Palu panya Godalu wangkangu mamangka ngunytjunga wanganarangku kulintjaku munu pulanya atunymara kanyintjaku, ka nyura tjukurpa palatja wiyamananyi munu nyurampa tjukurpa kutju wanganarangku kulira palyantjaku wangkanyi.

* 15:4 Exodus 20:12 * 15:4 Exodus 21:17

⁷ Uwa, nyura ngunti palya-palku kanany-kanany pa nyinapai tjuṭa, panya wangkatjara Aitjyalu iriti nyiringka nyuranyatjara tjukarurungku walcakjuna alatji,

⁸ 'Anangu nyangantuya ngayunya winpinpingku kutju walkulpai, panya tjana kurunpa winkingku ngayunya walkuntja wiya alatjitu.

⁹ Tjana ngayunya unytjungku kutju walkulpai, panya tjana ara tjuṭa walytjangku kutju kulira nintilpai tjukurpa anangitja tjuṭa, ngayulanguru wiya.' " *

Alatji Jesulu tjanala wangkangi wati panya Paratji tjuṭangka munu Moseku tjukurpa nintilpai tjuṭangka kulu.

Nyaangku Anangu Kuralpai?

(Markaku 7:14-23)

¹⁰ Munu palulanguru Jesulu anangu tjuṭa altingu kaya ilaringu palula kulintjikitja. Ka paluru tjanala wangkangu alatji, "Ngayulaya kulira nintiriwa!

¹¹ Panya paluru tjana kulilpai anangungku mara paltjintja wiyangu mai mantjira ngalkuntjatjanu kuraringkupai munu nyara palulanguru kuraringkuntjatjanungku Godanya puṭu walkulpai. Palu wiya, panya maingku kukangu anangu palunya puṭu kuralpai. Panya paluru unngu walytjangku kura kulira kutju kuraringkupai munu panya kura wangkapai. Nyara palulanguru paluru puṭu Godanya walkulpai, kura unngu walytjangku kulira, panya nyara palula unngunguru pakara palunya kuralpai. Palu nyara maingku kukangu ma-tjarpara palunya puṭu kuralpai."

¹² Kaya nintintja tjuṭangu palula wangkangu alatji, "Nyuntun wanyu kulinu Paratji nyanga tjuṭa miilarantja tjukurpa nyanga nyuntu wangkanytjijanguru?"

¹³ Ka Jesulu wangkangu, "Kulilaya! Paluru tjana tjukurpa tjuṭa anangu tjuṭangka wangkara nintilpai, palu tjukurpa paluru tjana Godalanguru wiya tjana walytjangku kulira nintintja. Tjukurpa palumpa tjanampa punu kura tjuṭa purunypa, panya watingku palumpa kaanangka punu kura tjuṭa pakaltjingantja wiyangu punu palya tjuṭa kutju pakaltjingalpai munu kura tjuṭa pakannyangka nyakula palunya tjananya iwiri winki warpara wanipai. Ka palu purunypa Mama Ilkaritjalu Paratji tjuṭaku tjukurpa palula tjanala nintintja wiya, munu paluru tjukurpa palunya tjananya uwankara wiyalku.

¹⁴ Ka nyura tjananya kulira wantima panya tjanaya kuru pati purunypa tjuṭangu nyuranya ngunti katirinanyi, panya kuru patingku anangu kuru pati kutjupa witira katira paluru pulatu piti ngatingka punkalku."

¹⁵ Ka Peterlu wangkangu Jesula, "Palu wanyu tjukurpa nyanganpa nganaṅala wangkara utila kala kulila!"

¹⁶ Ka Jesulu wangkangu tjanala, "Nyura kulu-manti puṭu kulini anangu kutjupa tjuṭa purunyju.

¹⁷ Kulilaya! Panya anangungku mara raputjingku mai mantjira ngalkunnyangka mai paluru tjaawanu tjuningka tjarpapa ngaripai munu nyara palulanguru kutjupawanu ma-pakalpai urilkutu. Mai

* 15:9 Aitjyaku 29:13

nyara paluru panya tjaawanu tjarpara anangu palunya kurunpa putu kuralpai paluru kulira kura palyantjaku.

¹⁸ Palu wanyuya tjaanguru nyanga ngalya-pakantjanya kulila, panya kura wangkanytja! Panya anangungku kura wangkapai mainguru wiya, palu paluru alatjitu unngu kura kulira kura wangkapai, munu nyara palulanguru kutju paluru Godanya putu walkuni mara raputjinku mai mantjira ngalkuntjatjanungku wiya.

¹⁹ Panya anangungku unngu kura tjuta kulintjatjanungku kura tjuta palyalpai alatjitu, panya paluru kura palyantjikitjangku rawangku kulilpai, munu nyara palulanguru anangu kutjupa iluntankupai, munu kuri walytjatjarangka ngaripai munu tjutangka pirtjipai. Munu paluru kutjupa kutjupa walytjatjara kutitjunkturupai, munu ngunti wangkapai, munu tjaalymara ngukara wangkapai.

²⁰ Uwa, kura nyanga palunya tjananya anangungku unngu kulilpai palyantjikitjangku munu nyara palulangurulta kuraringkula Godanya putu walkulpai kura nyanganpa unngu kulira palyantjatjanungku. Palu mara paltjintja wiyangku mai mantjira ngalkunnyangka nyakula Godalu kuranmankupai wiya." Alatji Jesulu tjanala wangkangi palumpa nintintja tjutangka.

*Minyma Ngura Kutjupitja Jesuku Mulamularingkunytja
(Markaku 7:24-30)*

²¹ Munu palulanguru Jesulu ngura palunya wantikatira alinytjara anu tawunu Tayala pulala Tjaitanta itingka unytju nyinanytjikitja.

²² Ka ngura nyara palula minyma Kainangga ngurara pitjangu Jesulakutu munu palula mirara wangkangu alatji, "Davidakun katja, ngalturiwatju! Ngayuku untalpa mamutjara pika pulka nyinanyi."

²³ Ka Jesulu kulira wantingi paluru wangkanyangka ngapartji wangkanytja wiyangku. Ka minyma paluru rawangku tjananya mirara wanarinangi, kaya nintintja tjutangu Jesula wangkangu, "Paira iyala! Palangkulanya rawangku alatjitu mirara wanarinanyi."

²⁴ Ka Jesulu wangkangu, "Wiya, Godalu ngayunya anangu Israealkunu tjutakutu kutju iyanu, panya paluru tjana tjiipi kawalirinytja tjuta purunypa nyinanyi kutjupangku atunymankunytja wiya."

²⁵ Ka minyma paluru kulira pitjala Jesula tjinangka tultjungarakatira wangkangu, "Mayatja, ngalturingkulatju palyala!"

²⁶ Ka Jesulu wantira palula wangkangu, "Wiya, ngayulu anangu Jew tjuta palyantja wiyatu, mununa nyaaku ngura kutjupitja Jew wiya tjuta-warara palyalku? Wanyu minyma kulila, panya paluru tjitji palumpa tjuta-warara mai ungkula paltjalpai munu palulanguru tjana paltjaringkunyangka kutju lampi tjuta papa tjuta ungkupai."

²⁷ Ka minymangku wangkangu, "Uwa mulapa Mayatja, palu panya tjitji tjutangu ngalkunnyangka mai lampi tjuta taipulanguru punka-punkalpai, kaya papa tjutangu ngalkupai."

²⁸ Ka Jesulu palula wangkangu, "Minyma ngana, wirun wangkangu! Mulapa nyuntu ngayuku pulkara mulamularinganyi, kana palulanguru nyuntu pala mukuringkunytja palyalku." Ka mulapatu palumpa untalpa mapalku palyaringu nyara palula-aratu.

Jesulu Anangu Tjuta Palyarunguntja

²⁹ Ka ngula Jesulu ngura panya palunya wantikatira malaku anu uru Galileelakutu munu nyara palula uru kantilypa warara anangi munu paluru pulu murpungka tjukutjuku ma-tatira nyinakatingu.

³⁰ Ka anangu winki mulapa palulakutu pitjangi, munuya pikatjara tjuṭa kulukulu ngalya-katingi panya lurpalpai tjuṭa, kuru pati tjuṭa, nyumpu tjuṭa, tjaa pati tjuṭa, pina pati tjuṭa kulu munu pika kutjupa kutjupa tjuṭatjara kulu. Munuya ngalya-katira Jesula tjinangka itingka ngaritjunangi, ka tjananya uwankara palyarunguningi.

³¹ Kaya anangu tjuṭangu nyakula nguwankeuringu tjaa patingku wangkanyangka munu lurpalpai tjuṭa palyaringkunyangka, nyumpu tjuṭa para-ngaranyangka, munu kuru patingku nyakunyangka. Munuya Godanya mirawanira walkuningi panya Israelku Godanya.

Jesulu Piruku Anangu Winki 4,000 Maingka Paltjantja

(Markaku 8:1-10)

³² Ka palulanguru Jesulu nintintja tjuṭa altira tjanala wangkangu, “Ngayulu ngalturinganyi anangu nyanga tjuṭaku, panya ngayula nyanganpa nyinangi tjinu mankurpa ka kuwari mai wiya tjanampa ngalkuntjaku. Kana puṭu kulini tjana iwarangka paltjatjiratja ankunytjaku. Tjinguruya ngururpaṭu uparingkula punkalku.”

³³ Kaya nintintja tjuṭangu palula tjapinu, “Palu yaaltjingkala wanyu mai nyanga pulka mantjilku anangu winki paltjantjikitjangku? Nyangatja ilytji, ngura parari alatjitu.”

³⁴ Ka Jesulu tjanala tjapinu, “Palu mai tampa yaaltjitu nyura wanyu kanyini?”

Kaya wangkangu, “Mai 7 munu kuka antipina mankurpa kulu.”

³⁵ Ka Jesulu wangkangu anangu tjuṭa mantangka nyinakatinytjaku.

³⁶ Munu mai panya 7 mantjinu kuka panya antipina kulu munu Godanya mainguru panya pukularira walkunu munu palulanguru mai katantara nintintja tjuṭa ungu anangu tjuṭa para-ungkunytjaku.

³⁷ Kaya uwankarangku mantjira ngalkula paltjaringu, kaya palula malangka nintintja tjuṭangu mai lampi mutun-mutunpa tjuṭa tjana ngalkula wantinytja mantjira piti 7-ta tjaalyngaratjunu.

³⁸ Uwa, ngura nyara palula wati 4,000-tu mai palunya ngalkunu, winki mulatu. Ka minyma tjitji kulukulu pala palula nyinangitu munuya uwankarangku ngalkula paltjaringu.

³⁹ Ka palula malangka Jesulu anangu uwankara ngurakutu witunu munu pautangka tatira anu ngura ini Makatantakutu.

16

Anangu Tjuṭangu Jesunya Wituwituntja Miracle Palyantjaku

(Markaku 8:11-13; Luke-aku 12:54-56)

¹ Kaya wati Paratji tjuṭa munu Tjatjutji tjuṭa kulu Jesulakutu pitjangu munuya palunya ngunti arkara wituwituningi alatji wangkara, “Nyuntunya kunyu Godalu ilkaringuru witulyanu. Kalanya wanyu nintila munu kutjupa kutjupa witulya pulkangku palyala, kala nyakula kulilku, ‘Munta mulapa wati nyangatja Godalanguru pitjanytja.’ ”

² Ka Jesulu tjanala wangkangu, “Wiya, wanyuya kulila! Panya kutjupa-ara tjinu ma-tjarpanyangka ngangkali tjuṭa wirura irnyara tjitin-tjitaripai, ka nyura nyakula wangkapai, ‘Nyawa nyara

ngangkali tjitin-tjitariningu. Tjinguru mungawinki ilkari ngaraku minangku puyintja wiya.'

³ Munu kutjupa-ara katjarungkannyangka tjiñtukutu ngangkali tjuṭa palu purunypatu irnyara tjitin-tjitaripai, ka nyura nyakula wangkapai, 'Nyawa nyara ngangkali tjitin-tjitariningu. Tjinguru minangku kuwari puyilku.' Uwa, mulapatu nyura nintingku wangkapai ilkari nyakula. Palu nyura miracle kutjupa kutjupa tjuṭa nyakula puṭu kulini Godalu kuwari palyannyangka.

⁴ Alatjiṭu nyura kura tjuṭa nyinanyi, Godanya kulira wantipai. Mununi nyura nyaaku rawangku wituwituni miracle kutjupa kutjupa tjuṭa witulyangku palyantjaku? Tjinguru nyura ngayuku nyakula mulamularingkunytjikitja mukuringanyi. Palu wiya, nyura ngayuku puṭu mulamularingkupai munu nyura ngunti arakara tjapini. Ka nyara palulanguru Godalu kutjupa kutjupa nyura nyakunytjaku witulyangku palyantja wiyangku wantinyi, panya paluru nganmanytju wati wangkatjara ini Jonah-nya iyanu nyura kulira nintiringkunytjaku, ka nyura uti ara nyara palunya kulintjatjanumpa nintiringama."*

Paratji Munu Tjatjutji Tjuṭaku Yiitja
(Markaku 8:14-21)

⁵ Munu paluru pautangka tatinu palumpa nintintja tjuṭangka tjungu munuya uru panya pulkangka ma-itipiringi. Munuya patunguru kutju kulinu nintintja tjuṭangkanu panya tjana mai katinytjaku watarkuringu.

⁶ Ka Jesulu tjananya wangkara ngulutjunangi alatji, "Purkarangkuya kulinma munuya Paratji, Tjatjutji tjuṭaku yiitja ngulu nyangama."

⁷ Kaya nintintja tjuṭangkanu nyangatja kulira tjanankulta wangkara kuliningi, "Nya nyanganku wangkanyi? Tjinguru nganana mai wantikatinyangka paluru alatji wangkanyi."

⁸ Ka Jesulu nintingku kuliningi panya tjana wangkanytja munu tjanala wangkangu, "Nyaaku nyuranku wangkanyi mai wiya pitjanytjatjanungku? Nyura tjinguru ngayuku mulamularingkunytja wiyangku wantinyi.

⁹ Wanyu nyura kuwaripatu ngurpa nyinanyi ngayunya kulintja wiya? Tjinguru nyura watarkuringu panya ngayulu wati 5,000 paltjantjittjaku mai panya nyuma kutjara mankurta, ka panya tjana ngalkula paltjaringkunyangka nyura piti tjuṭangka mai tjana wantinytja tjuṭa mantjira tjaalyngaratjunu.

¹⁰ Munu nyura watarkuringu panya ngayulu wati 4,000 paltjantjittjaku mai panya 7-ta, ka panya nyura piti tjuṭangkaṭu tjaalyngaratjunu?

¹¹ Ka yaaltji-yaaltji nyangatja nyanga nyura puṭu alatjiṭu kulini ngayulu wangkanyangka? Panya ngayulu nyurala mai wangkanytja wiya, palu panya nyuranyana wangkangi Paratji munu Tjatjutji tjuṭaku yiitja purkarangku kulira ngulu nyakunytjaku."

¹² Kaya palulanguru nintintja panya tjuṭangkanu kulinulta paluru wangkanyangka, panya nguntiya kuliningi Jesulu yiitja panya mai talṭulpainya wangkanyangka-palku. Palu wiya, paluru Paratji

* 16:4 Nyawa Jonah 1:15—2:6 munu Matthew-ku 12:40.

munu Tjatjutji tjuṭangku tjukurpa ngunti nintintjaku-tawara tjananya wangkara ngulutjunangi.

Peterlu Jesunya Godalu Kalkuntjitja Tjukururungku Wangkanytja
(Markaku 8:27-30; Luke-aku 9:18-21)

¹³ Ka palulanguru Jesunya tjana anu ngura kutjupakutu munuya tawunu ini Tjiitjariya-Pilipaila wirkanu, ka Jesulu nintintja tjuṭangka tjapinu, “Wanyuniya jakultjura! Panya ngayulu Watiku Katjanya, kaniya anangu tjuṭangku ngananya wangkanyi?”

¹⁴ Kaya palula wangkangi, “Kutjupa tjuṭangku nyuntunya wangkapai ‘John Baptistanya’, kantaya tjara kutjupangku wangkapai ‘Iaitjanya’, kaya tjara kutjupangku wangkapai ‘Jeremiah-nya’, munta tjinguru Godaku wangkatjara irititja kutjupa.”

¹⁵ Ka Jesulu tjanala wangkangu, “Ka nyura ngananya ngayunya wangkanyi?”

¹⁶ Ka Simon Peterlu wangkangu, “Nyuntun Christanya, panya Godalu kalkura iyantjanya nganananya wankarunkunytjaku. Nyuntun God titutjara nyinapaiku katja.”

¹⁷ Ka Jesulu palula wangkangu, “Uwa mulapa Simon Jonah-kunu! Wirungkun wangkangu. Palu nyangatja wati kutjupangku nyuntula nintintja wiya, panya Mama ilkaritjangku nyuntunya nintinnyangka kutju nyuntu wangkangu.

¹⁸ Kulila! Ngayulu manta winkingka anangu tjuṭa ngayuku walytjaringkunytjaku palyalku, mununa nyuntunya ngurkantara tjunanyi tjananya atunymara kanyintjaku. Panya ini Peternya wangkanyi ‘Walunya.’ Panya walungkaya wali palyalpai kunpu ngaranytjaku, palu purunypa nyuntu anangu ngayuku walytja tjuṭa kunpungku atunymara kanyilku, kaya ilura miriku ngurakutu ankunytja wiya wankaringkula pakara ngayula tjungu titutjara nyinaku ngayuku walytja uwankara.

¹⁹ Ka Peter, ngayulu nyuntunya key purunypa unpkuku, panya wati mayatjangku palumpa warkaripai kutjupa tjunkupai palumpa wali atunymankunytjaku munu panya waliku key palunya unpkupai anangu kutjupa pitjanyangka tuwa alara tjarpattjankunytjaku, palu purunypana ngayulu nyuntunya tjunanyi anangu kutjupa tjuṭa ngayulakutu wirkakatinytjaku ngayulu tjananya mayatjangku walytjanmara kanyintjaku. Ka nyuntu mantangka nyanga Godaku walytja tjuṭa pailku kutjupa kutjupa palyantja wiyangku wantinytjaku, ka Godalu painnyangka nyakula ilkaringuru pailkuṭu. Ka nyuntu mantangka nyanga tjananya wituwitulku kutjupa kutjupa palyantjaku, ka Godalu wituwitunnyangka nyakula ilkaringuru palyanmankukuṭu.”

²⁰ Munu palulanguru Jesulu tjanala wangkangu alatji, “Kulilaya! Anangu kutjupa tjuṭangka ngayunya jakultjunkuwiyangku wantima, panya ngayulu Christanya Godalu panya kalkuntjanya!”

Jesulu Ilurytjikitjangku Wangkanytja
(Markaku 8:31—9:1; Luke-aku 9:22-27)

²¹ Nyanga palulanguru Jesulu palumpa nintintja tjuṭangka nganmanytju jakultjunangi alatji wangkara, “Ngula ngayulu Jerusalemalakutu ankuku, kaya tjukurtjara kuranyitja tjuṭa, Moseku tjukurpa nintilpai tjuṭa munu wati tjilpi kutjupa tjuṭa kulu ngayuku

pulkara kuraringkuku mununiya witera unkkuku wati kura tjuta ngayunya pikantankunytjaku munu pungkula iluntankunytjaku. Palu ngayulu ilunytjatjanu tjintu kutjara wiyaringkuyangka piruku wankaringkula pakalku.” Alatji Jesulu palumpa nintintja tjutangka wangkangi.

²² Ka Peterlu kulintjatjanungku palunya mauntalpa katira paira wangkangu, “Mayatja, wantima alatji wangkawiyangku! Godalu nyuntunya atunymara kanyilku iluntankunytjaku-tawara.”

²³ Ka Jesulu pinkurarara Peternya painu alatji wangkara, “Ngayulan-guru ara! Nyuntun mamu, munun Satanta kulira wangkanyi. Nyuntun anangungku kulintjitja kutju kulini Godalu kulintjitja kulintja wiyangku.”

²⁴ Munu palulanguru Jesulu nintintja tjutangka wangkangu, “Kutju-pangku ngayunya wanantjikitja mukuringkulampa uti paluru walyt-jangku kulira palyantja wiyangku wantima, munu ngayunya kutju kulira wananna. Tjinguruya nyuranya iluntankuku ngayunya wanannyangka, ka nyangatja palya, nyura uti ilunytja kulira nguluringkuwiyangku wantima munu ngayunya tungun-tunguntu wananna titutjarangku.

²⁵ Panya anangumpa mantangka kutju rawa wanka nyinanytjikitja mukuringkulampa paluru ngula ilura wiyaringkuku alatjitu Godala tjunguringkunyitja wiya, panya paluru mantaku pulkara mukuringkula ngayunya wantipai munu ilunytjaku kulira nguluringkupai. Palu tjinguru anangumpa nguluringkuwiyangku ngayunya titutjarangku wanannyangkampa tjana palunya pungkula iluntankuku, ka nyara palulanguru paluru ilunytjatjanu wankaringkuku munu Godala tjunguringkula titutjara wanka mulapa nyinaku.

²⁶ Palu anangungku mantatja tjutaku mukuringkula winki mulapa mantjira kanyirampa ngula paluru ilura nyaaringkuku? Wiya, paluru ilura kawankatiku, panya paluru mantatja wiru tjutaku mukuringkula Godanya wantingi, ka mantatja tjutangku palunya putu wankarunanyi Godala tjunguringkula titutjara nyinanytjaku. Panya Godalu anangu kutjupa mantatja tjuta unkkunyangka putu wankarunanyi wanka titutjara nyinanytjaku. Tjinguru pulka mulapa unkkunyangka Godalu pututu palunya wankarunanyi.

²⁷ Uwa, nyura ngayunya Watiku Katjanya titutjarangku wananna mantatja kutjupa kutjupa tjuta wantira, panya ngula ngayulu malaku pitjaku angelpa tjutatjara. Panya Mamalu ngayunya pulkara witulyankuku kana pitalytji pulkangka pitjala anangu uwankara ngurkantara tjaralku. Mununa wiru palyalpai tjuta wiru mulapa unkkuku mununa kura palyalpai tjuta paira iyalku ngura kurakutu.

²⁸ Tjucarurungkuna nyurala wangkanyi, panya nyura nyanga kuwari ngaranyi, munu nyura kutjupa tjarangku ngula ilunytja kuwaripangka wankangku nyakuku ngayulu Watiku Katjangku Godaku walytja tjuta mayatjangku kanyinnyangka.” Alatji Jesulu wangkara nintiningi palumpa nintintja tjutangka kulira mulamularingkunytjaku.

Jesunya Puli Murpu Katu Kutjuparinytja

(Markaku 9:2-13; Luke-aku 9:28-36)

¹ Munu palulanguru tjiñtu mankur-mankurpa ngarala wiyaringkungangka Jesulu altingu Peternya munu wati panya kutarara Jamesanya pulanya Johnnga munu tjananya mauntalpa katingu puli murpu katu mulapa.

² Ka nyara palulalta tjanala mirangka Jesunya kutjuparingu. Kaya palunya nyangu yunpa tjiñtu purunypa pulkara irnyannyangka, ka mantara palumpa piranpa mulararingu munu pulkara irnyaningi.

³ Kaya wati panya mankurtu nyangu Mosenya pulanya Ilaitjanya utiringkula Jesula tjungu ngarala wangkanyangka.

⁴ Ka Peterlu Jesula wangkangu, "Mayatja, nyanga kuwarila wirura nyangangka ngaranyi. Ka nyuntu mukuringkunyangkala tjinguru wiltja mankurpa palyalku, kutju nyuntumpa, kutju Moseku, munu kutju Ilaitjaku. Palya?"

⁵ Ka Peterlu ngarala Jesula wangkanyangka ngangkali piranpa mulatu ukalingkula tjananya uwankara tjutunu, kaya wangka kulinu ngangkali unngunguru alatji wangkanyangka Godalu, "Nyangatja ngayuku katja. Nyanga palumpa pulkara alatjiñtu pukularinyi. Kaya palula wanganarangku kulinma!"

⁶ Kaya nintintja panya mankurtu wangka kulira pulkara urulyaranu munuya yunpa kutitjura mantangka watungarakatingu.

⁷ Ka Jesulu pitjala tjananya pampura wangkangu, "Pakalaya nguluringkuwiya!"

⁸ Kaya pakara nyangu Jesunya kutju alatjiñtu ngaranyangka kutjupa itingka ngaranytja wiya.

⁹ Munuya pulinguru ukalingangi mantakutu, ka Jesulu tjananya wangkara painu, "Kuware panya nyura nyakunytjaya anangu kutjupa tjutangka tjakultjunkuwiyangku wantima. Palu palyaya ngula tjakultjunama ngayulu Watiku Katjanya ilunytjatjanu pakannyangka malangka kutju."

¹⁰ Kaya nintintja tjutangku palula tjapinu, "Nyaakuya panyatja Moseku tjukurpa nintilpai tjutangku wangkapai Ilaitjanya-warara pitjanytjaku?"

¹¹ Ka Jesulu wangkangu, "Uwa, Ilaitjanya mulapa pitjanyi nganmanypa anangu tjutangka wangkanytjikitja kulil-kulilpa patara nyinanytjaku.

¹² Palu tjukarurungkuna nyurala wangkanyi, panya Ilaitjanya nganmanypa pitjangu, kaya palunya papulara kurara pungangi tjananku pukulmankunytjikitjangku, munuya palu purunymankukuñtu Watiku Katjanya."

¹³ Kaya palulanguru nintintja tjutangku kulinulta, "Munta-uwa, nyangangu wati panya John Baptistanya wangkanyi."

Jesulu Tjiti Mamutjara Palyarunguntja

(Markaku 9:14-29; Luke-aku 9:37-43)

¹⁴⁻¹⁵ Munuya palulanguru pulinguru ukalingkula mantangka anangu tjutangka wirkanu, ka wati kutjupa Jesulakutu pitjala tultjungarakatira palula wangkangu, "Mayatja, ngalturingama wanyu ngayuku katjaku, panya paluru rawa nguwanpa tjinanpungkula

witaly-witalyari pai munu kutjupa-ara warungka tjarpapai urungka kulu.

16 Kaṅa nyuntumpa nintintja tjuṭakutu katingu, palu puṭuya palyaningi.”

17 Ka Jesulu kulira tjituru-tjitururingu munu tjanala wangkangu, “Nyura mulapa uwankara puṭu alatjitu mulamularinganyi munu titutjarangku ngunti kulini. Kaṅa yaaltjitu-arangku nyuranya nyinara nintilku nyura kulira mulamularingkuny tjaku? Pakuringanyina nyuranya rawangku nintira nintira. Tjitji palunya ngalya-kati ngayulakutu!”

18 Munu Jesulu mamu panya tjitjingka unngutja painu ka mapalku pakana tjitjinguru panya, ka tjitji paluru nyara palulatu palyaringu.

19 Ka palula maṅangka palumpa nintintja tjuṭangku paluru tjana-kutjuringkula Jesula tjapiningi, “Nyaangurula panyatja nganaṅa mamu puṭu painingi?”

20-21 Ka Jesulu wangkangu, “Wiya, nyura Godaku puṭu mulamularingkula rapa tjukutjuku ngaranyi. Palulanguru nyura puṭu painingi. Palu wanyuya uninypa tjukutjuku kulila. Panya mantangka tjunkunyangka uninypa paluru pakara punu pulkaringkupai, ka palu purunypa nyura Godaku tjukutjuku mulamularingkulampa nyura punu nyanga pulkangka wangkaku iwiri winki pakara ankula uru pulkangka ngururpa ngarany tjaku. Ka mulapatu punu paluru ankuku nyura witunnyangka, munu nyura kutjupa kutjupa tjuṭa mulapalta witulyangka palyalku.”*

*Jesulu Ilunytjikitjangku Wangkanytja
(Markaku 9:30-32; Luke-aku 9:43-45)*

22 Munuya nintintja uwankara ngura Galileela tjunguringu, ka Jesulu wangkangu tjanala, “Panya wati kutjupangku ngayunya Watiku Katjanya nintilku wati mirpaṅtju tjuṭangka, kaṅiya witera katira iluntankuku.

23 Ka ilunytjatjanu wankaringkula pakalku tjintu kutjara wiyaringkula.”

Kaya nintintja tjuṭa alatji wangkanyangka kulira pulkara tjituru-tjitururingu.

Timpulaku Mani Ungkuny tjaku

24 Ka Jesunya tjana Kapunimala wirkankunyangka wati timpulaku mani mantjilpai tjuṭa tjanalakutu pitjangu munu Peterla tjapinu alatji, “Nyurampa nintilpaingku wanyu mani timpulaku ungkupai? Panya ara ngaranyi anangu uwankarangku rawangku ungkuny tjaku.”

25 Ka Peterlu wangkangu, “Uwa panya!”

Munu palulanguru tjana ngurakutu anu ka wirkankunyangka Jesulu Peternya wangkangu, “Simon, nyuntu yaaltji kulini? Mantatja tjuṭaku mayatja tjuṭangku tax mani nganala tjanalanguru mantjilpai? Tjanampa katja tjuṭanguru munta anangu nguraritja tjuṭanguru?”

26 Ka Peterlu wangkangu, “Wiya, anangu nguraritja tjuṭanguruya mantjilpai.”

* 17:20-21 Wati kutjupangku kunyu verse 21 walkatjanu munu mala tjungunu Matthew-ku tjukurta alatji: *Palu mamu nyanga palu purunypa nyura mai wantira Godala pulkara tjapira kutju pailku.*

Ka Jesulu wangkangu, “Uwa, ka panya mayatja palumpa tjanampa katja tjutangku tjananya ungkupai wiya. Ka ngayulu kulu mayatja pulkaku katja nyinara tjananya ungkunyjtaku wiyatu ngaranyi.

²⁷ Palu palya nyuntu ngali tjananya ungama ngalimpa mirpanarinyjtaku-tawara. Ka nyuntu wanyu uru pala pulkakutu ara, munu mukulpa panya kuka antipina witiipainya wani urungka, munu nyuntu kuka nganmanyitja witiira kuka nyara palula tjaangka unngu nyakuku mani tjiilpa ngarinyangka. Mani pala paluru nyuntumpa ngalimpa timpulaku ungkunyjtaku, ka tjananya katira uwa timpulaku mani mantjilpai tjuta.”

18

Ngananya Kuranyitja Pulka Nyinaku?

(Markaku 9:33-37; Luke-aku 9:46-48)

¹ Ka nyara palula ara nintintja tjutangku Jesula pitjala tjapinu, “Godalu nganannya mayatjangku kanyira ngananya wanyu kulini kuranyitja pulka mulapa nyinanyjtaku kutjupa tjutangka waintara alatjitu?”

² Ka Jesulu alatji tjapinnyangka kulira tjitji tjukutjuku altingu munu tjanala ngururpa ngaratjunu.

³ Munu wangkangu tjanala alatji, “Tjukururungkuna nyurala wangkanyi, panya nyura kampa kutjuparira tjitji nyanga purunyarinyangka kutju Godalu nyuranya mayatjangku walytjanmara titutjarangku kanyilku. Palu nyura wantinyangka paluru nyuranya wantiku.

⁴ Ka panya nyura ngayula tjapiningi ngananya wanyu pulka mulapa nyinaku. Palu tjitji nyangaya nyawa munuya wanyu kulila, panya paluru kanany-kananyarira walytjangku mirawanipai wiya nyinanyi, ka nyura tjitji nyanga purunyarira nyinanyangka kutju Godalu nyuranya pulkanmankuku. Panya tjitji nyangatja ngayuku kurunpa winki mulamularinganyi.

⁵ Ka tjinguru nyura ngayuku nintingu tjitji tjukutjuku nyanga purunypa mantjira pukultu walytjanmankulampa nyura ngayunya kulu walytjanmananyi.

Kura Mulamulangku Wantira Godanya Kutju Pulcara Kulintjaku

(Markaku 9:42-48; Luke-aku 17:1-2)

⁶ “Palu kulilaya! Tjinguru watingku anangu kutjupangka liringka puli pulka tjungura karpira palunya puli winki uru ngatingka waniku, ka alatji wiru wiya, kura alatjitu. Palu tjinguru tjitji ngayuku mulamularingkupai nyinanyi, ka anangu kutjupangku palunya wituwitulku kura palyantjaku, ka alatji wiru wiya kura pulka mulapa nyara urungka waninytjitjangka munkara mulapa. Panya pika pulka mulapa utiringkuku anangu nyara palumpa paluru tjitji tjukutjuku nyanga purunypa kuraringkunyjtaku palyannyangka.

⁷ Uwa, manta winkingka anangu kura tjuta nyinanyi munuya paluru tjana rawangku anangu kutjupa tjuta ngayulanguru mukumukura mauntara katipai. Palu anangu nyara palunya tjananya Godalu pulkara alatjitu pungkuku anangu tjuta ngunti kurantjitjanguru.

⁸ Ka nyura uti kura tjuta wantinyjtikitjangku pulkara kulinma munu wantima alatjitu kuraku piruku mukuringkunyitja wiyangku.

Tjinguru nyuntu marangku kura kutjupa kutjupa palyalku. Palu uti nyuntu mara katara wanima kura rawangku palyantjaku-tawara, munu palyalta mara wiya nyinama, panya nyuntu mara winkingku kura rawangku palyannyangka Godalu nyuntunya ngura kurangka waniku waru pulkangka. Munta tjinguru nyuntu tjinangku kura kutjupa kutjupa palyalku. Palu uti nyuntu tjina katara wanima kura rawangku palyantjaku-tawara, munu palyalta tjina wiya nyinama, panya nyuntu tjina winkingku kura rawangku palyannyangka Godalu nyuntunya palu purunypatu ngura kurangka waniku waru pulkangka titutjara kampanytjaku.

⁹ Munta tjinguru nyuntu kurungku kutjupa kutjupa nyakula kura palyalku. Palu uti nyuntu kuru warpura wanima kura rawangku palyantjaku-tawara munu palyalta kurutjara nyinama, panya nyuntu kuru winkingku kura rawangku palyannyangka Godalu nyuntunya ngura kurangka waniku waru pulkangka." Alatji Jesulu tjananya wangkara ngulutjunangi kura mulamulangku wantinytjaku munu Godanya kutju pulkara kulintjaku.

Tjukurpa Tjiipi Kawankatinytja
(*Luke-aku 15:3-7*)

¹⁰⁻¹¹ Munu piruku tjanala wangkangu, "Tjitji tjukutjuku nyanga purunypaya analwiyangku wantima, panya ngura ilkarangka nyanga palumpa tjanampa angelpa tjuta ngayuku mamangka tjungu titutjara nyinanyi."*

¹² Munu piruku tjukurpa kutjupa kampa kutjupara wangkangu alatji, "Nyaa nyura kulini? Panya watingku tjiipi 100 kanyini, ka tjinguru tjanalanguru kutju kawankatinyangka wanyu paluru wantiku? Wiya, paluru 99 panya ukiri ngalkunnyangka wantikatira ankula tjiipi panya palunya ngurilku.

¹³ Munu paluru ngurira nyakula mantjira pulkara alatjitu pukulariku. Panya paluru 99 ngurangka nyinanytja tjutaku pukularipai, palu tjanala munkara mulapa paluru pukulariku tjiipi panya kutjuku panya paluru ngurira mantjintjitjaku.

¹⁴ Ka tjitji nyanga tjuta tjiipi purunypa nyinanyi, ka nyara tjiipi atunymankupai purunypatu nyurampa mama ilkaritja tjitji nyanga palumpa tjanampa pulkara mukuringanyi, munu paluru kawalirinyangka wantinytja wiyangku ngurira mantjira wankarunkunytjikitja mukuringkupai.

Godaku Walytja Kutjupangku Nyuntunya Kurannyangka Alatjinama
(*Luke-aku 17:3*)

¹⁵ "Tjinguru Godaku walytja kutjupangku nyuntunya kuralku. Ka nyuntu uti palulakutu anama munu paluru nyupali mauntalpa tjungurinkula nyuntu palunya purkarangku wangkara nintinma panya paluru nyuntunya kurantjanguru. Ka paluru tjinguru nyuntula kulira kuntaringkuku munu nyuntumpa malaku kalyparingkuku.

¹⁶ Palu tjinguru paluru kulilwiyangku wantinyangkampa nyuntumpa malpa kutju munta kutjara alti munuya tjungungku ankula

* **18:10-11** Wati kutjupangku kunyu verse 11 walkatjunu, munu mala tjungunu Matthew-ku tjukurta alatji *Panya Watiku Katjanya anangu kawalirinytja tjuta ngurira mantjintjikitja pitjangu tjana Godaku ngurpa nyinanyangka.*

anangu panya palula wangka. Panya nyiringka iriti walkatjunkunyta ngaranyi alatji,

‘Tjinguru nyuntu anangu kutjupa nyuntunya kurantjanguru pultura wangkanytjikitja mukuringanyi. Munu uti nyuntu kutjungku ankula wangkanytja wiya, palu anangu kutju, munta kutjara nyuntunya kurannyangka nyakunyjtija kulu palulakutu ngalya-kati munuya mankurtu palunya wangkama.’

17 Ka rawangku kulira kuntaringkuwiyangku wantinyangkampa palunya Godaku walytja tjutakutu katira tjutangka mirangka wangka. Ka palu purunypatu tjutangka mirangka tungun-tungunpa ngaranyangkampa palya palunya kuranmara painma. Panya paluru anangu mantatja kulilpai tjuta purunypa nyinanyi Godaku mulamularingkupai wiya, wati panya kamantaku mani mantjilpai tjuta purunypa.”

Mankurpa Tjunguringkunyangka Jesunya Tjanala Tjungutu Ngaranyi

18 Munu Jesulu piruku tjanala wangkangi palumpa nintintja tjutangka panya, “Kulinmaya! Tjucarurungkuna nyurala wangkanyi tjukurpa nyangatja. Nyura tjinguru mantangka nyanga Godaku walytja kutjupa pailku kutjupa kutjupa palyantja wiyangku wantinytjaku, ka Godalu ilkaringuru nyakula pailkutu. Ka tjinguru nyura mantangka nyanga tjananya wangkaku kutjupa kutjupa palyantjaku, ka Godalu ilkaringuru nyakula palyanmankukutu.

19 “Pirukuna nyurala wangkanyi alatji, tjinguru anangu kutjarangku tjunguringkula wangkara kulira palyanmankula Mamala tjapilku, ka Mama Ilkaritjalu kulintja kutjuringkula tjapinyangka kulira pulampa palyalku alatjitu.

20 Panya anangu kutjara munta tjinguru mankurpa ngayuku mulamularingkula paluru tjana tjunguringkunyangka ngayulu tjanala tjunguringkula alatjitu ngaraku.”

Anangu Tjutaku Ngalturingkunyjtaku

21 Ka Peterlu ilaringkula Jesula tjapinu, “Mayatja, Godaku walytja kutjupangku ngayunya rawangku kurannyangkampa ngayulu yaaltjitu-arangku palunya kalypangku wantiku pungkuwiyangku? 7-arangkuna wantiku mununa ngula pirukutu kurannyangkampa nyaalku? Pungkukuna?”

22 Ka Jesulu wangkangu, “Wiya, 7-arangku wiya. Palu wantha alatjitu kalypangku ngula piruku pungkunyjtikitjangku kulintja wiyangku.

23 Panya Godalu anangu tjuta mayatjangku walytjanmara kanyintja ara nyanga palu purunypa ngaranyi. Panya wati mayatja pulka nyinangi munu paluru wati kuranyitja tjuta mani unytjungku ungupai ngula malakungku ungunytjaku. Munu kutjupa-ara paluru kulinu, ‘Wanyu kana kuwari nyiringka panya nyawa wati nganaluni panyatja ngapartji ungunytjaku ngaranyi.’

24 Munu nyiri alara ini tjuta nyakula wanara ini kutju nyangu, panya ini paluru mani pulka mulapa palunya malakungku ungunytjaku ngarangi. Ka mayatjangku palumpa waraka kutjupa wituu ini panya

palunya ankula ngalya-katinytjaku. Ka ankula wati panya palunya alтира ngalya-katingu.

²⁵ Ka wati panya paluru puṭu kulinu ngapartji ungkunyjtikitjangku tjukutjuku kanyintjatjanungku. Ka mayatja panyangu wangkangu, 'Wati nyanga palunya kuri ttitji winki munu paluru kanyintja uwankara kulu katira anangu kutjupangka tjalamilanma manikit-jangku mununi mani mantjira ngayunya ngapartji uwa.'

²⁶ Ka wati panya paluru mayatjangka tultjungarakatira wangkangu, 'Wanyu kuwaripa purkara patala, kananta uwankara malakungku purkarangku ungkukatima!'

²⁷ Ka mayatja panya palumpa ngalturingu, munu kalypangku wantira iyaṇu ka anu.

²⁸ "Munu ma-pakara wati warka kutjupa nyangu munu kulinu, 'Wati nyanga palunya panya mungatu mani tjukutjuku ungu, kani ngapartji ungkunyitja wiyatu.' Munu wati panya palunya witera lirintara wangkangu, 'Walangkuni uwa ngapartji panya mungatunanta ungu!'

²⁹ Ka wati panya warripaingu palula tultjungarakatira palula ngatjira wangkangu, 'Mayatja! Wanyu kuwaripa purkara patala, kananta ngula uwa!'

³⁰ Palu wati panyangu kulira wantingu palumpa ngalturingkunyitja wiyangu alatjitu, munu palunya tjailangka tjarpatjunu tjaila unngunguru payamilara wiyantjaku.

³¹ Kaya warripai kutjupa tjuṭangku alatjirinyangka nyakula mirpanaringu munuya ankula mayatja panya pulkangka uwankara tjakultjunu tjana nyakunyjtatjanungku.

³² Ka mayatjangu panya wituṇu wati palunya altinytjaku, kaya alтира wirkakatingu. Ka mayatjangu panya palula wangkangu, 'Nyuntun wati kura mulapa! Panya nyuntu ngayunya pulka mulapa malakungku ungkunyitjaku ngaranyi, kananta ngatjinnyangka kaly-pangku wantir'iyaṇu.

³³ Kan uti nyuntu ngapartji wati panya warka kutjupaku ngalturingamatu ngayulu purunypa.'

³⁴ Munu mayatja panya paluru palumpa pulkara alatjitu mirpanaringu munu palumpa warangka wangkangu, 'Wati nyanga palunya tjailakutu ma-kati, kaya tjaultji tjuṭangku palunya pulkara puwa. Ka nyara tjailangka nyinara paluru mani panya palunya uwankara ngayunya malakungku ungkula kutju pakalku.' "

³⁵ Munu Jesulu nyangatja wangkara wiyaringkula tjanala wangkangu, "Ngayuku mama ilkaritja mayatja nyanga palu purunypa nyinanyi. Panya nyura ngaltunytjungku anangu tjuṭa kalypangku wantinyangka paluru ilkaringuru nyuranya kalypangkuṭu wantiku, palu nyura tjanampa kalyparingkunyitja wiya rawa kuraringkuyangkampa paluru nyurampa kalyparingkunyitja wiyanguṭu wantiku."

19

*Kuri Wantikatiwiyangu Wantima
(Markaku 10:1-12)*

¹ Munu tjukurpa nyanganpa wangkara wiyaringkula Jesunya ngura Galileenya wantikatira ulpariralku anu manta panya Judealakutu

munu nyara palulanguru piruku kakarara anu karu panya urutjara ini Jordantakutu munu itipirira ma-wirkanu karungka kampa kutjupa.

² Ka anangu winki mulatu palunya wananingi, ka ngura nyara palula paluru pikatjara tjuṭa palulakutu katinyangka palyarunguningi.

³ Kaya wati Paratji tjuṭa palulakutu pitjangu munuya palunya ngunti arkara tjapiningi alatji wangkara, “Wanyulanya tjakultjura! Mulapa wanyu watingku minyama kuri wantinytjaku ngaranya ara kutjupa kutjupanguru? Mulapa wanyu Moselu alatji wangkangu?”

⁴ Ka Jesulu tjanala wangkangu, “Nyiringka nyura wanyu nyakunytja wiyatu? Panya kuwaripatjara mulapa Godalu anangu palunu wati munu minyama.

⁵ Ka nyanga palulanguru panya watingku mama ngunytju wantikatira minyama kuri altira pula kutjuringkupai.

⁶ Uwa, panya kutjara ngaranytjatjanu kutjuringkupai, ka pala palulanguru uti wati palumpa kuringuru tjararingkunytja wiya palula tjungu titutjara nyinama, panya Godalu wati palunya minyama kuringka tjungunu.”

⁷ Kaya Paratji tjuṭangu wangkangu, “Wiya, panya Moselu walkatjunu alatji, ‘Watingku kuri wantinytjikitja mukuringkula uti nyiringka walkatjura ungama minyama panya palumpa kuri nyiri mantjira ankunytjaku.’ Nyaanguru paluru alatji walkatjunu?”

⁸ Ka Jesulu wangkangu, “Wiya, panya kuwaripatjara mulapa Godalu wati minyama palyanu tjungu titutjara nyinanytjaku wantikatinytja wiya. Palu nyura panya tungunpungkula wituwitu nyinanyangka Moselu tjukurpa nyangatja walkatjunu kuri wantikatinytjaku.

⁹ Palu ngayulu nyurala wangkanyi alatji tjinguru minyama kuri wati kutjupangka kampangkaṭu ngarinyangka wati panya palumpa kuringku palunya palya wantikatinyi. Palu minyama kuri palya nyinanyangka wati panya palumpa kuringku palunya wantikatira minyama kutjupa altira kura palyani Godalu wangkanytjitjangka tungunpungkula.” Alatji Jesulu tjanala wangkangi Paratji panya tjuṭangka.

¹⁰ Ka palumpa nintintja tjuṭangu tjukurpa nyanga palunya kulin-tjatjanungku ngulalta palula wangkangu, “Munta-uwa, minyama kuri wati kutjupangka kampangkaṭu ngarinyangka kutju wantikatinytjaku ngaranya kutjupa kutjupa tjuṭanguru wiya, ka nyanga palulangurula kulini kampa kutjupa palyaṭu ngaranya kuri altiwiya kutju nyinanytjaku.”

¹¹⁻¹² Ka Jesulu wangkangu, “Uwa, panya wati kutjupa tjuṭa kuri wiya nyinapai kutjupa kutjupa tjuṭanguru. Panya kutjupa tjarangku tjitji puṭu utilpai, ka tjinguru kutjupatjara tjitji utintjaku-tawara kutjupangu palyanu tjana kuri wiya alatji-alatjitu nyinanytjaku. Ka kutjupa tjarangku kuri altinytja wiyangu wantipai Godaku warṅka kutju palyantjikitjangku. Ka tjinguru nyara palu purunypa nyinanytjaku Godalu wati kutjupangka wangkanyangkampa uti wati paluru wanganarangku kulira kuri altiwiya nyinama. Palu tjinguru wati kutjupa kuri altinytjikitja mukuringkulampa uti paluru ngayulu panya wangkanytjita wanganarangku kulinma munu minyama kuringka tjungu titutjara nyinama palunya wantikatinytja wiya.”

Jesulu Tjitji Tjuta Altinytja
(Markaku 10:13-16; Luke-aku 18:15-17)

¹³ Kaya anangu tjutangka tjitji tjuta ngalya-katingu Jesulakutu tjanala mara tjunkula wangkara tjananya pukulmanytjaku. Kaya nintintja tjutangka anangu palunya tjananya painu.

¹⁴ Ka Jesulu nintintja tjutangka wangkangu, "Tjitji tjukutjuku tjuta ngayulakutu pitjanyangka nyakulaya paintja wiyangku wantima! Panya anangu tjuta tjitji nyanga tjukutjuku tjuta purunypa nyinanyangkampa Godalu tjananya mayatja pulkangku walytjanmara kanyilku."

¹⁵ Munu alatji wangkara paluru tjitji palula tjanala mara tjunkula tjananya pukulmanu, munu palulanguru anu.

Wati Mani Ulytja Pulkatjara
(Markaku 10:17-31; Luke-aku 18:18-30)

¹⁶ Ka tjinu kutjupa wati yangupala kutju Jesulakutu pitjangu munu palula tjaminu, "Nintilpai! Nyaana wiru mulapa palyalku Godala tjungurinkula wanka titutjara nyinanytjikitjangku?"

¹⁷ Ka Jesulu palula ngapartji wangkangu, "Nyaakunin alatji tjaminu? Panya Godanya kutju palya mulapa nyinanyi. Ka panya nyuntu wanka titutjara nyinanytjikitja mukuringkulampa paluru wituntjitja tjuta wanganarangku kulira palyanma."

¹⁸⁻¹⁹ Ka wati panya paluru piruku tjaminu, "Palu wanyuni tjakultjura, wituntjitja yaaltjina tjukarurungku palyalku?"

Ka Jesulu palula wangkangu, "Miri pungkuwiyangku wantima, kuri walytjatjarangka ngariwiyangku wantima, walytjatjara kutitjungkuntja wiyangku wantima, anangu kutjupa ngunti ngukara wangkawiyangku wantima, mamangka ngunytjungka wanganarangku kulinma, munu anangu kutjupa tjutaku pulkara mukuringama nyuntunku mukuringkuntja purunypa."

²⁰ Ka wati panya paluru kulira wangkangu, "Wiya, tjukurpa nyanga palunya tjananya uwankara ngayulu wanganarangku kuliningi. Mununa nyaa piruku palyalku wanka titutjara nyinanytjikitjangku?"

²¹ Ka Jesulu palula wangkangu, "Nyuntu palya mulapa nyinanytjikitja mukuringkula uti ankula nyuntu panya kanyintja uwankara ma-ungama manikitjangku munu mani mantjira ngaltutjara tjuta para-ungama, mununi palulanguru pitjala ngayunya wananma. Munun nyuntu nyara palulanguru ngula ilkarangka wiru mulapalta mantjilku."

²² Ka wati paluru tjukurpa nyangatja kulira pulkara tjituru-tjitururira anu, panya paluru mani ulytja kutjupa kutjupa pulkatjara alatjitu nyinangi, munu palunya tjananya walytjangku kanyintjikitja mukuringangi.

²³ Ka wati paluru ankunyangka nyakula Jesulu nintintja tjutangka wangkangu, "Tjukarurungkuna nyurala wangkanyi, panya wituwitu mulapa ngaranyi anangu mani munu ulytja pulkatjara tjutaku, panya tjana mani ulytja kul pulkara kulira putu Godaku walytjaringanyi paluru tjananya mayatjangku kanyintjaku.

²⁴ Kulilaya! Panya nyiilangka ala utju mulapa ngaranyi. Ka ala nyara palulawanu wanyu kamula tjarapai? Wiya alatjitu. Ka

palu purunypatu anangu mani ulytja pulkatjara tjuta putu Godaku walytjaringanyi paluru tjananya mayatjangku kanyintjaku.”

²⁵ Kaya nintintja tjuangka kulira kawaru-kawaruringu munuyanku ngaparku tjapiningi, “Palu Godalu anangu mani pulkatjara tjuta wantirampa tjinguru anangu kutjupa uwankara kulu ngura kurakutu iyalku wankarunkuntja wiyangu.”

²⁶ Ka Jesulu tjananya tjukarurungku nyakula wangkangu, “Uwa, anangu putu walytja wankaringanyi, palu Godalu kutjungku wankalpai.”

²⁷ Ka Peterlu wangkangu, “Kulila, panya nganana kutjupa kutjupa uwankara wantikatira pitjangu nyuntunya wanantjikitja mukuringkula. Kalanya Godalu wanyu nyaa unkkuku?”

²⁸ Ka Jesulu wangkangu, “Ngula manta ilkari nyangatja wiyaringkunyangka Watiku Katjanya mayatja pulka tjiya wirungka nyinaku manta ilkari kuwaritjangka. Ka nyura ngayuku nintintja panya 12 palu purunypatu tjiya wiru tjuangka kutju kutju nyinaku munu nyura anangu panya Israelkunu tjuta mayatjarira kanyilku walytjapiti kutju kutju wati panya Jacobaku katja 12-nguru.

²⁹ Ka panya ngayunya wanantjikitjangku nyura tjinguru nyurampa wali, munu kuta, kangkuru tjuta, mama, ngunyaju, tjitji tjuta, kaana kutjupa kutjupa tjuta kulu wantikatingu. Ka nyara palulanguru Godalu watarkuriwiyangu nyuranya pulka mulapalta unkkuku, ka nyura palula tjungu wanka titutjara nyinaku.

³⁰ Ka panya kuwari anangu tjara kutjupa pulka nyinanyi, ka tjara kutjupa ngaltutjara nyinanyi. Palu ngula pulka nyinanytjatjanu tjana tjukutjukuringkuku, ka panya tjana ngapartji ngaltutjara nyinanytjatjanu pulkaringkuku.” Alatji Jesulu wangkangi palumpa nintintja tjuangka.

20

Tjukurpa Panya Warka Tjuta Altinytjatjara

¹ Ka Jesulu wangkangu, “Wanyu, kana tjukurpa kutjupa kampa kutjupara wangkama ara panya Godalu anangu tjuta mayatjangku walytjanmara kanyintja utintjikitjangku alatji, panya wati kutjupangu kaana wiru mulapa kanyiningi mai kiripitji tjutatjara. Munu tjintu kutjupa paluru mungawinki mulapa anu tawunukutu wati tjuta ngurintjikitja palumpa kaanangka pitjala warkarinytjaku.

² Munu ankula nyangu wati tjuta warkaku patara ngaranyangka, munu tjananya altira wangkangu, ‘Pitjalaya ngayuku kaanangka warkari, kana nyuranya warkarira mungartjirinyangka \$50 unkkuku.’ Kaya kulira palyanmanu. Ka tjananya witunu ankula warkarinytjaku.

³ Munu palulanguru tjirirpi katuringkunyangka piruku anu wati kutjupa tjuta ngurintjikitja, munu nyangu kutjupa tjuta warka wiya ngaranyangka.

⁴ Munu tjananya wangkangu, ‘Nyaaku nyura warka wiya ngaranyi? Ankulaya ngayuku kaanangka warkari, kana nyuranya warkarira mungartjirinyangka tjukarurungku unkkuku.’

⁵ Kaya mulapatu ankula warkaringi. Ka kalalarinyangka mayatja panya paluru piruku tawunukutu ankula wati kutjupa tjuta nyakula witunu ankula warkarinytjaku. Munu mungartjikutu kulu piruku

ankula palu purunypatu wati kutjupa tjuta witunu ankula palumpa kaanangka warkarinytjaku.

⁶ Munu wiltja wararingkunyangka pirukutu anu munu wati kutjupa tjuta nyangu warka wiya ngaranyangka. Munu tjanala wangkangu, 'Nyaanguru nyura warka wiya ngarala mungartjiringu?'

⁷ Kaya wangkangu, 'Wiya, kutjupangkulanya alinytja wiyatu warkarinytjaku.' Ka tjananya wangkangu, 'Uwa, nyura kulu ankula war kari ngayuku panya kaanangka.' Kaya mulapatu ankula war karingi.

⁸ Ka panya tjintu jarpanyangka wati panya mayatjangku wati war ka tjuta atunymankupai altingu munu palula wangkangu, 'War karipai pala tjuta altira mani uwa. Munu mala pitjanytja tjuta-warara uwa, munu ngururpa pitjanytja tjuta uwa munu palulangurulta mungawinki mulapa pitjanytja tjuta mala uwa.'

⁹ "Ka wati paluru mala pitjala tjukutjuku war karinytja tjuta altingu munu tjananya kutju kutju ungu \$50.

¹⁰ Kaya mungawinki mulapa pitjanytja tjutangku ungunyangka nyakula kuliningi, 'Uwa, tjananya \$50 ungu, palu nganannya kuwari pulka nguwanpa unganyi nganana rawa war karira mungartjirinytjijangka.' Palu tjananya uwankara palu purunypatu kutju kutju ungu \$50.

¹¹⁻¹² Kaya mani mantjira mirpanaringi munuya wangkangi mayatja panya palula alatji, 'Wati nyaranpa panya wiltja war aringkunyangka kutju pitjala tjukutjuku kutju war karingi, kala nganana mungawinkinguru alatjitu kuli pulkangka war karira mungartjiringu, kantilanyan munkara nguwanpa ungama. Nyaakulanyan palu purunypatu uwankara ungu?'

¹³ Ka mayatja panya paluru wati kutjungka wangkangu, 'Kulila, ngayulu nyuntunya kurara ungunytja wiyangku tjukarurungku ungu, panya nganmanytjunanta wangkangu \$50 ungunytjikitjangku tjintu kutju war karinyangka, ka panyan kulira palyanmanu.

¹⁴ Mununku mani nyanga mantjira ngurakutulta ara! Ngayulu panya mukuringanyi wati nyanga mala pitjanytja tjuta \$50 ungunytjikitja nyuntunya purunypatu.

¹⁵ Palya palana alatjitu intjanungku ungu ngayulu mukuringkula, panya nyangatja ngayuku mani kana ngayulu mukuringkula ungu-kupai. Ka nyura nyaaku mirpanarinyi? Tjinguru nyura nyararinganyi ngayulu tjananya intjanungku ungunyangka.' Uwa, nyanga palu purunypa Godalu palumpa walytja uwankara palu purunypatu mukulya pulkangku kanyilpai."

¹⁶ Munu Jesulu tjukurpa wangkara wiyaringkula tjanala alatji wangkangu, "Uwa, mulapa kuwari anangu tjara kutjupa pulka nyinanyi, ka tjara kutjupa ngaltutjara nyinanyi. Palu ngula pulka nyinanytjatjanu tjana tjukutjukuringkuku, ka panya tjana ngapartji ngaltutjara nyinanytjatjanu ngula pulkaringkuku."

*Jesulu Piruku Ilunyitjikitjangku Wangkanytja
(Markaku 10:32-34; Luke-aku 18:31-34)*

¹⁷ Munuya piruku Jesunya tjana nintintja tjuta kulukulu anu Jerusalemalakutu munu tjanala-kutju wangkangi alatji

18-19 “Kulilaya! Nganana nyanga kuwari ananyi Jerusalemalakutu, ka nyara palula wati kutjungku malpangku ngayunya Watiku Katjanya nintilku tjukurtjara kuranyitja tjutangka munu Moseku tjukurpa nintilpai tjutangka kulu, kaniya witiira katira kuutpangka ngaratjungkuku mununiya kuranmara kukanymankunytjatjanungku ngayunya wati Jew wiya tjuta ma-ungkuku ngayunya iluntankunytjaku. Kaniya wati nyara paluru tjana ngayunya anara wangkaku, mununiya wiipangka pulkara alkalku, mununiya palulangurulta ngayunya katira puu katakutjarangka wakara utitjungkuku, kana iluku. Palu tjiutu kutjara wiyaringkula ngayulu ilunytjatjanu wankaringkula pakalku.”

Tjipitiku Kuringku Jesula Tjapintja

(Markaku 10:35-45)

²⁰ Ka Tjipitiku kuringku katja kutjara Jesulakutu katingu wati panya Jamesanya pulanya Johnnga, munu tultjungarakatira palula tjapinu alatji wangkara, “Nyuntula tjapintjikitjana pitjangu.”

²¹ Ka Jesulu wangkangu, “Uwa, nyaa ngayula tjapintjikitjan mukuringanyi?”

Ka wangkangu, “Wiya, ngula panya nyuntu mayatjarira nyinara, ngayuku nyanga katja kutjara nyuntula itingka tjunkunytjakuna mukuringanyi, kutju wakungka, kutju tjampungka, paluru pula nyuntula itingka nyinara, anangu tjuta mayatjangku kanyintjaku.”

²² Ka Jesulu pulala wangkangu, “Wiya nyupali ngurpangku tjapini nintingku-palku. Panya kuwari ngayulu pika pulka mantjini. Ka nyupali wanyu ngayula tjunguringkuku munu pika pulkatu mantjilku?”

Ka pula wangkangu, “Uwali.”

²³ Ka Jesulu wangkangu, “Uwa, mulapa nyupali pika pulka mantjilku munu iluku ngayunya purunypa. Palu panya ngayula wakungka munu tjampungka mayatjarira nyinanytjaku ngayulu puu ngurkantananyi, panya ngayuku mamangku kutjungku nganmanytju ngurkantanu ngayula itingka nyinanytjaku.”

²⁴ Kaya nintintja panya kutjupa tjutangku paluru pula Jesula ngatjinnyangka kulira palumpa pulumpa mirpanaringu.

²⁵ Ka Jesulu tjananya uwankaratu altira wangkangu, “Nyura ninti panya mayatja mantatja tjutaya anangu alatjitu mayatjarira nyinanyi munuya anangu tjuta wituwitura pauntjingalpai kutjupa kutjupa tjuta tjanampa palyantjaku.

²⁶ Ka nyura palunya tjananya arkalwiyangku wantima. Munu nyura tjinguru mayatja pulka nyinanytjikitja mukuringkulampa uti anangu warakaripai purunypa nyinama munu kutjupa tjuta alpamilara palumpa tjanampa palyanma.

²⁷ Uwa, nyura kuranyitja nyinanytjikitja mukuringkulampa uti kutjupa tjutaku warakarima palunya tjananya pukulmankunytjikitja.

²⁸ Tjinguru nyura kulini Watiku Katjanya-manti pitjangu mayatjarira anangu tjuta warakaku wituwituntjikitjampa. Palu wiya, ngayulu pitjangu anangu tjutaku waraka pulka palyara tjanampa ngalkilpa ilunytjikitja tjana wankaringkunytjaku.” Alatji paluru wangkangi palumpa nintintja tjutangka.

Jesulu Wati Kuru Pati Kutjara Kuru Alantja

(Markaku 10:46-52; Luke-aku 18:35-43)

29 Munu Jesunya tjana nintintja tjuṭa kulukulu ngura panya Jerichonya wantikatira ma-pakannyangka anangu tjuṭa mulatu tjananya wanangingi.

30 Ka wati kuru pati kutjara iwara pala palula itingka nyinangi munu pula kulinu Jesunya iwarangka wati-pitjanyangka munu pula mirara wangkangu, "Davidakun katja! Ngalturiwalimpa!"

31 Kaya anangu tjuṭangku pulanya painu pilunarinytjaku. Palu wati paluru pula pulkaratu mirara wangkangi, "Davidakun katja! Ngalturiwalimpa!"

32 Ka Jesulu miranyangka kulira ngarakatingu munu pulanya altira tjapinu, "Ngayulu nyaantjaku nyupali mukuringanyi?"

33 Ka pula wangkangu, "Mayatja! Ngali kuru alaringkula nyakunytjikitja mukuringanyi."

34 Ka Jesunya pulampa pulkara ngalturingu, munu pulanya kuru pampunu, ka pula mapalku kuru alaringkula nyangangi munu pula palunya wanaṅu.

21

Jesunya Tangkiyinka Tatira Jerusalemalakutu Pitjanytja
(Markaku 11:1-11; Luke-aku 19:29-38; Johnku 12:12-19)

1-2 Munuya Jesunya tjana nintintja tjuṭa kulu Jerusalemalakutu malaringkula puli ini Alipatjarala katukutu tatira ma-wirkanu ngura tjukutjukungka itingka ini Pitja-paitjala. Ka ngura nyara palulanguru Jesulu nintintja kutjara witura iyanu alatji wangkara, "Ara pula kuranyu ngura pala ilatjakutu munu wirkara nyupali nyakuku tangkiyi kulunykira karpintja ngaranyangka. Nyara palunya pulanya pula araltjara ngalya-kati.

3 Ka tjinguru anangu kutjupangku nyupalinya nyakula tjapilku, 'Nyaaku nyupali araltjananyi?' Ka pula alatji wangka, 'Wiya, Mayatjanya nyanga palumpa pulampa mukuringanyi.' Ka paluru nyupalinya mapalkungku unku'iyalku."

4 Uwa, ara nyanga tangkiytjara Godalu nganmanytju tjakultjunu wati wangkatjara kutjupangka, ka panya nyiringka iriti walkatjunu nyanga alatji,

5 "Tjanala wangka ngura Tjayanta nyinanytja tjuṭangka nyanga alatji, 'Nyawaya! Nyurampa mayatja pulka kuwari nyurala wirkananyi. Paluru ngaltutjara purunyarira tangkiyinka tatira pitjanyi kananykananypa wiya.

Uwa, paluru nyuralakutu pitjanyi tangkiyi kulunyitja tatira.' " *

6 Ka nintintja panya kutjarangku kulira anu munu pula Jesulu panya wangkanytjitja alatjitu palyanu.

7 Munu pula tangkiyi kulunykira mantjira wirkakatingu palulakutu. Kaya nintintja tjuṭangku upukuta tjananku arara tangkiyinka tjanangka piitatjunu ka Jesunya tatira nyinakatingu.

8 Ka paluru tatira pitjanyangka anangu tjuṭangku palumpa pulkara pukularira tjanampa upukuta tjuṭa araltjara iwarangka lipira tjunkula wanangingi palula kuranyu. Kaya tjara kutjupangku punu parka katara palu purunypatu tjunkula wanangingi.

* 21:5 Tjakaṛayaku 9:9

9 Kaya anangu winkingku kuranyunguru munu malanguru pukularira mirara wangkangi alatji, "Mirawanirala walkunma Davidaku katja! Mayatja God, nyanga palunya pulkara pukulmanama, panya nyuntu palunya iyanu nganannya mayatjarira kanyintjaku. *

Ala, Godanyala walkura mirawanima katutja pulkanya!"
 10 Ka paluru Jerusalemala tjarpanyangka ngura nyara palunya ngurara uwankara pulkara alatjitu pukularingu, munuyanku ngaparku tjapiningi wangkara, "Nganannya wanyu nyangatja?"

11 Kaya kutjupa tjarangku palumpa nintingu wangkangu, "Wiya, Jesunya panya palatja, Godaku panya wangkatjara, ngura panya Nazarethanya ngurara manta nyara Galileelangu."

Jesunya Timpulangka Tjarpanytja

(Markaku 11:15-19; Luke-aku 19:45-48; Johnku 2:13-22)

12 Ka Jesunya timpulaku yaatangka tjarpangu munu nyangu anangu tjutangu kutjupa kutjupa tjuta tjalamilannyangka anangu tjutangka. Munu paluru mirpanarira tjananya uwankara painu, munu taipula manitjara tjuta untura wanira kampa kutjupanu munu taipula tjulpu kuukuuku tjutatjara kulu untura wangu. 13 Munu paluru wangkangu tjanala, "Panya nyiringka iriti walkatjunkunytja ngaranyi Godalu wangkanyitja alatji,

'Ngayuku timpula uti ngayuku alatjitu ngarama anangu winkingku ngayunya tjarpara walkuntjaku.' *

Palu nyura maniku manyu tjutangu timpula nyanga milmita tjarpara anangu tjutangka mani mantjira ngura nyangatja kurani munu wati kutitjunkupai tjutaku wali purunypa palyani."*

14 Kaya kuru pati tjuta nyumpu tjuta kulu palulakutu pitjangu timpulaku yaatangka nyinanyangka, ka palunya tjananya palyarungunu.

15 Kaya wati tjukurtjara kuranyitja tjutangu Moseku tjukurpa nintilpai tjutangu kulu nyangu Jesulu pikatjara tjuta witulya pulkangu palyarungunnyangka, munuya piruku kulinu tjitji tjutangu timpulangka mirara wangkanyangka, panya tjana alatji wangkangi, "Mirawanimala Davidaku katja!" Kaya wati panya paluru tjana alatji nyakunytjatjanu munu kulintjatjanu pulkara mirpanaringu.

16 Munuya Jesula wangkangu, "Nyuntun kulini tjitji nyanga tjutangu wangkanyangka?"

Ka Jesulu wangkangu, "Uwa-mantu, kulinina. Palu nyura wanyu nyiringka nyakunytja wiyatu? Panya alatji ngaranyi,

'Mama God, nyuntu tjitji tjuta iti tjuta kulu nyuntu nyuntunya tjukarurungku mirawanira walkuntjaku.' " *

17 Munu alatji wangkara wiyarangkula Jesulu tjananya wantikatingu munu Jerusalemalangu ma-pakara anu ngura panya Piitjanilakutu munu nyara paluma ngaringi palumpa nintintja tjuta kulu.

Punu Ili Piltiringkunytja

(Markaku 11:12-14,20-24)

18 Munuya ngarira tjinturungkula malaku anu Jerusalemaku, ka Jesunya pinpatja wiya palatjatjiratja anangi.

* 21:9 Psalm 118:26 * 21:13 Aitjayaku 56:7 * 21:13 Jeremiah-ku 7:11 * 21:16 Psalm 8:3

19 Munu ankula nyangu punu ili iwarangka itingka ngaranyangka munu para-nyakula nyangu mai wiya nyalpi kutju alatjitu ngaranyangka munu punu panya ilingka wangkangu, "Punu ngana! Nyanganguru nyuntula mai pakantja wiya alatjitu ngaraku." Ka mulapatu warpungkula alatjitu mapalku piltiringu.

20 Kaya nintintja tjutangku nyakula nguwanukungu, munuya wangkangu, "Yaaltji-yaaltji punu nyangatja warpungkula alatjitu mapalku piltiringu?"

21 Ka Jesulu tjanala wangkangu, "Tjukururungkuna nyurala wangkanyi, panya nyura Godaku mulamularingkula putu kulin-tja wiyangku palyalku alatjitu nyanga ngayulu punu ili wangkara piltintjanya purunypa munu nyura puli nyanga murpu pulkangka kulu wangkaku pakara uru pulkangka tjarpanytjaku, ka mulapatu pakara ankula tjarpaku.

22 Mulapa nyura Godaku mulamularingkula kutjupa kutjupaku palula tjapinyangkampa paluru nyurampa palyalku alatjitu."

*Nganalu Jesunya Tjunu Mayatjangku Wangkanytjaku
(Markaku 11:27-33; Luke-aku 20:1-8)*

23 Ka Jesunya timpulangka tjarpangu munu anangu tjutangka tjukurpa wangkara nintiningi. Kaya wati tjukurtjara kuranyitja tjutangku tjilpi tjutangku kulukulu pitjala palula wangkangi, "Nganalunta nyuntunya wangkangu anangu tjuta timpula nyangan-guru paintjaku? Mununta nganalu iyanu tjukurpa nyangangka wangkara nintintjaku?"

24 Ka Jesulu ngapartji tjanala wangkangu, "Wanyu kana nyurala-warara tjapila, mununa nyura wangkanyangka kutju ngayulu ngapartji nyurala wangkaku nganaluni witu nu nyanganpa palyantjaku.

25 Kaya kuwari ngayula utira tjukururungku wangka, nganalu wanyu Johnnga witu nu anangu tjuta baptise-katinytjaku Godalu munta watingku?"

Kayanku kaputurira wangkangi, "Nyaala wangkaku? Tjingurula wangkaku, 'Godalu palunya witu nu.' Ka alatji wangkanyangka tjinguru paluru wangkaku alatji, 'Ka nyura nyaaku wanyu panyatja Johnku mulamularingkuwiyangku wantingi?"

26 Palu tjinguru nganana wangkaku, 'Wiya palunya watingku panya witu nu.' Ka alatji wangkanyangkampa tjinguru anangu nyanga tjuta kulira nganampa mirpanariku panya paluru tjana Johnnga Godaku wangkatjaranmankupai."

27 Munuya putu para-wangkara kulira Jesula wangkangu, "Wiya ngurpala."

Ka Jesulu tjanala wangkangu, "Ka ngayulu ngapartji nyurala tjakultjungkunyitja wiyangku tu wantinyi panya ngayunya wituntjanya."

Tjukurpa Katja Kutjaratjara

28 Munu Jesulu tjanala piruku wangkangu wati panya tjukurtjara kuranyitja tjutangka munu tjilpi tjutangka kulu, "Wanyu kana tjukurpa kampa kutjupa nyurala wangka, kana nyura kulintjatjanungku tjakultjura nyaa nyura kulintja. Watingku katja kutjara kanyiningi. Munu kutjupa-ara paluru katja pulkangka tjapinu,

'Katja, wanyu ankula nganampa panya kaanangka war̄kari mai kiripitjingga.'

²⁹ "Ka katjangu wangkangu, 'Wiya, wantinyina.' Munu palulanguru mala kulinu ankula war̄karinytjikitjangu, munu ankula kaanangka panya war̄karingi.

³⁰ "Ka mama panya anu katja malatjakutulpi munu palula ngapartji palu purunypatu wangkangu. Ka paluru palyanmanu, palu mala paluru ankula war̄karinytja wiyangu wantingi."

³¹ Ka Jesulu tjukurpa nyangatja wangkara wiyaringkula tjanala tjapinu, "Katja yaaltjingu mamangka wanganarangku kulira ankula war̄karingi?"

Kaya wangkangu, "Katja panya pulkangu."

Ka tjanala wangkangu, "Uwa, tjukarurungkuna nyurala wangkanyu, panya wati kamantaku mani mantjilpai tjuṭa munu minyma watingka pirtjipai tjuṭa-warara Godaku walytjaringkuku paluru tjananya mayatjangu kanyintjaku, ka nyura malaringkuku.

³² Panya Johntu nyurala nganmanytju tjakultjunu kura wantira tjukaruru Godalawanu nyinanytjaku, ka panya nyura kulira wantira palumpa mulamularingkuwiyangu wantingi. Ka panyaya mani mantjilpai tjuṭangu munu minyma watingka pirtjipai tjuṭangu palula kulira palumpa mulamularingu munuya kura wantingu. Ka panya paluru tjana mulamularingkula kampa kutjuparingangka nyura nyangu, palu nyura wantingi alatjitu kulira kampa kutjuparingangka wiyangu." Alatji Jesulu tjanala wangkangi tjukurtjara kuranyitja tjuṭangka munu tjilpi tjuṭangka kulu.

*Wati Kura Tjuṭangu Kaana Kiripitjijara Mayatjaku Kanyintja
(Markaku 12:1-12; Luke-aku 20:9-19)*

³³ Munu piruku Jesulu panya palula tjanala wangkangu, "Wanyu kana piruku tjukurpa kutjupa nyurala wangka ara kutjupatjara, kaya kulila! Wati kutjupa kaana pulkatjara nyinangi munu paluru punu kiripitji tjuṭa tjawara ngaratjura wanaṅu munu apunguru yaata para-palyara arintara patinu munu pitj tjawara wantingu ngula kiripitji kururingkunyangka urara kantura tjulkura waina palyantjikitjangu munu wali wara palyanu katunguru nyakula atunymankunytjikitjangu. Munu palulanguru wati paluru kaana kiripitjijara wati mankurpa kutjupa unytjungku ungkukatingu mani palumpa palyantjaku, munu wantikatira anu ngura parari manta kutjupakutu. Kaya paluru tjana kaana panya palunya atunymanangi.

³⁴ "Ka ngula mai panya kiripitji kururingkunyangka wati panya kaanaku walytjangu wati war̄karipai mankurpa iyanu tjanalakutu ankula mai kiripitji tjarara mantjira palumpa katinytjaku.

³⁵ Kaya wati kaana atunymankupai tjuṭangu wati panya iyantja mankurpa nyakula witiṅu munuya kutju pungu munu kutjupa iluntanu munu kutjupa apungka atunu.

³⁶ Ka piruku wati panya kaanaku walytjangu wati war̄karipai kutjupa tjuṭa ngapartji iyanu, kaya tjananya palu purunymanutu.

³⁷ Ka wati panya paluru mala palumpa katjalta iyanu alatji kulira, 'Wanyu kana gayuku katja iyala, kaya palunya tjinguru wanganarangku kulilku.'

38 Palu wati panya palumpa katja wirkankunyangka nyakula tjananku kaputurira wangkara kuliningi, 'Ai, wati panya palumpa katjampal palatja pitjanya! Warpungkulala iluntara, ka ngula mama palumpa tjilpiringkula ilunyangka kaana nyangatja nganampariku.'

39 Munuya wati panya katja witira kaananguru itarikatingu urilkutu munuya pungkula iluntanu."

40 Munu Jesulu tjukurpa nyangatja wangkara wiyaringkula tjanala tjapinu, "Nyura nyaa kulini? Wati panya kaanaku walytjangku tjananya ngapartji pitjala nyaalku kaana panya atunymankupai tjuta?"

41 Kaya wangkangu, "Wiya, paluru pitjala tjananya ngapartji pungkula iluntankuku, munu wati palya tjuta tjunkuku kaana atunymara kanyintjaku, kaya paluru tjana kiripitji kururingkunyangka urara wati panya kaanaku walytjaku tjukarurungku tjarara tjunkuku."

42 Ka Jesulu tjanala wangkangu, "Nyura wanyu ninti tjukurpa panyaku? Panya iriti nyiringka walkatjunkunyta alatji ngaranyi, 'Wali palyalpai tjutangkuya wali puli tjutanguru palyaningi, munuya puli kutju nyakula waningu kura-palku kulira. Palu nguntiya waningu, panya puli nyara paluru kura wiya, wiru mulapa wali kunpu kanyilpai.

Panya Mayatja Godalu puli pala palunya ngurkantanu puli kutjupa tjuta wiya,

kala paluru ngurkantankunytjtja pukularira wirunmananyi.' *

43 Nyara palulanguruna nyurala wangkanyi alatji, panya Godalu nyuranya mayatjangku walytjanmara kanyintja wiyaringanyi munu panya anangu kutjupa tjuta ngapartji walytjanmara mayatjangku kanyilku palumpa tjukurpa wanganarangku kulira palyalpai tjuta.

44 Ka kutjupangku puli nyara palunya wantirampa pika pulka mulapa mantjilku. Panya puli nyara palunya wantinyangka Godalu pungkula wiyalpai alatjitu."*

45 Kaya tjukurtjara kuranyitja tjutangku munu Paratji tjutangku kuliningi Jesulu tjukurpa nyanganpa wangkanyangka munuya kulira miilaranu.

46 Munuya palulanguru palunya witintjikitjangku kuliningi, palu nguluringangiya anangu winki ngaranyangka nyakula panya anangu tjutangku Jesunya Godaku wangkatjaranmankupai, kaya palulanguru palunya witalwiyangku wantingu.

22

Tjukurpa Mai Pulkaku Putu Altinytja

(Luke-aku 14:15-24)

¹ Munu Jesulu piruku tjukurpa ara kutjupatjara tjanala wangkangi alatji,

² "Godalu anangu tjuta mayatjangku walytjanmara kanyintja ara nyanga purunypa ngaranyi panya wati ngura tjtaku mayatja pulka nyinangi ka wati nyara palumpa katjangku kuri kuwari kutju altinytjaku ngarangi. Ka wati panya mayatjangku pukularira

* 21:42 Psalm 118:22-23

wangkangi.

* 21:44 Tjukurpa nyanga pulitjara wangkara Jesulu palurunku

palumpa war̄karipai tjuṭangka wangkangu mai kuka pulka palyan-
tjaku, munu palumpa malpa tjuṭa wangkangu katjangku kuri
altinyangka pitjala tjunguringkula ngalkula pukularinytjaku.

³ Munu mai kuka riti ngarinyangka nyakula paluru wati pa-
nya war̄karipai tjuṭa witunu ankula anangu panya nganmanytju
wangkanytja tjuṭa para-altira ngalya-katinytjaku maiku pitjala tjun-
guringkunyjtaku, kaya ankula altingi. Palu tjana uwankarangku
kulira pitjanytja wiyangku wantingi.

⁴ Ka paluru piruku war̄karipai kutjupa tjuṭa witunu ankula anangu
panya palunya tjananya piruku altinytjaku. Kaya ankula palula
tjanala wangkangi, 'Pitjaya! Nganampa mayatjangku mai kuka pulka
nyurampa palyanu puluka pulkanya munu kulunypa kulu kuka
wiru mulapa, munu paura riti wantingu nyura pitjala ngalkuntjaku.
Kaya wanyu ngalkuntjikitja pitja, panya paluru mukuringanyi nyura
uwankara pitjala tjunguringkula pukularinytjaku palumpa katjangku
kuri altinyangka.'

⁵ "Palu tjana kulira alatjitu wantingi munuya tjana mukuringkunyitja
tjuṭa kutju palyanangi, kutjupa tjuṭaya anu palumpa tjanampa kaana
tjuṭakutu, kaya kutjupa tjuṭa anu war̄karira mani pulkantjikitja.

⁶ Kaya kutjupa tjuṭangku wati panya mayatjangku witura iyantja
tjuṭa witura pungkula iluntanangi.

⁷ "Ka mayatja panya paluru pungkunyitja kulira pulkara mir-
panaringu munu palulanguru tjaultji tjuṭa witunu, kaya anangu
panya palunya tjananya ngapartji ankula iluntanu munuya tjanampa
wali uwankara tilira wiyanu.

⁸ Munu palulanguru mayatja panya paluru palumpa war̄karipai
tjuṭa altira wangkangu, 'Kulila! Nyangatja nyura mai kuka pulka
palyara tjunu ngayuku katjaku pukularira ngalkuntjaku. Palu anangu
panya ngayulu altinytja tjuṭangku kulira alatjitu wantingi.

⁹ Palu araya tawunu tjuṭakutu munuya iwara tjuṭangka anangu
tjuṭa para-ngaranyangka nyakula tjananya altira ngalya-kati mai
nyanga pulkaku.'

¹⁰ Kaya mulapaṭu ankula para-altira ngalya-katingu anangu
uwankara tjana iwarangka nyakula panya kura tjuṭa munu palya tjuṭa
kulu, kaya pitjala wati panya mayatjaku walingga tjarpara angara
alatjitu nyinangi.

¹¹ "Ka mayatja panya paluru anangu tjuṭa nyakunyitjikitja tjarpangu
munu nyangu wati kutju mantara kutjupatjara nyinanyangka, pa-
nya watingku kuri altinyangkaya anangu tjuṭa mantara wirungka
tjarpara inmakitja pitjapai. Ka wati panya paluru mantara wirungka
tjarpanytja wiya pitjangu munu ngunti tjarpara nyinangi.

¹² Ka wati panya mayatjangku palula wangkangu, 'Ai! Nyaakun
nyuntu mantara wirutjara pitjanytja wiya? Panya ngayuku katjangku
kuwari kuri altinyi, kan uti nyuntu mantara wirutjara pitjama.' Ka
wati panya paluru wangkanytja wiya nyinangi.

¹³ Ka wati panya mayatjangku palumpa war̄karipai tjuṭa altira
wangkangu, 'Pitjalaya wati nyangatja mara tjina kulu karpila munuya
urilta mungawalurungka wani, ka nyara palulalta pika pulkatjara
nyinara titutjara ulaku.' Kaya mulapaṭu palunya karpira katira urilta
waningu."

14 Ka Jesulu tjukurpa nyangatja wangkara wiyaringkula tjanala wangkangu, “Panya Godalu anangu tjuṭa mulapa altipai palunya wanantjaku, palu paluru mankurpa nguwanpa ngurkantankupai.” Alatji Jesulu tjanala wangkangi tjukurjtara kuranyitja tjuṭangka munu tjiṭpi kutjupa tjuṭangka munu Paratji tjuṭangka kulū.

Rome-aku Mayatja Mani Tjarara Ungkunyjtaku, Munta Wiya?
(Markaku 12:13-17; Luke-aku 20:20-26)

15 Kaya Paratji tjuṭangu nyangatja kulira mauntalpa tjana-kutjuringkula wangkara kuliningi Jesunya arkara ngunti tjapintjikit-jangu.*

16 Munuya wangkara wiyaringkula tjanalanguru wati mankurpa nguwanpa Jesulakutu witura iyanu Irataku malpa tjuṭa kulū tjun-gura. Kaya ankula palula wangkangu alatji, “Nintilpai! Nganana ninti nyuntumpa, panya nyuntu wati tjukururu palyangu nyinapai. Munu panyan anangu tjuṭangka Godaku iwara tjukururungku wangkara nintilpai utingku kutitjungkunyjtja wiyangu. Munu panyan anangu uwankara tjungura nyakupai munu tjanala uwankarangka tjukururungku wangkapai tjukurpa panya palunyaṭu anangu kutjupa tjuṭaku nguluringkula kampa kutjuparinytja wiyangu.

17 Ka nyuntu yaaltji kulini? Palyala wati panya Tjiitjanya mayatja pulka Rome-ala nyinapainya mani tjarara unkkuku, munta wiya? Mulapa wanyu alatjinkunyjtaku ngaranyi Moseku tjukurta? Wanyulanya nyuntu tjakultjura!”

18 Ka Jesulu nintingku kuliningi tjana ngunti arkara tjapinyangka munu wangkangu, “Wiya, nyura ngunti palya-palku kananykananya nyinapai tjuṭa munu nyura ngunti tjapini ngayunya kuranmankunyjtikitjangu kutju.

19 Ngalya-katiya mani pala tjiilpa panya nyura mayatja Rome-ala nyinapainya mani pala palunya unkkupai, kana nyawa!” Kaya mulapaṭu katira palunya ungu.

20 Ka nyakula tjanala tjapinu, “Nganaku yunpa munu ini kulū wanyu nyangangka ngaranyi?”

21 Kaya wangkangu, “Mayatja pulka panya Tjiitjanya.”

Ka tjananya wangkangu, “Uwa mulapa mani nyangatja mayatja Tjiitjaku, kaya palunya palya ungama paluru wangkanyangka, palu Godalu wangkanyangkampaya Godanya alatjiṭu ungama.”

22 Kaya nyangatja kulira nguwanwuringu munuya kulinu, “Ai, wati nyangangu munkara alatjiṭu wangkapai.” Munuya palulanguru palunya wantikatira anu.

Tjukurpa Panya Ilura Pakantjanya Tjana Tjapintja
(Markaku 12:18-27; Luke-aku 20:27-40)

23 Kaya tjiṭu panya palulaṭu wati Tjatjutji mankurpa pitjangu Jesulakutu, panya paluru tjanaya anangu ilunyjtjanu pakantjitjaku mulamularingkupai wiya. Munuya wati nyanga mankurtu Jesula ngunti arkara tjapiningi alatji,

* 22:15 Panya paluru tjana alatji kuliningi, “Wanyula palula ngunti wangka, ka paluru tjin-guru tjukurpa kutjupa ngunti ngananaṭa wangkaku, kala ngunti wangkanyangka kulirampa kuranmankukulta palunya.”

24 “Nintilpai, panya Moselu tjukurpa nyangatja nganampa iriti walkatjunu alatji, ‘Tjinguru wati kuṭa iluku tjitji wiyatu, ka minyama panya palumpa kuri wanka nyinanyangka wati panya tjitjururungku uti alṭima minyama panya palunya. Munu tjinguru tjitji katja utintjatjanungku paluru kulilku, “Nyangatja ngayuku wiya, ngayuku kuṭaku tjitji, panya ngayulu palumpa kuringka utinu.”’ Alatji Moselu walkatjunu.

25 “Palu tjukurpa nyangatja wanyu kulila. Panya wati 7 kuṭarara kuṭarara nyinangi. Ka kuṭa nganmanyitjangku kungkawara alṭingu, munu paluru tjitji utintja wiyatu ilungu. Ka malanytju ngapartji minyama panya palunya alṭingu munu tjitji wiyatu ilungu,

26 ka palu purunypatu wati malanypa kutjupangku ngapartji alṭira paluru kulu tjitji wiyatu ilungu. Kaya palu purunypatu malanypa panya malatja tjuṭangku minyama panya palunya alṭira kanyira tjitji wiyatu ilungi uwankaratu wanapari wanapari.

27 Ka ngula minyama panya paluru tjanampa panya kurilta ilungu.

28 “Kalanya wanyu tjakultjura! Ngula ilunytjatjanu wankaringkula pakantjatjanu minyama panya paluru nganaku kuri nyinaku? Panya wati 7-tu palunya alṭingu.”

29 Ka Jesulu tjanala wangkangu, “Wiya, nyura ngunti kulilpai tjuṭa. Nyura Godaku tjukurku ngurpa munu palumpa witulyaku kulu ngurpa alatjiṭu.

30 Panya miri tjuṭa ilunytjatjanu wankaringkula pakara kuri alṭinytja wiya, panya angelpa tjuṭa kuri wiya nyinanyi, nyara palu purunypa alatjiṭu anangu tjuṭa nyinaku.

31-32 Ka nyura uti mulamularingama ilunytjatjanu pakantjitjaku. Wanyu tjukurpa panyatja kulila, panya nyiringka iriti walkatjunkunytja ngaranyi Godalu nyurala wangkanytja alatji,

‘Ngayuluna Aipuramaku, Isaacaku, Jacobaku God nyinanyi, kaniya paluru tjana ngayunya walkuni.’ *

Ala palatja. Aipuramanya, Isaacanya, Jacobanya tjana panya ngananypa ilungu, ka nyangatja nyaaku Godalu ilunyangka malangka wangkangi tjana palunya walkuntja? Wiya, paluru tjana panya ilunytjatjanu wankaringu munuya kuwari nyanga ilkarangka wanka nyinara Godanya walkuni.”

33 Kaya anangu uwankarangku nyangatja wangkanyangka kulira nguankuringu munuya kulinu, “Ai, wati nyangangu pulka mulapa wangkanyi.”

Tjukurpa Nyaa Pulka Mulapa Godalu Wangkanytja

(Markaku 12:28-34; Luke-aku 10:25-28)

34 Uwa, panya Jesulu Tjatjutji tjuṭangka wangkanyangka tjana puṭu kulinu ngapartji wangkanytjikitjangku. Kaya Paratji tjuṭangku kulinu Jesulu tjananya wangkara pilunmankunytja, munuya kulintjatjanu Tjatjutji tjuṭangka tjunguringkula anu Jesulakutu.

35-36 Ka wati tjanala tjungutjangku Moseku tjukurpa nintilpaingku Jesunya ngunti arkara tjapiningi alatji wangkara, “Nintilpai! Tjukurpa nyaa wanyu pulka mulapa ngaranyi uwankarangka waintarinytja Godalu wangkanytja?”

* 22:31-32 Exodus 3:6

37 Ka Jesulu wangkangu, “Tjukurpa pulka mulapa nyangatja ngaranyi alatji,

‘Mama Godaku pulkara mukuringama kurunpa winki, munu palunya kutju pukulmankunytjikitjangku titutjarangku kulinma.’

*

38 Uwa, tjukurpa nyanga paluru kutju alatjitu pulka mulapa ngaranyi kutjupa uwankarangka waintara.

39 Ka kutjupa kulu palu purunypatu pulka ngaranyi nyanga alatji, ‘Anangu kutjupa tjutaku pulkara mukuringama nyuntunku mukuringkunyaja purunypa.’ *

40 Uwa, tjukurpa nyanga paluru pula pulka kutjara ngaranyi tjukurpa kutjupa uwankarangka waintara. Ka panya Moselu tjana Godaku wangkatjara kutjupa tjutangku kulu tjukurpa walkatjunkunytja uwankara tjukurpa nyanga palula pulalanguru ngaranyi. Panya tjukurpa paluru pula wiya ngaranyangkampa tjinguru tjukurpa kutjupa uwankara kulu wiya ngarama.” Alatji Jesulu wangkangu wati panya Moseku tjukurpa nintilpaingka.

Christanya Godalu Panya Kalkuntjanya

(Markaku 12:35-37; Luke-aku 20:41-44)

41 Ka Paratji panya tjuta nyara palula tjunguringkula ngaranyangka Jesulu tjanala tjapinu,

42 “Yaaltji nyura kulini Christanya Wankarunkupainya panya Godalu kalkuntjanya? Walytjapiti nganalanguru wanyu paluru? Ngananya palumpa tjamu iriti nyinangi?”

Kaya wangkangu, “Wiya, paluru Davidaku walytjapiti malatjanguru utiringkuku.”

43 Ka tjanala wangkangu, “Ka nyaaku panyatja Davidalu Kurunpa Milmilu nintinyangka palunya mayatjanmanu? Panya nyiringka walkatjunkunytja ngaranyi Davidalu wangkanytja nyanga alatji,

44 ‘Mayatja Godalu ngayuku Mayatjangka wangkangu,

“Ngayula nyanga itingka mayatja pulka nyinakati kampa nyanga wakungka.

Kana nyuntumpa mirpantju tjuta tjarulku nyuntula wanganarangku kulintjaku,

kan tjananya nyuntu mayatjangku wituwitulku.” ’ *

45 Ala palatja! Davidalu Christanya mayatjanmanangi alatjitu Godalu panya kalkuntjanya, ka Christanya yaaltji-yaaltji piruku palumpa pakali malatja nyinama? Wiya, paluru pakali kutju wiya palumpa mayatja kulu nyinanyi.”

46 Kaya palulanguru Jesula ngapartji wangkanytjikitjangku putu kuliningi, munuya tjintu pala palulanguru piruku palula ngunti arkara tjapintja wiyaringu.

23

Jesulu Anangu Tjuta Ngulutjunkunytja Paratji Tjutangka-tawara Munu Moseku Tjukurpa Nintilpai Tjutangka-tawara (Markaku 12:38-40; Luke-aku 11:37-52; 20:45-47)

* 22:37 Deuteronomy 6:5 * 22:39 Leviticus 19:18 * 22:44 Psalm 110:1

¹ Munu palulanguru Jesulu nintintja tjuṭangka munu anangu winkinga kulu wangkangu,

² “Panya Moseku tjukurpa nintilpai tjuṭa munu Paratji tjuṭa kulu Moseku tjukurku ninti pulka nyinanyi nyurala wangkara utintjikitja.

³ Ka tjana wangkanyangka nyura uti wanganarangku kulira palyanma. Palu tjana palyantjaya arkalwiyangku wantima, panya paluru tjana tjukurpa palunya nintintjatjanungku mulamulangku wanganarangku kulira palyalpai wiya.

⁴ Panya paluru tjana ara kutjupa kutjupa tjuṭa Godaku tjukurta tjungura palyalpai munuya anangu tjuṭa rawangku wituwitulpai wanganarangku kulira palyantjaku, kaya ara tjuṭa mulapa ngaranyangka putu kulira kaar-kaaraira pakuringkupai. Panya mayatjangku palumpa wati warakaripaingka tjanangka kutjupa kutjupa tjuṭa mulapa katinytjaku tjunkupai munu mayatja paluru tjalira katira paku pulkaringkunyangka nyakula palunya alpamilara tjara palulanguru mantjira tjalira katinytja wiyangku wantipai. Nyara palu purunytjuya Moseku tjukurpa nintilpai tjuṭangku Paratji tjuṭangku kulu anangu tjuṭa rawangku wituwitulpai kutjupa kutjupa tjuṭa mulapa palyantjaku, kaya pakuringkupai.

⁵ “Munuya paluru tjana kutjupa kutjupa tjuṭa palyalpai anangu tjuṭangku nyakula palunya tjananya mirawaninytjaku, panya tjakangku wati tjuṭangku nyiri Moseku tjukurtjara rulumapi pakutja tjukutjukungka unngu tjarpatjunkupai munuya kutjupa-ara Godala tjapintjikitjangku kutju pakutja panya palunya minangka munu ngalyangka kulu tanpalpai tjukurpa panya palunyatjara, palu wati panya Moseku tjukurpa nintilpai tjuṭangku munu Paratji tjuṭangku kulu pakutja pulka nguwanpa tanpara kanany-kananytju kanyilpai rawangku nguwanpa munuya paluru tjana mantara wara pulkangka tjarpara para-ngarapai kanany-kananypa anangu tjuṭangku nyakula tjananya mirawaninytjaku.

⁶ “Munuya wali inmatjangka junguringkula tjiya wiru tjuṭa ngurkantankupai anangu tjuṭangka kuranyu uti nyinakatinytjikitja mukuringkula. Munuya kutjupa-ara mai pulka ngalkuntjikitja tjunguringkula palu purunypatu kuranyu nyinanytjikitja mukuringkupai tjuṭangku tjananya nyakula mirawaninytjaku.

⁷ Munuya pulkara pukularipai anangu tjuṭangku tjananya tawunangka para-ngaranyangka nyakula nintilpai wangkara walkuntjaku.

⁸ “Palu kulilaya! Tjinguru anangu kutjupangku nyuranya ninti pulkanmankunyangkampa nyura palunya markunma nyuranya walkuntjaku-tawara, panya nyura kutarara kutarara uwankara palu purunypa nyinanyi nintilpai kutjutjara.

⁹ Munuya nintilpai kutjupa tjuṭa mamanmara walkuntja wiyangkutu wantima, panya nyurampa mama kutju nyinanyi ngura ilkaritjangka.

¹⁰ Munu tjinguru anangu kutjupangku nyuranya ‘nintilpainya’ walkunnyangkampa nyura palunya markunma nyuranya ngunti walkuntjaku-tawara, panya alatjitu nyurampa ‘nintilpai’ kutju nyinanyi Godalu panya kalkuntjanya.

¹¹ Ka nyuralanguru tjinguru kutju kuranyurira mayatja nyinanytjikitja mukuringanyi munu uti paluru nyurampa pulkara warakarima

nyura witunnyangka wantinytja wiya.

¹² Panya anangungku palurunku walytjangku mayatjarira mirawanangka nyakula Godalu palunya paira malarku tjunkuku. Ka anangu kutjupa mala nyinanyangka nyakula Godalu palunya mirawanira kuranyu tjunkuku mayatja pulka nyinanytjaku.”

Jesulu Palunya Tjananya Ngunti Palya-palku Nyinanyangka Paintja (Markaku 12:40; Luke-aku 11:39-42; 11:44,52; 20:47)

¹³⁻¹⁴ Munu palulanguru Jesulu Moseku tjukurpa nintilpai tjuta munu Paratji tjuta kulu pulkara ngulutjunangi alatji wangkara, “Nyura ngunti palya-palku kanany-kanany pa nyinapai tjuta! Nyara palulanguru nyurampa pika pulka mulapa ngaraku! Panya nyura anangu tjutangka wangkara nintinnyangka kutju tjana kulilpai Godaku walytjaringkunyitjikitjangku. Palu nyura Godala tungunpungkula palunya mulamulangku wanantja wiyangku wantipai, munu kutjupa tjuta palumpa walytjaringkunyitjaku-tawara nyura titutjara anga-ngaranyi tjanala tjukarurungku nintintja wiya.*

¹⁵ “Uwa, nyura ngunti palya-palku kanany-kanany pa nyinapai tjuta! Nyara palulanguru nyurampa pika pulka mulapa ngaraku! Panya nyura ngura tjutakutu parari ankupai uru pulkangka itipirira munu mantangka kulu tjina ankula ngura kutjupangka ma-wirkara anangu kutjupa tjutangka tjukurpa wangkara tjananya wituwitulpai nyurampa ara tjuta wanganarangku kulintjaku, ka paluru tjana tjinguru nyurala wanganarangku kulilku munu nyuranya purunyarira ngunti palya-palku kanany-kanany pa nyinaku nyurala munkara kura mulapalta, ka nyara palulanguru ngula Godalu palunya nyuranya tjungura paira iyalku ngura kurakutu waru panya titutjara kampanytjalakutu.

¹⁶ “Uwa, nyura kuru patungku ngurpangku anangu kutjupa tjuta ngunti katirinkupai nintingku-palku! Nyara palulanguru nyurampa pika pulka mulapa ngaraku! Panya nyura anangu kutjupangka kalkuntjikitjangku ini ‘timpula’ wangkara kalkulpai anangu nyara paluru ini wangkanyangka kulira nyurampa mulamularingkunyitjaku. Munta tjinguru nyura ‘gold panya timpula unngu ngarinytja’ wangkara kalkulpai, munu nyara palulanguru ini ‘gold’ wangkara kalkuntjatjanungku nyura kalkuntja panya palunya kulilpai alatjitu wantinytja wiyangku. Palu nyura ini ‘timpula’ wangkara kalkuntjatjanungku nyura kampa kutjupa kulira kalkuntja panya palunya mukuringkula wantipai ungkunyitja wiyangku.

¹⁷ Palu alatji nyura ngunti kulilpai ngurpangku alatjitu munu nyura tjukurpa palunya anangu tjutangka ngunti nintilpai kuru patungku. Nyura kurangku gold ngunti milmilmanakupai, panya timpula kutju milmilpa mulapa ngaranyi, ka panya gold timpula unngu ngarira kutju milmilarinini.

¹⁸ “Munu panya nyura anangu kutjupangka kalkuntjikitjangku ini ‘timpulaku pitjilpa’ wangkara kalkulpai. Munta tjinguru nyura ‘kuka

* **23:13-14** Wati kutjupangku kunyu verse 14 walkatjunu, munu mala tjungunu Matthew-ku tjukurta alatji: *Nyura ngunti palya-palku kanany-kanany pa nyinapai tjuta! Nyara palulanguru nyurampa pika pulka mulapa ngaraku! Panya nyura minyama wanakala tjutanguru tjulyalpai tjanampa wali munu ulytja kutjupa kutjupa tjuta kulu. Munu nyura Godala tjaipira tjukurpa wara mulapa wangkapai anangu tjutangka kulira nyuranya mirawaninytjaku. Ka nyanga palula tjanalanguru Godalu nyuranya pulkara pungkuku.*

pitjilta Godaku tjunkunytja' kutju wangkara kalkulpai. Ka nyura nyara palulanguru ini 'kuka' wangkara kalkuntjatjanungku nyura kalkuntja panya palunya kulilpai alatjitu wantinytja wiyangku. Palu nyura ini 'pitjilpa' kutju wangkara kalkuntjatjanungku nyura kampa kutjupa kulira kalkuntja panya palunya mukuringkula wantipai ungkunyitja wiyangku.

¹⁹⁻²⁰ Palu alatji nyura ngunti kulilpai ngurpangku alatjitu munu nyura tjukurpa palunya anangu tjuangka ngunti nintilpai kuru patingku. Panya timpulaku pitjilpa milmilpa mulapa ngaranya kuka munu kutjupa kutjupa tjuta katu tjunkula Godanya ungkunyitjaku, ka panya kuka pitjilpanguru kutju milmilarinyi palula katu tjunkunyangka kutju. Ka nyura uti nintingku kulinma panya pitjilpa milmilpa pulka mulapa, ka kutjupangku ini nyanga 'timpulaku pitjilpa' wangkara kalkuni nyara paluru pitjilpa munu pitjilta katu tjunkunytja kulu winki tjungura wangkanyi.

²¹ Ka kutjupangku tjinguru ini 'timpula' wangkara kalkuni nyara paluru timpula munu timpulangka unngu nyinanytja kulu tjungura wangkanyi panya Godanya.

²² Ka tjinguru kutjupangku ini 'ilkaritja' wangkara kalkuni nyara paluru Godanya wangkanyi panya ngura nyara palula paluru mayatja pulkangku uwankara kanyini." Alatji Jesulu tjananya wangkara ngurpanmanangi Moseku tjukurpa nintilpai tjuta munu Paratji tjuta kulu.

²³ Munu piruku palula tjanala wangkangi alatji, "Uwa, nyura ngunti palya-palku kanany-kanany nyanapai tjuta! Nyara palulanguru nyurampa pika pulka mulapa ngaraku! Panya nyura ukiri panji wiru kutjupa kutjupa tjuta ini nyanganpa miinpa, tilpa munu kaminpa nyurampa kaananguru 100 mantjira tjarara 10 ungkupai Godanya. Palu nyangatja tjukutjuku nguwanpa Godalu nyakula pulkara pukularinytjaku wiya. Palya nyura alatjinganma, palu uti nyura waintara kulu kulinma munuya anangu tjutaku pulkara mukuringkula tjanampa ngaltunytjungku palyanma, munuya Godala wanganarangku kulira tjukaruru nyinama, panya nyanga alatji palyannyangka Godalu nyakula pulkara pukularipai. Ka nyura uti watarkurinytja wiyangku rawangku palyanma.

²⁴ Uwa, nyura kuru pati purunytju ngurpangku anangu kutjupa tjuta ngunti katirinkupai nintingku-palku, panya nyura tjukutjuku tjuta kutju rawangku palyalpai munu nyura tjukurpa nyanga pulka tjuta wantipai.

²⁵ "Uwa, nyura ngunti palya-palku kanany-kanany nyanapai tjuta! Nyara palulanguru nyurampa pika pulka mulapa ngaraku! Panya nyura kutjupa kutjupa tjuta palyalpai anangu tjuangka nyuranya palya-palku nyakula mirawaninytjaku. Palu Godalu nyuranya unngu nyanganyi panya nyura manyungku kutju anangu tjuta ngulutjingara kutjupa kutjupa tjuta tjanampa tjulyalpai, munu panya nyura kura kutjupa kutjupa tjuta kulu rawangku kampangkatu palyalpai. Uwa, nyura nyaa purunytja panya anangungku piti urilitja kutju paltjira wirulpai ka unngutja kiti raputji winki ngarapai, nyara palu purunytja nyura palya-palku nyinanyi kura mulapa.

²⁶ Nyuranku wanyu putu nyanganyi? Uti nyura piti kilina wiru

kanyintjikitja unngutja-warara paltjira kilinanama, ka nyara palulangurulta piti paluru wiruringkula kilina wiru mularariku. Nyara palu purunypa nyura uti kuru alaringkula nyuranku unngutja nyangama munu kura kutjupa kutjupa uwankara wantima, munu nyura nyara palulangurulta wirura nyinaku.

27-28 "Uwa, nyura ngunti palya-palku kanany-kanany pa nyinapai tjuta! Nyara palulanguru nyurampa pika pulka mulapa ngaraku! Kaya wanyu kurulpa kulila, panya katutja wiru tjutatjara ngarapai anangu tjutangku nyakula wiru kulintjaku, palu unngu nyaa ngarinyi? Wiya, tarka tjuta kutju ngarinyi. Ka nyura nyara palu purunypa nyinanyi, panya nyura anangu tjutangka mirangka palya-palku nyinapai, palu nyurala unngu kura pulka mulapa ngaranyi."

Jesulu Pika Pulka Tjanala Utiringkunyjaku Wangkanytja
(Luke-aku 11:47-51)

29 Munu Jesulu piruku Moseku tjukurpa nintilpai tjutangka munu Paratji tjutangka wangkangu alatji, "Uwa, nyura ngunti palya-palku kanany-kanany pa nyinapai tjuta! Nyara palulanguru nyurampa pika pulka mulapa ngaraku! Panya nyura kurulpa tjuta wirulpai Godaku wati wangkatjara tjuta unngu miri ngarinyangka. Panya palunya tjananyaya wirura tjukaruru nyinanyangka iluntanu, ka panya nyura tjanampa kurulta katu wiru tjuta tjunkupai.

30 Munu nyura wangkapai alatji, "Tjinguru nganaña tjanala tjungu nyinarampa tjananya iluntankunyja wiyangka wantima, kaya wanka nyinama."

31 Ka nyura alatji wangkanyangka ngayulu kulilpai, 'Munta, mulapa tjanampa panya tjamupitingku Godaku wangkatjara tjuta rawangku pungkukatingi.' Palu nyura tjinguru iriti nyinarampa tjanala tjungur-ingkula wangkatjara tjuta iluntanamatu tjana purunytju.

32 Ka palya nyura kuwari tjamu tjutaku ara wanama, munu paluru tjana purunytju wangkatjara kuwari nyinanytja tjuta iluntanama.

33 "Uwa, nyura uwankara liru tjuta anangu tjuta ngunti kuralpai, ka Godalu wanyu nyuranya ngula wantiku? Wiya, nyuranya ngura kurangka waniku waru pulkangka kampanytjaku.

34 Kulilaya! Ngayulu nyurampa iyalku Godaku wangkatjara tjuta munu nintipuka tjuta munu nintilpai tjuta kulu, ka nyura tjara kutjupa iluntankuku munu tjara kutjupa punu katkutjarangka wakara utitjungkuku, munu tjara kutjupa wali inmatja tjutangka ngaratjungkula mantara katantara nikitira wiipangka alkalku. Munu nyura tjananya paira wanara paira wanara iyalku ngura tawunu kutjupa tjutakutu.

35 Ka nyuranya Godalu kukanymanu nyura wati palya tjuta wiyanguru pungkula iluntankunyjtijangka. Panya Abelnga wati palya mulapa iluntanu palumpa kutangku, kaya nyara palulanguru nyurampa tjamu irititja tjutangku wati palya tjuta rawangku iluntankukatingi munuya palulanguru iluntanu Pirakayaku katja ini Tjakarayanya paluru timpulangka unngu pitjilta itingka ngaranyangka.*

36 Uwa, tjukarurungkuna nyurala wangkanyi panya Godalu nyuranya ngapartji iluntankuku wati nyanga palula tjanalanguru." Alatji

* 23:35 Genesis 4:8; 2 Chronicles 24:20

Jesulu tjanala utingku wangkangi Paratji tjutangka munu Moseku tjukurpa nintilpai tjutangka kuḷu.

Jesunya Ngura Jerusalemaku Ngalturingkunyaja
(Luke-aku 13:34-35)

³⁷ Munu palulanguru Jesulu Jerusalemala nyinanyaja tjutaku pulkara ngalturingkula tjituru-tjitururira ulara wangkangi alatji, "Ngaltutjara! Ngayulu nyurampa pulkara mukuringanyi nyanga Jerusalemala nyinanyaja tjutaku. Palu iritinguru nyura Godaku wangkatjara tjuta rawangku iluntanangi munu panya nyura wati tjukurtjara tjuta kuḷu pulingka atura iluntanangi panya Godalu ngura nyanga palulakutu iyantja tjuta. Kaṅa rawa mulapa mukuringangi nyuranya utulura kanyintjikitja, panya tjuḷpu ngunytjungkunku kuḷunypa tjuta nyalpingka unngu utulura atunymara kanyilpai, palu purunytju. Palu nyura ngayunya wantingi alatjitu.

³⁸ Ka palulanguru kuwari Godalu nyurampa timpula wantikatinyi, ka panya ultu alatjitu titutjara ngaraku.

³⁹ Ka kuwaringuru nyura ngayunya rawangku nyakunyaja wiya. Palu ngula nyura ngayunya piruku nyakuku mununi nyara palula arangka nyura ngayunya walkura wangkaku alatji, 'Awari! Wanyula Godanya mirawanira walkunma, panya nyanga palunya Mayatja Godalu iyantjatjanungku pulkara pukulmanu.' " Alatji Jesulu Jerusalemanya ngurara tjutanguru tjituru-tjitururira wangkangi.

24

Jesulu Timpulawanungku Wangkanyaja
(Markaku 13:1-2; Luke-aku 21:5-6)

¹ Ka Jesunya timpulanguru ma-pakara ankunyangka palumpa nintintja tjutangu wangkangu, "Wanyu malakukutura nyawa! Nganampa timpula wiru mulapa ngaranyi."

² Ka Jesulu nyakula wangkangu, "Uwa, timpula kuwari wiru ngaranyi, palu ngula wati warmala tjutangu pitjala uwankara piluntankuku, ka katakatira mantangka ma-ngarira wanalku."

Nintintja Tjutangu Tjapintja
(Markaku 13:3-13; Luke-aku 21:7-19)

³ Munuya Jerusalemanya wantikatira anu puli panya Alipatjaralakutu munuya pulingka katu tatira nyinakatingu. Kaya nyanga palula mauntalpa nyinara palumpa nintintja tjutangu Jesula tjapinu, "Wanyulanya tjakultjura! Yaalara nyanga alatjiriku panya nyuntu kuwari timpula pilukatinytja wangkangi? Ka nyaaringkuku ngula manta ilkari wiyaringkunyajaku ilaringkunyangka nyuntu malaku pitjanytja kuwaripangka?"

⁴ Ka Jesulu wangkangu, "Ngulu nyangamaya kutjupa tjutangu nyuranya wangkara ngunti kurantjaku-tawara.

⁵ Panya anangu kutjupa tjutaya pitjaku ngayulu iyantja-palku munuya ngunti wangkaku, 'Ngayuluna wati panyatja panya Christanya Godalu kalkuntjanya.' Kaya anangu winki mulatu ngunti kurannyangka kulira mulamularingkuku.

⁶ Ka nyura tjinguru kulilku anangu tjutangu tjananku pikangku pungkunyangka ilatjangu munu pararitja tjutangu kuḷu. Palu pika

nyanga palunya tjananya kuliraya nguluringkuwiya nyinama, panya nyanga paluru tjana utiringkunyjtaku ngaranyi alatjitu, palu tjintu malatja kuwaripatu ngaranyi ilaringkunyjtja wiya.

⁷⁻⁸ Panya ngura kutjupa kutjupangka tjaultji tjtutangka pikangku pungkuku nguraku mayatja tjtutangka wituwitunnyangka. Ka ngura kutjupangka kutjupangka manta uriku, ka ngura kutjupa tjtutangka ailuru pulka ngaraku. Panya pika kura nyanga paluru tjana nganmanypa utiringkunyjtaku ngaranyi, ka nyura nyanganpa kulin-tjatjanungku uti purkarangku kulinma. Panya minyma ititjarangku paku nyinara urira pirinnyangka kulilpai, 'Munta-uwa tjinguru nyangatja iti wirkankunyjtaku urinyi.' Palu purunypa kura nyanganpa utiringkunyangka nyura uti kulinma, 'Munta, nyangatja tjinguru tjintu malatjalta ilaringanyi, palu palula kuwaripangka pika kutjupa kutjupa tjtuta piruku utiringkunyjtaku ngaranyitu.'

⁹ "Kaya nyurampa mirpantju tjtutangka tjaultji tjtuta wituwit-ulku nyuranya witera pungkula iluntankunyjtaku. Uwa, ngura tjtutanguruya nyurampa pulkara kuraringkuku nyura ngayuku walytja nyinanyangka.

¹⁰ Kaya nyara palula ara ngayuku walytja kutjupa tjarangku ngayunya wanantjatjanungku wantiku munuya mulamularingkunyjtja wiyaringkuku. Munuya ngayuku walytja kutjupa tjtutaku mukulya wiyaringkuku, munuya tjanampa kuraringkula tjaultji tjtuta wituwit-ulku tjananya witera pungkunyjtaku.

¹¹ Kaya wati wangkatjara ngunti tjtuta ngura tjtutangka tjtutaringkuku munuya anangu tjtuta ngunti wankara kuralku Godaku tjukurpa-palku.

¹² "Uwa, ngura winkitjangkuya anangu tjtutangka kuraringkula kura tjtuta rawangku palyalku, ka kura nyanga paluru lipiringkunyangka anangu tjtuta mukulya wiyaringkuku munuya anangu ngaltutjara nyinanyangka nyakula ngulungku wantiku mukulyangku alpamilantja wiyangku.

¹³ Palu nyura titutjarangku ilunytjakutu-wankara ngayunya tungun-tunguntu wanannyangkampa Godalu nyuranya wankaru kanyilku palula tjungu titutjara nyinanyjtaku.

¹⁴ Palu tjintu malatja wirkankunyjtja kuwaripangka ngayuku walytja tjtutangka Tjukurpa Palya ngayunyatjara anangu uwankarangka paratjakultjungkuku manta winkingka, panya Godalu anangu tjtuta mayatjangku walytjanmara kanyintjatjara. Ka anangu ngura winkitjangku kulinnnyangka kutju manta ilkari wiyaringkuku.

*Jesulu Pika Pulka Mulapa Ngaranyjtaku Wangkanytja
(Markaku 13:14-23; Luke-aku 21:20-24)*

¹⁵ "Munu nyura ngula nyakuku timpula milmilta kutjupa kutjupa kura pulka mulapa ngunti ngaranyangka panya uwankara wiyal-painya, panya nganmanytju Godaku wangkatjarangku tjakultjunu wati panya Danieltu." (Tjukurpa nyanga palunyaya purkarangku kulinma nintiringkunyjtikitjangku.)

¹⁶ "Munu palulanguru kura panya paluru utiringkunyangka nyakula nyura uti Judeala nyinanyjtatjanu ngulu wirtjapakanma pulikutu.

¹⁷ Ka tjinguru nyara palula ara anangu kutjupa wali katu nyinanyi munu uti paluru ukalingkula wali unngu kutjupa kutjupa

tjuta mantjintjikitja tjarpanytja wiyangku wantira mapalku pulikutu wirtjapakanma wankakitja.

¹⁸ “Munta tjinguru kutjupa kaanangka warakarinyi munu uti paluru upukuta ngurangka ngarinyangka ankula mantjilwiya pulikutu mapalku wirtjapakanma.

¹⁹ Ka nyara palula ara panya kura pulka mulapa ngaraku minyama ititjara tjutaku munu iti tjukutjukutjara tjutaku kulu. Ngaltutjara! Panya tjana tjinguru wirtjapakara ngururpa tu pakuringkula wiyaringkuku.

²⁰ “Kaya Godala tjapinma kura nyanganpa nyinngangka utiringkunyjtaku-tawara, panya nyinngangu anangu urilta nyinanyangka pungkula iluntankunyjtaku-tawara. Munuya tjapinma tu tjintu pakuwiyaringkupaingka kulu utiringkunyjtaku-tawara, panya nyurampa ara ngaranyitu tjintu pala palula wirtjapakantjaku wiya.

²¹ “Uwa, kura nyanganpa utiringkuku pulka mulapa panya nganmanytju nyakunyjtja wiyatja alatjitu, ka kura nyanga palu purunypa piruku utiringkunyjtja wiyalta ngaraku.

²² Ka kura nyanganpa tjinguru rawa ngaranyangkampa anangu uwankara ilura wiyaringama. Palu Godalu tjintu nyara palunya tjananya mutulku anangu panya paluru ngurkantankunyjtja tjuta ilunyjtaku-tawara pika paluru rawa ngaranyangka.

²³ “Ka tjinguru kutjupangu nyurala wangkaku, ‘Nyangatja pitjangu Christanya, Godalu panya kalkuntjanya.’ Ka kutjupangu tjinguru wangkaku, ‘Wiya, nyaratja Christanya, Godalu panya kalkuntjitja mulapa.’ Ka nyura alatji wangkanyangka kulira mulamularingkunyjtja wiyangku wantima.

²⁴ Panya nyara palula arangka anangu ngunti wangkapai tjuta Christanya-palku wirkankuku Godalu panya kalkuntjanya-palku, ka wangkatjara ngunti tjuta kulu ngura tjutangka tjutaringkuku, munuya paluru tjana anangu winki araka ngunti kurantjikitjangu miracle kutjupa kutjupa pulka tjuta witulyangku palyalku tjana nyakula urulyarara mulamularingkunyjtaku, anangu Godalu ngurkantankunyjtja tjutangku kulu, palu putuya palunya tjananya kuralku Godaku panya walytja tjuta.

²⁵ “Ala! Kulinmaya nyanga kuwarina nyurala nganmanytju tjakultjunanyi nyura kutjupa kutjupa tjuta utiringkunyangka nyakula nintingku kulintjaku.

²⁶ Tjinguru kutjupa tjutangku nyurala wangkaku, ‘Ai! Nyaratja putingka nyinanyi wati panya Godalu kalkuntjanya.’ Palu alatji wangkanyangkaya kulira wantima ankula ngurintja wiyangku. Ka tjinguru kutjupa tjarangu wangkaku, ‘Awa! Pitjalaya wanyu nyawa! Nyangatja wati panya Godalu kalkuntjanya kumpira nyinanyi.’ Palu nyura wantima alatjitu tjanala kulira mulamularingkunyjtja wiyangku.

²⁷ Panya ngayulu Watiku Katjanya ngula malaku pitjala anangu uwankarangka utiringkuku manta winkitjangu uti nyakunyjtaku, panya wanangrangku pinpara utilpai manta winki, palu purunypa ngayulu utiringkuku manta winkitjangu nyakunyjtaku.

²⁸ Wanyu tjulpu panya walawuru kulila! Panya kuka ilura ngarinyangka walawuru tjuta kaputuripai. Kala nyakula

tjuktururungku kulilpai. Palu purunypa nyura ngayunya malaku pitjanyangka nyakula tjuktururungku ngurkantankuku.”

Jesulu Malaku Pitjanytjikitjangku Wangkanytja

(Markaku 13:24-27; Luke-aku 21:25-28)

²⁹ “Ka pika nyara paluru tjana ngarala wiyaringkunyaangka tjintu maruringkuku ka pirangku kulu irnyalwiya ngaraku. Ka kililpi tjuta ilkaringuru punkalku. Uwa, Godalu ilkaritja kutjupa kutjupa uwankara pulkara uritjingara kampa kutjupankuku.

³⁰ Ka nyara palula-arangka anangu uwankarangku kutjupa kutjupa ilkarangka nyakuku, munuya nyakunytjatjanungku kulilku, ‘Munta-uwa, nyangatja kuwari Watiku Katjanya malaku pitjanytjaku utiringanyi.’ Kana palulanguru ngayulu ngangkalangka pitjaku witulya pitalytji pulkanya, kaya uwankarangku ngayunya mayatja pulka mulapa pitjanyangka nyakula nguluringkula ulaku.

³¹ Ka ngayulu pitjanyangka kutjupangku turampata pulkara puura wangkatjinalgku, kana ngayulu angelpa tjuta witulku manta winkikutu ankunytjaku, kaya ankula kakarara ulparira alinytjara wiluraranguru anangu Godalu ngurkantankunytja tjuta utulura uwankara tjungulku, ngayuku walytja tjuta.”

Jesulu Punu Kiripitjinguru Wangkanytja

(Markaku 13:28-31; Luke-aku 21:29-33)

³² Munu Jesulu piruku tjanala tjukurpa kampa kutjupa wangkangu punu kiripitjtjara alatji, “Panya nyinngangka nyalpi punu kiripitjinguru punkara wiyaringkupai munu ngula piruku nyalpi kuwaritja pakannyangka nyura nyakula kulilpai alatji, ‘Munta-uwa, nyangatja watalpi kuliringanyi.’

³³ Ka nyanga palu purunypatu pika panya paluru tjana utiringkunyaangka nyura nyakula kulinma alatji, ‘Munta-uwa tjintu malatja watalpi ilaringu.’

³⁴ Uwa, tjuktururungkuna nyurala wangkanyi, panya nyanganpa uwankara utiringkuku anangu nyanga kuwari nyinanytja tjuta wanka nyinanyangkatu.

³⁵ Panya ngula manta ilkari uwankara wiyaringkuku, palu tjukurpa ngayulu wangkanytja titutjara alatjitu ngaraku wiyaringkunytja wiya.

Anangu Uwankara Ninti Wiya Tjintu Malatjaku

(Markaku 13:32-37; Luke-aku 17:26-30,34-36)

³⁶ “Palu uwankaraya tjintu nyara palumpa ngurpa. Angelpa ilkaritja tjuta ngurpa munu Katjanya kulu ngurpa, palu Mamanya kutju ninti.

³⁷ Panya ngula Watiku Katjanya pitjanyangka tjirirpi panya Noah-nya tjana iriti nyinanytja purunypa ngaraku.

³⁸ Panya nyara palula-arangka uru pulkangka kuwaripangka anangu tjuta watarku nyinangi, munuya mai kuka ngalkuningi, kapi waina kulu tjikiningi, munuya wati tjutangu kungka tjuta altingi.

³⁹ Nyanga alatjiya watarku alatjitu nyinangi, ka panya Noah-nya tjana walytjarara walytjarara kutju pautangka tjarpangu uru panya pulkangka-tawara, ka panya uru pulkangku pakara katuringkula anangu kutjupa uwankara iluntanu.* Ka nyara palu purunypa

* 24:39 Genesis 7:6

ngula anangu tjuṭa watarku alatjitu nyinaku ngayulu Watiku Katjanya witulya pulka pitjanyangka.

⁴⁰ Panya nyara palula ara wati kutjara tjinguru kaanangka warakarinyi, kana kutju katiku, mununa kutju wantikatiku.

⁴¹ Ka palu purunypa manta kutjupangka minyima kutjarangu tjinguru mai uninypa rungkanma, kana kutju katiku mununa kutju wantikatiku.

⁴² Ka nyura uti ala-alangu nyangama panya nyura tjiṅtu nyara palumpa ngurpa ngayulu panya pitjanytjaku.

⁴³ Wanyuya wati panya kutitjungkupainya kulila, panya paluru walingka tjarpara kutitjungkunyitjikitjangu nganmanytju waliku mayatjangka tjakultjunkturpai wiya, palu paluru kampangkatu tjarpapai. Tjinguru paluru nganmanytju tjakultjunkturangkampa waliku mayatjangka kulira nintingku nyinara palumpa patanma munu ngura atunyanama paluru tjarpanytjaku-tawara.

⁴⁴ Ka pala palu purunypa nyura uti rawangu ala-alangu patara nyangama nyura watarku nyinanyangka ngayulu Watiku Katjanya pitjanytjaku-tawara. Panya nyura uwankara ngurpa yaalara ngayulu malaku pitjanytjaku." Alatji Jesulu palurunku wangkangi palumpa nintintja tjuṭangka.

Tjukururu Wanganara Warakarinytjaku Mayatjaku

(Luke-aku 12:35-48)

⁴⁵ Munu Jesulu tjanala piruku wangkangu, "Ngananya wanyu wati waraka nintipuka munu tjukururu wanganara warakaripai? Nyara palunya mayatjangku tjukururu nyakula kutju tjunkuku palumpa waraka kutjupa tjuṭa tjukururungku atunymara kanyintjaku munu tjananya mai ungkunyitjaku.

⁴⁶ Munu ngula mayatja panya paluru ankunyitjatjanungku malaku pitjala nyakuku wati panya paluru waraka panya wirura palyantja. Munu paluru palumpa pulkara alatjitu pukulariku.

⁴⁷ Kana tjukururungku nyurala wangkanyi, panya wati mayatjangku alatji wirungku waraka tjuṭa atunymara kanyinnyangka nyakula palunya mayatja pulka mulapa tjunkuku palumpa uwankara mayatjarira atunymara kanyintjaku.

⁴⁸ "Palu tjinguru wati paluru kampa kutjuparira unngu kulilku, 'Munta, ngayuku mayatja tjinguru titutjara anu munu tjinguru ngula kutju malaku pitjaku.'

⁴⁹ Munu palulangurulta pitjanytja wiya ngaranyangka paluru wati waraka panya kutjupa tjuṭa pikangu pungkuku munu mai pulka kulu ngalkula waina pulka tjikira tarangkariku.

⁵⁰ Ka ngula mayatja panya paluru malaku pitjaku wati panya paluru watarku nyinanyangka.

⁵¹ Munu palunya kura nyinanyangka nyakula pulkara alatjitu pungkula paira iyalku ngura kurakutu pika pulkatjara nyinara titutjara ulanytjaku anangu panya ngunti palya-palku kananykananyapa nyinapai tjuṭangka tjunguringkula."

1-4 Munu Jesulu piruku tjanala alatji wangkangu, “Uwa, ngula tjinu malatjangka ngayulu malaku pitjala ngayuku walytja tjuṭa mayatjangku kanyilku. Ka ara nyara paluru paluru nyanga purunypa ngaranya panya kungkawara tjuṭatjara. Panya kungkawara 10 anu kungkawara kutjupaku ngurakutu palula tjunguringkula patantjikitja wati panya palumpa kalkuntjitjaku.* Munuya paluru tjana kutjungku kutjungku lampa tilitjara katingi mungangka ankunytjikitjangku. Palu panya kungkawara 5 kawakawa munuya tjana karitjina lampaku tjukutjuku kutju kanyiningi munga warangka tilingaranytjaku wiya. Ka panya 5 kutjupangu nintingu kulilpai munuya tjana karitjina pulka kanyiningi.

5 Munuya kungkawara paluru tjana uwankara rawa patara patara pilu-piluringkula kunkunaringu.

6 Ka munga kulturingkunyangka kutjupangu mirara wangkangu, ‘Walaya pakala! Wati panya paluru ila pitjanya, kala ngaparikatira nyawa!’

7 Kaya paluru tjana uwankarangkula kunkuntjanungku pakara lampa tjuṭa mantjira tili pulkanu ankunytjikitjangku.

8 Kaya panya 5 kawakawangku tili tjukutjukuringkunyangka nyakula putu kulinigi, ‘Utila panyatja karitjina pulka nguwanpa katima.’ Munuya putu kulira kungkawara panya 5 kutjupangka ngatjiniu wangkara, ‘Ungamalanya karitjina! Tililampa wiyaringu.’

9 Kaya wangkangu, ‘Wiya, nganana tjukutjuku kanyini nganampa kutju. Ankulayanku tjuwangka karitjina kutjupa payamilala!’

10 Kaya mulapaṭu anu payamilantjikitja. Ka tjana ankunyangka wati panya paluru wirkanu palumpa kalkuntja altira katinytjikitja. Kaya kungkawara panya kulilpai tjuṭa palula pulala tjunguringkula anu palumpa mamaku walikutu munuya wali palula wirkara tjarpangu mai panya pulka pukularira ngalkuntjikitja, ka wati warkaripaingku tuwa patinu.

11 Kaya kungkawara panya 5 kutjupangu karitjina mantjira mala wanara wirkanu munuya urilta ngarala mirara wangkangi, ‘Mayatja! Alalalampa!’

12 Ka wangkangu, ‘Wiya, ngayulu nyurampa ngurpa.’ ”

13 Munu Jesulu tjukurpa nyangatja wangkara wiyaringkula tjanalalta wangkangu, “Ala! Kulinmaya kungkawara panya kulilpai tjuṭa purunypa munuya ala-alangku nyangama! Panya nyura ngurpa tjinu nyara ngayulu pitjanytjitjaku.”

*Tjukurpa Wati Warkaripai Mankurpatjara
(Luke-aku 19:11-27)*

14 Munu Jesulu piruku tjanala wangkangu, “Uwa, ngayulu panya pitjanytja ara nyanga palu purunypaṭu ngaraku. Panya wati mayatjangku ngura kutjupakutu ankunytjikitjangku kulinigi munu panya palumpa warkaripai tjuṭa altira wangkangu palumpa walingka kutjupa kutjupa uwankara atunymankunytjaku.

* 25:1-4 Tjakaya kungkawaraku malpa tjuṭa palula tjunguringkula patalpai wati panya palumpa kalkuntjitjangku pitjala palunya altira ma-katinytjaku palumpa mamaku ngurakutu nyara palula malpa kutjupa tjuṭangka tjunguringkula mai pulka pukularira ngalkuntjaku.

¹⁵ Munu paluru war̄ka palunya tjananya kutju kutju unḡkukatingu. Wati war̄ka kutju nintipuka mulapa mani 5,000 unḡ, munu wati kutjupa ninti tjuku nguwanpa 2,000 unḡ, munu kutjupa ninti tjukutjuku 1,000 kutju unḡ. Munu anulta ngura kutjupakutu.

¹⁶ Ka wati panya 5,000 mantjintjatjanungku nintingku kutjupa kutjupa tjuṭa payamilara anangu tjuṭangka tjalamilaningi munu mani kutjupalta pulka palyara tjunḡunu ka 10,000-aringu palumpa panya mayatjaku.

¹⁷ Ka panya 2,000 mantjintjatjanungku palu purunypatu palyanu palumpa mayatjaku, ka 4,000-aringu.

¹⁸ Ka panya 1,000 mantjintjatjanungku ngurpangku katira piti tjawara tjunutjunu ngula palumpa mayatja malaku pitjanyangka malakungku unḡkunyjtikitjangu nampa panya palunyaṭu.

¹⁹ “Ka ngula tjanampa panya mayatja ngura kutjupakutu ankunytjatjanu malakulta pitjangu munu war̄karipai panya mankurpa alira tjapinu, ‘Mani panya ngayulu unḡkunyjtjalanguru nyura yaaltjitu palyanu?’

²⁰ Ka wati panya 5,000 mantjintjatjanungku pitjala 10,000 unḡkula wangkangu, ‘Uwa, Mayatja panya nyuntu ngayunya 5,000 unḡ, kana 5,000 kutjupa palyara tjunḡunu ka 10,000 nyuntumpa kuwari ngarinyi.’

²¹ “Ka mayatjangu panya wangkangu, ‘Wirungkun kulira nyanga palyanu, kananta kuwari pulka mulapalta unḡkuku ngayuku atunymara kanyintjaku. Ka ngalya-tjarpa, munu ngayula tjunḡuringkula pukularira nyinama.’

²² Ka wati panya 2,000 mantjintjatjanungku pitjala 4,000 unḡkula wangkangu, ‘Uwa, Mayatja panya nyuntunin 2,000 unḡ, kana kutjara kutjupa palyara tjunḡunu ka 4,000 kuwari ngarinyi.’

²³ “Ka mayatjangu panya wangkangu, ‘Wirungkun kulira palyanu, kananta kuwari pulka nguwanpalta unḡkuku ngayuku atunymara kanyintjaku. Ka ngalya-tjarpa, munu ngayula tjunḡuringkula pukularira nyinama.’

²⁴ Ka wati panya 1,000 mantjintjanyalta pitjangu munu wangkangu, ‘Wiya mayatja, ngayuluna nguluringangi nyuntumpa panya nyuntun wati wituwitu, munu nyuntu witulya pulkangku mantjilpai nyuntu tjunkunytja wiyatjangu munu panyan mai katara uralpai nyuntu nganmanytju uninypa tjuṭa tjunkunytja wiyatjangu.

²⁵ Kana nyuntumpa ngulungku mani panya nyuntu ngayunya unḡkunyjtja katira pitjanga tjawara tjunutjunu. Ka mani paluru nyangatja.’

²⁶ “Ka wati panya mayatjangu kulira wangkangu, ‘Nyuntun wati kura mulapa war̄ka palyantja wiya alatjitu nyinangi. Mulapa nyuntu ngayuku ninti panya ngayulu wati wituwitu mununa witulya pulkangku mantjilpai ngayulu tjunkunytja wiyatjangu, mununa mai katara uralpai ngayulu nganmanytju uninypa tjuṭa tjunkunytja wiyatjangu.

²⁷ Kan ngayuku nintingku nyaaku ngayuku mani tjawara tjunutjunu bankingka tjunkunytja wiyangu? Tjinguru nyuntu bankingka tjunkunyangka ngayulu malaku pitjala pulka nguwanpa mantjinma.’

28 “Munu tjananya ila ngaranyangka wangkangu, ‘Mani panya palunyaya mantjira uwa wati pala 10,000 kanyintjanya!’

29 Munu mayatja panya paluru wangkangu, ‘Panya anangungku warka pulka palyannyangka ngayulu palunya piruku pulka mulapa ungkuku, palu panya warka palyantja wiyangka ngayulu palumpa uwankara mantjilku mununa maralpa alatjitu paira iyalku.’

30 Munu mayatja paluru tjanala wangkangu, ‘Wati nyanga kurakuraya witiira ma-katira urilta wani ngura kurangka mungawalurungka pika pulkatjara nyinara titutjara ulanytjaku.’ ”

Tjintu Malatjangka Anangu Uwankara Ngurkantara Tjarantja

31 Munu palulanguru Jesulu tjanala piruku wangkangu alatji, “Ngula Watiku Katjanya mayatja pulka pitjaku angelpa winkitjara munu mayatja pulkaku tjiya wirungka nyinakatiku.

32 Kaya angelpa tjutangku anangu uwankara manta winkitja paramantjira ngalya-katira ngayula kuranyu ngaratjungkuku utulu winki mulapa. Kana tjananya ngayulu ngurkantara tjaralku, panya wati tjapatangku tjiipi tjuta munu nanikuta tjuta kulu tjungura kanyilpai munu kutjupa-ara paluru tjiipi tjutanguru ngurkantara nanikuta tjuta tjaralpai, palu purunypa ngayulu anangu tjuta ngurkantara tjaralku.

33 Mununa ngayuku walytja tjuta kampa wakungka ngaratjungkuku mununa ngayunya wantipai tjuta kampa tjampungka ngaratjungkuku.

34 Mununa kampa panya wakungka ngaranytja tjutangka alatji wangkaku, ‘Uwa, panya Mamalu nyuranya pukulmara kanyiningi, kaya pitjala ngayula tjunguriwa ngura nyanga ilkaritjangka. Panya kuwaripatjara mulapa manta ilkari paluntja kuwaripangka Mamalu nyurampa nganmanytju palyara wantingu ngula palula tjunguringkula nyinanytjaku.

35 Panya paltjatjiratja nyinanyangkani nyura mai ungu, munu panyani nyura mina ilu nyinanyangka mina ungu, munu panyani nyura malikitja wirkankunyangka nyakula nyurampa ngurangka kanyiningi.

36 Ka panya nikititi nyinangi, kani nyura nyakula mantarangka tjarpatjunu. Munu panyani nyura pikatjara ngarinyangka kulu wirura atunymanangi. Munu panya nyura ngayulu tjailangka nyinanyangka kulu ngayunya pitjala nyangangi mununi nyura wangkara pukulmanangi.’ Alatjina tjanala wangkaku wakungka panya ngaranytja tjutangka.

37-39 “Kaya ngapartji wangkaku, ‘Mayatja, putula kulini. Panya nyuntunyala nyakunytja wiyatu paltjatjiratja, mina ilu, malikitja, nikititi, pikatjara munu tjailangka nyinanytja.’

40 “Kana tjanala wangkaku, ‘Wiya, panya nyura anangu kutjupa tjuta paltjatjiratja, mina ilu, malikitja, nikititi, pikatjara munu tjailangka nyinanyangka nyakula tjananya alpamilara ngayunya kulu alpamilanangi, panya ngayulu mukuringangi nyura ngaltutjara nyara palunya tjananya alpamilara kanyintjaku.’

41 “Mununa palulanguru tjampungka ngaranytja tjuta wangkaku alatji, ‘Araya ngayulanguru panya nyuranya Godalu nganmanytju kukanymanu waru panya titutjara kampanytjala waninytjikitjangku, panya Godalu palyara wantingu Satanku munu mamu tjutaku kulu.

⁴² Panya nyakulani nyura wantingi paljtjatjiratja nyinanyangka mai unguwiyangku, munu panyani nyura mina ilu nyinanyangka wantingi kapi unguwiyangku,

⁴³ munu panyani nyura malikitja pitjanyangka nyakula altira ngurangka tjunkuwiyangku wantingi, munu panyani nyura nikiti nyinanyangka nyakula wantingi mantarangka tjarpatjunkuwiyangku, munu panyani nyura pikatjara ngarinyangka atunymara kanyintja wiyangku wantingi, munu panyani nyura tjaila unngu nyinanyangka tjarpara wangkara pukulmankuwiyangku wantingi.'

⁴⁴ "Kaniya wangkaku, 'Mayatja, puṭula kulini. Panya nyuntunyala nyakunyitja wiyatu paljtjatjiratja, mina ilu, malikitja, nikiti, pikatjara munu tjailangka nyinanytja.'

⁴⁵ "Kana tjanala wangkaku, 'Wiya, panya nyura anangu kutjupa tjuṭa paljtjatjiratja, mina ilu, malikitja, nikiti, pikatjara munu tjailangka nyinanyangka nyakula tjananya alpamilalwiyangku wantira ngayunya kulu alpamilantja wiyangku wantingi, panya ngayulu mukuringangi nyura ngalṭutjara nyara palunya tjananya alpamilara kanyintjaku.' Alatjina tjanala wangkaku ngayula tjampungka ngaranytja tjuṭangka.

⁴⁶ "Mununa palulanguru palunya tjananya uwankara paira iyalku ngura kurakutu nyara palula titutjara nyinanytjaku pika pulkatjara. Palu nyanga wakungka ngaranytja uwankara ngayula tjunguringkula wanka titutjara nyinaku."

26

Jesunya Pungkunyitjikitjangku Kulintja

(Markaku 14:1-2; Luke-aku 22:1-2; Johnku 11:45-53)

¹ Munu Jesulu tjukurpa nyanganpa wangkara wiyaringkula palumpa nintintja tjuṭangka wangkangu,

² "Nyura panya ninti panya nyanga palulanguru tjintu kutjara wiyaringkula inma panya Katuwanu Ankunyitjanya ngaranyi, ka inma nyara palula wati mirpantju tjuṭangu Watiku Katjanya witilku munuya ma-ungkuku punu katakutjarangka wakara utitjunksunyitjaku."*

³ Kaya wati tjukurtjara kuranyitja tjuṭa munu tjilpi kuranyitja tjuṭa kulu tjunguringu wati panya tjukurtjara pulkaku ngurangka ini panya Kayapatjaku.

⁴ Munuya wangkara kuliningsi kampangkatu Jesunya witintjikitjangku munu palula malangka iluntankunyitjikitjangku.

⁵ Munuya wangkangu, "Wanyula kuwaripangku wantima, panya anangu tjuṭaya inmaku pitjangu kuwari, munulanya tjinguru tjanala mirangka witinnyangka nyakula tjituru-tjitururira winkingku tjuṭuringkula pungkuku."

Minymangku Jesula Panṭi Wiru Tjutintja

(Markaku 14:3-9; Johnku 12:1-8)

* **26:2** Ara nyanga Katuwanu Ankunyitja kulintjikitjangku nyawa Exodus-ala chapter 12 munu verse 21-nguru.

⁶ Ka Jesunya panya ngura Piitjanila nyinangi wati ini Simonku ngurangka, panya wati nyara paluru nganmanypa miri pikatjara nyinangi.

⁷ Ka tjana nyinara mai ngalkunyangka minyma kutjupa Jesulakutu pitjangu munu paluru katingi patalangka uwila wiru pantipai mani pulkatja. Munu paluru alara Jesula katangka tjutinu.

⁸ Kaya nintintja tjutangku nyakula tjananku mirpanarira wangkangi, "Ai! Nyaaku nyangangu pupatjura wiyanu? Mani pulkatja alatjitu.

⁹ Uti nyangangu mani pulkakitjangku tjalamilanma munu mani mantjira ngaltutjara tjuta ungama."

¹⁰ Ka Jesulu kuliningi tjana wangkanyangka munu tjananya wangkangu, "Nyaaku nyura nyararingkula wangkanyi? Nyangangu wiru mulapa palyanu ngayuku.

¹¹ Panya ngaltutjara tjutaya nyurala rawa alatjitu nyinanyi, palu ngayulu nyurala rawa nyinanytja wiya.

¹² Kani minyma nyanga paluru panți nyanga wirungka nganmanytju tjutinu ngula panya kurulta ngarinytjaku.*

¹³ Tjukurungkuna nyurala wangkanyi, panya ngula Tjukurpa Palya ngayunyatjara ngura winkingka para-wangkaraya minyma nyanga palunyatjara kulu tjakultjungkuku paluru nyanga wiru palyantja ngayuku."

Judasalu Jesunya Tjanala Nintintjikitjangku Kalkuntja

(Markaku 14:10-11; Luke-aku 22:3-6)

¹⁴ Ka nyara palulanguru nintintja panya 12-nguru kutju anu Judas Kariyatanya tjukurtjara kuranyitja tjutakutu.

¹⁵ Munu tjanala wangkangu, "Ngayulu nyurala Jesunya nintinyangka nyura ngayunya mani yaaltjitu ungkuku?" Kaya wangkanyangka kulira mani tjarara 30 palunya ungu.

¹⁶ Ka nyara palulanguru Judasalu kuliningi, "Yaaltjingarana tjanala nintilku Jesunya?" Munu paluru rawangku nyakukattingi Jesunya tjanala nintintjikitjangku.

Mai Ngalkunytja Inma Panya Katuwanu Ankunytjanya Kulintjikitjangku

(Markaku 14:12-21; Luke-aku 22:7-13,21-23; Johnku 13:21-30)

¹⁷ Ka tjintu panya paluru wirkanu mai pilytja ngalkula ara panya Katuwanu Ankunytjanya kulintjaku. Ka palumpa nintintja tjutangku Jesula tjapinu, "Yaaltjinkala nyuntumpa nganampa mai kuka palyalku ngalkula ara panya Katuwanu Ankunytjanya kulintjikitjangku?"

¹⁸ Ka tjananya Jesulu witura iyara wangkangu, "Ankulaya Jerusalemala wirkara nyawa wati ini nyangatja munuya palula wangka alatji, 'Nintilpailulanya witu, kala kunyu nyuntumpa walingka mai palumpa nganampa palyalku ara panya Katuwanu Ankunytjanya ngalkula kulintjikitjangku, panya palumpa ilaringu.' Alatjiya wati panya palula wangka."

* 26:12 Jew tjutangkuya tjakangku anangu ilunyangka malangka uwila wiru pantipai puntungka tjuilpai wiruringkula ngarinytjaku. Ka Jesulu palurunku ilunytjikitjangku kulira nyangatja nganmanytju wangkangi.

¹⁹ Kaya mulapatu Jesulu panya wangkanytja uwankara ankula palyanu munuya mai pilytja kuka kulu paura tjunkula wantingu mungartji ngalkuntjikitjangu.

²⁰ Ka tjinu ma-tjarpanyangka Jesunya munu nintintja tjuta kulu wali panya palula tjarpangu munuya nyinakatingu mai ngalkuntjikitja.

²¹ Munuya antangu para-ngarira wanara mai ngalkuningi. Ka Jesulu tjanala wangkangu, "Tjukururungku nyurala wangkanyi, panya kutjungku nyuralanguru ngayunya nintilku ngayuku mirpantju tjutangka tjana ngayunya witintjaku."

²² Kaya nintintja panya tjutangu kulira ungu jtjuru-tjturingu, munuya kutjungku kutjungku palula wangkara tjapiningi, "Mayatja! Nyaa, ngayunan wangkanyi?"

²³ Ka Jesulu wangkangu, "Wiya, nyanga kuwari ngayula tjungungku pitingka tjalatjura ngalkuni, nyanga paluruni nintilku.*"

²⁴ Uwa, mulapa Watiku Katjanya iluku, panya alatjirinytjaku nyiringka iriti wakatjunu. Palu ngaltutjara, wati panya ngayunya nintintjanya, panya palumpa pika pulka mulapa ngaraku. Wanyunti wati paluru iti wirkankunyitja wiya ngarama." Alatji Jesulu wangkangu.

²⁵ Ka wati panya Judasalu, palunya panya nintintjalu wangkangu, "Nintilpai! Nyaa? Ngayunan wangkanyi?"

Ka wangkangu, "Uwa nyuntunya wangkanyi."

Mayatjala Tjana Mai Malatja Ngalkunyitja

(Markaku 14:22-26; Luke-aku 22:14-20; 1 Karintjaku 11:23-25)

²⁶ Ka tjana ngalkunnyangka Jesulu mai pilytja mantjinu munu maiku pukularira Godanya walkura wangkangu, "Wirungkulanyan mai nyangatja ungu." Munu katantara palumpa nintintja tjuta wangkara ungu, "Mantjiraya ngalkula. Nyangatja ngayulu puntu."

²⁷ Munu palulanguru walpayata wainatjara mantjinu munu wainaku pukularira Godanya walkura wangkangu, "Wirungkulanyan waina nyangatja ungu." Munu tjananya ungu wangkara, "Mantjiraya tjikila.

²⁸ Nyangatja ngayulu milkali anangu tjutaku tjutinytja. Panya ngayulu ilura milkali tjutinyangka Godalu kalkunu anangu tjutaku kalyparingkunyitjikitjangu munu tjananya kura tjuta palyantjijanguru pungkuwiyangu wantinytjikitjangu.

²⁹ Kaya kulila, panya ngayulu waina piruku tjikintja wiya mantangka nyanga nyinara, palu ngula Mamalu mayatja pulkangu palumpa walytja uwankara utulura kanyilku, kana nyara palula arangka nyurala piruku tjikilku waina kuwaritja." Alatji Jesulu tjanala wangkangi.

³⁰ Munuya palulanguru ngalkula tjikintjatjanungku inma kutju inkara wiyaringkula ma-pakara anu apu panya Alipataralakutu.

Jesulu Peternya Ngurparingkunyitjaku Wangkanytja

(Markaku 14:27-31; Luke-aku 22:31-34; Johnku 13:36-38)

³¹ Ka Jesulu tjanala wangkangu, "Munga nyanga kuwari nyura uwankara ngayulanguru wililyaralku, panya nyiringka iriti wakatjungkunyitja ngaranyi Godalu wangkanytja alatji, 'Ngayuluna tjiipi tjutaku tjapata pungkula iluntankuku, kaya tjiipi tjuta wililyaralku.' *"

* 26:23 Psalm 41:10 * 26:31 Tjakarayaku 13:7

32 Palu ngayulu ilunytjatjanu wankaringkula pakara nyurala kuranyu ankuku Galileelakutu.”

33 Ka Peterlu wangkangu, “Wiya, nyanga tjanantiya nyuntunya wantikatira wirtjapakalku palu ngayulu wiya.”

34 Ka Jesulu palula wangkangu, “Wiya, tjukarurungkuna nyuntunya wangkanyi, panya tjintu pakantja kuwaripangka tjuki wangkapai, ka munga nyanga kuwari tjuki paluru wangkanytja kuwaripangka nyuntu ngayuku mankurara ngurparingkuku.”

35 Ka Peterlu pulkara alatjitu tungun-tunguntu wangkangi, “Wiya, ngayulu nyuntumpa ngurparingkunyitja wiya alatjitu. Tjinguruli nyuntu ngalitu palya iluku.”

Kaya nintintja panya kutjupa tjuangka kulu tjukurpa palu purunypatu wangkangu.

Jesulu Godala Tjapintja Ngura Katjimanila

(Markaku 14:32-42; Luke-aku 22:39-46)

36 Munuya palulanguru apu panya Alipatjarala tatira ngura ini Katjimanila wirkanu, ka Jesulu wangkangu nintintja panya tjuangka, “Nyangangkaya nyinama patara kana nyarangka tjukutjuku ankula Mamala tjapila.”

37 Munu paluru altira katingu nintintja mankurpa Peternya munu Tjipitiku katja kutjara Jamesanya pulanya Johnnga. Munu tjukutjuku patupatu ankula nyara palulalta paluru pulkara tjituru-tjitururingu.

38 Munu nintintja panya mankurta wangkangu, “Ngayulu pulkara tjituru-tjitururira kurunpa paku pulkaringkula nguwanpa ilunyi. Kaya wanyu nyangangka ngayula tjungu nyinara wankangu nyangama kunkunpa wiyangu, kana Mamala tjapila.”

39 Munu paluru patupatu nguwanpa ilatu ankula mantangka watungarakatira Godala tjapiningi tjituru-tjituru pulkangu alatji wangkara, “Uwa Mama, wanyu tjananya ngayuku panya mirpantju tjuta markula ngayunya pungkunyitjaku-tawara. Palu wiya, nyuntu mukuringkula palya tjananya wantir'iyala ngayunya pungkunyitjaku, kana palula tjanalanguru kumpintja wiya, panya ngayulu mukuringanyi nyuntu mukuringkunyitjita kutju palyantjikitja.”

40 Munu panya tjanalakutu malaku pitjangu munu nyangu nintintja panya mankurpa kunkunpa ngarinyangka. Munu wangkangu, “Peter, nyura putu wankangu nyanganyi rawa nguwantu?”

41 Munu tjanala piruku wangkangu, “Wankangkuya nyangama munuya Mamala tjapinma nyuranya anga-kanyintjaku mamungku nyuranya kurantjaku-tawara, panya nyura pulkara mukuringanyi wanka nyinanyitjikitja, palu kuru nyura pilu-pilu ngaranyi.”

42 Munu tjanala wangkanytjatjanu malaku ankula Mamala piruku tjapiningi, “Uwa Mama, wanyu tjananya ngayuku mirpantju tjuta markula ngayunya pungkunyitjaku-tawara. Palu wiya, nyuntu mukuringkula palya wantir'iyala ngayunya pungkunyitjaku, kana palula tjanalanguru kumpintja wiya, panya ngayulu mukuringanyi nyuntu mukuringkunyitjita kutju palyantjikitja.”

43 Munu tjapira wiyaringkula piruku malaku pitjala tjananya nyangu kunkunpa ngarinyangka panya kuruya pilu-pilu mulapa ngarangi.

⁴⁴ Ka tjananya wantikatira malaku ankula piruku Mamala tjapiningi tjukurpa panya palunya wankara.

⁴⁵⁻⁴⁶ Munu tjapira wiyaringkula malakulta pitjangu munu tjanala wankangu, "Kunkunpa tu nyura ngarinyi? Alatjitu nyura kunkunarira pakuwiyaringu. Nyawaltaya pakara! Pala wirkakatingu tjananya ngayuku panya mirpantju tju ta, munu ni kuwari ngayunya Watiku Katjanya tjanala nintini wati pala kura tju tangka, kaya ngayunya witi ra katiku. Walaya pakala kala palula tjanalakutu ara!"

Jesunya Witintja

(Markaku 14:43-50; Luke-aku 22:47-53; Johnku 18:3-12)

⁴⁷ Ka Jesunya kuwaripatu tjanala ngarala wankanyangka Judasanya palumpa panya nintintja wirkanu wati tju tajar, munuya paluru tjana tju ta waratjara tju tinypatjara kulukulu pitjangu, panya tju kurtjara kuranyitja tju tangu munu tjilpi kutjupa tju tangu kulu tjananya witi ra iyanu Jesunya witintjaku.

⁴⁸ Ka wati panya palula tjanala Judasalu nganmanytju wankangu tjana pitjanytja kuwaripangka alatji, "Ngayulunawi mitamita kutjara nyunyjtula wati palunya, kaya nyunyjtjunnyangka nyakulampa witi lalta."

⁴⁹ Munu palulanguru Judasanya Jesulakutu pitjala wankangu, "Awa! Nintilpai!" Munu palula ilaringkula palunya nguku kutjara nyunyjtjunu.

⁵⁰ Ka Jesulu wankangu, "Uwa malpa, walangu palyala nyuntu mukuringkunyitja!" Kaya wati panya tju tangu pitjala palunya witi ra kanyiningi.

⁵¹ Ka wati kutjungku Jesula tju ngutjangu tju ta wara piltangka kanyintjatjanungku ilara wati tju kurtjara pulkaku warakaripai pungkula pina kutju mutunu.

⁵² Ka Jesulu palula wankangu, "Tju ta pala malakungku tjarpatjara! Panya anangungku tju langka kuntara iluntarampa palu purunypatu iluku kutjupangu palunya ngapartji tju langka kuntannyangka.

⁵³ Nyuntu ngayuku ninti. Tjinguru ngayulu mukuringkulampa Mamala tjapinma ngayunya alpamilantjaku, ka paluru angelpa tju ta mulapa witonma panya minga purunypa, kaniya warmalarira pitjala ngalkinma alatjitu.

⁵⁴ Palu tjinguru angelpa tju tangu pitjala ngayunya ngalkinnyangkampa tjukurpa panya nyiringka iriti walkatjunkunyjtjanya utiringkunyitja wiya ngaraku, panya ngayunya iluntankunyjtjaku wankanyjtjanya. Nyara palulanguruna angelpa tju tangu ngalkintjaku Mamala tjapintja wiyangu wantinyi."

⁵⁵ Munu palulanguru Jesulu wati tju tangu wankangu, "Nyaaku nyura tju ta waratjara tju tinypatjara kulu pitjangu ngayunya wati pikati-palku kulira witintjikitja? Wanyuna ngayulu mirpantju? Wiya, panya ngayulu tju tu kutjupa tju tu kutjupa timpula ungu nyinara nyurala nintilpai, ka panyani nyura witi lwiyangu wantingi.

⁵⁶ Palu palya, panya nyanga alatjirinytjaku Godalu nganmanytju wankangu wati wangkatjara tju tangu, kaya panya nyiringka iriti walkatjunu."

Kaya palulangurulta nintintja tju tangu palunya wantikatira ngulu wirtjapakanu.

Jesunya Jewku Mayatja Tjutangka Kuranyu Ngaranytja
(Markaku 14:53-65; Luke-aku 22:54-55,63-71; Johnku 18:13-14,19-24)

⁵⁷ Munuya Jesunya witintjatjanungku ma-katingu tjukurtjara pulkakutu wati panya Kayapatjaku walikutu. Kaya tjukurtjara kuranyitja tjuta, Moseku tjukurpa nintilpai tjuta munu tjilpi kutjupa tjuta kulukulu wali nyara palula unngu tjunguringu.

⁵⁸ Ka Peterlu Jesunya tjananya malawanungku kumpira wananingi palula tjanala ilaringkunyitja wiyangku munu wali panya palula wirkara ma-tjarpangu yaatangka unngu munu wati timpula atunymankupai tjutangka tjunguringkula ngarangi nyakunytjikitja. Panya paluru kuliningi, "Kuwari yaaltjiriku? Wanyu kana nyanganguru ngarala nyangama."

⁵⁹ Kaya tjukurtjara kuranyitja tjuta munu tjilpi kantjula uwankara tjunguringkula wali unngu nyinara wangkangi munuya anangu tjuta ngurira altira tjanala tjapiningi, "Wanyulanya tjakultjura Jesulu panya nganmanyitju wangkanyitja tjuta, kala kulira palunya ngurkantara." Alatji tjana tjapiningi panya tjana mukuringangi anangu tjutangka Jesulu kura palyantja ngunti wangkanytjaku tjanala kulira palunya iluntankunytjikitja.

⁶⁰ Kaya anangu tjutangu kantjula tjutangu altinyangka pitjala tjukurpa Jesunyatjara wangkangi, palu ngunti-nguntiya wangkangi, ka tjukurpa tjana wangkanyitja tjungu mulapa ngaranytja wiya kutjupa kutjupa ngarangi. Kaya putu nguriningi anangu kutjarangku pitjala tjukurpa kutju wangkanytjaku.

Ka palulanguru wati kutjara kutjupa tjanala wangkanytjikitja wirkanu,

⁶¹ munu pula wangkangu, "Wati nyangangu alatji mungatu wangkangu, 'Ngayulu Godaku timpula nyanga piluntankuku, mununa ngayulu tjintu mankurarira piruku palyalku malakungku.' Alatji wangkanyangkali ngali kulinu."

⁶² Ka wati panya tjukurtjara pulka pakanu munu Jesula tjapinu, "Nyuntun kulini? Wati nyanga pula nyuntunya kulintjatjanungku wangkanyi. Mulapa nyangantu nyuntunya tjukarurungku wangkanyi?"

⁶³ Palu Jesunya wangkanyitja wiya alatjitu pilunpa ngarangi. Ka wati panya tjukurtjara pulkangku piruku wangkangu, "Kuwarina Godala mirangka nyuntula tjapini, kalanya tjukarurungku wangka! Palu mulapan wanyu Christanya Godalu kalkuntjanya panya nganampa Wankarunkupainya, Mayatja Godaku katja?"

⁶⁴ Ka wangkangu, "Pala nyuntun wangkanyi. Palu kulilaya! Panya nyanga palulanguru nyura uwankarangku ngayunya nyakuku Watiku Katjanya Godala witulya pulkangka itingka nyinanyangka mayatja pulka, mununi nyura nyakuku ilkaranguru ngangkalangka pitjanyangka."

⁶⁵ Ka wati tjukurtjara pulkangku tjukurpa nyangatja kulira mirpanarira mantara palurunku tjilpirpungu munu wangkangu, "Ala palatja! Wati nyangatja Godala inkanyi. Wanyula wanti anangu

kutjupa tjuṭa piruku al̄tinytja wiyangku pitjala palunya kuranmankunytjaku. Panya kuwari nyangala nganaṅa alatj̄itulta kulinu palurunku walytjangku Godanyanmankunyangka.*

⁶⁶ Ka nyura yaaltji kulini?"

Kaya wangkangu, "Wiya, wati nyangatja kura mulapa. Utila iluntankunytjaku iyanma."

⁶⁷ Munuya Jesuku pul̄kara kuraringkula palunya yunpa wiṭalytjunangi munuya pungi munuya nguku kampa kutjara patjalku-pungkula ngalya-ngalyparingkula wangkangi,

⁶⁸ "Tjukaṛurungku wangka, nganalunta panyatja pungu? Panya nyuntu kunyun wangkatjarangku nitingku kulilpai Godalu panya kalkuntjanya."

Peternya Jesuku Ngurparingkunyitja

(Markaku 14:66-72; Luke-aku 22:56-62; Johnku 18:15-18,25-27)

⁶⁹ Ka Peternya wali panya palula yaatangka kuwaripatu nyinangi, ka kungkawara tjukurtjara pul̄kaku war̄karipai pitjangu munu palula wangkangu, "Nyuntu kulu panyan Jesula para-ngarapai wati panya Galileenya ngurarangka tjungu."

⁷⁰ Ka Peterlu winkingka mirangka wiyanmar̄a wangkangu, "Wiya, ngayulu ngurpa. Nyaan wangkanyi?"

⁷¹ Munu ma-pitjala kaitangka itingka ngarangi. Ka kungkawara war̄ka kutjupangu ngapartji palunya nyakula wati tjuṭangka wangkangu, "Wati nyara paluru kulu Jesula tjungu para-ngarapai wati panya Nazarethanya ngurarangka."

⁷² Ka paluru piruku ngurparingu munu wangkangu, "Wati nyara palumpana ngurpa alatj̄itu. Godala mirangkaṅa tjukaṛurungku wangkanyi."

⁷³ Ka wati tjuṭangu ngapartji kaputu ngaranytjatjanungku palulakutu pitjala wangkangu, "Wiya, mulapa nyuntu palula tjungutja. Pala wangkala nyuntunya ngurkantananyi. Palu purunpan wangkanyi Jesunya purunypa."

⁷⁴ Ka wangkangu, "Wiya wati palumpana ngurpa. Mulapana nyurala wangkanyi. Tjinguruna ngunti wangkanyangkampa Godalu ngayunya iluntakuku."

Ka palulanguru paluru wangkara wiyaringkunyangka tjulpu panya tjuki wangkangu.

⁷⁵ Ka Peterlu kulinu Jesulu panya nganmanytju wangkanytja alatji, "Nyuntu ngayuku mankurara ngurparingkunyitjatjanungku kulilku tjuki wangkanyangka." Ka nyangatja kulira paluru jtjuru-tjtururira ankula urilta pul̄kara ulangi.

27

Jesunya Pilate-alakutu Katinytja

(Markaku 15:1; Luke-aku 23:1-2; Johnku 18:28-32)

¹⁻² Munuya mungawinki mulapa wati tjukurtjara kuranyitja tjuṭangu munu tjilpi kutjupa tjuṭangu kulu wangkara kulira tjukurpa palyanu mayatja panya pul̄ka ini Pilate-anya wangkara

* **26:65** Moseku tjukurtu pul̄kara pailpai anangungku walytjangku Godanyanmankunytja wiyangku wantinytjaku. Nyawa Exodus 20:2-7.

wituwituntjikitjangku Jesunya iluntankunytjaku.* Munuya wati timpula atunymankupai tjuṭa wangkangu palunya tjiinangka karpira katinytjaku Pilate-alakutu. Wati nyara palunya panya Rome-aku mayatja pulkangku tjunu manta Judeanya mayatjarira kanyintjaku.

Judasanya Ilunytja
(Acts 1:18-19)

³ Ka Judasalu, wati panya Jesunya witintjaku nintintjalu kulinu tjilpi tjuṭangku Jesunya Pilate-anya iluntankunytjaku ungtkunytja. Munu paluru kulintjatjanungku mani panya 30 palunya ungtkunytjanya malakungku katingu timpulakutu tjukurtjara kuranyitja tjuṭa munu tjilpi tjuṭa kulu malakungku ungtkunytjikitjangku munu tjanala wangkangu,

⁴ “Kurangkuna nyurala nintinu wati tjukaruru iluntankunytjaku.”

Kaya palula wangkangu, “Wiya, wampa. Nyuntultanku walytjankulta kulila! Nganana panya ngurpa. Nyangatja panya nyuntu kulintja!”

⁵ Ka Judasalu mani panya tjilpa 30 waningu tjanala itingka munu pakara anu mununku walytjangku liri ruupangka karpira punungka tatira waraly-waralyngarangi munu ilungu.

⁶ Kaya tjukurtjara panya kuranyitja tjuṭangku mani panya 30 mantjira wangkangu, “Mani nyangatja milkalitja, ka panya Moseku tjukurta ngaranyi mani nyanga palu purunypa mani timpulitjangka tjungura tjunkunytja wiyangku wantinytjaku.”

⁷ Munuya wangkara kulira manta tjukutjuku payamilanu malikitja tjuṭa ilunyangka nyara palula tjuṭutjunkunytjaku. Manta panya palunyaya payamilanu wati panya tjuṭpirnguru piti tjuṭa palyalpaingka.

⁸ Kaya nyara palulanguru anangu tjuṭangku ngura nyara palunya ini wangkapai, *Manta milkalitjanya* munuya kuwari wangkanyitu.

⁹ Ara nyanga palunya panya wangkatjara ini Jeremiah-lu iriti nyiringka walkatjunu alatji,

“Anangu Israelkunu kutjupa tjarangku ngayunya mani 30 kutju ungu ngayulu tjanampa palyannyangka.

¹⁰ Kaya mani panya palunya mantjira manta payamilanu wati panya tjuṭpirnguru piti tjuṭa palyalpaingka, panya Mayatja Godaluni wangkangu alatji palyantjaku.”

Ka tjukurtjara kuranyitja tjuṭangku manta panyatja payamilan-nyangka tjukurpa nyangatjalta ngalya-utiringu.

Pilate-alu Jesunya Tjapira Kulintja
(Markaku 15:2-5; Luke-aku 23:3-5; Johnku 18:33-38)

¹¹ Kaya Jesunya katira Pilate-ala kuranyu ngaratjunu, ka Pilate-alu palula tjapiningi alatji wangkara, “Nyuntu wanyu mulapa Jew tjuṭaku mayatja pulka?”

Ka Jesulu wangkangu, “Uwa, pala wangkanyin.”

* 27:1-2 Tjinguruya Jew tjuṭangku Jesunya walytjangku iluntanama, palu tjanampa ngaranytja wiya anangu kutjupa iluntankunytjaku, panya mayatja Rome-anya ngurarangku kutju ngurkantara wangkapai anangu kutjupa iluntankunytjaku.

12 Kaya tjukurtjara kuranyitja tjuṭangku tjilpi tjuṭangku kulu Jesunya Pilate-ala mirangka puntura wangkangi. Ka tjana wangkanyangka Jesulu kulira wantira pilunpa alatjitu ngarangi.

13 Ka Pilate-alu palula wangkangu, "Nyuntu kulini tjana wangkanyangka? Nyuntu kunyun kutjupa kutjupa kura tjuṭa palyanangi, pala wangkanyintaya."

14 Palu Jesunya wangkanytja wiya alatjitu pilunpa ngarangi, ka mayatja panya Pilate-alu nyakula nguwanakuringi munu kulinigi, "Ai! Nyaaku nyangatja wangkara aluntja wiya ngaranyi?"

Jesunya Iluntankunyitjikitjangku Wangkanytja

(Markaku 15:6-15; Luke-aku 23:13-25; Johnku 18:39—19:16)

15 Ka panya yiya kutjupa yiya kutjupa inma panya Katuwanu Ankunyjtjanya ngaranyangka mayatja Pilate-alu tjakangku tjailanguru wati kutju walatjungkupai anangu tjuṭa mukuringkunyangka.

16 Ka nyara palula ara wati ini Parapatjanya tjailangka nyinangi, kaya anangu Judeala nyinanytja tjuṭa ninti wati palumpa.*

17 Ka tjintu nyara palula anangu tjuṭa mulapa palumpa ngurangka urilta tjunguringkunyangka Pilate-alu tjanala tjapinu, "Wati yaaltjina nyurampa walatjungkuku Parapatjanya, munta Jesunya panya nyura kutjupa tjuṭangku palunya Godalu kalkuntjanya kulilpai?"

18 Nyangatja paluru nintingu tjapiningi alatji kulira, "Wati nyanga tjukurtjara kuranyitja tjuṭangkuya Jesunya nyararingkula ngayulakutu katingi."

19 Munu mayatja paluru palumpa tjija pulkangka nyinangi, panya tjija nyara palula nyinara paluru anangu kutjupa palulakutu katinyangka ngurkantankupai. Ka paluru tjija nyara palulanguru tjanala wangkanyangka palumpa kuringku wati kutjupa wituṅu Pilate-ala tjakultjungkunyjtjaku alatji, "Wati palatja tjukaruru mulapa, panya ngayulu palunya mungangka tjukurmanu mununa pulkara nguluringkula tjititingangi. Ka palunya wantima iluntankunyjtjaku wangkanytja wiyangku."

20 Kaya tjukurtjara kuranyitja tjuṭangku, tjilpi tjuṭangku kulu anangu tjuṭa wituwituṅu mayatja Pilate-ala wangkanyjtjaku wati panya Parapatjanya tjailanguru walatjungkunyjtjaku munu Jesunya palumpa arangka iluntankunyjtjaku.

21 Ka Pilate-alu tjanala tjapinu, "Wati yaaltjiku nyura mukuringanyi nyanga kutjaranguru ngayulu walatjungkunyjtjaku?"

Kaya wangkangu, "Parapatjanya!"

22 Ka Pilate-alu wangkangu, "Kana wanyu nyaalku wati nyanga Jesunya Christanya?"

Kaya uwankarangku wangkangu, "Wiya, palunya punu katikutjarangka wakara utitjura!"

23 Ka Pilate-alu piruku tjanala wangkangu, "Palu kura nyaa wanyu nyanga paluru palyanu?"

Kaya alatji wangkanyangka kulira pulkara mirara wangkangu, "Punu katikutjarangka wakara utitjura!"

24 Ka palulanguru tjana tungun-tunguntu wangkanyangka nyakula Pilate-alu wantira kulinu, "Tjinguruya winki mirpanarira pulkara

* 27:16 Parapatjanya kunyu ini kutjupa Jesunya.

pikaringkuku.” Munu paluru mina mantjinu mununku mara paltjinu anangu winkingka mirangka munu tjanala wangkangu, “Nyawaniya! Ngayulu wati nyangatja nyurala tjungurinkula iluntankunyta wiyangku wantinyi. Nyangatja nyura iluntankunyjtikitja mukuringanyi ngayulu wiya. Palu nyura rawangku wituwitunyangka kutjupa tjaultji tjuangka wangkanyi iluntankunyjtaku.”

²⁵ Kaya anangu winkingku palula wangkangu, “Wiya, palya, nyan-gatja nganana mukuringkunyta, ka nyuntu nganana mukuringkun-yangka iluntankunyjtaku wangkanyi. Ka tjinguru nganana ngunti alatja palyannyangka Godalu nganannya pungama munu nganampa tjtiti tjuata munu walytjapiti malatja malatja tjuata kulu nyuntunya wiya.”

²⁶ Ka Pilate-alu wati panya Parapatjanya tjailanguru walatjunu munu palumpa tjaultji tjuata wangkangu Jesunya wiipangka alkan-tjaku. Munu palula malangka tjana pungkula wiyaringkunyaangka tjanala wangkangu katira punu katakutjarangka wakara utitjunksun-tyjaku.

*Tjaultji Tjuangka Jesunya Kurara Pungkunyta
(Markaku 15:16-20; Johnku 19:2-3)*

²⁷ Kaya Pilate-aku tjaultji tjuangka Jesunya katira mayatja pulkaku walingka tjarpatjunu munuya tjaultji kutjupa tjuata altira uwankara tjungurinkula palula para-ngarala arintanangi.

²⁸ Munuya mantara panya palumpa araltjanu munuya mantara kutjupangka rituwanaangka tjarpatjunu.

²⁹ Munuya mayatja pulkangku katangka kanyilpai purunypa palyanu tjilka-tjil kanguru iri pulkatjara munuya palula katangka puruntara tjunu. Munuya punu tjukara palunya ungu mara wakungku witera kanyintjaku mayatja pulka purunytju, munuya palu-langurulta palula kuranyu tultjungararakatira palunya anara ngalypan-galyparingkula ngunti walkura wangkangi alatji, “Awari! Mulapa nyuntu Jewku mayatja pulkanya.”

³⁰ Munuya palunya witalytjunksula punu panya tjukarangka man-tjira kata pungangi.

³¹ Munuya anara wiyaringkula mantara panya rituwana araltjara palumpa panya mantarangka malakungku tjarpatjunu. Munuya palulangurulta palunya ma-katingu iluntankunyjtikitjangku.

*Jesunya Punu Katakutjarangka Wakara Utitjunksunyta
(Markaku 15:21-32; Luke-aku 23:26-43; Johnku 19:17-27)*

³² Munuya Jesunya ngura Jerusalemalanguru urilkutu ma-pakaltjinganu, ka paluru punu tjalira anangi. Kaya urilkutu ma-pakara nyangu wati kutjupa ini Simonnga ngura ini Tjairininya ngurara ngalya-tjarpanyangka munuya tjaultji panya tjuangka palunya pauntjingara wangkangu punu panya Jesuku tjalira katinytjaku.

³³ Munuya ankula wirkanu ngura ini Kaulkatjala panya wangka tjanampangkuya puli nyara palunya wangkapai, *Kata Tarkatjaranya.*

³⁴ Munuya ngura pala palula wirkara palunya wainangka kutjupa kutjupa tjau purunypa tjungura ungangi pika kaarngaranyangka manarmankunytjaku,* palu Jesulu arkara wantingi tjikintja wiyangku.

³⁵ Kaya palulangurulta tjaultji panya tjuțangku palunya punu katakutjarangka wakara utitjunu, munuya palula malangka palumpa mantaraku punu nampatjara katu wanira inkangi kutjungku kutjungku winamilara mantjintjikitjangku. ³⁶ Munuya palula malangka ngarala atunymanangi palunya kutjupangku pitjala mantjintjaku-tawara.

³⁷ Munuya walka palula katangka katu walkatjura utitjunu, ka walka paluru alatji ngarangi,

Nyangatja Jesunya Jew Tjuțaku Mayatja Pulka

Panya palumpa mirpantju tjuțangku palunya alatji wangkanyangka kuranmanu, kaya nyara palulanguru walka panya palunya katu utitjunu.

³⁸ Munuya palula tjungu wati kutitjungkupai kura kutjara punu kutjupa kutjarangka wakara utitjunu nganytjarta kutjara, kutju kampa wakungka kutju kampa tjampungka.

³⁹ Ka palula itingka iwara pulka wati-ngaringi, kaya anangu tjuțangku iwara pala palula ankula Jesunya ira-nyakukatingi munuya palunya anara wangkangi,

⁴⁰ "Ala! Walangkunku palyala, panya nyuntu wangkangi timpula piluntara tjintu mankurarira piruku palyara wiyantjikitjangku. Wala wanyu ngalya-wararakati pununguru pala, mununku walytjangku wankala. Wanyumpa kunyun Godaku katjampa!"

⁴¹ Kaya tjukurjara kuranyitja tjuțangku munu Moseku tjukurpa nintilpai tjuțangku munu tijlpi kutjupa tjuțangku kulukulu tjukurpa palu purunypatu wangkangi Jesula munuya palunya anara ikaringangi alatji wangkara,

⁴² "Kutjupa tjuța nyangangu wankaningi, palu walytjangkunku putu wankani. Nyanga paluru panya kunyu Israelku mayatja pulka. Tjinguru paluru kuwari pununguru ukalingkunyangkampa nganana nyakula palumpa mulamularingkuku.

⁴³ Paluru kunyu mulamularinganyi Godaku palunya wankaru kanyintjaku mununku Godaku katjanmankupai. Kala wanyu nyangama ka tjinguru Godalu kuwari palunya wankarunkuku."

⁴⁴ Ka panya palula itingka wakara utitjungkunytja kutjarangku palu purunypatu palunya anara wangkangi.

Jesunya Ilunytja

(Markaku 15:33-41; Luke-aku 23:44-49; Johnku 19:28-30)

⁴⁵ Ka palulanguru tjintu panya katuringkula katu ngaranyangka ngura uwankarangka maruringu munu munga purunypa ngarala mungartji-mungartji kutju tjintungku piruku irnyanangi.

⁴⁶ Ka nyara palula ara piruku tjintungku irnyannyangka Jesulu mirara wangkangu, "Ilayi! Ilayi! Lama tjapatjani?" Alatji paluru wangkangi, "Mama God, Mama God! Nyaakunin wantikatingu?"

* **27:34** Nyanga alatjiya kunyu ungkupai wakara utitjungkunytja kuwaripangka pika pulkatjara ngaranyangka manarmankunytjaku.

47 Kaya anangu kutjupa tjuṅangu ila ngaranytjatjanungku paluru wangkanyangka kulinu munuya wangkangu, “Paluru Ilaitjanya altinyi pitjala alpamilantjaku.”

48 Ka wati kutjungku ngalya-wirtjapakara pantja punu warangka karpi-karpira waina kurakurangka tjalatjura katura Jesunya ungangi tjikintjaku.

49 Kaya tjara kutjupangu wangkangu, “Wanyula nyangama, ka Ilaitjalu pitjala palunya wankala.”

50 Ka palulanguru Jesunya pulkara mirangu munu ngaalypa wiyaringkula ilungu.

51 Ka paluru ilunyangka mantara panya timpulangka waraly-waralyngaranytjanya katunguru tjarukutu tjilpirarara kutjararira alaringu ngura panya milmilpa mulapa utiringkunyitjaku. Ka manta pulkara uringu, ka puli tjuṅa kulu katakatira tjilpiraranu.

52-54 Kaya tjaultji panya tjuṅangu Jesunya ilangku ngarala nyakunytjatjanungku nyangu manta urinyangka, puli tjuṅa tjilpiraranyangka munu kutjupa kutjupa uwankara kulu, munuya nyara palulanguru pulkara nguluringkula wangkangu, “Ai! Wati nyangatja mulapa Godaku katja.”

Ka kulpi panya kurulpa irititja tjuṅa alaringu, ka mungawinki kutjupa Jesunya ilunytjatjanu wankaringkula pakannyangka Godaku walytja nganmanypa ilunytja tjuṅa wankaringkula pakara kulpi panya palula tjanalanguru anu munuya ankula ngura panya Jerusalemala tjarpara para-ngarangi, kaya anangu tjuṅangu nyangangi.

55-56 Kaya minyma tjuṅa nyara palula ngarangitu Jesunya panya punu katakutjarangka utitjunkunytjala munuya patunguru ngarala nyangangi, panya Mary Magdalene-alu munu Mary-lu Jamesaku Josephaku pulampa ngunytjungku, munu minyma panya Tjipitiku kuringku munu minyma kutjupa tjuṅangu kulukulu. Panya minyma nyanga paluru tjana Jesula tjungu pitjalinangi Galileelanguru munuya palunya alpamilanangi kutjupa kutjupa tjuṅa ungkula.

Jesunya Puntu Kulpingka Tjunkunytja

(Markaku 15:42-47; Luke-aku 23:50-56; Johnku 19:38-42)

57 Ka mungartjirinyangka Jesuku nintintja kutjupa pitjangu wati ini Josephanya ngura Arima-tjiyanya ngurara wati mani pulkatjara.

58 Munu paluru ankula Pilate-ala ngatjinu Jesunya puntu mantjira katira kulpingka tjunkunytjikitjangku. Ka Pilate-alu kulira palyanmanu munu tjaultji tjuṅaku mayatjangka wangkangu Jesunya puntu ungkunyitjaku Josephanya.

59 Ka paluru ankula punu katakutjaranguru puntu mantjinu munu mantara piranpa wiru mulata karpinu.

60 Munu katira kulpi palumpangka tjarpara ngaritjunu, panya kulpi nyara palunyaya kuwari kutju nyarkara wantingu. Munu tjunkunytjatjanungku puli taanpa pulkanya untura wanara angatjunu kulpi tjaangka, munu wantikatira anu.

61 Ka Mary Magdalene-alu pula Mary panya kutjupangu nyinara kulpi panya nyangangi paluru tjarpatjunkunyangka.

Tjaultji Tjuṅa Wituntja Kulpi Atunymankunytjaku

62-63 Ka panya mungawinki Saturday tjiñtu panya pakuwiyaringkunyjaku, kaya tjukurtjara kuranyitja tjuťangku munu Paratji tjuťangku kulu ankula Pilate-ala wirkara wangkangu, "Uwa mayatja wirungkulanya wanyu kulila! Panya Jesulu wati panya ngunti wangkapainku nganmanytju wangkangi paluru ilura tjiñtu kutjaranguru wankaringkula pakantjikitjangku.

64 Ka nyuntu uti wangkama nyuntumpa tjaultji tjuťangku ankula kulpi nyaratja tjiñtu kutjarangku ngarala atunymankunyjaku, palumpa nintintja tjuťangku tjarpara kutitjungkunyjtjanungku wankaringkula pakantja ngunti para-wangkanytjaku-tawara. Panya wati paluru wanka nyinaralpi ngunti wangkangi anangu tjuťangka alatji, 'Ngayuluna Godalu panya kalkuntjitja nyurampa Wankarunkupainya.' Ka palatja kurangku ngunti wangkangi, ka tjinguru palumpa nintintja tjuťangku ngapartji wankaringkula pakantja nguntitu wangkaku, ka palatja kura mulapalta. Ka nyanga palula-tawaraya uti tjaultji tjuťangku ngarala atunymanama." Alatjiya Pilate-ala wangkara tjapiningi.

65 Ka paluru tjanala wangkangu, "Uwa palya! Tjaultji mankurpaya altira ma-kati munuya palunya tjananya wangka kaya kulpi palunya ngarala atunymanama."

66 Ka tjananya mulapatu katingu munuya ankula kulpi tjaangka puli taanpa pulkangka kititjura wantingu kutjupangku kampangkatu pitjala untunnyangka nyakunyjtikitjangku, munuya tjaultji panya tjuťa ngarala atunymankunyjaku wangkara wantikatingu.

28

Jesunya Wankaringkula Pakantja

(Markaku 16:1-8; Luke-aku 24:1-12; Johnku 20:1-10)

¹ Ka Sunday-ngka tjiñtu panya pakuwiyaringkupainangka malangka Mary Magdalene-anya pula Mary panya kutjuparara anu tjiñtu pakan-tja kuwaripangka kulpikutu nyakunyjtikitja.

² Ka pula ngururpa pitjanyangka manta pulkara uringu, ka Mayatja Godaku angelpa ilkaranguru ukalingkula puli panya taanpa kulpi tjaanguru untura wanara kitikitinu munu puli palula katu nyinakatingu.

³⁻⁴ Kaya tjaultji panya tjuťa pulkara nguluringkula punkara nguwanpa ilungu munuya ilunyitja purunypa ngaringi. Ka minyma panya paluru pula wirkara nyangu angelpa taanpangka nyinara pitalytji pulka mulapa irnyannyangka wanagara purunypa. Ka mantara palumpa piranpa mulapa pitalytji ngarangi. Ka pula nyakula pulkara nguluringangi.

⁵ Ka angelpa paluru minyma panya kutjarangka wangkangu, "Nyupali nguluringkunyitja wiya ngarama! Ngayulu ninti panya nyupali Jesunya ngurini, panya wakaraya punu katakutjarangka utitjunu.

⁶ Ka paluru nyangangka ngarinytja wiya, panya paluru nganmanytju nyurala wangkangu ilunyjtatjanu wankaringkula pakantjikitjangku, munu mulapa paluru wankaringu. Wanyu pula pitjala nyawa panya paluru ngarinytjitja." Ka pula mulapatu tjarpara nyangu, "Awari! Mulapa wiya ngaranyi."

⁷ Ka angeltu pulala piruku wangkangu, “Warpungkula pula ankula tjakultjura palumpa nintintja tjuťangka alatji, ‘Panya paluru wankaringkula pakaņu, munu paluru kuwari nyurala kuranyuriku Galileelakutu, ka nyura nyara palula palunya nyakuku.’ Alatji pula tjalala ankula wangka! Ala! Nyanga wangkanyina nyupalinya, ka pula kulinma watarkurinytja wiyangku.”

⁸ Ka pula kulpi wantikatira mapalku wirtjapakanu nguļu-nguļu pukulpa mulapa nintintja tjuťangka wangkanytjikitja.

⁹ Munu pula ngururpa nyangu Jesunya ngapari-ngapari ngalya-pitjanyangka. Ka paluru pulala wangkangu, “Awari! Minyma kutjara!” Ka pula ilaringkula palula kuranyu tultjungarakatira palunya tjina witira walķuningi.

¹⁰ Ka Jesulu pulala wangkangu, “Nguļu wiya pula rapariwa, munu pula ankula wangka ngayuku panya malpa tjuťangka Galileelakutu ankunytjaku, kaņiyawi paluru tjana nyawa palula.”

Tjaultji Mankurtu Kulpi Atunymankunytjatjanungku Wangkanytja

¹¹ Ka minyma panya paluru pula ankunyangka tjaultji panya kulpi atunymankupai manķurpa pakara anutu Jerusalemalakutu munuya tjukurtjara kuranyitja tjuťangka tjakultjunu uwankara tjana nyakunytjatjanungku.

¹² Kaya mayatja paluru tjana tjilpi kutjupa tjuťa altingu tjunguringkunytjaku munuya wangkara kulira tjukurpa palyanu, munuya tjaultji tjuťa mani pulka ungu tjana tjukurpa Jesunya wankaringkula pakantja para-tjakultjunkunytja wiyangku wantinytjaku.

¹³ Munuya tjananya wangkangu alatji, “Nyiiku! Mani nyangatja mantjira kanyinma, ka kutjupangu nyurala Jesunya tjapinyangkampa alatji wangka, ‘Wiya, nganana kunkunpa ngarinyangkanti palumpa nintintja tjuťangu munga kultungka pitjala palunya puntu kutitjura katingu.’ Alatji kutjuya wangka, palya!

¹⁴ Ka tjinguru nyurampa mayatjangku Pilate-alu tjukurpa nyangatja kunkunpa ngarinytja kulira nyurampa pulkara mirpanariku, palu palya, panya nganana palula nganmanytju wangkaku, ka paluru kulira nyuranya wantiku mirpanarira pungkunytja wiyangku, palya! Kaya nguļu wiya nyinama!” Alatjiya tjanala wangkangi.

¹⁵ Kaya tjaultji panya tjuťangu mani mantjira anu munuya parapitjala tjukurpa panya palunya anangu tjuťangka para-wangkangi, panya nintintja tjuťangu Jesunya puntu kutitjura katinytja. Ka tjukurpa paluru lipiringu ngura winkingka, kaya kuwari kulu Jew tjuťangu tjukurpa nyanga palunya wangkapai.

Jesunya Nintintja Tjuťangka Utiringkunytja

(Markaku 16:14-18; Luke-aku 24:36-49; Johnku 20:19-23; Acts 1:6-8)

¹⁶ Kaya nintintja panya 11 Galileelakutu anu munuya puli murpu panya palula wirkanu, panya Jesulu tjanala nganmanytju wangkangu nyara palula tjunguringkunytjikitjangku.

¹⁷ Munuya nyara palulalta Jesunya nyakula walķunu. Kaya kutjupatjara putu nguwanpa palumpa mulamularingangi kulira, “Mulapa nyangatja wanyu Jesunya?”

¹⁸ Ka Jesulu tjanala wangkangu alatji, “Godaluni wangkara tjunu uwankara mayatjangku kanyintjaku ilkarangka mantangka kulu.

¹⁹ Kaya nyuralpi ara ngura winkikutu munuya anangu tjuangka ngapartji nintila tjana ngayuku walytjaringkula ngayunya waꞑantjaku, munuya tjananya baptise-katima ini Mamala, Katjala, Kurunpa Milmilta.

²⁰ Munuya tjananya nintila ngayulu wangkanytjitja uwankara tjana wanganarangku kulira palyantjaku. Munuya rapa alatjitu nyinama panya ngayulu nyurala tjungu titutjara ngaraku manta ilkari wiyaringkuntja-kutu.”

Tjukurpa Palya Markalu Walkatjunkunyta Mark Nyangatja Nganmanytju Nyakula Wangkanytjaku

Nyangatja Godaku tjukurpa wati ini Markalu walkatjunkunyta ini kutjupa Johnnga. Paluru-warara walkatjunu tjukurpa Jesunyatjara Matthew-lu, Luke-alu, Johntu walkatjunkunyta kuwaripangka. Palu Markanya tjinguru mala Jesuku walytjaringu Jesunya ilkarikutu malaku ankunyangka malangka. Munu paluru Paulala pulala Paanapatjala-warara para-ngarangi ngura tjutangka tjukurpa wangkanytjikitja (nyawa Iyantja Tjutangu Palyantja 12:25). Munu paluru Peterla kulu tjunguringkula warkaringi munu palula kulira nintiringu tjukurpa tjuta Jesunyatjaraku (nyawa Lita Nampa 1 Peterku 5:13). Munu nintiringkunyttjanungku walkatjunu nyiri nyangangka nganana malatja tjutangu kulu kulintjaku munu kulira Mayatja Jesuku mulamularingkunyttjaku.

Nyiri nyangangka paluru nganmanytju walkatjunangi Johntu Jesunya baptise-katinytja munu piruku walkatjunangi wiru tjuta Jesulu palyantja witulya pulkangu, munu paluru para-pitalinkunyta ngura tjutangka, munu punu katakutjarangka ilunytja, munu ilunytjatjanu wankaringkula pakantja. Uwa, paluru tjakultjunangi panya Jesunya rawa alatjitu warkaripai anangu kutjupa kutjupa tjutaku munu panya tjananya mukulangku atunymankupai.

Tjukurpa nyanganpa ngarinyi:

1:1-13 Jesunya baptise-katinytja

1:14—9:50 Jesulu tjukurpa tjuta wangkanytja munu anangu tjuta palyarunguntja

10:1-52 Jesulu anangu tjutangka wangkara nintintja

11:1—15:47 Jesunya Jerusalemala nyinanytja munu punu katakutjarangka ilunytja

16:1-20 Jesunya ilunytjatjanu wankaringkula pakantja

John Baptistalu Jesuku Iwarankunyta

(Matthew-ku 3:1-12; Luke-aku 3:1-9,15-17; Johnku 1:19-28)

¹ Nyangatja Tjukurpa Palya panya Godaku Katja Jesunya Christanyatjara.

² Palu wati kutjupa nganmanypa wirkanu munu tjukurpa palunyatjara wangkangi palula kuranyu. Panya wati wangkatjarangu Aitjayalu iriti walkatjunu Godalu wangkanytja alatji,

“Ngayuluna wati kutjupa wangkatjara nganmanytju witura iyalku palula kuranyu. Panya anangu tjutangu mayatja pulka pitjanytja kuwaripangka ngura-warara wirulpai, palu purunypa wati paluru anangu tjuta nganmanytju wangkara tjukarurulku.

³ Wati nyara paluru ilytjingka mirara wangkaku anangu tjutangka alatji,

'Mayatjakuya nganmanypa ritiriwa paluru pitjala tjukurpa wangkanyangka nyura wanganarangku kulintjikitja.

Panya watingku iwara tjukarurulpai mayatja pulka malawanu pitjanytjaku, palu purunypa nyuranku tjukarururingkula patanma Mayatjanya pitjanyangka nyura wanganarangku kulintjikitja.' " *

⁴ Ka mulapatu wati panya paluru pitjangu, Johnnga panya, munu paluru ilytjingka nyinara Godaku tjukurpa anangu tjutangka alatji tjakultjunangi, "Kura palyantjatjanuya kuntariwa munuya wantima piruku kura palyantja wiyangu, ka Godalu nyuranya kalypangku pungguwiyangu wantiku, kana nyuranya urungka baptise-katiku." Munu alatji wangkanytjatjanungku Johntu tjananya baptise-katingi tjana kuranguru kuntaringkula kura wantinyangka.

⁵ Kaya Jerusalemanguru anangu winki mulapa palulakutu anu munu ngura ititja uwankaranguru kulu manta pala Judealanguru. Munuya paluru wangkanyangka kulira piiwiyaringangi munuyanku walytjangku kura palyantjatjanungku tjakultjunangi. Ka tjananya alatji wangkanyangka Johntu karu Jordanta urungka tjarpatjura baptise-katingi.

⁶ Ka Johnku panya mantara kamulaku intunguru palyantja, ka paluru karilpa karpinu piltangka kukaku miringuru palyantjitjangka. Munu ilytjingka nyinara paluru tjintilyka tjuta ngalkupai tjuratja kulu.

⁷ Munu paluru anangu tjutangka alatji wangkangi, "Ngayula malangka wati kutjupa pitjanyi. Nyara paluru mayatja pulka mulapa nyinanyi ngayula waintara alatjitu. Tjinguru mayatja mantatja purunypa nyinanyangkana palumpa warkaripai nyinara palumpa tjinatja pupakatira araltjanama. Palu wiya, nyara paluru mayatja pulka mulapa, kana ngayulu palya wiya mununa palula mirangka ngarala pulkara kuntaringanyi. Ka ngayulu palumpa tjinatja pupakatira araltjankunytjaku wiya ngaranyi.

⁸ Ngayuluna nyuranya urungka tjarpatjura baptise-katinyi, palu wati nyara paluru nyuranya baptise-katiku Kurunpa Milmilnga nyurala tjarpatjura."

Jesunya Baptise-katinytja Munu Mamungku Arkantja
(Matthew-ku 3:13—4:11; Luke-aku 3:21-22; 4:1-13)

⁹ Ka nyara palula arangka Jesunya tjarukutu anu Nazarethalanguru uru panya Galileela itinguru, munu karu Jordanta wirkanu, ka Johntu palunya urungka tjarpatjura baptise-katingu.

¹⁰ Ka urunguru pakara ilkari ira-nyangu alaringkuyangka, ka Kurunpa Milmilnga tjulpu kuukuuku purunypa palulakutu ukalingu.

¹¹ Ka ilkaringuru wangkangu alatji, "Nyuntu ngayuku katja, kana nyuntumpa pulkara mukuringanyi mununa nyuntumpa pulkara pukularinyitu."

¹² Ka nyara palulatu Kurunpa Milmilu palunya unngu wangkangu ilytjikutu ankunytjaku.

¹³ Ka paluru tjintu 40 nyinangi ilytjingka. Ka nyara palula Satantu palunya arkaningi paluru kuraringkunytjaku. Ka ngura nyara palula

* 1:3 Aitjayaku 40:3

papa inura tjuṭa munu kuka pikati kutjupa kutjupa tjuṭa kulu para-
ngarangi Jesula itingka. Ka angelpa tjutangku palunya atunytju
kanyiningi.

Jesulu Wati Mankurpa Altinytja Palula Tjunguringkunyjaku
(Matthew-ku 4:12-17; Luke-aku 4:14-15)

¹⁴ Ka panya Jewku mayatja kutjupa tjutangku Johnnga witera
tjailangka tjarpatjunu. Ka palula malangka Jesunya anu Galileelakutu
munu Godaku Tjukurpa Palya tjanala tjakultjungkulinangi anangu
tjutangka.

¹⁵ Munu paluru wangkangi alatji, “Nyangatja tjiṅtu panya paluru
wirkanu Godalu mayatjangku anangu tjuṭa walytjanmara kanyint-
jaku. Ka nyura kuwari kura nyinanytjatjanu piiwiyaringkula aruriwa
Godalakutu munuya tjukurpa nyanga palyaku nintiringkula mulamu-
lariwa.”

¹⁶ Ka nyara palula malangka Jesunya uru Galileela kantilytja
warara anangi munu nyangu wati antipina-putju kutjara ini Simonnga
pulanya Andrew-nya. Panya paluru pula kutararangku ngarala net
urungka waningi antipina tjuṭa witintjikitjangku.

¹⁷ Ka Jesulu wangkangu pulala, “Pitjalani pula ngayula tjunguriwa,
kana nyupalinya nintila wara kutjupa. Panya nyupali ninti antipina
witintjaku, palu kuwarina nyupalinya nintini anangu tjuṭa ngayu-
lakutu ngalya-katinytjaku tjana ngayunya wanantjaku.”

¹⁸ Ka pula kuwaritu net wantikatira mapalku palula tjunguringkula
anu.

¹⁹ Munuya palulanguru tjukutjuku ankula ma-nyangu kutarara
kutjupa Jamesanya pulanya Johnnga wati panya Tjipitiku katja kutjara.
Panya pula pauta unngu nyinara net palyarunguningi antipinaku
ankunytjikitjangku.

²⁰ Ka Jesulu palunya pulanya nyakula altingu. Ka pula kuwaritu
pakara palula tjunguringkula anu pulampa mama wantikatira
palumpa wati warakaripai tjuṭa kulu.

Wati Mamutjara
(Luke-aku 4:31-37)

²¹⁻²² Munuya Jesunya tjana nintintja tjuṭa kulu wirkanu ngura
kutjupangka tawunu ini Kapaniyamala munuya nyara palula nyinangi
tjiṅtu tjuṭa. Munu palulanguru tjiṅtu panya milmilta Saturday-ngka Je-
sunya wali inmaku tjunguringkupai-kutu anu munu Godaku tjukurpa
anangu tjutangka wangkara nintiningi. Kaya kulira nguwanringu
paluru wangkanyangka, munuya kulinigi, “Ai, wati nyangangu
munkara alatjitu wangkapai tjukurpa pulka mulapa.” Panya paluru
Godalu nintinnyangka tjanala wangkangi nintingku alatjitu, wati
panya Moseku tjukurpa nintilpai tjuṭa purunypa wiyangku.

²³ Ka wali inmatja nyara palula wati mamutjara ngalya-tjarpangu
munu mirara wangkangu palula alatji,

²⁴ “Jesu Nazarethanya ngurara, nyuntu nganananya nyaantjikitja
pitjangu? Nganananya iluntankunytjikitjan pitjangu? Ngayulu nyun-
tumpa ninti. Nyuntun wangkatjara Godalanguru pitjanytja milmilpa
alatjitu.”

²⁵ Ka Jesulu palula ngapartji wangkangu mamu panya watingka
unngu nyinanytjala, “Pilunarira ma-pakala watinguru pala.”

26 Ka mamu paluru wati panya palunya pulkara uri-uritjingara mirara pakara anu.

27 Kaya anangu tjutangku nyakula urulyarara wangkara waningi alatji, "Ai, wati nyangatja kutjupa mulapa. Nyanganku mamu wituni, ka wanganarangku palula kulini. Tjinguru nyanga paluru tjukurpa pulka kuwaritja nintingku wangkanyi."

28 Ka tjukurpa nyanga palunya Jesunyatjara mapalku lipiringu kuwaritu ngura tjutangka nyara uru Galileela itingka.

Jesulu Palyarunguntja Anangu Tjuta
(Matthew-ku 8:14-17; Luke-aku 4:38-41)

29 Munuya palulanguru Jesunya, Jamesanya Johnnga tjana wali inmatjanguru pakara anu Simonku pulampa Andrew-ku ngurakutu.

30 Munuya wirkara kulinu Simonku umari pikatjara ngarinyangka waruringkula.

31 Ka Jesulu palulakutu ankula palunya mara witira pakaltjinganu. Ka mapalku alatjitu kuwaritu pika panya waru wiyaringu. Ka paluru tjananya mai palyara ungu ngalkuntjaku.

32 Ka tjinu ma-tjarpanyangka anangu tjuta Jesulakutu pitjangi munuya katingi pikatjara tjuta, mamutjara kulukulu.*

33 Munuya pitjala wali tjaangka urilta junguringu tjuta mulapa.

34 Ka Jesulu pikatjara tjuta palyarunguningi tjana pika kutjupa kutjupa tjutatjara pitjanyangka, munu paluru mamu tjuta painingi anangu tjutanguru pakantjaku. Kaya mamu panya tjuta mapalku pakaningi tjanalanguru munu tjananya wantikatingi. Palu mamu paluru tjana palumpa ninti, ka Jesulu palunya wangkara tjakultjunkunytjaku-tawara mamu panya tjuta pilunmanu wangka wiya pilunpa pakantjaku.

Jesulu Godala Tjapintja Ngura Pilunta
(Luke-aku 4:42-44)

35 Munu Jesunya mungawinki mulapa manta marungka pakara anu walinguru urilkutu mauntalpa kutjungku ngura pilunta nyinara Mamangka tjapintjikitja.

36 Palu Simontu tjana panya palumpa nintintja kutjupa tjutangku kulu mala kunkuntjanu pakara palunya nguriningi.

37 Munuya ngurira nyakula wangkangu palula alatji, "Anangu winkingkuntaya ngurini. Kan nyaaku kumpira nyinanyi?"

38 Palu Jesulu wangkangu tjanala, "Nganana uti ngura kutjupa tjutakutu kulu anama munu nyara palula tjanala kulu para-ngarala tjukurpa wangkama, panya nyara palumpa tjanampa kuluna pitjangu."

39 Munu palulanguru paluru uru nyara Galileela itingka ngura uwankarakutu anu munu tawunu kutjupangka kutjupangka wali inmatja tjutangka tjarpara Godaku tjukurpa wangkangi anangu tjutangka, munu mamu tjuta painingi anangu tjutanguru.

Jesulu Wati Palyarunguntja
(Matthew-ku 8:1-4; Luke-aku 5:12-16)

* 1:32 Tjaka panya anangu Jew tjuta Saturday-ngka nyinara pakuwiyaringkupai para-ngarapai wiya. Palu tjinu tjarpanyangka milmilpa wiyaringkupai anangu tjuta para-ngaranytjaku.

40 Ka nyara palula arangka wati miri pikatjara kutjupa pitjangu Jesulakutu, panya pika nyara paluru kura pulka titutjara ngarapai wiyaringkupai wiya. Munu paluru pitjala Jesula tultjungararakatira alatji wangkara ngatjinu, "Mayatja nyuntu mukuringkulampani pika nyangatja palyanma wirungku."

41 Ka Jesulu nyakula ngalturingu wati panya palumpa munu marangku pampura wangkangu, "Uwa, ngayulu mukuringanyi nyuntu palyaringkunyjtaku, ka palyariwa."

42 Ka mapalku pika panya wiyaringkula miri winki palyaringu.

43-44 Ka Jesulu palunya wangkara painu, "Anangu kutjupa tjtutangka wangkawiyangku wantima nyuntu nyanga palyaringkunyjtatjanungku. Palu timpulakutu ankulanku nintila wati tjukurtjarangka, kanta nyawa miri pala palyaringkunyjtja mununta palyanmara. Ka palula malangka wati panya palunya tjulpu kutjara uwa Godanya ungunyjtaku, panya iriti Moselu wangkangu miri palyaringkunyjtatjanungku alatjingantjaku. Kaya nyuntu ungunyangka nyakula anangu tjtutanku kulilku, 'Munta-uwa, nyanganku mulapa palyaringkunyjtatjanungku unganyi.' " Alatji Jesulu wati panya palula wangkangu munu palunya witura iyanu ankula palyantjaku.

45 Palu wati panya paluru Jesulu panya wangkanytja kulin-tja wiyangku wantingi munu ankula anangu tjtutangka paratjakultjunangi Jesulu palunya palyantja. Ka tjukurpa paluru lipiringu ngura nyara palula, kaya anangu tjtuta mulapa Jesunya nyakunyjtikitja mukuringangi. Ka nyara palulanguru Jesulu putu kulinongi tawunangka kumpira tjarpara nyinanyjtikitjangku munu wantira manyinangi ilytjingka anangu tjtutanku palunya pitjala pakuntjaku-tawara. Palu anangu tjaraya palulakutu pitjangi ngura kutjupa kutjupa tjtutanguru.

2

Jesulu Wati Wawanypa Palyarunguntja (Matthew-ku 9:1-8; Luke-aku 5:17-26)

1-3 Ka palulanguru tjihtu mankurpa ngarala wiyaringkuyangka Jesunya malaku anu ngura Kapaniyamalakutu. Kaya anangu tjtutanku kulinu paluru ngurangka wirkankuyangka munuya kulira winki pitjangu palulakutu wali panya paluru nyinanyjtjtjakutu. Munuya wali palunya anganu anangu winkingku panya wali tjaangka kulu angara tjtuta mulapa ngarangi. Ka Jesulu tjanala tjukurpa wangkanyangka wati kutjara kutjarangku wati nyumpu wawanypa mantara lipira ngaritjura katingi Jesulakutu.

4 Munuya anangu tjtuta anga-ngaranyangka nyakula putuliringi wati panya nyumpu katira palunya Jesula nintintjikitjangku. Nyara palulanguruya kulinu wali katu tatira katutja alara wati panya palunya Jesulakutu ukalilyintjikitjangku. Munuya mulapatu wali katukutu kantu-kantura tatinu munuya katutja alara wati panya palunya mantarangka katunguru ukalilyinu Jesulakutu.

5 Ka Jesulu ukalilyinnyangka nyakula kulinu, "Mulapa wati nyan-ganpa ngayuku mulamularinganyi panya ngayulu pikatjara nyanga palunya palyarunguntjaku." Munu palulanguru wangkangu wati

panya wawanyangka, “Wati ngana, Godalu nyuntunya kura tjuṭa palyantjitjanguru kalypanku wantinyi pungkunyṭja wiyanku.”

⁶⁻⁷ Kaya wati Moseku tjukurpa nintilpai tjuṭa nyara palula tjanala tjunguṭu ngarangi munuya paluru wangkanyangka kulira kuliningi, “Nya nyanganku wangkanyi? Tjingurunku nyanganku walyt-jangku Godanya-palku kulini munu kura palyantjitjanguru kalypar-inkunyṭjikitjangku wangkanyi. Wati kuranku nyanganku ngunti wangkanyi. Panyatjampal Godalu kutjungkumpa kura palyan-nyangkampa wangkapai kalypanku pungkuywiyanku wantinyṭjikit-jangku.”

⁸ Ka Jesulu mapalku nintiringu tjana unngu kulintjitjaku munu wangkangu tjanala, “Nyaaku nyura unngu alatji kulini?”

⁹⁻¹⁰ Nyura kuwari nyangangi ngayulu wati nyanga palula wangkanyangka munu nyura kutjupa kutjupa nyakunyṭja wiya. Palulanguru nyura tjinguru kulini ngayunya ngurpa-palku, munu nyura ngayuku mulamularingkunyṭja wiyanku wantinyi. Palu kuwari nyangana wati nyanga wawanya wangkara palyarunguni. Ka nyanga nyura nyakuku kuwari pakannyangka munu nyura palulanguru mulamularingkuku ngayulu panya nganmanyṭju wangkanyṭjitjaku, panya ngayulu Watiku Katjangku mantangka nyanga nyinara anangu kutjupa kura tjuṭa palyantjitjanguru kalypanku wantinyṭjaku ngaranyi alatjitu.”

¹¹ Munu palulanguru piruku wangkangu wati panya pikatjarangka, “Wati awa, pakaranku mantara mantjira ngurakutu ara.”

¹² Ka anangu winkingka mirangka wati panya pakana munu mantara mantjira ngurakutu anu. Kaya uwankaranku nyakula urul-yaranu munuya pukularira Godanya walkura wangkangu, “Awari! Ngurpangkula kuwari kutju nyanga purunypa nyanganyi panya nganana nganmanyṭju nyanga purunypa nyakunyṭja wiyatu.”

Jesulu Levinya Ngurkantankunyṭja Palula Tjunguringkunyṭjaku
(*Matthew-ku 9:9-13; Luke-aku 5:27-32*)

¹³ Ka Jesunya piruku anu uru Galileela tjartjarpakutu. Kaya anangu tjuṭa mulapa palulakutu pitjangu, ka tjanala tjukurpa tjuṭa wangkara nintiningi.

¹⁴ Munu palulanguru uru tjartjarpa warara malaku anu tawunukutu munu nyangu wati kamantaku mani mantjilpai iwarangka itingka wali tjukutjukungka nyinara mani mantjinnyangka. Wati nyara paluru ini Levinya wati ini Alpi-yatjaku katja munu paluru anangu tjuṭa iwarangka wati-pitjanyangka nyakula tjanala mani mantjilpai alatjitu kamantaku. Ka Jesulu wangkangu palula alatji, “Pitjalani ngayunya wanala!” Ka mulapatu Levilu pakara palunya wanaṇu nintintja tjuṭangka tjunguringkula.

¹⁵ Kaya Jesulu tjana palumpa nintintja tjuṭangka kulu Leviku walingka tjunguringkula mai ngalkuningi. Kaya mani mantjilpai tjuṭangka, kura palyalpai kutjupa tjuṭangka kulu palula tjanala mai tjunguringkula ngalkuningi, panya anangu nyanga purunypa tjuṭa Jesula tjungu para-ngarapai.

¹⁶ Kaya wati Paratji kutjupa tjuṭangka Moseku tjukurpa nintilpai nyara palula nyinangi, munuya paluru tjana nyangu Jesulu wati kura palyalpai tjuṭangka tjungungku nyinara ngalkunnyangka. Munuya

nintintja panya tjuṭangka wangkangu, “Nyaaku nyarangku wati mani mantjilpai tjuṭangka, kura kutjupa tjuṭangka kulu tjunguringkula mai ngalkupai? Uti paluru tjanala tjunguringkuwiyangku wantira wati palya tjuṭangka kutju tjunguringama.”

17 Ka Jesulu tjananya kuraringkula wangkanyangka kulinu munu tjanala wangkangu alatji, “Kulila, anangu palya tjuṭa wanyu ngangkariku mukuringkupai? Wiya, palu pikatjara tjuṭa kutjuya mukuringkupai. Panya ngayulu pitjangu Moseku tjukurwanu nyinapai tjuṭa altinytjikitja wiya, palu anangu nyanga nyura nyakula wantipai tjuṭakuna pitjangu tjananya altira ngayula tjunguntjikitja.”

Mai Wantinytja

(*Matthew-ku 9:14-17; Luke-aku 5:33-39*)

18 Ka panya kutjupa-ara Johnku nintintja tjuṭangku munu Paratji tjuṭangku kulu mai rawa nguwanpa wantira nyinangi Godanya walkuntjikitjangku. Kaya anangu kutjupa tjuṭangku tjananya nyakula Jesula tjapinu alatji, “Nyaakuya nintintja nyara tjana kutju mai wantinyi, ka nyuntumpa nintintja tjuṭangku titutjarangku mai ngalkuni tjinṭu winkingku?”

19 Ka Jesulu wangkangu, “Wiya, nyura panya Moseku tjukurwanu nyinapai tjuṭa, palu ngayuku nintintja tjuṭaya ara kutjupawanu nyinanyi ara kuwaritjanga ngayulu nintintjitjanga, ka ara nyanga paluru pula titititu ngaranya tjungu wiya. Wanyuya kulila ara panya watingku kuri altinytja, panya nyara palula ara kuri altinyangka wati panya palumpa malpa tjuṭangku palula tjunguringkula pukultu mai pulka ngalkupai wantinytja wiyangku.

20 Palu ngula wati panya palunya kutjupa tjuṭangku witera katinyangka malpa panya tjuṭa pulkara tjituru-tjitururiku, munuya nyara palulanguru mai wantira nyinaku.*

21 “Munuya piruku ara kutjupa kulu kulila mantaratjara, panya anangungku mantara irititja alaringkunyangka ala patintjikitjangku mantara kuwaritjanguru tjukutjuku katara mantara irititjanga tjungura wakantja wiyangku wantipai paltjinnyangka katakatinytjakutawara. Panya paltjinnyangka mantara panya tjungura wakantjanya tjukutjukuringkupai munu mantara irititja ilara katantankupai, ka ala pulkaringkupai.

22 “Munuya piruku ara kutjupa kulu kulila palu purunypatu wainaku yakutjatjara. Panya watingku kukaku miringuru yakutja palyalpai waina kuwaritja tjutira kanyintjikitjangku. Palu paluru yakutja irititjanga waina kuwaritja tjuṭilpai wiya, panya waina kuwaritja tjuṭinnyangka wainaku panya wita yakutja unngu lipiringkupai, ka miri irititja pilṭi ngaranytjatjanu tjilpiraralpai, ka waina mantangka tjutira wiyaringkupai. Pala palula-tawara paluru waina kuwaritja yakutja miri kuwaritjanga tjuṭilpai tjulangka, ka wainaku wita lipiringkunyangka yakutja kulu lipiringkupai tjilpirarantja wiya.” Alatji Jesulu tjanala wangkangi tjana palumpa tjukurpa munu Moseku tjukurpa ngunti tjunguntjakutawara.

* 2:20 Nyanga alatji Jesulu palurunku wangkangi panya ngulaya palumpa mirpantju tjuṭangku palunya witera katingu munuya pungu, kaya palumpa nintintja tjuṭa pulkara tjituru-tjitururingu munuya mai ngalkuwiya wantira nyinangi.

Jesulu Tjintu Panya Pakuwiyaringkupai Utintja

(Matthew-ku 12:1-8; Luke-aku 6:1-5)

²³ Ka Saturday kutjupangka tjintu panya pakuwiyaringkupaingka Jesunya tjana palumpa nintintja tjuṭa kulu mai panya wiita tjuṭangka ngururwanu anangi. Kaya nintintja tjuṭangka waarangku ankula mai uninyapa urara ngalkukatangi.

²⁴ Kaya Paratji tjuṭangu nyakula wangkangu Jesula, “Nyawa, wati nyanga nyuntumpa nintintja tjuṭangu nganampa tjukurpa Moseku kurani, panya nyangatja Saturday tjintu pakuwiyaringkunyjtaku, mai urantjaku wiya.”

²⁵⁻²⁶ Ka Jesulu tjanala wangkangu, “Palu nyura wanyu nyiringka nyakunyjtja wiyatu panya iriti Apiyatjanya tjukurjtara pulka nyinanyangka mayatja Davidalu paltjatjiratjarira Godaku tiinta milmilṭa tjarpara mai panya milmilṭara tjunkunyjtja ngalkunu munu palumpa tjungutja tjuṭa kulu ungu ngalkula paltjaringkunyjtaku. Palu panya tjukurpa ara ngaranyi tjukurjtara tjuṭangu kutju mai nyara palunya ngalkunyjtaku. Ka paluru tjana tjukurpa ara nyanga palunya kulira wantingu, palu kutjupa tjuṭangu tjananya paintja wiyangku wantingi paltjatjiratjarira ngalkunnyangka.”

²⁷ Munu Jesulu piruku wangkangu tjanala, “Kulila, Godalu anangu tjuṭa-warara palyanu munu palulanguru kutju tjintu pakuwiyaringkunyjtaku tjunu paluru tjana pakuwiyaringkula pukulpa nyinanyjtaku.

²⁸ Ka nyanga palulanguru nyura uti kulinma panya ngayulu Watiku Katjanya mayatja pulka mulapa nyinanyi, mununa ngayulu alatjitu wangkapai nyaa palyantjaku tjintu panya pakuwiyaringkupaingka.”

3

Jesulu Wati Mara Ngalturpa Palyantja Tjintu Milmilṭa

(Matthew-ku 12:9-14; Luke-aku 6:6-11)

¹ Munu kutjupa-ara Jesunya wali inmatjangka piruku tjarpangu Saturday-angka tjintu panya pakuwiyaringkupaingka. Ka nyara palula wati mara ngalturpa tjanala tjungu nyinangi anangu tjuṭangka.

² Kaya Paratji tjuṭangu nyinara Jesunya nyangangi munuya patara nyinangi wati panya palunya palyarunggunnyangka nyakula kuranmankunyjtikitjangku, panya nyangatja tjirirpi Saturday pakuwiyaringkunyjtaku wara palyantjaku wiya.

³ Ka Jesulu wati panya mara ngalturpangka wangkangu anangu tjuṭangka ngurur-ngururpa pakara ngaranyjtaku. Ka wati panya mulapatu pakara ngarangu.

⁴ Ka Jesulu anangu tjuṭangka wangkangu, “Godalu nganana nyya palyantjaku wangkangu tjintu panya pakuwiyaringkupaingka? Paluru wangkangu palya palyantjaku munta kura? Palu Godanya wanyu mukuringanyi nganana anangu kutjupa wankarunkunyjtaku munta pungkula iluntankunyjtaku?”

Palu tjana pilunpa alatjitu nyinangi wangkanytja wiya.

⁵ Ka Jesulu tjananya mirpan-mirpanṭu para-nyakula wanara tjanampa mapalku ngalturingu panya anangu nyanga tjana kurunpa wituwitu pulka nyinangi. Ka Jesulu wati panya mara ngalturpangka

wangkangu, “Mara pala warariwa.” Ka mara panya wararingu, ka kuwaritu palyaringu, wiru mulapa.

⁶ Kaya Paratji tjuta nyakula mirpanaringu munuya mapalku anu Irataku malpa tjutakutu.* Munuya tjanala tjunguringkula wangkara kuliningi Jesunya iluntankunytjikitjangu.

Winki Mulapa Jesulakutu Pitjanytja

⁷⁻⁸ Munu Jesunya nintintja tjutatjara anu uru Galileelakutu, kaya ngura uru nyara palula ititja tjutanguru anangu tjuta mulapa tjunguringkula palunya wanaṇu. Ka anangu kutjupa tjuta kulu kulira palulakutu pitjangu ngura kutjupa kutjupa tjutanguru winki mulapa ngura Jerusalemanguru, Judealanguru, Itumiyalanguru, munu karu Jordanta kakararanguru kulukulu. Munuya ngura Tayala Tjaitanta pulalanguru kulu pitjangu munuya uwankara uru Galileela Jesula tjunguringu kakararanguru, alinytjaranguru, ulpariranguru, munu wiluraranguru kulu, anangu winki mulapa. Panya anangu nyara paluru tjanaya kulinu Jesulu kunyu pikatjara tjuta palyantja munu tjukurpa wiru tjuta kulu wangkanytja, munuya palulanguru pitjangu palunya nyakunytjikitja.

⁹ Ka Jesulu palumpa nintintja tjutangka wangkangu, “Pauta palaya ma-unṭula munuya urungka tjura nganmanypa ngayuku paṭara ngaranytjaku anangu nyanga winkingku ngayunya utjuntjaku-tawara.”

¹⁰ Panya nyara palula Jesulu anangu pikatjara winki mulapa palyarunguningi. Kaya pikatjara kutjupa tjutanku kuwaripankutu unṭu-unṭura ila-ilaringangi Jesunya pampura palyaringkunytjikitja.

¹¹ Kaya anangu mamutjara tjutanku palunya nyakula Jesula kuranyu pupakatingi, kaya mamu tjutanku mirara wangkangi alatji, “Nyuntun Godaku Katja.”

¹² Ka Jesulu mamu palunya tjananya painingi anangu tjutanguru wantikatinytjaku munu mamu tjutangka wangkangu, “Ngayunya tjakultjunkuwiyanṅku wantima.”

Jesulu Ngurkantankunytja Wati 12

(Matthew-ku 10:1-4; Luke-aku 6:12-16)

¹³ Munu Jesulu puli katu tatira anangu kutjupatjara tjanampa mukuringkula alṅingu palulakutu pitjanytjaku, kaya ma-pitjala palula tjunguringu.

¹⁴⁻¹⁵ Ka paluru tjanalanguru ngurkantanu wati panya 12. Munu palunya tjananya wangkangu, “Nyura ngayulu panya iyantja tjuta. Panya ngayuluna nyuranya ngurkantanu ngayula tjungu nyinanytjaku, mununa nyuranya witura iyalku anangu tjutangka tjukurpa palya para-tjakultjunkuunytjaku mununa nyuranya witulyankuku mamu tjuta anangu tjutanguru paintjaku.”

¹⁶ Ka wati paluru tjana ini nyanganpa,

Simonnga, ka Jesulu palunya ini kutjupa tjunu Peternya.

¹⁷ Munu Tjipitiku katja kutjara Jamesanya pula Johnnga. Ka Jesulu pulanya ininu *Paunatjanya kutjara*, panya ini nyanga paluru wangkanyi, *Tuuntja Kutjara* panya paluru pula pulkara wangkapai kutjara.

* 3:6 Iratanya panya manta Galileeku mayatja nyinangi munu mayatja pulka Rome-anya nguraraku malpa nyinangi.

18 Munu Andrew-nya, Philipanya, Patjalamunya, Matthew-nya, Thomasanya, Jamesanya wati panya Alpi-yatjaku katja, munu Tjatiyatjanya, munu Simonnga panya ngura Israelku pulkara mukuringkupai.

19-20 Munu panya Judas Kariyatanya, panya paluru ngula Jesunya pungkunytku nintinu Jewku mayatja tjutangka. Nyanga palunya tjananya Jesulu ngurkantanu palumpa nintintja tjuta nyinanytjaku.

Jesunya Munu Piiltjipalnga

(Matthew-ku 12:22-32; Luke-aku 11:14-23; 12:10)

Munuya palulanguru Jesunya tjana malaku anu ngurakutu nyinara paku wiyaringkunytkitja. Palu anangu tjuta mulapa piruku tjanala wirkara tjunguringu, kaya putuliringi nyinara mai ngalkuntjikitja.

21 Kaya Jesuku ngunytkungku munu malanya tjutanku kulu kulinu anangu tjuta palula rawa tjungurungkuyangka, munuya pitjangu palunya mantjintjikitja. Panya anangu tjutanku wangkangi paluru kata kuraringkunytkja, kaya palunya mantjira atunymankunytkitja mukuringangi.

22 Ka wati Moseku tjukurpa nintilpai tjuta Jerusalemalanguru pitjangu munuya wangkangi alatji, "Wati nyanga palula unngu mamu pulka nyinanyi, ini Piiltjipalnga, mamu uwankaraku mayatja pulka.* Munu nyara paluru wati nyanga palunya witulyananyi mamu tjuta paintjaku anangu tjutanguru." Alatjiya ngunti kuliningi paluru tjana.

23 Ka Jesulu nyangatja kulira tjananya altingu munu tjanala tjukurpa ara kutjupatjara wangkangi alatji, "Satantu wanyu palurunku pailpai anangu tjutanguru? Wiya alatjitu.

24 Kulilaya, panya anangu tjuta ngura kutjunguru walytjarara walytjararangku tjananku pikangku pungkula paturingkula tjungu utulu kutju nyinanytja wiyaringkupai.

25 Ka palu purunypa anangu walytjarara walytjarara wali kutjunguru nyinara rawa pikaringkula tjungu nyinanytja wiyaringkula mauntalparingkupai.

26 Ka nyara palu purunypatu tjinguru Satannga mamu palumpa walytja tjutaku pikaringkunyangkampa paluru tjana palumpa kuraringkula palula tjungu nyinanytja wiyaringkuku, ka paluru tjananya putu wituwitura uparingkuku munu tjanampa mayatja wiyaringkuku."

27 Munu piruku Jesulu tjukurpa kutjupa wangkangu alatji, "Watingku wanyu wati kunpu pulkaku ngurangka tjarpara kutjupa kutjupa tjuta kutitjunkupai? Wiya alatjitu. Paluru wati nyara kunpu karpintjaku-warara ngaranyi palumpa kutjupa kutjupa tjuta mantjintjikitja mukuringkula." (Nyanga alatji Jesulu wangkangi palurunku mamu tjuta anangu tjutanguru paira iyantja.)

28 Munu paluru piruku wangkangu alatji, "Palu kulinmaya nyangatja, panya nyura kura kutjupa kutjupa tjutanguru piwiyaringkuyangka Godalu nyuranya kalypanku pungguwiyangu wantiku. Munu nyura palunya anantjatjanu piwiyaringkuyangka palu purunypatu nyurampa kalyparingkuku.

* 3:22 Piiltjipalnga panya mamu Satannga.

29 Palu nyura tjinguru Kurunpa Milmilnga anara wangkanyangkampa Godalu nyurampa kalyparingkunyaja wiyangku nyuranya kukanyankuku, kuanypa titutjara nyinanytjaku.”

30 Jesulu nyanga palunya wangkangi anangu tjutangku palunya mamutjaranmankunyangka.

31 Kaya wirkanu palumpa ngunytju, malanyapa tjuta munuya walangka urilta palumpa patara ngarangi munuya anangu kutjupa witunu palunya altinytjaku.

32 Panya anangu winki mulatuya angara para-nyinara arintanangi, ka paluru ngururpa nyinangi. Kaya kutjupa tjutangku kulintjatjanungku wangkangu Jesula, “Nyuntumpa ngunytju malanyapa tjutaya patara ngaranyi urilta nyuntunya nyakunytjikitja.”

33 Ka Jesulu kulira wangkangu, “Ngaranypa ngayuku ngunytju munu malanyapa tjuta?”

34 Munu paluru para-nyakula wananu anangu winki nyinanyangka munu wangkangu, “Nyanga tjana ngayuku walytja ngunytju malanyapa tjuta kulu.

35 Kulila, anangu panya Godanya mukuringkunyitja kulira palyalpai tjuta, nyara paluru tjana ngayuku ngunytju malanyapa kulu nyinanyi walytja mulapa.”

4

Tjukurpa Uninyapa Tjunkula Wanantja (Matthew-ku 13:1-9; Luke-aku 8:4-8)

1 Munu ngula Jesulu tjanala piruku nintiningi uru panya Galileela itingka. Ka anangu winki mulapa palulakutu pitjangu. Munuya palunya utjuningi, ka paluru pautangka tatinu uru kantilytja tartjangka nyinanyangka tjukurpa katunguru wangkanytjikitja. Kaya anangu tjutangku uru kantilynguru ngarala kuliningsi pautanguru wangkanyangka.

2 Ka Jesulu tjukurpa tjuta tjanala wangkara nintiningi ara kutjupa kutjupa tjutatjara. Munu paluru tjukurpa nyangatja kulu wangkangi alatji,

3 “Kulilaya! Wati kutju ma-pitjangu uninyapa mantangka wanira wanantjikitja palumpa kaanangka.

4 Ka uninyapa wanira wanannyangka tjara iwarangka punkanu, kaya tulpu tjutangku pitjala uwankara ngalkula wiyanu.

5 Ka uninyapa tjara kutjupa manta pulitjarangka punkanu munuya mapalku pakanu manta tjukutjukungka.

6 Palu tjintungku pakara kampangu, ka manta tjukutjukungka ngaranytjatjanu mapalku pitiringu iwiri kulu panya iwiri paluru aputjarangka putu waintara tjarpangi.

7 Ka uninyapa kutjupatjara waningsi, ka manta tjilkatjarangka punkanu munu pakanu, ka pakannyangka tjilka tjutangku utjunu, kaya putu pulkaringkula maitjararingkunyaja wiya ngarangi.

8 Ka uninyapa kutjupatjara waninyangka manta palyangka punkanu munu mapalku pakara pulkaringkula maitjararingu, tjara kutjupa 30-tjararingu, tjara kutjupa 60-tjararingu, ka tjara kutjupa 100-tjararingu.”

⁹ Munu Jesulu tjukurpa wangkara wiyaringkula piruku wangkangu tjanala alatji, “Uwa, nyura pina alangku kulirampa ngalya-kulinma tjukurpa nyanga ngayulu kuwari nyurala wangkanytja.”

Tjukurpa Uninytjaranguru Utintja
(*Matthew-ku 13:10-17; Luke-aku 8:9-10*)

¹⁰ Ka anangu tjuta ngurakutu ankunyangka nintintja tjutangu munu anangu tjara kutjupangu Jesula tjapiningi tjukurpa panya palunya uti mulapa tjakultjungkunytjaku palula tjanala.

¹¹ Ka paluru tjanala wangkangi, “Uwa, ngayulu nyurala kutju Godaku tjukurpa kumpilitja utira wangkanyi, tjukurpa panya Godalu anangu tjuta mayatjangku walytjanmara kanyintjatjara. Palu anangu kutjupa tjutangka tjukurpa ara kutjupa kutjupa tjutatjara wangka-pai kitikiti nguwanpa.

¹² Panya paluru tjana rawangku nyakula putu nyanganyi munuya rawangku kulira putu alatjitu nintiringanyi.

Palu utiya tjana kulira mulamularingama munuya Godalakutu malaku aruringama,

ka Godanya tjanampa kalyparingama.

Palu paluru tjana mulamularingkunytja wiya alatjitu nyinangi.” *

¹³ Munu Jesulu tjanala wangkangu alatji, “Nyaanguru nyura putu kulini tjukurpa nyanga uninyatjara? Tjinguru nyura tjukurpa nyangatja putu kulirampa tjukurpa kutjupa tjuta kulu pututu kulini.” Munu palulanguru Jesulu tjukurpa palunya tjanala utira tjakultjunu alatji,

¹⁴ “Wati kaana kanyilpaingku uninya waninyi, ka palu purunypa wati tjukurtjarangku Godaku tjukurpa tjakultjunkturpai anangu tjutangu kulintjaku.

¹⁵ Ka uninya panya iwarangka punkara ngarinytja alatji, panya wati tjukurtjarangku Godaku tjukurpa wangkanyangka anangu tjutangu kulini, ka mamu Satantu pitjala tjulyani tjanalanguru, kaya mapalku watarkurinyi.

¹⁶ Ka anangu tjara kutjupa nyinanyi panya manta pulitjarangka punkantja purunypa panya tjana tjukurpa kulira mulamularingkula pukularipai.

¹⁷ Palu tjinguru kutjupa tjutangu tjananya mulamularingkunyangka analku munu pungkuku, kaya paluru tjana mapalku Godalanguru paturingkula watarkuriku.

¹⁸ Ka anangu tjara kutjupa panya uninya manta tjilkatjarangka punkantja purunypa nyinanyi, panya paluru tjana tjukurpa kulilpai.

¹⁹ Palu mantatja kutjupa kutjupa tjuta pulkara kulira wiru tjuta kanyintjikitja mukuringkupai mani pulka kulu munuya nyanga palula tjanalanguru Godaku tjukurku watarkurinyi munuya wiru tjuta Godaku putu palyani.

²⁰ Palu anangu kutjupa tjuta panya uninya manta palyangka punkantja purunypa nyinanyi. Nyara paluru tjana tjukurpa wanganarangku kulira pulkara mulamularingkupai munuya wiru tjuta Godaku palyalpai tjarangku Godaku wiru mankurpa nguwanpa palyalpai, ka tjarangku tjuta nguwanpa palyalpai, ka tjarangku wiru

* 4:12 Aitjayaku 6:9-10

tjuta mulapa palyalpai Godanya pukularinytjaku.” Alatji Jesulu uti mulapa tjanala tjakultjunu.

Tjukurpa Tilitjara
(*Luke-aku 8:16-18*)

²¹ Munu piruku tjukurpa kutjupa tjanala wangkangi alatji, “Anangungku wanyu lampa tili winki katira piti unngu tjunkupai munta pangkangka unngu? Wiya, anangungku lampa tili winki uti tjunkupai anangu tjutangka irnyannyangka nyakunyutjaku.

²² Palu kulilaya, panya kumpilpa kanyintja tjuta Godalu wangkara utilku munu kutitjura kanyintja tjuta Godalu utilku tu uwankarangku nyakunyutjaku.

²³ Uwa, nyura pina alangku kulirampa ngalya-kulinma tjukurpa nyanga ngayulu nyurala wangkanytja.”

²⁴ Munu piruku Jesulu wangkangu, “Nyura Godala tjukutjuku kutju wanganarangku kulinyangkampa, paluru palu purunypatu nyuranya tjukutjuku kulira tjukutjuku kutju pukulmankuku. Palu nyura Godala pulkara mulapa wanganarangku kulinyangkampa, paluru nyuranya pulkara mulapa pukulmankuku.

²⁵ Tjinguru nyura wanganarangku palula kulinyangkampa, nyuranya Godalu pulka mulapalta nintilku nyura kulira ninti mulararinytjaku. Palu tjinguru nyura kulira wantinyangkampa, Godalu nyuranya kulintja kampa kutjupankuku palumpa watarkurinytjaku.”

Tjukurpa Uninypa Pakantja

²⁶ Munu Jesulu piruku anangu tjutangka wangkangi tjukurpa kutjupa nyanga alatji, “Panya Godalu anangu tjuta walytjanmara mayatjangku kanyintja ara nyanga palu purunypa ngaranyi, panya watingku manta runyura wanantjatjanungku uninypa para-wanira wanalpai.

²⁷ Ka uninypa panya paluru tjunkunyitja uwankara tuulpakara ukiri pulkaringkupai mungangka kalala kulu. Munu wati paluru mungangka kunkunarinyangka munu kalala pakara parangaranyangka ukiri paluru rawa pakara pulkaringkupai. Ka wati paluru pakannyangka nyakula putu kulilpai, ‘Yaaltji-yaaltji nyanganpa walytja pakalarani?’

²⁸ Palu uninypa paluru tjana walytja alatjitu pakalarani manta wirunguru, munu kutju punu pulkaringkula maitjararinganyi, watingku palyantjitjangu wiya. Nganmanypa panya tuulpakani-warara munu palulanguru pakara punu nyalpitjararinganyi munu maitjararinganyilta, munu mai kururinganyi.

²⁹ Ka kururingkunyangka wati paluru urara wananilta. Uwa, nyanga palu purunypa anangu tjuta Godaku walytjaringkula wiruringkupai Godalu palyannyangka, watingku palyantjitjangu wiya.”

Tjukurpa Uninypa Tjukutjukutjara
(*Matthew-ku 13:31-32; Luke-aku 13:18-19*)

³⁰ Palulanguru piruku Jesulu wangkangu, “Uwa, Godalu anangu tjuta mayatjangku walytjanmara kanyintja ara nyaa purunypa ngaranyi? Tjukurpa ara nyaatarana nyurala wangkaku uti kulintjaku?

31-32 Wanyuna tjukurpa uninyapatjara wangka. Panya uninyapa ini matjata tjuku mulapa, ka anangungku kaanangka tjunkunyangka paluru pakara punu pulkaringkupai kutjupa tjutangka wain-tara munu miña tjutatararingkula lipiringkupai munu pulkunpa pulkaringkupai. Kaya tjulpu tjutangu pitjala manngu tjuta palyara nyinapai wiltjangka, panya punu paluru pulka mulapa, uninyapa tjukutjukunguru pakantja. Nyanga palu purunypa anangu tjuta Godaku walytja tjutaringkupai paluru tjananya mayatjangu kanyin-tjaku.”

33-34 Uwa, Jesulu anangu tjutangka tjukurpa uninyapatjara wangkara kampa kutjupara wangkara tjanala nintiningi Godalu anangu tjuta mayatjangu walytjanmara kanyintja. Munu palu purunyjtutu tjukurpa kutjupa tjuta kulu ara kampa kutjupawanungku nintiningi tjanala. Palu paluru tjana kutjuringkula nintintja tjutatjara kutju nyinara paluru tjukurpa tjuta wangkara utingku nintiningi ara kampa kutjupara wangkawiyangu, tjana uti kulintjaku.

Jesulu Walpa Atanmankunyntja

(*Matthew-ku 8:23-27; Luke-aku 8:22-25*)

35 Ka nyara palula malangka tjiñtu tjaruringkunyangka mungartjikutu Jesulu wangkangu palumpa nintintja tjutangka, “Wanyula ma-itipiri nyara urungka munkara.”

36 Munuya anangu tjuta wantikatira Jesunya pauta panya palulatu katingu nintintja panya tjutangu, kaya pauta kutjupa tjuta kulu tjanala tjungu anangi uru nyara palula.

37 Ka tjana urungka ngururpa ankunyangka walpa pulka mulapa wangkangu, ka uru pulka pauta unngu tjarpangu munu pauta nguwanpa tjarura urungka tjarpatjunu.

38 Palu Jesunya pautangka malarku kunkunpa pulka ngaringi katapi tjunkula. Ka nintintja tjutangu palunya mirara wankaning wangkara, “Nintilpai! Ilunytjakulanyan wantinyi? Kuwarila uwankara ilunyi nyangangka.”

39 Ka Jesunya pakanu munu walpangka wangkangu alatji, “Atanari!” Munu urungka wangkangu, “Uriwiya ngarima!” Ka walpa panya atanaringu munu uru kulu uriwiyaringkula tiwilaringu.

40 Munu Jesulu nintintja tjutangka wangkangu, “Nyaanguru nyura nguluringu? Nyura wanyu ngayuku kuwaripatu putu mulamularinganyi?”

41 Panya tjana nyakula pulkara nguluringangi munuyanku wangkara kuliningi, “Wati nyaa nyangatja? Panya walpangu urungku kulu palula wanganganangu kulilpai.”

5

Jesulu Wati Mamu Tjutatjara Palyarunguntja

(*Matthew-ku 8:28-34; Luke-aku 8:26-39*)

¹ Kaya nyara palula malangka mantangka ma-wirkanu kampa kutjupa kakarara ngura pulkangka ini Karatjala.

² Ka Jesunya pautanguru ukalingkula ngaranyangka wati mamu tjutatjara palulakutu ngalya-wirtjapakanu kulpinguru.

³⁻⁴ Panya ngura nyara palula kulpi tjuta ngarangi miri tjuta tjunkupai. Ka wati nyara paluru ngura pala palula nyinapai kulpingka.

Panya palunyaya anangu tjuṭangku nganmanytju witera tjiinangka karpilpai palumpa nguluringkula. Tjuṭa-arangkuya tjina mara kulu karpiningi, ka paluru kaṭantanangi alatjitu munu ayana tjina karpintja panya kaṭantara araltjanangi alatjitu. Wati paluru panya kunpu pulka mulapa, kaya palunya puṭu witera karpiningi munuya puṭu palyaringkunyjtaku palyaningi.

⁵ Ka paluru kaṭala mungangka titutjara kulpi tjuṭangka para-ngarapai puli katu kulukulu munu paluru mirara palurunku walytjangu pulangka atura miri wilypanpungkupai.

⁶ Munu wati nyara paluru pararinguru nyangu Jesunya pautanguru wararakatira ngaranyangka munu palulakutu wirtjapakara tultjun-garakatingu.

⁷⁻⁸ Ka Jesulu mamu panya palula unngu nyinanytjanya painu watinguru panya pakantjaku. Ka wati unngunguru pulkara mirara wangkangu, “Jesu, nyuntu God Katutja pulkaku katja. Ngayunya nyaantjikitjan pitjangu? Palu wanyuni pikantankuwiyangu wantima mununi Godala mirangka kalkula wantinytjikitjangu.”

⁹ Ka Jesulu palula tjapinu, “Palu nyuntu wanyu ini ngananya?” Ka wangkangu, “Ngayulu ini Tjuṭanya panya nganana mamu tjuṭa mulapa wati nyanga palula nyinanyi.”

¹⁰ Munu paluru tjana tjuṭa-arangku Jesula ngatjiningi ngura nyara palulanguru paira iyalwiyangu wantinytjaku.

¹¹ Ka ngura nyara palula itingka pikipiki winki mulatu 2,000-tu ngarala ukiri para-ngalkuningi puli pantangka.

¹² Ka mamu tjuṭangku Jesula ngatjinu alatji wangkara, “Wanyulanya witula pikipiki nyara tjuṭakutu, kala nyara palula tjanala tjarpa.”

¹³ Ka tjananya palyanmanu. Kaya watinguru panya pakara pikipiki tjuṭangka tjarpangu, kaya mamu tjuṭa tjarpanyangka pikipiki panya winki mulapa puli wararangka tjarukutu wirtjapakara urungka wala winki tjarpangu munuya kaṭalukatira uwankara wiyaringu.

¹⁴ Kaya wati panya pikipiki kanyilpai tjuṭangku nyangatja nyakula wirtjapakanu tawunukutu ngura kutjupa tjuṭakutu kulu munuya anangu tjuṭangka para-wangkangi. Kaya kulira pitjangu nyakunyjtikitja.

¹⁵ Munuya pitjala nyangu Jesunya munu wati panya nganmanypa mamutjara nyinanytjanya palula tjungu nyinanyangka mantaratjara, panya wati paluru kata palyaringkula nyinangi pilunpa. Kaya nyakula pulkara nguluringu Jesuku.

¹⁶ Kaya pikipiki kanyilpai tjuṭangku wati panya mamutjara palyaringkunyjtja nyakunyjtatjanungku tjanala tjakultjunangi, pikipiki tjuṭa ilura wiyaringkunyjtja kulu.

¹⁷ Kaya palulanguru anangu tjuṭangku wangkangi Jesula paluru ngura tjanampa wantikatira ankunyjtaku.

¹⁸ Ka Jesunya pautangka tatinnyangka wati panya paluru ngatjiningi palula, “Nyuntulana tjungu ankuku?”

¹⁹ Ka Jesulu palunya markunu munu wangkangu, “Ngurakutu malaku ara munu nyuntumpa walytja tjuṭangka tjakultjura Mayatjalu nyuntumpa pulkara ngalturingkula nyuntunya palyarunguntja.”

²⁰ Ka mulapaṭu paluru ankula para-ngarangi manta panya ngura tawunu 10-tjarangka munu Jesulu palunya palyantja anangu

tjutangka para-tjakultjunangi, kaya kulira putu nguwanpa kuliningi, "Mulapa nyangatja?"

Tjairatjaku Untalpa Munu Minymangku Jesunya Pampuntja
(Matthew-ku 9:18-26; Luke-aku 8:40-56)

²¹ Nyara palulanguru Jesunya tjana malaku ma-itipiringu pautangka urungka kampa wiluraralku. Ka uru nyara palula tjartjarpa kampa kutjupa anangu winki mulapa palula tjunguringu.

²²⁻²³ Ka nyara palula wati tjukurtjara ini Tjairatjanya wirkanu. Wati nyara paluru panya wali inmatjaku mayatja nyinangi ngura nyara palula, munu paluru Jesunya nyakula palula tjinangka itingka tultjungarakatira kurunpa winkingku ngatjiningi wangkara, "Ngayuku untalpa kungkawara tjukutjuku pika pulka ngarinyi munu nguwanpa ilunyi. Wanyu pitjala marangku pampula ka palyaringkula wankariwa."

²⁴ Ka Jesulu kulira palula tjunguringkula anu.

Kaya anangu winki mulatu palunya wananingi munuya ila-ila ankula palunya utjuningi.

²⁵ Ka nyara palula anangu tjutangka ngurur-ngururpa minyma kutjupa pika milkalitjara ngarangi. Minyma nyara paluru pika rawa ngarangi 12 yiyangka tjiñtu winki.

²⁶ Munu paluru ngangkaru kutjupa arkara mani pulkangka payamilanangi palunya palyarunguntjaku, palu putuya palyaningi, ka mani palumpa wiyaringu. Ka pika panya paluru tjukutjukuringkuntjaja wiya pulkaringu.

²⁷⁻²⁸ Ka minyma panya paluru Jesunya pitjanyangka kulinu munu anangu tjutangka ngururpa pitjala palula tjanawanu ilaringkula kuliningi, "Wanyunatju mantara palumpa pampula mununatju palyariwa." Munu paluru pampunu.

²⁹ Ka mantara pampunyangka pika panya paluru kuwaritu mapalku wiyaringu. Ka paluru unngu walytjangku kuliningi, "Ai, pika ngayuku wiyaringu."

³⁰ Palu Jesulu unngu kulinu palumpa mantara pampunyangka, panya witulya palumpa palulanguru pakanu. Ka pinkurarara anangu tjutangka tjapinu, "Nganalu ngayuku mantara pampunu?"

³¹ Ka palumpa nintintja tjutangu wangkangu, "Palu anangu nyanga tjuatan nyanganyi utjunyangka? Nyaakun kutju ankula-palku para-tjapini kutjupangu pampuntja?"

³² Palu Jesulu wantinytja wiyangu para-nyangangi alatjitu nyakuntjikitjangku, "Nganaluni panyatja pampunu?"

³³ Ka minymangku panya palurunku palyaringkuntjatjanungku kulira utiringu Jesula munu pulkara nguluringkula tjititingkula palula tjinangka tultjungarakatingu munu uwankara palula utingku tjakultjunu.

³⁴ Ka Jesulu wangkangu palula, "Wiya palya, nyuntu ngayuku mulamularingkula palyaringu. Ara kurunpa pukularira, munu titutjara pika wiya palya nyinama."

³⁵ Ka Jesulu tjanala kuwaripangku tu ngarala wangkanyangka wati mankurpa wirkanu Tjairatjaku nguranguru munuya wangkangu Tjairatjala, "Alatjitu wanti nintilpainya ngunti katinytjaku-tawara. Alatjitu purkutjararingu."

³⁶ Ka Jesulu tjana wangkanyangka kulira wantingu munu wati panya Tjairatjala wangkangu, "Pulkara kulilwiyangku wantima munu mulamulariwa kutju."

³⁷ Munu paluru anangu kutjupa tjuṭa markunu nyinanytjaku munu Peternya, Jamesanya Johnnga tjananya kutju katingu.

³⁸ Munuya ankula Tjairatjaku walingka urilta wirkanu munuya nyangu anangu tjuṭa pulkara ulara mirawakara waninyangka.

³⁹⁻⁴⁰ Ka Jesulu yaatangka ma-tjarpara tjanala wangkangu, "Nyaan-guru nyura mirawakara pulkara ulanyi? Tjitji nyangatja ilunytja wiya, kunkunpa ngarinyi." Kaya alatji kulira Jesunya anara ikaringangi ngunti wangkanyangka-palku.

Ka tjananya uwankara urilkutu pakaltjinganu munu tjitjiku mama ngunytju munu nintintja panya mankurpa kutju katingu munuya palumpa rूमangka tjarpangu tjitji panya ngarinytjalakutu.

⁴¹ Munu Jesulu tjitji panya mara witera wangkangu, "Tjitji awa, wangkanyinanta, pakala."

⁴² Ka mapalku pakara para-ngarangi. (Tjitji paluru panya kungkawara tjukutjuku 12 yiya kutju.) Kaya panya Jesula tjungu tjarpanytjatjanungku tjitji panya wankaringkula para-ngaranyangka nyakula urulyaraningi, "Awari, mulapa nyangatja ilunytjatjanu wankaringu!"

⁴³ Ka Jesulu tjitjiku panya mamangka ngunytjungka wangkangu, "Kulila pula! Nyupali nyangatja nyakunytjatjanungku anangu tjuṭangka tjakultjunkunytja wiyangku wantima. Palya? Palu kuwari pula mai uwa tjitji nyanga palunya."

6

Nguratja Tjuṭangku Jesunya Wantinytja (Matthew-ku 13:53-58; Luke-aku 4:16-30)

¹ Palula malangka Jesulu wantikatingu ngura panyatja, munu ngura walytjakutu anu Nazarethalakutu palumpa nintintja tjuṭa kulu.

² Ka Saturday tjintu panya pakuwiyaringkupai wirkankunyangka anangu tjuṭa wali inmatjangka tjunguringu, Jesunya tjana kulu. Ka paluru tjanala tjukurpa wangkara nintiningi. Kaya anangu tjuṭangku wangkanyangka kulira nguwanuringu, "Ai mulapa?"

Munuya wangkangi, "Yaaltjingka wati nyanga paluru tjukurpa nyanganku nintiringu? Paluru nintipukangku alatjitu wangkapai, munu panya nyanganku miracle kutjupa kutjupa tjuṭa kulu palyalpai. Nganalu palunya nintinu munu witulya ungu?"

³ Wiyampal panyatja wali palyalpainyampa, Maryku panya katjampa. Ka panya palumpa malanya tjuṭa nyangatja nyinanyi Jamesanya, Josephanya, Judasanya, Simonnga tjana, kaya palumpa nyarumpa tjuṭa kulu ngura nyangangka nyinanyi." Alatji wangkaraya palumpa kuraringangi munuya palula kulintja wiyangku wantingi.

⁴ Ka Jesulu kulira wangkangu, "Anangu tjuṭangku wati wangkatjara ngura kutjupitjangku wangkanyangka kutjuya wanganarangku kulilpai, palu wangkatjara nguraritjangku wangkanyangkaya kulilwiyangku wantipai."

5 Palulanguru Jesulu miracle kutjupa kutjupa wiru tjuṭa puṭu palyaningi ngura nyara palula, pikatjara manḵur-manḵurpa kutju marangka pampura palyarungunu.

6 Munu paluru puṭu kuliningi tjana palumpa mulamularingkuwiyangka wantinyangka.

Jesulu Nintintja 12 Iyantja

(Matthew-ku 10:5-15; Luke-aku 9:1-6)

Jesulu tawunu tjukutjuku tjuṭangka para-ngarala tjukurpa nintiningi anangu tjuṭangka.

7 Munu palulanguru nintintja panya 12 altira tjungunu munu tjananya kutjara kutjara witura iyanu ngura tjuṭakutu munu tjananya wityuanu mamu tjuṭa paira iyantjaku anangu tjuṭanguru.

8-9 Munu tjananya wituṅu alatji wangkara, "Iwarangka ankulaya kutjupa kutjupa katinytja wiyangka wantima, mai wiya, yakutja wiya, mani wiya munu mantara kutjupa tjinatja kutjupa kulu katinytja wiyangka wantima. Palu tjukara kutjuya katima."

10 Munu tjanala piruku wangkangu, "Nyura tawunu kutjupangka wirkankunyangka tjinguru anangu kutjupangka nyuranya altira tjunkuku palumpa walingka. Ka nyura tawunu nyara palula nyinara wali nyara palula kutjungka ngarima.

11 Palu nyura ngura tawunu kutjupangka wirkankunyangka tjinguru anangungku nyuranya ngurangka altira tjunkuwiyangka wantiku munu nyurala tjukurpa kulu kulilwiyangka wantiku. Ka palulanguru nyura uti ngura pala palunya wantikatima munuya wantikatinytjik-itjangu ulpuru nyurampa puutanguru patapatala, kaya nyara palulanguru patapatannyangka nyakula kulilku Godanya tjanampa mirpanaryangka." Alatji Jesulu tjanala wangkangi.

12 Kaya ma-pakanu munuya ngura tjuṭangka tjukurpa tjakultjunangi anangu tjuṭangka, munuya wangkangi, "Uti nyuranku kura kulira piwiyaringama munu kura tjuṭa wantima piruku palyantja wiyangka."

13 Munuya mamu tjuṭa painingi anangu tjuṭanguru, munuya pikatjara tjuṭa uwilangka nyitira palyarunguningi, kaya palyaringangi.

John Baptistanya Kata Mutura Iluntankunytja

(Matthew-ku 14:1-12; Luke-aku 9:7-9)

14 Ka Mayatja Iratalu nyanganpa kulinu, panya ini Jesunyaya ngura winkitjangku para-wangkangi. Kutjupa tjuṭangu alatji wangkangi, "Nyaratja panya John Baptistanya panya ilunytjatjanu wankaringu munu nyara palulanguru paluru miracle kutjupa kutjupa tjuṭa wityula pulkangku palyani."

15 Kaya tjarangku wangkangi, "Wiya palatja Godaku wangkatjara panya ilaitjanya."* Kaya tjara kutjupangu wangkangi, "Wiya, nyaratja Godaku wangkatjara pulka irititja tjuṭa purunypa."

16 Ka Iratalu anangu tjuṭangu wangkanyangka kulira wangkangu, "Wiya tjinguru nyaratja mulapa Johnnga, panya ngayulu kata mutuntjanya. Mulapa paluru ilunytjatjanu malaku wankaringu."

* 6:15 Ilaitjanya panya Godaku wangkatjara iriti nyinanytja. Ka panya tjilpiringkunyangka Godalu palunya ilkarikutu katingu wanka winki. Palulanguruya tjinguru kulinungi Jesunya ilaitjanya malaku pitjanytja.

17-19 Nganmanytju panya Johnnga wanka nyinanyangkalpi Iratalu palumpa malanypaku Philipaku kuri tjulyanu ini panya Iratinyanya. Ka panya Johntu rawangku wangkangi palula alatji, "Kurangkun tjulyanu nyuntumpa malanypaku kuri. Alatji palya wiya." Ka minyma panya paluru Johnku pulkara kuraringangi munu paluru mukuringangi palunya iluntankunytjikitja. Ka nyara palula-tawara wati panya Iratalu tjaultji mankurpa wangkangu Johnnga witiira tjailangka tjarpatjunkunytjaku.

20 Panya Iratanya ninti Johnku, panya paluru wati wiru mulapa kura wiya, ka nyara palunya kulira Iratalu nguluringkula wanka kanyiningi. Munu paluru rawa mukuringkupai Johntu wangkanyangka kulintjikitja, palu kulira paluru putu nguwanpa kulilpai munu tjuni tjulypilypa nyinapai.

21 Ngula Iratalu mai pulka palyanu munu palumpa malpa tjuta altingu tjunguringkula paluru iti ngarinytjita kulira ngalkula pukularinytjaku. Paluru wati kuranyitja tjuta altingu, munu palumpa tjaultji tjutaku mayatja tjuta kulu altingu, munu panya wati pulka tjuta Galileelanguru kulu altingu. Ka minyma panya palumpa kuringku kulinu Iratyalu, "Munta-uwa, kuwarina wati tjutangka mirangka Iratala ngatjilku Johnnga iluntankunytjaku, kani paluru putu wiyamankuku."

22 Ka tjana maingka tjunguringkunyangka minyma panya palumpa untalpa pitjala nyanpingi nyara palula tjana nyakunytjaku. Kaya nyakula pulkara pukularingu Iratanya tjana. Munu Iratalu kungkawara palula pukularira tjapinu, "Nyuntu kutjupa kutjupaku mukuringkulampa wangka, kana nyuntunya ungkuku."

23 Munu pulkara alatjitu kalkunu wangkara, "Mulamulangkuṅa wangkanyi. Nyuntu ngatjinnyangkananta ungangi alatjitu. Panya ngayulu mayatjangku ngura tjuta kanyini kutjupa kutjupa tjuta kulu. Munuṅa nyanga ngayulu kanyintja uwankara nyuntunya tjarara tjara kutjupa ungkuku nyuntu mukuringkunyangka."

24 Ka kungka panya paluru nyangatja kulira anu palumpa ngunytjukutu munu palula tjapinu alatji, "Ngunytju, nyaa ungkunytkuṅa Iratala wangkaku?" Ka ngunytjungku panya wangkangu, "Wiya, ankula Johnnga kata mutura ungkunytkuṅa tjapila."

25 Ka kungkawara panya malaku warpungkula anu mayatja Iratala ngatjintjikitja munu wangkangu, "Mukuringanyina Johnnga kata mutura ngayunya ungkunytkuṅa pulitangka tjunkula."

26 Ka nyanga alatji wangkanyangka Iratanya unngu pulkara tjituru-tjitururingu, munu kulinigi, "Tjinguru paluru ngatjinnyangkanana unguwiyangku wantima, palu ngayulu nganmanytju winkingka mirangka kalkuntatjanungku mala putu wiyamananyi."

27-28 Munu paluru wati panya tjaultji mapalku wituṅa ankula Johnnga kata mutura ngalya-katinytjaku. Ka wati tjaultji anu tjailakutu munu Johnnga kata mutura ngalya-katingu pulitangka tjunkula, munu kungkawara panya ungu. Ka paluru katira palumpa ngunytju ungu.

29 Kaya Johnku nintintja tjutangku nyangatja kulira pitjangu munuya palunya puntu mantjira katira kulpingka ngaritjunu.

*Jesulu Anangu Winki Mulapa Maingka Paltjantja
(Matthew-ku 14:13-21; Luke-aku 9:10-17; Johnku 6:1-14)*

³⁰ Ka ngula Jesulu panya iyantja tjuṭa maḷaku aruringu munuya Jesula tunguringkula uwankara tjakultjunangi tjana palyantjatjanungku munu nintintjatjanungku.

³¹ Ka panya anangu tjuṭa mulapa Jesula tjanalakutu rawa pitjangi munuya nyinara anangi, ka tjara kutjupa ngapartji pitjala nyinara anangi. Kaya alatji rawa iwarakatinyangka Jesulu tjana palumpa nintintja tjuṭangku puṭu nguwanpa kuliningi mai ngalkuntjikitjangku munu paluru wangkangu tjanala, "Wanyula ara maunṭalpa ngura pilunta nyinara pakuwiyaringkunyjtikitja."

³² Munuya pautangka tatira anu maunṭalpa ngura pilunta nyinanyjtikitja.

³³ Palu anangu tjuṭangku tjananya nyangu pautangka mapakanyangka munuya ngura nintingku kulira tawunu tjuṭanguru mantangka wirtjapakara nganmanypa wirkara nyinangi ngura panya palula, panya Jesunya tjana nyara palulakutu anangi.

³⁴ Ka Jesulu mantangka wirkara pautanguru ukalingu munu anangu winki mulapa ngaranyangka nyakula tjanampa kurunpa pulkara ngalturingu, panya tjana tjiipi tjuṭa purunypa para-ngarangi tjapatangku atunymankunyjtja wiya. Ka palulanguru Jesulu tjanala tjukurpa tjuṭa wangkara nintiningi.

³⁵ Ka paluru tjukurpa rawangku wangkanyangka tjintu tjaruringu kaya palumpa nintintja tjuṭangku palula wangkangu, "Ngura parari nguwanpa nyangatja, ka tjintu nyanga nguwanpa tjaruringu."

³⁶ Wanyu anangu nyanganpa witula kaya ankula ngura ilatjangka mai payamilara ngalkula paltjariwa."

³⁷ Ka Jesulu nintintja tjuṭangka wangkangu, "Wiya, mai nyura tjananya uwa."

Kaya wangkangu, "Wiya, nganana mani pulka kanyintja wiya mai pulka payamilantjikitjangku anangu nyanga winkingku ngalkula paltjaringkunyjtaku. Panya nganana tjinguru pira 8 warkarira kutju mani pulka mantjilku nyanga tjanampa mai payamilantjikitjangku."

³⁸ Ka Jesulu wangkangu tjanala, "Ankulaya nyawa mai yaaltjiṭu tjana kanyini."

Kaya ankula nyangu munuya pitjala wangkangu, "Mai tampa mankurpa kutjara nyangatja, munu kuka antipina kutjara kulu."

³⁹ Ka Jesulu palumpa nintintja tjuṭangka wangkangu, "Anangu tjuṭa wangka kapuṭu kutjupa kapuṭu kutjupa ukiringka nyinakatinyjtaku."

⁴⁰ Kaya palyanu paluru panya wangkanyjtja. Munuya anangu tjuṭa tjarara tjarara tjunu 50 kutjupa 50 kutjupa, 100 kutjupa, 100 kutjupa.

⁴¹⁻⁴² Ka Jesulu mai munu kuka kulu mantjira ilkari ira-nyakula Godanya walkura wangkangu, "Wirungkulanyan mai kuka nyangatja ungu." Munu katantara nintintja tjuṭa tjarara ungu anangu tjuṭa para-ungkunyjtaku, kaya uwankarangku mai kuka antipina kulukulu ngalkula paltjaringu.

⁴³ Kaya palula malangka nintintja tjuṭangku kuka mai lampi mutunmutunpa tjuṭa mantjira piti pulka 12-ngka tjaalyngaratjunu.

⁴⁴ Uwa, ngura nyara palula wati winki mulatu nyinara ngalkuningi nampa nyangantu 5,000-tu. Ka minyma tjitji kulukulu nyinangitu pala palula munuya ngalkula paltjaringu.

Jesunya Uru Katu Paltjura Ankunytja
(*Matthew-ku 14:22-33; Johnku 6:15-21*)

⁴⁵ Nyanga palula malangka Jesulu palumpa nintintja tjuṭa witunu palunya wantikatira pautangka tatira kuranyu ma-itipirinytjaku uru kampa kutjupa ngura ini Pitjaitalakutu. Munu paluru anangu panya tjuṭa kulu witunu ngurakutu malaku ankunytjaku.

⁴⁶ Munu tjananya wantir'iyara paluru pulikutu ankula puli pantangka tatinu Godala tjpintjikitja.

⁴⁷ Ka ngalya-mungartjirinyangka nintintja panya tjuṭa urungka ngururpaṭu pitjalinangi pautangka, ka Jesunya kutju nyinangi puli katu nyara malaku.

⁴⁸ Munu paluru nyangu tjana puṭu pauta panya walawalannyangka, panya walpangku untuningi malakukutungku, kaya puṭu anangi. Ka munga kultungka tjintukutu-tjintukutu Jesunya urungka katu paltjura tjanalakutu pitjangi. Munu nguwanpa tjanala waintaringu.

⁴⁹⁻⁵⁰ Kaya nintintja panya tjuṭangku nyangu palunya kurun-kurunpa-palku uru katu paltjura ankunyangka munuya pulkara nguluringkula mirangi.

Ka Jesulu tjanala wangkangu, "Nguluringkunytja wiyaya panya ngayuluna nyangatja, kaya raparingama!"

⁵¹ Munu pautangka tatinu tjanala. Ka walpa panya atanaringu.

Kaya nintintja panya tjuṭangku puṭu kuliningi, "Ai, yaaltji-yaaltji nyangatja?"

⁵² Panya tjana kurungku nyangangi paluru anangu winki mulapa maingka paltjannyangka palu nyakunytjatjanungkuya kuwari-pangkuṭu puṭu kuliningi paluru alatjirinyangka, munuya pina pati nyinangi.

Jesulu Pikatjara Tjuṭa Palyarunguntja Ngura Kina-tjaratala
(*Matthew-ku 14:34-36*)

⁵³⁻⁵⁴ Munuya urungka itipirira tjinturingkunyangka ma-wirkanu mantakutu ngura ini Kina-tjaratala. Munuya ukalingkula pauta karpira wantikatira anu. Kaya anangu tjuṭangku Jesunya mapalku ngurkantanu.

⁵⁵ Munuya manta nyara palula ngura tjuṭakutu para-wirtjapakalyira pikatjara tjuṭa mantjira mantarangka tjunkula palulakutu ngalya-katingi ngura kutjupa kutjupangka paluru pitjala nyinanyangka.

⁵⁶ Panya paluru ngura tjuṭakutu anangi, tjukutjuku tjuṭakutu, pulka tjuṭakutu, munu urilkutu kulukulu, kaya wirkankunyangka anangu tjuṭangku pikatjara tjuṭa katira ngaritjunangi anangu tjuṭa pitjala tjunguringkupaingka. Kaya pikatjara tjuṭangku Jesula ngatjiningi palumpa mantara pampuntjikitjangku, munuya uwankarankuṭu pampuntjatjanu palyaringangi.

7

Jesulu Paratji Tjuṭa Munu Moseku Tjukurpa Nintilpai Tjuṭa Wangkara Paintja
(*Matthew-ku 15:1-9*)

¹ Ka ngula wati Paratji tjuṭa munu Moseku tjukurpa nintilpai kutjupa tjuṭa kulu Jerusalemalanguru Jesunya nyakunytjikitja pitjangu, munuya palula para-ngarala arintara wanaṇu.

² Munuya nyangangi Jesuku nintintja tjuṭangku mai ngalkun-nyangka. Palu paluru tjana tjamutja-arangka mara paltjintja wiyangku ngalkuningi.

³ (Tjaka panya Paratji tjuṭangku munu Jew kutjupa uwankarangu kulū mai ngalkuntjikitjangku nganmanytju mara paltjilpai tjamutja-arangka.)

⁴ Munu tjana tjuwangka mai tjuṭa payamilara ngurakutu katira mai palunya tjananya kulū paltjilpai-warara ara palu purunypaṭu munuya palulanguru kutju ngalkupai. Nyanga alatji tjana tjamutja ara tjukarurungku palyalpai, munuya ara kutjupa tjuṭa kulū tjukarurungku palyantjikitjangku walpayata, piti, wayatjara kulukulū uwankara paltjilpai kilina ngaranytjaku. Munuya rawangku kulilpai ara nyanga palu purunypa tjuṭa palyantjikitjangku.)

⁵ Kaya Paratji panya tjuṭangku munu wati Moseku tjukurpa nintilpai tjuṭangku kulū Jesula wangkangu alatji, "Nyaakuya nyuntumpa nintintja tjuṭangku tjamuku tjanampa ara tjuṭa wanganarangku kulira palyantja wiyangku wantinyi munuya mara paltjilwiyangku ngalkuni?"

⁶ Ka Jesulu wangkangu tjanala, "Nyura kata kampa kutjara. Panya iriti Godaku wangkatjarangu Aitjayalu tjukarurungku walkatjuno nyuranyatjara Godalu wangkanytja alatji,

'Anangu nyangantuya ngayunya winpinpingku kutju walkulpai, panya tjana kurunpa winkingku ngayunya walkuntja wiya alatjiṭu.

⁷ Tjana ngayunya unytjungku kutju walkulpai.

Panya tjana ara tjuṭa walytjangku kulira nintilpai tjukurpa anangitja tjuṭa, ngayulanguru wiya.' " *"

⁸ Munu wangkangu, "Kulilaya. Nyura Godaku tjukurpa kulira wantinyi, munu nyura tjamupitingku wangkanytja kutju kulira palyani.

⁹ Nyuranku walytjangku ninti pulkangku-palku kulira Godalu wituntjitja tjuṭa kulira wantipai nyurampa tjamupitingku wangkanytjitja kutju palyantjikitjangku.

¹⁰ Panya Godaku tjukurpa Moselu wangkanytja ngaranyi alatji, 'Nyura mamangka ngunytjungka wanganarangku kulinma.'* Munu piruku paluru wangkangu alatji, 'Anangu kutjupangu mama ngunytju warkinyangkampa palunya pungkula iluntanama.'*

¹¹⁻¹² Palu nyura tjukurpa nyanganpa kampa kutjupankupai. Tjinguru anangungku palumpa mamangka ngunytjungka wangkaku alatji, 'Nyangatjana kutjupa kutjupa kanyini nyupalinya ungkula pukulmankunytjikitjangku, palu wiya, puṭuṇa nyupalinya unganyi panya nganmanytjuṇa Godanya kalkuṇu palumparinytjaku.' Ka alatji wangkanyangka nyura palyanmankupai, ka anangu paluru puṭu unganyi mama ngunytju wirura kanyintjikitjangku.

¹³ Palu panya Godalu wangkangu mamangka ngunytjungka wanganarangku kulintjaku, ka nyura tjukurpa palatja wyanmananyi munu nyurampa tjukurpa kutju wanganarangku kulira palyantjaku

* 7:7 Aitjayaku 29:13 * 7:10 Exodus 20:12 * 7:10 Exodus 21:17

wangkanyi. Uwa, nyura anangu tjuṭa rawangku Godalu wituntitja tjuṭa kulira wantinytjaku wituwitulpai tjukurpa tjamupitingku wangkanytjita kutju kulintjaku." Alatji Jesulu tjanala wangkangi wati panya Paratji tjuṭangka munu Moseku tjukurpa nintilpai tjuṭangka kulu.

Nyaangku Anangu Kuralpai?
(Matthew-ku 15:10-20)

¹⁴ Munu Jesulu piruku anangu tjuṭa altingu, kaya ilaringu palula kulintjikitja. Ka paluru tjanala wangkangi alatji, "Ngayulaya kulila munuya nintiriwa!

¹⁵⁻¹⁶ Panya maingku kukangku ngalkunnyangka nyuranya puṭu kuraṇi kura palyantjaku. Panya nyura unngu walytjangku kura kulira kutju kuraringkupai munu panya kura wangkapai. Nyara palulanguru nyura puṭu Godanya walkulpai, kura unngu walytjangku kulira, panya nyara palula unngunguru pakara nyuranya kuralpai. Palu nyara maingku kukangku ma-tjarpara nyuranya puṭu kuralpai."*

¹⁷ Munu palulanguru anangu tjuṭangka wankara wiyaringkula Jesunya walingka tjarpangu. Kaya palumpa nintintja tjuṭangu palula tjapiningi tjukurpa panya palunya tjanala utintjaku.

¹⁸ Ka Jesulu wangkangu tjanala, "Nyura kulu wanyu puṭu kulini nyangatja? Panya kutjupa kutjupa tjuṭangu anangu tjuningka tjarpara puṭu palunya kuraṇi kuraringkunytjaku.

¹⁹ Panya mai ngalkunnyangka kurunta wirkankunytja wiya tjuningka kutju tjarpara ngaripai mauntalpa munu palulanguru kutjupawanu ma-pakara wiyaringkupai urilta." (Tjukurpa nyangatja wankara paluru palyanmanu mai kuka kutjupa kutjupa uwankara ngalkuntjaku kutjupatarja kuranmankula wantinytjaku wiya.)

²⁰ Munu palulanguru wangkangu, "Palu anangungku walytjangku kura palyantjikitjangku kulira kutju kura palyalpai.

²¹ Panya anangungku kura tjuṭa unngu kulintjatjanungku kura tjuṭa palyalpai, panya paluru kura palyantjikitjangku rawangku kulilpai, munu pala palulanguru tjuṭangka pirtjipai, munu walytjatjara kutitjunkturpai, anangu iluntankupai, munu kuri walytjatjarangka ngaripai.

²² Uwa, paluru kura rawangku kulintjatjanungku manyuringkupai, munu kura kutjupa kutjupa tjuṭa rawangku palyalpai. Paluru anangu kutjupa ngunti kuralpai, munu kutjupa kutjupa tjuṭa kunṭa wiyangku palyalpai munu nyararingkupai munu tjaalymara anangu kutjupa ngukara wangkapai, kaṇany-kaṇanytju wangkapai, munu kawakawa alatjitu nyinapai.

²³ Uwa, kura nyanga palunya tjananya anangungku unngu kulilpai kura palyantjikitjangku munu nyara palulangurulta kuraringkula Godanya puṭu walkulpai kura nyanganpa unngu kulira palyantjatjanungku." Alatji Jesulu tjanala wangkangi palumpa nintintja tjuṭangka kutju.

Minyma Ngura Kutjupitja Jesuku Mulamularingkunytja
(Matthew-ku 15:21-28)

* **7:15-16** Wati kutjupangku kunyu verse 16 walkatjunu, munu mala tjununu Markaku tjukurta alatji *Kaya nyanga palunya kulintjatjanungku purkarangku kulinma.*

24 Munu palula malangka Jesunya anu ngura ini Tayala itingka nyinara pakuwiyaringkunyitjikitja munu wirkara walingka tjarpangu anangu tjutangu palunya nyakula palulakutu pitjanytjaku-tawara. Palu tjanaya nganmanytju nyangu.

25 Ka minyima kutjupangu paluru pitjanyangka kulira mapalku palulakutu pitjangu munu palula tjinangka tultjungarakatira palula ngatjinu, panya palumpa untalpa mamutjara nyinangi.

26 Minyima nyara paluru Jew wiya ngura ini Panitjiyalanguru. Munu minyima paluru Jesula pulkara ngatjiningi palumpa untalpanguru mamu paintjaku.

27 Palu Jesulu wangkangu palula, "Wiya ngayulu Jew tjutaku palyantja wiyatu, mununa nyaaku ngura kutjupitja Jew wiya tjutaku-warara palyalku? Panya ngunyitjunku tjitji tjutaku mai tjanalanguru mantjira papa tjuta ungkunyitja wiya tjana-warara ngalkula paltjaringkunyitjaku." Nyanga alatji paluru wangkangu arkara minyima panya palula paluru ngapartji wangkanyangka kulintjikitjangu.

28 Ka minymangu ngapartji wangkangu, "Uwa mulapa mayatja, palu panya papa tjutangu taipula unngu nyinara tjitji tjutaku mai tjukutjuku tjuta punkara ngarinyangka ngalkupai."

29 Ka Jesulu wangkangu minyima panya palula, "Nyuntu wiru mulapa wangkangu ngayula. Palya malaku ara munu nyawa, panya mamungku nyuntumpa untalpa wantikatingu."

30 Ka palula malangka minyima panya malaku anu ngurakutu munu nyangu palumpa untalpa palyaringkula piitangka ngarinyangka mamungku wantikatira ankunyangka.

Jesulu Pina Pati Alantja

31 Palulanguru Jesulu ngura Tayanya wantikatingu munu alinytjaralku anu ngura Tjaitantakutu munu nyara palulanguru kakarara anu munu ulpariralku piruku anu ngura ngururitja tjutawanu munu wirkanu uru Galileela ulparira-pitinypa panya manta nyara palula ngura tawunu 10-pa ngarangi.

32 Ka nyara palula anangu kutjupa tjutangu palulakutu katingu wati kutju pina pati, tjaa kulu pati. Munuya Jesunya pulkara ngatjiningi palula mara tjunkula palyarunguntjaku.

33 Ka Jesulu wati palunya mauntalpa katingu anangu tjutanguru munu mara palula pina unngu tjunu, munu paluru marangka witalytjura wati palunya tjalinyapa pampunu.

34 Munu ilkari ira-nyakula pulkara ngaalymara wangkangu, "Pina alariwa."

35 Ka wati panya mapalku alatjitu pina panya alaringu munu kulira wangkapairingu, munu uti alatjitu wangkangi wati panya paluru.

36 Ka Jesulu anangu tjuta wangkara painingi kutjupa tjutangka tjakultjungkunyitja wiyangu wantinytjaku. Panya paluru rawangu tjananya painingi, palu tjana rawangku tu tjakultjunangi anangu kutjupa tjutangka.

37 Kaya anangu tjutangu paluru palyannyangka nyakula pulkara urulyaraningi, "Awari, mulapa nyangatja." Munuya wangkangi, "Nyangangu kutjupa kutjupa uwankara wiru mulapa palyalpai,

panya paluru pina pati kulintjaku palyalpai munu tjaa pati wangkanytjaku palyalpaiu.”

8

Jesulu Piruku Anangu Winki Maingka Paltjantja (Matthew-ku 15:32-39)

¹ Ka Jesunya ngura nyara palula para-ngaranyangka anangu tjuṭa mulapa pitjala palula piruku tjunguringu. Palu tjana mai kanyintja wiya ngalkuntjikitjangku. Ka Jesulu nyangatja nyakula palumpa nintintja tjuṭa altingu munu tjanala wangkangu,

² “Ngayulu ngaltjuringanyi anangu nyanga tjuṭaku panya ngayulaya tjungu nyinangi tjiṅtu maṅkurpa munuya kuwari nyanga mai kanyintja wiya alatjitu.

³ Tjinguruna tjananya paltjatjiratja witura iyalku, kaya iwarangka ankula ngururpaṭu mai wiya uparingkula punkalku panya kutjupa tjaraya ngura pararinguru pitjangu.”

⁴ Kaya nintintja tjuṭangku palula wangkangu, “Wiya nyangatja parari, kala yaaltjingka mai pulka mantjilku anangu nyanga tjuṭa paltjantjikitjangku?”

⁵ Ka Jesulu tjanala tjapinu, “Palu mai tampa yaaltjitu nyura wanyu kanyini?”

Kaya wangkangu, “7-pa.”

⁶ Ka Jesulu anangu tjuṭa wangkangu mantangka nyinanytjaku. Munu palulanguru tampa panya 7 mantjira Godanya walkura wangkangu, “Wirungkulanyan mai nyangatja ungu.” Munu katantara nintintja tjuṭa ungu anangu tjuṭa para-ungkunyitjaku. Kaya mantjira anangu tjuṭa para-ungangi.

⁷ Munuya kuka antipina maṅkurpa kulu kanyiningi. Ka Jesulu kukanguru kulu pukularira Godanya walkunu munu nintintja tjuṭa ungu para-ungkunyitjaku.

⁸⁻⁹ Kaya anangu uwankarangku ngalkula paltjaringu, panya anangu 4,000 nyinangi nyara palula. Kaya palula maṅangka nintintja tjuṭangku mai panya maṅaringkula ngarinytja tjuṭa para-urara piti 7-ta tjunangi, ka piti uwankarangka tjaalyngarangu alatjitu. Ka Jesulu anangu panya tjuṭa ngurakutu witura iyanu.

¹⁰ Munu pautangka tatinu nintintja tjuṭangka tjungu, munuya ngura ini Talma-nutjalakutu urungka ma-itipiringu.

Paratji Tjuṭangku Miracle Palyantjaku Jesunya Untu-untuntja (Matthew-ku 12:38-42; 16:1-4)

¹¹ Kaya Paratji tjuṭa pitjangu Jesulakutu munuya pitjala palula tjapira pika-pikaringangi. Munuya wangkangu, “Wanyu nganana mirangka miracle kutjupa kutjupa witulya pulkangku palyala nganana nyakula nyuntunya mulapa kulintjaku alatji, ‘Munta, mulapa nyangatja Godalu iyantjanya.’ ”

¹² Ka Jesulu nyangatja kulira unngu tjituru-tjitururira ngaalyaranu munu wangkangu, “Nyaakuniya anangu nyangantu rawangku untuni miracle witulyangku palyantjaku nyakula ngayuku mulamularingkunytjikitjangku? Kulila! Mulamulangkuna nyurala wangkanyi, ngayulu nyurampa palyalwiyangku wantinyi alatjitu.”

13 Munu palulanguru tjananya wantikatira pautangka tatinu palumpa nintintja tjuṭa kulu munuya urungka ma-itipiringi.

Paratji Tjuṭaku Munu Irataku Yiitja

(Matthew-ku 16:5-12)

14 Ka nintintja tjuṭa watarkuringu mai panya pautangka tjunkunytjikitjangku munuya tampa kutju kanyiningi nganmanytju tjunkunytja.

15 Ka pautangka ankula Jesulu tjananya kulintjaku alatji wangkara ngulutjunangi, "Purkarangkuya kulinma munuya kulira wantima Paratji tjuṭaku yiitja munu wati panya Irataku kulu."

16 Kaya nintintja tjuṭangu nyangatja kulira tjanankulta wangkara kulinigi, "Nyaa nyangangu wangkanyi? Tjinguru nganaṅa mai wiya nyinanyangka paluru alatji wangkanyi."

17 Ka Jesulu nintingu kulinigi tjana nyanga wangkanytja munu tjanala tjaminu, "Nyaaku nyuranku wangkanyi mai wiya pitjanytjatjanungku? Nyura wanyu kuwaripaṭu ngurpa nyinanyi ngayunya kulintja wiya? Nyura wanyu ngukunypa pati?"

18 Kulilaya, nyura ngayunya palyannyangka nyanganyi, palu putulta nyura nyakula kulini. Munu nyura ngayulu wangkanyangka kulini, palu pina patingkulta nyura puṭu kulini. Nyura wanyu panyaku watarkuringu?

19 Panya mai kutjara maṅkurpaṅa kaṭantanu aṅangu 5,000-ku. Ka nyura piti yaaltjitungka panyatja mai mantangka maṅaringkula ngarinytja urara tjaalyngaratjunu?"

Kaya wangkangu, "Piti 12-pangkala urara tjaalyngaratjunu."

20 Ka Jesulu wangkangu, "Ka ngayulu mai panya 7 aṅangu 4,000-ku kaṭantankunyangka piti yaaltjitungka nyura panyatja urara tjaalyngaratjunu?"

Kaya wangkangu, "7-ta panyala tjaalyngaratjunu."

21 Ka Jesulu wangkangu tjanala, "Ka nyura nyaanguru kuwari-pangkutu puṭu kulini ngayulu Godalanguru pitjanytjitjaku?"

Jesulu Wati Kuru Pati Alantja

22 Munuya pautangka panya ankula ngura ini Pitjaitala wirkanu mantangka, kaya ngura nyara palula aṅangu kutjupa tjuṭangu wati kuru pati Jesulakutu wirkakatingu munuya palula ngatjinu wati palunya kuru kutjara pampura alantjaku.

23 Ka Jesulu wati panya palunya mara witiṛa urilkutu katingu tawununguru nganytjarpa. Munu palulanguru witalytjunu wati palunya kuru munu palula mara tjunu munu palula tjaminu, "Nyuntu nyanganyi kutjupa kutjupa?"

24 Ka watingku panya ira-nyakula wangkangu, "Uwa ngayulu nyan-ganyi aṅangu tjuṭa paulypa, panya tjana puṅu purunypa ngarala waṅinyi."

25 Ka Jesulu piruku mara tjunu kurungka, ka palulanguru kuru panya alaringu mulapa, ka paluru uti mulapalta nyangangi.

26 Ka Jesulu palunya ngurakutu witiṛa wangkangu, "Tawunukutu malaku ankuwiyangu wantima."

Peterlu Jesunya Wangkanytja

(Matthew-ku 16:13-20; Luke-aku 9:18-21)

27 Munuya Jesunya nintintja tjuṭa kulukulu anangi ngura ini Tjiit-jariya-Pilipailakutu. Munu iwarangka ankula Jesulu tjanala tjaning alati, “Wanyuniya tjakultjura. Anangu tjuṭangkuniya ngananya wangkanyi?”

28 Kaya wangkangu, “Tjarangkuntaya wangkapai John Baptistanya, kantaya tjara kutjupangku wangkapai Ilaitjanya, kaya tjara kutjupangku wangkapai nyuntu Godaku wangkatjara irititja kutjupa.”

29 Ka wangkangu, “Palu nyura ngananya ngayunya wangkanyi?”

Ka Peterlu wangkangu, “Nyuntun Christanya, panya Godalu kalkura iyantjanya nganannya wankarunkunytjaku.”

30 Ka Jesulu tjananya wangkangu anangu kutjupa tjuṭangka tjakultjunkuwiyanngku wantinytjaku.

Jesulu Ilunytjikitjangku Wangkanytja

(Matthew-ku 16:21-28; Luke-aku 9:22-27)

31 Munu Jesulu palumpa nintintja tjuṭangka nintiningi munu wangkangu, “Panya ngula wati kura tjuṭangku ngayunya Watiku Katjanya pulkara pikantankuku. Panya tjukurtjara kuranyitja tjuṭa, Moseku tjukurpa nintilpai tjuṭa munu wati tjilpi kutjupa tjuṭa kulu ngayuku pulkara kuraringkuku mununiya ma-ungkuku ngayunya pungkula iluntankunytjaku. Palu ngayulu ilunytjatjanu tjiṭu kutjara ngarala wiyaringkunyaangka piruku wankaringkula pakalku.”

32 Alati paluru utingku tjanala wangkangi, ka Peterlu palunya katingu mauntalpa munu palula alati wankara painingi, “Wanti! Nyaakuntaya unytjungku alatjitu iluntankuku?”

33 Ka Jesulu pinkurarara* palumpa nintintja tjuṭangka mirangka Peternya painu munu wangkangu, “Ngayulanguru ara! Nyuntun mamu, munun Satanta kulira wangkanyi. Nyuntun anangungku kulintitja kutju kulini, Godalu kulintitja kulintja wiyangku.”

34 Munu palulanguru Jesulu anangu tjuṭa altingu nintintja tjuṭangka tjungurinkunytjaku munu tjanala uwankarangka wangkangu, “Kutjupangku ngayunya wanantjikitja mukuringkulampa uti paluru walytjangku kulira palyantja wiyangku wantima, munu ngayunya kutju kulira wananna. Tjinguruya nyuranya iluntankuku ngayunya wanannyaangka, palu nyangatja palya, nyura uti ilunytja kulira nguluringkuwiyangku wantima munu ngayunya tungun-tunguntu wananna titutjarangku.

35 Anangu kutjupangku tjinguru alati kulilku, ‘Wanyu kanatju ngayulu walytjangku atunyanama mantangka nyanga rawa wanka nyinanytjikitjangku.’ Palu alati kulira paluru ngayunya wantinyi, ka Godalu palunya ngula ilunyangka putu wankani palula tjungurinkula titutjara nyinanytjaku. Ka anangu kutjupangku tjinguru alati kulilku, ‘Wanyu kana nguluringkuwiyangku Godanya titutjarangku wananna, kani palya kutjupangku ngayunya iluntankuku palunya wanara Tjukurpa Palya anangu tjuṭangka wangkanyangka.’ Ka alati kulinyangka Godalu ngula ilunyangka palunya wankara pakaltjinalgku palula tjungu titutjara wanka nyinanytjaku.

36 Palu anangungku mantatja tjuṭaku mukuringkula winki mulapa mantjira kanyirampa ngula paluru ilura nyaaringkuku? Wiya, paluru ilura kawankatiku, panya paluru mantatja wiru tjuṭaku

* 8:33 pinkurarara panya malakukutjura

mukuringkula Godanya wantingi, ka mantatja tjuṭangku palunya puṭu wankarunanyi Godala tjunguringkula titutjara nyinanytjaku.

³⁷ Panya Godalu anangu kutjupa mantatja tjuṭa ungkunyangka puṭu wankarunanyi wanka titutjara nyinanytjaku. Tjinguru pulka mulapa ungkunyangka Godalu puṭu palunya wankarunanyi.

³⁸ Panya kuwariya anangu tjuṭa kura pulka nyinanyi munuya ngayunya wantinyi alatjitu. Ka tjinguru anangu kutjupa ngayuku tjukurpa kulira ngayuku mulamularingkunyitjikitja kunṭaringanyi anangu tjuṭangka mirangka munu ngayunya wantinyi, ka palu purunypatu ngula ngayulu Watiku Katjangku pitjala palunya ngapartji wantiku ngayuku kunṭaringkunyangka. Panya nyara palula ara ngayulu Mamalangu ru pitjaku pitalytji witulya pulka, angelpa wiru tjuṭangka tjungu mununa ngayulu ngapartji ngayuku kunṭaringkupai tjuṭa wantiku.”

9

¹ Munu tjanala wangkangu, “Tjukururungkuna nyurala wankanyi, panya nyura nyanga tjuṭa kuwari ngaranyi, munu nyura kutjupa tjarangku ngula ilunytja kuwaripangka wangkangu nyakuku Godalu mayatja pulkanku anangu tjuṭa mulapa palumpa walytjaringkunyitjaku palyannyangka.” Alatji Jesulu wankara nintiningi anangu tjuṭangka kulira mulamularingkunyitjaku.

Jesunya Pulī Katu Kutjuparinytja
(*Matthew-ku 17:1-13; Luke-aku 9:28-36*)

² Munu palulanguru tjintu mankur-mankurpa ngarala wiyaringkunyangka Jesulu mauntalpa katingu Peternya, Jamesanya munu Johnnga kulu puli katu mulapa. Ka nyara palulalta tjanala mirangka Jesunya kutjuparingu.

³ Ka mantara palumpa piranpa mulararingu munu pulkara irnya-irnyaningi, panya anangungku piranpa nyanga palu purunypa puṭu alatjitu palyalpai.

⁴ Kaya nyangu Ilaitjanya pulanya Mosenya utiringkula Jesula tjungu ngarala wangkanyangka.

⁵ Ka Peterlu wangkangu Jesula, “Nintilpai, nyanga kuwarila wirura nyangangka nyinanyi. Wanyula wiltja mankurpa palyala, kutju nyuntumpa, kutju Moseku, munu kutju Ilaitjaku!”

⁶ (Alatji Peterlu kurunpa wapakatira mapalkungku wangkangu, panya nyara palunya tjananya nyakula paluru pulkara nguluringangi, Jamesanya pula Johnnga kulu.)

⁷ Ka ngangkalingku ukalingkula tjutuṅu tjananya, kaya wangka kulinu ngangkali unngunguru alatji wangkanyangka Godalu, “Nyangatja ngayuku katja. Nyanga palumpana pulkara mukuringanyi, kaya palula wanganarangku kulinma!”

⁸ Kaya nyangatja kulintjatjanungku para-nyangu wati mankurpa nyakunyitjikitjangku munuya nyangu Jesunya kutjuringkula ngaranyangka.

⁹ Munu tjana pulinguru ukalingangi mantakutu, ka Jesulu tjanala wankara painingi, “Kuwari panya nyura nyakunyitjaya anangu kutjupa tjuṭangka tjakultjunkuwiyangku wantima. Palu palyaya ngula

tjakultjunama ngayulu Watiku Katjanya ilunytjatjanu pakannyangka malangka kutju."

¹⁰ Kaya paluru panya wangkanytja wanganarangku kulinu munuya tjakultjunkunytja wiyangku wantingi, palu tjana-kutjuringkuluya wangkara kuliningi, "Nya panyatja wangkangi ilunytjatjanu pakan-tja?"

¹¹ Munuya Jesula tjapinu, "Panya Moseku tjukurpa nintilpai tjutangku wangkapai alatji, 'Iloitjanya-warara kunyu pitjaku Wankarunkupaila kuranyu?' Nyaanguruya wangkapai alatji?"

¹² Ka Jesulu tjanala wangkangu, "Uwa, Iloitjanya mulapa pitjanya nganmanytju wangkara uwankara tjukaruru palyantjikitja. Panya nyiringka iriti walkatjunkunytja alatji ngaranyi, 'Watiku Katjanya pulkara pikatjaralku munuya palunya wantiku mukuringkunytja wiyangku.' Palu nyaanguruya alatji walkatjunu?"

¹³ Wiya, mulamulangkuṅa wangkanyi Iloitjanya panya nganmanypa pitjangu, ka panyaya tjana mukuringkula tjailangka tjarpajunu munuya iluntanu, panya tjukurpa pala palunya wangkatjarangku iriti nyiringka walkatjunu."*

*Jesulu Tjitji Nyitayira Mamutjara Palyantja
(Matthew-ku 17:14-20; Luke-aku 9:37-43a)*

¹⁴ Munuya palulanguru ukalingkula mantangka wirkanu munuya anu nintintja kutjupa tjutakutu. Munuya ma-ilaringkula nyangu anangu tjuta mulapa palula tjanala para-ngarala arintankunyangka. Kaya wati panya Moseku tjukurpa nintilpai tjutangku tjananya pika-pikangku wangkangi Jesuku nintintja tjuta.

¹⁵ Palu anangu tjutangkuya Jesunya pitjanyangka nyakula pulkara pukularingu munuya ngapari-ngapari wirtjapakara palunya pukularira walkuningi.

¹⁶ Ka Jesulu tjanala tjapinu, "Nyaanguru nyuranku pika-pikangku wangkanyi?"

¹⁷ Ka wati kutjupangku anangu tjutangka ngururunguru Jesula wangkangu, "Nintilpai, ngayulu ngayuku katja ngalya-katingu nyuntulakutu panya paluru mamutjara, putu wangkapai.

¹⁸ Panya mamungku palunya mantangka anta-wanipai, ka tjaangka wita pulka pakalpai, munu katiti tirkilytjingalpai ka puntu winki tiwilaripai. Kana nyuntumpa nintintja tjuta tjapinu mamu paintjaku, palu putuya painingi."

¹⁹ Ka Jesulu kulira tjituru-tjitururingu munu tjanala wangkangu, "Nyura mulapa uwankara putu alatjitu mulamularinganyi. Kana yaaltjitu arangku nyuranya nyinara nintilku nyura kulira mulamularingkunytjaku? Tjitji palunya ngalya-kati ngayulakutu!"

²⁰ Kaya ngalya-katingu Jesulakutu. Ka mamungku panya tjitjingka unngunguru nyangu Jesunya munu mapalku tjitji panya palunya uri-uritjingara mantangka anta-waningu ka kutin-kutinkatira witaly-witalyaringu.

²¹ Ka Jesulu tjapinu mamangka, "Yaalara paluru alatjiringu?"
Ka wangkangu, "Tjitji tjukutjukulpi nyangatja alatjiringi.

* **9:13** Jesulu ara Iloitjanyatjara wangkara John Baptistanya wangkangi. Panya iriti Israelku mayatjangku Iloitjanya palu purunypatu kuraningi. Nyawa 1 Kings 19:1-10.

22 Rawangku alatjitu mamungku palunya alatjinkupai iluntankunytjikitjangku, munu kutjupa-ara palunya warungka anta-wanipai munu urungka kulu. Wanyutju ngalturingkula alpamilala, nyuntu ninti ngaralampa.”

23 Ka Jesulu wangkangu, “Nyaakun alatji wangkanyi, ‘Ninti ngaralampa palyala?’ Uti nyuntu Godaku mulamularingama, panya paluru mulamularingkunyangka palyalpai alatjitu.”

24 Ka mamangku panya mapalku wangkangu, “Ngayulu mulamularinganyi, palu tjuku nguwanpa, kani wanyu alpamilala pulkara mulamularingkunytjaku.”

25 Ka Jesulu nyangu anangu tjuta ngalya-kaputurinyangka munu mamu panya wankara painu, “Mamun pina patilpai, munun tjaa kulu patilpai. Ngayulu nyuntunya paini, tjitjingu pala ngalya-pakala munu piruku tjarpanytja wiyangku wantima.”

26 Ka mamungku tjitji panya mirara pulkara uritjingara anta-wanira pakara anu, ka tiwilarira ngaringi ilunytja purunypa. Kaya anangu tjutangku nyakula wangkangi, “Wiya, tjitji palatja alatjitu ilungu.”

27 Palu Jesulu tjitji panya palunya mara witera katunu, ka wankaringkula pakara paltjura ngarangi.

28 Ka palula malangka Jesunya tjana palumpa nintintja tjuta kulu wali unngu tjarpara nyinakatingu. Kaya palula tjapiningi alatji wankara, “Nyaanguru panyatja nganana mamu putu painingi?”

29 Ka Jesulu wangkangu, “Wiya, mamu nyara palu purunypa panya nyura Godala tjapira kutju pailku.”

*Jesulu Piruku Ilunytjikitjangku Wangkanytja
(Matthew-ku 17:22-23; Luke-aku 9:43b-45)*

30-31 Ka Jesulu tjana ngura palunya wantikatira anangi ngura tjutawanu uru panya Galileela itingka. Palu paluru mukuringkunytja wiya anangu tjutangku palunya ngurira nyakunytjaku, panya paluru nintintja tjuta kutju wankara nintintjikitja mukuringangi. Munu paluru iwarangka ankula tjanala wangkangi nyanga alatji, “Panya wati kutjupangku ngayunya Watiku Katjanya nintilku wati mirpantju tjutangka, kaniya witera katira iluntankuku. Ka ngayulu ilunytjatjanu tjiptu mankuritja wankaringkula pakalku.”

32 Palu putuya kuliningi paluru wangkanyangka, “Nyaa nyan-gangku wangkanyi?” Palu palula utingku tjapintjakuya nguluringangi munuya wantingi tjapilwiyangku.

*Ngananya Kuranyitja Pulka Nyinaku?
(Matthew-ku 18:1-5; Luke-aku 9:46-48)*

33 Munuya ankula ankula ngura Kapaniyamala wirkanu munuya ngurangka tjarpangu. Ka Jesulu palumpa nintintja tjutangka tjapinu, “Nyaa nyura panyatja ngaparku wangkangi iwarangka panya pitjala?”

34 Palu tjana kuntaringkula ngapartji wangkanytja wiyangku wantingi palula, panya tjana iwarangka ankula wankarinangi alatji, “Mayatjalu wanyu ngananya kuranyitja pulka nyinanytjaku kulini nyanga ngananalanguru?”

35 Ka Jesulu nyinakatira nintintja panya tjutangka wangkangu alatji, “Kulilaya. Ngananya wanyu kuranyitja pulka nyinanytjikitja

mukuringanyi? Uti paluru tjukutjukuringama munu wati warkaripai purunypa nyinara anangu uwankaraku wiru tjuṭa palyanma.”

³⁶ Munu paluru tjitji tjukutjuku ila ngaranyangka minara tjanala ngururpa ngaratjunu munu palulanguru tjitji palunya ngalikitikitira tjanala wangkangu alatji,

³⁷ “Tjinguru anangu kutjupangku ngayuku nintingku tjitji tjukutjuku nyanga purunypa mantjira pukultu walytjanmankulampa, nyara paluru ngayunya walytjanmananyi munu ngayunya iyantjanya kulu walytjanmananyi.”

³⁸ Ka Johntu wangkangu palula, “Nintilpai, nganana nyangu wati kutjupangku anangu tjuṭanguru mamu tjuṭa painnyangka nyuntu witunnyangka-palku, panya paluru painingi nyuntunya ini wangkara. Kala palunya painu, panya paluru ngananala tjungutja wiya.”

³⁹ Ka Jesulu tjanala wangkangu, “Pailwiyangkuya wantima, panya kutjupangku ngayunya ini wangkara wityatjarangku kutjupa kutjupa tjuṭa palyara ngayunya puṭu kurani.

⁴⁰ Panya anangu kutjupa nganampa kuraringkunyta wiya nyinarampa nyara paluru nganampa walytjatu nyinanyi.

⁴¹ Kana tjukarurungku nyurala wangkanyi, panya kutjupangku nyuranya ngayuku walytja nyinanyangka nyakula ngaltunytjungku alpamilannyangka, Godalu palunya ngapartji wiru mulapalta untkuku. Tjinguru anangu paluru mina wari kutju nyuranya tjikintjaku untkuku, ka Godalu nyakula wantinyta wiyangku palunya ngapartji untkuku alatjitu palumpa pukularira.”

Kuraringkunyttjaku Wituwituntja

(Matthew-ku 18:6-9; Luke-aku 17:1-2)

⁴² Munu Jesulu piruku wangkangi nyanga alatji, “Tjinguru wat- ingku anangu kutjupangka liringka puli pulka tjungura karpira uru ngatingka waniku, ka palatja wiru wiya kura. Palu tjinguru tjitji ngayuku mulamularingkupai nyinanyi, ka anangu kutjupangku palunya wituwitulku kura palyantjaku, ka palatja wiru wiya kura pulka mulapa. Panya pika pulka mulapa utiringkuku anangu nyanga palumpa paluru tjitji tjukutjuku nyanga purunypa kuraringkunyttjaku palyannyangka.

⁴³⁻⁴⁴ “Uwa, uti nyura kura tjuṭa wantinytjikitjangku pulkara kulinma munu wantima alatjitu kuraku piruku mukuringkunyta wiyangku. Ka nyuntu tjinguru mara kutjungku kura kutjupa kutjupa palyalku. Palu uti nyuntu mara pala palunya katara wanima kura rawangku palyantjaku-tawara, munun palyalta mara kutjutjara Godala tjungur- ingkula wanka titutjara nyinaku, panya nyuntu mara winkingku kura rawangku palyannyangka Godalu nyuntunya ngura kurangka waniku waru pulkangka titutjara kampanyttjaku.*

⁴⁵⁻⁴⁶ “Munun palu purunypatu tjinguru tjina kutjungku kura kutjupa kutjupa palyalku. Palu wiya, uti nyuntu tjina pala palunya katara wanima kura rawangku palyantjaku-tawara, munun palyalta tjina kutjutjara Godala tjunguringkula wanka titutjara nyinaku, panya

* **9:43-44** Wati kutjupangku kunyu verse 44 walkatjunu, munu mala tjungunu Markaku tjukurta alatji *Ka ngura nyara palula katilyka tjuṭangku tjananya rawangku ngalkuku wiyaringkunyttjaka wiyangku, ka waru panya pulka titutjara kampapai wiyaringkunyttjaka wiya alatjitu.*

nyuntu tjina winkingku kura rawangku palyannyangka Godalu nyuntunya palu purunypatu ngura kurangka waniku.*

⁴⁷ “Munu palu purunypatu tjinguru nyuntu kurungku kutjupa kutjupa nyakula kura palyalku. Palu uti nyuntu kuru warpura wanima kura rawangku palyantjaku-tawara, munun palyalta kurutjara Godala tjunguringkula wanka titutjara nyinaku, panya nyuntu kuru winkingku kura rawangku palyannyangka Godalu nyuntunya ngura kurangka waniku.

⁴⁸ Panya ngura nyara palula katilyka tjuťangku titutjarangku ngalkupai ilunytja wiyangku wankangku alatjitu, ka waru nyara paluru panya titutjara kampapai wiyaringkunyitja wiya.

⁴⁹ “Kulilaya, panya urtjanpa warungka witalpai tjuľaringkunyaangka kulata tjukaruruntjikitjangku. Palu purunypa Godalu palumpa walytja tjuťa warungka purunytja pikangka tjunkupai tjananya nintira tjukaruruntjikitjangku.

⁵⁰ “Ka tjaltu wiru, palu mayu wiyaringkula nyamparingkupai ka tjaltu palunya piruku mayutararingkunyitjaku putu palyalpai. Ka palu purunypa nyura Godaku walytja tjuťa uti Godala tjungu titutjara nyinama wantinytja wiya, munuyanku wirura kalypa palyanyku nyinama, panya nyura wantira Godalanguru paťuringkulampa wiru tjuťa putu palyalku anangu watarkitja tjuťaku.”

Alatji Jesulu palumpa nintintja tjuťangka wangkangi ngura panya Kapaniyamala.

10

Kuri Wantikatinytja Wiyangku Wantinytjaku
(Matthew-ku 19:1-12; Luke-aku 16:18)

¹ Munu Jesulu ngura palunya wantikatira ulpariralku anu manta Judealakutu munu nyara palulanguru kakarara ankula karu urutjara ini Jordanta itipiringu. Kaya anangu winki mulapa piruku palulakutu pitjangi, ka tjanala piruku tjukurpa wangkara nintiningi, panya paluru tjakangku nintilpai.

² Kaya wati Paratji tjuťa palulakutu pitjangu munuya palunya ngunti arkara tjapiningi alatji wangkara, “Wanyulanya tjakultjura! Palya watingku minyama kuri wantinytjaku ara kutjupa kutjupanguru? Mulapa wanyu Moselu palu purunypa wangkangu?”

³ Ka Jesulu wangkangu, “Palu Moselu nyuranya nyaa wangkangu?”

⁴ Kaya wangkangu, “Wiya, Moselu wangkangu alatji, watingku kuri wantinytjikitja mukuringkula uti nyiringka walkatjura ungama minyama panya paluru nyiri mantjira ankunyitjaku.”

⁵ Ka Jesulu wangkangu, “Wiya kulila! Moselu nyangatja nyurampa walkatjunu panya nyura tungunpungkula wituwitu nyinanyangka.

⁶ Palu kuwaripatjara mulapa panya Godalu anangu palunu wati munu minyama.

* 9:45-46 Wati kutjupangku kunyu verse 46 walkatjunu, munu mala tjungunu Markaku tjukurta alatji *Ka ngura nyara palula katilyka tjuťangku tjananya rawangku ngalkuku wiyaringkunyitja wiyangku, ka waru panya pulka titutjara kampapai wiyaringkunyitja wiya alatjitu.*

7-9 Ka nyanga palulanguru panya watingku mama ngunytju wantikatira kungka kuri altira pula kutjuringkupai. Uwa, panya kutjara ngaranytjatjanu kutjuringkupai, ka pala palulanguru uti wati palumpa kuringuru tjaringkunyta wiya palula tjungu titutjara nyinama, panya Godalu wati palunya kungka kuringka tjungunu." Alatji Jesulu Paratji tjutangka wangkangi.

10 Munuya palula malangka Jesunya tjana malaku anu ngurakutu. Kaya nintintja tjutangka Jesula tjapiningi tjukurpa panya palunya tjanela utintjaku.

11 Ka paluru wangkangi, "Watingku kuri wantinytjatjanungku minyma kutjupa altira palumpa panya kuri nganmanyitja kurani munu Godalu wangkanytjitjanga tungunpunganyi.

12 Ka minymangku palu purunypatu wati kuri wantikatinytjatjanungku, wati kutjupa altira palumpa panya kuri nganmanyitja kurani, munu palu purunypatu Godalu wangkanytjitjanga tungunpunganyi."

Jesulu Tjitji Tjuta Pukulmankunyta

(Matthew-ku 19:13-15; Luke-aku 18:15-17)

13 Kaya anangu tjutangka tjitji tjuta Jesulakutu ngalya-katingi mara tjunkula wangkara pukulmanytjaku, palu nintintja tjutangka tjananya painingi.

14 Ka Jesulu nyangu tjananya painnyangka munu mirpanarira wangkangu nintintja panya tjutangka, "Tjitji tjukutjuku tjuta ngayulakutu pitjanyangka nyakulaya paintja wiyangku wantima! Panya anangu tjuta tjitji nyanga tjukutjuku tjuta purunypa nyinanyangkampa, Godalu tjananya mayatja pulkangku walytjanmara kanyilku.

15 Kana tjukarurungku nyurala wangkanyi, panya nyura tjitji nyanga purunytju Godanya wanganarangku kulinnnyangka kutju, Godalu nyuranya mayatjangku walytjanmara titutjarangku kanyilku. Palu nyura wantinyangka paluru nyuranya wantiku."

16 Munu wangkara wiyaringkula tjitji panya tjuta ampunu munu tjanela mara tjunkula tjananya uwankara wangkara pukulmanu kutju.

Wati Mani Pulkatjara

(Matthew-ku 19:16-30; Luke-aku 18:18-30)

17 Ka palulanguru Jesunya ngura kutjupakutu ma-pakannyangka wati kutjupa palulakutu anga-wirtjapakanu, munu palula kuranyu tultjungarakatira palula tjapinu, "Nintilpai, nyuntun wiru mulapa! Wanyuni tjakultjura, nyaalkuna Godala tjunguringkula wanka titutjara nyinanytjikitjangku?"

18 Ka Jesulu palula wangkangu, "Nyaakunin wirunmananyi? Kutjupa wiru mulapa nyinanytja wiya, Godanya kutju wiru mulapa.

19 Palu nyuntu panya ninti Godalu wituntjitja tjutaku. Panya paluru alatji wangkangu, miri pungkuwiyangku wantima, kuri walytjatjarangka ngarinytja wiyangku wantima, walytjatjara kutitjunkuwiyangku wantima, anangu kutjupa ngunti ngukara wangkawiyangku wantima, ngunti kuralwiyangku wantima, munu ngunytjungka mamangka wanganarangku kulinma."

²⁰ Ka wati panyangku wangkangu, “Nintilpai, ngayulu tjitjingkulpi tjukurpa nyanga palunya tjananya uwankara wanganarangku kuliningi.”

²¹ Ka Jesunya nyakula mukuringu wati panya palumpa munu tjukarurungku palunya wangkangu, “Palu nyuntu kutjuku watarkuringu, nyuntu panya kanyintja uwankaraku. Uti nyuntu palunya tjananya manikitjangku tjalamilanna, munu mani mantjira ngaltutjara tjuta ma-ungama, mununi palulanguru pitjala ngayunyalta wananna. Munun nyuntu nyara palulanguru ngula ilkarangka wiru mulapalta mantjilku.”

²² Ka wati panyangku nyangatja kulira yunpa tjituru-tjitururira anu, panya paluru-mantu mani ulytja kutjupa kutjupa pulkatjara alatjitu nyinangi, munu palunya tjananya walytjangku kanyintjikitja mukuringangi.

²³ Ka Jesulu pinkurarara nintintja tjutangka wangkangu, “Nyangatja wituwitu mulapa ngaranyi anangu mani munu ulytja pulkatjara tjutaku, panya tjana mani ulytja kulu pulkara kulira putu Godaku walytjaringanyi paluru tjananya mayatjangku kanyintjaku.”

²⁴ Kaya nintintja tjutangka tjukurpa nyanga palunya kulira wangkangu, “Ai! Nyangatja mulapa wituwitu.”

Ka Jesulu piruku tjanala wangkangu, “Walytja tjuta, mulapa wituwitu ngaranyi anangu tjuta Godaku walytjaringkunyitjaku.

²⁵ Kulilaya! Panya nyiilangka ala utju mulapa ngaranyi. Ka ala pala palulawanu wanyu kamula tjarpapai? Wiya alatjitu. Ka palu purunypatu anangu mani ulytja pulkatjara tjuta putu Godaku walytjaringanyi, paluru tjananya mayatjangku kanyintjaku.”

²⁶ Kaya nyangatja kulira nintintja tjutangka piruku pulkara mulapa kuliningi munuyanku ngaparku tjapiningi, “Palu Godalu anangu mani pulkatjara tjuta wantirampa tjinguru anangu kutjupa uwankara kulu ngura kurakutu iyalku wankarunkunyitja wiyangku.”

²⁷ Ka Jesulu tjananya tjukarurungku nyakula wangkangu, “Panya anangu putu walytja wankaringanyi, palu Godalu kutjungku wankalpai.”

²⁸ Ka Peterlu wangkangu, “Kulila, panya nganana kutjupa kutjupa uwankara wantikatingu nyuntunya wanantjikitjangku.”

²⁹ Ka Jesulu wangkangu tjanala, “Uwa, kana nyurala tjukarurungku wangkanyi, panya ngayunya wanantjikitjangku nyura tjinguru nyurampa ngura, munu kuta, kangkuru tjuta, ngunyitju, mama, tjitji tjuta, kaana kutjupa kutjupa tjuta kulu wantikatingu Tjukurpa Palya ngayunyatjara anangu tjutangka tjakultjungkunyitjikitjangku.

³⁰ Nyara palulanguru Godalu watarkuriwiyangku nyuranya pulka mulapalta ungkuku, panya wali tjuta mulapa munu mama tjuta, ngunyitju tjuta, tjitji winki munu kaana tjuta kulu, palu nganmanyitja purunypa wiya, waintara mulapa. Ka nyura ngayunya wanannyangka nyakula anangu tjutangka nyuranya analku munu pungkuku. Palu ngula nyura ilunytjatjanu wankaringkula pakara wanka titutjara nyinaku Godala tjungu pukulpa mulapa.

³¹ Ka panya kuwari anangu kutjupa tjuta pulka nyinanyi, palu ngula paluru tjana ngaltutjararingkuku, ka panya kutjupa tjuta kuwari

ngalututjara nyinanyi, palu ngula paluru tjana pulkaringkuku." Alatji Jesulu wangkangi palumpa nintintja tjutangka.

Jesulu Piruku Ilunytjikitjangku Wangkanytja
(Matthew-ku 20:17-19; Luke-aku 18:31-34)

³² Munuya Jesunya tjana nintintja tjuta kulukulu iwarangka anangi Jerusalemalakutu. Ka Jesunya tjanala kuranyu anangi, kaya anangu panya kutjupa tjutangu malawanungku palunya wananingi munuya pulkara nguluringangi palula tjungu ankula. Ka nintintja panya 12-ngku putu kuliningi, "Nyaakitjala nyangatja ananyi Jerusalemalakutu?"

Ka Jesulu palunya tjananya mauntalpa katingu munu tjanala tjakultjunangi panya palumpa Jerusalemala utiringkunyjtaku.

³³ Munu tjanala wangkangu alatji, "Kulilaya, nganana nyanga kuwari ananyi Jerusalemalakutu, ka nyara palula wati kutjungku malpangku Watiku Katjanya nintilku tjukurtjara kuranyitja tjutangka munu Moseku tjukurpa nintilpai tjutangka kulu, kanuya witera katira kuutpangka ngaratjungkuku, mununiya kuranmara kukanymankuku. Palulanguruniya ngayunya wati Jew wiya tjuta ma-ungkuku tjana ngayunya iluntankunyjtaku.

³⁴ Kaya wati nyara paluru tjana ngayunya anara wangkaku, mununiya anara kurara pungkula witalytjungkuku mununiya wi-pangka pulkara alkalku, munuya palulanguru ngayunya katiralta iluntankuku. Palu tjintu kutjara wiyaringkula ngayulu ilunytjatjanu wankaringkula pakalku." Alatji Jesulu tjanala tjakultjunangi paluru tjana nganmanytju kulintjaku.

Jamesalu Pula Johntu Jesula Tjapintja
(Matthew-ku 20:20-28)

³⁵ Ka Jamesanya pula Johnnga wati panya Tjipitiku katja kutjara Jesulakutu pitjangu munu wangkangu, "Nintilpai, ngali nyuntula ngatjintjikitja mukuringanyi nyuntu kutjupa kutjupa ngalimpa palyanjtaku. Palya?"

³⁶ Ka Jesulu wangkangu, "Uwa, nyaana palyalku nyupalimpa?"

³⁷ Ka pula wangkangu, "Ngula nyuntu mayatja pulkaringkula tjija wirungka nyinarampa ngalinya kulu nyuntula itingka nyinatjunama, kutju wakungka kutju tjampungka mayatjarira nyinanyjtaku."

³⁸ Ka Jesulu wangkangu, "Wiya nyupali ngurpangku tjapini nintingku-palku. Kuwari ngayulu pika pulka mantjini. Ka nyupali wanyu ngayula tjunguringkula pika pulkatu mantjilku?"

³⁹ Ka pula wangkangu, "Uwa, ngali nyuntu purunypa pika pulka mantjilku."

Ka Jesulu wangkangu, "Uwa, mulapa nyupali pika pulka mantjilku munu iluku ngayunya purunypa.

⁴⁰ Palu panya ngayula wakungka munu tjampungka mayatjarira nyinanyjtaku ngayulu putu ngurkantananyi, panya Godalu kutjungku nganmanytju ngurkantanu ngayula itingka nyinanyjtaku."

⁴¹ Kaya nintintja panya kutjupa tjutangu paluru pula Jesula ngatjinnyangka kulira palumpa pulampa mirpanaringu.

⁴² Ka Jesulu tjananya uwankaratu altira wangkangu, "Nyura ninti panya mayatja mantatja tjutaya anangu alatjitu mayatjarira nyinanyi,

munuya anangu tjuṭa wituwitura war̄kamilara pakulpai kutjupa kutjupa tjuṭa tjanampa palyantjaku.

⁴³ Ka nyura tjananya arkalwiyangu wantima. Munu nyura tjin-guru mayatja pulka nyinanytjikitja mukuringkulampa, uti anangu war̄karipai purunypa nyinama, munu anangu kutjupa tjuṭa alpami-lara palumpa tjanampa palyanma.

⁴⁴ Uwa, nyura kuranyitja nyinanytjikitja mukuringkulampa uti anangu kutjupa tjuṭaku war̄karima paluru tjana pukularinytjaku.

⁴⁵ Tjinguru nyura kulini ngayunya Watiku Katjanya-manti pitjangu mayatjarira anangu tjuṭa war̄kaku wituwituntjikitja. Palu wiya, ngayulu pitjangu anangu tjuṭaku war̄ka pulka palyara tjanampa ngalkilpa ilunytjikitja, tjana wankaringkunyitjaku." Alatji paluru wangkangi palumpa nintintja tjuṭangka.

*Wati Ini Patimayatjanya Kuru Alaringkunyitja
(Matthew-ku 20:29-34; Luke-aku 18:35-43)*

⁴⁶ Munuya palulanguru paluru tjana ankula wirkanu ngura ini Jerichola munuya waaraṭu anangi. Kaya ngura nyara palula nyinapai tjuṭa kulu tjanala tjunguringu munuya wananingi winki mulatu. Ka iwara nyara palula itingka wati kuru patingku nyinara anangu tjuṭangka maniku ngatjiningi. Wati nyara paluru ini Patimayatjanya wati ini Timayatjaku katja.

⁴⁷ Ka kutjupangu palula tjakultjunu panya Jesunya Nazarethanya ngurara wati-pitjanyangka, ka paluru kulira mirara wangkangu, "Jesu, Davidakun tjamu, ngalturiwatju."

⁴⁸ Kaya anangu tjuṭangu wati palunya painu pilunarinytjaku. Palu wati palurunku pulkara mulapalta mirangu, "Davidakun tjamu, ngalturiwatju."

⁴⁹ Ka Jesulu miranyangka kulira ngarakatingu munu wangkangu, "Ma-altiya!" Kaya anangu tjuṭangu palunya altira wangkangu, "Ala, pukularira pakala. Altinyinta."

⁵⁰ Ka upukuta panya araltjara wanira mapalku pakara Jesulakutu pitjangu.

⁵¹ Ka Jesulu tjapinu palula, "Nyuntun ngayulu nyaantjaku mukuringanyi?"

Ka wati panya kuru patingku wangkangu, "Nintilpai, ngayulu nyakunytjikitja mukuringanyi."

⁵² Ka Jesulu wangkangu, "Palya ara. Panya nyuntu ngayuku mulamularingkunytjatjanu kuru palyaringu." Ka wati panya paluru mapalku kuru alaringkula nyangangi munu palulangurulta Jesunya wananingi iwarangka ankunyangka.

11

*Jesunya Tangkiyingka Tatira Pitjanyitja Jerusalemalakutu
(Matthew-ku 21:1-11; Luke-aku 19:29-38; Johnku 12:12-19)*

¹⁻² Munuya Jesunya tjana nintintja tjuṭa kulu Jerusalemalakutu ma-ilingkula puli ini Alipatjarala katukutu tatira ma-wirkanu ngura tjukutjuku kutjarangka itingka ini Piitjanila pulala Piitja-paitjala. Ka Jesulu nintintja kutjara kuranyu witura iyanu pulala alatji wangkara, "Ara pula kuranyu ngura pala ilatjakutu munu wirkara nyupali

nyakuku tangkiyi kulunypa karpintja ngaranyangka nganmanypa tatintja wiyatja. Nyara palunya pula araltjara ngalya-kati.

³ Ka tjinguru anangu kutjupangku nyupalinya nyakula tjapilku alatji, 'Nyaaku nyupali arani?' Ka pula alatji wangka, 'Wiya, Mayatjanya nyanga palumpa mukuringanyi. Munu paluru malakungku mapalkungku iyalku rawaringkula kanyintja wiyangku.' Alatji pula wangka."

⁴ Ka pula ankula nyangu tangkiyi panya palunya wali tjaangka urilta karpira wantinytja ngaranyangka munu pula araningi.

⁵ Kaya ila ngaranytjatjanungku nyakula pulanya wangkangu, "Nyaaku nyupali araltjananyi tangkiyi pala kulunypa?"

⁶⁻⁷ Ka pula tjanala wangkangu panya Jesulu wangkanytjitja. Kaya mulapatu kulira wantir'iyanu, ka pula tangkiyi panya palunya katingu Jesulakutu. Kaya nintintja tjutangku tangkiyi tjanangka mantara tjunu ka Jesunya tatinu.

⁸ Ka paluru tatira pitjanyangka anangu tjutangku palumpa pulkara pukularira tjanampa upukuta tjuta araltjara iwarangka lipira tjunkula wananingi palula kuranyu. Kaya tjarangku punu parka katantara palu purunypatu tjunkula wananingi.

⁹ Kaya anangu winkingku kuranyunguru munu malanguru pukularira mirara wangkangi,

"Godanyala walkura mirawanima!

Mayatja God, nyanga palunya pulkara pukulmanama, panya nyuntu palunya iyanu nganananya mayatjarira kanyintjaku. *

¹⁰ Kala pukularima panya nyanga paluru nganananya mayatjangku kanyilku tjamu Davidaku arangka wiru mulatu.

Ala, Godanyala walkura mirawanima katutja pulkanya!"

Alatjiya anangu tjutangku pukularira palunya mirawaningi.

¹¹ Ka Jesunya Jerusalemala wirkara ankula timpulangka tjarpangu munu uwankara para-nyangangi. Palu watalpi mungartjirinyangka paluru Jerusalemalanguru pakara malaku anu nintintja tjutatjara ngura Piitjanilakutu.

Jesulu Punu Ili Wangkanytja

(Matthew-ku 21:18-19)

¹² Munuya ngarira tjinturingkula malaku pitjangi ngura panya Piitjanilanguru, ka Jesunya pinpatja wiya paltjatjiratja anangi.

¹³ Munu pararinguru nyangu punu ili ngaranyangka pulkunpa mulapa. Munu paluru anu mai nyakula mantjintjikitja munu malaringkula nyangu nyalpi kutju ngaranyangka, palu punu paluru kuwaripa ngarangi mai ngula pakantjikitja. ¹⁴ Ka Jesulu wangkangu punu panya ilingka, "Anangu kutjupangku nyuntulanguru piruku mai mantjira ngalkuntja wiya alatjitu ngaraku." Kaya nintintja tjutangku kulinu paluru wangkanyangka.

Jesulu Anangu Tjuta Timpulanguru Paintja

(Matthew-ku 21:12-17; Luke-aku 19:45-48; Johnku 2:13-22)

¹⁵ Munuya palulanguru Jerusalemala wirkanu, ka Jesunya timpulaku yaatangka tjarpangu munu nyangu anangu tjutangku kutjupa kutjupa tjuta tjalamilannyangka. Munu paluru mirpanarira tjananya

* 11:9 Psalm 118:25

uwankara painu, munu taipula manitjara tjuta untura wanira kampa kutjupanu munu taipula tjulpu kuukuuku tjutatjara kulu untura waningu.

¹⁶ Munu anangu uwankara painu timpulaku yaatanguru kutjupa kutjupa tjuta tjalamilantjikitjangu piruku katiwiyangku wantinytjaku.

¹⁷ Munu palulanguru anangu tjutangka nintiningi alatji wangkara, "Panya nyiringka iriti walkatjunu Godalu wangkanytjita nyanga alatji, 'Ngayuku timpula uti ngayuku alatjitu ngarama anangu manta winkitjangu ngayunya tjarpara walkuntjaku.' *"

Palu nyura kampa kutjupara palyanu maniku manyu tjutangu anangu tjuta ngunti kurara tjanalanguru mani mantjintjaku." *

¹⁸ Kaya tjukurtjara kuranyitja tjutangu Moseku tjukurpa nintilpai tjutangu kulu ilangku kuliningi paluru alatji wangkanyangka, munuya tjaalymara wangkara kuliningi, "Yaaltji-yaaltjinkula palunya iluntankuku?" Palu putuya kuliningi anangu tjutaku nguluringkula, panya Jesulu tjukurpa wangkanyangkaya paluru tjana kulira nguwanakura wangkapai, "Awari, tjukurpa wirunya alatjitu nyangangu wangkapai." Kaya kuliningi, "Tjingurula palunya witinnyangkaya anangu tjuta nganampa kuraringkuku."

¹⁹ Ka mungartjirinyangka Jesulu tjana ngura Jerusalemnya wantikatira malaku anu Pitjanilakutu ngurakutu.

Piruku Ilinguru Wangkanytja
(Matthew-ku 21:20-22)

²⁰ Munuya mungawinki pakara malaku anu Jerusalemakutu munuya iwarangka ankula nyangu punu panya ili palunya pilti ngaranyangka, wata munu iwiri kulu.

²¹ Ka Peterlu mungartjitja panya kulinu munu Jesula wangkangu, "Nintilpai, nyawa punu panya nyuntu wangkanytjanya piltiringu."

²² Ka Jesulu wangkangu, "Godakuya mulamulariwa.

²³ Tjinguru kutjupangu palumpa pulkara mulamularingkulampa puli murpu nyangatja wangkara witulku pakara ankula uru nyara pulkangka tjarpanytjaku, ka mulapatu Godalu alatjirinytjaku palyalku anangu nyara paluru kurunpa winkingku mulamularingkula wangkanyangka.

²⁴ Kana nyanga palulanguru nyurala wangkanyi nyura Godala kutjupa kutjupaku tjapirampa pulkara mulamularingama, ka paluru nyurampa palyalku alatjitu.

²⁵⁻²⁶ Palu tjinguru nyura unngu mirpanpa kanyini anangu kutjupaku pikaringkunyjtjanungku. Munu nyura tjinguru Godala tjapintjikitjangu kulirampa uti nganmanypa kalyparingama anangu panya palumpa-warara, ka nyara palulanguru nyurampa Mama Ilkaritjanya nyurampa kalyparingkuku munu nyuranya kura palyantjitjanguru pungkuwiyangku wantiku."*

* 11:17 Aitjayaku 56:7 * 11:17 Jeremias-ku 7:11 * 11:25-26 Matthew-lu tjinguru verse 26 walkatjunu, ka wati kutjupangu mala tjungunu Markaku tjukurta nyanga alatji Palu nyuntu tjinguru anangu palumpa kalyparingkunyitja wiyangku wantinyangkampa Mama Ilkaritjala palu purunytjitu nyuntumpa kalyparingkunyitja wiyangku wantiku.

Jew Tjutangku Jesula Ngunti Tjapintja

(*Matthew-ku 21:23-27; Luke-aku 20:1-8*)

27 Munuya ankula ma-wirkanu Jerusalemala munuya timpulaku yaatangka tjarpangu. Ka Jesunya timpula unngu para-ngaranyangka tjukurtjara kuranyitja tjuṭa, Moseku tjukurpa nintilpai tjuṭa munu wati tijlpi tjuṭa kulukulu palulakutu pitjangu.

28 Munuya wangkangu palula, "Nganalunta nyuntunya wangkangu anangu tjuṭa timpula nyanganguru paintjaku? Mununta nganalu iyanu tjukurpa nyangangka wangkara nintintjaku?"

29 Ka Jesulu ngapartji tjanala wangkangu, "Wanyu kana nyurala-warara tjapila, mununa nyura wangkanyangka kutju ngayulu ngapartji nyurala wangkaku nganaluni iyanu nyanganpa palyantjaku.

30 Kaya kuwari ngayula utingku wangka, nganalu wanyu Johnnga iyanu anangu tjuṭa baptise-katinytjaku Godalu munta watingku?"

31 Kayanku kaputurira wangkangi, "Nyaala wangkaku? Tjingurula wangkaku, 'Godalu palunya iyanu.' Ka alatji wangkanyangka tjinguru paluru wangkaku alatji, 'Ka nyura nyaaku wanyu Johnku mulamularingkuwiyangku wantingi?"

32 Palu tjinguru nganana wangkaku, 'Watingku palunya iyanu.' Ka alatji wangkanyangkampa anangu nyanga tjutangku kulira nganampa mirpanariku panya paluru tjana Johnnga Godaku wangkat-jaranmankupai. Kala wanti munula ngurpariwa."

33 Munuya palulanguru Jesula wangkangu, "Wiya, ngurpala."

Ka Jesulu tjanala wangkangu, "Ka ngayulu ngapartji nyurala tjakultjungkunyitja wiyangkuṭu wantinyi panya ngayunya iyantjanya."

12

Jesulu Tjukurpa Wangkara Jewku Mayatja Tjuṭa Miiltjingantja

(*Matthew-ku 21:33-46; Luke-aku 20:9-19*)

1 Munu palulanguru Jesulu tjanala tjukurpa ara kutjupatjara wangkangi alatji, "Wati kutjupangku punu kiripitji tjuṭa kaana pulkangka tjawara ngaratjura wananu, munu apunguru yaata parapalyara arintara patinu, munu piti tjawara wantingu ngula kiripitji kururingknyangka urara kantura tjulkura waina palyantjaku, munu wali wara palyanu katunguru nyakula atunymankunytjaku. Munu palulanguru wati panya paluru kaana panya palunya wati mankurpa kutjupa unytjungku ungkukatingu mani palumpa palyantjaku, munu wantikatira anu parari manta kutjupakutu.

2 Ka mai panya kururingknyangka wati panya kaanaku walyt-jangu wati warkaripai kutju iyanu tjanalakutu, ankula mai kiripitji tjarara mantjira palumpa katinytjaku.

3 Kaya wati panya atunymankupai tjutangku wati panya iyantjanya nyakula witera pungkula maralpa paira iyanu mai wiya.

4 Ka piruku wati panya kaanaku walytjangu wati warkaripai kutjupa iyanu, kaya palunya ngapartji patara kata pungkula kunṭa wiyangku paira iyanu maralpaṭu.

5 Ka panya pirukuṭu warkaripai kutjupa iyanu, kaya wati panya palunya pungkula iluntanu. Ka rawangkuṭu iyaningi warkaripai kutjupa tjuṭa, kaya kutjupatjara iluntanangi munuya tjara kutjupa pungkula paira iyaningi.

6 “Ka kutjulta nyinangi wati panya tjanalakutu iyantjaku, wati panya palumpa katja. Ka katja panya palumpa paluru pulkara mukuringkupai munu paluru kulinu, ‘Wanyunatju ngayuku katja iyala, kaya palunya wanganarangku kulilku.’

7 “Palu wati panya palumpa katja wirkankunyangka nyakula tjananku kaputurira wangkara kulinigi, ‘Ai, wati panya palumpa katjampal palatja pitjanya! Warpungkulala iluntara, ka ngula mama palumpa tjilpiringkula ilunyangka kaana nyangatja nganampariku.’

8 Munuya wati panya palunya witira iluntara kaananguru urilkutu itarikatira waningu.”

Munu Jesulu tjukurpa wangkara wiyaringkula tjanalalta tjapinu,

9 “Ka wati panya kaanaku walytjangku wanyu nyaalku tjananya ngapartji? Wiya, paluru pitjala wati panya tjuṭa iluntankuku munu kaana kiripitjitjara panya ungkuku anangu kutjupa tjuṭa.

10 Nyura ninti tjukurpa panyaku, panya iriti nyiringka walkatjunktjuntja alatji ngaranyi,

‘Wali palyalpai tjuṭangkuya wali puli tjuṭanguru palyaningi, munuya puli kutju nyakula waningu kura-palku kulira.

Palu nguntiya waningu, panya puli nyara paluru kura wiya, wiru mulapa wali kunpu kanyilpai.

11 Panya Mayatja Godalu puli pala palunya ngurkantanu puli kutjupa tjuṭa wiya,

kala paluru ngurkantankuntjijtja pukularira wirunmananyi.’ ” *

12 Kaya Jewku mayatja tjuṭangku tjukurpa nyangatja wangkanyangka kulira miilarara wangkangu, “Nyangangku wali palyalpai tjuṭa nganananya wangkanyi.” Munuya palunya witintjikitjangku kulinigi. Palu nguluringangiya anangu winki ngaranyangka nyakula munuya palunya witalwiyangku wantira anu.

Rome-aku Mayatja Mani Tjarara Ungkuntjaku, Munta Wiya?

(Matthew-ku 22:15-22; Luke-aku 20:20-26)

13 Kaya Paratji tjuṭa Irataku tjuṭutja tjuṭangka tjuṭuringu munuya wangkara tamalmara witura iyanu wati mankurpa ankula Jesula ngunti tjapintjaku. Panya tjana mukuringangi Jesulu wangkanyangka kulira kuranmankuntjikitja.

14 Kaya wirkara palula wangkangi, “Nintilpai, nganana ninti nyuntumpa, panya nyuntu wati tjukaruru palyanyku nyinapai. Munu nyuntu anangu uwankara tjuṭura nyakupai munu tjanala uwankarangka tjukarurungku wangkapai tjukurpa panya palunya anangu kutjupa tjuṭaku nguluringkula kampa kutjuparinytja wiyangku. Munu nyuntu Godaku iwara tjukarurungku wangkara nintilpai kutitjunktjuntja wiyangku. Kalanya wanyu tjakultjura, palyala wati panya Tjiitjanya mayatja pulka Rome-ala nyinapainya mani tjarara ungkuku, munta wiya?”

15 Palu Jesulu nitingku kulinigi tjana ngunti arkara tjapinnyangka munu tjanala wangkangu, “Nyaakuni nyura ngunti arkani ngayunya kuranmankuntjikitjangku? Mani pala tjiilpaniya uwa nyakuntjaku.”

16 Kaya mulapatu ungu tjiilpa kutju. Ka wangkangu tjanala, “Ny-awaya, nganaku yunpa nyangatja ngaranyi munu nganaku ini kulun ngaranyi?”

* 12:11 Psalm 118:22-23

Kaya wangkangu, “Mayatja pulka panya Tjiitjanya.”

¹⁷ Ka Jesulu wangkangu tjanala, “Uwa mulapa mani nyangatja panya mayatja Tjiitjaku, kaya palunya palya ungama paluru wangkanyangka, palu Godalu wangkanyangkampaya Godanya alatjitu ungama.” Kaya nyangatja kulira nguwanakuringu, “Ai, nyangangu mun kara alatjitu wangkapai.”

Tjukurpa Panya Ilura Pakantjanya Tjana Tjapintja
(Matthew-ku 22:23-33; Luke-aku 20:27-40)

¹⁸⁻¹⁹ Ka ngula wati Tjatjutji mankurpa pitjangu Jesulakutu, panya tjanaya anangu tjuta ilunytjatjanu pakantjitjaku mulamularingkupai wiya. Munuya wati nyanga mankurtu Jesula ngunti arkara tjaminu alatji, “Nintilpai, panya Moselu tjukurpa nyangatja nganampa iriti walkatjunu alatji, ‘Tjinguru wati kuta kuritjara iluku tjitji wiyatu, ka minyama panya palumpa kuri wanka nyinanyangka wati panya miriku malanytju uti altima minyama panya palunya. Palu malanytju paluru tjinguru tjitji katja utintjatjanungku uti kulinma, ‘Nyangatja ngayuku wiya, ngayuku kutaku tjitji, panya ngayulu palumpa kuringka utinu.’”
’ Alatji Moselu walkatjunu.

²⁰ “Palu tjukurpa nyangatja wanyu kulila. Panya wati 7 kutarara kutarara nyinangi. Ka kuta nganmanyitjangku kungkawara altingu, munu paluru tjitji utilwiyatu ilungu.

²¹ Ka malanytju ngapartji minyama panya palunyatu altingu munu tjitji wiyatu ilungu, ka palu purunypatu wati malanyta kutjupangu ngapartji altira paluru kulu tjitji wiyatu ilungu.

²² Kaya palu purunypatu malanyta panya malatja tjutangu minyama panya palunyatu altira kanyira tjitji wiyatu ilungu uwankaratu wanapari wanapari. Ka ngula minyama panya paluru tjanampa panya kurilta ilungu.

²³ “Kalanya wanyu tjakultjura ngula ilunytjatjanu wankaringkula pakantjatjanu minyama panya paluru nganaku kuri nyinaku? Panya wati 7-tu palunya altingu.”

²⁴ Ka Jesulu wangkangu tjanala, “Wiya, nyura ngunti kulilpai tjuta. Nyura Godaku tjukurku ngurpa palumpa witulyaku kulu ngurpa alatjitu.

²⁵ Panya miri tjuta ilunytjatjanu wankaringkula pakara kuri altinyta wiya nyinaku, panya angelpa tjuta kuri wiya nyinanyi, palu purunypa.

²⁶ Ka nyura uti mulamularingama ilunytjatjanu pakantjitjaku. Wanyu tjukurpa panyatja kulila panya Moseku tjukurta ngaranyi, panya Godalu punu kampanytjalanguru Mosela wangkangu alatji,

‘Ngayuluna Aipuramaku, Isaacaku, Jacobaku God nyinanyi, kaniya paluru tjana ngayunya walkuni.’ *

²⁷ Ala palatja. Aipuramanya, Isaacanya, Jacobanya tjana panya nganmanypa ilungu, ka nyangatja nyaaku Godalu ilunyangka malangka wangkangi tjana palunya walkuntja? Wiya, paluru tjana panya ilunytjatjanu wankaringku munuya kuwari nyanga ilkaringka wanka nyinara Godanya walkuni. Ka nyura ilunytjatjanu wankaringkula pakantjitja wianmananyi ngurpangu.”

* 12:26 Exodus 3:6

Tjukurpa Nyaa Pulka Mulapa Godalu Wangkanytja

(*Matthew-ku 22:34-40; Luke-aku 10:25-28*)

²⁸ Ka Jesulu tjananku ngarala ngaparku wangkanyangka wati kutju pitjala tjanala junguringu, Moseku tjukurpa nintilpai. Munu paluru kuliningi Jesulu tjanala wirura wangkanyangka munu paluru tjapinu palula alatji, "Tjukurpa nyaa wanyu pulka mulapa ngaranyi uwankarangka waintarinytja Godalu panya wangkanytja?"

²⁹ Ka Jesulu wangkangu, "Tjukurpa pulka mulapa alatji ngaranyi, 'Kulilaya Israelkunu tjuta, nganampa Mayatja Godanya kutju alatjitu nyinanyi, ka god kutjupa nyinanytja wiya alatjitu.

³⁰ Ka nyura uti Mayatja Godaku pulkara mukuringama kurunpa winki, munu palunya kutju pukulmankunyitjikitjangku kulira titutjarangku wiru palyanma.' *

³¹ Ka palu purunypa tjukurpa pulka kutjupa ngaranyi alatji, 'Anangu kutjupa tjutaku pulkara mukuringama nyuntunku mukuringkunyitja purunypa.' *

Uwa, tjukurpa Godalu wangkanytja uwankara pulka ngaranyi, palu tjukurpa nyanga pula kutju pulka mulapa ngaranyi tjukurpa kutjupa tjutangka waintara."

³² Ka wati panya Moseku tjukurpa nintilpaingku wangkangu Jesula, "Nintilpai, tjukarurungku wiru mulapa wangkanyi, panya mulapa Godanya kutju nganampa mayatja nyinanyi, ka god kutjupa tjuta ngaranytja wiya alatjitu.

³³ Kala uti palumpa pulkara mukuringama kurunpa winki. Munula uti palu purunypatu anangu kutjupa tjutaku pulkara mukuringama panya ngananku mukuringkupai, palu purunypa. Panya tjukurpa nyanga pula Godalu wangkanytja kutjara pulka mulapa ngaranyi tjukurpa kutjupa tjutangka waintara. Ka panya tjukurpa kutjupa ngaranyi nganana kuka katira pungkula tiliwakara Godanya ungunytjaku paluru nyakula nganampa kalyparingkunyitjaku. Palu tjukurpa nyara paluru tjukutjuku nguwanpa panya tjukurpa Godaku mukuringkunyititja munu anangu tjutaku kulu mukuringkunyititja pulka kutjara tjukurpa panya kuka ungunytjitjangka mun kara."

³⁴ Ka alatji wangkanyangka Jesulu kulinu, "Wati nyanga paluru nintingku tjukarurungku wangkanyi." Munu wangkangu palula, "Nyuntun nguwanpa Godaku walytjaringanyi paluru nyuntunya mayatjangku kanyintjaku." Kaya palula malangka piruku Jesunya tjapintja wiyangku wantingi.

Davidanya Pula Christanya

(*Matthew-ku 22:41-46; Luke-aku 20:41-44*)

³⁵ Munu kutjupa-ara Jesulu timpulaku yaatangka anangu tjutangka wangkara nintiningi munu tjanala tjapinu alatji, "Wati panya Moseku tjukurpa nintilpai tjutangka wangkapai alatji, 'Christanya Wankarunkupainya Godalu panya kalkuntjanya Davidaku walytjapiti malatja malatjanguru utiringkuku.' Palu nyangatjaya wanyu tjukarurungku wangkanyi? Wiya kulila.

³⁶ Panya Kurunpa Milmilitu Davidala iriti nintiningi, ka nyiringka wakatjunu alatji,

* **12:30** Deuteronomy 6:4-5 * **12:31** Leviticus 19:18

'Mayatja Godalu ngayuku Mayatjangka wangkangu,

"Ngayula itingka mayatjarira nyinakati kampa nyanga wakungka. Kana nyuntumpa mirpañtju tjuṭa tjarulku nyuntula wanganarangku kulintjaku,

kan tjananya nyuntu mayatjangku wituwitulku." ' *

³⁷ Nyangatja Davidalu Christanya mayatjanmanangi, ka Christanya yaaltji-yaaltji piruku palumpa pakali malatja nyinama? Wiya, paluru pakali kutju wiya palumpa mayatja kulu nyinanyi."

Kaya anangu panya tjuṭa mulatu palula pukultu kuliningi tjukurpa wiru wangkanyangka.

Jesulu Anangu Tjuṭa Ngulutjunkunyntja Moseku Tjukurpa Nintilpai Tjuṭangka-tawara

(*Matthew-ku 23:1-36; Luke-aku 20:45-47*)

³⁸ Ka paluru tjanala nintira alatji wangkangu, "Ngulu nyangamaya Moseku tjukurpa nintilpai tjuṭa. Nyara tjana panya mantara waratjara kanany-kanany para-ngarapai anangu tjuṭangku nyakula tjananya mirawaninytjaku mukuringkula.

³⁹ Munuya wali inmatjangka tjunguringkula tjiya wiru tjuṭa ngurkantankupai, anangu tjuṭangka kuranyu uti nyinakatinytjikitja mukuringkula. Munuya kutjupa-ara mai pulka ngalkuntjikitja tjunguringkula, palu purunypatu kuranyu nyinanytjikitja mukuringkupai, anangu tjuṭangku tjananya nyakula mirawaninytjaku.

⁴⁰ Munuya minyma wanakala tjuṭa wituwitulpai tjananya ngunti kalkuntjaku alatji wangkara, 'Nyuntu nganananya kalkunma ngula nyuntu iluyangka nyuntumpa wali nganamparinytjaku.' Munuya paluru tjana Godala tjapira tjukurpa wara mulapa wangkapai anangu tjuṭangku kulira tjananya mirawaninytjaku mukuringkula. Ka nyanga palula tjanalanguru Godalu tjananya pulkara pungkuku."

Wanakalangku Ungkunyntja

(*Luke-aku 21:1-4*)

⁴¹ Ka palulanguru Jesunya nyinakatingu munu nyangangi anangu tjuṭangku mani pitingka Godaku waninyangka. Kaya wati mani pulkatjara tjuṭangkuya pulka mulapa waningi.

⁴² Ka minyma wanakala ngaltutjara pitjangu, munu tjiilpa kulunypa kutjara waningu mani tjukutjuku mulapa.

⁴³ Ka Jesulu altingu palumpa nintintja tjuṭa munu wangkangu, "Kulilaya, ngayulu nyangangi kuwari tjuṭangku pulka waninyangka, palu wanakala nyanga ngaltutjarangku tjanala munkara nguwanpa waningu.

⁴⁴ Panya kutjupa tjuṭangkuya pulka kanyintjatjanungku tjarara tjara kutju waningi, ka paluru uwankara alatjitu waningu paluru kanyintjatjanungku, munu nyanga wiyalta nyinanyi. Tjukururungkuṅa nyurala wangkanyi, minyma nyanga wanakalangku pulka mulapa Godanya ungu mani pulkatjara tjuṭangka munkara."

13

Jesulu Timpula Pilukatinyntja Wangkanyntja

(*Matthew-ku 24:1-2; Luke-aku 21:5-6*)

*

12:36 Psalm 110:1

¹ Ka Jesunya timpulaku yaatanguru pakannyangka palumpa nintinja kutjungku palula wangkangu, “Nintilpai, nyawa! Timpula nyanga wiru mulapa ngaranyi puli pulkanguru palyantja.”

² Ka Jesulu wangkangu, “Nyura kuwari nyanganyi timpula wiru mulapa puli nyanga pulkanguru palyara tatintja. Palu ngula wali nyanga paluru pilukatira minya-minyaringkuku. Ka puli kutjupa malaringkula ngarawiya uwankara alatjitu punkara minya-minya ngarira wanalku.”

Jesulu Nganmanytju Wangkanytja Pika Munu Tjukurtjara Ngunti Tjuta

(*Matthew-ku 24:3-14; Luke-aku 21:7-19*)

³⁻⁴ Munuya Jerusalemnya wantikatira anu puli panya Alipatjaralakutu munuya puli katu tatira nyinakatira walunyangangi timpula panya palunya. Ka Peterlu Jamesalu, Johntu, Andrew-lu tjana palula kampangkatu tjapinu, “Wanyulanya tjakultjura! Yaalara nyanga alatjiriku panya nyuntu kuwari timpula pilukatinytja wangkangi? Ka nyaa nganmanypa utiringkuku nganana nganmanytju nyakula kulintjaku?”

⁵ Ka Jesulu wangkangu tjanala, “Ngulu nyangamaya kutjupangku nyuranya wangkara ngunti kurantjaku-tawara.

⁶ Panya anangu tjuta pitjaku ngayulu iyantja-palku wangkara munuya ngunti wangkaku, ‘Ngayuluna panya paluru, Jesunya Christanya.’ Kaya anangu winki mulapa ngunti kurannyangka tjanampa kulira mulamularingkuku.

⁷ “Ka nyura tjinguru kulilku anangu tjutangku tjananku pikangku pungknyangka ilatjangku munu pararitja tjutangku kulu. Palu pika nyanga palunya tjananya kuliraya nguluringkuwiya nyinama, panya nyanga paluru tjana utiringkunyjtaku ngaranyi, palu tjintu malatja kuwaripatu ngaranyi ilaringkunyjtja wiya.

⁸ Panya ngura kutjupa kutjupangka tjaultji tjutangku pikangku pungkuku nguraku mayatja tjutangku wituwitunnyangka. Ka ngura kutjupangka kutjupangka manta uriku, ka ngura kutjupa tjutangka ailuru pulka ngaraku. Panya pika kura nyanga paluru tjana nganmanypa utiringkunyjtaku ngaranyi, ka nyura uti purkarangku kulinma, ‘Munta-uwa, nyanga palula tjanala malangka kunyu panyatja pika kura pulka mulapa utiringkuku tjintu malatja wirkankunyjtja kuwaripangka.’

⁹ “Kayanku ngulu nyangama, panya nyuranyaya witira kuutpangka ngaratjunkuku ngayuku mulamularingkunyangka, munuya nyuranya wali panya inmatjangka unngu wiipangka pulkara alkalku ngayuku tjukurpa wangkanyangka. Uwa, nyura ngayula wanganarangku kulinnyangkaya mayatja pulka tjutangku nyuranya palula tjanala kuranyu ngaratjunkuku, ka nyura Tjukurpa Palya ngayunyatjara tjanala tjakultjunkuku.

¹⁰ Palu tjintu malatja wirkankunyjtja kuwaripangka ngayuku walytja tjutangku uti Tjukurpa Palya ngayunyatjara anangu uwankarangka tjakultjunama manta winkinga.

¹¹ Ka nyuranya witira kuutpakutu katinyangka kulira nguluringkunyjtja wiya rapa ngarama. Tjinguru nyura kuutpangka wangkanytjikitjangku putu kulilku, “Tjukurpa nyaanatju

wangkaku?’ Palu alatji pulkara kulilwiyangku wantima, panya kuitpangka wirkankunyangka nyuranya Kurunpa Milmiltu nintilku wangkanytjaku. Ka nyura paluru nintinnyangka kutju wangkaku tjukurpa palumpa.

12-13 “Uwa, anangu winki nyurampa kuraringkuku nyura ngayuku walytja nyinanyangka. Panya kutangku palumpa malanya ngayuku mulamularingkunyangka ma-ungkuku mayatja kura tjutangku palunya iluntankunytjaku. Ka mamangku palu purunypatu palyalku palumpa tjtji tjuta. Ka tjtjingu tjinguru palu purunypatu mama ngunytju ngayuku walytja nyinanyangka, wati mirpantju tjutangka nintilku pulanya iluntankunytjaku. Palu nyura ilunytjakutu-wangkara ngayunya tungun-tunguntu titutjarangku wanannyangkampa, Godalu nyuranya wankaru kanyilku palula tjungu titutjara nyinanytjaku.

14 “Ka ngula nyura nyakuku kutjupa kutjupa kura pulka mulapa ngura milmilta ngunti ngaranyangka panya uwankara wiyalpainya.” (Tjukurpa nyanga palunyaya purkarangku kulinma nintiringkunytjik-itjangku.) “Munu palulanguru kutjupa kutjupa kura panya paluru utiringkunyangka nyakula nyura uti Judeala nyinanytjatjanu ngulu wirtjapakanma pulikutu.

15 Tjinguru nyara palula ara anangu kutjupa wali katu nyinanyi, munu uti paluru ukalingkula wali unngu kutjupa kutjupa tjuta mantjintjikitja, tjarpanytja wiyangku wantira mapalku pulikutu wirtjapakanma wankakitja.

16 Munta tjinguru kutjupa urilta kaanangka warkarinyi munu uti paluru mantara mantjintjikitja walikutu malaku ankuwiyangku wantima.

17 Ka nyara palula ara panya kura pulka mulapa ngaraku minyma ititjara tjutaku munu iti tjukutjukutjara tjutaku kulu. Ngaltutjara! Panya tjana tjinguru wirtjapakara ngururpau pakuringkula wiyaringkuku.

18 Kaya Godala tjapinma kura nyanganpa nyinngangka utiringkunytjaku-tawara, panya nyinngangka manarpa ngarira wiyaringkupai.

19 Uwa, kura nyanganpa utiringkuku pulka mulapa panya nganmanytju nyakunytja wiyatja alatjitu, ka kura nyanga palu purunypa malangka piruku utiringkunytja wiyalta ngaraku.

20 Ka kura nyanganpa tjinguru rawa ngaranyangkampa anangu uwankara ilura wiyaringama. Palu Godalu tjintu nyaranpa mutulku, anangu panya paluru ngurkantankunytja tjuta ilunytjaku-tawara, pika paluru rawa ngaranyangka.

21 “Ka tjinguru kutjupangku nyurala wangkaku, ‘Ai nyangatja pitjangu Christanya, Godalu panya kalkuntjtija.’ Ka kutjupangku wangkaku, ‘Wiya, nyaratja Christanya, Godalu panya kalkuntjtija mulapa.’ Kaya alatji wangkanyangka kulira wantima alatjitu mulamularingkuwiyangku.

22 Panya nyara palula ara anangu ngunti wangkapai tjuta Christanya purunypa pakalku, wangkatjara ngunti tjuta kulukulu, munuya paluru tjana anangu Godalu ngurkantankunytja tjuta arkara ngunti

kurantjikitjangku, kutjupa kutjupa pulka tjuṭa witulyangku palyalku, tjana nyakula mulamularingkunyjtaku, palu puṭuya tjananya kuralku.

²³ Ka nyuranku ngulu nyangama. Nyanga kuwarina nyurala nganmanytju tjakultjunanyi nyura kulintjatjanungku ngulu nyakunytjaku.

²⁴ “Ka kura nyara paluru tjana ngarala wiyaringkunyangka tjintu maruringkuku munu kinara kulu irnyalwiya ngaraku.

²⁵ Ka kililpi tjuṭa mantakutu punkalku, ka ilkaritja kutjupa kutjupa uwankara pulkara urira kampa kutjuparira ngunti-ngunti ngaraku.

²⁶ Ka nyara palula arangka anangu tjuṭangku ngayunya nyakuku Watiku Katjanya ngangkalangka witulya pitalytji pulka pitjanyangka.

²⁷ Ka ngayulu angelpa tjuṭa iyalku manta winkikutu Godaku walytja tjuṭa utulunkunyjtaku ngura manta winkitja.”

Jesulu Pununguru Wangkanytja

(Matthew-ku 24:32-35; Luke-aku 21:29-33)

²⁸ Munu Jesulu piruku wangkangi tjanala punu kiripitjinguru alatji, “Punu kiripitji nyalpi punkannyangka nyura kulilpai alatji, ‘Munta-uwa, kuwari wariringanyi.’ Ka nyalpi kuwaritja pakannyangka nyura nyakula kulilpai, ‘Munta-uwa, kuwari kuliringanyi.’

²⁹ Ka nyanga palu purunypatu pika panya paluru tjana utiringkunyangka nyura nyakula kulinma alatji, ‘Munta-uwa tjinguru tjintu malatja watalpi ilaringu.’

³⁰ Tjukururungkuna nyurala wangkanyi, panya nyanganpa uwankara utiringkuku anangu nyanga kuwari nyinanytja tjuṭa wanka nyinanyangkatu.

³¹ Panya ngula manta ilkari uwankara wiyaringkuku, palu tjukurpa ngayulu wangkanytja titutjara alatjitu ngaraku wiyaringkunytja wiya.

Jesulu Kulil-kulilpa Patantjaku Wangkanytja

(Matthew-ku 24:36-44)

³² “Palu uwankaraya tjintu nyara palumpa ngurpa. Angelpa ilkaritja tjuṭa ngurpa munu ngayulu Katjanya kulu ngurpa, palu Mamanya kutju ninti.

³³ Ka nyuranku uti ngulu nyangama munuya titutjarangku kulil-kulilpa patanma, panya nyura ngurpa tjintu nyara ngayulu pitjanytjtjaku.

³⁴ Panya ngayulu pitjanytja ara nyaa purunypa, panya tjinguru wati mayatjangku ngura kutjupakutu ankunytjikitjangku kulini munu palumpa warkaripai tjuṭa warka kutju kutju ungkukatinyi munu wati kutju wali tjaangka ngaratjunkula wantinyi titutjarangku ngarala ala-alangku nyakunytjaku.

³⁵ Kana palu purunytju nyurala wangkanyi ala-alangku patara nyakunytjaku panya nyura ngurpa tjintu panya ngayulu pitjanytjtjaku. Tjinguruna pitjaku tjintu tjarpanyangka, tjinguruna munga kultungka pitjaku, tjinguruna tjintukutu pitjaku. Ngayulu ngurpa.

³⁶ Titutjarangkuya nyangama ala-alangku kunkunta wirkankunytjaku-tawara.

³⁷ Uwa, ngayulu nyurala munu ngayuku walytja uwankarangka kulu wangkanyi, ‘Ala-alangkuya nyangama.’ ” Alatji Jesulu wangkara utiningi palumpa nintintja tjuṭangku kulintjaku.

14

Jesunyaya Iluntankunytjikitjangku Kulintja

(Matthew-ku 26:1-5; Luke-aku 22:1-2; Johnku 11:45-53)

¹ Ka inma panya Katuwanu Ankunytjanya watalpi ilaringu tjinu kutjaranguru ngaranytjaku, panya mai pilytja ngalkula ara panya irititja kulintjikitjangku.* Kaya tjukurtjara kuranyitja tjutangku munu Moseku tjukurpa nintilpai tjutangku kulu wangkara kuliningi kampangkatu Jesunya witera iluntankunytjikitjangku. Palu putuya kuliningi, "Yaaltjingarala witolku?"

² Munuya wangkangi, "Munta wanyula patala, ka inma nyan-gatja wiyariwa. Panya anangu winki mulapaya inmaku pitjangu munuya tjinguru nganampa mirpanarira pikaringkuku nganana Je-sunya tjanala mirangka witinnyangka."

Minymangku Jesunya nyitintja Ngura Piitjanila

(Matthew-ku 26:6-13; Johnku 12:1-8)

³ Ka Jesunya nyinangi ngura Piitjanila wati ini Simonku walingka. Wati nyara paluru panya nganmanypa nyinangi miri pika pulkatjara. Ka Jesunya wati nyara palumpa ngurangka nyinanyangka minyma kutjupa pitjangu patala uwila panji wirutjara mani pulkangka payamilantja. Munu minyma paluru patala panya alara uwila panya palunya Jesula katangka tjutinu.

⁴ Kaya anangu kutjupa tjutangku wali pala palula nyinanyt-jatjanungku nyangu paluru alatjinkunyangka munuyanku mirpan-mirpanu wangkara waningi, "Unytjungku alatjitu nyangangu mani pulkatja wiyanu.

⁵ Uti palangku tjalamilanma munu mani mantjira ngaltutjara tjuta ungama. Panya anangu kutjupangku uwila nyanga palunya payami-lantjikitjangku mani pulka mulapa untkuku." Alatjiya wangkangi munuya minyma panya palunya pulkara wangkara painingi.

⁶ Ka Jesulu wangkangu, "Wantiya. Nyaaku nyura minyma nyangatja kuranmananyi? Nyanga paluru wiru mulapa palyanu ngayuku.

⁷⁻⁸ Ka ngaltutjara tjuta panya titutjara nyinanyi nyura tjananya untkunytjaku. Palu ngayulu nyurala titutjara nyinanytja wiya. Ka minyma nyanga paluru ngayula tjukarurungku wiru panipai tjutinu nganmanytju ngula panya kurulta ngarinytjaku.*

⁹ Kana nyangatja nyurala tjukarurungku wangkanyi, ngula anangu tjutangku ngura winkingka anangu tjutangka Tjukurpa Palya ngayun-yatjara tjakultjungkuku, munuya tjukurpa palunya wangkara minyma nyanga palunyatjara kulu wangkaku, kaya manta winkitjangku kulilku."

Judasalu Kulintja Jesunya Palumpa Mirpantju Tjutangka Nintintjik-itjangku

(Matthew-ku 26:14-16; Luke-aku 22:3-6)

* **14:1** Panya iritija Israelkunu tjutangku Itjipanya warpungkula wantikatira ankunytjik-itjangku mai pilytja palyanu, panya taimi wiya mai talu palyantjaku. Kaya ara nyanga palunya kulintjikitjangku yiya kutjupa yiya kutjupa inma palyalpai munuya mai pilytja palyara ngalkupai. * **14:7-8** Jew tjutangkuya tjakangku anangu ilunyangka malangka uwila wiru panipai puntungka tjutilpai wiruringkula ngarinytjaku. Ka Jesulu palurunku ilunytjikitjangku kulira nyangatja nganmanytju wangkangi.

¹⁰ Ka nintintja kutju Judas Kariyatanya anu tjukurtjara kuranyitja tjuṭakutu munu tjanala wangkangi, “Ngayulu Jesunya nyurala witintjaku nintilku.”

¹¹ Kaya pukularingu paluru wangkanyangka kulira munuya palunya maniku kalkunu. Ka palulanguru Judasanya anu munu kulinigi, “Yaaltjingarana nintilku?” Munu paluru rawangku nyakukatingi Jesunya tjanala nintintjikitjangku.

*Jesulu Tjana Mai Katuwanu Ankunytjanya Ngalkunytja
(Matthew-ku 26:17-25; Luke-aku 22:7-14,21-23; Johnku 13:21-30)*

¹² Ka tjintu panya paluru wirkanu inma panya Katuwanu Ankunytjanya palyara kuka lamalama pungkula paura ngalkuntjaku. Ka palumpa nintintja tjuṭangku Jesula tjapinu, “Yaaltjingkala nyuntumpa mai kuka nganmanytju palyalku ngalkula ara panya Katuwanu Ankunytjanya kulintjaku?”

¹³ Ka Jesulu nintintja kutjara iyanu wangkara, “Ankula pula tawununga wirkara nyawa watingku piti minatjara tjalira katinyangka, munu pula palunya wanala.

¹⁴ Munu paluru walingka tjarpanyangka nyupali wanara tjarpa, munu pula wati waliku walytjangka wangka alatji, ‘Nintilpainya mukuringanyi nyuntu ngalila nintintjaku ruuma yaaltjingkala mai panya Katuwanu Ankunytjanya ngalkuku.’

¹⁵ Ka wati nyara paluru nyupalila nintilku ruuma katutja taipula kutjupa kutjupa tjuṭatjara nganampa palyara wantinytjatjanungku. Ka pula nyara palula nganampa mai nganmanytju palyala.”

¹⁶ Ka pula kulintjatjanu anu munu pula walingka wirkara nyangu panya Jesulu wangkanytjanya alatjiṭu. Munu pula mai kuka uwankara nganmanytju palyanu ara panya Katuwanu Ankunytjanya ngalkula kulintjikitjangku.

¹⁷ Ka mungartjirinyangka Jesunya tjana pitjangu nintintja panya 12 kulu wali panya palulakutu munuya tatira ruumangka tjarpangu.

¹⁸ Munuya taipulangka antangku para-ngarira arintara ngalkuningi. Ka Jesulu wangkangu, “Tjukarurungkuna nyurala wangkanyi panya nyuralanguru kutjungku ngayunya tjanala nintilku ngayuku mirpantju tjuṭangka. Wati nyanga paluru kuwari ngayula tjungungku ngalkuni.”

¹⁹ Kaya nintintja tjuṭangku kulira tjituru-tjitururingu, munuya kutjungku kutjungku Jesula tjapiningi alatji wangkara, “Nyaa, ngayunya nin wangkanyi?”

²⁰ Ka Jesulu wangkangu, “Nyura ngayuku nintintja 12 nyanga anta-ngarinyi munuya ngayula tjungungku mai pitingka nyanga tjalatjura ngalkuni, palu nyuralanguru wati kutjungku ngayunya tjanala nintilku ngayuku mirpantju tjuṭangka.

²¹ Uwa, mulapa ngayulu Watiku Katjanya iluku panya alatjirinytjaku nyiringka iriti walkatjunu. Palu ngaltutjara, wati panya ngayunya tjanala nintintjitjanya, panya palumpa pika pulka mulapa utiringkuku. Wanyunti wati paluru iti wirkankunytja wiya ngarama.” Alatji Jesulu wangkangu.

²² Ka tjana ngalkunyangka Jesulu mai pilytja mantjinu munu pukularira Godanya walkura wangkangu, “Wirungkulanyan mai

nyangatja ungu.” Munu katantara palumpa nintintja tjuṭa ungu wankara, “Mantjiraya ngalkula. Nyangatja ngayulu puntu.”

²³ Munu palulanguru walpayata wainatjara mantjinu munu pukularira Godanya walkura wangkangu, “Wirungkulanyan waina nyangatja ungu.” Munu tjananya ungu, kaya kutju-kutjungku uwankarangku tjikiningi paluru kulu.

²⁴ Ka Jesulu wangkangu, “Nyangatja ngayulu milkali anangu tjuṭaku tjutinytja, panya nyanga paluru nintini kalkuntja kuwaritja Godalu anangu tjuṭaku palyantja.

²⁵ Kana nyurala tjakarurungku wangkanyi, panya ngayulu waina piruku tjikintja wiya mantangka nyanga nyinara, palu ngula kutjuna tjikilku waina kuwaritja, Mama Godalu mayatjangku palumpa walytja uwankara tjungura kanyinnyangka.” Alatji Jesulu tjanala wangkangi.

²⁶ Munuya palulanguru ngalkula tjikintjatjanungku inma kutju inkara wiyaringkula ma-pakara anu apu panya Alipatjaralakutu.

Jesulu Peternya Ngurparingkunyjtaku Wangkanytja
(Matthew-ku 26:31-35; Luke-aku 22:31-34; Johnku 13:36-38)

²⁷ Munuya apu Alipatjarala wirkanu, ka Jesulu wangkangu tjanala, “Nyura uwankara ngayulanguru ankula wiyaringkuku, panya nyiringka iriti walkatjunkunyjtja ngaranyi alatji, ‘Ngayuluna tjiipi tjuṭaku tjapata pungkula iluntankuku, kaya tjiipi tjuṭa ankula wiyaringkuku.’” *

²⁸ Palu ngayulu ilunyjtjanu wankaringkula pakara nyurala kuranyu ankuku Galileelakutu.”

²⁹ Ka Peterlu wangkangu, “Wiya, tjanantiya nyuntunya wantikatiku, palu ngayulu nyuntunya wantikatinytja wiya alatjitu.”

³⁰ Ka Jesulu wangkangu Peterla, “Wiya, tjakarurungkuna nyuntunya wangkanyi, panya munga nyanga kuwari tjinṭu pakantja kuwaripangka nyuntu ngayuku mankurara ngurparingkuku, munun palulanguru kulilku tjuki kutjara-ara wangkanyangka.”

³¹ Ka Peterlu pulkara alatjitu tungun-tunguntu wangkangi, “Wiya, ngayulu nyuntumpa ngurparingkunyjtja wiya. Tjinguruli nyuntu ngalitu iluku. Palatja palya.” Kaya nintintja panya kutjupa tjuṭangku tjukurpa palu purunypatu wangkangu.

Jesulu Godala Tjapintja Ngura Katjimanila
(Matthew-ku 26:36-46; Luke-aku 22:39-46)

³² Munuya apu Alipatjarala tatira ngura ini Katjimanila wirkanu, ka Jesulu wangkangu palumpa nintintja tjuṭangka, “Nyangangkaya nyinama patara kana nyarangka tjukutjuku ankula Godala tjapila.”

³³ Munu paluru katingu wati mankurpa Peternya Jamesanya Johnnga. Munu nyara palulalta paluru pulkara tjituru-tjitururira tjuni tjulypilyaringu.

³⁴ Munu wangkangu tjanala, “Tjunina tjulypilyaringu mununi kurunpa paku pulkaringkula nguwanpa ilunyi. Kaya wanyu nyangangka nyinara wankangku nyangama kunkunpa wiyangku, kana Mamala tjapila.”

³⁵⁻³⁶ Munu paluru patupatu nguwanpa ilatu ankula mantangka watungarakatira Godala tjapiningi tjituru-tjituru pulkangku alatji

* 14:27 Tjakarayaku 13:7

wangkara, “Uwa Mama, nyuntu panya kutjupa kutjupa uwankara palyalpai nyinanyi. Wanyu tjananya ngayuku mirpantju panya tjuṭa markula ngayunya pungkunyjtaku-tawara. Palu wiya, nyuntu mukuringkula palya wantiriyala ngayunya pungkunyjtaku, kana palula tjanalanguru kumpintja wiya, panya ngayulu mukuringanyi nyuntu mukuringkunyjtija kutju palyantjikitja.”

³⁷ Munu tjapira wiyaringkula malaku pitjala nyangu nintintja panya mankurpa kunkunpa ngarinyangka munu wangkangu Simon Peterla, “Simon, kunkunpan ngarinyi? Puṭun wankangu nyanganyi rawa nguwantu?”

³⁸ Munu tjananya piruku wangkangu, “Wankangkuya nyangama munuya Mamala tjapinma nyuranya anga-kanyintjaku mamungku nyuranya kurantjaku-tawara, panya nyura pulkara mukuringanyi wanka nyinanytjikitja, palu kuru nyura pilu-pilu ngaranyi.”

³⁹ Munu tjanala wangkanytjatjanu piruku malaku anu munu Godala piruku tjapiningi tjukurpa panya palu purunypatu wankara.

⁴⁰ Munu tjapira wiyaringkula malaku pitjangu panya tjanalakutu munu tjananya nyangu piruku kunkunpa ngarinyangka panya kuruya pilu-pilu mulapa ngarangi. Munuya paluru pitjanyangka wankaringkula nyakula kunṭaringu palula wangkanyjtaku.

⁴¹⁻⁴² Ka piruku anu arakutu panya, munu tjapira wiyaringkula malaku pitjangu munu wangkangu tjanala, “Kunkunpatu nyura ngarinyi? Alatjitu nyura kunkunarira pakuwiyaringu. Nyawal-taya pakara. Pala wirkakatinguya ngayuku panya mirpantju tjuṭa, ngayunya tjanala nintintjikitjangku Watiku panya Katjanya. Walaya pakala kala ara. Wati panya paluru pitjangu ngayunya nintintjikitja wati kura tjuṭangku witintjaku.”

Jesunya Witintja

(Matthew-ku 26:47-56; Luke-aku 22:47-53; Johnku 18:3-12)

⁴³ Ka Jesunya kuwaripatu tjanala ngarala wangkanyangka Judasanya palumpa panya nintintja wirkanu wati tjuṭatjara, munuya paluru tjana tjuṭa waratjara tjutinyatjara kulukulu pitjangu, panya tjukurtjara kuranyitja tjuṭangku munu Moseku tjukurpa nintilpai tjuṭangku, tjilpi kutjupa tjuṭangku kulu tjananya witura iyanu Jesunya witintjaku.

⁴⁴ Ka wati panya palula tjanala Judasalu nganmanytju wangkangu tjana ngalya-pitjanytja kuwaripangka alatji, “Ngayulunawi mitamita kutjara nyunytjula wati palunya, kaya nyunytjunnyangka nyakulampa witalta munuya katira uwa mayatja tjuṭa.”

⁴⁵ Munu palulanguru Judasanya Jesula tjanala wirkara palulakutu pitjangu munu wangkangu, “Awa, Nintilpai.” Munu palula ilaringkula palunya nguku kutjara nyunytjunu.

⁴⁶ Kaya wati panya paluru tjana nyunytjunnyangka nyakula Jesunya mapalku witura wayaruruṇu.

⁴⁷ Ka kutjupangku ila ngaranytjatjanungku Jesunya ngalkintjikitjangku tjuṭa wara ilanṇu munu wati tjukurtjara pulkaku warkaripai pungkula pina kaṭaṇu, ka punkaṇu mantangka. ⁴⁸ Ka Jesulu tjanala wangkangu alatji, “Nyaaku nyura pitjangu tjuṭatjara tjutinyatjara ngayunya wati pikati-palku kulira witintjikitja?”

⁴⁹ Rawa panya nyurala tjungu nyinangi timpulangka, kani nyura nyakula wantingi. Palu tjukurpa panyatjalta nyangatja utiringu, panya nyiringka iriti walkatjungkunyta ngaranya ngayunya witintjaku ka nyanga kuwari utiringu.”

⁵⁰ Kaya palulangurulta nintintja tjuťangu palunya wantikatira ngulu wirtjapakanu.

⁵¹⁻⁵² Palu wati kutjupangu mantara pirantjarangu palunya itiwangku wanarinangi. Kaya palunya kulu witintjikitjangku mantara kutju witiñu, ka araltjara wantikatira nikitit alatjitu ngulu wirtjapakanu.

Jesunya Jewku Mayatja Tjuťangka Kuranyu Ngaranytja
(Matthew-ku 26:57-68; Luke-aku 22:54-55,63-71; Johnku 18:13-14,19-24)

⁵³ Munuya Jesunya witiñu ma-katingu tjukurtjara pulkaku walikutu. Kaya tjukurtjara kuranyitja tjuťa, Moseku tjukurpa nintilpai tjuťa munu tjiłpi kutjupa tjuťa kulukulu wali nyara palula unngu tjunguringu.

⁵⁴ Ka Peterlu Jesunya tjananya malawanungku kumpira wananingi palula tjanala ilaringkunyta wiyangu munu wali panya palula wirkara ma-tjarpangu yaatangka munu wati timpula anga-kanyilpai tjuťangka tjunguringkula ngarala waru nganytjiningi.

⁵⁵⁻⁵⁶ Kaya tjukurtjara kuranyitja tjuťa munu tjiłpi kantjulpa uwankara tjunguringkula wali unngu nyinara wangkangi munuya anangu tjuťa ngurira altira tjanala tjapiningi, “Wanyulanya tjakultjura Jesulu panya nganmanytju wangkanytja tjuťa, kala kulira palunya ngurkantara.” Alatji tjana tjapiningi panya tjana mukuringangi anangu tjuťangu Jesulu kura palyantja ngunti wangkanytjaku tjanala kulira palunya iluntankunyitjikitja. Kaya anangu tjuťangu kantjulpa tjuťangu altinyangka pitjala tjukurpa Jesunyatjara wangkangi, palu ngunti-nguntiya wangkangi, ka tjukurpa tjana wangkanytja tjungu mulapa ngaranytja wiya kutjupa kutjupa ngarangi. Kaya puťu nguriningi anangu kutjarangu pitjala tjukurpa kutju wangkanytjaku.

⁵⁷ Ka palulanguru wati mankurtu pakara ngunti wangkangi Jesunya kurantjikitjangku.

⁵⁸ Alatjiya wangkangi, “Nganana kulinu wati nyanga paluru mungatu wangkanyangka alatji, ‘Ngayulu timpula nyanga pulkanya wati tjuťangu palyantjitja piluntankuku, mununa ngayulu tjiñtu mankurarira palyalku timpula kutjupa watingku palyantjitja wiya.’ Alatji wangkanyangkala kulininingi.”

⁵⁹ Palu palumpa tjanampa tjukurpa kulu tjungu palu purunypa ngaranytja wiya.

⁶⁰ Ka wati panya tjukurtjara pulka pakanu munu anangu tjuťangka kuranyunguru tjapinu Jesula, “Nyuntun kulini? Wati nyanga tjuťangkuntaya wangkanyi kulintjatjanungku. Mulapa nyangantu nyuntunya tjukarurungku wangkanyi? Wanyulanya tjakultjura.”

⁶¹ Palu Jesunya wangkawiya alatjitu ngarangi. Ka wati panya tjukurtjara pulkangu piruku wangkangu, “Mulapan wanyu Christanya panya Godalu kalkuntjanya nganampa Wankarunkupainya panya Mayatja Godaku katja?”

⁶² Ka wangkangu, “Uwana. Ka panya nyura ngula uwankarangku ngayunya nyakuku, Watiku Katjanya Godala witulya pulkangka itingka nyinanyangka mayatja pulka, mununi nyura nyakuku ilkaringuru ngangkalingka pitjanyangka.”

⁶³⁻⁶⁴ Ka wati tjukurtjara pulkanku tjukurpa nyangatja kulira mirpanarira mantara palurunku tjilpirpungu munu wangkangu, “Ala palatja! Wanyula wanti kutjupa tjuta altinytja wiyangku piruku pitjala palunya wangkara kuranmankunytjaku. Panya kuwari nyangala nganana alatjiltula kulinu palurunku walytjangku Godanyanmankunyangka.* Ka nyura yaaltji kulini?”

Kaya uwankarangku wangkara palyanmanu, “Wiya, wati nyangatja kura mulapa. Utila iluntankunytjaku iyanma.”

⁶⁵ Kaya kutjupa tjutangku palunya witalytjunangi munuya kuru raikingka karpira palunya mara kaputurira pungangi kutjupangku kutjupangku munuya palunya ngalya-ngalyparingkula wangkangi, “Nyuntu wati wangkatjarangku nintingku wangka, nganalunta panyatja pungu?” Ka wati panya timpula anga-kanyilpai tjutangku ngapartji Jesunya pulkara marangku pungangi.

Peternya Jesuku Ngurparingkunyitja

(Matthew-ku 26:69-75; Luke-aku 22:56-62; Johnku 18:15-18,25-27)

⁶⁶ Ka panya Peterlu nyara palulatu ngarala waru nganytjiningi yaatangka urilta, ka wati tjukurtjara pulkaku warakaripai kungkawara palula itiwanu wati-pitjangu.

⁶⁷ Munu Peternya nyakula ngarakatingu munu papulara kuliningi, “Ai, ngananya nyangatja?” Munu palunya wangkangu, “Muntauwa, nyuntu panya Jesula tjungutja wati panya Nazarethanya ngurarangka.”

⁶⁸ Ka Peterlu ngurparingkula wangkangu, “Wampa, putuna kulini. Ngayulu ngurpa palumpa. Nyaakun ngayula tjapini?” Munu palulanguru ma-pakara kaita tjaangka ngarangi.

⁶⁹ Ka malangka kungkawara panya paluru Peternya kaita tjaangka ngaranyangka nyakula piruku wangkangu kutjupa tjutangka alatji, “Mulapa wati nyaratja Jesula tjungu para-ngarapai.”

⁷⁰ Palu Peternya piruku ngurparingu.

Ka palulanguru anangu tjutangku palula itingka ngaranytjatjanungku palunya piruku wangkangu alatji, “Wiya nguntin ngurparinganyi. Nyuntun Galileenya ngurara alatjitu munu Jesula tjungu para-ngarapai.”

⁷¹ Ka Peterlu mirpanarira wangkangu, “Wiya, ngayulu ngurpa alatjitu wati nyara palumpa. Tjukururungkuna nyurala wangkanyi. Tjinguruna ngunti wangkarampa, kani palya Godalu pungkuku.”

⁷² Ka paluru wangkanyangka tjuki wangkangu, ka Peterlu kulinu Jesulu panya nganmanytju wangkanytja alatji, “Panya tjulpu kutjara-ara wangkanyangka kuwaripangka, nyuntu ngayunya mankurarangku ngurpanmankuku.” Munu nyangatja kulira paluru pulkara tjituru-tjitururira ulangu.

* **14:63-64** Moseku tjukurtu pulkara pailpai anangungku walytjangku Godanyanmankunytja wiyangku wantinytjaku. Nyawa Exodus 20:2-7.

15

Jesunya Pilate-alakutu Katinytja

(*Matthew-ku 27:1-2,11-14; Luke-aku 23:1-5; Johnku 18:28-38*)

¹ Kaya ngalya-katjarungkannyangka piruku tjunguringu tjukurtjara kuranyitja tjuṭa, Moseku tjukurpa nintilpai tjuṭa munu Jewku mayatja uwankara, tjilpi tjuṭa kulukuḷu. Munuya wangkara kulira tjukurpa palyanu Pilate-anya wangkara wituwituntjikitjangku Jesunya iluntankunyjtaku. Munuya palulanguru wati timpula anga-kanyilpai tjuṭangka wangkangu Jesunya tjiinangka karpira katinyjtaku Pilate-alakutu munuya paluru tjana uwankarangku Jesunya Pilate-alakutu katingu munuya palula wirkakatingu.

² Ka Pilate-alu palula tjapinu, “Nyuntu wanyu mulapa Jew tjuṭaku mayatja pulka?”

Ka Jesulu palula wangkangu, “Uwa, pala wangkanyin.”

³ Kaya tjukurtjara kuranyitja tjuṭangku Pilate-ala mirangka Jesunya rawangku ara kutjupa kutjupa tjuṭa wangkara palunya kuranmanangi.

⁴ Ka Pilate-alu piruku palula wangkangu alatji, “Nyaaku nyuntu wangkanytja wiya ngaranyi? Nyanga tjana kutjupa kutjupa tjuṭa wangkara nyuntunya kuranmananyi.”

⁵ Palu Jesunya wangkanytja wiya alatjitu pilunpa ngarangi, ka Pilate-alu puṭu kuliningi, “Ai! Nyaaku nyangatja wangkara aluntja wiya ngaranyi?”

Jesunya Iluntankunyjtikitjangku Wangkanytja

(*Matthew-ku 27:15-26; Luke-aku 23:13-25; Johnku 18:39—19:16*)

⁶ Ka panya yiya kutjupa yiya kutjupa inma panya Katuwanu Ankunyjtanya ngaranyangka Pilate-alu tjakangku tjailanguru wati kutju walatjungkupai anangu tjuṭa mukuringkunyangka.

⁷ Ka tjiṅtu nyara palula wati kamantaku kuraringkupai tjuṭa tjailangka nyinangi. Panya paluru tjana mungatu kamantaku pikaringangi Rome-aku tjaultji tjuṭaku munuya wati kutju iluntanu, kaya nyara palulanguru tjananya witera tjailangka tjarpatjunu tjanampa mayatja wati ini Parapatjanya kulū.

⁸ Kaya anangu tjuṭa mulapa tjunguringu Pilate-aku ngurangka urilta munuya palula ngatjiningi wati kutju tjanampa walatjungkunyjtaku panya tjana nintingku kuliningi tjiṅtu nyanga palula wati kutju tjailanguru walatjungkunyjtaku.

⁹ Ka Pilate-alu tjanala tjapinu, “Nyura wanyu mukuringanyi ngayulu nyurampa nyanga mayatja pulka walatjungkunyjtaku?”

¹⁰ Nyangatja paluru nintingku tjapiningi alatji kulira, “Tjukurtjara nyanga kuranyitja tjuṭangkuya Jesunya nyararingkula ngayunya katira ungu.”

¹¹ Palu tjukurtjara kuranyitja tjuṭangkuya anangu tjuṭa pulkara wituwituningi Parapatjaku Pilate-ala ngatjintjaku tjanampa walatjungkunyjtaku.

¹² Ka piruku Pilate-alu tjapinu anangu tjuṭangka, “Kaṅa wanyu nyaalku wati nyangatja? Panya nyura palunya walkura wangkapai nyurampa mayatja pulka.”

¹³ Kaya mirara wangkangu, “Wiya, palunya puṅu katakutjarangka wakara utitjura!”

14 Ka Pilate-alu wangkangu, “Nyaanguru? Kura nyaa nyangangu wanyu palyanu?”

Kaya tungunpungkula pulkara alatjitu mirara wangkangu, “Punu katakutjarangka wakara utitjura.”

15 Ka Pilate-alu anangu tjuta pukulmankunytjikitjangku mukur-ingkula Parapatjanya walatjunu tjanampa, muni tjaultji tjuta wangkangu Jesunya wiipangka alkantjaku. Muni palulanguru tjana pungkula wiyaringkunya tjanala wangkangu katira punu katakutjarangka wakara utitjungkunytjaku.

Tjaultji Tjutangku Jesunya Anantja
(Matthew-ku 27:27-31; Johnku 19:2-3)

16 Kaya tjaultji tjutangku Jesunya katira mayatja pulkaku wali unngu tjarpatjunu munuya tjaultji kutjupa tjuta altingu uwankara tjungurungkunytjaku.

17 Munuya Jesunya mayatja pulkaku mantarangka ngunti tjarpatjunu kala panya purple-ta, munuya mayatja pulkangku katangka kanyilpai purunypa palyanu tjilka-tjil kanguru iri pulkatjara munuya palula katangka tjunu.

18 Munuya palunya anara ngalya-ngalyparingkula ngunti walkura wangkangi, “Awari, mulapa nyuntu Jewku mayatja pulkanya.”

19 Munuya punu tjukarangka palunya rawangku kata pungi, munuya palunya witalytjunangi, munuya palula kuranyu tultjungarakatira ikaritjarangka anara ngunti walkuningi.

20 Munuya palunya kurara pungkunytjatjanungku malangka mantara panya purple araltjara mantara palumpangka malakungku tjarpatjunu, munuya pakaltjingara ma-katingu punungka wakara utitjungkunytjikitjangku.

Jesunya Punu Katakutjarangka Wakara Utitjungkunytja
(Matthew-ku 27:32-44; Luke-aku 23:26-43; Johnku 19:17-27)

21 Munuya Jesunya ngura Jerusalemalanguru urilkutu ma-pakaltjinganu, ka paluru panya punu tjalira anangi. Kaya tjaultji tjutangku wati kutjupa ini Simonnga nyakula pauntjingara wangkangu punu panya Jesuku tjalira katinytjaku. Wati nyara paluru panya kuwari kutju ngalya-wirkanu ilytjiguru. Palu paluru ngura ini Tjairininya ngurara muni wati ini Alikatjantaku pulumpa Rupertjaku mama.

22 Munuya Jesunya katingu ngura ini Kaulkatjalakutu. (Kaulkatjanya panya wangkanyi *Kata Tarkatjaranya*.)

23 Munuya ngura palula wirkara palunya arkara wainangka kutjupa kutjupa tjau purunypa tjungura ungangi pika kaarngaranyangka manarmankunytjaku,* palu Jesulu wantingi tjikintja wiyangku.

24 Kaya tjaultji tjutangku palunya punu katakutjarangka wakara utitjunu, munuya palulanguru palumpa mantaraku punu panya nampatjarangka katu wanira inkangi kutjungku kutjungku winamilara mantjintjikitjangku.

25 Nyangatjaya panya mungawinki palunya utitjunu panya tjintu pakara tjukutjuku katurungkunya, 9 o'clock.

* 15:23 Nyanga alatjiya kunyu ungupai utitjungkunytja kuwaripangka pika kaarngaranyangka manarmankunytjaku. Tjau nyara paluru ini myrrh.

26 Ka punungka panya walka ngarangi Jesula katu alatji,
Jew Tjutaku Mayatja Pulka.

Panya palumpa mirpantju tjutangku palunya alatji wangkanyangka kuranmanu, ka nyara palulanguruya walka panya palunya utitjunu. 27-28 Munuya palula tjungu wati kutitjunkturpai kutjara punu kutjupa kutjarangka wakara utitjunu nganytjarta kutjara, kutju kampa wakungka kutju kampa tjampungka.*

29 Kaya anangu tjutangku Jesula itiwanu iwarangka ankula iranyakula kata uri-urira palunya anara wangkangi, "Ala, walangkunku palyala, panya nyuntu wangkangi timpula piluntara tjintu mankurarira piruku palyara wiyantjikitjangu.

30 Wala wanyu ngalya-wararakati pununguru pala, mununku walytjangu wankala."

31 Kaya tjukurtjara kuranyitja tjutangku munu Moseku tjukurpa nintilpai tjutangku tjukurpa palu purunypatu Jesula wangkangi munuya palunya anara ikaringangi alatji wangkara, "Kutjupa tjuta palangku wankaningi, palu walytjangu palanku putu wankani.

32 Wanyula arakara nyangama Christanya wankarunkupai Godalu kalkuntjita Israelku mayatja pulkanya, pala pununguruwi ngalya-ukaliwa. Kala nyakulampa mulamulariwalta."

Ka panya palula itingka wakara utitjunkturanytja kutjarangku palu purunypatu palunya anara wangkangi.

Jesunya Ilunyta

(Matthew-ku 27:45-56; Luke-aku 23:44-49; Johnku 19:28-30)

33 Ka palulanguru tjintu panya katuringkula katu ngaranyangka ngura uwankarangka maruringu munu munga purunypa ngarala mungartji-mungartji kutju tjintungku piruku irnyaningi.

34 Ka nyara palula ara tjintungku piruku irnyannyangka Jesulu pulkara mirara wangkangu, "Ilayi, Ilayi, lama tjapatjani." Alatji paluru wangkangi, "Mama God, Mama God! Nyaakunin wantikatingu?"

35 Kaya anangu kutjupa tjutangku ilangku ngaranytjatjanungku paluru wangkanyangka kulinu munuya wangkangu, "Kulila, paluru Ilaitjanya alitinyi pitjala alpamilantjaku."

36 Ka wati kutjungku ngalya-wirtjapakara pantja punu warangka karpi-karpira waina kurakurangka tjalatjura katura Jesunya tjikintjaku ungangi munu anara wangkangu, "Wanyula nyangama, ka Ilaitjalu pitjala palunya walatjura nyanga pununguru."

37 Ka Jesunya pulkara mirara ngaalypa wiyaringkula ilungu.

38 Ka paluru ilunyangka mantara panya timpulangka waraly-waralyngaranytja katunguru tjarukutu tjilpirarara kutjararingu ngura panya milmilpa mulapa utiringkunyitjaku.

39 Ka tjaultji tjutaku mayatjangu ngarala nyangangi Jesunya mirara ilunyangka munu wangkangu, "Ai, wati nyangatja mulapa Godaku katja."

40 Kaya minyama tjuta nyara palula ngarangitu munuya patunguru nyangangi, panya Mary Magdalene-alu munu Mary-lu panya Jamesaku

* 15:27-28 Wati kutjupangku kunyu verse 28 walkatjunu munu mala tjungunu Markaku tjukurta alatji Ka panya nyiringka iriti walkatjunkturanytja nyangatja utiringu, panya alatji walkatjunu, "Palunyaya wati kura-palku iluntanu kura tjutangka tjungu." (Aitjayaku 53:12)

Josephaku pulampa ngunytjungku, munu Tjalumilu, munu minyma kutjupa tjuṅangu kuḷu.

⁴¹ Nyanga paluru tjana panya Jesula tjungu para-pitjalinkupai uru Galileela itingka para-ngaranyangka munuya palunya atunymara kanyira mai mantara kuḷu ungkupai. Kaya minyma kutjupa tjuṅa kuḷu palula tjungu Jerusalemaku pitjanytjatjanu palula tjanala tjungutu ngarala nyangangi.

Jesunya Kulpingka Ngaritjungkunyja

(Matthew-ku 27:57-61; Luke-aku 23:50-56; Johnku 19:38-42)

⁴²⁻⁴³ Ka tjiṅtu nyanga paluru Friday Jesunya ilunyja, ka panyaya Jew tjuṅangu tjiṅtu nyanga palula kutjupa kutjupa tjuṅa nganmanytju palyara wantipai mungawinkiku tjiṅtu tjarpanyangka pilunarira waraka wiya nyinanytjikitjangku. Panya tjiṅtu tjarpanyangka milmilpa ngarapai munu ngarala tjiṅturingkula mungartjirira tjiṅtu piruku tjarpanyangka kutju milmilpa ngaranytja wiyaringkupai.

Ka wati panya Josephanya ngura ini Arima-tjiyanya ngurara nyinangi. Nyara paluru panya wati kantjula nyinangi munu Jewku kantjula kutjupa tjuṅangu mitingiku tjunguringkupai. Munu paluru rawa pānangi Godalu anangu tjuṅa walytjanmara mayatjangku kanyintjaku.

Munu paluru Jesunya ilunyangka nyakula kuliningi munu mungartjirinytjaku-tawara mapalku anu Pilate-alakutu munu palula rapangu ngatjiru Jesunya puntu puṅunguru mantjintjikitjangku.

⁴⁴ Ka Pilate-alu Jesunya ilunyja kulira wangkangu, "Ai, mapalku alatjitu ilungu?" Munu paluru tjaulti tjuṅaku mayatja alira tjapinu, "Mulapa Jesunya ilungu?" Ka wangkangu, "Uwa, nganmanypa ilungu."

⁴⁵ Ka nyangatja kulira paluru Josephanya palyanmanu Jesunya puntu puṅunguru mantjira katinytjaku.

⁴⁶ Ka Josephalu ankula mantara piranpa wiru mulapa payamilara anu Jesulakutu munu palunya puṅunguru ukalilyira mantara panya piranta karpinu munu katira kulpi unngu ngaritjunu. Munu ngaritjungkula puli pulkanya tjaangka untura wanara angatjunu. Kulpi nyara paluru panya nganmanytju pulingka nyarkara wantinytja ngarangi.

⁴⁷ Ka Mary Magdalene-alu pula Mary-lu, Josephaku panya ngunytjungku, ngarala nyangangi Jesunya puntu kulpi unngu ngaritjungkuyangka pulala mirangka.

16

Jesunya Ilunytjatjanu Wankaringkula Pakantja

(Matthew-ku 28:1-8; Luke-aku 24:1-12; Johnku 20:1-10)

¹⁻² Ka Saturday tjiṅtu panya pakuwiyaringkupai ngarala wiyaringu, ka tjiṅtu tjarpanyangka minyma panya mankurtu Mary Magdalene-alu munu Mary-lu Jamesaku ngunytjungku, munu Tjalumilu tjana ankula nyitilpai wiru payamilanu mungawinki ankula Jesunya puntu nyitintjikitjangku. Munuya mungawinki mulapa tjiṅtu ngalyapakannyangka kulpikutu anu.

³ Munuya iwarangka ankula alatji wangkarinangi, “Ai, nganalulampa puli panya pulka tjaangka panya anga-ngaranytjanya untura kitikitilku? Panyatja pulka mulapa.”

⁴ Munuya wirkara nyakula wangkangu, “Ai, nyaratja nyawa, nyara ala ngaranyi. Nganmanytju untuntja ngaranyi.” Puli nyara paluru panya pulka mulapa minyma tjutangku untura kitikitintjaku wiya.

⁵ Munuya kulpingka tjarpara nyangu wati yangupala mantara pirantjara nyinanyangka kampa wakungka munuya nyakula nguluringu. ⁶ Ka tjanala wangkangu, “Nguluringkuwiyaya ngarama. Nyura wanyu ngurini Jesunya Nazarethanya ngurara panya punungkaya wakara utitjunu? Paluru nyangangka wiya. Paluru wankaringkula pakanu. Nyawaya nyanga paluru ngarinytjita, panya nyangangka ngaritjunu ka nyanga mantara kutju ngarinyi.

⁷ Wanyuya ankula ma-tjakultjura Peterla tjanala palumpa panya nintintja tjutangka alatji, ‘Paluru kuwari nyurala kuranyu ananyi Galileelakutu, ka nyura nyara palula palunya nyakuku panya alatji paluru nyurala nganmanytju wangkangu.’” Nyanga palunya wati panya mantara pirantjarangku minyma panya mankurta wangkangu.

⁸ Kaya alatji wangkanyangka kulira putu kuliningi munuya wala pulka kulpinguru pakara ma-wirtjapakanu. Munuya ngururpa ngarala kutjupangka wangkanytja wiya, panya tjana nguluringu nyakunyjatjanu.

*Tjukurpa Malatja Jesunya Utiringkunyitja Mary Magdalene-ala**
(Matthew-ku 28:9-10; Johnku 20:11-18)

⁹ Jesunya panya ilunytjatjanu wankaringkula pakanu Sunday mungawinki mulapa munu Mary Magdalene-ala-warara utiringu, panya minyma nyara palulanguru Jesulu mamu 7 nganmanytju painu.

¹⁰ Ka nyara paluru nyakunyitjanungku ankula Jesuku malpa panya tjutangka tjakultjunu, panya tjanaya ngurangka tjituru-tjituru nyinara ulara waningi.

¹¹ Munu paluru wangkangu, “Ai! Ngayulu Jesunya nyangu. Paluru wanka.” Kaya wangkanyangka kulira putu mulamularingangi.

Jesunya Utiringkunyitja Wati Nintintja Kutjarangka
(Luke-aku 24:13-35)

¹² Nyangangka malangka Jesunya kutjuparira utiringu wati palumpa malpa kutjarangka iwarangka ilytjingka ankunyangka.

¹³ Munu pula nyakunyitjanu malaku anu malpa panya kutjupa tjutakutu munu pula tjakultjunu pulala utiringkunyitja. Palu kuliraya putu mulamularingangi.

Jesunya Nintintja 11-ta Utiringkunyitja

(Matthew-ku 28:16-20; Luke-aku 24:36-49; Johnku 20:19-23; Acts 1:6-8)

¹⁴ Ka ngulalta Jesunya utiringu nintintja panya 11-ta tjana mai nyinara ngalkunyangka. Munu tjananya wangkara painingi palumpa putu mulamularingkunyitjanguru, panya putuya kuliningi kutjupa tjutangku palunya nyakunyitjanungku tjakultjunkunyangka.

* 16:8 Verses nyanganpa wati kutjupangku walkatjunu munu Markaku tjukurta mala tjungunu.

¹⁵⁻¹⁶ Munu paluru tjanala wangkangu alatji, “Araya ngura winkikutu munuya anangu winkingka Tjukurpa Palya ngayunyatjara tjakultjunama. Kaya kulira mulamularingkulampa minangka baptisearingkuku, ka Godalu tjananya wankarunkuku. Palu mulamularingkuwiyangku wantinyangkampa Godalu tjananya paira iyalku ngura kurakutu.

¹⁷ Ka ngayuku mulamularingkunyangka Godalu palunya tjananya witulyankuku, kutjupa kutjupa pulka tjuta witulyatjarangku palyantjaku. Kaya ngayunya ini wangkara mamu tjuta anangunguru pailku, munuya wangka kutjupa kuwaritja wangkaku.

¹⁸ Munuya liru marangku witira pikatjararingkuwiya nyinaku, munuya kapi kura patjinatjara tjikira palu purunypatu pikatjararingkuntja wiya alatjitu nyinaku. Munuya anangu pikatjara tjutangka mara tjunkuku, kaya mapalku alatjitu palyaringkuku.”

Jesunya Ilkarikutu Katinytja
(Luke-aku 24:50-53; Acts 1:9-11)

¹⁹ Ka tjanala wangkara wiyaringkunyangka Jesunya Mama Godalu ilkarikutu katingu, ka nyara palulalta mayatja pulka mulapa nyinakatingu Mamala wakungka.

²⁰ Kaya nintintja panya tjuta anu ngura winkikutu munuya tjukurpa Jesunyatjara para-wangkangi anangu winkingka. Ka Mayatjalu tjananya witulyanangi kutjupa kutjupa pulka tjuta witulyatjarangku palyantjaku. Kaya anangu tjutangku nyakula mulamularingangi, “Mulapa nyangantu tjukarurungku tjakultjunanyi.”

*Tjukurpa Malatja Kutjupa**

²¹ (9) Munuya minyama paluru tjana Peterla tjanalakutu anu munu tjanala tjakultjunu uwankara wati panya mantara pirantjarangku wangkanytja.

²² (10) Ka nyanga palula malangka Jesulu nintintja tjuta witura iyanu Tjukurpa Palya para-tjakultjungkuntjaku ngura winkingka. Panya tjukurpa nyara paluru milmilpa titutjara ngarapai anangu tjutangka kulira wankaringkula titutjara nyinanytjaku.

* **16:20** Verses nyanganpa wati kutjupangku walkatjunu munu mala tjungunu Markaku tjukurta.

Tjukurpa Palya Luke-alu Walkatjunkuny^tja Luke Nyangatja Nganmany^tju Nyakula Wangkany^tjaku

Nyangatja Godaku tjukurpa wati ini Luke-alu walkatjunkuny^tja Jesuny^tatjara. Panya paluru wati nintipuka munu Jew wiya. Munu paluru nyiri nyangatja walkatjunu palumpa malpaku wati panya ini Tjiyapilatjaku. Munu paluru tjakultjunangi panya Jesunya wati palya mulapa kura wiya alatjitu, munu panya ilungu anangu ngura winkitja wankarunkunytjikitja Jew tju^ta kutju wiya, panya Godanya anangu uwankaraku pulkara mukuringkupai. Munu Luke-alu tjukurpa kutjupa kutjupa tju^ta walkatjunu Jesulu wangkany^tja munu palyantja. Munu paluru nintiningi Godala tjukarurungku tjapintjaku munu tjukurpa Godaku kurunpatjara kulu wangkangi.

Uwa, Luke-anya panya Paulala tjunguringkula ngura tju^tangka para-pitjalinangi. Munu ngula paluru nyiri kutjupa kulu walkatjunu panya yaaltji-yaaltji ngarangi Jesunya ilkarikutu ankunyangka malangka. Ka nyiri pala paluru panya ini Jesulu Iyantja Tju^tangka Palyantja.

Tjukurpa nyanganpa ngarinyi:

- 1:1—2:52 John Baptistanya iti ngariny^tja munu Jesunya iti ngariny^tja
- 3:1-20 Johntu anangu tju^tangka tjukurpa wangkara tjananya baptise-katiny^tja
- 3:21—4:13 Johntu Jesunya baptise-katiny^tja, ka Satantu Jesunya arkantja
- 4:14—9:50 Jesulu anangu tju^tangka wangkara nintintja munu pikatjara tju^ta palyarunguntja
- 9:51—19:27 Jesulu tjukurpa tju^ta tjakultjunkuny^tja
- 19:28—21:4 Jesunya Jerusalemalakutu tangkiyingka tatira ankunytja, munu timpulangka tjarpara tjukurpa tju^ta wangkany^tja
- 21:5-38 Jesulu palumpa nintintja tju^tangka tjakultjunkuny^tja ngula nyaaringkuku
- 22:1—22:46 Jesulu tjana mai malatja tjunguringkula ngalkuntja
- 22:47—23:56 Jesunya witintja munu punu katakutjarangka wakara utitjunkuny^tja
- 24:1-53 Jesunya ilunytjatjanu wankaringkula pakantja

Nganmany^tju Tjakultjunkuny^tja

¹⁻² Malpa wiru Tjiyapilatja, lita nyangatjana nyuntumpa walkatjunanyi nyuntu Jesunya mantangka nyinany^tja tjukarurungku kulin-tjaku. Panya nganmany^tjuya tju^tangka palula tjungu nyinaralpi palunya nyangangi paluru palyannyangka. Munuya paluru tjana nyakunytjatjanungku munu kulintjatjanungku kulu anangu tju^tangka tjakultjunangi nganaⁿala kulu. Kaya kutjupa tjarangku nyiringka walkatjunangi tjukurpa palunyatjaratu.

3-4 Kana tjukurpa nyanga palunya tjananya nyakula, kutjupa tjuṅangka kulū tјapira kulira purkara nintiringangi tjukurpa uwankaraku. Munuṅa kuwari uti mulapa tjukurpa uwankara tjukururungku walkatjunktjunktjiktja mukuringanyi. Panya nyuntu tjukurpa tјuta nganmanytјulpi kuliningi, palu lita nyanga palulanguru nyuntu uwankara tjukururungku nyakula kulira nintiringkuku.

Ka tjukurpa nyanga paluru nyiri nyangangka ngaranyi.

Angeltu Tjakarayala Tjakultjunktjuntja

⁵ Nyara palula arangka, panya wati Iratanya manta Judeaku winkiku mayatja pulka nyinanyangka, wati ini Tjakarayanya tjukurtjara nyinangi. Wati nyara paluru panya Apitjanya tјamutjara nyinangi.* Ka palumpa kuri kulū nyinangi minyma ini Elizabethanya. Minyma nyara paluru panya wati Aaronta tјanalanguru.*

⁶ Munu nyanga paluru pula tjukururu mulapa nyinangi Godala mirangka munu pula Godaku tjukurpa uwankara wanganarangku kulilpai.

⁷ Palu paluru pula kutjara alatјitu rawa nyinangi tјitji wiya munu pula tјilpiringkula pamparingu.

⁸ Ka tјintu kutjupa timpulangka Apitjakunu tјuṅanku ngapartji warka palyantjaku ngarangi, ka wati panya Tjakarayanya tjukurtjara tјanala tјungu wararingi Godala mirangka.

⁹ Kaya wati nyanga palunya ngurkantanu timpulangka ungu tјarpara pitјilta nyalpi wiru tјunkula tilira puyu paṅti wiru palyantjaku. Nyanga paluru tјana alatјinkupai tјanampa arangka, munuya wati kutju ngurkantankupai tjukurtjarangku puyu paṅti wiru tilintjaku.

¹⁰ Ka tјintu wirkanu puyu paṅti wiru tilintjaku, kaya anangu tјuta mulapaṅtu timpulangka urilta ngarala Godala tјapiningi.

¹¹ Ka wati panya paluru timpula ungu puyu paṅti wiru tilinnyangka Mayatjaku angelpa utiringu palula munu ngarangi pitјilpangka kampa wakungka wiru paṅti paingka itingka.

¹² Ka Tjakarayalu angelpa nyakula urulyaraṅu munu pulkara nguluringu.

¹³ Ka angeltu palula wangkangu, "Tjakaraya, nguluringkuntjuntja wiya. Godalunta kulinu nyuntu palula tјapinnyangka mununi witunu nyuntula tјakultjunktjunktjaku panya nyuntumpa kuri Elizabethanya pakuringkuku, ka nyupali katјatјararingkuku. Ka iti wirkankunyangka nyuntu palunya inila Johnnga.

¹⁴ Munu nyupali pulkara pukulariku, kaya anangu kutjupa tјuta kulukulu nyakula pukulariku.

¹⁵ Panya paluru ngula pulkaringkula Godala mirangka wati pulka alatјitu nyinaku Godaku tjukurtjara pulka mulapa. Munu paluru

* 1:5 Apitjanya tjukurtjara pulka iriti nyinangi Davidanya nyinanytja ara. Panya nyara palula ara Davidalu tjukurtjara tјuta tјarara tјunu tјana ngapartji-ngapartji timpulangka warkarinytјaku, munu paluru Apitjanya tјunu mayatja tјara kutјupaku. (Nyawa 1 Chronicles 24:1-19.) Kaya wati Apitjakunu tјuta tjukurtjara tјuta nyinangi malatja malatja tјuta kulū. Ka wati panya Tjakarayanya Apitjakunu malatja mulapa munu panya tjukurtjaraṅu nyinangi.

* 1:5 Aaronnga panya wati tjukurtjara nganmanypa mulapa nyinangi Godalu tјunktjuntjuntja. Paluru iriti mulapa nyinangi Moseku panya kuṅa.

wama tjkintja wiya nyinaku. Ka paluru iti wirkankunyangka alatjitu Kurunpa Milmilnga tjarpaku munu palula tjungu titutjara nyinaku.

¹⁶ Ka wati nyara paluru Israelkunu tjuangka tjukurpa wangkara malakungku tjananya alтира Godala jungulku piruku palumpa walytja nyinanytjaku.

¹⁷ Munu paluru kuranyurira rapangku ngulu wiyangku wangkaku Godaku tjukurpa, panya wati panya lilitjalu iriti Godaku tjukurpajara pulkangku Godaku tjukurpa wangkangi, palu purunytju. Kaya mama tjuangka palunya kulira kampa kutjuparira tjananku tjitji tjuata tjukarurungku mukulyangku atunymankuku. Munuya anangu kutjupa tjuangka kulu Godala tungunpungkunyttatjanungku paluru wangkanyangka kulilku munuya aruringkula Godala tjukarurungku kulilku. Uwa, wati nyara paluru anangu tjuata alatjirinytjaku palyalku tjana kulira Mayatjaku ala-ala patara nyinanytjaku." Nyanga palunya angeltu wangkangu wati panya Tjakarayala.

¹⁸ Ka paluru angelta kulira putu mulamularingkula palula ngapartji wangkangu, "Wiya, ngali tjlpiringu munu pamparingu kulu. Yaaltjingarali tjitji kanyilku? Wanyuni kutjupa kutjupa nintila kana nyakula mulamulariwa nyuntu panya wangkanytja tjukaruru ngaranytjaku."

¹⁹ Ka angeltu wangkangu palula, "Ngayuluna ini Gabrielnga panya Godala mirangka ngarapainya. Kani Godalu witunu tjukurpa nyanga palunya nyuntula tjakultjunkunytjaku.

²⁰ Palu kulila, ngayulu nyanga nyuntula wangkanytjitjaku nyuntu putu mulamularingkulumpa nyuntu tjaa patiringkuku munun putu wangkaku. Ka tjukurpa nyanga ngayulu wangkanytjanya nyuntula utiringkuku alatjitu, kan nyakuku tjintu nyara palula, munun iti wirkankunyangka kutju ngula tjaa alaringkuku munun wangkaku." Alatji angeltu palula wangkangu.

²¹ Kaya anangu tjuata urilta ngarala patanangi wati panya Tjakarayaku munuya ngarala putu kuliningi wangkara, "Nyaaku paluru timpulangka unngu tjarpara rawaringu?"

²² Ka Tjakarayanya timpulanguru ngalya-pakanu munu putu wangkangi. Kaya mara kutju urinyangka nyakula kuliningi, "Munta, tjinguru kutjupa kutjupa palula utiringu timpula unngu, ka nyanga palulanguru tjaa patiringu."

²³ Ka tjintu mankurnguru Tjakarayalu timpulangka wara wiyara ngurakutu anu.

²⁴ Ka nyara palula malangka palumpa kuri Elizabethanya pakuringu munu urilkutu pakantja wiya wali unngu kutju nyinangi titutjara pira mankurpa kutjara.

²⁵ Munu paluru pukularira alatji wangkangu, "Ngarari, wiru mulapa nyangatja. Ngula-ngulanitju mulapatu Mayatjalu pukulmanu. Panya nganmanytjunitjuya anangu tjuangka kurara pungkupai tjitji wiya nyinanyangka, kana kuntaringkupai. Palu kuwari nyanga Mayatjalu ngayuku kunta wiyanu alatjitu, kaya putulta ngayunya piruku nyanga purunypa wangkanyi."

Angeltu Mary-la Tjakultjunkunytja

²⁶⁻²⁷ Ka pira mankur-mankurpa wiyaringkunyangka Elizabethanya tjuni pulkaringu. Ka Godalu iyanu angelpa ini Gabrielnga kungkawara nyitayikutu ini Mary-lakutu. Kungkawara nyanga paluru

ngura ini Nazarethala nyinangi uru Galileela wilurara munu paluru wati ini Josephalu nganmanytju kalkuntja nyinangi altinytja wiyatu. Wati nyanga paluru mayatja Davidaku walytjapitinguru utiringkula nyinangi. Palu nyanga pula altinytja wiyatu kuwaripa nyinangi patara.

²⁸ Ka angelpa panya paluru wirkanu Mary-la munu pukultu tjakultjunu palula alatji, "Awa, Mayatjanyanku pulkara pukularinyi, mununta ilangku kanyira nyuntumpa wiru mulapa palyalku."

²⁹ Ka Mary-lu wangkanyangka kulira pulkara urulyaranu munu kulinigi, "Nyaani nyanganku wangkangu?"

³⁰ Ka angeltu palula wangkangu, "Mary, nguluringkunyitja wiya! Mayatjanya nyuntumpa pulkara pukularinyi mununta paluru nyuntuna ngurkantanu.

³¹ Kulila, nyuntu kuwari ititjararingkuku, munun katja kanyilku munun palunya inilku Jesunya.

³² Ka paluru pulka mulapa nyinaku Mayatja Katutja Pulka katja. Ka Godalu palunya tjunkuku Mayatja pulka nyinanytjaku wati panya palumpa tjamu Davidaku arangka.

³³ Ka paluru mayatja pulka mulapa rawa nyinaku Israelkunu tjutaku anangu kutjupa tjutaku kulu titutjara alatjitu wiyaringkunyitja wiya." Nyanga palunya angeltu Mary-la wangkangu.

³⁴ Ka Mary-lu palula ngapartji wangkangu, "Palu nganalanguruna iti nyanga palunya kanyilku? Panya ngayulu watiku ngurpa mununa wati kutjupangka nyinanytja wiyatu."

³⁵ Ka angeltu palula wangkangu, "Kulila, Kurunpa Milmilnga nyuntula tjarpaku munu Godaku witulya pulkatjarangku nyuntunya ititjararingkunyitjaku palyalku. Ka nyara palulanguru nyuntu iti milmilpa kanyilku 'Godaku Katja.'

³⁶ Munu wanyu piruku kulila, nyuntumpa panya walytja Elizabethanya, Tjakarayaku panya kuri. Paluru pampa mulapa nyinanyi. Palu kuwari nyanga paluru ititjara nyinanyi. Munu panya pira mankur-mankurnguru tjitji kanyilku pampa panya mulatu.

³⁷ Ka nyangatja kulinma panya Godalu kutjupa kutjupa uwankara alatjitu paluru nintingu palyalpai."

³⁸ Ka Mary-lu nyangatja kulira wangkangu, "Uwa palya, ngayulnatju mulapa Mayatjaku walytja nyinanyi paluru wangkanytja wanganarangku kulira palyantjikitja. Ka nyanga nyuntu wangkanytja palya ngayula utiringkuku." Ka nyanga palulanguru angeltu palunya wantikatira anu.

Mary-nya Elizabethalakutu Ankunyitja

³⁹ Ka palula malangka Mary-lu mapalku ulytja karpira mapakanu ulparira palumpa walytja Elizabethanya nyakunyitjikitja. Panya paluru pula kurirara nyinangi Jerusalemala ulparira tawunu tjukutjukungka apu murpu tjutangka ngururpa.

⁴⁰ Palu Mary-nya wala pulka nguwanpa ankula ankula tjinu mankurnguru ngura panya palula wirkanu munu pulampa walingka tjarpapa Elizabethanya nyakula wangkara ampura pukularingu.

41 Ka Mary-lu wangkanyangka Elizabethalu kulinu palula tjun-
ingka unngu iti pulkara urinyangka. Ka nyara palula arangka Ku-
runpa Milmilnga Elizabethala tjarpangu munu tjukarurungku nintinu
wangkanytjaku,

42 ka pulkara pukularira mirara wangkangu alatji, "Mama
God, wirungkun minyma nyanga Mary-nya ngurkantanu munun
pukulmanu minyma kutjupa uwankarangka waintara, munun iti
panya Mary-lu ngula kanyintjanya nyuntu pukulmara kanyilku.

43 Ngayuluna minyma pulka wiya, tjukutjuku nyinanyi, ka nyangatja
nyaaku Mayatjaku ngunyaju ngayulakutu pitjangu pulkakutu-palku?
Palu palya, pulkaraņa pukularinyi palumpa.

44 Ka nyuntu panya kuwari wirkara wangkanyangka ngayulu kulinu
ngayula unngu iti pukularira urinyangka.

45 Ka palan nyuntu kulu pukulpa ngaranya panya nyuntu Mayatjalu
wangkanyangka kulira mulamularingu munu palan patani paluru
wangkanytja utiringkunyitjaku." Alatji Elizabethalu Mary-la wangkara
pukularingi.

Mary-lu Godanya Mirawaninytja

46 Ka Mary-lu alatji wangkangu,

"Ngayuluna kuwari pulkara alatjitu mirawaninyi Mayatjanya,

47 Mununatju palumpa pulkara pukularinyi, nganampa God
panya Wankarunkupaiku.

48 Panya palurunitju ngurkantanu tjukutjuku nyinanyangka
mununi nyanga nyakunytjatjanungku pukulmanu.

Kaya nyanganguru anangu tjuťangu ngayunya rawangku kulilku
wangkara alatji, 'Mulapa minyma nyanga palunya Godalu
pulkara pukulmanu.'

49 Panya Godalu witulya pulkangku ngayuku pulka mulapa palyanu.
Nyara paluru wiru mulapa.

50 Munu anangu tjuťangu palunya rawangku kulinnyangka paluru
titutjarangku alatjitu ngaltunytjungku kanyilpai anangu
uwankara, munu anangu kutjupa palula tjanala malatja tjuťa
kulukulu.

51 Munu paluru kanany-kananyaripai tjuťa wililytjingalpai witulya
pulkangku tjananku walytjangku kulira palyannyangka.

52 Munu paluru alatjitu mayatja pulka tjuťa pauntjingara tjarulpai,
munu tjukutjuku tjuťa katulpai pulka katu nyinanytjaku.

53 Munu paluru palťatjiratja tjuťa palťalpai wiru tjuťa ungkula,
munu mani pulkatjara tjuťa paira iyalpai maralpa ankunytjaku.

54-55 Paluru panya nganmanytju kalkunu nganampa tjamu tjuťa
Aipuramanya tjananya, ngaltunytjungku kanyintjikitjangku
munu panyalanya titutjarangku mukulyangku kanyini
nganananya, Aipuramaku walytjapiti malatja uwankara
kulukulu.

Uwa, mulapa paluru nganananya Israelkunu tjuťa palumpa wa-
lytjapiti ngaltunytjungku atunymara titutjarangku kanyilpai."
Alatji Mary-lu Godanya walkura wangkangi.

56 Munu paluru palumpa walytjangka Elizabethala pira mankurpa
nyinangi, munu nyinara wiyaringkula palulanguru malakulta anu
alinytjara ngura walytjakutu.

Johnnga Iti Wirkankunytja

⁵⁷⁻⁵⁸ Ka malangka Elizabethalu it*i* kanyintjaku ilaringu, ka paluru katja kanyinu. Munu paluru pulkara pukularingu Godalu palunya wirungku ungkunyaangka. Kaya malpa tju*ta* walytja tju*ta* kulukulu nyangatja kulira palula tjunguringkula pukularingu uwankara.

⁵⁹ Munuya palulanguru tju*ntu* 7 ngarala wiyaringkunyaangka malangka anangu tju*ta* piruku tjunguringu wati tjukurtjarangku it*i* palunya watintjaku*. Munuya palunya kuliningi mamangka iningka tjunkunytjikitjangku, Tjakarayala.

⁶⁰ Palu palumpa ngunytjungku wangkangu, “Wiya alatj*tu*, tjitji nyanga paluru ini Johnnga.”

⁶¹ Kaya anangu tju*ta*ngku wangkangu palula, “Palu nyuntumpa walytja kutjupa ini nyanga paluru nyinanytja wiyatu.”

⁶² Munuya palumpa mamangka marangku tju*pin*ingi, “Tjitji nyan-gatjan ini ngananya tjunkuku? Tjakultjuralanya kala kulila.”

⁶³ Ka Tjakarayalu marangku wangkangu nyiri ungkunyitjaku. Kaya mantjira palunya ungu. Ka paluru walkatjunu nyiri nyara palula alatji, “Paluru ini Johnnga.” Kaya uwankarangku nyakula urulyaranu.

⁶⁴ Ka palulanguru Tjakarayanya tjaa mapalku alaringu munu wangkapairingu, munu paluru Godanya pulkara mirawaningi.

⁶⁵ Kaya palumpa malpa tju*ta*ngku palunya nyakula urulyaranu. Ka tjukurpa nyanga paluru manta Judeala ngura winkingka lipiringu.

⁶⁶ Kaya ngura uwankarangka anangu tju*ta*ngku tjukurpa nyanga palunya kulinu munuya rawangku kuliningi, “Mulapa Godalu tjitji nyara palunya marangku kanyini. Ka yaaltji-yaaltji paluru nyinaku ngula pulkaringkula?” Alatji tjana wangkara kuliningi.

Tjakarayalu Godanya Walkuntja

⁶⁷ Ka Kurunpa Milmilnga tjarpangu wati panya Tjakarayala, it*i* panya Johnku mamangka munu palunya kuranyukutungku nintinu, ka paluru pukularira wangkangu alatji,

⁶⁸ “Walkunmala Godanya, Israelkunu tju*ta* kanyilpainya, panya paluru pitjangu palumpa walytja tju*ta* wankarunkunytjikitja.

⁶⁹ Godalulampa iyanu wankarunkupainya witulya pulkatjara.

Ka wankarunkupainya nyanga paluru wati panya Davidaku walytju*pin*inguru utiringu. Panya iriti mulapa nyinangi Davidanya Godaku war*kar*ipai.

⁷⁰⁻⁷¹ Panya Godalu iriti kalkunu nganananya wankarunkunytjikitjangku mirpantju tju*ta*ngku pungkunytjaku-tawara,

ka panyaya palumpa wangkatjara tju*ta*ngku palula kulira nyir- ingka walkatjunu paluru kalkuntjitja nganana kulintjaku.

⁷² Munu panya wangkangu nganampa tjamu irititja tju*ta*ngka Aipuramala tjanala palunya tjananya ngaltunytjungku kanyin- tjikitjangku

munu paluru kalkuntjatjanungku palyanu alatj*tu* munu kanyiningi tjananya.

* **1:59** Panya tjakangkuya alatji palyalpai tjanampa arangka.

73-75 Panya paluru iriti mulapa Aipuramala tjanala kalkunu alatji wangkara,

'Nyurampa mirpantju tjutangku nyuranya pungkunytjikitjangku kulinyangkaña nyuranya ngalkilku nyura wankaru nyinanytjaku munu ngayunya rapangku walkuntjaku tjanampa nguluringkunyitja wiyangku.

Nyara palulanguru nyura ngayula mirangka palyanyku nyinaku titutjara.' "

76 Munu Tjakarayalu piruku katjaku tjukurpa ngapartji wangkangu alatji,

"Nyuntu God Katutja Pulka wangkatjara nyinaku, munun Mayatjanya pitjanytjaku patara kuranyurira nganmantju tamalmarā wantiku anangu tjuangku kulira palumpa ala-ala patara nyinanytjaku.

77 Nyuntu tjanala nganmantju tjakultjunkuku alatji, 'Godalu nyuranya kura tjuta palyantjitjaguru pungguwiyangku kaly pangku wantiku munu palulanguru nyuranya wankarunkuku.'

78 Uwa, mulapa Godanya nganampa ngaltunytju mukulya pulka mulapa nyinanyi.

Panya tjiirpingku mungawinki pakara manta uwankara utilpai, palu purunytju ilkaringuru pitjanytjalu nganananya kurunpa unngu utilku.

79 Panya nganana mungawalurungka nyinanyi munula iwara palyangka ankunytjikitjangku putu kulira ilunytjikitja kutju ngaranyi.

Palu panya Godalu ilkaringuru tili pulka iyalku, ka nganananya utilku iwara palyangka Godala tjungu pilunpa pukulpa ankunytjaku."

Nyanga palunya Tjakarayalu Kurunpa Milmiltu nintinnyangka wangkangi.

⁸⁰ Ka palumpa katja Johnnga tjitji pulkaringu, munu Godanya kurunpa winkingku kuliningsi. Munu paluru ngula pulkaringkula anu ilytjikutu munu ilytjinka nyinangi kumpilpa, munu ngula utiringu Godaku tjukurpa wangkanytjikitja Israelkunu tjutangka.

2

Jesunya Iti Ngarinytja (Matthew-ku 1:18-25)

¹ Ka nyara palula arangka wati ini Tjiitja Ukatjanya mayatja pulka nyinangi ngura panya ini Rome-ala munu ngura winki mulapa mayatjangku tjungura kanyiningi Israelnga kulu. Wati nyanga paluru mayatja uwankarangka wangkapai, kaya wanganarangku kulilpai palula. Ka Johnnga iti nyinanyangka mayatja nyara paluru anangu winki kantamilantjikitja mukuringangi, munu tjananya uwankara wituningi ngura uwankaranguru ankula ngura walytjangka walytjangka ini nyiringka walkatjunkunytjaku. ² Ka nyara palula arangka wati panya ini Kurini-yatjanya ngura Tjiriyaku mayatja nyinangi.

³ Kaya ngura uwankaranguru anangu winki ngura walytjakutu walytjakutu anangi tjanampa tjamuku ngurakutu ini tjanampa nyiringka walkatjunkunytjikitja.

⁴ Ka Josephanya ngura Nazarethala nyinangi munu ulparira mapakanu tawunu walytjakutu ngura ini Bethlehemalakutu, panya nganmanypa mulapa palumpa tjamu Davidanya iti ngaringu ngura nyara palula, ka palulakutu paluru anu ini walkatjunktjankunytjikitja.

⁵ Munu katingu Mary-nya panya palunya kalkuntjatjanungku. Ka Mary-nya paku pulka nyinangi munu nganmanypa tjuni pulkaringu.

⁶ Munu paluru pula Bethlehema wirkanu, ka Mary-ku iti wirkankunytjaku ilaringu.

⁷ Ka paluru iti katja kuwari kutju ngurpangku kanyinu, munu mantarangka karpira pantja-pantjanga ngaritjunu piti ngatingka. Piti nyara paluru panya puluka tjutaku munu tjiipi tjutaku mai tjunkupai ngalkuntjaku. Tjinguru pula walingka payamilara tjarpanyangka iti wirkanama, palu anangu winkingu nganmanypa tjarpara wali uwankara anganu, ka palulanguru pulumpa ngura wiya ngarangi wali unngu ngarinytjaku, ka pula tjulypinytja ngaringu pulukaku ngurangka.

Tjiipi Kanyilpai Tjutangka Angeltu Wangkanytja

⁸ Ka ngura nyara palula itingka tawunungka urilta wati tjapata tjutangu tjiipi tjuta atunymara kanyiningi mungangka.

⁹ Ka Mayatjaku angelpa utiringu tjanala munu pitalytji pulka mulatu tjananya irnyara kanyiningi. Kaya urulyarara pulkara nguluringu.

¹⁰ Palu angeltu palula tjanala wangkangu, "Nguluringkunyitja wiyangkuya kulinma. Ngayuluna pitjangu nyurala tjukurpa wiru mulapa tjakultjunktjankunytjikitja anangu uwankaraku, kaya kulira uwankara pulkara pukulariku.

¹¹ Kuwari nyanga Mayatja Davidaku ngurangka iti wirkanu nyuranya wankarunkunytjikitja panya Christanya Mayatjanya.*

¹² Ka nyura ankula ngurila munu nyawa iti nyara palunya mantarangka karpintja puluka tjutaku mai ngaripaingka ngarinyangka. Alatji ngarinyangka nyakula nyura kulilku, 'Munta, nyangatja iti panya paluru.'

¹³ Ka angelpa paluru wangkara wiyaringkunyangka malangka angelpa kutjupa tjuta mungilyi mulapa ilkarininguru ukalingkula palula tjungurinkula tjungungku inma inkara Godanya walkuningi alatji wangkara,

¹⁴ "Godanya wiru mulapa nyara ilkarangka nyinanytja panya.

Kayanku mantangka nyanga anangu Godala kulilpai uwankara kurunpa pukulpa nyinama."

¹⁵ Munuya angelpa tjuta inkara wiyaringkula malaku anu ilkarikutu, kayanku wati panya tjapata tjutangu wangkangu, "Ala, walala ara Bethlehemalakutu munula nyawa nyanga palunya, panya Mayatjaku angeltulanya kuwari tjakultjunu."

¹⁶ Munuya pakara warpungkula anu walikutu munuya walingka ma-wirkara ngurira nyangu Mary-nya pulanya Josephanya pulukaku ngurangka nyinanyangka munuya iti kulu pantja-pantjanga ngarinyangka nyangu pitingka pulukaku mai ngaripaingka.

¹⁷⁻¹⁸ Munuya wati panya tjapata tjutangu iti palunya nyakula Josephala pulala tjakultjunu tjukurpa panya angeltu

* 2:11 Ini Christanya wangkanyi Wankarunkupainya Godalu panya kalkuntjanya.

tjanala tjakultjunkunytja iti nyanga palunyatjara, munuya iti nyakunytjatjanungku anangu tjutangkalta tjakultjunangi. Kaya kulira urularyanu tjiipi kanyilpai tjutangku tjanala wangkanyangka.

¹⁹ Ka Mary-lu tjukurpa nyanganpa rawangku unngu kuliningi.

²⁰ Kaya palulanguru wati panya tjabatata tjutangku Mary-nya pulanya wantikatira malaku anu munuya iwarangka ankula inma inkara Godanya pulkara walkura pukularingi wiru kulintjatjanungku munu nyakunytjatjanungku kulu. Munuya wangkangi, "Mulapa angeltu nganana tjukarurungku tjakultjunu."

²¹ Ka tjinu 7 ngarala wiyaringkunyangka mungawinki iti panya palumpa tjinu wirkanu palunya watintjaku wati tjukurtjarangku.* Ka pula palunya ininu Jesunya, panya ini nyanga palunya nganmanytju wangkangu angeltu Mary-la.

Jesunya Timpulakutu Katinytja

²²⁻²³ Ka ara panya irititja ngaranya Godalu Mosela nganmanytju wangkanytja nyanga alatji, "Utiya katja nganmanyitja uwankara ngayunya ungama ngayukurinytjaku." Ka Josephalu pula ara panya palunya kulinu munu pira kutju wiyaringkunyangka iti Jesunya Jerusalemalakutu katingu Godanya ungkunytjikitjangku.

²⁴ Munu pula tjulpu kutjara kulu katingu. Panya Godalu Mosela ara kutjupa minyma ngunytju tjutaku nganmanytju wangkangu nyanga alatji, "Minyma ngunytjungku iti kanyintjatjanungku uti pira kutju wiyaringkula tjulpu kutjara katira wati tjukurtjara ungama tjinguru kuukuuku kutjara munta aralapalpalpa kulunypa kutjara, ka tjukurtjarangku tjulpu panya kutjara pungkula Godanya ungkuku, ka palulanguru minyma paluru palyaringkuku munu para-ngaramalta."* Ka pula ara nyanga kutjara kulinu munu pula Jesunya katingu timpulakutu tjulpu kutjara kulu.

²⁵⁻²⁶ Ka nyara palula arangka wati tjilpi kutju nyinangi Jerusalemala, wati ini Tjimiannga. Nyanga paluru wiru mulapa tjukaruru nyinangi Kurunpa Milmilngatjara. Munu paluru Godaku mulamularingkula rawatu pataningi munu kuliningi panya ngula Godalu Israelkunu tjuta wankarunkuku. Panya nganmanytju Kurunpa Milmilu tjilpi panya palula wangkangu alatji, "Panya Mayatja Godalu nganmanytju iriti mulapa kalkunu Wankarunkupainya nyuralakutu iyantjikitjangku. Kan nyuntu nyara palunya nyakunytjikitja wanka nyinaku munun yakula kutju iluku." Ka Tjimiyantu nyangatja kulira pataningi rawa alatjitu ala-ala panya paluru Wankarunkupainya pitjanytjaku.

²⁷ Ka tjinu panya palula Jesunya ungkunytjikitjangku katinyangka Kurunpa Milmilu wati panya palunya nintinu timpulakutu ankunytjaku. Ka paluru ankula tjarpara nyinangi timpula unngu munu mulapatu nyangu Mary-lu pula Josephalu iti Jesunya Godanya ungkunytjikitjangku ngalya-katinyangka.

²⁸ Munu paluru iti panya palunya nyakula ampura pulkara pukularingu, munu Godanya walkuningi wangkara,

* **2:21** Alatjiya tjakangku ara irititjanguru palyalpai iti tjukutjuku wati tjukurtjara katira ungkula, panya alatji Godalu wangkangu tjana alatjingantjaku. * **2:24** Iriti minymangku iti kanyintjatjanu pira kutju wali unngu kutju nyinapai. Munu palula malangka tjulpu kutjara timpulakutu katira Godanya ungkula kutju palya urila pakara para-ngarapai.

29-31 “Uwa Mayatja God, kuwarinatju ngayulu pukularingu alatjitu, panya nyuntu mulapa kuwari ngayula wirkakatingu Wankarunkupainya, panya nyanga palunya nganmanytju kalkunu.

Kana kuwari nyanga palunya nyangu kurungku nyuntu panya kalkuntjanya,

panya nyuntu anangu uwankara wankarunkunytjaku iyantjanya. Kana palya ilunyi nyuntu panya kalkuntjitjangka.

³² Nyanga paluru tili pulka mulapa nyinaku anangu Jew wiya tjutaku tjana manta winkingka Godanya uti nyakunytjaku.

Kaya paluru tjana tili palunya nyakula mulamularingkula Israelkunu tjuta pulkara mirawaniku nyuntumpa panya walytjapiti.”

Alatji Tjimiyantu Godanya wangkara walkuningi munu pukularingi.

³³ Ka tjilpi panya paluru alatji wangkanyangka iti panya palumpa mamangku ngunytjungku kulira urulyaranu.

³⁴ Ka Tjimiyantu pulala ngapartji wangkangu alatji, “Godalu nyupalinya pukulmanama munu iti nyanga palunya kulu.” Munu paluru piruku wangkangi minyama panya ngunytjungka alatji, “Tjitji nyanga palunya Godalu iyanu Israelkunu tjutangka tjukurpa wangkanytjaku. Ka tjarangku kulira wankaringkuku, palu tjara kutjupangku kulira wantiku munu ilura kawankatiku.

³⁵ Panya paluru utilku anangungku unngu kulintja uwankara. Ka Mary, nyuntu nyakula tjituru-tjitururiku munun tjuni katakatiku.” Alatji Tjimiyantu Mary-la wangkangu.

³⁶⁻³⁷ Ka minyama wanakala kutju ini Annanya nyinangi nyara palula munu timpulangka unngu ngarangi. Panya palumpa mama ini Panuwalnga nyinangi nganmanyapa, ka palumpa walytja tjuta wati ini Atjalanguru nyinangi panya iriti mulapa Atjanya wati Jacobaku katja nyinangi, pala palumpa. Ka minyama panya palumpa kuri nganmanyapa yiya 7 kutju palula tjungu nyinanytjatjanu ilungu. Ka nyara palulanguru minyama panya paluru rawa mulapa nyinangi munu pamparingkula yiya 84-ringu. Munu minyama panya paluru wangkatjara Godaku tjukurpa tjakultjunkupai nyinangi munu paluru timpulangka rawa nyinapai wantikatinytja wiya munu Godala tjapilpai mungangka kalala kulu, munu paluru kutjupa-ara mai wantipai Godala pulkara tjapintjikitjangku.

³⁸ Ka nyara palula arangka Mary-nya pula timpulangka ngaranyangka minyama panya paluru wirkanu pulala munu iti Jesunya nyakula pukularira Godanya walkuningi. Panya anangu kutjupatjara rawa pataningi Israelkunu tjuta wankarunkunytjikitja pitjanyangka nyakunytjikitja. Ka minyama panya paluru anangu nyanga palula tjanala wangkangi alatji, “Nganana panya rawa mulapa pataningi Wankarunkupainya pitjanytjaku ngura nyanga Jerusalemalakutu. Kana nyurala kuwari tjakultjunanyi panya paluru pitjangu alatjitu Mary-ku pulampa katja.” Alatji Annalu anangu tjutangka tjakultjunu paluru nyakunytjatjanungku.

Nazarethalakutu Malaku Ankunytja

³⁹ Ka nyara palulanguru Josephalu pula Mary-lu uwankara palyara wiyanu Moseku tjukurta ngaranytjita. Munu pula palula malangka timpulangka waraka wiyara anu malaku ngura Nazarethalakutu.

40 Ka tjitji panya paluru pulkaringkula kunpuringu munu ninti pulka mulararingu. Ka Godalu titutjarangku palunya pulkara mulapa pukulmanangi.

Jesunya Timpulangka Nyinanytja

41 Ka yiya kutjupa yiya kutjupa Jesuku ngunytju pula Josephanya rawa ankupai Jerusalemalakutu inma panya Katuwanu Ankunytja kulintjikitja.*

42 Ka Jesunya panya nguwanpa pulkaringu munu yiya 12-aringu, munuya paluru tjana kulu inma nyara palulakutu anu Jerusalemalakutu.

43 Munuya inmangka nyinara wiyaringkula ma-pakanu ngura walytjakutu. Palu tjitji panya Jesunya Jerusalemala nyinangi ngunytjungka tjungu ankunytja wiya. Ka Josephanya pula watarku anu.

44 Panya pula alatji kuliningi, "Tjinguru malpa kutjupa tjutangka anu." Munu pula pitjalira mungartjirira ngura tjunu ngarinytjikitjangku munu pula putu nyangangi. Munu pula walytja tjutangka malpangka kulu tjapiningi.

45 Palu putu alatjitu pula nguriningi munu pula ngarira tjinturingkula malaku anu Jerusalemalakutu Jesunya ngurintjikitja.

46 Munu pula palulanguru piruku munga kutju ngaringu Jerusalemala wirkara, munu mungawinki pakara Jesunya piruku para-nguriningi munu pula nyangu timpula unngu nyinara wangkanyangka wati tjilpi nintipuka tjutangka. Ka Jesulu tjana tjukurpa wangkanyangka kuliningi munu kulira tjanela tjapiningi.

47 Kaya paluru wangkanyangka pulkara urulyaraningi, "Ai, tjitji nyangatja nintipuka mulapa, munulanya nintingu ngananela tjapini."

48 Ka palumpa ngunytjungku nyakula urulyaranu munu wangkangu, "Katja, nyaakun kumpira nyinangi? Nyanga ngali nyuntunya putu ngurira ngurira pulkara tjituru-tjitururingu."

49 Ka Jesulu nyangatja kulira urulyaraningi munu wangkangu, "Palu nyaaku nyupali wanyu ngayuku nguriningi? Nyupali kulintja wiyatu panya ngayulu Mamaku walingka nyinanyangka?"

50 Ka pula putu kulinu alatji wangkanyangka.

51 Ka palulanguru Jesunya pulala tjunguringkula anu Nazarethalakutu munu paluru pula wangkanyangka wanganarangku kulilpai. Ka palumpa ngunytjungku unngu kuliningi kuruntu tjukurpa uwankara, paluru panya wangkanytja tjuta kulu.

52 Ka Jesunya rawa ngurangka nyinangi munu wati pulkaringkula nintipuka mulararingu. Ka Godanya palumpa pulkara pukularingi munu anangu tjuta kulu palumpa pukularingitu.

3

Johntu Wangkanytja Anangu Tjutangka

(*Matthew-ku 3:1-12; Markaku 1:1-8; Johnku 1:19-28*)

1 Ka nyara palulanguru wati ini Tjiitja Tapiriyanya Rome-aku mayatjaringu munu yiya tjuta nguwanpa mayatja nyinangi nampa 15. Munu palu purunypatu anangu ngura winkitja mayatja pulkangku

* 2:41 Ara nyanga Katuwanu Ankunytja kulintjikitjangku nyawa Exodus-ala chapter 12 munu verse 21-nguru.

kanyiningi Israelkunu tjuṭa kuḷukuḷu. Ka ngura tjuṭangka mayatja tjukutjuku tjuṭa kulu nyinangi anangu nguratja tjuṭa tjukarurungku kanyintjikitja Rome-aku panya mayatja pulkaku. Panya wati ini Pontius Pilate-anya mayatja tjukutjuku nyinangi manta ini Judeaku. Ka wati ini Iratanya mayatja tjukutjuku nyinangi manta ini Galileeku. Ka palumpa kuṭa Philipanya manta kutjara kutjupaku mayatja tjukutjuku nyinangi manta ini Ituriyaku munu Turakanaitaku. Ka wati ini Latjanijatjanya mayatja tjukutjuku nyinangi manta ini Apiliniku.

² Ka wati kutjara ini Anatjanya pula Kayapatjanya anangu Jew tjuṭaku tjukurtjara pulka nyinangi manta panya Judeala.

Ka nyara palula arangka wati Johnnga, Tjakarayaku panya katja, ilytjingka nyinangi, ka Godanya palula wirkanu munu palunya witunu anangu tjuṭangka palumpa tjukurpa wangkanytjaku.

³ Ka Johntu Godalu wangkanyangka kulira anu munu karu urutjarangka ini Jordanta itingka ngura tjuṭangka Godaku tjukurpa para-wangkangi, munu tjanala wangkangi alatji, "Piiwiyariwaya kura nyinanytjatjanu munuya kampa kutjuparira kura piruku palyantja wiyangku wantima, kana nyuranya urungka tjarpatjura baptise-katiku, ka Godalu nyuranya kura palyantjitjanguru kalyangku pungkuwiyangku wantiku."

⁴⁻⁵ Panya iriti wangkatjara Aitjayalu nyiringka walkatjunu alatji, "Kutjupangku ilytjingka anangu tjuṭangka mirara wangkanyi alatji, 'Mayatjakuya nganmanypa ritiriwa paluru pitjala tjukurpa wangkanyangka wanganarangku kulintjikitja. Panya watingku iwara tjukarurulpai mayatja pulka malawanu pitjanytjaku,

palu purunypa nyura tjukarururingkula patanma Mayatjalu pitjala wangkanyangka wanganarangku kulintjikitja.

⁶ Kaya anangu uwankarangku nyakuku Godalu palyantja anangu tjuṭa wankarunkunytjikitjangku.' " *

⁷ Kaya anangu winki mulapa pitjangu Johntakutu minangka baptisekatinytjaku. Ka paluru tjanala wangkangu alatji, "Nyaaku nyura baptisekatinytjaku pitjangu? Nyura wanyu mulapa kura wantira kampa kutjuparingu? Wiya, nyura uwankara liru tjuṭa anangu tjuṭa ngunti kuralpai! Nyura tjinguru ngunti kulini ngayulu nyuranya urungka tjarpatjungkunytjitjanguru Godanya nyurampa kalyparingkunytja-palku. Palu wiya, Godanya nyurampa pulkara mirpanarinyi. ⁸ Nyura uti mulamulangku kura wantira kampa kutjuparima munuya palyanyku nyinara wiru tjuṭa kutju palyanma, ka nyara palulanguru wiru tjuṭa palyannyangka nyakula Godanya nyurampa pukulariku. Palu nyura tjinguru kulini alatji, 'Nganananya Godalu kura ngurkantankunytja wiyangku wantinyi panya nganana Aipuramaku pakalipiti. Palulangurulanya pikantankuwiyangku wantiku.' Palu wiya, nyura ngunti kulini. Palu puli tjuṭa nyanga nyawa! Tjinguru Godalu mukuringkula apu nyangannguru Aipuramaku pakali tjuṭa palyanma.

⁹ Kulilaya! Panya wati kaana kanyilpaingku punu tjuṭa maitjararingkunytjaku pakaltjingalpai, palu punu kutjupa tjuṭa kuraringkula titutjara mai wiya ngaranyangka nyakula paluru katara wanipai

* 3:6 Aitjayaku 40:3-5

warungka, ka palu purunypa Godalu anangu tjuṭa titutjara kura nyinanyangka nyakula tjananya paira iyalku warukutu. Ka pala palula-tawara nyura uti Godalawanu tjukaruru palyanyku nyinama." Alatji Johntu anangu tjuṭangka wangkangi.

¹⁰ Kaya tjukurpa nyanga palunya kulintjatjanungku ngapartji palula tjapinu, "Kala wanyu nyaalku?"

¹¹ Ka paluru wangkangu tjanala, "Nyura mantara kutjara kanyirampa uti kutju ungama anangu kutjupa panya mantara wiyatjaranya. Munu nyura mai pulka kanyirampa uti munytjangku ungama anangu kutjupa tjuṭa kulu panya mai wiyatjara tjuṭa."

¹² Kaya wati mani mantjilpai tjuṭangu kulu pitjala palula kuliningi,* panya tjana kulu mukuringangi baptise-katinytjaku. Munuya tjukurpa nyangatja kulira palula tjapinu, "Nintilpai, kala ngananampa nyaalku?"

¹³ Ka tjanala wangkangu, "Nyura piruku tjanalanguru ngunti mani pulka waintara mantjilwiyangku wantima, munuya mayatjangku wituntjitja kutju palyanma."

¹⁴ Kaya wati tjaultji tjuṭangu ngapartji palula tjapinu, "Ka nganana ngapartji nyaa palyalku?"

Ka tjanala wangkangu, "Anangu kutjupangka ngunti pauntjingara mani mantjilwiyangku wantima munu ngunti kuranmankuwiyangku wantima munu warkanguru mani ungkuyangka pukultu mantjinma, pulka-tjiratjangku waintara wangkanytja wiyangku."

¹⁵ Nyanga alatji wangkanyangkaya anangu tjuṭangu kulinu palunya alatji, "Awa, nyanga paluru-manti wati panya kalkuntjitja palurumpa wirkanu Christanya panyampa, panya paluru pitjanytjaku ngarangi."

¹⁶ Palu Johntu tjakultjunangi anangu uwankarangka alatji, "Ngayuluna nyuranya urungka baptise-katinyi palu kutjupa pitjanyi ngayula malangka. Nyara paluru pulka mulapa ngayula mun kara waintara mulapa. Panya wati warkangku palumpa mayatjaku tjinatja araltjankupai, palu nyangatja mayatja pulka mulapa pitjanyi, kana ngayulu kura nyinara pulkara kunṭaringanyi palumpa tjinatja pupakatira araltjankunyitjaku. Nyara paluru nyuranya baptise-katiku Kurunpa Milmilnga nyurala tjarpatjura ka warungku purunytju nyuranya kampara tjukarurulku.

¹⁷ Panya paluru kuwari ila ngaranyi anangu uwankara tjarantjikitja, panya minymangku mai kanira mauntalpa tjunkupai munu unytjunytju ma-wanipai, palu purunypa paluru pitjala tjaralku munu palumpa walytja tjuṭa palumpa ngurangka tjunkuku munu kuralpai tjuṭa waru pulkangka waniku waru titutjara kampapaingka."

¹⁸ Alatji Johntu tjukurpa wangkara utiningi tjana kulira piiwiyaringkunyitjaku. Munu tjukurpa kutjupa kutjupa tjuṭawanungku paluru tjanala rawangku wangkangi tjana kulintjaku, munu tjukurpa palya kulu tjakultjunangi panya Godanya patani anangu tjuṭa wankarunkunyitjikitja.

* **3:12** Wati mani mantjilpai tjuṭa Rome-aku mayatjaku warkaripai munuya palumpa anangu tjuṭangka tax mani mantjilpai. Kaya anangu tjuṭa tjanampa mukuringkupai wiya alatjitu.

19 Munu paluru kutjupa-ara mayatja pulka Iratanya anangura tjukarurungku wangkangu alatji wangkara, “Nyuntu kurangu nyuntumpa inkani altingu nyuntumpa kutaku kuri Iratianya.” Munu paluru kura kutjupa kutjupa tjuta kulu utira wangkangu Iratalu palyantja tjuta.

20 Ka palulanguru Iratanya miilaranu munu piruku kura pulka mulapa palyanu munu Johnnga tjailangka witira tjarpatjunu.

Johntu Jesunya Baptise-katinytja

(Matthew-ku 3:13-17; Markaku 1:9-11)

21 Munu Johntu anangu tjuta urungka baptise-katira Jesunya kulu baptise-katingu. Ka paluru Godala mamangka tjarpinnyangka ilkari alaringu,

22 ka Kurunpa Milmilnga palulakutu ukalingu tjulpu kuukuuku purunpa. Ka ilkarunguru wangkangu alatji, “Nyuntu ngayuku katja wiru mulapa. Kana nyuntumpa pukulpa mulapa nyinanyi.”

Jesuku Walytjapiti Nganmanyitja Tjuta

(Matthew-ku 1:1-17)

23 Ka nyara palula arangka Jesunya yiya 30-ringu munu warkalta ma-palyanu munu tjukurpa para-wangkangi anangu tjutangka. Kaya anangu uwankarangku kuliningi palunya Josephaku katja-palku nyinanyangka.

Palu Josephanya panya wati ini iliku katja,

24 ka panya ilinya wati ini Matjatau katja, ka panya Matjatanya Leviku katja, ka Levinya Milkaiku katja, ka Milkainya Tjanaiku katja, ka Tjanainya Josephaku katja,

25 ka Josephanya Matatjayaku katja, ka Matatjayanya Aimatjaku katja, ka Aimatjanya Nayamaku katja, ka Nayamanya Itjiliku katja, ka Itjilinya Nakaiku katja,

26 ka Nakainya Maatjaku katja, ka Maatjanya Matatjaiku katja, ka Matatjainya Tjiminku katja, ka Tjiminnga Tjatjikaku katja, ka Tjatjikanya Tjautaku katja,

27 ka Tjautanya Tjuwananku katja, ka Tjuwanangga Ritjaku katja, ka Ritjanya Tjirapapilku katja, ka Tjirapapilnga Tjiiltiilaku katja, ka Tjiiltiilanya Neriku katja,

28 ka Nerinya Milkaiku katja, ka Milkainya Atiku katja, ka Atinya Katjamku katja, ka Katjamnga Ilmatamaku katja, ka Ilmatamanya Uurku katja,

29 ka Uurnga Tjatjuwaku katja, ka Tjatjuwanya Iliyatjaku katja, ka Iliyatjanya Tjarimku katja, ka Tjarimnga Matjatau katja, ka Matjatanya Leviku katja,

30 ka Levinya Tjimiyanku katja, ka Tjimiyangga Judah-ku katja, ka Judah-nya Josephaku katja, ka Josephanya Tjaunamaku katja, ka Tjaunamanya Iliya-kimaku katja,

31 ka Iliya-kimanya Miliyaku katja, ka Miliyanya Miinaku katja, ka Miinanya Matatjaku katja, ka Matatjanya Nathanku katja, ka Nathangga Davidaku katja,

32 ka Davidanya Jesse-ku katja, ka Jesse-nya Uupitaku katja, ka Uupitanya Pawatjaku katja, ka Pawatjanya Tjamanku katja, ka Tjamangga Naatjanku katja,

³³ ka Naatjannga Amina-tapaku katja, ka Amina-tapanya Adminku katja, ka Adminnga Arniku katja, ka Arninya Iitjiranku katja, ka Iitjarannga Piritjiku katja, ka Piritjinya Judah-ku katja,

³⁴ ka Judah-nya panya wati ini Jacobaku katja, ka Jacobanya panya Isaacaku katja, ka panya Isaacanya Aipuramaku katja, ka Aipuramanya Tairaku katja, ka Tairanya Nayaku katja,

³⁵ ka Nayanya Tjirakaku katja, ka Tjirakanya Ruuku katja, ka Ruunya Pilikaku katja, ka Pilikanya Iipaku katja, ka Iipanya Tjiilaku katja,

³⁶ ka Tjiilanya Kainanku katja, ka Kainannga Apakataku katja, ka Apakatanya Tjimaku katja, ka Tjimana panya wati ini Noah-ku katja, ka panya Noah-nya Lamikaku katja,

³⁷ ka Lamikanya Mitjutjilaku katja, ka Mitjutjilanya Inakaku katja, ka Inakanya Tjaritaku katja, ka Tjaritanya Maalalilku katja, ka Maalalilinga Kinanku katja,

³⁸ ka Kinannga Inatjaku katja, ka Inatjanya wati ini Tjiitjiku katja, ka Tjiitjinya wati panya Adamaku katja, ka Adamanya panya Godaku katja nyinangi. Nyanga paluru tjana Josephaku walytjapiti iritinguru nyinakatinytja wanapari wanapari ngarangi.

4

*Jesunya Mamu Satantu Arkantja
(Matthew-ku 4:1-11; Markaku 1:12-13)*

¹ Ka Jesunya baptise-katinyangka malangka karu Jordantanguru malaku anu Kurunpa Milmilngatjara, ka Kurunpa Milmiltu palunya katingu ilytjikutu.

² Ka ilytjinka nyinanyangka palunya mamungku arkaningi kuran-tjikitjangku tjiñtu 40. Ka paluru mai ngalkuwiya alatjitu nyinangi tjiñtu nyara palula tjanala munu malangkalta paltjatjiratjaringu.

³ Ka Satantu palula wangkangu alatji, "Mulapa nyuntu Godaku katja nyinanyi? Wanyu puli nyangangka wangka mairingkunytjaku."

⁴ Palu Jesulu wangkangu, "Wiya, panya nyiringka walkatjunkunytja ngaranyi alatji, 'Anangungku mai kutju rawangku ngalkula puñtu wanka titutjara nyinaku Godala tjungu.' " *

⁵ Ka piruku Satantu palunya ngura katutja kutjupakutu katingu munu katunguru warpungkula nintinu ngura uwankara manta winkitja.

⁶ Munu wangkangu palula, "Nyuntu ngayunya pupakatira walkunnyangkampa, ngayulu nyuntunya tjunkuku ngura nyanga uwankara mayatjarira kanyintjaku. Panya nyanganpa uwankara ngayuku, kaña ngayulu mukuringkula ngurkantara tjunkupai kutjupangku mayatjangku kanyintjaku.

⁷ Wanyuni ngayunya pupakatira walkunma, kaña ngura nyanganpa uwankara nyuntunya ungkuku."

⁸ Ka Jesulu wangkangu, "Wiya, panya nyiringka walkatjunkunytja ngaranyi alatji,

* 4:4 Deuteronomy 8:3

'Mayatja Godanya kutjuya walkunma munuya palula kutju wangarangu kulinma.' " " *

⁹⁻¹¹ Ka Satantu piruku palunya katingu Jerusalemalakutu, munu ngaratjuni timpula katu mulapa munu wangkangu alatji, "Mulapa nyuntu Godaku katja nyinanyi? Wanyu wararakati nyanganguru, panya nyiringka walkatjungkunyta alatji ngaranyi,

'Godalu palumpa angelpa tjuta witulku nyuntunya atunymara kanyintjaku,

kaya nyuntunya marangu katura kanyilku punkannyangka apungku tjina katantankunyta-tawara.' " " *

Alatji mamungku palunya wangkangu arkantjikitjangku.

¹² Palu Jesulu wangkangu, "Wiya, panya nyiringka walkatjungkunyta ngaranyi alatji,

'Nyura uti Mayatja Godala ngunti tjapintja wiyangu wantima paluru witulya pulkangu palyannyangka unytjungku nyakunytkitjangku.' " " *

¹³ Ka Satantu palunya kutjupa kutjupa tjutawanungku arkara wiyaringkula unytjungku wantikatira anu ngula malaku pitjala piruku arkantjikitjangku.

Jesulu Tjukurpa Wangkanyta Ngura Galileela

(Matthew-ku 4:12-17; Markaku 1:14-15)

¹⁴ Nyara palula malangka Jesunya malaku anu Galileelakutu, ka Kurunpa Milmilnga palula tjungutu ngarangi munu witulyanangi palunya tjukurpa wangkanytjaku munu pikatjara palyarunguntjaku kulu. Kaya ngura winitjangku kuliningi palunyatjara tjakultjungkunyangka.

¹⁵ Panya paluru ngura tjutangka wali inmatjangka tjarpara anangu tjutangka tjukurpa nintilpai. Kaya anangu uwankarangu pulkara pukularira palunya mirawaningi.

Ngura Walytjangka Jesunya Wantinyta

(Matthew-ku 13:53-58; Markaku 6:1-6)

¹⁶ Ka Jesunya Nazarethala malaku wirkanu ngura panya walytjangka. Paluru panya ngura nyara palula pulkaringu, munu paluru Saturday-ngka, tjintu panya pakuwiyaringkupaingka, wali inmatjangka tjarpara nyinapai, anangu tjutangka tjungu. Munu Saturday kutjupangka paluru tjarpara nyinakatingu, ka kutjupangu palunya altingu, nyiringuru tjukurpa nyakula wangkanytjaku. Ka paluru pakara ngarangu wangkanytkitja.

¹⁷ Ka palunya nyiri ungu tjukurpa panya wangkatjara Aitjayalu iriti walkatjungkunyta, ka paluru alara tjukarurungku ngurira nyakula wangkangu alatji,

¹⁸ "Mayatjaku kurunpa ngayula tjungu alatjitu nyinanyi,

panya paluruni ngurkantanu tjukurpa wiru wangkanytjaku ngaltutjara tjutangka.

Mununi iyanu karpintja tjutangka wangkanytjaku kulu tjana palumpa tjukurpa kulira araltjarinytjaku.

* 4:8 Deuteronomy 6:13 * 4:9-11 Psalm 91:11-12 * 4:12 Deuteronomy 6:16

Mununi kuru pati tjutakutu kulu iyanu tjana kulu kuru alaringkula nyakunytjaku. *

Nyara paluruni iyanu kurangka nyinanytja tjuta kulu walatjunktunytjaku anangu kura tjutangku mayatjarira kanyira kuran-nyangka. *

19 Mununi iyanu nyanga alatji kulu tjakultjunktunytjaku panya tjiutu nyangatja alatjitu wirkanu Mayatjalu palumpa anangu tjuta pukulmara wankaru kanyintjaku." *

20 Munu Jesulu wangkara wiyaringkula nyiri panya palunya malakungku ungu wati panya palunya munu nyinakatingu. Kaya anangu uwankarangu pulkara mulapa palunya nyangangi.

21 Ka paluru wangkangu tjanala, "Tjukurpa nyangatja alatjitu kuwari utiringu, panya kuwarina wangkangi, ka nyura kulinu."

22 Kayanku anangu tjutangku tjukurpa nyangatja kulira urulyaranu munuya pukularingu, palu wangkaraya kuliningi, "Yaaltji-yaaltjinku nyanganku tjukurpa nyanga pulka wangkanyi? Nganana ninti, nyanga paluru wati alatjitu Josephaku katja."

23 Ka Jesulu piruku wangkangu, "Nintingkuna nyuranya kulini panya nyura ngayunya wangkanytjikitja mukuringkunyaangka nyanga alatji, 'Wanyunkuwi nyanganku walytjangku-warara palyala.' Munu nyura piruku mukuringanyi ngayulu ngura walytjanga palyan-nyangka nyakuntjikitja, panya ngayulu ngura Kapunimala palyantja purunypatu.

24 Kana nyurala tjukarurungku wangkanyi panya anangu tjutangku wati wangkatjara ngura kutjupitjangku wangkanyangka wangararungku kulilpai, palu wangkatjara nguraritjangku wangkanyangkaya kulilwiyangku wantipai.

25 Palu wanyuya kulila, panya iriti wanakala tjuta nyinangi wangkatjara ini llaitjanya nyinanytja arangka. Ka panya minangku puyintja wiya ngarangi yiya mankurpa nguwanpa. Kaya ailurungka mai wiya nyinangi manta winkingka.

26 Ka Godalu llaitjanya wanakala walytjakutu iyantja wiyangku wantingu munu wanakala malikitjakutu iyanu ngura kutjupakutu ini Tjarapatjalakutu ngura pulka ini Tjaitanta itingka.

27 Kaya ngura nyanga Israelta anangu tjuta mulapa miri pikatjara nyinangi Elishanya nyinanytja arangka. Pika nyara paluru kura mulapa ngarangi miringka lipiringkupai, palu Elishalu tjananya palyarunguntja wiyatu ngarangi, munu wati malikitja ngura kutjupanguru pitjanyangka kutju palyarungunu wati ini Naimannga. Wati nyara paluru panya Tjiriyanya ngurara nyinangi, panya ngura kutjunguruya anangu walytja tjuta wangkatjaraku mukuringkupai wiya ngura walytjanga nyinanyangka walytja tjutangka. Nyanganpa panya uwankara Godalu malikitja tjuta palyarunguningi."

28 Ka nyara palulanguru inmangka panya nyinanytja tjutangku nyangatja kulira pulkara mulapa mirpanaringu palumpa.

29 Munuya pakara Jesunya inmanguru witera katingu urilkutu puli wararanguru untura waninytjikitjangku, panya tjanampa ngura apu katu ngarangi.

* 4:18 Aitjayaku 61:1 * 4:18 Aitjayaku 58:6 * 4:19 Aitjayaku 61:2

³⁰ Palu Jesunya tjanala ngururwanu maḷaku anu, kaya anangu tjuṭangku puṭu witiningi.

Jesulu Mamu Paintja
(Markaku 1:21-28)

³¹ Palula maḷangka Jesunya anu ngura Kapuniyamalakutu uru Galileela wilurara munu nyara palula tjiṅtu pakuwiyaringkupaingka wali inmatjangka tjarpangu munu anangu tjuṭangka nintiningi.

³² Munu paluru tjukurpa pulka tjuṭa nintingu rapangku alatjitu wangkangi, kaya anangu tjuṭangku kulira urulyaranu.

³³ Ka wali nyara palula unngu wati kutjupa mamutjara nyinangi munu pulkara alatjitu mirara wangkangu Jesula,

³⁴ “Wati awa, nganaṅanya nyaantjikitjan mukuringanyi. Nyuntun pitjangu nganaṅanya wiyantjikitja? Wantimalanya. Ngayulu nyuntumpa ninti. Nyuntu panyan milmilpa alatjitu Godalanguru pitjanytja.”

³⁵ Ka Jesulu mamu panya paira wangkangu, “Pilunari! Wati pala palunya wantikati!” Ka mamungku wati panya palunya mantangka anṭa-waṅingu anangu tjuṭangka ngurur-ngururpa munu pikantankunyitja wiyangku wati panya palunya wantikatingu.

³⁶ Kaya anangu tjuṭangku nyakula urulyarara wangkangu, “Wati wangka nyaa nyanga paluru? Panya paluru witulya pulkatjarangku mamu tjuṭa witulpai, kaya palula kulira mapalku wantikatipai.”

³⁷ Ka tjukurpa Jesunyatjara lipiringu ngura winkingka.

Jesulu Pikatjara Tjuṭa Palyarunguntja
(Matthew-ku 8:14-17; Markaku 1:29-34)

³⁸ Munu Jesulu tjananya wantikatingu munu anu Simonku walikutu. Kaya paluru wirkankunyangka paṭara tjakultjunu Simonku umari pikatjara waruringkula ngarinyangka.

³⁹ Ka Jesunya ankula minyma panya palula itingka ngarangu munu pika panya palunya painu wantikatinytjaku. Ka mapalku alatjitu pika panya waru wiyaringkula minyma panya paluru tjananya pakara mai ngalkuntjaku palyara ungu.

⁴⁰ Ka tjiṅtu tjarpanyangka tjiṅtu panya milmilpa wiyaringu, kaya malpa tjuṭangku pikatjara tjuṭa ngalya-katingu Jesulakutu. Ka paluru tjanala mara tjunkula uwankara palyarungunu.

⁴¹ Kaya mamu tjuṭa anangu tjuṭanguru ngulu mirara pakaningi wangkara, “Nyuntun mulapa Godaku katja!” Ka Jesulu tjananya painu piruku wangkawiyangku wantinytjaku panya alatjitya palumpa ninti nyinanyi panya paluru Christanya Wankarunkupainya.

⁴² Munu mungawinki mulapa Jesulu tawunu wantikatira anu kutju maunṭalpa pilunta nyinanytjikitja. Kaya anangu tjuṭangku nguriningi munuya nyakula palunya markuningi piruku tjananya wantikatira ankunytjaku-tawara.

⁴³ Palu paluru tjanala wangkangu, “Wiya, utina Godaku tjukurpa wiru para-wangkama ngura kutjupa tjuṭangka kulu mununa tjakultjunama Godalu anangu tjuṭa mayatjangku walytjanmara kanyintja. Panya alatjinkunytjakuni Godalu iyanu.”

⁴⁴ Munu paluru wali inmatja tjuṭangka para-wangkarinangi ngura winkingka manta Judealawanu.

5

Jesulu Malpa Mankurpa Altinytja
(*Matthew-ku 4:18-22; Markaku 1:16-20*)

¹ Tjintu kutjupa Jesunya urungka itingka ngarangi uru ini Kina-tjaratala. Munu tjukurpa wangkangi anangu tjutangka. Kaya tjuta mulatu utjura utjura ngarangi Godaku tjukurpa kulintjikitja.

² Ka Jesulu nyangu pauta kutjara urungka itingka ngaranyangka panya antipina witolpai tjutangkuya wantikatira ankula net tjuta paltjiningi.

³ Ka Jesunya tatinu pauta kutjungka panya Simonkungka munu palula wangkangu tjukutjuku ma-untuntjaku urukutu munu Jesulu pauta katunguru nyinara wangkangi anangu tjutangka.

⁴ Munu wangkara wiyaringkula Simonta wangkangu, "Pauta nyan-gatjaya ma-untula ngatikutu nguwanpa munuya net pala wanira kuka tjuta witala."

⁵ Ka Simontu wangkangu, "Mayatja, putulirala tjinturingu munga warangka palu nyuntu wangkanyangkala palyatu arkara waninyi."

⁶ Munuya ma-pitjala urungka net waningu munuya winki mulapa witiu munuya net panya putu ngalya-ilara pautangka tjarpatjunangi. Ka net nguwanpa alatjitu katakatingi.

⁷ Kaya Simontu tjana malpa panya pauta kutjupitja altingu alpami-lara ilantjaku. Kaya mulapatu pitjangu munuya tjarara pauta panya kutjupanguru tjanampa pautangka tjunangi. Ka tjaalyngaranyangka pauta panya kutjara nguwanpa urungka tjarpangi.

⁸ Ka Simontu ini kutjupa Peterlu nyangatja nyakula urulyarara kuntaringu, munu palula kuranyu tultjungarakatira wangkangu, "Mayatja! Nyuntun palya mulapa. Wantikatini panya ngayulu palya wiya mununa kura kutju palyalpai."

⁹ Munuya paluru tjana pulkara urulyaranu kuka pulka witintjatjanu.

¹⁰ Ka pula Simonku malpa kutjara panya Jamesanya Johnnga pula pulkaratu urulyaranu Tjipitiku panya katja kutjara. Ka Jesulu wangkangu Simonta, "Nguluringkunyitja wiya. Nyanga palulanguru nyuntu antipina wiyangku anangu tjuta witalku altira ngayuku walyt-jaringkunyitjaku."

¹¹ Munuya pauta panya kutjara urunguru ma-ilara urilta tjunkula uwankara wantikatira Jesula tjunguringkula anu.

Jesulu Wati Pikatjara Palyarunguntja
(*Matthew-ku 8:1-4; Markaku 1:40-45*)

¹² Kutjupa ara Jesunya tawunu kutjupangka nyinangi, ka ngura nyara palula wati kutju miri pika pulkatjara nyinangi.* Munu wati paluru Jesunya nyakula palula kuranyu punkara pulkara ngatjinu alatji wangkara, "Mayatja nyuntu mukuringkulampani palyala pika nyangatja wiyaringkunyitjaku."

¹³ Ka Jesulu marakatira palunya pampunu munu wangkangu, "Ngayulu mukuringanyi, ka palyariwa." Ka mapalku alatjitu pika panya paluru wiyaringu wati panya palula puntungka.

* 5:12 Anangu kutjupa pika nyanga palunyatjara nyuntu pampurampa pika nyanga palunya mantjilku. Nyawa chapter 4 munu verse 27.

¹⁴ Ka Jesulu wati panya palunya wangkangu kutjupangka nintintja wiyangku wantinytjaku. Munu palunya wangkangu, “Ankulanku wati tjukurtjarangka-warara nintila nyuntu nyanga palyaringkunytjatjangku. Munu kuka katira uwa wati palunya pungkula Godanya ungkunyitjaku. Panya ara nyangatja Moselu wangkangu pika palyaringkula alatjingantjaku. Kaya wati tjukurtjaranku, anangu tjuantangku kulū nyakula mulamularingkuku nyuntu palyaringkunya.” Alatji Jesulu wangkangu wati panya palula.

¹⁵ Ka tjukurpa panya paluru lipiringu ngura winkingka. Kaya anangu winki mulapa palulakutu pitjangi tjukurpa kulintjikitja paluru wangkanyangka. Kaya pikatjara tjuṭa kulū rawa pitjangi palyarunguntjaku.

¹⁶ Ka tjuṭa ara paluru wangkara wiyaringkula ankupai mauntalpa ngura piṭunta Godala tjpantjikitja.

Jesulu Wati Wawanypa Palyarunguntja
(Matthew-ku 9:1-8; Markaku 2:1-12)

¹⁷ Tjintu kutjupa Jesulu anangu tjuṭangka nintiningi wali unngu, kaya wati Paratji munu Moseku tjukurku ninti tjuṭa nyara palula tjunḡutu nyinangi. Wati nyanga paluru tjana ngura tjukutjuku tjuṭanguru pitjangu panya uru Galileela itingka ngura tjuṭa ngarala wananingi. Kaya kutjupa tjuṭa ulpariranguru pitjangu Jerusalemanguru munu ngura ititja tjuṭanguru kulukulu.

Ka panya Godaku witalya Jesula ngarangi alatjitu pikatjara tjuṭa palyarunguntjaku.

¹⁸ Kaya wati kutjupa tjuṭangku pikatjara wawanypa mantarangka ngaritjunkula katura katingu Jesulakutu. Munuya walingka wirkara kuliningi tjarpara Jesula kuranyu ngaritjunkunyitjikitjangku.

¹⁹ Palu anangu tjuṭa mulapa alangka anga-ngaranyangka tjana puṭu tjarpangi. Munuya wali para-nyakula wanara kuliningi, “Yaaltjingarala tjarpaku?” Munuya palulanguru wali katukutu tatira wali katutja alanu munuya wati panya pikatjara mantarangka ngarinytja walatjunkula Jesula tjinangka itingka tjunu.

²⁰ Ka Jesulu nyakula kulinu, “Mulapa nyanganpa ngayuku raparingkula mulamularingu wati nyangatja ngayulu palyarunguntjaku.” Munu wangkangu wati panya palula, “Wati ngana, Godalu nyuntunya kura tjuṭa palyantjitjanguru kalypangku wantinyi pungkunyitja wiyangku.”

²¹ Kayanku wati panya Moseku tjukurpa nintilpai tjuṭangku munu Paratji tjuṭangku kulū alatji unngu kuliningi, “Ai! Wati yaalitja nyangatja? Tjingurunku nyangangu walytjangku Godanya-palku kulini munu kura palyantjitjanguru kalyparingkunyitjikitjangku wangkanyi. Wati kurangu nyangangu ngunti wangkanyi. Panyatjampal Godalu kutjungkumpa kura palyannyangkampal wangkapai kalypangku pungguwiyangku wantinytjikitjangku.”

²²⁻²⁴ Ka Jesulu tjana unngu kulintja nintingku kulinu munu wangkangu, “Nyaaku nyura alatji unngu kulini? Nyura kuwari nyangangi ngayulu wati nyanga palula wangkanyangka munu nyura kutjupa kutjupa nyakunyitja wiya. Palulanguru nyura tjinguru kulini ngayunya ngurpa-palku, munu nyura ngayuku mulamularingkuwiyangku wantinyi. Palu kuwari nyangana wati nyanga

wawanypa wangkara palyarunguni. Ka nyanga nyura nyakuku kuwari pakannyangka, munu nyura palulanguru mulamularingkuku, ngayulu panya nganmanytju wangkanytjtjaku, panya ngayulu Watiku Katjangku mantangka nyanga nyinara, anangu kutjupa kura tjuṭa palyantjtjanguru kalypangku wantinytjaku ngaranya alatjitu." Munu palulanguru piruku wangkangu wati panya pikatjarangka, "Wati awa, pakaranku mantara mantjira ngurakutu ara."

²⁵ Ka mulapaṭu wati panya paluru pakara mantara mantjinu anangu winkingka mirangka, munu ngurakutu ankula iwarangka Godanya pulkara walkurinangi.

²⁶ Kaya anangu tjuṭangku nyakula pulkara urulyarara wangkangi, "Ai, wiru mulapala kuwari kutju ngurpangku nyangu witulya pulkangku palyannyangka." Munuya tjana kulu Godanya pukularira walkuningi.

Jesulu Wati Levinya Altinytja

(*Matthew-ku 9:9-13; Markaku 2:13-17*)

²⁷ Nyanga palula maṅangka Jesunya walinguru pakara anu munu nyangu wati ini Levinya wati panya anangu tjuṭangka kamantaku mani mantjilpai. Munu paluru nyinangi wiltjangka iwarangka itingka. Ka Jesulu palunya wangkara altingu, "Pitjalani ngayunya waṅala!"

²⁸ Ka Levilu pakara uwankara wantikatingu munu palunya waṅanu nintintja tjuṭangka tjunguringkula.

²⁹ Munu Levilu palumpa ngurangka mai pulka palyara mani mantjilpai tjuṭa, anangu kutjupa tjuṭa kulu, altingu tjunguringkula ngalkuntjaku, anangu winki mulapa.

³⁰ Kaya Paratji tjuṭangku munu wati Moseku tjukurku ninti tjuṭangku nyakula Jesuku nintintja tjuṭangka wangkangi, "Nyaaku nyura mani mantjilpai tjuṭangka wati kura kutjupa tjuṭangka kulu tjunguringkula mai ngalkuni? Uti nyura tjanala tjunguringkuwiyangku wantira wati palya tjuṭangka kutju tjunguringama."

³¹⁻³² Ka Jesulu wangkangu tjanala, "Anangu palya tjuṭa ngangkariku mukuringkupai wiya, palu pikatjara tjuṭa kutjuya mukuringanyi. Ka ngayulu pitjangu anangu Moseku tjukurwanu nyinapai tjuṭa altinytjikitja wiya, palu anangu nyanga nyura nyakula wantipai tjuṭa altinytjikitjana pitjangu tjana piiwiyaringkula kura wantira kampa kutjuparinytjaku."

Paratji Tjuṭangku Jesunya Tjapintja

(*Matthew-ku 9:14-17; Markaku 2:18-22*)

³³ Kaya anangu panya paluru tjana piruku Jesula wangkangu, "Kulila, panya Johnku nintintja tjuṭangku munu Paratji tjuṭaku nintintja tjuṭangku kulukuluya ilatu-ilatu mai wantipai Godala tjapintjikitjangku, palu nyuntumpa nintintja tjuṭangkuya kutjupa-ara Godala tjapintjikitjangku mai wantinytja wiyangku titutjarangku ngalkuni."

³⁴⁻³⁵ Ka Jesulu wangkangu, "Wiya, nyura panya Moseku tjukurwanu nyinapai tjuṭa, palu ngayuku nintintja tjuṭaya ara kutjupawanu nyinanyi ara kuwaritjangka ngayulu nintintjitjangka, ka ara nyanga paluru pula titutitu ngaranya tjungu wiya. Wanyuya kulila ara panya watingku kuri altinytja, panya nyara palula ara kuri altinyangka wati panya palumpa malpa tjuṭangku tjunguringkula pukularira mai

ngalkupai wantinytja wiyangku. Palu ngula wati panya palunya kutjupa tjuantangku witira katinyangka malpa tjuantangku palumpa tjituru-tjitururiku munuya nyara palulanguru kutju mai wantira nyinaku.”*

³⁶ Munu Jesulu tjanala tjukurpa ara kutjupatjara wangkangi nyanga alatji, “Kulilaya ara mantaratjara! Panya anangungku palumpa upukuta irititja alaringkunyangka, ala angatjungkuntjikitjangku upukuta kuwaritjanguru, mantara tjukutjuku katara, upukuta panya irititjangka tjungura wakantja wiyangku wantipai, paltjinnyangka katakatinytjaku-tawara. Panya upukuta palunya paltjinnyangka mantara panya tjungura wakantjanya tjukutjukuringkupai, munu upukuta panya irititja ilara katantankupai, ka ala pulkaringkupai. Ka paluru panya upukuta kuwaritjangka kulu putu tjarpanyi, panya paluru mantara tjukutjuku palulanguru katara mantjinu, ka upukuta paluru kulu kuraringkupai.

³⁷ “Munuya piruku ara kutjupa kulu kulila palu purunypatu wainaku yakutjatjara. Panya watingku kukaku miringuru yakutja palyalpai waina kuwaritja tjutira kanyintjikitjangku. Palu paluru yakutja irititjangka waina kuwaritja tjutilpai wiya, panya waina kuwaritja tjutinnyangka wainaku panya wiya yakutja unngu lipiringkupai, ka kukaku miri irititja pilti ngaranytjatjanu tjilpiraralpai, ka waina mantangka tjutira wiyaringkupai. ³⁸ Pala palula-tawara paluru waina kuwaritja yakutja miri kuwaritjangka tjutilpai tjulangka, ka wainaku wiya lipiringkunyangka yakutja kulu lipiringkupai tjilpirarantja wiya.

³⁹ “Ka anangu waina irititja tjikilpai tjuaya waina kuwaritjaku putu mukuringkupai, panya tjana wangkapai, ‘Waina nyanga irititja mayu wiru mulapa, ka kuwaritja mayu wiya, nyampa nguwanpa.’” Alatji Jesulu tjanala wangkangi tjana palumpa tjukurpa munu Moseku tjukurpa ngunti junguntjaku-tawara.

6

Tjintu Milmilta Wangkanytja

(*Matthew-ku 12:1-8; Markaku 2:23-28*)

¹ Kutjupa-ara Saturday-ngka tjintu panya pakuwiyaringkupaingka Jesunya tjana kaanawanu anangi mai wiita tjuantangka unnguwanu. Kaya palumpa nintintja tjuantangku uninypa marangku mantjira runyura ngalkukatangi.

² Palu Paratji tjuantangku tjananya nyakula wangkangu alatji, “Nyura nyaaku tjintu nyanga pakuwiyaringkupaingka mai uninypa urani? Panya alatji palyara nyura warkarinyi munuya nganampa ara kurani, panya tjukurpa ngaranyi tjintu nyanga milmilta warkarinytja wiyangku wantinytjaku.”

³⁻⁴ Ka Jesulu wangkangu tjanala, “Palu nyura wanyu nyiringka nyakunyta wiyatu panya iriti mayatja Davidalu paltjatjiratjarira Godaku tiinta milmilta tjarpara mai panya milmilmaru tjunkunytja ngalkunu munu palumpa tjungutja tjuata kulu ungu ngalkula

* **5:34-35** Nyanga alatji Jesulu palurunku wangkangi panya ngulaya palumpa mirpantju tjuantangku palunya witira katingu munuya pungu, kaya palumpa nintintja tjuata pulkara tjituru-tjitururingu munuya mai ngalkuwiya wantira nyinangi.

paljtjaringkunyjtaku. Palu panya tjukurpa ara ngaranyi tjukurtjara tjtutangku kutju mai nyara palunya ngalkuntjaku. Ka paluru tjana tjukurpa ara nyanga palunya kulira wantingu munuya mai ngalkunu, palu kutjupa tjtutangku tjananya paintja wiyangku wantingi paljtjtjiratarira ngalkunnyangka.”

⁵ Munu Jesulu piruku wangkangu alatji, “Uwa, nyura uti kulinma panya ngayulu Watiku Katjanya mayatja pulka mulapa nyinanyi, mununa ngayulu alatjitu wangkapai kutjupa kutjupa tjuta tjintu panya pakuwiyaringkupaingka palyantjaku.”

Wati Mara Wawanypa Palyantja
(Matthew-ku 12:9-14; Markaku 3:1-6)

⁶ Munu Saturday kutjupangka tjintu panya pakuwiyaringkupaingka Jesulu wali inmatjangka tjarpara anangu tjtutangku nintiningi. Ka wati kutju nyara palula nyinangi mina waku nyuti-nyuti tiwilpa.

⁷ Kaya wati Moseku tjukurpa nintilpai tjtutangku Paratji tjtutangku kulu ilangku nyangangi tjintu panya pakuwiyaringkupaingka pikatjara palyarungunnyangka nyakula palunya kuranmankunytjikitjangku. Munuya kulinigi, “Tjinguru kuwari wati nyanga paluru wati nyanga mina tiwilpa palyarungulku tjintu nyanga pakuwiyaringkupaingka.”

⁸ Ka Jesulu nintingku kulinigi tjana unngu kulinnnyangka munu wangkangu wati panya pikatjarangka, “Pakala munu pitjala nyanangka ngururpa ngara.” Ka wati panya paluru mulapatu pakanu munu pitjala ngarangu tjanala ngururpa. ⁹⁻¹⁰ Ka Jesulu tjapinu tjanala, “Nyaalkula wanyu tjintu pakuwiyaringkupaingka? Palyaringkunyjtakula palyalku munta kuraringkunyjtakula wantiku? Anangula alpamilalku munta iluntankukula?” Munu alatji wangkara tjananya para-nyakula wanara wati panya mina tiwilpangka wangkangu, “Mina pala warariwa!” Ka mulapatu ngalya-wararingu munu mina panya paluru palyaringu alatjitu.

¹¹ Kaya Paratji tjtutangku Moseku tjukurpa nintilpai tjtutangku kulu nyakula pulkara mirpanaringu munuyanku wangkara kulinigi, “Yaaltjingalkula wati nyanga palunya? Panya nyanga paluru kutjupa kutjupa tjuta tjintu pakuwiyaringkupaingka palyara Moseku tjukurpa kurani.”

Jesulu Nintintja 12 Ngurkantankunytja
(Matthew-ku 10:1-4; Markaku 3:13-19)

¹² Tjintu kutjupa Jesunya anu pulikutu Godala tjapintjikitja munu tjapira tjinturingu.

¹³ Munu tjinturingkula palumpa panya malpa tjuta altingu munu tjanalanguru wati 12 ngurkantanu palumpa nintintja tjuta nyinanytjaku munu tjananya ininu *Iyantja Tjuta*.

¹⁴⁻¹⁶ Paluru ngurkantanu Simonnga, munu palunya ini kutjupa tjunu Peternya,* munu palumpa malanypa kulu ngurkantanu Andrewnya. Munu palulanguru ini nyanga palunya tjananya kulu ngurkantanu Jamesanya, Johnnga, Philipanya, Patjalamunya, Matthewnya, Thomasanya, munu James kutjupa panya Alpi-yatjaku katja, munu Simon kutjupa kulu ngurkantanu, panya paluru Rome-anya ngurara

* 6:14-16 Ini nyanga Peternya wangkanyi “apu walu.”

tjuta Israeltanguru paira iyantjikitja pulkara mukuringkupai. Munu Jesulu ngurkantanu Jude-anya Jamesaku katja, munu panya pungkuntjaku nintilpainya kulu ngurkantanu wati Judasanya ini kutjupa Kariyatanya.

Jesulu Wangkanytja Munu Palyarunguntja
(Matthew-ku 4:23-25)

¹⁷ Munu palulanguru Jesunya pulinguru ukalingu palumpa iyantja tjuta kulu munuya mantangka wirkara ngarangi. Kaya anangu winki mulapa palunya wanalpai kutjupa tjuta kulu Jesula tjanala tjunguringu ngura tjutanguru Jerusalemalanguru munu Tayala Tjaitanta tjanalanguru kulu.

¹⁸ Nyara paluru tjanaya pitjangu Jesulu tjukurpa wangkanyangka kulintjikitja kaya tjanala tjungu pitjangu pikatjara tjuta munu mamutjara tjuta kulu paluru palyarunguntjaku. Ka paluru tjananya pikatjara uwankara palyarungunu munu mamu tjuta kulu tjanalanguru painu.

¹⁹ Uwa, Jesulu witulya pulkangku tjananya pampura palyarunguningi pikatjara uwankara. Kaya anangu winkingku mara katuningi palunya pampura palyaringkuntjikitjangku.

Pukulmankunytja Munu Ngulutjunkunytja
(Matthew-ku 5:1-12)

²⁰ Ka Jesulu palumpa nintintja tjuta nyakula tjanala wangkangi alatji, "Nyura kutjupa tjuta ngalutjara nyinanyi ulytja tjuta kanyintja wiya. Palu nyuranya Godalu mayatja pulkangku walytjanmara kanyini, ka palulanguru nyura pukulpa nyinaku.

²¹ Nyura kutjupa tjuta paljatjiratja nyinanyi mai wiya.

Palu nyuranya Godalu alatjitu paljalku pukulpa nyinanytjaku, ka palulanguru nyura pukulpa nyinaku.

Nyura kutjupa tjuta tjituru-tjituru nyinara ulanyi.

Palu nyuranya Godalu ikaringkuntjaku palyalku, ka palulanguru nyura pukulpa nyinaku.

²²⁻²³ "Ngayulu panya Watiku Katjanya Godalu panya iyantja, ka nyura ngayunya wanannyangka anangu kutjupa tjuta tjinguru nyurampa kuraringkuku munuya nyuranya paira iyalku. Tjinguruya nyuranya warkira kurara pungkuku munuya nyuranya ngunti kuranmankuku tjukurpa ngunti tjuta tjungura wangkara. Palu tjana alatjinnannyangka nyura wantima munu nyara palulanguru nyura pukulpa nyinaku. Panya iriti tjanampa walytjapitingku palu purunytju Godaku wangkatjara tjuta kuraningi. Ka tjana kuwari nyuranya palu purunytju kurannyangka nyura uti Godaku pulkara pukularira wararakatima, panya paluru nyurampa wiru mulapa ungkuntjikitjangku patara kanyini ngura nyara ilkarangka." Alatji Jesulu tjanala wangkangi palumpa nintintja tjutangka.

²⁴ Munu palulanguru paluru anangu kutjupa tjutangka wangkangi alatji,

"Kulilaya mani ulytja pulkatjara tjuta! Panya nyurampa tjituru-tjituru pulka ngula ngaraku.

Panya nyura mantangka nyanga pulkatjara pukulpa nyinanytjanu ngula pika pulkangka nyinaku tjituru-tjituru.

²⁵ Kaya palta nyinanytja tjuta kulu kulila! Panya nyurampa tjituru-tjituru pulka ngula ngaraku.

Panya nyura mantangka nyanga pal̄tja nyinanytjatjanu ngula pal̄tjatjiratja pul̄ka nyinaku.

Kaya ikaringkupai t̄juta ngapartji kulila! Panya nyurampa t̄jituru-t̄jituru pul̄ka ngula ngaraku.

Panya nyura mantangka nyanga ikaringkula pukulpa nyinanytjatjanu ngula t̄jituru-t̄jituru pul̄ka nyinara ulaku.

26 “Uwa, nyura pukularipai an̄angu uwankarangku nyuranya mirawanira walkunnyangka. Palu nyurampa t̄jituru-t̄jituru pul̄ka ngula ngaraku. Panya iritiya nyurampa wal̄ytjapiti t̄jutanku palu pur̄unyt̄jutu wati wangkatjara ngunti t̄juta mirawan̄ingi t̄jukurpa ngunti wangkanyangka.”

Alatji Jesulu an̄angu kutjupa t̄jutangka wangkangi.

Nyurampa Mirpantju T̄jutaku Mukuringkunȳtjaku
(Matthew-ku 5:38-48; 7:12)

27-30 “Palu nyuralana wangkanyi ngayula kulilpai t̄jutangka nyanga alatji nyurampa mirpantju t̄jutaku pul̄kara mukuringama munuya wiru palyanma nyurampa kuraringkupai t̄jutaku kul̄u. Pukulmanamaya nyuranya kurannyangka munuya tjanampa Godala t̄japinma nyuranya kurara pungknyangka. T̄jinguru kutjupangku nyuntunya anara mita-mita pungknyangkampa mita-mita kampa kutjupa nintila piruku pungknȳtjaku. T̄jinguru kutjupangku nyuntumpa upukuta paunt̄jingara nyuntulanguru t̄julyannyangkampa mantara nyuntu kanyintja kutjupa kul̄u ungama palunya. Munu an̄angungku ngat̄jinnyangka ngalt̄uringkula ungama munu kutjupangku nyuntumpa kutjupa kutjupa katinyangkampa wantima wanara malakungku t̄julyalwiyangku.

31 “Uwa, panya nyura mukuringanyi an̄angu kutjupa t̄jutanku nyurampa wirura palyant̄jaku. Palu wanyu nyura alat̄jitu tjanampa mukulyangku wirura palyanma wantinytja wiyangku.

32-33 “T̄jinguru nyura an̄angu kutjupaku mukuringanyi paluru nyurampa mukuringkunyangka kutju. Ka Godalu nyakula nyurampa pul̄kara pukulariku? Wiya, panya an̄angu kura t̄juta palu pur̄unypatu nyinanyi munuya ngapartji mukuringkunyangka kutju mukuringkupai. Palu nyura uti nyurampa kuraringkupai t̄jutaku mukuringama alat̄jitu munu tjanampa wiru palyanma.

34 “T̄jinguru nyura an̄angu kutjupa wiru kutju ungkupai kulira paluru ngula ngapartji wirungku ungkunȳtjaku. Ka Godalu nyakula nyurampa pul̄kara pukularipai? Wiya, panya an̄angu kura t̄jutanku kul̄u palu pur̄unyt̄ju ungkupai ngapartji ngula ungkunȳtjaku.

35 Palu wanyu Godanya kulinma panya paluru mukuringanyi nyura mirpantju t̄jutaku mukulya pul̄ka nyinanyt̄jaku munu tjanampa wiru palyant̄jaku, munu intjanungku ungkunȳtjaku ngapartji kulin̄tja wiyakitjangku. Ka nyura palulanguru ngula pul̄ka mulapalta mant̄jilku Godalu ungkunyangka munu nyura God Katutja Pul̄kaku katja un̄talpa mulapa nyinaku, panya paluru an̄angu kuralpai t̄jutaku mukuringkupai alat̄jitu munu kulira wantipai t̄jutaku kul̄u.

36 Uwa, ngalt̄unyt̄juya nyinama Mama Godanya pur̄unypa panya paluru uwankaraku ngalt̄unyt̄ju nyinanyi.”

Nyakula Kuranmankuwiyangku Wantinytjaku

(Matthew-ku 7:1-5)

³⁷ Munu Jesulu piruku wangkangi alatji, “Anangu kutjupaya nyakula ngurkantara kuranmankuwiyangku wantima. Panya nyura nyanga alatjingannyangka Godalu nyuranya kulu ngula palu purunypatu ngurkantara kuranmankuku. Munuya palu purunytju tu anangu kutjupa nyakula ngukantja wiyangku wantima. Panya nyura nyanga alatjingannyangka Godalu nyuranya kulu ngula palu purunypatu kuranmankuku. Munuya anangu kutjupangku nyuranya kuran-nyangkampa palunya kalypanghu kuralwiyangku wantima, ka Godalu nyuranya palu purunypatu kura palyannyangka nyakula kalypanghu wantiku.

³⁸ Munuya ngaluringkula munytjangku ungama, ka Godalu palu purunypatu nyuranya ngapartji ngaluringkula pulka mulapalta unghuku nyura unghunytjitjangka waintara mulapa. Palu nyura kutjupa tjuta tjukutjuku unghunyangka paluru palu purunypatu nyuranya ngapartji tjukutjuku unghuku.”

³⁹ Munu paluru piruku tjukurpa ara kutjupatarja tjanala wangkangi alatji, “Kulilaya! Wati kuru patingku wanyu wati kuru pati kutjupa katirinkupai? Wiya. Paluru pula kutjaratu piti ngatingka punkalku.

⁴⁰ Munu wanyu piruku kulinma. Anangu nintiringkupai wanyu palumpa nintilpaingka waintaripai? Wiya. Paluru pulkara nintiringkunytjatjanu kutju palumpa nintilpaingka tjungu ngaraku.

⁴¹⁻⁴² “Palu nyaaku nyura anangu kutjupa tjuta wangkara kuranmankupai? Tjinguru nyura nyanganyi Godaku walytja kutjupangka kurungka punu tjilpirpa tjukutjuku ngarinyangka. Palu nyurampa kurungka tjinguru punu pulka ngarinyi. Ka nyura kuru palyangku-palku wangkaku palula alatji, ‘Wanyu kananta punu pala tjilpirpa tjukutjuku mantjira wani.’ Palu wiya, nyura ngunti kuru palyangku-palku kanany-kananytju watarku wangkanyi. Uti nyura nyurampa kurunguru-warara punu pala pulkanya mantjira wanima, munu palulanguru kuru palyaringkula utilta nyakuku, anangu nyara kutjupaku kurunguru tjilpirpa tjukutjuku mantjira waninytjikitjangku.” Alatji Jesulu tjanala wangkangi tjana kura walytjangku-warara tjukarurungku ngurkantankunytjaku munu palulanguru kutju anangu Godaku walytja kutjupa kura nyakula wangkanytjaku.

Pununguru Anangu Wangkanytja

(Matthew-ku 7:15-20; 12:33-35)

⁴³ Munu piruku Jesulu wangkangu tjukurpa kutjupa alatji, “Panya punu wirungka mai kura pakalpai wiya. Ka palu purunypatu punu kurakurangka mai wiru pakalpai wiyatu.

⁴⁴ Panya mai uwankara pakalpai punu walytjangka kutju. Nyura putu ili mantjilpai punu tjilkatjaranguru munu nyura putu kiripitji mantjilpai punu wakalpakanguru.

⁴⁵ Ka palu purunypa anangu palyangku palya tjuta palyalpai, kurunpa palya ngarala. Ka anangu kurangku kura tjuta kutju palyalpai, kurunpa kura ngarala. Panya tjaangku wangkapai unghunguru. Ka kurunpa wiru ngaranyangka, tjaangku wiru kutju wangkapai, palu kurunpa kura ngaranyangka, tjaangku kura kutju wangkapai.”

*Wali Kutjaranguru Tjukurpa Wangkanytja**(Matthew-ku 7:24-27)*

⁴⁶ Munu piruku Jesulu tjukurpa kutjupa wangkangu nyanga alatji, “Nyaakuni nyura ngayunya mayatjanmananyi munu nyura kulira wantinyi ngayulu wangkanytjijta uwankara?”

⁴⁷ Kulilaya, anangu ngayulakutu pitjala munu ngayulu wangkanytjijta wanganarangku kulira palyannyangkampana nyuranya nintilku yaaltji-yaaltji paluru nyinanytja.

⁴⁸ Alatji paluru nyinanyi wati nyanga purunypa, panya paluru wali palyantjikitjangu piti-warara tjawara arintanangi, munu apu tjiwa pulka tjuta ungu tjunkula wanaṅu, munu wituwitu palula tjanala purkarangku wali palyanangi, kuṅpu ngaranytjaku. Ka ngula mina pulkangku pitjala puyinu. Ka uru pulkaringkula katuringu, munu wali panya puṅtu untuningi. Ka witu alatjiṅu ngarangi urinytja wiya.

⁴⁹ Palu anangungku ngayuku tjukurpa kulira wantirampa paluru panya wati nyanga purunypa nyinanyi. Panya paluru wali mantangka warpungkula palyanu, apu tjiwa pulka tjuta-warara tjunkunyitja wiyangku munu mapalku palyara wiyanu. Ka ngula mina pulkangku pitjala puyinu munu uru pulkaringkula katuringu munu wali panya unṅunu. Ka mapalku alatjiṅu pilukatingu.”

7*Wati Rome-anya Ngurara Mulamularingkunyitja**(Matthew-ku 8:5-13; Johnku 4:43-54)*

¹ Munu Jesulu tjanala tjukurpa wangkara wiyaringkula anu ngura Kapunimalakutu.

² Ka ngura nyara palula wati Rome-anya ngurara nyinangi. Wati paluru tjaultji tjuṅaku mayatja. Ka wati nyara palumpa warṅka palyalpai pika pulka ngaringi ilunytjikitja. Ka wati nyanga paluru wati nyara pikatjaraku pulkara mulapa mukuringkupai.

³ Munu paluru kulinu Jesunya ila nyinanytja munu wati Jew tjuṅaku mayatja mankurpa altira wituṅu Jesunya ankula altinytjaku pitjala palumpa panya warṅkaripai pika palyarunguntjaku.

⁴ Kaya mulapatu ankula Jesula wirṅara pulkara tjapiningi palula wangkara, “Nyuntula wangkanytjikitjala pitjangu. Wati nyaratjanku nyuntumpa mukuringanyi nyuntu pitjala alpamiltjaku.

⁵ Wati nyara paluru nganampa Jew uwankarakutu pulkara mukuringkupai munulanya paluru nganananya mani ungu mungatu nganana wali inmatja palyantjaku. Wati wirunya mulapa nyaratja.”

⁶ Ka Jesunya tjanala tjunguringkula anu wati nyara palunya nyakunytjikitja, kaya anangu tjuṅangku kulṅu tjunguringkula wanaṅu palunya. Ka tjana nguwanpa ngurangka ilaringkunyangka wati mayatjangu piruku kulinu munu malpa kutjupa mankurpa wituṅu ngaparikatira Jesula wangkanytjaku. Kaya mulapatu ngaparikatira wangkangu palula alatji, “Awa, wanyu kulila! Wati nyara mayatjankulanya wituṅu nyuntumpa, panya nyuntu mayatja pulka, ka paluru kunṅaringanyi nyuntu palumpa walangka pitjala tjarpanytjaku.

⁷ Munu paluru kunṅaringanyiṅu nyuntulakutu pakara pitjanytjaku, panya paluru mayatja tjukutjuku, ka nyuntu mayatja pulka mulapa nyinanyi. Kalanya wituṅu paluru nyuntula wangkanytjaku, ka kunyu

palya nyuntu nyanganguru wangka, ka wati panya pikatjara palyariwa nyuntu nyanga patunguru mayatjangku wangkanyangka.

⁸ Paluru kunyu ninti nyuntu Godaku warkaripai munu panyan paluru witunnyangka wanganarangku kulira palyalpai. Ka nganampa panya malpa palu purunypatu Rome-aku mayatjangku witunnyangka wanganarangku kulira palyalpai. Munu paluru ngapartji mayatjangkutu tjaultji tjuta wangkara witulpai, kaya palula wanganarangku kulilpai. Ka panya paluru tjananya altipai, kaya mapalku pitjapai. Munu tjananya wangkapai palyantjaku, kaya mapalku palyalpai paluru witunnyangka. Ka paluru kulini panya nyuntu palu purunypa mayatjatu nyinanyi munun panya nyanganguru wangkaku, ka paluru palyaringkuku wati panya palumpa warka nyuntu nyanga patunguru wangkanyangka." Alatjija tjakultjunu Jesula tjanampa mayatjangku wangkanytja.

⁹ Ka Jesulu nyangatja kulira pulkara urulyaranu munu malakukutura wangkangu anangu tjutangka, "Kuwarina nyurala tjukurungku wangkanyi, panya wati nyanga tjaultji tjutaku mayatja wati Jew wiya, munu paluru ngayuku mulamularinganyi pulkara alatjitu anangu Jew tjutangka waintara. Panya ngura nyanga Israelta ngayulu anangu Jew kutjupa wati nyangatja purunypa pulkara mulamularingkunyangka nyakunytja wiyatu."

¹⁰ Ka wati panya tjakulpa ngaparikatinytja mankurpa malaku anu tjanampa malpaku walikutu munuya nyangu wati panya pikatjara ngarinytjatjanu pakara palyaringkula nyinanyangka.

Jesulu Wanakalaku Katja Wankantja

¹¹ Munu nyanga palula malangka tjukutjuku nyinara, Jesunya anu tawunu ini Naintakutu palumpa nintintja tjutatjara. Kaya anangu kutjupa tjuta kulu palula tjunguringkula anu.

¹² Munuya nguwanpa tawunu panya Nainta kaitangka milaringkula nyangu, anangu nguratja tjutangka wati ilunytja punu pakutjangka tjunkula tjalira ngalya-pakaltjingannyangka, urilkutu tjunutjungkunytjikitjangku. Ka wati nyara ilunytjanya panya minyma wanakalaku katja kutju alatjitu. Kaya anangu tjuta minyma palula tjungutu ngalya-ulara pakanu urilkutu.

¹³ Ka Mayatjalu minyma palunya nyakula pulkara ngalturingu panya paluru kurunpa winki tjituru-tjitururira katakatingu palumpa katja kutju-tjiratja. Ka wangkangu palula, "Ulanytja wiya."

¹⁴ Munu ankula wati panya ilunytja pampunu. Kaya wati panya tjuta palunya tjalira katinytjatjanu ngarakatingu. Ka wangkangu, "Wati awa! Wangkanyinanta, pakala!"

¹⁵ Ka wati panya ilunytja mapalku pakanu munu nyinara wangkangi. Ka Jesulu minara katira palumpa ngunytju ungu.

¹⁶ Kaya anangu tjutangka nyangatja nyakula nguluringu munuya Godanya walkuningi. Munuya alatji wangkangi, "Awari! Wangkatjara pulka mulapa Godalanguru ngananala wirkanu. Tjinguru Godanya nyangatja pitjangu nganananya wankarunkunytjikitja."

¹⁷ Ka tjukurpa nyanga Jesunyatjara lipiringu ngura winkingka.

Johntu Wituntja Jesula Tjapintjaku (Matthew-ku 11:1-19)

18 Kaya Johnku nintintja tjuṭangku ankula Johnta tjakultjunu tjailangka nyinanyangka tjana uwankara nyakunytjatjanungku munu kulintjatjanungku Jesulu palyantja munu wangkanytja.

19 Ka paluru wati kutjara wituṇu ankula Jesula tjapintjaku alatji wangkara, "Mulapan nyuntu panya paluru, panya Johntu tjakultjunangi ngula wankarunkupainya pitjanytjaku? Munta tjinguru nyuntu kutjupa, kantila kuwaripatu paṭanma."

20 Kaya mulapatu ankula Jesula wirkanu munuya wangkangu, "Johntu panya baptise-katipaingkulanya wituṇu nyuntula tjapintjaku alatji, 'Mulapan nyuntu panya paluru, panya Johntu tjakultjunangi ngula wankarunkupainya pitjanytjaku? Munta tjinguru nyuntu kutjupa, kantila kuwaripatu paṭanma.' "

21 Ka tjintu nyara palula Jesulu pikatjara tjuṭa palyarunguningi pika kutjupa kutjupa tjuṭatjara munu mamu tjuṭa kuḷu painingi anangu tjuṭanguru, ka wati panya kutjarangku nyangangi.

22-23 Ka palulanguru wangkangu pulala, "Ankula pula Johnta tjakultjura kuwari nyanga kulira nyakunytjatjanungku, panya kurutjara tjuṭangku nyanganyi, nyumpu tjuṭa pakanu, miri pikatjara tjuṭa palyaringu, pina pati tjuṭangku kulini, munu anangu ilunyitja tjuṭa kuḷu wankaringkula pakanu. Kaya ngaltutjara tjuṭangku kuḷu Tjukurpa Palya ngayulu tjakultjunksunyangka kulini. Uwa, ankula pula Johnta wangka ngayunya tjukarurungku kulintjaku, panya paluruna ngayulu. Panya anangumpa ngayuku pulkara mulamularingkunyangka Godalu palunya pukulmankupai."

24 Ka wati panya kutjara Johntakutu malaku ankunyangka Jesulu anangu tjuṭangka wangkangi tjukurpa Johnngatjara alatji, "Nyura panya mungatu ilytjikutu anu wati panya Johnnga nyakunytjikitja. Palu nyaaku nyura palunya nyakunytjikitja anu? Paluru wanyu wati upa, panya nyalpi walpangku uritjingannyangka uripai, palu purunypa? Wiya, wati paluru ngulunyitju nyira rapangku alatjitu wangkapai.

25 Palu nyaaku nyura palunya nyakunytjikitja anu? Tjinguru nyura anu mantara wirutjara ngaranyangka nyakunytjikitja. Palu wiya, Johnnga palu purunypa wiya, panya wati mantara wirutjara mayatja pulkaku walingka kutju nyinapai ilytjingka wiya.

26 Tjakultjuranija! Nyaaku nyura palunya nyakunytjikitja panyatja anu? Wiya, Godaku wangkatjarangku wangkanyangka kulintjikitja nyura anu, panya paluru Godaku wangkatjara pulka mulapa nyinanyi kutjupa uwankarangka munkara.

27 Panya tjukurpa palunyatjaraya nyiringka iriti walkatjunu Godalu wangkanytja nyanga alatji, 'Ngayulunatju tjakulpa witura iyalku nyuntula kuranyu.

Ka nyara paluru ankula kuranyungku nyuntumpa iwarankuku mayatja pulka pitjanytjaku.' " *"

28 Munu Jesulu piruku wangkangu tjanala, "Wati nyanga Johnnga pulka mulapa nyinangi, ka nyanga palu purunypa anangu kutjupa nganmanypa nyinanytja wiya alatjitu. Palu nyanga palulanguru kuwari ara kutjupa ngarakatinyi, panya Godalu anangu tjuṭa walytjanmara mayatjangku kanyini tjitji tjukutjuku tjuṭa kulukulu, kaya

* 7:27 Malakaiku 3:1

paluru tjana uwankara Johnta waintara pulka mulapa nyinanyi tjitji tjukutjuku tjuṭa kulu." Alatji Jesulu tjanala wangkangi Johnngatjara.

²⁹ Panya anangu nyanga paluru tjana uwankarangu nganmanytju kuliningi Johntu wangkanyangka ilytjingka, wati kamantaku mani mantjilpai tjuṭangu kulu panya nyara paluru tjana kulira mulamularingu, "Munta mulapa Godaku tjukurpa tjukaruru alatjitu." Munuya wanganara mukuringu Johntu baptise-katinytjaku kuranguru piiwiyaringkula.

³⁰ Palu Paratji tjuṭangu munu Moseku tjukurku ninti tjuṭangu kuluya paluru wangkanyangka kulira wantingi, munuya wantingi alatjitu piiwiyaringkula mukuringkunyitja wiyangu Johntu urungka baptise-katinytjaku.

³¹ Munu Jesulu piruku wangkangu tjanala, "Palu nyura kutjupa tjuṭa wanyu nyaa purunypa nyinanyi?"

³² Wiya, nyura tjitji tjuṭa purunypa kulira wantipai, panya tjitji utulu kutju nyinara mirara ngaparku wangkapai alatji, 'Inma wirula inkara wangkatjanganingi, ka panya nyura pitjala nyanpinytja wiyangu wantingi.' Kaya utulu kutjupangu ngapartji wangkapai, 'Uwa, ka panya nganana ngapartji ulara inma tjituru-tjituru inkangi, ka nyura kulira tjunguringkula ulanytja wiyangu wantingi.'

³³ Nyanga palu purunypa panya nyura Johnnga ngalinya kulira wantingi. Panya Johnnga pitjangu munu paluru mai waina kulu tjikintja wiyangu wantingi Godaku waraka palyantjikitjangku. Ka panya nyura palunya alatji nyinanyangka nyakula mamutjaranmanangi.

³⁴ Ka ngayulu Watiku Katjanya pitjangu mununa mai pulka nguwanpa ngalkula waina kulu tjikiningi Johnnga purunypa nyinanytja wiyangu, ka nyura ngayunya nyakula palu purunypatu kuranmanangi alatji wangkara, 'Palatja wati maiku manyu, wainaku kulu, munu anangu kura tjuṭangka malparingkula tjungu nyinapai, panya wati mani mantjilpai tjuṭangka munu anangu kura kutjupa tjuṭangka kulu.'

³⁵ "Palya nyura alatji kanany-kananytju wangkapai palya-palku nyinara. Palu nyangatjaya kulila, panya Godanya ninti pulka nyinanyi munu iwara tjukaruru palyanu anangu tjuṭangu wanantjaku, ka iwara nyara palunya wanalpai tjuṭangu kulilpai, 'Munta-uwa, iwara nyangatja Godalu kulira palyanu, anangungku wiya.' "

Minyma Jesulakutu Pitjanytja

³⁶ Ka wati Paratjinku ini Simontu Jesunya altingu palumpa ngurangka mai ngalkuntjaku munuya tjunguringkula ngalkuningi palumpa walingka.

³⁷ Ka tawunu nyara palula nyinangi minyma kura mulapa munu paluru kulinu Jesunya Simonku walingka nyinanyangka munu uwila wiru pantipai mantjira pitjangu Jesulakutu.

³⁸ Munu wirkara nyangu tjana taipulangka antangu para-ngarira arintara mai ngalkunyangka, munu tjarpara Jesula malarku ngarala ulangi. Ka ilanypa palula tjinangka punkaningi, ka pupakatira mangkangka munira tjina nyunytjuningi munu uwila panya wiru pantipai tjutiningi palula tjinangka.

³⁹ Ka wati panya Simontu nyangatja nyakula unngu kuliningi alatji, "Ai! Wati wangkatjara-palkuna nyangatja kulinu. Uti nyanganguku

wangkatjarangkumpa ngurkantanama minyma nyanga kurangku pampunnyangka. Palu nyaaku nyanganku pailwiyanku wantinyi.”

⁴⁰ Ka Jesulu Simonta wangkangu, “Ngayulu nyuntula wangkanytijk-itja mukuringanyi.”

Ka wangkangu, “Palya nintilpai, wangkani kana kulila.”

⁴¹ Ka Jesulu wangkangu, “Wati kutjara nyinangi munu pula ngatjinu wati mani kanyilpaingka. Kutjungku ngatjinu \$25,000-ku, ka kutjungku ngatjinu \$2,500-ku, ka pulanya tjarara ungu ngula ngapartji malakungku ungkunyjtjaku.

⁴² Palu wati panya kutjaranku puṭu kuliningi malakungku ungkunyjtjikitjangku. Ka pulanya wati panya mani kanyilpaingku kalypangku palyanmanu munu pulanya wantir'iyanu.” Munu wangkara wiyaringkula tjapinu Simonta ngapartji, “Ala, wangkani! Yaaltji pulkara mukuringu wati mani kanyilpaiku?”

⁴³ Ka paluru wangkangu, “Wati panya pulka mantjintjanya.”

Ka Jesulu wangkangu, “Tjukururungkun wangkangu.”

⁴⁴ Ka Munu Jesulu minyma panya nyakula Simonta wangkangu, “Nyuntu wanyu minyma nyangatja nyanganyi? Ngayulu nyuntumpa ngurakutu pitjangu, kan ngayunya mina ungkunyjtja wiyanku wantingi tjina paltjintjaku, palu nyanga paluruṅni paltjinu palumpa ilanypanangka mununi mangkangka muninu.

⁴⁵ Nyuntu ngayunya nguku kutjara nyunyjtjura pukulmankunyjtja wiyanku wantingi, palu nyanga paluruṅni tjina rawanku nyunyjtjuningi wantinyjtja wiyanku.

⁴⁶ Ka nyuntu ngayula katangka uwila tjutintja wiyanku wantingi, palu minyma nyanga paluru kutju ngayula tjinangka tjutinu wiru pantipai.

⁴⁷ Kulinin Simon? Panya Godalu minyma nyanga palunya kura tjuta palyantjijanguru kalypangku wantingu, ka nyara palulanguru paluru ngayuku pulkara mukuringanyi munu paluru ngayuku kuwari palyaningi. Panya anangungku kura pulka tjuta palyantjatjanu piiwiyaringkunyangka Godanya palumpa kalyparinganyi munu kalypangku pungguwiyanku wantinyi, ka pala palulanguru paluru Godaku pulkara mukuringanyi. Ka anangu kutjupangku kura tjukutjuku palyantjatjanu piiwiyaringkunyangkampa Godanya palumpa kalyparinganyitu, ka pala palulanguru anangu nyara paluru Godaku tjukutjukutu mukuringanyi kura tjukutjukunguru palumpa kalyparingkunyangka.”

⁴⁸ Munu Jesulu wangkangu minyma panya palula, “Godalu nyuntunya kura tjuta palyantjijanguru kalypangku wantinyi.”

⁴⁹ Kaya anangu kutjupa tjutangku tjungu nyinanyjtjanungku ungu nyararingkula kuliningi alatji, “Nyaa nyanganku wangkanyi? Panya Godalu kutjungku wangkapai kura palyantjijanguru kalypangku pungguwiyanku wantinyjtjikitjangku?”

⁵⁰ Palu Jesulu piruku wangkangu minyma panya palula, “Nyuntu ngayuku mulamularingkunyangka Godalu nyuntunya kuranguru wankarunu. Ka ankula pukulpa nyinama!”

8

Minyma Jesunya Alpamilalpai Tjuta

¹ Nyangangka maḷangka Jesunya pakara anu ngura pulka tjuṭakutu munu tjukutjuku tjuṭakutu kulu munu tjukurpa palya para-wangkangi anangu tjuṭangka. Munu tjakultjunangi Godalu anangu tjuṭa may-atjangku walytjanmara kanyintja. Kaya nintintja panya 12 munu minyama tjuṭa kulu palula tjungutu para-ngarangi.

² Minyama nyara paluru tjana panya nganmanypa mamutjara nyinangi munu pika kutjupa kutjupa tjuṭatjara kulu nyinangi. Ka tjananya Jesulu uwankara palyarungunu, kaya pukularira palunya wanarinangi. Ka panya minyama kutju ini Mary Magdalene-anya* nganmanypa mamu 7-tjara nyinangi, ka Jesulu uwankara painu.

³ Ka kutjupa Tjuwananya panya Tjutjaku kuri. Wati nyara paluru mayatja pulka Irataku walingka warkaripai. Ka minyama kutjupa ini Tjutjananya munu minyama kutjupa tjuṭa kulukulu. Minyama nyanga paluru tjanaya Jesunya tjananya alpamilanangi mai kuka tjananya paura ungkula munuya kutjupa kutjupa tjuṭa kulu palumpa tjanampa palyaningi palumpa tjanampa maninguru.

Tjukurpa Uninyapa Wanira Wanantja
(Matthew-ku 13:1-9; Markaku 4:1-9)

⁴ Kaya anangu tjuṭangku Jesunya pitjanyangka kulira ngura kutjupitja tjuṭa kulu pitjangi nyakunytjikitja munu kulintjikitja kulu. Ka Jesulu tjanala tjukurpa ara kutjupatjara wangkangi alatji,

⁵ "Wati kutju ma-pitjangu uninyapa mantangka wanira wanantjikitja palumpa kaanangka munu wanira wananingi. Ka uninyapa wanira waninyangka tjara iwarangka punkanu. Ka anangu tjuṭangku iwarangka paltjura ankula tjinangku kuranu, ka tjuṭpu tjuṭangku kulu pitjala ngalkula wiyanu.

⁶ Ka uninyapa kutjupatjara punkanu manta pulitjarangka, munu pakara mapalku piltiringu mina wiyangka.

⁷ Ka uninyapa kutjupatjara punkanu manta tjilkatjarangka, ka pakannyangka tjilka tjuṭa kulu pakara pulkaringu munu ukiri panya waninytjanya utjunu, ka putu pulkaringangi.

⁸ Ka tjara kutjupa manta palyangka punkanu munu mapalku pakara pulkaringu munu mai 100-tjararingu."

Munu Jesulu ara nyanga palunya wangkara wiyaringkula tjanala wangkangu alatji, "Uwa, nyura pina alangku kulirampa ngalya-kulinma tjukurpa nyanga ngayulu kuwari nyurala wangkanytja."

Tjukurpa Panya Uninyapatjara Utira Wangkanytja
(Matthew-ku 13:10-23; Markaku 4:10-20)

⁹ Kaya ngula palumpa nintintja tjuṭangku palula tjapiningi wangkara, "Wanyulanya tjukurpa nyanga palunya utira tjakultjura. Nyaa nyanganku nintini?"

¹⁰ Ka paluru tjanala wangkangu, "Uwa, ngayulu nyurala kutju Godaku tjukurpa kumpilitja utira wangkanyi, tjukurpa panya Godalu anangu tjuṭa mayatjangku walytjanmara kanyintjatjara. Palu anangu kutjupa tjuṭangkana ara mantatja tjuṭa wangkara kampa kutjupara wangkapai, kaya tjukurpa wangkanyangka kulilpai palu putuya kulira nintiringkupai."

* 8:2 Magdalene-anya panya Makata-linanya

11 Munu paluru tjanala wangkangu, “Kulilaya, kaṅa tjukurpa panya palunya nyurala utira tjakultjura! Panya wati kaana kanyilpaingku uninyapa waninyi, ka palu purunypa wati tjukurtjarangku Godaku tjukurpa tjakultjunkturpai anangu tjuṅangku kulintjaku.

12 Ka anangu kutjupa tjaraya nyinanyi uninyapa panya iwarangka punkantja purunypa. Nyara paluru tjana panya tjukurpa kulilpai, palu mamu Satantu pitjala tjananya pina kuralpai tjana tjukurku mulamularingkula wankaringkunyjtaku-tawara.

13 “Kaya anangu kutjupatjara nyinanyi uninyapa panya manta pulitjarangka punkantja purunypa. Panya tjana tjukurpa kulira pulkara pukularipai, palu tjana mulamulangku kuruntu tjukurpa mantjintja wiya unytju kutju mulamularingkupai. Munu ngula palumpa tjanampa tjituru-tjituru wirkankunyangka tjana mapalku paturingkula Godaku watarkuripai.

14 “Kaya anangu kutjupa tjuṅa nyinanyi uninyapa panya tjilangka punkantja purunypa, panya tjana tjukurpa kulira mulamularingkupai, palu tjana mantatja kutjupa kutjupa tjuṅa pulkara kulira, wiru tjuṅa kanyintjikitja mukuringkupai munuya kutjupa kutjupa wiru tjuṅaku ngunti pukularipai. Munuya nyanga palula tjanalanguru Godaku tjukurku watarkuripai munuya wiru tjuṅa Godaku puṅu palyalpai.

15 “Kaya anangu kutjupatjara nyinanyi uninyapa panya manta palyangka punkantja purunypa, panya tjana tjukurpa wanganarangku kulira pulkara mulamularingkupai. Munuya rawangku kulira wiru tjuṅa kutju Godaku palyalpai, tjanampa tjituru-tjituru wirkankunyangka kulintja wiyangku.”

Lampa Tilira Uti Tjunkunyja
(Markaku 4:21-25)

16 Munu piruku tjanala wangkangi, “Anangungku wali unngu lampa tilira pitingka anga-tjunkturpai wiya, munu piitangka unngu tjaru kulu tjunkula kutitjunkturpai wiya. Palu uti tjunkturpai, katu, tili paluru irnyara utintjaku anangu tjuṅangku walingka tjarpara nyakunyjtaku.

17 “Ka Godaku tjukurpa palu purunypa, panya ngayulu kuwari anangu tjuṅangka kitikiti wangkanyi ara tjuṅa kutju wangkara, kaya puṅu nguwanpa kulini. Palu ngula tjukurpa nyanganpa uwankara utiringkuku anangu winkingku kulintjaku. Panya Godalu tjukurpa kumpilpa kanyintjatjanungku utilku, kaya winkingku kulilku.

18 Ka nyura palulanguru purkarangku kulinma ngayulu wangkanyangka. Panya nyura wanganarangku kulinnyangkampa nyuranya Godalu pulka mulapa nintilku nyura uti kulintjaku. Palu nyura tjinguru kulira wantinyangkampa Godalu nyuranya kulintja kampa kutjupankuku palumpa watarkurinyjtaku.” Alatji Jesulu tjanala wangkangi.

Jesuku Ngunyjtju Munu Malanypa Tjuṅa
(Matthew-ku 12:46-50; Markaku 3:31-35)

19 Ka Jesuku ngunyjtju munu malanypa tjuṅaya palulakutu pitjangu, palu anangu tjuṅa mulapa anga-ngaranyangkaya puṅu palulakutu ilaringangi.

²⁰ Ka anangu kutjupangku Jesula wangkangu, “Nyaratja nyuntumpa ngunyntju malanya tjuta kulu urilta ngaranyi nyuntumpa patara munuya mukuringanyi nyuntunya nyakunyntjikitja.”

²¹ Ka Jesulu wangkangu alatji, “Wiya, panya Godaku tjukurpa wanganarangku kulira palyalpai tjuta, nyara paluru tjanaya ngayuku ngunyntju malanya kulu nyinanyi walytja mulapa.”

Jesulu Walpa Pulka Atanmankunyntja

(*Matthew-ku 8:23-27; Markaku 4:35-41*)

²² Tjintu kutjupa Jesunya palumpa nintintja tjutatjara pautangka tatinu uru panya Galileela munu wangkangu tjanala, “Wanyula manta nyara kutjupakutu urungka mun kara ma-itipiri.”

²³ Munuya mulapatu ma-pitjangu pautangka panya munuya urungka ngururpa pitjalinangi. Ka Jesunya pilu-piluringkula kunkunaringu. Ka palulanguru walpa pulka mulapa mapalku rurku winki pakanu uru palula ngururpau pitjalinkunyangka. Ka uru pulkara urira pautangka tjarpangi munu pauta panya palunya nguwanpa tjarura tjarpatjunangi urungka unngu. Kaya uwankara pulkara nguluringu.

²⁴ Munuya Jesunya wankara wangkangu, “Mayatja, kuwarila ilunyi!” Ka Jesulu pakara walpa panya wangkara atanmanu munu uru kulu wangkangu tiwilarinyntjaku, ka walpa panya atanaringu munu uru kulu urinyntja wiyaringkula tiwilaringu.

²⁵ Munu palulanguru Jesulu wangkangu palumpa nintintja tjutangka, “Nyaanguru nyura putu mulamularinganyi?”

Palu tjana wangkanyntjaku putu kulinu panya tjana nyakula uwankara urulyarara nguluringu. Munuyanku wangkara kulinungi alatji, “Wati nyaa nyangatja? Panya walpangku urungku kulu palula wanganarangku kulilpai.”

Jesulu Wati Mamutjara Palyarunguntja

(*Matthew-ku 8:28-34; Markaku 5:1-20*)

²⁶ Munuya palulanguru ma-wirkanu urungka itipi mantangka ngura ini Karatjala itingka.

²⁷⁻²⁹ Ka Jesunya pautanguru ukalingkula ngarangi urungka itingka, ka wati mamutjara ngura nyara palunya ngurara palulakutu ngalya-wirkanu. Wati nyanga paluru rawa mulapa nikit para ngarapai munu wali wantira miriku kulpingka kutju nyinapai. Panya nganmanyntju tjaultji tjutangu tjuta-arangku palunya tjina mara kulu tjiina pulkangka karpira kanyiningi, palu mamungku palunya tjarpara pulkara kunpulpai, ka paluru tjiina katantara ilytikutu wirtjapakalpai mamungku katinyangka.

Ka Jesulu wati palunya nyakula mamu panya painu palulanguru pakantjaku. Ka wati panya paluru pulkara mirara palula kuranyu tjinangka itingka punkanu munu wangkangu, “Jesu, God Katutja Pul kaku Katja! Ngayunya nyaantjikitjan mukuringanyi?” Munu paluru pulkara ngatjira wangkangu, “Wantimani iluntankunyntja wiyangku!”

³⁰ Ka Jesulu wangkangu palula, “Palu nyuntu wanyu ini ngananya?”

Ka wangkangu, “Nganana ini ‘Tjutanya.’” Panya mamu tjuta mulapa wati palula unngu nyinangi.

31 Munuya Jesula tjuṭa-arangku ngatjira wangkangi, “Wantimalanya piti marukutu wituntja wiyangku.

32 Palu witulalanya nyara pikipiki tjuṭakutu, nyara puling kaya ngarala ukiri ngalkuni, palula tjanalakutulanya witula.”

33 Ka tjananya mulapaṭu wituṇu, kaya watinguru panya pakara tjukaruru wirtjapakara pikipiki tjuṭangka tjarpangu. Kaya pikipiki panya tjuṭa mamu tjuṭa tjarpanyangka puli wararangka tjarukutu wirtjapakara ukalingkula urungka uwankara tjarpara ilungu.

34 Ka wati panya pikipiki tjuṭa kanyilpai tjuṭangu nyakula wirtjapakanu tawunukutu, munuya tjakultjunu anangu uwankarangka ngura ititja tjuṭangka kulū.

35 Kaya nyangatja kulira anangu tjuṭa anu nyakuntjikitja munuya wirkara nyangu wati panya palunya Jesula itingka nyinara tjukurpa kulinyangka mantarangka tjarpara. Wati panya paluru kata palyaringkula nyinangi pilunpa, kaya nyakula pulkara nguluringu Jesuku.

36 Munuya anangu kutjupa tjuṭangka para-tjakultjunangi wati panyatja palyaringkunyaangka nyakuntjatjanungku.

37 Kaya ngura palunya ngurara tjuṭangu Jesunya pulkara tjarinu ngura tjanampa rawa nyinawiyangku wantikatinytjaku panya pulkaraya palumpa nguluringu.

Ka Jesunya pautangka tatinu ankuntjikitja.

38 Ka wati panya palyaringkuntjalu pulkara ngatjinu palula tjungu ankuntjikitjangku.

39 Ka Jesulu wangkangu, “Wiya, ara malaku nyuntumpa walytja tjuṭaku ngurakutu munu anangu tjuṭangka tjakultjura Godalu nyuntunya palyantja.” Ka mulapaṭu anu munu ngura nyara palula tjanala para-tjakultjunangi anangu uwankarangka Jesulu palunya palyantja.

*Tjairatjaku Untalpa Munu Minymangku Mantara Pampuntja
(Matthew-ku 9:18-26; Markaku 5:21-43)*

40 Kaya palulanguru Jesunya tjana urungka munkara malaku matipiringu manta panya palulakutu. Ka wirkankunyaangka anangu tjuṭa Jesuku pukularingu ala-ala patantjatjanu.

41-42 Ka wati ini Tjairatjanya wirkanu palula tjanala. Wati nyara paluru wali inmatjaku mayatja nyinangi ngura nyara palula, ka palumpa unṭalpa kungkawara tjukutjuku ngurangka waṭalpi iluntjikitja ngaringi. Ka wati paluru pulkara tjturu-tjtururira Jesula tjinangka itingka tultjungarakatira ngatjiningi palumpa ngurakutu pitjanytjaku. Ka mulapaṭu Jesulu palunya wananu. Kaya anangu winkingu tjunguringkula wanara palunya utjuningi.

43 Ka nyara palula arangka tjanala utu-utu pitjangi minyma kutjupa. Minyma nyara paluru rawa milkali tjuṭipai nyinangi yiya 12 munu paluru rawaṭu ngangkari tjuṭakutu anangi, munu mani pulka tjuṭa tjananya rawangku ungangi palunya palyarunguntjaku. Palu palyaringkuntja wiyatu rawa palurutu ngarangi.

44 Ka minyma paluru kulinu Jesunya munu tjuṭangka unnguwanu pitjangu palulakutu, munu tjanawanungku palumpa mantara wara tjanawanungku kanyintjanya ankala kumpiltu pampunu. Munu mapalku milkali panya palumpa piltiringkula wiyaringu munu palyaringu.

⁴⁵ Ka Jesulu kulira tjanala tjapinu, “Nganaluni panyatja pampunu?” Kaya uwankara ngurparingu. Ka Peterlu wangkangu, “Wiya Mayatja, anangu nyanga tjuṭangkuya utjura utjura ngaranyi.”

⁴⁶ Palu Jesulu wangkangu, “Wiya, kutjupangkuni pampunu, kana kulinu ngayulanguru pakannyangka witya ngayuku.”

⁴⁷ Ka minyangu panya nyakula kulinu alatji, “Munta, kam-pangkatu-palkunatju pampunu kani nitingku alatjitu para-tjapini.” Munu minyama paluru pulkara nguluringkula tjititingu munu tultjun-garakatingu palula tjinangka winkingka mirangka munu tjakultjunu paluru pampuntja munu mapalku palyaringkuntja.

⁴⁸ Ka Jesulu wangkangu palula, “Minyama wiru, nyuntun mulapa ngayuku mulamularingu, munun palulanguru palyaringu. Pukulpa ma-pitja.”

⁴⁹ Ka Jesunya minyangka kuwaripatu ngarala wangkanyangka wati kutju tjakulpa wirkanu Tjairatjaku nguranguru munu wangkangu Tjairatjala, “Wiya, alatjitun purkutjararingu. Wanti Mayatjanya unytjunku altiwiyangku.”

⁵⁰ Ka Jesulu kulinu watingku alatji wangkanyangka munu Tjairatjala wangkangu, “Nguluringkuwiya ngayuku mulamulariwa, ka tjitji nyara paluru palyaringkuku.”

⁵¹⁻⁵³ Munuya Tjairatjaku walingka wirkanu ngura panya palula. Kaya anangu winki urilta nyinara pulkara ulangi tjitji panya palumpa. Ka Jesulu wangkangu tjanala, “Ulanytja wiyaya nyinama. Tjitji nyangatja ilunyta wiya, kunkunpa ngarinyi.” Kaya kulira palumpa ikaringkula kurara pungangi alatji kulira, “Wiya tjitji palatja ilungu alatjitu.”

Ka Jesulu anangu tjuṭa markunu urilta nyinanytjaku munu Pertainya, Johnnga, Jamesanya munu tjitjiku mama ngunytju kutju altira tjarpattjuna ruumangka wali unngu tjitji panya ngarinytjitjangka.

⁵⁴ Munu paluru tjitji panya mara wituṅu, munu wangkangu, “Tjitji awa, pakala!”

⁵⁵⁻⁵⁶ Ka tjitji panya malaku wankaringu munu mapalku pakanu. Ka tjitji palumpa mama ngunytju pulkara urulyaranu wankaringkunya nyakula. Ka Jesulu wangkangu tjitji palunya mai ungunytjaku, munu pulanya wangkangu, “Nyangatja nyakunytjatjanungku kutjupa tjuṭangka tjakultjunkuwiayangku wantima. Palya?”

9

Jesulu Nintintja 12 Wangkara Iyantja (*Matthew-ku 10:5-15; Markaku 6:7-13*)

¹ Munu palula malangka Jesulu nintintja panya 12 altira tjungunu munu tjananya wityyanu mamu tjuṭa anangu tjuṭanguru paintjaku munu pikatjara tjuṭa kulu palyarunguntjaku.

² Munu tjananya wituṅu Godaku tjukurpa anangu tjuṭangka para-wangkanytjaku tjukurpa panya Godalu anangu tjuṭa walytjanmara mayatjangku kanyintjatjara. Munu pikatjara tjuṭa kulu palyarunguntjaku tjananya wituṅu.

³ Munu tjanala wangkangu, “Kutjupa kutjupa tjuṭa katinytja wiyangkuya wantima, tjukara wiya, yakutja wiya, mai, mani munu mantara tjuṭa wiya.

⁴ Munuya tawunu kutjupangka wirkara anangungku altira walingka tjunkunyangka, wali pala palula alatjitu ngarima, munuya pala palulanguru para-ngarala warkarima, munu ngula panya ankunytjikitjangu kutju ngura palunya wantikatima.

⁵ Palu tawunu kutjupangka wirkara anangungku altira ngurangka tjunkuwiyangku wantinyangka, nyura uti ngura palunya wantikatima, mununku ulpuru puutanguru patapatala piruku tjananya nyakunytja wiyakitjangu. Kaya nyakula kulilku Godanya tjanampa mirpanarinyangka." Alatji Jesulu tjananya wangkara witunu.

⁶ Kaya nintintja panya tjuta ma-pakanu. Munuya ngura tjukutjuku tjutangka para-pitjalira Tjukurpa Palya wangkangi munu pikatjara tjuta palyarunguningi.

Iratalu Puṭu Kulintja

(*Matthew-ku 14:1-12; Markaku 6:14-29*)

⁷ Ka mayatja Iratalu panya Galileeku mayatjangu Jesulu palyantja uwankara kulinu munu puṭu kulinigi, "Wati ngananya nyangatja?" Panya anangu kutjupa tjutangkuya wangkangi Johnnga ilunytjatjanu wankaringkunyitja.

⁸ Kaya kutjupa tjarangku wangkangi Iloitjanya malaku pitjanytja, kaya tjara kutjupangku wangkangi wangkatjara irititja kutjupa malaku wankaringkula pakantja.

⁹ Ka Iratalu wangkangu, "Johnnga panyaṅa nganmanytju kata katantjaku wangkangu. Palu wati nganalu nyanganguk palyarinanyi?" Munu paluru Jesunya nyakunytjikitja mukuringangi.

Jesulu Paltjantja Wati 5,000

(*Matthew-ku 14:13-21; Markaku 6:30-44; Johnku 6:1-14*)

¹⁰ Kaya iyantja panya tjuta ankunytjatjanu ngula malaku pitjangu munuya Jesula tjakultjunu uwankara tjana palyantjatjanungku. Ka tjananya Jesulu altira katingu ngura ini Pitjaitalakutu paluru tjana anangu tjuta wantikatira mauntalpa nyinanytjikitjangu.

¹¹ Kaya anangu tjutangu kulinu tjana ankunytja munuya malawanungku wanara ngururpaṭu tjanala tjunguringu. Ka Jesulu tjananya pitjanyangka nyakula pukultu altingu munu tjanala tjakultjunangi tjukurpa panya Godalu anangu tjuta walytjanmara mayatjangu kanyintja. Munu paluru pikatjara tjuta kulu palyarunguningi.

¹² Ka mungartjirira tjintu nguwanpa ma-tjarpanyangka nintintja tjutangu palula wangkangu, "Nyangatjala ilytjinka nyinanyi mai wiyangka. Wanyu anangu nyanga tjuta witula, kaya ara ngura nyanga ilatja tjutakutu munuya mai mantjira ngalkula paltjaringkula mangari ngura unytjunta."

¹³ Palu Jesulu wangkangu tjanala, "Wiya, nyura alatjituya tjananya uwa mai ngalkuntjaku wituntja wiyangu."

Kaya wangkangu, "Wiya, nyangatjala mai tjukutjuku kutjara mankurpa kanyini munu kuka antipina kutjara kulu. Kan mukuringanyi nganaṅa ankula pulka payamilantjaku anangu nyanga winkiku?"

¹⁴ (Panya ngura nyara palula kunyu wati 5,000 nyinangi winki mulapa, ka tjinguru minyama tjtji winkitu nyinangi pala palula.)

Ka Jesulu wangkangu nintintja tjutangka, "Uwa palya, anangu pala tjuta wanyu tjarara nyinatjura wanala 50 kutjupa, 50 kutjupa."

¹⁵ Kaya nintintja tjuṭangku mulapaṭu nyinatjura waṇaṇu paluru wangkanyangka.

¹⁶ Ka palulanguru Jesulu mai panya kutjara mankurpa antipina kutjara kulu mantjinu munu ilkari ira-nyakula Godanya walkura wangkangu, “Wirungkulanyan mai kuka nyangatja ungu.” Munu paluru katantara nintintja tjuṭa ungangi. Kaya nintintja tjuṭangku anangu tjuṭa para-ungangi. Ka mai panya tjuṭa mulararira waintarira ngaringi.

¹⁷ Kaya uwankarangku ngalkula palṭjaringkula wantingu waintarira ngarinyangka. Ka ngalkula wiyaringkunyangka nintintja tjuṭangku tjana palṭjaringkula wantinytja tjuṭa mantjira piti pulka 12-ngka tjalyngaratjunu.

Peterlu Tjukarurungku Wangkanytja Jesunya
(*Matthew-ku 16:13-19; Markaku 8:27-29*)

¹⁸ Ka kutjupa-ara Jesulu kutjungku ankula mauntalpangku nyinara Godala tjapiningi. Kaya palumpa nintintja tjuṭangku waṇara wirkanu. Ka Jesulu tjanela tjapinu, “Nyura ninti? Ngananyaniya wangkanyi anangu tjuṭangku?”

¹⁹ Kaya wangkangu, “Wiya tjarangkuntaya wangkapai ‘John Baptista.’ Kaya tjara kutjupangku wangkapai ‘Iaitjanya.’ Kaya kutjupa tjuṭangku wangkapai nyuntu Godaku wangkatjara kutjupa irititja malaku wankaringkunytja.”

²⁰ Ka Jesulu wangkangu tjanela, “Kani nyura ngananya wangkanyi?”

Ka Peterlu wangkangu, “Nyuntun Christanya, panya Godalu kalkura iyantjanya ngananyanya wankarunkunytjaku.”

²¹ Ka Jesulu tjananya wangkara markuningi, “Tjukurpa nyanga palunyaya kutjupa tjuṭangka tjakultjunkuwiyangku wantima.”

Jesulu Ngula Ilunytjikitjangku Wangkanytja
(*Matthew-ku 16:20-28; Markaku 8:30—9:1*)

²² Munu palulanguru alatji wangkangu, “Ngula wati kura tjuṭangku ngayunya Watiku Katjanya pulkara pikantankuku. Panya tjukurtjara kuranyitja tjuṭa, Moseku tjukurpa nintilpai tjuṭa, munu wati tjiṭpi kutjupa tjuṭa kulu ngayuku pulkara kuraringkuku, mununiya maungkuku ngayunya pungkula iluntankunytjaku. Palu ngayulu ilunytjatjanu tjiṭtu kutjara ngarala wiyaringkunyangka piruku wankaringkula pakalku.” Tjukurpa nyanga palunya paluru nintintja tjuṭangka kutju wangkara tjakultjunangi.

²³ Munu palulanguru anangu tjuṭangka tjukurpa kutjupa wangkangi alatji, “Kutjupangku ngayunya waṇantjikitja mukuringkulampa uti paluru walytjangku kulira palyantja wiyangku wantima, munu tjiṭtu kutjupa tjiṭtu kutjupa ngayunya kutju kulira waṇanma. Tjinguruya nyuranya iluntanama ngayunya waṇannyangka, palu palya, nyura uti ilunytja kulira nguluringkuwiyangku ngayunya tungun-tunguntu waṇanma titutjarangku.

²⁴ Anangu kutjupangku tjinguru alatji kulilku, ‘Wanyu kanatju ngayulu walytjangku atunymanama mantangka nyanga rawa wanka nyinanytjikitjangku.’ Palu alatji kulira paluru ngayunya wantinyi, ka Godalu palunya ngula ilunyangka puṭu wankani palula tjunguringkula titutjara nyinanytjaku. Ka anangu kutjupangku tjinguru alatji

kulilku, 'Wanyu kana nguluringkuwiyangku Jesunya titutjarangku wananma, kani palya kutjupangku ngayunya iluntankuku palunya wanannyangka.' Ka alatji kulinnyangka Godalu ngula ilunyangka palunya wankara pakaltjingalku palula tjungu titutjara wanka nyinanytjaku.

²⁵ Palu anangungku mantatja tjutaku mukuringkula winki mulapa mantjira kanyirampa ngula paluru ilura nyaaringkuku? Wiya, paluru ilura kawankatiku, panya paluru mantatja wiru tjutaku mukuringkula Godanya wantingi, ka mantatja tjutangku palunya putu wankarunanyi Godala junguringkula titutjara nyinanytjaku.

²⁶ "Ka tjinguru anangu kutjupa ngayuku tjukurpa kulira ngayuku mulamularingkulampa kuntringkuku anangu tjutangka mirangka, munu ngayunya wantiku ngayuku tjukurpa kulu, ka palu purunypatu ngayulu ngula Watiku Katjangku pitjala palunya ngapartji wantiku ngayuku kuntringkunyjtjangu. Panya nyara palula ara ngayulu Mamalanguru pitjaku pitalytji witulya pulka, angelpa wiru tjutangka tjungu, mununa ngayulu ngapartji ngayuku kuntringkupai tjuta wantiku.

²⁷ Kana tjukarurungku nyurala wangkanyi, panya nyura nyanga kutjupa kutjupa tjuta kuwari ngaranyi, munu nyura kutjupa tjarangku ngula ilunyitja kuwaripangka wankangku nyakuku, Godalu mayatja pulkangku anangu tjuta mulapa palumpa walytjaringkunyjtjaku palyannyangka." Alatji Jesulu wankara nintiningi palumpa nintintja tjutangka kulira mulamularingkunyjtjaku.

Jesunya Apu Katu Irnyantja

(*Matthew-ku 17:1-8; Markaku 9:2-8*)

²⁸ Nyara palula malangka tjintu 8 ngarala wiyaringkunyangka Jesulu nintintja mankurpa altingu Peternya, Johnnga munu Jamesanya kulu, munu paluru tjananya puli murpukutu katingu puli katu Godala tjapintjikitja.

²⁹ Munu nyara palula Godala tjapira paluru yunpa kutjuparira irnyaningi, ka mantara kulu piranaringu munu wanagara purunypa irnya-irnyara rawa ngarangi.

³⁰ Ka paluru ngarala tjapinnyangka wati Mosenya pula Ilaitjanya utiringkula palula tjungu ngarala wankangi.

³¹ Panya pula pitalytji pulkatjara utiringu munu pula Jesula wankangi nganmanytju panya ngula nyaaringkuku Jerusalemala paluru ngura ilkaritjakutu malaku ankunyjtjaku.

³² Kaya Peternya tjana nganmanypa pilu-piluringkula kunkunaringu munuya wankaringkula nyangu Jesunya pitalytji pulkatjara ngaranyangka munuya wati panya kutjupa kutjara kulu nyangu.

³³ Ka palulanguru wati panya kutjarangku Jesunya wantikatira ankunyjtikitjangku kuliningi, ka Peterlu wankangu, "Mayatja, nyanga kuwarila wirura nyangangka ngaranyi. Wanyula wiltja mankurpa palyala kutju nyuntumpa, kutju Moseku, munu kutju Ilaitjaku!" Alatji paluru ngurpangku wankangi ngunti kulira pula mantangka tjukutjuku nyinanyjtikitja pitjanyangka-palku.

³⁴ Ka ngarala wangkanyangka ngangkali pitjangu munu Jesunya Mosenya Ilaitjanya tjananya tjutu nu munu wati panya nintintja mankurpa kulu tjutu nu, kaya pulkara nguluringu.

³⁵ Ka wangka kutju utiringu ngangkali unngunguru munu tjanala wangkangu, “Nyangatja ngayuku katja, panya ngayulu palunya iyan-tjikitjangku ngurkantanu. Nyanga palulaya kulinma!”

³⁶ Ka wangkara wiyaringkunyaangka ngangkali panya katuringu, kaya nintintja panya maṅkurtu nyangu Jesunya kutju maṅaringkula ngaranyaangka. Uwa, tjana wiru mulapa nyangangi nintintja panya maṅkurtu, palu tjana nyakunytjatjanungku kutjupa tjuṅangka wangkawiyangku wantingi unngu kutju kulira. Munuya ngula kutju tjakultjunu.

Jesulu Palyarunguntja Tjitji Mamutjara
(Matthew-ku 17:14-18; Markaku 9:14-27)

³⁷ Munuya mungawinki Jesunya tjana nintintja panya maṅkurpa kulu pulinguru ukalingu, kaya anangu tjuṅa mulatu paluru pit-janyangka nyakula palalakutu ngaparikatingu.

³⁸ Ka wati kutjupa anangu tjuṅangka ngurur-ngururpa mirangu munu Jesula pulkara ngatjira wangkangu, “Nintilpai! Wanyutju nyawa katja nyanga! Panya nyanga paluru ngayuku katja kutju.

³⁹ Katju mamungku nyangatja miratjingalpai rawangku munu uritjingara anṅa-waṅipai mantangka, ka wiṅaly-wiṅalyaripai. Munu rawangku alatjingara unytju kutju pakara ankula mapalku pitjala piruku tjarpapai. Ka urira urira pakuringkula nguwanpa ilupai.

⁴⁰ Kana nyuntumpa nintintja tjuṅangka nganmanytju ngatjinu mamu nyanga palunya paintjaku, kaya puṅu painingi.”

⁴¹ Ka Jesulu kulira tjituru-tjitururingu munu tjanala wangkangu, “Nyura mulapa uwankara puṅu mulamularinganyi munu titutjarangku ngunti kulini. Kana yaaltjitu arangku nyuranya nyinara nintilku nyura kulira mulamularingkunytjaku? Pakuringanyiṅa nyuranya rawangku nintira nintira.” Munu palulanguru watingka panya wangkangu, “Katjanku ngalya-kati ngayulakutu!”

⁴² Ka tjitji panya ngalya-katinyangka mamungku piruku uritjinganu. Ka mantangka punkara ngarira tjinanpungangi. Ka Jesulu mamu panya painu munu tjitji panya palyarungunu munu palumpa mama ungu.

⁴³ Kaya anangu tjuṅa pulkara urulyaranu Godalu Jesulawanungku witulya pulkangku palyannyangka nyakula.

Jesulu Piruku Wangkanytja Ilunytjikitjangku
(Matthew-ku 17:22-23; Markaku 9:30-32)

Ka anangu tjuṅa ngarala urulyarannyangka Jesulu palumpa nintintja tjuṅangka wangkangu alatji,

⁴⁴ “Kuwariya watarkuriwiyangku kulinma ngayulu nyanga wangkanytja. Panya wati kutjupangku ngayunya Watiku Katjanya nintilku wati mirpaṅtju tjuṅangka, kaniya witera katira iluntankuku.”

⁴⁵ Palu nintintja tjuṅangkuya puṅu kuliningi paluru alatji wangkanyangka, panya Godalu tjananya puṅu kulintjaku palyanu. Kaya puṅu nguwanpa tjukarurungku kuliningi munuya nguluringangi palula tjapintjaku.

Ngananya Pulka Nyinaku?
(Matthew-ku 18:1-5; Markaku 9:33-37)

46 Palulanguru nintintja panya tjuṭangkuyanku anga-anganku ngaparku wangkangi alatji, “Ngananya wanyu pulka nguwanpa nyinanyi?”

47 Ka tjana wangkanyangka Jesulu kulintja wiya, palu paluru nintingku ngurkantanu tjana kulintjitja munu tjitji tjukutjuku alṭira palula itingka ngaratjunu.

48 Munu wangkangu tjanala, “Tjinguru nyura ngayuku nintingku tjitji tjukutjuku nyanga purunypa mantjira pukulṭu walytjanmankulampa nyura ngayunya kulu walytjanmananyi, munu ngayunya iyantjanya kulu walytjanmananyi. Panya nyura walytjangku kulira tjukutjukuringkulampa kutju Godala mirangka pulka mulapa nyinaku.” Alatji Jesulu tjanala wangkangi.

*Wati Kutjupangku Mamu Tjuta Paintja
(Markaku 9:38-40)*

49 Ka Johntu Jesula wangkangu, “Mayatja, nganaṅa nyangu wati kutjupangku anangu tjuṭanguru mamu tjuta painnyangka nyuntu witunnyangka-palku, panya paluru painingi nyuntunya ini wangkara. Kala palunya painu, panya paluru nganaṅala tjungutja wiya.”

50 Ka Jesulu wangkangu tjanala, “Wantimaya paintja wiyangku! Panya anangu kutjupa nganampa kuraringkunyṭja wiya nyinarampa nyara paluru nganampa walytjaṭu nyinanyi.”

Tjamiriyanya Ngurara Manṅkurtu Jesunya Wantinytja

51 Ka tjiṅṭu panya paluru ilaringangi Godalu Jesunya ilkarikutu mantjintjaku, ka paluru ngulu wiyangku kulinu Jerusalemalakutu ankunytjikitjangku.

52 Munu wati manṅkurpa kuranyungku iyaṅu ankula ngura ngurintjaku manta Tjamiriyalakutu. Kaya Tjamiriyalawanu ankula ngura tjukutjukungka wirkanu ngura tjanampa palyantjikitja.

53 Palu anangu nyara palunya ngurara tjuṭangku Jesunya tjananya wantingi tjanampa ngurangka tjunkunytja wiyangku, panya paluru tjana wati Jew tjuta Jerusalemalakutu anangi. Nyara palulanguruya palunya tjananya wantingi Jew tjuta nyakula.*

54 Ka palumpa panya nintintja kutjarangku Jamesalu pula Johntu nyakula wangkangu Jesula, “Mayatja, nyuntu mukuringkulampa uti nganaṅa Godala tjapinma paluru waru ilkaringuru iyantjaku, ka anangu nyanganpa uwankara kampara wiyala.”

55 Palu Jesulu malakukutura palunya pulanya painu.*

56 Munuya ngura palunya wantikatira ma-pakanu ngura kutjupakutu ngapartji.

*Jesunya Wanantjikitjangku Wangkanytja
(Matthew-ku 8:19-22)*

* 9:53 Tjakaya anangu Tjamiriyanya ngurara tjuta Jew tjtaku pulkara kuraringkupai.

* 9:55 Nyiri irititja kutjupa tjarangka tjukurpa nyangatja kulu ngarinyi alatji munu wangkangu palula, “Wiya kulila, nyura kurunpa palyatjara Godaku kuruntjara. Panya ngayulu Watiku Katjanya anangu tjuta wiyantjikitja pitjanyṭja wiya. Ngayulu anangu tjuta wankarunkunytjikitja pitjangu.” Palu nyangatja kunyu wati kutjupangku mala walkatjunu munu Luke-aku tjukurta tjunguṅu.

⁵⁷ Munuya iwarangka anangi, ka wati kutjupangku palula wangkangu, “Ngayuluna nyuntula tjungu para-pitjalinkunytjikitja mukuringanyi nyuntu ngura tjutakutu ankunyangka.”

⁵⁸ Ka Jesulu palula wangkangu, “Panya tuuka tjutaku nyarkalpa tjuta ngarinytjaku ngaranya. Ka tjulpu tjutaku manngu tjuta ngaranya tjana ngarinytjaku, palu Watiku Katjaku ngura ngaranya wiya ngarikatira pakuwiyaringkunytjaku. Panya ngayulu ngura wiyatjara rawa para-pitjalinkupai.”

⁵⁹ Munu paluru wati kutjupangka wangkangu, “Ngayula junguriwa mununi wanama!”

Ka wati panya paluru Jesula wangkangu, “Munta Mayatja! Wanyuni unytjungku wantiriyala, panya ngayuku mama tjilpi mulapa, kana ngula tjtularira pitjala nyuntula junguringkula nyuntunya wanaku.”

⁶⁰ Ka Jesulu palula wangkangu, “Wiya, ngayunya-warara kulinma, kaya ngurpa tjutangu nyuntumpa mama wiyaringkunyangka tjunutjunkuku. Palu nyuntu ankula ngura tjutangka para-tjakultjunama tjukurpa panya Godalu anangu tjuta walytjanmara mayatjangu kanyintjatjara.”

⁶¹ Ka kutjupangku ngapartji palula wangkangu, “Mayatja, ngayulu nyuntula tjungu ankunytjikitja mukuringanyi. Palu wanyuni wantiriyala-warara, kana ankula ngayuku walytja tjuta-wararangu tjakurira pitjala nyuntula junguringkuku.”

⁶² Ka Jesulu wangkangu, “Wiya, anangungku Godaku waraka palyantjikitja mukuringkula uti titutjarangu palyanma malakukutura kulintja wiyangu. Panya paluru piruku malakukutura kulirampa waraka Godalu wituntjitja putu tjakarurungku palyani.”

10

Nintintja 72 Iyantja

¹ Ka nyanga palula malangka Mayatja Jesulu ngurkantanu wati 72 kutjupa, munu tjananya kutjara kutjara iyanu ngura uwankarakutu palula kuranyu ankunytjaku panya paluru nganmanytju kulinu ngula ankunytjikitjangu.

² Munu paluru tjananya alatji wangkara iyanu, “Panya anangu mungilyi mulapa nyangatja watarku nyinara-waninyi Godaku walytjaringkunytjikitja patara, palu anangu Godaku warakaripai mankurpa kutju ngaranya palula tjanala ankula tjukurpa tjakultjunkunytjaku tjana kulu kulira Godaku walytjaringkunytjaku. Kaya Godala tjalipa palumpa warakaripai kutjupa tjuta ngurkantara iyantjaku nyuranya alpamilara anangu ngura winkitjangka Tjukurpa Palya wangkanytjaku. Kaya kulira Godaku mulamularingkula palumpa walytjaringkuku.

³ “Ala, araya palya. Palu wanyuya kulila panya ngayulu nyuranya iyani tjiipi tjuta purunypa inura tjutangka ngurur-ngururpa.

⁴ Wantimaya yakutja katiwiyangu munu mani munu tjinatja kulu, munuya anangu kutjupa tjuta iwarangka nyakulampa tjanala ngarala wangkanytja wiyangu wantima.

⁵ “Munuya tawunu kutjupangka wirkara walingka tjarpanytjikitjangu anangu wali pala palula nyinapai tjutangka alatji wangkama, ‘Uwa, Godalu nyuranya kurunpa rapa kanyinma.’”

6 Ka tjinguru waliku mayatja wati mirpantju nyinanyangkampa Godalu palunya munu palumpa walytja tjuta kulu kurunpa rapara kanyintja wiyangku wantiku, kaya paluru tu alatjitu nyinaku pukulpa wiya. Palu tjinguru waliku mayatja wati pukultju nyinanyangkampa Godalu palunya kurunpa rapara kanyilku palumpa walytja tjuta kulu.

7 Ka nyura wali nyara palula tjarpara palula tjanala tjungu nyinama munuya mai kuka kulu ngalkula tjikinma paluru tjana nyuranya ungkuyangka. Panya anangu kutjupa nyurampa warakarinyangka nyura palunya ungkupai, kaya palu purunpa nyura anangu tjutangka ngayuku waraka palyannyangka paluru tjana uti ngapartji nyuranya pukularira ungama. Palya! Kaya tawunu pala palula nyinara, wali kutju pala palula ngura tjunkula nyinama wali kutjupa tjutakutu ankunytja wiya.

8 "Ka nyura tawunu kutjupangka wirkankuyangka tjinguru anangu nguratja tjutangka pukularira mantjilku, ka tjana nyuranya mai kuka kulu ungkuyangkampa pukularira ngalkunma wantinytja wiyangku.

9 Munuya ngura pala palula pikatjara tjuta nyakula palyarungunma munuya tjanala tjakultjunama alatji, 'Panya watalpi ilaringanyi Godalu anangu tjuta mayatjangku walytjanmara kanyintjaku.'

10 Palu tjinguru nyura tawunu kutjupangka ma-wirkara ka anangu nguratjangku nyuranya papulankuyangkampa nyura iwarakutu ara tawunangka ngururpa munu tjanala alatji wangka,

11 'Nyura nganananya wantinyangkala ulpuru nyanga tjinatja nyurampa nguranguru patapatani nyuranya ngulutjungkunytjikitjangku.* Palu kulinmaya panya watalpi ilaringanyi Godalu anangu tjuta mayatjangku walytjanmara kanyintjaku. Palu nyura wantinyi palunya.' Alatji tjanala wangka nyurala kulilwiyangku wantinyangka.

12 "Panya ngula Tjintu Malatjangka Godalu anangu Tjatamanya ngurara tjuta paira iyalku ngura kurakutu pika pulkatjara nyinanytjaku. Munu paluru anangu panya nyuranya wantinytja tjuta kulu tjanala tjungu paira iyalku, palu ngura nyara palula tjana nyuranya wantinytjatjanungku pika pulka mulapa mantjilku Tjatamanya ngurara tjutangka waintara.* Nyangatjana mulamulangku nyurala wangkanyi."

*Jesulu Ngulutjungkunytja Anangu Kulira Wantipai Tjuta
(Matthew-ku 11:20-24)*

13 Ka anangu Kuratjinta nyinanytja tjutangu munu Pitjaitala nyinanytja tjutangu kulu Jesunya wantingi palumpa mulamularingkunytja wiyangku. Ka Jesulu tjananya wantinyangka pulkara painingi alatji wangkara, "Nyurampa pika pulka mulapa ngaraku ngura Kuratjinta nyinanytja tjutaku munu Pitjaitala nyinanytja tjutaku kulu, panya ngayulu nyurampa ngurangka pikatjara tjuta palyarunguningi munu miracle kutjupa kutjupa tjuta kulu witalya pulkangku palyaningi, ka nyura nyakunytjatjanungku kura tjuta wantinytja wiya alatjitu munu panya nyura Godalakutu

* **10:11** Nyanga alatjiya kunyu ulpuru tjinatja patapatapai nyaa nintintjikitjangku, panya nintintja tjutangu putu wangkanytjatjanungku tjananya wantinytja, kaya kunyu nyakula nguluringkupai. * **10:12** Tjatamanya panya tawunu pulka iriti ngarangi Israelta itingka, ka panya anangu nyara palula nyinapai tjutangu kura pulka mulapa rawangku palyannyangka Godalu tjananya uwankara pungkula wiyanu. Nyawa Genesis 18:20.

aruringkuntja wiyangku wantingi. Tjinguru ngayulu ngura panya Tayala pulala Tjaitanta palu purunypa nganmanytulpi palyanyangka, anangu ngura nyara palula pulala nyinapai tjuta tjinguru mapalku kuranguru piwiyaringama, munuya mantara walykulykungka tjarpara tjunpangka yunpa nyitinma, tjananku piwiyaringkula kura wantinytja nintintjikitjangku.*

¹⁴ Kulilaya! Ngula tjintu malatjangka Godalu anangu uwankara manta winkitja ngurkantara tjaralku, munu paluru anangu panya ngura Tayanya pulanya Tjaitangga ngurara tjuta paira iyalku ngura kurakutu pika pulka mantjintjaku. Munu paluru nyuranya kulu tjanala tjungu paira iyalku, palu ngura nyara palula nyura pika kutjupa pulka mulapalta mantjilku anangu nyara palula tjanala munkara.”

¹⁵ Ka Kapunimanya ngurara tjutangku kulu palunya wantingi, ka Jesulu tjananya palu purunypatu wangkangi alatji, “Ka nyura Kapunimala nyinapai tjutangku yaaltji kulini? Godalu wanyu nyuranya ilkarikutu katira pulkanmara tjunkuku? Wiya, paluru alatjitu nyuranya tjaru mulapa waniku ngati pulkakutu.”

¹⁶ Munu Jesulu palumpa nintintja tjutangka wangkangu, “Kutjupangku nyurala kulirampa ngayula kulu kulini, ka kutjupangku nyuranya wantirampa ngayunya kulu wantinyi munu paluru ngayunya wantira ngayunya panya iyantjanya kulu wantinyi.” Alatji Jesulu tjanala wangkangu munu tjananya witura iyanu. Kaya anu ngura uwankarakutu.

Nintintja Panya 72 Malaku Pitjanytja

¹⁷ Ka ngula wati panya 72 paluru ngurkantara iyantja tjuta malaku pitjangu pukulpa alatjitu munuya tjakultjunu palula alatji wangkara, “Mayatja! Mamu tjutangkulanya nganannya wanganarangku kulipai nganana nyuntunya ini wangkara tjananya painnyangka.”

¹⁸ Ka Jesulu tjanala wangkangu, “Ngayulu nyangu Satangga ilkaringuru punkannyangka, panya paluru anangu tjuta mayatjangku kanyintjatjanungku kuwari tjananya kanyintja wiyaringu.

¹⁹ Panya ngayulu nyuranya pulkara wityulynu, ka kutjupangku nyuranya putu alatjitu kuralku. Panya nyura liru tjuta munu pitikatali tjuta kulu kantura puuntankunyangkaya nyuranya patjara pikatjarantja wiya. Ka mamu Satantu nyuranya arakara wityulangku kurannyangka nyura kunpu pulka ngaraku, ka paluru nyuranya putu alatjitu kuralku ngayulu nyuranya wityulankunyangka.

²⁰ Palu nyura uti mamu tjutangku nyurala wanganarangku kulinnyangka pukularinytja wiyangku wantima, palu uti nyura pukularima panya ngura ilkarangka nyurampa ini tjuta nyiringka wakatjunktjuntja ngaranyangka.”

Jesulu Pukularira Mamala Wangkanytja

(Matthew-ku 11:25-27; 13:16-17)

²¹ Munu palulanguru Jesulu Kurunpa Milmilngatjarangku pulkara pukularira palumpa mamangka wangkangu alatji, “Uwa Mama, nyuntun Mayatja pulka mulapa nyinanyi ilkariku mantaku anangu

* **10:13** Panya ngura Tayala pulala Tjaitanta anangu Jew wiya tjuta nyinangi munuya kura tjuta rawangku palyaningi, kaya Israeltanguru Godaku wangkatjara tjutangku ngura palunya pulanya kuranmankupai.

uwankaraku munu ilkaritja uwankaraku kulu. Kana nyuntunya kuwari mirawanira walkuni, panya nyuntun tjukurpa nyanga wiru utinu anangu ngurpa tjutangka munun nintipuka tjutangka utintja wiyangu kutitjara wantingu. Uwa Mama, mulapa panyan nyanga palunya alatji palyanu nyuntu mukuringkula.”

²² Munu palulanguru Jesulu anangu tjutangka wangkangu alatji, “Panya Mamaluni uwankara alatjitu wangkara utinu. Ngayuluna palumpa katja ka paluru kutju ngayuku ninti nyinanyi, ka palu purunypa ngayulu kutju palumpa ninti mulapa nyinanyi. Palu ngayulu anangu kutjupa tjuta ngurkantara nintilku, kaya paluru tjana kulu Mamaku nintiringkula nyinaku ngayulu nintinnyangka kutju.”

²³ Munu palulanguru Jesulu malakukutura palumpa nintintja tjutangka kutju wangkangu alatji, “Nyura panya ngayunya kuru walytjangku nyanganyi. Pala palulanguru nyura pulkara pukularinyi.

²⁴ Panya wangkatjara tjuta munu mayatja pulka tjuta kuluya pulkara mukuringangi nyura nyanga nyakunytjanya nyakunytjikitja, palu nyakunytja wiyatuya nganmanypa wiyaringu. Munuya nyura purunytju kulintjikitja mukuringangi palu kulintja wiyatuya nganmanypa wiyaringu.”

Wati Palya Tjamiriyanya Ngurara

²⁵ Ka wati kutjungku Moseku tjukurpa nintilpaingku pakara Jesunya ngunti arakara tjapiningi alatji wangkara, “Nintilpai, nyaalkuna wanka titutjara nyinanytjikitjangku?”

²⁶ Ka Jesulu ngapartji palula wangkangu, “Nyaa nyiringka walkatjunkunytja ngaranyi? Nyara palunyan nyakula wangkara yaaltji-yaaltji kulilpai?”

²⁷ Ka wati panya paluru wangkangu, “Alatji ngaranyi, ‘Mayatja Godaku pulkara mukuringama kurunpa winki, munu palunya kutju pukulmankunytjikitjangku kulira titutjarangku wiru palyanma.’” *

Ka kutjupa kulu ngaranyi alatji,

‘Anangu kutjupa tjutaku pulkara mukuringama nyuntunku mukuringkunytja purunypa.’” *

²⁸ Ka Jesulu palula wangkangu, “Tjukururungkun wangkanyi. Alatjina munun wanka titutjara nyinaku.”

²⁹ Ka wati paluru Jesulu palunya palyanmankunytjaku mukuringkula piruku tjapinu palula, “Palu anangu nganaku tjanampana wanyu mukulya pulka nyinama?”

³⁰ Ka Jesulu ngapartji palula tjukurpa wangkangu ara utintjikitjangku nyanga alatji, “Wati kutju iwarangka anangi Jerusalemalanguru Jericholakutu. Kaya wati tjulyalpai tjutangka palunya ngururpa nyangu munuya mantara araltjara palunya pungkula nguwanpa iluntanu munuya iwarangka itingka uti wantikatingu ilunytjaku, ka paluru ngaringi.

³¹ Ka palula malangka wati tjukurtjara iwara panya palula pitjangi munu wati panya pikatjara ngarinyangka nyakula wantikatira katakutjara anu kampa kutjupawanu.

* 10:27 Deuteronomy 6:5 * 10:27 Leviticus 19:18

³² Ka palula malangka wati kutjupa timpulangka warkaripai pitjangu wati Levikunu, munu palu purunypatu nyakukatira anu kampa kutjupawanu.

³³ “Ka wati Tjamiriyanya ngurara iwara panya palulatu pitjangi tangkiytjara,* munu nyangu wati panya pikatjara ngarinyangka munu palumpa pulkara ngalturingu.

³⁴ Munu palulakutu ankula palunya mantjira pika tjuta uwilangka nyitinu wainangka kulu munu pantitjingga karpinu. Munu palulanguru wati panya pikatjara palunya tangkiyinka utitjungkula katingu wali ruuma tjutatjarakutu munu palunya ruuma kutjunga piitangka ngaritjungkula wirura kanyiningi.

³⁵ “Munu tjitungka wati panya Tjamiriyanya ngurarangku mani ungu wati panya waliku mayatja. Munu palula wangkangu, ‘Nyangatjananta unganyi nyuntu wati nyangatja wirura kanyintjaku. Ka tjinguru mani nyanga palunya wiyaringkunyangkampa rawangkuu kanyinma wantinytja wiyanku, panya ngayulunanta ngula malaku pitjala nyuntunya piruku mani kutjupa ungkuku nyuntu rawangku kanyinnyangka.’ ”

³⁶ Munu Jesulu ara nyanga palunya wangkara wiyaringkula wati panya Moseku tjukurpa nintilpaingka tjapira wangkangu, “Yaaltjin kulini wati nyanga mankurnguru? Nyuntu ngurkantara, ngananya wanyu wati panya pikatjaraku pulkara mukuringu?”

³⁷ Ka paluru ngapartji palula wangkangu, “Panya paluru, panya pikatjara ngarinyangka nyakula ngalturingu munu alpamilanu.”

Ka Jesulu wangkangu palula, “Ka nyuntu kulu wati panya paluru palyantja purunypa ankula palyanma, munu anangu kutjupa tjuta ngalturingkula alpamilanma.”

Jesunya Mary-la Marthala Pulala Nyinanytja

³⁸ Ka ngula Jesunya munu palumpa nintintja tjuta kulu iwarangka ankula ngururpa wirkanu ngura tjukutjukungka. Ka minyma kutjupangku ini Marthalu Jesunya nyakula altingu pitjala palumpa walangka unytju nyinara mai ngalkula pakuwiyaringkunyjtaku.

³⁹ Ka Jesunya walangka tjarpara nyinakatingangka Marthaku malanya minyma ini Mary-nya palula itingka nyinakatingu munu paluru nyinara kuliningi Jesulu palula tjukurpa wangkanyangka.

⁴⁰ Ka Marthanya maingka pulkara warkarangi munu pakuringkula palumpa malanypaku ungu mirpanaringi nguwanpa munu pitjala Jesula wangkangu, “Mayatja, ngayuku malanytjuni wantikatingu kutju warkarinytjaku. Ka nyuntu wanyu kulintja wiya ngayulu kutju pulkara warkarinyangka? Wanyu wangka palunya kali tjungungku mai palyala.”

⁴¹ Palu Jesulu palunya wangkangu, “Martha, Martha! Nyangatja nyuntu kutjupa kutjupa tjuta rawangku kulira jtituru-tjitururinyi.

⁴² Palu kutju ngaranyi nyuntu pulkara kulintjaku. Ka nyangatja Mary-lu tjukarurungku ngurkantanu munu panya ngayulu tjukurpa wangkanyangka nyinara kulini, ka kutjupangku palunya puu alinyi.”

* **10:33** Jew tjuta tjaka anangu Tjamiriyanya ngurara tjutaku kuraringkupai.

11

Jesulu Palumpa Nintintja Tjuta Godala Tjapintjaku Nintintja
(Matthew-ku 6:9-13; 7:7-11)

¹ Ka ngula tjintu kutjupa Jesulu Godala tjapiningi. Ka paluru tjapira wiyaringkuyangka palumpa nintintja kutjupangu palula wangkangu, "Mayatja, nganannya wanyu nintila Godala tjakarurungku tjapintjaku. Panya Johntu palumpa nintintja tjuta nintinu, palu purunypa."

² Ka Jesulu tjanala wangkangu, "Nyura Godala tjapirampa alatji palula wangkama,

'Mama God, nyuntun pulka mulapa nyinanyi uwankarangka wain-tarinytja.

Nintinmalanya nyuntunya tjakarurungku walkuntjaku anangu uwankarangka.

Munu nyuntu mayatjangku pitjala nganannya uwankara walytjan-mara kanyinma nyuntumpa walytja mulapa nyinanytjaku.

³ Kuwarilanya ungama mai kuka kuwariku nganana ngalkula paltja nyinanytjaku.

⁴ Munu nganana nyuntunya kurannyangkampa nganannya kaly-pangku wantima pungkuytja wiyangku.

Panya kutjupangu nganannya kurannyangkampa nganana palunya kaly-pangku wantipai.

Anga-kanyinmalanya nganana ngunti mukuringkula kura palyantjaku-tawara.'

Alatjiya Mamala tjapinma."

⁵⁻⁶ Munu palulanguru Jesulu tjanala wangkangu, "Tjinguru nyuntu nyuntumpa malpaku walikutu ankuku munga kultungka munun palula wangkaku, 'Wati wiru! Ngayuku malpa kuwari pararinguru pitjangu ngayunya nyakunytjikitja. Palu ngayulu mai kanyintja wiya palunya ungunytjikitjangku. Wanyuni wirungku ungama mai mankurpa.'

⁷ "Ka tjinguru nyuntumpa malpangku wali ungunnguru ngapartji wangkaku, 'Pakulwiyangkuni wanti! Nyawa, tuwa pati ngaranya. Katju tjitji tjuta munu ngayulu kulu nganmanypa ngarikatingu kunkunarininytjikitja, mununa putu pakani nyuntunya mai ungunytjikitja.' Alatji paluru wangkaku.

⁸ Palu ngayulu nyurala wangkanyi, panya paluru nyuntunya malpa kulira pakara ungunytja wiyangku wantiku, palu nyuntu kunta wiyangku rawangku tjapinnyangka kutju nyuntunya pakara ungunku nyuntu mukuringkunyitja.

⁹⁻¹⁰ "Kana palulanguru nyurala wangkanyi alatji rawangkuya Godala ngatjinma nyura mukuringkunyitjitu, ka nyuranya ungunku. Munuya Godala rawangku tjapinma nyuranya tjukurpa palumpa nintintjaku, ka paluru nyuranya nintilku. Uwa, rawangkuya Godala tjapinma, panya anangungku tuwa pati ngaranyangka pungkupai pakara alpamilantjaku, palu purunypa. Ka Godalu nyuranya kulilku, panya anangungku wali unngu nyinara tuwa pungkupungku yangka kulira alara ungunpai, ka nyara palu purunypa Godalu rawangku tjapinnyangka kulira ungunpai munu nintilpai munu alpamilalpai wantinytja wiyangku.

¹¹ Wanyu wati mamangku katja kuka antipinaku ngatjinnyangka liru ungkupai? Wiya!

¹² Munu wanyu ngampuku ngatjinnyangka palunya pitiitjalili ungkupai?

¹³ Wiya, nyura panya kura tjuṭangku nintingu tjitji nyurampa wiru tjuṭa kutju ungkupai ngatjinnyangka. Kaya palulanguru wanyu Mama Ilkaritjanya kulinma, paluru nyaa purunypa nyinanyi? Panya paluru wiru mulapa nyurala waintara alatjitu munu paluru intjanungku Kurunpa Milmilnga ungkupai nyura palula ngatjinnyangka." Alatji Jesulu nintintja tjuṭangka wangkangi.

Jesuku Witulya Godalanguru

(Matthew-ku 12:22-30; Markaku 3:20-27)

¹⁴ Ka wati mamutjara tjaa pati nyinangi putu wangkapai mamungku tjaa patinnyangka. Ka Jesulu mamu palunya paira iyanu, ka wati panya palulanguru ngalya-pakara palunya wantikatingu. Ka wati paluru piruku wangkapingu, kaya anangu tjuṭangku palunya kulira pulkara urulyaranu.

¹⁵ Palu kutjupa tjuṭangkuya wangkangu, "Wiya, mamu ini Piiltjipaltu wati nyanga palunya witulyankupai panya mamu tjuṭaku mayatja pulkangu, ka nyara palulanguru paluru mamu tjuṭa pailpai anangu tjuṭanguru."*

¹⁶ Kaya kutjupa tjuṭangku Jesunya ngunti arkara wituwituningi alatji wangkara, "Nyuntunya kunyu Godalu ilkaringuru witulyanu. Kalanya wanyu nintila munu kutjupa kutjupa witulya pulkangu palyala, kala nyakula kulilku, 'Munta, mulapa wati nyangatja Godalanguru pitjanytja.' "

¹⁷ Palu Jesunya nintiringu tjana unngu kulintjitjaku, panya tjana kuliningi mamu Piiltjipaltu palunya witulyankunyangka-palku. Ka nyangatja kulira paluru tjanala nyanga alatji wangkangu, "Kulilaya! Panya anangu tjuṭa ngura kutjunguru, walytjarara walytjararangku tjananku pikangu pungkula paturingkula, tjungu utulu kutjungka nyinanytja wiyaringkupai. Ka palu purunypa anangu walytjarara walytjarara wali kutjungka nyinara, rawa pikaringkula tjungu nyinanytja wiyaringkula mauntalparingkupai.

¹⁸ Ka palu purunypa tjinguru Satannga mamu palumpa walytja tjuṭaku pikaringkunyangkampa, paluru tjana palumpa kuraringkula palula tjungu nyinanytja wiyaringkuku, ka paluru tjananya putu wituwitura uparingkuku, munu tjanampa mayatja wiyaringkuku. Ka panya nyura ngayunya wangkapai alatji, 'Mamu ini Piiltjipaltu wati nyanga palunya witulyankupai mamu tjuṭa paintjaku anangu tjuṭanguru.' Alatjini nyura wangkapai.

¹⁹ Palu ngayulu tjinguru palumpa witulyatjarangku mamu tjuṭa painnyangkampa, nganalu wanyu nyuranya wanalpai tjuṭa witulyankupai mamu tjuṭa paintjaku? Mamungku? Wiya, nyura alatji wangkanyangkaya nyuranya wanalpai tjuṭa nyurampa pikaringkuku, panya Godalu tjananya witulyankupai mamu paintjaku Satantu wiyangku. Ala palatja! Nyura ngayunya ngunti mamutjaranmananyi.

* 11:15 Piiltjipalnga panya mamu Satannga.

20 Palu wiya, Godalu ngayunya witulyankupai mamu tjuṭa paintjaku, ka nyara palulanguru nyura uti nyakunytjatjanungku kulilku, 'Muntawa, mulapa Godanya pitjangu nganananya mayatjangku walytjanmara kanyintjikitja.'

21 "Panya wati kunpungku kulata munu tjula waratjarangku wali anga-kanyilpai, ka walingka unngu palumpa ulytja uwankara palya ngaripai paluru atunymankunyangka.

22 Palu tjinguru wati kunpu pulka mulapa pitjaku munu palunya pungkula waintariku. Munu palulanguru paluru wati panya palumpa kulata, kutjupa kutjupa tjuṭa kulu mantjira katiku ulytja uwankara kulu, munu katira palumpa walytja tjuṭa tjarara ungguku. Ka palu purunypa ngayulu witulya pulka mulapa nyinanyi Satanta tjanala waintara alatjitu.

23 "Panya anangumpa ngayula tjungu nyinanytja wiya ngaralampa paluru Satanta tjungutja nyinanyi ngayuku mirpantju. Munu paluru anangu tjuṭa Godalakutu wirkakatinytja wiyangku wantirampa paluru Satanku warkarinyi munu tjananya ngayulanguru wililytjingani.

*Mamu Anangunguru Painnyangka Malaku Pitjala Tjarpanytja
(Matthew-ku 12:43-45)*

24 "Ka mamu anangunguru painnyangka pakara ankupai ngura pitikutu munu para-ngurilpai paluru nyinara pakuwiyaringkunytjikitjangku. Palu tjinguru mamu paluru ngura putu ngurira kulilpai, 'Wiya, ngayulu malaku ankuku ngura panya ngayulu nganmanypa nyinanytjitjakutu.'

25 Munu mamu panya paluru pitjala nyakupai ngura panya paluru wiru kilina alatjitu ngaranyangka.

26 Munu palulanguru malaku ankula paluru mamu 7 kutjupa altira katipai kura mulapalta, munuya paluru tjana palula tjarpara ngura palyara titutjara nyinapai. Ka anangu panya paluru ngula malangka pulkara mulapa kuraringkupai mamu panya paluru tjana unngu nyinara titutjarangku kurannyangka." Alatji Jesulu tjanala wangkara nintiningi mamu tjuṭatjara.

Ngananya Tjana Pukulpa Mulapa Nyinanyi?

27 Ka Jesulu tjukurpa nyanganpa wangkanyangka minyma kutjungku mirara wangkangu, "Minyma panya nyuntumpa ngunytju pukulpa mulapa nyinanyi, panya paluru nyuntunya iti kanyinu mununta ampungka pulkanu."

28 Palu Jesulu wangkangu palula, "Wiya, panya tjana kutjupa tjuṭa pukulpa mulapa nyinanyi, panya Godaku tjukurpa wanganarangku kulira palyalpai tjuṭa."

*Jesulu Jonah-nyatjara Wangkanytja
(Matthew-ku 12:38-42; Markaku 8:12)*

29 Munu anangu tjuṭa mulapa tjunguringkunyangka paluru tjanala wangkangu, "Alatjitu nyura kura tjuṭa nyinanyi, panya nyura ngayuku putu mulamularingkula rawangku tjapini ngayulu miracle kutjupa kutjupa witulya pulkangku palyantjaku, panya ngayulu nyara palu purunypa palyannyangka nyakula kutju nyura kulilpai mulamularingkunytjikitjangku. Palu wiya, Godalu kutjupa kutjupa

nyura nyakunytjaku witulyangku palyantja wiyangku wantinyi, panya paluru nganmanytju wati kutju ini panya Jonah-nya iyanu, ka nyura uti ara nyara palunya kulintjatjanumpa nintiringama.

³⁰ Panya wati nyara palunya Godalu iyanu anangu Ninapanya ngurara tjutangka wangkara ngulutjunkunytjaku, tjana kuranguru piiwiyaringkula Godalakutu aruringkunytjaku.* Ka palu purunypa Godalu ngayunya Watiku Katjanya iyanu, kana anangu nyanga kuwari nyinanytja tjutangka palu purunypatu wangkanyi kuranguru piiwiyaringkula Godalakutu malaku aruringkunytjaku.

³¹ “Ka panya ngula tjintu malatjangka Godalu anangu uwankara ngurkantara tjaralku, ka nyara palula ara minyma panya mayatja ulpariranguru pitjanytjalu nyuranya puntura wangkara kuranmankuku ngayuku tjukurpa kulira wantinytjitjanga. Panya paluru ngura ulparira pararinguru pitjangu mayatja pulkangka Tjalamanta kulintjikitja paluru tjukurpa nintingu wangkanyangka. Ka kuwari kutjupa Tjalamanta waintara pulka mulapa nyurala tjungu nyinanyi nyura nyakula wanganarangku kulintjaku. Palu nyura ngayunya ngurkantankunytja wiya alatjitu.

³² “Ka tjintu panya palulatu anangu Ninapanya ngurara tjutangu kulu nyuranya puntura wangkaku ngayuku tjukurpa kulira wantinytjitjanguru. Panya paluru tjana Jonah-lu Godaku tjukurpa wangkanyangka kulinu munuya piiwiyaringkula kura tjuta wantingu. Ka kuwari kutjupa Jonah-la waintara pulka mulapa nyurala tjungu nyinanyi nyura nyakula wanganarangku kulintjaku. Palu nyura ngayunya ngurkantankunytja wiya alatjitu.

Ananguku Tili

(Matthew-ku 5:15; 6:22-23)

³³ “Kaya wanyu kulinma nyangatja. Anangungku wali unngu lampa tilira wanyu kutitjunkupai kumpilpa ngaranytjaku? Wiya, paluru uti tjunkupai, katu, tili paluru irnyara utintjaku anangu tjutangka walingka tjarpara uti nyakunytjaku.

³⁴ Ka palu purunypa nyura kurungku tili nyakupai munu kutjupa kutjupa tili paluru irnyannyangka kulu.

“Munu nyura kuru palyangku uwankara uti nyanganyi. Palu nyura tjinguru kuru kurungku puu nyanganyi munu mungawalurungka nyinanyi.

³⁵ Kayanku palula-tawara purkarangku kulinma tili mulata kutju nyinanytjikitjangku Godaku panya tilingka. Tjinguru nyuntu tili nguntingka nyinanyi mungawalurungka.

³⁶ Palu nyura kurunpa winki Godaku pulkara nintiringkunytjikitja mukuringkulampa tili mulata nyinanyi mungawalurungka wiya alatjitu, ka Godalu tili pulkalu nyurala uwankara tjukarurungku

* **11:30** Anangu Ninapanya ngurara tjuta malikitja tjuta Jew wiya tjuta, munuya nganmanyapa kura pulka nyinangi. Nyawa Jonah 1:1.

nintilku nyura palumpa ninti pulkaringkula tili pulkangka nyinanytjaku.”*

Jesulu Paratji Tjuta Munu Moseku Tjukurpa Nintilpai Tjuta Kulu Kuranmankunytja

(*Matthew-ku 23:1-36; Markaku 12:38-40; Luke-aku 20:45-47*)

³⁷ Ka Jesulu tjukurpa wangkara wiyaringkunyangka wati Paratji kutjungku palunya altingu palula ankula mai ngalkuntjaku palumpa walangka. Ka mulapatu Jesunya anu palula tjungu munu walangka tjarpara anta-ngarikatingu taipulangka itingka.*

³⁸ Ka wati panya Paratjingku Jesunya nyakula pulkara urul-yarara kuliningi, “Ai, nyangangu ara nganampangka nganmanytju manyirka paltjintja wiyatu mai ngalkuntjikitjangku.”

³⁹ Ka paluru urulyarara kulinnyangka Jesulu nyakula palula wangkangu, “Panya nyura Paratji tjutangu kutjupa kutjupa wiru tjuta palyalpai uti, anangu tjutangu nyuranya nyakula palya-palku kulintjaku. Palu Godalu nyuranya unngu nyanganyi, panya nyura manyungku anangu tjuta ngulutjingara kutjupa kutjupa tjuta tjanampa tjulyalpai, munu panya nyura kura kutjupa kutjupa tjuta kulu rawangku kampangkatu palyalpai. Uwa, nyura nyaa purunypa, panya anangungku piti urilitja kutju paltjira wirulpai, ka unngutja kiti raputji winki ngarapai, nyara palu purunypa nyura palya-palku nyinanyi kura mulapa.

⁴⁰⁻⁴¹ Nyura kawakawa tjuta! Godalu wanyu nyuranya puntu kutju palyanu kurunpa wiya? Wiya, paluru alatjitu nyuranya kurunpa winki palyanu, urilitja munu unngutja kulu. Ka nyura uti tjukarurungku kulinma munuya anangu ngaltutjara tjutaku kurunpa winki ngalturingkula tjanampa mulamulangku palyanma wiru tjuta kutju, ka nyara palulanguru Godalu nyuranya kurunpa winkingku mulamulangku palyannyangka nyakula nyurampa pulkara pukulariku.

⁴² “Palu nyurampa Paratji tjutaku pika pulka mulapa ngaraku! Panya nyura ukiri panji wiru ini miinpa, munu ruuwa, munu ini kutjupa kutjupa tjuta kulu nyurampa kaananguru 100 mantjira tjarara 10 Godanya ungupai, Moseku panya tjukurta kulintjatjanungku. Palu

* **11:36** Nyangatja Jesulu tjukurpa kuru munu tilitjara wangkangi nyuntu nganana kampa kutjupara tjukurpa kutjupa kulintjaku, panya nganana unngu nyaa kulini. Panya nganana kurungku kutju tili nyakupai munula kutjupa kutjupa tilingku irnyannyangka kulu uti nyakupai. Palu purunypa nganana unngu kutju kulira ngurkantankupai nyaa tjukaruru ngaranyi tjukurpa Godanyatjara. Munula panya kuru palya nyinarampa uwankara wirura tjukarurungku nyanganyi. Palu purunypala kulintja palya nyinarampa nganana Jesulu panya wangkanytjita uwankaraku mulamularingkuku, panya nganana unngu Godaku pulkara nintiringkunytjikitja mukuringanyi. Palu tjingurula kuru pika nyinarampa nganana putu nguwanpa tjukarurungku nyakuku, munula tjinguru kurutjararingkula putu alatjitu nyakuku. Palu purunypala Godanya unngu wantirampa nganana Jesulu wangkanytjita kutju mulamularingkunytja wiyangu wantiku, panya nganana Godaku pulkara nintiringkunytjikitja mukuringkunytja wiya munula palulanguru ngurpa alatjitu nyinaku. Pala palula-tawarala uti purkarangku kulinma tjukarurungku unngu kulintjikitjangku. Tjinguru kutjupangku kulini, “Wiya, ngayulu nganmanypa nintiringu Godaku. Nyaakuna piruku tjukurpa kutjupa nyanga Jesulu wangkanytjita nintiringama?” Palu alatji kulirampa palurunku ngurparinganyi panya paluru Jesunya wantira Godanya kulu wantinyi. Palu nganana kurunpa winki Godaku pulkara nintiringkunytjikitja mukuringkunyangkampa paluru nganana uwankara tjukarurungku nintilku nganana palumpa ninti pulka nyinanytjaku. * **11:37** Jew tjutangu tjakangu mai taipula mutumutungka itinguru antangu ngarira ngalkupai.

nyura Moseku tjukurpa pulka tjuṭa kulira wantipai, panya nyura anangu tjuṭa ngunti kuralpai tjanampa tjukarurungku palyantja wiyangku, munu nyura Godaku pulkara mukuringkunyntja wiyangku wantipai. Palya nyura ukiri panya tjuṭa Godanya unganyi, palu nyura uti waintara kulinma munuya anangu tjuṭaku tjukarurungku palyanma.

⁴³ “Uwa, mulapa nyurampa pika pulka ngaraku ngula, panya nyura wali inmatjangka tjungurungkula tjiya wiru tjuṭa ngurkantankupai anangu tjuṭangka kuranyu uti nyinakatinytjikitja mukuringkula. Munu nyura tawunungka kanany-kanany para-ngarapai anangu tjuṭangu nyuranya nyakula mirawaninytjaku mukuringkula.

⁴⁴ Palu nyurampa pika pulka mulapa ngaraku, panya nyura kurlpa irititja tjuṭa purunypa nyinanyi. Panya anangu tjuṭa kurlpa irititjawanu watarku anukupai manta palyangka-palku, palu purunypa nyuranya anangu tjuṭangu nyakula palya-palku kulilpai, palu wiya nyurala unngu kura pulka mulapa ngaranyi.” Alatji Jesulu wangkangi tjanala Paratji tjuṭangka.

⁴⁵ Ka wati kutjupangu Moseku tjukurpa nintilpaingku palula wangkangu, “Nintilpai, nyuntu tjukurpa nyanga palunya wangkara nganaṅanya kulu paini.”

⁴⁶ Ka Jesulu palula ngapartji wangkara wangkangu, “Nyurampa kulu pika pulka ngaraku Moseku panya tjukurpa nintilpai tjuṭaku, panya nyura anangu tjuṭa rawangku wituwitulpai tjukurpa kutjupa kutjupa tjuṭa wanganarangku kulira palyantjaku, kaya ara tjuṭa mulapa ngaranyangka puṭu kulira kaar-kaararira kurunpa pakuringkupai. Panya mayatjangku palumpa wati warkaripaingka tjanangka kutjupa kutjupa pulka mulapa katinytjaku tjalitjungkupai munu mayatja paluru tjalira katira paku pulkaringkunyaṅka nyakula, palunya alpamilara tjara palulanguru mantjira tjalira katinytja wiyangku wantipai. Nyara palu purunytju nyura anangu tjuṭa rawangku wituwitulpai kutjupa kutjupa tjuṭa mulapa palyantjaku, kaya pakuringkupai.

⁴⁷ “Uwa, mulapa nyurampa pika pulka utiringkuku, panya nyura kulpi tjuṭa rawangku wirulpai nyara Godaku wati wangkatjara tjuṭa unngu miri ngarinyangka. Palu miri nyara palunya tjananya panya nyurampa tjamupitingku iriti iluntanangi.

⁴⁸ Kana nyuranya kulpi tjuṭa wirura kanyinnyangka nyakula kulilpai, ‘Munta, nyanga paluru tjana tjinguru palya kulini tjanampa tjamupitingku iriti wangkatjara tjuṭa iluntankunyntja.’

⁴⁹ “Palu nyanga palunya Godalu nintingku kuliningi munu panya wangkangu, ‘Ngayulu wangkatjara tjuṭa iyalku, tjakulpa tjuṭa kulu anangu tjuṭa wangkara tjukaruruntjaku. Kaya tjara iluntankuku munuya tjara kutjupa kuralku.’

⁵⁰ Uwa, nyurampa tjamupitingkuya wangkatjara tjuṭa kuwaripatjara mulapa iluntanangi, munuya rawangkuṭu iluntankukatingi. Ka nyara palulanguru Godalu nyuranya nyanga kuwari nyinanyntja tjuṭa kukanymanu, panya nyura munu nyurampa tjamupitingku wati wangkatjara tjuṭa pungkula iluntankunyntjitjangka.

⁵¹ Panya nyura Abelnga-warara iluntanu, munuya nyara palulanguru Godaku wangkatjara tjuṭa rawangku iluntara wananingi, munuya palulanguru wati malatja Tjakarayanya kulu iluntanu,

paluru timpula unngu pitjilpa pulkangka itingka ngaranyangka, Godala mirangka. Uwa, panya palula tjanalanguru kuwari nyura kukanypa ngaranyi, panya nyurampa tjamupitingku tjananya rawangku pungkukatinytjijangka.

⁵² “Uwa mulapa pika pulka mulapa nyurampa ngaraku Moseku tjukurpa nintilpai tjutaku. Panya nyura anangu tjutangka wangkara nintinyangka kutju tjana kulira Godaku iwaraku nintiringkupai, palu nyura Godala tungunpungkula iwara pala palunya wanantja wiyangku wantipai, munu kutjupa tjutangku kulu iwara pala palunya wanantjaku-tawara nyura titutjara anga-ngaranyi, tjanala tjukarurungku nintintja wiya.” Alatji Jesulu tjananya wangkangu.

⁵³ Ka Jesunya ankunytjikitja ritiringkunyangka wati tjukurpa nintilpai tjutangku munu Paratji tjutangku kulu palunya markunu munuya palula mirpan-mirpanu rawangku tjapiningi paluru tjukurpa tjuta piruku wangkanyangka kulintjikitjangu.

⁵⁴ Panya paluru tjanaya ngunti arkara palula tjapiningi ngunti wangkanyangka palunya kuutpakutu katira wangkanytjikitjangu.

12

Paratji Tjuta Purunypa Ngunti Palya-palku Nyinanytja Wiya

¹ Ka nyara palula-arangka anangu mungilyi mulapa tjunguringu munuyanku ngarala pulkara utjuningi. Ka Jesulu palumpa nintintja tjutangka-warara wangkangu nyanga alatji, “Ngulu nyangamayanku nyura Paratji tjuta purunyarinytjaku-tawara panya paluru tjana ngunti palya-palku nyinapai.

² Panya anangungku kampangkatu palyantjitja uwankara ngula utiringkuku, paluru unngu kuraringkula kulintjitja tjuta kulu, panya kumpilitja uwankara mulapa utiringkuku, kaya uwankarangku kulilku.

³ Panya tjukurpa nyura mungangka kumpira wangkanytja kutjupangku kalala utingku wangkaku, kaya uwankarangku kulilku. Munu tjukurpa nyura wali unngu tjaalytju wangkanytja kutjupangku urilta mirara tjakultjungkuku wali katunguru anangu winkingku uti kulinjtaku. Uwa nyurayanku paluru tjana purunyarinytjaku-tawara pulkara atunymanama.”

Godaku Kutjuku Nguluringama (Matthew-ku 10:28-31)

⁴ “Kana walytja wiru tjutangka nyurala wangkanyi, anangu tjutakuya nguluringkuwiya nyinama paluru tjana nyurampa pikaringkunyangka, panya tjana nyuranya puntu kutju pungkula iluntankuku, munu palulangurulta nyuranya kurunpa puwu wiyani.

⁵ Wiya, nyura uti Godaku pulkara nguluringama panya paluru kutju witulya pulkangku nyuranya puntu iluntankunytjatjanungku kurunpa waniku ngura kurangka waru pulkangka kampanytjaku. Uwa, nyara palula-tawara nyura uti palumpa kutjuku nguluringama anangu tjutaku wiya.

⁶ “Panya Godalu nyuranya titutjarangku mukulyangku kulini watarkurinytja wiyangku. Wanyuya tjulpu panya nyii-nyii kulinma. Tjinguru nyura tjulpu palu purunypa kutjara mankurpa payamilalku mani kulunytja kalka kutjarangka. Palu Godalu tjulpu nyanga

tjukutjuku tjuṭaku watarkurinytja wiyangku tjananya kutju kutju rawangku kulilpai.

⁷ Munu palulanguru tjuṭpu tjukutjuku tjuṭa rawangku kulira paluru wanyu nyurampa pulka tjuṭaku watarkuriku? Wiya, paluru nyuranya rawangku mukulya pulkangku kulilpai tjuṭpu tjuṭangka munkara, kaya palulanguru nguluringkuwiya rapa nyinama. Panya paluru nyuranya uwankara kutju kutju nintinku kulilpai. Munu paluru nyurampa mangkaku ninti yaaltjitu nyurampa katangka ngaranya. Kutjupangku putu kantamilani, palu Godanya kutju ninti, munu nyurampa kutjupa kutjupa uwankaraku kulu paluru ninti nyinanyi. Pala palulanguru nyura uti nguluringkunyitja wiya rapa nyinama.

Jesuku Walytjangku Utingku Wangkanytja
(Matthew-ku 10:32-33; 12:32; 10:19-20)

⁸ “Kulilaya! Tjinguru nyura anangu tjuṭangka mirangka rapangku wangkaku ngayuku walytja nyinanytjatjanungku, ka ngayulu Watiku Katjangku ngapartji palu purunypatu nyuranya wangkaku Godaku angelpa tjuṭangka mirangka alatji, ‘Nyanga paluru tjana ngayuku walytja nyinanyi.’

⁹ Palu nyura tjinguru tjuṭangka mirangka ngayuku ngurparingkunya yangkampa ngayulu nyurampa ngapartji ngurparingkukuṭu angelpa tjuṭangka mirangka.

¹⁰ Uwa, ngayunya nyura Watiku Katjanya kurara wangkanytjatjanu piiwiyaringkunyaangka Godalu nyuranya kalypanghku pungkuwiyangku wantiku. Palu Kurunpa Milmilnga nyura kurara wangkanyaangka Godalu nyuranya kukanymankuku nyurampa kalyparingkunyitja wiyangku.

¹¹⁻¹² “Kaya tjinguru ngayunya wanannyangka nyuranya wali inmatjakutu witera katiku Jewku mayatja tjuṭakutu nyuranya kulira ngurkantara paintjaku. Ka nyura tjinguru mayatjangka wangkanytjikitjangku putu kulilku, ‘Tjukurpa nyaanatu wangkaku?’ Palu alatji pulkara kulilwiyangku wantima, panya nyara palula arangka tjanala kuraru ngarala nyura Kurunpa Milmilu nintinnyangka kulilku tjukarurungku wangkanytjikitjangku.” Alatji Jesulu wangkangi tjanala.

Tjukurpa Wati Mani Pulkatjara

¹³ Ka wati kutjungku tjanalanguru wangkangu Jesula, “Nintilpai, ngali kutarara tjitula nyinanyi. Katju kuta wanyu wangka, kani mamaku ulytja tjarara uwa.”

¹⁴ Ka Jesulu palula wangkangu, “Wiya, nganaluni wangkangu ngayulu mayatjarira nyupalinya tjarara unghkunyitjaku? Palatja nyupalimpa, ngayuku wiya.”

¹⁵ Munu palulanguru Jesulu anangu uwankarangka wangkangu, “Nyura uti ulytja munu mani pulka mantjintjikitja mukuringkunyitja wiyangku wantima! Godalu wanyu nyuranya wankaru kanyilku nyura pulka mulapa kanyinnyangka? Wiya alatjitu.”

¹⁶ Munu palulanguru paluru tjanala tjukurpa ara kutjupatjara tjakultjunangi alatji wangkara, “Wati mani pulkatjarangku manta pulka kanyiningi munu mai ukiri pulka paamangka pakaltjinggaṭu.

17 Munu paluru kutjungku kuliningsi, 'Wali nyangatja mai pulka utulura tjunkunytjaku tjukutjuku utju mulapa, kana nyaalku?

18 Munta, nyanga alatjintina palyalku. Kuwarina wali nyanga tjukutjuku piluntankuku mununa kutjupa pulka mulapa palyalku mununatju nyara palula mai munu ngayuku kutjupa kutjupa uwankara utulura tjunkuku. 19 Mununatju pukularira wangkaku, "Ngayuku mai pulka munu kutjupa kutjupa uwankara winki ngarinyi kuwari yiya tjutaku alatjitu, kana rawangku ngalkula tjikira pukulariku mununatju pakuwiya nyinaku." '

20 "Palu Godalu wati panya palunya wangkangu, 'Nyuntun kawakawa! Munga nyanga kuwari nyuntu iluku, munun panya nyuntu utulura tjunkunytja uwankara wantikatiku kutjupangku mantjintjaku.' "

21 Munu Jesulu ara nyanga palunya wangkara wiyaringkula tjananya wangkangu, "Nyanga palu purunyariku anangu panya palurunku walytjangku kulira wiru tjuta utulura tjunkupai, panya paluru Godanya pulkara pukulmankunytjikitjangku kulintja wiyatu."

Iluru-ilururinytja Wiya Nyinanytjaku

(Matthew-ku 6:25-34)

22 Munu palulanguru Jesulu wangkangu palumpa nintintja tjutangka, "Tjinguru nyura kutjupa-ara tjituru-tjitururipai alatji kulira, 'Mailanku yaaltjinguru mantjilku ngalkula paltja nyinanytjikitjangku, munula mantara kulu yaaltjinguru mantjilku tjarpara unytjunpa nyinanytjikitjangku?' Palu ngayulu nyurala wangkanyi nyanga alatji kuliraya tjituru-tjitururinytja wiyangku wantima!

23 Panya Godalulanya wanka nyinanytjaku palyanu mai kutju pulkara kulintjaku wiya, munulanya puntu wiru palyanu mantara kutju pulkara kulintjaku wiya, palu palunya waintara kulintjaku.

24 "Wanyuya tjulpu tjuta nyawa munuya kulinma panya paluru tjanaya ukiri kaanangka pakaltjingalpai wiya munuya mai kururingkunyaangka mantjira utulura walingka ngulaku tjunkupai wiyatu, panya Godalu tjananya titutjarangku paltjalpai tjintu winki. Kaya kulinma panya nyura tjulpu tjuta purunypa wiya anangu pulka tjuta nyinanyi, ka panya Godanya nyurampa pulkara mulapa mukuringanyi tjulpu tjutangka munkara.

25-26 Palulanguruya maiku kutjupa kutjupa tjutaku putu kulira tjituru-tjitururinytja wiyangku wantima, panya nyura tjituru-tjituru nyinarampa putu yiya tjuta ma-warani mantangka nyanga rawa wanka nyinanytjikitjangku. Palulanguruya kutjupa kutjupa tjutaku putu kulirampa tjituru-tjitururinytja wiyangku wantima.

27 "Kulinmaya wanyu inuntji panya ilytjingka pakantja tjuta, panya paluru tjana wiru mulapa ngaranyi, palu tjananku warakarira mantara walytjangku palyara ngana purunytju tjarpapai wiya alatjitu. Panya Tjalamannga mayatja pulka iriti nyinara mantara wiru tjutangka tjarpapai, palu palumpa wiru tjutangka munkara mulapa inuntji panya ilytjingka pakantja tjuta ngaranyi.

28 "Ka nyura nyaaku mantara-tjiratja tjituru-tjitururinyi Godaku putu mulamularingkula? Panya Godalu alatjitu ukiri tjuta inuntjingka wirulpai, palu ukiri paluru tjana tjintu mankurpa nguwanpa

ngarala piltiringkupai, ka tjananya warungku kampara wiyalpai. Kaya nyara palulanguru kulinma, panya Godalu ukiri tjuṭa kulira rawangku inuntjingka wirulpai unytju ngarala wiyaringkunyjtaku, munu palulanguru nyuranya wantinytja wiyangku pulkara kulilku ukiringka munkara mulapa panya nyura titutjara nyinapai ukiri purunypa wiya. Nyara palulanguru paluru nyurampa watarkurinytja wiya, munu nyuranya mantara tjuṭa ungkuku tjarpanytjaku.

²⁹ “Ka palulanguru nyura alatji kulilwiyangku wantima, ‘Yaaltjigurula mantjira ngalkuku? Munula yaaltjiguru mantjira tjikilku?’ Palu kutjupa kutjupaku puṭu kulira tjituru-tjitururinytja wiyangku wantima.

³⁰ Nyanga alatjiya Godaku ngurpa tjuṭangku rawangku kulilpai mantjintjikitjangku. Palu Mama Godanya ninti nyinanyi nyura pala mukuringkunyjtija uwankaraku.

³¹ Kaya kutjupa kutjupa tjuṭa-tjiratjangku tjituru-tjitururira puṭu kuli-kulintja wiyangku wantima, munuya palunya kutju rawangku kulinma paluru nyuranya mayatjangku kanyinnyangka pukulmankunyjtikitjangku, ka paluru nyuranya ungkuku mai, mantara, munu kutjupa kutjupa tjuṭa kulu nyura mukuringkunyangka.

*Ngura Ilkaritjaku Mukuringama
(Matthew-ku 6:19-21)*

³² “Uwa, nyura ngayuku walytja wiru mankur-mankurpa nyinanyi, munuya nguluringkuwiya nyinama. Panya nyurampa mamangku Mayatja Godalu nyuranya rawangku atunytju kanyintjikitja mukuringanyi walytja uwankara.

³³ Kaya nyurampa ulytja kutjupa kutjupa tjuṭa tjalamilara mani mantjirampa anangu ngaltutjara tjuṭa ma-ungama. Panya nyura alatji palyannyangka Godalu nyurampa ilkarangka tjunkuku wiru mulapa. Palulanguruya rawangku mani mantangka nyanga pulkantjikitjangku kulintja wiyangku wantira ma-ungama Godalu nyakula nyurampa ilkarangka rawangku tjunkukatinytjaku wiru tjuṭa mulapa. Panya ngura nyara palula nyurampa Godalu tjunkunyangka titutjara ngaraku wiyaringkunyjtja wiya. Panya nyara palula wati kutitjunkturpai nyinanytja wiya tjarpara kutitjunkturpajitja, ka kantaya tjuṭa kulu ngaranytja wiya nyarangka mantara ngalkula kurantjikitja.

³⁴ “Uwa, uti nyura ilkaritja tjuṭaku kutju pulkara mukuringama. Tjinguru nyura mantatja tjuṭaku pulkara mukuringkulampa nyura palunya tjananya kutju rawangku kulilku Godanya wantira. Palu nyura ilkaritja tjuṭaku kurunpa winki mukuringkulampa nyura mantatja tjuṭa wantira waintara ilkaritja tjuṭa kutju rawangku kulilku munu Godala kutju wanganarangku kulintjikitja mukuringkuku.”

*Mayatjaku Ala-alangku Patara Wara Wiru Palyalkatima
(Matthew-ku 24:45-51)*

³⁵⁻³⁶ Munu Jesulu tjananya wangkangu, “Ngayukuya titutjara riti ala-ala patara ngarama, nyaa purunypa, panya wati wara tjuṭa tjanampa mayatjaku tili winki patantja purunypa. Panya tjanampa mayatja tjinguru nganmanypa anu wati palumpa malpangku kungkawara altinyangka nyakunytjikitja munu pulampa pukularira mai pulka anangu malpa tjuṭangka tjunguringkula

ngalkuni. Kaya wati mayatjaku war̄ka tjuṭa ngurangka nyinara lampa tilitjara palumpa paṭani maḷaku pitjanytjaku. Munu tjanampa mayatjangku pitjala tuwa pungku-pungkunyangkaya paluru tjana pakara tuwa mapalku alaṅi.

³⁷ Ka wati panya mayatjangku tjananya pitjala riti paṭara ngaranyangka nyakula palunya tjananya pulkara pukulmananyi, munu panya upukuta araltjara tjunkula tjananya taipulangka nyinatjunanyi mai katira ungkunyjtikitjangku.

³⁸ Panya mayatja paluru tjinguru munga kultungka pitjama munta tjinguru tjintukutu pitjama, palu palumpa war̄ka tjuṭa kunkunpa wiya palumpa rawa riti ala-ala paṭani munuya pitjanyangka nyakula pulkara pukularinyi. Ka nyura palu purunypatu ngayuku riti ala-ala nyinama kunkunpa wiya ngayulu pitjanytjaku paṭara.”

³⁹ Munu Jesulu tjukurpa kutjupa palu purunypa tjanala piruku wangkangi alatji, “Wati panya kutitjungkupainya kulila, panya paluru walingka tjarpara kutitjungkunyjtikitjangku nganmanytju waliku mayatjangka taimi tjakultjunktunytja wiya paluru urulyku wirkankupai. Tjinguru paluru nganmanytju tjakultjunama, ka waliku mayatjangku nintingku nyinara ngura anga-nyangama pitjala tjarpanytjaku-tawara.

⁴⁰ Ka palu purunypa nyura uti rawangku riti nguwantu ala-alangku paṭara nyangama ngayulu Watiku Katjanya watarku nyinanyangka pitjanytjaku-tawara. Panya nyura uwankara ngurpa yaalara ngayulu maḷaku pitjanytjaku.” Alatji Jesulu palurunku wangkangi palumpa nintintja tjuṭangka.

Tjukurpa Wati War̄katjara

⁴¹ Ka palulanguru Peterlu palula tjapinu, “Mayatja, nyuntu wanyu tjukurpa nyangatja ngananaḷa wangkanyi nganampa kutju, munta anangu uwankaraku?”

⁴² Ka Jesulu palula wangkangu, “Ngananya wanyu wati war̄ka nintipuka munu tjukaruru wanganara war̄karipai? Nyara palunya mayatjangku tjukaruru nyakula kutju tjunkuku palumpa war̄karipai kutjupa tjuṭa tjukarurungku atunymara kanyintjaku munu tjananya mai ungkunytjaku.

⁴³ Munu ngula mayatja panya paluru ankunytjatjanungku maḷaku pitjala nyakuku wati panya paluru war̄ka panya wirura palyantja. Munu paluru palumpa pulkara alatjitu pukulariku.

⁴⁴ Kana tjukarurungku nyurala wangkanyi, panya wati mayatjangku alatji wirungku war̄ka tjuṭa atunymara kanyinnyangka nyakula palunya mayatja pulka mulapa tjunkuku palumpa uwankara mayatjarira atunymara kanyintjaku.

⁴⁵ “Palu tjinguru wati paluru kampa kutjuparira unngu kulilku, ‘Munta ngayuku mayatja tjinguru titutjara anu munu tjinguru ngula kutju maḷaku pitjaku.’ Munu palulangurulta pitjanytja wiya ngaranyangka paluru war̄karipai kutjupa tjuṭa pikangku pungama, wati tjuṭa munu minyma tjuṭa kulu. Munu paluru mai pulka ngalkula waina tjikira tarangkariku.

⁴⁶ Ka ngula mayatja panya paluru maḷaku pitjaku wati panya paluru watarku nyinanyangka. Munu palunya kura nyinanyangka nyakula pulkara alatjitu pungkula paṭa iyalku ngura kurakutu panya Godala tungunpungkupai tjuṭangka tjunguringkula nyinanytjaku.

47 “Ka nyura kulini? Tjinguru wati war̄karipaingku nintingku kulini mayatjangku palunya war̄kaku wangkanyangka munu paluru palyantja wiyangku wantinyi. Ka mayatjangku war̄ka wantinyangka palunya pul̄kara mulapa pungkuku.

48 Palu wati war̄karipaingku tjinguru mayatja mukuringkunyjtija palyantja wiyangku wantinyi ninti wiyangku munu kutjupa ngunti palyani paluru kulintja. Ka palunya mayatjangku watarkitja-man̄tu pika tjukutjuku pungkuku.

“Kulini nyura? Godalu tjinguru an̄angu kutjupa war̄ka pul̄ka unganyi palyantjaku, munu paluru mukuringanyi war̄ka panya ungkunyjtija tjukarurungku palyantjaku. Munu tjinguru piruku an̄angu kutjupa war̄ka pul̄ka mulapa unganyi war̄ka panya ngan̄manytju ungkunyjtijangka mun̄kara, munu paluru pirukuṭu mukuringanyi war̄ka panya ungkunyjtija tjukarurungku palyantjaku.”

Walytjapiti Tjutangkuyanku Tjararingkula Tjananku Kuraringkuku Jesulanguru

(Matthew-ku 10:34-36)

49 Munu Jesulu rawangku wangkangi, “Panya ngayulu pitjangu mantakutu Godaku tjukurpa war̄u purunypa wangkara lipintankunyjtikitja. Ka tjarangku kulira mulamularingkuku, ka tjarangku kulira wantiku. Kaya nyara palulanguru maun̄talpa maun̄talpa ngaraku warungku kampanyangka purunypa. Kaṅa ngayulu mukuringanyi warpungkula war̄u purunypa lipiringkunyjtjaku.

50 Palu panya ngayuku ngaranya ngan̄manypa pika pul̄karingkula pul̄kara uliringkunyjtjaku, kaṅa ngayulu kulil-kulilpa nyinanyi pika panya palumpa paṭara.

51 “Ka nyura tjinguru ngayunya kulini alatji, ‘Nyangatja tjinguru mantakutu pitjangu an̄angu tjuṭa kalypa nyinanytjaku palyantjikitjampa.’ Palu wiya, nyangatja nyura ngunti kulintja, panya ngayulu pitjanyangka an̄angu uwankara kalyparingkula tjungu nyinanytja wiya, palu kutjupa tjuṭa ngayuku mulamularingkuku, kaya kutjupa tjuṭa ngayuku mulamularingkuwiya nyinaku munuya paluru tjana an̄angu panya ngayuku mulamularingkupai tjuṭaku pikaringkuku.

52 Panya kuwaringuru tjinguru an̄angu 5 walytjapiti tjungu nyinanytjatjanu kutjara mulamularingkuku, ka maṅkurpa kulilwiya watarku nyinaku, munuya puṭu tjungu pukulpa nyinaku ngura kutjungka.

53 “Ka wati mama palumpa katjaku kuraringkuku ngayuku mulamularingkunyangka. Ka palu purunypaṭu wati katjangku palumpa mamangka tungunpungkuku paluru ngayuku mulamularingkunyangka. Ka minyma ngunytju palumpa un̄talpaku pikaringkuku ngayuku walytjaringkunyangka. Ka palu purunypaṭu kungkawarangku palumpa ngunytjunga tungunpungkuku paluru ngayuku mulamularingkunyangka. Ka minyma kutjupa palu purunypaṭu palumpa mingkayiku kuraringkuku, ka kungkawara kutjupangku minyma mingkayingka tungunpungkuku.”

Jesulu Paintja Ngunti Pinatjararingkunyangka
(Matthew-ku 16:2-3; 5:25-26)

54 Munu palulanguru Jesulu tjanala wangkangu, “Panya nyura wilyura nyakupai ngangkali ngaranyangka munu nyura wangkapai, ‘Kuwarintilanya minangku puyilku.’ Ka mulapatu minangku puyilpai.

55 Ka palu purunypa nyura piriya wangkanyangka kulira wangkapai, ‘Kuwarinti kuli pulka ngaraku.’ Uwa, mulapatu nyura tjukarurungku wangkapai ilkaru nyakunytjatjanungku munu piriya wangkanyangka kulintjatjanungku.

56 Palu nyaaku nyura kutjupa kutjupa tjuṭa nyakula puṭu kulini Godalu palyannyangka? Wiya, nyura palya-palku nyinapai tjuṭangku puṭu Godanya tjukarurungku kulilpai.

57 “Nyaaku nyura rawangku puṭu kulini tjukarurungku palyantjikitjangku?

58 Tjinguru nyuntu anangu kutjupa kurannyangka paluru nyuntunya mirpanarira kuutpakutu katiku. Ka katinyangka nyuntu uti palunya wirura purkarangku wangkakatima palumpa kalyparingkunytjikitjangku kuutpangka wirkankunytja kuwaripangka, kanta paluru tjinguru kalypangka wantiku kuutpangka ngaratjunkunytja wiyangku.

“Palu tjinguru nyuntu wangkara palumpa kalyparingkunytja wiyangku wantinyangkampa paluru nyuntunya katiku alatjitu munu wati ngurkantankupaingka kuranyu ngaratjunkuku, kanta paluru nyuntunya kura ngurkantara wangkaku maningka payamilantjaku munu paluru pulitjamunu alitiku kanta pitjala nyuntunya witera katira tjailangka tjarpatjunkuku.

59 Mununta nyara palula rawangku kanyilku nyuntu mani uwankara payamilara wiyantjaku patara. Nyangatjana mulamulangku nyurala wangkanyi.”

Alatji Jesulu wangkangi anangu tjuṭangka Godanya tjukarurungku kulintjaku.

13

Godalakutu Malaku Aruriwa Kura Tjuṭa Wantira

1 Ka nyara palula-arangka anangu kutjupa mankurpa wirkanu ngura nyara palula munuya pitjala Jesula tjakultjunu, “Tjukurpa panyatjan kulini? Panya anangu Galileenya ngurara mankurpa wali inmatjangka tjarpangu Godanya walkuntjikitja. Munu panyaya kuka pungkula pitjilta tjunkula tiliningi Godanya ungkunytjikitjangku. Ka panya alatji palyannyangka Pilate-aku tjaultji tjuṭa urulyku wirkanu munu panya tjananya tjarpara pungkula iluntanu, ngaltutjara.”

2 Ka Jesulu kulira tjanala wangkangu, “Palu nyura nyaa kulini? Tjinguru nyura kulini tjana kura pulka palyantjatjanu ilungu, ka panya Galileenya ngurara kutjupa tjuṭa palu purunypa wiya anangu palya tjuṭa.

3 Palu wiya, nyangatja nyura ngunti kulini. Uti nyura kuluyanku kulinma, munuya kura tjuṭa palyantjatjanu piiwiyaringkula Godalakutu aruringama! Panya nyura wantinyangkaya nyuranya palu purunypatu iluntankuku.

4 “Wanyuya ara panyatja kulila panya wati 18 mungatu Jerusalemala ilunytja. Panya ngura nyara Tjailumala tjananya wali warangku pilukatira iluntanu. Ka nyura tjinguru palu purunypatu kulini tjana

kura pulka palyantjatjanu ilungu, ka panya anangu Jerusalemanya ngurara kutjupa tjuta palu purunypa wiya anangu palya tjuta.

⁵ Palu wiya, nyangatja nyura ngunti kulini. Uti nyura kuluyanku kulinma, munuya kuranguru piiwiyaringkula Godalakutu aruringama! Panya nyura wantirampa palu purunypatu iluku."

Jesulu Israelnga Utintja Punu Ili Mai Wiya Ngaranytja

⁶ Munu palulanguru Jesulu tjukurpa ara kutjupatjara tjanala wangkangu alatji, "Wati kutjungku palumpa kaanangka punu ili pakaltjinganu, munu ngula punu panya paluru pulkaringkunyaangka wati paluru anu mai nyakula mantjintjikitja. Palu ankula putu nyangu punangka panya mai wiya ngaranyangka.

⁷ Munu wangkangu wati panya kaana kanyilpaingka, 'Nyawa, ngayuluna rawa yiya mankurpa pitjangi punu nyanga palulakutu mai ili nyakula mantjintjikitja mununa mai punu nyangangka nyakunyitja wiya alatjitu. Ka wanyu katara punkatjingala, munu punu kutjupa tjura palumpa arangka.'

⁸ "Palu wati panya warkaripaingku ngapartji wangkangu, 'Mayatja, wanyu yiya kutju piruku wantima, kana para-tjawara arintara tjiipiku kuna tjunkuku punu panya paluru palyaringkula maitjararingkunytjaku.

⁹ Ka tjinguru ngula yiya kutjupa mai pakalku. Palu tjinguru mai pakalwiya ngaranyangkampana katara waniku.'" Alatji Jesulu wangkangi tjanala.

Minyma Pupatu-pupatu Palyarunguntja Tjintu Milmilta

¹⁰ Ka ngula Saturday-ngka tjintu panya pakuwiyaringkupaingka Jesulu wali panya inmatjangka tjarpara anangu tjutangka wangkara nintiningi.

¹¹ Ka minyma kutjupa nyara palula nyinangi witapi pupatu-pupatu mamungku kurantja, munu paluru rawa mulapa yiya 18 witapi pupatu-pupatu ankupai tjakaruru wiya.

¹² Ka Jesulu minyma panya palunya nyakula altingu munu wangkangu palula, "Minyma ngana, tjakarururiwa!"

¹³ Munu paluru palula mara tjunu, ka minyma panya paluru malku tjakarururingu munu pulkara pukularira Godanya walkuningi.

¹⁴ Ka wali inmatjaku mayatja pulkara Jesuku mirpanaringu minyma panya palunya tjintu pakuwiyaringkupaingka palyarungunnyaangka, munu paluru anangu tjutangka wangkangu, "Panya tjintu 6 kutjupa ngaranyi warkarinytjaku, kaya tjintu nyara palula tjanala palyarunguntjaku pitjama, palu tjirirpi nyanga milmilpa Saturday ngaranyangkaya uti wantima palyarunguntjaku pitjanytja wiyanku."

¹⁵ Ka Jesulu palula tjanala wangkangu, "Nyura ngunti palya-palku nyinapai tjuta. Panya nyura tjirirpi kutjupa tjirirpi kutjupa nyurampa puluka munu tangkiyi kulu araltjara katipai mina tjikintjaku tjirirpi nyanga pakuwiyaringkupaingka kulu.

¹⁶ Palu nyura paini minyma nyanga nyurampa walytja Aipuramalanguru nyinanytja. Kunangka! Nyanga palunya panya Satantu ngura iritilpi kuranu, ka witapi rawa pupatu-pupatu ngarangi yiya 18. Ka nyura nyaaku paini pitjanytja wiyanku wantinytjaku

witapi ngayulu palyarunguntjaku? Wiya, utina minyama nyanga palunya Satantu rawangku kurantja palyanma alatjitu tjintu nyanga pakuwiyaringkupaingka.”

17 Ka Jesulu alatji wangkanyangka palumpa kuraringkupai tjutangku kulira pulkara kuntaringu, palu anangu kutjupa tjuta Jesuku pulkara pukularingu paluru wiru mulapa palyannyangka nyakula.

*Tjukurpa Uninypatjara Munu Yiitjatjara Wangkanytja
(Matthew-ku 13:31-33; Markaku 4:30-32)*

18 Munu Jesulu tjanala tjapinu wangkara, “Godalu anangu tjuta mayatjangku walytjanmara kanyintja ara nyaa purunypa ngaranyi? Tjukurpa nyaawanungkuna nyurala wangkara utilku?”

19 Wanyuna tjukurpa uninypatjara wangka. Panya wati kutjupangku uninypa ini matjata tjuku mulapa mantangka tjunu, ka uninypa panya paluru tjuku mularnguru pakara punu pulkalta ngarangi, kaya tjulpu tjutangku pitjala punu pala palula manngu palyara nyinangi. Nyara palu purunypa Godaku walytja tjutaringkupai paluru tjananya mayatjangku kanyintjaku.”

20 Munu Jesulu piruku wangkangu tjanala, “Uwa, Godalu anangu tjuta mayatjangku walytjanmara kanyintja ara nyaa purunypa ngaranyi? Wanyuna tjukurpa kutjupa wangka nyuranya nintintjik-itjangku.

21 Panya minymangku yiitja tjukutjuku mai ulungka tjungura uritjingalpai, ka panya yiitja tjuku mulatu mai taltulpai pulkaringkunyangka warungka pauntjaku. Nyara palu purunypa Godaku walytja tjutaringkupai.” Alatji Jesulu tjanala wangkara utiningi.

Ala Utju

(Matthew-ku 7:13-14,21-23)

22 Ka Jesulu Jerusalemalakutu ankula ngururpa ngura tjukutjuku tjutangka munu pulka tjutangka kulu anangu tjutangka Godaku tjukurpa wangkara nintiningi.

23 Ka kutjupangku palula tjapinu, “Mayatja, palu Godalu wanyu anangu mankurpa kutju wankarunkuku?”

24 Ka Jesulu wangkangu, “Godaku ngura wali pulka purunypa ngaranyi, ka ala utju ngaranyi anangu tjuta tjarpanytjaku. Kaya anangu tjuta mulapa ala pala palulakutu pitjaku arkara tjarpanytjikitja. Palu anangu kura palyalpai tjuta pitjanyangka Godalu wantiku tjarpatjunkunytja wiyangku. Kaya mankurpa kutju pitjala ala pala utjuwanu tjarpaku Godala tjungu titutjara nyinanytjikitja. Palulanguru nyura uti titutjara tjukaruru nyinama ala pala utjuwanu tjarpara Godala nyinanytjikitja.

25 Ka wati waliku mayatjangku pakara tuwa patinnyangka nyura urilta ngarala tuwa pungku-pungkula walkura wangkaku, ‘Mayatja, alalalampa tuwa!’ Palu wati waliku mayatjangku nyurala wangkaku, ‘Ngayulu nyurampa ngurpa. Yaaltjingu nyura pitjangu?’

26 Ka nyura wangkaku, ‘Panya nganana nyuntula mirangka nyuntula tjungungku ngalkula tjikilpai, ka nyuntu kulu nganampa tawununga tjarpara tjukurpa nintilpai.’

27 Palu paluru alatji wangkaku nyurala, 'Wiya alatjitu, ngayulu nyurampa ngurpa. Araya ngayulanguru. Nyura kuralpai tjuta.'

28 "Ka palulanguru nyuranya paira iyannyangka nyura urilta ngarala Aipuramanya, Isaacanya, Jacobanya tjananya Godala tjungu nyinanyangka nyakuku munu wati panya wangkatjara kutjupa tjuta kulu. Munu nyura Godalu tjananya mayatjangku kanyinnyangka nyakula pulkara tjituru-tjitururira ulaku panya nyura tjanala tjunguringkunyta wiyanguru.

29 Kaya ngura uwankaranguru anangu Jew wiya tjuta mulapa pitjaku kakaranguru wiluraranguru alinytjaranguru munu ulpararanguru kulu, munuya paluru tjana pitjala Godaku walytja kutjupa tjutangka tjunguringkula nyinakatiku mai panya pulka pukulpa mulatu ngalkuntjikitja Godalu tjananya uwankara mayatjangku kanyinnyangka.

30 Ka kutjupa tjuta panya kuwari mala nyinanytja tjuta kuranyuriku, ka kuranyitja tjuta malaringkuku."

Jesulu Iratanya Anantja

31 Ka tjinu kutjupa Paratji tjuta Jesulakutu pitjangu munuya wangkangu palula, "Nyuntu uti anama ngura nyangangka nyinanytja wiya, panya Iratalu nyuntunya ngurini iluntankunytkitjangku."

32 Ka Jesulu tjanala wangkangu, "Wiya panya Iratanya wati tuuka alatjitu. Kaya ankula palula wangka panya ngayulu tjinu nyanga kuwari mamu tjuta anangu tjutanguru paini, mununa anangu pikatjara tjuta kulu palyarunguni munu mungawinki kulu, mununa palulanguru tjinu mankurnguru palyara wiyalku warka uwankara.

33 "Palu ngayulu warka nyanga palunya palyani alatjitu kuwari nyanga, mununa mungawinki kulu, munu tjinu kutjupa kulu ngura nyanga palula. Panya ngura nyanga Jerusalemalaya Godaku wangkatjara tjuta nganmanytju iluntanangi, munuya palu purunypatu ngayunya ngapartji iluntankuku ngura nyanga palulatu."

Jesunya Jerusalemalanguru Tjituru-tjitururinytja (Matthew-ku 23:37-39)

34 Munu palulanguru Jesulu Jerusalemala nyinanytja tjutaku pulkara ngalturingkula tjituru-tjitururira ulara wangkangi alatji, "Ngaltutjara! Ngayulu nyurampa pulkara mukuringanyi nyanga Jerusalemala nyinanytja tjutaku. Palu iritinguru nyura Godaku wangkatjara tjuta rawangku iluntanangi munu panyaya wati tjukurtjara tjuta kulu pulingka atura iluntanangi panya Godalu ngura nyanga palulakutu iyantja tjuta. Kana rawa mulapa mukuringangi nyuranya utulura kanyintjikitja, panya tulpu ngunytjungkunku kulunypa tjuta nyalpingka unngu utulura atunymara kanyilpai, palu purunytju. Palu nyura ngayunya wantingi alatjitu.

35 "Ka palulanguru kuwari Godalu nyurampa timpula wantikatinyi, ka panya ultu alatjitu titutjara ngaraku. Ka kuwaringuru nyura ngayunya rawangku nyakunytja wiya. Palu ngula nyura ngayunya piruku nyakuku mununi nyara palula arangka nyura ngayunya walkura wangkaku alatji, 'Awari! Wanyula Godanya mirawanira

walkunma, panya nyanga palunya Mayatja Godalu iyantjatjanungku pulkara pukulmanu.'” Alatji Jesulu Jerusalemanya ngurara tjutanguru tjituru-tjitururira wangkangi.

14

Jesulu Wati Pikatjara Palyarunguntja Tjirirpi Milmita

¹ Ka Saturday kutjupangka tjintu panya pakuwiyaringkupaingka Jesunya anu mai ngalkuntjikitja wati Paratji pulkaku walikutu. Kaya Paratji kutjupa tjutangku munu wati Moseku tjukurpa nintilpai tjutangku kulu wali pala palulatu tjunguringkula ngalkuningi, munuya Jesunya ilangku arura nyangangi.

² Panya wati kutju tjunta kutjara munu miņa kutjara raa-raa pulkatjara Jesula kuranyu nyinangi.

³ Ka Jesulu palunya nyakula Paratji tjutangka munu wati Moseku tjukurpa nintilpai tjutangka kulu tjapinu wangkara, “Nganampa palya ngaranyi Saturday-ngka pikatjara palyarunguntjaku tjintu panya pakuwiyaringkupaingka, munta wantikula tjirirpi kutjupaku?”

⁴ Kaya uwankara alatjitu pilunpa nyinangi wangkanytja wiya.

Ka Jesulu pikatjara panya witiņa munu palunya pika palyarungunu munu witura iyanu ngurakutu ankunyjtaku.

⁵ Munu malangka Jesulu wangkangu anangu tjutangka, “Tjinguru nyuntumpa katja munta tjinguru puluka tjirirpi pakuwiyaringkupaingka wellangka punkara tjarpanyangkampa nyuntu palunya ilara walatjunkturpai mungawinkiku patara wantinytja wiyangku.”

⁶ Kaya nyangatja kulira unngu kuliningi, “Uwa pala.” Munuya ngapartji wangkanytjikitjangku putu kuliningi, munuya wangka wiya alatjitu ngarangi.

Walytjangkunku Pulka Palyalwiyangku Wantima

⁷ Ka wali pala palula Jesulu nyangu anangu tjutangku tjarpara tjiya wiru nyinakatinytjikitjangku walytjangku ngurkantankunyangka munu paluru tjanala tjukurpa ara kutjupatjara wangkangi alatji,

⁸ “Tjinguru kutjupangu nyuntunya mai pulkaku altinyangkampa pitjala tjiya wirungka ngurkantara kuranyu nyinakatiwiyangku wantima. Tjinguru anangu kutjupa nganmanytju altingu mai pala palumpatu. Ka paluru tjinguru wati mayatja purunypa nyuntula waintara nguwanpa.

⁹ Ka panya nyuntunya maiku altinytjalu tjinguru pitjala nyuntula wangkaku, ‘Nyuntu pala nyinanytjitjangka wati nyangatja nyinatjura kuranyu munu nyuntu nyangangka nyinakati mala nguwanpa.’ Ka nyuntu paluru alatjingannyangka pulkara kuntringkuku munun pakara malarku nyinakatiku.

¹⁰ “Palu utin kutjupangu nyuntunya maiku altinyangkampa nganmanypa alatjitu ankula tjiya kutjupangka mala nyinama, kanta paluru nyuntunya maiku panya altinytjalu pitjala nyakula wangkaku, ‘Walytja wiru, pakara pitja munu tjiya nyanga wirungka kuranyu nyinakati!’ Kan kutjupa tjutangka kuranyulta nyinaku.

¹¹ “Palu nyuntunku walytjangku pulkanmankunyangkampanta mala tjunkuku, palu nyuntu walytjangku tjukutjuku kulinnyangkam-panta kuranyu tjunkuku. Alatji Godalu palyalpai.”

¹² Munu Jesulu wangkangu wati panya palunya maiku altinytjanya panya, “Nyuntu mai pulka palyarampa altiwiyangku wantima, nyuntumpa kuta malanya malpa tjuta, munu wati mani pulkatjara kulu, munu nyuntula itingka nyinanytja tjuta kulukulu, panya nyuntu altinyangkampa, tjana kulu ngula mai pulka palyantjatjanungku, nyuntunya ngapartji palu purunypatu altiku.

¹³ Palu mai pulka palyarampa anangu ngaltutjara tjuta, nyumpu tjuta munu lurpalpai tjuta kulu alti, munu kuru pati tjuta kulu.

¹⁴ Panya paluru tjana nyuntunya ngapartji putu ungkupai, kanta ngula Godalu nyuntunya ngapartji ungkula pukulmankuku tjirirpi malatjangka panya anangu Godaku walytja tjuta ngula ilunytjatjanu pakantjijangka.”

Mai Pulka Altinytja
(Matthew-ku 22:1-10)

¹⁵ Ka Jesulu wangkara wiyaringkunyangka wati kutjupangku palula itingka nyinara wangkangu, “Ngula Godaku walytja tjuta palula tjungurungkula mai pulka ngalkuku Godalu tjananya mayatjangku kanyinnyangka, kaya palulanguru pukulpa mulapa nyinaku.”

¹⁶ Ka Jesulu palula ngapartji wangkangu tjukurpa ara kutjupatjara nyanga alatji, “Wati pulkangku anangu malpa tjutaku mai pulka palyantjikitja mukuringangi munu paluru tjanala nganmanytju tjakultjunu ngula pitjanytjaku.

¹⁷ Ka mai panya ritiringkunyangka paluru wati palumpa warkaripai iyanu ankula nyara palunya tjananya altinytjaku wangkara, ‘Pitjaya! Mai uwankara palyara tjunkunytja riti ngarinyi.’

¹⁸ “Kaya uwankarangku kutjungku kutjungku wantinytjikitjangku wangkangi. Kutjungku alatji wangkangu, ‘Ngayulu kuwari manta payamilanu, mununa ankula nyakunytjikitja mukuringanyi. Ka-puta nyuntumpa mayatjangka ma-wangka ngayulu putu pitjanytja.’

¹⁹ “Ka kutjupangku ngapartji wangkangu palula, ‘Ngayulu pulka kutjara mankurpa payamilanu malparara malparara mununa tjananya arkara warkamilantjikitja mukuringanyi. Ka-puta nyuntumpa mayatjangka ma-wangka ngayulu putu pitjanytja.’

²⁰ “Ka kutjupangku ngapartji wangkangu, ‘Ngayulu kuwari kutju kungkawara altingu mununa kuringka nyinanytjikitja mukuringanyi. Ka nyuntumpa panya mayatjangka ma-tjakultjura ngayulu putu pitjanytja.’

²¹ “Ka wati panya warangkaku malaku ankula tjana wangkanytjita uwankara mayatjangka tjakultjunu. Ka paluru pulkara mirpanarira wangkangu palula, ‘Wala pulka ara tawunukutu munu anangu ngaltutjara tjuta iwara pulka tjutangka munu tjukutjuku tjutangka kulu nyakulampa tjananya altira ngalya-kati, nyumpu tjuta, kuru pati tjuta kulukulu munu lurpalpai tjuta kulu.’

²² “Ka paluru mulapatu ankula altira ngalya-katingu anangu ngaltutjara tjuta, munu palulanguru wangkangu, ‘Mayatja, panya nyuntu wangkanytjitjangkaya pitjangu, palu ruuma angantja wiyatu ngaranyi.’

²³ “Ka mayatjangku panya piruku wangkangu wati panya warangka, ‘Ara ilytikutu munu iwara kutjupa tjutanguru altira ngalya-kati ngayuku wali angantjaku.

24 Ka anangu panya ngayulu nganmanytju altinytjijta tjuṭangkuya puṭu mai ngalkuku ngayula tjungungku.’” Alatji Jesulu tjukurpa tjanala wangkangi nintintjikitjangku panya paluru anangu tjuṭaku pulkara mukuringanyi palulakutu pitjala tjunguringkunyjtjaku.

*Palumpa Nintintja Nyinanytjaku
(Matthew-ku 10:37-38)*

25 Kaya anangu tjuṭa mulapa Jesula tjungu anangi, ka paluru malakukutura tjanala wangkangu,

26 “Kutjupa tjinguru ngayuku nintintja nyinanytjikitja mukuringkulampa uti ngayuku pulkara mukuringama munu palumpa mamaku, ngunytjuku, kuriku, tjitjiku, nyarumpaku, kuṭaku munu palurunku kulu tjuku nguwanpa mukuringama. Panya paluru ngayuku waintara tjanampa pulkara mukuringkulampa puṭu ngayuku nintintja nyinaku.

27 Uwa, nyura ngayuku nintintja nyinanytjikitja mukuringkulampa uti titutjarangku ngayunya wananna pakuringkuwiyangku ilunytjakutu-wangkara. Palu nyura tjinguru punu katakutjarangka ilunytjikitja kulira nguluringkulampa nyura puṭu ngayuku nintintja nyinaku.

28 “Panya kutjupangku tjinguru wali wara palyantjikitja mukuringkulampa uti paluru nganmanytju nyinakatira mani-warara kantamilanma nyakunytjikitjangku tjinguru mani pulka ngarinyi wali palunya palyara wiyantjaku.

29 Palu tjinguru paluru mani kantamilalwiyangku watarkungku wata-warara palyara tjunkulampa tjinguru paluru puṭu uwankara palyara wiyalku mani wiyaringkunyaangka. Ka ngatalpaṭu palyara wiyantja wiyatu wiyaringkuku, ka anangu tjuṭangku palunya nyakula ikaringkuku.

30 Munuya wangkaku, ‘Wati nyangangku panya wali palyaningi, palu palyara wiyantja wiyatu, nyangatja kuwaripaṭu ngaranyi.’

31 “Munu tjukurpa pala palu purunypa kutjupa nintiringkunyjtjikitjangku kulila. Panya Mayatja pulkangku wati tjaultji tjuṭa pika pungkunytjaku katingi nampa nyangatja 10,000. Ka ankunyaangka kutjupangku tjinguru pitjala wangkangu palula, ‘Kulila, nyaratja mayatja kutjupangku nyuranya ngapartji pika pungkunytjikitjangku ngalya-katinyi tjaultji tjuṭa mulapa nampa nyangatja 20,000 nyuntumpa tjaultjingka munḱara mulapa.’

“Ka nyangatja kulira mayatja panya paluru nyinakatingu munu kuliningi alatji, ‘Tjinguru nganana tjananya pungkula wiyalku, munta tjinguru wiya. Panya paluru tjana tjuṭa mulatu ngananyanya pungkula wiyantjaku alatjitu.’

32 Munu paluru tjananya pika pungkula wiyantjikitjangku puṭu kulirampa wati kutjupa manḱurpa tjakulpa iyanu ankula tjananya ngaparikatira kalypangku wangkara markuntjaku tjaultji panya kutjupa tjuṭa parari kuwaripaṭu pitjanyangka.

33 “Ka palu purunypa ngaranyi nyurampa, panya nyura ngayuku nintintja tjuṭa nyinanytjikitja mukuringkulampa nyura uti pulkara kulinna. Panya nyura kutjupa kutjupa uwankara wantira ngayuku pulkara mukuringkula kutju ngayuku nintintja nyinaku.” Alatji Jesulu tjananya wangkangi.

Tjaltu Mayu Wiyaringkunyaja
(*Matthew-ku 5:13; Markaku 9:50*)

³⁴ Munu piruku wangkangi tjukurpa kutjupa nintintjikitjangku alatji, “Panya tjaltu wiru mulapa ngaranyi, palu tjinguru tjaltu paluru mayu wiyaringkunyangkampa yaaltjingara piruku tjaltu paluru palyaringkupai mayu wiruringkunyajaku?”

³⁵ Wiya tjaltu paluru mayu wiyaringkupai alatjitu, ka nyamparingkunyangka wanipai. Ka nyura pina alangku kulirampa ngalyakulinma tjukurpa nyanga ngayulu nyurala wangkanyaja.”

15

Tjiipi Kawalirinyaja Ngurira Malakungku Mantjintja
(*Matthew-ku 18:12-14*)

¹ Ka wati kamantaku mani mantjilpai tjuata munu wati kura kutjupa tjuata kulu ilaringu Jesulu tjukurpa wangkanyangka kulintjikitja.

² Kaya Paratji tjuatngku munu wati Moseku tjukurpa nintilpai tjuatngku kulu nyakunyatjanungku mirpaṅ-mirpantu wangkangi, “Wati nyangatja wati kura tjuata pitjanyangka tjanampa pukularipai, munu mai kulu tjanala tjuungungku ngalkupai.”

³ Ka Jesulu tjanala tjukurpa ara kutjupatjara wangkangu alatji,

⁴ “Tjinguru wati kutjungku tjiipi tjuata kanyini 100, ka tjinguru kutju tjanalanguru kawankatiku. Ka wati paluru yaaltjiriku? Paluru wanyu wantiku? Wiya, paluru 99 panya ukiri ngalkunnyangka wantikatira ankula tjiipi panya palunya ngurilku.

⁵⁻⁶ Munu palunya ngurira nyakulampa paluru pulkara pukularira piningka tjunkula katiku ngurakutu. Munu paluru malpa tjuatngka munu ila nyinanyaja tjuatngka kulu wangkaku, ‘Tjunguringkulala pulkara pukulari! Panya ngayulu kutju kawankatinyaja ngurira mantjinu.’ Alatji paluru pulkara pukulariku.

⁷ “Ka pala palu purunypa ngaranyi ngura nyara ilkaritjangka. Panya angelpa tjuata anangu palya tjuatku pukularipai, palu panya anangu kutjungku kura palyantjatjanu piiwiyaringkula aruringkunyangkaya pulkara alatjitu pukularipai.”

Mani Pulka Kutju Kawalirinyaja Ngurira Mantjintja

⁸ Munu palu purunypa piruku Jesulu tjukurpa kutjupa wangkangu alatji, “Tjinguru minymangku mani pulka tjuata 10-pa kanyintjatjanungku kutju walangka unngu kawalinkuku, munu paluru lampa tilira tilitjarangu wali unngu puluwangka purkara mulatu ngurira ngurira mantjilku.

⁹ Munu paluru mantjira pulkara pukularira palumpa malpa tjuatngka palula itingka nyinanyaja tjuatngka kulu wangkaku, ‘Tjunguringkulala pukularima, panya ngayulu mani kutju kawalinkunyatjanungku kuwari ngurira mantjinu.’ Alatji paluru pukulariku.

¹⁰ “Ka palu purunypa Godaku angelpa tjuata pulkara pukularipai wati kutjungku kura palyantjatjanu piiwiyaringkula Godalakutu malaku aruringkunyangka.”

Mama Kutju Katja Kutjaraku Mukuringkunyaja

¹¹ Munu Jesulu piruku tjukurpa kutjupa tjanala wangkangu alatji, “Wati kutjungku katja kutjara kanyiningi.

12 Ka katja małatjangku wangkangu mamangka, ‘Mama wanyuni ungama manta panya nyuntu kalkuntja palunya.’ Ka mulapa tu mamangu panya manta tjaranu pulanya ungkunyjtikitjangku munu kutju ungu katja panya małatja.

13 “Ka palula maangka tjintu mankurpa wiyaringkunyaangka katja panya małatjangku palumpa manta tjalamilana munu mani mantjira palumpa ngura wantikatira anu ngura kutjupakutu parari mulapa nyinanyjtikitja. Munu ngura nyara palula paluru mani uwankara wiyana ngunti pukularira.

14 Paluru panya pulka kanyintjatjanungku uwankara alatjitu wiyana. Ka ngula ngura nyara palula ailuru pulkaringu ngura kutjupa uwankarangka kulu. Ka paluru kutjupa kutjupa ngalkuntjikitjangku kanyintja wiya alatjitu nyinangi maralpa alatjitu.

15 “Munu paluru ngura nyara palula warka nguriningi mani mantjintjikitjangku, ka wati kutjungku pikipiki tjuta kanyilpaingku palunya mantjira iyanu kuka pikipiki tjutakutu tjananya mai ungkula atunymara kanyintjaku.

16 Ka paluru pulkara paltjatjiratjarira pikipiki tjutaku mai kurakura nguwanpa ngalkuningi. Ka kutjupangu palunya mai ungkunyjtja wiya alatjitu.

17 “Ka paluru ngula kata palyaringkula kulinu, ‘Mulapa ngayulu ngunti palyaningi mununa kuwari paltjatjiratjaringu. Ka panya ngayuku mamaku warka tjutangu uwankarangu mai pulka ngalkula paltja alatjitu nyinapai, palu ngayulu nyanga kuwari paltjatjiratjaringu mununa nguwanpa ilunyi.

18 Utiņa ngura nyangatja wantikatima munu Mamalakutu malaku anama mununa palula wirkara wangkama alatji, “Mama, ngayulu mulapa kuraringkula Godanya kuranu munu nyuntunya kulu kuranu.

19 Kani kura pulka nyinanyangka katjanmankunyjtja wiyangu wantima. Palu nyuntuni wangka nyuntumpa wati warkaripai purunypa nyinanyjtaku.” Alatjina ankula Mamala arkara wangkaku.’

20 “Munu alatji kulintjatjanungku mulapa tu paluru ngura panya palunya wantikatira pakara anu palumpa mamaku ngurakutu. Ka panya palumpa mama rawa ala-ala nyinangi malaku pitjanytjaku patara. Munu paluru kuwaripatu parari pitjanyangka nyakula ngurkantanu munu ngapari-ngapari palulakutu wirtjapakanu pulkara ngalturingkula munu palunya ampura mitamita kutjara nyunyjtunu palumpa pukularira.

21 “Ka palumpa katjangku palula wangkangu, ‘Mama, ngayulu kuraringkula mulapa Godanya kuranu nyuntunya kulu. Kani katjanmankunyjtja wiyangu wantima.’

22 “Palu alatji wangkanyangka palumpa mamangu palunya kulintja wiyangu wantingi munu palumpa warkaripai tjutangka wangkangu, ‘Warpungkulaya mantara wiru mantjira ngalya-kati, munuya palunya tjarpatjura munuya palula marangka ringi tjura munu tjinatjangka kulu tjarpatjura.

23 Munuya kuka puluka kulunypa kulu kanpi pulka nganampa iluntara, kala tjunguringkula mai pulka ngalkula pulkara pukulari.

²⁴ Panya ngayuku katja ilungu munu ilunyjtjanu malaku piruku wankaringu, panya paluru kawaliringu, palu paluru kawalirinyjtjanu malaku aruringu.' Munuya palulanguru uwankara tjunguringkula pulkara pukularingi.

²⁵ "Ka palumpa panya katja nganmanyitja watarku alatjitu kaanangka ngarala warkaringi patu nguwanpa, munu paluru walikutu ilaringkula kutju kulinu tjana wangkatjingara tantjirinyangka.

²⁶ Munu paluru wati warkaripai kutjupa altingu munu palula tjapinu, 'Nyaaringanyiya pala unngu?'

²⁷ "Ka wati panya warkangku palula wangkangu, 'Nyuntumpa malanya malaku aruringu, ka nyuntumpa mamangku puluka kulunypa kanpi pulka iluntankunytjaku wangkangu nganana pukularira ngalkuntjikitjangku, panya nyuntumpa malanya malaku pitjangu ngurakutu wankaru alatjitu.'

²⁸ Ka katja panya nganmanyitjangku kulira palumpa malanyku pulkara kuraringkula mulyararingu munu wantingu wali unngu tjarpanytja wiyangku.

"Ka palumpa mama pakanu urilkutu munu palunya nyakula palula kalyantara purkarangku wangkangi paluru kulu tjarpara pukularinytjaku.

²⁹ Palu katjangku ngapartji palula wangkangu, 'Wiya, panya ngayulu rawangku alatjitu nyuntula wanganarangku kulilpai nyuntu wangkanyangka mununa yiya tjuta mulapa nyuntumpa warkaringi, palu nyuntu ngayuku puluka kulunypa kanpi pulka iluntankunytjaku wangkanytja wiyangku wantingi ngayulu ngalkula pukularinytjaku malpa tjutatjarangku.

³⁰ Palu nyuntumpa katjangku manta nyuntu ungunytjitja mapalkungku tjalamilara mani mantjira ankula wanira wiyanu kungkawara kura tjutangka munu ngula kutju malaku pitjangu nyuntulakutu. Ka nyuntu palumpa kutjuku puluka kanpi pulka iluntara pauntjaku wangkangu palumpa pukularira.'

³¹ "Ka mamangku katjangka wangkangu, 'Katja, nyuntu panyan titutjara mulapa ngayula tjungu nyinapai, ka ngayulu kanyintja uwankara nyuntumpa ngaranyi.

³² Palyala pukularira kuka mai pulka ngalkunma panya nyuntumpa malanya ilunyjtjanu malaku wankaringu, panya paluru kawankatinyjtjanu malaku aruringu.'" Alatji Jesulu wankara wiyaringu.

16

Wati Mayatja Ngunti Kurantja

¹ Munu Jesulu piruku wangkangu palumpa nintintja tjutangka, "Wati kutjupa mani pulkatjara nyinangi, munu paluru wati kutjupa mayatja tjukutjuku tjunu palumpa uwankara atunymara kanyintjaku. Palu ngula wati panya mani pulkatjarangku kulinu tjana wangkanyangka munu nintiringu wati panya paluru tjunkunytjalu ngunti kurannyangka.

² Munu palunya alтира wangkangu palula, 'Ngayulu kulinu nyuntu ngayunya kampangka tu kurannyangka. Wanyuni nyuntu

walkatjunkunytja uwankara nintila nyaanun ngayuku panya mani, panya nyuntu nyanga alatji palyara ngayuku warkarinytja wiyaringkuku.'

³ "Ka wati panya mayatja tjukutjukungku palurunku kuliningsi walytjangku, 'Yaaltjinalgakuna? Panya ngayuku mayatjangkuni kuwari pailku warkanguru, kana wara wiyangku paltjatjiratjarira upangku manta putu tjawalku mununatju kutjupangka ngatjintjaku kuntaringanyi.

⁴ Palu tjinguruna nganmanytju kutjupa kutjupa palyalku, kantini palya warkanguru paira iyalku. Kaniya anangu kutjupa tjutangku ngayunya altiku mununiya tjanampa walingka kanyilku.'

⁵ "Munu wati panya mayatja tjukutjukungku altingu wati mankurpa, panya paluru tjana nganmanytju unytjungku kutjupa kutjupa mantjinu mayatja pulkanguru munuya palunya ngapartji malakungku ungkunyttjaku ngarangi. Ka wati panya paluru tjananya altira kutju tjarpattjura wangkangi. Munu paluru wati kutjungka tjapinu, 'Nyuntu ngayuku mayatja nyaa ngapartji ungkunyttjaku ngaranyi?'

⁶ "Ka paluru wangkangu, 'Ngayulu palunya piti pulka tjuta uwilatjara 18 ungkunyttjaku ngaranyi.'

"Ka wati panya mayatja tjukutjukungku palula wangkangu, 'Wiya palya tjarula, munu nyiringka walkattjura piti pulka 9 kutju malakungku ungkunyttjikitjangku.'

⁷ "Munu paluru piruku wati kutjupangka tjapinu, 'Nyuntu ngayuku mayatja nyaa ngapartji ungkunyttjaku ngaranyi?'

"Ka wati panya paluru wangkangu palula, 'Ngayulu palunya yakuttja mai uninyattjara 1,000 ungkunyttjaku ngaranyi.'

"Ka wati panya mayatja tjukutjukungku palula wangkangu, 'Wiya palya tjarula, munu nyiringka walkattjura yakuttja 800 kutju malakungku ungkunyttjikitjangku.'

⁸ "Ka ngula wati panya mani pulkatjarangku kulinu wati panya paluru alatji palyannyangka, munu palunya mirawaningku kulira, 'Munta, wati nyangangu ayinayiningku palyanu anangu tjutangku palunya ngapartji ngula altinyttjaku munu tjanampa ngurangka palunya kanyintjaku.' "

Ka Jesulu tjukurpa nyanga palunya wangkara wiyaringkula palumpa nintintja tjutangka utinu alatji wangkara, "Uwa, mulapa panya anangu mantattja kulilpai tjutangkuyanku ayinayiningku palyalpai mantangka nyanga pukulpa nyinanyttjikitjangku, palu Godaku walytja tjuta palu purunypa wiya, panya tjana ngura nyara ilkarittjangka pukulpa nyinanyttjikitjangku kutju kulilpai munkaritja waintara."

⁹ Munu palulanguru tjananya wangkangu, "Palu ngayulu nyurala alatji wangkanyi. Uti nyura mani munu ulyttja kutjupa kutjupa tjuta nyura kanyintjatjanungku munytjangku ma-ungama anangu kutjupa tjuta tjana pukularinyttjaku munu nyurampa malparingkunytjaku. Ka palulanguru nyura munu nyura kanyintja uwankara wiyaringkunyangka Godalu nyuranya mantjira ngura ilkarittjangka pukultu ttjungkuku palula ttjungu ttuttjara nyinanyttjaku.

¹⁰ "Ka nyura ttjukuttjuku ttjuta-warara ttjukarurungku kanyintjatjanungku pulka tjuta kulu ttjukarurungku kanyilku, kaya nyurampa

nyakula pukulariku alatjitu. Palu nyura tjukutjuku tjuṭa wirura kanyintja wiyangku wantirampa pulka tjuṭa kulu puṭu wirura kanyilku.

¹¹ Ka nyura mantatja kutjupa kutjupa tjuṭa puṭu tjukarurungku kanyirampa Godalu wanyu nyuranya wiru tjuṭa palyanyku kanyintjaku ungkuku? Wiya alatjitu.

¹² Tjinguru kutjupangku nyuranya wangkara wantikatinyi palumpa kutjupa kutjupa nyura atunymara kanyintjaku, ka nyura puṭu tjukarurungku wirura kanyinnyangkampa paluru wanyu nyuranya ungkuku walytjangku kanyintjaku? Wiya alatjitu.

Tjukurpa Kutjupa Tjuṭa Jesulu Wangkanytja

¹³ “Panya anangu kutju mayatja kutjarangka puṭu warakaripai. Paluru tjinguru kutjungka wanganarangku kulilku munu kutjupangka kulintja wiyangku wantira tungunpungkuku. Munu tjinguru kutjuku pulkara pukularira kutjupaku puṭu pukularira palumpa kuraringkuku. Ka pala palu purunypa nyura tjinguru maniku pukularirampa Godaku puṭu pukulariku. Panya nyura puṭu kutjara tjungura kulini Godanya munu mani kulu. Palu uti nyura Godanya kutju pulkara kulinma munu mani wantima.”

Jesulu Tjukurpa Kutjupa Piruku Wangkanytja

(Matthew-ku 11:12-13; 5:31-32; Markaku 10:11-12)

¹⁴ Kaya wati Paratji tjuṭangku tjukurpa nyanganpa wangkanyangka ilangku kulinigi munuya Jesunya anara palumpa ikaringangi panya tjanaya maniku kutju pulkara pukularipai.

¹⁵ Palu Jesulu tjanala wangkangu, “Nyuranku walytjangku kutju wiru kulilpai anangu kutjupa tjuṭangka mirangka. Palu Godanya nyurampa ninti pala nyura unngu kulintjitjaku. Anangu tjuṭangku nyuranya nyakula mirawanipai, palu Godalu nyuranya unngu nyakula nyurampa pukularinytja wiya alatjitu.

¹⁶ “Tjukurpa panya Godalu Mosenya ungkunyjtija munu wangkatjara tjuṭangku kulu walkatjunkunyjtija rawa mulapa ngarangi anangu tjuṭangku wanganarangku kulintjaku. Palu panya mungatu Johnnga pitjangu munu anangu tjuṭangka tjakultjunangi tjukurpa panya Godalu anangu tjuṭa walytjanmara mayatjangku kanyintjtija, kana ngayulu kulu palu purunypatu tjakultjunangi. Kaya kuwari anangu uwankara pulkara arkanṅi Godala tjunguringkunyjtikitjangku paluru tjananya walytjanmara mayatjangku kanyintjaku.

¹⁷ Palu kulilaya, panya manta ilkarṅi ngaranyangkampa tjukurpa uwankara Godalu Mosenya tjananya ungkunyjtja tjuṭa titutjara alatjitu ngaraku nyura rawangku wanganarangku kulira palyantjaku, tjukurpa pulka tjuṭa munu tjukutjuku tjuṭa kulu.

¹⁸ “Palu kulila nyangatja! Watingku tjinguru kuri wantira minyama kutjupa alṅirampa kura pulka palyani. Ka palu purunypatu tjinguru wati kutjupangku minyama panya kuringku wantinytjanya alṅirampa paluru kulu kura pulka palyani.”

Wati Mani Pulkatjara Munu Wati Ngaltutjara

¹⁹ Ka Jesulu wangkangu, “Wati kutjupa nyinangi mani pulkatjara munu paluru rawa alatjitu mantara wiru tjuṭangka tjarpapai munu wali wirungka nyinara mai pulka ngalkupai tjirirpi winkingka.

20 Ka wati kutjupa ngaltutjara nyinangi pika purtju winkitjara ini Lazarusanya. Kaya palunya katira tjunkupai wati panya mani pulkatjaraku kaitangka itingka nyinara ngatjintjaku.

21 Munu paluru mukuringangi wati panya mani pulkatjaraku taipulanguru mai lampi punkannyangka ngalkula paltjaringkunyjtikitja. Kaya tjitutja tjuťangku pitjala wati panya palunya pika tjuťa anytjulpai.

22 Ka ngula Lazarusanya ilungu. Kaya angelpa tjuťangku palunya katira Aipuramala itingka tjunu palula tjungu nyinanytjaku.

“Ka wati panya mani pulkatjara kulu ilungu. Kaya palumpa malpa tjuťangku palunya tjuťutjunu.

23 Ka paluru ngura kurakutu anu, munu nyara palula warungka titutjara kampangi pika pulka mulapa. Munu paluru ira-nyakula nyangu Aipuramanya parari mulapa nyinanyangka munu Lazarusanya kulu nyangu palula itingka nyinanyangka.

24 Munu paluru mirara wangkangu, ‘Mama Aipurama! Ngalturiwatju munutju Lazarusanya ngalya-iyala paluru ngayulakutu pitjala minangka mara tjalatjungkula ngayunya tjalinyapa pampura purkantjaku. Pika pulkaringu warungka nyanga nyinara nyinara.’

25 “Palu Aipuramalu palula ngapartji wangkangu, ‘Katja, nyuntun kulini? Panya nyuntu mantangka nyinanan wiru tjuťatjara nyinangi. Ka wati nyanga Lazarusanya ngaltutjara nyinangi kura tjuťatjara kutju. Palu paluru kuwari pukulpa mulapa nyinanyi ngura nyanangka. Kan kuwari nyuntu ngapartji pika pulkatjara nyinanyi.

26 Palu kulila ngati pulka mulapa ngaranyi nyuntula ngalila nyanga ngururpa. Ka nyanganguru kutjupa putu ma-itipiriku nyuntunya alpamilantjikitja. Ka palangka nyinapai tjuťa pututu ngalya-itipiriku ngananalakutu pitjanytjikitja.’

27 “Ka wati panya mani pulkatjarangu wangkangu palula, ‘Palu wirungku wanyu Lazarusanya wati-iyala ngayuku mamaku walikutu panya mantangka nyinanytja tjuťakutu.

28 Panya ngayuku malanyapa 5 nyinanyi nyara palula paluruwi tjananya wangkara ngulutjingala ngura nyanga kurakutu pitjanytjaku-tawara.’

29 “Palu Aipuramalu wangkangu palula ngapartji, ‘Tjana panya tjukurpa pulka tjuťa Mosenya ungkunyjtitja kanyini munuya wangkatjara tjuťangku waltatjungkunyjtja kulu kanyini. Uti tjana nyakula wangkara nganmanypa nintiringama munu nintingkulta kulira nguluringama.’

30 “Ka paluru wangkangu, ‘Wiya mama Aipurama, tjana Moseku tjanampa tjukurku putu nguwanpa mulamularingkupai. Palu tjinguru wati kutjupangu, tjinguru Lazarusalu, ilunyjtatjanu pakantjatjanungku tjanala ankula wangkaku, kaya palunya nyakula paluru wangkanyangka kulira mulamularingama munuya kura palyantjatjanu piiwiyaringkula Godalakutu malaku aruringama.’

31 “Palu Aipuramalu wangkangu palula, ‘Wiya, panya nyuntumpa malanyapa tjuťangkuya Moseku tjanampa tjukurpa tjuťa kulira wantirampa palu purunyjtutu kutjupangu ilunyjtatjanungku pakara tjanala wangkanyangka kulira mulamularingkunyjtja wiyangkuťu wantiku.’ ” Alatji Jesulu tjanala wangkangi.

17

Jesuku Walytja Tjuta Kurantja Wiyangku Wantinytjaku
(Matthew-ku 18:6-7,21,22; Markaku 9:42)

¹⁻² Ka Jesulu wangkangu palumpa nintintja tjutangka, “Uwa, mantangka nyanga nyinara anangu tjutanku Godala tungunpungkula kura tjuta palyalpai. Ka kutjupa tjutanku Godala tungunpungkula anangu kutjupa tjuta wituwitulpai tjana purunyitju kura palyantjaku. Palu anangu nyara palumpa tjanampa pika pulka mulapa ngaraku ngunti wituwitunnyangka. Kulilaya! Tjinguru watingku anangu kutjupangka liringka puli pulka tjungura karpira palunya puli winki uru ngatingka waniku, ka alatji wiru wiya, kura alatjitu. Palu tjinguru tjitji ngayuku mulamularingkupai nyinanyi, ka anangu kutjupangu palunya wituwitulku kura palyantjaku, ka alatji wiru wiya kura pulka mulapa nyara urungka waninytjitjangka mun kara mulapa. Panya pika pulka mulapa utiringkuku anangu nyara palumpa paluru tjitji tjukutjuku nyanga purunypa ngayula tungunpungkunyitjaku palyan-nyangka.

³ Kayanku nyura pulkara atunymanama.

“Palu tjinguru nyuntumpa kutanku nyuntunya kurannyangkampa palula utira tjakultjunama panya paluru nyuntunya kurantja. Ka tjinguru paluru kura palyantjatjanu piwiyaringkunyangkampa nyuntu palumpa kalyparingama.

⁴ Palu tjinguru nyuntumpa kutanku tjinu kutju kalala wara nyuntunya tjuta-arangku kuralku munu kurantjatjanu paluru tjuta-aratu malaku pitjaku kunaringkula nyuntula wangkara kalyparingkunyitjikitja, ka nyuntu uti tjuta-arangku tu palunya kalypangu kulira wantima.”

Rapa Mulararinytjaku

⁵ Kaya Jesulu iyantja tjutanku palula wangkangu, “Mayatja, nintinmalanya Godaku rapa mulararinytjaku.”

⁶ Ka Jesulu wangkangu, “Wiya, nyura tjinguru kulini Godaku rapa pulkaringkula kutju nyura pulka palyantjikitjangu. Palu wanyuya uninypa tjukutjuku kulila. Panya mantangka tjunkunyangka uninypa paluru pakara punu pulkaringkupai, ka palu purunypa nyura Godaku tjukutjuku mulamularingkulampa nyura punu nyanga pulkangka wangkaku milku winki pakara ankula uru pulkangka ngururpa ngaranytjaku. Ka mulapatu punu paluru ankuku nyura witunnyangka.”

Kanany-kananyarinytja Wiya Mayatjaku Warakarima

⁷ Ka Jesulu piruku tjanala tjukurpa kutjupa wangkangi wati warakatjara alatji, “Tjinguru wati kutjupangu wati warakaripai kanyini. Ka tjinguru paluru urilta warakaripai munu manta runyulpai munta tjinguru paluru tjiipi tjuta atunymankupai, munu paluru tjinguru warakatjanu wiyaringkula ngalya-tjarpaku. Ka tjarppanyangka palumpa mayatjangu palula nyaa wangkaku? Tjinguru alatji wangkaku, ‘Pitjala nyinakatira mai ngalkula.’”

⁸ Wiya, wati pala palula paluru alatji wangkaku, 'Kukatju paula mai kulu munu mantara kutjupangka tjarpara mai mina kulu ngalyakati ngayulu ngalkula tjikintjaku. Munun malangka ngayulu ngalkula wiyaringkunyangka nyuntunku ngapartji mai walytjangku ngalkula.'

⁹ Ka wati panya warkaripaingku uwankara wanganarangku kulira palyannyangka mayatjangku wanyu palunya wirunmankuku? Wiya, panya palumpa ngaranyi alatjitu mayatjangku witunnyangka palyantjaku.

¹⁰ "Ka palu puruntju nyura kulu uti Godalu wangkanytja uwankara palyara wiyarampa palula alatji wangkama, 'Nganana nyuntumpa warkaripai tjuta kutju, ka palya nyuntu ngananyanya wangkara wirunmankunyitja wiyangku wantinyi, panya nganana nyuntu wituntjita tjuta kutju palyanigi.' " Alatji Jesulu wangkangi palumpa nintintja tjutangka tjana Godalu wituntjita tjuta wanganarangku kulira palyantjaku.

Jesulu Wati Miri Pikatjara Tjuta Palyarunguntja

¹¹ Ka Jesunya tjana Jerusalemakutu ma-pakanu munuya Galileela pulala Tjamiriyala ngururwanu anangi.

¹² Munuya wirkanu ngura tawunu kutjupangka tjukutjukungka. Kaya wati 10 miri pika pulkatjara tjuta nyinangi nyara palula wali tjutangka mauntalpa. Munuya Jesunya pitjanyangka nyakula ngaparikatingu palulakutu. Palu tjana putu ilaringangi palulakutu, panya tjaka anangu miri pikatjara putu tjungurinkupai anangu palya tjutangka.

¹³ Munuya patunguru mirara palula wangkangu, "Mayatja Jesu! Ngalturiwalampa!"

¹⁴ Ka Jesulu tjananya nyakula wangkangu, "Ma-pitjaya walikutu munuyanku ankula nintila wati tjukurtjara tjutangka nyuranya miri nyakunytjaku." Kaya mulapatu anu munuya ngururpa palyaringu.

¹⁵ Ka kutjungku palurunku palyaringkunyitja nyakula malaku aruringu Jesulakutu munu wangka katungku mirara Godanya walkunu.

¹⁶ Munu pulkara pukularira Jesula tjinangka itingka kuranyu watungarakatira palunya walkunu. Wati nyanga paluru malikitja Tjamiriyanya ngurara, Jew wiya.

¹⁷ Ka Jesulu tjapinu palula, "Panya wati 10 kuwari palyaringu, ka yaaltji 9 kutjupa?"

¹⁸ Munu palulanguru palumpa nintintja tjutangka wangkangu, "Nyangatja wati Tjamiriyanya ngurara kutju malaku aruringu wati malikitja Godanya pukularira walkuntjikitja."

¹⁹ Munu Jesulu piruku palula wangkangu, "Palya, pakara pukularira ara! Panya nyuntu ngayuku mulamularingkunytjatjanu palyaringu alatjitu."

*Godanya Mayatja Pulka Ngananala Ngaranyi
(Matthew-ku 24:23-28,37-41)*

²⁰ Kaya Paratji tjutangu Jesula tjapinu, "Yaalara Godalu pitjala mantangka nyanga anangu tjuta walytjanmara mayatjangku kany-illku?"

Ka Jesulu tjanala wangkangu, “Wiya, puṭu nyura uti nyanganyi Godalu anangu tjuṭa walytjanmara mayatjangku kanyintja, panya paluru mayatja mantatja purunypa pitjala palyantja wiya.

²¹ Anangungku puṭu wangkaku, ‘Nyawa! Nyangatja kuwari Godalu pitjala mayatjangku kanyini anangu nyanganpa.’ Munta tjinguru wangkaku, ‘Nyaratjampal!’ Palu wiya, panya Godanya nganmanypa pitjala mayatja pulka nyurala ngurur-ngururpa ngaranyi nyurala unngu.”

²² Munu Jesulu piruku wangkangu palumpa nintintja tjuṭangka, “Ngula, pika kutjupa kutjupa tjuṭa utiringkunyangka nyura Watiku Katjaku pulkara mukuringkuku ngayulu warpungkula pitjala wankantjaku, palu puṭu nyura palunya nyakuku.

²³ Ka nyara palula arangka anangu kutjupa tjuṭangku nyurala wangkaku, ‘Nyawa Mayatjanya nyaratjampal!’ Ka kutjupa tjuṭangku wangkaku, ‘Wiya, nyangatjampal!’ Palu alatji wangkanyangkaya kulira wantima, munuya ngayuku ngurintjikitjangku tjanala tjunguringkuntja wiyangku wantima.

²⁴ Panya ngayulu Watiku Katjanya ngula malaku pitjala mapalku utiringkuku anangu uwankarangka manta winkitjangku uti nyakunytjaku. Panya wanangarangku pinpara utilpai manta winki, palu purunypa ngayulu utiringkuku.

²⁵ Palu ngayulu nganmanypa pikatjararingkuku, kaya anangu mantatja tjuṭangku ngayunya kurara pungkuku.

²⁶ Panya ngayulu pitjanytja-arangka tjirirpi panya Noah-nya tjana iriti nyinanytjita purunypa ngaraku.

²⁷ Panya nyara palula arangka uru pulkangka kuwaripangka anangu tjuṭa watarku nyinangi, munuya mai kuka ngalkuningi, kapi waina kulu tjikiningi, munuya wati tjuṭangku kungka tjuṭa altingi. Alatji-alatjituya nyinangi watarku, ka panya Noah-nya tjana palumpa walytja tjuṭa kulu uru pulkangka-tawara pautangka tjarpangu, ka panya uru pulkangu pakara katuringkula anangu kutjupa uwankara iluntanu.*

²⁸ “Ka palu purunypa ngula ngaraku ngayulu malaku pitjanyangka. Panya Lotanya tjana iriti nyinanytja-ara purunypa ngura panya Tjatamala. Panya nyara palula arangka anangu Tjatamanya ngurara tjuṭa watarku alatjitu nyinangi munuya ngalkula tjikiningi, munuya kutjupa kutjupa tjuṭa tjalamilaningi, munuya mai tjuṭa kulu pakaltjinganingi, munuya wali tjuṭa kulu palyaningi.

²⁹ Ka panya tjiṅtu kutjupa Lotalu tjana palumpa walytja tjuṭangku ngura pala Tjatamanya wantikatingu, ka tjana ankula ma-paturingkunyangka Godalu waru pulka ilkaringuru iyanu Tjatamalakutu, ka anangu uwankara ilungu malaringkula nyinanytja tjuṭa.

³⁰ Ka nyara palu purunypa ngula anangu tjuṭa watarku alatjitu nyinaku ngayulu Watiku Katjanya witulya pulka pitjanyangka.

³¹ Nyara palula arangka tjinguru wati wali katu nyinanyi munu uti paluru ukalingkula wali unngu palumpa ulytja mantjintjikitja tjarpantja wiya mapalku wirtjapakanma. Ka palu purunypa wati kutjupa

* 17:27 Genesis 7:6

tjinguru urilta kaanangka warkarinyi munu uti paluru malaku ngurakutu ulytjakitja ankunytja wiya mapalkutu wirtjapakanma.

³² Minyma panyatjaya kulinma, Lotaku panya kuri, palu purunypa wiyaringkunytjaku-tawara.*

³³ Anangu kutjupangku tjinguru alatji kulilku, 'Wanyu kanatju ngayulu walytjangku atunymanama mantangka nyanga rawa wanka nyinanytjikitjangku.' Palu alatji kulira paluru Godanya wantinyi, ka Godalu palunya ngula ilunyangka putu wankani palula tjunguringkula titutjara nyinanytjaku. Ka anangu kutjupangku tjinguru alatji kulilku, 'Wanyuna nguluringkuwiyangku Godanya titutjarangku wananma, kani palya kutjupangku ngayunya iluntankuku.' Ka alatji kulinnyangka Godalu ngula ilunyangka palunya wankara pakaltjingalku palula tjungu titutjara wanka nyinanytjaku.

³⁴ "Ka ngula ngayulu mantakutu malaku pitjanyangka munga pala palula anangu kutjara tjinguru piita kutjungka kunkunpa ngarinyi, kana kutju mantjilku mununa kutju wantikatiku.

³⁵⁻³⁶ Ka palu purunypa ngura kutjupangka minyma kutjarangku tjinguru mai ukiringuru uninypa rungkani, kana tjinguru kutju mantjilku mununa kutju wantikatiku."* Alatji Jesulu tjanala wangkangi palumpa nintintja tjutangka.

³⁷ Kaya tjapinu Jesula, "Mayatja, palu ngura yaaltjingka nyanga paluru tjana alatjiriku?"

Ka Jesulu tjanala wangkangu, "Wanyu tjulpu panya walawuru kulila! Panya kuka ilura ngarinyangka walawuru tjuta kaputuripai. Kala nyakula tjukarurungku kulilpai. Palu purunypa nyura ngayunya malaku pitjanyangka nyakula tjukarurungku ngurkantankuku."

18

Minyma Wanakala Munu Wati Ngurkantankupai

¹ Munu Jesulu tjukurpa ara kutjupatjara tjanala wangkangi paluru tjana kulira rawangku Godala tjapintjaku pakuringkunytja wiyangku.

² Alatji paluru wangkangu, "Tawunu kutjupangka wati mayatja kutjupa nyinangi ngurkantankupai. Munu nyara paluru Godaku munu anangu tjutaku kulu nguluringkupai wiya tjana palunya kuranmankunytjaku.

³ Ka tawunu nyara kutju palulatu minyma wanakala nyinangi, ka anangu kutjupangku palumpa kutjupa kutjupa kutitjara kanyiningi. Ka minyma paluru rawa pitjapai wati panya ngurkantankupailakutu munu palula wangkapai, 'Wanyuni alpamilala, munu anangu panya palunya wangka ngayunya malakungku ungkunytjaku!'

⁴ "Ka wati paluru rawangku alpamilantja wiyangku wantingi, munu rawa mulatu kulira wantinytjatjanungku paluru ngula kulinu kutjungku alatji, 'Ngayulu Godaku nguluringkupai wiya, mununa anangu tjutangka wangkanytja kulu kulira wantipai.

* **17:32** Lotaku kuri panya Tjatamalanguru ma-pitjala Godala tungunpungu munu pinkurara nyangu waru pulka punkananyangka munu palulanguru purkaringkula tjalturingu alatjitu. Nyawa Genesis 19:26. * **17:35-36** Wati kutjupangku kunyu verse 36 walkatjunu munu mala tjungunu Luke-aku tjukurta alatji *Ka ngura kutjupangka wati kutjara tjinguru urilta warkarinyi, kana tjinguru kutju mantjilku mununa kutju wantikatiku.*

⁵ Palu minyama nyanga wanakalangkuni rawangku ngayunya pitjala tjapilpai. Kana palya palunya kuwari alpamilalku panya ngayulu wantinyangkampa tjinguru paluru rawa alatjitu ngayulakutu pitjama mununi rawangkuu uulinama mununi pakunma.' Alatji wati panya ngurkantankupaingku kuliningi."

⁶ Munu palulanguru Jesulu tjanala wangkangu, "Wati panya palunya kulinma! Panya paluru minyama palunya rawangku wantingi mapalkungku alpamilantja wiyangku. Munu palulanguru nyaa wangkangu?"

⁷ Ka Godanya wanyu palu purunypa nyinanyi? Panya Godaku walytja tjutangku palula rawangku ulara tjapilpai mungangka kalala kulu paluru tjananya alpamilantjaku. Ka paluru wanyu tjananya kulira wantipai rawangku alpamilantja wiyangku?"

⁸ Wiya, Godalu palunya tjananya kulira mapalkungku alatjitu alpamilalpai palumpa anangu tjuta. Ka ngula ngayulu Watiku Katjangku malaku pitjala anangu tjuta yaaltji-yaaltji nyinanyangka nyakuku mantangka nyanga? Wanyu ngayulu anangu tjuta ngayuku mulamularingkunytjatjanu rapa mulapa nyinanyangka nyakuku?"

Godala Tjukururu Nyinanytja

⁹ Munu Jesulu piruku tjanala tjukurpa ara kutjupattjara tjakultjuningi, panya anangu kutjupa tjutangkuyanku walytjangku mirawanira palyanmankupai munuya kutjupa tjuta kuranmankupai. Ka Jesulu tjukurpa nyangatja tjanala wangkangu alatji,

¹⁰ "Tjintu kutjupa wati kutjara anu timpulakutu Godala tjapintjikitja, kutju Paratji, ka kutjupa kamantaku mani mantjilpai.

¹¹ Ka wati panya Paratji patu ngarangi, wati panya mani mantjilpaingka ila wiya, munu paluru Godala kanany-kananytju mara katuringkula tjapira alatji wangkangu,

'Mama God, ngayulu nyuntumpa pukularinyi nyuntu ngayunya wirura kanyinnyangka, panya ngayulu manyu wiya anangu nyanga kutjupa tjuta purunypa wiya. Mununa wati kutjupa tjuta purunytju kutitjura ngunti kuralpai wiya, mununa kuri walytjatjarangka kutju ngaripai kampakatu ngarinytja wiya. Mununa nyuntumpa pukularinyi, panya nyuntu ngayunya tjukururu nyinanytjaku palyanu wati nyanga mani mantjilpai purunypa wiya.

¹² Panya ngayulu tjintu mankurpa mai kuka kulu ngalkupai mununa tjintu kutjupa wantipai mai kuka kulu ngalkuntja wiyangku. Munu panya warkarinytjatjanungku mani mantjira tjukutjuku tjarara nyuntunya rawangku ungkupai Moselu wangkanytjitjangka.'

¹³ Ka wati panya mani mantjilpaingku kuntaringkula patunguru ngarala palurunku kurunpa tjituru-tjitururira mara pilpirta tjunkula wangkangu,

'God, ngalturiwatju panya ngayulu kura rawangku palyanangi.'
Alatji paluru piiwiyaringkula Godala tjapinu."

¹⁴ Munu palulanguru Jesulu tjanala wangkangu, "Wati panya kutjara tjapira wiyaringkula ngurakutu anu. Palu Godalu wati kutju palyanmanu palumpa pukularira wati panya mani mantjilpainya, munu wati panya Paratjiku pukularinytja wiya alatjitu. Ka tjukurpa nyanga palulanguru nyura uti kulinma walytjangku mirawaninytja

wiyangku wantinytjikitjangku. Panya anangungku walytjangku mirawaninyangkampa Godalu palunya tjukutjukulku. Palu tjinguru paluru walytjangku tjukutjukunmankunyangkampa Godalu palunya mirawanira pulkanmankuku kutjupa tjuantangka waintara.”

Jesulu Tjitji Tjukutjuku Purunyarinytjaku Wangkanytja
(*Matthew-ku 19:13-15; Markaku 10:13-16*)

¹⁵ Kaya anangu kutjupa tjuantangku tjitji tjukutjuku tjuṭa Jesulakutu ngalya-katingi mara tjunkula wangkara pukulmanytjaku. Kaya palumpa nintintja tjuantangku katinyangka nyakula tjananya painingi.

¹⁶ Palu Jesulu tjitji panya tjukutjuku tjuṭa altingu palulakutu pitjanytjaku, munu wangkangu palumpa nintintja tjuantangka, “Tjitji tjukutjuku tjuṭa ngayulakutu pitjanyangka nyakulaya paintja wiyangku wantima! Panya anangu tjuṭa tjitji nyanga tjukutjuku tjuṭa purunypa nyinanyangkampa Godalu tjananya mayatja pulkangu walytjanmara kanyilku.

¹⁷ Kaṇa tjukarurungku nyurala wangkanyi, panya nyura tjitji nyanga purunytju Godanya wanganarangku kulinyangka kutju Godalu nyuranya mayatjangku walytjanmara titutjarangku kanyilku. Palu nyura wantinyangka paluru nyuranya wantiku.”

Wati Mayatja Kutjupa Ulytja Pulkatjara
(*Matthew-ku 19:16-30; Markaku 10:17-31*)

¹⁸ Ka wati wali inmatjaku mayatjangku palula tjapinu, “Nintilpai, nyuntun wiru mulapa! Wanyuni tjakultjura, nyaalkuna Godala tjunguringkula wanka titutjara nyinanytjikitjangku?” ¹⁹ Ka Jesulu palula wangkangu, “Nyaakunin wirunmananyi? Kutjupa wiru mulapa nyinanytja wiya, Godanya kutju wiru mulapa.

²⁰ Palu nyuntu panya ninti Godalu wituntjitja tjuṭaku. Panya paluru alatji wangkangu kuri walytjarangka ngarinytja wiyangku wantima, miri pungkuwiyangku wantima, walytjarara kutitjunkuwiyangku wantima, anangu kutjupa ngunti ngukara wangkawiyangku wantima, munu ngunytjungka mamangka wanganarangku kulinma.”

²¹ Ka wati paluru wangkangu, “Uwa ngayulu tjitjingkulpi tjukurpa nyanga palunya tjananya uwankara wanganarangku kuliningi.”

²² Ka alatji wangkanyangka Jesulu kulinu munu palula wangkangu, “Palu nyuntu kutjuku watarkuringu, nyuntu panya kanyintja uwankaraku. Uti nyuntu palunya tjananya manikitjangku tjalami-lanma munu mani mantjira ngaltutjara tjuṭa para-ungama mununi palulanguru pitjala ngayunyalta wananma. Munun nyuntu nyara palulanguru ngula ilkarangka wiru mulapalta mantjilku.”

²³ Palu wati paluru alatji wangkanyangka kulira pulkara tjituru-tjitururingu, panya paluru mani ulytja kutjupa kutjupa pulkatjara alatjitu nyinangi, munu palunya tjananya walytjangku kanyintjikitja mukuringangi.

²⁴ Ka Jesulu palunya tjituru-tjitururinyangka nyangu munu palulanguru wangkangu, “Nyangatja wituwitu mulapa ngaranyi anangu mani munu ulytja pulkatjara tjuṭaku, panya tjana mani ulytja kulu pulkara kulira puṭa Godaku walytjaranganyi paluru tjananya mayatjangku kanyintjaku.

25 Kulilaya! Panya nyiilangka ala utju mulapa ngaranyi. Ka ala pala palulawanu wanyu kamula tjarpapai? Wiya alatjitu. Ka palu purunypatu anangu mani ulytja pulkatjara tjuṭa puṭu Godaku walytjaringanyi paluru tjananya mayatjangku kanyintjaku.”

26 Kaya anangu tjuṭangku nyanganpa kulinu munuya puṭu kulira palula tjapinu, “Palu Godalu anangu mani pulkatjara tjuṭa wanti-rampa tjinguru anangu kutjupa uwankara kulu ngura kurakutu iyalku wankarunkunytja wiyangku.”

27 Ka Jesulu piruku wangkangu tjanala, “Uwa, anangu puṭu walytja wankaringanyi, palu Godalu kutjungku wankalpai.”

28 Ka Peterlu wangkangu, “Kulila, panya nganana kutjupa kutjupa uwankara wantikatingu nyuntunya wanantjikitjangku.”

29-30 Ka Jesulu tjanala wangkangu, “Uwa mulapa. Kana nyurala tjukarurungku wangkanyi, panya nyura tjinguru nyurampa ngura, munu kuri, kuṭa, kangkuru tjuṭa, ngunytju, mama munu tjitji tjuṭa kulu wantikatingu Godalu nyuranya munu anangu kutjupa tjuṭa kulu walytjanmara mayatjangku kanyintjaku. Ka nyara palulanguru Godalu watarkuriwiyangku nyuranya waintara ungkuku walytja tjuṭa mulapalta manta nyanga palula nyinanyangka, ka ngula nyura ilunyt-jatjanu wankaringkula pakara wanka titutjara nyinaku Godala tjungu pukulpa mulapa.”

Jesulu Palurunku Ilunytjikitjangku Wangkanytja

(Matthew-ku 20:17-19; Markaku 10:32-34)

31 Munu palulanguru Jesulu wati panya palumpa nintintja 12 mauntalpa katingu munu tjanala wangkangu, “Kulilaya! Kuwarila Jerusalemalakutu ananyi. Ka uwankara panya wangkatjara tjuṭangku iriti Watiku Katjatjara walkatjunkunytja utiringkuku.

32 Panya ngayuku mirpantju tjuṭangkuniya witiṛa wati Jew wiya tjuṭa ungkuku, kaniya ngayunya anara kurara pungkuku mununiya witalytjunkuku.

33 Mununiya wiipangka kulu pulkara alkalku munuya palulanguru ngayunya iluntankuku. Palu ngayulu ilunytjatjanu tjiṅṅu kutjara wiyaringkula wankaringkula pakalku. Alatji panya nyiringka iriti walkatjunkunytja utiringkuku.”

34 Palu palumpa nintintja tjuṭangkuya puṭu nguwanpa kulinigi paluru ngula pikatjararingkunytja wangkanyangka, panya mulapa Godalu tjukurpa nyanga palunya kumpilpa kanyiningi tjanala utintja wiyangku tjana nintiringkula uti kulintjaku-tawara.

Jesulu Wati Kuru Pati Ngatjilpai Palyarunguntja

(Matthew-ku 20:29-34; Markaku 10:46-52)

35 Ka Jesunya tjana watalpi Jerichola wirkanu, ka ngura nyara palula wati kuru pati nyinangi iwarangka itingka, munu paluru maniku nyinara ngatjilpai.

36 Munu paluru kulinu anangu tjuṭa mulapa kinkinpa winki itiwanu wati-pitjanyangka munu tjapinu tjanala, “Nyaaringanyi nyanganpa?”

37 Kaya palula wangkangu, “Wiya, Jesunya wati-pitjanyi panya Nazarethanya ngurara.”

38 Ka wati panya kurutjarangku nyangatja kulira Jesula mirara wangkangu, “Jesu! Davidakun katja! Ngalturiwatju!”

39 Kaya anangu tjutangku Jesula tjungu ankunytjatjanungku palunya kulinu paluru Jesula wangkanyangka munuya palunya painu pilunarira wangkawiya nyinanytjaku. Palu paluru pirukuwu pulkara mirara tjapiningi alatji wangkara, "Davidakun katja! Ngalturiwatju!"

40 Ka Jesulu miranyangka kulira ngarakatingu munu wangkangu wati palunya ngalya-katinytjaku.

41 Munu palunya tjapinu, "Palu ngayulu nyaa palyantjakun nyuntu mukuringanyi?"

Ka paluru wangkangu, "Mayatja, ngayulu nyakunytjikitja mukuringanyi."

42 Ka Jesulu wangkangu palula, "Kuru alaringkula nyawa! Panya nyuntun mulapa ngayuku mulamularingkula kuwari kuru alaringu."

43 Ka mulapatu paluru mapalku kuru alaringkula nyangangi, munu pulkara pukularira Jesunya wanara Godanya walkuningi. Kaya anangu tjutangku palunya nyakula urulyaraningi, munuya tjana kulu pukularira Godanya walkuningi.

19

Tjakiyatjalu Jesunya Nyakunytja

1 Ka Jesunya tjana tawunu panya Jerichola tjarpara iwarangka waaratu anangi.

2 Ka ngura nyara palula wati mani pulkatjara ini Tjakiyatjanya nyinangi mani mantjilpai tjutaku mayatja, panya palumpa waraka tjutangku anangu tjutanguru kamantaku mani mantjilpai.

3 Ka Jesunya tjana ankunyangka anangu winki iwarangka ngarala wananingi palunya nyakunytjikitja.

Ka Tjakiyatjanya kulu palunya nyakunytjikitja pulkara mukuringangi. Palu puwu nyangangi anangu tjuta anganaranyangka, panya paluru wati mutumuwu mulapa.

4 Munu paluru kuranyu wirtjapakanu punu minatjarangka tatira Jesunya katunguru nyakunytjikitja panya paluru kulinigi, "Tjinguru Jesunya nyanga palulawanu pitjaku."

5 Ka Jesunya mulapatu nyara palulawanu anangi munu punu pala palula wirkara ira-nyakula nyangu Tjakiyatjanya punu katu nyinanyangka munu wangkangu, "Tjakiyatja! Ngalya-ukaliwa! Ngayulu kuwari nyuntula akatjari nyinanytjikitja mukuringanyi nyuntumpa walingka."

6 Ka Tjakiyatjanya mapalku ukalingu pununguru, munu pukularira Jesunya katingu palumpa walikutu.

7 Kaya anangu tjutangku Jesunya katinyangka nyakula mirpanarira wangkara waningi alatji, "Ai! Wati nyaratja kura mulapa. Ka Jesunya nyaaku palumpa ngurakutu ananyi?"

8 Ka nyara palumpa ngurangka Tjakiyatjalu pakara winkingka mirangka Mayatja Jesula wangkangu alatji, "Mayatja, ngayulu kuwari ulytja kutjupa kutjupa uwankara tjara ni kutjarankunytjikitjangku mununatju tjara kutju ngaltutjara tjuta ungkuku. Mununa ngayulu anangu kutjupa tjutangka mani ngunti waintara mantjintjatjanungku palunya tjananya malakungku ungkuku kutjara arangku."

9 Ka Jesulu nyangatja kulira wangkangu palula, "Kuwari nyanga alatjitu nyuntunya munu nyuntumpa walytjapiti kulu Godalu

wankarunu wali nyangangka nyinanytja tjuṭa. Panya kuwari nyuntu Aipuramanya purunypa Godaku mulamularingu. Nyara palulanguru nyuntu Aipuramaku walytja mulapa nyinanyi.

¹⁰ Panya ngayulu Watiku Katjanya pitjangu anangu kawalirinytja tjuṭa ngurira mantjintjikitja munu Godala malakungku tjungura wankaru kanyintjikitja.”

Tjukurpa Wati Warkaripai Tjuṭatjara
(Matthew-ku 25:14-30)

¹¹⁻¹² Ka ngura Jerichonya Jerusalemala itingka ngarangi, kaya anangu tjuṭangku kuliningi Jesulu tjukurpa wangkanyangka. Munuya ngunti alatji kuliningi, “Tjinguru kuwari Godalu ngananala utiringkula nganananya mayatjangku kanyilku ngura nyanga Jerusalemala.”

Ka Jesulu nitingku kuliningi tjana unngu kulintjita, munu tjanala tjukurpa ara kutjupatjara wangkangi alatji, “Wati pulka nyinangi ngura kutjupangka warka tjuṭatjara. Kaya kutjupa-ara palunya ngura kutjupanguru altingu mayatja pulka tjunkunytjikitjangku ngura tjuṭaku palumpa nguraku kulu.

¹³ Ka wati paluru ankunytja kuwaripangka anangu palumpa warka tjuṭa altingu wati 10-pala munu tjananya mani yakutjangka kutju kutju ungkula wangkangu, ‘Warkaya palyanma mani nyanga palunyatjarangku ngayulu malaku pitjanytjaku patara munuya mani pulkaringkunytjaku piruku palyanma.’ Alatji paluru wangkara tjananya wantikatingu munu anu parari ngura kutjupakutu mayatjarinytjikitja.

¹⁴ “Palu palumpa ngurangka anangu tjuṭa palumpa kuraringkupai, munuya ankunyangka malangka wati tjakulpa tjuṭa malawanungku iyanu tjana ankula alatji wangkanytjaku, ‘Wiya, wati nyanga palumpala nganaṇa mukuringkunytja wiya nganampa mayatja pulka nyinanytjaku nganampa ngurangka.’

¹⁵ Palu ngura nyara parariya palunya tjananya kulira wantingu munuya wati panya palunya tjunu alatjitu mayatja pulka nyinanytjaku ngura uwankaraku. Ka palulanguru malaku pitjangu wati panya paluru munu wirkara warka panya tjuṭa altingu munu tjananya wangkangu, ‘Ngayulu panya nyuranya mani ungkukatingu. Ka nyura yaaltjitu piruku palyanu ngayulu ankunyangka malangka mani panya palula tjanalanguru?’

¹⁶ “Ka wati warka kutju kuranyu pitjangu munu palula wangkangu, ‘Uwa mayatja, panya yakutja manitjara kutjunin ungu.

¹⁷ Kana ngayulu piruku palyanu mani pulka mulapa nampa nyan-gatja panya yakutja 10-pa.’

“Ka palunya mayatjangku panya wangkangu, ‘Nyuntun wiru mulapa palyanu. Ka nyuntu tjukutjuku wirungku atunymankunytjitunguru ngayulu nyuntunya mayatja tjunanyi ngura pulka 10-pa atunymara kanyintjaku.’

¹⁸ “Ka palulanguru wati warka kutjupa palulakutu pitjangu munu wangkangu, ‘Mayatja, panya nyuntunin yakutja manitjara kutju ungu, kana ngayulu piruku palyanu mani pulka nampa nyangatja panya yakutja 5-pala.’

19 “Ka mayatjangku palula wangkangu, ‘Uwa palya. Ngayulu nyuntunya mayatja tjunkuku ngura pulka 5-pala atunymara kanyintjaku.’

20 “Ka piruku wati warka kutjupa pitjangu munu paluru mayatjangka wangkangu, ‘Mayatja, nyangatja mani panya nyuntu ngayunya ungkunyta. Ngayulu nyanga palunya raikingka karpira kumpilpa ngarinytjaku tjunu.

21 Panya ngayuluna nguluringangi nyuntumpa panya nyuntu wati wituwitu, munu nyuntu witulya pulkangku mantjilpai nyuntu tjunkunyta wiyatjangku munu panyan mai katara uralpai nyuntu nganmanytju uninya tjuta tjunkunyta wiyatjangku.’

22 “Ka mayatjangku panya wangkangu palunya, ‘Nyuntun wati kura, munun warka ngayuku palyantja wiya alatjitu. Kuwarina tjukurpa panya nyuntu ngayunya wangkanytjitjanguru nyuntunya paini. Panya nyuntu ninti ngayuku panya ngayulu wati wituwitu mununa witulya pulkangku mantjilpai ngayulu tjunkunyta wiyatjangku, mununa mai katara uralpai ngayulu nganmanytju uninya tjuta tjunkunyta wiyatjangku.

23 Kan nyaaku ngayuku mani raikingka kutju karpira kanyiningi bankingka tjunkunyta wiyangku? Tjinguru nyuntu bankingka tjunkunyangkampa ngayulu pulka nguwanpa bankinguru mantjinma malaku pitjala.’

24 Munu tjanala wangkangu palula itingka ngaranyangka, ‘Mani palatjaya mantjira uwa wati panya pulka palyantjanya.’

25 “Palu anangu tjutangkuya wangkangu palula, ‘Wiya, paluru panya pulka kanyini yakutja tjutangka 10-pangka.’

26 “Ka mayatja panya paluru wangkangu, ‘Wiya, panya pulka palyantjala piruku mantjilku, palu panya warka palyantja wiyanguru ngayulu palumpa uwankara mantjilku maralpa ngaranytjaku.

27 Kana kuwari nyurala tjapini, “Ngananya tjana panyatja ngayulu mayatjarinytjaku mukuringkunyta wiya? Ngalya-katiya palunya tjananya munuya nyanga kuranyu iluntara ngayula mirangka!” ‘Alatji mayatja panya paluru wangkangu.”

28 Munu Jesunya nyanganpa wangkara wiyaringkula ma-pakanu Jerusalemalakutu.

Jesunya Jerusalemalakutu Tjarpanyta

(Matthew-ku 21:1-11; Markaku 11:1-11; Johnku 12:12-19)

29-30 Munu paluru wirkanu ngura Piitja-paitjala pulala Piitjanila itingka apu panya ini Alipatjarangka munu paluru nintintja kutjara kuranyu witura iyanu pulala alatji wangkara, “Ara pula tawunu nyara ilatjakutu munu nyupali ma-wirkara nyakuku tangkiyi kulunypa karpintja ngaranyangka nganmanypa tatintja wiyatja. Nyara palunya pula araltjara ngalya-kati!

31 Ka tjinguru wati kutjupangku nyupalinya nyakula tjapilku alatji wangkara, ‘Nyaaku nyupali palatja araltjananyi?’ Ka pula alatji wangka, ‘Wiya, Mayatjanya nyanga palumpa mukuringanyi.’ Alatji pula wati palula wangka.”

32 Ka pula mulapatu ankula nyangu paluru panya wangkanytjitja.

33 Ka pula tangkiyi panya kulunypa araltjankunyangka wati panya tangkiyiku walytjangku pulanya nyakula tjapinu wangkara, “Nyaaku nyupali araltjananyi?”

³⁴ Ka pula wangkangu, “Wiya, Mayatjanya nyanga palumpa mukuringanyi.” Ka pulanya palyanmanu araltjara katinytjaku.

³⁵ Ka pula mulapaṭu katingu Jesulakutu, kaya nintintja tjuṭangu mantara upukuta wara maṅkurpa tjunu tangkiyi panya kulunyta tjanangka munuya Jesunya tatitjunu.

³⁶ Ka paluru tatira pitjanyangka anangu tjuṭangu palumpa pulkara pukularira upukuta tjananku araltjara lipira tjunkula wananingi iwarangka palula kuranyu.

³⁷ Ka paluru apu Alipatjaralawanu ankula ma-ukalingangi wimarangka itipirira piruku Jerusalemalakutu ma-tatintjikitja. Ka ma-ukalingkungangkaya anangu palunya wanalpai tjuṭa palumpa pulkara alatjitu pukularingi, munuya pukultu mirara Godanya walkuningi, panya paluru miracle wiru tjuṭa palyantjitjangu, panya tjanaya rawanku nyangangi paluru palyannyangka. ³⁸ Munuya Godanya mirawaningi alatji wangkara,

“Mayatja God, nyanga palunya pulkara pukulmanama, panya nyuntu palunya iyanu nganananya mayatjarira kanyintjaku.

Kuwari nganampa God Ilkaritjanya anangu tjuṭaku kalyparingu.

Kala palunya walkura mirawanima katutja pulkanya!”

³⁹ Kaya Paratji tjuṭangu anangu tjuṭangka ngurur-ngururpa ankunytjatjanungku Jesula wangkangu, “Nintilpai, nyanga nyuntunya wanalpai tjuṭa wanyu paila pilunarinytjaku!”

⁴⁰ Ka Jesulu tjanala wangkangu, “Wiya, nyanga tjana tjin-guru pilunarinyangkampa apu nyangantu ngapartji mirara Godanya walkulku.”

Jesunya Jerusalema Ulanytja

⁴¹ Munu palulanguru Jerusalemalakutu ngalya-ilaringkula Jesulu wali palunya nyangangi munu paluru nyakula ulangi anangu tjuṭaku munu wangkangu,

⁴² “Ngayulu mukuringanyi nyura nintingku kulintjaku yaaltjingara Godala kalypa tjungu nyinanytjikitjangu. Palu wiya, nyura ngurpangu putu nyanganyi munu nyura pututu kulini. Ngaltutjara!

⁴³ Panya ngula nyurampa mirpantju tjuṭangu pitjala nyuranya pikangu tjatutjura angatjungkuku kampa uwankaranguru.

⁴⁴ Munuya nyurampa wali uwankara piluntara minya-minyalku alatjitu kutjupa malaringkula ngaranytjaku wiya, munuya nyuranya unngu nyinanytja tjuṭa uwankara alatjitu iluntara wiyalku tjtji tjuṭa kulukulu. Panya Godanya pitjangu nyuranya wankarunkunytjikitja, ka panya nyura palunya ngurkantankunytja wiyanku wantingi.” Alatji Jesulu tjituru-tjitururira wangkangi Jerusalemanya nyakula.

Jesulu Paintja Timpula Kurannyangka

(*Matthew-ku 21:12-17; Markaku 11:15-19; Johnku 2:13-22*)

⁴⁵ Munu palulanguru walangka ma-wirkara ankula timpulangka tjarpangu. Ka timpulaku yaatangka panya anangu tjuṭangu ngarala kutjupa kutjupa tjuṭa tjalamilaningi.

Ka Jesulu nyakula tjananya mirpanarira painu.

⁴⁶ Munu tjanala wangkangi, “Panya nyiringka iriti walkatjunkunytja ngaranyi Godalu wangkanytjita alatji,

'Ngayuku timpula uti ngayuku alatjitu ngarama anangu winkingku ngayunya tjarpara walkuntjaku.' *

Palu nyura maniku manyu tjutangku timpula nyanga milmita tjarpara anangu tjutangka mani mantjira ngura nyangatja kurani munu nyura wati kutitjunkturpai tjutaku wali purunypa palyani." *

Alatji Jesulu tjanala wangkangu.

⁴⁷ Munu tjinu kutjupa tjinu kutjupa Jesulu timpulangka pitjala tjukurpa wangkapai. Kaya wati tjukurtjara kuranyitja tjutangku, munu wati Moseku tjukurpa nintilpai tjutangku, munu Jewku mayatja tjutangku kulukulu Jesunya kukanymanangi iluntankunyitjikitjangu.

⁴⁸ Palu putuliringiya panya anangu tjutangkuya rawangku palula tjukurpa kulintjikitja pulkara mukuringangi munuya putu wantingi.

20

Jesunyaya Putu Tjapira Kulintja

(*Matthew-ku 21:23-27; Markaku 11:27-33*)

¹ Ka tjinu kutjupa Jesulu timpulangka tjukurpa wiru tjanala nin-tingi. Kaya wati tjukurtjara kuranyitja tjuta munu wati Moseku tjukurpa nintilpai tjuta kulu palulakutu pitjangu.

² Munuya wangkangu palula, "Nganalunta nyuntunya wangkangu anangu tjuta timpula nyanganguru paintjaku? Mununta nganalu iyanu tjukurpa nyangangka wangkara nintintjaku?"

³ Ka Jesulu tjanala ngapartji wangkangu, "Wiya, wanyu kana ngayulu-warara nyurala tjapila.

⁴ Nganalu wanyu Johnnga witunu anangu tjuta baptise-katinytjaku Godalu munta watingku?"

⁵ Kaya tjananku kaputurira wangkangi, "Nyaala wangkaku palula? Tjinguru nganana alatji wangkaku, 'Godalu witunu', ka paluru tjinguru nganana wangkaku, 'ka nyura nyaaku Johnku mulamularingkuwiyangku wantingi?'

⁶ Palu nganana tjinguru alatji wangkaku, 'Watingku witunu', kaya alatji wangkanyangkampa anangu nyanga tjutangku kulira mirpanarira nganananya apungka atura iluntankuku, panya paluru tjana Johnnga Godaku wangkatjaranmankupai. Kala nyaa wangkaku?"

⁷ Munuya palulanguru putu kulira Jesula wangkangu, "Wiya, nganana ngurpa nganalu Johnnga witunu baptise-katinytjaku."

⁸ Ka Jesulu tjanala wangkangu, "Ka ngayulu ngapartji nyurala tjakultjunkturpa wiyangku wantinyi panya ngayunya iyantjanya."

Wati Warka Kura Tjutangku Kiripitji Kanyintja

(*Matthew-ku 21:33-46; Markaku 12:1-12*)

⁹ Munu Jesulu piruku tjanala tjukurpa ara kutjupatjara wangkangi alatji, "Wati kutjupangku kaana pulkangka punu kiripitji tjuta tjawara ngaratjura wana, munu palulanguru wati mankurpa tjunkukatingu punu pakannyangka atunymara kanyintjaku munu parari anu ngura kutjupakutu rawa nguwanpa ma-nyinanytjikitja.

¹⁰ Ka ngula mai panya kiripitji kururingkunyangka wati panya kaanaku walytjangu wati warkaripai kutju iyanu wati panya

* 19:46 Aitjayaku 56:7 * 19:46 Jeremiah-ku 7:11

kaana atunymankupai tjutakutu ankula mai kiripitji tjarara mantjira palumpa ngalya-katinytjaku. Palu pitjanyangka nyakulaya palunya pungkula maralpa paira iyanu malakungku.

¹¹ Ka maralpa wirkankunyangka wati panya paluru piruku iyanu wati kutjupa ngapartji. Kaya palunya kulu wirkankunyangka nyakula pungkula pikatjarara maralpa malakungku paira iyanu.

¹² “Ka malaku pitjanyangka piruku kutjupa ngapartji iyanu, kaya palunya pungkula pikatjarara urilta waningu.

¹³ Ka paluru kutjungku kulira wangkangu wati panya kaanaku walytjangku, ‘Nyaalkuna wanyu? Munta wanyunatju ngayuku katja iyalku, panya nyanga palumpana pulkara mulapa mukuringkupai, kaya tjinguru palunya wanganarangku kulilku.’

¹⁴ Palu wati panya palumpa katja wirkankunyangka nyakulaya tjananku kaputurira wangkara kulinigi, ‘Ai! Wati panya palumpa katjampal palatja pitjanyi. Wanyula palunya iluntara, ka ngula mama palumpa tjilpiringkula ilunyangka kaana nyangatja nganampariku.’

¹⁵ Munuya wati panya palunya witira kaananguru itarikatingu urilkutu munuya pungkula iluntanu.”

Munu Jesulu tjukurpa nyangatja wangkara wiyaringkula tjanala wangkangu, “Ka wati panya kaanaku walytjangku nyaalku tjananya ngapartji?

¹⁶ Wiya paluru pitjala wati panyanpa iluntankuku munu kaana kiripitjtjara anangu kutjupa tjuta unkkuku.”

Kaya anangu tjutangku nyangatja kulira putu nguwanpa mularingangi, “Mulapaya katja pungkula iluntanama? Wiya, alatji wangkanytja wiyangku wantima!”

¹⁷ Ka Jesulu palunya tjananya nyangangi munu wangkangu, “Kulilaya tjukurpa panyatja, panya nyiringka iriti walkatjunkunyitja nyanga alatji,

‘Wali palyalpai tjutangkuya wali puli tjutanguru palyaningi, munuya puli kutju nyakula waningu kura-palku kulira.

Palu nguntiya waningu, panya puli nyara paluru kura wiya, wiru mulapa wali kunpu kanyilpai.’

¹⁸ Palu kutjupangku puli nyara palunya wantirampa pika pulka mulapa mantjilku. Panya puli nyara palunya wantinyangka Godalu pungkula wiyalpai alatjitu.”*

Rome-aku Mayatja Mani Ungkunyitjaku

(Matthew-ku 22:15-22; Markaku 12:13-17)

¹⁹ Kaya wati panya Moseku tjukurpa nintilpai tjutangku munu tjukurtjara kuranyitja tjutangku kulu tjukurpa nyangatja wangkanyangka kulira miilarara wangkangu, “Nyangangku nganananya wangkanyi.” Munuya palunya witintjikitjangku kulinigi. Palu nguluringangiya anangu winki ngaranyangka nyakula.

²⁰ Munuya pataningi Jesunya ngula witintjikitjangku. Munuya wati kutjupa tjuta iyanu palya tjuta-palku palula tjunguringkula wanarira kulintjaku paluru wangkanyangka. Panya tjana kulinigi Jesulu

* **20:18** Tjukurpa nyanga pulitjara wangkara Jesulu palurunku wangkangi.

tjukurpa kutjupa kutjupa ngunti wangkanyangka palunya witiira wati mayatja pulka ungkunyitjikitjangku palunya ngurkantankunytjaku.

21 Kaya wati panya paluru tjana ankula Jesunya ngunti tjapin-tjikitjangku palula wangkangu, "Nintilpai, nganana ninti tjukurpa pala nyuntu wangkanyitjijaku, panya tjukurpa pala paluru tjukaruru alatjitu. Munu nyuntu anangu uwankara tjungura nyakupai munu tjanela uwankarangka tjukarurungku wangkapai tjukurpa panya palunyatu anangu kutjupa tjutaku ngulurinkula kampa kutju-parinytja wiyangu. Munu nyuntu Godaku iwara tjukarurungku wangkara nintilpai kutitjunkunytja wiyangu.

22 Kalanya wanyu tjakultjura, palyala wati panya Tjiitjanya mayatja pulka Rome-ala nyinapainya mani tjarara ungkuku, munta wiya?"

23 Palu Jesulu nitingku kuliningi tjana ngunti arakara tjapinnyangka munu tjanela wangkangu,

24 "Wanyuniya nintila mani panya tjiilpa kutju." Kaya tjiilpa kutju mantjira palunya nintinu. Ka paluru nyakula tjanela tjapinu, "Nganaku ini walkatjunkunytja nyangatja ngaranyi? Munu nganaku yunpa kulu ngaranyi?"

Kaya wangkangu, "Mayatja pulka panya Tjiitjanya."

25 Ka Jesulu tjanela wangkangu, "Uwa mulapa mani nyangatja mayatja Tjiitjaku, kaya palunya palya ungama paluru wangkanyangka, palu Godalu wangkanyangkampaya Godanya alatjitu ungama."

26 Palu paluru alatji wangkanyangkaya nguwanuringu, "Ai, nyan-gangku munkara alatjitu wangkapai." Munuya pilunpa ngarangi wangka wiya alatjitu, panya paluru tjukurpa tjukaruru alatjitu wangkapai putu kuranmankunytjaku, kaya putu palunya anangu tjutangka mirangka witintjikitjangku kuliningi.

Anangu Ilunytjatjanu Pakantjitja

(Matthew-ku 22:23-33; Markaku 12:18-27)

27 Kaya ngula wati Tjatjutji mankurpa pitjangu Jesulakutu, panya paluru tjana anangu tjuta ilunytjatjanu pakantjitjaku mulamularingkupai wiya. Munuya wati nyanga mankurtu Jesula ngunti arakara tjapinu alatji,

28 "Nintilpai, panya Moselu tjukurpa nyangatja nganampa iriti walkatjunu alatji, "Tjinguru wati kuta iluku tjitji wiyatu, ka minyima panya palumpa kuri wanka nyinanyangka wati panya tjitjururungku uti altima minyima panya palunya. Munu tjinguru tjitji katja utintjatjanungku paluru kulilku, "Nyangatja ngayuku wiya, ngayuku kutaku tjitji, panya ngayulu palumpa kuringka utinu." ' Alatji Moselu walkatjunu.

29 "Palu tjukurpa nyangatja wanyu kulila. Panya wati 7 kutarara kutarara nyinangi. Ka kuta nganmanyitjangku kungkawara altingu, munu paluru tjitji utilwiyatu ilungu.

30-31 Ka malanytju ngapartji minyima panya palunyatu altingu munu tjitji wiyatu ilungu, ka palu purunypatu wati malanytja kutjupangku ngapartji altira paluru kulu tjitji wiyatu ilungu. Kaya palu purunypatu malanytja panya alatja tjutangka minyima panya palunyatu altira kanyira tjitji wiyatu ilungu uwankaratu wanapari wanapari.

32 Ka ngula minyima panya paluru tjana panya kurilta ilungu.

33 Kalanya wanyu tjakultjura ngula ilunytjatjanu wankaringkula pakantjatjanu minyama panya paluru nganaku kuri nyinaku? Panya wati 7-tu palunya altingu.”

34 Ka Jesulu wati panya Tjatjutji tjutangka wangkangu, “Mantangka nyanga nyinara watingku kungkawara altipai munu pula tjunguringkula kurirara nyinapai.

35 Palu ngula Godaku walytja tjuta ilunytjatjanu pakara ngura nyara ilkaritjangka kuri altinytja wiya nyinaku.

36 Munuya angelpa tjuta purunypa titutjara nyinaku piruku ilunytja wiya, panya tjana ilunytjatjanu pakara Godaku tjitji tjuta nyinaku.

37 Panya Moselu utingku alatjitu tjakultjunu anangu tjuta ilunytjatjanu pakantjaku. Panya paluru punu kampanyangka nyakunytjatjanungku walkatjunu alatji Godalu panya wangkanytja, ‘Ngayulu Aipuramaku, Isaacaku munu Jacobaku God nyinanyi.’

38 Kala nyanga palulanguru kulini panya Mayatjanya anangu wanka nyinapai tjutaku God nyinanyi, miri tjutaku wiya, panya Godalu anangu uwankara wanka tjuta nyakupai.”

39 Kaya kutjupa tjutangu wati panya Moseku tjukurpa nintilpai tjutangu palula wangkangu, “Nintilpai, nyuntun tjukurpa wiru mulapa wangkangu.”

40 Munuya palula malangka piruku Jesunya tjpintja wiyangu wantingi.

Christanya Davidaku Katja

(Matthew-ku 22:41-46; Markaku 12:35-37)

41 Ka Jesulu wangkangu tjanala, “Nyaakuya panyatja anangu tjutangu wangkapai Christanya Davidaku katja nyinanytja?

42 Panya nyiri Psalmangka ngaranyi Davidalu wangkanytja alatji, ‘Mayatja Godalu ngayuku Mayatjangka wangkangu,

“Ngayula itingka mayatja pulka nyinakati kampa nyanga wakungka.

43 Kana nyuntumpa mirpantju tjuta tjarulku nyuntula wanganarangku kulintjaku,

kan tjananya nyuntu mayatjangku wituwitulku.” ’ *

44 Ala palatja! Davidalu Christanya mayatjanmanangi alatjitu Godalu panya kalkuntjanya, ka Christanya yaaltji-yaaltji piruku palumpa pakali malatja nyinama? Wiya, paluru pakali kutju wiya palumpa mayatja kulu nyinanyi.”

Jesulu Anangu Tjuta Ngulutjunkunytja Moseku Tjukurpa Nintilpai Tjutangka-tawara

(Matthew-ku 23:1-36; Markaku 12:38-40; Luke-aku 11:37-54)

45 Munu anangu tjutangu ngarala kulinnyangka Jesulu palumpa nintintja tjutangka wangkangu alatji,

46 “Ngulu nyangamaya Moseku tjukurpa nintilpai tjuta. Nyara tjana panya mantara waratjara kanany-kananyapa para-ngarapai anangu tjutangu nyakula tjananya mirawaninytjaku mukuringkula.

* 20:43 Psalm 110:1

Munuya wali inmatjangka tjunguringkula tjiya wiru tjuṭa ngurkan-tankupai anangu tjuṭangka kuranyu uti nyinakatinytjikitja mukuringkula. Munuya kutjupa-ara mai pulka ngalkuntjikitja tjunguringkula palu purunypatu kuranyu nyinanytjikitja mukuringkupai anangu tjuṭanku tjananya nyakula mirawaninytjaku.

⁴⁷ Munuya minyma wanakala tjuṭa wituwitulpai tjananya ngunti kalkuntjaku alatji wangkara, 'Nyuntu nganannya kalkunma ngula nyuntu ilunyangka nyuntumpa wali nganamparinytjaku.' Munuya paluru tjana Godala tjapira tjukurpa wara mulapa wangkapai anangu tjuṭanku tjananya kulira mirawaninytjaku mukuringkula. Ka nyanga alatji kanany-kanany pa nyinanyangka Godalu tjananya pulkara pungkuku."

21

Minyma Wanakalangku Ungkunyta (Markaku 12:41-44)

¹ Munu Jesulu tjukurpa wangkara wiyaringkula waintara nyangu anangu mani pulkatjara tjuṭanku mani pitingka waninyangka timpulangka, panya mani palunya tjananya paluru tjana Godanya ungangi.

²⁻³ Munu paluru nyangu minyma wanakalangku mani tjuku mulapa waninyangka kalka kutjara kutju munu tjanala wangkangu, "Kulilaya, ngayulu nyangangi kuwari anangu tjuṭanku pulka waninyangka, palu wanakala nyanga ngaltutjarangku tjanala munkara nguwanpa waningu.

⁴ Panya kutjupa tjuṭangkuya pulka kanyintjatjanungku tjarara tjara kutju waningi, ka paluru uwankara alatjiṭu waningu paluru kanyintjatjanungku, munu nyanga wiyalta nyinanyi. Tjukarurungkuṇa nyurala wangkanyi, minyma nyanga wanakalangku pulka mulapa Godanya ungu mani pulkatjara tjuṭangka munkara."

Timpula Pilukatinytja Tjanala Wangkanytja (Matthew-ku 24:1-2; Markaku 13:1-2)

⁵ Kaya palumpa nintintja kutjupa tjarangku timpula panya nyakula wangkangi wiru mulapa ngaranyangka. Panya timpula paluru puli wiruly-wiruly pa wiru mulapatjara. Panya iritiya nyara palula wiru tjuṭa katira Godanya ungangi timpula tjanampa wiru mulapa palyantjaku.

⁶ Ka Jesulu kulira tjanala wangkangu, "Nyura kuwari nyanganyi timpula wiru mulapa puli nyanga pulkanguru palyara tatintja. Palu ngula wali nyanga paluru pilukatira minya-minyaringkuku. Ka puli kutjupa malaringkula ngarawiya uwankara alatjiṭu punkara minya-minya ngarira waniku."

Jesulu Pikangka-tawara Ngulutjunkunyta (Matthew-ku 24:3-14; Markaku 13:3-13)

⁷ Kaya kutjupa tjuṭanku palula tjapinu, "Nintilpai, wanyulanya tjakultjura! Yaalara nyanga alatjiriku panya nyuntu kuwari timpula pilukatinytja wangkangi? Ka nyaa nganmanypa utiringkuku nganaṇa nganmanytju nyakula kulintjaku?"

8 Ka Jesulu wangkangu, “Ngulu nyangamaya kutjupangku nyuranya wangkara ngunti kurantjaku-tawara. Panya anangu tjuta pitjaku ngayulu iyantja-palku wangkara munuya ngunti wangkaku, ‘Ngayuluna panya paluru, Jesunya Christanya!’ Munta tjinguru kutjupangku wangkaku alatji, ‘Tjintu panya wirkanu, anangu tjuta wankarunkunytjaku.’ Palu kuliraya wantima palunya tjananya wanalwiyangku ngunti kurannyangka.

9 Munu nyura tjinguru kulilku anangu tjutangku tjananku pikangku pungkunyangka ilatjangku munu pararitja tjutangku kulu. Palu pika nyanga palunya tjananya kuliraya nguluringkuwiya nyinama, panya nyanga paluru tjana utiringkunytjaku ngaranya alatjitu, palu tjintu malatja kuwaripatu ngaranya ilaringkunytja wiya.”

10 Munu Jesulu tjanala piruku wangkangu, “Panya ngura kutjupa kutjupangka tjaultji tjutangku pikangku pungkuku nguraku mayatja tjutangku wituwitunnyangka.

11 Ka ngura tjutangka manta pulkara uriku. Ka ailuru pulka ngaraku, ka mai wiyaringkunyangka anangu winki paltjatjiratja nyinaku, ka pika kutjupa kutjupa tjuta utiringkula anangu tjuta pikatjararingkunytjaku palyalku. Ka piruku ilkaringka kutjupa kutjupa pulka tjuta utiringkuku anangu tjutangku nyakula pulkara nguluringkunytjaku.

12 “Palu nyanganpa utiringkunytja kuwaripangka anangu mirpantju tjutangku nyuranya witiilku ngayunya wanannyangka. Munuya nyuranya anara kurara pungkuku munuya nyuranya katira wali inmatjangka ngaratjungkuku kuutpangka wangkanytjaku, ka mayatja tjutangku nyuranya ngurkantara tjailakutu iyalku, nyura ngayuku mukuringkunyangka. Munuya nyuranya wati mayatja pulka tjutangka kuranyu ngaratjungkuku tjanala mirangka nyuranya kuranmankunytjikitjangku.

13 Palu nyara palula ara nyura uti tjukurpa ngayunyatjara tjanala tjakultjunama.

14 “Munuya nyuranya kuutpakutu katinyangka alatji kulilwiyangku wantima, ‘Nyaanatju wangkaku ngayunya tjapinnyangka?’

15 Panya ngayulu alatjitu nyuranya wangkanytjaku unngu nintilku. Kaya nyurampa mirpantju tjutangku putu kulilku nyuranya ngapartji wangkanytjikitjangku.

16 Ka nyurampa malpa tjutangku nyuranya wati mirpantju tjutangka nintilku witera katinytjaku, tjinguru nyurampa mamangku ngunytjungku, tjinguru kutangku tjinguru walytja kutjupangku nyuranya tjanala nintilku, kaya nyuranya witera katiku munuya nyuranya kutjupatjara iluntankuku.

17 “Uwa, anangu winki nyurampa kuraringkuku nyura ngayunya wanannyangka.

18 Palu pika nyanga palu purunytju nyuranya putu Godalanguru mauntankuku.

19 Palu nyura titutjarangku ilunytjakutu-wangkara ngayunya tungun-tunguntu wanannyangkampa Godalu nyuranya wankaru kanyilku palula tjungu titutjara nyinanytjaku.

*Jesulu Wangkanytja Jerusalemanya Ngula Wiyantjaku
(Matthew-ku 24:15-21; Markaku 13:14-19)*

20 “Ka nyura wati warmala winki mulapa Jerusalemala para-arintara ngaranyangka nyakulama ngulinma panya tjanaya pitjangu ngura palunya wiyantjikitja alatjitu.

21 Ka nyura manta Judeala nyinanytjatjanu uti ngulu wirtjapakanma pulikutu. Ka palu purunypatu uti nyura Jerusalemala nyinanytjatjanu pakara wirtjapakanma ngura kutjupakutu. Ka nyura ngura tjukutjuku tjutangka nyinanytjatjanungku Jerusalemalakutu ankunytja wiyanguk wantima.

22 Panya nyiringka iriti walkatjunkunytja ngaranyi pika nyanga palu purunypa ngula Judeala utiringkunytjaku.

23 “Ka nyara palula ara panya kura pulka mulapa ngaraku minyma ititjara tjutaku munu iti tjukutjukutjara tjutaku kulu. Ngaltutjara! Panya tjana tjinguru wirtjapakara ngururpau pakuringkula wiyaringkuku. Panya mulapa ngura nyanga Israelta winkingka pika pulka mulapa ngaraku anangu tjutaku, panya mulapa Godanya palumpa tjanampa pulkara mirpanariku Israelkunu tjutaku.

24 Kaya kutjupa tjuta warmala pitjaku ngura kutjupa kutjupa tjutanguru munuya tjara kutjupa tjula pulkangka wakara iluntankuku munuya tjara kutjupa witira katiku ngura kutjupa tjutakutu. Munuya Jerusalemanya piluntara wiyalku anangu ngura kutjupitja tjutangu. Munuya ngura palunya rawangukanyilku malikitja tjutangu ngura kutjupa kutjupa tjutanguru pitjala. Munuya tjinu malatja watalpi ilaringkuyangka kutju wantikatiku Jew tjutangu piruku ngura walytjangukanyintjaku.

Jesunya Malaku Pitjanytja

(Matthew-ku 24:29-31; Markaku 13:24-27)

25 “Ka tjinu munu pira kulu kutjupa kutjuparikuku, ka kililpi tjuta punkalku. Ka manta winkingka uru pulkara urira rurkulku. Kaya anangu tjutangu nyakula nguluringkuku munuya putu kulilku kutjupa kutjupa palyantjikitjangu.

26 Panya Godalu ilkarangka ngaranytja tjuta pulkara uritjingalku. Kaya anangu winki nyakula pulkara nguluringkula tjititinkuku munuya putu kulilku, ‘Nyaaringanyi kuwari?’

27 Munuya palulanguru ngayunya nyakuku Watiku Katjanya ngangkalangka pitjanyangka witulya pitalytji pulka alatjitu.

28 Ka nyanga uwankara alatjirinyangkampa nyura uti nguluringkunytja wiya ngarama munuya raparingkula kulinma, ‘Munta nganananya wankarunkunytjikitja pala pitjangu.’”

Jesuku Tjukurpa Titutjara Ngaraku

(Matthew-ku 24:32-35; Markaku 13:28-31)

29 Munu Jesulu tjukurpa ara kutjupatjara tjanala piruku wangkangi alatji, “Kulinmaya punu panya nyalpi punkara wiyaringkupai wariringkuyangka.

30 Munu panya punu nyara palula piriyakutu nyalpi kuwaritja piruku pakalpai, ka pakannyangka nyakula nyura nintingku kulilpai, ‘Munta-uwa, kulil watalpi ilaringanyi.’

31 Ka nyanga palu purunypatu pika panya paluru tjana utiringkuyangka nyakula nyura kulinma panya tjinu watalpi ilaringanyi Godalu palumpa walytjapiti uwankara mayatjangukanyintjaku.

³² “Uwa, tjukarurungkuṅa nyurala wangkanyi, panya nyanganpa uwankara utiringkuku anangu nyanga kuwari nyinanytja tjuṭa wanka nyinanyangkaṭu.

³³ Panya ngula manta ilkari uwankara wiyaringkuku, palu tjukurpa ngayulu wangkanytja titutjara alatjitu ngaraku wiyaringkunyitja wiya.

Titutjaraya Ala-ala Patanma

³⁴⁻³⁵ “Uwa, nyura uti rawa kulil-kulilpa nyinama watarkurinytja wiya. Munuya mai pulka ngalkula waina pulka kulu tjikira pukularinytjikitjangku kulintja wiyangku wantima munuya mantatja kutjupa kutjupa tjuṭaku pulkara mukuringkula kulintja wiyangkuṭu wantima. Panya nyura rawa alatjirinyangkampa tjiṅtu panya paluru mapalku wirkankuku, ka nyura pulkara urulyaralku watarku nyinanytjatjanu. Panya watingku kuka witintjikitjangku pitji tjawara tjuṭura wantipai. Ka kuka kutjupa watarku pitjala karalukatipai pitji panya palula, ka iluntankupai. Palu purunypa anangu kutjupa watarku nyinara puṭu wankaringkuku tjiṅtu malatjangka. Panya tjiṅtu nyara paluru wirkankunyangka anangu uwankarangku nyakuku manta winkingka.

³⁶ Ka uti nyura rawa ala-ala nyinama munuya rawangkuṭu Godala tjapilkatima nyuranya ngalkintjaku pika nyanga kutjupa kutjupa tjuṭanguru. Munuya palula tjapinma nyuranya kunpuntjaku, ka nyura titutjarangku ngayunya tjukarurungku waṅanma ngayulu Watiku Katjanya nyurampa pukularinytjaku tjiṅtu malatjangka.”

³⁷ Jesulu tjukurpa nyanga palunya tjananya timpulangka wangkangi anangu tjuṭangka tjiṅtu kutjupa tjiṅtu kutjupa, munu wangkara wiyaringkula paluru mungartji ankupai ngura panya puli Alipatjaralakutu munu nyara palula ngaripai.

³⁸ Kaya anangu tjuṭa mungawinki kutjupa mungawinki kutjupa ali pakara pitjapai timpulakutu paluru tjukurpa wangkanyangka kulintjikitja.

22

Jewku Mayatja Tjuṭangku Jesunya Kukanyankunyitja

(*Matthew-ku 26:1-5,14,16; Markaku 14:1-2,10-11; Johnku 11:45-53*)

¹ Ka tjiṅtu watalpi ilaringu tjiṅtu pala palula mai panya pilytja ngalkula ara panya irititja kulintjaku ini panya Katuwanu Ankunyitjanya.

² Kaya wati tjukurtjara kuranyitja tjuṭa munu Moseku tjukurpa nintilpai tjuṭa kulu Jesunya iluntankunyitjikitja mukuringangi, palu tjana anangu tjuṭaku nguluringangi kulira, “Tjinguru tjanala mirangka witinnyangkaya nyakula palunya ngalkilku. Kala yaaltjingga palunya kampangkaṭu witilku?”

³ Ka tjiṅtu nyara palula mamu Satannga Jesuku nintintja kutjunga tjarpangu ini panya Judas Kariyatala.

⁴ Ka Judasalu ankula kampangkaṭu wangkangi wati panya tjukurtjara kuranyitja tjuṭangka munu wati timpula atunymankupai tjuṭangka kulu. Alatji paluru wangkangi, “Yaaltji nyura kulini? Ngayuluna nyuranya alpamilalku Jesunya witintjaku?”

⁵ Kaya paluru wangkanyangka kulira pukularingu munuya palunya kalkunu Jesunya tjanala nintinnyangka mani ungkunytijkikitjangu.

⁶ Ka tjana wangkanyangka Judasalu palyanmanu munu palulanguru kuliningi, "Wanyuyawi anangu uwankara ngurangkari, kana tjanala kampangkatu nintila Jesunya witintjaku."

Tjapa Malatja Ngalkunytjaku Palyantja
(*Matthew-ku 26:17-25; Markaku 14:12-21; Johnku 13:21-30*)

⁷ Ka tjintu panya paluru wirkanu mai panya palunya ngalkuntjaku munu lamalama kulu iluntankula paura ngalkuntjaku.

⁸ Ka Jesulu wangkangu Peterla pulala Johnta, "Ankula pula mai kuka riti palyala nganaña ngalkuntjaku."

⁹ Ka pula tjapinu Jesula, "Yaaltjingka riti palyantjakun mukuringanyi?"

¹⁰ Ka Jesulu pulanya Jerusalemalakutu wangkara iyanu, "Nyupali walingka ma-wirkara nyakuku wati warkaripaingku piti minatjara tjalira katinyangka. Nyara palunya pula wanara nyawa walingka tjarpnyangka.

¹¹ Munu pula nyakula wali pala palulatu ma-tjarpara wati waliku walytjangka wangka alatji, 'Nintilpainya mukuringanyi nyuntu ngalila nintintjaku ruuma yaaltjingkala mai panya Katuwanu Ankunytjanya ngalkuku.'

¹² Ka wati nyara paluru nyupalila nintilku ruuma katutja taipula kutjupa kutjupa tjuatjara. Ka pula nyara palula nganampa mai nganmanytju palyala."

¹³ Ka Peternya pula Johnnga anu tjananya wantikatira munu pula mulapa tu nyangu Jesulu panya wangkanytjita uwankara. Munu pula mai kuka uwankara riti palyanu ara panya Katuwanu Ankunytjanya ngalkula kulintjikitjangu.

Tjapa Malatja Ngalkunytja
(*Matthew-ku 26:26-30; Markaku 14:22-26; 1 Karintjaku 11:23-25*)

¹⁴ Munuya mungartjirinyangka pitjala taipulangka para-ngarira arintanangi Jesunya munu palumpa iyantja tju ta kulu mai ngalkun-tjikitja.

¹⁵ Ka paluru tjanala wangkangu, "Ngayulu pulkara mukuringanyi nyurala tjungungku mai nyanga katuwanutja ngalkuntjikitja ngayuku pika ngaranytja kuwaripangka.

¹⁶ Panya ngayulu mantangka nyurala nyinara mai nyanga katuwanutja piruku ngalkuntja wiya, palu ngula kutjuna nyurala tjunguringkula ngalkuku tjintu panya malatjangka Godalu palumpa walytjapiti uwankara mantjira mayatjangku kanyinnyangka."

¹⁷ Munu Jesulu walpayata wainatjara mantjinu munu Godala wangkara walkunu, "Wirungkulanyan waina nyangatja ungu." Munu tjanala wangkangu, "Mantjilaya walpayata nyanga wainatjara munuya uwankarangku tjikila.

¹⁸ Panya ngayulu mantangka nyurala nyinara piruku waina nyanga palunya tjikintja wiya, palu ngula kutjuna nyurala tjunguringkula tjik- ilku tjintu panya malatjangka Godalu palumpa walytjapiti uwankara mantjira mayatjangku kanyinnyangka."

19 Munu Jesulu mai pilytja mantjinu munu maiku pukularira Godala wangkangu, “Wirungkulanyan mai nyangatja ungu.”

Munu palulanguru tjananya katantara palumpa nintintja tjuta ungu munu wangkangu, “Nyangatja ngayulu puntu nyurampa pikatjararingkuntja. Mantjiraya ngalkula, munuya ara nyanga palunya rawanku palyanma ngayunya kulintjikitjangku.”

20 Munu ngula maingka malangka piruku walpayata mantjinu wainatjara munu palu purunypatu Godanya walkura tjanala wangkangu alatji, “Nyangatja ngayulu milkali nyurampa tjutinytja, panya nyanga paluru nintini kalkuntja kuwaritja Godalu anangu tjutaku palyantja.

21 “Palu kulilaya! Kuwari nyanga nyura ngayula tjungu nyinanyi ngayuku malpa uwankara taipulangka nyanga. Palu nyuralanguru wati kutjungku ngayunya mirpantju tjutangka nintilku tjana ngayunya witintjaku.

22 Uwa, ngayulu Watiku Katjanya mulapa iluku panya alatjirinytjaku nganmanytju alatjitu wangkangu. Palu pika pulka mulapa ngaraku wati panya palumpa, panya ngayunya tjanala nintintjitjaku.”

23 Kaya palumpa nintintja tjutangka alatji kulira tjananku ngaparku tjapiningi wangkara, “Nganalu wanyu alatji palyalku nyanga palumpa?”

Nintintja Tjutangkuyanku Ngaparku Tjapintja Pulka Nyinanytjatjiratja

24 Munuyanku mirpan-mirpantu ngaparku wangkangi alatji, “Ngayulu uti kuranyu nyinama nyurala waintara.”

25 Ka Jesulu tjananya paira wangkangu, “Kulilaya! Panya anangu tjutaku mayatja tjutangkuya tjananya tungun-tunguntu kanyira pauntjingara wituwitulpai, munuya walytjangku tjananku mirawanira wangkapai alatji, ‘Nyawa, nganana malpa wirungku anangu uwankara wirura kanyilpai.’ Alatjiya wangkapai wati mantatja tjutangu.

26 Palu tjananya kulira arkalwiyangkuya wantima. Nyuntu tjinguru pulka nyinarampa utin walytjangku kulira kuntaringama, munta tjinguru nyuntu mayatja kuranyitja nyinarampa utin tjaruringkula wati wara purunyarima.

27 Palu anangu tjutangu ara nyanga palu purunypa kulilpai wiya, panya tjana uwankara mayatja pulka nyinanytjikitja mukuringkupai, munuya anangu kutjupa tjuta tjanampa wara palyantjaku mukuringkupai tjananya witura. Palu nyura uti kampa kutjupa kulinma munu ngayunya purunypa arakara nyinama, panya ngayulu nyurampa mayatja pulka nyinara nyurampa rawa pulkara wararingi.

28 “Uwa, nyura panya ngayula tjungu titutjara nyinangi munuya mirpantju tjutangu ngayunya kurara pungkuyangkañi wantikatinytja wiya alatjitu.

29 Kana palulanguru kuwari nyuranyalpi tjunanyi ngula anangu tjuta mayatjarira kanyintjaku, panya Mamalu ngayunya mayatja tjunu anangu uwankaraku mayatjarinytjaku, nyara palu purunypa.

30 Ka ngula nyura ngayuku ngurangka ngayula tjunguringkula ngalkula tjikilku. Munu nyura mayatja tjuta tjiya wirungka kutju kutju nyinaku anangu panya Israelkunu tjuta mayatjarira kanyintjikitja.”

Jesulu Nganmanytju Wangkanytja Peternya Palumpa Ngurparingkunyjtjaku

(*Matthew-ku 26:31-35; Markaku 14:27-31; Johnku 13:36-38*)

³¹ Munu palulanguru Jesulu Simon Peterla wangkangu alatji, "Simon, Simon, kulilani! Panya Satantu tjapinu nyuranya uwankara kutju kutju arkantjikitjangku panya mai kanilpai purunytju, panya anangungku uninypa kanira mai wiru mantjilpai munu kura tjuṭa tjarara wanipai, palu purunytju Satantu nyuranya arkara nyakunytjikitja mukuringanyi.

³² Palu Simon, ngayulu nyuntumpa Godala tjapinu nyuntunya arkanyangka anga-kanyintjaku nyuntu ngayuku ngurparingkunyjtjanu ngayunya wantinytjaku-tawara. Ka ngula nyuntu malaku ngayula tjunguringkula tjananya ngapartji kunpunma ngayuku walytja tjuṭa."

³³ Ka Peterlu wangkangu, "Wiya, Mayatja, tjinguruya nyuntunya witera tjailangka tjarpatjunkunyangka ngayulu kulu nyuntula tjunguringkula tjailakutu ankuku. Tjinguruya nyuntunya iluntankuku, kana ngayulu nyuntula tjungu iluku."

³⁴ Ka Jesulu wangkangu, "Peter, nganmanytjunanta wangkanyi, panya tjintu pakantja kuwaripangka tjulpu panya tjuki wangkapai, ka munga nyanga kuwari tjulpu paluru wangkanytja kuwaripangka nyuntu ngayuku mankurara ngurparingkuku."

³⁵ Munu Jesulu tjananya tjapinu, "Panya ngayuluna nyuranya mungatu maralpa iyanu yakutja wiya, mani katinytja wiya ankunytjaku munu tjinatja kulu wiya, ka nyura wanyu ankula kutjupa kutjupa tjuṭaku mukuringangi nyara palula ara panya?"

Kaya wangkangu, "Wiya alatjitu. Nganana palya pukulpa anangi."

³⁶ Ka Jesulu tjanala wangkangu, "Palu kuwari kutjupa ngaranyi, ka nyura uti yakutja manitjara kanyirampa katima, munuya yakutja kutjupa mantaratjara kanyirampa katima, munuya tjuṭa pulka kanyintja wiya ngarala nyurampa ulytja tjara kutjupa tjalamilala munuya mani mantjira tjuṭa pulka payamilala.

³⁷ Panya nyiringka iriti walkatjunkunytja ngaranyi nyanga alatji, 'Palunyaya wati kuralpai-palku kulilku.' *
Uwa, tjukurpa nyangangu ngayunytjara tjakultjunangi, ka tjukurpa nyanga paluru mulapa kuwari utiringanyi."

³⁸ Kaya palumpa nintintja tjuṭangu wangkangu, "Mayatja, nyangatjala tjuṭa pulka kutjara kanyini."

Ka Jesulu nyakula wangkangu, "Wiya, palya wanti!"

Jesulu Mamangka Tjapintja Ngura Apu Alipatjarala

(*Matthew-ku 26:36-46; Markaku 14:32-42*)

³⁹ Munu palulanguru Jesunya pakara anu ngura panya apu Alipatjaralakutu panya ngura nyara palulakutu paluru rawa ankupai, kaya palumpa nintintja tjuṭa palula tjunguringkula anu.

⁴⁰ Munu nyara palula wirkara Jesulu tjanala wangkangu, "Godalaya tjapinma nyuranya anga-kanyintjaku mamungku nyuranya kurantjaku-tawara."

⁴¹⁻⁴² Munu paluru tjukutjuku patu nguwanpa anu munu tultjungarakatira Godala tjapiningi alatji wangkara, "Mama, wanyu tjananya mirpantju panya tjuṭa markula ngayunya pungkunytjaku-tawara. Palu

* 22:37 Aitjajaku 53:12

wiya, nyuntu mukuringkula palya tjananya wantir'iyala ngayunya pungkunyitjaku, kaṇa palula tjanalanguru kumpintja wiya, panya ngayulu mukuringanyi nyuntu mukuringkunyitja kutju palyantjikitja.”

⁴³ (Ka mapalku angelpa ilkarīnguru palula utiringu palunya kunpuntjikitja.)

⁴⁴ Palu Jesunya kurunpa ulīringkula akurī-akurīringu pulkara alatjitu Mamala tjapira tjapira, ka milkali akurīngka tjunguringkula mantangka punkaningi.)

⁴⁵ Munu paluru tjapira wiyaringkula pakara malaku anu palumpa nintintja tjutakutu. Munu tjananya nyangu kunkunpa alatjitu ngarinyangka panya tjituru-tjituru pulkaringkulaya pakuringu.

⁴⁶ Ka Jesulu tjanala wangkangu, “Nyaaku nyura kunkunpa ngarinyi? Pakaraya tjapinma nyuranya anga-kanyintjaku mamungku nyuranya kurantjaku-tawara.”

Jesunya Witintja

(*Matthew-ku 26:47-56; Markaku 14:43-50; Johnku 18:3-11*)

⁴⁷ Ka Jesunya tjanala ngarala wangkanyangka anangu tjuta pitjangu, panya nintintja kutjungku tjananya ngalya-katingu, Judasalu. Munu paluru ilaringkula Jesunya mitamita kutjara nyunytjuna.

⁴⁸ Palu Jesulu wangkangu, “Judas, nyaakun malpangku-palku ngayunya Watiku Katjanya nyunytjura nintini witintjaku?”

⁴⁹ Kaya palumpa nintintja tjutangku nyangatja kulira kuliningsi, “Kuwariya witini Jesunya.” Munuya palula wangkangu, “Mayatja, pungkukula tjananya tjuḷa nyanga pulka kutjarangka?”

⁵⁰ Ka mulapatu nintintja kutjungku wati tjukurtjara pulkaku warakaripai tjuḷa warangka pungkula pina waku katara punkatjinganu.

⁵¹ Ka Jesulu wangkangu, “Wantima alatjingantja wiyangku!” Munu paluru wati panya warakaripaiku pina pampunu, ka mapalku palyaringu.

⁵² Munu Jesulu wangkangu wati tjukurtjara kuranyitja tjutangka munu wati timpula atunymankupai tjutangka munu Jewku mayatja kuranyitja tjutangka kulū, “Nyaaku nyura tjuḷatjara tjuṭinypatjara kulū pitjangu ngayunya wati kura-palku kulira witintjikitja?”

⁵³ Panya ngayulu nyurala tjungu alatjitu nyinangi timpulangka rawa mulapa, ka nyura panyatja nyaaku nganmanyatju nyara palula aratu witiwiyangku wantingi? Wiya, nyura kalala wantipai munu nyura mungangka kutju kumpilpa nyanga palu purunypa palyalpai mamungku wituwitunnyangka. Nyangatja nyurampa ara.”

Peternya Jesuku Ngurparingkunyitja

(*Matthew-ku 26:57-58,69-75; Markaku 14:53-54,66-72; Johnku 18:12-18,25-27*)

⁵⁴⁻⁵⁵ Kaya Jesunya witira ma-katingu tjukurtjara pulkaku walikutu. Ka Peterlu palunya malawanungku wanarinangi palula tjanala ilaringkunyitja wiyangku. Kaya wirkara wali unngu ma-tjarpangu Jesunya katira. Kaya kutjupa tjutangku urilta yaatangka ngarala waru tilinu munuya nyinara nganytjiningi. Ka Peternya wirkara tjanala tjunguringkula nyinangi.

56 Ka kungkawara warkaripaingku palunya waru tilingka yunpa rawangku nyangangi munu wangkangu, "Wati nyanga paluru kulu palula tjungutja."

57 Ka Peterlu wangkangu, "Wiya, ngayulu ngurpa wati nyara palumpa!"

58 Ka ngula anangu kutjupangku ngapartji nyangu Peternya munu wangkangu, "Mulapan panyatja, nyuntu kulu palula tjungutja."

Ka Peterlu wangkangu, "Wiyatuna! Ngurpana!"

59 Ka piruku ngula palula malangka kutjupangku ngapartji nyangu palunya munu wangkangu, "Mulapa wati nyanga paluru palula tjungutja, panya paluru wati Galileenya ngurara wangka Jesunya pula tjungu."

60 Ka Peterlu wangkangu, "Wiya, ngayulu ngurpa wati palumpa! Putuna kulini nyuntu wangkanyangka." Ka Peterlu wangkanyangka tjulpu panya tjuki mirangu.

61 Ka Mayatja Jesulu malakukutura Peternya nyangu. Ka Peterlu kulini Mayatjalu panya wangkanytja alatji, "Tjulpu wangkanytja kuwaripangkatjun nyuntu mankurara ngurparingkuku."

62 Ka Peternya urilkutu ankula pulkara alatjitu tjituru-tjitururira ulangi.

63 Ka wali panya unngu wati timpula atunymankupai tjutangku Jesunya witera kanyiningi munuya palunya anara wangkara pulkara pungangi,

64 munuya ngalya-ngalyparingkula palunya kuru patinu raikingka karpira munuya palunya pungkula ngunti tjapiningi wangkara, "Tjukururungku wangka, nganalunta panyatja pungu? Panya nyuntu kunyun wangkatjarangku nintingku kulilpai."

65 Munuya palunya rawangku kurara pungangi kura tjuta wangkara.

*Jewku Mayatja Tjutangku Jesunya Tjapira Ngurintja
(Matthew-ku 26:59-66; Markaku 14:55-64; Johnku 18:19-24)*

66 Ka tjintu pakannyangka wati tjukurtjara kuranyitja tjuta munu Moseku tjukurpa nintilpai tjuta kulu mitingiku tjunguringu, kaya timpula atunymankupai tjutangku Jesunya katira tjanala kuranyu ngaratjunu.

67 Kaya palula tjapiningi, "Nyuntu mulapa Christanya Wankarunkupainya panya Godalu kalkuntjanya? Wanyulanya tjakultjura."

Ka Jesulu tjanala wangkangu, "Tjinguru ngayulu nyurala tjakultjungkuku ka nyura ngayuku mulamularingkunyitja wiyangku wantiku.

68 Munu ngayulu nyurala tjapinnyangka nyura ngapartji wangkawiyangku wantiku.

69 Palu kuwaringuru ngayulu Watiku Katjanya Godala witulya pulkangka itingka mayatja pulka nyinaku."

70 Kaya piruku uwankarangku tjungungku Jesula tjapinu, "Palu wanyu nyuntu mulapa Godaku katja?"

Ka Jesulu tjanala wangkangu, "Tjukururungku pala nyura wangkangu."

71 Kaya wangkangu, "Ala palatja! Wanyula wanti kutjupa tjuta altinytja wiyangku pitjala palunya wangkara kuranmankunyitjaku.

Panya kuwari nyangala nganana alatjijulta kulinu palurunku walytjangku Godaku katjanmankunyangka.* Utila iluntankunytjaku katima."

23

Mayatja Pilate-alu Jesunya Tjapintja

(*Matthew-ku 27:1-2,11-14; Markaku 15:1-5; Johnku 18:28-38*)

¹ Munuya palulanguru paluru tjana uwankarangku pakara Jesunya ma-katingu Pilate-alakutu.

² Munuya palunya Pilate-ala mirangka kuranmankula wangkangi nyanga alatji, "Ngaranana nyangu wati nyanga palunya anangu tjuta kurara katinyangka. Panya paluru tjananya wituwituningi nyuntunya munu nyuntumpa mayatja nyara Rome-ala nyinanytjanya wantinytjaku. Munu paluru alatji wangkangi, 'Uti nganana Rome-aku mayatja mani unkuwiyangku wantima paluru ngatjinnyangka.' Mununku nyangangku walytjangku wangkangi paluru kunyu Christanya Wankarunkupainya Godalanguru nganampa mayatja pulka."*

³ Ka Pilate-alu tjapinu Jesunya, "Nyuntu wanyu mulapa Jew tjutaku mayatja pulka?"

Ka Jesulu wangkangu, "Uwa, pala wangkanyin."

⁴ Ka Pilate-alu wangkangu wati panya tjukurtjara kuranyitja tjutangka munu anangu tjutangka kulu, "Ngayulu wati nyanga palunya putu kura ngurkantananyi pungkunytjikitjangku."

⁵ Kaya pirukutu wangkangi, "Palu wati nyanga paluru anangu tjuta rawangku wangkara kuraning munu paluru para-wangkarinangi ngura tjutangka Judeala munu ngura uwankarangka. Paluru ngura nyara Galileela rawangku para-ngarala wangkangi munu kuwari nyanga ngura nyangangka ngapartjilta kurani."

⁶ Ka Pilate-alu kulinu tjana alatji wangkanyangka munu tjapinu, "Wati nyanga paluru wanyu mulapa Galileenya ngurara?"

⁷ Kaya uwanmanu. Ka paluru kuliningi, "Utina palunya Iratalakutu iyanma ngura Galileeku mayatjakutu panya paluru kuwari nyanga nyinanyi Jerusalemala." Munu paluru mulapa tu ma-iyana Jesunya Iratalakutu.

⁸ Ka Iratalu Jesunya nyakula pulkara pukularingu, panya paluru Jesunya kutjupangku tjakultjunkunyangka kutju kulilpai nyakunytja wiyangku munu rawa mukuringangi palunya nyakunytjikitja. Munu paluru mukuringangi Jesulu palula mirangka kutjupa kutjupa witulya pulkangku palyannyangka nyakunytjikitja.

⁹ Munu Iratalu Jesunya rawangku tjapiningi tjukurpa kutjupa kutjupa tjuta, palu Jesunya wangka wiya alatjitu ngarangi.

¹⁰ Kaya wati tjukurtjara kuranyitja tjuta munu wati Moseku tjukurpa nintilpai tjuta tjungu ngaranytjatjanu pulkara mirpanaringi munuya Jesunya puntura wangkara kuranmanangi.

* **22:71** Moseku tjukurtu pulkara pailpai anangungku walytjangku Godanyanmankunytja wiyangku wantinytjaku. Nyawa Exodus 20:2-7. * **23:2** Alatji tjana wangkangi Pilate-ala panya tjana ninti palumpa mayatjaku ini Tjiitjaku. Nyara paluru mukuringangi anangu uwankarangku palunya kutju pulkara walkuntjaku mayatja pulka Godanya purunypa. Munu kunyu paluru pulkara nyararingkupai anangu tjutangku mayatja kutjupa walkunnyangka.

11 Ka Iratalu munu palumpa tjaultji tjuṭangku kulu Jesunya anara wangkangi munuya mayatja pulkaku tiritja purunytja wara pulkangka tjarpatjunktala malakungku palunya iyanu Pilate-alakutu.

12 Palu panya nganmanypa Pilate-anya pula Iratanya pikaringkupai, palu tjiṅtu nyara palula ara pula kalyparingu munu pula malparingu.

Pilate-alu Palyanmankunytja Jesunya Punu Katakutjarangka Utitjunktunytjaku

(*Matthew-ku 27:15-26; Markaku 15:6-15; Johnku 18:39—19:16*)

13 Ka Pilate-alu alingu anangu panya tjuṭa tjunguringkunytjaku wati panya tjukurtjara kuranyitja tjuṭangka munu Jewku mayatja kutjupa tjuṭangka kulu.

14 Munu paluru wangkangu tjanala, “Panya wati nyanga palunya nyura ngalya-katingu ngayulakutu munu nyura wangkangu alatji, ‘Wati nyanga paluru anangu tjuṭa wituwituningi nyuntunya munu nyuntumpa mayatja Rome-ala nyara nyinanytja wantinytjaku.’ Palu ngayulu panya palunya tjapinu kuwari nyanga nyurala mirangka, mununa palumpa kura puṭu ngurkantananyi nyura panya wangkanytjitjanga.

15 Ka Iratalu kulu palunya puṭu kura ngurkantara malakungku iyanu ngayulakutu. Nyawa, paluru kura kutjupa kutjupa palyantja wiyatu kala nyaaku palunya iluntankuku.

16 Palu palyana tjaultji tjuṭangka wangkanyi palunya wiipangka pulkara alkantjaku mununa palulangurumpa malalta wantir'iyalku. Palya?”

17-18 Palu anangu uwankarangkuya mirara wangkangi, “Wiya, wati nyanga palunya iluntara munu Parapatjanya walatjura.”*

19 (Wati nyanga paluru kunyu nganmanytju wati kutjupa tjuṭangka tjunguringkula kamantaku pikaringangi Rome-aku tjaultji tjuṭaku munu panya wati kutju iluntanu, kaya palunya witiṛa tjailangka tjarpatjunu.)

20 Ka Pilate-anya mukuringangi Jesunya walatjunktunytjikitja munu piruku tjanala tjapiningi.

21 Kaya anangu tjuṭangku rawangku mirara wangkangi, “Wiya, punu katakutjarangka wakara utitjura! Punu katakutjarangka wakara utitjura!”

22 Ka Pilate-alu tjanala piruku tjapinu, “Palu nyaanguru? Kura nyaa wanyu paluru palyanu? Palunyaṅa kura puṭu ngurkantananyi iluntankunytjikitjangku. Palyantina tjaultji tjuṭangka wangkaku palunya wiipangka alkaṛa wantir'iyantjaku.”

23-24 Palu pulkaraya mirara palunya wituwituningi Jesunya punu katakutjarangka wakara utitjunktunytjaku. Ka Pilate-alu puṭu wangkara palyanmanu paluru tjana mukuringkunytja.

25 Panya tjana mukuringangi Parapatjanya walatjunktunytjaku. Ka wati panya miriputju palunya Pilate-alu wanganarangku tjailanguru walatjunu, munu Jesunya wakara utitjunktunytjaku palyanmanu anangu tjuṭa mukuringkunyangka.

* 23:17-18 Wati kutjupangku kunyu verse 17 walkatjunu munu mala tjungunu Luke-aku tjukurta alatji *Tjaka kunyu inma nyanga Katuwanu Ankunytjala Pilate-alu wati kutju tjailanguru walatjunktunytjaku ngarangi.*

Jesunya Punu Katakutjarangka Utitjungkunyta

(Matthew-ku 27:31-44; Markaku 15:21-32; Johnku 19:17-27)

²⁶ Ka tjaultji tjuṅṅku Jesunya witira katingu. Ka nyara palula arangka wati kutjupa ini Simonnga kuwari kutju ngalya-tjarpangi walikutu ilytjinguru. Wati paluru ngura ini Tjairininya ngurara. Kaya tjaultji tjuṅṅku wati nyanga palunya witiṅṅ munuya punu katakutjara palula piningka tjunkula wangkangu tjalira katira Jesunya malawanungku wanantjaku.

²⁷ Kaya anangu tjuṅṅ mulatu palunya wananingi minyma tjuṅṅku kulu munuya pulkara tjituru-tjitururira ulangi.

²⁸ Palu Jesulu malakukutura nyangu munu wangkangu, "Minyma Jerusalemnya ngurara, wantima ngayuku ulawiyangku munuyanku nyura walytja ulama munu nyurampa tjitji tjuṅṅku kulu.

²⁹ Panya ngula nyurampa tjituru-tjituru pulka mulapa ngaraku.* Ka nyara palula arangka nyura tjituru-tjitururira pulkara ulaku munuya alatji wangkaku, 'Pukulpayanku nyinanyi tjitji wiyatjara tjuṅṅ munuyanku pukulpa nyinanyi iti ampura kanyilwiya.'

³⁰ Munu nyara palula arangka nyura wangkaku apu murpu pulka tjuṅṅka, 'Punkala ngananala katu munulanya puruntara.' Munu nyura piruku apu tjukutjuku tjuṅṅka kulu alatji wangkaku, 'Punkaralanya tjutula.'

³¹ Panya nyanga kuwarinnya ngayunya tjukaruru nyinanyangka iluntananyi. Palu nyura ngayunya purunypa palya mulapa wiya, kaya nyuranya wanyu wantiku? Wiya, ngula tjituru-tjituru pulka mulapa nyurala utiringkuku waintara mulapa. Ka nyura uti walytja ulama, ngayuku wiya." Alatji Jesulu minyma tjuṅṅka wangkangu.

³² Kaya nyara palula ara tjaultji tjuṅṅku wati kutjara kutjupa kulu Jesula tjungu katingu iluntankunytjikitjangku, panya kura kutjara.

³³ Munuya ngura ini Kata Tarkala wirkara Jesunya punu katakutjarangka wakara utitjunu munuya wati panya kura kutjara kulu punu kutjupa kutjarangka wakara utitjunu palula tjungu, kutju kampa wakungka munu kutju kampa tjampungka.

³⁴ Ka Jesulu tjaultji tjuṅṅ walunyakula kulinu munu palumpa Mamangka wangkangu, "Mama, nyanga tjanampa ngalturingkula tjananya kalypangku wantima, panya tjana ninti wiya mununya ngurpangku nyanga alatjingani."

Kaya tjaultji tjuṅṅ palumpa mantaraku punu nampatjara katu wanira inkangi kutjungku kutjungku winamilara mantjintjikitjangku.

³⁵ Kaya anangu tjuṅṅku ngarala nyangangi Jesunya, kaya Jewku mayatja tjuṅṅku palumpa ikaringkula anara wangkangu, "Nyara paluru panya kutjupa tjuṅṅ ilunyangka wankaṅṅ. Nyangamala wanyu kanku palurunku wankala, panya paluru kunyu Christanya Wankarunkupainya Godalu ngurkantankunytja."

³⁶ Kaya tjaultji tjuṅṅku kulu palunya anara ikaringangi munuya wama kurakura tjaa patja-patjalpai mantjira katura palula nintira wangkangu, "Nyuntu wama nyangatja tjikintjikitja mukuringanyi?"

* **23:29** Nyangatja Jesulu nganmanytju wangkangi ka ngula panya Jesunya ilkarikutu malaku ankunyangka malangka yiya tjuṅṅ nampa 50 ngarangi, ka nyara palulanguru warmala Rome-anya ngurara tjuṅṅ mulapa Judealakutu pitjangu munuya Israelkunu tjuṅṅ pulkara pikaringkula tjananya pungkula wiaṅṅṅ alatjitu munuya wali tjuṅṅ kulukulu minya-minyanu.

37 Munuya palulanguru piruku wangkangi, "Nyuntu Jew tjutaku mayatja pulka nyinarampa nyuntunku walytjangku wankala!"

38 Ka walkatjara utitjunktunya palula katangka katu ngarangi alatji, *Nyangatja Jew Tjutaku Mayatja Pulka.*

39 Ka panya palula itingka wakara utitjunktunya kutjungku palu purunypatu Jesunya anara wangkangi alatji, "Nyuntu panyan Christanya Wankarunkupainya? Utinkun walytjangku wankanma ngalina kulu."

40 Palu wati kutjupangku punu katakutjara kutjupanguru palunya painu munu wangkangu, "Wantima! Nyuntu uti Godaku nguluringama panya nyuntunya nganannya wakara utitjunu ilunytjaku.

41 Ngalinyya kura palyannyangka utitjunu, palu wati nyangangu kura palyantja wiya alatjitu, kaya ngunti palunya iluntananyi."

42 Munu wati panya paluru wangkangu Jesula, "Jesu, ngula ngura ilkaritjangka ngayunya mayatja pulkangku ngaltunytjungku kulinma."

43 Ka Jesulu palula wangkangu, "Wiya, kuwari nyanga alatjitu nyuntu ngayula tjunguringkula nyinaku ngura nyara wirungka."

Jesunya Ilunytja

(Matthew-ku 27:45-56; Markaku 15:33-41; Johnku 19:28-30)

44-45 Ka palulanguru tjintu panya katuringkula katu ngaranyangka ngura uwankarangka maruringu munu munga purunypa ngarala mungartji-mungartji kutju tjintungku piruku irnyanangi. Ka maru ngaranyangka mantara panya timpula unngu waraly-waralyngaranytjanya tjilpirarara kutjararingu.*

46 Ka Jesulu pulkara mirara wangkangu, "Mama, kurunpani mantjila." Munu nyanga alatji wangkara ngaalypa wiyaringkula ilungu.

47 Ka wati tjaultji tjutaku mayatjangku nyanga alatjirinyangka nyakula Godanya walkunu munu wangkangu, "Wati nyanga paluru palya mulpa kura palyantja wiya alatjitu."

48 Ka anangu panya tjuta mulpa nyara palula nganmanypa tjunguringu Jesunya ilunyangka nyakunytjikitja. Munuya uwankarangku ilunyangka nyakula ulatjarangku tjananku pilpirpa punga-pungangi tjituru-tjituru pulkangku, munuya palula malangka ngurakutu anu.*

49 Palu palumpa panya malpa tjutangku nyara palulatu ngarala nyangangi patunguru, munu minyma tjutangku kulu panya palula tjunguya pitjangu Galileelanguru.

Jesunya Puntu Kulpingka Ngaritjunktunya

(Matthew-ku 27:57-61; Markaku 15:42-47; Johnku 19:38-42)

50-51 Ka wati kutjupa nyara palula ngarangi wati ini Josephanya ngura Arima-tjiyanya ngurara. (Arima-tjiyanya panya tarwunu tjukutjuku Jerusalemala itingka.) Wati nyanga paluru wirura nyinapai tjukaruru mulpa. Munu paluru rawa pataningi Godalu anangu tjuta walytjanmara mayatjangku kanyintjaku. Paluru panya wati kantjula nyinangi munu Jewku kantjula kutjupa tjutangka mitingiku

* **23:44-45** Mantara nyanga paluru panya timpulangka waraly-waralyngarala anga-kanyiningi ngura ruuma milmilpa mulpa, kaya ngura pala palula anangu tjuta tjarpapai wiya. Nyawa lipuru Tjutaku Lita chapter 9. * **23:48** Tjakangkuyanku tjituru-tjituru pulkaringkula pilpirpa pungku-pungkupai.

tjunguringkupai. Palu paluru tjanala tjungungku palyanmankunytja wiyatu tjana Jesunya iluntankunytjikitjangku wangkanyangka.

⁵² Munu wati panya paluru anu Pilate-alakutu munu palula ngatjiniu Jesunya puntu mantjintjikitjangku.

⁵³ Munu palyanmankunyangka paluru ankula Jesunya puntu pununguru mantjira ukalilyinu, munu karpinu mantara piranta munu kulpi kuwari nyarkara wantinytjitjangka palunya katira tjunutjunu, panya anangu kutjupaya nyara palula nganmanytju tjunkunytja wiyatu.

⁵⁴ Ka tjintu nyanga paluru panya Friday Jesunya ilunytja-ara. Ka panya tjirirpi ma-tjarpanyangka Saturday-ringu tjintu panya pakuwiyaringkunytjaku.

⁵⁵ Kaya minyma panya Galileelanguru Jesula tjungu pitjanytja tjuatjangu Josephanya wanaru Jesunya puntu kulpikutu katinyangka. Munuya kulpingka wirkara nyangangi Jesunya puntu ngaritjunkunyangka kulpi unngu.

⁵⁶ Munuya nyakula wiyaringkula malaku anu ngurakutu panu wiru nyitilpai nganmanytju mantjira riti palyara tjunkunytjikitja.* Munuya tjintu tjarpanyangka nyinara pakuwiyaringangi tjintu panya Saturday wirkankunyangka, panya Moseku tjukurku alatji pakuwiyaringkunytjaku wangkapai.

24

Jesunya Ilunytjatjanu Wankaringkula Pakantja

(*Matthew-ku 28:1-10; Markaku 16:1-8; Johnku 20:1-10*)

¹ Ka Sunday mungawinki mulapa minyma panya tjuata pakara kulpikutu anu nyitilpai wiru tjuatjara.

² Munuya ma-wirkara nyangu apu panya pulka kulpi tjaanguru untura-wanara waninytja.

³ Munuya unngu tjarpara Jesunya putu nyangu.

⁴ Munuya ngarala putu kulinigi, "Yaaltjiringu?" Ka mapalku wati kutjara tjanala utiringu mantara piranpatjara munu wanagara purunypa irnyaningi.

⁵ Kaya pulkara nguluringkula pupakatira yunpangku pampuningi manta. Ka tjanala wangkangu, "Nyaaku nyura anangu wanka ngurini nyanga miriku ngurangka?"

⁶ Nyura ninti panya paluru nyurala nganmanytju wangkangu Galileela panya nyinaralpi.

⁷ Alatji paluru wangkangu, 'Mirpanjtju tjuatjangu Watiku Katjanya ungkuku wati kura tjuata, kaya palunya punu katakutjarangka wakara utitjungkuku. Ka paluru ilunytjatjanu tjintu kutjara wiyaringkunyangka piruku wankaringkula pakalku.' Alatji panya palurunku wangkangi nyurala."

⁸ Kaya minyma panya tjuatjangu mulapa tu kulinu paluru panya nganmanytju wangkanytjitja munuya anu ngurakutu.

⁹ Munuya ngurangka wirkara nintintja panya 11-ta munu kutjupa tjuatjangu kulu tjakultjunu uwankara panya tjanala angeltu wangkanyangka kulintjatjanungku.

* **23:56** Wiru panipai tjuata miritjina purunypa miringka nyitilpai unaringkunytjaku-tawara.

10 Minyma paluru tjana panya ini nyanganpa, Mary Magdalene-anya, Tjawananya, munu Mary-nya Jamesaku ngunytju munu minyma kutjupa tjuṭa kulu.

11 Uwa, minyma nyanga paluru tjanaya iyantja panya tjuṭangka tjakultjunu, kaya puṭu mulamularingangi tjana ngunti wangkanyangka-palku. Munuya tjananya kuliningi kawakawaringkunyangka-palku.

12 Palu Peternya pakara wirtjapakanu kulpikutu, munu paluru kulpingka wirkara nyirkira nyangu mantara kutju ngarinyangka Jesunya panya karpintjitja. Munu paluru puṭu nyakula ngurakutu ankula iwarangka kulirinangi, "Nyaaku nyangatja alatjiringu?"

*Nintintja Kutjara Ngura Imayatjalakutu Ankunytja
(Markaku 16:12-13)*

13 Ka tjiṅtu pala palula Jesunya wanalpai kutjara Jerusalemalanguru pakara anu ngura ini Imayatjalakutu, panya ngura nyara paluru tjukutjuku paṭu nguwanpa ngarangi, tinanguru ankula mungartji tjarpantjaku.

14 Ka wati panya paluru pula iwarangka ankula wangkarinangi pula uwankara utiringkunyangka nyakunytjatjanungku.

15 Ka pula wangkakatinyangka Jesunya pulala wanara tjunguringu munu pulala tjungu anangi.

16 Palu pula wati kutjupa-palku kuliningi, panya Godalu pulanya kuru kampa kutjupanu puṭu palunya ngurkantankunytjaku.

17 Ka Jesulu pulala tjapinu, "Nya nyupali wangkarinanyi?"

Ka paluru pula tjapinnyangka ngarakatingu yunpa tjituru-tjitururira.

18 Ka wati kutjungku ini panya Kuliya-patjalu wangkangu, "Palu nyuntu kutjun ngurpa nyinanyi? Ngura panya Jerusalemalan wanyu kuwari panya nyakunytja wiyatu?"

19 Ka Jesulu pulala tjapinu, "Nya nyupali wangkanyi?"

Ka pula wangkangu, "Panya Jesunya Nazarethanya ngurawali wangkanyi wati panya wangkatjara Godalanguru pitjanytja. Panya anangu uwankarangku kulilpai paluru kutjungku tjukurpa wiru mulapa wangkanyangka munuya nyakupai kutjupa kutjupa tjuṭa kulu witulya pulkangku palyannyangka.

20 Ka panyaya nganampa nyanga mayatja tjuṭangku wati tjukurtjara kuranyitja tjuṭangku kulu Jesunya iluntankunytjaku wangkangu munuya palunya ma-ungu punu katakutjarangka wakara utitjunktunytjaku.

21 Palu nganana paṭaningi Jesulu nganananya Israelkunu tjuṭa ngalkintjaku. Palu kuwari nyanga wiyaringulta, panya palunyaya iluntanu, ka nyangatja tjiṅtu mankuraringu.

22 "Palu minyma tjuṭangku nganana walu wiru tjakultjunu panya paluru tjana mungawinki mulapa kulpikutu ankunytjatjanungku.

23 Munuya kunyu miri panya ngarinytjitja puṭu nyangu munuya pitjala nganana tjakultjunu alatji panya tjana kunyu angelpa mankurpa nyangu, kaya kunyu tjanala tjakultjunu alatji, 'Jesunya wankaringkula pakanu.'

24 Kaya kutjupa tjuṭa ngananalanguru ngapartji anu kulṭipikutu munuya palu purunypaṭu putu nyangu panya minyma tjuṭangku wangkanytja purunypa." Alatji pula wangkangu.

25 Ka palulanguru Jesulu pulala wangkangu, "Nyupali ngurpa munu nyupali putu mulamularinganyi uwankara panya nganmanytju wangkatjara tjuṭangku wangkanytjitjaku.

26 Panya tjukurpa iriti nyiringka walkatjunkunytja ngaranyi, panya Godalu Christanya Wankarunkupainya pikatjararingkula ilunytjaku iyalku, ka nyara palulanguru kutju paluru ilunytjatjanu wankaringkula pakalku Godala tjunguringkula mayatja pulka mulapa titutjara nyinanytjikitja. Alatjiya wangkatjara tjuṭangku iriti walkatjunu."

27 Munu palulanguru Jesulu pulala utira wangkangu uwankara panya iriti wangkatjara tjuṭangku tjukurpa palunyatjara walkatjunkunytja, panya Moselu tjana wangkatjara maḷatja maḷatja tjuṭangku kulukulu.

28 Munuya ilaringu ngura panya Imayatjalakutu, ka Jesunya nguwanpa ma-waintaringu.

29 Ka pula palunya markunu wankara, "Wanyu ngalila nyina. Mungartjiringu nyangatja ka tjuṭu watalpi tjarpanyi." Ka paluru mulapaṭu wantira nyinangu munu pulala tjungu tjarpangu walangka nyinanytjikitja.

30 Munu Jesunya pulala maiku tjunguringu taipulangka munu mai mantjira Godala wangkangu, "Wirungkulanyan mai nyangatja ungu." Munu palulanguru pulanya mai katantara ungu.

31 Ka Godalu pulanya kuru alanu ka pula nyakula ngula kutju kulira ngurkantanu, "Mulapa nyangatja Jesunya alatjitu." Palu pula ngurkantankunyangka Jesunya mapalku arkayiringu. 32 Ka pulanku wangkangu, "Panya Jesulu ngalila iwarangka pitjala wangkanyangka ngali kurunpa unytjunaringu, panya paluru mulapa ngalila Godaku tjukurpa tjuṭa utira wangkangi."

33 Munu pula mapalku pakara maḷaku anu Jerusalemalakutu munu pula ma-wirkara nyangu Jesuku panya nintintja 11 munu anangu panya kutjupa tjuṭa kulu tjunguringkula nyinanyangka.

34 Kaya tjana wangkangi, "Mulapa Jesunya ilunytjatjanu wankaringkula pakanu. Paluru utiringu Simonta."

35 Ka wati panya kutjarangku ngapartji pitjala tjanala tjakultjunu Jesunya pulala pulala iwarangka utiringkunytja munu paluru pulanya mai nyuma katantara ungunytja. Munu pula palunya mala kutju ngurkantankunytjatjanungku tjakultjunangi tjanala.

Jesunya Nintintja Tjuṭangka Utiringkunytja

(Matthew-ku 28:16-20; Markaku 16:14-18; Johnku 20:19-23; Acts 1:6-

8)

36 Ka paluru pula kuwaripangku ngarala tjakultjunkunyangka Jesunya tjanala ngurur-ngururpa utiringu munu tjanala wangkangu, "Pukularimaya!"

37 Palu tjana urulyarara pulkara nguluringu munuya ngunti kulinu kurun-kurunpa-palku.

38 Ka Jesulu tjanala wangkangu, "Nyaaku nyura urulyarani? Nyaaku nyura putu mulamularinganyi?"

39 Nyawaniya mara munu tjina kulu, panya ngayulu alatjituna. Pampulaniya munuya mulamulariwa. Ngayulu panya. Nyanga anangu alatjituna ngaranyi, panya kurun-kurunpa puntu nyanga ngayulu purunpa wiya."

40 Munu wangkanytjatjanungku tjanala nintinu palumpa mara munu tjina kulu.

41 Kaya palumpa panya nintintja tjuta pulkara alatjitu urulyaranu munuya pukularingu kulira, "Munta mulapampal nyangatja wankaringkula ngaranyi?"

Ka Jesulu tjanala tjapinu, "Kuka nyura kanyini?"

42 Kaya palunya kuka antipina warutja ungu.

43 Ka paluru tjanala mirangka antipina panya mantjira ngalkuningi.

44 Munu tjanala wangkangu, "Panyatja nyura kulini, panya ngayulu nganmanytju nyurala nyinara wangkanytja? Panya Moselu tjana wangkatjara kutjupa tjutangu tjukurpa ngayunyatjara walkatjunu, munu Psalm tjutangka kulu Davidalu tjana ngayunyatjara walkatjunu. Ka panya nyurala nganmanytju wangkangu tjukurpa nyanga paluru tjana uwankara ngula utiringkuku."

45 Munu palulanguru Jesulu nyiringuru tjanala wangkara utiningi tjana tjukurpa tjakarurungku kulintjaku.

46 Munu paluru tjanala wangkangu alatji, "Ngayulu panya Christanya Wankarunkupainya, ka panya nyiringka iriti walkatjunu tjukurpa ngayunyatjara alatji, 'Ngula Godalu Wankarunkupainya iyalku ka paluru pikatjararingkula ilunytjatjanu tjintu mankurarira wankaringkula pakalku.

47 Kaya palunya wanalpai tjutangu anangu tjutangka tjakultjunkuku ngayunyatjara tjana kuranguru piiwiyaringkula kampa kutjuparinytjaku, ka Godanya tjanampa kalyparingkuku munu tjananya kura palyantjitjanguru kalypangu pungguwiyangu wantiku. Paluru tjana tjukurpa nyangatja Jerusalemalarara wangkaku munuya palulanguru ngura winkikutu ankula tjakultjunkuku.'

"Uwa alatji nyiringka iriti walkatjunkunytja ngaranyi.

48 Ka nyura panya nyangu ngayulu ilunyangka munu ilunytjatjanu wankaringkula pakannyangka kulu. Kana nyara palulanguru nyuranya iyani anangu tjutangka ankula tjakultjunkunytjaku uwankara nyura nyakunytjatjanungku.

49 Palu kulilaya munuya ngura nyanga Jerusalemala nyinara patanma Godalu nyuranya ilkarunguru witulyankunytjaku. Panya ngayuku Mamangu nyurampa iriti kalkunu, kana kuwari kalkuntjitja panya palunya nyuralakutu iyalku."

Jesunya Ilkarikutu Katinytja

(Markaku 16:19-20; Acts 1:9-11)

50 Munu palulanguru Jesulu palumpa nintintja tjuta ma-katingu Piitjanilakutu, munu ngura nyara palula itingka wirkara ngarangu, munu mara katura tjananya wangkara pukulmanu.

51 Ka paluru wangkara pukulmankunyangka Godalu palunya katura katingu ilkarikutu. 52 Kaya palunya pukultu walkuningi munuya wiyaringkula malaku anu Jerusalemalakutu pukulpa mulapa.

⁵³ Munuya palulanguru tjiⁿtu kutjupa tjiⁿtu kutjupa timpulangka tjarpara Godanya rawangku mirawanira walkuningi.

Tjukurpa Palya Johntu Walkatjunkunytja John Nyangatja Nganmanytju Nyakula Wangkanytjaku

Nyangatja Godaku tjukurpa wati ini Johntu walkatjunkunytja Jesunyatjara. Johnnga panya wati kutjupa John Baptistanya wiya. Paluru wati antipina witiipai nyinangi, ka Jesulu palunya nyakula ngurkantanu palumpa nintintja nyinanytjaku palumpa kutangka tjungu wati panya Jamesala. Ka panya ngula Jesunya ilkarikutu ankunyangka malangka wati nyanga Johntu Jesuku panya ngunytju atunymara kanyiningi.

Uwa, ka nyiri nyanga palula Johntu kutjupa kutjupa tjuta Jesunyatjara walkatjunu, panya paluru Godaku katja, munu panya *Tjukurpa*, panya palulawanungku Godalu uwankara palunu. Munu paluru walkatjunu Jesulu witulya pulkangku palyantja tjuta kulu, panya anangu tjutangka palunya nyakula pulka kulintjaku munu palulanguru palumpa nintiringkunytjaku, panya paluru Godaku katja. (Nyawa chapters 2, 4, 5, 6, 9 munu 11). Nyanga alatji paluru walkatjunu nganana kulira Jesuku mulamularingkula wankaringkunytjaku munu wanka titutjara nyinanytjaku.

Munu Johntu tjukurpa tjuta tjakultjunu Jesulu palurunku walytjangku wangkanytja alatji,

- "Ngayuluna mai kurunpa wankalpainya, ka anangu ngayulakutu pitjalampa pukulpa mulapa nyinaku." (6:35)
- "Ngayuluna tili anangu tjutaku, ka kutjupangku ngayula tjungu ngaralampa tili wankarunkupainya mantjilku." (8:12)
- "Ngayuluna kaita panya tjiipi tjutaku, ka kutjupa ngayulawanu tjarparampa wankaringkuku." (10:9)
- "Ngayuluna tjapata palyanya, mununa tjiipi tjutaku ngalkilpa ilunytjikitja mukuringanyi." (10:11)
- "Ngayuluna ilunyangka wankara pakaltjingalpainya, ka anangu ngayuku mulamularingkulampa ilunytjatjanu wankaringkula wanka mulapa nyinaku." (11:25)
- "Ngayuluna iwaranya, panya nyura ngayulawanungku kutju uwankara tjukarurungku kulilku munu nyura ngayula kutju kulira wankaru Godala wirkankuku." (14:6)
- "Ngayuluna punu panya kiripitji purunypa, ka ngayuku Mama wati panya punu kiripitji kanyilpai purunypa." (15:1)

Alatji Jesulu palurunku walytjangku wangkangi.

Tjukurpa nyanganpa ngarinyi:

1:1-18 Tjukurpa Godanyatjara

1:19—12:50 Jesulu anangu tjutangka tjukurpa tjuta wankara nintintja munu pikatjara tjuta palyarunguntja

13:1—16:33 Jesulu palumpa nintintja tjutangka wankara nintintja

17:1-26 Jesulu Godala tjapintja

18:1—19:42 Jesunya witintja munu punu katakutjarangka wakara utitjunkunytja

20:1—21:14 Jesunya ilunytjatjanu wankaringkula pakantja munu palumpa nintintja tjuṭangka utiringkunyṭja
21:15-25 Jesulu Peterla wangkanyṭja

Jesunya Tjukurnga Munu Godanya Nganaṇala Nintini

¹ Kuwaripatjara mulapa uwankara wiyangka Godanya nyinangi, ka palupa tjuṅgu kutjupa nyinangi ini Tjukurnga. Panya paluru Godanya alatjitu.

² Nyara paluru manta kuwaripangka nyinangi Godala tjuṅgu.

³ Munu pula tjuṅgungku uwankara palunu. Mamalu kutjuṅgu paluntja wiya, tjuṅgungku alatjitu pula kutjupa kutjupa uwankara palunu.

⁴ Kaya Tjukurnguru kutju anangu tjuṭa wanka nyinanyi, panya paluru wanka alatjitu munu paluru uwankara wanka kanyini. Panya Tjukurtu tili wirkakatingu anangu tjuṭa irnyantjaku tjana nyakula tjukarurungku kulintjaku Godanya.

⁵ Tili nyara paluru mungawaluru irnyara wiyalpai alatjitu, ka mungawalurungku tili nyara palunya puṭu wiyani. Tili paluru ngaranyi alatjitu wiyaringkunyṭja wiya.

⁶ Palu Godalu wati kutju iyaṇu ini Johnnga.*

⁷ Ka paluru pitjangu tili nyanga palunya tjakultjungkunyṭjikitja anangu winkungku kulira mulamularingkunyṭjaku.

⁸ Wati nyara paluru tili wiya palu paluru tili palunya nganmanyṭju tjakultjungkunyṭjikitja pitjangu.

⁹ Tili nyara paluru tjukaruru mulapa anangu winki irnyalpai. Nyara paluru mantangka wirkara utiringu.

¹⁰ Mama Godalu Tjukurwanungku manta palunu. Ka Tjukurnga mantangka wirkara nyinangi, palu anangu tjuṭangku palunya puṭu ngurkantanangi.

¹¹ Paluru manta paluntjatjanu anangu walyṭja tjuṭakutu pitjangu, kaya walyṭja tjuṭangku palumpa pukularinyṭja wiyangu wantingi.

¹²⁻¹³ Palu anangu kutjupa tjaraya palumpa pukularingu munuya palumpa mulamularingu. Ka nyara palulangu paluru tjananya Godaku walytjaringkunyṭjaku palyaṇu. Paluru wangkanyangka tjana Mama Godaku katjaringu munu untalaringu palumpa tjukurwanu. Watinguru munu minymanguru wiya, palu panya Godanya mukuringkunyṭjanguru kutju.

¹⁴ Ka Tjukurnga mantakutu pitjala itiringkula ananguringu, munu nganaṇala tjuṅgu nyinangi ngaltunytju pukultju pulka, munu paluru nganaṇala Mama Godanya tjukarurungku alatjitu nintiningi. Kala nganaṇa nyangu palunya wiru mulapa witulya pulka alatjitu, panya Mama Godalu palunya alatjirinyṭjaku iyaṇu palumpa katja kutjukurutja.

¹⁵ Ka John Baptistalu palunya nyakula anangu tjuṭangka tjakultjunangi alatji katuwangku wangkara, "Nyanga palunya panyaṇa ngayulu nganmanyṭjulpi nyurala wangkangi alatji, 'Ngayula malangka kutjupa pitjanyi. Nyara paluru pulka mulapa ngayula waintarinyṭja. Paluru panya kuwaripatjara nyinanyṭja.' Alatji panyaṇa nyurala nganmanyṭju wangkangu."

* 1:6 Wati nyanga paluru panya John Baptistanya.

16 Ka Tjukurnga panya ngaltunyitju pukultju pulka munu paluru nganannya pukultjungku titutjarangku kanyini wantinytja wiyangku.

17 Godalu tjukurpa pulka ungu Mosenya anangu tjutaku, palu Jesulu Christalu pukultjungku tjukarurungku utinu mukulya pulka mulapalta.

18 Anangu kutjupangku Godanya yunpa nyakunytja wiya. Palu palumpa katja palula tjungu nyinapai munu paluru nganana utinu palumpa Mama, panya paluru Godanya alatjitu.

*Johnnga Wati Tjukurtjara Tjutangku Tjapintja
(Matthew-ku 3:1-12; Markaku 1:1-8; Luke-aku 3:15-17)*

19 Ka panya Johntu anangu tjuta baptise-katingi ngura ini Piitjanila uru panya ini Jordanta kakarara. Ka Jewku mayatja tjutangku Jerusalemalanguru witura iyanu wati tjukurtjara tjuta, munu wati timpulangka warkaripai tjuta kulu ankula Johnnga tjapintjaku alatji, "Nyuntu ngananya? Tjukarurungkulanya tjakultjura."*

20 Kanku Johntu ngapartji tjukarurungku tjanala wangkangu utingku, "Wiya, ngayuluna Christanya wiya. Ngayulu Wankarunkupai Godalu panya kalkuntjitjanya wiya."

21 Kaya piruku tjapinu, "Palu ngananyan wanyu, Ilaitjanyan?"
Ka wangkangu, "Wiyana."

Kaya tjapira wangkangu, "Palu Godaku wangkatjaran wanyu?"*
Ka wangkangu, "Wiyana."

22 Kaya piruku wangkangu, "Palu ngananyan wanyu? Tjakultjuralanya kala ankula tjanala wangka, panya nyara tjana nyuntunya kulintjikitja mukuringanyi. Nyaan wanyu nyuntunku wangkanyi?"

23 Ka Johntu wangkangu, "Ngayuluna panya paluru, panya Aitjayalu iriti walkatjunu nyanga alatji,

'Wangka kutju mirapai ilytjingka nyanga alatji,
'Iwaraya tjukarurula Mayatjanya pitjanytjaku.' '
Alatji Aitjayalu ngayunytjara iriti wangkangi."

24 Ka palulanguru Paratji tjutangku ngapartji Johnta tjapiningi, panya palunya tjananya kulu Jewku mayatja tjutangku Jerusalemalanguru witura iyanu Johnta tjapintjaku.

25 Munuya alatji palula tjapinu, "Kan nyaaku wanyu baptise-katinyi panya Wankarunkupainya Godalu kalkuntjitjanya wiyangkumpa, Ilaitjanya wiyangku, wangkatjara wiyangkumpa?"

26 Ka Johntu ngapartji tjanala wangkangu, "Ngayuluna minangka baptise-katipai, palu kutjupa nyurala ngurpatja ngaranya.

27 Wati paluru ngayula malangka pitjanyi. Panya paluru pulka mulapa ngayula waintara alatjitu. Kana yaaltji-yaaltjingku kurangku palumpa waraka palyalku? Wiya alatjitu panya paluru pulka mulapa." Nyanga alatji Johntu tjanala wangkangi wati Moseku tjukurtjara tjutangka.

* 1:19 Wati tjukurtjarangku timpulangka inma kanyilpai munu kuka pungkupai Godanya ungkunyitjikitjangku. Nyanga paluru panya *Priest*. Ka wati timpulangka warkaripai tjutangku tjukurtjara tjuta alpamilapai. Nyanga paluru tjana panya wati ini *Levikunu* tjuta, panya Levinya Jacobaku katja. * 1:21 Godaku Wangkatjarangku panya Godalu wangkanyangka kulira tjakultjunkturupai anangu tjutangka. Nyanga paluru panya *Prophet*.

²⁸ Nyanga alatjiringu Johntu baptise-katinyangka ngura ini Piitjanila uru panya ini Jordanta kakarara.

Johntu Godaku Lamalama Nintintja

²⁹ Ka tji^{nt}ungka Johntu Jesunya nyangu palulakutu ngalya-pitjanyangka, munu nyakula paluru anangu tjutangka wangkangu, "Ala, nyawaya! Nyangatja panya paluru Godaku panya lamalama, panya nyanga paluru anangu uwankaraku ngalkilpa iluku Godalu tjananya kura palyantjitjanguru kalypangku pungguwiyangku wantinytjaku.*

³⁰ Nyanga palunya panya^{na} nyurala nganmanytju tjakultjunangi alatji, 'Ngayula malangka wati kutjupa pitjanyi ngayula waintarinytja pulka mulapa, panya paluru nganmanypa ngayula wiyangka nyinanytja.'

³¹ Ngayuluna palumpa ngurpa nyinangi, palu nyanga palumpana nganmanytju pitjala nintiningi urungka baptise-katira paluru Israelkunu tjutangka utiringkuny^tjaku."

³² Munu piruku Johntu nyakuny^tjatjanungku tjakultjunu nyanga alatji, "Ngayulu nyangu Kurunnga ilkar^{ing}guru tjulpu kuukuuku purunypa ukalingkula palula nyinakatinyangka.

³³ Ngayuluna palumpa ngurpa nyinangi, palu panya Godaluni ngayunya anangu tjuta minangka baptise-katinytjaku iyani, mununi nyanga alatji wangkangu, 'Panya nyuntu nyakuku Kurunnga ukalingkula watingka nyinakatinyangka, nyara paluru anangu tjuta baptise-katiku Kurunpa Milmilta.'

³⁴ Kana ngayulu mulapa nyangu munu nyangana tjakultjunanyilta alatji, 'Nyanga paluru Godaku katja.' " Alatji Johntu tjanala wangkangu Jesunya.

Nintintja Mankurpa Jesula Tjunguringkuny^tja

³⁵ Ka tji^{nt}ungka piruku Johnnga nintintja kutjaratjara ngarangi ngura panya palulatu. ³⁶ Munu mungartji paluru Jesunya wati-pitjanyangka nyakula wangkangu alatji, "Ma-nyawa pula, Godaku lamalama pala wati-pitjanyi."

³⁷ Ka pula nintintja kutjarangku kulinu nyangatja wangkanyangka munu pula Jesunya wana^{na}.

³⁸ Ka Jesulu pinkurarara nyangu pula ngalya-wanannyangka munu pulala wangkangu, "Nyaaku nyupali ngayunya wanaⁿⁱ?"

Ka pula wangkangu, "Rabbi, nguranku yaaltji?" (Pula *Rabbi* wangkangi tjanampa wangkangu *Nintilpai*.)

³⁹ Ka pulala wangkangu, "Pitjala pula nyawa!"

Ka pula Jesula tjunguringkula anu munu pula ngura nyangu munuya nyara palulata nyinara mungaringu.

⁴⁰⁻⁴¹ Palulanguru pula anu, ka kutju ini Andrew-lu Simon Peterku malanytju mapalku ankula nyangu tjukarurungku palumpa kuta munu palula tjakultjunu alatji, "Nyanguna panya Messiah-nya Godalu panya Kalkuntjanya!" (*Messiah-nya* panya wangka Iipuru, ka wangka kutjupa Kuriki panya *Christanya* wangkanyi, panya *Wankarunkupainya Godalu panya Kalkuntjanya*.)

* 1:29 Nyangatja Johntu Jesunya Godaku lamalama wangkangi inma *Katuwanu Ankuny^tjanya* kulira. Nyawa Exodus 12:43.

42 Munu katingu palunya Jesulakutu. Ka Jesulu nyakula palunya wangkangu, “Nyuntu ini Simonnga wati Johnku katja. Palu ngayulunanta inilku Tjiipatjanya.” (Palu Kuriki tjuṭangku ini nyanga palunya wangkapai *Peternya* panya *walu*, panya kunpu wityula titutjara ngarapai.)

43 Tjirirpingka Jesulu kulinu alinytjara ankunytjikitjangku uru ini Galileelakutu. Munu paluru wati ini Philipanya ngurira nyakula wangkangu, “Ngayunyaṇi wana!”

44 (Philipanya panya tawunu ini Pitjaitala nyinapai uru Galileela itingka. Ka Andrew-nya pula *Peternya* kulu ngura pala palunya ngurara.)

45 Ka Philipalu ngurira nyangu wati panya ini Natjanyulnga munu wangkangu palula, “Nyangula wati panyatja, panya Moselu iriti nyiringka walkatjunu wangkatjara tjuṭangku kulu. Nyara paluru Jesunya panya Josephaku katja ngura panya Nazarethanya ngurara.”

46 Ka Natjanyultu nyangatja kulira puṭu mulamularingkula wangkangu, “Wiya Nazarethanya panya ngura kurakura, ka palunya ngurara kutju palya nyinanytja wiya?”

Ka Philipalu wangkangu, “Wiya, wanyu-puta pitjala nyawa ilangku.” Munu pula anu nyakunytjikitja.

47 Ka Jesulu nyangu pula pitjanyangka, munu ilaringkunyangka wangkangu, “Wati nyanga paluru Israelkunu palya mulapa, ngunti wangkapai wiya.”

48 Ka Natjanyultu palula wangkangu, “Yaaltji-yaaltjin ngayuku nintiringu?”

Ka Jesulu wangkangu, “Nyanguṇanta nganmanytju Philipalu nyuntunya alṭinytja kuwaripangka, puṇu panya ili wiltjangka nyinanyangka.”

49 Ka Natjanyultu wangkangu, “Nintilpai, mulapa nyuntu Godaku Katja, mayatja pulka Israelkunu tjuṭaku.”

50 Ka Jesulu palula wangkangu, “Mulapa panya palulangurun ngayuku mulamularingu? Panya nyuntu puṇu ili wiltjangka nyinanyangananta nyakula wangkangu, kan nyara palulanguru wanyu ngayuku mulamularinganyi? Palu wanyu kulila. Nyanga paluru pulka wiya, palu nyuntu ngula pulka mulapa nyakuku ngayulu palyannyangka. Nyara palulanguru nyuntu ngayuku pulkara mulamularingkuku.”

51 Munu piruku wangkangu tjanala, “Tjukururungkuṇa nyurala wangkanyi nyura nyakuku ilkarī alaringkunyangka munu Godaku angelpa tjuṭa ukalingkula tatinnyangka Watiku Katjangka.”

2

Jesulu Minanguru Waina Palyantja

¹ Ka palulanguru tjiṇtu kutjara wiyaringkunyangka anangu tjuṭa tjunguringu ngalkula pukularinytjikitja tawunu ini Kainala uru panya Galileela wilurara watingku kuri alṭinyangka. Ka nyara palula Jesuku ngunytju kulu tjunguringu tjanala.

² Munuya Jesunya alṭingu palumpa nintintja tjuṭa kulu, kaya pitjala tjanala tjunguringkula mai ngalkuningi.

³ Palu anangu tjutangku tjikinnyangka waina tjanampa wiyaringu. Ka Jesuku ngunytjungku palula pitjala wangkangu, “Waina tjanampa wiyaringu.”

⁴ Ka Jesulu wangkangu, “Wampa. Tjanampanti, nyuntumpa ngalimpa wiya. Panya ngayulu pulka utintjaku ngayuku riti wiya kuwaripa ngaranyi.”

⁵ Ka palulanguru palumpa ngunytjungku palula kulira mapitjala warkaripai tjutangka wangkangu, “Nyuranya Jesulu wangkanyangkaya wanganarangku kulira palyanma.”

⁶ Ka pala palula piti pulka mankur-mankurpa ngarangi minatja ulu tjuta. Piti nyanga palunya tjananyaya minatjara kanyilpai ara tjanampangka mara paltjintjikitjangku. Piti paluru tjana apunguru palyantja pulka mulapa mina pulka kanyilpai 100 litres.

⁷ Ka Jesulu tjanala wangkangu warkaripai tjutangka, “Minaya tjutira kati munuya tjaalyngaratjura piti pala ulu tjutangka.” Kaya mulapa tu tjaalyngaratjunu piti uwankarangka. ⁸ Ka Jesulu wangkangu, “Ala, tjutiraya ma-katira uwa nyurampa mayatja.” Kaya mulapa tu tjutira katira palunya ungu.

⁹ Ka paluru tjikira arkanu waina kuwaritja minanguru panya palyantja, palu wati paluru ngurpangku putu kuliningi yaaltjinguruya mantjinu. Palu wati warkaripai tjutangkuya nintinku kuliningi palyannyangka nyakunytjatjanungku. Ka arkantjatjanungku wati panya mayatjangku altingu wati panya kuwari kuri altinyjanya.

¹⁰ Munu wangkangu, “Ai, nyuntu waina wiru mulapa nyangatja kuwari unganyi, panya tjakangkuya waina wiru nganmanytju ungkupai munuya malangka pulkara tjikinnyangka kurakura ungkupai. Palu nyuntu kuwari waina wiru mulapalta malangka unganyi.”

¹¹ Miracle nyanga palunya wararangku Jesulu utintjikitjangku palyanu ngura ini Kainala uru Galileela wilurara. Palurunku witulya nintinu, kaya nintintja tjutangku nyakula palumpa mulamularingu.

¹² Nyanga palula malangkaya ma-pakanu ngura panya Kapuni-malakutu palumpa ngunytju, malanypa tjuta, munu nintintja tjuta kulu, munuya ma-wirkara ngura pala palula nyinangi tjirirpi mankurpa.

Jesulu Godaku Walinguru Anga-wangkara Paintja

(Matthew-ku 21:12-13; Markaku 11:15-17; Luke-aku 19:45-46)

¹³ Ka Jesulu kulinu Jewku inma panya Katuwanu Ankunytjanya* ilar-ingkunyangka, munu Jerusalemalakutu pakara ma-pitjangu palumpa nintintja tjuta kulu.

¹⁴ Munuya wirkara nyangu timpulaku yaatangka unngu watingku tjalamilannyangka tjiipi, puluka, tjulpu kuukuuku tjuta kulu. Ka wati mani ngaparku ungkupai tjuta taipulangka nyinangi.*

¹⁵ Ka Jesulu ruupanguru karpikarpira wiipa purunypa palyanu munu tjananya uwankara untura wanara urilkutu pakaltjinganu

* **2:13** Inma *Katuwanu Ankunytjanya* kulintjikitjangku tjukurpa nyangatja nyawa Exodus 12:43. * **2:14** Anangu kutjupa tjutangku mani kutjupa katipai timpulakutu Godanya ungkunytjikitjangku. Palu timpulaku mayatja tjuta mani timpulitja kutju ungkunytjaku mukuringangi. Ka palulanguru wati mani ngaparku ungkupai tjuta nyinangi timpulaku yaatangka anangu tjutangku mani kutjupatjara pitjala tjananya ungkula mani timpulitja ngaparku mantjintjaku. Kaya mani palunya kutju katira ungkupai Godanya.

tjiipi, puluka tjuṭa kulukulu. Munu paluru mani ngaparku ungkupai tjuṭaku taipula untura waningu tjiilpa uwankara ma-wililytjinganu. ¹⁶ Munu kuukuuku tjalamilalpai tjuṭangka wangkangu, “Katiya tjuṭpu nyanganpa. Nyangatja Mamaku yiwaḷa. Nyaaku nyura tjuwangka-palku alatji palyani?”

¹⁷ Kaya nintintja tjuṭangku panyatja kulinu, panya iriti walkatjunkunytja ngaranyi alatji, “Nyuntumpa yiwaḷakuna pulkara mukuringkula kurunpa kakulyarani.”

¹⁸ Kaya Jewku mayatja tjuṭangku nyakula wangkangu, “Godalunta wanyu wangkangu nyanga alatjingantjaku? Palu wanyu-puta miracle kutjupa kutjupa pulka palyala, kala nyakula kulila, ‘Munta, mulapa nyangatja Godalu iyantja.’”

¹⁹ Ka Jesulu tjanala wangkangu, “Piluntaraya wiyala nyanga Godaku yiwaḷa, kana ngayulu tjiiripi mankurnguru piruku palyara wiyalku.”

²⁰ Ka Jewku mayatja tjuṭangku wangkangu, “Ai, nyuntun tjiiripi mankurnguru mapalku pakaltjingalku? Timpula nyangatjaya kuli 46-ngku palyaningi rawa mulatu, ka nyuntu tjiṭtu mankurtu puṭu mapalku palyalku.”

²¹ Palu Jesulunku palurunku puntu wangkangi ngula ilunytjatjanu tjiṭtu mankurnguru pakantjikitjangku.

²² Kaya ngula paluru ilunytjatjanu pakannyangka nintintja tjuṭangku nyangatja kulinu paluru wangkanytja munuya palulanguru mulamularingu Godaku Tjukurku iriti panya walkatjunkunytjitjaku, munu Jesulu wangkanytjanguru kulu.

Jesunya Anangu Uwankaraku Ninti Nyinanytja

²³ Munu paluru ngura pala Jerusalemala nyinangi inma Katuwanut-jangka, kaya tjuṭa mulapa palumpa mulamularingu miracle pulka tjuṭa palyannyangka nyakula.

²⁴ Palu Jesulu tjana mulamularingkunytja nyakula kulinigi, “Wiya, tjana unytju kutju mulamularinganyi.” Munu paluru nitingku tjananya unngu nyangangi munu kulinigi alatji, “Tjana kuwari nguwanpa ngayunya wantikatiku.” Nyara palulanguru paluru puṭu mulamularingu tjanampa.

²⁵ Anangu kutjupangku palula tjakultjunkunytja wiya, palu paluru alatjitu nitingku unngu nyakupaingku ngurkantanangi.

3

Jesunya Munu Nicodemusanya

¹ Wati kutjupa nyinangi ini Nicodemusanya wati Paratji, munu paluru wati Jew kuranyitja tjuṭangka tjungutja.

² Munu wati nyara paluru anu Jesulakutu mungangka munu wangkangi palula, “Nintilpai, nganana ninti panya Godalu nyuntunya witunu nganananya nintintjaku. Panya watingku miracle nyanganpa nyuntu palyantjita puṭu palyani Godala wiyangka, palu panya Godalu nintinnyangka kutju palyalpai.”

³ Palu Jesulu palula wangkangu, “Tjucarurungkunanta wangkanyi, panya nyuntu piruku itiringkunyangka kutju Godalu nyuntunya walytjanmara mayatjangku kanyilku.”

4 Ka Nicodemusalu wangkangu, “Yaaltjingara wanyu wati tjilpi malaku itiringkuku? Piruku wanyu ngunytjunga tjuningkariku munu piruku itiringkuku?”

5 Ka Jesulu wangkangu, “Wiya, tjukarurungkuanta wangkanyi, panya nyuntu nganmanypa ngunytjuwanu itiringu, munun palulanguru piruku itiringanyi Kurunpa Milmilu nyuntunya unngu kampa kutjupankunyangka, ka nyara palulanguru kutju Godalu nyuntunya walytjanmara mayatjangku kanyilku.

6 Panya nganana mamanguru ngunytjunguru itiringkula mantangka wanka nyinapai, palu Kurunpa Milmilu unngu kampa kutjupankunyangka kutjula wanka ilkaritjawanu nyinaku, Godaku walytja.

7 Mulapa ngayulu wangkangu nyuntunya piruku itiringkunyjtaku, palu alatji wangkanyangka nyuntu uti urulyaralwiyangku kulinma.

8 Panya walpa walytja wangkapai, palu nyuntu ninti wiya yaaltjinguru walpa pakani munu yaaltjingka wiyaringanyi. Ka nyanga palu purunypa Kurunpa Milmilnga nganana nyakunytja wiya, panya paluru walytjangku kulira tjarpanyi anangungka walpa purunypa munu Godaku walytjaringkunyjtaku kampa kutjupananyi.”

9 Ka Nicodemusalu piruku tjapinu, “Yaaltji-yaaltji nyangatja? Putuna kulini.”

10 Ka Jesulu wangkangu, “Nyuntu panyan Israelkunu tjuangka pulkara nintilpai munun nyaaku tjukurpa nyanganpa putu kulini?”

11 Tjukarurungkuanta wangkanyi, panya nganana nyurala nintingu wangkanyi munula nyakunytjatjanungku tjakultjunanyi, ka panya nyura tjakultjunkunyangka nganananya kulira wantinyi.

12 Ngayulu nyangana tjukurpa mantatja nyurala wangkangi, ka nyura mulamularingkuwiyangku wantinyi. Munu nyura wanyu yaaltjingara tjukarurungku kulira mulamularingkuku tjukurpa ilkaritja tjakultjunkunyangka?

13 Anangu mantanguru ilkarikutu tatintja wiya, palu Watiku Katja kutju ninti nyinanyi palulanguru pitjanytjatjanu.

14 “Panya Israelkunu tjuata iriti ilytjingka para-ngaranyangka Moselu liru purunypa palyara utitjunu punungka,* palu purunypaya ngayunya Watiku Katjanya katura utitjungkuku.

15 Kaya anangu tjuata palumpa mulamularingkulampa wanka titutjara nyinaku palula tjungu.

16 Panya Godalunku anangu uwankaraku pulkara mukuringkula katja kutjukurutja mantakutu iyanu, ka anangu uwankara palumpa mulamularingkulampa ilu wiya wanka titutjara nyinaku Godala tjungu.

17 Panya Godalunku katja mantakutu iyanu anangu tjuata ngurkantara kuranmankunytjaku wiya, palu tjananya wankarunkunytjaku.

18 Ka panya anangu palumpa katjaku mulamularingkunyangkampa Godalu kuranmankuwiyangku kanyilku, palu palumpa katjaku mulamularingkunytja wiyangku wantinyangkampa Godalu palunya ngurkantara kuranmankuku alatjitu.

* 3:14 Panya Israelkunu tjuata iriti ilytjingka para-ngarala kuraringangi, ka Godalu liru tjuata iyanu tjananya patjantjaku. Munu Mosenya wangkangu liru purunypa ayananguru palyara punungka utitjunkunytjaku. Ka anangungku lirungku patjannyangka liru panya palunya ira-nyakula wankaringkupai.

19 Palu tili Godalanguru mantangka wirkara nyinanyi Godanya tjukarurungku nintintjikitja. Kaya anangu tjutangku tili pala palunya wantipai mungawaluruku mukuringkula tjana rawangku kurantjatjanungku. Nyara palulanguru Godalu tjananya ngurkantara wantir'iyantjaku ngaranyi.

20 Panya anangu kura palyalpai tiliku kuraringkupai, munu tilikutu putu pitjapai kura palumpa tilingku utintjaku-tawara.

21 Palu anangungku iwara tjukaruru mulapa wanarampa tilikutu ngulu wiya pitjaku, ka tili paluru irnyara utilku anangu palunya panya paluru tjukarurungku palyanangi Godalawanungku."

Jesunya Munu Johnnga

22 Nyanga palula malangkaya Jesunya tjana nintintja tjuta kulu Jerusalemnya wantikatira ngura ititja tjutangka tjungu parapitjalinangi manta nyanga palulatu Judeala. Munuya baptise-katingi anangu tjuta ngura nyara palunya ngurara tjuta.

23 Ka Johntu ngapartji baptise-katingitu ngura kutjupangka ini Ainanta ngura ini Salimala itingka, panya uru pulka ngaringi ngura nyara palula. Kaya anangu tjuta nyara palulakutu pitjangi urukutu baptise-katinytjaku.

24 (Nyangatja nganmanypa panya palunya tjailangka tjarpatjunkuntja kuwaripangka.)

25 Kaya Johnku nintintja tjutangku wati Jew kutjuku pika-pikaringkula ngaparku wangkangi ara panya tjanampa tjukarurungku palyantja-tjiratjangku minangka panya paltjira.*

26 Munuya palula malangka Johntakutu ankula wangkangu, "Nin-tilpai, wati panyatja panya mungatu nyuntula wirkanu karu panya Jordanta kakarara, kan panya nganana tjakultjunangi. Panya paluru kuwari palumpa malpa tjutatjarangku anangu tjuta baptise-katinyi. Kaya winki mulapa palulakutu ananyi."

27 Ka Johntu wangkangu tjanala nyanga alatji, "Wiya, watingku warka nyanga palu purunypa palyalpai Godalu witunnyangka kutju.

28 Panya nganmanytjuna nyurala wangkangu alatji, 'Ngayuluna Christanya wiya panya Wankarunkupainya Godalu panya kalkuntjitja wiya. Palu panya Godaluni kuranyu iyanu palumpa iwarankunytjaku.' Ka panya nyura kulinu.

29 Panya watingku kuri altipai ka palumparipai alatjitu. Ka panya watiku malpa ila ngarala palumpa pukularipai. Palu purunypa kuwari ngayulu pulkara pukularinyi palumpa.

30 Ka nyura palunya pulkanmanama panya nyara paluru ngayula waintara pulka mulapa, ka ngayulu pulka wiya." Nyanga alatji Johntu palumpa nintintja tjutangka wangkangi.

31 Munu piruku wangkangi, "Panya ilkaringuru pitjanytja nyara paluru pulka mulapa nyinanyi uwankarangka waintarinytja. Ka wati mantangka nyinapai, paluru panya mantatja alatjitu munu tjukurpa mantatja tjuta kutju wangkapai. Palu ilkaringuru pitjanytja mulapa uwankarangka waintarinytja alatjitu nyinanyi.

* 3:25 Jew tjutangkuyanku tjakangku inmaku ritiringkunyitjikitjangku minangka paltjilpai.

³² Munu paluru tjakultjunkupai ilkarangka nyakunytjatjanungku kulintjatjanungku, palu mantangka nyanga anangu uwankarangku palunya kulilwiyangku wantinyi.

³³ “Palu anangungku palunya kulira mulamularingkulampa paluru kulilpai mulapa Godalu tjakarurungku wangkapai.

³⁴ Panya Godalu iyantjalu Godaku tjukurpa kutju wangkapai, panya Godalu palula Kurunpa Milmilnga tjarpatjunu alatjitu palunya pulkara witulyankunytjaku. Ka nyara palulanguru paluru Godaku tjukurpa wangkapai.

³⁵ Kulilaya! Panya Mama Godanya katjaku pulkara mukuringanyi munu palulanguru palunya tjunu uwankara mayatjarira witulyangku kanyintjaku.

³⁶ Ka anangumpa palumpa katjaku mulamularingkulampa wanka titutjara nyinaku Godala tjungu, palu katjangka tungunpungkula wantirampa paluru tjungu wiya mauntalpa alatjitu nyinaku, ka Godanya palumpa titutjara mirpanpa nyinaku.”

4

Jesulu Minyma Tjamiriyanya Ngurarangka Minaku Ngatjintja

¹⁻³ Kaya Paratji tjuťangku kulinu Jesunya wanalpai tjuťaringkunyangka munu tjananya baptise-katinyangka. Panya Jesunya wanalpai ma-tjuťa mulararingi ka Johnnga wanalpai ma-manjuraringu. (Palu Jesulu tjananya baptise-katinytja wiya panya nintintja tjuťangku kutjuya tjananya baptise-katingi.) Ka Jesulu kulinu Paratji tjuťangku wangkanytja munu palulanguru Judeanya wantikatira Galileelakutu malaku anu palumpa nintintja tjuťatjara.

⁴ Ka iwara kutju Tjamiriyalawanu ma-ngaringi Galileelakutu.

⁵ Ka paluru tjana Tjamiriyalawanu ankula ngura ngururitjangka wirkanu tawunu ini Tjikala. Ngura nyanga palula itingka panya manta kutjupa ngarangi panya Jacobalu katja Josephanya iriti ungkunyitja.

⁶ Ka Jacobaku well ngarangi ngura nyara palula.

Ka Jesunya iwarangka ankula kalalarinytjatjanu pakuringkula wellangka itingka nyinakatingu.

⁷⁻⁸ Kaya nintintja tjuťa kuranyu anu walikutu mai payamilantjikitja.

Palu minyma Tjamiriyanya ngurara walinguru pitjangu mina tjutin-tjikitja. Ka Jesulu palula ngatjinu, “Ungamani mina tjikintjaku!”

⁹ Ka minyma panya paluru urulyarara wangkangu, “Nyaakunin ngayula minaku ngatjini? Nyuntu Jew, ka ngayulu Tjamiriyalanguru.” (Alatji minyma paluru wangkangu panya Jew tjuťa Tjamiriyanya ngurara tjuťangka tjunguringkupai wiya, waru kutjungka tjikilpai wiya.)

¹⁰ Ka Jesulu wangkangu, “Nyuntu ngurpa Mama Godalu nyuntunya ungkunyitjitu munun puťu kulini, nganalunta wanyu ngatjini minaku. Palu nyuntu ninti ngaralampa ngayula ngatjila, kananta mina kutjupa ungkuku kurunpa wankalpai.”

¹¹ Ka minymangku wangkangu, “Palu pakitanku yaaltji mina tjutin-tjaku? Piti nyangatja ngati pulka, parari mulapa. Yaaltjingurun mina wanka palunya nyuntu pala wangkanytjanya tjutilku?”

¹² Nganampa tjamungku Jacobalu piti nyangatja tjawanu palumpa katjapitiku tjamupitiku kuka tjuťaku kulu, kaya tjikiningi mina nyanga

palunya. Nyara palurulampa pulkangku tjawara wantingu piti nyangatja, kantin nyuntulta pulka mulapalta pitjangu malawanulta.”

¹³ Ka Jesulu wangkangu, “Mina piti nyanganguru tjikintjatjanun piruku ngula iluringkuku.”

¹⁴ Palu ngayulu ungkunyitja tjikirampun piruku iluringkunyitja wiya nyinaku. Panya mina paluru titutjara ngariku anangungka, ka anangu mina palunyatjara nyinara wanka titutjara nyinaku Godala tjungu.”

¹⁵ Ka minyama panya paluru wangkangu, “Ala, mina nyara palunya wanyu uwa, kana piruku iluringkula iwarakatinytja wiya minyama.”

¹⁶ Ka Jesulu wangkangu, “Ankulanku wati kuri alitira ngalya-kati!”

¹⁷⁻¹⁸ Ka minyangu wangkangu, “Ngayulu kuri wiya.”

Ka Jesulu wangkangu, “Uwa palya nyuntu kuri wiya, palu ngayulu ninti nyuntu panyan wati kutjupaku mukuringkula palula ngaripai alatjitu. Mununa ninti panya nyuntunya nganmanytju wati kuri 5-ngku kanyiningi. Ka panyan kuwari wati panya palulatu kampangkatu ngarinyi, nyuntumpa kuri mulapa wiyangka.”

¹⁹ Ka minyangu kulira wangkangu, “Munta-uwa, nyuntu alatjitu-manti Godaku wangkatjarampa nyinanyi.

²⁰ Nganampa tjamupitingkuya puli nyangangka Godanya walkulpai, ka nyura Jew tjutangku wangkapai, ‘Wiya, utila Jerusalemala kutjungka Godanya walkunma.’”

²¹⁻²⁴ Ka Jesulu wangkangu, “Minyama, tjukarurungkunanta wangkanyi, ka kulinma nyanganpa ngayulu wangkanyangka. Kuwari nguwanpa anangu tjutangku Mama Godanya walkulku apu murpu nyangangka wiya Jerusalemala kulu wiya, palu tjukarurungkuya palunya walkulku Kurunpa Milmilu witulyangku nintinyangka kutju, ngura winkingka. Nyanga alatjiku Godanya mukuringanyi Kurunpa Milmilngatjararingkula tjukarurungku palunya walkuntjaku. Panya Godanya kurunpa alatjitu nyinanyi. Ka anangungku walytjangku kulira putu tjukarurungku palunya walkuni, palu Kurunpa Milmilu witulyangku nintinyangka kutju paluru tjukarurungku palunya walkulku. Nyura Tjamiyanya ngurara tjutangku Godaku ngurpangku ngunti watarku walkulpai, ka nganana Jew tjutangku Godaku nintingu walkulpai, panya Godalu Jew tjutawanungku anangu tjuta wankarunkuku manta winkingka.” Nyanga alatji Jesulu minyangka wangkangu.

²⁵ Ka minyama panya paluru wangkangu alatji, “Ngayulu kulinu panya Wankarunkupainya kunyu pitjaku Godalu panya iriti kalkuntjanya. (Nganana panya palunya wangkapai Christanya). Munu kunyu nyara paluru pitjala nganana uwankara tjakultjunkuku.”

²⁶ Ka Jesulu wangkangu, “Pala paluru ngayulu, pala nyuntun wangkanyi, Godalu panya kalkuntjanya.”

²⁷ Ka Jesulu nyinara minyangka wangkanyangka palumpa nintinja tjuta malaku wirkanu, munuya nyakula urulyaranu minyangka wangkanyangka.* Munuya minyama nyanga palula tjapintjikitjangu kulinigi alatji, “Nyaakun Jesula wangkangi?” Munuya

* 4:27 Jew tjutangku tjakangu anangu Tjamiyanya ngurara tjutangka wangkapai wiya.

palu purunypatu kuliningi Jesula tjapintjikitjangku alatji, “Nyaakun minyma Tjamiriyanya ngurarangka wangkangi?” Palu wantinguya ungu kutju kulira.

²⁸ Kanku minymangku mina panya tjutira katinytja wiyatu piti wantikatira tawunukutu malaku anu munu anangu nguratja tjuangka ma-tjakultjunu,

²⁹ “Pitjalaya wanyu nyawa! Wati nyaranku ngayulu iritinguru kuwari kulu kurantja uwankara tjukarurungku wangkangi. Tjinguru nyara paluru Christanya, panya Wankarunkupai Godalu kalkuntjanya.”

³⁰ Kaya nyanga palunya kulira tawununguru uwankara anu Jesunya nyakuntjikitja.

³¹ Ka minyma panya paluru walikutu tjakultjunkunytjikitja ankunyangka malangka palumpa nintintja tjuangka Jesunya wituwituningi mai ngalkuntjaku.

³² Ka Jesulu tjanala wangkangu, “Ngayulu mai kanyini ngalkuntjikitjangku, palu mai nyara palumpa nyura ngurpa.”

³³ Kayanku nintintja tjuangka wangkangi, “Kutjupangku-manti mai katira ungu, kampangkatumpa.”

³⁴ Ka Jesulu wangkangu, “Panya ngayunya iyantjalu wangkanyangka wanganaranku palyarana paltjaringanyi, palumpa wara palyara wiyara. Nyara paluru ngayuku mai, panya Mamala wanganaranku kulira palyantja.

³⁵ Nyura panya mai uninypa kaanangka tjunkula wanantjatjanungku wangkapai, ‘Uwa, kuwarila pira kutjara kutjara patalku mai kururingkunytjaku munula palulangurulta uralku.’ Palu ngayuluna nyurala wangkanyi ngura tjuangka para-nyakula wanantjaku, panya anangu tjuta mulapa patani kutjupa tjutaku pitjala tjanala Tjukurpa Palya tjakultjunkunytjaku, ka nganalu tjana ankula palula tjanala Tjukurpa Palya tjakultjunkuku?

³⁶ Panya wati kutjupangku tjukurpa nganmanytju tjanala tjakultjunu, ka ngula wati kutjupangku pitjala wangkanyangkaya tjuta mulapa Godaku mulamularingkuku wanka titutjara nyinanytjikitja. Ka pula kutjaratu mulamularingkunyangka nyakula pukara pukulariku wati nyara nganmanytju tjakultjunkunytjanya pula malawanu pitjala wangkanytjanya kulu.

³⁷ “Tjurkultuya anangu wangkapai alatji, ‘Watingku uninypa tjunkula wanalpai, ka kutjupangku ngula mai kururingkunyangka urara wanalpai.’

³⁸ Ka ngayulu nyuranya iyani ngura kutjupa tjutakutu mai kururingkunyangka nyakula urantjaku. Palu nyura mai pala palunya jawara tjunkula wanantja wiyatu, kutjupa tjuangkuya tjunkula wanara wantingu. Ka nyura tjana pakaltjingantja tjuta kururingkunyangka mantjira pukulariku.” Alatji Jesulu wangkangi palumpa nintintja tjuangka.

³⁹ Ka panya ngura nyara palula Tjamiriyanya ngurara tjuta Jesuku mulamularingu minyma panyangku tjakultjunkunyangka alatji, “Wati nyara paluru ngayulu kurantja uwankara tjukarurungku wangkara utinu.”

40 Kaya kulira pitjangu Jesulakutu munuya palunya markuningi tjanala rawa nguwanpa nyinanytjaku. Ka Jesunya mulapa tu tjanala nyinangi tjirirpi kutjara munu tjanala tjukurpa wangkangi. 41 Anangu tju ta panya palumpa nganmanypa mulamularingu minyma panyangu wangkanyangka, palu Jesulu piruku wangkanyangka kuliraya winki mulapa mulamularingu.

42 Munuya wangkangu minyma panya palula, "Nganmanypala Jesuku mulamularingu nyuntu wangkanyangka kulira, palu kuwarila pulkara mulamularinganyi palunya nyakula walytjangku kulintjatjanu, munula kulini mulapa nyangatja Wankarunkupainya anangu manta winitjaku."

Jesulu Mayatjaku Katja Palyarunguntja

43 Ka tjirirpi kutjara wiyaringkula Jesulu palumpa nintintja tjutatjarangu ngura palunya wantikatira ma-pakanu ngura walytjakutu, Galileelakutu.

44 (Munu Jesulu nganmanytju wangkangu tjanala, "Nyangatja ngayuku ngura, palu tjakangkuya nguraritja tjutangu Godaku wangkatjara kulira wantipai.")

45 Munuya palulanguru ngura panya palula wirkanu, kaya Galileenya ngurara tju ta Jesuku pukularingu, panya tjana palunya Jerusalemala mungatu nyangu paluru witulya pulkangu palyannyangka, inma panya Katuwanu Ankunytjala junguringkula, munuya nyara palulanguru ngurangka wirkankunyangka nyakula pukularingi.

46 Kaya Jesunya tjana anu tawunu panya Kainalakutu uru Galileela wilurara. Ngura nyara palula panya Jesulu minanguru waina palyanu. Ka wati kutjupa nyinangi ngura ini Kapunimala Kainala kakarara. Paluru mayatja pulka munu kamantaku warkaripai. Ka wati nyara palumpa katja pika pulka mulapa ngaringi ngurangka.

47 Ka wati panya paluru Jesunya Judealanguru pitjanyangka kulira anu Jesula wangkanytjikitja palumpa katja pitjala palyarunguntjaku. Munu tjapinu palula, "Ngalturiwatju! Ngayuku katja pika pulka ngarinyi munu nguwanpa ilunyi. Wanyun Kapunimalakutu pitjala palunya palyarungulku?"

48 Ka Jesulu wangkangu palula, "Nyura panya kulira mulamularingkuwiyangu wantipai munu miracle witulya pulkangu palyannyangka nyakula kutju nyara mulamularingkupai."

49 Ka wangkangu, "Uwa Mayatja, palu pitjalatju nyawa ilunytjakutawara."

50 Ka Jesulu wangkangu, "Palya ngurakutu ma-pitja. Nyuntumpa katja wankaringkuku." Ka wati panya paluru mulamularingu Jesulu wangkanyangka munu ngurakutu malaku anu.

51 Ka mungawinki paluru ngurakutu ma-ilaringkunyangka palumpa warkaripai tju ta ngalya-ngaparikatingu, munuya palula tjakultjunu, "Nyuntumpa katja palyaringu."

52 Ka tjanala tjapinu, "Yaalara nguwanpa palyaringu?"

Kaya wangkangu, "Mungartji wiltja mutungka pika waru panya wiyaringu."

53 Ka wati panya paluru kulinu, "Munta-uwa, panya palula arangka ni Jesulu wangkangu, 'Nyuntumpa katja wankaringkuku.'"

Munu paluru, munu palumpa walytja tjuṭa, munu waṛkaripai tjuṭa kuḷu Jesuku mulamularingu.

⁵⁴ Uwa, nyangatja Jesulu kutjara-arangu miracle palyanu Judealangu guru Galileelakutu pitjanytjatjanungku.*

5

Jesulu Wati Urungka Itingka Palyarunguntja

¹ Ka ngula Jesunya Galileela nyinanytjatjanu Jerusalemalakutu anu inma pulkaku, panya Jew tjuṭangu tjakangkuya kutjupa-ara inma pulka palyalpai.

² Ka ngura pala Jerusalemala uru ngaringi ngatingka kaita kutjupangka itingka panya kaita nyara palulawanungkuya tjiipi tjuṭa ngalya-katira tjarpatjungkupai urilnguru. Uru paluru ini Pitjitjanya wangka lipurungku ini tjunkunyta. Ka uru ngatingka itingka wiltja tjulypinypa 5 para-ngarala wananingi.

³⁻⁴ Kaya pikatjara tjuṭa wiltja nyara palula tjanala nyinara wananingi kurutjara tjuṭa, nyumpu tjuṭa, wawanypa tjuṭa kuḷu. Nyara paluru tjana nyinara patalpai uru urinytjaku.*

⁵ Ka wati kutju ngaringi iriti mulapa pikatjararingkula wawanyarinytja kuḷi 38.

⁶ Ka Jesulu uru pala palula wirkara nyangu wati panya palunya munu ngurkantanu paluru iritilpi wawanypa ngarinytja. Munu palunya tjapinu, "Nyuntu mukuringanyi palyaringkunyjtikitja?"

⁷ Ka wati panya pikatjarangu wangkangu, "Uwa, palyaringkunyjtikitjana mukuringanyi, palu uru urinyangka wati kutjupa ila ngaranytja wiya ngayunya minara tjarpatjungkunyjtikitja. Kaya tjana-warara tjarpapai, ka ngayulu rawa malaringkupai."

⁸ Ka Jesulu wangkangu palula, "Pakala! Mununku mantara pala mantjira paltjura para-ngara."

⁹ Ka mapalku palyaringu mununku pakara mantara mantjira para-ngarangi.

Ka tjintu nyara paluru Saturday panya anangu tjuṭa pakuwiyaringkunyjtaku.

¹⁰ Ka Jewku mayatja tjuṭangu wati panya paluru mantara katinyangka nyakula wangkangu, "Wati awa! Nyaakun mantara pala katinyi? Tjintu nyangatja Saturday pakuwiyaringkunyjtaku kutjupa kutjupa para-katinytjaku wiya. Kan nyaaku tjintu milmilpa kurani?"

¹¹ Ka wangkangu tjanala, "Wiya, wati nyara ngayunya palyantjaluni wangkangu mantara mantjira ankunyjtaku."

¹² Kaya piruku tjapinu, "Wati nganalunta wangkangu mantara mantjira ankunyjtaku?"

¹³ Ka wati panya pika palyaringkunyjtalu ngurpangu Jesunya yunpa puṭu para-ngurkantanangi tjanala nintintjikitjangku. Panya

* **4:54** Jesulu nganmanytju waina minangu palyanu Judealangu pitjanytjatjanungku, munu palulanguru piruku anu Judealakutu munu ngula malaku pitjanytjatjanungku wati panya kamantaku katja palyarungunu. * **5:3-4** Wati kutjupangu kunyu verse 4 walkatjunu munu mala tjungunu Johnku tjukurta alatji Panya kutjupa-ara angeltu ukalingkula uritjingalpai uru nyara palunya, kaya pika pulka nyinanytjatjanu uru uritjingannyangka mapalku tjarpapai pika wiyaringkunyjtikitja. Palu anangu nganmanypa mapalku tjarpanytjatjanu kutju pika wiyaringkupai.

anangu tjuṭa mulapa ngarangi ngura pala palula, ka Jesunya tjanala unnguwanu kumpira mapalku anu.

14 Ka ngula Jesulu wati panya palunya piruku nyangu timpulangka ngaranyangka munu palunya wangkangu, “Kulila! Kuwari nyuntu palyaringu. Palu piruku kuralwiya nyinama nyuntula piruku pika pulka mulapa wirkankunytjaku-tawara.”

15 Ka wati panya paluru anu munu pitjala Jewku mayatja tjuṭangka tjakultjunu munu wangkangu, “Wati paluru ini Jesunya, ngayunya panya palyarunguntjanya.”

16 Kaya palulanguru ini kulira Jesuku kuraringu, panya paluru nyanga alatji Saturday-ngka palyannyangka tjintu panya pakuwiyaringkupaingka. Munuya palunya wangkara kuranmanangi munuya palunya iluntankunytjikitjangku kulinigi.

17 Ka Jesulu tjanala wangkangu, “Ngayuku Mama titutjara warakaripai ngururpa pakuringkula wantinytja wiya. Kana ngayulu palu purunypatu titutjara warakarinyi.”

18 Ka nyanga palulanguru Jewku mayatja tjuṭangku palunya iluntankunytjikitjangku pulkara alatjitu wangkara kulinigi. Panya tjana alatji kulinigi, “Wati nyanga paluru kura mulapa, panya paluru tjintu milmilpa Saturday kuranu munu palulanguru piruku Godanya mammanu. Alatji wangkara palurunku walytjangku Godanmananyi mununku Godala tjunguni.”

19 Ka Jesulu tjanala wangkangu, “Tjucarurungkuna nyurala wangkanyi. Panya ngayulu Godaku katjangku walytjangku palyantja wiya, palu Mamalu palyannyangka nyakula kutjuna palu purunypatu palyalpai. Panya paluru uwankara palyannyangka nyakula ngayulu palu purunypatu palyalpai.

20 Ka panya Mamanya ngayuku pulkara mukuringanyi mununi paluru palyara ngayunya kulu nintilpai uwankara ngayulu ngapartji palyantjaku. Mununi pulka mulapalta piruku nintilku ngayulu witulya pulkangku palyantjaku, wati nyanga kuwari palyantjanya purunypa wiya, waintara pulka mulapa, nyura nyakula pulkara urulyarantjaku.

21 Panya Mamalu anangu kutjupa ilunyangka wankara pakaltjinalgalpai, ka ngayulu palu purunytjuṭu anangu kutjupa ilunyangka mukuringkula wankalpai.

22 Mamalu anangu tjuṭa kura ngurkantankupai wiya. Palu paluru ngayunya tjunu uwankara walytjangku ngurkantankunytjaku, kura munu palya.

23 Alatji paluru palyanu anangu uwankarangku ngayunya ngurkantara walkuntjaku, panya Mamanya nyura walkulpai, palu purunytjuṭu nyura ngayunya walkuntjaku. Palu nyura ngayunya anarampa nyura Mamanya kulu anani panya nyara paluruni ngayunya iyanu.”

24 Munu piruku paluru tjanala wangkangi, “Tjucarurungkuna nyurala wangkanyi alatji kutjupangku ngayuku tjukurpa wanganarangku kulira munu ngayunya iyantjitjaku mulamularingkula nyara paluru wanka titutjara nyinaku Godala tjungu wiyaringkunyitja wiya. Ka anangu palunya Godalu piruku ngurkantara ngura kurakutu paira iyantja wiya, panya paluru wankakutu ananyi ilunytjikitja wiya.

25 Tjuktururungkuṅa nyurala wangkanyi panya tjintu ilaringu munu kuwari nyanga alatjitu ngaranya anangu Godanya wantipai tjuṅangku Godaku Katjangku wangkanyangka kulintjaku, kaya wanganarangku kulintjatjanu wankaringkukulta.

26 Panya Mamalu wityula pulkangku wankalpai, munu palu purunypatu ngayunya kulu wityulanyu anangu tjuṭa wankantjaku.

27 Ngayulu panya Watiku Katjanya.* Kani palulanguru Mamalu ngayunya tjunu mayatja pulkangku anangu tjuṭa ngurkantara tjarantjaku.

28-29 Kaya tjukurpa nyangatja kulira urulyaralwiya nyinama. Tjirirpi panyatja ilaringanyi, panya miri tjuntjunktunytja tjuṅangku ngayulu wangkanyangka kulintjaku, kaya kulira kurulnguru pakalku. Panya tjara kutjupa wiru palyantjatjanu pakalku Godala tjungu wanka titutjara nyinanytjikitja, ka tjara kutjupa kura palyantjatjanu pakalku Godalu ngura kurakutu paira iyantjaku." Alatji Jesulu wangkangi tjanala Jewku mayatja tjuṅangka.

Jesunyatjara Nganmanytju Tjakultjunktunytja

30 Munu piruku Jesulu tjanala wangkangi, "Ngayulunatju kutjungku puṭu palyani. Palu Mama Godalu wangkanyangka kutjuṅa kulin-tjatjanungku anangu tjuṭa ngurkantankupai. Pala palulanguruna tjukururungku ngurkantankupai. Panya ngayulu kutjungku puṭu palyani, palu ngayunya iyantjala kulira kutjuṅa wanganarangku kulira palyani.

31 "Ngayulu walytjangku wangkanyangkampa nyura tjinguru kulira mulamularingkuwiyangku wantima.

32 Palu panya kutjupangku ngayunya tjukururungku tjakultjunktupai nyinanyi, ka nyara palulanguru nyura ngayuku mulamularingkunytjaku ngaranya. Ngayulu ninti palumpa, panya paluru ngayunya tjukururungku tjakultjunktupai.

33 "Ka panya nyura wati mankurpa witura iyanu Johnta tchapintjaku, ka wati paluru tjanala ngayunya tjukururungku wangkangu.

34 Watingku ngayunya tjukururungku tjakultjunktunytjaku wiya ngaranya, palu nyangatjana Johntu wangkanytja nyurala wangkanyi nyura kulira ngayuku mulamularingkunytjaku, ka palulanguru Godalu nyuranya wankarunkuku.

35 "Panya Johntu tjukurpa wiru wangkara tili purunytju nyuranya irnyanangi, ka nyura unytju pukularingi paluru wangkanyangka kulira munu nyura wiyaringu.

36 Ka panya Johntu ngayunyatjara nyurala wangkara tjakultjunangi nyura mulamularingkunytjaku. Palu kutjupa pulka mulapa ngaranya nyura nyakula mulamularingkunytjaku, panya Mamaluni waraka pulka tjuṭa ungu wityulanyku palyantjaku. Ka nyanga palunya tjananya palyannyangka nyakula nyura kulilku alatji, 'Nyangatja mulapa Godalu iyantja.'

37 Kani Mamalu ngayunya iyantjatjanungku ngayunyaṭu tjakultjunktupai. Palu nyura palumpa wangkaku ngurpa, munu nyura palunya yunpa nyakunytja wiyatu.

* 5:27 Jesulunku tjakangku palurunku wangkapai *Watiku Katja*. Alatji paluru wangkapai panya paluru Godalanguru pitjala anangurira mantangka nyinangi wati purunypa alatjitu.

38 Munu panya nyura nyara palumpa iyantjitjaku mulamularingkuwiyangku wantira palumpa tjukurpa kulu wantinyi.

39 Nyura nyiri irititjangka Godaku tjukurpa pulkara ngurilpai nyakula wanka titutjara nyinanytjikitjangku. Palu tjukurpa nyara paluru tjana ngayunyatjara wangkanyi.

40 Palu nyura wanyu ngayulakutu pitjanyi wankaringkunyjtikitja? Wiya, nyura wantinyi alatjitu.

41 "Ngayuluna anangu tjutangku ngayunya mirawaninytjaku mukuringkunyjtja wiya.

42 Palu ngayulu nyuranya nintingku nyanganyi, panya nyura Godaku mukuringkunyjtja wiya alatjitu.

43 Ngayulu Mamalu iyannyangka kutju pitjangu, ka nyura ngayunya wantingi. Palu wati kutjupangku walytjangku palurunku mayatjanmara pitjanyangka nyura wati nyara palumpa pukularipai.

44 Uwa, nyura pukularipai anangu tjutangku nyuranya mirawanira palyanmankunyangka. Palu nyura mukuringkunyjtja wiya Godalu nyuranya palyanmankunyjtjaku. Palulanguru nyura putu mulamularinganyi ngayulu wangkanyangka.

45 Palu kulila, ngayulu nyuranya Mamala mirangka puntura wangkanyjtja wiya. Palu panya Moseku tjukurku alatjitu nyuranya puntura wangkaku. Panya nyura Moseku tjukurku ngunti mulamularinganyi nyuranya wankarunkunyjtjaku. Palu wiya, Moseku tjukurku nyuranya putu wankani.

46 Moselu panya tjukurpa ngayunyatjara walkatjunu, ka nyura tjinguru palumpa tjukurku mulamularingkulampa ngayuku kulu mulamularingama.

47 Palu nyura palumpa tjukurku mulamularingkuwiyangku wantira yaaltjingara ngayulu wangkanyjtjitjaku mulamularingkuku? Wiya alatjitu, nyura putu kulilku." Alatji Jesulu tjanala wangkangi Jewku mayatja tjutangka ngura panya Jerusalemala.

6

Jesulu Anangu Winki Maingka Paltjantja

(*Matthew-ku 14:13-21; Markaku 6:30-44; Luke-aku 9:10-17*)

1 Munu ngula Jesunya palumpa nintintja tjutatjara uru Galileela pautangka tatira ma-itipiringu manta kutjupakutu. (Uru nyanga paluru panya ini kutjaratjara, ini kutjupa Tapiiriyanya, ka ini kutjupa Galileenya).

2 Kaya anangu tjuta mulatu palunya wananingi uru kantilypa warara panya tjana pikatjara tjuta palyarungunyangka nyakunytjatjanungku nintingku wananingi.

3 Ka Jesunya munu palumpa nintintja tjuta kulu manta kampa kutjupa ma-wirkara pautanguru ukalingkula puli murpu tjukutjukungka tatira ngururpa nyinakatingu.

4 (Ka nyara palula ara Jew tjutaku inma pulka ilaringu tjukurpa panya Katuwanu Ankunytjanya.)

5 Ka Jesulu walunyangangi anangu winki mulapa uru kantilytja ngalya-pitjanyangka, munu nyakunytjatjanungku pinkurarara wangkangu nintintja kutjungka ini Philipala, "Yaaltjingkala mai payamilalku nyangantu ngalkuntjaku?"

⁶ (Nyangatja paluru Philipala ngunti arkara tjapiningi, nintingku mala palyantjikitjangku.)

⁷ Ka Philipalu wangkangu, "Tjingurula mani pulka kanyirampa mai pulka payamilanma, kaya tjukutjuku tjukutjukulta ngalkunma. Palu mani pulkala kanyintja wiya."

⁸ Ka nintintja kutjupa ilatu ngarangi wati panya Andrew-nya, Simon Peterku malanya. Munu paluru wangkangu,

⁹ "Munta, nyangatja tjitjingu kanyini mai pilytja kutjara mankurpa munu antipina tjukutjuku kutjara kulu. Palu anangu nyangalta mungilyi mulapa."

¹⁰ Ka ngura nyara paluru ukiri wirutjara. Ka Jesulu nintintja tjutangka wangkangu, "Anangu pala tjutaya wanyu nyinatjura." Ka tjananya mulapa tu uwankara nyinatjunu ukiringka anangu mungilyi mulapa, wati 5,000 nguwanpa munu minyma tjitji winki kulu.

¹¹ Ka Jesulu tjitji panyangka mai munu kuka kulu mantjira Godanya walkura wangkangu, "Wirungkulanyan mai kuka nyangatja ungu." Munu paluru katantara nintintja tjuta ungu anangu tjuta para-ungkunyjaku. Kaya anangu uwankarangku ngalkula paltjaringkula tjara wantingu, ka waintarira alatjitu ngaringi.

¹² Ka Jesulu wangkangu nintintja tjutangka, "Uraraya ngulaku tjura mai pala tjana paltjaringkula wantinytja tjuta."

¹³ Kaya mulapa tu para-urara pitingka tjunangi munuya tjunkula piti 12-ngka tjaalyngaratjunu mai panya kutjara mankuritjanguru ngalkula paltjaringkula wantinytja tjuta.

¹⁴ Kaya anangu tjutanku Jesulu miracle nyangatja witulya pulkanku palyannyangka nyakula wangkangi, "Nyanga paluru alatjitu-manti Godaku wangkatjarampa, panya Moselu iriti wangkangi mantakutu pitjanytjaku."

¹⁵ Palu Jesulu tjananya nintingku kuliningi alatji, "Kuwarinitjuya witiira tjunkuku tjanampa mayatja nyinanytjaku." Munu palulanguru witiira tjunkunyjaku-tawara kutjuringkula mapalku anu pulikutu.

Jesunya Uru Katu Paltjura Ankunytja
(*Matthew-ku 14:22-33; Markaku 6:45-52*)

¹⁶⁻¹⁷ Ka mungartjirinyangka nintintja tjuta ukalingkula urukutu anu munuya pautangka tjarpara malaku ma-pitjangu wilurara Kapunimalakutu. Ka mungaringu urungka ngururpa ankunyangka, ka Jesunya tjanala wirkankunytja wiyatu ngarangi puli katu nyinara.

¹⁸ Ka walpa pulkanku rurkura uru pulkara uritjinganingi.

¹⁹ Kaya nintintja tjutanku urungka punu tjarpatjura ilara uritjingalkatingi pauta panya, munuya rawa nguwanpa ankula ankula nyangu Jesunya urungka katu paltjura ngalya-pitjanyangka tjanalakutu. Munuya nyakula pulkara nguluringkula kurunpa tjititgangi.

²⁰ Ka Jesulu tjanala wangkangu, "Ngayuluna nyangatja! Nguluringkunytja wiyaya!"

²¹ Kaya palunya wangka ngurkantara pukularira pautangka tatitjunu palunya. Ka paluru tjarpanyangka pauta paluru mapalku mantangka wirkanu ngura nyara Kapunimala itingka.

²²⁻²³ Kaya anangu tjara kutjupa uru kantilytja kampa kutjupa kakarara patara ngaringi Jesulu panya tjananya mai ungkunyjtjala

itingka. Munuya nyangu nintintja tjuṭa kutju pautangka tatira ankunyangka, ka Jesunya tjanala tjungu ankunytja wiyatu. Munuya tjintungka Jesunya puṭu nyakula kuliningi, “Wiya pauta kutjumpal panyatja. Nyaratjaya tjana kutju anu, Jesunya wiya.” Ka palulanguru pauta kutjupa tjuṭa ngura Tapiriyalanguru pitjala wirkanu manta panya palula panya Mayatjalu tjananya maingka paltjantjitjala.

²⁴ Kaya anangu tjuṭangku Jesunya tjananya nintintja tjuṭa kulu puṭu nyakula pauta panya palula tjanala tatira wananu malawanungku Kapunimalakutu Jesunya ngurintjikitjangku.

Mai Kurunitja Wankalpai

²⁵ Munuya kampa wilurara ma-wirkara ngurira nyangu Jesunya wali inmatjangka ngaranyangka munuya palula tjapinu, “Nintilpai! Yaalara nguwanpan wirkanu ngura nyangangka?”

²⁶ Ka Jesulu tjanala wangkangu, “Nyura wanyu ngayunya nguriningi witulya pulkangku palyannyangka? Wiya, tjukarurungkuṅa nyurala wangkanyi, nyura mai panyatja ngalkula paltjaringkunytjatjanungku kutju ngayunya nguriningi.

²⁷ Palu mai nyara paluru mantatja, tjukutjuku ngarira mapalku unaringkupai, ka nyura uti palulanguru mai mantatja ngurilwiyangku wantima. Palu ngurinmaya mai kurunitjaku titutjara wanka nyinanytjikitjangku Godala tjungu. Panya mai nyanga palunya ngayulu Watiku Katjangku nyuranya ungkuku, panya Mama Godanya ngayuku pulkara pukularipai mununi ngayunya alatjitu iyanu palumpa witulyatjara.”

²⁸ Kaya wangkangu Jesula, “Palu Godanya mukuringanyi nganana nyaa palyantjaku?”

²⁹ Ka wangkangu, “Wiya, paluru mukuringanyi nyura ngayuku mulamularingkunytjaku, panya paluru ngayunya iyanu nyura nyakula mulamularingkunytjaku.”

³⁰ Kaya wangkangu palula, “Kan nyaa utintjikitjangku palyalku nganana nyakula mulamularingkunytjaku? Utin kutjupa kutjupa witulya pulkangku palyanma nyakunytjaku.

³¹ Panya nganampa tjamu tjuṭangku iriti mai panya manna ilytjingka ngalkuningi. Panya nyiringka iriti walkatjunkunytja ngarinyi nyanga alatji,

‘Paluru ilkaringuru tjananya mai ngalkuntjaku ungu.’ ” *

³² Ka Jesulu tjanala wangkangu, “Wiya, nyura tjinguru kulini Moselumanti tjananya mai ilkaritja ungu. Palu wiya, ngayuku Mamangku tjananya iriti ungangi, munu paluru kuwari kulu nyuranya mai mulapa ilkaringuru ungkupai mai kurunitja.

³³ Panya mai nyanga palunya Godalu ilkaringuru iyanu, ka mantakutu pitjangu anangu tjuṭa wankarunkunytjikitja.”

³⁴ Kaya wangkangu palula, “Utilayan titutjarangku mai nyanga palunya ungama.”

³⁵ Ka Jesulu tjanala wangkangu, “Ngayuluna mai kurunpa wankalpainya. Ka anangu ngayulakutu pitjala ngayuku mulamularingkulampa, nyara paluru pukulpa mulapa nyinaku maingka miangka paltjaringkunytja purunypa. Munu paluru kurunpa pukulpa titutjara nyinaku.

* 6:31 Exodus 16:4

36 “Ngaranmanytju panyaṅa nyurala wangkangu, panya ngayunya nyakunytjatjanu nyura kuwaripatu ngayuku putu mulamularinganyi.

37 Palu anangu uwankara Mamalu ngayunya ungkunyitja tjutaya ngayulakutu pitjaku, kana ngayulu tjananya wantir'iyalwiyangu alatjitu kanyilku.

38 “Panya ngayulu ilkaringuru pitjangu Mamanya mukuringkunyitja uwankara palyantjikitja. Paluru ngayunya iyanu, kana walytjangku kulira palyantja wiya paluru wangkanyangka kutjuna wanganarangu kulira palyani.

39 Mamalu panya anangu tjuta ngayula marangka tjunu munu paluru mukuringanyi ngayulu palunya tjananya kawalinkunyitja wiyangu atunymara kanyintjaku tjirirpi malatjangka wankara pakaltjingantjikitjangku.

40 Panya Mamanya mukuringanyi palumpa katjaku mulamularingkupai uwankara palula tjungu wanka titutjara nyinanytjaku. Kana ngula tjananya pakaltjingalku tjirirpi malatjangka.”

41 Kaya anangu tjutangu nyangatja kulira mirpanarira wangkangi, palurunku mai ilkaritja wangkara mirawaṅinyangka.

42 Alatjiya wangkangi, “Wiya, nyangatja wati panya Jesunya Josephaku panya katja. Nganaṅa palumpa mamaku ngunytjuku ninti. Kanku nyaaku nyangangu nganaṅala ngurpangka-palku wangkanyi ilkaringuru pitjanytja? Nganaṅa ninti palumpa.”

43 Ka Jesulu tjananya wangkangu, “Wantimaya nyararingkula wangkanyitja wiyangu!

44 Anangungku putu walytjangku kulira ngayulakutu pitjanyi, palu Godalu unngu nintinyangka kutju mukuringkula pitjapai. Ka ngayulu palunya pakaltjingalku tjirirpi malatjangka.

45 Panya iriti Godaku wangkatjara kutjungku walkatjunu alatji, ‘Godalu nintilku anangu uwankara.’ Ka palulanguru anangungku Mama Godala kulira nintiringkulampa nyara paluru ngayulakutu pitjaku.

46 Palu kulila! Anangu uwankarangu Mamanya nyakunytja wiya, palu ngayulu kutju palumpa ninti, palulanguru pitjanytjatjanu.

47 Tjukarurungkuṅa nyurala wangkanyi, anangu uwankara ngayuku mulamularingkulampa wanka titutjara nyinaku Godala tjungu.

48 “Ngayuluna mai wankalpainya.

49 Iriti panyaya ilytjingka nyurampa tjamu tjutangu mai panya manna ngalkuningi. Munuya wanyu ngalkula wanka titutjara nyinangi? Wiya panya uwankaraya ilungu.

50 Palu mai panya ilkaringuru pitjanytja mai kurunitja, panya anangungku nyanga palunya ngalkulampa wiyaringkunyitja wiya wanka titutjara nyinaku Godala tjungu.

51 Kana ngayulu mai kurunitja panya paluru, panya wankalpainya ilkaringuru pitjanytja. Ka anangungku mai nyanga palunya ngalkula wanka titutjara nyinaku Godala tjungu. Mai nyanga paluru ngayulu iltjanpa. Kanatju iltjanpa winki intjanungku ungkuku anangu tjuta manta winkingka wankaringkunyitjaku.” Alatji Jesulu wangkangi.

52 Kaya nyanga alatji wangkanyangka kulira anangu tjuṭa pulkara mirpanaringi munuyanku ngaparku wangkara kuliningi, “Yaaltjingga wati nyanga paluru iltjanpa palurunku ngananyanya ngalkuntjaku ungkuku?”

53-54 Ka Jesulu tjanala wangkangu, “Tjukururungkuna nyurala wangkanyi. Nyura uti wanka mulapa nyinanytjikitja mukuringkulampa ngayunya Watiku Katjanya iltjanpa ngalkunma munu ngayuku milkali kulū tjikinma. Panya nyura ngayunya ngalkuwiyanku tjikilwiyanku wantirampa puṭu wanka mulapa nyinaku. Palu ngalkula tjikira nyura wanka titutjara nyinaku, kana ngayulu tjinṭu malatjangka nyuranya pakaltjingalku Godala tjungu titutjara nyinanytjaku.

55 Panya ngayuku iltjanpa mai mulapa kurunitja, ka ngayuku milkali kapi mulapa kurunitjaṭu ngalkula tjikira kurunpa wankaringkunytjaku.

56 Ka anangungku ngayunya iltjanpa ngalkulampa munu milkali tjikirampa ngayula tjungu mulapa nyinaku, ka ngayulu palula tjungu nyinakuṭu.

57 “Mamalu ngayunya iyanu uwankara wankaru kanyilpailu, kana palulanguru wanka nyinanyi. Mununa palu purunypaṭu anangungku ngayunya ngalkunyangkampa ngayulu palunya wankarunkuku.

58 Ngayuluna mai ilkaringuru pitjanytja mai panya nyurampa tjamu tjuṭangku iriti ngalkula ilunytjanya purunypa wiya, palu kutjupa nguwanpa, panya anangungku mai nyanga palunya ngalkulampa titutjara wanka nyinaku Godala tjungu.”

59 Tjukurpa nyanga palunya tjananya Jesulu anangu Jew tjuṭangka wangkara nintiningi ngura Kapunimala wali inmatjangka unngu.

Tjukurpa Wanka Titutjara Nyinanytjaku

60 Kaya wanalpai kutjupa tjarangku tjukurpa nyanga palunya kulira wangkangi, “Tjukurpa wituwitu palangku wangkanyi. Kala yaaltjiyaaltjingku kulira mulamularingkuku?”

61 Ka Jesulu unngu kuliningi nintingku tjana alatji puṭu kulira wangkanyangka. Munu tjanala wangkangu, “Palu nyura yaaltji kulini ngayulu wangkanyangka? Tjinguru nyura kulini ngayunya wantinytjikitjangku.

62 Palu nyura yaaltjiriku ngayulu Watiku Katjanya ngura walytjakutu ilkaritjakutu malaku ankunyangka? Nyura nyakula nyaa kulilku?

63 Kulila, panya Godaku Kuruntu kutju wankarunkupai, Kurunpa Milmilṭu. Panya anangu puṭu walytja wanka nyinanyi palu Kurunpa Milmilṭu kutju wanka kanyilpai. Palu ngayuku tjukurta nyura wangararangku kulinyangka Kurunpa Milmilṭu palyalpai nyuranya kurunpa wanka nyinanytjaku.

64 Palu nyura kutjupatjara mulamularingkuwiya nyinanyi.”

(Alatji Jesulu tjanala wangkangi panya paluru kuwaripatjaranguru ninti nyinangi tjanampa munu nintingku kuliningi ngananyanya tjana palumpa mulamularingkuwiya nyinaku, munu nintingkuṭu kuliningi nganalū ngula Jewku mayatja tjuṭangka nintilku palunya witintjaku.)

65 Munu tjanala piruku wangkangu, “Mulapa nyura kutjupatjara unytju ngayula tjunguringanyi ngayuku mulamularingkunytja wiya. Nyanga palulanguru panyana nyurala nganmanytju wangkangu alatji,

'Anangu walytja puṯu ngayula tjunguringanyi, palu Mamalu unngu nintinnyangka kutju ngayula tjunguringkuku.'" Alatji Jesulu tjanala wangkangi.

⁶⁶ Kaya nyangatja kulira Jesunya wanalpai kutjupa tjaranku palunya wantikatira anu munu palunya piruku wanantja wiyaringu.

⁶⁷ Ka Jesulu nintintja panya 12-ngka tjapinu, "Ka nyura kulū ngayunya wantikatiku?"

⁶⁸ Ka Simon Peterlu wangkangu, "Mayatja, nganalakutula ankuku? Panya nyuntu kutjungkulanyan tjukurpa wiru tjakultjunanyi wankaru titutjara nyinanytjaku.

⁶⁹ Kala tjukurpa nyangaku mulamularinganyi munula nintingu kulini panya nyuntu kutjun milmilpa Godalanguru pitjanytja nyinanyi."

⁷⁰ Ka Jesulu wangkangu, "Panya ngayulu nyuranya nganmanytju ngurkantanu wati panya 12, palu nyuralanguru kutjungku ngayunya mamungku urakanyini."

⁷¹ (Paluru panya Judasanya wangkangi Simon Kariyataku katja. Nyara paluru panya Jesuku nintintja nyinangi, palu paluru ngula Jewku mayatja tjutangka Jesunya nintiningi palunya witintjaku.)

7

Jesuku Malanypa Tjuta Mulamularingkunyitja Wiya

¹ Nyanga palulanguru Jesulu Judeanya wantikatingu, munu Galileelakutu malaku ankula nyara palula kutju para-ngarangi ngura tjutangka. Panya ngura nyara Judeala wati panya Jewku mayatja tjuta palunya pungkuntjikitja mukuringangi. Palulanguru paluru Galileela kutju para-ngarangi.

² Ka panya Jew tjutaku inma kutjupa ilaringu ini Wiltjanya.*

³ Kaya Jesuku malanypa tjutanku wangkangu palunya, "Ngura nyangatja wantikatira ara ulparira Judealakutu, kantaya nyuntunya pala wanalpai tjutanku nyawa nyuntu miracle tjuta witulya pulkanku palyannyangka.

⁴ Tjinguru anangu kutjupa mukuringanyi anangu tjutanku palunya mirawaninytjaku, munu palulanguru paluru kutjupa kutjupa tjuta utingku palyalpai tjutangka mirangka, kampangkatu palyantja wiyanku. Ka nyuntu uti palu purunypatu palyanma utingku anangu tjutanku nyakula nintiringkunyitjaku manta winkitjangku." Alatjiya Jesuku malanypa tjutanku palula wangkangi.

⁵ (Palu paluru tjana kuluya palumpa mulamularingkuwiyanku wantingi.)

⁶ Ka Jesulu wangkangu tjanala, "Nyurampa ankunyitjaku ngaranyangkaya nyura anama alatjitu, palu ngayuku kuwaripa ngaranyi.

* **7:2** Inma nyanga palunyaya kanyilpai mai uwankara kaananguru urantjatjanungku munuya mainguru Godanya pulkara walkulpai paluru tjanampa mai pulka kaanangka pakaltjingannyangka. Munuya nyara palula ara wali uwankara wantikatira tjinu 7 urilta nyinapai wiltjanka munu tjulypinypangka. Alatjiya nyinapai ara irititja kulintjikitjangku panya Israelkunu tjuta ngura Itjipalanguru pakara ilytjinka wali wiya para-ngaranytja. Nyawa Exodus 23:16-17.

⁷ Panya anangu tjuṭa nyurampa kuraringkunyṭja wiya alatjitu, palu ngayuku kutjukuya kuraringanyi. Panya ngayulu tjanampa kura tjuṭa rawangku utini.

⁸ Palya, nyura inmaku ankunytjaku ngaranyi. Palu ngayulu nyurala tjungu ankunytja wiya, panya ngayuku kuwaripa ngaranyi."

⁹ Munu wangkanyṭjatjanu Jesunya maḷaringkula wantira nyinangi Galileela. Kaya maḷanypa panya tjuṭa kutju anu.

¹⁰ Palu ngula Jesunya maḷawanu anu Jerusalemalakutu kampakatu anangu tjuṭangku nyakunytjaku-tawara.

¹¹ Kaya inma nyara palula Jewku mayatja tjuṭangku palunya nguriningi witintjikitjangku munuya wangkangi, "Yaaltjiringu wati panya paluru?"

¹²⁻¹³ Kaya anangu tjuṭangku tjukurpa palunyatjara kampakatu kutju wangkara kuliningi mayatja paluru tjana kulintjaku-tawara. Kutjupa tjarangkuya tjaalymara anga-wangkangi alatji, "Wati palya nyaratja." Kaya kutjupa tjarangku wangkangi, "Wiya, paluru ngunti wangkara anangu tjuṭa ngunti kurara katirinanyi." Palu tjana Jewku mayatja tjuṭangka mirangka wangkanyṭja wiyatu palumpa tjanampa ngulringkula.

¹⁴ Ka inma nyanga paluru tjintu 7 ngarangi. Palu ngururpa tjintu mankurpa wiyaringkula Jesulu timpulangka tjarpara anangu tjuṭangka tjukurpa wangkara nintiningi.

¹⁵ Kaya Jewku mayatja tjuṭangku palunya kulira urulyaraningi munuya wangkangu, "Wati nyangatjampa yaaltji-yaaltji pulkara nintiringu? Panya kutjupangku palunya nintintja wiyatu."

¹⁶ Ka Jesulu wangkangu tjanala, "Tjukurpa nyangatjana wangkanyi ngayuku wiya, palu Godaluni nintinu nyara ngayunya iyantjalu.

¹⁷ Kani nganalu nintingku kulira ngurkantankuku ngayulu nyanga wangkanyangka? Tjinguruna kutjungku kulira wangkanyi, munta tjinguruna Mamalu nintinyangka wangkanyi. Palu mulapa Mamala wanganarangku kulilpai tjuṭangku kutjuya kulira tjukarurungku ngurkantankuku ngayulu wangkanyangka.

¹⁸ Tjinguru ngayulu walytjangku kulira wangkama kutjupa tjuṭangku ngayunya mirawaninytjaku. Palu wiya, ngayulu mukuringanyi Mamanya mirawaninytjaku nyara ngayunya iyantjanya. Nyara palulanguruna tjukarurungku wangkanyi ngunti wangkanyṭja wiyangku.

¹⁹ Panyatja nyura kulini? Panya Moselu nyuranya ungu Godaku tjukurpa. Palu nyura mantjintjatjanungku uwankarangku kulira wantipai, munu nyura nyaanguru ngayunya pungkunytjikitja mukuringanyi?"

²⁰ Kaya anangu tjuṭangku wangkangu palula, "Nyuntun mamutjara. Nganalunta pungkunytjikitjangku kukanymanu?"

²¹ Ka Jesulu tjanala wangkangu, "Kutju-ara panyana miracle palyanu mungatu Saturday-ngka tjintu panya pakuwiyaringkupainangka, ka panya nyura uwankarangku nyakula urulyaranu.

²²⁻²³ Palu kutjupa-ara nyura kulu tjintu pala palula kutjupa kutjupa palyalpai. Panya Moselu nyuranya wangkangu iti katja wirkankunyangka tjintu 8 wiyaringkula palunya watintjaku. (Palu tjukurpa nyanga paluru Moselanguru wiya Aipuramala Jacobala tjanalanguru

nganmanypa alatjitu ngaranytja.) Ka panya kutjupa-ara iti katja tjinguru tjirirpi Friday wirkankupai, ka palulanguru tjintu 8 wiyaringkula palunya katira watintjaku ngarapai Saturday-ngka tjirirpi panya pakuwiyaringkupaingka. Ka nyura nyanga palumpa miilarantu ngayutu Saturday-ngka palyannyangka. Munu nyura nyaanguru ngayuku kutju miilarani ngayulu tjirirpi pakuwiyaringkupaingka wati pikatjara puntu winki palyarunggunnyangka?

²⁴ “Kulila, uti nyura nyakula mapalku ngurkantara kuranmankuwiyangu wantima, palu nyakula purkarangu kulira tjukarungku ngurkantana.”

Jesunya Witintjikitjangu Kulira Wantinytja

²⁵ Kaya Jerusalemnya ngurara kutjupa tjarangu putu kulira ngaparku tjapiningi wangkara, “Wati nyangatjaya panyatja pungkuntjikitjangu rawangu ngurini mayatja tjutangu.

²⁶ Nyawa! Nyanga paluru kuwari tjanala mirangka ngaranyi munu nyanga utingku alatjitu wangkanyi, ka nyangaya pailwiyangu wantinyi! Tjinguruya kulini nyangatja mulapa Christanya Wankarunkupainya panya Godalu kalkuntjanya.

²⁷ Palu mulapa Christanya pitjanyangka nganana putu kulilku yaaltjinguru paluru pitjangu, panya nganana uwankara ngurpa. Palu wati nyangaku nganana ninti, panya paluru Nazarethanya ngurara. Palulangurula palumpa putu mulamularinganyi.” Alatjiya wangkara waningi anangu Jerusalemnya ngurara tjutangu.

²⁸ Ka Jesulu timpulaku yaatangka tjukurpa wangkangi munu mirara wangkangu alatji, “Mulapa nyura wanyu ngayuku ninti? Yaaltjinguruna pitjangu? Wiya, nyura ngurpa. Kulilaya! Ngayuluna walytjangu kulira pitjanytja wiya. Panya ngayuku Mamangkuñi iyanu. Nyara paluru tjukaruru alatjitu nyinanyi, ka nyura nyara palumpa ngurpa.

²⁹ Palu ngayulu kutju palumpa ninti, panya paluruni iyanu nyanga mantakutu, ka nyangana nyinanyilta palulanguru pitjanytjatjanu.” Alatji Jesulu katungku wangkangi.

³⁰ Kaya kutjupa tjutangu nyangatja kulira palunya witintjikitjangu wangkangi, palu wantingiya witintja wiyangu, palumpa tjintu kuwaripatu ngaranyangka.

³¹ Palu anangu kutjupa tjutaya palumpa mulamularingu munuya wangkangu, “Nyangatja alatjitu Christanya Wankarunkupainya panya Godalu kalkuntjampa, panya paluru miracle tjuta witulya pulkangu palyani. Ka kutjupangu putu palula waintariku. Nyanga paluru alatjitu kalkuntjanya panya.”

Jew Tjutangu Jesunya Witintjikitjangu Wangkanytja

³² Kaya Paratji tjutangu kulinu anangu tjutangu Jesunytjara tjaalymara wangkanyangka. Munuya kulira tjukurtjara kuranyitja tjutangka junguringkula wangkangi munuya wati timpula atunymankupai tjuta witura iyanu Jesunya witintjaku.

³³ Ka tjana pitjanyangka nyakula Jesulu tjukurpa nyangatja wangkangi, “Kuwaripatuna nyurala tjukutjuku rawa nguwanpa nyinaku, mununa palulanguru malaku ankuku panya ngayunya iyantjalakutu.

³⁴ Ka nyura ngayunya ngurira puṭu nyakuku munu nyura puṭu ngayula waṇara wirkankuku.”

³⁵ Kayanku Jewku mayatja tjuṭangku anara nguwantu wangkara kuliningi, “Wati nyanganku yaaltjikutu ankunytjikitjangku wangkanyi nganaṇa palunya puṭu ngurintjaku? Tjinguru paluru kulini nganampa walytja kutjupa tjuṭakutu ankunytjikitjangku ngura malikitja tjuṭakutu. Munu nyara palula tjinguru Jew wiya tjuṭangka ngapartji tjukurpa wangkara nintilku.

³⁶ Nganaṇa puṭu kulini wati nyanganku wangkanyangka, panya paluru nganaṇanya wangkangu, ‘Nyura ngayunya ngurira puṭu nyakuku munu nyura puṭu ngayula waṇara wirkankuku.’” Alatjiyanku Jewku mayatja tjuṭangku Jesulu wangkanytja puṭu kulin-tjatjanungku wangkara kuliningi.

Jesulu Kalkuntja Kurunpa Milmilku

³⁷ Ka inma panya paluru tjintu panya 7 ngarala wiyaringu, ka mungawinki inma malatjalta pulka mulapa ngarangi wiyaringkuny-tjikitja. Ka tjintu nyanga palula Jesunya pakara ngarangu munu wangka katungku mirara wangkangu, “Anangu mina ilu ngaralampa uti ngayulakutu pitjama munu tjikira ipilyarima.

³⁸ Panya nyiringka iriti walkatjunkunytja nyanga alatji ngaranyi, ‘Nyuntu ngayuku mulamularingkunyangka nyuntula unngunguru mina kurunitja wala purunypa titutjara ukalingkuku.’”

³⁹ Nyanga alatji Jesulu Kurunpa Milmilnga wangkangi panya ngula tjanala tjarpanyangka mina wala purunypa titutjara ukalingkunj-tjaku. Palu nyara palula arangka Kurunpa Milmilnga tjanala tjarpanytja wiya kuwaripatu ngarangi, panya Jesunya ilunytjatjanu pakara Godalakutu malaku ankunytja wiyatu kuwaripa nyinangi mantangka.

Anangu Tjuta Tjararingkunyitja

⁴⁰ Kaya kutjupa tjuṭangku tjukurpa wangkanyangka kulira wangkangu, “Munta, nyangatja-manti Godaku wangkatjarampa, panya nyanga palumpala pataningi.”

⁴¹ Kaya kutjupa tjuṭangku wangkangu, “Wiya, nyangatja Christanya panya Wankarunkupainya Godalu panya kalkuntjanya.” Kaya kutjupa tjarangu wangkangu, “Palu wati nyanga paluru Galileenya ngurara. Wanyu Godalu kalkunu Christanya Galileelanguru pitjanytjaku?”

⁴² Wiya, panya nyiringka iriti walkatjunkunytja ngaranyi nyanga alatji, ‘Christanya Wankarunkupainya Mayatja Davidaku walytjapitinguru nyinaku munu iti ngariku ngura ini Bethlehemala nyara Davi-daku ngurangka.’”

⁴³ Alatjiya tjarangu tjarangu wangkara tjararingu Jesunya puṭu tjukarurungku ngurkantara.

⁴⁴ Kaya kutjupa tjarangu palunya witintjikitjangku kuliningi, palu wantingiya witintja wiyangu.

Jew Tjuta Jesuku Mulamularingkunytja Wiya

⁴⁵ Kaya wati panya timpula atunymankupai tjuṭangku witintja wiyatu malaku anu tjukurtjara kuranyitja tjuṭakutu munu Paratji tjuṭakutu. Ka tjananya patara tjapinu, “Nyaaku nyura witiṇa katinytja wiyangu wantingu?”

⁴⁶ Kaya timpula atunymankupai tjuṭangku wangkangu, “Wiya, wati nyarangku tjukurpa wiru mulapa wangkangi, wati panya kutjupa tjuṭangku purunypa wiya, palya mulapa.”

⁴⁷ Kaya Paratji tjuṭangku wangkangu tjanala, “Munta, nyuranya kulu kawantjinganu?”

⁴⁸ Kulila, nganana wanyu Jewku mayatja tjuṭa Jesuku mulamularinganyi? Wiya alatjitu.

⁴⁹ Palu anangu nyanga kutjupa tjuṭa Moseku tjukurku ngurpa alatjitu, ka panya tjananya Godalu wiyalku.”

⁵⁰ Ka Paratji kutju tjanala tjungu ngarangi, panya nganmanypa Jesulakutu mungangka ankunytjanya, Nicodemusanya panya. Munu nyara paluru tjanala wangkangu Jewku panya mayatja tjuṭangka,

⁵¹ “Nganampa tjukurku panya alatji wangkanyi, ‘Utiya anangu kutjupa mapalku ngurkantara kuranmankuwiyangku wantima, munu paluru palyantjatjanungku wangkanyangka kulira kutju tjukarurungku ngurkantanama palumpa nintiringkula.’ ”

⁵² Kaya Nicodemusanya anara wangkangu, “Ka nyuntu kulu wanyu Galileenya ngurara, wati nyara palula tjungutja? Wanyu tjukurpa pala iriti walkatjunkunytja nyawa Godaku walkatjara tjuṭaku nintiringkunytjikitja, panya walkatjara kutjupa Galileelanguuru pitjanytja wiya alatjitu.”

⁵³ Nyara palulanguruya uwankara ngurakutu anu.

8

Jesunya Arkantjikitjangkuya Minyma Kura Katinytja

¹ Ka Jesunya kutju anu puli ini Alipatjaralakutu.

² Munu ngarira tjuṭuringkula mungawinki mulapa malaku anu timpulakutu. Ka anangu winki palulakutu pitjangu, ka Jesulu nyinakatira tjanala tjukurpa wangkara nintiningi.

³ Ka paluru tjanala wangkanyangka wati kutjupa tjuṭangku Moseku tjukurpa nintilpai tjuṭangku, Paratji tjuṭangku kulu minyma kutju ngalya-katingu. Minyma nyara paluru kunyu wati kutjupangka kampangkaṭu ngaringi kuri walytjatjarangka. Kaya katira palunya ngururpa ngaratjunu.

⁴ Munuya wangkangu Jesula, “Nintilpai, minyma nyangatjaya nyangu wati kutjupangka kampangkaṭu ngarinyangka kuri walytjatjarangka.

⁵ Ka panya Moselu walkatjunu minyma nyanga purunypa apungka atura iluntankunytjaku wati kutjupangka kampangkaṭu ngarinyangka kuri walytjatjarangka. Kan yaaltji kulini? Iluntankukula?”

⁶ Palu tjana Jesula ngunti arkara tjapiningi, panya tjana kulinigi, “Tjinguru paluru ngunti wangkanyangkala palunya kuutpangka katira wangkaku.” Palu Jesulu pupakatira mantangka walkatjunangi manyirkangku.

⁷ Kaya rawa nguwantu ngarala tjapiningi, ka Jesulu pakara wangkangu tjanala, “Ngananya wanyu palya mulapa nyinanyi kura palyantja wiya alatjitu? Uti nyara paluru-warara apu mantjira minyma nyangatja atunma.”

⁸ Munu paluru piruku pupakatira walkatjunangi mantangka.

⁹ Kaya wati panya tjuṭangku kulira kutju kutju ankula wiyaringu tjilpi tjuṭa-warara, ka malatja tjuṭa ngapartji maḷawanu anu. Ka Jesulu kutjuringkula pupara walkatjunangi.

¹⁰ Munu wiyaringkula pakara nyangu minyma panya paluru kutju ngaranyangka. Munu paluru wangkangu, “Yaaltjiringuya wati panya tjuṭa? Kutju ngaranytja wiya nyangatja nyuntunya kuranmara atura iluntankunytjikitja?”

¹¹ Ka minyma panya paluru wangkangu, “Uwa, uwankaraya ankula wiyaringu.”

Ka Jesulu palula wangkangu, “Ka ngayulu kulu nyuntunya kuranmara atuntja wiya. Palya ara nguraku, munu piruku kura palyantja wiya palyanyku kutju nyinama.”

Jesunya Tili Anangu Uwankaraku

¹² Munu ngula Jesulu anangu tjuṭangka piruku wangkangi nyanga alatji, “Ngayuluna tili anangu manta winkitjaku. Ka kutjupangku ngayunya wanarampa tili wankanya mantjilku, munu tili palunyatjara paluru putu mungawalurungka ngaraku.”

¹³ Kaya Paratji tjuṭangku palula wangkangu, “Nyuntunkun walytjangu wangkanyi, kala nyuntumpa putu mulamularinganyi.”

¹⁴ Ka Jesulu wangkangu, “Uwa, mulapa ngayulu walytjangu wangkanyi, palu ngayulu tjukarurungku wangkanyi ngunti wangkanytja wiyangku, panya ngayulu ninti ngayuku nguraku. Ngura nyara palulanguruna pitjangu mununa ngula malaku ananyi nyara palulakutu. Ka nyura ngurpa ngura nyara ngayulu ankunytjitjaku.

¹⁵ Nyura anangu kutjupa tjuṭa nyakula walytjangu ngurkantara kuranmankupai. Palu ngayuluna anangu kutjupa tjuṭa wangkapai wiya.

¹⁶ “Palu tjinguru ngayulu anangu kutjupa nyakula ngurkantankunytjikitja mukuringkula ngayulu tjukarurungku ngurkantara wangkaku. Panya ngayulu kutjungku ngurkantankupai wiya. Palu Mamanya ngayunya panya iyantjanya ngayula tjungu nyinanyi kali tjungku ngurkantankupai.

¹⁷ Panya tjukurpa irititja nyurampa alatji walkatjunu, “Tjinguru wati kutjarangu kutjupa kutjupa nyakunytjatjanungku pitjala nyurala tjakultjungkuku, ka paluru pula tjukurpa palunyaṭu wangkanyangka nyura kulira mulamularingkupai. Palu pula pitjala tjukurpa titutitu tjakultjunkunyangka nyura kulira putu mulamularingkupai.”

¹⁸ Ka palu purunypatu ngali kutjarangu tjakultjungkupai tjukurpa palunyaṭu, ka pala palulanguru nyura uti mulamularingama. Panya ngayulunatju walytjangu tjakultjungkupai, ka Mamalu kulu tjukurpa palunyaṭu tjakultjungkupai ngayunya panya iyantjatjanungku.”

¹⁹ Kaya palula tjapinu, “Nyuntumpa mama wanyu yaaltji?”

Ka Jesulu wangkangu, “Nyura ngayuku Mamaku ngurpa munu nyura ngayuku kulu ngurpa. Tjinguru nyura ngayunya tjukarurungku ngurkantarampa ngayuku Mama kulu tjukarurungkuṭu ngurkantatnama ngayuku nintingkumpa.”

²⁰ Alatji Jesulu tjanala wangkangi timpulangka nyinara, panya nyara palula itingka piti tjuṭa ngarangi anangu tjuṭangku pitjala mani Godaku tjunkunytjaku. Palu Jewku mayatja tjuṭangkuya palunya

nyakula witintja wiyangku wantingi, panya palumpa kuwaripatu ngaranyangka.

²¹ Ka piruku Jesulu tjanala wangkangu, “Ngayuluna ananyi, kani nyura putu ngurilku munu nyura putu ngurira kura winkitu iluku. Munu nyura ngayulu nyara ankunytjitjakutu putu ma-wirkankuku.”

²² Kaya Jewku mayatja tjutangku alatji wangkanyangka kulira wangkangu, “Munta-uwa, wati nyangangku wangkanyi nganana kunyu putu wanalku paluru nyara ankunytjitjakutu. Tjingurunku paluru walytjangku iluntankunytjikitjangku wangkanyi.”

²³ Ka Jesulu piruku wangkangu tjanala, “Nyura nyanga mantanguru, kana ngayulu ilkaringuru pitjanytja. Panya nyurampa ngura nyan-gatja, ka ngayulu mantanguru wiya ilkaringuru pitjanytja.

²⁴ Ngayulu panya nyurala wangkangu nyura kura winkitu iluku. Panya ngayulu panya paluru, panya Godalu iriti kalkuntjanya, ka nyura ngayuku putu mulamularingkulampa mulaputu kura winki alatjitu iluku.”

²⁵ Kaya tjapinu, “Palu ngananya wanyu nyuntu?”

Ka wangkangu, “Panya paluru ngayulu, panya kuwaripatarana nyurala wangkangu.

²⁶ Ngayulu nyuranya ngurkantara kuranmankunytjaku ngaranyi alatjitu, nyura kura tjuta palyantjitjanguru. Palu ngayunya iyan-tjalu witunnyangka kutjuna wangkanyi. Panya ngayunya iyant-janya tjukaruru alatjitu. Kana palula kulintjatjanungku anangu uwankarangka tjukarurungku tjakultjunanyi.”

²⁷ Kaya putu kulingi Jesulu palumpa Mama ilkaritja wangkanyangka panya palunya iyantjanya.

²⁸ Ka Jesulu tjanala wangkangu, “Nyura ngayunya Watiku Katjanya ngula utitjungkuku munu utitjungkunytjatjanungku nyura ngayuku nintiringkula kulilku, ‘Munta-uwa, wati nyaratja panya paluru, Godalu panya kalkuntjanya, panya alatji paluru nganana nganmanytju wangkangi.’ Munu piruku nyura kulilku, ‘Munta-uwa, mulapa nyara paluru walytjangku palyalpai wiya, munu palumpa Mamangku nintin-nyangka kutju wangkapai munu palyalpai.’ Alatji nyura nintiringkula kulilku ngayunya utitjungkunytjatjanungku.

²⁹ Panya ngayunya iyantjanya ngayula tjungu titutjara nyinanyi, kana paluru pukularinytjaku rawangku palyani, kani palulanguru ngayunya wantikatinytja wiya.”

³⁰ Kaya paluru alatji wangkanyangka tjuta mulapa palumpa mula-mularingu.

Jesuku Nintintja Mulapa Nyinanytjaku

³¹ Ka Jesulu wangkangu anangu panya palumpa mulamularingkupai tjutangka, “Nyura ngayuku tjukurpa mulamulangku kulira rawangku wanarampa ngayuku nintintja mulapa nyinaku.

³² Munu nyura nyara palulanguru tjukurpa Godanyatjara tjukarurungku kulilku, ka paluru nyuranya iwara kuranguru mantjintjatjanungku iwara palyangka tjungkuku nyura karalyarira ankunytjaku.”

³³ Kaya Jewku mayatja tjutangku wangkangu, “Wiya, nganana anangu Aipuramaku walytjapiti. Nganalu wanyu nganananya iwara kurangka katirinanyi? Wiya, kutjupangku nganananya mayatarira

iwara kurangka katirinkunyitja wiya alatjitu. Kan nyaaku ngunti wangkanyi Godalu nganananya iwara kuranguru mantjira iwara palyangka tjunkunytjaku?"

³⁴ Ka Jesulu tjanala wangkangu, "Tjuka^rurungkuna nyurala wangkanyi. Anangungkumpa rawangku kura palyarampa iwara kurangka titutjara ananyi munu kura palunya pu^tu wantikatinyi.

³⁵ Kulila wati munu palumpa katja. Panya katja paluru mamaku tjitji titutjara nyinanyi. Ka anangu kutjupa malikitja war^kaku pitjala, paluru unytju kutju tjukutjuku nyinapai wati panya palula. Palu watiku katja kutju titutjara nyinapai palumpa mamangka tjungu.

³⁶ Ka Godaku katjangku tjinguru nyuranya iwara kuranguru mantjira iwara palyangka tjunkunyangka nyura kar^alyarira iwara pala palula pukulpa mulapa ankuku.

³⁷ "Palu ngayulu nyurampa ninti panya mulapa nyura Aipuramaku tjamupiti ma^latja ma^latja. Palu nyura ngayuku tjukurpa kulira wantinyi. Nyara palulanguru nyura ngayunya pungkunytjikitjangku kulini.

³⁸ Ngayuluna Mamalu nintinnyangka kutju wangkara tjakultjunku-pai, ka nyura palu pur^unytju^tu wanganarangku nyurampa mamangka kulira palyalpai."

³⁹ Kaya wangkangu palula, "Wiya, nganampa mama Aipuramanya kutju."

Ka Jesulu wangkangu, "Nyura Aipuramaku katja wiya. Tjinguru nyura Aipuramaku katja nyinarampa palu pur^unytju^tu palyanma panya paluru palyantja purunypa.

⁴⁰ Ngayulu panya nyurala Godaku tjukurpa tjuka^rurungku wangkangi palula kulintjatjanungku. Ka nyara palulanguru nyura ngayunya iluntankunytjikitja mukuringanyi. Palu Aipuramalu Godaku wangkatjara tju^ta iluntankunytjikitjangku kulintja wiya alatjitu.

⁴¹ Palu nyura nyurampa mamangka wanganarangku kulira palyani."

Kaya wangkangu, "Palu mama kutjupa-palkulanyan kulini? Wiya, nganana^la mama Godanya kutjutjara nyinanyi."

⁴² Ka Jesulu tjanala wangkangu, "Wiya, Godanya nyurampa mama wiya. Tjinguru Godanya nyurampa mama nyinanyangkampa nyura ngayuku pukularima, panya ngayulu Mama Godalanguru pitjangu, mununa kuwari nyanga nyurala wangkanyi. Panya ngayulunatju walytjangku kulira pitjanytja wiya, ngayuku mamangkuni ngayunya iyanu.

⁴³ Palu nyaanguruⁿi nyura pu^tu kulini ngayulu wangkanyangka? Wiya, panya nyura ngayuku tjukurpa kulira wantinyi, pala palulanguru nyura pu^tu kulini.

⁴⁴ Nyurampa mama panya mamu Satannga, ka nyura palula wanganarangku kulira palyalpai. Palu Satannga panya kuwaripataralpi miriputju nyinangi munu tju^ta alatjitu iluntanangi. Munu paluru tjuka^ruru wiya titutjarangku ngunti kuralpai. Paluru tjakangku ngunti kuralpai tjukurpa nguntitjara nyinara. Munu paluru ngunti wangkapai tju^taku mama.

45 “Ka ngayulu nyurala tjukurpa Godanyatjara tjukarurungku wangkangi, palu nyura kulira ngayuku mulamularingkuwiyangku wantinyi alatjitu.

46 Nyura wanyu ngayunya kura ngurkantananyi? Wiya, ngayulu kura wiya alatjitu. Palu ngayulu tjukarurungku kutju wangkanyi. Ka nyura ngayuku mulamularingkunyitja wiyangku wantinyi ngayulu tjukarurungku wangkanyangka.

47 Panya Godaku walytja tjutangku Godaku tjukurpa wanganarangku kulilpai. Palu nyura Godaku walytja wiya, munu nyura nyara palulanguru Godalu wangkanytjitja kulira wantipai.”

Jesunyaya Mamutjara Wangkanytja

48 Kaya Jewku mayatja tjutangku wangkangu Jesunya, “Ala palatja, nganana tjukarurungku nyuntunya wangkangi. Nyuntun Jew mulapa wiya wati Tjamiriyanya ngurara munun mamutjara.”

49 Ka Jesulu wangkangu, “Mamutjara wiyana. Panya ngayulu Mamala wanganarangku kulini. Ka nyura ngayunya wanganarangku kulintja wiya.

50 Palu ngayulu mukuringkunyitja wiya ngayunya tjutangku mirawaninytjaku. Palu kutjupa nyinanyi munu paluru mukuringanyi tjutangku ngayunya mirawaninytjaku. Nyara paluru kutjungku uwankara tjukarurungku ngurkantankupai.

51 Kana tjukarurungku nyurala wangkanyi, ‘Anangungku ngayuku tjukurpa wanganarangku kulirampa ilunyitja wiya wanka titutjara nyinaku.’ ”

52 Kaya palula wangkangu, “Ala palatja, pala palulangurula nyuntunya kulini mamutjara alatjitu. Aipuramanya panya nganmanypa ilungu, wati Godaku wangkatjara tjuta kulu. Kan yaaltji-yaaltjingku wangkanyi alatji, ‘Anangungku ngayuku tjukurpa wanganarangku kulirampa ilu wiya wanka titutjara nyinaku.’

53 Palu nganampa tjamu Aipuramanya nganmanypa ilungu Godaku wangkatjara tjuta kulu, kan nyuntu wanyu Aipuramala tjanala waintarinyi? Wiya, nyuntun wati tjukutjuku alatjitu.”

54 Ka Jesulu wangkangu, “Tjinguruna walytjangku mirawaninyangkampa nyura ngayunya ananma. Palu kutjungku ngayunya mirawaninyi ngayuku Mamangku. Nyara palunya panya nyura Godanyanmananyi.

55 Palu nyura palumpa ngurpa, ka ngayulu palumpa ninti. Tjinguru ngayulu ngunti ngurparingkula ngunti wangkama nyura purunytju, palu ngayulu palumpa nintingku wangkanyi mununa palumpa tjukurpa wanganarangku kulilpai.

56 Nyurampa tjamu Aipuramalu nganmanytju kulinu ngayulu ngula ilkaringuru mantakutu pitjanytja, munu pulkara pukularingu. Munu ngula ngayulu ankunyangka nyakula paluru pulkara tu pukularingu.”

57 Kaya Jewku mayatja tjutangku palula wangkangu, “Nyuntun Aipuramanya nyangu? Wiya nyuntun tjilpi wiya, nyuntu wati tjukutjuku. Aipuramanya iriti mulapa nyinangi nyuntula wiyangka.”

58 Ka Jesulu wangkangu tjanala, “Tjukarurungkuna nyurala wangkanyi, Aipuramanya iti ngarinytja kuwaripangkana ngayulu-warara nyinangi Mamala tjungu, panya ngayuluna Titutjara Nyinapainya.”

⁵⁹ Kaya nyangatja kulira apu mantjinu palunya atuntjikitjangku. Palu Jesunya tjanala kumpira ngururwanu ma-pakara anu timpulan-guru urilkutu.

9

Jesulu Wati Kurutjara Palyarunguntja

¹ Munu Jesulu nyanga palulanguru ma-pitjala nyangu wati kurutjara nyinanyangka. Wati nyara paluru itilpi kurutjara ngarinytja alatjitu.

²⁻³ Kaya palumpa nintintja tjutangku Jesula tjapinu alatji, "Nyaan-guru wati nyanga paluru kurutjara nyinanyi? Walytjangkunku nyanganku kuranu?"

Ka Jesulu wangkangu, "Wiya."

Kaya piruku tjapinu, "Munta, tjinguru ngunytjungku mamangku kura palyanu, ka nyara palula pulalanguru iti kuru pati wirkanu?"

Ka Jesulu piruku wiyanmarā wangkangu, "Wiya, wati nyanga paluru kurutjara iti ngaringu anangu tjutangku nyakunytjaku Godalu witulya pulkangku palunya palyannyangka.

⁴ Ka nyanga kuwari tjintu kalala ngaranyi, ka nganana uti Godaku warka palyanma ngayunya panya iyantjijaku. Panya kuwari mungaringanyi, ka nganana mungangka putu warkarinyi.

⁵ Kaṇa mantangka nyanga nyinara tili purunytju irnyara utini anangu tjutangku Godanya uti kulintjaku."

⁶ Munu tjukurpa nyanga palunya wangkanytjatjanungku Jesulu manta mantjira witalytjunu munu tjułpirpa palyanu. Munu wati panya kuru patingka kurungka tjułpirpa tjunu.

⁷ Munu wangkangu, "Ma-pitjalanku kuru paltjila uru nyara ini Tjailumala." (Ini nyanga paluru wangkanyi tjanampa wangkanku, *Iyantjanya*.)

Ka wati panya paluru uru pala palulakutu ankula kuru paltjira mapalku kuru kutjaratu alaringu munu malaku pitjala para-nyangangi.

⁸ Kaya kutjupa tjuṭa palumpa ninti panya paluru tjana nyakupai wati nyanga palunya maniku nyinara ngatjinnnyangka. Munuyanku ngaparku tjapiningi, "Wati panyatja nyangatja? Panya nyinara maniku ngatjilpainya?" Kaya palu purunytjuṭu wangkangi palumpa ngurangka itingka nyinapai tjutangku.

⁹ Tjarangkuya wangkangi, "Wati panya paluru alatjitu palatja." Kaya kutjupa tjutangku wangkangi, "Wiya, wati kutjupa palatja, yunpa palu purunypa."

Ka wati panya paluru wangkangu, "Ngayulu panya paluru, panya kuru patina nyinangi."

¹⁰ Kaya palula tjapinu, "Kanta nganalu kuru alānu?"

¹¹ Ka wangkangu, "Wati ini Jesuluni tjułpirpa palyara kuru nyitinu mununi wangkangu ankula uru Tjailumala paltjintjaku. Kaṇa ankula paltjira mapalku kuru alaringu."

¹² Kaya wangkangu, "Wati paluru yaaltji?"

Ka paluru wangkangu, "Wampa, ngurpana."

¹³ Munuya palulanguru katingu Paratji tjuṭakutu wati panya palunya kuru panya pati alaringkunytjanya.

¹⁴ (Ka tjintu nyara Jesulu wati panya kuru pati alantjanya Saturday tjintu panya pakuwiyaringkupai.)

15 Kaya Paratji tjuṭangku wati panya palunya palu purunypaṭu tjapinu, “Yaaltji-yaaltjin kuru alaringu?”

Ka paluru tjanala tjakultjunu, “Wati nyara paluruni tjulpirpa tjunu kurungka, kana paltjira mapalku kuru alaringu.”

16 Kaya Paratji tjarangku wangkangu, “Wiya, wati nyara paluru Godalanguru wiya. Tjintu milmilpa nyangatja, warkarinytjaku wiya. Wati nyarangku kurutjara palyara tjintu nyanga milmilpa kurani.” Kaya tjara kutjupangku wangkangi, “Wiya, wati kurangku puṭu nyanga palu purunypa palyalpai.” Munuyanku wangkara kulira tjarangku tjarangku tjukurpa kutjupa kutjupa wangkangi.

17 Kaya piruku wati panyangka Paratji tjuṭangku wangkangu, “Nyuntunya kunyu kuru alānu wati nyara paluru, kan nyaa wangkanyi palunya?”

Ka wangkangu, “Nyara paluru wati Godaku wangkatjara alatjitu.”

18 Kaya Jewku mayatja tuṭa puṭu mulamularingangi wati nyanga kurutjara kuru alaringkunyaangka. Munuya altingu palumpa mama ngunytju pitjala tjakultjunkunytjaku.

19 Munuya palula pulala tjapinu, “Nyangatja mulapa nyupalimpa panya katja? Panya kuru pati iti wirkankunytja? Ka nyupali ninti yaaltji-yaaltjinku nyanganku kuwari nyanganyi?”

20 Ka pula wangkangu, “Uwa, nyangatja mulapa ngalimpa katja, panya kuru pati iti wirkankunytja.

21 Palu ngali ngurpa. Nyakunytja wiyatuli paluru kuru alaringkunyaangka. Munuli ngurpa wati nganalu kuru alānu. Pala palunyaya tjapila. Wati pulka palatja, kanku walytjangku wangka.”

22 Paluru pula alatji wangkangi Jewku mayatja tjuṭaku nguluringkula pulanya paintjaku-tawara. Panya kutjupa tjuṭangkuya wangkapai, “Jesunya mulapa Godalu panya kalkuntjanya, Christanya panya.” Kaya Jewku mayatja tjuṭangku nyangatja kulira wangkangi, “Nyanga palu purunypaya wangkawiyangku wantima ngana wali inmatjanguru nyuranya paira iyantjaku-tawara.”

23 Ka pula palulanguru mamangku ngunytjungku nguluringkula tjukutjuku kutju wangkangi alatji, “Pala palunyaya tjapila! Wati pulka palatja.”

24 Kaya piruku altingu wati panya kuru pati iti ngarinytjanya, munuya wangkangu, “Kuwari nyuntu tjukarurungku wangka Godala mirangka! Panya ngana ninti wati nyara nyuntunya kuru alantjitjaku. Paluru wati kura.”

25 Ka paluru wangkangu, “Uwa, ngurpana palumpa. Tjinguru mulapa paluru kura, munta tjinguru wiru. Palu kutju nyanganguruna ngayulu kulini, panya nganmanypana kuru pati nyinangi munu kuwari kuru alangku nyanganyi.”

26 Kaya piruku wangkangu, “Palu nyaanunta wanyu wati nyara paluru? Yaaltji-yaaltjinkunta kuru alānu?”

27 Ka paluru tjanala piruku wangkangu, “Nganmanytju panyana nyurala wangkangu, ka nyura ngayunya kulilwiyangku wantingi. Nyaaku nyura piruku kulintjikitja mukuringanyi? Nyura kulu wanyu palumpa nintintja nyinanytjikitja mukuringanyi?”

28 Kaya mirpaṅarira palunya warkira wangkangu, “Nyuntun palumpa nintintja. Palu nganaṅa Moseku nintintja tjuta, palumpa wiya.

29 Nganaṅa ninti Godalu Mosela wangkangu, palu wati nyanga palumpa nganaṅa ngurpa. Yaaltjinguru nyangatja pitjangu?”

30 Ka wati paluru urulyarara wangkangu, “Ai! Nyura ngurpa wati nyara palumpa? Nyara paluruṅi kuru alaṅu, ka nyura nyaaku puṅu kulinu nintipuka tjuṅangu?”

31 Nganaṅa ninti Godalu kura palyalpai tjuṅangka kulilwiyangu wantipai. Palu wangaṅarangku kulira walkunnyangka kutju paluru kulilpai.

32 Iritinguru mulapa wati kutjupangu kuru alantja wiyatu, kuwari kutju nyanga alatjitu kuru pati iti ngarinytja alaṅu.

33 Wati nyanga paluru Godalanguru pitjanytja wiyatjangu tjinguru puṅu kuru alaṅma. Palu mulapa wati nyanga paluru Godalanguru pitjanytja alatjitu, panya paluru kutjungkuṅi kuru alaṅu.”

34 Kaya mirpaṅarira wangkangu palula, “Nyuntun itinguru alatjitu kura winki wirkanu munun kura alatjitu pulkaringu, munun palulanguru nganaṅanya puṅu alatjitu nintini.” Munuya palunya painu wali inmatjangka piruku tjarpawiyangu wantinytjaku.

35 Ka Jesulu kulinu wati panya palunyaya kunyu wali inmatjanguru painu munu palunya ngurira nyakula wangkangu, “Nyuntu mulamularinganyi Watiku Katjaku?”

36 Ka wangkangu, “Palu ngananya wanyu paluru? Wangkaṅi, kana palumpa mulamulariwa.”

37 Ka Jesulu wangkangu, “Nyangu panyan nganmanytju. Ka nyangaṅanta kuwari paluru wangkanyi.”

38 Ka wati panya paluru wangkangu, “Ngayulu nyuntumpa pulkara mulapa mulamularinganyi.” Munu paluru Jesula tjinangka tultjun-garakatira palunya walkunu.

39 Ka Jesulu wangkangu, “Ngayuluna mantakutu pitjangu anangu tjuta tjarantjikitja, kaya tjarangu kutju nganmanypa kuru pati purunypa nyinanytjatjanungku kuru alaringkula nyakula ngayuku mulamularingkuku, kaya tjara kutjupa kuru ala purunypa nyinanytjatjanu kuru pati mularariku ngayuku puṅu mulamularingkula.”

40 Kaya Paratji kutjupa tjarangu ila ngaranytjatjanungku kulinu Jesulu alatji wangkanyangka, munuya palula tjapinu, “Munta nganaṅanya kulun wangkanyi nganaṅa kuru pati purunypa? Wiya, nganaṅa kuru ala.”

41 Ka Jesulu wangkangu, “Tjinguru nyura kuru pati purunypa nyinara kura watarkungku palyanma, kulintja wiyatjangu, ka Godanya nyurampa ngalturingama munu nyuranya kura ngurkantara wangkanytja wiya. Palu ngunti nyuranku walytjangu kuru alaṅmananyi Godanya pulkara kulintjatjanungku-palku. Ka nyara palulanguru nyuranya Godalu kura ngurkantankunytjaku ngaranyi alatjitu.”

10

Tjukurpa Tjiipi Atunymankupaitjara

¹ Ka Jesulu wangkangu, “Tjukaꝛurungkuꝛa nyurala wangkanyi, panya wati tjiipiku yaatangka kaitawanu wiya kultukaꝛa tatira waꝛaꝛakatipai, nyara paluru wati tjulyara kutitjukupai.

² Palu panya kaitawanu tjarpanytja, nyara paluru tjiipi tjuꝛaku tjaꝛata.

³ Ka wati kutjungku mungangka kanyilpaingku tjananya yaatangka unngu atunymara tjiꝛturingkupai, munu mungawinki tjaꝛata pitjanyangka nyakula kaita alaꝛpai. Ka wati panya tjaꝛatangku palumpa tjiipi tjuꝛa ini wangkara alꝛpai kutju kutju.

⁴ Mununku tjiipi walytja tjuꝛa alꝛira pakaltjingara kuranyuripai munu tjananya katipai. Kaya palunya ngurkantara waꝛalꝛpai palumpa wangkaku nitingku.

⁵ Palu wati malikitja kulira tjana waꝛalwiyangku wantira wirtjapakalku wangka palumpa puꝛu ngurkantara.”

⁶ Alatji Jesulu tjanala tjukurpa ara tjiipitjara wangkangi nintintjikitjangu, palu puꝛuya kuliningi.

Jesulu Wangkangu, “Ngayulu Tjaꝛata Palyanya.”

⁷ Ka Jesulu piꝛuku tjanala wangkangu, “Tjukaꝛurungkuꝛa nyurala wangkanyi. Panya ngayuluꝛa tjiipiku kaita, kaya tjiipi tjuꝛa ngayulawanu kutju tjarpaku.

⁸ Panya kutjupa tjuꝛaya ngayula kuwaripangka pitjangu, nyara paluru tjana tjulyara kutitjukupai tjuꝛa, ka panya tjananya tjiipi tjuꝛangku kulilwiyangku wantingi.

⁹ Ngayuluꝛa kaita panya tjiipiku, ka kutjupa ngayulawanu tjarparampa wankaringkuku. Kana palunya atunymara kanyilku kurangka-tawara. Ka pukulpa alatjiꝛu para-ngaraꝛaku wankaru munu palꝛtja titutjara nyinaku.

¹⁰ Palu wati panya kutitjukupai tjuꝛaya unytju kutju pitjapai tjulyara pungkula wiyantjikitja kutju. Palu ngayuluꝛa pitjangu nyuranya wankarunkunytjikitja nyura pukulpa mulapa titutjara nyinanytjaku ngayula tjungu.

¹¹ “Ngayuluꝛa tjaꝛata palyanya, munuꝛa tjiipiku ngalkilpa ilunytjikitja mukuringanyi.

¹² Palu wati panya kutjupa manikitja unytju waꝛkaripai tjaꝛata wiya, tjiipiku walytja wiya. Paluru inuꝛa pitjanyangka nyakula ngulu wirtjapakalꝛpai tjiipi wantikatira, ka tjananya inuꝛangku patjara wililytjingalꝛpai.

¹³ Wati panya paluru manikitja kutju waꝛkaripai munu tjiipi tjuꝛaku pulkara mukuringkupai wiya munu ngalturingkupai wiyatu. Nyara palulanguru paluru ngulu wirtjapakalꝛpai inuꝛa nyakula.

¹⁴⁻¹⁵ “Palu ngayuluꝛa tjaꝛata palyanya. Panya Mamanya ngayuku ninti, ka ngayulu Mamaku nintitu. Palu puꝛunypana ngayulu ngayuku tjiipi tjuꝛaku ninti, katjuya tjiipi tjuꝛa ngayuku nintitu. Kana ngayulu palumpa tjanampa ngalkilpa ilunytjikitja mukuringanyi.

¹⁶ Katjuya tjiipi kutjupa tjuꝛa kulu nyinanyi nyangatja ngurara wiya, palu ngura kutjupitja. Kana palunya tjananya kulu alꝛira katiku ngura kutjupa kutjupa tjuꝛanguru, kaniya ngayunya wangka kulilku munuya pitjala tjunguringkuku ngura nyangatja ngurara tjuꝛangka. Kana ngayulu kutjungku tjananya uwankara tjunguꝛa kanyilku utulu kutju.

17 “Panya ngayulu kutju alatjituṅa ngalkilpa ilunytjikitja mukuringanyi, ka pala palulanguru Mamanya ngayuku pukularinyi. Palu ngayulu titutjara ilura miri ngarinytjikitja wiya, malaku wankaringkunyitjikitja ilunyi.

18 Kutjupa tjuṅangkuniya wanka putu wiyani, palu ngayulu alatjituṅatju intjanurinyi anangu tjuṅaku ngalkilpa. Ngayulu alatjitu mukuringkula ilunyi, munuṅa ngayulu alatjitu mukuringkula malaku wankaringanyi, panya Mamaluni witunu anangu tjuṅaku ngalkilpa ilunytjaku.”

19 Ka Jesulu tjukurpa nyangatja wangkanyangkaya anangu tjuṅangu kulira tjararingkula ngaparku wangkangi.

20 Kutjupa tjarangkuya wangkangi, “Nyangangku mamutjarangku ngunti wangkanyi, kawakawangku. Ka nyura nyaaku palula kulini?”

21 Kaya tjara kutjupangku wangkangi, “Wati mamutjarangku wanyu tjukurpa nyanga purunypa wangkapai, munu kuru pati kulu alalpai? Wiya, mamutjarangku nyanga palu purunypa palyalpai wiya.”

Jew Tjuṅangu Jesunya Wantinytja

22 Nyanga palula malangka nyinnga ngarinyangka, anangu Jew tjuṅa inma pulkaku tjunguringu ngura panya Jerusalemala timpulangka.*

23 Ka timpulangka kantilytja wiltja wara para-ngarala arintanangi. Nyanga paluru ini Tjalamanku wiltja. Ka nyara palulawanu Jesunya anangi.

24 Kaya Jewku mayatja tjuṅangu Jesunya nyakula kaputu-kaputuringu munuya palula wangkangu nyanga alatji, “Rawangkun nyuntunku kutitjunanyi. Yaalaran nyuntunku utingku tjakultjungkuku? Nyuntun mulapa wanyu Christanya panya iriti Godalu kalkuntjanya?”

25 Ka Jesulu tjanala wangkangu, “Panya ngayulu nyurala nganmanytju wangkangu, ka nyura ngayuku mulamularingkuwiyangku wantingi. Ngayulu panya witulya pulkangku kutjupa kutjupa tjuṅa palyaningi Mamalu ngayunya nintinnyangka, ka nyura nyakula kulira mulamularingkunyitjaku ngaranyi.

26 Palu nyura wantingi, panya nyura ngayuku tjiipi tjuṅa wiya.

27 Palu ngayuku tjiipi tjuṅangu ngayunya wangka kulilpai. Nyara palumpa tjanampaṅa ninti. Nyara tjananiya kulira wanalpai nintingku.

28 Kana tjananya wankarunkuku Godala tjungu titutjara nyinanytjaku, kaya wiyaringkuwiya alatjitu nyinaku. Ka kutjupangku tjananya putu ngayulanguru tjulyara katiku.

29 Panya Mamaluni palunya tjananya ngayunya ungu. Paluru panya pulka mulapa uwankarangka waintarira nyinanyi, ka kutjupangku tjananya Mamalanguru putu tjulyani.

30 Panya Mamanya ngali kutjuṅu nyinanyi.”

31 Kaya Jewku mayatja tjuṅangu nyangatja kulira piruku miilarara apu mantjinu Jesunya atuntjikitjangku.

* **10:22** Panya iriti ngura kutjupitja tjuṅangu timpula nyanga palunya tjulyara anga-tjirkara kanyiningi yiya mankurtu. Kaya palulanguru yiya mankurpa wiyaringkunyaangka malakungku mantjira tjana pukularingu munuya nyara palulanguru inma pulka palyalkatingi nyinnga kutjupa nyinnga kutjupa-ara nyanga palunya kulintjikitjangku.

³² Ka paluru tjanala wangkangu, “Ngayulu tjuṭa-arangku Mamalu nintinnyangka wiru tjuṭa palyaningi nyura nyakula nintiringkuny-tjaku. Kani nyura nyaa palyannyangka miilarara atuntjikitjangku kulini?”

³³ Kaya Jewku mayatja tjuṭangku wangkangu, “Wiya, nganana nyuntunya wiru tjuṭa palyannyangka atuntja wiya, palu nyuntunku walytjangku Godanmankunyangkala nyuntunya atulku. Nyuntun Godanya wiya, wati mantatja alatjiṭu.”

³⁴ Ka Jesulu wangkangu, “Wiya kulila! Panya nyurampa tjukurta alatji ngaranyi Godalu iriti wangkanytja,

‘Nyura panya mayatja tjuṭa nyinanyi ngayunya purunypa.’ *

³⁵ Nyangatja paluru iriti wangkangu anangu tjuṭangka, kala mulamularinganyi tjukurpa nyanga palumpa nyiri milmilta ngarinyangka, panya Godaku tjukurpa tjukaruru alatjiṭu.

³⁶ Kani ngayunya Mamalu ngurkantara mantakutu iyanu. Kani nyura nyaaku tjapira ngurini Godanya kuranmankunyangka-palku? Wiya, ngayulunatju tjukarurungku Godaku katjanmananyi.

³⁷ Tjinguru ngayulu walytjangku kulira palyannyangkampa nyura palya mulamularingkuwiyangku wantima.

³⁸ Palu Mamalu wangkanyangkaṅa ngayulu kulira wiru tjuṭa palyani, ka nyura uti palyannyangka nyakula ngayuku mulamularingama. Palya ngayulu wangkanyangka nyura puṭu mulamularinganyi, palu miracle tjuṭa witulya pulkangku palyannyangka nyakula nyura uti mulamularingama. Panya nyura mulamularingkulampa uti mulapa kulilku Mamanya ngali kutjuṭu nyinanytja. Panya Mamanya ngayula tjungu nyinanyi, ka ngayulu Mamala tjungutu nyinanyi.”

³⁹ Kaya nyangatja kulira Jewku mayatja tjuṭa piruku Jesunya witintjikitja ilaringu. Palu paluru anangu tjuṭangka unguwanu kumpira anu, kaya puṭu witiṭu.

⁴⁰ Palulanguru Jesunya uru Jordanta itipirira malaku wirkanu ngura panya nganmanytju Johntu anangu tjuṭa baptise-katinytjala, munu nyinangilta nyara palula.

⁴¹ Kaya anangu tjuṭa pitjangu palulakutu kulintjikitja. Munuya kulira wangkangi, “Johntu panya miracle tjuṭa palyantja wiyangku wantingi munu wati nyanga palunya wangkara pulkanmanangi. Kala kulini panya paluru nganmanytju wati nyanga palunya tjakultjunktjytja tjukaruru mulapa.”

⁴² Kaya palulanguru tjuṭa mulatu kulira palumpa mulamularingu ngura nyara palulalta.

11

Lazarusanya Ilunyitja

¹⁻² Ka wati ini Lazarusanya munu palumpa malanypa kutjara Marynya pula Marthanya kulu ngura ini Piitjanila nyinangi. (Marynya minyama panyatja, panya paluru Jesunya panṭi wirungka tjina nyitinu munu mangkangka muninu.) Ka Lazarusanya pikatjararingu munu ngaringi ngurangka.

³ Ka pula kangkururangku witura iyanu wati kutjupa Jesula ankula ma-tjakultjunktjytjaku. Ka ankula ngura panya Jordanta munṅara

* 10:34 Psalm 82:6

Jesunya nyakula wangkangu, “Mayatja, nyuntumpa panya malpa wiru pika pulka ngarinyi.”

⁴ Ka paluru alatji wangkanyangka kulira wangkangu palumpa nintintja tjuangka, “Wiya, pika nyara palulanguru paluru ilunytja wiya. Palu nyangatja ngaranyi anangu tjuangka nyakula Godanya mirawañinytjaku witulya pulkanya munu ngayunya kulu walkuntjaku palumpa katja.”

⁵ Panya Jesunya Marthaku pulampa Mary-ku pulkara mukuringku-pai palumpa pulampa kutaku kulu,

⁶ palu pikatjara ngarinyangka kulira paluru wantira ma-nyinangi ngura palulatu tjintu kutjara.

⁷ Munu palulanguru tjintu kutjara wiyaringkula wangkangu palumpa nintintja tjuangka, “Palya, kuwarila malaku ara manta panya Judealakutu.”

⁸ Kaya nintintja tjuangu wangkangu, “Wiya, Nintilpai wanyu kulila, panya kuwarintaya Jewku mayatja tjuangu nguriningi atuntjikitjangu, kan nyaaku piruku malaku ananyi?”

⁹ Ka Jesulu wangkangu, “Wiya, wanyuya kulila, panya tjinturingkunyangka kalala wara ngarapai. Ka nyura kalala para-ngarapai punkantja wiya, panya kalalangku irnyannyangka nyura uti nyanganyi.

¹⁰ Palu mungangka para-ngarala nyura tili wiyangka punkalku.”

¹¹ Alatji Jesulu tjanala wangkara piruku wangkangu, “Nganampa panya malpa Lazarusanya kunkunaringu, kana kuwari ankula palunya wankalku.”

¹² Kaya nintintja tjuangu wangkangu, “Wiya Mayatja, tjinguru paluru kunkunairampa palyaringama paluru kutju.”

¹³ Palu panya Jesulu kunkunaryntja wangkara Lazarusanya ilunytja wangkangi, kaya nintintja tjuangu kuliningi kunkunpa mulapalku.

¹⁴ Ka Jesulu utingku tjanala wangkangu, “Wiya, Lazarusanya kunkunpa wiya ilungu alatjitu.

¹⁵ Palu palyana tjintu kutjara patara nyinangi palulakutu ankunytja wiya, panya nyanga palulanguru nyura nintiringkula ngayuku mulamularingkuku. Panya nyura nintiringkunytjakuna rawa nguwanpa patara nyinangi. Palu kuwarila ara nyara palulakutu.”

¹⁶ Ka nintintja kutju ini Thomasanya nyinangi tjanala tjungu. Paluru ini kutjupa Titimatjanya. Nyanga paluru wangkangu nintintja kutjupa tjuangka, “Palyala ankula nganampa nintilpaingka tjungu uwankara iluma.”

Jesulu Lazarusanya Wankara Pakaltjingantja

¹⁷ Kaya palulanguru Jesunya tjana ma-pitjangu Piitjanilakutu, munuya wirkara kulinu Lazarusanya miri nganmanytju kulpingka tjarpatjunkunytja. Ka wati paluru miri ngaringi tjintu kutjara kutjara kulpingka.

¹⁸ Ka ngura nyanga Piitjaninya panya Jerusalemala itingka,

¹⁹ kaya nyara palulanguru Judeanya ngurara tjuata pitjangu Marthanya pula Mary-nya pinikuringkula tjituru-tjituru nyinanyangka pukulmankunytjikitja.

20 Ka Marthanya Jesunya ngalya-ilaringkunyangka kulira pakara anu palumpa ngaparikatinytjikitja, ka Mary-nya walingka nyinangi ankunytja wiya.

21 Ka Marthalu Jesula ngaparikatira wangkangu, "Mayatja, nyuntu tjinguru ngura nyangangka nyinanyangkampa Kutanya ilunytja wiya wanka nyinama."

22 Palu ngayulu kuwari nyanga nyuntula kulira mulamularinganyi nyuntu Godala tjapinnyangka, ka paluru kuwari witulya pulkangkku kutjupa kutjupa palyalku nyuntumpa."

23 Ka Jesulu wangkangu, "Nyuntumpa kuta piruku ilunytjatjanu wankaringkula pakalku."

24 Ka Marthalu wangkangu, "Uwa, mulapa paluru ilunytjatjanu ngula pakalku tjintu malatjangka miri tjuța pakannyangka."

25 Ka Jesulu wangkangu, "Ngayuluna ilunyangka wankara pakaltjinalgalpaina, ka anangu ngayuku mulamularingkulampa ilunytjatjanu wankaringkula wanka mulapa nyinaku."

26 Munu anangu wanka nyinara ngayuku mulamularingkulampa ilunytja wiya Godala tjungu wanka titutjara nyinaku ngayulu purunypa. Kan tjukurpa nyangatja kulira mulamularinganyi?"

27 Ka wangkangu, "Uwa Mayatja, kulinina. Ngayulu mulamularinganyi nyuntumpa panya nyuntu Christanya Godaku katja, panya paluru iriti kalkunu nyuntu mantakutu pitjala anangu tjuța wankarunkunytjaku."

28 Mununku nyangatja wankara ankula altingu palumpa malanyapa Mary-nya munu palula kutju purkarangku tjakultjunu, "Awa! Nintilpaina panya pitjangu mununku nyuntumpa ngurini wangkanytjikitjangku."

29 Ka Mary-nya nyangatja wangkanyangka kulira pakara warpungkula anu Jesunya nyakunytjikitja.

30 Ka Jesunya panya palulatu kuwaripa ngarangi panya Marthalu palunya ngaparikatira nyakunytjala.

31 Kaya anangu tjuțangku walingka tjungu nyinanyatjanungku nyangu Mary-nya mapalku pakara ankunyangka munuya pakara wananu kulira, "Kulpikutu-manti ananyi ulanytjikitjampa."

32 Ka Mary-nya Jesula ma-wirkanu munu tjinangka watungarakatira ulara wangkangu, "Mayatja, nyuntu tjinguru ngura nyangangka nyinanyangkampa Kutanya ilunytja wiya wanka nyinama."

33 Ka Jesunya Mary-nya tjana palumpa malpa tjuța ulara waninyangka nyakula kurunpa tjituru-tjitururingu.

34 Munu wangkangu, "Yaaltjingka nyura tjunutjunu?"

Kaya wangkangu, "Mayatja, pitjala nyawa."

35 Ka Jesunya ulangu.

36 Kaya anangu tjuțangku ulanyangka nyakula wangkangu, "Nyawayaya, paluru palumpa malpaku pulkara mukuringanyi."

37 Palu tjarangkuya wangkangu, "Nyanga paluru panya wati kuru pati alalpai. Uti nyangangka nganmanytjulpi panya pitjala pampura palyarungunma ilunytjaku-tawara."

38 Ka alatji wangkanyangka Jesunya piruku pulkara tjituru-tjitururingu, munu kulpikutu ilaringkula nyangu tjaangka apu tjiwa pulka angkatjunkunytja.

39 Munu paluru wangkangu, "Apu palaya kitikitila."

Ka Marthalu pinkungku panya wangkangu, "Wiya Mayatja, wanti. Kuwari una pulka ngalya-pantinyi. Nyanga paluru panya tjintu kutjara kutjara ngaringi kulpi nyangangka."

40 Ka Jesulu wangkangu, "Wiya, panya wangkangunanta, nyuntu mulamularingkula nyakuku Godalu witulya pulkangku palyan-nyangka."

41 Kaya mulapatu apu panya tjaangka angkatjunkunytja kitikitinu. Ka Jesulu ira-nyakula wangkangu, "Mama, wirungkun ngayulu wangkanyangka titutjarangku kulilpai.

42 Ngayulu ninti panya nyuntunin titutjarangku kulilpai. Palu nyanga tjapininanta anangu nyanga tjungu ngaranytjalu tjana kulira mulamularingkunytjaku nyuntu panya ngayunya iyantjitjaku."

43 Munu nyangatja wangkara pulkara mirangu, "Lazarus! Ngalya-pakala!"

44 Ka wati panya miri paluru ngalya-pakanu mara tjina kulu mantarangka karpintja, yunpa kulu patintja mantarangka. Ka Jesulu tjanala wangkangu, "Araltjaraya mantara pala munu walatjura."

Jesunyaya Pungkunytjikitjangku Wangkanytja

(*Matthew-ku 26:1-5; Markaku 14:1-2; Luke-aku 22:1-2*)

45 Kaya anangu panya Judealanguru Mary-la pitjala nyinanytja tjutangku nyangu Jesulu palyannyangka munuya palumpa mulamularingu.

46 Palu tjarangkuya mulamularingkuwiyangku wantingi munuya Paratji tjutakutu malaku ankula tjanala ma-tjakultjunu panya Jesulu Lazarusanya pakaltjingantja.

47 Kaya Paratji tjutangku tjukurtjara kuranyitja tjutangku kulu tilpi tjuta altingu Jewku mayatja tjuta, munuya wangkara kulinigi, "Yaaltjingalkula wati nyangatja? Paluru panya miracle tjuta witulya pulkangku palyani, kaya tjuta palumpa mulamularinganyi.

48 Ka tjinguru nganaa palunya paintja wiyangku wantinyangkampa anangu winki palumpa mulamularingkuku, ka Rome-aku mayatja tjutangku kulira warmala iyalku, kaya pitjala nganampa timpula piluntara wiyalku, munu nganananya kulu iluntankuku."

49 Ka wati Kayapatjanya tjukurtjara tjutaku mayatja pulka tjanala tjungu nyinangi munu alatji tjanala wangkangu, "Nyura ngurpa alatjitu.

50 Nyaaku nyura rawangku putu kulini? Uti nyura nyanga alatji kulinma panya wati kutju palya ilunyi nganampa ngalkilpa anangu Jew uwankaraku, nganaa uwankara wiyaringkunytjaku-tawara."

51 Nyanga alatji palurunku walytjangku kulira wangkanytja wiya. Palu Godalu palula nintinnyangka kutju paluru tjukurtjara pulkangku tjukarurungku tjakultjunu panya Jesunya ngalkilpa anga-ilunytjaku anangu Jew tjutaku.*

* 11:51 Tjukurpa nyanga palunya wati tjukurtjara pulkangku watarkungku wangkangi, panya paluru kampa kutjupa kuliningi Rome-anya ngurara tjutangka-tawara Jesunya iluntankunytjikitjangku.

⁵² Palu tjanampa kutju wiya Godaku walytja uwankaraku anangu manta winkitjaku Jesunya anga-iluku, paluru tjana uwankara kutjuringkula walytjarara walytjarara nyinanytjaku.

⁵³ Kaya tjinu nyara palalanguu Jewku mayatja pulka tjutangu tjana kutjuringkula kukanymanangi Jesunya iluntankunyitjikitjangku.

⁵⁴ Ka nyangatja kulira Jesunya ngura Jerusalemala tjanala ngura ititja tjutangka piruku uti para-ngaranytja wiya panya tjana nyakunyitjaku-tawara. Munu ngura nyara palunya tjananya wantikatira anu tawunu panya ini Ipuraimalakutu ilytjingka tjangati,* munu ngura nyara palulalta nyinangi palumpa nintintja tjutangka tjungu.

⁵⁵ Ka Jew tjutaku inma Katuwanu Ankunyjtjanya ngaranytjaku ilaringu, kaya anangu tjuta ngura winkinguru Jerusalemalakutu mapitjangu inma kuwaripangka puntu munu mantara kulu paltjira inmaku ritiringkunyitjikitja.

⁵⁶ Kaya nyara palula ara Jewku mayatja tjutangu Jesunya nguriningi munuya timpulangka tjunguringkula Jesunya puu nyakula tjananku ngaparku wangkangi, "Yaaltji nyura kulini? Paluru tjinguru inmaku pitjanytja wiya ma-nyinanyi."

⁵⁷ Palu panya tjukurtjara kuranyitja tjutangu Paratji tjutangu kulukuluya anangu tjutangka wangkangu, "Jesunya nyakulampaya ngananala pitjala tjakultjura." Alatji tjana wangkangu kutjupangu Jesunya nyakula tjakultjungkunyangka ankula palunya witintjikitjangku.

12

Jesunya Mary-lu Panti Wirungka Tjina Nyitintja

(*Matthew-ku 26:6-13; Markaku 14:3-9*)

¹ Ka inma panya Katuwanu Ankunyjtjanya ilaringangi. Ka tjirirpi mankur-mankurpa kuwaripangka Jesunya anu ngura Pitjanilakutu. (Nyara palula panya Jesulu Lazarusanya nganmanytju ilunyangka pakaltjinganu.)

² Kaya Jesunya nyakula palumpa malpa tjuta palumpa pulkara pukularingu munuya mungartjirinyangka mai pulka palyanu palula tjunguringkula ngalkuntjikitjangku. Ka Marthalu tjananya mai para-ungangi, ka Lazarusanya tjana uwankaratu para-nyinara wananu Jesula tjungu.

³ Ka nyanga palula malangka Mary-lu pakara uwila wiru pantipai mantjira ngalya-katingu patala warangka. Uwila nyanga paluru mani pulkangka payamilantja. Ka Mary-lu patala alara uwila panya palunya Jesula tjinangka tjutinu munu mangka araltjara tjina muninu mangkangka. Ka wali nyara palula ruuma uwankarangka wiru mulapa pantingu.

⁴⁻⁵ Ka nintintja kutjupa Judas Kariyatanya tjanala tjungu nyinangi. (Nyanga paluru panya ngula Jewku mayatja tjuta Jesunya witintjaku nintinu.) Munu paluru wangkangu Mary-nya, "Ai! Uwila palatja mani pulkatja. Utin tjalamilanma pupatjura wiyantja wiyangku. Tjingurun tjalamilara mani pulka mantjinma munun ngaltutjara tjuta ungama."

* **11:54** Ngura Ipuraimanya panya tawunu nganytjar-nganytjarpa mulapa ngarangi, ka tawunu kutjupa munkara ngaranytja wiya manta ilytji kutjulta ma-ngarangi.

⁶ Palu Judasanya ngaltutjara tjuṭaku ngalturingkupai wiya, munu tjukurpa nyanga palunya ngunti wangkangi mani tjanampa kutitjunkturpaingku. Panya paluru nintintja tjuṭaku yakutja manitjara kanyilpai munu nyara palulanguru kutjupa-ara kutitjunkturpai.

⁷⁻⁸ Ka Jesulu wangkangu, “Wanti minyma nyanga palunya pail-wiyangu. Panya paluru tjintu nyanga kuwariku uwila wiru pantipai kanyiningi ngayula nganmanytju tjutintjikitjangku ngula panya kurulta ngarinytjaku.* Ka panya ngaltutjara tjuṭa nyurala titutjara nyinanyi, palu ngayulu nyurala rawa nyinanytja wiya.”

Lazarusanya Pulanya Pungkunyitjikitjangku Wangkanytja

⁹ Kaya nyara palula ara anangu winkingku kulinu Jesunya ngura Piitjanila nyinanytja. Munuya palunya nyakunyitjikitja anu, palunya kutju wiya palu Lazarusanya kulu. Panya Jesulu nganmanytjulpi ilunytjitja pakaltjingantja kulintjatjanuya nyakunyitjikitja mukuringangi.

¹⁰ Kaya palulanguru tjukurtjara kuranyitja tjuṭangu tjunguringkula wangkara kulinigi Lazarusanya pulanyatu iluntankunyitjikitjangku.

¹¹ Panya Lazarusanya miri pakaltjingannyangkaya anangu winki Jesuku mulamularingu munuya Jewku mayatja tjuṭa kulilwiyangu wantingi. Kaya palulanguru kukanymanu pungkunyitjikitjangku.

Jesunya Jerusalemalakutu Tangkiyingka Tatira Ankunyitja

(Matthew-ku 21:1-11; Markaku 11:1-11; Luke-aku 19:28-40)

¹²⁻¹³ Ka tjintungka Jesunya pakara ma-pitjangi Jerusalemaku. Kaya anangu tjuṭa mulapa Jerusalemala nyinangi inma panya Katuwanutjaku. Munuya Jesunya ngalya-pitjanyangka kulira uwankara ngaparikatingu parkatjara, nyaipi lipi tjuṭa katara katara palunya pukularira walkuntjikitja. Munuya pukularira mirara wangkangi, “Godanyala walkura mirawanima!

Ka Mayatja God, nyanga palunya pulkara pukulmanama,

panya nyuntu palunya iyanu nganananya mayatarira kanyintjaku,

Israelku mayatja pulka nyinanytjaku.”

¹⁴ Ka Jesulu tangkiyi kulunypa ngaranyangka nyakula tatira ma-pitjangu, panya nyiringka iriti walkatjungkunyitja ngaranyi nyanga alatji,

¹⁵ “Jerusalemanya ngurara tjuṭaya nguluringkunyitja wiya raparingama!

Nyawaya nyara nyurampa Mayatja Pulka pitjanyi tangkiyi kulunypangka tatira.” *

Ka Jesunya ara nyanga iriti walkatjungkunyitjawanu tangkiyingka tatira ma-pitjangi.

¹⁶ Kaya nganmanytju palumpa nintintja tjuṭangu nyanga alatjirinyangka nyakula puṭu kulinigi, “Nyaakuya nyangatja alatjingani anangu winkingku pulkara mirawanira tangkiyingka pitjanyangka?” Palu ngula Mamalu palunya ilkarikutu katinyangka kutjuya kulira nintiringu, “Munta-uwa panya, panya iriti walkatjunu wangkatjarangu ara nyanga palunya, ka panyaya tjukarurungku

* **12:7-8** Jew tjuṭangkuya tjakangku anangu ilunyangka malangka uwila wiru pantipai puntungka tjutitpai wiruringkula ngarinytjaku. Ka Jesulu palurunku ilunytjikitjangku kulira nyangatja nganmanytju wangkangi. * **12:15** Tjakaṛayaku 9:9

anangu winkingku mirawaningi palunya tangkiyingka tatira ankunyangka.”

¹⁷⁻¹⁸ Uwa, anangu winkiya tjunguringkula ngaparikatingu Jesunya nyakunytjikitja. Panya tjana kulinu Jesulu kunyu Lazarusanya miri kulpinguru pakaltjinganu. Kaya kutjupa tjuṅangu nyara palula ila ngaranytjatjanungku nyangu Lazarusanya pakannyangka munuya anangu tjuṅangka rawangku tjakultjunangi nyakunytjatjanungku. Kaya tjukurpa palunya kulintjatjanu Jesulakutu ngaparikatingu anangu winki mulapa.

¹⁹ Kaya Paratji tjuṅangu tjananya ankunyangka nyakula wangkangi, “Nyawaltaya wanyu! Nyara anangu winki mulatuya palunya wanani. Kala nyuntu nganana puṭu tjananya markuni.”

Jesulu Palurunku Ilunytjikitjangku Wangkanytja

²⁰ Kaya tjara kutjupa Jew wiya tjuṭa pitjangu Jerusalemalakutu inma Katuwanutjaku Godanya walkuntjikitja.

²¹ Munuya Jerusalemala nyinara Jesunya nyakunytjikitja mukuringangi. Munuya ankula nintintja kutjungka Philipala wangkangu, “Wati wiru, nganana Jesunya nyakunytjikitja mukuringanyi.” (Wati nyanga Philipanya panya tawunu ini Pitjaitalanguru uru panya Galileela itingka.)

²² Ka Philipalu ankula Andrew-la wangkangu, munu pula ankula Jesula tjakultjunu.

²³ Ka Jesulu nyanga alatji wangkangu, “Panyatja ilaringu panya ngayunya Watiku Katjanya pulkara mirawaninytjaku.

²⁴ Mulamulangkuṅa nyurala wangkanyi, panya uninypa mantangka tjunkuwiyangku wantinyangka uninypa paluru rawa ngarira kuraringanyi munu puṭu pakara maitjararinganyi. Palu panya uninypa mantangka tjunkunyangka miri panya nganmanyitja wiyaringkupai, ka kutjupa unngutja kuwaritja pakara pulkaringskula maitjararingkupai.

²⁵ Ka anangu kutjupangku tjinguru alatji kulilku, ‘Ngayulunatju pulkara pukularinyi mantangka nyanga nyinara. Wanyu kanatju ngayulu walytjangku atunymanama.’ Palu alatji kulira paluru ngayunya wantinyi, ka Godalu palunya ngula ilunyangka puṭu wankani palula tjunguringkula titutjara nyinanytjaku. Ka anangu kutjupangku tjinguru alatji kulilku, ‘Nyangatjana mantangka unytju kutju nyinanyi. Wanyu kana Jesunya titutjarangku wanama, kani palya kutjupangku ngayunya iluntankuku.’ Ka alatji kulinnyangka Godalu ngula ilunyangka palunya wankara pakaltjingalku palula tjungu titutjara wanka nyinanytjaku.

²⁶ Uwa, anangumpa ngayuku warkarinytjikitja mukuringkula uti paluru ngayunya wanganarangku kulira wanama. Nyara palulanguru paluru ngayula tjungu titutjara nyinaku. Katju Malmalu palunya nyakula palyanmankuku ngayuku wirura wanganara warkarinyangka.

²⁷ “Kuwarina kurunpa tjituru-tjitururira puṭu kulini, ‘Nyaana wangkaku?’ Tjinguruna wangkaku nyanga alatji, ‘Mama, atunymarani kanyinma ilunytjaku-tawara.’ Palu wiya, nyanga palunyakitja panya alatjuna pitjangu mantakutu.

28 Mama, nyuntunku tjanala nintila panya nyuntun pulka mulapa uwankarangka waintarinytja.”

Ka palulanguru ilkaringuru wangkangu, “Uwa, nganmanytjuna tjanala nintinu mununa piruku nintilku ngula uwankarangku nyakunytjaku.”

29 Kaya anangu tjutangku palula ila ngaranytjatjanungku kulinu ilkaringuru wangkanyangka, munuya tjarangku wangkangu, “Tjinguru palatja mina tuuni!” Kaya kutjupa tjarangku wangkangu, “Wiya, tjinguru angeltu palula wangkanyi.”

30 Ka Jesulu tjanala wangkangu, “Wiya, nyara ilkaringuru wangkangu ngayulu kulintjaku wiya, palu nyura kulira mulamularingkunytjaku.

31 Panya kuwari Godalu anangu uwankara manta winkingka ngurkantara tjarantjaku ngaranyi. Munu paluru manta winkiku mayatja Satangga ma-waniku.

32 Panya ngayunyaniya katura utitjungkuku, kana nyara palula ara ngayulu anangu uwankara kampa kutjupankuku kulira ngayulakutu pitjanytjaku.”

33 Nyanga alatji Jesulu tjanala utingku tjakultjunangi ngula palunya punu katakutjarangka wakara utitjungkunytja.

34 Kaya anangu tjutangku tjukurpa nyanga palunya kulira wangkangu alatji, “Panya iriti walkatjungkunytja nyiringka ngarinyi alatji panya Christanya kunyu Godalu panya kalkuntjanya ilu wiya alatjitu wanka titutjara nyinaku. Kan nyaaku wangkanyi Watiku Katja punungka utitjungkunytjaku? Ngananya wanyu Watiku Katja paluru?”

35-36 Ka palulanguru Jesulu tjanala wangkangu alatji, “Ngayulu tili purunytju irnyara nyuranya nintini Godaku nintiringkunytjaku. Palu tili nyanga paluru kuwari nguwanpa irnyara wiyaringanyi, ka nyura uti tili ngaranyangka Godalawanu tjukururu nyinama tilingka purunypa. Panya tili wiyaringkunyangka mungawalurinyi, ka panya anangu mungawalurungka ngarala putu kulini, ‘Yaaltjikutuna ankuku?’ Ka pala palula-tawara nyura uti ngayuku mulamularingama tili panya Godaku ngayulu nyurala nyinanyangka, munu nyara palulanguru mulamularingkula nyura ngayula tjunguringkula nyinaku tilingka purunypa ngayuku walytja tjuta.” Munu tjukurpa nyanga palunya wangkara wiyaringkula Jesunya kumpira anu kutjuringkula.

Jew Tjuta Jesuku Rawa Putu Mulamularingkunytja

37 Uwa, Jesulu tjuta-arangku witulya pulkangku miracle tjuta palyanangi anangu tjutangka mirangka. Kaya uti nyakula palumpa mulamularingama, palu tjana kulira mulamularingkunytja wiyangku wantingi.

38 Palu wantinytja nyanga palunya Godaku wangkatjarangku Aitjayalu iriti walkatjunu nyanga alatji, “Kulilaya! Ngayulu panya nyurala tjukurpa wangkanyangka nyura uwankarangku kulira mulamularingkunytja wiyangku wantingi.

Munu panya nyura Godalu witulya pulkangku palyannyangka nyakunytja wiyangku wantingu.” *

* 12:38 Aitjayaku 53:1

³⁹ Nyanga palulanguruya puṭu mulamularingangi panya Aitjayalu nganmanytju Godala kulintjatjanungku walkatjunu. Munu panya paluru piruku walkatjunu nyanga alatji,

⁴⁰ "Godalu tjananya kuru patinu nyakunyjtaku-tawara.

Munu tjananya pina patinu pina alangku kulintjaku-tawara.

Alatji Godalu wangkangu,

'Paluru tjana ngayulakutu malaku aruringkunyjtja wiya ngayulu tjananya palyarunguntjaku.' " *

⁴¹ Nyangatja Aitjayalu nganmanytju walkatjunu Godalu palunya nintingu tjakultjungkuyangka ngula Jesunya witulya pulka utiringkunyjtaku. Palulanguru Aitjayalu tjukurpa nyanga Jesunyatjara nganmanytju kulintjatjanungku walkatjunu.

⁴² Palu tjtaya Jesuku mulamularingu, Jewku mayatja kutjapatjara kulukulu. Palu paluru tjana mulamularingkunyjtjanungku kutjupa tjtangka para-tjakultjungkunyjtja wiya, panya paluru tjana Paratji tjtaku nguluringangi palunya tjananya wali inmatjanguru paira iyantjaku-tawara.

⁴³ Utiya tjakultjunama alatjitu unngu kutju kulintja wiyangu, Godanya tjanampa pukularinytjaku. Palu tjana wantingi Paratji tjtuta kutju tjanampa pukularinytjaku kulira.

Jesuku Tjukurpa Wantinyangka Godalu Ngurkantankupai

⁴⁴ Ka Jesulu pulkara katuwanungku wangkangu, "Nyura ngayuku mulamularingkulampa ngayuku kutjuku mulamularingkunyjtja wiya, palu panya ngayunya iyantjtjaku kulu mulamularinganyi.

⁴⁵ Panya nyura ngayunya nyakula nyara ngayunya iyantjanya kulu nyanganyi.

⁴⁶ Ngayuluna mantakutu pitjangu tili irnyantjikitja, anangu tjtuta mungawalurungka nyinanytjaku-tawara. Panya tjana ngayuku mulamularingkula tilingka nyinaku.

⁴⁷ Palu anangungku ngayuku tjukurpa kulira wantinyangka ngayulu pala palunya ngurkantara kuranmankunyjtja wiya. Panya ngayulu anangu tjtuta wankarunkunyjtjikitja pitjangu ngurkantara tjarantjikitja wiya.

⁴⁸ Palu tjinguru anangungku ngayuku mulamularingkuwiyangu wantinyi munu tjukurpa ngayuku anani, ka kutjupa palumpa patara nyinanyi palunya ngula tjintu malatjangka ngurkantankunyjtjikitja. Panya nyara palula arangka Godalu palunya kura ngurkantara pailku ngayuku tjukurpa kulira wantinytjtjanguru.

⁴⁹ Palu ngayuluna kutjungku kulira wangkanytja wiya, panya Mamalu ngayunya iyanu palumpa tjukurpa kutju wangkanytjaku kana tjukurpa palunya kutju tjakultjunanyi palula kulintjatjanungku.

⁵⁰ Ngayulu ninti panya palumpa tjukurtu anangu tjtuta wankaru kanyilpai. Ka nyura tjukurpa palumpa mulamularingkulampa wanka titutjara nyinaku palula tjungu. Palulanguruna Mamalu ngayula wangkanyangka kutju tjakarurungku wangkapai."

13

Jesulu Palumpa Nintintja Tjtuta Tjina Paltjintja

* 12:40 Aitjayaku 6:10

¹ Ka panya inma Katuwanu Ankunytjanya ilaringu. Ka Jesulu unngu kuliningi, “Kuware ilaringu ngayulu manta nyangatja wantikatira Mamalakutu ankunytjaku.” Munu paluru palumpa panya malpa tjuta unngu kuliningi, panya paluru tjanampa rawa pulkara mukuringangi ilunytjakutu alatjitu.

² Ka munga pala palula Jesulu tjana palumpa nintintja tjutanku kulu tjunguringkula mai ngalkuningi. Ka mamu Satantu panya nganmanytju Judasanya wituwitu Jesunya manikitjangku Jewku mayatja tjuta nintintjaku. (Judasanya panya Simon Kariyataku katja.)

³ Ka Jesunya ninti panya palumpa Mamangku palunya mayatja pulka tjunu uwankarangka waintarira witulya pulka nyinanytjaku. Munu palurunku nintingu kuliningi panya paluru Godalanguru pitjanytjatjanungku Godalakutu malaku ankunytjikitjangku.

⁴⁻⁵ Munu palulanguru paluru pakara mantara katutja araltjanu, munu taula mantjira palurunku karilpa karpinu munu pitingka mina tjutinu. Munu palulanguru tjananya kutju kutju tjina paltjiningi, palumpa nintintja tjuta, munu tjananya taulangka tjina muniningi.

⁶ Munu para-paltjira wanara Simon Peterla wirkanu, ka Peterlu wangkangu palula, “Nyaa Mayatja, ngayunya kulun tjina paltjini?”

⁷ Ka Jesulu wangkangu, “Kuwarin putu kulini ngayulu nyanga tjina nyuranya paltjinnyangka. Palu ngulan kulini nyanga palunya.”

⁸ Ka Peterlu wangkangu, “Wiya, paltjintja wiyangkuni wantima!”

Ka Jesulu ngapartji wangkangu, “Palu ngayulu nyuntunya paltjintja wiyangku wantinyangkampa nyuntu ngayuku walytja wiya alatjitu.”

⁹ Ka palulanguru Simon Peterlu wangkangu, “Uwa Mayatja, ngayunya tjina kutju paltjintja wiyangku, mara, kata kulu uwankara paltjila.”

¹⁰ Ka Jesulu wangkangu, “Tjinguru anangungku walytjangku puntu winki nganmanytju paltjintjatjanungku piruku paltjintja wiya, panya alatjitu paluru kilina wiru nyinanyi. Palu tjina kutju palya paltjini iwarangka pitjanytjatjanungku. Ka nyura uwankara kilina nyinanyi, palu nyuralanguru kutju kilina wiya.”

¹¹ (Panya Jesulu nintingu kuliningi nganalu kuware Jewku mayatja tjutangka palunya witintjaku nintilku. Palulanguru paluru wangkangu, “Panya nyuralanguru kutju kilina wiya nyinanyi.”)

¹² Munu Jesulu tjananya tjina paltjira wiyaringkula mantarangka malaku tjarpangu munu arangkatu nyinakatingu. Munu tjanala wangkangu, “Nyura wanyu nyangatja tjukarurungku kulini ngayulu nyanga nyuranya tjina paltjintja?”

¹³⁻¹⁴ Kulilaya! Panya ngayunya nyura mayatjanmankupai, munu panyani nyura wangkapai ‘Nintilpai.’ Nyangatja nyura tjukarurungku wangkapai, panya mulapa ngayulu nyurampa mayatja, munu panyana nyuranya nintilpai. Palu kuware nyangana nyurampa warkaripai purunytju nyuranya tjina paltjinu, ka nyuranku uti palu purunypatu tjina paltjinma.

¹⁵ Alatjituna nyurampa utira wantingu nyura nyakunytjatjanungku ngayunya arkara palu purunypatu nyura palyantjaku mayatjamaytjangku wiya panya waraka purunytju.

¹⁶ Tjukarurungkuna nyurala wangkanyi panya wati warkaripai palumpa mayatjangka waintarinytja wiya. Ka palu purunypatu

wati panya tjakulpa iyantjanya pulka wiya, palu wati panya witura iyalpainya pulka mulapa palula waintara.

¹⁷ Uwa, kuwari nyanga nyura nintiringu tjukurpa nyangaku, panya ngayulu mayatjangku nyuranya tjina paltjira nintinu nyura palu purunypatu palyantjaku. Ka nyura nintiringkunyjtjanungku ngayulu arkara palyannyangka Godalu nyuranya pukulmankuku.

¹⁸ “Ka panya ngayulu nyuranya wangkangu nyura uwankara kilina ngaranytja. Palu uwankara wiya, panya kutju nyuralanguru kura ngaranyi. Ngayulu ninti nyurampa ngayuku nintintja tjutaku, panya ngayulu nganmanytju nyuranya ngurkantanu. Palu panya tjukurpa nyiringka iriti walkatjunkunyitja ngaranyi nyanga alatji, ‘Wati malpangku ngayula tjungungku mai ngalkupai, nyara paluru kampa kutjuparira ngayuku kuraringu.’ Ka tjukurpa nyanga paluru mulapa kuwari nguwanpa utiringanyi.

¹⁹ Kana nyangatja nyurala nganmanytju tjakultjunanyi tjukurpa nyara paluru utiringkunyitja kuwaripangka. Ka nyura malangka kulira ngayuku mulamularingkuku, panya ngayulu panya paluru, Godalu panya kalkuntjanya.

²⁰ Tjukururungkuna nyurala wangkanyi. Ngayuluna tjakulpa tjuta witura iyalpai ngayuku tjukurpa tjakultjunkunyitjaku. Ka kutjupangku anangu nyara palunya tjananya pukularira altirampa ngayunya kulu pukultu altinyi. Munu paluru ngayunya altirampa ngayuku Mama kulu pukultu altinyi panya ngayunya iyantjanya.”

Jesulu Judasanya Kuraringkunyitja Nganmanytju Wangkanytja
(*Matthew-ku 26:20-25; Markaku 14:17-21; Luke-aku 22:21-23*)

²¹ Munu nyanga palunya wangkara wiyaringkula Jesunya kurunpa pulkara tjituru-tjitururingu munu tjanala wangkangu, “Tjukururungkuna nyurala wangkanyi. Kutjungku nyanga ngananalanguru Jewku mayatja tjutangka nintilku ngayunya witintjaku.”

²² Kayanku nintintja tjutangku nyanga palunya kulira yunpa kutjupa kutjuparira ngapar-ngaparku nyangangi putu kulira, “Ngananya nyanganku wangkanyi?”

²³ Ka nintintja kutju Jesula itingka anta-ngaringi palumpa panya malpa mulapa.

²⁴ Ka wati nyara palula Simon Peterlu marangku tjapira wangkangu, “Wati-tjapila! Ngananya palangku wangkanyi?”

²⁵ Ka wati paluru itingka anta-ngarinytjatjanungku ma-ilaringkula palula tjaalymara tjapinu, “Mayatja, wati paluru ngananya?”

²⁶ Ka Jesulu wangkangu, “Nyangamani. Kuwarina mai mantjira tjalatjura unganyi wati panya palunya. Nyara paluru ni witintjaku nintilku.” Munu mulapatu mai mantjira tjalatjura ungu Judasanya, Simon Kariyataku katja.

²⁷ Ka paluru marakatira mai mantjinnyangka nyara palula ara Satangga wati nyanga palula tjarpangu. Ka Jesulu wangkangu palula, “Mapalku ankula palyala panya nyuntu palyantjikitjangku kulintjatjanungku.”

²⁸ Kaya uwankarangku tjungu nyinanytjatjanungku tjukurpa nyanga palunya putu kulinigi Jesulu Judasala wangkanyangka.

29 Kutjupa tjarangku kuliningi, “Tjinguru nyanganku Judasanya wituni ankula nganampa mai mantjintjaku, panya paluru yakutja manitjara nganampa kanyilpai.” Kaya kutjupa tjarangku kuliningi, “Tjinguru palunya wituni ankula anangu ngaltutjara tjuta mani mangkunyjtaku.”

30 Ka Judasalu mai lampi Jesulu panya ungkunyangka mantjira ngalkunu munu pakara mapalku anu urilkutu. Ka manta maruringkula munga ngarangi.

Jesulu Tjananku Mukuringkunyjtaku Wangkanytja

31 Ka Judasanya ankunyangka malangka Jesulu wangkangu palumpa nintintja tjutangka, “Kuwarina Watiku Katjangku wiru mulapa palyalku, kani Godalu pulkara mirawaniku. Ka wiru mulapa ngayulu palyannyangka anangu tjutangka Godanya palu purunypatu pulkara mirawaniku.

32 Uwa, tjana ngayulanguru Godanya pulkara mirawaniku, ka nyara palula malangka Godalu ngayunya ngapartji mirawaniku anangu tjutangka mirangka, munu paluru rawangku patantja wiyangku mapalkungku palyalku kuwaritu.”

33 Munu tjanala piruku wangkangu, “Walytja tjuta! Ngayulu kuwari tjukutjuku nyurala nyinanytjatjanu ananyi. Ka nyura ngayunya ngurilku, munu nyura ngurira putu nyakuku, panya ngayulu nganmanytju wangkangu Jewku mayatja tjutangka nyanga alatji, ‘Ngayulu nyara ankunyjtjakutu nyura putu ngayunya ma-wanalku.’ Alatjina tjanala wangkangu, kana kuwari tjukurpa pala palunya nyurala kulu wangkanyi alatji, ‘Nyura ngayunya putu wanalku ngayulu ankunyjtjakutu.’

34 “Palu kuwarina tjukurpa kuwaritja nyurala wangkanyi. Uti nyuranku mukulya pulka nyinama. Panya ngayulu mukulyangku nyuranya atunymara kanyini, palu purunypatu nyuranku uti mukulyangku kanyinma.

35 Panya nyuranku alatji ngaltunytju pulka mukuringkunyangka nyakula anangu winkingku nintiringkula kulilku nyura ngayuku nintintja tjuta nyinanyangka.”

Jesulu Wangkanytja Peternya Ngula Palumpa Ngurparingkunyjtaku (Matthew-ku 26:31-35; Markaku 14:27-31; Luke-aku 22:31-34)

36 Ka Simon Peterlu tjapinu, “Mayatja, yaaltjikutun ananyi?”

Ka Jesulu wangkangu, “Wiya, nyuntu kuwari ngayunya putu ma-wanalku nyanga ngayulu ankunyangka. Palu ngulanin wanalku.”

37 Ka Peterlu wangkangu, “Mayatja, nyaakunanta wanalwiyangku wantir'iyalku kutju ankunyjtaku? Ngayulu mukuringanyi nyuntunya wanantjikitja, mununa palya nyuntunya wanara nyuntumpa ngalkilpa iluku.”

38 Ka Jesulu wangkangu Peterla, “Palu mulamulangkun wanyu wangkanyi ngayuku ngalkilpa ilunytjikitjangku? Kulila, nyuntulana kuwari tjukarurungku wangkanyi, panya tjintu pakantja kuwaripangka tjulpu panya tjuki wangkapai, ka munga nyanga kuwari tjulpu paluru wangkanytja kuwaripangka nyuntu ngayuku mankurara ngurparingkuku.”

14

Jesunya Iwaranya Mamalakutu

¹ Munu piruku Jesulu nintintja tjutangka wangkangu, “Kurunpa iluru-ilururinytja wiyaya nyinama. Godakuya mulamulariwa, ngayuku kulu.

² Ngayuku Mamaku ngurangka ngura tjuta mulapa ngaranyi, kana nyara palulakutu ankula ngura tjuta nganmanytju palyalku nyurampa. Nyangatjana nyurala tjukarurungku wangkanyi, panya mulapa ngura tjuta nyara palula ngaranyi. Ngayuluna nyurala ngunti wangkanytja wiya.

³ Mununa ankula ngura nyurampa-warara palyantjatjanu malakulta pitjaku, mununa nyuranya mantjira katiku ngura nyara palulakutu nyura ngayula tjungurungkula nyinanytjaku.

⁴ Panya nyura ninti iwara panya ngayulu ankunytjitjaku.”

⁵ Ka Thomasalu wangkangu, “Mayatja, nganana ngurpa ngura nyara palumpa nyuntu pala ankunytjitjaku. Munula iwaraku kulu ngurpa. Yaaltjingarala nintiringkuku iwara nyara palumpa?”

⁶ Ka Jesulu palula wangkangu, “Ngayuluna iwaranya, panya nyura ngayulawanungku kutju uwankara tjukarurungku kulilku munu nyura ngayula kutju kulira wankaru Godala wirkankuku. Panya ngayulu kutjungku nyuranya wirkakatiku Mamalakutu, kutjupangku wiya.”

⁷ Munu piruku tjanala wangkangu nyanga alatji, “Nyura tjinguru ngayuku ninti pulka nyinarampa ngayuku Mamaku kulu ninti nyinama. Palu nyanganguru nyura Mamaku ninti nyinanyi, munu nyura palunya nyangu.”

⁸ Ka Philipalu alatji wangkangu, “Mayatja, wanyulanya Mama palunya nintinma, kala nyakula pukularima.”

⁹ Ka Jesulu wangkangu, “Philip, palu wanyu nyuntu ngayunya nyakunytja wiyatu? Panya ngayulu nyurala tjungu titutjara parangarangi, kan ngurpa titutjara nyinanyi? Kulila, kutjupangku ngayunya nyakula Mamanya kulu nyanganyi. Kan nyaakitjangku wangkanyi ngayulu Mamanya nyurala nintintjaku?”

¹⁰ Palu putun kulini? Mamanya ngali kutjutu tjungu nyinanytja. Panya ngayulu nyurala aratja ma-tjakultjunkupai Mamala kulintjatjanungku. Panya paluru ngayula unngu nyinanyi mununi paluru ngayunya witulyankupai wara palumpa palyantjaku.

¹¹ “Ala, uti nyura mulamularingama ngayulu wangkanyangka, panya Mamanya ngali kutjutu nyinanyi. Palu tjinguru wangkanyangka putu mulamularingkula nyura uti miracle panya tjuta kulinma ngayulu witulya pulkangku palyantja, munu palunya tjananya nyakunytjatjanu mulamularingama ngayulu nyanga wangkanytjitjaku.

¹² Tjukarurungkuna nyurala wangkanyi, anangumpa ngayuku mulamularingkulampa paluru ngayulu purunytju miracle tjuta witulyangku palyalku. Munu nyanga ngayulu palyantjanya purunypa kutju wiya kutjupa pulka mulapalta palyalku witulya pulkangku ngayula waintara, panya ngayulu Mamalakutu malaku ananyi.

¹³ Ka nyura ngayuku walytja nyinara ngayula tjaminnyangka ngayulu kulira nyurampa palyalku. Kaya anangu tjutangku ngayulu palyan-nyangka nyakula Mamanya pulkara mirawaniku witulya pulkanya.

¹⁴ Uwa, nyura ngayuku walytja tjutangku kutjupa kutjupa tjutaku ngayula tjaminnyangka ngayulu nyurampa palyalku alatjitu.”

Jesulu Kurunpa Milmilku Kalkuntja

¹⁵ Munu piruku Jesulu tjanala wangkangi palumpa nintintja tjutangka, “Nyura ngayuku mukuringkulampa uti wanganarangku kulira palyanma ngayulu wangkanyangka.

¹⁶ Kana ngayulu Mamala tjaminiku, ka nyuranya unkkuku Kurunpa Milmilnga nyuranya alpamilantjaku munu nyurala tjungu titutjara nyinanytjaku.

¹⁷ Ka Kurunpa nyanga paluru nyuranya tjukurpa tjukururu nintilku. Palu anangu panya watarku nyinapai tjuta Kurunpa nyanga palumpa putu mulamularingkupai. Panya paluru tjana palunya putu nyanganyi munuya palumpa ngurpa nyinanyi. Kurunpa nyanga paluru mulapa nyurala tjungu titutjara nyinanyi. Nyara palulanguru nyura palumpa ninti nyinanyi.

¹⁸ Ngayulu nyuranya urtjunu titutjarangku wantikatinytja wiya. Ngayulu ankunytjatjanu malaku pitjaku.

¹⁹ Kuwari nguwanpana ananyi. Kaniya watarku nyinapai tjutangku piruku nyakunytja wiya. Palu nyura ngayunya wanalpai tjutangku piruku nyakuku. Panya ngayulu Mamala tjungu titutjara nyinanyangka nyura kulu palula tjungu titutjara nyinaku.

²⁰ Ka nyara palula ara nyura nintingku nyakula kulilku panya Mamanya ngali kutjutu nyinanytja, munu palu purunypatu nyura kulilku panya nyuntu nganana junguringkula kutjutu nyinanytja.

²¹ “Ngananya tjana wanyu ngayuku pulkara mukuringanyi? Wiya panya ngayuku tjukurpa wanganarangku kulira palyalpai tjuta, nyara paluru tjana ngayuku pulkara mukuringanyi. Ka Mamanya kulu palumpa tjanampa pulkara mukuringanyi tjana ngayuku mukuringkanyangka. Kana ngayulu kulu palumpa tjanampa pulkara mukuringkuku mununatju tjanala walytjangku nintilku.”

²² Ka wati panya Judas kutjupangku, Kariyatanya wiyangku, palula wangkangu, “Mayatja, nyaakun ngananala kutju utiringkunytjikit-jangku wangkanyi? Ka anangu kutjupa tjutampaya wanyu watarku alatjitu nyinama, nyuntunya nyakuwiya alatjitu?”

²³ Ka Jesulu wangkangu alatji, “Kutjupa ngayuku pulkara mukuringkulampa paluru tjukurpa ngayuku wanganarangku kulira palyalku. Ka palumpa Mamanya mukuringkuku, kali ngali palula titutjara ngurararira nyinaku.

²⁴ Ka anangu kutjupa ngayuku mukuringkuwiya nyinarampa ngayuku tjukurpa paluru putu tjukururungku palyalku. Palu tjukurpa nyangatjana nyurala wangkanyi aratja ngayuku wiya, panya Mamalu gayunya iyantjalu ngayunya nintinnyangka.

²⁵ Nyanga uwankarana kuwari tjakultjunanyi nyurala nyanga tjungu nyinaralpi.

²⁶ Palu Kurunpa Milmilu pitjala nyuranya alpamilalku, panya Mamalu palunya iyalku ngayuku arangka nyurala tjungu nyinanytjaku. Ka paluru pitjala nyuranya nintilku ngayulu panya nyurala nganmanytju wangkanytja uwankara nyura watarkuriwiyangku kulintjaku.

²⁷ "Uwa, ngayulu nyuranya wantikatinyi palu nyuranyaḅa kurunpa pukulpa nyinanytjaku palyani. Panya ngayulu kurunpa rapa pukulpa nyinanyi, palu purunypa ngayulu nyuranya kurunpa rapa pukulpa nyinanytjaku palyalku. Nyara anangu watarkitja tjuḅa mukuringanyi pukulpa nyinanytjikitja. Palu wiya, tjanampa pukulpa unytju kutju ngarapai. Ka ngayulu kutjungku pukulpa titutjara nyinanytjaku palyalpai. Ka nyura kulira kurunpa tjituru-tjitururira nguluringkuwiya nyinama.

²⁸ "Nyura panya nganmanytju kulinu ngayulu wangkanyangka alatji, 'Nyuranyaḅa wantikatira ananyi, munuḅa nyuralakutu malaku pitjanya.' Palu nyaaku nyura nyangatja kulira tjituru-tjitururinyi? Tjinguru nyura ngayuku pulkara mukuringkunyitja wiya. Panya nyura ngayuku pulkara mukuringkulampa uti tjukurpa nyangaku pukularima ngayulu Mamalakutu ankunyangka kulira. Panya Mamanya pulka mulapa ngayula waintara nyinanyi.

²⁹ Nyangatjana nganmanytju nyurala tjakultjunanyi. Ka ngula tjukurpa nyanga paluru utiringkunyangka nyura nintingku kulilku nganmanytju panya ngayulu wangkanytja. Munu nyura kulintjatjanu ngayuku mulamularingkuku.

³⁰ Palu ngayulu piruku rawangku nyurala wangkanytja wiya, panya manta nyangaku mayatja Satannga kuwari pitjanya. Palu nyara paluru putu ngayunya mayatjarira kanyilku.

³¹ "Panya ngayulu Mamala wanganarangku kulilpai munuḅa paluru ngayunya wangkanytja uwankara kulintjatjanungku palyalpai, kaya nyara palulanguru anangu manta winkitjangku kulilku ngayulu palumpa pulkara mukuringkunyangka."

Alatji Jesulu wangkangi palumpa nintintja tjutangka munu palulanguru wangkangu, "Uwa alatjitulta. Walangkula ngura nyangatja wantikatira ara."

15

Jesunya Punu Kiripitji Purunypa

¹ Jesulu palumpa nintintja tjutangka wangkangi nyanga alatji, "Ngayuluna punu panya kiripitji purunypa, ka ngayuku Mama wati panya kaana kanyilpai purunypa. ² Uwa, ngayulu kiripitji kultu purunypa, ka nyura miḅa tjuḅa purunypa. Ka wati panya kaana kanyilpailu ngayuku Mamangku pitjala miḅa mai wiya ngaranyangka nyakula mutura waniku munu miḅa palya maitjara nyakula tjukutjuku mutura wirulku ngula pakara mai pulkatjararingkunyitjaku.

³ Ka nyura alatjitu nganmanypa wiruringu, panya ngayulu tjukurpa tjuḅa nyurala wangkangi, ka nyura kulira ma-wanganararingu.

⁴ Palulanguruya ngayula tjungu ngarama, kaḅa ngayulu nyurala tjungutu ngaraku. Panya punu miḅa nganmanytju mutura waninytjitja pitiringkula putu pakara maitjararingkupai, palu panya

puṇu kultungka tjungu ngarala nyara palulanguru kutju pakara maitjararinganyi. Ka nyura palu purunypatu ngayula tjungu ngarala kutju Godanya mukuringkunyitja uwankara rawangku palyalku munu tjukururu wirura nyinaku. Palu nyura ngayula tjungu ngarawiyangku wantirampa Godanya mukuringkunyitja putu alatjitu palyalku.

⁵ “Ngayuluna puṇu kiripitji wata purunypa, ka nyura mina tjuṭa purunypa pakara ngaranyi ngayula tjungu. Munu nyura alatji rawa ngayula tjungu ngaralampa nyura Godanya mukuringkunyitja rawangku palyalku. Palu ngayula wiyangka nyura putu palumpa palyalku paluru mukuringkunyangka.

⁶ Panya anangumpa ngayula tjungu wiya patu ngaralampa paluru mina mutura waninytja purunypa. Panya mina mutura waninyangka piltiringkupai, nyara palu purunypa nyura ngayulanguru paṭuringkula wiyaringkuku. Panya mina piltiringkunyitja tjuṭaya urara warangka wanipai kampara wiyaringkunyitjaku. Ka palu purunypatu nyura wiyaringkuku ngayulanguru paṭuringkula.

⁷ “Ka nyara palula-tawara nyura uti ngayula tjungu titutjara ngarama munu tjukurpa ngayuku wanganarangku kulinma. Ka nyara palulanguru nyura Mamala kutjupa kutjupa tjuṭaku ngatjinnyangka paluru nyuranya ngapartji wanganarangku kulira ngkuku.

⁸ Uwa, panya Godanya mukuringanyi nyura titutjarangku palumpa palyalkatinytjaku paluru mukuringkunyitja uwankara. Ka nyara palulangurulta anangu tjuṭangku nyuranya wirura palyannyangka nyakula kulilku, ‘Munta-uwa, mulapa anangu nyanganpa Jesuku walytja tjuṭa nyinanyi.’ Munuya nyuranya nyakunyitjatjanungku Godanyaalta pulkara mirawaniku.

⁹ “Mamanya panya ngayuku pulkara mukuringanyi, ka palu purunypatu ngayulu nyurampa pulkara mukuringanyi. Kaya nyanga palunya rawangku kulinma, munuya ngayula titutjara tjungu ngarama ngayulu nyuranya rawangku mukulyangku kanyintjaku.

¹⁰ Panya nyura ngayuku tjukurpa wanganarangku kulinnyangkampa, ngayulu ngapartji nyuranya mukulyangku atunymara kanyilku titutjarangku. Panya ngayunya Mamalu mukulyangku kanyini palumpa wangka ngayulu wanganarangku kulira palyannyangka, palu purunypa ngayulu nyuranya rawangku kanyilku nyura ngayuku tjukurpa wanganarangku kulinnyangka.

¹¹ Uwa, nyanga nyuralana tjakultjunu nyura pukulpa mulapa nyinanytjaku. Panya ngayulu pukulpa mulapa nyinanyi, mununa mukuringanyi nyura kulu palu purunypatu ngayula junguringkula pukulpa nyinanytjaku tjituru-tjituru wiya.

¹² “Uwa, ngayulu nyuranya wangkara wituni nyuranku mukulya pulka nyinanytjaku. Panya ngayulu mukulyangku nyuranya atunymara kanyini, palu purunypatu nyuranku uti mukulyangku kanyinma.

¹³ Anangu kutjupa tjinguru palumpa malpaku ngalkilpa iluku nguluringkunyitja wiya. Kala alatjirinyangka nyakula kulilpai, ‘Mulapa paluru palumpa malpaku pulkara mulapa mukuringu waintara alatjitu.’

¹⁴ Ka nyura ngayulu wangkanyangka wanganarangku kulira palyarampa ngayuku malpa mulapa nyinanyi.

¹⁵ Tjinguruna nyuranya rawangku kulinma ngayuku war̄karipai tjuṭa. Palu wiya, nyanganguruna nyuranya walytjanmananyi. Wati panya war̄karipai mayatjangku wangkara witulpai kutju, kutjupa kutjupa utira tjakultjunkunyta wiyangku. Ka paluru ninti wiyangku war̄ka kutju palyalpai mayatjangku witunnyangka. Palu nyuranya ngayulu kuwari walytjanmananyi, panya ngayulu nyurala walytjangka uwankara utingku tjakultjunu Mamala kulintjatjanungku.

¹⁶ Tjinguru nyura kulini nyura ngayunya ngurkantankunytjatjanungku-palku. Palu wiya ngayuluna nyuranya ngurkantanu mununa nyuranya witunu Godanya mukuringkunytja uwankara palyalkatinytjaku titutjarangku. Ka pala palulanguru nyura ngayuku walytjaringkunytjatjanungku Mamala tjapinnyangka paluru nyuranya ungkuku.

¹⁷ “Uwa, ngayulu nyuranya wangkara wituni nyuranku mukulya pulka nyinanytjaku ngaltunytju pulka.”

Mantatja Tjuṭa Kuraringkunytja

¹⁸ “Kaya anangu panya mantatja kutju kulilpai tjuṭaya nyurampa kuraringkunyangkampa nyura uti alatji kulinma, panya tjanaya ngayuku-warara kuraringu.

¹⁹ Tjinguru nyura palula tjanala jungungku mantatja kutju kulinnyangkampa paluru tjana nyurampa pulkara mukuringama. Palu ngayulu panya nyuranya mantangka nyanga watarku nyinanyangka ngurkantara mantjinu, ka nyura mantatja panya tjuṭa kulintjaku wiyaringu, panya nyura kuwari kulintja kutjupatjara nyinanyi. Kaya nyara palulanguru nyurampa kuraringanyi nyara mantatja kutju kulilpai tjuṭa.

²⁰ “Tjukurpa panyatjaya kulinma, panya ngayulu nyurala wangkangu alatji, ‘Panya wati war̄karipai tjukutjuku, ka panya palumpa mayatja pulka palula munkara.’ Ka panya mirpantju tjuṭangku ngayunya anara kurarampa palu purunypatu nyuranya ngapartji anara kuralku nyura ngayuku war̄ka palyannyangka. Palu kutjupa tjuṭangku ngayuku tjukurpa wanganarangku kulirampa palu purunypatu nyurala ngapartji wanganarangku kulilku.

²¹ Uwa, nyanga alatjiya nyuranya ngapartji kuralku panya nyura ngayuku walytjaringkunyangka. Panya tjana Mamaku ngurpa nyinanyi ngayunya panya iyantjitjaku.

²² “Tjinguru ngayulu pitjala wangkanytja wiyangku wantinyangkampa tjana watarku alatjitu nyinama kura kulintja wiya. Palu ngayulu alatjituna tjukurpa pitjala tjanala wangkangu, kaya kulira wantingi. Pala palulanguru tjananku putu ngurpanmananyi nganmanytju kurantjatjanungku.

²³ Palu ngayuku kuraringkulampa ngayuku Mamaku kulu kuraringanyi.

²⁴ Tjinguruna pitjala tjanala kutjupa kutjupa wiru tjuṭa palyalwiya nyinanyangkampa tjana ngurpatu nyinama kura tjana palyantjatjanungku kulintja wiya. Palu ngayulu alatjituna pitjala tjanala wiru tjuṭa palyanangi panya kutjupangku nganmanytju nyanga purunypa palyantja wiyatu. Kaya kuwari kutju nyakula mulamularingkuwiya Mamaku ngalimpa kuraringanyi.

²⁵ Ka tjukurpa nyanga palu purunypa nyiringka iriti walkatjunkunytja ngarinyi alatji,

'Ngayukuya unytju alatjitu wiyanguru kuraringu.' *

Ka tjukurpa nyanga paluru kuwari utiringu.

²⁶ Palu Nintilpainya pitjaku Mamalanguru Kurunpa Milmilnga, panya paluru Godanya tjukarurungku utilpai. Panya ngayulu kuwari Mamalakutu ankula palunya nyuralakutu witulku nyurala tjunguringkula nyinanytjaku munu tjukarurungku ngayunytjara tjakultjunkunytjaku.

²⁷ Ka nyura kulu ngayunytjara tjakultjunama, panya nyura ngayula tjungu rawa mulapa para-ngarangi."

16

¹ "Uwa, nyangatjana nyurala nganmanytju utira tjakultjunanyi nyura ngayunya wantikatinytjaku-tawara.

² Panya Jewku mayatja tjutangku nyuranya pailku wali inmatjanguru palula tjanala inmangka tjunguringkunytjaku-tawara. Munuya ngula nyuranya iluntankuku nyanga alatji ngunti kulira, 'Godanya nganampa pukularinyi nganana tjananya iluntankunyangka nyakula.' Palu wiya.

³ Panya tjana nyanga alatji palyalku Mamaku ngurpangku munu ngayuku kulu ngurpangku.

⁴ Kana nyangatja nyuranya nganmanytju wangkara ngulutjunanyi nyura ngula nintingku kulintjaku ngayulu panya wangkanytja utiringkunyangka nyura nyakula tjanampa nguluringkula ngayunya wantikatinytjaku-tawara."

Kurunpa Milmilntu Tjukarurungku Nintintjaku

Munu palulanguru Jesulu piruku tjanala wangkangu, "Ngayulu panya nyuranya nganmanytju ngurkantanu mununa nyara palulanguru nyurala rawa tjungu nyinangi. Pala palulanguruna tjukurpa nyanganpa nyurala nganmanytju wangkanytja wiya.

⁵ Palu kuwari nyangana ngayulu ananyi ngayunya iyantjitjakutu. Ka nyura kulira ngayula tjapintja wiya, 'Yaaltjikutun ananyi?'

⁶ Panya nyura tjukurpa nyanga ngulutjunkunytja kulira kurunpa pulkara tjituru-tjitururinyi.

⁷ "Palu nyangatjana nyurala tjukarurungku wangkanyi. Palyana ananyi, panya ngayulu ankunyangka malangka nyura wiru mulapa mantjilku, panya ngayulu ankunytjatjanungku nyurampa iyalku Nintilpai kutjupa nyuranya rapara wirura kanyintjaku, Kurunpa Milmilnga. Palu tjinguru ngayulu ankunytja wiya nyinanyangkampa paluru nyuralakutu pitjanytja wiyatu ngaraku.

⁸ Kurunpa paluru pitjala anangu manta winkitjangku ngunti kulinnyangka utilku. Panya tjana kura ngunti ngurkantankupai palyapalku kulira. Munuya paluru tjana ngayunya ngunti analpai tjukurpa ngunti wangkanyangka-palku kulira. Munuya ngunti kulilpai Godalu tjananya ngurkantara tjarantja wiyangku wantiku. Palu tjana ngunti kulinnyangka Kurunpa Milmilntu utilku alatjitu.

⁹ Panya tjana kura ngunti ngurkantankupai ngayuku mulamularingkuwiyangku wantira.

* 15:25 Psalm 35:19; 69:4

¹⁰ Munu panyaya ngayunya ngunti analpai tjukurpa ngunti wangkanyangka-palku kulira. Palu wiya, panya ngayulu Mamalakutu ananyi, kani nyura piruku nyakunyitja wiyaringkuku.

¹¹ Ka panyaya ngunti kulilpai Godalu tjananya ngurkantara tjarantja wiyangu wantiku. Palu panya Godalu nganmanytju Satannga ngurkantara waningu nyara mantatja kulilpai tjutaku mayatja. Nyara palulanguru Godalu alatjitu tjananya kulu ngurkantankuku kura tjuta palyantjitjanguru. Uwa, nyanga alatjiya mantatja kulilpai tjutangu ngunti-ngunti kulilpai, ka panya Kurunpa Milmilu pitjala tjana ngunti kulintja utilku.

¹² "Uwa, ngayulu tjukurpa kutjupa tjuta mulapa nyurala tjakultjunktjikitjangku kulini, palu nyura tjinguru tjuta wangkanyangka putu kulilku.

¹³ Palu ngula Kurunpa Milmilnga pitjaku. Nyara paluru tjukurpa Godanyatjara tjakarurungku utilpai. Munu nyara paluru nyuranya tjukurpa uwankara tjakarurungku nintilku. Kurunpa nyara paluru panya walytjangku kulira nintilpai wiya, Mamala kulintjatjanungku kutju paluru nyurala tjakarurungku tjakultjunktuku. Munu paluru nyurala wangkaku panya ngula utiringkunyitjaku.

¹⁴ Nyara paluru tjukurpa ngayulu wangkanyangka kulintjatjanungku nyurala nintilku, ka nyura kulira ngayunya mirawaniku.

¹⁵ Panya uwankara Mamalu kanyintja ngayulu kulu kanyini. Nyanga palulanguru panya nyurala wangkangu alatji, 'Kurunpa Milmilu ngayula kulintjatjanungku nyurala nintilku ngayuku tjukurpa.'

Nintintja Tjuta Tjituru-tjitururinytja Munu Palula Malangka Pukularinytja

¹⁶ Munu palulanguru Jesulu wangkangu, "Kuwari nguwanpa nyura ngayunya nyakuwiya nyinaku. Munu palulanguru nyura tjukutjuku nyinara piruku ngayunya nyakuku." Alatji paluru wangkangi palumpa nintintja tjutangka.

¹⁷ Ka nyanga alatji wangkanyangka nintintja kutjupa tjutangu putu kulira ngaparku wangkangi, "Nyaa nyangangu wangkanyi panya kuwari nguwanpala kunyu palunya nyakuwiya nyinaku, munula kunyu palulanguru tjukutjuku nyinara piruku nyakuku? Nyaaku paluru wangkanyi Mamalakutu ankunyitjikitjangku?"

¹⁸ Munu paluru nyaa wangkangi, 'kuwari nguwanpa?' Putula kulini paluru wangkanyangka."

¹⁹ Ka Jesulu nintingu kulinigi paluru tjana tjapintjikitjangku kulinnyangka. Munu nyanga alatji wangkangu tjanala, "Wangkangu panya nyurala alatji, 'Kuwari nguwanpa nyura ngayunya nyakuwiya nyinaku. Munu palulanguru nyura tjukutjuku nyinara piruku ngayunya nyakuku.' Ka nyura wanyu ara nyanga palunya wangkara kulini tjakarurungku kulintjikitjangku?"

²⁰ Wiya, nyangatjana tjakarurungku nyurala wangkanyi. Panya mulapa nyura kurunpa tjituru-tjitururira uparingkula ulaku. Ka anangu panya mantatja kulilpai tjuta pulkara pukulariku. Uwa, nyura mulapa pulkara tjituru-tjitururiku, palu malangka nyura tjituru-tjitururinytjanu piruku pukulariku.

²¹ Nyaa purunpa, panya minyama ititjara iti kuwaripangka tjituru-tjituru nyinapai iti kanyintjikitja. Palu iti wirkankunyangka nyakula

paluru pulkara pukularipai munu pika panyatja kulintja wiyaringkupai.

²² “Ka nyara palu purunypa nyura tjituru-tjituru nyinaku ngayulu ankunyangka. Palu ngayulu nyuranya piruku nyakuku, ka nyura ngayunya nyakula pulkara pukulariku kurunpa winki. Ka kutjupa tjutangu nyuranya putu piruku tjituru-tjiturunkuku.

²³ “Uwa, tjintu nyara palulanguru nyura ngayula piruku tjpintja wiyaringkuku kutjupa kutjupaku nintiringkunytjikitjangu, panya Kurunpa Milmitu nyurala uwankara nintilku. Tjukururungku nyurala wangkanyi, panya nyura ngayuku walytja nyinarampa Mamala kutjupa kutjupaku tjapinnyangka paluru nyuranya ungkuku alatjitu.

²⁴ Panya nganmanypa nyura ngayunya wanara Mamala ngatjintja wiya ngarangi. Palu kuwari nyanga nyura uti palula ngatjinma, ka nyuranya ungkuku, ka nyura nyara palulangurulta pukulpa pulka mulapa nyinaku.

²⁵ “Uwa, nganmanytjuna nyurala tjukurpa tjuta wangkangi ara tjutatjara nyura kampa kutjupawanungku kulira nintiringkunytjaku. Palu ngulana ara nyanga palu purunypa tjuta kampa kutjupawanungku wangkanytja wiyangu tjukururungku wangkaku tjukurpa Mamanyatjara nyura utingku kulintjaku.

²⁶ Ka tjintu nyara palulanguru nyura ngayuku walytja nyinarampa Mamala walytjangu tjukururungku tjpilku, ka ngayulu nyurampa palula tjpintja wiyaringanyi.

²⁷ Panya Mamanya paluru alatjitu nyurampa pulkara mukuringanyi, panya nyura ngayuku mukuringu munu panya nyura nyura mulamularingu ngayulu Mama Godalanguru pitjanytjitjaku. Nyara palulanguru Mamanya nyurampa pulkara mukuringanyi.

²⁸ Uwa, ngayuluna mulapa Mamalanguru pitjangu nyanga mantakutu. Mununa kuwari manta nyangatja wantikatira malaku Mamalakutu ananyi.”

²⁹ Kaya nintintja tjutangu kulira wangkangu, “Munta-uwa, kuwari nyanga nyuntu utingku wangkanyi ara kutjupatjara kampa kutjupawanungku wangkanytja wiyangu.

³⁰ Kala nyanga kuwarilta kulini nyuntun mulapa uwankaraku ninti. Panya nyuntu nganmanytju nintingu kulilpai kutjupangu nyuntula tjpintjikitjangu kulinnyangka. Nyanga palulangurula mulamularinganyi panya nyuntun mulapa Godalanguru pitjanytja.”

³¹ Ka Jesulu wangkangu tjanala, “Nyura wanyu mulapa ngayuku mulamularinganyi?

³² Palu kulila, kuwari nguwanpa nyura wililyarara ankuku ngura walytjakutu walytjakutu munu nyura ngayunya kutju wantikatiku. Palu ngayulu kutju mulapa wiya panya Mamanya ngali nyinanyi.

³³ “Uwa, nyangatjana nyurala wangkangi nyura kurunpa rapa nyinanytjaku. Panya nyura ngayunya wanara raparingkula nyinaku. Palu mantatja kulilpai tjutangu nyuranya titutjarangu kuraluku. Palu palya, panya ngayulu mantatja uwankarangka waintarira ngayulu-kutjuringu. Nyara palulanguru nyura uti pukulpa mulapa nyinama kurunpa raparingkula.” Alatji Jesulu wangkangu palumpa nintintja tjutangka.

17

Jesulu Mamala Tjapintja

¹ Munu Jesulu tjanala wangkara wiyaringkula ira-nyangu ilkarikutu munu Mamala wangkara tjapiningi alatji, "Mama, tjin̄tu panyatja wirkanu. Kani nyuntu ngayunya nyanga anangu tjutangka nintila ngayunya tjakarurungku ngurkantankunytjaku panya ngayulu witulya pulka mulapa nyuntumpa katja. Ka ngayulu ngapartji palu purunypatu tjanala nintilku nyuntunya kulū tjakarurungku witulya pulka ngurkantankunytjaku. ² Panya nyuntunin tjunu anangu winki kuranyurira kanyintjaku mununin kutjupatjara ngayunya ungu ngayukurinytjaku, kana palunya tjananya uwankara wankarunkuku titutjara nyuntula tjungu nyinanytjaku.

³ Palu ngananya tjanaya wanyu wanka titutjara nyinaku? Wiya, panya paluru tjana nyuntumpa ngalimpa ninti mulapa nyinanytjatjanu kutjuya titutjara wanka nyinaku. Panya nyuntu kutju God mulapa nyinanyi, ka ngayulu panya nyuntu iyantjitjanya, Jesunya Christanya.

⁴ Nyuntunin war̄ka palyantjaku witura iyanu mantakutu, kana uwankara palyara wiyara nyuntumpa witulya pulka utinu anangu tjutangka.

⁵ Mama, panya nyuntu ngali manta kuwaripangka kutjūtu nyinangi witulya pulka. Kani kuwari panya purunypatu ngayunya pulkanmanama witulya pulka mulapa nyinanytjaku nyuntula tjungu.

⁶ "Nyanga mantangkāna tjanala nyuntunya nintinu anangu panya nyuntu ngayunya unγκunytjitja tjūta, kaya nintiringkula nyuntunya tjakarurungku kulini. Panya palunya tjananya nyuntu ngurkantara kanyiningi, munu panyanin ngayunya ungu. Kaya paluru tjana nyuntumpa wangka wanganarangku kulira palyanu.

⁷ Kuwariya nintingu kulini panya uwankara ngayulu palyantja nyuntu ngayunya nintinu.

⁸ Ka panya ngayulu tjananya nintinu tjukurpa panyatja, panya nyuntu ngayunya nintintja, kaya wanganarangku kulinu. Munuya kulini mulapa ngayulu nyuntulanguru mantakutu pitjangu nyuntu iyannyangka.

⁹ "Uwa Mama, nyanga palumpa tjanampāna nyuntula tjapini, palu panya mantatja kulilpai tjutakuna tjapintja wiya. Nyangatjana tjanampa kutju nyuntula ngatjini panya nyuntu ngayunya unγκunytja tjutaku, panya paluru tjana nyuntumpa walytja nyinanyi.

¹⁰ Paluru tjana nyuntumpa ngalimpati nyinanyi. Kaya anangu tjutangu palunya tjananya ngayunya wanannyangka nyakula ngayunya mirawanira pulkanmananyi.

¹¹ Kuwari nguwanpāna manta nyangatja wantikatira ma-pitjanya nyuntulakutu. Palu nyanga tjanaya mantangka rawa nyinanyi, ngayunya wanalpai tjūta. Mama, nyuntun wiru mulapa nyinanyi witulya pulkanya, munu panyan ngayunya witulyanu palu purunypatu witulya pulka nyinanytjaku. Wanyu nyanga tjananya witulya pulkangku atunymara kanyinma uwankara tjungu nyinanytjaku, panya nyuntu ngali tjungu nyinanytja purunypa.

¹² "Uwa, nyuntu panyanin tjunu witulya pulka nyinanytjaku, kana mulapa tjanala tjungu nyinara witulya pulkangku tjananya atunytju kanyiningi kutjupa kawalinkunytja wiyangku. Palu panya Judasanya

kutju kawankatingu, panya nganmanytju nyiringka iriti walkatjunu paluru kawankatinytjaku, ka panya mulapa alatjiringu.

13 “Kaṇa kuwari ngayulu nyuntulakutu ma-pitjanya. Palu mantangka nyanga nyinarana tjukurpa nyanganpa tjanala wangkanyi kuwari-pangku tjana kulira pulkara pukularinytjaku kurunpa winki, nyanga ngayulu pukulpa nyinanytja purunypa.

14 Nyuntumpa tjukurpana tjanala wangkara utinu ngayunya wanalpai tjuangka. Kaya anangu tjukurpa mantatja kulilpai tjuṭa tjanampa kuraringu, panya paluru tjana ngayunya nyanga wanalpai tjuṭangu tjukurpa mantatja kulira wanalpai wiya, ngayulu purunypa.

15 Ka nyanga mantaguru nyuntu tjananya mantjintjakuṇa tjpintja wiya. Palu mamungku kurantjaku-tawarana tjanampa tjpini nyuntu tjananya atunymara kanyintjaku.

16 Panya ngayulu tjukurpa mantatja kulilpai wiya, kaya palu purunypatu tjana tjukurpa mantatja kulilpai wiya.

17 Nyuntumpa panya tjukurpa tjukaruru alatjitu, ka tjukurpa palunya tjananya wanyu nintinma tjana nintiringkula nyuntumparinytjaku alatjitu.

18 Panya nyuntunin ngayunya mantakutu witunu, kaṇa palu purunypa tjananya wituni ngura uwankarakutu.

19 Uwa, ngayulunatju nyuntunya unganyi alatjitu mununa tjananya nintini tjukurpa tjukaruru nyuntunyatjara tjana kulu kulira nyuntumparinytjaku.

20-21 “Palu Mama, nyanga tjanampa kutjuna nyuntula tjpintja wiya, palu kutjupa tjuṭaku kuluna tjpini. Panya ngula nyanga tjana ngayuku tjukurpa anangu kutjupa tjuṭangka tjakultjunkunyangkaya kulira ngayuku mulamularingkuku. Kaṇa nyara palumpa tjanampa kulu nyuntula tjpini tjana kutjuringkula nyuntula tjungu nyinanytjaku. Panya nyuntu ngali tjungu kutjuṭu nyinanyi, palu purunypa palunya tjananya kulu tjungunma. Kaya anangu panya tjukurpa mantatja kulilpai tjuṭangu tjananya tjungu kutjuṭu nyinanyangka nyakula kulilku nyuntu ngayunya mantakutu iyantja.

22 Uwa, nyuntu ngayunya tjunu witulya pulka mulapa, kaṇa palu purunypatu nyanga tjananya witulyanu ngayulu purunypa witulya pulka nyinanytjaku munu tjunguringkula kutjuṭu nyinanytjaku nyuntu ngali purunypa.

23 Nyanga ngayuluna tjanala tjungu nyinanyi, ka nyuntu ngayula tjungu nyinanyi, kaya palulanguru tjana ngapartji uwankaratu tjunguringkula kutjuṭu nyinaku. Kaya anangu panya tjukurpa mantatja kulilpai tjuṭangu tjananya tjungu nyinanyangka nyakula kulilku mulapa nyangatja Godalu iyantja munu mulapa paluru tjanampa pulkara mukuringanyi, panya ngayuku purunypa.

24 “Mama, nyuntu panya anangu tjuṭa ngayunya ungu ngayunya wanantjaku. Kaṇa mukuringanyi ngula tjana ngayula tjunguringkula nyinanytjaku ngura ilkaritjangka. Kaniya paluru tjana pulka mulapa nyakuku, panya nyuntu ngayunya ungu witulya pulka mulapa ngayuku nganmanypa mulapa pulkara mukuringkula manta wiyangkalpi.

²⁵ Mama, nyuntu panyan tjukaruru mulapa. Ka anangu panya tjukurpa mantatja kulilpai tjuṭa nyuntumpa ngurpa nyinanyi. Palu ngayulu nyuntumpa ninti, kaya nyanga tjana nyakula nintiringu panya nyuntu ngayunya iyantjijaku.

²⁶ Kaṅa ngayulu nyuntunya tjanala utira nintinu, mununa rawangkutu tjanala nintilkatiku. Kaya nyuntumpa mukulyaku nintiringkula anangu kutjupa tjuṭa mukulyangku kanyilku, panya nyuntunin ngayunya mukulyangku kanyini, palu purunypa. Kaṅa ngayulu kulu tjanala tjungu nyinaku.”
Alatji Jesulu Mamala tjapiningi.

18

Jesunya Witintja

(*Matthew-ku 26:47-56; Markaku 14:43-50; Luke-aku 22:47-53*)

¹ Munu tjapira wiyaringkula Jesunya ma-pakanu palumpa nintintja tjuṭa kulu. Munuya wimarwanu karu ini Kitaranta ma-itipirira kaana pulkangka ma-wirkanu munuya nyinangi.

² Ka Judasanya, wati panya Jesunya witintjaku nintintjanya tjanala tjungu wiya. Palu wati nyara paluru ngura nyara palumpa ninti panya Jesunya Judasanya tjanaya tjuṭa ara junguringkula nyinapai ngura nyara palula.

³ Kaya ngura nyara Jerusalemala tjukurtjara kuranyitja tjuṭangku, Paratji tjuṭangku kulu wati timpula atunymankupai tjuṭa witunu Judasala junguringkula ankunytjaku, ka tjananya katingu nintingku kaana nyara palulakutu wati Rome-anya ngurara tjaultji tjuṭa kulu. Kaya ma-pitjala wirkanu ngura nyara palula kulata tjilira, waru tili tjaatjara kulu.

⁴ Ka Jesulu unngu nintingku kuliningi nyanga alatjirinytjaku, munu tjana ngalya-wirkankunyangka ma-ngaparikatira tjapinu, “Ngananya nyura ngurini?”

⁵ Kaya wangkangu, “Jesunya Nazarethanya ngurara ngurini.”

Ka Jesulu wangkangu tjanala, “Uwa, ngayuluna ini nyanga paluru.”

Ka Judasanya panya tjaultji tjuṭangka tjungu ngarangi Jesunya tjanala witintjaku nintintjikitjangku.

⁶ Ka Jesulu alatji wangkanyangka panya tjana uwankara matjutukatira tjananguru punkanu mantangka.

⁷ Ka Jesulu piruku tjanala tjapinu, “Ngananya nyura ngurini?”

Kaya piruku wangkangu, “Panya Jesunya Nazarethanya ngurara ngurini.”

⁸ Ka Jesulu wangkangu, “Wangkangu panyana nyurala alatjitu. Ngayuluna ini nyanga paluru. Ka nyura ngayuku pitjangu, palu nyanga tjananyaya wantiriyala kaya ara.”

⁹ (Jesulu nyanga alatji wangkanyangka tjukurpa panya paluru nganmanytju wangkanytja utiringu, paluru Mamala nganmanytju tjapira alatji wangkanytja, “Mama, wati nyanga tjuṭa panya nyuntu ngayunya ungkunyjana kawalinkunytja wiyatu.”)

¹⁰ Ka Simon Peterlu tjula wara kanyintjatjanungku ilara wati kutju pina waku katanu, ka pina punkanu mantangka. Wati nyanga paluru panya wati tjukurtjara pulkaku warakaripai ini Malkanya.

11 Ka Jesulu wangkangu Peterla, “Wanti! Tjula pala malakungku tjarpatjura. Panya Mamaluni witu pika pulkatjararingkunyjtaku, kana palula wanganarangku kulira nyanga alatjirinyjtaku mukuringanyi alatjitu wantinytja wiya.”

Mayatja Ini Anatjalakutu Katinytja

12-13 Ka wati panya tjaultji tjtaku mayatjangku tjananya wangkangu Jesunya witintjaku, kaya mulapatu witu tjaultji tjtangku munu timpula atunymankupai tjtangku kulu. Munuya mara karpira ma-katingu wati ini Anatjalakutu panya Kayapatjaku waputjukutu. Anatjanya panya nganmanypa nyinangi Jew tjtaku Tjukurtjara Pulka, palu nyara palula ara Kayapatjanya ngapartji Tjukurtjara Pulka nyinangi.

14 Wati nyara paluru panya Jewku mayatja tjtangka nganmanytju wangkangu alatji, “Wati kutju palya ilunyi anangu uwankaraku ngalkilpa.”

Peternya Jesuku Ngurparingkunyjtja

(Matthew-ku 26:69-70; Markaku 14:66-68; Luke-aku 22:55-57)

15 Ka tjaultji tjtangku Jesunya witera Tjukurtjara Pulka ngurakutu ma-katinyangka Simon Peterlu pula nintintja panya kutjuparangku Jesunya tjananya malawanungku wananingi. Ka ngura nyara palula wirkankunyangka nintintja panya kutjupangku Peternya urilta wantikatira waintara Jesunya tjananya wanara tjarpangu waliku yaatangka. Panya nintintja paluru wati nyara Tjukurtjara Pulka ninti.

16 Ka Peternya urilta ngarangi tuwangka itingka panya palumpaya ngurpa. Ka nintintja panya paluru malaku pakanu munu kungkawara tuwa kanyilpaangka tjapinu Peternya yaatangka tjarpatjungkunyjtaku, ka mulapatu tjarpatjuru kungkawara panya paluru.

17 Munu palunya ngurkantanu Peternya munu tjapinu, “Nyuntu kulu wanyu Jesula tjungutja?”

Ka Peterlu wangkangu, “Wiya! Ngayulu palumpa tjungutja wiya.”

18 Ka munga nyara palula wari pulka ngarangi, kaya warakaripai tjtangku timpula atunymankupai tjtangku kulu waru tilira ngarala unytjunaringi. Ka Peternya waringku puyinnyangka pitjangu tjanalakutu munu tjunguringkula ngarala waru nganytjiningi.

Tjukurtjara Pul kangku Jesunya Tjapira Kulintja

(Matthew-ku 26:59-66; Markaku 14:55-64; Luke-aku 22:66-71)

19 Ka wali unngu Tjukurtjara Pul kangku Anatjalu Jesunya tjapira nguriningi, “Wati yaaltjtjungkunta wanalpai? Nganalu tjana? Nyaan palunya tjananya nintilpai?”

20 Ka Jesulu wangkangu, “Utingkuna tjanala wangkangi tjukurpa anangu winkingka, wali inmatja tjtangka ngura kutjupangka kutjupangka mununa Jerusalemala timpulangka kulu rawangku nintiningi anangu tjuta tjunguringkunyangka kampangkatu wiya.

21 Kan nyaaku ngayunya tjapini? Utin tjanala tjapinma panya nyara paluru tjana ngayulu wangkanyangka kuliningi, munuya paluru tjana nintingu kulintjatjanungku nyuntula tjakultjungkuku.”

22 Ka alatji wangkanyangka wati timpula atunymankupai kutjungku ila ngaranytjatjanungku Jesunya nguku pungu, munu wangkangu,

“Ai, alatji wangkanytja wiyangku wantima! Palatja wati Tjukurtjara Pulƙanya.”

²³ Ka Jesulu wangkangu, “Ngayulu ngunti wangkanyangkampaniya utingku wangkama nyanga anangu tjuťangka mirangka. Palu ngayulu tjukarurungku wangkangi, kanin nyaaku pungu?” Ka wati timpula atunymankupai piruku wangkanytja wiya ngarangi.

²⁴ Ka palula malangka Anatjalu palunya karpintjatu ma-iyanu Tjukurtjara Pulƙakutu panya palumpa waputju Kayapatjalakutu.

Peternya Piruku Ngurparingkunyitja

(*Matthew-ku 26:71-75; Markaku 14:69-72; Luke-aku 22:58-62*)

²⁵ Ka Peterlu urilta waru ngarala nganytjiningi. Kaya kutjupa tjuťangu palula wangkangu, “Nyuntu kulu wanyu wati palula tjuťungutja?” Ka Peterlu pulƙara alatjitu wiymanu, “Wiya! Ngayulu palumpa tjuťungutja wiya.”

²⁶ Ka waru nyara palula wati Tjukurtjara Pulƙaku warƙaripai ngarangi. Wati nyanga paluru panya Peterlu pina ƙatantjitjaku walytja. Munu paluru nyakula Peternya ngurkantara wangkangu, “Munta, nyuntunya panyatja nyangu, Jesula tjuťungu ngaranyangka, panya nyara kaanangka. Mulapa?”

²⁷ Ka Peterlu piruku wiymanu. Ka paluru wiymanangkanyangka tjuťpu panya mungawinki mulapa wangƙapainya wangkangu.

Pilate-alu Jesunya Tjapira Kulintja

(*Matthew-ku 27:1-2,11-14; Markaku 15:1-5; Luke-aku 23:1-5*)

²⁸ Ka mungawinki mulapa Jewku mayatja tjuťangu timpula atunymankupai tjuťangu kulu Jesunya Kayapatjaku nguranguru ƙatingu mayatja ini Pilate-aku ngurakutu.* Munuya wirƙara urilta yaatangka paťara ngarangi, panya tjana tjuťunguru wati Jew wiyaku ngurangka tjarparampa kuraringkuku munuya palulanguru inma Ƙatuwanu Ankunytjanya ngaranyangka puťu mai kuka ngalkuku. Nyangatja tjanampa tjaka Jew tjuťaku, kaya palula-tawara Jesunyatjara urilta paťara ngarangi Jewku mayatja tjuťa munu wati timpula atunymankupai tjuťa kulu.

²⁹ Ka Pilate-anya urilkutu pakanu munu tjanala tjapinu, “Wati nyangatja nyura nyaanguru ngalya-ƙatingu, nyaa palyannyangka?”

³⁰ Kaya wangkangu, “Wiya, tjuťunguru paluru kura palyantja wiyangka nganana ƙatinytja wiyangku wantima, palu kura palyannyangkala palunya ngalya-ƙatingu.”

³¹ Ka Pilate-alu wangkangu tjanala, “Wiya, nyurayanku ma-ƙatira walytjangku tjapira ngurira palunya ngurƙantanama nyurampa tjuťurnguru.”

Kaya wangkangu, “Wiya, panya nyuntun ngananyanya angapainu wati kura pungkula iluntankunytja wiyangku wantinytjaku. Palu panya nyuntu wangkanyangka kutjula iluntankupai.”

* **18:28** Panya Rome-aku mayatja pulƙangkulu Pilate-anya nganmanytju iyanu Jerusalemalakutu anangu Jew tjuťa manta nyara Judeala nyinanyangka mayatjarira ƙanyintjaku palumpa.

32 (Nyanga alatji tjana wangkanyangka Jesulu nganmanytju panya wangkanytja utiringu, panya nganmanytju paluru utingku wangkangu nyanga alatji ilunytjikitjangu.)*

33 Ka Pilate-alu palumpa walingka malaku tjarpara Jesunya ngalya-katinytjaku wangkangu. Munu palulanguru palula tjapinu, "Nyuntun mulapa Jew tjtaku mayatja pulka?"

34 Ka Jesulu palula wangkangu, "Nyuntu wanyu walytjangu kulira ngayunya tjapini? Munta kutjupa tjtangkunta ngayunya tjakultjunu?"

35 Ka Pilate-alu wangkangu, "Nyuntu wanyu ngayunya kulini nyuntumpa walytja? Wiya, ngayulu Jew wiya. Nyanga nyuntumpa walytja tjtangkuntaya ngalya-katingu ngayulakutu pala tjukurtjara kuranyitja tjtangu. Palu nyaan wanyu palyanu kantaya nyuntunya ngalya-katingu?"

36 Ka Jesulu wangkangu, "Ngayulu panya mayatja mantatja tjuta purunypa wiya. Tjinguruya ngayulu mayatja mantatja nyinanyangkampa ngayunya wanalpai tjtangu ngayulanguru anga-pikaringkula ngalkinma ngayunya Jewku mayatja tjtangu witintjaku-tawara. Palu ngayulu mayatja mantatja tjuta purunypa wiya."

37 Ka Pilate-alu wangkangu, "Palu nyuntun wanyu mayatja pulka?"

Ka Jesulu wangkangu, "Tjukururungku palan wangkanyi. Panya ngayulu mantakutu pitjala iti ngaringu tjukurpa tjukururu kutju wangkanytjikitja. Nyanga palunyakitjana pitjangu. Ka anangu kutjupangu tjukurpa tjukururu mukuringkula ngayulu wangkanyangka wanganarangku kulilpai."

38 Ka Pilate-alu wangkangu, "Nyaa wanyu tjukurpa tjukururu paluru?"

Pilate-alu Jesunya Iluntankunytjaku Palyanmankunytja

(Matthew-ku 27:15-31; Markaku 15:6-20; Luke-aku 23:13-25)

Munu nyangatja wangkara Pilate-anya malaku pakanu urilkutu, munu panya tjanala wangkangu, "Wati nyanga palunyaana kura putu ngurkantanyani iluntankunytjikitjangu.

39 Panyatjaya kulila panya ngaranya ngayulu nyurampa wati kutju tjalangka nyinanytja walatjunktunytjaku inma nyanga Katuwanu Ankunytjanya panya ngaranyaangka. Palu nyura wanyu mukuringanyi ngayulu nyurampa nyanga mayatja pulka walatjunktunytjaku?"

40 Kaya Jew paluru tjana uwankarangku pulkara mirara wangkangu, "Wiya, Jesunyala wantinyi. Nganana mukuringanyi wati pala Parapatjanya walatjunktunytjaku." (Parapatjanya panya wati pikati Rome-anya ngurara tjuta pikangu pungkupai.)

19

1 Ka Pilate-alu palumpa tjaultji tjtangka wangkangu, "Jesunyaya katira wiipangka pulkara puwa!" Kaya mulapatu palunya wiipangka pulkara alkanu.

* 18:32 Jesulu panya nganmanytju wangkangu, "Ngayunyaanya katura utitjunktuku." Alatji wangkara paluru punu katakutjarangka utitjunktunytja kuliningi. Panya Rome-anya ngurara tjtangu wati kura tjuta alatji iluntankupai punungka wakara utitjunktula. Palu Jew tjtangu alatji iluntankunytjaku wiya ngarangi Rome-aku mayatjangu painnyangka.

² Munuya tjilka iri pulkatjara manguri purunypa karpi-karpira tjunu palula katangka. Munuya palunya mantara purple mayatja pulkangku kanyilpaingka tjarpatjunu.

³ Munuya palumpa ikaringkula palunya anara wangkangi alatji, "Awa, Wanyumpa kunyung Jew tjutaku mayatja pulkampa." Munuya marangku palunya yunpa jewtjangi.

⁴ Ka Pilate-anya piruku pakaņu urilkutu munu Jewku mayatja tjutangka wangkangu, "Ngayuluņa kuwari wati nyanga palunya nyuralakutu ma-pakaltjingani, panya ngayulu puņu palumpa kura ngurkantananyi palunya iluntankunytjikitjangku."

⁵ Ka Jesunya tjanalakutu ma-pakaņu manguri tjilkatjara katangka tjunkunytja munu mantara panya mayatjangku kanyilpainyatjara. Ka Pilate-alu tjanala wangkangu, "Nyawaya! Nyangatja wati panya paluru, ngaltutjara."

⁶ Kaya tjukurtjara kuranyitja tjutangku munu wati panya timpula atunymankupai tjutangku kulu Jesunya nyakula ngalturingkunytja wiyangku alatjitu mirara wangkangu, "Punu katakutjarangka wakara utitjura! Punu katakutjarangka wakara utitjura!"

Ka Pilate-alu miranyangka kulira wangkangu alatji, "Wiya, wati nyanga palunya ngayulu puņu kura ngurkantananyi iluntankunytjikitjangku. Palu nyurayanku ma-katira punungka wakara utitjura."

⁷ Kaya Jewku mayatja tjutangku palula wangkangu, "Wiya, wati nyanga palurunku Godaku katjanmanangi. Ka panya nganampa tjukurpa ngaranyi alatji, 'Anangu kutjupangku walytjangku Godanyanmankunyangka palunya iluntanama.'"

⁸ Ka tjana nyanga alatji wangkanyangka Pilate-alu kulira pulkara nguluringu.

⁹ Munu piruku walangka tjarpara tjapinu Jesula, "Nyuntu ngura yaaltjinguru pitjangu?" Palu Jesulu palula wangkanytja wiyangku alatjitu wantingi.

¹⁰ Ka Pilate-alu wangkangu, "Nyaakun ngayula tjukurpa utingku tjakultjunkunytja wiyangku wantinyi? Panya ngayuluņa mayatja pulka nyinanyi munuņa ngayulu mukuringkula nyuntunya wantir'iyalku ankunytjaku, munta tjinguruņa mukuringkula nyuntunya punu katakutjarangka wakantjaku palyanmankuku."

¹¹ Ka Jesulu wangkangu, "Wiya, panya ilkaringuru Godanya mukuringkunyangka kutju nyuntu ngayuku palyantjaku ngaranyi. Palu wati nyara ngayunya katira nyuntunya ungunytja tjuta kura pulka mulapa ngaranyi nyuntula waintara, panya paluru tjana ngayunya iluntankunytjikitja mukuringanyi."

¹² Ka nyangatja kulira Pilate-alu palunya walatjunkunytjikitjangku kuliningi munu piruku urilkutu pakara tjanala ngapartji tjapiningi Jew panya tjutangka. Ka paluru tjana piruku mirara wangkangi, "Munta, nyuntun malpa wiya Rome-aku mayatjaku? Nyaakun wati nyanga palunya walatjunkunytjikitjangku wangkanyi? Panya palurunku mayatja pulkanmanangi. Ka nyuntumpa mayatja Rome-ala nyinanytjanya tjinguru nyangatja kulira nyuntumpa mirpanariku nyuntu palunya walatjunkunyangkampa."

13 Ka Pilate-alu nyangatja kulira Jesunya urilkutu pakaltjingantjaku wangkangu. Kaya katira ngaratjuno urilpa panya ngurkantankupaingka. (Ngura nyara paluru panya ini *Urilpa Walu Tjiwanguru Palyantjitjanya*, kaya wangka lipurungku ngura palunya wangkapai, *Kapatjanya*.) Ka nyara palula Pilate-anya nyinakatingu tjiya pulkangka, panya wati mayatja nyinakatipai tjiya nyanga palula kura palyalpai tjuta tjukarurungku ngurkantankunyitjikitja.

14 Ka tjintu nyara palula panya Jew tjutangu ritiringkula kutjupa kutjupa tjuta palyanangi nganmanytju inma Katuwanu Ankunytjanya mungawinki palyantjikitjangku.* Ka nyara palula ara kalalarinyangka Pilate-alu wangkangu tjanala, "Nyawaya! Nyangatja nyurampa panya mayatja pulka."

15 Kaya piruku mirara wangkangu kutjupangku kutjupangku, "Iluntarala! Iluntarala! Punu katakutjarangkala wakara utitjura."

Ka Pilate-alu tjapinu tjanala, "Mulapana nyurampa nyanga mayatja punu katakutjarangka wakara utitjungkuku?"

Kaya tjukurtjara kuranyitja tjutangu wangkangu, "Wiya, nyanga paluru nganampa mayatja wiya, panya mayatja pulka nyara Rome-ala nyinanytjanya kutju nganampa mayatja pulka nyinanyi."

16 Ka palulanguru Pilate-alu Jesunya wantir'iyanu katira punu katakutjarangka wakara utitjungkunyitjaku. Kaya tjaultji tjutangu palunya witera ma-katingu.

Jesunyaya Punu Katakutjarangka Wakara Utitjungkunyitja
(*Matthew-ku 27:32-44; Markaku 15:21-32; Luke-aku 23:26-43*)

17 Ka paluru punu katakutjara walytjangku tjalira ma-katingu ngura ini Kata Tarkatjaralakutu. (Panya lipuru tjutangu ngura nyanga palunya ini wangkapai, *Kaulkatjanya*.)

Kaya ngura nyara palula tjaultji panya tjutangu palunya punu katakutjarangka wakara utitjunu.

18 Munuya palulanguru wati kutjupa kutjara palu purunypatu wakara utitjunu kutjupa mara wakungka, kutjupa mara tjampungka. Ka Jesunya ngururpa utingarangi.

19 Ka Pilate-alu nganmanytju kutjupangka wangkangu punu tjilpirta ini walkatjura Jesula katu punungka tjungura wakantjaku nyanga alatji,

Jesunya Nazarethanya Ngurara
Jew Tjutaku Mayatja Pulka

20 Ka wati kutjupangku tjukurpa palunya punungka walkatjuno wangka panya mankurpa lipuru munu Latin munu Kuriki, ka tjaultjingu punungka katu wakara wantingu. Kaya Jew tjutangu ini nyara palunya nyangangi, panya ngura nyara Jesunya wakara utitjungkunyitjanya panya walingka itingka nguwanpa, kaya walinguru pakara ma-nyangangi uti ngaranyangka.

21 Kaya tjukurtjara kuranyitja tjutangu walka panya nyakula ankula wangkangu Pilate-ala, "Nyaakun alatji walkatjungkunyitjaku

* 19:14 Paluru tjana tjintu tjarpanytja kuwaripangka palyara ritiringangi panya tjintu tjarpanyangka munga nyara paluru munu mungawinki kulu milmilpa ngarapai warkarinytjaku wiya Godanya tjunguringkula walkuntjaku.

wangkangu. Utin nyanga alatji palyanma, 'Nyanga palurunku walytjangu Jew tjutaku mayatjanmanangi.' "

²² Ka Pilate-alu wangkangu, "Wiya, alatjituna wangkangu. Ka nyara paluru ngaranya alatjitu."

²³ Kaya tjaultji kutjara kutjarangu Jesunya wakara utitjura mantara palumpa mantjira kutjungku kutjungku katingu. Munuya kutju panya tiritja purunypa paluru unngu tjarpapa kanyilpai mauntalpa tjunu. Mantara pala paluru panya alatji-alatjitu palyantja wakara tjunguntja wiya. ²⁴ Kayanku wangkangi tjaultji tjutangu, "Wanyula katantankunytja wiyangu wantima munula punu nyanga nampatjara arkara wanira nyawa, 'Nganalu nampa pulka waniku?' Ka nyara paluru nampa tjukarurungku waninytjatjanungku mantara palunya mantjilku." Ka mulapa kutjupangu nampa tjukarurungku waningu munu paluru mantjinu mantara panya palunya. Panya nganmanytju nyiringka iriti walkatjunkunytja ngaranya nyanga alatji, "Ngayuku mantaraya kutjungku kutjungku katingu.

Munuya mantara panya ngayulu unngu kanyintjijaku inkangi,

ka kutjupangu nampa tjukarurungku waningu paluru mantjintjikitjangku." *

Kaya wati tjaultji tjutangu mulapatu alatjinganu tjukurpa iriti walkatjunkunytja ngaranytjaku alatjitu.

²⁵ Kaya minyma panya tjuta ila ngarangi Jesunya utitjunktunytjala itingka panya palumpa ngunytju, munu ngunytju malatja, munu minyma kutjupa ini Mary-nya Kulapatjaku kuri, munu Mary Magdalene-anya kulu.

²⁶ Ka nintintja kutju Jesuku ngunytjunga tjungu ngarangi, panya nyanga paluru Jesuku malpa mulapa. Ka Jesulu pulanya walunyakula ngunytjunga wangkangu, "Ngunytju, palatjanku nyuntumpa katja."

²⁷ Munu piruku wangkangu palumpa panya malpangka, "Ka nyuntunku ngunytju nyanga palunya atunymanama."* Ka nyara palulanguru nintintja panya paluru Jesuku ngunytju katingu palumpa ngurakutu munu palumpa ngurangka atunymara kanyiningi.

Jesunya Ilunytja

(*Matthew-ku 27:45-56; Markaku 15:33-41; Luke-aku 23:44-49*)

²⁸ Ka Jesulu nintingku kulinu, "Uwa, Mamalu wangkanytjana uwankara palyara wiyanu." Munu palulanguru paluru wangkangu, "Mina iluna." Ka alatji paluru wangkanyangka iriti nyiringka walkatjunkunytja mulapa utiringu.

²⁹ Ka piti waina kurakuratjara ngarangi, kaya tjaultji tjutangu pantja purunytja wainangka tjalatjura punu warangka tjunkula katura Jesula tjaangka kanyiningi tjikintjaku.

³⁰ Ka Jesulu waina tjikira wiyaringkula wangkangu, "Uwa, uwankarana palyara wiyanu." Munu palulangurulta kata tjaruringkula kurunpa wiyaringkula ilungu.

Jesunya Kultu Kulatangka Wakantja

³¹ Ka palulanguru Jewku mayatja tjutangu Pilate-ala ankula tjaminu, "Palyaya wati nyara punungka utingarinytja mankurpa tjalpa

* 19:24 Psalm 22:18

* 19:27 Alatji Jesulu wangkangu palumpa malpangka ngunytju palumpa paluru ankunyangka katjaringkula atunymara kanyintjaku, palu katja mulapa wiya.

kaṭantankuku mapalku ilunytjaku? Panya nganana mukuringanyi palunya tjananya miri mantjintjikitja.” Alatjiya tjapinu tjana miri punungka rawa ngaranytjaku-tawara. Panya mungawinki Saturdayngka tjanampa tjintu milmilpa mulapa ngarangi Jew tjtaku, kaya tjana mukuringkunyta wiya miri punungka rawa utingarinytjaku tjintu tjarpanyangka malangka.

³² Ka Pilate-alu palyanmanu tjananya tjalpa kaṭantankunytjaku munu wangka iyanu tjaultji panya tjtakutu. Kaya kulira wati panya Jesula nganytjarta kutjara ngaranytja-warara tjalpa kaṭantanu.

³³ Palu Jesulakutu ngapartji wirkaraya nyangu nganmanypa ilunytja munuya ilunytja nyakula tjalpa kaṭantankuwiyangku wantingu.

³⁴ Ka tjaultji kutjungku Jesunya kultu wakanu kulatangka, ka milkali mina kulu ngalya-tjutingu.

³⁵ Ka nyangatja wati kutjungku nyakunytjatjanungku ngula tjakultjunu. Wati paluru nintingu tjakarurungku wangkapai nyura kulu kulira mulamularingkunytjaku.*

³⁶ Kaya tjaultji tjtangku Jesunya tjalpa kaṭantankunytja wiyangku wantinyangka tjukurpa panya iriti nyiringka walkatjunkunytja utiringu panya alatji ngaranyi nyiringka,

“Palunyaya tarka kaṭantankunytja wiyangku wantiku.” *

³⁷ Ka tjukurpa kutjupa kulu nyiringka ngarangi nyanga alatji,

“Anangu tjtangkuya nyakuku palunya wakannyangka.” *

Jesunya Miri Kulpingka Tjunutjunkunytja

(*Matthew-ku 27:57-61; Markaku 15:42-47; Luke-aku 23:50-56*)

³⁸⁻³⁹ Ka wati kutjupa nyinangi ini Josephanya Arima-tjiyanya ngurara. (Wati nyara paluru Jesunya wanalpai, palu paluru utingku wanantja wiya, kumpiltu wananingi, Jewku mayatja tjtaku nguluringkula.) Munu paluru Pilate-alakutu anu Jesunya miri ngatjintjikitja. Ka Pilate-alu palunya palyanmanu katinytjaku. Ka wati kutjupa Josephala tjunguringu ini Nicodemusanya. (Wati nyanga paluru panya Jesulakutu nganmanypa anu mungangka.) Munu pula ankula Jesunya puntu pununguru araltjara ukalilyinu munu mantjira katingu. Ka Nicodemusalu wiru paṅtipai tjuta katingu Jesula miringka tjtintjikitjangku. Panya paluru yakutjangka pulka mulapa katingu, nampa nyangatja 30 kilograms.

⁴⁰ Munu pula Jesunya puntu winki wiru paṅtipaangka tjtira karpinu mantara warangka. Panya tjakangkuya Jew tjtangku alatji palyalpai tjunutjunkunytjikitjangku, ka pula Jesunya anangu palu purunypatu palyanu.

⁴¹⁻⁴² Ka ngura nyara palula itingka kaana pulka ngarangi, panya Jesunya punu kaṭakutjarangka utitjunkunytjtjangka tjaru. Ka nyara palula kulpi ngarangi kuwari kutju tjawara wantinytja. Ka tjintu panya pakuwiyaringkupai ilaringkunyangka pula kulpi nyanga ilatjangka Jesunya miri mapalku tjarpatjura wantingu, panya pula mungawinkiku riti palyantjikitja mukuringangi tjintu tjarpanytja kuwaripangka.

* **19:35** Nyanga alatji wangkara Johntu palurunku wangkangi.

* **19:36** Psalm 34:20

* **19:37** Tjakarayaku 12:10

20

Kulpi Ultu Ngaranyangkaya Nyangu

(Matthew-ku 28:1-8; Markaku 16:1-8; Luke-aku 24:1-12)

¹ Ka Sunday tjintukutu manta marungka mulapa Mary Magdalene-anya pakara anu kulpikutu, munu wirkara nyangu apu panya tjaangka angatjungkunyitja wati-unura wanara wantinyitja.

² Munu nyakula wirtjapakanu nintintja kutjarangka tjakultjungkunyitjikitja Simon Peterla munu Jesuku panya malpa mulata. Munu pulala wangkangu, "Pitjala pula wanyu nyawa. Mayatjanyala putu nyangu. Kulpi ala ngaranyi. Kutjupangkunti mantjira katira wampa kutitjunu."

³⁻⁴ Ka pula alatji wangkanyangka kulira pakara mapalku wirtjapakanu kulpikutu. Ka nintintja panya kutjupa Peterla waintaringu munu paluru-warara kulpingka wirkanu.

⁵ Munu pupakatira nyirkira nyangu mantara panya palunya karpira tjungkunyitja kutju ngarinyangka. Munu tjarpanyitja wiyangu urilnguru kutju ma-nyangu.

⁶ Ka Simon Peterlu wanara malawanungku wirkanu kulpingka munu paluru-warara tjarpangu kulpi unngu. Munu ilangku nyangu mantara kutju ngarinyangka.

⁷ Ka raiki panya kata karpira wantinyitjanya mauntalpa ngaringitapulara tjungkunyitja.

⁸ Ka nintintja panya kutjupa, panya paluru-warara kulpingka wirkankunyitjanya, paluru kulu tjarpangu, munu nyangu, "Mulapa nyangatja mantara kutju ngarinyi." Munu paluru mulamularingu Jesunya ilunytjatjanu wankaringkula pakantjitjaku.

⁹ (Panya Mary-lu pulanya Jesunya puntu wiya ngaranyitja tjakultjungkunyangka pula Jesunya wankaringkunyitjijaku mulamularingkunyitja wiyatu. Panya kuwaripankutu pula putu kuliningi panya nyiringka iriti walkatjungkunyitja ngaranyi alatjitju Jesunya ilunytjatjanu wankaringkula pakantjaku.)

¹⁰ Munu pula kulpi unngu nyakunytjatjanu malaku anu ngurakutu.

Jesunya Mary Magdalene-ala Utiringkunyitja

(Matthew-ku 28:9-10; Markaku 16:9-11)

¹¹⁻¹² Ka Mary-lu panya pulanya kulpikutu malawanungku wananu munu wirkara ngarala ulangi urilta kulpi tjaangka munu ulara ulara pupakatira kulpi unngu nyirkira nyangu angelpa kutjara mantara pirantjara nyinanyangka. Panya pula Jesunya ngarinyitjijangka nyinangi kutjupa tjinatjangka, kutjupa kataalku.

¹³ Munu pula Mary-nya nyakula tjapinu, "Minyma awa, nyaakun ngarala ulanyi?"

Ka wangkangu pulala, "Wiya, panya ngayuku Mayatjantiya wampa katingu, kana putu kulini, 'Yaaltjingkaya katira tjunu?'"

¹⁴ Munu alatji wangkara pinkurarara nyangu Jesunya ngaranyangka, munu paluru putu ngurkantanangi wati kutjupa-palku.

¹⁵ Ka Jesulu tjapinu palunya, "Minyma awa, nyaakun ngarala ulanyi? Ngananyan putu ngurini?"

Ka paluru wati kaanangka war̄karipai-palku kulira tjapinu, “Munta, nyuntu ma-katinytjatjanungkumpani tjakultjura, ‘Yaaltjingkan tjunu?’ Kana ankula mantjila.”

¹⁶ Ka Jesulu wangkangu palula, “Mary!”

Ka ini wangkanyangka kulira paluru pinkurarara nyangu munu wangkangu, “Rabboni!” (Ini nyanga *Rabboni* wangka Ara-mayiki munu panya wangkanyi *Nintilpai*.)

¹⁷ Ka Jesulu wangkangu palula, “Pampulwiyangkuni wantima panya kuwaripana Mamalakutu ankunytja wiyatu. Palu ankula tjanala wangka nintintja panya tjutangka, ‘Ngayulu Mamalakutu malaku ananyi, panya nyuntumpa nganampa Mamakutu. Panya nyuntu nganana God nyara palunya wal̄kulpai, nyara palulakutuna ananyi.’ Alatji tjanala ankula wangka.”

¹⁸ Ka Mary-lu kulira ankula nintintja tjutangka wangkangu, “Awa, kulilaya wanyu! Ngayuluna nyangu Mayatjanya ngayula utiringkunya.” Munu paluru tjanala tjakultjunu Jesulu palula wangkanytja uwankara.

Jesunya Palumpa Nintintja Tjutangka Utiringkunyitja

(*Matthew-ku 28:16-20; Markaku 16:14-18; Luke-aku 24:36-49*)

¹⁹ Ka tjinu panya palulatu nintintja tjuta mungangka tjunguringu wali kutjunga munuya nyinangi tuwa patira Jewku mayatja tjutaku ngulu. Ka Jesunya tuwa patingka utiringkula ngarangu tjanala ngururpa munu wangkangu tjananya, “Raparingkulaya pukulpa nyinama!”

²⁰ Munu nyangatja wangkara tjanala nintinu mara kultu kulū, kaya nyakula pulkara pukularingu palumpa.

²¹ Ka piruku Jesulu tjananya wangkangu, “Raparingkulaya pukulpa nyinama. Panya ngayunya mantakutu Mamalu witura iyanu palumpa war̄ka palyantjaku, kana ngayulu palu purunypatu nyuranya ngapartji witura iyanu war̄ka ngayuku palyantjaku.”

²² Munu palulanguru tjananya puunu munu wangkangu, “Kuwarina nyurala Kurunpa Milmilnga tjarpatjunanyi, kaya mantjila nyurala tjunguringkula nyinanytjaku.

²³ Ka tjinguru nyura kutjupangka wangkaku alatji, ‘Mama Godanya nyuntumpa kalyparingu munu nyuntu kura palyantjitjangu kaly-pangku wantinyi.’ Ka mulapatu Mamanya palumpa kalyparingkuku. Palu tjinguru kutjupangka nyura wangkaku alatji, ‘Mama Godanya nyuntumpa kalyparingkunyitja wiya.’ Ka mulapatu Godalu palumpa kalyparingkunyitja wiyangku wantiku.”

Jesunya Thomasala Utiringkunyitja

²⁴ Ka munga nyara palula Jesunya tjanala utiringkunyitjjangka nintintja kutju wiya ngarangi wati ini Thomasanya. (Nyara paluru ini kutjupa panya Titimatjanya.)

²⁵ Kaya nintintja panya kutjupa tjutangu Thomasanya ngula pit-janyangka nyakula tjakultjunu alatji, “Mayatjanya nyangu.”

Ka Thomasalu wangkangu, “Wiya, putuna mulamularinganyi ngayulu. Tjinguruna palunya mara panya nailangka wakantja nyakula pampura kutju mulamularingkuku, mununa kultu panya wakantja pampura kulū mulamularingkuku.”

²⁶ Ka nyanga palulanguru tjirirpi 7 ngarala wiyaringkunyaangka nintintja tjuṭa piruku tjunguringkula wali unngu nyinangi tuwa patingka. Ka Thomasanya kulu tjanala tjungu nyinangi. Ka Jesunya tuwa patingka piruku utiringu munu tjanala ngururpa ngarangu munu panya palu purunypatu wangkangu, “Raparingkulaya pukulpa nyinama!”

²⁷ Munu paluru Thomasala wangkangu, “Ala, nyawaltani kurungku mara nyanga mununi pampula, mununi piruku mina wararingkula kultungka nyanga mara tjura pika nyanga alangka. Panya nganmanyan panu mulamularingangi tjana tjakultjungkunyaangka. Palu kuwari nyangaltatju mulamulariwa.”

²⁸ Ka Thomasalu nyakula mulamularingu munu wangkangu palula, “Mulapan nyuntu ngayuku Mayatja Godanya!”

²⁹ Ka Jesulu palula wangkangu, “Ngayunya nyakula kutjun ngayuku mulamularingu. Palu kutjupa tjuṭaya ngayuku nyakuntja wiya mulamularingkupai, nyara paluru tjana pukulpa mulapa nyinaku.”

Tjukurpa Nyangatja Mulamularingkunyjtaku Walkatjunu

³⁰⁻³¹ Ka Jesulu miracle kutjupa kutjupa tjuṭa mulapa palyaningi palumpa nintintja tjuṭangka mirangka tjana nyakula mulamularingkunyjtaku. Palu nyiri nyangangka Jesulu palyantja uwankara walkatjungkunyjtaja wiya mununa tjukurpa mankurpa kutju walkatjunu nyura nyakula kulira mulamularingkunyjtaku panya Jesunya mulapa Christanya Godaku katja, panya Wankarunkupai Godalu kalkuntjanya. Ka nyura tjukurpa nyangatja kulira mulamularingkula wankaru titutjara nyinaku palula tjungu.

21

Jesunya Nintintja Tjuṭangka Utiringkunyjtaja Urungka Itingka

¹⁻² Ka ngula Jesunya piruku utiringu palumpa nintintja kutjupa tjarangka uru ini Tapiriyala itingka (ini kutjupa Galileela). Panya nyanga alatja ngarangi nintintja 7 tjunguringkula nyinangi ngura nyara palula panya Simon Peturnya, Thomasanya (ini kutjupa Titimatjanya), munu Natjanyulnga panya Kainanya ngurara, munu Tjipitiku katja kutjara munu nintintja panya kutjupa kutjara kulu.

³ Ka Simon Peterlu mungartjirinyangka wangkangu tjanala, “Antipinakuṅa ananyi.”

Kaya wangkangu, “Uwa palya, nganaṅa kulu nyuntula tjungu ma-pitjanya.” Munuya uwankaratu pautangka tatira ma-pitjangu uru ngatikutu. Palu munga nyara palulaya rawangku kuka putu alatjitu witingi.

⁴ Ka ngalya-tjinturingkunyaangka Jesunya uru kantilytja ngarangi, ka nintintja tjuṭa pararitu nyinangi urungka ngururpa pautangka munuya palunya putu ngurkantanangi.

⁵ Ka Jesulu tjananya mirara tjaminu, “Walytja tjuṭa! Kuka nyura witinu?”

Kaya wangkangu, “Wiya alatjitu.”

⁶ Ka tjanala wangkangu, “Net palaya wani pauta kampa wakungka munu nyura kuka pulka witu.” Kaya mulapatu waningu kampa wakungka, munuya winki mulapa wituṅa witinu munuya pautangka tjunkunytjikitjangku net putu ilaningi antipina mungilyi mulartjara.

⁷ Ka nintintja panya Jesuku malpa mulatu wangkangu, “Mayatjanya palatja.” Ka Peterlu nyangatja kulira mantara nganmanytju araltjara tjunkunytjatjanu tjarpangu malaku munu urungka mawarakatingu Jesulakutu ankunytjikitja.

⁸ Kaya nintintja kutjupa tjuṭa pautangka pitjangi mantakutu munuya net panya kuka tjuṭatjara ilara katingi, panya manta ila ngarangi 100 metre nguwanpa.

⁹ Kaya mantangka wirkara nyangu waru purku kampanyangka, ka nyara palula antipina mankurpa paura wantinytja ngaringi, ka mai tampa kulu warungka itingka tangka ngaringi.

¹⁰ Ka Jesulu tjanala wangkangu, “Kuka tjaraya ngalya-kati.”

¹¹ Ka Simon Peterlu pautangka tjarpara net panya antipina pulka tjuṭatjara witera ngalya-ilanu mantakutu. Munuya kantamilara nyangu nampa nyanga alatji 153, tjuṭa mulapa. Palu net panya palyatu ngarangi katakatinytja wiya alatjitu.

¹² Ka Jesulu tjanala wangkangu, “Pitjalaya pinpatja ngalkula!”

Kaya pitjala nyinakatira unngu kutju kuliningi alatji, “Ngananya nyangatja?” Palu utingku tjapilwiyangkuya wantingi, panya palunya alatjituya ngurkantanu Mayatja Jesunya.

¹³ Ka Jesulu mai tampa mantjira tjananya ungu kuka antipina kulukulu, kaya ngalkuningi.

¹⁴ Nyangatja panya Jesunya ilunytjatjanu pakara ara mankurara nintintja tjuṭangka utiringkunyitja.*

Jesulu Peterla Wangkanytja

¹⁵ Kaya kuka mai ngalkula wiyaringkuyangka Jesulu Simon Peterla wangkangu, “Simon Johnkunu, nyanga tjana ngayuku pulkara mukuringkupai. Ka nyuntu tjanala waintara mulapa ngayuku mukuringanyi?”

Ka wangkangu, “Uwa Mayatja, nyuntu ninti ngayulu nyuntumpa pulkara alatjitu mukuringkupai.”

Ka wangkangu, “Uwa, lamalama tjuṭatju paltjanma.”

¹⁶ Munu piruku tjapinu Simonta, “Simon Johnkunu, nyuntu mulapa ngayuku pulkara mukuringanyi?”

Ka wangkangu, “Uwa Mayatja, nyuntu ninti ngayulu nyuntumpa pulkara alatjitu mukuringkupai.”

Ka wangkangu, “Uwa, tjiipi tjuṭatju atunymara kanyinma.”

¹⁷ Munu pirukutu Simonta tjapinu, “Simon Johnkunu, nyuntu ngayuku pulkara mulapa mukuringanyi?”

Ka Peternya tjituru-tjitururingu mankurarangku tjapinnyangka. Munu paluru wangkangu Jesula, “Mayatja, nyuntu uwankaraku ninti. Nyuntu ninti alatjitu panya ngayulu nyuntumpa pulkara mulapa mukuringanyi.”

Ka Jesulu palula wangkangu, “Tjiipi tjuṭatju paltjanma.

¹⁸ Tjukarurungkunanta wangkanyi, nganmanypa panya nyuntu wati yangupalalpi nyinara pakara mantarangka tjarpara walytjangku kulira ankupai. Palu ngulan tjilpiringkula mara katuringkuku, kanta

* **21:14** Panya nganmanypa tjanala utiringu wali unngu tuwa patingka nyinanyangka. Munu piruku utiringu tjanala wali panya palulatu. Munu palulanguru uru nyanga kantilytjalta piruku utiringu.

kutjupa tjuṭangku nyuntunya mara karpira witira ma-katirinkuku nyuntu mukuringkunyjtija wiyakutu.”

¹⁹ (Alatji Jesulu wangkara utinu panya ngula mirpantju tjuṭangku Peternya witira mara karpira ma-katiku pungkula iluntankunyjtikit-jangku. Panya paluru rapa alatjitu iluku Godaku pulkara mulamularingkula, kaya anangu tjuṭangku palunya rapa ilunyangka nyakula Godanya pulkara mirawanira walkulku.)

Ka palulanguru Jesulu wangkangu Peterla, “Ngayunyaṅi wananma.”

²⁰ Ka Peterlu pinkurarara nyangu nintintja panya Jesuku malpa mulapa palunya pulanya wanannyangka. (Nintintja nyanga paluru panya mungatu mai ngalkunnyangka Jesula itingka ngarikatira tjapinu alatji, “Nganalunta witintjaku nintilku?”)

²¹ Ka Peterlu palunya nyakula Jesula tjapinu, “Mayatja, wati nyangatjampa? Nyanga paluru ngula yaaltjiriku?”

²² Ka Jesulu wangkangu, “Tjinguruṅa ngayulu mukuringkulampa wati nyanga palunya wanka kanyinma ngula panya ngayulu malaku pitjanyangka ngayunya nyakunyjtaku. Palu nyuntu palunya nyakula kulintja wiyangku wantima, munuṅi nyuntu walytjangku kulira ngayunya wananma.”

²³ Kaya Jesunya wanalpai tjuṭangku tjukurpa nyangatja kulira ara kampa kutjupa ngunti kulinu munuya wangkara lipinu uwankarangka nyanga alatji, “Jesulu panya wangkangi wati nyanga nintintja palumpa malpa mulapa ilunyjtja wiya rawa nyinanyjtaku.” Palu Jesulu nyanga alatji wangkanyjtja wiya wati paluru ilunyjtja wiya nyinanyjtaku. Alatji kutju paluru wangkangu, “Tjinguru ngayulu mukuringkulampa palunya wanka kanyinma ngula panya ngayulu malaku pitjanyangka ngayunya nyakunyjtaku. Palu nyuntu nyanga palunya nyakula kulintja wiyangku wantima.”

²⁴ Ka tjukurpa nyanganpa nintintja panya paluru tjakultjunanyi munu paluru nintingku walkatjunanyi kulintjatjanungku. Kala nganana kulini panya paluru nintingku tjukarurungku tjakultjunkunyangka.

²⁵ Ka panya Jesulu kutjupa kutjupa tjuṭa mulapa palyaningi mantangka nyinaralpi. Kana tjinguru tjukurpa palunyatjara uwankaratu nyiri tjuṭangka walkatjura wiyanna, ka nyiri paluru tjana manta winki anganma. Palu wiya, kutjupatjara kutjuṅa walkatjunu.

Uwa alatjituṅa wiyaringu.

Jesulu Iyantja Tjutangku Palyantja Acts Nyangatja Nganmanytju Nyakula Wangkanytjaku

Nyangatja Godaku tjukurpa wati ini Luke-alu walkatjunkunytja Jesuku nintintja tjutatjara, panya Jesunya ilkarikutu malaku ankunyangkaya wiru tjuta palyanangi. Ka Luke-alu lita nyangatja walkatjunu wati panya palumpa malpaku ini Tjiyapilatjaku paluru nyakula wangkara nintiringkunytjaku tjukurpa uwankaraku panya Peterlu Paululu tjana Jesuku panya nintintja tjutangku palyantjitjaku.

Tjukurpa nyanga palula Luke-alu tjakultjunu Godalu Kurunpa Milmilnga iyantja palumpa walytja tjutakutu panya Jew tjutakutu kutju wiya palu Jew wiya tjutakutu kulu. Panya Jew tjutangku kulira nintiringkunytjaku ngarangi panya Godaku Kurunpa anangu Jesuku mulamularingkupai uwankaraku Jew tjutaku kutju wiya. Palu Jew kutjupa tjuta puu mulamularingangi munuya paluru tjana kuraringangi anangu Jesuku walytja tjutaku. Palu tjana puu kurara angatjunangi, kaya tjukurpa panya Jesunyatjara ngura winkingka katira lipintanu anangu manta winkitjangku kulintjaku. Panya Kurunpa Milmilnga Jesuku walytja tjutangka tjungu nyinangi munu palunya tjananya pulkara witulyanangi waraka wiru palyantjaku munu pika kura tjanampa ngaranyangka paluru alatjitu tjananya anga-kanyiningi, kaya tungun-tunguntu Godaku tjukurpa lipintanangi anangu manta winkitjangka, ka anangu tjuta Jesuku walytjaringangi ngura kutjupa kutjupangka munu manta kutjupangka kutjupangka.

Tjukurpa nyanganpa ngarinyi:

- 1:1—8:1 Anangu tjuta Jesuku walytjaringkunytja ngura Jerusalemala
- 8:1—9:31 Jesuku walytja tjutaringkunytja ngura Israelta
- 9:32—12:25 Anangu Jew wiya tjuta Jesuku walytjaringkunytja
- 13:1—14:28 Paulanya pula Paanapatjanya ngura kutjupa tjutakutu ankunytja Tjukurpa Jesunyatjara wangkara lipintankunytjikitja
- 15:1-35 Jesulu iyantja tjutangku Jerusalemala tjunguringkula wangkara kulintja
- 15:36—18:23 Paulanya pula Tjaalatjanya ngura tjutakutu ankunytja Jesuku tjukurpa para-wangkanytjikitja munu palumpa walytja tjuta wangkara kunpuntjikitja
- 18:24—21:16 Paulanya piruku ankunytja ngura kutjupa tjutakutu Jesuku walytja tjuta wangkara kunpuntjikitja
- 21:17—26:32 Paulanyaya witintja munuya kuutpangka katira tjunkunytja wangkara ngurkantankunytjaku
- 27:1—28:31 Paulanyaya Rome-alakutu katinytja

Luke-alu Palumpa Malpa Wati Ini Tjiyapilala Nganmanytju Wangkanytja

1-2 Uwa Tjiyapilatja, panya nyiri nganmanyitjangkana tjukurpa Jesunyatjara walkatjunu nyuntu nyakula uti kulintjaku,* panya paluru nganmanypa mantangkalpi nyinara waraka palyantja munu anangu tjuṭangka nintintja kulū. Uwa, paluru mantangka nyanga nyinara palyantja uwankarana nyiringka panya walkatjunu palunya ilkarikutu mantjintja kulū, munu panyaṅa walkatjura nyuntulakutu iyaṅu.

Palu ilkarikutu mantjintja kuwaripangka Jesulu Kurunpa Milmilngatjarangku palumpa nintintja tjuṭangka tjukurpa tjuṭa wangkangi munu tjananya wituningi waraka palumpa palyantjaku. Panya paluru tjananya nganmanytju ngurkantanu munu tjananya witura iyaṅu palumpa tjukurpa anangu tjuṭangka tjakultjungkuntjaku. Palulanguru paluru wati palunya tjananya ini tjunu, *Iyantja Tjuṭa*.

³ Ka panya Jesunya ilunytjatjanu pakara palula tjanala utiringangi tjuṭa ara alatjiṭu, kaya nyara palulanguru palunya nyakunytjatjanungku kuliningi, “Mulapa paluru kuwari wanka nyinanyi.” Panya paluru tjintu 40-arangka tjanala rawa utiringangi, munu tjanala tjakultjunangi Godalu anangu tjuṭa walytjanmara mayatjangku kanyintja.

⁴ Kutjupa-ara paluru tjanala junguringkula mai ngalkuningi, munu tjananya wangkangu alatji, “Jerusalemalaya patara nyinama ankunytja wiya, panya Mamalu nyuranya nganmanytju kalkunu ungunytjikitjangku. Kaya nyangangka patanma, ka nyuranya ungunyu kalkuntja panya palunya, panya ngayulu nyurala nganmanytju wangkangu palunya.

⁵ Kulilaya! Nganmanytju panya Johntu anangu tjuṭa kuranguru kuntaringkunyangka urungka tjarpatjura baptise-katingi, palu kuwari nguwanpa Mamalu nyuranya baptise-katiku Kurunpa Milmilnga iyara nyurala unngu tjarpara nyinanytjaku.” Alatji Jesulu tjanala wangkangu.

Jesunya Ilkarikutu Mantjintja

⁶ Munuya tjintu kutjupangka puli ini Alipatjarala junguringkula ngaranggi Jesunya munu palumpa iyantja tjuṭa kulū, kaya palula tjapinu alatji, “Mayatja! Nyuntu wanyu kuwari ngura nyanga Israelku mayatjariku? Munulanya nyuntu Israelkunu uwankara mayatjarira atunymara kanyilku?”

⁷ Ka Jesulu wangkangu tjanala, “Wiya, Mamalu kutjungku tjintu nyara palunya ngurkantanu ngayulu Israelku mayatjarinytjaku. Munu paluru nyurala tjakultjungkuntja wiya nyura ninti nyinanytjaku.

⁸ Palu wanyuya kulila! Kurunpa Milmilṭu pitjala nyurala unngu tjarpara nyuranya witulyankuku nyura kutjupa kutjupa tjuṭa witulyangku palyantjaku. Ka nyura tjukurpa ngayunyatjara rapangku wangkaku ngura nyanga Jerusalemala, munu ngura ititja tjuṭangka kulū manta nyanga Judeala winkingka, munu palulanguru nyura manta nyara Tjamiriyalawanungku ngayunyatjara para-wangkaku anangu tjuṭangka, munu palulanguru nyura manta winkingka

* 1:1-2 Nyiri nganmanyitja panya Tjukurpa Palya Luke-alu Walkatjungkuntja.

ankula ngayunyatjara para-pitjalira tjakultjungkuku anangu winkingka urungka mun kara kulu." Alatji Jesulu tjanala wangkangu.

⁹ Ka wangkara wiyaringkunyaangka malangka Godalu palunya katun ilkarikutu, kaya malpa panya tjutangu ngarala palunya ilkarikutu katuringkunyaangka ira-nyangangi, ka palulanguru ngangkalingku palunya angatjunu.

¹⁰ Ka paluru tjana ngarala ira-nyakunyaangka wati kutjara tjanala itingka utiringkula ngarangi mantara pirantjara.

¹¹ Munu pula wangkangu palula tjanala, "Wati Galileenya ngurara tjuta! Nyaaku nyura ngarala ilkarikutu ira-nyanganyi? Nyara paluru panya palu purunypatu malaku pitjaku, panya nyura nyangu ilkarikutu ankunyaangka, palu purunypatu paluru ngula pitjaku." Alatji pula wangkangu tjanala munu wangkara wiyaringkula palula tjanalanguru arkayiringu.

Judasaku Arangka Nyinanytjaku Wati Kutjupa Ngurkantankunytja

¹² Kaya palula malangka iyantja panya tjuta malaku anu Jerusale-malakutu puli panya palulanguru. (Puli panya paluru Jerusale-mala itingka ngarangi.)

¹³ Munuya Jerusale-mala wirkara ngurakutu anu munuya walingka tjarpara tatira ruuma katutjangka nyinangi wati nyanga tjana panya ini nyanganpa Peternya, Johnnga, Jamesanya, Andrew-nya, Philipanya, Thomasanya, Patjalamanya, Matthew-nya, Simonnga, Jamesanya, Judasanya tjana. (Jamesanya panya Alpi-yatjaku katja, ka Judasanya panya James kutjupaku katja.)

¹⁴ Munuya wati nyanga paluru tjana Godala tjapintjikitja rawa tjunguringkupai, kaya minyma panya Jesunya wanalpai tjuta kulu palula tjanala tjunguringkupai, munu Mary-nya Jesuku panya ngunytju munu malanya tjuta kulu.

¹⁵ Ka tjintu kutjupangka paluru tjana piruku tjunguringu anangu Jesuku mulamularingkupai tjuta nampa nyangatja 120 nguwanpa, ka Peterlu pakara tjanala wangkangi alatji,

¹⁶⁻¹⁷ "Walytja wiru tjuta, kulilaya! Panya nyiringka ngaranya alatjitu tjukurpa Judasanyatjara Kurunpa Milmilu iriti Davidala nintintja. Ka tjukurpa panya paluru utiringu panya Judasalu nintinu Jesunya witintjaku. Palu panya Jesulu ngurkantanu Judasanya nganana tjungu para-ngaranytjaku, ka paluru mulapa nganana tjungu Godaku war karangi."

Alatji Peterlu wangkangi.

¹⁸ (Ka Judasalu panya Jesunya kurangku tjanala witintjaku nintintjatjanungku mani mantjira anu manta payamilantjikitja munu manta payamilara palulalta katanguru punkanu munu tjuni tjilpirarara unngunguru uwankara pakanu munu ilungu.

¹⁹ Kaya Jerusale-mala nyinanytja tjutangu kulinu Judasanya ilunytja munuya manta panya palunya inu palumpa tjanampa wangkangu, *Akil-tamanya*, panya ini paluru alatji wangkanyi, "Manta nyanga palula panya anangu ilura milkali tjutingu.")

²⁰ Ka Peterlu piruku wangkangu, "Panya Davidalu iriti tjukurpa Judasanyatjara walkatjunu Psalmangka alatji,

'Wanyuwi palumpa nguraya wantikatira ara, ka kutjupa nyinanytja wiya alatjitu ngarama.' *

Ka piruku ngaranyi Psalm kutjupangka kulu alatji,

'Ka paluru wiyaringkuyangka uti kutjupa palumpa arangka nyinama.' *

21-22 Ka nyara palulangurula uti kutjupa ngapartji ngurkantanama ngananala tjungurinkula Godaku warka palyantjaku wati panya palumpa arangka. Uti wati panya Jesula tjungutja ngurkantanama panya kuwaripatjara Jesula ngananala tjungu para-ngaranytjanya, munu panya paluru nganana tjungungku Johntu urungka baptisekatinyangka nyakunyjanya munu Jesunya ilkarikutu ankuyangka tjungungku nyakunyja kulu, wati tjungutja mulapa kutjupa wiya, panya paluru Jesunya ilura wankarinkula pakantja nyakunyjtjanungku ara nintingu tjakultjungkunyjtjaku ngananala tjungungku."

²³ Kaya palulanguru wati kutjara ini walkatjunu Josephanya ini kutjupa kutjara Paatjapatjanya munu Tjatjanya, ka wati panya kutjupa ini Matjaiyatjanya.

²⁴ Kaya nyara palulanguru ini kutjara walkatjungkunyjtjanungku tjungungku Godala tjapiningi wangkara, "Mayatja, nyuntu ninti nganampa uwankaraku panya nganana unngu kulintjtjaku. Wanyulanya nyuntu nintila wati nyanga kutjaranguru nyuntu ngurkantanakunyja ngananala tjungurinkula nyuntumpa warkarinytjaku Jesulu iyantja.

²⁵ Panya Judasalu warka nyangatja wantingu munu kura pulka palyantjatjanu anu ngura kurakutu. Kalanya Mayatja wirungku nyuntu nintila palumpa arangka kutjupa ngurkantara tjungkunyjtjaku."

²⁶ Munuya tjapira wiyaringkula ini panya kutjara nganmanytju walkatjungkunyjtjanungku ngururpa waningu, ka Matjaiyatjaku ini utiringu. Kaya palunya tjungunu wati panya Jesulu iyantja tjutangka, kaya 11 ngaranytjatjanu 12-aringulta paluru tjanala tjungurinkuyangka.

2

Kurunpa Milmiŋga Pitjanytja

¹ Ka tjintu panya Pintikatja* ngaranyangka Jesuku mulamularingku-pai tjuta tjungurinkula nyinangi wali kutjungka.

² Ka rurku winki ukalingu ilkaringuru walpa pulka purunypa, munu tjarpangu yiwala tjana nyinanytjtjangka. Kaya uwankarangku kulinu.

³ Munuya nyangu waru tili purunypa tjanala katu utiringkuyangka, ka waru tili paluru tii-tiilarara kutjungka kutjungka katangka nyinakatingu.

* **1:20** Psalm 69:25 * **1:20** Psalm 109:8 * **2:1** Tjintu Pintikatja ngaranyangkaya Jew tjutangu inma pulka palyalpai munuya Godalu tjananya wiru tjuta ungkunyjtjanguru pukularira mai pulka ngalkupai, munuya mai tjuta pakaltjingantjatjanangkuya tjarara tjukutjuku Godanya ungkupai palunya walkuntjikitjangku. Munuya palunya mirawanipai tjukurpa pulka Mosanya ungkunyjtjanguru. Palu inma Katuwanu Ankunyjanya nganmanyntja ngarapai, ka palula malangka tjintu 50 ngarala wiyaringkuyangka inma nyanga Pintikatjanya ngarapai.

4 Ka Kurunpa Milmilnga tjanala uwankarangka tjarpangu. Kaya ngurpangu kuwari kutju alatjitu mapalku wangkangu wangka kutjupa kutjupangu Kurunpa Milmiltu nintinnyangka.

5 Ka Jew ngura kutjupitja kutjupitja tjuṭa kulu ngura nyara Jerusalemala pitjala nyinangi Godanya timpulangka walkuntjikitja.

6 Munuya pulkara rurkunnyangka kulira ilaringkula ngarala nyangangi munuya kulinu Peterlu tjana wangkanyangka wangka tjanampangku, panya kutjungku kutjungkuya wangka kutjupa kutjupa wangkangi, kaya anangu tjuṭangku wangka walytjangku uti wangkanyangka kulinigi.

7 Munuya putu kulinigi, "Nyaaringuya nyanga tjana?" Munuya wangkangi, "Wati nyanganpa panya Galileenya ngurara tjuṭa.

8 Munu nyangantu yaaltji-yaaltji nganampa nyanga wangka wangkanyi?

9 Panya mulapa nganaṅa ngura kutjupa kutjupa tjuṭanguru pitjala tjuṅguringkula nyinanyi Jerusalemala, ngura ini nyangan-guru Patjiyalanguru, Miitijalanguru munu Ilamalanguru, Mitjuputaimiyalanguru, Judealanguru munu Kapatu-tjiyalanguru, Pantatjalanguru munu Aitjalanguru,

10 Purikijalanguru munu Pampijialanguru munu Itjipalanguru munu ngura tjuṭa Tjairinila itinguru panya manta nyara Lipijalanguru, munu tjara kutjupa Rome-alanguru.

11 Nganaṅa kutjupatjara Jew tjuṭa, kaya kutjupatjara Jew wiya tjuṭa panya paluru tjana Godaku mulamularingkula ngananala Jew tjuṭangka tjuṅguringu. Kaya kutjupa tjuṭa pitjangu manta nyara Kuritalanguru, ka tjara kutjupa manta Araipijalanguru. Uwankarala ngura nyanga palula tjanalanguru pitjala nyinanyi munu nyangala uwankarangku kulini anangu nyanga paluru tjana kuwari nganampa wangkangu wangkanyangka. Panya tjana wangkara Godanya pulkara wirunmananyi paluru wiru tjuṭa palyannyangka, kala uti kulini nganampa wangkangu wangkanyangka." Alatjiya wangkangi anangu tjuṭangku.

12 Munuya putu nguwanpa kulira tjananku wangkangi alatji, "Nyaaringu nyanganpa munuya nganampa wangka tjuṭa kutjungku kutjungku wangkanyi?"

13 Kaya tjara kutjupangu tjana wangkanyangka putu mulamularingkula tjananya anara wangkangi alatji, "Wiya, palantuya tarangkangu wangkanyi wama pulka kuwari tjikintjatjanungku."

Peterlu Anangu Tjuṭangka Wangkanytja

14 Kaya Peternya tjana panya nintintja tjuṭa walanguru ngalyapakanu urilkutu ka Peterlu anangu panya palula tjanala wangkangu alatji, "Jew tjuṭa munu Jerusalemala nyinapai tjuṭa! Kulilaniya kana nyurala tjukarurungku kulintjaku wangka!

15 Nyura ngunti wama tjikintja-palku kulini. Munga-munga nyangatja. Nganaṅa wama tjikintja wiyatu.

16-18 Nyangatja tjukurpa panyatja utiringu, panya wati Godaku wangkatjarangu Tjawiltu iriti walkatjungkunyitja nyiringka Godalu wangkanytja alatji,

'Panya ilkari manta wiyaringkunyitja kuwaripangka ngayulu kurunpa ngayuku iyalku anangu uwankarangka tjarpanytjaku,

watingka minyomangka kulu panya ngayuku waraka palyalpai tjuṭangka,

kaya tjukurpa ngayuku anangu tjuṭangka tjakultjunkuku.

Kaya nyurampa katja unṭalpanku kulu tjakultjunkuku ngayulu tjananya nintinnyangka.

Kaya wati tawaritja tjuṭangu kutjupa kutjupa tjuṭa nyakuku ngayulu tjanala nintinnyangka.

Kaya tjilpi tjuṭangu palu purunypatu tjukurmankula nyakuku ngayulu nintinnyangka.

19-20 Kaṇa pulka tjuṭa ilkarangka utilku tjana nyakula urulyarantjaku, panya tjuṭu maruringkuku, ka pira tjitin-tjitarira milkali purunyariku.

Munuṇa palu purunypatu pulka tjuṭa mantangka kulu utilku kaya milkali, waru puyu pulkanya kulu nyakula nguluringkuku.

Ka nyanga palula tjanala maṅangka tjuṭu panya palurulta wirkankuku,

ka Mayatjanya pitalytji witulya pulka utiringkuku anangu tjuṭangka.

21 Ka anangungku palula mirara tjapinnyangkampa Godalu palunya wankarunkuku ngura kurakutu iyantja wiyangu.' " *

Alatji Peterlu tjukurpa Tjawiltu iriti nyiringka walkatjunkunytjtja anangu tjuṭangka tjakultjunangi.

22 Munu wangkangu, "Anangu tjuṭa, kulilaniya! Panya Jesunya Nazarethanya ngurara wati Godalu iyantja, panya paluru kutjupa kutjupa pulka tjuṭa witulyangu palyaningi nyurala mirangka, ka panya nyura palyannyangka nyakula kulinigi, 'Awari! Wiru mulapa nyangangu palyani.' Nyara palulanguru nyura uti kulinma wati nyanga paluru panya Godalanguru pitjanytja.

23 Panya Godalu nganmanytju nintingu kulinu ngula wati kutjungku Jesunya wati kura tjuṭangka nintilku, ka panya nyura Jesunya iluntanu wati kura tjuṭangka tjunguringkula munu panya nyura punu katakutjarangka wakara utitjunu.

24 Ka paluru ilura titutjara ngarinytja wiya. Palu Godalu palunya wankara pakaltjanganu.

25-26 Panya iriti Davidalu nyiringka walkatjunu Jesulu nganmanytju wangkanytja nyanga alatji,

'Ngayuluna nyangu Mayatja Godanya ila ngaranyangka.

Paluru ngayula titutjara tjungu nyinanyi,

kaṇa nguluringkunytja wiya titutjara rapa ngaranyi,

munuṇa kurunpa winki pukularira rawangu pukultu inkapai

munuṇa waintara kulira palumpa pulkara mulamularinganyi.

27 Panya ngulana ilura wankaringkula pakalku,

panya paluruṇi wantinytja wiyangu mantjilku miri tjuṭaku ngurangka titutjara ngarinytjaku wiya.

Panya palulana titutjarangu wanganarangku kulilpai,

kani ngayuku puntu wantinytja wiya kulpingka ngarira piltiringkunytjaku.

28 Panya paluru ngayunya rawangu nintilpai iwara wankakutu palula tjunguringkula pukulpa mulapa nyinanytjaku.' " *

* 2:21 Tjawilku 2:28-32 * 2:28 Psalm 16:8-11

Alatji Peterlu anangu tjuṭangka tjakultjunangi tjukurpa panya Davidalu iriti Jesuku wangka nyiringka walkatjunkunyja.

²⁹ Munu piruku wangkangi tjanala, "Walytja wiru tjuṭa kulilaya! Panya tjamu Davidanya ilunyangka tjana puntu kulpingka tjunu, ka kulpi paluru manta nyangangka ngaranyitu kuwari.

³⁰ Panya Davidanya Godaku wangkatjara nyinangi munu kuliningi Godalu panya palunya wangkara kalkuntja alatji, 'Ngula nyuntumpa pakali maṭatja mayatjarira nyinaku nyuntumpa arangka nyuntu purunypa.'

³¹ Ka Davidalu nyara palunya nganmanytju kulintjatjanungku nyanga alatji wangkangu, 'Wati nyara palunyaya puntu kulpingka tjunu, palu Godalu palunya mapalku pakaltjingalku wantinytja wiyangku rawa ngarira puntu piltiringkunyjtaku-tawara.' Alatji Davidalu nganmanytju wangkangi ilunyjtjanu pakantjaku.

³² "Ka wati nyara paluru panya Jesunya, panya Godalu wankara pakaltjingantja, ka nganana mulapa palunya nyakunyjtjanungku nyurala tjakultjunanyi.

³³ Panya palunya Godalu ilkarikutu mantjinu, ka paluru kuwari palula tjungu nyinanyi mayatja pulka mulapa. Panya palumpa Mamangku palunya Kurunpa Milmilnga ungu paluru panya nganmanytju kalkuntjatjanungku. Ka paluru kuwari Kurunpa Milmilnga ngananalakutuluta iyanu. Ka nyanga nyura kuwari nyakula kulini nganana nyurampa wangkangu wangkanyangka, panya nyangatjalanya Kurunpa Milmilu nganana ungu nyinara nintini.

³⁴ Panya Godalu Davidanya ilkarikutu mantjintja wiyatu, palu Davidalu Jesuyatjara iriti walkatjunu alatji, 'Godalu ngayuku mayatjanga wangkangu alatji,

"Pitja munu ngayula tjunguringkula mayatjari,

³⁵ kana nyuntumpa mirpantju tjuṭa tjarulku,

ka nyuntu tjanala waintarira mayatja pulka mulapa nyinaku." ' *

³⁶ Ka nyura Jew tjuṭangu tjukarurungku kulintjaku ngaranyi, panya nyangatjana Jesuyatjara wangkanyi, panya punu katakutjarangka nyura wakara utitjunu. Ka nyara palunya Godalu ngurkantanu mayatja pulka nyinanyjtaku munu anangu tjuṭa kulu wankarunkunyjtaku." Alatji Peterlu tjanala wangkangi.

³⁷ Kaya kulira pulkara alatjitu kuntaringu munuya Peterla tjanala tjapiningi alatji wangkara, "Kala nyaaringkuku?"

³⁸ Ka Peterlu wangkangu, "Nyura uti uwankarungku kura wantima munuya kampa kutjuparira malaku Godalarkutu pitja, kala nyuranya Jesuku Christaku mulamularingkunyangka urungka baptisekatiku. Ka Godalu kalypangku nyuranya kura palyantjitjangu pungkuwiyangku wantiku, munu nyurala Kurunpa Milmilnga tjarpatjunkuku nyurala ungu nyinanyjtaku.

³⁹ Panya Mayatja Godalu kalkunu nyuranya munu nyurampa tjitji tjuṭa, munu maṭatja maṭatja tjuṭa kulu, munu paluru pararitja tjuṭa kulu kalkunu ngura winkitja. Panya paluru anangu tjuṭa ngura winkingka ngurkantankuku palumpa walytjaringkunyjtaku munu paluru Kurunpa Milmilnga tjanala tjarpatjunkuku."

* 2:35 Psalm 110:1

⁴⁰ Munu piruku Peterlu tjanala tjukurpa kutjupa tjuṭa wangkangi tjananya ngulutjunktjikitjangku munu alatji wangkangu, “Kulilaya! Kura pulka mulapa ngula ngaraku anangu kura tjuṭaku, panya Godalu tjananya paira iyalku ngura kurakutu. Kaya palula-tawara kuwari Godalakutu aruriwa paluru nyuranya wankarunkunytjaku.”

⁴¹ Kaya tjuṭa mulapa Peterlu tjukurpa wangkanyangka kulira kuntaringkula mulamularingu, kaya palunya tjananya urungka baptise-katingu Jesuku walytjaringkunyangka. Panya kalala nyara palulaya anangu tjuṭa mulapa mulamularingu nampa panya 3,000 alatjiṭu.

⁴² Munuya anangu nyara paluru tjana Peterla tjanala tjunguringkula nyinara Godaku tjukurpa kulira nintiringangi iyantja panya tjuṭangku nintinyangka. Munuya pukultu mai tjungungku ngalkuningi munuya kutjupa-ara nyuma waina kulu ngalkula tjikiningi Jesunya ilunytja kulintjikitjangku, munuya Godala rawangku tjapiningi.

Mulamularingkupai Tjuṭangku Ngapartji-ngapartjingku Munytjangku Ungkupai

⁴³ Kaya wati panya Jesulu iyantja tjuṭangku Godalu witulyankunyangka kutjupa kutjupa pulka tjuṭa rawangku palyaningi, kaya anangu tjuṭangku nyakula pulkara kuliningi, “Awa! Mulapa Godanya ngananala ngaranya.”

⁴⁴ Munuya paluru tjana titutjara tjunguringkupai munuyanku ngapartji-ngapartjingku ungupai munytja nyinara.

⁴⁵ Munuya tjana kanyintjatjanungku manikitjangku tjalamilara mani mantjiningi munuya ngaltutjara tjuṭa ungangi mai munu kutjupa kutjupa tjuṭa kulu payamilantjaku.

⁴⁶ Munuya tjintu kutjupa tjintu kutjupa timpulangka tjunguringkupai munuya ngura tjuṭangka kulu tjarpara pukultu tjunguringkula mai ngalkupai, munuya mai nyuma katantara ngalkula waina kulu tjikilpai Mayatja Jesunya ilunytja kulintjikitjangku.

⁴⁷ Paluru tjana kurunpa pukultu alatjiṭu Godanya mirawanira walkuningi. Kaya anangu kutjupa uwankarangku kulu tjananya nyakula wirunmanangi paluru tjana rawangku alatji palyannyangka.

Ka tjintu kutjupa tjintu kutjupa Mayatja Godalu piruku anangu kutjupa tjuṭa kulu tjanala tjunguningi panya Jesuku walytja tjuṭangka, kaya nyara palulanguru winki mulararingu.

3

Peterlu Pula Johntu Wati Nyumpu Palyarunguntja

¹ Ka tjintu kutjupa mungartjirinyangka Peternya pula Johnnga timpulakutu anu panya anangu tjuṭaya tjaka rawa ankupai mungartji titutjara Godala tjapintjikitja.

² Palu mungartji nyara palula pula timpulakutu ilaringkula nyangu wati nyumpu nyinanyangka. Wati nyara paluru panya itilpi nyumpu ngarinytja, kaya palunya walytja tjuṭangku katira tjunkupai timpulaku kaita panya ini *Wirula* iwarangka itingka, ka paluru nyinara maniku ngatjilpai anangu tjuṭa timpulangka tjarpanyangka nyakula.

³ Munu wati panya paluru nyangu Peternya pulanya Johnnga nguwanpa ma-waintarinyangka munu pulala mapalku maniku ngatjiniu.

⁴ Ka Peterlu pula Johntu nyakula palula wangkangu, "Nyawalinya!"

⁵ Ka paluru pulanya pulkara ira-nyangu alatji ngunti kulira, "Mani ungkunyjikitjangku-mantini pula wangkanyi."

⁶ Palu Peterlu palula wangkangu, "Ngayulu mani wiya, palu kutjupananku palyalku. Panya Jesulu Nazarethanya ngurarangku ngayunya witulyanu, kana wangkanyi nyuntunya, 'Pakala munu paljtjura para-ngara.'"

⁷ Munu wangkara mara waku witiira pakaltjanganu, ka tjina kutjaratu palyaringkula tari kunpuringu.

⁸ Munu mapalku pakara para-ngarala arkara Peternya pulanya timpulangka tjarpnyangka wanara tjarpangu munu wararakatira paljtjura Godanya walkuningi.

⁹ Kaya winkingku nyangangi wati panya palunya para-ngarala Godanya walkunnyangka.

¹⁰ Munuya wangkangu, "Ai! Wati panya paluru palatja! Kaita panya ini 'Wirula' nyinara ngatjilpainya!" Munuya putu nguwanpa kuliningi wati nyumpu nyinanytjatjanungku palyaringkula para-ngarala Godanya walkunnyangka nyakula.

Peterlu Anangu Tjutangka Timpulangka Wangkanytja

¹¹ Ka timpulangka kantilytja wiltja wara para-ngarala arintanangi. Kaya anangu tjuta timpulangka tjarpapai kampa kakararanguru. Nyanga paluru ini *Tjalamanku Wiltja*. Ka nyanga palula wati panya nyumpu palyaringkunyjtjalu pukularira Peternya pulanya Johnnga witiira ngarangi. Kaya anangu tjutangku palunya nyakula putu kuliningi, munuya uwankara wati panya palula tjanalakutu ngalya-ngalya-wirtjapakara ngarala tjananya nyangangi.

¹² Ka Peterlu tjananya para-nyakula wanara wangkangi, "Wati Israelkunu tjuta! Kulilaya! Nyura nyaaku putu kulini wati nyan-gatja nyakula munu ngalinya pulkara nyanganyi? Tjinguru nyura kulini ngali Godalawanu tjukaruru nyinara wati nyanga nyumpu witulyangku palyarungunu.

¹³⁻¹⁴ Palu wanyuya kulila! Godanya panya nganampa tjamupitiku mayatja pulka nyinanyi Aipuramaku Isaacaku Jacobaku tjanampa, munu panya Jesunya ilunyangka wankara pakaltjanganu munu ilkarangka tjunu mayatja pulka mulapa nyinanytjaku. Panya paluru Godaku warka mantangka nyanga nyinara wanganarangku kulira palyanangi, ka panya nyura palunya ma-ungu palumpa mirpantju tjutangku palunya iluntankunyjtjaku. Munu panya nyura piruku Pilate-alu walatjunktjikitjangku wangkanyangka tungun-tunguntu wangkangi palunya iluntankunyjtjaku alatjitu. Uwa, nyura panya palunya wantingu alatjitu wati palya mulapa.

¹⁵ Munu panya nyura wati miriputjuku mukuringu palumpa arangka walatjunktjaku. Palu nyura alatjitu iluntanu wati panya wankarunkupainya, palu Godalu palunya ilunytjitja wankara pakaltjanganu, kali nyakunyjtjatjanungku kuwari nyurala tjukarurungku tjakultjunanyi.

16 “Ka nyura uwankara ninti wati nyanga palumpa, panya itilpi nyumpu ngarinytjitjaku. Wati nyanga palunya panya Godalu palyarungunu Jesuku mulamularingkunyangka, ka nyanga nyura kuwari uwankarangku palyarungkunyangka nyanganyi. Uwa, Jesuku mulamularingkunyangka wati nyanga palunya Godalu pakaltjinganu.

17 “Ka walytja tjuṭa! Ngayulu ninti panya nyura nyurampa mayatja tjuṭangka tjunguringkula ngurpangku Jesunya iluntanu Wankarunkupainya Godalu kalkuntja, Godalu iyantja kulilwiyangkuṭu.

18 Panya nganmanytjuya Godaku wangkatjara tjuṭangku Jesunya pikatjararingkunyjtjaku nyiringka walkatjunu, ka mulapa tjana panya nganmanytju walkatjura wantinytja alatjitu utiringu.

19 Ka wanyuya kulila, munuya kura wantira malaku aruriwa Godalakutu, ka paluru nyuranya kalypangku pungguwiyangku wantiku.

20 Munu nyuranya kurunpa palyarungura ipilymara kanyilku munu Jesunya ngula iyalku nyuralakutu, panya paluru nganmanytju palunya iyantjikitjangku kalkunu nyuranya wankarunkunyjtjaku.

21 Panya Godaku wangkatjara tjuṭangku nganmanytjulpi nyiringka walkatjunkunyjtja ngaranyi Godalu wangkara kalkuntja alatji, ‘Ngayulu panya nganmanytju uwankara wiru mulapa palyanu, ka panya uwankara kuraringu, palu ngulana piruku malakungku wirulku.’ Palu Jesunya kuwaripatu ilkarangka nyinanyi tjinṭu nyara palumpa patara. Munu nyara palula ara kutju pitjaku.

22 “Ka nyura uti kura palyantjitjanguru piiwiyaringkula kampa kutjuparima panya Moselu wangkangu alatji, ‘Mayatja Godalu wati wangkatjara nyuralakutu iyalku anangu nyurampa walytjanguru, ka paluru ngayulu purunytju nyurala wangkaku. Ka nyura uti palula wanganarangku kulinma paluru wangkanyangka.

23 Palu nyura tjinguru palula kulilwiyangku wantinyangkampa Godalu nyuranya wantiriyalku alatjitu nyurampa walytja tjuṭanguru mauntalpa nyinanytjaku munu palumpa walytja wiyaringkunyjtjaku kulu.’ *

24 Kaya Samueltu tjana wangkatjara kutjupa tjuṭangku kulu uwankarangku nganmanytju wangkara nyiringka walkatjunu ngula utiringkunyjtjaku.

25 Panya Godalu Aipuramala kalkunu alatji, ‘Nyuntumpa walytjapiti malatjanguruna ngayulu anangu manta winkitja pukulmankuku.’ Ka kalkuntja nyara paluru nyurampa kulu ngaranyi.

26 Ka Godalu palulanguru Jesunya ngurkantara iyanu nyuralakutuwarara nyura nganmanytju kulintja kampa kutjuparira kura wantira pukulpa nyinanytjaku, ka nyara palula malangka kutjupa tjuṭangku kulu palunya kulira kura wantira kampa kutjuparira pukulpa nyinaku.” Alatji Peterlu tjanala wangkangi Jew tjuṭangka.

4

Peternya Pulanya Johnnga Witintja

1 Ka Peterlu pula Johntu ngarala kuwaripangkuṭu wangkangi anangu tjuṭangka, kaya Moseku tjukurtjara kuranyitja tjuṭa munu

* 3:23 Deuteronomy 18:15,18-19

wati Tjatjutji tjuṭa munu wati timpula atunymankupai tjuṭaku mayatja kulu pitjangu palula pulalakutu.

² Munuya pulampa pulkara mirpaṅaringu pula ilunytjatjanu pakan-tja wangkanyangka. Panya pula alatji wangkangi, "Jesunya ilunytjatjanu pakantjitjanguru anangu miri kutjupa tjuṭa kulukulu wankaringkula pakalku."

³ Kaya palulanguru pulanya wangkanytjikitjangku wituṅu munuya tjirirpi nganmanypa tjarpanyangka pulanya tjailangka tjarpatjunu mungawinki wangkanytjikitjangku.

⁴ Palu anangu kutjupa tjuṭaya paluru pula wangkanytjitjanguru kulira mulamularingu alatjitu winki mulapa, munuya Jesuku walytja kutjupa tjuṭangka tjunguringkula tjuṭaringu munuya 5,000 nguwanpa nyinangi tjuṭa mulapa.

⁵ Ka pula tjaila unngu nyinara tjinturingu. Kaya ngura Jerusalemala mayatja tjuṭa tjunguringu Jew tjuṭaku mayatja kuranyitja tjuṭa, munu tjilpi tjuṭa kulu, munu Moseku tjukurpa nintilpai tjuṭa kulukulu.

⁶ Ka wati tjukurtjara pulka kulu tjanala tjunguringu wati ini Anatjanya munu palumpa wapatju ini Kayapatjanya. Ka palumpa walytja kutjupa kutjara kulu ini Johnnga pula Alikatjantanya nyara palula tjanala tjungu nyinangi.

⁷ Munuya wituṅu wati timpula atunymankupai mankurpa Peternya pulanya Johnnga tjailanguru pakaltjingara ngalya-katinytjaku, munuya ngalya-katinyangka pulanya kuranyu ngaratjungkula pulala tjapiningi alatji wangkara, "Nganalu nyupalinya witulyanu wati nyanga nyumpu palyarunguntjaku? Ini nganalu nyupalinya wituṅu wangkara palunya pakaltjingantjaku?"

⁸ Ka Peterlu Kurunpa Milmilngatjarangku rapangku alatjitu wangkangu, "Mayatja tjuṭa munu tjilpi tjuṭa kulu! Kulilaniya!

⁹ Ngali wati nyanga nyumpuku nyakula ngalturingu, ka nyura wanyu ngalinya tjapira kulini paluru palyaringkunyitja kulintjikitjangku?

¹⁰ Palya, kaṅa kuwari nyurala tjukarurungku tjakultjunanyi anangu Israelkunu uwankarangka kulu. Panya nyura Jesunya Christanya Nazarethanya ngurara punu katakutjarangka wakara utitjunu ilunytjaku, palu palunya Godalu ilunyangka wankara pakaltjinganu. Ka ini panya paluru ngalinya nintinu Jesulu wati nyanga palunya palyarunguntjaku.

¹¹ Panya nyiringka iriti walkatjungkunyitja nyanga alatji ngaranyi, 'Panya puli kutju ngarinyi wali palyalpai tjuṭangku kura-palku nyakula waninytja.

Palu puli panya paluru wiru mulapa puli kutjupa uwankarangka waintara.' *

Kala uti puli nyanga palulanguru Jesunya kulinma.

¹² Panya Jesulu kutjungku anangu tjuṭa wankarunkupai kutjupangku wankantja wiya. Panya Godalu palunya kutju iyanu anangu tjuṭa wankarunkunyitjaku, ka kutjupa palu purunypa mantangka nyanga nyinanytja wiya alatjitu anangu tjuṭa wankarunkunyitjikitja." Alatji Peterlu Jewku mayatja tjuṭangka wangkangi.

* 4:11 Psalm 118:22

13 Kaya Peterlu pula rapangku wangkanyangka nyakula pulkara kuliningi, "Ai! Nyanga pula ngurpa kutjara nyinanyi kuulitja wiya kutjara, munu paluru pula yaaltji-yaaltjingku nintingku wangkanyi?" Munuya piruku kulinu, "Munta-uwa! Nyanga pula panya Jesula tjungu rawa para-ngarapai."

14 Munuya nyangu wati panya nyumpu nyinanytja pulala itingka ngaranyangka, munuya wangkanytjikitjangku putu kuliningi munuya pilunpa alatjitu nyinangi.

15 Munuya pulanya urilkutu witu munuya tjana kutjulta wangkara kuliningi pula urilta patara ngaranyangka.

16 Alatjiya wangkangi, "Nyaalkula wati nyanga kutjara? Panya anangu nyanga Jerusalemala nyinanytja tjutaya ninti wati nyanga palumpa pulampa panya pula kuwari nyanga witulyangku pulka palyantjitja, kala putu wiymananyi.

17 Palu utila kuwari painma piruku Jesunyatjara wangkanytja wiyangku wantinytjaku kutjupa tjutangku kulira mulamularingkula tjutaringkunytjaku-tawara."

18 Munuya pulanya malakungku altira tjarpatjunu munuya pulala wangkangu, "Nyupali piruku Jesunyatjara wangkanytja wiyangku wantima! Munu pula tjukurpa palunyatjara anangu tjutangka nintintja wiyangku kulu wantima!"

19 Palu Peterlu pula kulira tjanala ngapartji wangkangu, "Yaaltji tjukaruru ngaranyi? Nyura wangkanyangkali kulira palyanma? Wiya, ngali Godalu wangkanyangka kutju wanganarangku kulira palyani.

20 Panya ngali nyangatja kuwari putu wantinyi. Utili nyakunytjatjantungku munu kulintjatjanungku wangkama alatjitu."

21 Kaya Jewku mayatja tjutangku piruku pulanya painu wangkawiyangku wantinytjaku munu pulanya walatjunu ankunytjaku ngurakutu. Panya tjana pulanya pungkula nintintjikitjangku kuliningi, palu anangu tjutakuya nguluringkula wantingi, panya anangu winkingkuya paluru pula wirungku palyantjitjanguru Godanya walkuningi, munuya Peternya pulanya pungkunyangkampa tjinguru palunya tjananya ngapartji pungama. Palula-tawaraya kulira wantingu.

22 Palu wati panya itilpi nyumpu nyinanytjanya kunyu kuli 40 nyinanytja iritinguru alatjitu.

Mulamularingkupai Tjutangku Godala Tjapintja

23 Palulanguruya Peternya pulanya Johnnga walatjunu, ka pula ankula tjunguringu Jesuku walytja tjutangka munu pula tjanala tjakultjunu uwankara Jewku mayatja tjutangku pulanya wangkanytja.

24 Kaya paluru pula wangkanyangka kulira Godala tjapiningi alatji wangkara, "Uwa Mayatja, nyuntu panyan pulka mulatu ilkari manta uru kulu palunu munu panyan ilkaritja mantatja urutja tjuta kulu palunu.

25 Nganampa tjamu Davidanya panya wati nyuntumpa warkaripai nyinangi. Munu panya paluru Kurunpa Milmiltu nintinnyangka alatji wangkangu, 'Nyaakuya anangu Jew wiya tjuta ngura winkitja pulkara mirpanarinyi?'

Munuya panyatja nyaaku nintingku-palku ngunti wangkara tamal-mankupai?

26 Uwa, wati panya mayatja manta winkitjangkuya tjunguringkula wangkara tamalmankupai Mayatjanya pikangku pungkunytjikitjangku, Godalu panya kalkura iyantjanya.*

27 "Uwa Mama God ilkaritja! Davidalu panya iriti wangkangu wati tjuťangku wangkara tamalmankunytja, ka panya palu purunypa kuwari Jewku mayatja tjuťangku ngura nyanga Jerusalemala tjunguringkula wangkara kuliningi Mayatja Jesunya pungkunytjikitjangku, munuya mayatja Iratala pulala Pontius Pilate-ala tjunguringu munu wati panya Jew wiya tjuťangka kulu munuya uwankarangku tjunguringkula mirpantu alatjitu wangkara kuliningi palunya iluntankunytjikitjangku. Panya palunya nyuntu ngurkantara iyanu nyuntumpa warka wangararangku kulira palyantjaku nyuntu mukuringkunytja.

28 Munu panyan nganmanytju alatjitu nintingku kuliningi nyanga alatjirinytjaku.

29 Uwa Mama, kulinma tjananya wangkara waninyangka, panya tjana nganananya ngulutjingantjikitjangku alatji wangkanyi. Kalanya Mayatja, kurunpa rapanma nyuntumpa tjukurpa tjanala ngulu wiyangku rapangku wangkanytjaku.

30 Munulanya nganananya witulyanama anangu pikatjara tjuťa palyarunguntjaku, panya nyuntu Jesunya witulyanu nyuntumpa warka palyantjaku, palu purunypa. Munu kutjupa kutjupa pulka tjuťa utinma tjana nyakula nyuntunya walkura pulkanmankunytjaku."

31 Ka tjana Godala tjapira wiyaringkunyangka wali panya tjana nyinanytjanya uringu, ka nyara palula ara Kurunpa Milmitu tjananya piruku pulkara witulyanangi, ka nyara palulanguruya Godaku tjukurpa rapangku alatjitu wangkangi anangu tjuťangka.

Mulamularingkupai Tjuťangkuyanku Wirura Atunymankunytja

32 Munuyanku Jesuku panya walytja tjuťangku wangkara kulira wangka kutju palyanu. Munuyanku tjungungku ngurtjuringkuwiyangku ngapartji-ngapartjingku intjanungku ungangi tjana kanyintja uwankara.

33 Kaya wati panya Jesulu iyantja tjuťangku ngulu wiyangku rapangku alatjitu wangkangi tjukurpa panya Jesunya ilunytjatjanu pakantja. Ka Godalu palunya tjananya pulkara mulapalta pukulmanu, Jesuku walytja uwankara.

34 Ka nyara palula anangu kutjupa ngaltutjara nyinanytja wiyaringu. Uwankaraya pukulpa alatjitu nyinangi mai ulytja pulkatjara. Kaya kutjupa-ara walitjara tjuťangku munu kaanatjara tjuťangku wali munu kaana tjalamilalpai manikitjangku.

35 Munuya mani mantjira katira ungangi wati panya Jesulu iyantja tjuťa, kaya paluru tjana tjarara ungangi anangu kutjupa tjuťa maralpa nyinanyangka.

36 Ka wati kutju ini Josephanya nyara palula nyinangi wati Levikunu ngura Tjaipuritjanya ngurara, panya paluru kulu Jesuku walytja nyinangi. Kaya iyantja tjuťangku palunya ini kutjupa tjunu Paanapatjanya. Ini nyanga palupayaya kunyu tjanampa wangkangku wangkapai alatji, *Wangkara Rapalpainya*.

* 4:26 Psalm 2:1-2

³⁷ Ka wati nyanga paluru kaana maitjara kanyiningi, munu manikitjangku manta winki tjalamilara mani mantjira katira iyantja tjuta ungu.

5

Ana-nayatjanya Pula Tjapairanya

¹ Ka wati ini Ana-nayatjanya pula kurirara ini Tjapairanya nyinangi ngura nyara palula munu paluru pula kulu pulanku kaana tjalamilara manikitjangku.

² Munu wati panya paluru mani mantjira tjarara pulanku tjunu pulampa ngurangka munu kutjapatjara katira ungu wati panya Jesulu iyantja tjuta alatji wangkara, "Nyangatjali kaana tjalamilara mani uwankara mantjira unganyi nyuranya." Palu minyama panya palumpa kuri kutju ninti nyinangi mani panya palumpa pulampa tjarara tjunkunytjitjaku.

³ Ka Ana-nayatjalu winki-palku katira ungunyangka Peterlu wangkangu, "Nyuntun kurangu mamungka wanganarangku kulira Kurunpa Milmilnga ngunti kuraṇu. Panya nyuntu kaana tjalamilantjatjanungku mani mantjira katira tjara kutjupa tjunu nyupalimpa ngurangka munun tjara kutjupa ngalya-katingu uwankara-palku, kala ngunti kulinu nyuntuntin uwankara nganannya ungu.

⁴ Panya kaana nyara paluru tjalamilantja kuwaripangka nyuntumpa alatjitu ngarangi. Ka palulanguru nyuntu tjalamilantjatjanungku mani mantjinu, ka mani pala paluru nyuntumpa alatjitu ngarangi. Kan nyaaku kuwari winki katira ungunytjatjanungku-palku ngunti kurani? Kulila! Nyuntun nganannya ngunti kurantja wiya, palu nyuntu Godanya ngunti kurani."

⁵⁻⁶ Ka Ana-nayatjanya alatji wangkanyangka kulira punkara ilungu, kaya wati tjutangu mantarangka karpira urilkutu katira palunya tjunutjunu. Kaya anangu tjutangu ara nyanga palunya kulira pulkara nguluringu.

⁷ Ka nyara palula malangka palumpa kuri watarku pitjangu, panya paluru kulintja wiya palumpa kuri ilunytja.

⁸ Ka ngalya-tjarpanyangka Peterlu palula tjapinu, "Uwa, wanyuni tjakultjura utingku. Nyupali mani nyanga alatji-alatjitu mantjinu kaana tjalamilara?"

Ka minyama panya paluru wangkangu, "Uwa, mani pala palunya alatjituli mantjinu."

⁹ Ka Peterlu wangkangu, "Nyaaku nyupali Kurunpa Milmilta ngalya-ngalyparingkula palunya ngunti kurani? Kulila! Nyuntumpa kuri katira tjunutjunkunytjatjanu nyangaya wati tjuta kuwari pitjalalta ngaranyi nyuntunya ngapartji katira tjunutjunkunytjikitja."

¹⁰ Ka Tjapairalu alatji wangkanyangka kulira mapalku punkara ilungu, kaya wati panya tjutangu nyangu ilura ngarinyangka munuya palunya ngapartji mantjira katira kuringka itingka tjunutjunu.

¹¹ Kaya Jesuku panya walytja uwankarangku munu anangu kutjupa tjutangu kulu nyangatja kulira pulkara nguluringu.

Pikatjara Tjuta Palyarunguntja

¹² Kaya Peterlu tjana wati panya Jesulu iyantja tjutangu kutjupa kutjupa pulka tjuta witulyangku palyaningi anangu tjutangu nyakula

Godanya pulka kulintjaku. Munuya paluru tjana Jesuku walytja kutjupa uwankara kulu tjunguringkupai timpulangka, Tjalamanku panya wiltjangka.

¹³ Kaya anangu Jesuku walytja wiya tjutangku tjananya nyakula wirunmankupai kutju, palu palula tjanalaya tjunguringkunyitja wiyangku nguluringkula wantipai.

¹⁴ Palu anangu tjara kutjupaya anangu nyara palula tjanalanguru Mayatja Jesuku mulamularingkula tjanala tjunguringangi, ka Jesuku walytjapiti piruku tjuta mulararingu.

¹⁵ Kaya anangu tjutangku Peterlu tjana kutjupa kutjupa tjuta witulyangku palyannyangka nyakunyitjatjanungku pikatjara tjuta katira iwarangka itingka mantara piitatjura ngaritjura wananingi paluru tjana pitjala palyarunguntjaku. Panya tjana mukuringkula alatji kuliningi, "Tjinguru Peternya tjanalawanu ankunyangka palumpa wiltjangku tjananya tjutulku kaya palyaringkuku."

¹⁶ Kaya kutjupa tjutangku ngura Jerusalemala itingka nyinanyitja tjutangku kulu kulira pikatjara tjuta katira tjunangi munu mamutjara kulukulu, ka tjananya uwankaratu palyarungunu.

Angeltu Wati Jesulu Iyantja Tjuta Tjailanguru Pakaltjingantja

¹⁷⁻¹⁸ Kaya wati panya tjukurtjara pulka munu palumpa malpa tjuta panya Tjatjutji tjuta kulu Peterku tjanampa wati panya Jesulu iyantja tjutaku pulkara nyararingangi. Munuya palunya tjananya witera tjailangka tjarpatjuno.

¹⁹⁻²⁰ Ka munga nyara palula Godaku angelpa tjailakutu pitjangu munu tuwa kunpu pulka key wiyangku alanu munu tjananya altira katira urilta wirkara wangkangu, "Araya timpulakutu munuya anangu tjutangka tjakultjura iwara nyanga kuwaritja panya Jesuku mulamularingkula palunya wanantjaku."

²¹ Kaya mulapatu mungawinki mulapa pakara anu timpulakutu munuya timpulaku yaatangka tjarpara ngarala anangu tjutangka wangkangi Godaku tjukurpa. Ka tjukurtjara panya pulka malpa tjutatjara kampa kutjupawanu wirkanu Peternya tjananya nyakunyitja wiya, munuya ruumangka tjarpara altingu wati panya tjilpi kuranyitja tjuta mitingiku. Munuya wati timpula atunymankupai mankurpa witunu tjailakutu ankula wati panya iyantja tjuta pakaltjingara ngalyakatinytjaku.

²² Palu wati panya paluru tjanaya tjailakutu ankula putu nyangu munuya malaku pitjangu mayatja panya tjutakutu.

²³ Munuya wangkangu, "Ankulala tjailangka wirkara tuwa pati ngaranyangka nyangu, kaya atunymankupai tjuta kulu anganngarangi tjana unngu nyinanyangka-palku. Palu tjarparala wati panya palunya tjananya putu nyangangi."

²⁴ Ka wati panya timpula atunymankupai tjutaku mayatjangku nyangatja wangkanyangka kulira putu kulinu, "Yaaltjiringuya?" Kaya tjana kulu putu kuliningi tjukurtjara panya kuranyitja tjutangku.

²⁵ Ka palulanguru wati kutju ngalya-tjarpangu munu tjanala tjakultjuno, "Kulilaya! Wati panya nyura witera tjailangka tjarpatjungkunyitja tjutangkuya timpulaku yaatangka ngarala tjukurpa wangkanyi anangu tjutangka."

²⁶ Ka wati panya timpula atunymankupai tjuṭaku mayatja anu wati tjuṭatjara munuya Jesulu iyantja tjuṭa altira ngalya-katingu witintja wiyangku, panya tjana nguluringangi anangu tjuṭangku witinnyangka nyakula palunya tjananya apungka atuntjaku-tawara.

²⁷⁻²⁸ Munuya katira tjanala kuranyu ngaratjunu tjilpi panya tjuṭangku tjananya tjapira kulira ngurkantankunytjaku. Ka wati tjukurtjara pulkangku tjanala alatji wangkangu, “Kulilaya! Nganana panya nyuranya painu Jesunyatjara piruku wangkawiyangku wantinytjaku anangu nyanga tjuṭangka, ka nyura tungun-tunguntu tjanala tjakultjunangi anangu winkingka ngura nyanga Jerusalemala. Munu nyura nganananya rawangku ngukara wangkapai Jesunya pungkunytja.”

²⁹ Ka Peterlu tjana alatji wangkangu, “Utila anangungka kulintja wiyangku Godala kulinma palula kutjunga.

³⁰ Panya nyura wituwitunnyangkaya Jesunya punu katakutjarangka wakara utitjunu. Palu Godalu palunya ilunyangka wankara pakaltjingga. Panya nyuntumpa nganampa tjamu tjuṭangkuya iriti God nyanga palunyatu walkulpai.

³¹ Ka paluru Jesunya mayatja pulka tjunu anangu tjuṭa wankarunkunytjaku. Ka palulanguru nyura Israelkunu tjuṭangku kura wantira kampa kutjuparinytjaku ngaranyi Godalu nyuranya kaly pangku pungkuwiyangku wantinytjaku.

³² Tjukurpa nyangatjala nintingku wangkanyi nyakunytjatjanungku, ka Kurunpa Milmiltu kulu nyangu munu nganananya unngu nintinu. Panya Kurunpa Milmilinga nyanga palunya Godalu iyanu palula wanganarangku kulilpai tjuṭakutu.”

³³ Kaya tjilpi panya kuranyitja tjuṭangku alatji wangkanyangka kulira pulkara mirpanaringu munuya palunya tjananya iluntankunytjikitjangku kulinigi.

³⁴ Palu wati Paratji kutju ini Kamaliyalnga pakara ngarangu tjanala wangkanytjikitja, panya nyanga paluru Moseku tjukurpa nintilpai nyinangi kaya anangu tjuṭangku palula kulu wanganarangku kulilpai. Ka paluru Peternya tjananya wituṅu urilkutu ankula tjukutjuku patantjaku, kaya palunya tjananya urilkutu katingu.

³⁵ Ka malangka Kamaliyaltu wangkangu, “Wati Israelkunu tjuṭa! Wanyuya kulila! Warpungkula kukanymankunytja wiyangkuya wantima!

³⁶ Wanyuya kulila wati panya ini Tjiyatatjanya! Panya mungatu palurunku walytjangku mirawaningi palurunku pulka kulira, ka panya anangu tjuṭa palula tjunguringu nampa 400 tjuṭa mulapa, munu panyaya palunya wananingi. Ka ngula kutjupangku palunya pungkula iluntanu, ka palumpa panya malpa tjuṭa wililyaranu munuya piruku tjunguringkunytja wiyaringu.

³⁷ Ka wati kutjupa palu purunypatu ini Judasanya Galileenya ngurara mungatu nyinangi, panya anangu tjuṭangku kamantaku nyiringka ini walkatjunkunytja-arangka. Munu paluru wati tjuṭa altira tjungunu wati kamanta tjuṭaku pikaringkunytjaku. Kaya palu purunypatu palunya iluntanu, ka malpa panya tjuṭa wililyarara kutju kutju ankula wiyaringu.

38 Ka wati nyanga palula pulalanguru nyuntu nganana kulintjaku ngaranyi. Uti nganana wati nyanga palunya tjananya wantima munula kuralwiyangku wantir'iyala ankunytjaku. Tjinguru tjana walytjangu tjana kulintjitja palyannyangkampa malpa tjutangu tjananya ngula wantikatiku.

39 Palu tjinguru tjana nyanga alatji palyani Godalu nintinnyangka, ka nganana palunya tjananya putu pailku, panya nganana tjanampa pikaringkula Godaku kulu pikaringkuku."

Kaya tjilpi panya tjutangu Kamaliyaltu wangkanyangka kulira mulamularingu.

40 Munuya Peturnya tjananya iyantja tjuta malakungku altingu munuya timpula atunymankupai tjuta wangkangu tjananya wi- ipangka alkantjaku. Munuya pungkula wiyaringkuyangka malangka tjananya wangkangu alatji, "Pirukuya Jesunyatjara wangkanytja wiyangku wantima." Munuya palulanguru tjananya wantir'iyanu ankunytjaku.

41 Kaya pukulpa alatjitu anu pungkunytjitjanguru tjituru- tjitururinytja wiya, panya tjana alatji kulinigi, "Godanya ninti panya nganananya pungkuyangkala Jesunya wantinytja wiyangku titutjarangu kulira wanani anangu tjutangka tjukurpa palumpa wangkanytjikitjangku."

42 Munuya tjintu kutjupa tjintu kutjupa timpulaku yaatangka unngu tjarpara Tjukurpa Palya Jesunyatjara wangkangi anangu tjutangka, munuya nyara palulanguru Jesuku walytja kutjupa tjutaku walingka kulu tjarpara palu purunypatu nintiningi tjukurpa Jesunyatjara panya Godalu kalkuntjatjanungku iyantjanya.

6

Wati 7 Ngurkantankunytja

1 Kaya nyara palula ara anangu kutjupa tjuta ngapartji Jesuku mulamularingangi munuya winki mulararingu Jesuku walytja tjuta, kutjupatjara wangka panya Kuriki wangkapai nyinangi, kutjupatjara wangka panya Ara-mayiki wangkapai nyinangi. Kaya Kuriki wangka- pai tjutangu Ara-mayiki wangkapai tjuta kuranmanangi, munuya pitjala Peterla tjanala tjakultjunangi, "Kulila! Panya nyura tjintu kutjupa tjintu kutjupa wanakala ngaltutjara tjuta mai ungupai. Palu nyura Ara-mayiki wangkapai tjuta kutju ungupai munu nganampa wanakala tjuta ungunytja wiyangku wantipai."

2 Kaya Peterlu tjana iyantja panya 12-ngku Jesuku panya walytja uwankara altira tjanala wangkangu, "Tjingurula nganana mai ulytja nyuranya tjukururungku para-ungama. Palu nganampa warka kutjupa ngaranyi Godaku tjukurpa wangkanytjaku.

3 Palu uti nyura wati nintipuka 7 nyuralanguru ngurkantanama panya Kurunpa Milmita wanganarangku kulilpai tjuta. Munu tjananya ngurkantara tjunama warka nyanga palula tjukururungku warakarira mai para-ungkunytjaku.

4 Ka nganana warka nyanganta warkarinyi munula Godala tjpini munu tjukurpa kulu nintini anangu tjutangka."

5 Kaya Jesuku walytja uwankarangku alatji wangkanyangka kulira pukularingu munuya ngurkantanu Stephenna. Wati nyanga paluru

panya Kurunpa Milmilta wanganarangku kulilpai nyinangi munu paluru Jesuku pulkara mulamularingkupai. Kaya piruku ngurkantanu wati ini nyanganpa Philipanya, Purakuratjanya, Nikananya, Timunnga, Paminatjanya munu Nikalaitjanya, panya wati nyanga paluru ngura Antiyakanya ngurara nyinangi munu panya god kutjupa nganmanypa walkulpai nyinangi, palu Godaku mulamularingkula paluru Jew tjutangka tjunguringkula tjananya purunytju Godanya walkuningi munu palulangurulta paluru mala kulira Jesuku walytjaringu.

⁶ Uwa, wati nyanga palunya tjananyaya ngurkantanu munuya Iyan-tja Tjutangka kuranyu ngaratjunu, kaya paluru tjana tjanala katangka mara tjunkula tjanampa Godala tjapiningi tjananya kunpuntjaku.

⁷ Ka Peterlu tjana Godaku tjukurpa wangkanyangka anangu winkingu kulinigi. Munuya tjuta mulapa mulamularingu, ka ngura nyara Jerusalemala Jesuku walytja tjuta mulararingu, kaya wati Moseku tjukurtjara tjuta kulu Jesuku mulamularingu munuya tjanala tjunguringu.

Stephennga Witintja

⁸ Ka wati panya Stephennga Godalu pukultjungku kanyiningi, munu palunya pulkara witulyanangi miracle tjuta palyantjaku. Ka paluru palyannyangka anangu tjutanku nyakula kulinigi, "Awari! Nyangatja wiru mulapa!" Munuya palulangurulta Jesunya pulkara walkuningi.

⁹ Kaya Jew ngura kutjupitja tjutanku nyakula mirpanaringi palumpa. Wati nyanga paluru tjana ngura nyangannguru Tjairinilanguru munu Alika-tjantu-riyalanguru, Tjilitjiyalanguru munu Aitjalanguru. Nyanga paluru tjanaya Stephenku pikaringkula ngaparku wangkangi.

¹⁰ Palu Stepheentu wati nintingu tjanala wangkangi, panya Kurunpa Milmilta palunya nintiningi tungun-tunguntu tjukarurungku tjanala wangkanytjaku, kaya putu palula waintarira wangkangi.

¹¹ Munuya palulanguru wati mankurpa kutjupa altira tjungunu munu tjananya wituwitu ankula tjukurpa Stephenngatjara anangu tjutangka ngunti wangkanytjaku. Kaya mulapa ankula wangkangi anangu tjutangka alatji, "Ai! Nganana kulinu wati panya Stepheentu Mosenya pulanya Godanya kuranmankunyangka."

¹² Kaya anangu tjutanku kulira mulamularingu munuya Moseku panya tjukurpa nintilpai tjutangka ankula tjakultjunu, tjilpi panya kuranyitja tjutangka kulu. Kaya paluru tjana Stephennga witu munuya Jewku kantjula kutjupa tjuta altira palunya katingu tjanampa ruumakutu munuya palula tjanala kuranyu ngaratjunu palunya ngurkantankunytjikitjangku tjapira kulira.

¹³⁻¹⁴ Munuya wati panya ngunti wangkapai mankurpa altingu pitjala wangkanytjaku. Kaya paluru tjana pitjala ngunti wangkangi alatji, "Mulapa nyangangu nganampa timpula milmilpa rawangku kuranmananyi. Nyanga paluru alatji wangkanyi, Jesulu kunyu Nazarethanya ngurarangku timpula nyangatja piluntankuku. Munu nyangangu Moseku tjukurpa kulu kurara wangkangi, panya paluru nyanga alatji wangkangi, Jesulu kunyu Moseku tjukurpa kampa kutjupankuku." Alatjiya Stephennga wangkara kuranmanangi.

¹⁵ Kaya wati tjuṭangku ruuma nyara palula unngu nyinara Stephennga pulkara nyangangi munuya nyangu yunpa palumpa angelpa purunyarinyangka.

7

Stephentu Tjukurpa Wangkanytja

¹ Ka wati tjukurtjara pulkangku Stephennga tjapinu, “Mulapantaya nyangantu tjukarurungku wangkanyi?”

² Ka Stephentu tjanala wangkangu Jewku kantjula tjuṭangka, “Walytja tjuṭa kulilaya! Panya nyuntumpa nganampa tjamu Aipuramanya ngura Aaranku ankunytja kuwaripangka ngura panya Mitjuputaimiyala nyinangi. Ka nyara palula Godanya pitalytji witulya pulka mulapa palula utiringu.

³ Munu wangkangu palula, ‘Nyuntumpa nyanga ngura wantikati walytja tjuṭa kulu, munu pakara ara kaṇanta ngayulu ngura kutjupa nintilku nyuntu nyinanytjaku.’*

⁴ “Ka mulapatu paluru palumpa ngura wantikatira anu Papi-lanialanguru, munu parari mulapa ankula ngururpatu nyinangi ngura panya Aaranta wirkara. Ka palumpa mama ilunyangka Godalu palunya piruku wituṇu ngura nyanga kuwari nganaṇa nyinanytjalakutu. Ka mulapatu paluru anu.

⁵ Palu Godalu palunya wirkankunyangka manta ungkunyitja wiyatu ngura walytjangku tjunkula nyinanytjaku, ka paluru tjanampa ngurangka unytju nyinangi. Palu Godalu palunya kalkuṇu ngura walytja ngula ungkunyitjikitjangku palurunku walytjangku palyara nyinanytjaku. Munu palumpa walytjapiti maḷatja maḷatja kulu nyinanytjaku kalkuṇu ngura nyara palula. Palu nyara palula ara panya Godalu kalkuntja-arangka Aipuramanya tjitji wiya nyinangi.

⁶ “Ka Godalu palula alatji wangkangu, ‘Ngula nyuntumpa walytjapiti maḷatja maḷatjaya ngura malikitjakutu ankula nyinaku rawa mulapa kuli tjuṭa. Kaya ngura nyara palunya ngurara tjuṭangku tjananya pauntjingara pulkara warakamilalku unytjungku kutju. Munuya tjananya rawangku kanyira warakamilalku kuli tjuṭa mulapa nampa nyangatja 400.

⁷ Palu ngayulu ngura nyara palunya ngurara tjuṭangka kura kutjupa kutjupa pulka tjuṭa utilku, kaya paluru tjana nyuntumpa walytjapiti maḷatja maḷatja wantir’iyalku, kaya pitjala ngura nyangangka wirkara ngayunya pupakatira walculku.’ Alatji Godalu Aipuramala tjakultjuningi ngula panya utiringkunyitja.

⁸ “Munu palulanguru paluru Aipuramala wangkara kalkuṇu alatji, ‘Ngayuku tjukurpa kulinma munu tjukurpa nyanga palulawanungku nyuntumpa katjapiti watiringkunyitjaku palyanma. Munu titutjarangku palyanma anangu kutjupa tjuṭangku nyuranya kulintjaku alatji, “Mulapa nyanga paluru tjana Godaku walytjapiti nyinanyi.”

’ Ka ngula Aipuramalu palumpa katja Isaacanya iti ngarinyangka mulapatu mapalku watiringkunyitjaku palyanu, ka ngula Isaacalu ngapartji palumpa katja Jacobanya palu purunymanutu iti ngarinyangka, ka ngula Jacobalu ngapartji palumpa katja panya 12 palu purunypatu palyanu uwankaratu iti ngarinyangka.

* 7:3 Genesis 12:1

⁹ “Ka panya Jacobaku katja tjuṭa kuraringu tjanampa maḷanypa maḷatjaku Josephaku, panya Jacobanya palumpa kutju pulkara mukuringkunyaṅka. Munuya unḡkul'iyana wati malikitja tjuṭa ngura Itjipalakutu parari katinytjaku. Palu Godanya palula tjungu alatjitu nyinangi.

¹⁰ Munu palunya wankaru alatjitu kanyiningi anangu kutjupa tjuṭaṅku palunya kurannyaṅka. Munu palunya nintiningi nintipuka nyinara tjukarurungku ngurkantara wangkanytjaku. Munu panya Itjipaku mayatja pulkaku malparingkunyitjaku kulu palyana, wati panya Piiraku. Ka mayatja paluru panya Josephanya mayatja tjunu palula itingka nyinara ngura pulka Itjipanya atunymara kanyintjaku, palumpa wali kulu.

¹¹ “Ka panya ngula ailuru pulkaringu ngura nyara palula, kaya ngura winkingka anangu tjuṭa palatjatjiratja nyinangi ngura panya Kainanta kulu. Ka tjamu Jacobaku tjanampa kulu mai wiyaringu.

¹² Ka tjilpi paluru kulinu mai pulka kunyu ngura Itjipala ngarinyi, munu palumpa katja tjuṭa witunu paluru tjana ankula mai mantjira ngalya-katinytjaku. Kaya paluru tjana ankula mai pulka mantjira ngalya-katingu.

¹³ Munuya ngula mai paluru wiyaringkunyaṅka piruku anu, ka nyara palula aralta Josephalu palurunku papulangka wangkara utinu palumpa panya kuṭa tjuṭaṅka. Ka mayatja panya Piiralu kulu kulinu Josephaku panya walytja tjuṭa pitjanyaṅka.

¹⁴⁻¹⁵ “Ka palula maḷangka Josephalu tjananya witunu ankula palumpa tjanampa walytja uwankara altira ngalya-katinytjaku Itjipalakutu palumpa mama Jacobanya kulu. Kaya Jacobanya tjana uwankara tjunguringkula anu Itjipalakutu anangu panya nampa alatjitu 75. Ka tjilpi panya paluru ngura nyara palula rawa mulapa nyinangi munu ngulalta ilungu, ka ngula palumpa walytjapiti maḷatja tjuṭa kulu ilungu ngura nyara palula nganampa panya tjamupiti.

¹⁶ Kaya Jacobanya pulanya Josephanya puntu maḷakungku katingu ngura walytjakutu Tjikimalakutu munuya pulanya kulpi panya aratjanga tjunu, panya nganmanytju Aipuramalu payamilara wantingu wati Aimurkunu tjuṭaṅka.

¹⁷ “Ka ngula mulapa tjintu ilaringu Godalu panya Aipuramanya nganmanytju kalkuntjatjanungku unḡkunyitjaku manta panya Kainannga. Kaya ngura nyara Itjipala rawa mulapa nyinara tjuṭa mulararingu, nganampa panya walytjapiti.

¹⁸ Ka ngula mulapalta ngura Itjipaku mayatja kutjupa nyinakatingu panya paluru Josephaku ngurpa munu iriti mulapa nyinanytjitja kulintja wiyatu.

¹⁹ Munu paluru nganampa walytjapiti ngunti kuraningi munu tjananya pauntjingara pulkara pakuningi. Munu panya palumpa tjaultji tjuṭa wituningi ankula tjanampa iti tjuṭa tjulyara tjanalanguru waninytjaku urilta ngarira ilunytjaku.

²⁰ “Ka panya nyara palula arangka Mosenya iti ngaringu tjitji wiru mulapa, ka ngunytjungku palunya ngurangka kanyiningi pira mankurto.

²¹ Munu palulanguru karukutu katira urungka katu tjunu pitingka tjuna-tjuna tjabatanga, ka panya mayatja Piiraku untaltu pitjala

nyakula mantjinu urungka ngarinyangka munu paluru ngunyitjuringkula kanyira pulkanu.

22 Ka paluru pulkaringkula Itjipanya ngurara tjutaku araku nintiringkula palunya tjananya purunypa nyinangi. Munu paluru watiringkula wirura rapangku wangkapairingu, munu paluru pakuringkunyitja wiyangu wiru tjuta rawangku palyalpai.

23 “Munu palulanguru wati pulkaringkula yiya nampa nyangatja 40-ringu, munu paluru kuliningi palumpa walytjapiti ankula nyakunyitjikitjangu anangu panya Israelkunu tjuta.

24 Munu ankula nyangu palumpa walytja kutju wati Itjipanya ngurarangku pungkuyangka munu walytja-tjiratjangu pungkula iluntanu wati panya Itjipanya ngurara.

25 Munu paluru kuliningi, ‘Tjinguruya nyanga palulanguru ngayuku walytja tjutangu kulilku panya Godalu kuwari ngayulawanungku tjananya wankarunanyi.’ Palu wiya, tjana watarku nyinara putu kuliningi.

26 “Ka mungawinki Mosenya piruku anu munu nyangu Israelkunu kutjarangku pulanku pikangku pungkuyangka. Munu palula pulala ngururpa ngarala kitikitira angatjungkula wangkangi, ‘Nyaaku nyupalinku walytjarangkumpa panganyi? Pika wiyariwa pula!’

27 “Ka wati kutjungku pikaringkunyitjatjanungku Mosenya untunu munu wangkangu, ‘Nganalunta tjunu ngalinya mayatjangu paintjaku?’

28 Panya mungartjin wati Itjipanya ngurara pungkula iluntanu, munun kuwari ngayunyalpi iluntankunyitjikitja mukuringanyi?’

29 Ka Moselu kulinu, ‘Munta-uwa, tjinguruya uwankarangku ngayunya kulinu.’ Munu nyara palulanguru paluru ngulu kumpira anu manta kutjupakutu ngura ini Mitiyantakutu munu ngura nyara palula nyinara minyma kuri altira ma-nyinangi, munu katja kutjaratararingu.

30 “Munu panya ngura nyara palula yiya 40 kutjupa nyinangi rawa alatjitu. Ka palulanguru angelpa palula utiringu ilytjinka puli murpu panya Tjaniala itingka, ka paluru nyangu punu wanka kampanyangka.

31 Munu nyakula kulinu, ‘Awari! Nyaa nyangatja punu nyanga wanka tilingaranyi.’ Munu paluru ilangku nyakunyitjikitja milaringkula wangka kulinu Mayatja Godalu punu kampanytjangu wangkanyangka.

32 Panya paluru alatji wangkangi, ‘Ngayuluna nyuntumpa tjamu tjutaku God, Aipuramaku Isaacaku Jacobaku tjanampa.’ Ka Moselu kulira pulkara nguluringkula tjititingangi mununku yunpa tjutunu ngulungku nyakunyitja wiyakitjangu.

33 “Ka panya Mayatja Godalu palula alatji wangkangu, ‘Tjinatja palanku araltjara! Nyangatja manta milmilpa nyanga nyuntu kuwari ngaranytjanya.

34 Kulila! Ngayuluna nyangu ngayuku panya walytja tjuta kurara pungkuyangka ngura panya Itjipala, mununa ulanyangka kulu kulira pitjangu tjananya wankarunkunyitjikitja. Mununa kuwari nyanga nyuntunya wituni Itjipalakutu ankula tjananya pakaltjingtjaku.’ Alatji Godalu wangkangu.

35 “Nyangatja wati panya paluruṭu Mosenya panya, panya nganmanytju Israelkunu kutjarangku papulara wangkangi alatji, ‘Nganalunta tjunu nganannya mayatjangku paintjaku?’ Palu wati panya palunya Godalu angeltawanungku pununguru wangkara witura iyaṇu tjananya mayatjarira pakaltjingara katinytjaku Israelkunu tjuṭa.

36 Ka paluru witulya pulkangku kutjupa kutjupa pulka tjuṭa palyaningi ngura panya Itjipala tjana nyakula kulira nintiringkunyjtaku. Munu panya paluru palumpa walytjapiti pakaltjingara katingu Itjipalanguru. Munu tjananya katira uru panya Tjitin-tjitinta wirkakatira pulka mulapalta palyaṇu, kaya itipirira wankaringu. Munu piruku pulka tjuṭa palyarinangi ilytjingka panya rawa parapitjalira kulī panya 40.

37 “Nyangatja wati panya paluruṭu wangkangu Moselu Israelkunu tjuṭangka alatji, ‘Mayatja Godalu wati wangkatjara nyuralakutu iyalku aṇangu nyurampa walytjanguru, ka paluru ngayulu purunytju nyurala wangkaku.’*

38 Palu Mosenya panya Israelkunu tjuṭangka tjungu alatjitu ilytjingka para-pitjalinangi nganampa panya walytjapitingka. Ka panya palunya angeltu puli panya Tjaniyala wangkangu, ka palula kulira paluru tjukurpa wiru mulapa mantjinu munu ngananaṭa tjakultjunu kulira wankaru nyinanytjaku.

39 “Palu panya nganampa tjamu tjuṭangkuya Mosenya kulira wantingi alatjitu munuya mukuringangi malaku ankunytjikitja ngura panya Itjipaku.

40 Munuya Mosenya puli panya Tjaniyala tatira ma-nyinanyangkaya palumpa panya kuṭangka tjapinu wati panya Aaronta, ‘Nyuntumpa panya malanypampa yaaltjiringu? Panya paluru nganannya ngura Itjipalanguru pakaltjingara ngalya-katingu ngura nyangakutu. Kala puṭu kulini yaaltjiringu paluru. Wanyulampa nyuntu god tjuṭa palyala nganannya kuranyurira katirinkunytjaku.’*

41 Munuya nyara palula ara paluru tjana puluka kulunypa purunypa palyaṇu tjanampa god. Munuya palulanguru palyantjatjanungku pukularira palulakutu mai kuka kulu ngalya-katingu palunya ungkula walkuntjikitjangku.

42 “Palu Godalu tjananya nyakula wantingu paluru tjana walytjangku kililpi pira tjintu kulu pupakatira walkuntjaku. Ka tjukurpa panya wangkatjara tjuṭangka iriti walkatjura wantinytjanya panya utiringu, panya alatjiya nganmanytju nyiringka walkatjunu Godalu wangkanytja,

‘Aṇangu Israelkunu tjuṭa, kulilaya! Nyura panya ilytjingka yiya 40-ara para-ngarala kuka pungkula tiliwakantja wiyatu ngayulu nyakula pukularinytjaku.

43 Palu nyura panya god ngalya-ngalya ini Malikaku tiinta milmilpa katirinatingi palunya walkuntjikitjangku.

Munu panya nyura puli kililpi purunypa palyantja kanyiningi god ngalya-ngalya ini Ripannga walkuntjikitjangku.

* 7:37 Deuteronomy 18:15 * 7:40 Exodus 32:1

Kana nyanga palulanguru nyuranya ngura walytjanguru ma-iyalku ngura kutjupa tjutakutu parari mulapa ngura panya Papilanta munkarakutu.' *

44 "Ka panyaya nganampa tjamu tjutangku iriti Godaku tiinta milmilpa ilytjingka katirinangi. Panya tiinta pala palunya Godalu Mosenya nintinu palyantjaku, kaya Moselu tjana tjukarurungku palyanu Godalu panya nintintjitja alatjitu. Munuya tiinta pala palula tjarpara Godanya walkulpai munuya kulilpai, 'Mulapa Godanya ngananala tjungu nyinanyi.'

45 Ka ngula Mosenya tjana ilunyangka palumpa tjanampa katjapit- ingku ngapartji tiinta panya palunya kanyiningi Tjatjuwalu tjana panya nganampa tjamu nganmanyitja tjutangku. Munuya paluru tjana tiinta panya palunya winkilta wirkanu ngura panya kalkun- tjitjangka. Ka panya Godalu nguraritja tjuta ngura nyara palu- languru pakaltjingu ka Tjatjuwanya tjana ngapartji nyara palula ngurararingu anangu panya Israelkunu tjuta. Kaya tiinta panya palunya ngura palulatu tjunkula kanyiningi, ka tiinta panya paluru nyara palula titutjara ngarangi wati panya Davidanya tjanampa mayatjarira nyinanytjijakutu alatjitu.

46 Ka Godanya panya Davidaku pulkara pukularipai. Ka paluru Godala tjapinu alatji, 'Jacobaku God! Wanyuni wangka, kana nyun- tumpa wali wiru palyanma anangu tjutangku nyuntunya tjarpara walkuntjaku.'

47 Palu Davidalu putu tjapiningi, ka panya palumpa katjangku Tjalamantu wali panya palumpa palyanu Godaku.

48 "Palu kulilaya! Godanya panya mayatja pulka mulapa uwankarangka waintarinytja munu paluru wali watingku palyan- tjitjangka nyinapai wiya. Panya wangkatjarangku nyiringka iriti walkatjunu Mayatja Godalu wangkanytja nyanga alatji,

49-50 'Ngayuluna ilkarangka mayatja pulka mulapa nyinanyi, mununa uwankara kanyini, ilkaritja mantatja kulukulu.

Ka nyura wali wiru ngayulu tjarpara ngurararira nyinanytjaku putu alatjitu palyalku.

Panya ngayulu uwankara mulapa palyanu.

Ka ngura ngayulu nyinara pakuwiyaringkunyitjaku mantangka ngaranytja wiya alatjitu.' " *

Alatji Stephentu tjanala wangkangi Jew tjutaku kantjula tjutangka.

51 Munu alatji piruku tjanala wangkangi, "Nyura Godala tun- gungpungkupai tjuta nyinanyi palumpa tjukurku mulamularingkupai wiya nyurampa panya walytjapiti nganmanyitja tjuta purunypa. Panya tjana Kurunpa Milmilta tungunpungangi munu panyaya kulira wantingi, palu purunypa nyura ngapartji tungun-tungunpatu nyinanyi palula kulintja wiya.

52 Panya iriti nyurampa tjamu tjutangku Godaku wangkatjara uwankara kurara pungangi munu panyaya iluntanangi tjananya. Panya wangkatjara paluru tjanaya nganmanyitju tjakultjunangi ngula kutjupa pitjanytjaku wati tjukaruru mulapa. Ka panya paluru

* 7:43 Aimatjaku 5:25-27 * 7:49-50 Aitjayaku 66:1-2

pitjanyangka nyura ngapartji palumpa mirpañarira palunya iluntankunytjaku intjanungku ma-ungu. Munu panya nyura kulu palula tjanala tjunguringkula miripungkupai tjuṭa nyinanyi.

⁵³ Uwa, Godalu panya tjukurpa pulka mulapa nyurampa tjamupiti ungu, panya paluru angelpa iyanu Mosela nintintjaku, ka panya paluru kulintjatjanungku tjanala tjakultjunu. Ka nyura kuwari tjukurpa panya palunya kanyini nyiringka, munu nyura kulira wantinyi wanganarangku kulira palyantja wiyangku." Alatji Stepheṭu tjanala wangkangi.

Stephenna Atuntja

⁵⁴ Kaya wati panya Jew tjuṭaku kantjula tjuṭangku paluru alatji wangkanyangka kulira pulkara alatjitu palumpa mirpañarira tjalinyapa patjanu.

⁵⁵ Palu wati nyara palunya Kurunpa Milmilṭu kanyira witulyanangi ka paluru ilkarikutu ira-nyakula nyangu Godanya pitalytji witulya pulka nyinanyangka, munu Jesunya kulu nyangu palula kampa wakungka mayatja pulka nyinanyangka.

⁵⁶ Munu paluru nyakula wangkangu, "Awari! Nyawaya! Kuwarina ngayulu nyanganyi ilkari alaringkunyangka, ka nyara Godala wakungka Watiku Katjanya mayatja pulka nyinanyi."

⁵⁷ Kaya wati panya kantjula tjuṭangku nyangatja kulira pulkara alatjitu mirara mara tjananku angatjunu pinangka paluru wangkanyangka kulintja wiyakitjangku, munuya palulakutu wala pulka ngalya-pakara palunya witiṇu.

⁵⁸ Munuya urilkutu ilara itarikatira anṭa-waṇingu ngura Jerusalemala urilta, munuya mirpaṅjarangku mantara tjananku katutja araltjara mantangka waṇingu wati yangupala ini Saulala itingka. Munuya puli tjuṭa mantjira Stephenna rawangku pulkara atuningi iluntankunytjikitjangku. Ka Saulalu tjanampa mantara tjuṭa ngarala atunyanangi.

⁵⁹ Ka tjana atunnyangka Stepheṭu Godala tjapiningi alatji wangkara, "Mayatja Jesu, Kurunpaṇi mantjila!"

⁶⁰ Munu paluru tultjungarakatira mirara wangkangu, "Mayatja! Nyanga tjananya ngayunya iluntankunyangka ngapartji pungkunytja wiyangku wantima!" Munu alatji wangkanytjatjanu ilungu.

8

¹ Ka wati panya Saulanya nyara palula ngarangi munu tjana iluntankunyangka nyakula pukularingi panya paluru kulu tjanala tjungutja.

Saulalu Jesuku Walytja Tjuṭa Kurantja

Kaya nyara palula arangka ngura Jerusalemala Jesunya wanṭipai tjuṭa Jesuku walytja tjuṭaku pulkara kuraringu munuya tjananya ngulura waṭaparara pungangi. Ka nyara palulanguruya Jerusalemanya wantikatira ngulu wililyarara ankula waṇingu ngura tjukutjuku tjuṭakutu manta panya Judeala pulala Tjamiriyala kumpira nyinanytjikitja. Kaya wati panya Jesulu iyantja tjuṭa kutju Jerusalemala malaringkula nyinangi.

² Kaya Stephennga ilunyangka wati Godaku mukuringkupai tjuṭa pulkara tjituru-tjitururira ulara waṅingi munuya palunya mantjira katira kulpingka tjunutjunu.

³ Palu Saulanya mukuringangi Jesuku walytja tjuṭangku Jesunya waṅantja wiyangku wantinytjaku, munu paluru kutjupa tjuṭa wituṅu tjananya ngulura wataparantjaku, kaya tjanampa walingka para-tjarpangi munuya wati minyma kulu witera itarikatira tjailangka tjarpatjunangi Jesuku walytja tjuṭa.

Tjamiriyanya Ngurara Tjuṭa Tjukurpa Palyaku Mulamularingkunytja

⁴ Kaya Jesuku walytja tjuṭangku ngulu panya wililyarara ankunytjatjanungku Tjukurpa Palya Jesunyatjara tjakultjunangi anangu tjuṭangka ngura kutjupangka kutjupangka.

⁵ Ka Philipanya manta pala Tjamiriyalakutu ankula ngururpa tawunu pulkangka ini Tjapatjila wirkanu munu Tjukurpa Palya anangu tjuṭangka tjakultjunangi Jesunyatjara, panya Godalu palunya iyaṅu anangu tjuṭa wankarunkunytjaku.

⁶ Munu paluru kutjupa kutjupa pulka tjuṭa witulyangku palyaningi, kaya anangu tjuṭangku palyannyangka nyakula palula tjukurpa wangkanyangka rawangku purkarangku kulinigi wantinytja wiyangku.

⁷ Ka Philipalu Godaku witulyatjarangku painnyangka mamu tjuṭa mirara pakaningi anangu tjuṭanguru. Ka nyumpu tjuṭa, wawanypa tjuṭa, tiwilpa ngarinytja tjuṭa kulu palyaringangi Philipalu wangkara pakaltjinginganyangka.

⁸ Kaya ngura pala palula anangu uwankara pulkara pukularingu.

Wati Ngangkari Ini Simonnga

⁹ Ka ngura pala palula wati ngangkari purunypa nyinangi ini Simonnga panya paluru kutjupa kutjupa pulka tjuṭa ayinayinirira palyalpai, kaya Tjamiriyanya ngurara uwankarangu nyakula wangkapai, "Ai! Nyangangu ayinayiningku palyalpai!" Kanku paluru walytjangku mirawaṅipai alatji wangkara, "Ngayuluna mayatja pulka mulapa nyinanyi."

¹⁰ Kaya anangu winkingku nyakula palumpa pulkara mulamularingangi, anangu pulka tjuṭangku munu tjukutjuku tjuṭangku kulu. Munuya palunya mirawaṅira wangkapai alatji, "Wati nyanga paluru-manti mulapampa ilkaranguru pitjangu, munu nyanga Godalu purunytju witulyangku pulka tjuṭa palyani."

¹¹ Munuya mirawaṅingi alatjitu palunya, panya rawangku paluru kutjupa kutjupa pulka tjuṭa ayinayinirira palyaningi, kaya nyakula kulinigi, "Awari! Nyangatja pulka mulapa." Munuya palunya mirawaṅingi munuya paluru wangkanyangka kulira palumpa mulamularingangi munuya palunya waṅaningi.

¹² Palu Philipalu pitjala Tjukurpa Palya Jesunyatjara wangkangi panya Godalu anangu tjuṭa palumpa mulamularingkungangka walytjanmara mayatjangku kanyintja. Kaya anangu tjuṭangku kulira mulamularingu paluru wangkanyangka, ka tjananya urungka baptisekatingu.

13 Ka wati panya Simonnga kulū Jesuku mulamularingu, ka palunya urungka baptise-katingu. Ka palula malangka paluru Philipala tunguringkula palula tjungu para-ngarangi, munu Philipalu kutjupa kutjupa pulka tjuta Godaku witulyatjarangku palyannyangka nyakula kuliningi, "Awari! Nyangatja wiru mulapa."

14 Kaya wati panya Jesulu iyantja tjutangku Jerusalemalanguru kulini anangu Tjamiriyanya ngurara tjuta Godaku Tjukurku kulira mulamularingkuntja munuya palulanguru Peternya pulanya Johnnga iyanu palula tjanalakutu.

15 Ka pula ngura pala palula wirkara mulamularingkupai tjutaku Godala tjapiningi paluru Kurunpa Milmilnga tjanala tjarpatjunkuntjaku.

16 Panya Kurunpa Milmilnga tjanala kuwaripa tjarpanytja wiyatu, palu tjana urungka tjarpara kutju baptise-aringu ini Jesula kutjungka, ka Kurunpa Milmilnga tjanala kuwaripatu tjarpanytja wiyatu.

17 Ka Peterlu pula Johntu tjanala katangka mara tjunkula Godala tjapinnyangka nyara palula ara Kurunpa Milmilnga tjanala ungu tjarpangu.

18-19 Ka wati panya Simontu nyangu Kurunpa Milmilnga tjanala ungu tjarpanyangka Jesulu iyantja kutjarangku tjanala katangka mara tjunkunyangka. Munu paluru mukuringangi paluru pula puruntjtutu anangu tjutangka mara tjunkuntjikitja munu Peternya pulanya Johnnga mani ungkula ngatjiningi alatji wangkara, "Wati wiru kutjara! Ngayunyani pula nintila, witulyangku palyantjaku, kana nyupali puruntjtutu anangu kutjupa tjutangka mara tjunkula alatjinama, ka Kurunpa Milmilnga tjanala kulū tjarpama."

20 Ka Peterlu mani ungkuntjikitjangku wangkanyangka kulini munu palunya paira wangkangu alatji, "Wiya, mani palatjanku makati munu pula manirara ngula ngura kurangka tjarpa! Panya nyuntun ngunti kulini Godaku Kurunpa maningga payamilantjikitjangku.

21 Nyuntun ngalila tjungutja wiya, kanta Godalu nyuntunya nintintja wiya wara nyanga purunypa palyantjaku, panya paluru nintingku nyanganyi nyuntu ngunti ungu mukuringkunyangka.

22 Nyuntun kurangku ngunti kulini maningga payamilantjikitjangku! Palu kuntaringkula wantima mununku kampa kutjuparira Godala tjapila nyuntumpa kalyparingkula nyuntunya pungguwiyangku wantinytjaku.

23 Ngayulu kulini nyuntun ngalimpa pulkara nyararinganyi ngali puruntjtutu palyantja-tjiratja, munu nyuntu kuraringkula rawa alatjitu kurangka nyinanyi putu wantira." Alatji Peterlu palula wangkangu.

24 Ka Simonnga nyangatja kulira nguluringu munu palula pulala wangkangu, "Wanyutju pula tjapila Godala ngalina manirara ngura kurangka waninytjaku-tawara." Ka pula mulapatu Godala tjapinu palumpa.

25 Munu pula ngura nyara palula anangu tjutangka rawangku tjakultjunangi tjukurpa Jesunyatjara. Palulanguru pula wangkara wiyaringkula ma-pakanu malaku ngura Jerusalemalakutu. Munu pula manta panya Tjamiriyalawanu ngapari malaku pitjala ngura tjukutjuku tjutangka kulū Tjukurpa Palya tjanala ngapartji piruku tjakultjunangi anangu kutjupa tjutangka.

Philipalu Wati Itjiyau-piyanya Ngurarangka Wangkanytja

26-28 Ka Israelta ulparira manta kutjupangka ngura ini Itjiyau-piyala wati kutju nyinangi. Ka ngura nyara palumpa mayatja pulka minyama nyinangi munu paluru wati panya palunya kamanta tjunu Itjiyau-piyaku mani atunymankunytjaku. Palu wati nyara paluru Godanya kulilpai munu kutjupa-ara paluru wakina wiila kutjaratjarangka tatira alinytjaralku anu parari Jerusalemalakutu munu wirkara timpula pulkangka tjarpara Godanya walkuningi. Munu paluru walkura wiyaringkula malaku anangi ngurakutu munu wakinangka ankula paluru nyiri Aitjayalu iriti walkatjunkunytja nyakula wangkarinangi.

Ka nyara palula-arangka Philipanya manta panya Tjamiyiyala nyinangi Jerusalemala alinytjara, ka nyara palula nyinanyangka Mayatja Godaku angeltu Philipala utiringkula wangkangu alatji, "Ara Jerusalemalakutu munu Jerusalemalanguru munkara ma-pitja ulparira, panya iwara pulka nyara Kaatjalakutu ma-ngarinyi, iwara nyara palulawanu ma-pitja ilytjiwanu." Alatji angeltu wangkangu Philipala. Ka paluru angelta kulira wanganara ma-pakanu munu ankula ankula ngura tjuta wantikatira ngulalta ma-nyangu wati panya Itjiyau-piyanya ngurara wakinangka ma-pitjanyangka.

29 Ka Kurunpa Milmiltu Philipala wangkangu, "Ma-ilariwa wakinakutu nyara munu ilangku wananma."

30 Ka Philipalu wakinakutu ma-ilaringkula kulinu wati panyanguku tjukurpa Aitjayalanguru nyakula wangkanyangka, munu tjapinu wati palula, "Nyuntu wanyu tjukururungku kulini pala nyuntu nyakula wangkanytjanya?"

31 Ka watingku panya wangkangu, "Wiya, putuna kulini. Kutjupangu nintingu wangkara nintinnyangkana tjinguru kulilku. Wanyu nyuntu wakinangka nyanga ngalya-tatila mununi wangkara nintinma." Ka Philipanya tatira palula itingka nyinakatingu.

32 Ka tjukurpa panya paluru Aitjayalanguru nyakula wangkanytjanya nyanga alatji ngarangi,

"Wati palunyaya tjiipi purunypa katingu iluntankunytjaku,
ka paluru piluntu alatjitu pika pulka mantjinu ngaparpungkula
tjukurpa wangkanytja wiyanguku.

Panya lamalama pilunpa uriwiya ngaripai watingku inyukitjangku
tjiiramilannyangka,

palu purunypa paluru wangkanytja wiya alatjitu ngarangi.

33 Uwa, palunyaya witera anangura wangkara ngunti kurmananangi
wati kura-palku munuya iluntankunytjaku ma-katingu,

ka kutjupa palumpa anga-wangkanytja wiya alatjitu.

Ka nganalu wanyu tjukurpa palumpa tjitjtjara, pakalitjara wangkaku?

Wiya alatjitu, panya paluru wati yangupala ilungu tjitji wiya
alatjitu." *

34 Ka wati panya Itjiyau-piyanya ngurarangku Philipala tjapinu alatji, "Wanyuni tjakultjura wati nyanga wangkatjarangku ngananya wangkanyi? Palurunku walytjangku wangkanyi? Munta kutjupa wangkanyi?"

35 Ka Philipalu tjukurpa pala palulanguru wati panya palula utira tjakultjunangi Tjukurpa Palya Jesunyatjara.

* 8:33 Aitjayaku 53:7-8

36-37 Munu pula ankula ankula karu urutjara nyangu, ka wati panyangku Jesuku mulamularingkula wangkangu, "Karungka nyanga uru ngarinyi. Wanyuni nyanga palula urungka tjarpatjura baptise-kati."*

³⁸ Munu wati panya paluru palumpa wakina ngaratjunu. Munu pula ukalingkula urungka ankula tjarpangu. Ka Philipalu palunya urungka tjarpatjura baptise-katingu.

³⁹ Ka pula urunguru ngalya-pakannyangka Kurunpa Milmilu Philipanya katingu, ka wati panya Itjiyau-piyanya ngurarangku palunya piruku nyakunyitja wiya, palu paluru pukulpa mulapa anu ngurakutu.

⁴⁰ Ka Philipalu nyangu, "Ai! Ngura kutjupangkampanal nyangatja nyinanyi ngura ini Atjatatjala." Munu paluru ma-pakanu alinytjara munu ankula ngura ngururitja tjutangka Tjukurpa Palya Jesunyatjara anangu tjutangka tjakultjunangi munu ngura ini Tjiitjariyalalta wirkanu.

9

Saulanya Jesuku Walytjaringkunyitja

(Acts 22:6-16; 26:12-18)

¹⁻² Ka ngura Jerusalemala wati panya Saulanya Mayatja Jesuku walytja tjutaku rawatu pikaringangi munu tjananya iluntankunyitjikitjangu wangkara ngulutjinganingi. Munu paluru piruku kuliningsi ngura Tamatjakalakutu ankula ngura nyara palula ngapartji Jesuku walytja kutjupa tjuta kurantjikitjangu. Munu paluru wati panya Jewku tjukurtjara pulkangka ankula tjapinu wangkara, "Wanyuni nyiri walkatjura uwa, kana Tamatjakalakutu kati mununa wirkara wali inmaku tjunguringkupaingka tjarpara wati kuranyitja tjutangka nintila, kaya nyakula kulilku, 'Munta, tjukurtjara nyara pulkangu wati nyangatja iyanu wati minyama kulukulu Jesunya wanalpai tjuta nyakula witiira Jerusalemalakutu katinytjaku.' Alatjini walkatjura unukul'iyala, kana ankula Jesuku walytja tjuta witiira ngalya-katiku nyuralakutu." Ka mulapatu walkatjura unukul'iyanu.

³ Ka paluru nyiritjara ma-pakanu Tamatjakalakutu wati malpa tjutatjara munuya ankula ankula ngura palulakutu ilaringu, ka ilkarisinguru tili pulkangu irnyanu.

⁴ Ka wati panya Saulanya punkanu mantangka munu kulinu ilkarisinguru wangkanyangka alatji, "Saul! Saul! Nyaakunin titutjarangku kurani?"

⁵ Ka Saulalu wangkangu, "Palu ngananyan wanyu?"

Ka wangkangu, "Ngayuluna Jesunya, panya nyuntuinin rawangku kurani.

⁶ Palu kuwari pakara ara pala Tamatjakalakutu, kanta kutjupangu wangkaku nyuntu nyaa palyantjaku."

⁷ Kaya wati panya tjuta palula tjungu ankunyitjatjanu wangkanytja wiya ngarangi, panya wangkaya kulinu palu ananguya puu nyan-gangi.

* **8:36-37** Wati kutjupangu kunyu verse 37 walkatjunu munu mala tjungunu Luke-aku tjukurta alatji - *Ka Philipalu wangkangu palula, "Nyuntu Jesuku kurunpa winki mulamularingkunyangkampana nyuntunya palya baptise-katiku." Ka wangkangu, "Uwa, ngayulu Jesuku Christaku mulamularinganyi panya paluru Godaku katja."*

⁸ Ka Saulanya mantanguru pakanu, palu putu nyangangi, kaya mara witera katingu walikutu.

⁹ Ka paluru tjiñtu mankurpa kuru pati nyinangi nyakunytja wiya alatjiñtu munu mai kulu ngalkuntja wiya munu kapi tjikintja wiyatu.

¹⁰ Ka tawunu nyara palula wati Jesuku walytja kutjupa nyinangi ini Ana-nayatjanya. Ka Mayatja Jesulu palula utiringkula ini wangkangu, "Ana-nayatja!"

Ka paluru kuru unngutjangku nyangangi munu palula wangkangu, "Uwa, kulininanta Mayatja."

¹¹ Ka wangkangu, "Pakara ara iwara ini 'Tjukururulukutu' munu wati panya Judasaku ngurangka wirkara tjapila wati ini Saulaku ngura panya Taatjatjanya nguraraku, panya paluru kuwari ngayula nyinara tjapini.

¹² Panya ngayulu palunya nintinu ka paluru kuruntu nyanganyi nyuntu pitjala palula mara katangka tjunkunyangka palunya kuru alantjaku. Ka nyuntu ara palulakutu!"

¹³ Ka Ana-nayatjalu wangkangu, "Wiya Mayatja, anangu tjutangkuya palunyatjara wangkangi, panya wati nyanga paluru kunyu Jerusalemala nyuntumpa walytja tjutaku pikaringkula tjananya pulkara kuralpai.

¹⁴ Ka kunyu kuwari Jewku tjukurtjara pulka tjutangku wati nyanga palunya wituñu ngura nyangaku pitjala nganananya ngapartji nyuntumpa walytja tjuta witintjaku." Alatji Ana-nayatjalu nguluringkula wangkangi.

¹⁵ Ka Mayatjalu palula wangkangu, "Wiya, ara palulakutu! Panya wati nyanga palunyañu ngayulu ngurkantanu ngayuku wara palyantjaku munu tjukurpa ngayunyatjara wangkanytjaku anangu Jew wiya tjutangka, tjanampa mayatja tjutangka, munu anangu Israelkunu tjutangka kulukulu.

¹⁶ Kaña palunya nintilku panya paluru ngayuku warkarinyangka kutjupa tjutangku palunya pulkara pikantankuku." Alatji Mayatjalu Ana-nayatjala wangkangi.

¹⁷ Ka paluru anu wali panya Saulanya nyinanytjitjakutu munu tjarpara nyangu palunya. Munu palula mara katangka tjunkula wangkangu, "Saul, walytja wiru! Mayatja Jesuluni nyuntulakutu wituñu, panya iwarangka ngalya-pitjanyangka paluru nyuntula utiringu. Panya paluruñi kuwari nyuntulakutu iyañu nyuntu piruku kuru alaringkula nyakunytjaku, ka Kurunpa Milmilu kulu nyuntula unngu tjarpara nyuntunya kanyilku."

¹⁸ Ka mapalku kutjupa kutjupa tjukutjuku mulapa palumpa kurunguru punkanu, ka paluru kuru alaringkula nyangangi. Munu palulanguru paluru pakanu, ka palunya urangka baptise-katingu.

¹⁹ Palulanguru paluru uparingkunytjatjanungku mai ngalkunu munu malaku ipilyarira kunpuringu.

Saulalu Tamatjakala Tjukurpa Wangkanytja

Palulanguru Saulanya Jesuku walytja tjutangka tjungu nyinangi tjiñtu mankurpa ngura pala Tamatjakala.

²⁰ Munu paluru Jew tjutaku wali inmatja tjutangka tjarpara tjukurpa Jesunyatjara wangkangi anangu tjutangka. Munu paluru tjakultjunangi tjanala panya Jesunya Godaku katja.

²¹ Kaya paluru wangkanyangka kulira putu nguwanpa kuliningi, "Wati panyatja nyangatja, panya Jerusalemala tjananya ini nyanga Jesunya walkunnyangka iluntanangi. Munu panya kunyu nyangatja pitjangu Jesuku walytja tjuta witera malakungku katinytjikitja Jewku tjukurjara kuranyitja tjutakutu."

²² Palu Saulalu tjukurpa Jesunyatjara kurunpa rapangku tjanala wangkangi munu tjananya wangkara mukumukuningi. Panya paluru alatji utira wangkangi, "Iriti panya Godalu kalkunu Wankarunkupainya iyantjikitjangku, ka kuwarilta wirkanu wankarunkupai panya paluru, Jesunya Christanya." Kaya tjukurpa nyanga alatji wangkanyangka wati Jew nyara palunya ngurara tjutangku putu kuliningi palunya ngapartji anantjikitjangku.

²³ Munuya ngula tjintu tjuta ngarala wiyaringknyangka paluru tjana mitinginka tjunguringu munuya wangkara kuliningi palunya iluntankunytjikitjangku.

²⁴ Palu kutjupangku kulintjatjanungku Saulala tjakultjunu. Ka panya tjana mungangka kalala kulu tawunu pala Tamatjakaku kaita pulkangka kumpira patara nyinangi paluru ngalya-pakannyangka pungkula iluntankunytjikitja.

²⁵ Ka palulanguru munga kutjupa Saulaku malpa tjutangku palunya kampangatu katingu munuya wall-pa katunguru palunya piti pulkangka ruupangka karpira ukalilyinu urilkutu, ka Tamatjakalaguru ngulu kumpira wirtjapakanu Jerusalemalakutu.

Saulanya Jerusalemala Nyinanytja

²⁶ Munu paluru Jerusalemala wirkara Jesuku walytja tjutangka tjunguringunytjikitja mukuringangi, palu putuya kuliningi, panya paluru tjanaya palumpa putu mulamularingkula nguluringangi kulira, "Panya nyanga paluru Jesuku walytja wiya."

²⁷ Ka wati panya Paanapatjalu palunya ngaltunytjungku pitjala altira katingu wati panya Jesulu iyantja tjutakutu. Munu paluru tjanala ara uwankara tjakultjunu panya Saulanya iwarangka ankula Jesunya nyakunytja, munu Jesulu palunya wangkanytja, munu paluru rapangku tjukurpa Jesunyatjara ngura panya Tamatjakala wangkanytja kulu tjanala tjakultjunu. Alatji Paanapatjalu tjanala ara uwankara tjakultjunu, kaya kulira mulamularingu.

²⁸ Ka palulanguru Saulanya Jesuku walytja tjutangka tjunguringu munu paluru tjanala tjungu para-ngarangi ngura Jerusalemala. Munu paluru tjukurpa Jesunyatjara rapangku alatjitu anangu tjutangka para-tjakultjunangi.

²⁹ Munu paluru Jew panya Kuriki wangkapai tjutangka wangkangi, panya paluru tjana Kurikiku ara tjuta kulira wanapai, munuyanku Saulalu tjananku rawangku ngaparku wangkangi. Panya tjana palumpa mulamularingkunytja wiya mirpanaringi munuya palunya iluntankunytjikitja mukuringangi.

³⁰ Kaya Jesuku walytja kutjupa tjutangku nyanga palunya kulira Saulanya iluntankunytjaku-tawara ma-katingu Tjiitjarialakutu munuya pautangka ma-iyanu ngura walytjakutu Taatjatjalakutu.

³¹ Kaya palulanguru Jesuku walytja tjuta ngura winkingka manta Judeala, Galileala munu Tjamiriyala kulu pukulpa nyinangi panya mirpananju tjuta tjanampa pikaringkunytja wiyaringu. Ka panya

Kurunpa Milmilu tjananya kunpuningi munu kurunpa rapaningi Jesunya tungun-tunguntu wanantjaku. Kaya kutjupa tjuta mulapa Jesuku mulamularingkula palumpa walytjaringangi munuya pukulpa nyinangi Mayatja Jesunya rawangku walkura.

Wati Ini Aini-yatjanya Palyaringkunyta

³² Ka Peternya panya ngura tjutangka para-pitjalinangi, munu paluru ngura ini Litala wirkanu munu Jesuku walytja tjutakutu ankula palupa tjanala tjunguringu.

³³ Munu nyara palula nyangu wati pikatjara ini Aini-yatjanya tjanala tjungu nyinanyangka. Wati paluru wawannya munu piitangka rawa ngaringi kuli 8 pakantja wiya alatjitu.

³⁴ Ka Peterlu palula wangkangu, "Aini-yatja! Jesulu Christalunta kuwari palyarunguni, ka pakala mununku mantara karpila." Ka paluru mapalku pakara ngarangu.

³⁵ Kaya ngura nyara palula nyinapai winkingku nyangu palyaringkula ngaranyangka, manta panya Tjaranta nyinapai tjutanku kulu. Munuya nyakunyjatjanu Mayatja Jesuku mulamularingkula palumpa walytjaringu winki mulapa.

Minyma Ini Tapitjanya Ilunyangka Pakaltjingantja

³⁶ Palu tawunu ini Tjapala minyma kutjupa Jesuku walytja nyinangi ini Tapitjanya. Kaya wangka Kuriki wangkapai tjutanku palunya ini wangkapai alatji *Tuukatjanya*. Panya paluru rawangku wiru tjuta palyalpai anangu tjutaku munu anangu ngaltutjara tjuta atunymankupai.

³⁷ Ka Peternya ngura nyara Litala nyinanyangka minyma panya paluru pika pulkaringkula ilungu. Kaya ilunyangka palunya puntu minangka paltjitu munuya katira ruuma katutjanka tjunkula wantingu.

³⁸ Ka Tjapanya panya ngura Litala itingka, kaya ngura pala Tjapala Jesuku walytja tjutanku kulinu Peternya ila ngura Litala nyinanyangka. Munuya palulanguru wati kutjara witira iyanu Peterlakutu. Ka pula Peterla wirkara wangkangu, "Wiru ngana, ngali nyuntunya altinytjikitja pitjangu. Wanyu warpungula pitja!"

³⁹ Ka Peternya pulala tjunguringkula mapalku anu. Ka paluru ngura nyara palula wirkankunyangka tjana palunya patara mantjitu munuya ruuma katutjakutu katingu. Kaya wanakala kutjupa tjuta Peterla itingka ngarala ulara waningi, munuya palula nintinu ulytja kutjupa kutjupa tjuta minyma panya paluru palyantja nganmanytju wanka nyinaralpi.

⁴⁰ Ka Peterlu nyakunyjatjanungku tjananya uwankara ruumanguru urilkutu iyanu. Munu paluru tultjungarakatira Godala tjapinu, munu palulanguru minyma panya ilunyitja nyakula wangkangu, "Tapitja! Pakala!" Ka paluru kuru alaringu munu Peternya ngalya-nyakula pakanu munu nyinangi piitangka.

⁴¹ Ka Peterlu palunya mara witira pakaltjinganu paltjura ngaranytjaku, munu paluru Jesuku walytja tjuta altingu minyma panya wanakala tjuta kulu. Munu tjananya nintinu minyma panya ilunyitjanu wankaringkula ngaranyangka.

⁴² Kaya ngura nyara palula anangu winkingku kulinu minyma panya ilunytjanya wankaringkunytja, munuya tjuṭa mulapa Mayatja Jesuku mulamularingu.

⁴³ Ka Peternya ngura nyara Tjapala nyinangi tjiṅtu tjuṭa mulapa wati ini Simonku ngurangka. Wati nyara paluru panya kukaku miringuru latja tjuṭa palyalpai.

10

Peternya Munu Kuniliyatjanya

¹ Ka ngura panya Tjiitjariyala wati kutjupa nyinangi ini Kuniliyatjanya. Wati nyanga paluru tjaultji tjutaku mayatja nyinangi munu paluru tjaultji 100 kanyilpai. Ka tjaultji nyara paluru tjana panya Italinya ngurara tjuṭa.

² Ka Kuniliyatjanya wati Jew wiya, munu paluru, munu palumpa walytjapitingku kulu Godanya wanganarangku kulilpai munuya palunya kutju walkulpai. Munu wati nyara paluru anangu ngaltutjara tjuṭa muntjangku ungkupai munu Godala titutjarangku tjapilpai.

³ Ka tjiṅtu kutjupa kalala kakarara-wiltja paluru Godala nyinara tjapiningi, munu paluru kuruntu nyangu panya Godaku angelpa palula utiringkunyangka. Ka paluru ngalya-ilaringkula palunya ini wangkangu, "Kuniliyatja!"

⁴ Ka paluru urulyarara nguluringu munu angelpa panya palunya pulkara nyangangi, munu wangkangu, "Uwa mayatja! Nyaakun mukuringanyi?"

Ka angeltu palula wangkangu, "Godanya nyuntumpa pulkara pukularinyi nyuntu palula rawangku tjapinnyangka munu panya ngaltutjara tjuṭa muntjangku ungkunyangka. Munu paluru nyuntunya kulintjatjanungku ngayunya wituṅu nyuntula wangkanytjaku.

⁵ Ka wanyu kulila! Wati mankurpa witura iyala tawunu nyara Tjapalakutu, kaya ankula wati ini Simon Peternya ngurira altira ngalya-kati.

⁶ Panya wati nyara paluru Simon kutjupaku walingka unytju nyinanyi urungka itingka. Simon nyara paluru panya kuka miringuru latja tjuṭa palyalpai. Kaya ngura nyara palulanguru Peternya altira ngalya-katinytjaku wangka!" Alatji angeltu Kuniliyatjala wangkangu.

⁷ Ka angelpa paluru wangkara ankunyangka Kuniliyatjalu wati mankurpa altingu, kutju tjaultji palula tjungu warkaripai wati panya Godaku mulamularingkupai, munu wati walingka warkaripai kutjara kulu.

⁸ Munu paluru tjananya altira wangkangu panya angeltu palula wangkanytja munu tjananya witura iyanu ngura Tjapalakutu.

⁹ Kaya ma-pitjala munga kutju ngururpa ngaringu ngura kutjupangka, munuya mungawinki pakara anu munuya ankula tjiṅtu katuringkunyangka ngura Tjapalakutu ngalya-ilingu.

Ka tjana kuwaripatu ila pitjanyangka wati nyara Simonku walingka Peternya wali katu tatinu Godala tjapintjikitja.

10-11 Munu paluru tjapira pulkara paltjatjiratjaringu mai kuwaripangku palyannyangka munu maiku patara paluru nyinara kuruuntu nyangangi ilkari alaringkunyangka. Ka ilkaringunguru ngalya-ukalingangi pulangkita purunypa lipi pulkanya kuuna kutjara kutjaranguru witora kanyira palulakutu tjarunnyangka.

12 Ka mantara palula unngu kutjupa kutjupa tjuta wanka ngarangi mantangka para-ngarapai tjuta, panya tjinatjara tjuta, tjuninguru ankpai tjuta, tjulpu tjuta kulukulu, palu uwankara kuka wiya.

13 Ka ilkaringunguru palula wangkangu, "Peter! Pakala mununku nyanganpa pungkula ngalkula!"

14 Ka Peterlu wangkangu, "Wiya Mayatja, nyanganpa kuka wiya! Panya Moselulanya painu nyanga palu purunypa tjuta ngalkuwiyangku wantinytjaku. Panya nyanga palu purunypa nganmanytju ngalkuntja wiyatu, kuka tjuta kutjupa ngalkupai."*

15 Ka piruku ilkaringunguru palula wangkangu, "Wiya, nyangatja kuka alatjitu Godalu palyanmankunyitja, ka wantinytja wiyangku ngalkula paluru palyanmankunyangka."

16 Munu nyanga palu purunypa kutjara-ara wangkanytjatjanungku piruku kutju-aralta wangkangu. Ka palulanguru mantara panya kuka winki malakungku ma-katunu ilkarikutu.

17 Ka Peterlu nyakunyitjatjanungku nyinara kuliningi, "Nyaana panyatja nyangu? Godanya ngayulu nyaaringkunyitjaku mukuringanyi?" Ka paluru nyinara putu kulinnyangka wati panya Jew wiya mankurpa pitjala urilta ngarangi Kunilyatjalu iyantja mankurpa, panya tjana Simonku ngura ngurira nyangu munuya patara ngarangi.

18 Munuya urilnguru tjapiningi, "Wati ini Simon Peternya nyangangka nyinanyi?"

19 Ka Peterlu panya wali katu kuwaripangku nyinara putu kuliningi, ka Kurunpa Milmitu palula wangkangu, "Kulila! Wati Jew wiya mankurtunta ngurini.

20 Ka pakala munu ukalingkula tjananya wanganrangku kulira wanala wantinytja wiyangku, panya ngayuluna tjananya iyanu nyuntulakutu."

21 Ka Peterlu tjananya ukalingkula nyangu ngaranyangka munu wangkangu, "Uwa, ngayuluna wati panya paluru panya nyura ngayuku nguriningi. Palu nyaaku nyura wanyu pitjangu?"

22 Kaya palula wangkangu, "Wati ini Kunilyatjalulanya witunu panya tjaultji tjtaku mayatjangku. Panya paluru wati palya Godanya wanganrangku kulilpai munu palunya kutju walculpai. Kaya Jew tjuta palumpa mukuringkupai. Palu Godaku angeltu palula wangkangu nyuntunya altinytjaku nyuntu palumpa ngurangka ankula Tjukurpa Palya wangkanytjaku."

23 Ka Peterlu tjana wangkanyangka kulira tjananya altira tjunu walingka, kaya munga kutju ngaringu.*

Munuya mungawinki Peternya tjana tjungu ma-pakanu Tjiit-jariyalakutu, ka Jesuku walytja kutjupa tjuta kulu palula tjungu anu ngura nyara Tjapalanguru.

* 10:14 Leviticus 11 * 10:23 Panya Godalu Peternya ilkaringunguru mantarangka nintinu kutjupa kutjupa tjuta palya ngalkuntjaku, ka palulanguru paluru nintiringkunyitjatjanungku palya kulinu Jew wiya tjutangka tjunguringkunyitjikitjangku.

²⁴ Munuya ngururpa ngarira mungawinkilta wirkanu Tjiitjariyala. Palu tjana kuwaripatu ila pitjanyangka Kuniliyatjalu palumpa walytja tjuṭa, malpa tjuṭa kulu altingu palumpa ngurakutu pitjanytjaku, kaya pitjala wati panya palula tjunguringkula Peterku ala-ala nyinara paṭaningi.

²⁵ Ka Peternya palumpa walingka wirkankunyangka Kuniliyatjanya ngaparikatira palula kuranyu tultjungarakatingu munu palunya walkuningi.

²⁶ Ka Peterlu minara pakaltjingara wangkangu, "Wati ngana! Kulila! Ngayunya walkulwiyangku wantima, panya ngayuluna wati alatjitu nyuntunya purunypa."

²⁷ Munu pula tjukutjuku ngarala wangkara palulanguru walingka tjarpangu, ka Peterlu nyangu anangu Jew wiya tjuṭa mulapa tjunguringkula paṭara nyinanyangka wali unngu.

²⁸ Munu paluru tjanala wangkangu, "Nyura panya ninti Jew tjuṭaku, panya nganaṇa tjaka Jew wiya tjuṭangka tjunguringkupai wiya, panya nganaṇala Moseku ara kulilpai tjuṭa. Palu Godalu ngayunya wangkangu anangu kutjupa tjuṭangka wiyamankuwiyangku wantinytjaku.

²⁹ Kana nyura altinyangka wantinytja wiya wanganara pitjangu. Palu nyaakuni nyura wanyu altingu?"

³⁰ Ka Kuniliyatjalu palula wangkangu, "Uwa, mungatu ngayulu ngurangka nyinangi kakarara-wiltja, mununa Godala tjapiningi, mununa nyangu wati mantara piranpatjara utiringkula ngaranyangka ngayula kuranyu.

³¹ Kani ini wangkara alatji wangkangu, 'Wati wiru! Godalu kulinigi nyuntu palula tjapinyangka mununta nyangangi ngalutjara tjuṭa kulu munytjangku ungunyangka.

³² Ka nyuntu wati mankurpa witura iyala ngura Tjapalakutu, kaya ankula wati ini Simon Peternya ngurira altira ngalya-kati. Panya wati nyara paluru Simon kutjupaku walingka unytju nyinanyi urungka itingka. Simon nyara paluru panya kuka miringuru latja tjuṭa palyalpai. Kaya ngura nyara palulanguru Peternya altira ngalyakatinytjaku wangka!' Alatjini wangkangu angeltu.

³³ Kana mapalku wituṇu wati mankurpa nyuntunya altinytjaku, ka palan wiru alatjitu pitjangu. Godalu panya nyuntunya wangkara nintinu tjukurpa wiru palumpa nganaṇala wangkanytjaku, kala nyangatja Mayatja Godala mirangka nyinanyi nyuntu wangkanyangka kulintjikitja."

Peterlu Kuniliyatjala Tjanala Tjukurpa Wangkanytja

³⁴ Ka Peterlu wangkangu tjanala alatji, "Uwa, kuwarina nintiringu panya Godalu anangu uwankara tjungu lipula nyakupai, panya paluru ngayunya nganmanytju nintinu ngayulu Jew wiya tjuṭangka palya tjunguringkunyitjaku. Panya paluru nyuranya Jew wiya tjuṭa kutjupa nguwanpa nyakunytja wiya, palu purunypatu nyanganyi nganaṇanya purunypa, munu panya anangu uwankaraku palu purunypatu tjungu mukuringkupai Jew tjuṭaku munu Jew wiya tjuṭaku kulu.

³⁵ Panya paluru pukularipai anangu tjuṭangku palunya ngurkantara walkunnyangka, Jew tjuṭangku munu Jew wiya tjuṭangku kulu.

Paluru uwankaraku pukularipai palunya wanganarangku kulira tjukururu nyinanyangka nyakula.

³⁶ Panya Godalu Tjukurpa Palya nganana utinu anangu Israelkunu tjutangka.* Ka tjukurpa paluru alatji ngaranyi panya Jesunya Christanya anangu uwankaraku ngalkilpa ilungu, panya paluru mayatja pulka uwankaraku nyinanyi, ka nyara palulanguru anangu uwankara wankaringkula Godala kalypa nyinanytjaku ngaranyi. Ka nyura ninti tjukurpa nyangaku.

³⁷⁻³⁸ "Munu nyura ninti panya wiru mulapa utiringangi ngura winkingka manta Judealawanu, panya nganmanytju Johntu anangu tjutangka wangkangi kura palyantjatjanu kuntaringkula piruku palyantja wiyaringkunyitjaku munu urungka baptise-arinytjaku. Ka nyara palula-aratu panya Godalu ngurkantanu Jesunya Nazarethanya ngurara wara palumpa palyantjaku munu palula Kurunpa Milmilnga tjarpatjunu ka paluru Kurunpa Milmilngatjarangku kutjupa kutjupa pulka tjuta witulyangku palyaningi. Munu paluru uru panya Galileela itingka para-ngarala wiru tjuta palyaningi anangu tjutaku munu paluru pikatjara tjuta kulu palyarunguningi mamu panya Satantu kurara kanyintja tjuta. Munu palu purunypatu manta Judealawanungku witulya pulkangku para-pitjalira palyaningi ngura tjutangka, panya Godanya palula tjungu alatjitu nyinangi.

³⁹ "Ka nganana panya nyangangi uwankara paluru manta Israelta palyantja ngura Jerusalemala tjanalawanungku munula kuliningi paluru tjukurpa wangkanyangka. Ka panyaya anangu palumpa mirpantju tjutangu palunya punungka wakara utitjunu, ka ilungu.

⁴⁰ Palu tjintu kutjara ngarala wiyaringkunyangka Godalu palunya wankara pakaltjinganu, munu palunya anangu tjutangka utinu tjana palunya pakara wanka nyinanytja nyakunyitjaku.

⁴¹ Anangu uwankarangku palunya nyakunyitja wiyatu, palu nganana Godalu panya ngurkantankunyitja tjutangu kutju palunya nyangu, munula palula tjungungku ngalkula tjikiningi paluru ilunytjatjanu pakannyangka malangka.

⁴² Kalanya Jesulu wangkangu alatji, 'Tjukurpa Palya ngayunyatjaraya anangu tjutangka para-tjakultjunama, munuya tjanaa wangkama panya mulapa ngayunya Godalu ngurkantara tjunu ngula anangu winki wanka tjuta munu miri tjuta kulu kuranyu ngaratjungkula ngurkantara tjarantjaku.' Alatji Jesulu ngananaa wangkangu.

⁴³ Ka panyaya Godaku wangkatjara tjutangu nganmanytju tjukurpa nyanga palunya wangkangi panya Jesunyatjara. Alatji panyaya wangkangi, 'Anangungku kura palyannyangka Godalu palunya pungkunyitjaku ngaranyi. Palu anangu paluru Godalu kalkuntjitjaku mulamularingkunyangka Godalu palunya pungkuwiyangku kalypangku wantiku.' " Alatji Peterlu tjanala wangkangi anangu panya Jew wiya tjutangka.

⁴⁴ Ka tjana tjukurpa nyinara kulinnnyangka Kurunpa Milmilnga tjanala uwankarangku unngu tjarpangu.

* **10:36** Anangu Jew tjuta panya Israelkunu tjuta, panya wati ini Israelnga palumpa tjanampa tjamu nganmanyitja iriti nyinangi.

⁴⁵ Kaya tjarpanyangka nyakula wati panya Jew tjuṭa Peterla panya tjungu pitjanytja tjuṭa pulkara kulira wangkangi, “Awari! Godalu Kurunpa Milmilnga tjanala kulu tjarpatjunu Jew wiya tjuṭangka nganaṅala purunypaṭu.”

⁴⁶⁻⁴⁷ Panya Kurunpa Milmilnga tjanala tjarpanyangka Kuniliyatjanya tjana wangka kutjuparira wangkangi Peterla tjanala mirangka munuya Godanya mirawanira walakuningi.

Ka Peterlu wangkangu palumpa malpa tjuṭangka, “Kurunpa Milmilnga kuwari anangu nyanganta tjarpangu alatjitu, panya nganaṅala nganmanypa tjarpangu, palu purunypa. Ka wanyu nganalu nganaṅanya pailku tjananya urungka tjarpatjura baptisekatinytjaku-tawara? Wiya alatjitu. Wanyula tjananya baptise-kati!”

⁴⁸ Munu Peterlu palumpa malpa tjuṭa wituṅu tjananya katira urungka baptisekatinytjaku. Kaya mulapaṭu tjananya ini Jesula Christala baptise-katingu. Kaya palula malangka Kuniliyatjalu tjana Peternya markuṅu tjanala nyinanytjaku piruku tjintu mankurpa.

11

Peterlu Ara Tjakultjunkunytja Jerusalemnya Ngurara Tjuṭangka

¹ Kaya wati panya Jesulu iyantja tjuṭangu kulinu Jew wiya tjuṭangu Godaku tjukurpa wanganarangku kulira palumpa mulamularingkunytja. Kaya Jesuku walytja kutjupa tjuṭangu kulu palu purunypaṭu kulinu ngura winkingka manta Judeala.

² Ka Peternya Jerusalemala malaku wirkankunyangka Jesuku walytja kutjupa tjuṭangu Jew panya tjuṭangu palumpa patara pika-pikaringkula ngalytjurmara wangkangi alatji,

³ “Kulila! Moseku ara panya ngaranya nganaṅa Jew wiya tjuṭangka tjunguringkunytja wiyangu wantinytjaku. Ka nyuntu kura Jew wiya tjuṭaku walingka tjarpangu munun tjanala tjunguringkula mai ngalkula tjikiningi.”

⁴ Ka Peterlu uwankara tjanala tjakultjunu panya paluru Jew wiya tjuṭangka tjunguringkunytja. Alatji paluru wangkangu,

⁵ “Ngayulu tawunu panya Tjapala nyinangi wali kutjupangka munuṅa wali katu tatira Godala nyinara tjapiningi munuṅa ngalya alaringkula nyangu ilkari alaringkunyangka. Ka ilkaringuru mantara pulangkita purunypa lipi pulkanya kuuna kutjara kutjaranguru witiṅa kanyira ngayulakutu walatjunangi.

⁶ Kana nyangu mantarangka ngarinyangka ini kutjupa kutjupa tjuṭa inura tjuṭa munu liru, tinka, tjulpu tjuṭa kulukulu.

⁷ Kani ilkaringuru wangkangu, ‘Peter! Pakala mununku kuka nyanganpa pungkula ngalkula!’

⁸ Kana wangkangu, ‘Wiya Mayatja! Moselu panyalanya painu nyanga palu purunypa tjuṭa ngalkuwiyangu wantinytjaku. Kana ngurpa nyanga palu purunypa nganmanytju ngalkuntja wiya alatjitu.’

⁹ Ka piruku ilkaringuru ngayula wangkangu, ‘Wiya nyangatja kuka wirunya Godalu palyanmankunytja, ka wantinytja wiyangu ngalkula paluru wangkanyangka.’

10 Munu nyanga palu purunypa kutjara-ara wangkanytjatjanungku piruku kutju-ara wangkangu, ngayulu Jew wiya tjuṭangka tjunguringkunyitjikitjangku palya kulintjaku. Ka palulanguru mantara panya kuka winki malakungku ma-katuṅu ilkarikutu.

11 “Ka nyara palula arangka wati Jew wiya mankurpa pitjala ngarangi urilta wali nyara ngayulu nyinanytjala, panya wati nyara palunya tjananya ngura Tjiitjarialanguru ngayulakutu iyanu.

12 Kani Kurunpa Milmilṭu wangkangu, ‘Palula tjanala tjunguringkula ara wantinytja wiyanku!’ Kana mulapaṭu tjanala tjunguringkula anu. Kaya Tjapalanguru Jesuku walytja kutjupa tjuṭa kulu ngayula tjunguringkula anu wati nyanga mankur-mankurpa. Munula wirkanu ngura panya palula munula wati ini Kuniliyatjaku walingka tjarpangu.

13 Ka wati paluru ngananala tjakultjunu angelpa palula utiringkunyitja palumpa walingka unngu. Ka kunyu angeltu palula wangkangu alatji, ‘Wati mankurpa witura iyala Tjapalakutu Simon Peternya altira ngalya-katinytjaku.

14 Ka paluru pitjala tjukurpa nyurala wangka. Ka nyura tjukurpa nyara palumpa mulamularingkunyangka Godalu nyuranya wankarunkuku nyurampa walytjapiti kulukulu.’ Alatji kunyu angeltu wati panya Kuniliyatjala wangkangu.

15 “Ka panya ngayulu Kuniliyatjala tjanala tjukurpa wangkangi, ka wangkanyangka Kurunpa Milmilnga tjanala tjarpangu, panya ngananala nganmanypa tjarpangu, palu purunypaṭu tjanala unngu tjarpangu.

16 Kana kulinu panya Mayatja Jesulu wangkanytjitja panya alatji wangkangu, ‘Johntu anangu tjuṭa urungka baptise-katingu, palu Godalu nyuranya baptise-katiku Kurunpa Milmilnga nyurala unngu tjarpatjura.’ Alatji panya Jesulu wangkangu.

17 Uwa, Godalu Kurunpa Milmilnga ngananala tjarpatjunu nganana Jesuku Christaku mulamularingkunyangka, munu palu purunypaṭu Jew wiya tjuṭangka kulu tjarpatjunu. Kana nyakula kulinu, ‘Yaaltji-yaaltjinkuna Godanya markulku tjanala tjarpatjunkuwiyangku wantinytjaku, panya paluru Godanya alatjitu anangungku markuntjaku wiya.’” Alatji Peterlu tjanala wangkara tjakultjunu Jew panya tjuṭangka.

18 Kaya tjukurpa nyanga palunya wangkanyangka kulira pilunaringu Peterla piruku ngalytjurmara wangkanytja wiya. Munuya wangkangu, “Munta-uwa! Godanya palumpa tjanampa kulu mukuringanyi Jew wiya tjuṭaku tjana kulu kura wantira palula tjunguringkula wanka titutjara nyinanytjaku.” Munuya palulangurulta pukularira Godanya walkura pulkara mirawaningi.

Jesuku Walytja Tjuṭaringkunyitja Ngura Antiyakala

19 Ka panya Stephennga atura iluntankunyangka malangkaya Jesuku walytja tjuṭa Jerusalemalanguru ngulu ankula wiyaringu ngura kutjupa kutjupa tjuṭakutu, panya nyara palunya tjananya kuluya kurantjikitja mukuringangi Jesuku mirpantju tjuṭangku. Kaya kutjupa tjuṭa alinytjara anu manta ini Panitjijalakutu, munu munkara kulu tawunu ini Antiyakalakutu, kaya kutjupatjara pautangka tatira urungka anu manta tjukutjuku ini Tjaipuritjalakutu. Munuya ngura

nyara palula tjanala Jew tjuṭangka kutju Tjukurpa Palya Jesunyatjara tjakultjunangi.

²⁰ Kaya Jesuku walytja kutjupatjara anu manta Tjaipuritjalanguru munu ngura ini Tjaarinilanguru tawunu panya Antiyakalakutu, munuya Tjukurpa Palya Mayatja Jesunyatjara wangkangi Jew wiya tjuṭangka kulu.

²¹ Ka Godalu tjananya pulkara witulyanu tjana kutjupa kutjupa pulka tjuṭa palyantjaku munu rapangku wangkanytjaku, kaya anangu tjuṭa mulatu tjananya nyakula kulira Mayatja Jesuku mulamularingu munuya palumpa walytjaringu.

²² Kaya Jesuku walytja tjuṭangu Jerusalemala nyinanytjatjanungku kulinu Antiyakala nyinanytja tjuṭa Jesuku walytjaringkunyntja, munuya wati panya Paanapatjanya witura iyanu ankula tjananya wangkara kunpuntjaku.

²³ Ka ankula wirkara nyangu Godalu tjananya pukultjungku wirura kanyinnyangka. Munu paluru pukularira tjananya rapaningi wangkara, "Godanyaya wantinytja wiyangku kurunpa winkingku titutjarangku waṇanma."

²⁴ Uwa, Paanapatjanya wati palya mulapa Godaku pulkara mulamularingkupai, munu paluru Kurunpa Milmilṭu nintinnyangka wanganarangku kulira palyalpai. Ka pala palulanguru anangu tjuṭa mulapa Jesuku mulamularingkula palumpa walytjaringu.

²⁵ Ka palulanguru Paanapatjanya anu ngura ini Taatjatjaku wati panya Saulanya ngurintjikitja.

²⁶ Munu ma-wirkara ngurira nyangu munu palunya altira malakungku katingu ngura panya Antiyakaku. Munu pula ngura nyara palula rawa nyinangi kuli kutjara munu pula Jesuku walytja tjuṭangka Godaku tjukurpa nintiningi titutjarangku, kaya tjuṭa mulapa nintiringangi. Ka panya ngura nyara Antiyakalaya anangu tjuṭangu Jesuku mulamularingkupai tjuṭa ininu *Jesuku walytja tjuṭa*.

²⁷ Ka nyara palula ara wati Godaku wangkatjara maṅkurpa Jerusalemalanguru pitjangu ngura Antiyakaku munuya Jesuku walytja tjuṭangka tjunguringu.

²⁸ Ka wangkatjara kutju ini Aka-patjalu tjanala ngururpa pakara ngarala wangkangu Kurunpa Milmilṭu nintinnyangka. Alatji paluru wangkangu, "Kulilaya! Panya ailuru manta winkingka ngaraku, ka mai pulka ngaranytja wiyaringkuku anangu tjuṭangu ngalkula paltjaringkunyntjaku." (Ka mulapatu ngula ailuru pulka ngarangu wati Rome-anya ngurara ini Kulutiyatjanya ngura winkiku mayatja pulka nyinanytja arangka.)

²⁹ Kaya ngura nyara Antiyakala Jesuku walytja tjuṭangu kulintjatjanungku wangkangu mani pulka nguwanpa ungkunyntjikitjangku Jesuku walytja tjuṭa nyara Judeala nyinanytja tjuṭa. Munuya kutjungku kutjungku mani tjarara tjunangi tjananya ungkunyntjikitjangku.

³⁰ Munuya Paanapatjanya pulanya Saulanya unguṭiyanu, ka pula Jerusalemalakutu katira ungu wati panya Jesuku walytjapiti atunymankupai tjuṭa.

12

Iratalu Jamesanya Iluntara Peternya Tjailangka Tjarpatjunkunyntja

¹ Ka nyara palula ara ngura Jerusalemala mayatja Iratanya Jesuku walytja tjutaku pulkara kuraringangi munu palumpa tjaultji tjuṭa wituṇu tjananya ngurira witira tjailangka tjarpatjunkunytjaku, panya paluru tjananya tjituru-tjituru pulka palyantjikitja mukuringangi. Kaya mulapatu Jesuku walytja kutjupatjara witira tjailangka tjarpatjuru.

² Munu paluru Johnku kuṭa Jamesanya iluntankunytjaku wangkangu tjaultji tjuṭa, kaya palunya witira tjuṭa warangka wakara iluntanu.

³ Kaya Jew panya kutjupa tjuṭa Jamesanya iluntankunyangka nyakula pukularingu. Ka Iratalu pukularinyangka kulira tjananya piruku pukulmankunytjikitjangku kulinu munu Peternya kulu witin-tjaku wangkangu. Kaya tjaultji panya tjutangku palunya kulu ankula wituṇu. Nyara palula ara panya Jew tjutangku mai pilytja ngalkuningi tjanampa ara panya *Katuwanu Ankunytjanya* kulintjikitjangku, kaya nyara palula-aralta Peternya wituṇu tjaultji panya tjutangku.

⁴ Ka Iratalu tjananya wangkangu tjailangka waninytjaku ruuma unngutja mulata munu paluru tjaultji tjutangka 16-ta wangkangu palunya ngapartji-ngapartjingku anga-kanyintjaku. Kaya tjana kutjara kutjarangku kanyiningi ngapartji-ngapartjingku mungangka kalala. Panya Iratalu alatji kuliningi, “Kana inma nyanga ‘Katuwanu Ankunytjanya’ wiyaringkunyangka palunya kuutpangka ngaratjungkuku anangu tjutangka mirangka palunya wangkara kuranmankunytjaku.”

⁵ Kaya tjaultji panya tjutangku Peternya tjaila unngu anga-kanyiningi kuutku patara. Kaya Peternya tjaila unngu nyinanyangka Jesuku walytja tjutangku Godala pulkara rawangku tjapiningi palunya walatjunkunytjaku.

Angeltu Peternya Tjailanguru Walatjunkunytja

⁶ Ka munga pala palula inma panya *Katuwanu Ankunytjanya* wiyaringkunyangka Iratalu kuliningi alatji, “Kuwarina mungawinki pakara wati panya palunya kuutpangka ngaratjungkuku.” Ka Peternya panya munga pala palula tjaila unngu ngaringi tjaultji kutjarangka ngururpa, panya tjaultji nyara paluru pula Peterku mina kutjara tjungura palumpa pulampa minangka tjiinangka karpira ngaringi, ka tjaultji kutjara kutjupa tuwangka anga-ngarangi.

⁷ Ka angelpa Mayatja Godalu iyannyangka tjaila unngu utiringu Peterla itingka, ka tili pulkangku irnyaṇu. Ka angeltu Peternya kunkunpa ngarinyangka kultu pampura wankanu munu wangkangu, “Wala pulka pakala!” Ka tjiina panya minanguru walytja araltjaringu.

⁸ Ka angeltu wangkangu palula, “Mantarangka tjarpa tjinatjangka kulu!”

Ka paluru pakara mantarangka tjarpara tjinatjangka kulu tjarpangu. Ka piruku wangkangu, “Upukutangka pala tjarpa munuṇi ngayunya wanala!”

⁹ Ka Peterlu angelpa panya palunya wananu, palu paluru puṭu kuliningi, “Mulapana nyangatja tjailanguru ma-pakani? Tjukurtjukurtu-mantinatju wanani.”

¹⁰ Munu pula tjaultji panya tuwangka anga-ngarapai kutjarangka ma-waintaringu, munu piruku tjaultji kutjupa tjuṭa ngururpa anga-ngaranyangka ma-wantikatingu, munu pula kaita panya

urilitjakutuluta ngalya-wirkanu. Ka kaita panya paluru walytja alatjitu alaringu, ka pula tjailanguru ma-pakanu iwarakutu, munu pula iwarangka tjukutjuku ma-pitjala, ka angelpa panya palulanguru arkayiringu.

¹¹ Ka Peterlu kulinu, "Ai! Mulapanitju nyangatja angeltu ngayunya pakaltjinganu Mayatja Godalu witura iyannyangka? Mulapa Godalu ngayunya wankarunu Iratalu tjana Jewku mayatja tjutangku kulu ngayunya iluntankunytjaku-tawara."

¹² Munu alatji kulintjatjanu paluru ankula Mary-ku walingka wirkanu. Minyma nyanga paluru panya wati ini John Markaku ngunytju, panya wali nyara palulaya Jesuku walytja tjuta nganmanypa tjungurinkula nyinangi munuya Godala tjapiningi Peterku.

¹³ Ka Peterlu urilta ngarala tuwa urilitja punga-pungangi, ka kungkawara warkaripai ini Ruutanya kulira ngalya-pakanu tuwa alantjikitja.

¹⁴ Munu Peterku wangka ngurkantanu urilta ngarala wangkanyangka munu pulkara alatjitu pukularingu. Munu tuwa alantja wiyatu malaku wirtjapakara pukultu wangkangu anangu panya tjutangka, "Kulilaya! Nyaratja Peternya urilta ngaranya."

¹⁵ Kaya wangkangu, "Wiya, nguntin wangkanyi."

Ka paluru tungunpungkula alatjitu wangkangi, "Wiya, mulapana wangkanyi. Nyara urilta ngaranya."

Kaya wangkangu, "Wiya, tjinguru palumpa angelpa pitjala ngaranya."

¹⁶ Ka Peterlu rawangku ngarala tuwa punga-pungangi, kaya pitjala tuwa alanu munuya palunya nyakula putu kulinungi, "Awari! Yaaltji-yaaltji nyangatja tjailanguru pakanu?"

¹⁷ Ka tjananya marangku paira pilunmanu munu tjanala tjakultjunu Godalu palunya tjailanguru pakaltjingara katinytja. Munu wangkara wiyaringkula wangkangu, "Ankulaya tjukurpa nyanga palunya Jame-sala tjanala tjakultjura!" Munu Peternya nyara palulanguru anu tjananya wantikatira ngura kutjupakutu.

¹⁸ Kaya nyara tjailangka tjaultji panya tjutangku mungawinki pakara putu nyakula kawaru-kawaruringu, munuya putu kulinungi, "Wati panyatja nyanganguru yaaltjiringu?"

¹⁹ Ka Iratalu tjanala wangkangu, "Wati panya palunyaya ngurira piruku mantjila!" Palu putuya nguriningi. Ka paluru piruku tjaultji panya tjailangka ngarala atunymankupai tjuta altira tjapiningi, palu putuya kulinungi. Ka putu tjapira tjananya iluntankunytjaku wangkangu. Ka Iratanya manta Judealanguru anu munu ankula ngura Tjiitjariyala nyinangi.

Iratanya Ilunytja

²⁰ Ka Mayatja Iratanya panya mirpanaringi anangu nyara ngura Tayala nyinanytja tjutaku munu Tjitanta nyinanytja tjutaku kulu. Palu panya anangu Tayala pulala Tjitanta nyinanytja tjutangku tjanampa mai Irataku mantanguru payamilalpai. Munuya palulanguru Iratalu tjananya mai unkuwiyangku wantinytjaku-tawara palulakutu anu palunya wangkara kaly pantjikitja. Palu panya nganmanytjuya wangkangu wati ini Pulatjala, panya wati nyanga paluru Irataku wali atunymankupai. Munuya palunya tjapinu tjananya alpamilara

Iratanya tjanampa kalyantjaku. Ka wati panya paluru tjanala kulinu munu mitingi palyanu tjintu kutjupangka tjana Iratala tjunguringkula kalyangku wangkanytjaku.

²¹ Ka tjintu panya paluru wirkankunyangka Iratanya mantara wiru mulata tjarpangu panya mayatja pulkangku kanyilpaingka, munu mayatjaku panya tjia wirungka nyinakatingu munu anangu tjutangka tjukurpa wangkangi.

²² Kaya palula kulinigi munuya palulanguru mirara walkuningi wangkara, "Wiya, nyuntu wati purunypa wiya, ilkaritja purunypa wangkanyi, Godanya purunypa alatjitu."

²³ Ka mapalku Godaku angeltu Iratanya pikatjaranu, ka tjuningka unngu kuyi tjutanku patjara patjara iluntanu. Ka paluru ilura wiyaringu alatjitu, panya paluru anangu tjutaku pukularingu palunya walkunyangka munu kanany-kananytju tjananya paintja wiyangku wantingi. Uti paluru tjananya painma Godanya kutju mirawaninytjaku, munu palunya walkuntja wiyangku wantinytjaku. Nyara palulanguru paluru ilungu.

²⁴ Palu Godaku tjukurpa ngura winkingka lipiringangi, kaya anangu winki mulapa kulira mulamularingangi.

²⁵ Ka Paanapatjalu pula Saulalu mani panya Jesuku walytja tjutanku Antiyakalanguru unku'iyantjanya Jerusalemalakutu katingu munu pula ungu anangu panya Jesuku walytja tjuta. Munu palulanguru ungunytjatjanu paluru pula malaku anu Antiyakalakutu munu pula wati ini Johnnga ini kutjupa Markanya altingu palula pulala tjungu ankunytjaku.

13

Paanapatjanya Pulanya Saulanya Ngurkantara Iyantja

¹ Ka ngura nyara Antiyakala Jesuku walytja tjutangka tjungu wangkatjara mankurpa munu nintilpai mankurpa kulu nyinangi ini nyanganpa wati panya Paanapatjanya, munu Tjimiannga ini kutjupa *Marunya*, munu wati ini Lutjiyanya ngura Tjaarininya ngurara, munu wati kutjupa ini Manayingga mayatja panya Irataku ngalungku, munu wati panya Saulanyalta.

² Wati nyanga paluru tjanaya tjunguringkula Godanya walkura tjapiningi mai wantira, ka Kurunpa Milmitu tjanala wangkangu, "Ngayulu Paanapatjanya pulanya Saulanya ngurkantanu ngayuku warakarinytjaku, ka nyura nyanga palunya pulanya tjura waraka nyanga palunya palyantjaku."

³ Kaya palulanguru kuwaripangu tu nyinara Godala tjapiningi mai wantira, munuya tjapira wiyaringkula pulala katangka mara tjunkula pulampa ngapartji tjapinu munu pulanya rapara iyanu ankula waraka panya palunya palyantjaku.

Paulanya Pula Manta Ini Tjaipuritjala Nyinanytja

⁴ Ka Kurunpa Milmitu witunnyangka Paanapatjanya pula Saulanya anu ngura ini Tjalutjiyalakutu, panya pauta tjuta pitjala ngarapai ngura nyara palula uru pulkangka kantilytja. Ka pula ngura nyara palulangurulta pautangka tatira ma-pakanu urungka munu pula ankula manta tjukutjukungka wirkanu manta ini Tjaipuritjala.

⁵ Munu pula tawunu ngura ini Tjalamitjala wirkara pautanguru ukalingkula nyinangi munuya ngura nyara palula Jew tjutaku wali inmatja tjutangka tjarpara Godaku tjukurpa wangkangi anangu tjutangka. Ka wati panya John Markanya pulala tjungutu pitjalinangi pulanya alpamilantjikitja.

⁶⁻⁸ Munuya wangkara wiyaringkula ngura panya palunya wantikatira ngururwanu ma-pitjala uru kantilypa kampa kutjupa ma-wirkanu ngura ini Paipatjala. Ka ngura nyara palula wati Jew ini Paatjitjanya nyinangi. Wati nyanga palunyaya anangu Kuriki wangkapai tjutanku ini kutjupa wangkapai llimatjanya, panya ini nyanga paluru wangkanyi, *ngangkari*. Wati paluru kutjupa kutjupa ayinayinirira palyalpai ngangkari purunytju, mununku ngunti walytjangku Godaku wangkatjaranmanangi. Wati nyanga paluru manta Tjaipuritjaku mayatja pulkaku malpa nyinangi. Mayatja paluru panya wati nintipuka ini Tjutjiya Puulatjanya munu paluru Godaku tjukurpa tjukarurungku wangkanyangka kulintjikitja mukuringkula Saulunya pulanya altingu. Palu wati panya Paatjitjala pulanya rawangku angatjunangi palumpa panya malpangku Godaku tjukurpa kulira mulamularingkunytjaku-tawara.

⁹ Ka Saulalu, ini kutjupa Paulalu, Kurunpa Milmiltu witulyankuyangka wati panya palunya tjukarurungku kuru nyakula wangkangu,

¹⁰ "Nyuntun mamuku walytjangku tjukurpa kurani! Nyuntun anangu tjukaruru tjutaku mirpanjtju munun anangu tjutangka Godaku tjukurpa kampa kutjupara kurara wangkapai tjukurpa palyapalku. Yaalaran kampa kutjupariku munun wantiku Godaku tjukurpa kuralwiyangku?"

¹¹ Nyuntu rawa alatjirinyangkanta nyuntunya ngapartji Godalu kuwari mirpanarira kuru patini, kan putu alatjitu nyakuku munun ngula kutju alaringkula nyakuku."

Ka mulapatu wati panya paluru kuru patiringu munu paluru putu para-pampuning kutjupangku palunya minara katinytjaku.

¹² Ka mayatja panyangku wati panya palumpa malpa kuru patiringkuyangka nyakula Godaku pulkara mulamularingu. Panya paluru tjukurpa Godaku nintinnyangka kulintjatjanungku kulinu, "Awari! Tjukurpa wirunatju kuwari kutju kulinu."

Paulalu Tjana Tjukurpa Wangkanytja Ngura Antiyaka Kutjupangka Manta Ini Pitjitiyala.

¹³ Munuya palulanguru Paulanya tjana pautangka tatira urungka ma-pakanu ngura Paipatjanya wantikatira, munuya ankula ngura ini Puukala wirkanu manta pulkangka ini Pampiliyala. Ka nyara palula John Markalu tjananya wantikatira malaku anu Jerusalemalakutu.

¹⁴ Ka Paulanya pula ngura Puukalanguru tjina anu munu pula ankula ngura Antiyaka kutjupangka wirkanu manta panya Pitjitiyala ngururpa. Munu pula Saturday-ngka tjintu panya pakuwiyaringkupaingka anangu tjutangka tjunguringkula wali inmatjangka tjarpara nyinangi.

¹⁵ Ka kutjupangku nyiringuru nyakula wangkangi tjukurpa panya Moseku munu wangkatjara tjutaku ara kulu. Ka nyakula wangkara wiyaringkuyangka wali inmatjaku mayatja tjutanku wati kutju wituu Paulala pulala tjapintjaku, ka ankula wangkangu,

“Walytja wiru kutjara! Tjinguru nyupali tjukurpa wiru kanyini nganannya wangkara kunpuntjikitjangku. Ka nyangatja kuwari nyupali wangkanytjaku ngaranya.”

¹⁶ Ka Paululu pakara marangku tjananya pilunmanu munu wangkangu alatji, “Uwa, anangu Israelkunu tjuta munu Jew wiya tjuta kulu, nyura uwankarangu Godanya walkulpai. Wanyuniya kulila kana nyurala wangkaku! ¹⁷ Godalu panya Israelkunu tjuta kanyilpaingku nganampa panya tjamupiti iriti ngurkantanu munu tjananya pukulmanu walytjapiti tjutatjararingkunyjtaku ngura panya malikitjanga nyinanyangka manta Itjipala. Munu panya tjananya ngura nyara palulanguru pakaltjingara katingu witulya pulkangku.

¹⁸ Munu paluru tjananya rawangku tu katirinangi ilytjingka kuli 40.

¹⁹ Munu tjananya witulyanangi anangu ngura 7-itja pungkula wiyantjaku manta panya Kainanta nyinanytja tjuta. Munu tjanampa manta palumpa walytja tjuta ungu nguraritjaringkula nyinanytjaku.

²⁰ Kaya pala palula rawa nyinangi kuli 450.

“Ka Godalu palumpa wangkatjara tjuta ngurkantara tjunkukatingi wanapari wanapari tjananya rawangku wirura atunymara kanyintjaku Israelkunu tjuta. Munu ngula mulapa paluru piruku wangkatjara kutjupa ngurkantara tjunu wati panya Samuelnaga.

²¹ Kaya nyara palula ara anangu tjutangku tjapiningi Godala tjanampa mayatja mulapa ngurkantara tjunkunyjtaku, ka Godalu mulapatu ngurkantanu wati panya ini Saulanya tjanampa mayatja pulka nyinanytjaku. Wati panya paluru tjamu Pintjimantanguru palumpa pakali malatja mulapa wati ini Kiitjaku katja. Munu wati panya Saulanya Israelkunu tjutaku mayatjarira nyinangi kuli 40.

²² Ka nyara palula malangka Godalu palunya mayatja wiyanu munu Davidanya ngapartji ngurkantara tjunu Israelkunu tjutaku mayatja nyinanytjaku. Nyanga alatji Godalu wangkangu, ‘Ngayuluna Davidanya ngurkantanu wati ini Tjiitjiku katja, panya nyara palumpana pulkara pukularinyi. Nyara paluru ngayuku wara wanganarangku kulira palyalku.’

²³ “Munu Godalu nganmanytju kalkuntjatjanungku Davidaku walytjapiti malatjanguru Jesunya ta iyanu anangu Israelkunu tjuta wankarunkunyjtaku.

²⁴ Ka panya Jesunya pitjanytja kuwaripangka Johntu palunyatjara tjanala tjakultjunangi anangu panya Israelkunu tjutangka paluru tjana kulira kuranguru kuntaringkula Godalakutu aruringkunyjtaku munu urungka baptise-arinytjaku.

²⁵ Munu paluru Godaku wara palyara wiyantjikitjangku wangkangu alatji, “Tjinguru nyura ngayunya kulini wati panya Godalu kalkuntjanya-palku. Palu wiya, wati nyara paluru ngayula malangka pitjanyi. Nyara paluru mayatja pulka mulapa nyinaku ngayula waintara alatjitu, kana palula mirangka ngarala pulkara kuntarinyi.” Alatji Johntu wangkara palurunku tjukutjukunmanangi munu Jesunya pulkanmanangi.

²⁶ “Walytja wiru tjuta! Kulilaniya Aipuramaku walytjapiti malatja malatjangku! Mununiya Jew wiya tjutangku kulu kulila nyura Godanya walkulpai nyinara! Panya Godalu tjukurpa wankarunkupainya ngananela utinu nyuntu nganana kulira wankaringkunyjtaku.

27 Ka panya Jew tjuṭa nyara Jerusalemala nyinapai tjuṭangu munu tjanampa mayatja tjuṭangu kulu Jesunya ngurkantankuwiyangu wantingi nganampa panya wankarunkupainya Godalu kalkuntjita. Munuya paluru tjana tjukurpa panya wangkatjara tjuṭangu iriti waltjunktjuntja putu kulira nintiringangi. Panya tjukurpa nyara palunya tjananyaya rawangu nyakula wangkapai inmangka tjun-guringkula Saturday kutjupa Saturday kutjupa. Palu tjana tjukurpa palumpa mulamularingkuwiyangu wantira Jesunya pulkara anara kuranmanangi, panya alatjirinytjakuya wangkatjara tjuṭangu iriti nyiringka waltjuntju.

28-29 Ka panya nyiringka nganmanytju waltjunktjuntja uwankara alatjitu utiringangi. Panya palunyaya kura putu ngurkantara wantinytja wiyangu Pilate-alakutu katira ngunti wankara wituwitunu palunya iluntankuntjaku, kaya mulapatu punungka wakara utitjuno. Ka panyaya paluru ilunyangka pununguru mantjira katira kulpingka tjuno.

30 Palu Godalu palunya wankara pakaltjinganu.

31 Ka nyara palula malangka anangu panya Jesula tjungu parangarapai tjuṭangu Jesunya nyangangi tjuṭa-ara tjanala utiringkunya. Anangu nyara paluru tjana panya nganmanypa Galileelangu Jerusalemaku Jesula tjungu anangi. Munuya paluru tjana kuwari tjukurpa palunyatjara tjakultjunanyi anangu Israelkunu tjuṭangka.

32-33 “Ka ngali pitjangu nyurala Tjukurpa Palya tjakultjunktjuntjikitja panya Godalu iriti nganampa tjamu tjuṭangka wankara kalkuntja. Ka panya Godalu iriti kalkuntjatjanungku ngananalalta utinu tjitji malatja tjuṭangkalta, munu panya Jesunya ilunyangka wankara pakaltjinganu. Panya iriti nyiringka waltjunktjuntja ngaranyi Psalm 2-ngka nyanga alatji,

‘Nyuntun gayuku katja,

kaṅa nyanganguru nyuntunya titutjarangu katjanmankuku.’ *

34 “Godalu alatjitu panya Jesunya ilunyangka wankara pakaltjinganu, ka paluru putu ananyi malaku kulpikutu piruku ngarira mantaringkuntjikitja. Panya Godalu katjangka wangkanytja alatji ngaranyi,

‘Panya gayulu Mayatja Davidala nganmanytju wankara kalkunu palumpakununguru wanka titutjara nyinanytjaku.

Kaṅa kuwari kalkuntjatjanungku nyuntunya palyani wiru mulapa titutjara nyinanytjaku.’ *

35 “Palu nyiri kutjupangka Davidalu Godala wangkanytja ngaranyi nyanga alatji,

‘Nyuntunku palunya wantinytja wiyangu pakaltjingalku rawa ngarira piltiringkuntjaku-tawara.’ *

36 Panya Davidalu Godaku warṅa palyara wiyantjatjanu ilungu, kaya katira palumpa mamaku kulpingka tjuno, ka ngarira piltiringkula mantaringu.

37 Palu wati panya Godalu wankara pakaltjingantjanya piltiringkuntjaku wiyatu.

* 13:32-33 Psalm 2:7 * 13:34 Aitjayaku 55:3 * 13:35 Psalm 16:10

38-39 “Walytja tjuṭa! Tjukurpa nyanga palunyaya pulkara kulinma! Panya Jesunya nyura kurantjitjanguru ngalkilpa ilungu, ka pala palulanguru Godalu nyuranya pungkuwiyangku kalypangku wantinyi nyura Jesuku mulamularingkunyangka. Panya nyura Moseku tjukurwanu nyinanyangka Godalu nyuranya putu tjukarurunmankula walytjanmananyi. Palu nyura Jesuku mulamularingkunyangka kutju Godalu alatji palyani.

⁴⁰ Wanyuya kulila, panya Godaku wangkatjara tjuṭangku nyiringka iriti walkatjunu Godalu Israelkunu tjuṭangka wangkanytja alatji,

⁴¹ ‘Nyura tjukarurungku wangkanyangka ngayunya anara kurara pungkupai.

Kana kuwari kutjupa kutjupa kura pulka mulapa nyurampa palyalku.

Tjinguru nyurala kutjupangku kura nyanga pulka nganmanytju wangkara tjakultjunkunyangkampa nyura kulira wantima.

Palulanguruya wanganarangku kulinma ilunytjaku-tawara.’ *

Alatji Godalu iriti wangkangu. Ka nyura tjukurpa nyanga palunya pulkara kulinma Godalu nyuranya palu purunymankunytjaku-tawara.” Alatji Paulalu tjananya wangkangi.

⁴² Munu palulanguru wangkara wiyaringkula Paulanya pula Paanapatjanya wali inmatjanguru pakantjikitja tuwakutu ma-pitjangi, kaya anangu tjuṭangku pulanya wangkangi ngula piruku pitjala tjanala tjukurpa tjakultjunkunytjaku tjiṅtu Saturday kutjupangka.

⁴³ Ka inma wiyaringkunyangka anangu tjuṭa pakanu munuya tjarangku pulanya wananu anangu Jew tjuṭangku munu Jew wiya tjuṭangku kulu, panya Jew wiya tjuṭa nganmanypa kampa kutjuparingu munuya Jew tjuṭa purunytju Godanya walkulpai nyinangi. Ka Paulalu pula Paanapatjalu tjanala tjukurpa rawangku wangkangi munu tjanala alatji wangkangi, “Panya Godalu ngananyanya pukultju pulkangku kanyini, kaya watarkurinytja wiyangku rawangku kulinma.”

⁴⁴ Ka ngula Saturday kutjupangka tjiṅtu panya pakuwiyaringkupaingka anangu winki mulapa ngura nyara palunya ngurara tjuṭa tjunguringu Tjukurpa Palya Mayatja Jesunyatjara kulintjikitja.

⁴⁵ Kaya wati Jew kuranyitja tjuṭangku nyangu anangu mungilyi mulapa kapuṭurira ngaranyangka, munuya nyakula nyararingangi munuya Paulalu wangkanyangka anara palunya kuranmanangi.

⁴⁶ Palu pula kurunpa rapangku alatjitu tjanala wangkangi Jew panya kuranyitja tjuṭangka. Alatji pula wangkangi, “Panya Godalu ngalinya witunu palumpa tjukurpa Jesunyatjara nyurala-warara wangkanytjaku. Palu nyura tjukurpa nyanga palunya kulira wantingu rawa wanka nyinanytjikitja mukuringkunytja wiyangku. Ka ngali nyura wantinyangka Jew wiya tjuṭakutu ankuku tjukurpa nyanga palunyaṭu tjanala wangkanytjikitja.

⁴⁷ Ngali kulini Godalu panya wangkanytja alatji, ‘Ngayulu nyuntunya tili purunypa iyani Jew wiya tjuṭakutu, panya tilingku irnyara kalalankupai, palu purunytju nyuntu tjanala Tjukurpa Palya wangkaku, kaya kulira mulamularingkula wankaringkuku, anangu nyanga manta winkitja.’ ” *

* 13:41 Apakukaku 1:5 * 13:47 Aitjayaku 49:6

48 Kaya Jew wiya tjuṭangku Paulalu alatji wangkanyangka kulira pukularingu munuya mirawanira wangkangi, “Mayatja God! Nyuntumpa tjukurpa Jesunyatjara wiru mulapa ngaranya. Kala nyuntunya pulkara alatjitu mirawanira walkuni.” Kaya anangu panya Godalu ngurkantankunytja tjuṭa Jesuku mulamularingu, panya tjananya ngurkantanu palula tjungu wanka titutjara nyinanytjaku.

49 Ka tjukurpa Jesunyatjara lipiringu ngura winkingka manta nyara palula.

50 Palu ngura nyara Antiyaka kutjupangkaya Jew kuranyitja tjuṭangku Paulaku pulampa Paanapatjaku kuraringkula mayatja ngura nyara palunya ngurara tjuṭa wituwituningi, minyma kuranyitja tjuṭa kulū, tjanala junguringkula Paulanya pulanya pikaringkula paira iyantjaku. (Minyma nyara paluru tjanaya Jew wiya tjuṭa munuya Jew tjuṭa purunypa Godanya walkulpai nyinangi.) Kaya mulapaṭu pulampa kuraringkula pulanya paira iyanu palumpa tjanampa mantanguru ngura kutjupakutu.

51 Ka pula tjinatja araltjara ulpuru patapatara tjanala wangkangu, “Nyanga alatjili palyani nyura tjukurpa nyanga Jesunyatjara wantinyangka nyura nyakula kulintjaku, panya nyura Godaku ngurpa tjuṭangku purunytju ngalnya paira iyanu.” Munu pula tjinatjangka tjarpara anu ngura kutjupakutu ngura ini Akani-yamalakutu.

52 Palu ngura nyara Antiyakalaya Jesuku walytja tjuṭa pukulpa alatjitu nyinangi munuya Kurunpa Milmilṭu nintinnyangka wanganarangku kulilpai.

14

Paulanya Pula Paanapatjanya Akani-yamala Nyinanytja

1 Ka Paulalu pula Paanapatjalu tjukurpa panya palu purunypaṭu wangkangi ngura ini Akani-yamala. Paluru pula Jew tjuṭaku wali inmatjangka tjarpangu, kaya paluru pula tjukurpa uti wiru mulapa wangkanyangka kulira anangu winki mulamularingu Jew tjuṭa munu Jew wiya tjuṭa kulū.

2 Palu Jew kutjupa tjuṭangkuya mulamularingkunytja wiyangku wantingi, munuya paluru tjana Jew wiya tjuṭa wituwituningi Paulaku pulampa munu Jesuku walytja kutjupa tjuṭaku kulū kuraringkula tjananya wangkara kurantjaku.

3 Palu Paulanya pula ngura nyara palula rawa nguwanpa nyinangi, munu pula rapangku alatjitu Mayatja Jesuku tjukurpa wangkangi anangu tjuṭangka, tjukurpa panya Godalu anangu uwankaraku pukultju pulkangku palyantja Jesulawanungku. Ka pula tjukurpa wangkanyangka Godalu pulanya witulyanu kutjupa kutjupa pulka tjuṭa paluru witulyankunyangka palyantjaku. Kaya anangu tjuṭangku tjukurpa pula wangkanyangka mulamularingu alatji kulira, “Awari! Godanya pulka mulapa nyinanyi, munulampa pukultju pulkangku palyanu Jesulawanungku.”

4 Ka nyara palulanguru ngura nyara palula anangu tjuṭa tjararingu, kaya tjara kutjupa wati panya Paulaku pulampa mulamularingu Jesulu panya iyantja kutjaraku munuya pulala junguringu. Kaya tjara kutjupangku mulamularingkuwiyangku wantira Jew kuranyitja tjuṭangka tjunguringu.

5 Munuya kampangkaṭu wangkara kuliningi Paulanya pulanya puringka atura iluntankunytjikitjangku. Paluru tjana panyaya Jew tjuṭangku munu Jew wiya tjuṭangku munu tjanampa mayatja kuranyitja tjuṭangku kulu kampangkaṭu wangkangi pulanya pungkunytjikitjangku.

6-7 Palu pula nganmanypa nintiringu munu pula mapalku alatjitu warpungkula anu tjina manta kutjupakutu ini Lakaniyalakutu. Munu pula manta nyara palula wirkara ngura tawunu ini Tuupila pulala Litjurala anangu tjuṭangka Tjukurpa Palya Jesunyatjara parajakultjunangi munu pula ngura tjukutjuku tjuṭangka kulu paragarala tjukurpa wangkangi.

Paulanya Pula Litjurala Nyinanytja.

8 Ka ngura nyara Litjurala wati nyumpu nyinangi, panya paluru tjina para-ngaranytja wiyatu nyumpu alatjitu nyinara pulkaringu.

9 Munu wati paluru nyinara kuliningi Paulalu tjukurpa wangkanyangka. Ka paluru wati panya palunya tjukarurungku nyangangi nyinara kulinyangka munu kulinu, "Wati nyanga paluru mulapa mulamularinganyi Jesuku palunya palyarunguntjaku."

10 Munu paluru nyakula wangkangu, "Wati ngana! Pakara ngara tjinangku paltjura!" Ka wati panya nyumpu mulapaṭu mapalku pakanu munu para-ngarangi.

11 Kaya anangu tjuṭangku Paulalu palyannyangka nyakula puṭu kuliningi munuya wangka walytjangku Lakaniyaku wangkangu mirara wangkangu, "Awari! Nganampa god kutjaraya kuwari ananguringu munu pula ngananalakutu pitjangu." (Panya manta nyara palunya ngurara tjuṭangku tjanampa god ini Umitjanya pulanya Tjuutjinya walkulpai.)

12 Munuya palulanguru Paanapatjanya nyakula wangkangu, "Nyangatja nganampa god ini Tjuutjinya." Munuya palu purunypatu Paulanya tjukurpa rawangku wangkanyangka kulira wangkangu, "Nyangatja nganampa panya god kutjupa ini Umitjanya."

13 Ka ngura nyara palula itingka timpula ngarangi tjana Tjuutjinya walkulpai. Ka wati tjanampa tjukurtjara kulu nyinangi nyara palula munu paluru puluka nyitayira tjuta munu ukiri inuntji wiru tjuta kulu ngalya-katingu tawunuku kaita pulkakutu, panya anangu nyara palunya ngurara tjuṭaya mukuringangi kuka pungkula tiliwakara palunya pulanya walkuntjikitja tjanampa god kutjara-palku kulira.

14 Ka wati panya Paulalu pula kulinu tjana alatjingantjikitjangku wangkanyangka munu pula tjituru-tjitururira mantara pulanku tjilpirpungkula ma-wirtjapakanu anangu tjuṭakutu munu pula mirara wangkangu,

15 "Anangu tjuta! Nyaaku nyura nyanga alatjinanyi? Panya ngali anangu alatjitu nyuranya purunypa, munuli pitjangu Tjukurpa Palya Jesunyatjara nyurala tjakultjunkunytjikitja. Wanyuya ngunti kulilwiyangku wantima munuya God panya wankaku mukuringama, panya paluru ilkari, manta, uru kulu palunu munu ilkaritja, mantatja, urutja uwankara kulu.

16 Munu panya paluru iriti anangu tjuta palumpa watarkurinyangka wantir'iyau tjananku walytjangku kulira palyantjaku.

17 Palu anangu tjuṭa iritinguru alatjitu palumpa ninti nyinangi panya tjana nyangangi paluru rawangku tjanampa wiru tjuṭa palyalkatinyangka, panya paluru wirungku mina iyalpai ilkaringunguru puyira mai pakaltjingantjaku, ka mai paluru pulkaringkula kururingkunya ngala nyura mantjira ngalkula paltjaringkula kurunpa pukulpa mulapa nyinapai." Alatji pula wangkangi.

18 Palu paluru pula tjukurpa nyanga palunya wangkara puṭu markuningi anangu panya tjuṭa, kaya paluru tjana tungunpungangi kuka pungkula tiliwakara pulanya walkuntjikitja alatjitu.

19 Kaya anangu Jew kutjupa tjuṭa pitjangu Antiyaka panya kutjupanguru munu Akani-yamalanguru kulu munuya paluru tjana anangu panya tjuṭa wituwituṇu Paulaku kuraringkula pikaringkunyitjaku munu palunya pulingka atura iluntankunyitjaku. Kaya mulapaṭu Paulanya pulingka atura atura ma-itarikatira urilta waningu ngunti ilunyangka-palku kulira.

20 Palu anangu panya Jesuku walytja tjuṭaya palulakutu pitjala katuku para-ngarala wananingi, ka Paulanya pakaṇu munu palulanguru walikutu malaku anu palumpa ngurakutu. Munu tjiṅtungka Paulanya pula Paanapatjanya tjunguringkula anu malaku ngura panya Tuupilakutu.

Paulanya Pula Paanapatjanya Antiyakalakutu Malaku Ankunyitja

21 Munu pula ngura pala palula Tjukurpa Palya Jesunyatjara tjanala tjakultjunangi, kaya tjuṭa mulapa Mayatja Jesuku walytjaringu. Ka pula nyara palulanguru malaku anu ngura panya Litjuralakutu munu Akani-yamalakutu munu Antiyaka kutjupakutu panya ngura paluru manta Pitjitiyala ngarangi.

22 Munu ngura nyara palula tjanala, paluru pula anangu panya Jesuku walytjaringkunyitja tjuṭa piruku wangkara rapaningi, tjana mulamularingkunyitjatjanungku rawangku tungun-tunguntu Jesunya wanantjaku. Munu pula wangkara nintiningi alatji, "Nganana mantangka nyanga wanka nyinanyangka Jesunya wantipai tjuṭangku nganananya rawangku kuralku Jesuku mulamularingkunya angka, kala uti tungun-tungunpa ngarama Jesunya wantinytja wiya Godalu nganananya ngula rawangku kanyintjaku ngura ilkaritjangka."

23 Munu pula ngura kutjupangka kutjupangka para-pitjalira, Jesuku walytja tjuṭanguru wati mankurpa ngurkantara tjunangi, Jesuku walytja tjuṭa ngura nyara palunya ngurara tjuṭa atunymara kanyintjaku. Munu pula ngura nyara palula tjanala, wati atunymankupai mankurpa ngurkantankunyitjatjanungku mai wantira, Godala tjanampa pulkara tjapiningi, "Mayatja! Nyanga paluru tjana nyuntumpa pulkara mulamularinganyi, ka tjananya witulyanama nyuntumpa walytja tjuṭa tjukarurungku atunymara kanyintjaku."

24 Munu pula palulanguru anu manta Pitjitiyala ngururwanu manta Pampiliyalakutu.

25 Munu pula manta nyara palula ngura tawunu ini Puukala wirkara Tjukurpa Palya Jesunyatjara tjakultjunangi anangu tjuṭangka. Munu pula palula malangka tjarukutu ukalingu ngura ini Atalialakutu.

26 Munu pula palulanguru pautangka tatira urungka ma-itipiringu malaku manta Tjiriyalakutu munu pula mantangka wirkara

ukalingkula tjina anu tawunu panya Antiyakalakutu. Panya ngura nyara palulanguruya palunya pulanya nganmanytju Godala tjapira iyanu, palunya palunya wankaru katirinkunytjaku, pula kumpungku warka ngura tjutangka palyantjaku. Ka pula warka panya palunya palyara wiyantjatjanu malaku wirkanulta ngurakutu.

²⁷ Munu pula Antiyakala wirkara Jesuku walytja tjuta altingu tjunguringkunytjaku munu pula tjanala tjakultjunangi Godalu palula pulalawanungku palyantja uwankara. Munu pula wangkangi alatji, "Panya Godalu anangu Jew wiya tjuta kulu altingu tjana kulu kulira mulamularingkula Jesuku walytjaringkunytjaku."

²⁸ Munu pula palulanguru ngura nyara palula rawa alatjitu nyinangi tjanala tjungu, Jesuku panya walytja tjutangka.

15

Jerusalemalaya Tjunguringkula Wangkara Kulintja

¹ Kaya Jesuku walytja wati Jew kutjupatjara Judealanguru pitjangu Antiyakalakutu, munuya wankara wituwituningi wati panya Jesuku walytjaringkunytja tjuta. Alatjiya wangkangi, "Uti nyura tjukurpa panya Mosenya ungkunyjtjawanu watiringama, ka nyara palulangurulta Godalu nyuranya wankarunkuku nyura Moseku arawanu watiringkunyangka kutju."

² Ka Paulalu pula Paanapatjalu alatji wangkanyangka kulira tjituru-tjitururira mirpanaringu, munu pula wati panya palula tjanala tjunguringkula tjananku ngaparku wankara pika-pikaringu. Kaya Jesuku walytja ngura nyara palunya ngurara tjutangu, tjananku ngaparku wangkanyangka nyakula putu kuliningi, munuya wangkangu alatji, "Wanyula ngananalanguru wati mankurpa iyala wati nyanga Paulala pulala tjungu ankunytjaku Jerusalemalakutu, kaya ankula wati panya Jesulu iyantja tjutangka munu Jesuku walytjapiti atunymankupai tjutangka kulu tjapila alatji, 'Mulapalanya Godalu Moseku arawanu watiringkunyangka kutju wankarunkuku?' Alatji tjapintjakula iyala."

³ Munuya mulapatu wati mankurpa ulparira iyanu Jerusalemalakutu Paulala pulala tjungu.

Kaya manta Panitjiyalawanu ankula anangu tjutangka ara tjakultjunangi, ara panya Jew wiya tjuta Jesuku mulamularingkunytja. Munuya piruku ankula manta Tjamiriyala wirkara palu purunypatu anangu tjutangka tjakultjunangi.

⁴ Munuya palulanguru ankula ma-wirkanu ngura panya Jerusalemala, kaya Jesuku walytja uwankara tjananya nyakula pulkara pukularingu, Jesulu iyantja tjuta munu atunymankupai tjuta kulukulu. Ka Paulalu pula Paanapatjalu tjanala tjakultjunangi Godalu palula pulalawanungku kutjupa kutjupa wiru tjuta palyantja.

⁵ Kaya wati Paratji kutjupatjara Jesuku walytjaringkunytjatjanu nyinangi tjanala tjungu, munuya paluru tjana pakara wangkangu, "Kulilaya! Palyaya Jew wiya tjuta Jesuku mulamularingu, mununtiya Moseku arawanu kulu watiringama munuya palulangurulta Moseku tjukurpa uwankara wanganarangku kulira palyanma."

⁶ Kaya Jesulu iyantja tjuta munu atunymankupai tjuta tjana-kutjuringkula mauntalparingu panya tjana wangkanytja wankara kulintjikitja.

7 Munuya rawangku alatjitu ngapartji-ngapartjingku wangkara kuliningi. Ka Peterlulta pakara wangkangu, "Uwa, wanyuya kulila walytja tjuṭa! Nyura panya ninti panya nganmanytjulpi Godalu ngayunya ngurkantanu Tjukurpa Palya anangu Jew wiya tjuṭangka kulu tjakultjunktjaku tjana kulu kulira Mayatja Jesuku mulamularingkunytjaku.

8 Ka tjananya Godalu unngu kulinyangka nintingu nyangu paluru tjana palumpa mulamularingkunyangka munu tjananya Kurunpa Milmilnga ungu nganannya purunypatu, panya nganannya nganmanytju ungu, palu purunypatu tjananya kulu ungu.

9 Panya paluru Jew wiya tjuṭa mauntara wantinytja wiyangku tjananya kulu kura palyannyangka kalypangku pungguwiyangku wantingu mulamularingkunyangka nyakula. Panya paluru palunya tjananya munu nganannya kulu tjungura nyanganyi.

10 Nyura ninti panya iriti nganampa tjamupiti putuliringi Moseku arawanu Godala tjunguringkunjikitja, ka kuwari nganana kulu palu purunypatu putulirinyi. Ka nyura uti Jew wiya tjuṭa ngunti wituwituntja wiyangku wantima panya tjukurpa nyara palulawanu putu Godala tjunguringkupai. Ka nyura tjananya ngunti wituwitura Godanya mirpanpa palyani.

11 Panya Godalulanya mukulya pulkangku wankarunu Mayatja Jesulawanungku nganana palumpa mulamularingkunyangka munu tjananya kulu palu purunytjutu wankarunu palumpa mulamularingkunyangka." Alatji Peterlu tjanala wangkangi.

12 Ka Paanapatjalu pula Paulalu tjukurpa panya palunya tjanala tjakultjunu, panya Godalu kutjupa kutjupa pulka tjuṭa palula pulalawanungku palyantja Jew wiya tjuṭangka, tjana nyakunytjatjanungku kulira Godaku mulamularingkunytjaku. Ka pula wangkanyangkaya uwankarangku pilunarira kuliningi.

13 Ka pula wangkara wiyaringkunyangka Jamesalu pakara wangkangu, "Uwa, walytja wiru tjuṭa, kulilaniya!

14 Simon Peterlu panya kuwari nganana tjakultjunu panya Godalu Jew wiya tjuṭaku ngalturingkula tjara ngurkantanu tjana kulu palumpa walytjaringkula nyinanytjaku.

15 Panya Godaku wangkatjara tjuṭangku tjukurpa nyanga palunya iriti walkatjunu nyanga alatji,

16 'Mayatja Godalu wangkangu, "Ngayulu ngula malaku pitjanyi mununa Mayatja Davidakunu tjuṭa piruku malakungku tjungulku tjana Davidanya purunytju anangu tjuṭa mayatjarira kanyintjaku.

Panya tjana wali purunypa katakatira minya-minyaringkunytja mantangka ngarinyi, ka kutjupangku piruku pakaltjingara ngaratjunkuku.

17 Kaya nyara palulanguru anangu kutjupa tjuṭa kulu ngura uwankaranguru ngayulakutu malaku aruringkuku, panya Jew wiya tjuṭa kuluna ngayulu altingu paluru tjana kulu ngayuku walytjaringkunytjaku." *

* 15:17 Aimatjaku 9:11-12

18 Tjukurpa nyanga palunya panya Mayatja Godalu tjanala iriti wangkangi. Panya paluru alatji kalkuntjatjanungku palyalpai alatjitu.’”

19 Munu Jamesalu piruku wangkangu, “Ngayulu nyanga alatji kulini. Utila Jew wiya tjuṭa Godaku walytjaringkunyaangka tjananya Jew tjuṭaku arawanu kutju rawa nyinanytjaku wituwituntja wiyangku wantima.

20 Palu utila ara mankurpa kutju litangka walkatjura tjanala tjakultjunama panya kuka god ngalya-nyalya ungkunyitjita ngalkuwiyangku wantinytjaku, munu anangu kutjupangka ngunti ngariwiyangku wantinytjaku, munu kuka milkalitjara ngalkuwiyangku wantinytjaku, munu milkali kulu tjikintja wiyangku wantinytjaku.

21 Panya Saturday kutjupa Saturday kutjupa Jewku tjukurtjara tjuṭangu rawangku wali inmatjangka tjarpara Moseku tjukurpa nyiringuru nyakula wangkapai, ka panyaya tjukurpa nyanga palunyaṭu ngura winkingka wangkakatingi iritinguru alatjitu.” Alatji Jamesalu tjanala wangkangu.

Jew Wiya Tjuṭakutu Lita Walkatjura Iyantja

22 Kaya Jesulu iyantja tjuṭangu, atunymankupai tjuṭangu kulu, munu Jesuku walytja uwankarangku wangkara kulira ngurkantanu wati kutjara Paulala pulala Paanapatjala tjungurinkula ankunyitjaku Antiyakalakutu. Munuya ngurkantanu wati ini Tjaalatjanya pulanya Judasanya ini kutjupa Paatjapatjanya. Panya nyanga paluru pula atunymankupai wiru kutjara.

23 Munuya pulanya ungu’iyantjikitjangku lita walkatjunu nyanga alatji,

Walytja wiru tjuṭa ngura pala Antiyakala nyinanytja tjuṭa, munu manta pala Tjiriyala pulala Tjilitjiyala nyinanytja tjuṭa kulu! Kuwarila Jerusalemalanguru nyurampa lita nyangatja walkatjunanyi Jesulu iyantja tjuṭangu, atunymankupai tjuṭangu kulu, munu Jesuku walytja uwankarangku.

24 Panya nganaṅa kulinu wati kutjupatjara, nyanga nganaṅalanguru nyuralakutu ma-pitjanytja, munu nyurala tjukurpa kutjupa wangkara nyuranya tjituru-tjiturunkunyitja. Palu nganaṅa tjananya iyantja wiyatu nyuralakutu. Palu tjanantiya walytjangku kulira nyuralakutu ma-pitjangu nyurala ngunti wangkanyitjikitja.

25 Kala kuwari tjungurinkula wangkara kulira ngurkantanu, wati kutjara nganaṅalanguru Paulala pulala Paanapatjala tjungurinkula ma-pitjala nyurala wangkanyitjaku.

26 Panya wati nyanga Paulalu pula Mayatja Jesuku Christaku waraka palyannyangkaya wati Jesuku mirpantju tjuṭangu nguwanpa iluntankupai.

27 Kala Judasanya pulanya Tjaalatjanya lita nyangatja walkatjura ungu’iyani nyuralakutu, ka nyura mantjira nyakula wangkaku, ka pula nyurala utira tjakultjungkuku tjukurpa nyanga palunya.

28 Panya Kurunpa Milmitu munu nganaṅa kulu tjungungku nyurala wangkanytja wiya Moseku arawanu kutju rawa nyinanytjaku.

Palu ara nyanga mankurpa kutjula nyurala wangkanyi, nyura wanganarangu kulintjaku.

²⁹ Uti nyura kuka god ngalya-ngalya ungunytjita ngalkuwiyangu wantima, munu milkali tjikintja wiyangu wantima, munu kuka milkalitjara kulu ngalkuwiyangu wantima, munu anangu kutjupangka ngunti ngariwiyangu wantima kuri walytjangka kutju ngarima. Uwa, tjukurpa nyanganpa wanganarangu kulira palyarampa nyura palyanyku nyinaku.

Uwa, alatjitu wiyaringu. Palya!

³⁰ Alatjija lita tjanampa walkatjunu munuya unku'iyanu wati panyanpa Antiyakalakutu. Kaya ngura pala palula ma-wirkara Jesuku walytja uwankara altingu munuya tjunguringkunyangka lita panya tjana katinytjatjanungku tjananya ungu.

³¹ Kaya lita mantjira nyakula wangkara kulira pulkara pukularingu kurunpa unngu.

³² Ka Judasalu pula Tjaalatjalu tjananya rawangu wangkara rapaningi tjana kunpuringkula tungun-tunguntu Jesunya wanantjaku, panya wati nyanga paluru pula Godaku wangkatjara kutjara nyinangi.

³³⁻³⁴ Munu palulanguru pula ngura nyara palula Jesuku walytja tjutangka rawa nguwanpa nyinangi, kaya ngula palunya pulanya ngura walytjakutu malaku ankunytjaku puku'tu alatjitu wangkara iyanu.*

³⁵ Ka Paulanya pula Paanapatjanya rawatu nyinangi ngura nyara palula munu pula tjukurpa Mayatja Jesunyatjara anangu tjutangka rawangkutu tjakultjunangi munu tjanala utira wangkangi. Kaya kutjupa tjutangu kulu palula pulala tjunguringkula anangu tjutangka nintiningi.

Paulanya Pula Paanapatjanya Tjararingkunyta.

³⁶ Ka ngula tjintu kutjupa Paulalu wangkangu Paanapatjala, "Utili piruku anama ngura panya ngali para-ngarala tjukurpa wangkanytja tjutakutu, munuli anangu panya Jesuku walytjaringkunyta tjuta nyangama yaaltji-yaaltji paluru tjana kuwari nyinanyi."

³⁷ Ka Paanapatjanya mukuringangi Johnnga ini kutjupa Markanya katinytjikitja palula pulala tjungu ankunytjaku.

³⁸ Palu paluru nganmanytju wantikatinytjitjanguru Paulalu putu nguwanpa kuliningi, munu palyanmankunytja wiyangu wantingi palunya katinytjikitjangku. Panya paluru mungatu manta panya Pampilyala pulanya wantikatingu, pulala tjungungku warkariwiyangu wantira.

³⁹ Ka palulanguru Paanapatjalu pulanku Paulalu pulkara mirpanarira ngaparku wangkara kuliningi, munu palulanguru pula tjararingu. Ka Paanapatjalu wati panya Markanya katingu, munu pula pautangka tatira anu ngura Tjaipuritjalakutu.

⁴⁰ Ka Paulanya mukuringu wati panya Tjaalatjanya katinytjikitja. Ka Jesuku walytja tjutangu pulampa Mayatja Jesula tjapiningi pulanya atunytju katirinkunytjaku.

* **15:33-34** Wati kutjupangu kunyu verse 34 walkatjunu munu mala tjungunu Luke-aku tjukurta alatji - Palu Tjaalatjanya ankunytja wiya ngura nyara Antiyakala ma-nyinangi.

⁴¹ Ka paluru pula anu manta Tjiriyalawanu munu Tjilitjyalawanu kulu, munu pula anangu panya Jesuku walytja tjuta para-nyangangi, munu tjananya wangkara kunpuningi Jesunya titutjarangku wanantjaku, wantinytja wiyangku.

16

Timitjinya Paulala Pulala Tjaalatjala Ankunytja.

¹ Munu nyara palulanguru Paulanya pula Tjaalatjanya anu malaku ngura panya Tuupilakutu munu pula pala palulanguru Litjuralakutu anu. Ka wati ini Timitjinya ngura nyara palula nyinangi. Nyara paluru panya Jesuku walytja nyinangi, ka palumpa ngunytju minyma Jew munu paluru kulu Jesuku walytja nyinangi. Palu palumpa mama wati Jew wiya manta ini Kuritjanya ngurara munu nyara paluru wangka Kuriki wangkapai.

² Kaya ngura nyara Litjurala pulala Akani-yamala Jesuku walytja tjutangku Timitjinya pukularira wirunmankupai.

³ Ka Paulanya wati nyara palunya katinytjikitja mukuringangi, palu Jew nyara palunya ngurara tjutaya palumpa mamaku ninti panya paluru Jew wiya wati Kuriki munu panya palumpa katja Timitjinya iti ngarinyangkalpi Moseku arawanungku watintja wiyatu. Ka Paulalu tjukurpa nyanga palunya kulintjatjanungku Timitjinya watiringkunytjaku palyanu, panya Jew tjuta pukularipai wiya wati wiya tjutaku, palu panya watiringkula kutjuya Jew tjutangka tjunguringkupai. Ka palulangurulta watiringkunytjatjanu paluru Paulala tjanalana tjunguringu.

⁴ Munuya palulanguru ma-pakanu ngura tjutakutu munu ngura pala palula tjanalana wirkara Jesuku walytja tjutangka tjukurpa panyatja tjakultjunangi, tjukurpa panya Jerusalemala wati Jesulu iyantja tjutangku munu atunymankupai tjutangku kulu litangka walkatjunkunytja Jew wiya tjutaku.

⁵ Kaya Jew wiya tjuta Jesuku walytjaringkunytja tjutangku tjukurpa nyangatja kulira pukularira kunpuringangi Jesunya rawangku tungun-tunguntu wanantjikitja, ka tjinu kutjupa tjinu kutjupa anangu kutjupa tjuta kulu Jesuku walytjaringangi tjuta mulapa.

Paulalu Tjukurmankunytja Ngura Ini Turuwatjala

⁶ Ka Paulalu tjana manta ini Purikiyala pulala Kalaitjyalawanungku para-ngarala tjukurpa wangkangi. Tjinguruya manta Aitjala kulu wirkara tjukurpa wangkama anangu tjutangka, palu Kurunpa Milmitu palunya tjananya markunu manta nyara palula tjukurpa wangkanytja wiyangku wantinytjaku.

⁷ Kaya manta pala palula itiwanu waintara ankula ngura kutjupangka wirkanu manta ini Matjiyala munuya palulanguru mukuringangi manta ini Patjiniyala wirkankunytjikitja, palu Kurunpa Milmitu tjananya pirukutu unngu nintiningi manta nyara palulakutu tjarpanytja wiyangku wantinytjaku.

⁸ Kaya waintara anu Matjiyala itiwanu munuya wirkanu ngura ini Turuwatjala uru pulkangka kantilytja.

⁹ Ka ngura nyara palula mungangka kunkunarira Paulalu tjukurmanu wati Matja-tunianya ngurarangku ngarala palula tjapinyangka. Alatji paluru wangkangi, "Pitja ngura nyanga Matjatuniyalakutu munulanya alpamilala!"

¹⁰ Ka nyara palula malangka Paulalu tjukurmankunytjtjanguru nganana mapalku ritiringu ngura nyara palumpa ankunytjikitja, panya nganana kulira wangkangu, "Mulapa nyangatja kuwari Godalu nintinu ankula ngura nyara palula tjukurpa tjakultjungkunytjaku anangu tjutangka."*

Minyma Litiyanya Jesuku Walytjaringkunytja Ngura Pilipaila.

¹¹ Kala Turuwatjalanguru pautangka tatira anu urungka manta tjukutjuku ini Tjamatja-raitjalakutu, munula nyara palula ngarira mungawinki piruku tatira ma-pakanu munula ngura nyara Niya-palitjala wirkanu.

¹² Munula nyara palulanguru piruku anu ngura Pilipailakutu. Ka ngura Pilipainya panya manta pulkangka Matja-tuniyala ungu ngarangi. Ngura nyanga palunya panya Rome-anya ngurara tjutanku nganmanytju pitjala ngura palyanu. Kala ngura nyara palula tjintu mankurpa nguwanpa nyinangi.

¹³ Munula Saturday-ngka tjintu panya pakuwiyaringkupaingka nganana nguranguru unytju anu karu urutjarakutu panya ngura nyara palulaya Jew tjuta tjaka Saturday-ngka pitjala tjunguringkupai Godala tjapintjikitja. Kala wirkara nyangu minyma tjuta nyinara waninyangka munula palula tjanala tjunguringkula nyinakatingu munula tjanala wangkangi Godaku tjukurpa.

¹⁴ Ka minyma kutjupa ngura ini Tjayatiranya ngurara nyinangi nyara palula minyma ini Litiyanya. Minyma nyara paluru mantara purple tjuta payamilalpai munu anangu tjutangka tjalamilalpai. Munu paluru Godanya kulira walikulpai. Ka Paulalu tjukurpa wangkanyangka Mayatja Jesulu minyma palunya kurunpa pampunu paluru tjukururungku kulintjaku, ka paluru kulira mulamularingu Paulalu wangkanyangka.

¹⁵ Ka palulanguru palunya urungka tjarpatjura baptise-katingu palumpa walytja tjuta kuluku, panya paluru tjana kulu mulamularingu paluru wangkanyangka. Ka minyma panya paluru nganananya altingu nganana ankula palumpa walingka nyinanytjaku. Alatji paluru wangkangi, "Nyura panya kuwari nyangu ngayunya Jesuku mulamularingkunyangka munu palumpa walytjaringkunyangka. Kaya kuwari pitja ngayuku ngurakutu munuya nyara palula nyinama ngayuku walingka." Alatji nyanga paluru nganananya wangkara altingi, kala mulapatu anu palumpa walikutu munula nyara palula nyinangi.

Paulanya Pulanya Tjailangka Tjarpatjungkunytja Ngura Pilipaila.

¹⁶ Kala karu panya palulakutu rawa anangi Godala tjapintjikitja. Ka tjintu kutjupa kungkawara kutjupa ngalya-ngaparikatingu ngananalakutu panya paluru wati mayatja mankurku unytju warakaripai. Kungkawara nyara paluru mamutjara nyinangi, ka

* **16:10** Verse 10 wangkanyi *nganana* panya nyanga palula-arangka wati panya Luke-anya Paulala tjanala tjunguringu munu palula tjanala para-ngarangi.

mamu nyara paluru palunya kuranyukutungku nyakula wangkanytjaku nintilpai. Kaya anangu tjuṭa alatji wangkanyangka kulira nintiringunytjikitja mukuringangi munuya kungkawara palunya mani ungkupaṭ paluru kuranyukutungku nyakula tjanala tjakultjunkunytjaku. Ka palumpa mayatja tjuṭangku mani panya palunya mantjilpai. Munuya mani pulkatjararingu kungkawara nyanga palulanguru.

17 Ka kungkawara nyanga paluru Paulanya nganannya wananu munu mirara wangkangi, “Wati nyanganpaya Mayatja God Pulkaṭ walytja tjuṭa munu paluru tjana nyuranya tjakultjunanyi Godalu nyuranya wankarunkunytjaku.”

18 Munu paluru tjiṭu tjuṭangka rawangku alatji wangkakatingi. Ka Paulanya kungkawara panya paluru rawangku wangkanyangka kulira kulira kaar-kaararingu munu malakukutura mamu panya palunya wangkara painu, “Jesulu ngayunya witulyankunyangkananta nyuntunya wituni kungkawara pala palulanguru ngalya-pakala munu palunya wantikati!” Ka mapalku mamu paluru kungkawara panya palulanguru pakanu munu palunya wantikatira anu.

19 Ka kungkawara panya palumpa mayatja tjuṭangku palunya nyakula alatji kulinu, “Ai! Nganampa mani palyantjaku wiyaringu.” Munuya palulanguru Paulanya pulanya Tjaalatjanya witira katingu ngura nyara palumpa mayatja tjuṭakutu tawunungka ngururpa. Panya ngururpa nyara palula anangu tjuṭangku kutjupa kutjupa tjuṭa tjalamilalpai ngarangi, kaya palunya pulanya nyara palulakutu katingu mayatja tjuṭangku ngurkantara paintjaku.

20 Munuya mayatja tjuṭangka wirkara wangkangu, “Wati wiru tjuṭa! Wati nyanga pula Jew kutjara munu pula anangu ngura nyangatja ngurara tjuṭa kurani.

21 Panya nganampa mayatja Tjiitjanya nyara Rome-ala nyinapainya, kala nganampa tjamupitiku arangka rawa nyinanytjikitja mukuringanyi. Ka nyanga pula nganannya wituwituni nganampa ara tjuṭa wantira paluru pula purunytju palyantjaku.”

22 Kaya palulanguru anangu winki mulapa tjunguringkula palumpa pulampa pikaringkula ngalytjurmara waṅingi. Ka tawunu nyara palumpa mayatja tjuṭangku tjaultji tjuṭa witunu, palumpa pulampa mantara anangitja tjilpirpungkula wanira pulanya katira pulkara pungkunytjaku, munu palula malangka tjailangka tjarpatjunkunytjaku.

23 Kaya mulapaṭu palunya pulanya punu urtjanpa purunytja pulkara alatjitu alkanu milkali pakantjaku. Munuya palulanguru palunya pulanya katira tjailangka tjarpatjunu munuya wati tjaila kanyilpai piruku wangkangu pulanya ilangku anga-ngarala atunymankunytjaku.

24 Ka mulapaṭu wati panya tjaila kanyilpaingku wanganarangku kulinu tjana wangkanyangka munu Paulanya pulanya Tjaalatjanya ruuma unngutjangka tjarpatjunu, munu pulanya punu pulkangka alatjarangka tjina tjarpatjura tjungura tjiinangka karpinu pakantjaku-tawara.

25 Ka munga kultungka Paulalu pula Tjaalatjalu Godala tjapiningi munu pula inma inkara Godanya walkuningi pukultu alatjitu, kaya pulala itingka nyinanytja tjuṭangku kuliningsi pula inma inkanyangka.

²⁶ Ka nyara palula ara manta pulkara uringu munu wali panya tjaila pulkara uritjinganu, ka mapalku tuwa uwankara alaringu. Ka tjaina uwankara anangu tjutanguru mapalku araltjarira punkanu.

²⁷ Ka wati panya tjaila kanyilpai kunkuntjanu wankaringu munu nyangu tuwa uwankara ala ngaranyangka munu ngunti kulinu karpintja panya uwankara kumpira ma-wirtjapakannyangka-palku mununku tjula wara mantjira palurunku walytjangku iluntankunytjikitjangku wakunu.*

²⁸ Ka Paulalu nyangu paluru alatjirinyangka, munu mirara palunya painu, "Wantimanku walytjangku ngunti iluntankunytja wiyangku! Nyangatjala uwankaratu nyinanyi."

²⁹ Ka wati panya tjaila kanyilpaingku wati kutjupangka mirara wangkangu warpungkula tili ngalya-katinytjaku. Munu katira ungkunyangka paluru tilitjara ruuma unngu tjarpangu munu pulkara nguluringkula puntu winki tjititingkula Paulala pulala tjinangka itingka punkara watungarakatingu.

³⁰ Munu pakara palunya pulanya urilkutu katira tjapinu, "Wati wiru kutjara! Nyaaringkukuna Godalu ngayunya wankarunkunytjaku?"

³¹ Ka pula wangkangu, "Mayatja Jesuku Christaku mulamulariwa, kanta Godalu wankarunkuku nyuntumpa walytja tjuta kulukulu."

³² Munu palulanguru Paulalu pula Tjukurpa Palya Jesunyatjara palula tjakultjunangi palumpa walytja tjutangka kulu.

³³ Ka wati panya paluru pulanya katira pika panya pungkunytjitja uwankara minangka paltjira kilinanu. Ka nyara palula malangka Paulalu pula palunya munu palumpa walytja uwankara kulu urungka baptise-katingu.

³⁴ Ka palulanguru wati panya tjaila kanyilpaingku pulanya altira katingu palumpa walikutu munu pulanya mai ungu ngalkuntjaku. Munuya paluru tjana uwankara pulkara alatjitu pukularingu Godaku mulamularingkunytjatjanu.

³⁵ Ka mungawinki tawunu nyara palumpa mayatja tjutangku tjaultji tjuta iyanu wati panya tjaila kanyilpaikutu, kaya wirkara palula wangkangu wati panya kutjara palya walatjunkunytjaku.

³⁶ Ka wati panya paluru kulira mulapatu Paulala pulala Tjaalatjala wangkangu, "Wati panya mayatja tjutangku nyupalinya wangkangu walatjunkunytjaku. Ka pula palyalta ara ngurakutu."

³⁷ Palu Paulalu wangkangu wati panya tjaultji tjutangka, "Ngali wati miriputju wiya, ka panya tjana ngalinya tjuta mirangka pungangi kuutpakutu katira ngurkantankunytja wiyangku, munu panyalinya tjailangka tjarpatjunu. Munuya kuwari mukuringanyi ngalinya kampangka pakaltjingara iyantjikitja. Palu wiya, panya ngalimpa mayatja Tjiitjanya nyara Rome-ala nyinapainya, kaya nyaaku mukuringanyi ngalinya kampangka iyantjikitja wati malikitja-palku? Wiya, utiya wati panya mayatja tjuta nyangakutu pitjama munuya paluru tjana ngalinya anangu tjutangka mirangka wangkara walatjunama."

* **16:27** Alatji wati palurunku iluntankunytjikitjangku tjula wakunu panya Rome-aku tjukurpa ngaranyi alatji nyuntumpa tjailanguru puritjina tjuta wirtjapakannyangka Rome-aku tjaultjingku nyuntunya iluntankuku. Ka pala palula-tawara wati paluru walytjangku iluntankunytjikitjangku kuliningi.

³⁸ Ka wati panya tjaultji tjuťangku ankula wati panya mayatja tjuťangka tjakultjunu Paulalu panya wangkanytja. Kaya Paulalu pula Tjiitjanya mayatjanmankunyangka kulira pulkara nguluringu.

³⁹ Kaya mulapatu paluru tjana pitjala palula pulala kunťaringkula wangkangu, "Kurangkula nyupalinya pungkula tjailangka tjarpatjunu." Munuya palunya pulanya tjailanguru pakaltjingara walatjunu munu pulala wangkangu, "Palya pula ara nganampa ngura wantikatira."

⁴⁰ Ka Paulanya pula Tjaalatjanya tjailanguru pakara Lityaku walikutu anu, munu pula wali nyara palula tjarpara anangu Jesuku walytja tjuťangka tjunguringu munu pula palunya tjananya wangkara kunpuningi Jesunya rawanku tungun-tunguntu wanantjaku. Munu pula nyara palulanguru anu.

17

Anangu Tjuťa Paulaku Pulampa Kuraringkunyťa Ngura Tjiťa-lanikala.

¹ Munu palulanguru Paulanya pula ngura Ampi-palitjala pulala Apalanyalawanu anu ngura ini Tjiťa-lanikalakutu. Ka ngura nyara palula Jew tjuťaku wali inmatja ngarangi.

² Ka Paulanya ankula tjarpangu wali panya palula Godanya walkuntjikitja. Panya paluru tjakanku alatji palyalpai ngura kutjupangka wirkara. Munu paluru wiki mankurpa nyinara tjuťu Saturday-ngka rawa anangi wali panya palulakutu anangu tjuťangka nyiringuru Godaku tjukurpa utira wangkanyťjikitja.

³ Munu wangkangi tjana nintiringkunyťjaku alatji, "Panya Godaku tjukurtu alatji wangkanyi Godalu panya kalkuntjanya ngula pitjala pikatjararingkula iluku, ka ilunyangka Godalu palunya wankara pakaltjingalku. Kana kuwari nyurala tjakultjunanyi panya Godalu kalkuntjanya mungatu pitjangu ini panya Jesunya nganananya wankarunkunyťjikitja."

⁴ Kaya Jew kutjupa tjarangku tjukurpa nyanga palunya kulintjatjanu mulamularingu munuya Paulala pulala Tjaalatjala tjunguringu. Kaya wangka Kuriki wangkapai tjuťa kulu kulira mulamularingu, panya paluru tjanaya nganmanypa Godanya walkulpai nyinangi munuya Paulalu tjukurpa Jesunyatjara wangkanyangka kulira Jesuku mulamularingu. Kaya minyma kuranyitja tjuťa kulu mulamularingu.

⁵ Palu wati Jew kutjupa tjuťaya tjukurpa kulintjatjanu mulamularingkuwiyanku wantingi munuya nyararingangi Paulaku pulampa. Munuya palulanguru wati kura iwarangka para-ngarapai tjuťa altira utuluńu munu tjanala wangkangu, "Araya munuya anangu kutjupa tjuťa nyakula para-altira tjungura tjuťa ngalya-kati Paulaku tjanampa pikaringkunyťjaku." Kaya mulapatu anu munuya tjuťa altira utulura pika pitjangu wati ini Jasonku walikutu Paulanya pulanya Tjaalatjanya ngurintjikitja.

⁶ Munuya puťu ngurintjatjanungku Jasonnga tjananya Jesuku walyťa kutjupa tjuťa kulu witira itarikatingu walinguru munuya tjananya katingu tawunu nyara palumpa mayatja tjuťakutu munuya mirara wangkangi, "Kulilaya! Paulalu pula Tjaalatjalu kunyu anangu

ngura winkitja kuraningi munu pula kuwari pitjangu nganampa ngura ngapartji kurantjikitja.

⁷ Ka wati nyanga Jasontu palunya pulanya mantjira palumpa walingka kanyiningi. Munuya paluru tjana uwankarangku tjunguringkula mayatja Tjijtjalu panya wangkanytjtjangka tungunpungkula alatji wangkapai, 'Mayatja pulka kutjupa nyinanyi ini Jesunya.' "

⁸ Kaya anangu tjutangku munu tawunu nyara palumpa mayatja tjutangku kulu alatji wangkanyangka kulira pulkara alatjitu palumpa tjanampa mirpanaringu Jesuku panya walytja tjutaku.

⁹ Kaya mayatja tjutangku Jasonnga tjananya wangkangu alatji, "Nyura nganana maningka payamilannyangka kutjula nyuranya walatjunkuku. Walangkulanya uwa!" Kaya mulapatu paluru tjana payamilaṅu, ka tjananya walatjunu.

Ngura Pariyanya Ngurara Tjuta Jesuku Mulamularingkunyta.

¹⁰ Ka munga nyara palulatu Jesuku panya walytja tjutangku Paulanya pulanya Tjaalatjanya tjakurira ma-iyanu ka pula wilurara anu ngura ini Pariyalakutu. Munu pula ngura nyara palula wirkara Jew tjutaku wali inmatjakutu anu munu tjanala tjunguringu.

¹¹ Kaya ngura nyara palunya ngurara tjuta anangu wiru tjuta nyinangi panya Tjitja-lanikala nyinanytja tjuta purunypa wiya. Panya paluru tjanaya pukultu alatjitu tjukurpa wangkanyangka wanganarangku kulinigi. Munuya tjiṅtu kutjupa tjiṅtu kutjupa nyiri Godaku tjukurpa alara tjukurpa Paulalu wangkanytjtja nguriningi paluru tjakaruru wangkanyangka ngurkantankunyjtjikitjangku munuya kulinigi, "Mulapa nyanganku tjakarurungku tjakultjunanyi nyanga nyiringuru alatjitu."

¹² Kaya tjuta mulapa nyara palulangu Jesuku mulamularingu, Jew tjuta munu Jew wiya tjuta panya minyma Kuriki kuranyitja tjuta munu wati Kuriki tjuta kulu.

¹³ Kaya ngura panya Tjitja-lanikalanguru wati panya Jew tjutangku kulinigi, "Ai! Paulalu pula kunyu ngura nyara Pariyala Godaku tjukurpa tjakultjunanyi piruku anangu tjutangka." Munuya kulintjatjanu pitjangu Pariyalakutu, munuya panya palu purunypatu anangu panya nguratja tjuta wangkara wituwituningi, tjana tjunguringkula Paulaku tjanampa pikaringkunyjtjaku. Kaya mulapatu anangu tjuta utulu kutjuringkula tjutaringu, munuya Paulaku tjanampa mirpanarira pikaringangi.

¹⁴ Kaya Pariyanya ngurara tjuta Jesuku walytjaringkunyjtjanungku Paulanya tjananya palumpa malpa tjuta kulu mapalku witura iyanu uru pulkakutu, warpungkula pautangka tatira ankunyjtjaku. Palu Tjaalatjanya pula Timitjinya ngura panya palulatu nyinangi, Paulala tjungu ankunyjtja wiya.

¹⁵ Ka Paulaku malpa tjutangku palunya katingu ulparirakutu ngura ini Atjantjalakutu. Munuya ngura nyara palula wirkara Paulalu palunya tjananya wangkara wituṅu alatji, "Malaku ankulampaya Timitjinya pulanya Tjaalatjanya witula ngayulakutu warpungkula pitjanyjtjaku." Kaya mulapatu malaku anu wati panya Paulaku malpa tjuta.

Paulanya Ngura Atjantjala Nyinanytja.

16 Ka Paulanya ngura nyara Atjantjala Timitjiku pulampa Tjaalatjaku paṭara nyinangi munu paluru para-ngarala nyangangi god ngalyapa-ngalyapa watingku palyantja tjuṭa ngarala waninyangka munu paluru pulkara alatjitu tjituru-tjitururingu.

17 Munu paluru anu Jew tjtaku wali inmatjakutu munu tjanala tjunguringu anangu Kuriki panya Godanya walkulpai tjuṭangka kulu munu paluru Tjukurpa Palya Jesunyatjara tjanala tjakultjunangi kaya ngaparku wangkara kuliningi. Ka paluru tjintu kutjupa tjintu kutjupa ankupai anangu panya tjuṭangu tjunguringkula tjalamilalpaikutu munu nyara palula ngarala anangu tjuṭangka palu purunypatu wangkapai.

18 Kaya wati kutjupa tjuṭa ngura nyara palula nyinangi wati ini Ipi-kuratjanya kulilpai tjuṭa panya tjana tjakanku palumpa ara kulira palunya mirawanipai. Kaya palu purunypatu wati ini Tjiinanya kulilpai tjuṭangu palunya ngapartji mirawanipai. Munuya wati nyanga paluru tjana Paulalu wangkanyangka kulin-tjatjanu palumpa pikaringangi munuya alatji wangkangi, "Nyaa nyanganku wangkanyi, wati nyanga ngunti nintingku-palku wangka-paingku?" Palu Paulalu tjakultjunangi alatjitu tjukurpa Jesunyatjara paluru ilunytjatjanu wankaringkula pakantja. Kaya kutjupa tjuṭangu wangkangi, "Palurulanya tjinguru wituwituni god kutjupa walkuntjaku ngura kutjupitja nganampa wantira."

19 Munuya paluru tjana Paulanya katingu puli panya ini Ari-yapakalakutu. Panya puli nyara palulaya anangu nintipuka tjuṭa tjunguringkupai tjukurpa tjuṭa wangkara kulintjikitja. Munuya puli nyara palula wirkara Paulala wangkangu, "Nganana mukuringanyi tjukurpa panya nyuntu kuwari wangkanytja nganana uwankarangka utira wangkanytjaku. Tjukurpa nyaan panyatja wangkangi?"

20 Panya tjukurpa nyuntu wangkanytjanya nganana kuwari kutju kulinu munula puṭu nguwanpa nintiringanyi. Wanyu nganana utinma nganana kulira nintiringkunyitjaku."

21 (Atjantjala panya nyinanytja tjuṭaya rawa mukuringkupai tjukurpa kuwaritja tjuṭa nyinara wangkara kulintjikitja, kaya malikitja tjuṭa pitjapai ngura kutjupa tjuṭanguru munuya tjanala tjunguringkula tjukurpa palunya tjananya wangkara kulilpai.)

22 Ka puli nyara Ari-yapakala anangu tjuṭa tjunguringkunyangka Paulanya pakanu tjanala wangkanytjikitja munu wangkangu, "Wati Atjantjanya ngurara tjuṭa! Ngayulu nyuranya nyakula kuwari kuliningi, 'Nyanga tjana mulapa kutjupa kutjupa walkuntjikitja mukuringanyi alatjitu.'

23 Panya ngayulu nyurampa nyanga tawunungka para-ngarala nyangangi kutjupa kutjupa nyura panya walkuntja tjuṭa ngarala waninyangka tjuwa tjuṭangka munu urilta kulu. Mununa pitjilpa kulu nyangu, ka nyara palula walka ngarangi alatji, 'God nganana ngurpatja walkuntjaku.' Mununa palunya nyakula ngayulu kuliningi, 'Mulapaya nyangantu palunya ngurpangku pupakatira walkulpai.' Kana ngayulu kuwari God pala palunya nyurala tjakultjungkunyitjikitja mukuringanyi.

24 "Panya God nyanga paluru manta winki munu mantangka nyinanytja uwankara kulu palunu. Munu paluru uwankaraku Mayatja pulka nyinanyi mantaku ilkariku kulu. Munu paluru

wali anangungku marangku palyantjitjangka nyinapai wiya timpula mantatjangka.

²⁵ Paluru nyinara patalpai wiya anangu tjutangku palunya alpamilantjaku, panya paluru alatjitu anangu uwankara ngaalya ungupai wanka nyinanytjaku munu kutjupa kutjupa uwankara kulu anangu tjutaku palyalpai.

²⁶ God nyanga paluru panya wati kutju kuranyitja kuwaripatjara palyanu, munu wati kutju nyara palulanguru anangu tjutaringkunyitjaku palunu manta winkingka tjiwariwari nyinanytjaku. Wangka kutjupa kutjupa miri kutjupa kutjupa paluru palyanu. Munu paluru alatjitu nganmanytju ngurkantanu anangu uwankara miri kutjupa kutjupa manta walytjangka walytjangka nyinanytjaku munu paluru ngurkantanu kuli yaaltjitu-ara mantangka nyanga paluru tjana nyinanytjaku.

²⁷ Panya nyanganpa uwankara Godalu kulira palyanu tjana ngapartji mukuringkula palunya tjukarurungku ngurkantara walkuntjaku. Panya paluru parari wiya nganana ala alatjitu titutjara ila ngaranyi.

²⁸ Panya kutjupangku iriti nyiringka walkatjunkunyitja alatji ngaranyi,

‘Nyara paluru nganannya palyara witulyankunyangka kutju nganana wanka nyinanyi munu para-ngaranyi.’

Ka panya nyurampa wangkatjara tjutangku kulu alatji walkatjunu,

‘Panya nganana uwankara palumpa tjitji tjuta.’

²⁹ “Uwa, mulapa anangu uwankara manta winkingka Godalanguru nyinanyi Godalu palyantja. Ka nyara palulangurula uti ngunti kulilwiyangku wantima, panya Godanya wati nintipukangku goldnguru tjilpanguru apunguru palyantja wiyatu, Godanya alatjitu.

³⁰ Panya kuwaripatjaranguru anangu tjuta Godaku ngurpa nyinangi palunya kulilwiya alatjitu, ka Godalu tjananya ngurkantara pungkunyitja wiyangku wantingi. Palu kuwari nyanga Godalu anangu uwankara wangkara wituwituni kura wantira piwiyaringkula kampa kutjuparinytjaku.

³¹ Panya paluru tjinu kutju ngurkantanu munu wati kutju ngurkantara tjunu tjinu pala palula anangu uwankara tjukarurungku ngurkantara tjarantjaku. Munu paluru wati nyanga palunya ilunyangka pakaltjinganu anangu tjutangku kulintjaku, ‘Munta-uwa! Wati nyanga paluru waintaringu anangu uwankara ngurkantara tjarantjikitja.’ ”

³² Kaya Paulalu tjukurpa nyanga anangu ilunytjitja pakantja wangkanyangka kutjupa tjutangku kulira palunya wiyamanangi. Kaya kutjupa tjarangku wangkangi, “Uwa palya! Nganana piruku ngula kulintjikitja mukuringanyi tjukurpa nyanga nyuntu kuwari wangkanytja.”

³³ Ka nyara palulanguru Paulalu tjukurpa tjanala wangkara wiyaringkula tjananya wantikatira anu.

³⁴ Kaya anangu kutjupatjara mulamularingu tjukurpa wangkanyangka kulintjatjanu munuya palula junguringu. Ka wati ini Tayani-tjiyatjanya kulu Jesuku mulamularingu munu minyama ini Tamaritjanya munu kutjupa tjuta kulukulu mulamularingu munuya

anangu nyanga paluru tjana Paulala tjunguringu. Palu wati nyanga Tayani-tjiyatjanya wati nintipuka nyinangi munu panya puli nyara Ari-yapakala mitingi ngaranyangka paluru tjanala tjunguringkula wangkara kulilpai.

18

Paulanya Karintjala Nyinanytja

¹ Ka nyara palulanguru Paulanya Atjantjalanguru wilurara anu ngura Karintjalakutu.

² Ka ngura nyara palula wati ini Akuwilanya pula kurirara nyinangi Puritjilanya, panya Akuwilanya wati Jew manta Pantatjanya ngurara, palu paluru pula ngura panya Rome-ala ankula nyinangi manta Italila. Ka ngula mayatja pulka ini Kulutiyatjalu anangu Jew uwankara paira iyanu ngura nyara Rome-languru, ka pula pitjala ngura pala palulalta nyinangi ngura panya Karintjala. Ka Paulanya wirkanu ngura pala palula munu pulanya ngura pala palula nyangu.

³ Munu palula pulala tjunguringkula nyinara warkaringi, panya paluru pula kulu Paulalu purunytju tiinta wakara palyalpai.

⁴ Ka Paulanya tjintu Saturday kutjupa Saturday kutjupa rawa ankupai Jew tjutaku wali inmatjakutu tjunguringkunyitjikitja munu paluru anangu Jew tjutangka munu Jew wiya tjutangka kulu Godaku tjukurpa wangkangi tjana tjukurpa kulira kampa kutjuparira Jesuku mulamularingkunyitjaku.

⁵ Ka nyara palula-arangka Tjaalatjanya pula Timitjinya wirkanu manta nyara Matja-tuniyalanguru. Ka paluru pula wirkankunyangka, Paulalu tjintu uwankarangka tjukurpa Jesunyatjara rawangku wangkangi anangu Jew tjutangka, munu paluru alatji wangkangu, "Panya Godalu kalkuntjitjanya pitjangu anangu tjuta wankarunkunyitjikitja. Nyanga paluru ini Jesunya."

⁶ Ka paluru alatji wangkanyangkaya Jew tjutanku kulira tungpungkula palunya warkingi. Ka Paulalu Jew tjutanku palunya alatjingannyangka palumpa mantaranguru ulpuru patapatara tjanala wangkangu, "Ngulaya ngayunya ngukalwiyangku wantima nyuranya Godalu paira iyannyangka. Panya nyura kulilwiyangku wantingi ngayulu wangkanyangka. Kana kuwari nyuranya wantikatira ananyi anangu Jew wiya tjutakutu tjukurpa Jesunyatjara tjanala wangkanyitjikitja." Alatji Paulalu tjanala utingku wangkangi.

⁷ Munu palulanguru paluru wali inmatjanguru pakara ilatu wati-tjarpangu, wati ini Titiyatja Tjatjaku walingka, panya wati nyara paluru Godanya walkulpai nyinangi, munu paluru Jew tjutaku wali inmatjangka itingka nyinangi. Ka Paulanya palulakutu anu, munu paluru nyinangi wati panya palumpa walingka.

⁸ Ka wati ini Kuritjipanya wali inmatjaku mayatja nyinangi munu paluru tjukurpa Paulalu wangkanyangka kulira Mayatja Jesuku mulamularingu. Kaya palumpa walytja tjuta kulu tjunguringkula Jesuku mulamularingu. Kaya anangu kutjupa tjutanku kulu tjukurpa Jesunyatjara kulintjatjanu palumpa mulamularingu, ka tjananya urungka baptise-katingu.

⁹ Ka munga kutjupa paluru ngurangka ngarinyangka Mayatja Jesulu Paulala utiringkula wangkangu alatji, “Nguluringkula wantinytja wiyangku rawangkuṭu tjukurpa wangkama.

¹⁰ Panya ngayulu nyuntula tjungu titutjara nyinanyi munuṇa nyuntunya aṭunymananyi, ka aṇangu kutjupangku nyuntunya puṭu pikaringkula pungkuku, panya ngura nyanga palulaya aṇangu tjuta nyinanyi ngayuku walytja tjuta.”

¹¹ Ka Paulanya mulapaṭu palula kulintjatjanu raparingu munu pira 18 ngura pala palula nyinangi munu aṇangu tjuṅangka Godaku tjukurpa rawangku alatjitu wangkara tjanala nintiningi.

¹² Ka wati ini Kaliyanya manta ini Akayaku mayatjarinyangka Jew tjuta Paulaku pulkara mirpanaringu munuya palunya witiṛa katingu kuutpakutu mayatja panya Kaliyalu kura ngurkantankunytjaku.

¹³ Munuya palula wangkangu, “Wati nyanganku tjukurpa kutjupawanungku aṇangu tjuta wituwituṇi Godanya walḱuntjaku Moseku ara wantira.”

¹⁴⁻¹⁵ Ka Paulanya ritiringangi wangkanytjikitja ka mayatja panya Kaliyalu wangkangu, “Wati Jew tjuta, kulilaya! Ngayulu tjukurpa nyanga palu purunypa kulintjikitja mukuringkunytja wiya. Tjinguru wati nyanga paluru aṇangu kutjupa iluntankunyangka munta tjin-guru walytjatjara kutitjungkunyangka kutjuṇa palunya kura kulira ngurkantankuku. Palu nyura wati nyanga palunya kura palu purunypa palyannyangka nyakunytja wiyatu munu nyura ngunti ngalya-katingu palunya nyurampa tjukurnguru miilarara. Paluru tjukurpa ara tjuta wangkanyangka kutju nyura palumpa mirpanarinysi nyurampa tjukurpa wangkanytja-tjiratja, kayanku nyuranku ngurkantara! Ngayulu nyanganpa wantinyi ngurkantankuwiyangku.”

¹⁶ Munu tjananya paira iyaṇu kuutpanguru urilkutu ankunytjaku.

¹⁷ Kaya ma-pakara urilta nyangu wati ini Tjatjanitjanya panya paluru wali inmatjaku mayatja nyinangi. Kaya palunya witiṛa pulkara alatjitu pungangi wali panya kuutpa wangkapaingka urilta, ka mayatja Kaliyalu nyakula alatjitu wantingi pailwiyangku.

Paulanya Antiyakalakutu Malaku Ankunytja.

¹⁸ Ka Paulanya ngura panya Karintjala rawa nyinangi Jesuku walytja tjuṅangka. Munu palulanguru paluru tjananya wangkara wantikatira anu ngura Tjintjuriyalakutu, ka Akuwilanya pula Puritjilanya kuḷu palula tjungu anu. Ka ngura nyara Tjintjuriyala Paulalu kutjupa kutjupa palyantjikitjangku kalkuṇu Godala mununku mangka winki kataṛa wiyanu, panya tjakangkuya alatji palyalpai Godala wangkara kalkuntjatjanungku. Ka palulanguru paluru tjana pautangka tatira anu kakarara manta Tjiriyaku.

¹⁹ Munuya ngura ngururitjangka wirkanu ngura ini Ipitjala munuya pautanguru ukalingu. Ka Paulanya anu Jew tjuṭaku wali inmatjakutu munu Jew tjuṅangka tjunguringkula tjukurpa Jesunyatjara tjanala wangkangi tjana kulira Jesuku mulamularingkunytjaku.

²⁰ Kaya paluru tjana palunya markuningi tjanala rawa nyinanytjaku, palu paluru wantingu.

²¹ Munu ankunytjikitjangku paluru tjananya wangkangu, “Ngula Godalu ngayunya witunnyangkampaṇa tjinguru nyuralakutu malaku pitjaku.”

22 Munu paluru Akuwilanya pulanya Puritjilanya nyara palula wantikatira pautangka piruku tatira anu kakarara ulparira ngura nyara Tjiitjarialakutu.

Munu paluru uru pulkangka rawa ankula ankula wirkanu Tjiitjariyala manta panya Israelta, munu nyara palula pautanguru ukalingkula tjina anu Jerusalemalakutu. Munu ngura nyara palula paluru Jesuku walytja tjuta nyakula wangkara pukulmanangi. Munu palulanguru mapalku anu alinytjara ngura Antiyakalakutu.

23 Munu wirkara ngura nyara palula tjukutjuku rawa nguwanpa nyinara piruku anu manta Kalaitjiyala pulala Purikiyalakutu. Munu paluru ngura tjutangka anangu panya Jesuku nganmanypa walytjar-ingkunyitja tjuta para-nyangangi, munu tjananya tjukurpa wangkara kunpuningi Jesunya rawangku tungun-tunguntu wanantjaku.

Apalatjanya Ngura Ipitjala Nyinanytja.

24 Ka wati Jew kutjupa ini Apalatjanya nyinangi Godaku tjukurku ninti pulka. Panya wati nyanga paluru ngura Alika-tjantu-riyala iti ngingu manta panya Itjipala munu paluru Ipitjalakutu pitjangu nyinanytjikitja.

25 Ka kutjupangu palunya nintinu Mayatja Jesulawanu nyinanytjaku, ka paluru tjukurpa Jesunyatjara kurunpa winkingku pukultu wangkapai tjukarurungku alatjitu. Palu baptise-katinytja nganmanyitja kutju kulilpai, panya John Baptistalu kuranguru kuntaringkunyangka kutju baptise-katipai - pala palumpa kutju paluru ninti.

26 Munu ngura nyara Ipitjala wati panya paluru Jew tjutaku wali inmatjangka tjarpara tjanala rapangu alatjitu tjukurpa wangkangi. Ka Akuwilalu pula Puritjilalu kulinu paluru tjukurpa wangkanyangka munu pula wangkanyangka malangka palunya altira katingu pulampa walikutu munu pula palula utira tjakultjunangi tjukurpa Jesunyatjara paluru kulira pulkara nintiringkula uwankara tjukarurungku kulintjaku.

27 Ka nyara palulanguru Apalatjanya mukuringu manta nyara Akayalakutu ankunytjikitja. Kaya Jesuku walytja tjutangu kulira pukularingu, munuya lita palunyatjara walkatjura unkul'iyanu, Jesuku walytja kutjupa tjutangu ngura nyara palula wirkankunyangka nyakula, wati panya palunya patara pukultu mantjintjaku. Ka mulapatu Apalatjanya ngura nyara palulakutu pautangka tatira anu, munu wirkara paluru anangu Jesuku nganmanypa walytjar-ingkunyitja tjutangka Jesuku tjukurpa wangkangi, palunya tjananya kunpuntjikitjangku, panya paluru tjana nganmanypa mulamularingu Godalu tjananya pukultjungku kurunpa pampunyangka.

28 Munu paluru Jew tjutangka tjukurpa Jesunyatjara wangkangi, kaya putu nguwanpa mulamularingangi munuya Apalatjala ngaparku wangkangi. Ka paluru Godaku tjukurnguru tjanala utira wangkangi alatji, "Panya Godalu kalkuntjitjanya pitjangu anangu tjuta wankarunkunytjikitja. Nyanga paluru ini Jesunya." Kaya anangu tjutangu paluru utingku wangkanyangka kulinungi, "Munta-uwa, mulapa Jesunya nganampa kalkuntjitja wirkanu Godalu iyantja."

19

Paulanya Ipitjala Nyinanytja

¹ Ka wati panya Apalatjanya ngura Karintjala nyinanyangka Paulanya anu ngura nyara Ipitjalakutu munu wirkara ngura nyara palula nyangu Jesuku walytja tjuṭa wati 12 munu minyma tjuṭa kuḷu munu paluru tjanala tjapinu,

² “Nyura wanyu Kurunpa Milmilnga mantjinu Jesuku walytjar-inkunyjtjanungku?”

Kaya wangkangu, “Wiya, nganana Kurunpa Milmilnga kulintja wiyatu. Wiyangka-palkula watarku nyinangi.”

³ Ka Paulalu tjanala wangkangu, “Palu kutjupangku nyuranya wanyu nyaa wangkara urungka tjarpatjura baptise-katingu?”

Kaya wangkangu, “Panya John Baptistalu nganmanytju tjukurpa wangkara anangu tjuṭa baptise-katingi, nyara palu purunytjuṭu kutjupangku nganannya baptise-katingi tjukurpa panya palunyatju wangkara.”

⁴ Ka Paulalu wangkangu, “Uwa, Johntu tjananya baptise-katingi tjana kuranguru kuntaringkula Godalakutu malaku aruringkuyangka kutju. Palu paluru kutjupa kuḷu tjanala tjakultjunu alatji, ‘Ngayula malangka wati kutjupa pitjanyi, ka nyura uti nyara palumpa mulamularingama.’ Alatji Johntu wangkangu. Ka wati nyara paluru panya Jesunya.”

⁵ Kaya Paulalu alatji wangkanyangka kulira mulamularingu, ka tjananya urungka baptise-katingu ini Mayatja Jesula.

⁶⁻⁷ Munu palulanguru Paulalu tjanala katangka mara tjunkula Godala tjapinu, ka Kurunpa Milmilnga tjanala unngu tjarpangu, kaya wangka kutjuparira wangka kutjupa kutjupa wangkangi munuya tjukurpa Godalanguru kulintjatjanungku kuḷu nintingku utira tjakultjunangi wati panya 12-ngku.

⁸ Ka Paulanya ngura nyara palula pira mankurpa nyinangi, munu paluru rawa ankupai Jew tjuṭaku wali inmatjakutu, munu paluru rapangku alatjitu Tjukurpa Palya Godaku tjakultjunkturpai anangu Jew tjuṭangka, paluru tjana kulira Jesuku walytjaringkunytjaku.

⁹ Kaya anangu tjara mulamularingu, palu tjara kutjupangkuya kulira alatjitu wantingu mulamularingkunyitja wiyangku munuya anangu tjuṭangka mirangka tungunpungkula Mayatja Jesuku tjukurpa tjanala tjakultjunkturanyangka tjananya wiyamanangi. Ka Paulalu tjananya wantikatira Jesuku panya walytjaringkunytja tjuṭa katingu munuya ankula kuulangka tjarpangu panya kuula nyara palula wati ini Taranatjalu nintilpai. Ka nyara palulalta Paulalu Godaku tjukurpa tjanala tjakultjunangi tjintu kutjupa tjintu kutjupa.

¹⁰ Munu paluru kuli kutjara ngura nyara Ipitjala nyinara wali pulka nyara palula anangu tjuṭangka Godaku tjukurpa rawangku utira wangkangi. Kaya Jew tjuṭangku, munu Jew wiya tjuṭangku kuḷu, manta Aitjala nyinanytja uwankarangku kulinu Mayatja Jesuku tjukurpa Paulalu wangkanytja.

Kiipaku Katja Tjuṭa

¹¹ Ka Godalu Paulalawanungku kutjupa kutjupa pulka tjuṭa witulyangku palyanangi.

12 Panya anangu tjutangku angkitji munu mantara kutjupa tjuta kulu Paulalu pampuntjitja pikatjara tjutakutu katingi, kaya mantara pampura pika wiyaringkula uwankara palyaringangi, kaya palu purunypatu mamutjara tjuta kulu palyaringangi mamungku tjananya wantikatinyangka.

13 Palu wati Jew kutjupa tjutangku ngura tjutangka para-pitjalira mamu tjuta anangu tjutanguru pakaltjingalpai ngangkaru purunytju. Munuya paluru tjana Paulalu mamu tjuta painnyangka kulintjatjanungku palu purunypatu Jesuku ini wangkara arkara mamu anangu tjutanguru painingi alatji wangkara, "Ngalya-pakala! Nganana Jesunya ini wangkara nyuntunya paini panya nganana Paulalu alatji wangkanyangka kulinu munula palu purunytjutu paini."

14 Panya wati 7-tuya nyanga alatjinganingi wati panya Kiipaku katja tjutangku. Kiipanya panya wati tjukurtjara kuranyitja.

15 Ka kunyu mamungku paluru tjana painnyangka kulira ngapartji alatji tjanala wangkangu, "Ngayulu ninti Jesuku pulampa Paulaku, palu nyura wanyu yaalitja tjuta?"

16 Ka wati panya mamutjara paluru tjanalakutu ngalya-wararakatingu munu tjananya kunpu pulkaringkula pulkara alatjitu pungkula pungkula tjanampa mantara kulu katantara minyaminyanu, kaya wati panya Kiipaku katja tjuta mantara katalytjara walinguru pakara wirtjapakanu pika tjutatjara.

17 Kaya ngura nyara Ipitjala nyinanytja tjutangku nyangatja kulira pulkara alatjitu nguluringu Jew tjuta munu Jew wiya tjuta kulu. Munuya palulangurulta Mayatja Jesunya pulkara walkuningi.

18 Munuya anangu tjutangku Jesuku mulamularingkunytjatjanungku tjutangka mirangka pakara tjananku tjakultjunangi panya paluru tjana kulu kura kutjupa kutjupa tjuta palyantjatjanungku.

19 Ka panya Jesuku walytja kutjupa tjarangku nganmanytju mamungku witulyankunyangka anangu tjuta initjunkupai. Panya paluru tjana nyiri rulamapi tjuta kanyiningi tjukurpa initjunkupaitjara. Munuya nyiri palunya tjananya uwankara ngalya-katira utulunu urilta warungka kutjantjikitjangku. Panya nyanga alatjiya palyaningi piruku initjunksunytja wiyangku wantinytjikitjangku. Munuya nyiri uwankara utulura kantamilara mani nampa nyakula wangkangu, "Nyangatja mani pulkangka payamilantja, mani panya \$50,000-ta." Munuya paluru tjana anangu tjutangka mirangka tilinu ka waru pulkangka kampara wiyaringu.

20 Ka nyara palulanguru Mayatja Jesuku tjukurpa ngura uwankarangka lipiringu alatjitu, panya anangu ngura winkitjangkuya kulinu munuya tjuta mulapa Jesuku walytjaringu.

21 Ka nyanganpa alatjirinyangka Paulalu kuliningi Jerusalemalakutu ankunytjikitjangku manta ini Matja-tuniyala pulala Akayalawanu. Munu paluru malpa tjutangka alatji wangkangu, "Ngayulu Jerusalemalakutu ankula nyara palulanguru ankuku ngura Rome-lakutu Jesuku walytja tjuta nyakunytjikitja."

22 Munu paluru wati kutjara wilurara iyanu Timitjinya pulanya Iratjatjanya manta nyara Matja-tuniyalakutu, panya wati nyanga paluru pula palunya wirura alpamilalpai. Ka Paulanya piruku unytju nyinangu ngura pala Ipitjala.

Ipitjala Anangu Tjuta Pikaringkunyitja

²³ Kaya nyara palula-arangka anangu tjuta ngura panya Ipitjala pulkara alatjitu pikaringangi Jesuku walytja tjutaku tjana Jesuku ara wanannyangka.

²⁴ Ka ngura nyara palula palumpa tjanampa timpula pulka ngarangi, ka palula unngu apu pulka ngarangi ini Atimatjanya anangu tjutanku pitjala pupakatira palunya walkuntjaku. Ka wati kutjupa nyinangi ini Tumitu-ritjanya, munu paluru timpula nyara pulka purunypa timpula kuluny-kulunypa tjuta tjiilpanguru palyalpai. Kaya wati kutjupa tjuta kulu palula tjungu warakarira timpula kulunypa tjutatu palyalpai. Kaya anangu tjutanku tjana palyantja tjuta payamilara wali walytjangka walytjangka katira unngu tjunkupai palunya tjananya pupakatira walkuntjikitjanku. Kaya Tumitu-ritjalu tjana tjanalanguru mani pulka mantjilpai.

²⁵ Munu paluru tjinu kutjupa palumpa wara tjuta altingu munu wati panya tjiilpanguru palyalpai kutjupa tjuta kulu altira tjungunu. Munu tjanala wangkangu, "Kulilaya! Nyura panya ninti nganana panya wara nyanganguru mani pulka mantjilpai.

²⁶ Palu kuwari nyanga Paulalu pitjala anangu tjutangka tjakultjura kuranu alatji wangkara, 'Nyanganpa panya watingku palyantja god ngalya-ngalya mulamula wiya.' Alatji wangkara paluru anangu ngura winkitja kuranu ngura nyanga Ipitjala nyinanytja tjuta kutju wiya, palu ala lipitja manta Aitjala nyinanytja tjuta kulukulu. Kaya alatji wangkanyangka kulintjatjanungku kuwari Tayananya walkulwiyangku wantingi. Ka nyura nyakunytjatjanungku nintingku kulini.

²⁷ Ka tjinguru kuwari anangu tjutanku nganana nyanga palyantja tjuta wantiku payamilantja wiyangku, kala palulanguru mani puu palyalku, munula yaaltjiriku mani nganampa wiyaringkunyangka? Panya manta winkitjankuya Tayananya mirawanira walkulpai god pulka kulira. Kaya kuwari palunya uwankarangku anara wantiku Paulalu wangkanyangka kulintjatjanungku. Kala nyaalku paluru tjana Tayananya wantinytjaku-tawara munu timpulakutu kulu pitjawiyangku wantinytjaku-tawara?"

²⁸ Kaya wati panya tjiilpanguru palyalpai tjutanku paluru wituwitura wangkanyangka kulira pulkara mirpanaringu munuya pulkara alatjitu mirara wangkangi, "Tayananya kutju witulya pulka mulapa nganampa nyinanyi ngura nyanga Ipitjanya ngurara tjutaku!"

²⁹ Kaya nyara palulanguru Ipitjanya ngurara uwankara pulkara alatjitu pikaringangi munuya wati kutjara witinu ini Kayatjanya pulanya Ari-tjakatjanya, panya wati nyanga paluru pula Paulala tjungu pitjangu ngura panya Matja-tuniyalanguru. Kaya palulanguru pulanya witera wala pulkangku katingu wali panya anangu tjuta tjunguringkupaikutu tawunungka panya ngururpa.

³⁰ Ka Paulanya mukuringangi anangu panya palula tjanala ankula wangkanytjikitja, palu Jesuku walytja kutjupa tjutankuya palunya markuningi.

³¹ Kaya mayatja kutjupa tjuta palumpa malpa tjuta nyinangi ngura nyara palunya ngurara tjuta munuya paluru tjana anangu kutjupa

witura iyanu ankula Paulanya wangkara ngulutjungkunyjtaku wali panya palulakutu ankunyjtaku-tawara.

³² Kaya wali nyara palula anangu tjtangku puṭu kulira mirara wangkara waningi. Tjarangku tjarangkuya wangkangi ara kutjupa kutjupa, munuya puṭu tjukarurungku kulira alatji wangkangi, “Nyaakula nyangatja junguringu winki mulapa?”

³³ Kaya anangu Jew tjtangku wati kutjupa ini Alika-tjantanya wangkara wituwitunu kuranyunguru ngarala anangu tjtangka wangkanyjtaku. Ka paluru mulapa manyirka katuringu tjanala wangkanytjikitja.

³⁴ Palu tjana nintingku palunya ngurkantanu paluru kulu panya wati Jew. Kaya nyakula wantira rawangku alatjitu pulkara mirara wangkangi tjungungku, “Tayananya kutju witulya pulka mulapa nganampa nyinanyi ngura nyanga Ipitjanya ngurara tjtaku!”

³⁵ Ka paluru tjana rawatu miranyangka wati ngura nyara palumpa mayatja pulkangku tjananya paira pilunmanu munu wangkangu, “Ipitjanya ngurara tjuta kulilaya! Manta winkingkaya anangu winki ninti alatjitu nyinanyi panya Tayananya god witulya pulka nyinanyi ngura nyanga Ipitjala. Panya paluru ilkarunguru punkanu ngura nyangangka ka panyala palunya munu palumpa timpula pulka atunymankupai.

³⁶ Ka kutjupangku ara nyanga palunya puṭu wiyamananyi. Panya mulapa paluru nyangangka kuwari nyinanyi. Ka nyura uti palulanguru pilunarima munuya anangu kutjupa mapalku pikaringkula pungkula iluntankunyjtikitjangku kulintja wiyangku wantima.

³⁷ Palu nyaaku nyura wati nyanga palunya pulanya ngalya-katingu nyangakutu, panya paluru pula nganampa god Tayananya anara kuranmankunyjtja wiyatu, munu pula palumpa timpulanguru kutjupa kutitjungkunyjtja wiyatu.

³⁸ Palu uti Tumitu-ritjalu tjana wati nyanga pulanya wangkanytjikitja mukuringkulampa kuutpakutu katima, munu nyara palulalta wati mayatja tjtangka tjakultjunama palunya pulanya kura ngurkantankunyjtaku, ka paluru tjanalta purkarangku nyakula kulira ngurkantanama.

³⁹ Munu tjinguru nyura tjukurpa kutjupa utingku wangkanytjikitja mukuringkulampa nguraku mayatja tjtakutu kati paluru tjana tjunguringkula purkarangku wangkara kulintjaku.

⁴⁰ Panya nyura kuwari wiyanguru alatjitu pikaringkula mirara waningi. Kala nganana uwankarangku ngurpangku puṭu kulini. Ka tjinguru mayatja pulka Tjiitjalu nyara Rome-ala nyinapaingku nyangatja kulintjatjanungku ngayula tjapilku. Kana nyaa palula wangkaku? Wiya, ngayulu kulu puṭu kulilku palula utingku tjakultjungkunyjtikitjangku, panya nyura wiyanguru alatjitu ngunti pikaringkula mirara waningi.”

⁴¹ Munu wangkara wiyaringkula anangu uwankara witunu ngurakutu ankunyjtaku.

20

Paulanya Matja-tuniyala Pulala Kuritjalakutu Ankunyjtja

¹ Ka pika panya paluru wiyaringkunyaangka Paulalu altingu Jesuku walytja tjuta pitjala tjunguringkunyjtaku. Munu tjananya wangkara

kunpuningi Jesunya rawangku tungun-tunguntu wanantjaku munu wangkara wiyaringkula tjananya tjakurira wantikatira ma-pakanu alinytjara wilurara manta Matja-tuniyalakutu.

² Munu manta nyara palula wirkara, paluru ngura tjutangka para-pitjalira anangu panya Jesuku nganmanya walytjaringkunyitja tjuta, palu purunyitjutu nyakula wangkara kunpuningi. Munu palulanguru ngulalta ulparira ankula manta ini Kuritjala wirkanu.

³ Munu paluru ngura nyara palula pira mankurpa nyinangi. Munu paluru kulinu manta panya Tjiriyalakutu pautangka malaku ankunytjikitjangku. Palu Jew tjutangkuya kampangka wangkara kulinungi palunya iluntankunytjikitjangku. Ka paluru kulinu kutjupangku palula tjakultjunkunyangka munu palulanguru kulinu arawanutu malaku ankunytjikitjangku manta panya Matja-tuniyalawanu.

⁴ Kaya wati nyanganpa palula tjungu anu, wati ini Tjapatanya Pairatjaku katja ngura ini Pariyanya ngurara, munu wati Tjitjanikanya ngurara kutjara kulu ini Ari-tjakatjanya pula Tjikanatjatanya munu wati kutju Tuupilanguru ini Kaiyatjanya munu wati kutjara Aitjalanguru ini Titjikatjanya pula Turu-pimatjanya munu wati Timitjinyalta.

⁵ Nyanga paluru tjanaya kuranyu anu munuya nyinara nganampa pataningi ngura nyara Turuwatjala wirkara.*

⁶ Kala nganana ngura Pilipaila nyinangi Jewku panya inma ini Mai Piltjanya wiyaringkunyitjaku patara. Munula palulanguru pautangka tatira kakarara ma-pakanu Turuwatjalakutu munula tjinu 5-nguru ngura palula ma-wirkara panya tjanala tjunguringu, munula tjirirpi 7 nyinangi ngura nyara palula.

Wati Ini Yuti-katjanya Ilunyangka Wankara Pakaltjingantja Ngura Turuwatjala

⁷⁻⁸ Munula Saturday tjinu tjarpanyangka wali warangka tatira ruuma katutjanga inmaku tjunguringu mai kulu ngalkula Jesunya kulintjikitja. Ka Paulalu nyara palula tjukurpa wangkangi anangu tjutangka munu mungawinki ankunytjikitjangku paluru rawangku alatjitu tjanala tjukurpa jakultjunangi, ka munga kulturingu. Ka ruuma nyara katutja palula tili tjuta kampangi.

⁹ Ka wati kutjupangku ini Yuti-katjala winta alangka nyinara tjukurpa wangkanyangka kulira kulira nyuurukatingu munu kunkunpa pulkaringkula paluru katunguru alatjitu mantangka punkanu. Kaya anangu tjuta palunya mantjintjikitja wali katunguru warpungkula ukalingu, munuya wirkara palunya mantjira nyangu, "Ilunytjampal nyangatja!"

¹⁰ Palu Paulanya kulu katunguru ukalingu munu wati panya palula katuku watungarakatira palunya ampura tjanala wangkangu, "Tjituru-tjitururinytja wiyaya nyinama! Paluru ilunytja wiyatu. Wanka nyangatja."

¹¹ Munu palula malangka Paulanya tjana malaku tatinu ruuma panya palulakutu, munuya mai tjungungku ngalkunu. Munu palulanguru Paulalu piruku tjukurpa tjanala wangkangi rawangku alatjitu, ka tjinu ngalya-pakanu. Ka palulanguru Paulanya anu.

* **20:5** Verse 5 wangkanyi *nganana* panya nyanga palula-arangka wati panya Luke-anya Paulala piruku tjunguringu munu palula tjanala para-ngarangi.

¹² Kaya wati panya punkara ilunytjanya ngurakutu wanka katingu munuya uwankara pukulpa mulapa nyinangi.

Turuwatjalanguru Pautangka Ankunytja Ngura Malitatjalakutu

¹³ Ka Paulanya tjina anu ulparira ngura ini Aitjatjalakutu. Kala nganana pautangka tatira kuranyu anu munula wirkara palumpa pataningi ngura nyara palula. Panya Paulalu ngananyana nganmanytju wangkangu ngura nyara palula wirkara palunya patara mantjintjaku.

¹⁴ Munu paluru ngula wirkara nganana tjunguringu. Kala nyara palulanguru tjungu anu pautangka tatira ngura ini Mitilintakutu.

¹⁵ Munula palulanguru mungawinki pautangka piruku anu ulparira, munula ankula mungartjirira manta tjukutjukungka ini Kiyatjala wirkanu munula nyara palula ngaringi. Munula mungawinki piruku pautangka tatira ma-pakanu ulparira munula Ipitjala itiwanu ankula mungartji wirkanu manta tjukutjukungka ini Tjaimatjala. Munula nyara palulanguru mungawinki anu kakarara manta pulkakutu munula mungartjilta wirkanu ngura ini Malitatjala Ipitjalakutu ankunytja wiyatu, munula pautanguru ukalingu.

¹⁶ Tjingurula Ipitjalakutu anama palu Paulanya Jerusalemalakutu warpungkula ankunytjikitja mukuringangi, panya ngura nyara palula tjintu ilaringangi inma pulka Pintikatja ngaranytjaku. Ka nyara palulanguru paluru mukuringkunyitja wiya manta nyara Aitjala rawa nyinanytjikitja.

Paulalu Wati Ipitjanya Ngurara Atunymankupai Tjuta Tjakurinkunytja

¹⁷ Munu Paulalu ngura nyara Malitatjalanguru wangka iyanu ngura Ipitjalakutu alatji wangkara, "Jesuku walytjapiti atunymankupai tjuta! Uti nyura pitjala ngayula unytju tjunguringama ngura nyangangka."

¹⁸ Kaya anangu panya paluru tjana mulapatu pitjangu. Ka Paulalu tjanala wirkankunyangka wangkangi, "Kulilaya! Nyura panya uwankaraku ninti, panya ngayulu nyurala nganmanypa wirkanu ngura nyanga palula Aitjala, munu panya nyura ngayunya nyangangi ngayulu nyurala tjungu rawa nyinara warkarinyangka. ¹⁹⁻²⁰ Ka panyaniya Jew kutjupa tjarangu ngayunya anara kurara pungangi, ka ngayulu tjituru-tjitururira ulangi. Panya ngayulu purkaranytju alatjitu tjituru-tjituruwanu Mayatja Jesuku rawa warkaringi wantinytja wiya alatjitu. Ngayulu tjukurpa wangkangi urilta anangu tjutangka mununa nyurampa walingka unngu kulu wangkangi anangu mankurta. Munu ngayulu ngulu wiyangu Godaku tjukurpa uwankara nyurala nintiningi tjara kutjupa kutitjura kanyintja wiyangu nyura uwankara kulira kunpuringkunyitjaku.

²¹ Mununa anangu uwankarangka rawangu wangkapai Jew tjutangka munu Jew wiya tjutangka kulu tjana kura palyantjatjanungku wantira kuntarinkula Godalakutu pitjanytjaku munu Jesuku Christaku mulamularingkunyitjaku. Uwa, nyura ninti nyanga palumpa tjanampa.

²² "Ka ngayulu kuwari ananyi Jerusalemalakutu Kurunpa Milmilu witunnyangka, palu ngayulu ninti wiya nyaaringkuku ngayulu ngura nyara palula wirkankula.

²³ Panya ngayulu ngura uwankarangka para-pitjalinkunyangka Kurunpa Milmil̄tu ngayunya nintira ngulutjunkturpai tjana ngayunya ngula mantjira tjailangka tjarpatjunkturjaku ngura nyara Jerusale-mala.

²⁴ Palu ngayulu pulkara nguluringkuntja wiya. Ngayulu mukuringanyi war̄ka nyanga Godalu ngayunya ungkuntjtija war̄karira wiyantjikitja kutju. Panya paluru ngayunya witunu anangu tjuṭangka Tjukurpa Palya Jesunyatjara tjakultjunkturjaku, panya palurulanya nganananya mukulyangku wankarunu.

²⁵ “Uwa, panya ngayulu rawa para-pitjalinangi ngura tjuṭangka mununa anangu uwankarangka Godaku tjukurpa tjakultjunangi, tjukurpa panya Godalu anangu tjuṭa walytjanmara kanyintjtija. Palu kuwari panya ngayulu ananyi, kani nyura piruku yunpa nyakuntja wiyaringkuku.

²⁶ Ka nyangana kuwari nyurala pulkara wangkanyi. Tjinguru kutjupa tjuṭangku Godaku tjukurpa kulira Jesuku mulamularingkuntja wiyangku wantiku munuya palulanguru tjintu malatjangka Godaku ngurangka puṭu tjarpaku. Munuya tjinguru ngayunya wangkaku, ‘Nyangankulanya nganmanytju wangkanytja wiyangku wantingi.’

²⁷ Palu wiya, ngayulu panya nyurala wangkangi alatjitu Godalu wangkanytja uwankara nyura kulira palula wanganarangku kulintjaku.

²⁸ Kayanku walytjangku walytjangku pulkara atunymanama ngunti kulira kuraringkuntjaku-tawara munuya Jesuku walytja kutjupa tjuṭa kulu wirura atunymanama, panya Kurunpa Milmil̄tu nyuranya tjunu palunya tjananya atunymara kanyintjaku. Panya Jesunya Godaku katja puṅu katakutjarangka ilura milkali tjutingu palumpa tjanampa ngalkilpa, ka nyara palulanguru panya Godalu tjananya walytjanmanu. Kaya palulanguru tjananya wirura atunymanama.

²⁹ Panya ngayulu nintingku kulini ngayulu ankunyangka malangka anangu panya kutjupa tjuṭangku papa pikati tjuṭa purunytju pitjala Jesuku walytja tjuṭa kurakurara katiku tjana ngunti kulira iwara kutjupa wanantjaku.

³⁰ Panya ngula nyuralanguru kutjupa tjarangku Jesuku walytja tjuṭa tjukurpa ngunti wangkara mukumukulku palunya tjananya wanantjaku, kaya palunya tjana wanalku.

³¹ Kayanku pulkara atunymanama munuya panyatja kulinma watar kuriwiyangku, panya ngayulu nyurala mungangka kalala kulu titutjarangku tjakultjunangi kurunpa ulara, panya ngayulu nyurala tjungu kuli mankurpa nyinangi rawa alatjitu.

³² “Palu ngayulu nyanga kuwari nyuranya wantikatinytjikitjangku Godala tjaipini, ka paluru nyuranya rawangku atunymara kanyilku. Ka nyura tjukurpa panya Jesunya nganampa ngalkilpa ilura pakantjtija kulira witulyarira kunpu nyinaku. Ka ngula Godalu nyuranya tjukurpa nyanga palumpa mulamularingkunyangka mantjira palumpa walytja kutjupa uwankarangka tjungura titutjarangku kanyilku ngura ilkaritjangka.

³³ “Ngayuluna anangu kutjupangku mani munu mantara wiru tjuṭa kanyinnyangka nyakula mantjintjikitjangku kulilpai wiya.

34-35 Panya nyura ninti, ngayulu walytjangku marangku kutjupa kutjupa tjuta palyaningi manikitjangku ngayuku maiku munu mantaraku. Waintara nguwanpana mani palyaningi ngayuku malpa tjutaku kulu. Munu panyaana alatji palyara nyuranya nintiningi nyura ngapartji pulkara warakarinytjaku munu mani mantjira nyuranku kutju kulintja wiyangku ngaltutjara tjuta kulu ungkunyjtaku. Munuya kulinma panya Mayatja Jesulu wangkanytjitja, panya alatji paluru wangkangu, 'Kutjupangku nyuranya ungkuyangkampa nyura unytju tjukutjuku kutju pukulariku, palu nyura anangu kutjupa ungkulampa nyura pulkara mulapa pukulariku.' "

36 Ka Paulalu tjanala wangkara wiyaringkunyangka paluru tjana uwankarangku tultjungarakatira Godala tjapiningi.

37-38 Munuya tjapira wiyaringkula palunya tjakurira tjituru-tjitururira ampura nguku kutjara nyunytjura ulangi. Panya paluru tjanala alatji wangkangu, "Nyanganguru nyura ngayunya piruku nyakunyjtja wiyaringkuku." Kaya nyara palunya kulintjatjanu pulkara alatjitu tjituru-tjitururingu. Kala palulanguru Paulanya nganana pautakutu ma-pitjangu. Kaya paluru tjana nganannya wana nu pautangka tatinnyangka tjakurira iyantjikitjangku.

21

Paulanya Jerusalemalakutu Ankunyjtja

1 Munula tjananya tjakurinkula wiyaringkula pautangka tatira tjakaruru anu ulparira manta tjukutjuku ini Kaatjalakutu. Munula ngarira mungawinki kakarara anu manta tjukutjuku kutjupa ini Ruutilakutu, munula nyara palulanguru anu Patarakulta manta panya pulkakutu.

2 Munula ngura nyara palula nyinara pauta kutjupa nyangu manta ini Panitjiyalakutu ankunyjtikitja ngaranyangka. Kala pauta panya palula tatira ma-pakanu manta panya Panitjiyalakutu.

3 Munula ankula ankula manta ini Tjaipuritjala ulparirawanu anangi palula wirkankunyjtja wiyatu. Munula palulanguru manta panya Tjiriyalakutu anu munula mantangka wirkara ukalingu ngura ini Tayala. Panya ngura nyara palulaya pautanguru katinyangka kutjupa kutjupa tjuta mantjira mantangka tjunkupai tjuwa tjutangka tjunkunyjtaku.

4 Kala tjana kutjupa kutjupa tjuta pautanguru mantjira tjunkunyangka patara ankula nyangu Jesuku walytja tjuta, kalanya paluru tjana wirungku mantjira palumpa tjanampa ngurangka tjintu 7 kanyiningi. Munuya paluru tjana Kurunpa Milmilu nintinnyangka Paulanya markunu Jerusalemalakutu ankunyjtja wiyaku.

5 Palu pauta panya ritiringkunyangka nganana ngura nyara palunya wantikatira anu uru pulkakutu pautangka tatintjikitja, kalanya Jesuku walytja winkingku wana nu tjtjingu minymangku kulu. Kala nyara palula wirkara nganana uwankara mantangka tultjungarakatingu uru pulkangka itingka munula Godala tjapiningi.

6 Munula palulanguru palunya tjananya tjakurira wiyaringkula tatinu pautangka, kaya tjana ngurakutu malaku anu.

7 Munula nyara palulanguru Tayanya wantikatira ulparira anu munula ngura ini Talamaitjala wirkanu. Munula ngura nyara

palula pautanguru ukalingkula piruku Jesuku walytja tjuṭa nyakula wangkara pukulmanangi munula tjanala tjunguringkula nyinangi tjiṅtu kutju.

⁸ Munula mungawinki piruku tatira ma-pakanu ulparira ngura ini Tjiitjariyalakutu, munula nyara palula wirkara mantangka ukalingu munula wati ini Philipaku walikutu ankula palula nyinangi. Panya wati nyanga paluru Tjukurpa Palya Jesunyatjara para-pitjalira tjakultjunkupai anangu ngurpatja tjuṭangka. Panya palunyaya nganmanytju ngurkantanu Jerusalemala wati panya 6 kutjupangka tjungu Godaku waraka palyantjaku.

⁹ Ka paluru untalpa kutjara kutjaratjara panya tjananya watingku altinytja wiyatu. Ka paluru tjana Godaku wangkatjara tjuṭa, panya Kurunpa Milmiltu nintinnyangkaya Godaku tjukurpa tjukarurungku wangkapai.

¹⁰ Kala ngura nyara palula tjiṅtu mankurpa nyinanyangka wati wangkatjara kutjupa pitjangu ini Aka-patjanya manta Judealanguru.

¹¹ Munu paluru ngananalakutu pitjala Paulaku pilita mantjinu mununku walytjangu tjina munu mara kulu karpira ngananaala wangkara nintiningi alatji, “Kurunpa Milmiltuni kuwari wangkangu panya Jerusalemala wati Jewku mayatja tjuṭangkuya kunyu wati pilita nyangaku walytja witera karpilku munuya palunya unkkuku wati panya Jew wiya tjuṭa pungkunytjaku.”

¹² Ka nganana nyanga palunya kulira Paulanya pulkara wangkara markuningi Jerusalemalakutu ankuwiyangu wantira nyinanytjaku. Kaya Jesuku walytja ngura nyara palunya ngurara tjuṭangu kulu palu purunypatu palunya markuningi.

¹³ Munuya uwankara palumpa ulangi. Ka Paulalu wangkangu, “Wiya, wantimaya gayuku ulanytja wiyangu, panya nyura gayuku ularampa gayunya kurunpa pulkara tjituru-tjiturunanyi. Palyantiṅiya gayunya Mayatja Jesuku tjukurpa wangkanyangka tjailangka karpira tjarpatjunama, palu gayulu rapa alatjiṅtu ngaranyi. Tjiguruniya gayunya palumpa waraka palyannyangka pungkula iluntanama, palu gayulu nguluringkunytja wiya alatjiṅtu ngura nyara Jerusalemala ankula ilunytjikitja.”

¹⁴ Kala Paulanya puṭu markuntjatjanungku wantingu, munula wangkangu palula alatji, “Wiya palya, Mayatja Jesulu palurunku kulintjatjanungku palyani.”

¹⁵ Munula nyara palulanguru nganana ritiringkula Jerusalemaku ma-pakanu.

¹⁶ Kaya Jesuku walytja kutjupa tjuṭa ngananaala tjunguringkula anu, panya Tjiitjariyanya ngurara tjuṭa, munuya nganananya katingu wati ini Nathanku walikutu nyara palula nyinanytjaku. Panya wati nyara paluru ngura Tjaipuritjanya ngurara munu panya nganmanypa mulapa Jesuku walytjaringu.

Paulanya Jamesalakutu Ankunytja

¹⁷ Ka nganana Jerusalemala wirkankunyangka Jesuku walytja tjuṭangu nganananya nyakula pukularira patara mantjinu.

18 Ka mungawinki Paulanya nganaṅala tjunḡu anu Jamesanya nyakunytjikitja,* kaya wati panya aṭunymankupai tjuṭa kuḷu palula tjunḡu nyinangi.

19 Ka Paulalu kuwari wirkankunytjatjanunḡu tjanala tjakultjunangi uwankara Godalu palulawanunḡu Jew wiya tjuṭangka palyantja, panya paluru ngura tjuṭangka para-pitjalira tjukurpa Jesunyatjara wangkangi, munu kutjupa kutjupa pulka tjuṭa tjanala palyanangi, kaya Jew wiya tjuṭa Jesuku walytjaringangi.

20 Kaya Jamesalu tjana nyanga palunya kulira Godanya mirawanḡu munuya Paulala ngapartji wangkangu alatji, "Uwa, walytja wiru! Nyuntu ninti panya anḡu Jew tjuṭa mulapaya Jesuku walytjaringu nganmanypa munuya paluru tjana uwankara tjukurpa panya Godalu Mosenya ungkunyjtjjangka wanganarangku kulintjik-itja pulkara mukuringkupai.

21 Ka panya nyuntu ngura kutjupa tjuṭakutu anu para-pitjalira Godaku tjukurpa tjakultjunkunytjikitja manta nyanga Judealawanunḡu wiya manta kutjupa tjuṭawanunḡu. Munu panyan mulapa anḡu uwankarangka tjakultjunangi Jew tjuṭangka munu kutjupa tjuṭangka kulukulu. Ka panya ngura nyanga Jerusalemala anḡu Jew panya Jesuku walytjaringkunytja tjuṭangka kulinu nyuntu kunyu ngura nyara palula tjanala Jew tjuṭangka alatji wangkangi, 'Moseku tjukurpaya kulira wantima munuya nyurampa tjitji nyitayira tjuṭa watintja wiyangku wantima. Munuya Jew tjuṭaku arawanu nyinanytja wiyariwa.' Alatjila tjana ngunti tjakultjunkunyangka kulinu panya nyuntu Jew wiya tjuṭangka wangkanytja-palku, munuya palulanguru kuwari nyuntumpa kuraringanyi.

22 Munuya kulinu nyuntu kuwari pitjanytja munuya tjinguru nyuntunya pungkunytjikitja mukuringkuku. Kala nganaṅa nyaalku nyuntunya wankarunkunytjikitja?

23 Palu wanyu kulila, munu nyanga alatji palyala! Panya nyangatjaya wati Jesuku walytja kutjara kutjara ngaranyi, panya paluru tjana Godala wangkara kalkunu, ka tjananku kalkuntjatjanunḡu minangka kurpintjaku ngaranyi Moseku panya tjukurwanunḡu.

24 Ka nyuntu tjanala tjunḡuringkula ara timpulakutu munu paluru tjana purunytju tjunḡunḡu palyanma Moseku arawanunḡu. Munu nyuntu manangka payamilanma wati tjukurtjarangku nyuranya mangka katara wiyantjaku. Ka nyara palulanguru Jew panya Jesuku walytjaringkunytja tjuṭangka nyuntu alatji palyannyangka nyakula pukulariku munuya nyuntunya kulilku, 'Munta-uwa! Nguntilanyaya tjakultjunu Paulalu Moseku tjukurpa wiyankunyangka-palku. Panya nyangatja paluru Moseku tjukurpa wanganarangku kulini wantinytja wiyangku.' Paluru tjana alatji nyuntunya kulilku munuya nyuntumpa pukulariku.

25 "Ka panya anḡu Jew wiya tjuṭa Jesuku mulamularingkunyangka nganaṅa nganmanytju tjanampa lita walkatjura iyanu munu panyala litangka ara mankurpa kutju walkatjura tjananya painu nyanga alatji, kuka panya god ngalya-ngalya ungkunyjtjita ngalkuwiyangku wantinytjaku, munu milkali tjikintja wiyangku

* 21:18 Jamesanya panya Jesuku malanypa, munu paluru lita walkatjunu Jesuku walytja tjuṭaku tjana nyakula kulira kunpuringkunytjaku. Ka lita paluru kuwari ngaranyi nganampa Bible-ta.

wantinytjaku, munu kuka milkalitjara kulu ngalkuwiyangku wantinytjaku, munu anangu kutjupangka ngunti ngariwiyangku wantinytjaku. Alatjila tjanala nganmanytju wangkangu litangka walkatjura.”

²⁶ Ka alatji wangkanyangka Paulalu wanganarangku kulinu munu mungawinki pakara wati panya kutjara kutjarangka tjunguringkula anu ara panya palunya palyantjikitja Moseku panya tjukurwanungku. Munu paluru tjana palyantjatjanungku timpulangka tjarpara wati tjukurtjarangka tjakultjunu panya tjintu 7-nguru tjananku kuka katinytjikitjangku pungkula tiliwakara Godanya ungunyitjaku.

Paulanya Timpulangka Witintja

²⁷ Ka tjintu panya 7 ngarala nguwanpa wiyaringkunyangka wati Jew manta Aitjanya ngurara tjutangku Paulanya nyangu timpulangka unngu ngaranyangka. Munuya anangu tjutangka para-wangkara tjananya altira wituwituningi tjunguringkula Paulaku pikaringkunyitjaku, munuya mulapatu palunya witiu.

²⁸ Munuya mirara altingi kutjupa tjuta kulu alatji wangkara, “Wati Israelkunu tjuta! Pitjalalanya alpamilala! Wati panya paluru nyangatja, panya anangu ngura winkitja wituwitulpai nganampa Israelkunu tjutaku kuraringkunyitjaku, munu Moseku tjukurpa kulu kuranmankunyitjaku munu timpula nyangaku kulu kuraringkunyitjaku. Munu nyanga kuwari wati Jew wiya mankurpa ngalya-tjarpatjunu timpulaku yaata unngutjangka, kala ngana nyakula miilaranu nyanga alatji paluru palyannyangka.”

²⁹ (Nyanga palunyaya wangkangu panya Paulalu wati Jew wiya Ipitjanya ngurara ini Turu-pimatjanya ngalya-katingu ngura Jerusale-malakutu, kaya paluru tjana ngunti kulinungi paluru timpulaku yaata unngutjangka tjarpatjunkunyangka-palku, panya Jew wiya tjuta nyara palula unngu tjarpanyitjaku wiya ngarangi.)

³⁰ Kaya ngura nyara Jerusalemnya ngurara tjuta mulapa kulira pulkara mirpanaringu Paulaku munuya uwankarangku ngalya-wirtjapakara palunya witiira timpulanguru urilkutu itarikatingu, ka tjanala malangka kaita panya mapalku patiringu.

³¹ Kaya anangu panya tjutangku Paulanya pungkula nguwanpa iluntanangi, ka tjaultji tjutaku mayatjangku kulinu anangu winki pikaringkunyangka.

³² Munu paluru mapalku wangkangu wati tjaultji tjutaku mayatja mankurta tjanampa tjaultji tjuta mantjira mapalku katinytjaku anangu tjutakutu munu paluru kulu tjanala tjunguringkula anu. Munuya mapalku wirtjapakara nyangu anangu tjuta mulatu kaputungku ngarala Paulanya pikangku pungkunyangka. Ka anangu panya tjutangku tjaultji tjuta pitjanyangka nyakula palunya wantingu pungkunyitja wiyangku.

³³ Ka tjaultjiku mayatjangku ilaringkula wangkangu palumpa tjaultji kutjarangka palunya witiira tjiina kutjarangka karpintjaku. Munu paluru anangu tjutangka tjapinu, “Wati ngananya nyangatja? Nyaa wanyu paluru palyanu, ka nyura palunya pungangi?”

³⁴ Kaya tjarangku ngalya-mirara wangkangi tjukurpa kutju, kaya kutjupa tjutangku ngapartji mirara tjukurpa kutjupatu wangkangi. Ka paluru tjana pulkara miranyangka tjaultjiku panya mayatjangku putu

alatjitu kuliningi, munu paluru palumpa tjaultji tjuṭangka wangkangu Paulanya tjanampa walikutu katinytjaku. Tjanampa wali-manṭu ila ngarangi.

³⁵ Kaya katira wali panya katukutu tatilpaingka wirkanu, kaya anangu panya winkingku ngalya-ilaringkula paluru katukutu matatinyangka nyakula palumpa pulkara mirpanaringu palunya pungkunyjikitja munuya wati panya tjaultji tjuṭa ngalya-utjuningi, kaya ngalya-utjunnyangka paluru tjana Paulanya tjaira katura katingi.

³⁶ Kaya anangu panya tjuṭangu mira winkingku wanangingi alatji wangkara, "Iluntara! Wati palatja iluntara!"

Paulalu Anangu Tjuṭangka Wangkanytja

³⁷ Kaya tjaultji tjuṭangu Paulanya wali unngu nguwanpa ma-tjarpatjunkunyangka paluru tjaultjiku mayatjanga tjapinu, "Wanyuna nyuntula wangkaku?"

Ka wati panya mayatjangu ngapartji palula wangkangu, "Palu nyuntu wanyu wangka Kuriki wangkapai?"

³⁸ Munta nyuntu-mantin wati panyatja Itjipanya ngurara, panya nyuntun panyatja anangu tjuṭa mulapampa 4,000 nguwanpa mungatu katingu manta nyara Itjipalanguru ngura panya ilytjikutumpa nganampa pikaringkunyjikitjangku mayatja Tjiitjaku panya tjaultji tjuṭaku."

³⁹ Ka Paulalu ngapartji wangkangu, "Wiya, ngayuluna wati Jew, ngura ini Tatjatjanya ngurara. Ngura nyara paluru panya pulka mulapa manta ini Tjilitjiyala ngururpa ngaranya. Wanyuni wirungku walatjura, kana anangu nyanga tjuṭangka wangka!"

⁴⁰ Ka wati panya mayatjangu palyanmanu paluru wangkanytjaku anangu tjuṭangka. Ka Paulanya tatilpaingka katu ngarangi tjanala kuranyu munu mara katunu tjana nyakula pilunarinytjaku munu palula kulintjaku. Munu paluru uwankara pilunarinyangka tjanala wangkangu wangka Ara-mayikangku tjanampa panya wangka walytjangku.

22

¹ "Walytja tjuṭa! Wanyuniya kulila tjilpi tjuṭangu kulukulu, kana nyurala utingku tjakultjura ngayulunatju walytjangku tjukurpa ngayunyatjara."

² Kaya anangu tjuṭa pilunaringu Paulalu wangka Ara-mayikangku wangkanyangka kulira. Ka paluru wangkangu alatji,

³ "Ngayuluna mulapa wati Jew nyinanyi, panya ngayuluna iti ngaringu ngura panya Tatjatjala manta panya ini Tjilitjiyala, mununa nyara palulanguru pitjala ngura nyanga Jerusalemala nyinara pulkaringu. Kani wati ini Kamaliyaltu kuulangka nintiningi. Wati nyara paluruni rawangku wirura nintilpai nganampa panya tjamu tjuṭaku ara Moseku panya tjanampa, kana palulanguru pulkara alatjitu Godaku mukuringanyi kurunpa winki, panya nyura kuwari palumpa pulkara mukuringanyi, palu purunpa.

⁴ Palu nganmanytju panyaṅa mulapa anangu tjuṭa Jesunya wanannyangka kurara pungangi mununa tjara iluntanangi mununa

kutjupa tjuṭa witiṛa katira tjailangka tjarpatjunangi wati tjuṭa munu minyṃa tjuṭa kulukuḷu.

⁵ Ka wati panya tjukurtjara pulka ngayuku ninti nyinangi Jewku kantjula tjuṭa kulū. Panya ngayulu palula tjanala tjaminu lita walkatjura ngayunya unkuḷiyantjaku ngura panya Tamatjakalakutu tjanampa malpa tjuṭakutu nyara paluru tjana nyakula palyanmankunytjaku ngayulu Jesuku walytja tjuṭa witiṛa tjailakutu ngalya-katinytjaku. Munuṃa palulanguru anu ngura Tamatjakalakutu nyara palunya tjananya witiṛa tjailakutu ngalya-katinytjikitja.

⁶ “Munuṃa ankula ngura nyara palula nguwanpa ma-wirkanu, kani ilkarīnguru tili pitalytji pulkangku pulkara irnyanu. Nyangatja alatjiringu tjiṃtu katu kalala alatjitu.

⁷ Kaṃa punkanu mantangka munuṃa kulinu kutjupangku ngayunya ini wangkanyangka alatji, ‘Saul! Saul! Nyaakunin tiṭutjarangku kurani?’

⁸ “Kaṃa ngapartji wangkangu palula, ‘Palu ngananyan wanyu?’

“Ka paluru ngayula wangkangu, ‘Ngayuluna Jesunya panya Nazarethanya ngurara panya nyuntunin tiṭutjarangku kuraningi.’

⁹ Kaya wati panya tjuṭangku ngayula panya tjungu ankunytja tjuṭangku tili kutju nyangangi, palu tjana wangka kulintja wiya paluru ngayula wangkanyangka.

¹⁰ “Kaṃa palula wangkangu, ‘Mayatja, palu nyaana palyalku?’

“Kani paluru wangkangu, ‘Pakara ara Tamatjakalakutu, ka ngura nyara palula wirkankunyangka wati kutjupangku nyuntula tjakultjunkuku panya ngayulu mukuringkunytja nyuntu palyantjaku.’

¹¹ “Kaṃa puṭu nyangangi panya tili pulkangkuni kuru irnyara kuranu. Kaniya wati panya ngayula tjungu ankunytja tjuṭangku ngayunya mara witiṛa katunu mununiya minara katingu ngura panya Tamatjakalakutu.

¹² “Ka ngura nyara palula wati kutjupa nyinangi ini Ana-nayatjanya, panya wati nyanga paluru Moseku tjukurta wanganarangku kulilpai, kaya Jew tjuṭa ngura nyara palunya ngurara tjuṭa palumpa pulkara mukuringkupai.

¹³ Munu wati nyara paluru pitjala ngayula itingka ngarangu mununi wangkangu, ‘Walytja wiru! Kuru alariwa mununi nyawa!’ Kaṃa mulapaṭu mapalku kuru alaringkula palunya nyangangi.

¹⁴ “Kani nyara palulalta Ana-nayatjalu tjakultjunangi alatji, ‘Panya Godalu nganampa tjamu tjuṭa iriti kanyiningi, panya paluru nyuntunya kuwari ngurkantanu nyuntu paluru mukuringkunytjitjaku nintiringkunytjaku. Panya palurunta ngurkantanu Jesunya panya Tjukururu Nyinapainya nyakunytjaku, munu paluru wangkanyangka kulintjaku.

¹⁵ Ka nyuntu kuwari nyanga nyakunytjatjanungku munu kulintjatjanungku para-pitjalira anangu ngura winkitjangka tjakultjunkuku.

¹⁶ Ka nyuntu kuwari rawa patantja wiya pakala munu Jesula tjapila, kanta kutjupangku urungka tjarpatjura baptise-kati. Kanta Godalu nyuntu panya kurantjitjangu kalypangku pungguwiyangku wantiku.’ Alatji Ana-nayatjalu ngayula wangkangi.

17 “Kaṇa nyara palulanguru malaku pitjangu Jerusalemalakutu. Munuṇa tjiṇtu kutjupa timpulangka tjarpara Godala tjapiningi, munuṇa nyangu Mayatjanya ngayula utiringkunyangka.

18 Kaṇi paluru wangkangu alatji, ‘Wala pulka pakala munu Jerusalemana wantikatira ara kuwaritu! Panya anangu nyangantuya tjukurpa tjukururu nyuntu ngayunyatjara tjakultjunkunyangka kulil-wiyangku wantiku.’

19 “Kaṇa palula wangkangu, ‘Mayatja! Wati nyanga paluru tjana ngayuku ninti panya ngayulu wali inmatja uwankarangka tjarpara anangu nyuntumpa mulamularingkupai tjuṭa pungkula witera katira tjailangka tjarpatjunangi. Kaṇiya panya nintingku nyangu.

20 Munuya nyangaku kulu ninti, panya wati tjuṭangku Stephennga pulingka atunnyangka ngayulu ngarala nyangangi munuṇa palumpa tjanampa mantara araltjara tjunkunytja ngayulu atunymanangi. Panya ngayulu kulu mukuringangi wati palunya iluntankunytjaku.’ Alatjina Mayatjala wangkangi.

21 “Kaṇi Mayatjalu wangkangu, ‘Kuwaritu ara panya ngayulunanta iyani ngura parari mulapa malikitja tjuṭakutu anangu panya Jew wiya tjuṭakutu.’ ”

22 Kaya tjukurpa nyanga palunya Paululu wangkanyangka kulira tjana pulkara alatjitu mirara wangkangu, “Iluntaraya! Nyaaku nyura palunya wanka kanyini?” Alatjiya palunya pulkara mirpanarira mirara wangkangi paluru Jew wiya tjuṭatjara wangkanyangka, panya paluru tjana Jew wiya tjuṭaku mukuringkupai wiya.

23 Munuya palulanguru upukuta tjananku kanyintjatjanungku araltjara waningu munuya mantatjunangi ka ulpuru pulka alatjitu pakaningi.

24 Ka wati mayatjangku tjaultji tjuṭangka wangkangu Paulanya palumpa tjanampa walingka unngu tjarpatjunkunytjaku munu wi-pangka alkantjaku, panya paluru putu kuliningi, “Nyaanguru nyan-ganpa palumpa pulkara alatjitu kuraringanyi munuya palumpa mirpanarira mirara wangkara waninyi?” Munu paluru mukuringangi tjukurpa tjukururu kulira nintiringkunytjikitja.

25 Kaya tjaultji tjuṭangku Paulanya wali panya unngu karpiningi alkantjikitjangku, ka Paululu tjaultjiku mayatjangka wangkangu, “Kulilani! Ngayulu Rome-aku mayatja Tjiitjanya mayatjanmankupai. Ka nyurampa wanyu ara alatji ngaranyi Tjiitjaku anangu tjuṭa kuitpangka ngurkantankunytja wiyangku watarku pungkunytjaku? Wiya, nyurampa tjukurpa ngaranyi ara-warara tjapira kulira mala ngurkantankunytjaku munu nyara palulanguru kura ngurkantara kutjulta palunya pungkunytjaku.”

26 Ka wati panya paluru kulinu Paululu alatji wangkanyangka munu anu palumpa tjanampa mayatjangka wangkanytjikitja munu palula tjapinu, “Nyuntu wanyu ninti wati nyanga palumpa? Munun nintingku nyanga palunya alatjinanyi? Kulila, wati nyanga paluru kunyu Tjiitjanya mayatjanmankupai, kala palunya pungkunytjaku wiya ngaranyi.”

27 Ka wati panya mayatjangku nyangatja kulira Paulalakutu pitjangu munu tjapinu palula, “Mulapa nyuntu Tjiitjanya mayatjanmankupai?”

Ka Paululu wangkangu, “Uwana.”

²⁸ Ka wati panya mayatjangku Paulala wangkangu, “Palu ngayulu Tjiitjanya mani pulkangka payamilanu paluru ngayunya walytjanmankunytjaku.”

Ka Paulalu wangkangu, “Palu ngayuku mamangku Tjiitjanya mayatjanmankupai, ka ngayulu mamanguru palunya mayatjanmanangi itinguru alatjitu.”

²⁹ Kaya tjaultji uwankarangku Paulalu alatji wangkanyangka kulira nguluringu munuya nguwanpa palunya pungkunytjatjanu patupaturingu. Ka wati panya mayatja kulu pulkara ngulunguluringu, panya paluru nganmanytju tjananya wangkangu Paulanya karpintjaku, palumpa mayatja-warara tjapira kulira ngurkantankunytja wiyangku.

Paulalu Jewku Kantjula Tjutangka Wangkanytja

³⁰ Ka tjitungka wati panya mayatja paluru kuliningi nintiringkunytjikitjangku, “Ara nyaanguruya wati nyanga Jew tjuta Paulaku pulkara mirpanarinyi?” Munu paluru wati tjukurtjara kuranyitja tjuta, munu Jewku kantjula tjuta kulu tjunguringkunytjaku altingu, panya paluru tjana tjungungku wangkara kulintjikitjangku. Munu paluru tjaultji tjuta wangkangu Paulanya tjailanguru pakaltjingara ngalya-katinytjaku, kaya mantjira ngalya-katira tjanala kuranyu ngaratjunu.

23

¹ Ka Paulalu wati panya Jewku kantjula tjuta tjukarurungku nyangangi munu tjanala rapangku wangkangi alatji, “Walytja tjuta! Ngayuluna titutjarangku alatjitu Godala wanganarangku kulilkatingi kura kutjupa kutjupa tjuta palyantja wiyangku.”

² Ka nyanga alatji wangkanyangka kulira tjukurtjara pulkangku ini Ana-nayatjalu wati kutjupangka wangkangu Paulanya tjaa pungkunytjaku.

³ Ka Paulalu kulira malakukutura wati panya tjukurtjara palunya nyakula wangkangu, “Wiya, nyuntun ngunti palya-palku nyinanyi! Nyaakunin pungkunytjaku wangkanyi? Panya Moseku tjukurtu wangkanyi nyanga palu purunypa pungkunytja wiyangku wantinytjaku. Ka palan nyinara ngayunya ngurkantanyani Moseku arawanungku, munun ngayunya pungkunytjaku wangkara nyuntu alatjitu palumpa tjukurpa kurani. Pala palulanguru Godalu nyuntunya ngapartji pungkuku.”

⁴ Ka wati kutjupa tjutangku Paulala itingka ngaranytjatjanungku palula wangkangu, “Nyaakun alatji wangkanyi? Panya wati nyangatja Godaku tjukurtjara pulka nyinanyi.”

⁵ Ka Paulalu palula tjanala wangkangu, “Munta! Ngurpangkuna watarkungku wangkangu wati tjukurtjara pulka kulintja wiyangku. Panya mulapa Moseku tjukurta ngaranyi anangu tjutangku mayatja tjanampa kuranmankunytja wiyangku wantinytjaku.”

⁶ Munu Paulalu para-nyakula wanara tjananya ngurkantanu panya wati kutjupa tjaraya Tjatjutji kaya kutjupatjara Paratji.* Ka paluru

* 23:6 Panya paluru tjanaya Jew tjutatu palu ini kutjupa kutjupa.

tjanala wangkangu, “Walytja tjuṭa, ngayuluna mamaku arangka nyinanyi wati Paratji. Mununa mulamularingkupai Godalu anangu tjuṭa ilunyangka wankara pakaltjingantjitjaku. Ka nyara palulanguru nyura kuwari ngayunya ngalya-katira ngaratjunu, ngayulu ilunytjatjanu wankaringkunyta wangkanyangka.”

⁷ Ka Paulalu nyanga alatji wangkanyangkaya wati panya Tjatjutji tjuṭangu palumpa pulkara mirpanarira palunya wiymanangi, kaya Paratji tjuṭangu anga-wangkangi munuya palulanguru Tjatjutji tjuṭa munu Paratji tjuṭa tjungu nyinanytjatjanu tjananku ngaparku wangkara tjara-tjararingu.

⁸ Panya Tjatjutji tjuṭaya puṭu mulamularingkupai anangu tjuṭa ilunytjatjanu pakantjitjaku munuya angelpa tjuṭa wiymanakupai, kurunpa tjuṭa kulu. Palu Paratji tjuṭaya ilunytjatjanu pakantjitjaku mulamularingkupai munuya kulilpai angelpa tjuṭa mulapa nyinanyi kurunpa tjuṭa kulu.

⁹ Munuya nyara palulanguru wati panya tjuṭa pulkara alatjitu mirara kinkinmara waningi. Ka wati kutjupa tjarangu Moseku tjukurpa nintilpai tjuṭangu pakara pulkara wangkangu, “Nganana wati nyanga palumpa kura puṭu ngurkantanyani. Tjinguru palula angeltu wangkangu munta tjinguru kurunpa kutjupangu wangkangi.”

¹⁰ Munuya rawangu wangkara wangkara pika-pikaringu munuya pulkara ngalytjurmara waningi. Ka Paulanya pungkula iluntankunytjaku-tawara wati mayatjangu tjaultji tjuṭangka wangkangu palunya mantjira katira unngu tjarpatjunkunytjaku palumpa tjanampa yiwalangka.

¹¹ Ka mungaringkunyangka Mayatja Jesunya utiringkula palula itingka ngarangi munu alatji wangkangu, “Wati wiru! Nguluringkunyta wiya nyinama panya rapangkun ngayunyatjara tjakultjunangi anangu tjuṭangka ngura panya Jerusalemala, munun palu purunytjutu Rome-alakutu ankula tjanala ngapartji rapangkun tjakultjunkuku nguluringkunyta wiyangu.”

Paulanyaya Iluntankunytjikitjangku Wangkara Kulintja

¹²⁻¹³ Ka palulanguru tjiṭuringkunyangka wati Jew kutjupajara nampa 40 kampangkaṭu tjunguringu munuya Paulanya iluntankunytjikitjangku wangkara kuliningi, munuya kalkunu kuka mai ngalkuwiyangu wantira palunya-warara iluntara, ngula malangka piruku ngalkuntjikitjangku.

¹⁴ Munuya paluru tjana ankula wati tjukurtjara kuranyitja tjuṭangka munu wati tjiṭpi kuranyitja pulka tjuṭangka kulu wangkangi alatji, “Nganana wangkara kalkunu Paulanya iluntara kutju kuka mai kulu mala ngalkuntjikitjangku.

¹⁵ Kala mukuringanyi nyura munu Jewku kantjula tjuṭangu kulu wati kutju tjakulpa iyantjaku wati panya tjaultji tjuṭaku mayatjakutu, ka wati paluru ankula ngunti wangka alatji, ‘Jew tjuṭaku mayatja tjuṭaya Paulala tjukurpa kutjupa tjuṭa piruku tjapira kulintjikitja mukuringanyi. Wanyu kunyu palunya pakaltjingara kati tjanalakutu.’ Ka mayatja nyara paluru tjinguru palunya pakaltjingara ngalya-iyannyangkampa nganana ngururpa ankula patalku palunya iluntankunytjikitja.”

16 Palu Paulaku ukaringku kulinu tjana panya kampangkatu wangkanytja uwankara munu paluru kulintjatjanu Paulala tjakultjunktjikitja anu tjaultji tjuaku yiwalakutu munu paluru tjarpara Paulala wirkara tjakultjunu tjukurpa panya palunya.

17 Ka kulintjatjanungku Paulalu wati tjaultji kutju altingu munu palula wangkangu, "Wati nyangatja wanyu nyurampa mayatjakutu ma-kati! Paluru kunyu mukuringanyi kutjupa kutjupa palula tjakultjunktjikitja."

18 Ka mulapa wati panya tjaultjingu Paulaku panya ukari altira katingu tjanampa panya mayatjakutu munu palula wangkangu, "Wati panya Paulaluni tjapinu wati nyangatja nyuntulakutu ngalya-katinytjaku. Paluru kunyu nyuntula kutjupa kutjupa wangkanytjikitja mukuringanyi."

19 Ka wati panya mayatjangku Paulaku panya ukari minara mauntalpa katingu paluru pula pilunta nyinara wangkanytjikitjangku. Ka mayatjangku panya palula tjapinu, "Nyaa wangkanytjikitjan mukuringanyi? Walangkuni tjakultjura!"

20 Ka wati panya Paulaku ukaringku palula wangkangu, "Jew kutjupa tjarangkuya kunyu wangkara kulinigi nyuntula mungawinki tjapintjikitjangku nyuntu Paulanya tjanalakutu katinytjaku kantjula tjuakutu. Tjana kunyu nyanga alatji ngunti palyalku Paulala tjukurpa kutjupa tju piruku tjapira kulintjikitjangku-palku, palu paluru tjana kunyu alatji ngunti wangkaku nyuntu tjanala kulira wantir'iyantjaku.

21 Ka nyuntu palumpa tjanampa mulamularingkuwiyangku wantima! Panya nyara palula arangkaya kunyu wati 40 nguwanpa kumpira nyinaku iwarangka itingka munuya pitjanyangka nyakula Paulanya pungkula iluntankuku. Panya paluru tjana nganmanytju wangkara kalkunu mai wantinytjikitjangku munuya kunyu Paulanya iluntara kutju paluru tjana piruku mai ngalkuku. Munuya paluru tjana kuwari nyanga patara nyinanyi nyuntu kulira mulamularingkunyttjatjanungku palunya katinytjaku. Palu wantima tjanala kulintja wiyangku!"

22 Ka wati panya mayatjangku Paulaku panya ukari wangkara witu, munu alatji wangkangu, "Kutjupangka tjakultjunktjuntja wiyangku wantima panya nyuntu kuwari ngayula tjakultjunktjuntja. Palya!"

Paulanya Iyantja Ngura Tjiitjarialakutu

23 Munu wati panya mayatja paluru wati tjaultji kuranyitja kutjara altingu munu pulala wangkangu, "Ankula pula wati tjaultji tjuata 200 altira riti palyala munga nyanga kuwari ngura nyanganguru Tjiitjarialakutu ankunytjaku. Munu tjaultji kutjupa tjuata kulu altira tjungula wati nyanytjutjara 70 nguwanpa munu piruku wati kulatatjara tjuata kulu altira tjungula nampa 200. Munu pula tjaultji palula tjanala uwankarangka wangka ritiringkula patantjaku munga nyanga kuwari 9-ta ngura nyangatja nyura wantikatinytjikitjangku.

24 Munuya nyanytju kutjupa tjuata kulu mantjira riti kanyinma munuya nyanytju kutju uwa Paulanya paluru tatintjaku palunya nyura wankaru katinytjikitjangku wati panya mayatja pulkakutu Pilikitjilakutu."

25 Munu paluru lita walkatjunu tjananya ungu'iyantjikitjangku nyanga alatji,

26 Uwa, mayatja pulka Pilikitji! Nyangatjana ngayulu Kulutiyatja Litjiyatjala nyuntumpa lita walkatjunanyi nyuntumpa pulkara pukularira.

27 Wanyu kulila! Jew tjutangku wati nyangatja witiira palunya nguwanpa iluntanangi. Palu ngayulu kulinu panya wati nyanga paluru Tjiitjanya mayatjanmankupai, kana nyangatja kulin-tjatjanungku ngayuku tjaultji tjutatarangku ankula mantjira katira palunya wankarunu.

28 Mununa mukuringangi tjanalanguru kulintjikitja, "Nyaanguru nyanganpa wati nyanga palumpa pulkara kuraringanyi?" Kana Jewku kantjula tjutakutu katira tjanala tjapinu ara kulintjikitjangku.

29 Kaya paluru tjana wangkangu, "Wiya, wati palangku ara nganampa kurani." Kana ngayulu kulini, "Tjinguru paluru ara tjanampa kuranu, tjinguru wiya." Palu ngayulu paluru kura palyantja palula putu tjapira kulinigi mununa kulinu, "Nguntiya nyangantu tjanampa aranguru kutju palunya witiira nguwanpa iluntanangi." Kana ngayulu tjana wangkanyangka ngunti kulintjatjanungku palunya witiira tjailangka tjarpatjunu. Palu paluru wati kura wiya, kana palunya putu tjailangka rawangku kanyini.

30 Palu tjintu kutjupa tjitji kutjupangku pitjala ngayunya tjakultjunu panya Jew kutjupa tjarangku kunyu kampangka tu wangkangi Paulanya iluntankunyitjikitjangku. Kana palulanguru wati nyanga palunya kuwari mapalkungku nyuntulakutu ma-iyani. Mununa wati panya Jew tjutangka wangkangu tjana kulu ankula nyuntula wirkara utingku ara tjakultjungkunyitjaku nyaanguru paluru tjana palunya kuranmanangi.

Alatji paluru nyiringka walkatjura tjananya ungu'iyanu.

31 Kaya tjaultji tjutangku wanganarangku kulira palyanu munuya Paulanya katingu munga panya palulatu, munuya ankula ngura ngururitjangka ma-wirkanu munga kultungka ngura ini Anti-paturitjala.

32 Kaya mungawinki nyanytjutjara tjutangku ngapartji wati panya Paulanya katingu Tjiitjarialakutu. Kaya wati panya tjaultji kutjupa tjuta malaku pitjangu ngurakutu Jerusalemalakutu.

33 Kaya wati panya nyanytjutjara tjutangku Tjiitjariala ma-wirkara lita panya palunya katira ma-ungu wati panya mayatja pulka Pilikitjinya, munuya Paulanya palula kuranyu ngaratjunu.

34 Ka mayatja panya paluru lita mantjira nyakula wangkangu munu palulanguru tjanala tjapinu, "Wati nyangatja ngura ngananya ngurara?"

Kaya wangkangu, "Manta ini Tjilitjiyalanguru."

35 Ka nyangatja kulira mayatja panya paluru Paulala alatji wangkangu, "Palya! Ngulana nyuntu wangkanyangka kulilku, nyuntumpa kuraringkupai tjutangku kulu pitjala wangkanyangka. Mununa nyara palulangurulta kulira nintiringkuku." Munu mayatja panya paluru palumpa tjaultji tjutangka wangkangu Paulanya mayatja Irataku walikutu katira nyara palula unngu kanyira pulkara

atunymankunytjaku. Wali paluru kuutpa purunypa ngarangi panya Iratalu palulakutu pitjala anangu tjuṭa ngurkantankupai.

24

Jew Tjuṭangku Paulanya Kuranmankunytja

¹ Ka tjiṅṭu 5 ngarala wiyaringkunyangka wati panya tjukurtjara pulka Ana-nayatjanya anu ngura nyara Tjiitjarialakutu. Kaya palula tjungu anu wati kuranyitja tjilpi pulka tjuṭa munu wati lawyer ini Tuatalatjanya kulu.* Nyanga paluru tjanaya pitjangu mayatja panya Pilikitjilakutu Paulanya kuutpangka anangura wangkanytjikitja.

² Ka Pilikitjilu Paulanya ngalya-katinytjaku wangkangu, kaya tjaultji tjuṭangku palunya tjarpatjura wati tjuṭangka kuranyu ngaratjunu. Ka wati panya Tuatalatjalu Paulanya anangura wangkanytjikitjangu alatji wangkangu mayatja panya Pilikitjila, "Wati wiru! Nyuntu panya mayatja wiru mulapa nganampa uwankaraku nyinanyi munu panyalanyan nitingku tjukarurungku kanyilpai, kala rawa pilunpa wirura nyinapai. Munu panyan palyalpai kutjupa kutjupa wiru tjuṭa ngura nyanga palula nganana pukulpa nyinanytjaku.

³ Kala ngura uwankarangka wirura pukulpa nyinapai munula nyanga palulanguru nyuntunya pulkara mirawanipai.

⁴ Palu nyuntu pakuringkunytjaku-tawarana tjinguru rawangku wangkanytja wiyangku wantiku, ka wanyu wirungku nganampa tjukurpa kulinma.

⁵ Panya wati nyangangu nganananya anangu Jew tjuṭa ngura winkitja tjituru-tjitururungkula pikaringkunytjaku palyalpai, kala palulanguru mirpanarira pulkara ngalytjurmara mirapai. Panya anangu kutjupa tjuṭangkuya wati Nazarethanya ngurara wanarinkupai Jesunya panya, ka panya wati nyanga paluru palumpa tjanampa mayatja nyinanyi.

⁶⁻⁸ Munu paluru Jerusalemala nganampa timpulangka tjarpara arkara kuraningi, kala nyakula palunya witera tjailangka tjarpatjunu.* Wanyu nyuntu palula tjapila, kanta paluru tjakultjura. Kan nyuntu mulapa kulilku nganana tjukarurungku wangkanytja." Alatji Tuatalatjalu wangkangi mayatja panya Pilikitjila.

⁹ Kaya Jew kutjupa tjuṭangku kulu Tuatalatjala tjungurungkula mayatja panya palula wangkangi, "Uwa, mulapa nyangangu tjukarurungku wangkanyi."

Paulalu Palurunku Ara Tjakultjungkunytja Mayatja Pilikitjila

¹⁰ Ka wati panya mayatjangku Paulanya mara urira wangkangu paluru ngapartji wangkanytjaku. Ka Paulalu wangkangu alatji, "Uwa, ngayulu ninti nyuntumpa, panya nyuntun nganampa nyanga ngura rawangku kanyiningi mayatjangku munu panyalanyan Jew

* **24:1** Tuatalatjanya wati Jew palu paluru Kuriki wangkapai tjuṭa purunypa nyinapai.

* **24:6-8** Wati kutjupangku kunyu verse nyanga palula ngururpa tjukurpa kutjupa wakatjunu munu mala tjungunu Luke-aku tjukurta alatji - Panya nganana mukuringangi palunya kuutpangka ngaratjungkula nganampa arawanungku ngurkantankunytjikitja. Palu Mayatja Tjiitjaku tjaultji pulkangu ini Litjiyatjalu tjaultji tjuṭatjarangku pitjala nganananya untu-untura pauntjingara wangkangi munuya Paulanya tjulyara katingu. Munu wati paluru nganananya wangkangu pitjala nyuntula tjakultjungkunytjaku wati nyanga palunya anangura wangkanytjatjanungku.

tjuta kuutpangka tjapira kulira ngurkantankupai. Palulanguru nyuntu nganampa ninti nyinanyi, kana pukularira nyuntula rapangku utira wangkanyi ngayulu palyantja nyuntu tjakarurungku kulintjaku.¹¹ Nyangatjana nyuntula tjakarurungku wangkanyi. Palu nyuntu mukuringkulampa anangu kutjupa tjutangka tjapira kulila, kaya tjukurpa palunya nyuntula wangkaku. Panya tjintu 12 mungatu ngayulu anu Jerusalemalakutu Godanya timpulangka walkuntjikitja.

¹² Mununa timpula nyara unngu ngarala ngayulu anangu kutjupaku pikaringkunyta wiyatu, mununa palu purunypatu wali inmatja kutjupa tjutangka kulu ngayulu ngalytjurmara wangkara pikaringkunyta wiyatu. Palu ngayulu Jerusalemala wirura para-ngarangi anangu tjutaku pikaringkunyta wiya alatjitu.

¹³ Kani nyangantu ngunti ngayunya kuranmananyi munu nyangaya tjukurpa putu kulini ngayunyatjara tjakarurungku wangkanytjikitjangu.

¹⁴ "Palu ngayulu nyanga nyuntula kuwari tjakultjunanyi tjukurpa tjakaruru nyuntu kulintjaku. Panya ngayulu nganampa tjamupitiku God walkulpai Aipuramaku Isaacaku tjanampa God. Palu ngayulu Jesuku mulamularingkula palunya wanalpai mununa palu-lawanungku Godanya walkulpai. Palu Jew kutjupa tjutangkuya Jesunya analpai munuya palumpa iwara kuranmankupai. Palu ngayulu paluru tjana purunypa pulkara mulamularinganyi tjukurpa panya Godalu Mosenya ungkunyjtijaku munu tjukurpa panya wangkatjara tjutangu kulu walkatjungkunyjtijaku.

¹⁵ Mununa tjana purunyjtutu ala-alangku patara kulini, 'Mulapa Godalu ngula anangu uwankara ilunyjtija pakaltjingalku anangu palya tjuta munu kura tjuta kulukulu.'

¹⁶ Uwa, ngayulu pulkara mulamularinganyi panya Godalu ngayunya ngula ilunyangka wankara pakaltjingalku, mununa palulanguru arkara Godala mirangka rawa palyanyku nyinanyi anangu tjutangka mirangka kulu ngayunya kuranmankunyjtjaku-tawara.

¹⁷ "Panya ngayulu nganmanypa anu Jerusalemalanguru mununa rawa kuli tjuta nguwanpa ngura tjutangka para-ngaranytjatjanu ngula ngura nyara palulakutu malaku anu mununa anangu ngaltutjara tjutaku mani katingu palunya tjananya ungkunyjtikitjangu. Mununa palulanguru kuka katingu timpulakutu Godanya ungkula walkuntjikitjangu.

¹⁸ Kaniya nyara palula nyangu timpula unngu ngarala palyan-nyangka. Panya ngayulu nganmanytju Moseku arawanungku palyan-tjatjanungku kuka ungangi. Kaya anangu tjuta kulu ngayula ila para-ngarala arintankunyta wiyatu.

¹⁹ Palu mulapaya anangu panya Jew mankur-mankurpa ktju nyara palula ngarangi manta panya Aitjanya ngurara tjuta kutju. Munuya uti paluru tjana pitjama nyuntula mirangka ngayunya wangkanytjikitja panya nyara paluru tjana kutjuniya ngayunya nyangu.

²⁰ Munta, tjilpi nyanga palula tjanala wanyu tjapila. Panya paluru tjananiya Jerusalemala Jew tjutaku kantjula tjutangka kuranyu ngaratjunu mununiya putu tjapira kuliningi ngayulu kura palyantja kulintjikitjangu.

²¹ Palu mulapa tjinguru tjana kutjunguru ngayunya kuranmanangi panya ngayulu alatji tjanala wangkangu, 'Nyura ngayunya kuutpangka nyanga ngaratjunu ngayulu miri tjuta panya ilunytjatjanu pakantjita kulira mulamularingkunyangka.' Nyanga palunya wangkanyangka tjana tjinguru ngayunya kuranmananyi, ka nyangaḡa kuwari nyuntula kuranyu ngaranyi nyuntu ngayunya kulira ngurkantankunytjaku." Alatji Paulalu wangkangi.

²² Ka Pilikitjilu wati panya Tuutalatjalu pula Paulalu wangkanyangka kulira tjanala wangkangu Jew panya tjuḡangka alatji, "Wiya, palyala wanti ngulaku wati panya tjaultji tjutaku mayatja Litjiyanya pitjanytjaku patara. Kana nyara palula-arangka nyurala piruku kulira nintiringkuku mununa Paulanya kulira ngurkantankukulta tjinguru palya, tjinguru kura." Panya Pilikitjinya nganmanypa nintiringu tjukurpa nyanga Jesunyatjaraku kutjupa tjuḡangka palula wangkanyangka kulintjatjanu.

²³ Munu paluru tjaultji kuranyitjangka wangkangu alatji, "Paulanya katira atunymanama palu karpintja wiyangku kanyinma munu paluru urira tjukutjuku para-ngaranytjaku wantir'iyanna. Munu palumpa malpa tjuḡangu mai, kuka mantara kulu palunya katira ungunyangka paintja wiyangku wantima. Palya!"

Paulalu Pilikitjila Pulala Wangkanytja

²⁴ Ka tjintu mankurpa nguwanpa ngarala wiyaringkunyangka Pilikitjinya pula kurirara minyama panya ini Turatjilanya pitjangu Paulanya nyakunytjikitja. Minyama nyanga paluru kulu panya Jew. Ka Pilikitjilu tjaultjingga wangkangu Paulanya pakaltjingara pulalakutu ngalya-katinytjaku. Munu paluru pula nyinara kuliningsi Paulalu tjukurpa Jesunyatjara tjakultjunkunyangka ara panya Jesuku mulamularingkula Godaku walytjaringkunytjatjara.

²⁵ Munu Paulalu piruku tjukurpa kutjupa tjuta kulu palula pulala tjakultjunangi, panya Godanya mukuringanyi anangu tjuta palyanyku nyinanytjaku munu purkarangku kulintjaku kura palyantjaku-tawara. Munu paluru tjakultjunangi tjintu panya malatja, panya nyara palula arangka Godalu anangu uwankara manta winkitja ngurkantara tjaralku. Palu alatji wangkanyangka wati panya Pilikitjinya kulira ngulu-nguluringu munu wangkangu, "Uwa palya! Alatjitu wanti, kana ngula piruku mukuringkula nyuntunya altiku ngayula pitjala piruku wangkanytjaku."

²⁶ Munu paluru unngu kuliningsi, "Tjinguru Paulalu ngayunya mani ungunyangka kutju ngayulu palunya walatjunkuku." Munu nyara palulanguru paluru rawangku Paulanya altipai palula pitjala nyinanytjaku, munu paluru pula nyinara wangkapai.

²⁷ Ka Paulanya rawa nyinangi ngura nyara palula tjailangka purunypa. Ka yiya kutjara ngarala wiyaringkunyangka mayatja panya Pilikitjinya anu, ka palumpa arangka wati kutjupa ini Putjiyatja Pitjitjanya Judeaku mayatjaringu munu paluru Jew tjuta pukulmankunytjikitjangu Paulanya tjailangka nyinanytjaku wantingu ngura nyara Tjiitjariyala.

25

Paulalu Tjapintja Rome-aku Mayatja Tjiitjanya Nyakunytjikitjangu

¹ Uwa, wati panya mayatja Pitjitjanya Tjiitjarialakutu pitjala manta panya Judeaku mayatjaringu munu tjintu mankurpa nyinara paluru ngura Tjiitjarialanguru ulparira unytju anu Jerusalemalakutu.

² Kaya ngura nyara palula wati tjukurtjara kuranyitja tjutangku munu Jew tjutaku mayatja tjutangku kulu mayatja panya Pitjitjala pitjala tjukurpa Paulanyatjara tjakultjunangi panya paluru kura tjuta palyantjitja.

³ Munuya palula pulkara tjapiningi alatji wangkara, "Wanyu nganana pukularinytjaku wati pala Paulanya malakungku iyala nyanga Jerusalemalakutu." Alatjiya ngunti tjapiningi panya nganmanytjuya wangkara kulinigi Paulanya malakungku iyannyangka wanara ngururpa iluntankunytjikitjangku.

⁴ Palu Pitjitjalu tjanala wangkangu, "Wiya! Ngayuku tjaultji tjutangku Paulanya kanyini ngura nyara Tjiitjariala, ka ngayulu tjukutjuku nyinara malaku ananyi.

⁵ Ka nyura uti mukuringkulampa wati kuranyitja mankurpa ngayula tjungu iyanma. Kaya paluru tjana ngura nyara palula palunya nyakula ngayula tjakultjungkuku ara palunyatjara. Tjinguru paluru mulapa kura palyanu, munta tjinguru wiya."

⁶ Munu wati panya mayatja Pitjitjanya tjintu tjuta piruku tjanala nyinangi Jerusalemala tjinguru tjintu 8, tjinguru 10. Munu palulangurulta paluru malaku anu Tjiitjarialakutu. Ka wati panya Jew kuranyitja tjuta kulu palula tjungu anu munuya ma-wirkanu. Ka mungawinki mayatja panya paluru ruuma panya kuutpa wangka-paikutu anu munu tjarpapa mayatjaku panya tjiyangka nyinakatingu. Munu paluru tjaultji tjutangka wangkangu Paulanya altira ngalyakatira palula kuranyu ngaratjungkunytjaku palula tjapira palunya ngurkantankunytjikitjangku.

⁷ Ka tjana Paulanya wirkakatinyangka wati panya Jew kuranyitja tjuta palula para-ngarala arintanu. Munuya paluru tjana pulkara alatjitu ngunti palunya kuranyitja tjakarurungku wangkara-palku panya tjukurpa palunya tjananyaya mulamulangku wangkanytja wiya tjana ngunti wangkangi tjana mirpanarira.

⁸ Ka Paulalu wangkangu palurunku walytjangku kulira, "Ngayulu kura kutjupa kutjupa palyantja wiyatu anangu nyanga Jew tjutaku, mununa timpula kulu kurantja wiyatu, mununa mayatja pulka Tjiitjanya kulu kurantja wiyatu."

⁹ Palu Pitjitjanya mukuringangi Jew tjuta pukulmankunytjikitja munu paluru Paulala wangkangu, "Nyuntu Jerusalemalakutu ankunytjikitja mukuringkunyangkampana ngura nyara palula nyuntunya kuutpangka tjungkuku, mununa nyuntumpa mirpantju tjutangku nyuntunya wangkanyangka kulira ngurkantankuku."

¹⁰ Palu Paulalu wangkangu, "Wiya! Ngayulu nyangangka alatjitu ngaranya wali nyanga kuutpa wangkapaangka ungu nyuntu mayatja Tjiitjalawanungku ngayunya ngurkantankunytjaku. Kani nyaaku Jerusalemalakutu iyanma? Panya ngayuluna kura kutjupa kutjupa palumpa tjanampa palyantja wiyatu wati nyanga Jew tjutaku. Ka panyan nyuntu kulu ninti tjukurpa nyanga palumpa.

¹¹ Tjinguru ni nyara mulapa kura pulka palyannyangkampa iluntanama, kana palya iluma. Palu nyangantu niya wiyanguru

alatjitu kuranmananyi tjukarurungku-palku, ka nyuntu ngapartji ngayunya putu unganyi paluru tjana iluntankunytjaku. Palu ngayulu mukuringanyi Rome-aku mayatjangu Tjiitjalu ngayuku tjukurpa kulira ngurkantankunytjaku ngayulu wangkanytjitjangu.

¹² Ka palulanguru wati panya mayatja Pitjitjalu palumpa malpa tjutangka tunguringkula tjana kaputungku tjaalytju wangkara kuliningi. Munu palulanguru Pitjitjalu Paulala wangkangu, "Nyuntu panyan wangkangu Tjiitjanya nyakunytjikitjangku, kana palya kulini nyuntunya palulakutu iyantjikitjangku ngura nyara Rome-alakutu."

Paulanya Katinytja Mayatja Akuripalakutu

¹³ Ka tjiitu mankurpa nguwanpa ngarala wiyaringkunyangka, wati mayatja kutjupa ini Akuripanya pula malanykira pitjangu, minyama ini Punitjanya, ngura Tjiitjarialakutu mayatja pulka Pitjitjanya nyakunytjikitja.

¹⁴ Munu paluru pula rawa nguwanpa nyinangi ngura nyara palula tjiitu tjuta nguwanpa, ka Pitjitjalu tjukurpa panya Paulanyatjara tjakultjunangi wati panya Akuripala, munu alatji wangkangu, "Ngura nyangangka wati kutjupa nyinanyi tjailangka wati panya Pilikitjilu wantikatinytja.

¹⁵ Ka ngayulu mungatu Jerusalemala nyinanyangka Jew tjutaku tjukurtjara kuranyitja tjutangu munu wati tjilpi pulka tjutangu kulu wati palunya kuranmanangi munuya palunya puntura wangkangi. Munuya paluru tjana ngayula wangkangi wati panya palunya kura ngurkantara iluntankunytjaku.

¹⁶ "Palu ngayulu tjanaala wangkangu alatji, 'Panya nganana Tjiitjanya mayatjanmankupai tjutangu wati kutjupangu kura palyannyangka mapalku iluntankupai wiya, palu kuutpangka-wararala tjunkupai kuranmankupai tjutangka mirangka palurunku ara walytjangku tjukarurungku wangkanytjaku. Munula uwankara kulira kura ngurkantankunytjatjanungku kutju palunya iluntankupai.' Alatjina tjanala wangkangu.

¹⁷ Kaya wati paluru tjana ngura nyanga Tjiitjarialakutu pitjangu kuutpangka palunya wangkara kuranmankunytjikitja. Kana ngayulu mungawinki ankula nyinakatingu mayatjaku panya tjiyangka mununa wati kutjupa witunu Paulanya altira ngalya-katinytjaku.

¹⁸⁻¹⁹ Kaya palumpa panya kuraringkupai tjutangu Paulanya ngalya-wirkakatinyangka nyakula uwankara pakara ngarangu munuya palunya kuranmanangi. Kana ngayulu kuliningi tjinguru nyan-ganpa palumpa kuraringanyi kura pulka palyantjitjangu, palu wiya tjanampa aranguru kutjuya palunya alatjinangi. Palu paluru tjana nyanga ngayulu kulintjitja purunypa mulamulangku palunya kuranmankunytja wiyatu. Panya anangu nyanga paluru tjanaya ngunti palumpa mirpanaringi tjukurpa wati ini Jesunyatjara wangkanyangka, panya Jesunya kunyu ilungu palu Paulalu kunyu wangkangi Jesunya ilunytjatjanu pakantja munu kuwari wanka nyinanytja.

²⁰ "Palu ara ngurpangkuna putu kuliningi palula tjapira kulin-tjikitjangku. Mununa palulanguru Paulanya tjapinu, 'Nyuntun mukuringanyi Jerusalemalakutu malaku ankunytjikitja ngura nyara palula kuutpangka kulira ngurkantankunytjaku?'

21 Ka paluru wangkangu, 'Wiya! Ngayulu mukuringanyi Rome-aku mayatja pulkanku Tjiitjalu ngayulu wangkanyangka kulira ngurkan-tankunyitjaku.' Mununi paluru tjaminu ngura nyanga Tjiitjariyala patara kanyintjaku. Kana palyanmanu ngura nyangangka palunya tjaultji tjutangu patara kanyintjaku ngula iyantjikitjangku mayatja panya Tjiitjalakutu." Alatji Pitjitjalu wati panya Akuripala tjakultjunu.

22 Ka paluru kulira wiyaringkula paluru ngapartji wangkangu, "Ngayulu mukuringanyi paluru wangkanyangka kulintjikitja."

Ka Pitjitjalu wangkangu, "Palya, mungawinkin kulilku paluru wangkanyangka."

23 Ka tjiitungka Akuripanya pula Punitjanya mantara wirungka tjarpangu panya mayatjangku kanyilpaingka wiru mulata, munu paluru pula pitjangu wali pulkakutu panya kuutpa wangkapaikutu. Kaya ngura nyanga Tjiitjariyaku mayatja tjuta palula pulala tjunguringu wati tjaultji kuranyitja tjuta kulukulu. Munuya uwankara tjungu ruuma panya palula tjarpara nyinakatingu. Ka mayatja Pitjitjalu tjaultjingga wangkangu Paulanya mantjira ngalya-katinytjaku.

24 Ka Paulanya ngalya-wirkakatinyangka mayatja panya paluru wangkangu anangu tjutangka, "Uwa, mayatja Akuripa munu anangu uwankara, kulilaya! Wati nyanga palunyatjarana kuwari nyurala tjakultjunanyi. Panya wati Jew winkingkuya nyanga palumpa kuraringkula ngayula tjakultjunangi Jerusalemanya ngurara tjutangu munu ngura nyangatja ngurara tjutangu kulukulu. Munuya paluru tjana uwankarangku ngayula mirara wangkangi alatji, 'Wati palatja iluntara rawangku wanka kanyintja wiyangku!'

25 Palu ngayulu paluru tjana kuranmara wangkanytja kulinu mununa wati nyanga paluru kulu palumpa ara walytjangku tjakultjunktunyitja kulinu. Mununa ara uwankara kulintjatjanungku putula kulinigi, 'Kura nyaa palyannyangkaya palunya iluntankunyitjikitja mukuringanyi?' Kani paluru panya tjaminu mayatja Tjiitjalu palunya nyakula ngurkantankunyitjaku, kana palya kulini palunya Tjiitjalakutu iyantjikitjangku ngura nyara Rome-alakutu.

26 Palu ngayulu putu kulini tjukurpa nyaana nyiringka paluru kuran-tja walkatjunktunyitjikitjangku mayatja panya Tjiitjalu nyakula nintiringkunyitjaku? Wati nyangangu kura nyaa palyanu, kana walkatjura? Palu putuna kulini. Munu nyangana kuwari palunya nyuralakutu ngalya-katingu munu nyuntulakutu kulu. Wanyu Mayatja Akuripa, nyuntu palula tjapila palula kulira nintiringkunyitjikitjangku munu paluru wangkanyangka kulintjatjanungku ngayulalta tjakultjura, kana nyiringka walkatjura.

27 Tjinguru paluru kura kutjupa kutjupa palyannyangka nyiringka walkatjunama. Palu wiyangka putu palunya watarku iyani mayatja Tjiitjalakutu tjukurpa nyiringka walkatjunktunyitja wiyangka. Panya Tjiitjanya kulintjikitja mukuringkuku nyaanguruya palumpa kuraringanyi munuya anangura wangkanyi." Alatji Pitjitjalu mayatja Akuripala wangkangi.

26

*Paulalu Palurunku Tjakultjunktunyitja
(Acts 9:1-19; 22:6-16)*

¹ Ka wati panya Akuripalu Paulala wangkangu, “Uwa palya, nyuntunku kuwari walytjangku tjakultjura!”

Ka palulanguru Paulalu marangku uwanmanu palurunku walytjangku wangkanytjikitjangku, munu alatji wangkangu,

² “Mayatja Akuripa! Ngayulu kuwari pulkara pukularinyi ngayuku ara nyuntula tjakultjunkunyitjiktja, panya Jew tjutangkuniya ngayunya kuranmanangi mununiya puntura wangkangi. Kana kuwari nyanga nyuntula mirangka ngarala tjana ngunti wangkanytjtja uwankara wiymananyi alatjitu mununatju ngayuku tjukurpa nyuntula tjukarurungku tjakultjunanyi.

³ Panya nyuntun nganampa Jew tjutaku tjukurku ninti alatjitu nganampa ara tjutaku kulu. Palulanguruna nyuntumpa pulkara pukularinyi kuwari nyuntula wangkanytjiktja. Panya ara nyanga palula tjanalanguruniya ngayunya anangura wangkapai. Kani wanyu wirungku purkarangku kulinma ngayulu wangkanyangka.

⁴ “Panya wati nyanga Jew tjutaya uwankara ngayuku ninti alatjitu panya ngayulu ngura nyara Jerusalemala tjitjinguru alatjitu nyinara pulkaringu ngura walytjanga.

⁵ Ka tjana iritinguru alatjitu ngayuku ninti nyinangi. Tjinguru paluru tjana mukurukulampa ngayunya nyuntula tjukarurungku tjakultjunama panya ngayulu wati Paratji alatjitu nyinanyi. Panya Paratji tjutangku Jew tjutaku ara wanganarangku alatjitu kulilpai tungunpungkunyitja wiyangku panya Jew kutjupa tjutangka waintara.

⁶ Ka nyangana kuwari palumpa tjanampa kukanyaringu, panya Godalu nganampa walytja tjuta iriti kalkunu ilunyangka wankara pakaltjingtjikitjangku kana kalkuntja nyara palumpa mulamularinganyi alatjitu, kaniya palulanguru ngayunya kuranmankupai.

⁷ Palu kalkuntja panya paluru utiringkunyitjaku patara nganana Jew tjutangku Godanya rawangku alatjitu walculpai mungangka kalala kulu. Ka wati wiru, wanyu kulila! Nyanga alatji palyannyangkaya wati nyanga Jew tjutangku ngayunya kukanymanu wiyanguru alatjitu.

⁸ Ka nyura nyaaku wanyu putu mulamularinganyi Godalu ilunytjtja wankara pakaltjingtja wangkanyangka?

⁹ “Palu mulapa ngayulu kuluna nganmanytju tjana purunytju kuliningi Jesuku walytja tjuta kurantjikitjangku wiyanguru alatjitu.

¹⁰ Mununa ngayulu nganmanytju alatji palyaningi Jerusalemala, mununa tjananya witera tjailangka tjarpatjunangi wati tjukurtjara kuranyitja tjutangku ngayunya wankara palyanmankunyangka. Mununa tjana Jesuku walytja tjuta iluntankunyangka ngayulu pukulariratu palyanmanangi.

¹¹ Mununa wali inmatja tjutangka tjarpara rawangku alatjitu palunya tjananya kurara wililytjinganingi Jesuku panya walytja tjuta, mununa tjananya wituwituningi Jesunya wiymanmankunyitjaku. Mununa tjanampa pulkara mirpanarira ngura parari ankupai maliktja tjutaku ngurakutu mununa Jesuku walytja kutjupa tjuta ngura nyara palula tjanala nyinanytja tjuta kulu kuralpai.

¹² “Mununa kutjupa-aralta anangi ngura nyara Tamatjakalakutu. Panya ngayunya tjukurtjara kuranyitja tjutangku wankara witu nu ngura nyara palula ankula Jesuku walytja tjutaku pikaringkunyitjaku.

13 Ka wati wiru, wanyu kulila! Kalala nyara palulana tjinu katu ngaranyangka iwarangka anangi, mununa nyangu tili pitalyti pulka ilkarinuru irnyanyangka. Ka tili nyara paluru tjirirpi purunypa wiya pulka mulapa ngayula irnyaningi munu ngayula panya tjungutja tjutangka kulu.

14 Kala uwankara mantangka punkanu. Kana wangka kulinu ngayula alatji wangkanyangka wangka panya Iipurungku, 'Saul! Saul! Nyaakunin titutjarangku kurani? Panya nyuntu rawa tungun-tungunarira nyuntunku walytjangkumpa kurani.'

15 "Kana ngayulu wangkangu, 'Palu ngananyan wanyu?'

"Ka Mayatjalu wangkangu, 'Ngayuluna Jesunya, panya nyuntuin titutjarangku kurani.

16 Palu pakala kuwari panya ngayulu nyuntunya ngurkantanu ngayuku warkarinytjaku, panya ngayulu kuwari nyuntunya witura iyani ngayunya nyanga nyakunyjtatjanungku anangu tjutangka tjakultjunkunyjtaku. Mununa nyuntula ngula piruku utiringkuku, kan pirukutu ngayunya nyakunyjtatjanungku tjanala tjakultjunkuku.

17-18 Kana nyuntunya atunytju wankaru kanyilku anangu Jew tjutanguru munu Jew wiya tjutanguru kulu. Panya kuwarinanta iyani nyara palula tjanalakutu, ka nyuntu tjanala wirkara tjukurpa tjakaruru wangkara nintilku tjana kulira nintiringkunyjtaku, panya paluru tjana mungawalurungka purunypa watarku alatjitu nyinanyi. Ka tjananya nintila Satanta kulilwiyangu wantira kampa kutjuparira Godala kutjunga kulintjaku. Ka tjananya kura palyantjitjanguru Godalu kalypangku pungkuwiyangu wantiku ngayuku mulamularingkunyangka nyakula. Ka palulanguru paluru tjana ngayuku panya walytja kutjupa tjutangka tjunguringkula pukulpa nyinaku.' Alatji Mayatja Jesulu ngayula wangkangu.

19 "Uwa, wati wiru! Ngayuluna mulapa ilkarinuru ngayula utiringkunyangka nyakunyjtajanu mulamularingu.

20 Mununa nyara palulanguru paluru wangkanyangka wanganarangku kulinu mununa anangu tjutangka ngura nyara Tamatjakala Tjukurpa Palya wangkangi. Mununa piruku anangu Jerusalemanyana ngurara tjutangka ngapartji wangkangi tjukurpa panya palunya, mununa palulanguru Jew tjutaku ngura uwankarangka kulu para-pitjalira wangkangi ngura pulka tjutangka munu tjukutjuku tjutangka kulu. Mununa anangu Jew wiya tjutangka kulu wangkangi paluru tjana kulu kulintjatjanungku kura wantira Godalakutu pitjanytjaku, munu kura uwankara wantira palyanyku nyinanytjaku. Kaya kutjupa tjutangu palunya tjananya nyakula kulilku, 'Mulapa paluru tjana Godaku walytjaringu.'

21 Kaya Jew panya kuranyitja tjutangu ngayulu tjukurpa nyanga palunya timpulangka wangkanyangka ngayunya witiu mununiya pulkara pungangi iluntankunyjtikitjangku.

22 Palu Godaluni ngayunya wankarunu nyara palula-arangka mununi rawankutu wankaru kanyiningi tjinu nyanga kuwarikutuwangkara. Ka nyangana kuwari ngarala nyuralalta tjakultjunanyi anangu uwankarangka ngayulu panya nyakunyjtatjanungku anangu tjukutjuku tjutangka munu pulka tjutangka kulu. Palu ngayuluna tjukurpa kuwaritja wangkanytja wiyana, tjukurpa panya palunya tjanu

tjakultjunanyi, panya Moselu tjana wati panya Godaku wangkatjara kutjupa tjutangku kulu iriti wangkangi ngula nyanga alatjirinytjaku.

²³ Uwa, mulapa paluru tjana alatji wangkangi panya Christanya Godalu kalkuntjanya ngula pikatjararingkula iluku munu paluru-warara ilunyttjanu wankaringkula pakalku munu tjukurpa tjukururu anangu uwankarangka tjakultjunkuku tjana kulira palumpa mulamularingkula wankaringkunyttjaku Jew tjuṭa munu Jew wiya tjuṭa kulukulu. Alatjiya wangkatjara tjutangku iriti wangkangi.”

²⁴ Ka Paulalu kuwaripangkutu ngarala wangkanyangka wati panya Pitjitalu puṭu mulamularingkula pakara painu munu wangkangu, “Tjukurpa nyaan wangkanyi? Tjingurun kata kawakawaringu tjukurpa ttjutaku pulkara nintiringkunyttjanu.”

²⁵ Ka Paulalu ngapartji palula wangkangu, “Wati wiru! Ngayuluna kawakawa wiya, mununa tjukurpa tjukururu nyangatja wangkanyi kata palyangku.

²⁶ Panya uwankara nyanga ngayulu nyuntula wangkanytja uti alatjitu ngaranya, kaya tjutangku nyangangi. Ka wati nyanga mayatja Akuripanya kulu ninti nyinanyi. Ka nyangana palula mirangka utingku wangkanyi palumpa nguluringkunyttja wiyangku.

²⁷ Ka wati wiru Akuripa! Nyuntu wanyu mulamularinganyi wati panya wangkatjara nganmanyitja ttjutaku? Uwa, ngayulu ninti. Nyuntu mulapa tjanampa mulamularinganyi tjana panya wangkanyttjtjaku.”

²⁸ Ka alatji wangkanyangka mayatja panya paluru wangkangu Paulala, “Wiya, nyuntu ngayunya puṭu mapalku wituwituni ngayulu Jesuku kuwaritu mulamularingkula palumpa walytjaringkunyttjaku.”

²⁹ Ka Paulalu wangkangu, “Tjinguru kuwari munta tjinguru ngula, palu ngayulu nyurampa Godala tjapini nyanga nyura kuwari nyinara kulintjtja uwankaraku, nyura kulu kulira ngayunya purunyarira Jesuku walytjaringkunyttjaku, palu nyanga purunypa nyinanyttjaku wiya nyanga tjiinangka karpintjana kuwari ngaranya, palu purunypa wiya.”

³⁰ Ka mayatja panya Akuripanya pula nyarumpara pakanu munu mayatja Pitjtjanya kulu munu tjanala ttjungu nyinanyttja tjuṭa kulu.

³¹ Munuya ruuma panya palunya wantikatira urilkutu ma-wangkara pakanu alatji, “Nyaakuya wati nyanga palunya iluntankunyttjikitjangku kuliningi munuya ttjailangka ttjarpatjura wantingu kura palyannyangka-palku?”

³² Ka wati panya mayatja Akuripalu mayatja panya pulkangka Pitjtjala wangkangu, “Wati nyanga palunya nyuntu tjinguru walatjunama ankunyttjaku, palu paluru panya nganmanyttju ttjapinu mayatja Tjiitjalakutu iyantttjaku nyara paluru kulira palunya ngurkantankunyttjaku. Ka alatji ttjapinnyangka nyuntu puṭulta walatjunanyi, palu kuwari nyuntumpa ngaranya mayatja Tjiitjalakutu iyantttjaku.”

27

Paulanya Pautangka Katinyttja Rome-alakutu

¹ Ka palulanguru Pitjtitalu Paulanya Rome-alakutu iyantttjikitjangku kuliningi. Panya ngura nyara paluru manta ini Italila ngururpa ngaranya. Munu kulintttjanungku wati ttjaultti kuranyttja ini Tjuliyattjala wangkangu wati panya Paulanya pautangka katinyttjaku wati

puritjina kutjupa tjuṭa kulukulu. Panya Tjuliyatjalu tjaultji tjuṭa kanyiningi nampa nyangatja 100, munuya paluru tjana utulu kutju ngarangi ini nyanga alatji, *Mayatja Tjiitjaku tjaultji tjuṭa*. Ka nganaṇa kulu Paulala junguringu palula tjanala tjungu ankunytjikitja.*

² Munula uwankara pauta ngura panya Atura-mitiyama-nya ngurarangka tatinu tjaultji panya tjuṭa kulukulu, panya pauta nyara paluru manta panya Aitjala itiwanu ankunytjikitja riti ngarangi ngura kutjupa tjuṭakutu. Munula palulanguru uru pulkawanu mapakanu alinytjara. Ka wati ini Ari-tjakatjanya kulu ngananala tjungu pauta palula anangi. Wati nyanga paluru panya manta ini Matjatunyalanguru panya palumpa ngura tawunu ini Tjitja-lanikanya.

³ Kala pautangka ankula ankula mungaringu munula rawatu ankula ankula tjintungka kutju ma-wirkanu ngura ini Tjaitanta. Ka tjaultji tjuṭaku mayatjangku Tjuliyatjalu Paulaku ngalturingkula wangkangu, “Palya nyuntu unytju pautanguru ukalingkula ankula nyawa nyuntumpa malpa tjuṭa ngura nyanga palula nyinanytja tjuṭa. Kantaya nyakula mai ulytja kutjupa kutjupa tjuṭa kulu uwa katinytjaku.” Kala mulapaṭu anu Paulaku malpa tjuṭakutu nyakunytjikitja.

⁴ Palulangurula pautangka piruku tatinu munula ma-pakanu alinytjara. Munula ankula ankula manta tjukutjuku ini Tjaipuritjala walpa tjukutjukuwanu wati-pitjangi, panya walpa pulkangkulanya pulkara untuningi, kala puṭu nguwanpa anangi walparakutu.

⁵ Munula nyara palulanguru piruku wilurara wati-pitjangi munula uru pulkangka ngururpa anangi manta kutjarangka tjaruwanu manta ini Tjilitjiyala pulala Pampiliyala. Munula palulanguru manta ini Laitjiyala wirkanu ngura ini Mairala.

⁶ Ka ngura nyara palula wati tjaultjiku mayatjangku ngurira nyangu pauta kutjupa Italilakutu ankunytjikitja riti ngaranyangka munulanya nyara palulalta tatitjunu. Pauta paluru kunyu ngura ini Alika-tjanturiyalanguru pitjangu ulpariranguru manta ini Itjipalanguru.

⁷ Kala pauta palula tatira wilurara ma-pakanu munula walparakutu anangi purkara alatjitu tjintu tjuṭa nguwanpa munula ngula kutju ma-ilaringu ngura ini Kanaitatjalakutu. Palu nyara palulangurula puṭu piruku wilurara anangi, panya walpa pulkangku alinytjara wiluraranguru nganampa pauta pulkara untuningi malakukutungku. Ka palulanguru wati panya pauta katipaingku wilurara puṭu ankula kulinu ulparira ankunytjikitjangku. Kala mulapaṭu katakutjara anu ulparira munula manta tjukutjuku ini Kuritala ilaringkula ngura ini Tjalmunila itingka wirkanu kampa kakarara.

⁸ Munula nyara palulanguru manta palula kampa ulparira walpa tjukutjukuwanu anangi wilurara. Purkara alatjitula anangi, munula ankula ankula manta nyara palula ngururpa wirkanu uru patipatingka ngura ini *Pilunpa Wirula*. Ka pala palula itingka ngura tawunu ini Latjiyanya ngarangi. Kala uru patipatingka tjarpara ngarakatingu mantangka itingka urungka.

⁹⁻¹⁰ Munula ngura nyara palula nyinara kuliningi, “Ai! Nganaṇa purkara pitjanyangkaṭu nguwanpa nyinngaringu, kala nyangatja

* 27:1 Verse 1 wangkanyi *nganaṇa* panya nyanga palula-arangka Luke-anya piruku Paulala junguringu.

malaringu nguwanpa piruku wilurara ankunytjaku, panya Jewku inma pulka nganmanypa ngarala wiyaringu.”* Panya wariringkunyaangka pauta tjuṭa puṭu ankupai uru pulkangka ngururpa, panya tjaka nyinngangka walpa pulkanku unṭura uru wiṭatjara katupai, ka tjinguru pauta urangka ngururpa ankunyaangkampa uru katuringkula pautangka tjarpaku, ka pauta panya urangka karalukatiku. Ka nyara palulanguru Paulalu wati panya pauta katipai tjuṭa wangkara ngulutjunangi alatji, “Wati tjuṭa! Kulilaya! Utila piruku ankunytja wiya nyinama! Panya ngayulu kulini tjinguru nganaṇa pautangka piruku tungunpungkula ankunyaangkampa nganaṇala kutjupa kutjupa utiringkuku walpa nyanga pulkangka. Tjinguru uru pulka pautangka tjarpaku, kala tjinguru pauta winki karalukatiku munula uwankara iluku mantangka wirkankunytja wiyatu.” Alatji Paulalu tjananya wangkara ngulutjunangi.

¹¹ Palu wati panya pauta palumpa walytja munu wati pauta katipai kulu puṭu mulamularingangi Paulalu wangkanyangka, ka tjaultji tjuṭaku mayatjangu kulu paluru wangkanyangka kulintja wiyangu wantingi, munu wati panya palumpa pulumpa kutju mulamularingangi paluru pula wangkanyangka.

¹² Panya wari ngaranyaangka uru nyara patipati palula, pauta tjuṭa tjunkula wantira nyinanytjaku, wiru wiya nguwanpa. Kaya palulanguru wangkara kuliningi ankunytjikitjangu. Munuya kulinu, “Palyantila wilurara tjukutjuku urangka ankuku manta nyanga Kuritala itiwanu munula wirkankuku ngura nyara tawunu ini Pinikala, munutila nyara palula pauta tjunkula wantira nyinama wari wiyaringkunytjaku paṭara. Panya ngura nyara palula uru patipati wiru mulapa ngaranya yuu wiru pauta tjuṭa warangka ngaranyaṇtjaku, panya kampa wilurara kutju ala ngaranya, ka panya walpa ulpariranguru munu alinytjaranguru kulu wangkanyangka pauta tjuṭa kulpi-kulpingka kumpira ngarapai palya alatjitu.”

Walpa Pulka Pakantja

¹³ Ka nyara palula ara walpa tjukutjuku wirura wangkangi ulpariranguru. Kaya wati tjuṭangu kuliningi, “Ai! Walpa nyangatjamanti wirumpa wangkanyi nganaṇa ankunytjakumpa!” Munuya pauta panya karpira wantinytjatjanungku araltjanu walpangu unṭuntjaku. Munula manta panya Kuritala itiwanu urangka mapakanu alinytjara wilurara.

¹⁴ Palu nyara palulanguru walpa kutjupa pulka mulapa manta panya Kuritalanguru pakanu ini *Alinytjara Kakararatjanya* munu pulkara alatjitu rurkunyingi.

¹⁵ Munu walpa panya pulka paluru pauta panya pulkara alatjitu unṭuningi ngura wiyakutu, ka katipai tjuṭangu puṭu arkara tjukaruruningi mantakutu ankunytjikitjangu, munuya pakuringkula wantingu, ka walpangu nganaṇanya mantanguru unṭura ma-katingi ulparira wilurara.

¹⁶ Kala ankula manta tjukutjuku mulata ini Kuutala ilaringkula palula walpa tjukutjukuwanu anangi, ka walpa uru kulu

* **27:9-10** Inma pulka nyara palula Jew tjuṭa wiltjanyinaringkunyaangka tjunguringkupai munuya kuka pungkula Godanya ungkupai paluru nyakula tjana kura palyantjitjanguru kalypangu pungkuwiyangu wantinytjaku.

tjukutjukuringu nguwanpa. Ka panya pauta pulkangku pauta tjukutjuku ruupangka karpintja itarikatingi. Kaya ngura nyara palulawanu ankula wati pauta pulka katipai tjutangku pauta panya tjukutjuku ilara ilara paku pulkaringkula nguwanpa wantir'iyanu

17 Palu pulkaraya ilara katura utitjunu pauta panya pulkangka katu, munuya ruupangka karpinu. Munuya nyara palula malangka ruupa kutjupa tjuta mantjinu, munuya pauta pulkangka unguwanungku para-karpira arintanu, pauta pulka paluru witu ngaranytjaku uru pulkangku untura katantankunytjaku-tawara. Munuya paluru tjana alatji kulira nguluringangi, "Kuwarintilanya walpa nyanga pulkangku manta kutjupakutu untura katinyi ulparira ngura panya ini Tjaititjalakutu. Ngura nyara palula itingka panya uru matartjaringu ngati mulapa wiya, ka tjinguru pauta nyangangku uru ungu manta pampulku ka mantangku witera kanyilku, ka tjinguru uru witajara pulkangku pauta pungkula katantara minyaminyara wiyalku." Alatjiya kulira nguluringangi, munuya palulanguru tiinta panya pulka katu ngarapainya tjarura karpira tjunu, walpangku manta tartjakutu untura katinytjaku-tawara. Ka palulanguru walpangku pauta panya purkarangku untura katirinangi.

18 Palu walpa paluru rawa mulapa pulkara rurkuningi mungangka kulu munu pauta panya pulkara alatjitu untuningi. Ka mungawinki wati panya tjutangku luuta pulka tjuta panya pauta ungu ngarinytja tjuta mantjira urungka waningi pauta panya uparingkunytjaku.

19 Munuya rawa ankula ankula piruku tjintu kutjupangka kutjupa tjuta ngapartji urungka waningi ruupa tjuta, tiinta pulka tjuta, punu kutjupa kutjupa tjuta kulu.

20 Ka walpa paluru rawangku pauta panya nganananyatjara pulkara untura uritjinganangi. Kanti wampa tjintu tjuta ngarala wiyaringangi ngangkalingku tjutura kanyinnyangka, panya ngana tjirirpi nyakunytja wiya alatjitu, kililpi tjuta kulu. Munya palulanguru pulkara nguluringkula kulinangi, "Kuwarintila uwankara alatjitu iluku ananga kutjupa malaringkula wanka nyinanytja wiya."

21 Munuya wati panya paluru tjana mai ngalkuntja wiya pulkara alatjitu wararingi. Ka palulanguru Paulanya tjanala kuranyu pakara ngarangu munu tjanala wangkangi alatji, "Wati tjuta! Uti nyara panyatja nganmanytju ngayulu wangkanyangka kulinma, munula manta nyara Kuritalatu ma-nyinama luuta nyanga pulka tjuta urungka waninytjaku-tawara. Tjinguru ngana ngura nyara palula nyinanyangkampa walpangku puu katantanama pauta nyanga palunya.

22 Palu kuwarina nyuranya wangkanyi nguluringkunytja wiya kurunpa raparingkunytjaku, panya pauta nyangatja katakatira minyaminyaringkuku, palu nyuntu ngana uwankara ilunytja wiya wankaringkuku.

23 Kulilaya! Ngayulu panya Godanya wal kulpai, mununa ngayulu palumpa walytja nyinanyi. Ka mungangka Godalu palumpa angelpa iyanu ngayulakutu.

24 Ka paluru alatji ngayula wangkangu, 'Paul! Nguluringkunytja wiya ngarama! Panya kuwari Godalu nyuntunya wankarunkuku munu paluru wati nyanga nyuntula tjungu pautangka nyinanytja uwankara kulu ngalunytjungkutu wankarunkuku panya nyuntu

tjanampa tjapinnyangka paluru kulinu. Munu paluru nyuntunya mayatja Tjiitjala wankaru wirkakatiku, ka nyuntu nyara palula mirangka ngaraku paluru nyuntunya kulira ngurkantankunytjaku.' Alatji angeltu wangkanga ngayula.

²⁵ Ka wati wiru tjuta! Uti nyura raparingama panya ngayulu Godalu wangkanyangka kulira mulamularinganyi alatjitu, ka panya angeltu wangkanytja mulapa alatjitu alatjiriku.

²⁶ Palu walpa nyanga pulkangku pauta nyanga untura katirinkuku manta tjukutjukukutu, ka mantakutu ilaringknyangka mantangku pauta nyangatja witera kanyilku." Alatji Paulalu wangkangi tjanala.

²⁷ Ka panya walpangku nganananya rawangku munga 14 untura katirinangi uru pulkangka ini panya Aturi-yatikala. Ka munga pala palula wati panya pauta katipai tjutangku kulinu, "Mantakutu-mantila nguwanpampa ilaringu."

²⁸ Munuya ayana tjukutjuku ruupa warangka karpira urungka waningu uru unngu manta pampura mitjuramilara ngati nyakunytjikitjangku. Munuya pampuntjatjanungku nyangu panya uru paluru nampa 120 ngarangi tjaru nguwanpa ngati pulka mulapa wiya. Kaya piruku ngula tjukutjuku rawa nguwanpa ankula pirukutu ayana panya palunya waningu ruupangka panya karpintitja. Munuya manta unngu pampuntjatjanungku nyangu, "Munta mulapa uru nyangatja tjukutjuku ma-tartjaringu nampa 90 kutju."

²⁹ Ka wati panya pauta katipainya ngulu-nguluringu alatji kulira, "Kuwarintilampa pulingku uru unngunguru atura alalku pauta nyangatja." Munuya nyara palulanguru ayana panya ini aingka kutjara kutjara ruupangka karpintja tjuta urungka unngu waningu ukalingkula manta unngutjangka tjarpara pauta palunya witera kanyintjaku pulikutu ilaringkunytjaku-tawara. Munuya nyara palulanguru tjanampa god ngalya-ngalya tjutangka tjapiningi mapalku tjinturingkunytjaku mukuringkula. ³⁰ Ka wati pauta katipai kutjupatjara mukuringangi kampangka ankunytjikitja pauta panya pulka wantikatira. Munuya paluru tjana pauta tjukutjuku kampangka araltjara tjarunu urukutu wati panya pauta pulkangka nyinanytja tjutangku ngunti kulintjaku alatji, "Munta, aingka panya kutjupaya tjinguru kuranyunguru waningu." Palu wiya.

³¹ Ka Paulalu tjananya pauta kulunypa urukutu tjarunnyangka nyakula wati tjaultji tjutaku mayatjangka wangkangu tjaultji tjutangka kulu alatji, "Wati nyanga pauta katipai tjuta uti nyinama pauta nitingku katinytjikitja. Palu tjinguru tjana wantikatinyangkampa nyura pauta nyanga palunya putu mantangka wirkakatiku munu nyura urungkatu iluku."

³² Kaya palulanguru wati panya paluru tjana pauta tjukutjuku tjarunnyangka tjaultji tjutangku ruupa ngururpa katanu, ka pauta paluru punkara urungka tjarpara wiyaringu.

³³ Ka ngalya-tjinturingkunyangka Paulalu tjananya pulkara wangkara wituwituningi mai ngalkuntjaku. Munu wangkangu, "Kulilaya! Kuwari nyanga tjintu 14-aringu panya nyura ngulungku mai wantira ngalkuwiya rawa nyinanyangka.

³⁴ Kana nyuranya kuwari wangkanyi mai ngalkula paljtjaringkula kunpuringkunytjaku, munu wanka nyinanytjaku. Rapariwaya panya

nyura kuwari pika wiya alatjitu wankaru mantangka wirkankuku."

³⁵ Munu alatji wangkara wiyaringkula Paulalu mai mantjira palula tjanala mirangka Godanya walkura wangkangu, "Wirungkulanyan mai nyangatja ugu!" Munu palulanguru paluru mai katantara ngalkuningi.

³⁶ Kaya uwankarangku palunya ngalkunyangka nyakula raparingu munuya tjana kulu mai mantjira ngalkuningi uwankarangku.

³⁷ Panya wati paluru tjanaya nampa nyanga alatjitu pauta nyanangka nyinangi, 276, tjuṭa mulapa.

³⁸ Munuya uwankarangku mai tjana mukuringkunyitja ngalkula paljaringu. Ka luuta kutjupa tjuṭa pauta unngu ngaringi mai panya wiita tjuṭa yakutja pulka tjuṭangka, panya mai palunyaya katingi Italilakutu. Kaya wati nyanga tjuṭangu pauta uparingkunyitjaku yakutja maitjara palunya tjananya uwankara mantjira pautanguru waningu urungka.

Pauta Katakatira Minya-minyaringkunyitja

³⁹ Ka tjiṭu pakannyangka wati pauta katipai tjuṭangu manta ngaranyangka nyakula puṭu ngurkantanangi, "Ngura yaalitja nyan-gatja?" Palu nyanguya uru patipati ngaranyangka manta palyatjara puli wiyatjara munuya kulinu, "Utila pauta nyara palulakutu katima munu manta pala palyangka nyinatjunama."

⁴⁰ Munuya palulanguru ruupa panya aingkatjara tjuṭa katantara aingka panya tjuṭa wantir'iyanu urungka. Ka panya pau-tangka malarku punu wara tjarukutu ngarangi watingku uritjin-gara pauta tjukarurura katirinkupai. Kaya nganmanytju punu palunya ruupangka tjungura karpinu uru panya pulkangu uritjin-gara katantankunyitjaku-tawara. Munuya palulanguru ruupa panya palunya araltjanu punu panya palunya uritjingara pauta tjukarurura katirinkunyitjikitjangku. Munuya tiinta kutju katu lipira utitjura karpinu pautangka kuranyu pauta palunya walpangku unṭura katinyt-jaku manta palyakutu.

⁴¹ Palu pauta mulya mantangu witiṅu. Ka uru wiṭatjara pulkangu pitjala malarkunguru pauta panya palunya pulkara pungkula katantaningi.

⁴² Kaya tjaultji tjuṭa mukuringangi wati panya puritjina tjuṭa iluntankunyitjikitja urungka tjarpara kumpira ankunyitjaku-tawara.

⁴³ Palu wati panya tjanampa mayatjangku Tjuliyatjalu painu Paulanya tjananya iluntankuwiyangu wantinytjaku. Munu tjananya wangkangu, "Urungka tjarpapai tjuṭa! Urungkaya wararakati, munuya ankula mantangka wirkara!"

⁴⁴ Ka nyura ngapartji urungka puṭu tjarpapai tjuṭa! Punu pala pau-tanguru katakatinytja tjuṭa mantjila munuya tatira mantakutu ara!" Kala mulapaṭu nyanga palunya palyara uwankara wankaru wirkanu mantangka, ka pauta panya paluru katakatira minya-minyaringu alatjitu urungka ngururpa.

¹ Uwa, mantangkala wankaru wirkanu munula nintiringu panya manta nyanga paluru uru pulkangka ngururpa ngaranya manta ini Maltanya.

² Ka nyara palula nganannya minanku puyiningi, ka wari pulkaringu. Kaya anangu panya Maltanya ngurara tjutangku nganannya nyakula nganampa ngalturingu munulampa waru tilinu munulanya wirura atunymanangi ngura nyara palula nyinanyangka.

³ Ka waru tjukutjukuringkunyangka Paulalu ankula waru tjiwuru tjuṭa urara ngalya-katingu. Munu paluru warungka tjunkunytjikitja ilaringu warukutu, ka warungku kampanyangka liru puṅunguru ngulu ngalya-pakanu munu Paulanya manyirka patjara tjakatjura waraly-waralyngarangi.

⁴ Kaya anangu panya Maltanya ngurara tjutangku nyangangi lirungku patjara waraly-waralyngaranyangka. Munuya wangkangu, “Awari! Wati nyanga paluru-manti miriputju alatjituṅpa, ka nganampa god ini ‘Ngapartji Pungkupainya’ tjinguru mukuringanyi paluru ilunytjaku. Panya paluru urungka tjarpara ilunytja wiyatu wanka wirkanu, palu nyanga lirungku palunya patjanu, ka kuwari nyangalta paluru ilunyi.”

⁵ Palu Paulalu manyirka warungka itingka uri-uritjinganu, ka liru panya paluru punkanu warungka ka kampangu. Ka Paulalu lirungku patjannyangka maṅangka wankankutu ngarala waru nganytjiningi pikatjararingkunyitja wiyangku.

⁶ Kaya anangu tjutangku pulkara nyakula kuliningi, “Kuwarinti paluru manyirka raa-raaringkuku mununti punkara iluku.” Munuya rawangku alatjitu palunya nyangangi, palu kutjupa kutjuparinytja wiya alatjitu ngarangi. Kaya ilunytja wiya rawa wanka ngaranyangka nyakula kampa kutjupa kulinu munuya wangkangu, “Ai! Nyanga paluru alatjitu-manti god kutjupampa nyinanyi.”

⁷ Ka ngura nyara Maltala tjanampa mayatja nyinangi ini Papiliyatjanya. Ka wati nyara palumpa ngura ila ngarangi. Ka paluru nganannya wirungku altingu palumpa ngurangka ankula ngarinytjaku. Kala ngura nyara palula tjiṅtu maṅkurpa nyinangi kalanya paluru pukultu alatjitu kanyiningi.

⁸ Ka wati panya palumpa mama nganmanypa pikatjara tju-ritja waruringkula ngaringi. Ka Paulalu kulinu paluru pikatjara ngarinyangka munu palumpa ruumangka tjarpara palumpa Godala tjapiningi. Munu palula manyirka tjunkula palunya palyarungunu.

⁹ Kaya nyara palulanguru anangu pikatjara kutjupa tjutangku kulinu munuya tjana kulu ngalya-pitjangu Paulalakutu. Ka tjanampa kulu Paulalu Godala tjapira tjananya uwankara palyarungunu.

¹⁰ Ka anangu ngura nyara palunya ngurara tjutangkulanya wirunmanangi munulanya wiru tjuṭa ungangi. Munuya nganana ankunytjikitja ritiringkunyangka paluru tjana mai kuka pulka, kutjupa kutjupa tjuṭa kulu nganannya unglu'iyanu katinytjaku.

Paulanya Rome-lakutu Ankunytja

¹¹ Kala ngura nyara Maltala pira maṅkurpa nyinanytjatjanu pauta kutjupangka tatinu piruku ankunytjikitja Rome-alakutu. Pauta nyanga paluru panya ngura Alike-tjantu-riyalanguru nganmanypa

pitjangu Maltalakutu munu wari panya pulka ngarala wiyaringkunyjtaku patara ngarangi ngura panya manta tjukutjuku palula. Ka pauta nyanga palula kuranyu watiwati kutjara pununguru palyantja ngarangi, panya palumpa tjanampa god ini nyanga pula Kaatjanya munu Palatjanya pula kutarara.

¹² Kala pauta palula tatira ma-pakanu alinytjara munula ankula manta kutjupangka wirkanu ngura ini Tjaira-kuutjala, munula nyara palula nyinangi tjintu mankurpa.

¹³ Munula ngura nyara palulanguru piruku ma-pakanu alinytjara munula ankula manta kutjupangka wirkanu manta pulkangka ini Italila munula ngura tawunu ini Rikiyamala wirkara ngaringu munga kutju. Ka mungawinki walpa pulka wangkangi ulpariranguru, munulanya wala pulkanku untuningi alinytjara ankunyangka kala nyara palulanguru tjintu kutju wiyaringkula wirkanu ngura ini Putiyalila.

¹⁴ Munula ngura nyara palula pautanguru ukalingkula anangu Jesuku walytja kutjupa tjuta ngurira nyangu, kalanya paluru tjana tjapinu palula tjanala tjirirpi 7 nyinanyjtaku. Kala tjirirpi 7 ngarala wiyaringkula nyara palulangurulta tjina anu Rome-lakutu.

¹⁵ Kaya Jesuku walytja Rome-ala nyinapai tjtutjangu kulinu nganana ngururpa pitjanytja munuya ngaparikatira nganampa ngururpa pataningi tjara kutjupa ngura ini Apiyatjala tjuwa tjtutjanga itingka, ka tjara kutjupa pataningi ngura ini *Ngaripai Mankurtjarala*. Kaya paluru tjana nganampa ngaparikatira patannyangka Paulalu nyakula pulkara pukularingu munu Godanya pukularira walkuningi.

Paulanya Rome-la Wirkankunytja

¹⁶ Munula nyara palulanguru Rome-lalta wirkanu. Ka tjaultjiku mayatjangku Paulanya tjailangka tjarpatjunkuwiyangku wantingu munu wali kutjupangka mauntalpa tjunu kutju nyinanyjtaku, ka tjaultji kutju palula tjungu nyinangi munu palunya atunymanangi kampangkatu ankunytjaku-tawara.

¹⁷ Ka ngura nyara palula tjintu mankurpa nyinanytjatjanungku Paulalu wati kutju witura iyanu ankula Jew nyara palunya ngurara tjtutaku mayatja tjuta altinyjtaku wati panya kuranyitja tjuta. Kaya pitjala palula tjunguringkula nyinakatingi. Ka tjanala wangkangu Paulalu alatji, "Walytja tjuta! Ngayulu kura kutjupa kutjupa palyantja wiyatu ngayuku walytja tjuta kurantjikitjangku. Mununa nganampa tjamu tjtutaku kulu ara tjuta kuralwiyatu. Palu ngayunyaia Jerusale-mala witinu tjukurtjara kuranyitja tjtutjangu mununiya tjaultji tjuta ungu tjailangka tjunkunytjaku.

¹⁸ "Ka paluru tjana ngayunya pulkara tjapira nguriningi mununiya putu kuliningsi, 'Nyaangurula wati nyangatja iluntankuku? Panya nyanga paluru kura palyantja wiyatu.' Munuya kuliningsi ngayunya walatjunkunytjikitjangku.

¹⁹ Palu Jew tjuta ngura nyara palunya ngurara tjtutaya mukuringkunyjtja wiyatu ngayunya walatjunkunytjaku. Kana palulanguru tjaultjiku mayatjangka tjapinu ngura nyanga Rome-lakutu ngayunya iyantjaku, panya ngayulu mukuringangi mayatja panya Tjiitjalu ngayuku ara ngayulu wangkanyangka kulira ngurkantankunytjaku. Palu ngayulu ngayuku walytja tjuta kuranmankunytjikitja pitjanytja wiyatu.

20 Kana nyanga palunya jakultjunkunytjikitjangku kuwari nyuranya altingu. Panya nganana Jew tjutangku rawangku patanangi Godalu kalkuntjitjaku ngananalakutu wankarunkupainya iyantjaku. Kana paluru panya pitjanytjitjaku mulamularinganyi alatjitu, kaniya tjukurpa nyanga palulanguru ngayunya tjiinangka karpintjaku ungu.”

21 Kaya Jew tjutangku wangkangu, “Nganana Jerusalemalanguru lita mantjintja wiyatu tjukurpa nyuntunyatjara. Ka nganampa walytja kutjupa ngura nyara palulanguru pitjala nyuntunyatjara wangkara kuranmankunytja wiyatu.

22 Palu nganana kulinu tjukurpa nyangatja kutju panya anangu tjutangkuya kunyu ngura winkitjangku Jesuku walytja tjuta kuranmankupai nyinanyi. Palulangurula mukuringanyi nyuntu wangkanyangka kulintjikitja.”

23 Munuya Paulalu tjana tjintu ngurkantanu piruku tjunguringkula wangkanytjikitjangku. Munuya tjintu panya palula wati panya Jew kuranyitja winki tjunguringkula anu wali panya Paulanya nyinanytjijakutu. Ka Paulalu tjanala kalala wara wangkara mungartjiringu. Munu tjanala nyanga alatji wangkangi, panya Godalu anangu tjuta palumpa mulamularingkunyangka kutju walytjanmara mayatjarira kanyilpai. Munu palunya tjananya Jesuku pulkara mulamularingkunytjaku wangkangi tjukurpa nyangatja, “Panya Godalu iriti wankarunkupainya iyantjikitjangku kalkunu. Ka kalkuntja panya paluru wirkanu. Paluru panya ini Jesunya. Panya kalkuntjitja nyanga palunya Moselu tjana wangkatjara tjutangku iriti nyiringka walkatjunu, ka nganampa kulira mulamularingkunytjaku ngaranyi.” Alatji Paulalu tjananya wangkangi tjana walytjangku kulira mulamularingkunytjaku Jesuku.

24 Kaya tjara mulamularingu paluru wangkanyangka, palu kutjupa tjutangkuya mulamularingkunytja wiyangku wantingi.

25 Munuya palulanguru wangkara pika-pikaringkula tjara-tjararingu munuya pakara ankunytjikitjangku kuliningi. Palu Paulalu piruku tjukurpa kutju tjanala alatji wangkangu, “Panya Kurunpa Milmilu wati wangkatjara Aitjayalawanungku nyuntumpa nganampa panya tjamupitingka tjakarurungku wangkangi. Alatji paluru Aitjayala wangkangu,

26 ‘Ankula wangka anangu nyanga tjutangka nyanga alatji, “Nyura tjukurpa wangkanyangka rawangku kulilku, palu nyura kulira kulira putu alatjitu tjukurku nintiringkuku.

Munu nyura piruku kurungku rawangku nyakula nyakula putu alatjitu ngurkantankuku.

27 Panya anangu nyanga paluru tjanaya kurunpa wituwitingu tjukurpa tjakaruru kulintjaku-tawara.

Paluru tjanaya pinangku putu kulilpai, munuya kurungku kulu putu nyakupai kuru patiringkunytjatjanungku.

Tjinguru tjana tjakarurungku kulirampa mulamularingama alatjitu kuru alangku nyakunytjatjanungku, munu pinangku kulintjatjanungku kulu.

Munu tjinguru paluru tjana kulintja palyangkumpa tjukurpa uwankara wangkanyangka tjakarurungku kulinma.

Munuya nyanga alatji palyarampa, kampa kutjuparinytjatjanu ngayu-lakutu malaku aruringama.

Kaṇa palulanguru tjananya palyarungunma." ' '*

28-29 Ka panya nyurampa ngaranyi kuwari nyanga alatjitu nintiringkunyjtaku munu kulintjaku panya Godalu wankarunkupainya iyaṇu aṇangu Jew wiya tjuṭaku kulu nyurampa kutjuku wiya. Ka nyara paluru tjana wangaṇarangku kulilku."*

³⁰ Ka Paulanya wali panya palula rawa alatjitu nyinangi yiya kutjara, munu payamilalkatingi wali nyara palula nyinanytjikitjangku. Munu aṇangu tjuṭa palunya nyakunyjtikitja pitjanyangka paluru wali nyara palula tjananya tjarpatjunkupai.

³¹ Munu paluru Godaku tjukurpa tjakultjura aṇangu tjuṭangka Jesunyatjara wangkapai. Munu tjanala alatji tjakultjunkupai panya Godalu aṇangu tjuṭa Jesuku mulamularingkunyangka walytjanmankupai munu palunya tjananya mayatjarira kanyilpai. Uwa, paluru ngulu wiyangku rapangku alatjitu tjukurpa nyanga palunya wangkapai. Kaya aṇangu kutjupa tjuṭangku palunya pailwiyangku wantipai paluru tjukurpa wangkanyangka.

* 28:27 Aitjayaku 6:9-10 * 28:28-29 Wati kutjupangku kunyu verse 29 walkatjunu munu mala tungunu Luke-aku tjukurta nyanga alatji - *Ka Paulalu tjukurpa nyanga palunya wangkanyangka wati panya Jew tjuṭa pakara uwankara anu munuya paluru tjananku mirpanarira ngaparku wangkangi.*

Lita Paulalu Walkatjura Iyantja Ngura Rome-alakutu Romans Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjura iyantja Jesuku walytja tjutakutu ngura nyara Rome-ala nyinanytja tjutakutu. Lita nyangatja Paulalu walkatjuru ngura ini Karintjala nyinara tjinguru yiya nampa nyangangka AD 57-ta.

Nyangatja lita pulka Paulalu walkatjuru tjukurpa pulka Jesunyatjara, kala uti purkarangka nyakula wangkama munu pulkara kulinma panya tjukurpa wiru mulapa Godalu palula utira nintintja. Lita nyangangka Paulalu tjakultjunanyi alatji, panya anangu uwankara alatjitu kura nyinanyi munuya Godalanguru mauntalparingu, ka Jesunya kutju palya mulapa nyinanyi kura wiya alatjitu. Kala uti Jesuku mulamularingama panya paluru nganampa pulkara mukuringkupai munu panya nganana kura palyantjitjangu nganampa ngalkilpa ilungu Godalu nganananya palumpa mulamularingkunyangka kalypanku wantinytjaku munu nganananya walytjanmankunytjaku. Alatji Paulalu walkatjura utiningi Jesuku walytja tjutangu tjukururungku kulintjaku ngunti kulira Godalanguru paturingkunytjaku-tawara.

Tjukurpa nyanganpa ngarinyi:

1:1-17 Paulalu tjukurpa nganmanyitja wangkanytja

1:18—3:20 Anangu uwankara kura palyalpai

3:21—8:39 Godalu nganananya kura palyantjitjangu kalypanku wantipai

9:1—11:36 Anangu Jew tjutaku Godalu palyantja

12:1—15:13 Jesuku walytja tjuta wirura tjukururu nyinanytjaku

15:14—16:27 Paulalu tjukurpa malatja wangkanytja munu malpa tjutangka wangkanytja

Paulalu Nganmanytju Wangkanytja

¹ Jesuku walytja tjuta! Ngayuluna Paulalu lita nyangatja walkatjunanyi nyurampa ngura pala Rome-ala nyinanytja tjutaku. Panya ngayulu Jesuku Christaku wanganara warakaripai. Panya Godaluni ngayunya ngurkantara tjuru palumpa tjukurjtjara warakarinytjaku mununi witura iyanu Tjukurpa Palya ngura winkingka ankula tjakultjunksunytjaku.

² Panya paluru tjukurpa nyanga palunya iritilpi kalkunu, ka panyaya palumpa wangkatjara tjutangu kulira walkatjunangi nyiri panya milmita. Kana tjukurpa nyanga palunya kuwari wangkanyi.

³⁻⁴ Tjukurpa nyangangu wangkanyi Godaku katja Jesunya Christanya panya nganampa mayatja. Panya paluru anangu nganananya purunypa mantangka nyinangi Davidaku panya walytjapitinguru itiringkula. Ka ngula paluru ilunyangka Kurunpa Milmitu palunya

witulya pulkangku wankara pakaltjinganu, kala nyanga pakaltjingtjatanguru nganana mulamularingkula kulilpai, "Mulapa paluru Godaku katja nyinanyi."

⁵ Nyara paluruṅi mukulyangku ngurkantara iyanu, Jesulu panya, Tjukurpa Palya palumpa ankula tjakultjunkunytjaku ngura winkingka anangu tjutangku kulira Jesuku mulamularingkunytjaku munu Godala wanganarangku kulintjaku.

⁶ Munu panya nyuranya kulu Jesulu ngurkantara tjunu Rome-ala nyinanytja tjuta kulu palumpa walytjaringkunytjaku, kana ngayulu mukuringanyi nyurala ma-pitjala tjukurpa tjakultjunkunytjikitja.

⁷ Mununa lita nyangatja nyurampa walkatjunanyi, panya Godanya nyurampa pulkara mukuringanyi, munu panya nyuranya ngurkantara tjunu palumpa walytja mulapa nyinanytjaku.

Uwa, ka Mama Godalu Mayatja Jesulu Christalu kulu nyuranya pukultju pulkangku kanyinma munu nyuranya kurunpa rapara pukulmanama.

Paulanya Tjanalakutu Ankunytjikitja Mukuringkunytja

⁸ Uwa nganmanytjuna nyangatja wangkanyi panya anangu ngura winkitjangku nyuranya kulinu nyura Jesuku pulkara mulamularingkunytja. Kana ngayulu palulanguru nyurampa pukularira Godanya walkuni Jesunya Christanya kulu.

⁹⁻¹⁰ Panya ngayulu Godala nyurampa rawangku tjapilpai watarkurinytja wiyangku. Nyangatjana tjakarurungku wangkanyi panya Godanya ngayuku ninti. Kana Godala kutjunga wanganarangku kulira palyalpai kurunpa winkingku mununa Tjukurpa Palya tjakultjunkupai palumpa katja Jesunyatjara ngura winkingka. Palu ngayulu rawangku Godala tjapini paluru mukuringkula ngayunya nyuralakutu iyantjaku, kana tjinguru kuwari nguwanpa ma-pitjala nyurala tjunguringkuku paluru kulira ngayunya iyannyangka.

¹¹ Panya ngayulu pulkara mukuringanyi nyuranya nyakunytjikitja munu nyuranya kurunpa pukulmara kunpuntjikitja Kurunpa Milmiltu ngayunya nintinnyangka.

¹² Palu nyura kutju wiya, ngayulu kulu nyuralanguru kunpuringkunytjikitja mukuringanyitu. Panya ngayulu Godaku mulamularingkunyangka nyura ngapartji nyakula mulamularingkula kunpuringkuku, ka ngayulu kulu nyura mulamularingkunyangka nyakula kunpuringkukutu.

¹³ Walytja wiru tjuta, kulilaya! Ngayuluna rawangku kulinungi nyuralakutu ma-pitjanytjikitjangku palu putulirinyina, panya kutjupa kutjupangkuni rawangku angatjunanyi. Panya ngayuluna mukuringanyi nyurampa ngurangka wirkara anangu kutjupa tjutangka Tjukurpa Palya Jesunyatjara wangkanytjikitja tjana kulu Jesuku walytjaringkunytjaku. Panya ngayulu ngura winkingka tjukurpa panya palunyaṅu tjakultjunangi, kaya kulira Jesuku mulamularingangi, nyara palu purunypa palyantjikitjana mukuringanyi nyurampa ngurangka.

¹⁴ Panya Godalu ngayunya warka nyangatja ungu, ka ngayuku ngaranya alatjitu anangu kutjupa uwankarangka Tjukurpa Palya

tjakultjunkunytjaku ngura pulka tjuťangka, munu ilyťjinka nyinapai tjuťangka, nintipuka tjuťangka munu ngurpa tjuťangka kulukuľu.

¹⁵ Uwa, ngayuku mulapa ngaranyi anangu uwankarangka wangkanytjaku, mununa nyurala Rome-ala nyinanytja tjuťangka kulu Tjukurpa Palya tjakultjunkunytjikitja mukuringanyi.

Godalu Jesuku Mulamularingkunyangka Kutju Tjukarurunmankula Walyťjanmankupai

¹⁶ Uwa, tjukurpa nyanga paluru pulka mulapa ngaranyi wankarunkupainyatjara. Kańa kuntaringkuwiyangku rapangku wangkapai anangu tjuťangka, panya tjana tjukurpa nyanga palumpa mulamularingkunyangka Godalu tjananya uwankara wankarunkuku, Jew tjuťa munu palulanguru anangu kutjupa tjuťa kulu panya Jew wiya tjuťa.*

¹⁷ Panya tjukurpa nyanga palulawanungku Godalu nintilpai nyanga alatji anangu Jesuku Christaku mulamularingkunyangka kutju Godalu palunya tjukarurunmankula walyťjanmankupai. Uwa mulapa, palumpa mulamularingkula rapa ngaranyangka kutju Godalu tjukarurunmankupai palumpa walyťjaringkunytjaku. Panya nyiringka iriti walkatjunkunytja alatji ngaranyi,

“Anangu Godaku mulamularingkunyangkampa Godalu palunya tjukarurunmankuku, ka paluru wanka titutjara nyinaku palula tjungu.”*

Anangu Uwankara Kuratjara Nyinanyi

¹⁸ Panya Godanya mirpanaripai anangu tjuťangku palunya kulira wantinyangka munu kura kutjupa kutjupa tjuťa rawangku palyannyangka. Panya paluru tjana kura palyantjatjanungku tjukurpa tjukaruru wantipai munuya palyanyku nyinanyťjikitjangku kulintja wiyangku wantipai. Ka tjana nyanga alatji rawangku palyannyangka Godanya tjanampa pulkara mirpanarinyi.

¹⁹ Panya Godalu manta, ilkari kutjupa kutjupa uwankara palunu nganana nyanga palunya nyakula nintiringkula kulintjaku, “Muntauwa, mulapa nyangatja Godalu paluntja uwankara.” Palu tjana alatjitya nyakula kulira wantinyi.

²⁰ Anangu tjuťangku Godanya witulya pulkanya puťu nyanganyi kurungku, palu palya, panya nganmanypanguru alatjitu Godalu paluntja uwankara uti ngarangi anangu tjuťangku kurungku nyakunytjaku, munu nyakula kulira nintiringkunytjaku panya Godanya witulya pulka nyinanyi uwankarangka waintarinytja. Uwa, anangungku puťu Godanya wiymananyi panya Godalu paluntja uwankara uti ngaranyi nyakula kulintjaku.

²¹ Panya paluru tjana Godaku ninti nyinangi, palu nyara palunyaya pulkanmankunytja wiyangku wantingi, munuya palumpa pukularira palunya walkuntja wiyangkuťu wantingi. Munuya palulanguru tjukarurungku kulintja wiyaringu munuya pina pati alatjitu nyinangi.

* **1:16** Lita nyangangka Paulalu kutjupa-ara wangkanyi Jew tjuťangka munu kutjupa-ara wangkanyi Jew wiya tjuťangka, munu piruku kutjupa-ara wangkanyi anangu uwankarangka. Ka nganana Pitjantjatjara tjuťa kulu Jew wiya tjuťa panya ini kutjupa Gentile tjuťa. * **1:17** Apakukaku 2:4

22 Paluru tjanayanku walytjangku wangkapai, “Nganana ninti pulka mulapa nyinanyi, uwankaraku ninti.” Palu wiya, tjana ngunti wangkapai panya tjana ninti wiya ngurpa alatjitu nyinanyi.

23 Utiya Godanya kutju walkunma panya paluru kutju wanka titutjara nyinanyi pulka mulapa wiru alatjitu uwankarangka wain-tarinytja. Palu tjana pununguru apunguru kutjupa kutjupa tjuta palyalpai wati purunypa, tjulpu purunypa, kuka purunypa, munu liru, tjati, ngintaka tjuta purunypa kulukulu, munuya palunya tjananya walkulpai. Palu nyanga paluru tjana mantangka unytju kutju ngarapai munu wiyaringkupai.

24 Kulila! Anangu nyanga paluru tjana kura titutjarangku palyalpai, ka Godalu putu tjananya painingi kura pulka nyinanyangka munu putu paintjatjanungku tjananya wantir'iyanu tjananku kurunpa mukuringkunyttatjanungku palyantjaku kura tjuta kutju, kaya mula-patu kura pulka nyinanyi kutjupangka ngunti ngaripai.

25 Panya tjana tjukurpa tjukaruru Godanyatjara wantingu munuya tjukurpa nguntiku mukuringu. Panya Godalu uwankara palunu mantangka ilkarangka, palu tjana God palulpainya wantira mantatja tjuta ngunti walkuningi, Godalu paluntja tjuta. Palu utila Godanya kutju walkunma titutjarangku munula Godalu paluntjita tjuta walkuntja wiyangku wantima. Uwa mulapa.

26 Palu tjana kurangka kutju titutjara anangi, ka Godalu tjananya wantir'iyaningi tjana kura tjutaku pulkara mukuringkunyangka, kaya rawangku kura nyanga palunya tjananya kutju palyaningi. Panya minymangku wati wantira minymaku pulkara mukuringkupai munu pulanku ngunti tjunguringkupai.

27 Ka palu purunypa watingku minyma wantira watiku pulkara mukuringkupai, munu pulanku palu purunypatu ngunti tjunguringkupai kunta wiya alatjitu. Munuyanku nyanga palulanguru tjananku walytjangku alatjitu puntu kuralpai kura nyanga palu purunypa tjuta palyara.

28 Uwa mulapa tjana Godanya tjukarurungku kulintja wiyaringu munuya palumpa tjukurpa tjukaruru wantingu, ka palulanguru tjananya Godalu wantir'iyanu tjananku walytjangku kulintjaku. Kaya kura tjuta kutju kulilkatinyi rawangku. Utiya wantima kura nyanga palunya tjananya, palu tjana palyalkatingi alatjitu.

29-31 Panya tjana kura kutjupa kutjupa tjutaku rawa mukuringkupai kura nyanga tjanampa:

- Tjana manyu nyinapai,
- nyararingkupai,
- miripungkupai,
- pikaringkupai,
- ngunti kuralpai,
- ngunti ngukara wangkapai,
- tjukurpa kurakura tjuta tjaalymara para-wangkapai,
- Godaku kuraringkupai,
- mirpantu warkira wangkapai,
- walytjangku mirawanira kanany-kanany nyinapai,
- kurungku nyakula kulilpai rawangku kura kutjupa kutjupa tjuta palyantjikitjangku,

-mamangka ngunytjungka kulilwiyangku wantira tungunpungku-
pai,
-kunṭa wiyangku kura pulka palyalpai,
-mulamulangku kalkuntja wiyangku ngunti kuralpai,
-pina pati, kawakawa alatjitu nyinapai,
-walytja tjutaku mukulya wiya,
-anangu kutjupaku ngalturingkupai wiya alatjitu.

Uwa paluru tjana kura nyanga palu purunypa tjutaku pulkara mukuringkupai.

³² Palu tjana nganmanytju kulinu Godalu tjukurpa nyangatja wangkanyangka panya, "Kura nyanga palu purunypa tjuta palyarampan mulapa iluku." Palu tjana kura nyanga palu purunypa tjuta tungun-tunguntu palyalkatipai, munuya kutjupa tjuta wituwitulpai kura nyanga palu purunypa tjuta palyantjaku.

2

Godalu Anangu Uwankara Ngurkantara Tjaralku

¹ Kulila! Nyuntu kutjupa tjuta nyakula kuranmankupai. Palu nyuntunku uti walytjangku kulinmatu, panya nyuntu kulu palu purunypatu kura palyalpai tjana nyanga palyantja purunypa. Munun tjananya kuranmankula nyuntunku kulu walytjangku kuranmananyi tjananya kutju wiya.

² Nganana ninti panya Godalu anangu tjuta tjukarurungku ngurkantara pungkupai tjana kura nyanga purunypa tjuta palyannyangka.

³ Ka nyuntu yaaltji kulini? Nyuntu panya anangu kutjupa kuranmankupai, munu nyuntu ngapartji palu purunypatu palyalpai panya paluru kura palyantja purunypa. Ka Godalu wanyu nyuntunya nyakula palyanmankuku munu palunya kutju kuranmara pungkuku? Wiya Godalu nyupalinyaṭu kuranmara pungkuku.

⁴ Munta tjinguru nyuntu alatji kulini, "Palyantina ngayulu kura tjuta palyanma panya Godanya nganampa ngalturinganyi munulanya titutjarangku mukulyangku kanyini iluntankunytja wiyangku." Uwa mulapa Godanya ngaltunytju titutjara nyinanyi, panya paluru rawa mulatu nyuntumpa paṭani kura wantira palulakutu malaku aruringkunytjaku.

⁵ Palu nyuntu kulira wantinyi munu kurunpa wituwitu nyinanyi munun rawa Godala tungunpunganyi. Ka palulanguru tjintu malatjangka Godalu nyuntunya pulkara mirpanarira pailku, panya tjintu nyara palula anangu uwankara Godalu kutju kutju ngurkantara tjukarurungku tjaralku.

⁶ Panya Godalu anangu uwankara nitingku kutju kutju ngurkantara tjaralku munu kura palyalpai tjuta ngapartji kurakura uningkuku munu wiru palyalpai tjuta ngapartji wiru mulapa uningkuku.

⁷ Kutjupa tjutangku panya wirura rawangku palyalkatinyi, Godanya kutju waintara kulira, munuya mukuringanyi Godalu tjananya pukularira palyanmankunytjaku, munuya mukuringanyitu tjananya wanka titutjarangku kanyintjaku. Ka mulapa Godalu tjananya wanka uningkuku, palula tjungu titutjara nyinanytjaku.

⁸⁻⁹ Ka kutjupa tjutangku walytjangku kulilpai kaṅany-kaṅanytju, munuya paluru tjana tjukurpa tjukaruru wantira iwara kurangka

ananyi titutjara. Ka Godalu tjanampa mirpañarira pika pulka palyalku tjana kurangka titutjara ankunyangka. Panya kura palyalpai uwankara Godalu pika pulka unkkuku, Jew tjuṭa-warara munu anangu kutjupa tjuṭa kulu, panya Jew wiya tjuṭa.

¹⁰ Palu kutjupa tjuṭangku wirura palyannyangka Godalu tjananya pukularira palyanmankuku, munu tjananya kurunpa pukulpa rapa nyinanytjaku palyalku. Uwa, anangu wiru palyalpai uwankara Godalu alatjingalku, Jew tjuṭa-warara munu anangu kutjupa tjuṭa kulu.

¹¹ Panya Godanya nganampa kutju pukularinytja wiya, wirura palyannyangka, anangu Jew wiya tjuṭaku kulu paluru pukularipai, tjana kulu wirura palyannyangka.

¹² Panya anangu kutjupa tjuṭa Moseku tjukurku ngurpa. Palu nyara paluru tjana kura palyannyangka Godalu tjananya ngurkantara pungkuku ngurpanmara ngalturingkunyitja wiyangku. Ka panya Jew tjuṭa ninti nyinanyi tjukurpa nyanga palumpa. Palu tjana kulu kura palyannyangka Godalu palunya tjananya kulu uwankara ngurkantara pungkuku, panya Moseku tjukurta alatji ngaranyi kura palyannyangka pungkunyitjaku.

¹³ Panya Moseku tjukurku ninti nyinanyangka kutju Godalu tjukarurunmankula walytjanmankunyitja wiya. Palu wanganarangku kulira palyannyangka kutju Godalu nyakula tjukarurunmankula walytjanmankupai.

¹⁴ (Kaya anangu kutjupa tjuṭa ngurpa nyinanyi Moseku tjukurku. Palu kutjupa-ara tjana watarku nyinara walytjangku kulilpai tjukaruru nyinanytjikitjangku. Palu tjana Godaku tjukurku ninti wiya munuya unngu kulilpai yaaltji-yaaltji palyanyku nyinanytjikitjangku.

¹⁵ Panya Moseku tjukurku wangkanyi yaaltji-yaaltji tjukaruru nyinanytjaku. Kaya tjukurku ngurpa tjuṭangku yaaltji-yaaltjingu kulini tjukaruru nyinanytjikitjangku? Wiya, Godalu panya nganmanyitju tjanala unngu nintinu. Ka tjana tjukurpa unngu kanyira kulilpai yaaltji palya, yaaltji kura. Munuya nyara palulanguru kura nyinara nintingu kulilpai, "Munta, nyangatjana tjinguru kura palyani." Munuya piruku tjukaruru nyinara kulilpai, "Munta, tjinguruna palya nyinanyi.")

¹⁶ Ka ngula tjiṅtu panya malatjangka Godalu Jesunya Christanya tjunkuku anangu uwankara tjukarurungku ngurkantara tjarantjaku. Ka anangu tjuṭangku walytjangku unngu kulinnyangka paluru nintingu ngurkantankuku munu tjaralku. Godanya mukuringanyi tjukurpa nyangatja kulu anangu tjuṭangku kulintjaku, ka panyana palunyatjara jakultjunkupai.

Jew Tjuṭa Munu Tjukurpa Mosenya Ungkunyitja

¹⁷ Palu kuwarina nyurala wangkanyi, Jew tjuṭangka. Nyuranku walytjangku mirawanipai alatji, "Jew tjuṭa nganana nyinanyi, Godaku walytja mulapa. Panya Godalu palumpa tjukurpa nganampa walytja Mosenya ungu, kala nganana kanyini."

¹⁸ Uwa tjinguru nyura mulapa ninti Godaku iwaraku, panya nyura Moseku tjukurku nintiringkula nintingu kulini yaaltji-yaaltji palyanyku nyinanytjikitjangku.

¹⁹ Munu nyura kanany-kananyapa nyinara anangu kutjupa tjuṭa nintilpai. Nyura alatji kulilpai, "Nganana mulapa watarkitja tjuṭa nintilpai Godanya tjukarurungku wanantjaku. Panya tilingku

mungangka irnyara iwara utilpai, palu purunytjula ngurpa tjuṭangka utira nintilpai Godaku iwara." Alatji nyura kulilpai ngunti.

²⁰ Munu nyura kawakawa tjuṭa tjukaruruntjikitjangku kulilpai, munu tjukurku ngurpa tjuṭa kuḷu nintintjikitja mukuringkupai. Panya nyura kulilpai, "Nganana Moseku tjukurpa kanyini munula palulanguru Godaku tjukurpa uwankaraku ninti nyinanyi."

Uwa, mulapa nyura Moseku tjukurpa kanyini munu nyura uwankaraku ninti nyinanyi, palu nyura wanyu wanganarangku kulilpai tjukurpa pala palula? Wiya.

²¹ Nyura tjananya kutju nintilpai tjukaruru nyinanytjaku, palu tjananya nintira nyura tjukaruru nyinapai wiya. Munu nyura kutjupa tjuṭa pailpai kutitjunkuwiyangku wantinytjaku, munu tjananya paintjatjanungku nyura kuḷu kutitjunkturupai.

²² Ka panya palu purunypa nyura tjananya pailpai kuri walytjarangka ngariwiyangku wantinytjaku, palu tjananya paira nyura kuḷu kampangkaṭu walytjarangka ngaripai. Munu piruku nyura wangkapai alatji, "Ngayulu tjanampa wali milmilṭa tjarpara tjanampa god tjuṭa pupakatira walkulpai wiya. Ngayulu tjanampa kuraringanyi." Alatji nyura wangkapai, palu nyura wali pala palula tjarpara tjanampa kutjupa kutjupa tjuṭa kutitjura katipai kurangu.

²³ Munu nyuranku mirawanipai tjukurpa panya Godalu Mosenya ungkunyjtija kanyira. Palu nyura wanyu tjukurpa palunya wanganarangku kulilpai? Wiya, nyura kulira wantira nyuranku walytjangku mirawanipai. Ka nyara palulanguru anangu kutjupa tjuṭangku nyuranya nyakula Godanya analpai.

²⁴ Panya nyiringka tjukurpa iriti wangkatjarangka walkatjunkturuntja ngaranyi panya Jew tjuṭangka wangkanytja nyanga alatji, "Nyuralanguruya anangu Jew wiya tjuṭangku nyuranya nyakula Godanya analpai." *

²⁵ Uwa Jew tjuṭa, nyuralana wangkanyi, panya nyura Aipuramaku arangka itinguru watiringu,* munu nyura palulanguru kulilpai, "Nganana Godaku walytja tjuṭa nyinanyi." Alatji nyura kulilpai, palu nyura tjinguru Godalu wangkanyjtija kulira wantira ara nyanga itinguru watiringkunyntja upani, panya nyura Godala tungunpunganyi munu palumpa walytja mulapa nyinanytja wiya. Palu nyura Godaku tjukurta wanganarangku kulirampa ara nyanga itinguru watiringkunyntja kunpu kanyini.

²⁶ Kaya kulila anangu kutjupa, panya Jew wiya. Nyara paluru Aipuramaku arangka watiringkunyntja wiya nyinanyi. Palu tjinguru paluru tjukaruru palyanyku nyinanyangka Godalu nyakula alatji wangkara walytjanmankuku, "Nyangatja ngayuku walytja nyinanyi. Palya paluru watiringkunyntja wiya, panya tjukaruru nyinanyangka ngayulu palunya walytjanmananyi wati Jew purunypa." Alatji Godalu palunya kulilku.

²⁷ Ka nyura watiringkunyntja tjuṭangku Godaku tjukurpa kanyintjatjanungku uti wanganarangku kulinma, palu nyura tungunpungkupai.

* 2:24 Aitjayaku 52:5 * 2:25 Nyawa Genesis 17:9, panya Godalu Aipuramanya kalkuntjatjanungku wangkangu watiringkunyntjaku munu iti nyitayira tjuṭa uwankara kuḷu wirkara tjintu 8-nguru watintjaku.

Ka nyara palulanguru anangu kutjupa tjuṅangku tjukaruru nyinanytjatanungku nyuranya kuranmankuku. Panya nyura Aipuramaku arangka itinguru watiringu munu panya nyura Godaku tjukurpa nyiringka kanyini wanganarangku kulintjikitjangku. Palu anangu kutjupa tjuṅaya tjukaruru nyinanyi itinguru watiringkunyitja wiyatja, munuya paluru tjana nyuranya tungunpungkunyangka nyakula analku.

²⁸ Palu ngananya Jew mulapa nyinanyi? Ngananya wanyu Godaku walytja mulapa? Nyara Aipuramaku arangka itinguru watiringkunyitja tjuṅa kutju? Paluru tjana wanyu Jew mulapa? Wiya, nyara paluru tjana watiringkunyitjatanu Jew mulapa nyinanytja wiya.

²⁹ Palu panya Kurunpa Milmitu unngu palyantjitjangu kutjuya Jew mulapa nyinanyi, watiringkunyitjangu wiya. Ka Jew pala palu purunypa panya Godaku walytja nyinanyi munu paluru tjukaruru nyinapai Godanya nyakula palumpa pukularinytjaku anangu tjuṅa wiya.

3

¹ Ka nyura tjinguru nyara palulanguru kulini, “Nyaakula nyanga alatji Jew tjuṅa nyinanyi? Nganaṅa wanyu nyaa? Unytju kutjula itinguru watiringu?”

² Wiya, ara nganampa wiru mulapa ngaranyi. Panya Godalu palumpa tjukurpa nganaṅanya ungu nganaṅa tjukarurungku kanyintjaku.

³ Palu Jew kutjupa tjuṅangku Godala wanganarangku kulintja wiyangku wantingi. Ka tjana kulilwiyangku wantinyangka Godalu kalkuntjatanungku wanyu palyantja wiyangku wantipai?

⁴ Wiya, Godanya tjukaruru alatjitu nyinanyi, ngunti kuralpai wiya. Panya anangula ngunti wangkapai nyinanyi, palu Godalu kalkuntjatanungku tjukarurungku palyalpai alatjitu. Panya iriti nyiringka wakatjungkunyitja ngarinyi tjukurpa nyanga alatji Davidalu Godala wangkanytja,

“Nyuntu wangkanyangkaya anangu uwankarangku kulilpai, ‘Mulapa Godalu wangkanytjatanungku tjukarurungku palyalpai.’ Nyuntu anangu tjuṅa kuutpangka wangkanytjaku ngaratjungkula tjukarurungku ngurkantankupai.” *

⁵ Nyanga palulanguruya anangu kutjupa tjuṅangku tjinguru kulilku tjukurpa ngunti nyanga alatji, “Palyala kura rawangku palyanma. Panya nganaṅa kura nyinanyangka anangu kutjupa tjuṅangku nganaṅanya kura nyakula waintara Godanya kulilku panya paluru kutju tjukaruru nyinanyi nganaṅanya purunypa wiya. Ka nyara palulanguru Godanya tjinguru nganampa pukularima munulanya kuraringkunyangka pungkunyitja wiyangku wantima, panya anangu tjuṅangkuya palunya walkuni nganaṅa kura nyinanyangka nyakula.” Alatjiya anangu kutjupa tjuṅangku tjinguru kulilpai.

⁶ Palu wiya, nyangatja ngunti kulintja tjukaruru wiya. Panya Godanya kura palyannyangka pukularipai wiya alatjitu. Paluru tjukarurungku kutju ngurkantankuku anangu ngura winkitja, munu nganaṅanya kulu.

* 3:4 Psalm 51:4

7 Kaya tjinguru kutjupa tjuṭangku kulilpai alatji, “Palyala ngunti kuranma, panya nganaṅa ngunti kurannyangka kutjupa tjuṭangku nganaṅanya nyakula waintara kulilku Godanya kutju tjukaruru nyinanytja, munuya nyara palulangurulta palunya pulkara walṅulku. Ka uti nyara palulanguru Godanya nganampa kalyparingama kukany-mankunytja wiya, munulampa pukularima ngunti kurannyangka.” Alatjiya tjinguru kulilpai.

8 Palu wiya, tjana nyanga alatji ngunti kulini. Tjana ngayulu wangkanytja kulira kampa kutjupara wangkanyi nyanga alatji, “Wanyula kura tjuṭa kutju palyalkatima anangu tjuṭangku nganaṅanya kura nyakula waintara Godanya kutju mirawaninytjaku.” Palu wiya, ngayulu nyanga alatji wangkanytja wiya. Ka Godalu tjananya ngunti kurannyangka mirpanarira kukanymananyi alatjitu.

Anangu Kutjupa Tjukaruru Mulapa Nyinanytja Wiya

9 Kala nganaṅa Jew tjuṭangku yaaltji-yaaltji kulilku? Godanya wanyu nganampa kutju pulkara pukularinyi munu anangu kutjupa tjuṭaku mukuringkunytja wiya? Wiya alatjitu. Panya nganmanytjuna nyurala wangkangu nyanga alatji, “Anangu Jew tjuṭa munu Jew wiya tjuṭa kulu uwankara kura nyinanyi, munuya iwara kurangka titutjara ankula puṭu palyaringanyi.” Alatjiṅa nyurala wangkangu nganmanytju,

¹⁰panya tjukurpa paluruṭu nyiringka iriti walkatjunkunytja ngarinyi alatji,

“Anangu uwankaraya kura nyinanyi, anangu kutjupa tjukaruru nyinanytja wiya.

11 Panya anangu uwankarangku puṭu kulini Godalawanu tjukaruru nyinanytjikitjangku.

Ka kutjupangku Godaku nintiringkunytjikitjangku kulintja wiya alatjitu, uwankarangkuya wantinyi.

12 Panya anangu winkingkuya Godanya wantingu, munuya walytjangku kutju kulira uwankara tjunguringkula makuraringu.

Kutjupa tjukaruru nyinanytja wiya alatjitu, uwankarangkuya kura tjuṭa kutju palyani.*

13 Tjanampa wangka kura mulapa, panya tjana tjukurpa kura kutju wangkapai, munuya ngunti kuralpai tjukarurungku wangkanytja wiyangku.

Ka tjana wangkanyangka kura tjuṭa kutju utiringkupai.*

Panya lirungku anangu patjara iluntankupai, nyara palu purunytjuya tjana tjukurpa ngunti wangkara pikantankupai.*

14 Uwa mulapa, tjana warkilangku rawangku warkipai.*

15 Munuya mapalku pikaringkupai munu pungkula iluntankupai.

16 Munuya para-pitjalira ngura kutjupangka kutjupangka kura palyara anangu tjuṭa titutjarangku tjuni kuralpai.

17 Panya tjana puṭu kulilpai kalypa nyinanytjikitjangku.*

* 3:12 Psalm 14:1-3; 53:1-3 * 3:13 Psalm 5:9 * 3:13 Psalm 140:3 * 3:14 Psalm 10:7

* 3:17 Aitjayaku 59:7-8

18 Munuya Godanya kulira nguluringkunyitja wiyangku analpai alatjitu.” *

Uwa, tjukurpa nyanganpa panya nyiringka iriti walkatjunkunyitja ngarinyi.

19 Palu Godaku tjukurpa wanyu nganaku tjanampa ngarinyi? Wiya, panya Jew tjuatalanya ungu, ka nganana wanganarangku kulintjaku ngaranyi. Ka nganana palumpa tjukurta tungunpungkungyangka Godalu nganananya tjukarurungku ngurkantankuku, kala putu ngurparingkuku kura tjuata nganmanyitju palyantjatjanu. Panya Godalu anangu uwankara tjungura ngurkantananyi Jew tjuata munu Jew wiya tjuata kulu.

20 Palu ngananya wanyu Moseku tjukurta wanganarangku kulin-tjatjanu tjukaruru ngaranyi Godala mirangka? Wiya alatjitu, panya anangu kutjupa Moseku tjukurta kulira tjukarururingkunyitja wiya Godala mirangka. Tjukurpa nyara paluru panya nganananya putu tjukaruruni, palu panya tjukurpa paluru nganananya nintini nganampa kura uwankara.

Yaaltjingara Godalu Anangu Tjuata Walytjanmankupai?

21 Palu yaaltjingarala wanyu Godala mirangka tjukaruru ngaraku paluru nganananya walytjanmankunyitjaku? Wiya kulila, kuwari paluru utinu iwara kutjupa nganana palula ilaringkula tjukaruru ngaranyitjaku. Iwara nyanga palunya panya Moselu tjana wangkatjara kutjupa tjuatanku kulu nganmanyitju tjakultjunangi.

22 Ka iwara nyanga paluru alatji ngaranyi panya nganana Jesuku Christaku mulamularingkunyangka kutju Godalu nganananya tjukarurunmankula walytjanmankupai. Nyanga alatji paluru palyalpai Jesuku mulamularingkupai uwankara,

23 panya anangu uwankara alatjitu kura nyinara mauntalparingu munuya Godala putu ilaringanyi panya paluru wiru mulapa uwankarangka waintarinytja.

24 Munu panya paluru nganampa ngaltunyitju pulka nyinanyi, munu iyanu Jesunya Christanya nganampa ngalkilpa ilunytjaku, ka nyara palulanguru paluru nganananya tjukarurunmankula walytjanmankupai kala karalyaripai.

25-26 Panya Godalu palumpa katja iyanu nganampa arangka ilunytjaku nganana kurantjitjanguru. Ka panya Jesunya nganampa anga-ilura milkali tjutingu nganana palumpa mulamularingkunyangka Godalu nganananya pungguwiyangku kalypangu wantinytjaku. Kala nyanga palulanguru kulilpai mulapa Godalu tjukarurungku ngurkantankupai. Panya nganmanyitju anangu tjuatanku kura tjuata palyannyangka Godalu tjananya pikantankuwiyangku wantingi. Palu tjukarurungku paluru wantingi ngula Jesunya iyantjikitjangku kura uwankaranguru anga-ilunytjaku. Kala nyanga palulanguru kulini panya anangungku kura palyannyangka Godanya putu pukularipai, panya kuwari paluru tjukarurungku anangu tjuata pungguwiyangku kalypangu wantipai Jesunya tjanampa ngalkilpa ilunytjitjanguru, munu palulanguru Jesuku mulamularingkupai uwankara tjukarurunmankula walytjanmananyi.

* 3:18 Psalm 36:1

²⁷ Kalanku wanyu nyaanguru walytjangku mirawanima? Ngana wanyu Godaku walytjaringu tjukaruru nyinanytjatjanu? Wiya putulanku walytjangku mirawaninyi, panya Godalu tjukaruru nyinanyangka nyakula walytjanmankunyitja wiya, palu ngana Jesuku mulamularingkunyangka kutju Godalu nganannya tjukarurunmankula walytjanmananyi. Ka ngana walytjangku mirawaninytjaku wiya ngaranyi.

²⁸ Panya Jesuku mulamularingkunyangka kutju Godalu nganannya tjukarurunmankula walytjanmankupai. Palu Moseku tjukurwanungku Godalu nganannya putu walytjanmankupai.

²⁹ Munta tjinguru nyura alatji kulini, "Godanya tjinguru Jew tjtaku kutju mayatja nyinanyi." Palu wiya, nyura ngunti kulini, panya Godanya anangu uwankaraku mayatja nyinanyi, Jew tjtaku kutju wiya, palu anangu kutjupa tjtaku kulu ngura winkitjaku.

³⁰ Panya Godanya kutju alatjitu nyinanyi kutjara wiya. Munu paluru Jew tjtaku Jesuku mulamularingkunyangka kutju tjukarurunmankula walytjanmankupai, munu palu purunypatu anangu kutjupa tjtaku kulu Jesuku mulamularingkunyangka kutju tjukarurunmankula walytjanmankupai.

³¹ Kala wanyu Jesuku mulamularingkula Moseku tjukurpa wantira wiyankuku? Wiya, Jesuku mulamularingkula ngana nyanga alatji kulilpai, "Moseku tjukurpa tjukaruru ngaranyi ngana kulira tjukaruru nyinanytjaku, kala uti tjukurpa nyanga palunya wanarangku kulinma wantinytja wiyangku."*

4

Aipuramanya Purunypala Mulamulariwa Godaku

¹ Uwa, ngana Jew tjtaku tjamu Aipuramalanguru tjtaringkunyitja malatja malatja. Kala wanyu palunya kulinma.

²⁻³ Panya paluru Godaku walytjaringkula tjukaruru alatjitu ngarangi Godala mirangka. Palu paluru wanyu wara wiru palyantjatjanu Godaku walytjaringu munu palula tjukaruru ngarangi? Wiya, paluru Godaku mulamularingkunyangka kutju palunya Godalu tjukarurunmankula walytjanmanu. Ka nyara palulanguru palurunku walytjangku putu mirawaningi, panya paluru palyantjitja-nguru Godalu palunya tjukarurunmankunyitja wiya. Panya nyiringka iriti walkatjunkunyitja nyanga alatji ngarinyi,

"Aipuramanya mulamularingu Godaku. Ka nyara palulanguru Godalu palunya mulamularingkunyangka nyakula tjukarurunmankula walytjanmanu." *

⁴ Ka wati panya warkaripai wanyu kulinma, panya paluru wara palyantjatjanungku mani mantjilpai mayatjanga, munu paluru kulilpai, "Mani nyangatjani unytjungku ungunyitja wiya, palu wara palyannyangka kutjuni nyangatja ungu."

⁵ Ka tjinguru nyura ara nyanga palulanguru kulini nyanga alatji, "Munta Godalu ngayunya walytjanmankuku ngayulu palumpa wirura

* **3:31** Palu panya kuka pungkula Godanya ungunyitjaku wiyaringu, panya Jesunya alatjitu pitjangu munulampa ngalkilpa ilungu ngana kura palyantjitjanguru. * **4:2-3** Genesis 15:6

warkarinyangka kutju.” Palu wiya, Godalu nyanga alatji walytjanmankupai wiya. Panya paluru anangu kura tjuta walytjanmankupai palumpa mulamularingkunyangka kutju, kutjupa kutjupa wiru tjuta palyantjanguru wiya. Palu mulamularingkunyangka kutju wangkapai alatji, “Nyuntun kuwari ngayula mirangka tjukaruru ngaranyi, kura wiya.”

⁶ Ka Davidalu kulu wangkangu tjukurpa nyanga palu purunypa. Panya Godalu anangu tjukarurunmankupai paluru kutjupa kutjupa wiru tjuta palyantjanguru wiya, palu palumpa mulamularingkunyangka kutju paluru tjukarurunmankula walytjanmankupai. Ka nyanga palulangurulta paluru pukulpa mulapa nyinapai Godaku walytjaringkunyjtjanu. Panya nyiringka iriti walkatjunkunytja ngarinyi nyanga alatji,

⁷⁻⁸ “Anangu tjtaya pukularinyi Godalu tjananya kura palyantjtjanguru pungkuwiyangku kalypanngu wantinyangka.

Uwa, tjana pukulpa mulapa nyinanyi,

panya Godanya tjanampa kalyparingkula tjana kura palyantjtjaku watarkuringu alatjitu piruku kulintja wiya.” *

⁹ Ka ara nyangatja wanyu Davidalu Jew tjtaku kutju wangkangu panya Aipuramaku arangka watiringkunyjtja tjtaku kutju? Wiya, paluru wangkangu Jew tjtaku kutju wiya, palu panya anangu kutjupa uwankaraku kulu. Panya nganmanytjuna Godaku tjukurnguru nyurala tjakultjunu alatji, “Panya Godalu Aipuramanya palumpa mulamularingkunyangka nyakula tjukarurunmankula walytjanmanu.”

¹⁰ Palu tjinguru nyura kulini Aipuramanya watiringkunyangka kutju Godalu palunya tjukarurunmanu. Palu wiya, Godalu palunya tjtijlpi nganmanytju alatjitu tjukarurunmanu.

¹¹ Panya Godalu palunya tjukarurunmanu palumpa mulamularingkunyangka, ka nyara palula malangka ngula Aipuramanya wati Jew-ringkulalta nyinangi. Palu nyaanguru Aipuramanya watiringu? Wiya, paluru watiringu alatji nintintjikitja panya mulamularingkunyangka kutju Godalu palunya tjukarurunmanu. Kaya Aipuramanya purunypa Godaku mulamularingkupai tjuta kuwari nyinanyi, panya tjananya kulu Godalu palumpa mulamularingkunyangka tjukarurunmanu Aipuramanya purunypa. Nyanga palulanguru Aipuramanya nganampa tjamu pulka nyinanyi Godaku mulamularingkupai uwankaraku. Panya anangu Jew wiya tjuta nyinanyi Godaku mulamularingkupai tjuta, nyara paluru tjana kulu Aipuramaku walytja nyinanyi.

¹² Ka palu purunypatu nganana Jew tjuta Godaku mulamularingkulampa nganana kulu Aipuramaku walytja nyinanyi watiringkunyjtjanguru wiya, palu Godaku mulamularingkula kutju, Aipuramanya purunypa, panya wati nyara paluru ngananypa Godaku mulamularingu watiringkunyjtja kuwaripangka.

Mulamularingkunyangka Godalu Kalkuntja Panya Ungkupai

¹³ Ka panya Godalu Aipuramanya nganmanytju kalkunu alatji wangkara, “Nyuntu munu nyuntumpa walytjapiti malatja malatjangkuya manta winki mantjilku munuya ala lipiwanu nyinaku manta winkingka.” Palu Godalu wanyu alatji Aipuramanya

* 4:7-8 Psalm 32:1-2

kalkunu paluru Moseku tjukurta wanganarangku kulinyangka? Wiya, Aipuramanya tjukurpa panya Mosenya ungkunyitjangka kuwaripangka Godaku mulamularingu, ka pala palulanguru Godalu palunya tjukurunmanu nyara palula ara alatjitu. Munu palulanguru Godalu palunya kalkunu palumpa walytjapiti malatja malatja kulu manta winki ungkunyitkitjangku tjana manta winkingka lipiwanu tjuaringkula nyinanytjaku.

¹⁴ Uwa, tjana mulamularingkula kutju mantjinu Godalu panya kalkuntja. Tjinguru Aipuramalu tjana Moseku tjukurpa wanganarangku kulira palyantjatjanungku mantjinnyangkala tjinguru ngunti mulamularingama kulira, "Tjukurwanungku-mantiya kalkuntja panyatja mantjinu, kala nyaaku mulamularingama?" Palu wiya, Aipuramalu mulamularingkula mantjinu, kala palunya arkara tjukururu mulamularinganyi.

¹⁵ Panya Moseku tjukurtu nintilpai tjukururu nyinanytjaku, ka tjukurpa pala palula tungunpungkyangka Godalu mirpanarira iluntankupai. Palu tjinguru anangu kutjupa tjukurpa nyanga palumpa ngurpa nyinarampa paluru puu tungunpunganyi watarkitja alatjitu, panya kutjupangku palunya nganmanytju tjakultjungkunyitja wiyatu.

¹⁶ Palu panya Aipuramanya mulamularingu Godaku, ka palulanguru palunya Godalu kalkunu. Kala palulanguru nitingku kulini panya Godalu mulapa ngaltunytjungku kalkuntjatjanungku ungkupai palumpa mulamularingkunyangka. Nyangatja panya paluru muringkula kutjukampa ungkunyitja Aipuramaku walytjapiti uwankara, Moseku tjukurpa kanyilpai tjuu kutju wiya, palu Godaku mulamularingkupai uwankara kulu paluru kalkuntjatjanungku ungu. Panya Aipuramanya nganampa uwankaraku tjamu nganmanyitja mulapa nyinanyi, anangu mulamularingkupai uwankaraku.

¹⁷ Panya nyiringka iriti walkatjungkunyitja ngarinyi Godalu Aipuramanya kalkuntja nyanga alatji wangkara,

"Ngayuluna nyuntunya ngurkantanu anangu ngura winkitjaku tjamuringkunyitjaku, kaya ngura winkinguru nyuntunya tjamu nganmanyitja pulka kulira walkulku." *

Uwa mulapa Godalu palunya tjunu nganampa mama nganmanyitja nyinanytjaku, panya paluru mulamularingu Godaku. Godanya panya miri ilunytjitja wankalpai munu kutjupa kutjupa tjuu palulpai wiyanguru alatjitu.

¹⁸ Ka Aipuramanya tjitji wiya alatjitu nyinangi munu wiyatu tjilpiringu, palu paluru mulamularingangi alatjitu Godaku, munu watarkurinytja wiyangku titutjarangku kuliningi ngula Godalu tjitji ungkunyitjaku. Ka paluru titutjara mulamularingkunyangka mulapatu walytjapiti tjuaringu palumpa katjanguu munuya ma-tjuaringkula malatja malatja mungilyi mulapa nyinangi wangka kutjupa kutjupa. Panya Godalu palula wangkangu Aipuramala nyanga alatji, "Nyuntumpa walytjapiti tjuaringkula mungilyi mulapa nyinaku malatja malatja."*

¹⁹⁻²⁰ Ka Aipuramanya panya rawa mulapa nyinangi kuli tjuu mulapa yiya 100 nguwanpa, munu palurunku kuliningi, "Panya ngayulu kuwari tjilpi mulararingu munu watalpi ilunytjikitjalta nyinanyi.

* 4:17 Genesis 17:5 * 4:18 Nyawa Genesis 15:5

Ka ngayuku kuri Tjiiranya tjitji wiya alatjitu pamparingu panya ngali rawa mulapa nyinangi." Palu nyanga alatji kulira paluru titutjara Godaku mulamularingangi watarkurinytja wiya. Munu palumpa mulamularingkula kurunpa kunpuringu munu Godanya rawangkuwu mirawañingi.

²¹ Panya paluru raparingkula watarkurinytja wiyangku kulinigi, "Mulapa Godalu kalkuntjatjanungku palyalku."

²² Nyara palulanguru mulamularingkunyangka Godalu Aipuramanya tjukururunmankula walytjanmanu.

²³⁻²⁴ Palu tjukurpa nyanga paluru wanyu Aipuramaku kutjuku? Wiya, tjukurpa paluru nganampa kulu ngaranyi. Panya nganana mulamularinganyi Godalu Mayatja Jesunya ilunyangka wankara pakaltjingantjitjaku. Ka nyara palulanguru Godalu nganananya tjukururunmananyi.

²⁵ Panya Mayatja Godalulampa Jesunya iyanu nganampa kuranguru anga-ilunytjaku, munu ilunyangka palunya wankara pakaltjinganganu Godalu nganananya walytjanmankunytjikitjangku Jesula tjungu tjukururu Godala mirangka ngaranytjaku.

5

Godalulanya Walytjanmanu Palula Pukulpa Nyinanytjaku

¹⁻² Uwa, panya Jesuku mulamularingkunyangka Godalu nganananya tjukururunmanu. Ka nyara palulanguru nganana Godala tjunguringkula pukulpa nyinanyi Mayatja Jesula Christalanguru. Panya paluru-mantu Godanya kalypanu munulanya palula tjungunu mukulya pulkangka. Kala kuwari palula kalypa pukulpa mulapa ala-ala patara nyinanyi munula kulini, "Mulapa Godalu nganananya katiku palumpa ngura wiru mulata kanyintjikitjangku palula tjungu."

³ Munu nganana pukularinyitu kutjupa tjutjangu nganananya miilarara kurannyangka. Panya kura nyanga palu purunypa tjuta nganana wirkankunyangka nganana uti waintara kulinma nyanga alatji, "Wiya palyalanya nyura Jesunya wanannyangka kurani, panya nganananya pikangku wataparannyangkala kulira raparinganyi Jesunya tungun-tunguntu wanantjikitja."

⁴ Nyara palulangurula tungun-tunguntu titutjarangu wanara nganana kunpuringanyi punkantja wiya, kalampa Godanya nyakula pukularinyi. Kala kurunpa raparingkula nyinara patalku ala-alangu Godalu ngula nganananya pitjala katinytjaku.

⁵ Palu Godalu tjinguru nganananya wantiku ngura wirukutu katinytja wiyangku, kala tjituru-tjitururiku. Wiya, Godalulanya katiku alatjitu ngura wiru mulata kanyintjikitjangku. Panya paluru mukulya pulkangu Kurunpa Milmilnga nganana tjarpatjunu unngu nyinara Godaku mukulya nintintjaku. Kala mulapa pulku ala-alangu nyinara patani Godala tjungu titutjara nyinanytjikitjangku.

⁶ Kulini nyura? Panya nganana uwankara kura nyinangi munula putu walytja palyaringangi, ka nganana kura winki nyinanyangka Christanya nganampa ngalkilpa ilungu tjirirpi panya palula alatjitu, panya Godalu nganmanytju kulintjitjangka.

⁷ Palu wati ngananya wanyu mukuringanyi ngalkilpa ilunytjikitja anangu panya tjukururu nyinapaiku? Tjinguru wiya alatjitu. Tjinguru

palya mulapa nyinanyangka kutju kutjupangku kulilku pala palumpa ngalkilpa ilunytjikitjangku. Palu anangu tjuta mukuringkunyta wiya ngalkilarira ilunytjikitja.

⁸ Palu Jesunya Christanya kutju mukuringkula nganampa ngalkilpa ilungu nganaṅa kura winki nyinanyangka. Kala pala palulanguru kulini, “Mulapa Godanya nganampa pulkara alatjitu mukuringanyi.”

⁹ Uwa, Christanya nganampa ngalkilpa ilunyangka Godalu nganaṅanya kura tjuta palyantjitjanguru kalypangku pungguwiyangku wantingu munu nganaṅanya tjukarurunmanu. Ka pala palulanguru nganaṅa tjinṅu malatjangka rapalta ngaraku. Panya tjirirpi nyara palula nganaṅanya Godalu ngurkantara paira iyantja wiya, panya Christalu nganaṅanya nyara palula wankarutu kanyilku nganmanypa nganampa kuranguru ngalkilpa ilunytjatjanungku.

¹⁰ Panya nganampa Godanya mirpanpa nyinangi, ka Jesulu palunya kalypaṅu nganampa kuranguru anga-ilura. Ka kuwari Godanya nganampa kalypa nyinanyangka nganaṅa kulini mulapa Jesulu nganaṅanya titutjarangku wankaru kanyilku panya paluru wankatu nyinanyi nganampa malpa wiru.

¹¹ Kala palumpa pulkara alatjitu pukularinyi Godaku Mayatja Jesula Christalanguru, panya paluru Godanya kalypaṅu nganaṅa palula tjungu walytja titutjara nyinanytjaku.

Ara Kutjara Ngaranyi Adamanya Munu Jesunya Christanya

¹² Nyaanguru anangu uwankara ilupai? Wiya panya wati nganmanyitjangku Adamalu kura palyaṅu munu palulanguru ilungu titutjara nyinanytja wiya. Ka nyara palulanguru anangu winki Adamanya purunypa kura palyalpairingu, munu palulangurulta uwankara ilupairingu.

¹³ Uwa, iritinguru alatjitu anangu uwankara kura nyinangi. Palu Mosela kuwaripangka tjukurpa panya wiya ngarangi tjananya paira tjukaruruntjaku, ka nyara palulanguru nyura tjinguru kulini Godalu Mosenya tjukurpa ungkunyaṅka kutju-manti kurampa wirkanu. Palu wiya, nganmanytju alatjituya kura palyanangi, panya Adamalanguru.

¹⁴ Ka nyara palulanguru panya anangu ngura winitja rawa ilukatingi Adamalanguru panya Mosenya tjukurpa ungkunyitjakutu-wangkara. Uwa, Adamalu Godala tungunpungu munu mai panya paintitja ngalkuṅu. Kaya kutjupa tjuṅangku mai nyara palu purunypa ngalkuntja wiya, palu tjana palu purunypatu Godala tungunpungkula kura kutjupa kutjupa tjuta palyanangi munuya palu purunypatu ilungi.

Palu wati kutjupa Adamanya purunypa ngula wirkankunyitjaku ngarangi.

¹⁵ Palu nyanga paluru pula tjungu wiya. Panya Adamalu kutjungku tungunpungkula ilunytjaku palyaṅu, kaya anangu uwankara ilupairingu. Ka Jesulu kampa kutjupa pulka mulapalta palyaṅu anangu tjuta wankaringkunyitjaku, panya Godalu mukulya pulkangku palunya intjanurinytjaku iyaṅu.

¹⁶ Palu Adamaku kuranguru nganaṅa uwankara kuraringu anangu winki, kalanya Godalu ngurkantara wiyantjaku ngaranyi kura nyara palulanguru. Palu anangu uwankarangku titutjarangku kura palyan-nyangka Godalu nganampa ngalturingkula nganaṅanya Jesunya intjanungku iyaṅu anangu tjutaku ngalkilpa ilunytjaku, ka paluru

kura uwankaranguru ilunyangka Godalu palumpa mulamularingku-pai tjuṭa tjukarurunmankula walytjanmanu.

¹⁷ Uwa, wati kutjungku Adamalu anangu uwankara ilunytjaku palyanu. Ka wati kutjupangku Jesulu Christalu kampa kutjupa pulka mulapalta palyanu palumpa mulamularingkupai tjuṭaku. Panya paluru palyantjitjanguru Godalu anangu nyara palunya tjananya mukulya pulkangku tjukarurunmanu. Kala pala palulanguru nganana Jesula tjungurinkula titutjara wanka mulapa nyinanyi munula ilunytja kulira nguluringkunyitja wiya, rapa alatjitu nyinanyi.

¹⁸ Uwa, wati kutjungku Adamalu Godala tungunpungu munu anangu uwankara kuraringkunyitjaku palyanu, ka panya Godalu tjananya kuraringkunyangka nyakula wiyantjaku ngarangi. Palu wati kutjungku Jesulu Godala wanganarangku kulinu munu ilungu, ka nyara palulanguru anangu uwankaraku ala ngaranyi Godaku walytjaringkula palula tjukaruru ngaranytjaku munu palula tjungu wanka titutjara nyinanytjaku.

¹⁹ Panya anangu uwankara kuraringku wati kutjungku Adamalu Godala tungunpungula kulira wantinyangka. Palu wati kutjungku Jesulu Godala wanganarangku kulinyangka Godalu anangu tjuṭa tjukarurunmanu palumpa walytjaringkunyitjaku.

²⁰ Uwa, anangu tjuṭangkuya kura palyalkatingi, ka Godalu tjukurpa pulka Mosenya tjananya ungu kulira kura tjananku walytjangku ngurkantankunyitjaku panya tjana palyantjatjanungku. Palu Moseku tjukurpa kulira tjana putu kura wantingi munuya rawangkuṭu kura tungun-tunguntu palyalkatingi. Uwa, tjukurpa ungkunyangka kura pulkaringu mulapa manta winkingka. Palu kura pulkaringkunyangka Godaku mukulya ngarangi alatjitu pulka mulapa, panya paluru ngaltunytjungku rawangku kuliningi anangu tjuṭa wankarunkunyitjikitjangku.

²¹ Uwa, anangu tjuṭangku iwara kurangka ankula putu wantingi munuya palulanguru rawa ilungi. Palu kuwari nyanga Jesunya nganampa anga-ilunyangka Godalu ngananyanya mukulyangku tjukarurunmanu munulanya walytjanmara kanyini. Nyara palulanguru nganana wanka titutjara nyinaku Jesula Christala tjungu nganampa mayatjangka.

6

Jesula Tjungu Nyinara Kura Wantinytjaku Ngaranyi

¹ Uwa, nganana rawangku kura tjuṭa palyanangi, ka Godalu ngananyanya pungkunyitjaku ngaranyi alatjitu. Palu panya Godanyalampa pulkara alatjitu mukuringkupai, munu paluru Mayatja Jesunya nganampa anga-ilunytjitjanguru ngananyanya pungkuwiyangku kalypangku wantinyi. Kala nyanga palulanguru yaaltji kulilku? Rawangkula kura palyalkatima? Kalampa Godanya rawatu mukuringama munulanya kalypangku wantima?

² Palu wiya, nyangatja ngunti kulintja. Uti nganana Godaku walytjaringkulampa kura rawangku palyantja wiyangku wantima. Panya Jesuku mulamularingkunyangka Godalu ngananyanya iwara kuranguru mantjinu munulanya iwara palyangka tjunu palunya wanantjaku. Kala palunya wanara wanyu kura rawangku palyanma? Wiya

alatjitu. Panya anangu ilura kura palyantja wiyaringkupai, nyara palu purunypa uti nganana kura palyantjikitja mukuringkunyntja wiyangku wantima.

³⁻⁴ Nyura ninti panya nganana Jesula Christala baptise-arinyangka Godalu ngananyanya Christala tjungunu. Ka baptise-arinyntja nyanga paluru nintilpai nyanga alatji panya nganana urungka tjarpara Christala tjungu purunypa ilungu, kalanya palula tjungutu tjunutjunu. Ka panya Godalu witulya pulkangku Jesunya wankara pakaltjinganu, nyara palu purunypa nganana uru unngunguru pakara palula tjungu pakanu kampa kutjuparira iwara palyangka ankula tjukaruru nyinanytjikitja.

⁵ Uwa Jesunya punu katakutjarangka iluyangka nganana ilunytjaku wiyaringu panya paluru alatjitu ilungu nganampa ngalkilpa. Ka panya Jesunya wankaringkula pakannyangka, nganana kulu palu purunypatu wankaringkula pakalku palula tjungu wanka kuwaritjajara.

⁶ Munula piruku nitingku kulini, panya nganmanypala nganana kulintja kura nyinangi munula kura kutju kulira palyalpai. Palu kulintja kurala ilungu Christala tjungu punu katakutjarangka. Nyara palulanguru kulintja panya paluru wiyaringu kura panya tjuta pampuntjaku.

⁷ Panya anangungku ilura kura tjuta piruku pampuntja wiyaringanyi. Palu purunypa nganana Jesula Christala tjungu ilura kura tjuta pampuntjaku wiyaringu.

⁸ Uwa, nganana Christala tjungu ilungu, munula pala palulanguru kulini, "Mulapala palula tjungu ilunytjatjanu palula tjungutu wankaringkula pakalku munula palula tjungutu wanka titutjara nyinaku."

⁹ Panya mulapa Godalu Christanya wankara pakaltjinganu piruku ilunytjaku wiya. Ka kuwari paluru wanka titutjara nyinanyi mayatja pulka mulapa piruku ilunytja wiya alatjitu.

¹⁰ Panya paluru anga-ilungu nganampa kuranguru kutju-ara alatjitu, munu kuwari wanka titutjara nyinanyi Godala tjungu munu palula wanganarangu kulini.

¹¹ Ka nyura palu purunytjutu kulinma, panya Christala tjungu ilura nyura kura palyantjaku wiyaringu, munu nyura Christala tjungu wankaringkula kuwari palula tjungu nyinanyi Godala wanganarangu kulintjikitja.

¹² Pala palulanguruya kura palyantja wiyangku wantima mantangka nyanga nyinaralpi. Panya nyura unytju kutju nyinanyi manta nyangangka, ka kura nyanga palu purunypa utiringkunyangka kulira wantima pulkara kulintja wiyangku.

¹³ Munu nyurampa tjina kurangka paltjuntja wiya, nyurampa marangku kura pampuntja wiya, nyurampa tjaangku kura wangkanyntja wiya, nyurampa kurungku kura nyakunytja wiya, nyurampa pinangku kura kulintja wiya. Nyurampa uwankarangku uti kura palyantjikitja mukuringkunyntja wiyangku wantima, palu Godaku kutju mukuringama palumpa waraka palyantjikitja. Panya nyura Christala tjungu ilungu, munuya wanyu kulila panya miri ilunytjtjangku kura putu palyalpai, ka nyura uti nyara palu purunytju kura palyantja wiyangku wantima. Nyura panya Christala

tjngu wankaringkula pakalku. Pala palulanguru nyura uti Godaku mukuringama palumpa wara wiru palyantjikitja.

14 Uwa, Godalu nyuranya ngaltunyjtungku Jesulawanungku mantjira kanyinnyangka nyura kura palyantjaku wiyaringu. Nganmanytju panya nyura Moseku tjukurwanu nyinara kura putu wantingi. Palu kuwari Jesulawanu nyinara nyura kura wantinytjaku ngaranya alatjitu. Pala palulanguru nyura uti kura palyantja wiyangku wantima.

Tjukururula Nyinama Godaku Warakaripai Tjuta

15 Uwa, Godalu nganannya ngaltunyjtungku kanyini marangku Jesula tjungura, kala Moseku tjukurwanu palula wirkankunytjikitjangku kulintja wiyangku wantinyi. Palu nyara palulangurula yaaltji kulinma? Godanya nganampa ngaltunyjtju nyinanyangkala wanyu titutjarangku kura palyalkatima? Wiya alatjitu.

16 Panya nyura ninti wati panya warakaripaiku. Panya nyuntu mayatjangka warakarira palula kutjungka wanganarangku kulira palyalpai. Ka palu purunypa nyura kura tjuta palyantjikitja mukuringkula kurangka kutju wanganarangku kulilku, ka kura nyara paluru nyuranya mayatjarira kawantjinalgku ilunytjaku. Palu nyura Godala wanganarangku kulintjikitja mukuringkunyangkampa paluru mayatjangku nyuranya tjukururunmankula walytjanmankuku.

17 Palu kuwarina Godanya pulkara mirawaninyi, panya nyura nganmanytjulpi kura kutju mukuringkula palyaningi munu nyura putu palya nyinangi. Palu kutjupa tjtjangku Tjukurpa Palya Jesunyatjara nyurala wangkanyangka nyura kampa kutjuparira kurunpa winkingku wanganarangku kulinu. Nyara palulanguruna Godanya pulkara mirawaninyi.

18 Ka Godalu nyuranya iwara kurangka ngaranyangka mantjinu munu nyuranya palumpa warakarinytjaku tjunu iwara palyangka wiru tjuta kutju palyantjaku.

19 (Ara nyangatjana nyurala wangkanyi utingku nyura tjukururungku kulintjaku, panya nyura mantangka nyanga nyinara putu nguwanpa mapalku nintiringanyi Godaku araku.) Panya nganmanypalpi nyura iwara kurangka anangi munu nyura kura tjuta kutju palyaningi kurunpa winkingku, palu uti nyura kuwari iwara palyangka ankula kurunpa winkingku Godala wanganarangku kulira palyanma munu tjukururu kutju nyinama.

20 Uwa nganmanytju panya nyura iwara kura wananingi munu kura kutju kulira palyaningi. Munu nyura tjukururungku palyantjikitjangku kulintja wiyangku wantingi panya nyura-mantu Godala kulintja wiya.

21 Munu nyura wanyu kura palyantjatjanu pulkara pukularingu? Wiya, nyura kuwari kuntaringanyi kura nganmanytju palyantjatjanungku kulira. Panya anangungku kura rawangku palyara kurunpa winki ilunyi.

22 Palu kuwari nyura kuraku mukuringkunytja wiyangku wantinyi, panya Godalu nyuranya iwara kurangka nyinanyangka mantjira palumpa iwarangka tjunu palumpa titutjara warakarinytjaku. Nyanga palulanguru Godalu nyuranya palyani tjukururu nyinanytjaku. Ka nyura nyara palulanguru wanka titutjara nyinaku.

23 Kulini nyura? Panya anangu iwara kurangka ngarala kura mantjilku munu ilura Godalanguru kawankatiku. Palu Godaku iwara kutjupa alatjitu ngaranyi panya iwara pala palula ngaranyangka paluru kutjukampa nganananya wankarunanyi Jesunya nganampa ngalkilpa ilunytjitjangu, kala palula tjungu titutjara nyinaku.

7

Moseku Tjukurtu Putu Wankarunkupai

¹ Walytja tjuṭa! Nyura tjukurpa Mosenya ungkunyjtjaku ninti nyinara nyangatja kulila, panya tjukurpa palunyala putu palyalku ilura wiyaringkunyjtjanungku, palu nganaṇa wanka nyinaralpi kutju palyalpai. Panya paintjtija tjuṭa ngaranyi anangu tjuṭangu wanganarangku kulira tjukaruru nyinanytjaku. Palu panya anangu ilunyangkampa tjukurpa nyanga paintjtija tjuṭangu palunya wituwituntja wiyaringu piruku kulira palyantjaku.

²⁻⁴ Ka palu purunypatu kuwari ngaranyi nyurampa Christanya ilunyangka.* Panya nganmanytju nyura tjukurpa panya Mosenya ungkunyjtjjangka kulira palyaningi Godalu nyuranya kalypangu pungguwiyangu wantinytjaku. Palu nyura iwara nyanga palunya wanara ngatalaringu Moseku tjukurpa uwankara putu tjukarurungku palyara. Palu kuwari nyanga nyura Christala junguringkula iwara nyara palunya wantingu, panya nyura ilungu purunypa Christanya ilunyangka. Munu nyura kuwari Christaku iwarangka ananyi, panya Godalu palunya ilunyangka wankara pakaltjinganu, kala kuwari palumpa walytjapiti nyinanyi Godala wanganarangku kulira warkarinytjikitja.

⁵ Panya nganmanytjula walytjangku kulira kura tjuṭa palyalkatingi. Nganaṇa ninti nyinangi tjukurpa Mosenya Godalu ungkunyjtjaku, panya tjukurpa nyara palurulanya painingi tjukaruru kutju nyinanytjaku. Palu iwara nyanga Moseku wanara nganaṇa putu tjukurpa paintjtija tjuṭa tjukarurungku arkara palyaningi wiru nyinanytjikitjangku munula kura tjuṭaku pulkara mukuringangi munula putu wantingi. Ka nyanga palulanguru nganampa ngarangi Godalu nganananya paira iyantjaku ngura kurakutu.

⁶ Uwa mulapa panyala Moseku tjukurpa kutju kulira putu Godala junguringangi. Palu kuwarila iwara panya palunya wantikatingu panya Godalulanya mantjira tjunu iwara kuwaritjangka Christanya nganampa ilunytjitjangu. Panya iwara nganmanyitjangka ankunyangka tjukurpa Mosenya ungkunyjtjjangku nganananya putu tjukaruruningi Godanya tjukarurungku wanantjaku. Panya tjukurpa nyiringka walkatjungkunyjtjangu nganaṇa putu wanganarangku

* **7:2-4** Tjukurpa nyangatja utintjikitjangku Paulalu ara kutjupa minyma kuritjara kampa kutjupara wangkangu alatji - *Wanyuṇa ara kutjupa minyma kuritjara wangka nyura kampa kutjupara kulira nintiringkunyjtjaku.* (2) Panya Moseku tjukurtu wangkapai minyma kuritjara uti palumpa kuringka wanka nyinanyangkalpi titutjara tjungu nyinama wantikatinytja wiya. Palu wati paluru ilunyangka minyma paluru wati kutjupa palya altinyi, panya tjukurpa paluru paini kuritjara nyinanyangka kutju. (3) Ka tjinguru wati kuri wanka nyinanyangka minyma paluru wati kutjupangka ngarirampa paluru kura palyani, munu paintjtija panyatja kurani. Palu palumpa kuri ilunyangka minyma paluru wati kutjupa palya altinyi, panya tjukurpa paluru paini kuritjara nyinanyangka kutju, ka paluru wati kutjupa altirampa kura palyantja wiya.

kulira palyaningi. Palu kuwari nganaṅa iwara kuwaritjangka ankunyangka Jesulu nganaṅanya mayatjangku kanyini, ka Kurunpa Milmilṅu nganaṅanya nintini Godanya tjukarurungku wanantjaku.

Moseku Tjukurtu Palya Munu Kura Utilpai

7 Kala nyanga palulanguru yaaltji kulilku tjukurpa Godalu Mosenya ungkunyjtija? Nyara paluru wanyu kura? Wiya, nyaratja kura wiya. Moseku tjukurpa palya alatjitu ngaranya, panya tjukurpa paluru ngayunya pailpai kaṅa kulilpai, “Munta-uwa, Godalu nyanga palunya pailpai.” Wanyuna unytjungku tjukurpa nyangatja wangkama utintjikitjangku. Panya Moseku tjukurta Godalu wangkara paintja nyanga alatji ngaranya,

“Nyuntu anangu kutjupangku kutjupa kutjupa walytjangku kanyinnyangka nyakula mukuringkunyta wiyangku wantima!”

Ka tjinguru ngayulu tjukurpa nyanga palumpa ngurpa ngaralampa walytjatjaraku nyakula mukuringama, paintjtija panya kulintja wiyatja. Palu ngayulu tjukurpa nyangatja kulintjatjanungku nintingku kulilku, “Munta-uwa, kurangkuna walytjatjaraku nyakula mukuringanyi.” Uwa, nganaṅa tjukurku nintiringkula kutju kulilpai nganaṅa kura nyinanytjatjanungku.

8 Palu panya nganmanypa ngayulu tjukurku ngurpa nyinangi palyapalku, ka kura nyara paluru ngarangi alatjitu ngayula unngu. Kaṅa palulanguru tjukurpa panya palunya kulinu, mununa painnyangka kulira ngayulu kura panya palunya puṅu wantingi, panya kulintja ngayuku ngarangi alatjitu walytjatjaraku mukuringkunyjtaku. Palu tjinguruna tjukurpa kulintja wiya ngurpa nyinarampa ngayulunatju kura kulintja wiya ngurpa alatjitu nyinama.

9-10 Uwa, nganmanypana Moseku tjukurku ngurpa nyinangi mauntalpa palya-palku. Mununa palulanguru tjukurpa panya paintjtija kulinu, palu ngayuku kulintja kuratu ngarangi munu puṅu wiyaringangi. Mununa tjituru-tjitururira kulinu, “Munta nyanga kura tjuṅtampanal palyaningi. Kantini Godalu palya ngayunya iluntankuku.” Panya Moseku tjukurtu alatji wangkanyi, “Wanka mulapa nyinanytjikitjangku wiru kutju palyanma, kura wantira.” Palu ngayulu kura puṅu wantingi kaṅi tjukurpa nyara palulanguru Godalu ngayunya ngurkantanu ilunytjaku.

11 Panya ngayulu kulinungi alatji, “Moseku tjukurpa ngaranya ngayulu kulira tjukaruru nyinanytjaku.” Palu wiya, ngayulu kulira puṅu tjukaruru nyinangi, panya tjukurpa nyara paluru ngayulu kura tjuṅa palyantja kutju utinu, ka nyara palulanguru Godalu ngayunya ngurkantankunyjtaku ngarangi alatjitu. Palu ngayulu tjukurku nintiringkula alatji kulinungi, “Wanyu kaṅatju tjukurpa nyangatja wanganarangku kulinma wanka mulapa nyinanytjikitjangku.” Alatjina kulinungi ngunti panya ngayulu puṅu wanganarangku kulinungi mununa kura palyara tjukurpa palunya kuraningi, ka ngayunya iluntankunyjtaku ngarangi.

12 Panya tjukurpa Godalu Mosenya ungkunyjtija pulka mulapa ngaranya wiru alatjitu, munulanya nintini tjukaruru wirura nyinanytjaku.

13 Ka tjukurpa nyanga wirunguru wanyu ngayunya iluntankunyjtaku ngaranya? Wiya, ngayulu kura palyantjtjanguru kutju ngayunya

iluntankunytjaku ngaranyi, tjukurnguru wiya. Panya tjukurpa nyanga wirungku nintini ngayulu kura palyantja uwankara, kana nintingku kulini, "Mulapa ngayulu kura palyara Godala tungunpunganyi, kani ngayunya iluntankunytjaku ngaranyi alatjitu ngayulu kura palyantjitjanguru."

Kura Munu Palya Ngananala Unngu Nyinanyi

¹⁴ Nganana ninti panya Moseku tjukurpa wiru mulapa panya Godalu wangkanytja. Palu ngayulu anangu mantatja mununa iwara kurangka titutjara ananyi mununa putu palunya wantikatinyi.

¹⁵ Palu yaaltjirikuna? Putuna kulini, panya ngayulu wiru palyantjikitja mukuringanyi, palu putuna palyani. Mununa kura tjuata wantinytjikitjangku kulini, palu pirukuna kura nyara palunya tjananya palyani alatjitu.

¹⁶ Panya ngayulu tjituru-tjitururipai kura palyara mununa pala palulanguru kulilpai, "Mulapa Godaku tjukurpa tjukaruru ngaranyi, kana ngayulu tungunpungkunytjatjanu uti tjituru-tjitururima."

¹⁷ Palulanguruna kulini, "Ngayulu panya wiru palyantjikitja mukuringanyi, palu ngayula unngu kura ngaranyi, nyara paluru ni kura palyantjaku witu ni."

¹⁸ Ngayulu ninti panya ngayula unngu palya ngaranytja wiya. Panya ngayulu mukuringanyi wiru palyantjikitja, palu kurangkuni angatjunanyi, kana putu nguwanpa palyani.

¹⁹ Ngayulu wiru palyantjikitja mukuringkula putu alatjitu palyani, mununa kura tjuata wantinytjikitja mukuringanyi, palu palyani alatjituna putu wantira.

²⁰ Uwa, putu nguwanpana kulini palyanyku nyinanytjikitjangku. Palu panya ngayula unngu kura ngaranyi, nyara paluru ni kura palyantjaku rawangku wituwitu ni.

²¹ Uwa, nyanga alatji ngayula titutjara ngaranyi. Ngayulu wiru palyantjikitja mukuringanyi, palu kura kutju alatjituna rawangku palyani.

²² Ngayulu kurunpa winki Godaku tjukurku pulkara pukularinyi.

²³ Palu tjukurpa palunya putu tjukarurungku palyani. Panya ngayula unngu kura ngaranyi mununi nyara paluru wiru palyantjikitja mukuringkunya angka kuralpai. Panya kura munu palya, paluru pula ngayula unngu ngaranyi titutjara mununi nyara paluru pula wituwitulpai, kana wiru palyantjikitja mukuringkula putu palyani, panya kurangkuni wituwitulpai kura kutju palyantjaku. Kana putu nguwanpa wantipai.

²⁴⁻²⁵ Uwa, ngaltutjaranatju mulapa iwara kurangka ananyi ilunytjikitja. Ngayulu unngu kulilpai Godaku tjukurpa palyantjikitjangku. Palu panya ngayula unngu kura kulu ngaranyi, mununi nyara paluru kura palyantjaku wituwitulpai, kana putu walytjangku kulira wantinyi. Kanitju nganalu wankarunkuku ilunytjaku-tawara? Wiya ngayulu kuwari Godanya kutjulta pulkara mirawaninyi, panya paluru ngayunya Mayatja Jesula Christalawanungku wankarura iwara palyangka tjunu.

8

Kurunpa Milmil̄tu Nintilpai Tjukaruru Nyinanytjaku

¹ Uwa, Godalu nganannya Jesula Christala tjunguringkula nyinanyangka iluntankunyitja wiyangku wantinyi.

² Panya nganmanypala kura tjuṭa palyara iwara kurangka anangi ilunytjikitja. Palu Jesula Christala tjunguringkunyaangka Kurunpa Milmil̄tu nganannya iwara kuranguru wankarunu munulanya iwara palyangka tjunu titutjara palula tjungu ankunytjaku. Ka nganana iwara panya kura piruku wanantja wiyaringulta.

³ Panya tjukurpa Godalu Mosenya ungunytjitjangu nganannya puṭu tjukaruruningi, panya nganana anangu kurunpa upa munula tjukurpa palunya kulira puṭu nguwanpa palyaningi tjukaruru nyinanytjikitjangu. Nyara palulanguru tjukurtu nganannya puṭu tjukaruruningi kura pampulwiyangku wantinytjaku. Palu Godalu palumpa katja iyanu paluru anangurira puntu nganannya purunypa nyinanytjaku, ka nganampa kuranguru anga-ilungu nganampa ngalkilpa. Ka nyara palulanguru Godalu kuwari nganannya tjukarurulpai kura pampulwiyangku wantinytjaku.

⁴ Nyanga alatji paluru palyanu nganana tjukurpa panya Godalu Mosenya ungunytjitja wanganarangku kulira palyantjaku. Panya kuwari Kurunpa Milmil̄nga nganana unngu tjarpatjunu, kalanya paluru nintini nganana tjukarurungku kulira palyantjaku. Panya nganmanytjula kura kutjupa kutjupa tjtaku mukuringkula palyaningi munula puṭu wantingi. Palu kuwarila Kurunpa Milmil̄ta kulira palyalpai.

⁵ Ka kutjupa tjuṭangku panya kura kutjupa kutjupa tjtaku mukuringkula palyalpai, nyara paluru tjana Godala kulintja wiyangku tjananku mukuringkunyititja kutju kulini. Palu kutjupa tjuṭangku Kurunpa Milmil̄ta wanganarangku kulilpai, nyara paluru tjana Kurunpa Milmil̄tu wangkanyangka palyalpai munu kurangu wituwitunyangka wantinyi.

⁶ Panya nganana kura tjuṭa kulira mukuringkunyititja palyarampa iwara kura wanaṇi munula ilunyi. Palu nganana Kurunpa Milmil̄tu wangkanyangka wanganarangku kulira palyarampa iwara palya wanaṇi, munula wanka alatjitu nyinanyi kurunpa pukulpa.

⁷ Ka anangu kutjupangku kura kutjupa kutjupa tjuṭa kulira mukuringkunyititja palyalpai, nyara paluru Godaku malpa wiya, palumpa mirpantju nyinanyi. Panya paluru Godaku tjukurpa kulira palyalpai wiya. Paluru puṭu wanganarangku kulilpai,

⁸ munu nyara paluru puṭu Godanya pukulmananyi paluru mukuringkunyitja kutju walytjangku palyara.

⁹ Palu nyura panya kutjupa nguwanpa, panya Kurunpa Milmil̄nga nyurala unngu nyinanyangka kurangu nyuranya wituwitunyangka nyura wantipai kulira palyantja wiyangku, munu nyura Kurunpa Milmil̄ta kutju kulilpai. Palu tjinguru nyurala unngu Kurunpa Milmil̄nga nyinanytja wiya ngaranyangkampa nyura Jesuku walytja wiya.

¹⁰ Palu Christanya nyurala tjungu nyinanyangkampa Kurunpa Milmil̄tu nyuranya wanka kanyini, panya Godalu nyuranya Christalangu tjukarurunmara walytjanmanu. Mulapa nyura puntu iluku kura

palyantjatjanu, palu kurunpa nyura Christalanguru wanka titutjara nyinaku.

¹¹ Panya Godalu Jesunya ilunyangka wankara pakaltjinganu Kurunpa Milmilṭawanungku, ka Kurunpa nyara paluru nyurala unngu nyinara nyuranya kulu palu purunypatu ilunyangka wankara pakaltjingalku.

¹² Uwa walytja tjuṭa, kulinmaya! Utila tjukaruru palyanyku nyinanytjikitjangku kulinma munula kura kutjupa kutjupa tjuṭa nganana kulira mukuringkunyjtija palyantja wiyangku wantima.

¹³ Panya nganana kura kutjupa kutjupa tjuṭa kulira mukuringkunyjtija rawangku palyalkatira palyalkatira ilura wiyaringkuku. Nyara palula-tawarala uti tjukaruru nyinama. Palu Kurunpa Milmilṭu ngananyanya nintinnyangka nganana kura kutjupa kutjupa tjuṭa kulira mukuringkuwiyangku wantirampa Godala tjungu wanka titutjara nyinaku.

¹⁴ Panya Kurunpa Milmilṭa kulilpai tjuṭa, nyara paluru tjana Godaku tjitji mulapa nyinanyi.

¹⁵ Nganmanypa panyala nganana Godaku nguluringkupai nyinangi. Palu kuwarila ngulu wiya, panya Godalu nganana unngu Kurunpa Milmilnga tjarpatjunu, ka nyara paluru ngananyanya mayatjarira wirura kanyini pauntjingantja wiyangku. Panya palurulanya Godaku katja untalpa mulapa nyinanytjaku palyani, munulanya rapani Godanya rawangku Mamanmara walkuntjaku. Kala mulapatu rapangku Godanya mama walkulpai.

¹⁶ Panya Kurunpa Milmilṭu nganana unngu nintinnyangka nganana nitingku kulini, "Mulapala nganana Godaku tjitji nyinanyi."

¹⁷ Kala Godaku tjitji nyinanytjatjanungku ngula Christala tjungungku wiru mulapa mantjilku Godalu panya kalkuntjitja. Palu nyanga mantangka nyinanyangka pika kura kutjupa kutjupa tjuṭa kuwari nganana utiringanyi panya Christala nganmanypa utiringangi, nyara palu purunypa. Palu palya, panya Godalulanya ngula wirura kanyilku palumpa ngura wiru mulata Christala tjungura.

Ngula Wiru Mulapa Utiringkuku

¹⁸ Uwa mulapa kuwari nganana pika kura kutjupa kutjupa tjuṭa utiringanyi ngananyanya tjituru-tjiturunkunyjtikitja. Palu nganana munkaritja waintara kulini, panya ngulala Godala tjunguringkula ngura wiru mulata nyinaku, munula kura panya tjuṭaku mantangkalpi ngaranytjitja uwankaraku watarkuriku alatjitu.

¹⁹ Panya kutjupa kutjupa Godalu paluntjitja uwankara manta winkitja Godaku ala-ala patara ngaranyi paluru palumpa walytja tjuṭa tjanala mirangka utintjaku.

²⁰⁻²¹ Panya Adamalu pula kurantjanguru, Godalu wangkangu paluru paluntjitja uwankara kuraringkunyjtaku munu mailururingkunyjtaku titutjara. Palu nyanga paluntjitja uwankaraku Godanya watarkurinytja wiya, panya paluru kalkunu ngula piruku uwankara wiru mulapa malakungku palyantjikitjangku piruku kuraringkunyjtaku wiya. Ka uwankara Godalu paluntja kutjuparira wiru mularariku Godaku walytja tjuṭangka tjungu.

22 Panya nganana nintingku kulini Godalu paluntjitja uwankara titutjara ankuṅi pikatjara purunypa kuwaripatjaranguru alatjitu. Panya minyma iti kanyintjikitja ngarira ankulpai, nyara palu purunypa Godalu paluntja uwankara ankuṅi panya ngula piruku wiruntjaku.

23 Ka palu purunypa nganana kulu Godaku walytja tjuṭa kurunpa watjil-watjilpa ulanyi mantangka nyanga nyinara, munula ala-alangku patara nyinara nyanganyi ngula Godalu nganananya puntu winki kampa kutjupara wiru mularmankunytjaku. Panya Godalu nganmanytju Kurunpa Milmilnga ngananala unngu tjarpatjunu, kala titutjara kulil-kulilpa nyinanyi, munula kulini, "Yaalaralanya puntu winki wiru mularmankuku palumpa katja unṭalpa mulararinytjaku."

24-25 Panya nganananya mulapa Godalu nganmanytju wankarunu, palu wanka mulapa ngula ngaranyi wanka titutjara Godala tjungu nyinanytjaku ngura wirungka. Kala nyara palumpa ala-alangku patara nyinara nyanganyi ngula Godalu nganananya ngura wirukutu katinytjaku. Tjingurula nganmanytju katinyangkampa nganana palumpa ala-alangku patantja wiya watarku nyinama. Palu kuwaripatula patara nyinanyi palumpa munula uti kaar-kaarurinytja wiyangku purkarangku nyinara patanma alatji kulira, "Panya mulapa paluru nganananya ngula puntu winki wiru mularmankuku."

26 Nyanga alatji kulu ngaranyi, panya nganana upa munula putu kulilpai. Palu panya Kurunpa Milmilnga ngananala ngaranyi nganananya nintintjikitja nganana kulira palumpa raparingkunytjaku. Panya kutjupa-ara nganana Godala wangkanytja-tjiratja tjituru-tjitururipai putu kulira, "Yaaltjingarala Godala tjapilku?" Palu alatji tjituru-tjitururinyangka Kurunpa Milmilṭu ngananala unngu nyinara pulkara Godala tjapilpai nganampa.

27 Ka Godalu tjukarurungku kulilpai. Panya paluru nintingku kulilpai anangungku unngu kulinyangka, munu palulanguru nintingku kulini Kurunpa Milmilṭu Godaku walytja tjuṭaku tjapinyangka, panya paluru pula tjungungku kulilpai.

28 Ka nganana ninti panya Godalu wirura kanyilpai palumpa mukur-inkupai tjuṭa. Panya mantangka nyanga nyinanyangka ngananala kutjupa kutjupa tjuṭa utiringkupai, kutjupa tjuṭa palya nganana pukularinytjaku, kutjupa tjuṭa kura nganana tjituru-tjitururinytjaku. Palu nganana palumpa walytja nyinanyangka Godalu pukulpanguru munu tjituru-tjitururunguru nganananya palyalpai kunpuringkula palunya tjukarurungku wanantjaku. Panya paluru alatjitu mukur-inkula nganananya ngurkantara tjunu palumpa walytja mulapa nyinanytjaku.

29 Panya Godalu palumpa walytja tjuṭa nganmanytju ngurkantanu kuwaripatjara mulapa uwankara wiyangka, munu nganmanytju kulinu tjana palumpa katja unṭalpa nyinanytjaku tjukaruru mulapa palumpa katja Jesunya purunypa. Panya palunya Godalu nganampa kutjukuṭa nganmanyitja tjunu, ka nganana palumpa maṭanypiti maṭatja maṭatja nyinanyi.

30 Panya Godalu palumpa walytja tjuṭa nganmanytju ngurkantankunytjatjanungku altingu, ka nganana palunya kulinyangka Godalulanya tjukarurunmanu. Munulanya nyara palulanguru ngura wirukutu katiku wiru mulapa nyinanytjaku palula tjunguringkula.

Godanya Nganampa Pulgara Mukuringkupai

³¹ Ka nyanga palulanguru nganana uti alatji kulinma mulapa panya Godanya nganampa ngalkilpa anga-wangkapai nyinanyi, kalanya nganalu kuralku paluru atunymara kanyinnyangka? Wiya, kutjupangu nganananya putu kurani paluru kanyinnyangka.

³² Panya Godalu katja palumpa ngurtjuringkunyta wiyangu intjanungku iyanu nganampa anga-ilunytjaku. Kala pala palulanguru kulini, panya palurunku nganmanytju katja iyantjatjanungku kutjupa kutjupa tjuta kulu nganananya intjanungku ungkuku ngurtjuringkunyta wiyangu.

³³ Ka anangu kutjupangu nganananya Godalu ngurkantara tjunkunyta tjuta putu puntura wangkanyi, panya Godalulanya tjukarurunmanu.

³⁴ Kalanya nganalu Godala mirangka mirpanarira kukanymankuku Godaku walytja tjuta? Wiya kutjupangu nganananya putu kukanymananyi, panya Christanya nganampa ngalkilpa ilunytjanguru, ka panya Godalu palunya wankara pakaltjinganu, kalampa nyara paluru Godala itingka nyinara anga-wangkanyi mayatja pulkangu.

³⁵ Paluru panya nganampa pulgara mulapa mukuringanyi. Ka kutjupa kutjupa tjutangu nganananya putu mauntananyi Jesulanguru. Panya kura kutjupa kutjupa tjuta tjinguru nganana utiringkuku, tjinguru anantjaku, tjinguru pikantankunytjaku, tjinguru kurunpa tjituru-tjitururingkunytjaku, tjinguru mai wiya ulytja wiya nyinanytjaku, munta tjinguru mirikutura iluntankunytjaku. Palu kura nyanga uwankarangku nganananya putu mauntananyi Jesulanguru panya palurulanya titutjarangu mukulyangu kanyini.

³⁶ Panya nyiringka iriti wakatjunkunytja ngarinyi tjana Godala wangkanytja alatji,

“Nganana nyuntumpa walytja tjuta nyinanyangka tjana nganananya rawangu kukanymananyi.

Munulanya tjiipi purunypa iluntankunytjikitjangu rawangu nyakukatinyi.

Panya tjiipi tjuta kaputura kanyilpai pungkula ngalkuntjikitjangu, palu purunypa.” *

³⁷ Uwa, kura kutjupa kutjupa tjuta nganana utiringkuku, palu nganana nguluringkunytja wiya rapa alatjitu nyinanyi Jesulanguru, panya palurulampa pulgara mukuringanyi, ka panya kura nyanga paluru tjana nganananya putu Godalanguru mauntananyi.

³⁸⁻³⁹ Uwa, Godanya panya nganampa pulgara mulapa mukuringanyi, kana gayulu nintingu kulini kutjupangu nganananya putu mauntananyi Godalanguru paluru nganampa mukuringkunyaangka. Tjinguru nganana iluku munta tjingurula wanka nyinaku, palu Godanya nganampa mukuringanyi alatjitu. Ka panya angelpa tjuta munu mamu tjuta kulu, nyara paluru tjana tjinguru nganananya kuranma, palu putulanya tjana Godalanguru mauntananyi paluru nganananya mukulyangu kanyinnyangka. Ka kuwari kutjupa kutjupa tjuta nganana utiringu, munta tjinguru ngula nganana utiringkuku, palu palya, panya Godalu nganananya mukulyangu alatjitu kanyini titutjarangu. Tjinguru ilkarangka kutjupa kutjupa

* 8:36 Psalm 44:22

utiringkuku nyakula nguluringkunyjtaku munta tjinguru manta un-
ngunguru pakalku,* palu putulanya ngulutjingara mauntananyi Go-
dalanguru. Tjinguru Godalu paluntjtija uwankarangku nganananya
kuralku palu putulanya mauntankuku Godalanguru paluru nganampa
mukuringkunyangka. Panya paluru Jesula Christalawanu nganampa
titutjara mukulya pulka alatjitu nyinanyi.

9

Godanya Munu Palumpa Walytja Tjuta

¹⁻² Kulilaya! Ngayulu kurunpa pulkara tjituru-tjitururinyi ngayuku
walytja tjtaku, Israelkunu tjtaku, panya tjana Jesunya tjanampa
wankarunkupainya wantinyangka. Mununa tjanampa rawa alatjitu
unngu ulapai. Nyangatjana nyurala tjukarurungku wangkanyi
Christala mirangka ngunti wangkanytja wiyangku. Panya Kurunpa
Milmiltu ngayula unngu nintinnyangkana tjukarurungku wangkanyi.

³ Uwa, ngayulu tjituru-tjituru mulapa nyinanyi nyara palumpa
tjanampa ngayuku walytja tjtaku, mununa palulanguru
ngaluringkula unngu kulilpai, "Yaaltjingarana tjananya alpamilalku
Jesuku walytjaringkunyjtaku?" Mununa pulkara tjituru-tjitururira
kulilpai, "Tjinguruna alatji Godala wangkama, 'God, ngayunyani
wanyu paila mauntalpa nyinanytjaku Christalanguru, kaya paluru
tjana ngapartji nyuntumpari Christaku mulamularingkula.'"
Alatjina tjituru-tjitururira wangkanytjikitjangku kulilpai tjanampa
mukuringkula, panya tjana ngayuku walytja tjuta, Israelkunu tjuta.

⁴ Panya palunya tjananya Godalu ngurkantara tjunu palumpa
katja untalpa nyinanytjaku. Munu palurunku tjananya nintinu
witulya pulka nyinara, munu wiru tjuta tjanampa palyantjikitjangku
kalkuningi tjana ngapartji palula wanganarangku kulintjaku, munu
panya tjananya ungu tjukurpa pulka tjuta Moselawanungku. Munu
tjananya nintinu junguringkula palunya tjukarurungku walkuntjaku.
Munu tjananya wiru tjuta ungkunyjtikitjangku kalkunu.

⁵ Ka tjanampa panya tjamupiti iriti nyinangi Aipuramanya, Isaa-
canya, Jacobanya tjana. Ka panya walytjapiti nyanga palula tjanalan-
guru Christanya kulu anangurira nyinangi palumpa tjanampa walytja
alatjitu.

Uwa, Christanya Godanya alatjitu mayatja pulka mulapa nyinanyi
uwankarangka waintarinytja, kala palunya walkunma titutjarangku.
Uwa mulapa.

⁶ Mulapa ngayuku walytja tjtangku Christanya wantingu, Is-
raelkunu tjtangku. Kala pala palulanguru nyaa kulilku? Godalu
wanyu ngunti kalkunu Israelkunu tjuta? Wiya, Godalu tjukarurungku
kalkunu, panya paluru ngunti wangkapai wiya. Mulapa wati panya
Israelku walytja tjuta mulararingu malatja malatja,* palu kutjupatjara

* **8:38-39** Alatji Paulalu wangkangu tjanala Rome-anya ngurara tjtangka panya paluru
tjana nganmanytjulpi kuliningi alatji, "Nganampa god tjuta ilkarangka nyinapai, ka panya
mamu tjuta manta unngu nyinapai." Alatjia nganmanytju kuliningi, ka Paulalu tjananya
wangkangi nyanga palumpa tjanampa nguluringkuwiya nyinanytjaku. * **9:6** Godalu wati
panya Jacobanya ininu Israelnga, Aipuramaku pakali panya. Palulangurula palumpa walytja
malatja malatja wangkapai Israelkunu tjuta.

kutjuya Godaku walytjapiti nyinanyi, uwankara wiya. Nyara paluru tjana kutju Israelkunu mulapa nyinanyi Godaku walytjapiti.

⁷ Palu wanyu Aipuramaku pakalipiti malatja malatja Godaku walytjapiti nyinanyi? Wiya, kutjupatjara kutjuya Godaku walytjapiti nyinanyi. Panya Godalu Aipuramanya kalkunu nyanga alatji wangkara, "Isaacalanguru kutjuya nyuntumpa walytjapiti tjturingkula manynara wanalku malatja malatja, ngayulu panya kalkuntjanguru kutju."*

⁸ Ka panya Aipuramalu walytja mukuringkula minyma kutjupangka katja kutjupa utinu ini panya Itjumailnga, kaya nyanga palumpa pakalipiti malatja malatja Godaku walytjapiti wiya nyinanyi, panya palunya tjananya Godalu kalkuntja wiyatu. Palu panya Aipuramaku kuri Tjiiralanguru anangu tjuta utiringu Godalu nganmanytju kalkuntjitjanguru, nyara paluru tjana kutju Aipuramaku pakalipiti mulapa nyinanyi, Godaku walytjapiti.

⁹ Panya Godalu kalkunu Aipuramanya nyanga alatji,

"Ngula tjirirpi nyara ngayulu kalkuntjitjangka ngayulu malaku pitjaka wityula pulkanya, ka nyuntumpa kuringku Tjiiralu tjitji katja kanyilku." *

¹⁰ Ka ara kutjupa kulu ngaranyi nyura kulira nintiringkuntjaku, panya Ripikalu iti katja kutjara kanyinu mama kutjutja Isaacalanguru.

¹¹⁻¹² Palu pula iti wirkankuntjta kuwaripangka Godalu Ripikala wangkangu, "Nyuntun kuwari iti katja kutjara kanyilku, ka malatja mayatjariku munu kutangka waintariku."* Alatji Godalu Ripikanya kalkunu nganmanytju. Tjinguru paluru alatji wangkama pulanya nyakula kutju. Palu wiya, Godalu kura nyinanyangka palya nyinanyangka nyakuntjta wiyangku nganmanytju ngurkantanu pula iti wirkankuntjta kuwaripangka malanya mayatjarinytjaku. Panya Godalu alatjitu walytjangku kulilpai munu paluru alatjitu mukuringkula ngurkantankupai, palya nyinanyangka kutju nyakula tjunkuntjta wiyangku.

¹³ Panya iriti nyiringka walkatjunkuntjta alatji ngarinyi,

"Ngayuluna Jacobanya ngurkantanu mununa litjunya wantingu." *

¹⁴ Palu nyura yaaltji kulini? Tjinguru nyura kulini Godanya tjakaruru wiya panya paluru litjunya wantinyangka. Palu wiya, Godanya tjakaruru alatjitu nyinanyi ngunti palyalpai wiya.

¹⁵ Panya iriti paluru wangkangu Mosela alatji,

"Ngayulu alatjitu walytjangku kulira anangu ngalturingkuku. Mununa ngayulu alatjitu mukuringkula anangu ngaltuntjungku kanyilku." *

¹⁶ Kulini nyura? Godanya walytja alatjitu mukuringkula anangu tjtaku ngalturingkupai. Panya anangungku walytjangku kulira mukuringkula ngatjinnyangka kutju paluru ngalturingkupai wiya. Munu palu purunypatu anangu kutjupa wirura tjakaruru nyinanyangka ngalturingkuntjkitjangku kulintja wiya. Panya paluru alatjitu mukuringkula ngalturingkupai.

¹⁷ Panya iriti nyiringka walkatjunkuntjta ngarinyi nyanga alatji Godalu Piirala wangkanytja,

* 9:7 Genesis 21:12 * 9:9 Genesis 18:10,14 * 9:11-12 Genesis 25:23 * 9:13 Malakaiku

1:2-3 * 9:15 Exodus 33:19

“Ngayuluna nyuntunya Itjipaku mayatja pulka tjunu ngayuku witulya pulka nyuntulanu utiringkunyjtaku munu anangu ngura winitjangku ngayunya kulira mirawaninyjtaku.” *

¹⁸ Pala palulangurula kulini panya Godalu walytjangku alatjitu mukuringkula anangu kutjupa ngurkantara ngaltunyjtungku kanyilpai, munu piruku paluru alatjitu anangu kutjupa wantinytjikitjangku mukuringkula wantipai alatjitu wituwitu titutjara nyinanyjtaku.

¹⁹ Ka nyanga palunya kulirani tjinguru kutjupangu tjapilku alatji, “Godalu alatjitu-manti ngurkantankupai paluru mukuringkulampa. Munu nyaaku nganampa mirpanarinyi kura palyannyangka? Uti paluru wantima nganananya kuranmankunyjtja wiyangku, panya paluru kulintjtija nganana putu kampa kutjupananyi.” Alatjini tjinguru kutjupangu tjapilku.

²⁰ Kana palunya wangkaku, “Wiya, nyuntun anangu munun nyaaku nyanga alatji wangkanyi, panya Godalu nyuntunya palyanu, ka nyuntu uti Godala ngaparpungkula wangkanyjtja wiyangku wantima. Panya watingku piti palyantjtjangku wanyu ngaparpungkula wangkapai, ‘Nyaakunin alatji palyanu?’ Wiya, piti palyantjtjangku alatji wangkapai wiya.

²¹ “Kulila, panya minymangu punu kutjunguru piti kutjupa kutjupa tjuta palyalpai. Nyara paluru mukuringkula palyalpai. Tjinguru paluru kutju palyani maiku minaku munu kutjupa palyani manta tjawantjikitjangku. Nyangatja paluru mukuringkula walytjangku kulira palyantja punu panya kutju palulanguru.”

²² Ka Godalu palu purunypa mukuringkula walytjangku kulira palyalpai anangu tjutangka. Kala nganana ngapartji putu Godala wangkanyi, panya paluru tjinguru mukuringangi anangu tjutangka nintintjikitja nyanga alatji, panya paluru kuranguru pulkara mirpanaripai munu witulya pulkangu tjukarurulpai. Panya anangu kuralpai tjuta iluntankunyjtaku ngaranyi alatjitu. Palu panya Godalu tjananya nyakula kuwaripanguku wantingi patara mapalku wiyantja wiyangku.

²³ Munu paluru mukuringangitu nganananya, palumpa walytja tjuta, wirura mulatu kanyintjikitja. Panya paluru alatjitu nganananya ngaltunyjtungku ngurkantanu nganmanytju, nganana palula tjungu titutjara wirura nyinanyjtaku.

²⁴ Panya paluru nganananya Jew tjutanguru munu Jew wiya tjutanguru kulu ngurkantanu palumpa walytja tjuta nyinanyjtaku.

²⁵ Panya wati wangkatjarangu iriti Godaku wangka walkatjunu wati panya ini Utjyalu nyanga alatji,

“Kutjupa tjutaya ngayuku walytjapiti nyinanyjtja wiya.

Nyara palunya tjananyaana wangkaku alatji, ‘Nyura kuwari ngayuku walytjaringu!’

Panya nganmanypana tjanampa mukuringkunyjtja wiya nyinangi, palu kuwarina tjananya wangkaku alatji, ‘Nyurampana pulkara mukuringanyi.’ ” *

Alatji Utjyalu iriti walkatjunu. Munu piruku nyangatja kulu walkatjunu.

* 9:17 Exodus 9:16 * 9:25 Uutjyaku 2:1; 2:23

26 “Panya Godalu nganmanytju ngura kutjupangka tjananya wangkangu nyanga alatji, ‘Nyura ngayuku walytja nyinanytja wiya.’

Alatji paluru nganmanytju wangkangu.

Palu kuwari Godalu ngura nyara palulalta tjananya walytjanmankuku, kaya palumpa katja untalpa nyinaku God panya wankaku.” *

27 Ka wati panya Aitjayalu iriti wangkangu alatji,

“Anangu Israelkunu tjuta mulararira, minga tjuta purunypa nyinaku, winki mulapa.

Palu Godalu kutjupattjara kutju wankarunkuku.

28 Panya paluru rawaringkunyitja wiyangku anangu watarku nyinapai uwankara manta winkingka ngurkantara tjaralku munu wiyalku.” *

29 Panya Aitjayalu nganmanytju tjukarurungku tjakultjunu alatji,

“Godanya panya witulya pulka mulapa, munulanya tjinguru paluru mukuringkula nganananya Israelkunu tjuta uwankara wiyanna,

panya paluru anangu uwankara tawunu panya kutjarangka wiyanu Tjatamala pulala Kumarala, nyara palu purunypa.

Palu wiya, Godalu nganananya uwankara wiyantja wiyangku kutjupattjara wantingu wankaru nyinanytjaku.” *

Israelkunu Tjuta Munu Tjukurpa Palya

30 Uwa, nyangatjala utingku wangkanyi. Panya anangu Jew wiya tjtaya nganmanypa mukuringkunyitja wiya Godaku iwaraku tjukaruru nyinanytjikitja. Palu Godalu tjananya Jesuku mulamularingkungangka tjukarurunmankula walytjanmanu.

31 Ka Jew tjtangu Moseku tjukurwanungku kulira arkara palyaningi Godala tjukaruru nyinanytjikitjangku, palu wiya tjana ngatalaringu.

32 Ka nyaanguru tjana ngatalaringi? Wiya, panya paluru tjana walytjangku arkara palyalkatingi Godala mirangka tjukaruru nyinanytjikitjangku, munuya kulinigi, “Godalu nganananya walytjanmananyi wirura tjukaruru nyinanyangka nyakula.” Palu tjana ngunti kulinigi. Utiya Godaku mulamularingama paluru tjananya kura palyantjittjangu wankarunkunyitjaku, ka paluru mulamularingkungangka nyakula tjananya tjukarurura walytjanmanama. Palu tjana wantinyangka Jesunya puli purunypa tjanampa iwarangka anganaripai munu tjananya tjina tarpipungkula punkatjingalpai, panya tjana walytjangku kutju kulira palunya putu tjukarurungku ngurkantankupai.

33 Panya nyiringka iriti walkatjungkunyitja alatji ngarinyi,

“Nyawa, watiņa tjunkuku Jerusalemala apu purunytju iwarangka nyinara tarpipungkunyitjaku.

Kaya anangu tjuta tarpipungkungangka punkalku palumpa putu mulamularingkupai tjuta.

Palu anangumpa palumpa mulamularingkula Godala mirangka kunta wiya ngaraku pukulpa alatjitu.” *

* 9:26 Uutjyaku 1:10 * 9:28 Aitjyaku 10:22-23 * 9:29 Aitjyaku 1:9 * 9:33 Aitjyaku 8:14; 28:16

10

¹ Uwa, Jesuku walytja tjuta! Ngayulu pulkara mukuringanyi kurunpa winki ngayuku walytja tjutaku panya Jew tjutaku, tjana Jesuku mulamularingkula wankaringkunyjtaku. Panya tjanampaṅa titutjarangku tjapilpai Godala.

² Kaṅa nyangatja palunya tjananyatjara wangkanyi, panya tjana pulkara arkani Godaku iwara tjukarurungku waṅantjikitjangku, Godanya tjanampa pukularinyjtaku. Palu paluru tjana nintiringkunyjtja wiyatu Godaku iwaraku.

³⁻⁴ Panya Godalu kutjungku anangu tjuta tjukarurunmankupai. Palu palunyaya kulira wantingi munuya walytjangku arkara palyanangi Moseku tjukurwanungku tjana walytja Godala mirangka tjukaruru ngaranytjikitjangku. Palu tjana ngunti kuliningi Moseku tjukurwanungku Godala mirangka tjukaruru ngaranytjikitjangku. Panya kulintja nyanga palunya Christalu pitjala wiyanu, munu panyalampa iwara kuwaritja alānu Godalu palumpa mulamularingkupai uwankara tjukarurunmankunyjtaku.

⁵ Kulila Mosenya, panya paluru iriti walkatjunangi Godaku tjukurwanu palula mirangka tjukaruru ngaranytjaku nyanga alatji, "Anangungku tjukurpa nyangatja wangaṅarangku kulira palyarampa Godala junguringkula wanka titutjara nyinaku." *

⁶ Palu tjukurpa kutjupa nyiringka ngarinyi panya anangu Godaku mulamularingkula kutju palula junguringkula tjukaruru ngaraku. Kala mulamularingkupai tjutangku alatji wangkawiyangku wantipai, "Ngananya wanyu ilkarikutu tatilku munu Christanya altira ngalyakatiku mantakutu nganananya iwara tjukaruru nintintjaku?" Wiya alatjitu.

⁷ Munula palu purunypatu alatji wangkawiyangku wantipai, "Ngananya wanyu manta unngu tjarpaku munu Christanya miriku ngurangka ngarinyangka wankara pakaltjingalku nganananya iwara tjukaruru nintintjaku?" Wiya alatjitu.

⁸ Panya nganaṅa mulamularingkupai tjutangku alatji kulilpai, "Wiya, Godaku tjukurpa nganaṅala unngu ngaranyi alatjitu, ka nganaṅa tjaliny pangku wangkanytjaku ngaranyi alatjitu." *
Kaṅa tjukurpa panya palunyatu rawangku nyurala wangkanyi kulira mulamularingkunyjtaku.

⁹ Alatjina wangkanyi, "Tjinguru nyuntu tjaa alaringkula utingku Jesunya mayatjanmankuku munun kurunpa winki Jesunya ilunytja Godalu pakaltjingantjijtaku mulamularingkuku, ka nyara palungaguru Godalu nyuntunya wankarunkuku palula tjungu nyinanytjaku."

¹⁰ Panya nganaṅa kurunpa winki mulamularingkunyaṅka Godalu nganananya tjukarurunmankupai. Munu nganaṅa Jesunya wangkara utingku mayatjanmankunyaṅka Godalu nganananya wankarunkupai palula tjungu titutjara ngaranytjaku.

¹¹ Panya iriti nyiringka walkatjungkunyjtja ngarinyi nyanga alatji, "Anangu Mayatja Godaku mulamularingkulampa tjituru-tjitururinytja wiya, panya Godalu mulapa palunya wankarunkuku." *

* 10:5 Leviticus 18:5 * 10:8 Deuteronomy 30:14 * 10:11 Aitjajaku 28:16

12 Palu tjukurpa nyangatja uwankaraku Jew tjuṭaku munu Jew wiya tjuṭaku kulu. Panya Godanya mayatja uwankarakuṭu nyinanyi, ka anangu kutjupa uwankarangku palula tjapinnyangkampa paluru wirura kalkuntjatjanungku munytjangku ungkula pukulmankupai.

13 Panya nyiringka iriti walkatjunkunyta ngarinyi nyanga alatji, “Anangungku Mayatja Godala alpamilantjaku tjapinnyangkampa palunya wankarunkuku alatjitu.” *

14 Palu yaaltji-yaaltjinkuya tjapilku tjana palumpa puṭu mulamularingkula? Munuya yaaltji-yaaltji mulamularingkuku tjukurpa Jesunyatjara kulintja wiyatja? Munuya yaaltji-yaaltjinku kulilku tjukurpa panya palunya kutjupa tjuṭangku tjakultjunkunyta wiyanguru?

15 Kaya yaaltji-yaaltjinku tjukurpa palunya wangkaku Godalu tjananya wituntja wiyanguru? Panya nyiringka iriti walkatjunkunyta ngarinyi nyanga alatji,

“Panya nyakulaya pulkara pukularipai tjukurpa palyatjara wirkankunyangka.” *

16 Palu Jew kutjupa tjarangkuya Tjukurpa Palya kulira mulamularingkunyta wiyangku wantingi. Panya iriti anangu tjuṭangku wantinyangka Aitjayalu wangkangu Godala nyanga alatji, “Mayatja, ngananya tjana wanyu mulamularingu tjukurpa nganana tjakultjunkunyangka kulira?”

17 Uwa, anangu tjuṭa Jesuku mulamularingkuku Tjukurpa Palya palunyatjara wangkanyangka kulira kutju.

18 Palu wanyuṇa nyurala tjapilku, “Mulapaya panyatja Jew tjuṭangku tjukurpa nyangatja kulintja wiya?” Wiya panya tjana kulinu alatjitu. Panya nyiringka iriti walkatjunkunyta ngarinyi nyanga alatji, “Manta winkitjangkuya tjukurpa palya kulinu

panya tjakultjunangiya ngura uwankarangka.” *

19 Pirukuṇa wanyu nyurala tjapilku? Mulapaya panyatja Israelkunu tjuṭangku tjukurpa nyangatja puṭu kuliningi? Wiya, panya tjana uti alatjitu kulinu, panya Moselu iriti tjanala wangkangu Godalu wangkanytja nyanga alatji,

“Nyura panya kulilpai ngura kutjupitja tjuṭa-manti ngurpampa nyinanyi. Palu nyura kuwari tjananya nyakula nyararingkuku panya palunya tjananyaṇa ngayulu ngurkantara altiku ngayuku walytja tjuṭa nyinanytjaku. Uwa, nyura panya palunya tjananya ngurpalku kulini. Palu nyura kuwari tjanampa nyakula mirpaṇariku nyuranya kutju kanyintja-tjiratja.” *

20 Ka ngula palu purunypaṭu Aitjayalu Israelkunu tjuṭangka tjakarurungku wangkangu nyanga alatji,

“Godalu panya anangu Jew wiya tjuṭa alatji wangkangu, ‘Anangu nyara paluru tjana panya ngayunya ngurintja wiya watarku nyinangi,

kaṇa ngayulu tjanala wirkanu.

Uwa nyara paluru tjanaya ngayunya tjapintja wiya watarku nyinangi, kaṇa ngayulu tjanala utiringu.’ ” *

* 10:13 Tjawilku 2:32 * 10:15 Aitjayaku 52:7 * 10:18 Psalm 19:4 * 10:19 Deuteronomy 32:21 * 10:20 Aitjayaku 65:1-2

21 Ka panya Israelkunu tjuṭangku nganmanytju kulinu tjukurpa palunya munuya kulintjatjanungku nintingu kulinigi. Palu tjana mulamularingkuwiyangku kulira wantingi. Kala tjukurpa nyangaku ninti panya Godalu nganmanytju Israelkunu tjuṭangka wangkangu alatji,

“Titutjaraṇa ngayuku anangu tjuṭaku puṭu marakatingi ngayulakutu pitjanytjaku.

Palu tjana rawangku tungunpungkula wantingi,
munuya ngayuku wangka tjana wanganarangku kulintja wiyangku wantingi.” *

11

Godalu Israelkunu tjuṭa Ngaltunytjungku Kulintja

¹ Munta tjinguru nyura kulini ngayulu nyanga alatji wangkanyangka-palku Godalu Israelkunu tjuṭa nganmanytjulpi ngurkantankunytjatjanungku tjananya wantir'iyānu. Palu wiya, ngayulu alatji wangkanytja wiya! Panya ngayulu kulu wati Israelkunu nyinanyi, Aipuramalanguru. Panya ngayuku tjamu ngururitja Pintjimangga Jacobaku panya katja malatja.*

² Panya Godalu tjananya Israelkunu tjuṭa nganmanytju mulapa ngurkantanu iti wirkankunytja kuwaripangka palumpa walytjapiti nyinanytjaku munu tjananya wantir'iyantja wiyangku alatjitu kanyiningi. Panya nyura tjukurpa nyangaku ninti panya nyiringka iriti walkatjunktunytja ngarinyi Ilaitjalu Godala pulkara ngatjintja Israelkunu tjuṭanguru alatji wangkara,

³ “Mayatja, Israelkunu tjuṭangkuya nyuntumpa pitjilpa tjuṭa minyaminyanu,* munuya nyuntumpa wangkatjara tjuṭa iluntanu. Kaṇa ngayulu kutju alatjitulta nyinanyi, kaniya ngayunya kulu iluntankunytjikitjangku kulini. Wanyuni atunytju kanyinma.” Nyanga alatji wangkara paluru Godala pulkara tjapiningi.

⁴ Ka Godalu kulira nyaa wangkangu palula? Wiya, nyanga alatji wangkangu, “Nyuntu kutju mulapa wiya! Panya ngayulu tjananya kutjupa tjuṭa kanyini ngayuku walytja mulapa wati panya 7,000. Nyara paluru tjana panya god ngalya-ngalya ini Paalnga pupakatira walkulpai wiya.” Alatji Godalu ngapartji wangkangu Ilaitjala.

⁵ Ka kuwari palu purunypa ngaranyi, panya Godalu ngaltunytjungku mankur-mankurpa ngurkantara kanyini.

⁶ Palu wanyu Godalu tjananya wiru palyannyangka ngurkantanu? Wiya paluru tjananya ngaltunytjungku ngurkantanu, paluru mukur-ingkula. Panya paluru palya nyinanyangka nyakula ngurkantankupai wiya. Paluru alatjitu ngalturingkula walytjangku kulira ngurkantankupai ngaltunytjungku.

⁷ Ka panyaya Israelkunu tjuṭangku iwara puṭu nguriningi Godalakutu ilaringkunytjikitjangku. Palu mankur-manhurtu kutjuya iwara palunya ngurkantanu Godalu ngurkantankunytja tjuṭangku kutju. Kaya tjuṭa mulapa pina patiringkula titutjara watarku nyinangi Godalu altinyangka kulintja wiya.

* 10:21 Aitjayaku 65:2 * 11:1 Jacobanya panya ini kutjupa Israelnga. * 11:3 Tjakangkuya Jew tjuṭangku Godanya walkuntjikitjangku pitjilpa tjunkupai.

- ⁸ Panya nyiringka iriti walkatjunkunytja alatji ngarinyi,
 “Godalu tjananya kulintja kampa kutjupanu puṭu kulintjaku, kaya
 kuru patingku puṭu nyanganyi munuya pina patingku puṭu kulini
 munu panyaya kuwari kulu puṭu kulilpai titutjara nyinanyi.” *
- ⁹ Ka panya Davidalu iriti wangkanytja ngarinyi nyanga alatji,
 “Ka God, nyuntu tjananya ngapartji pulkara pikantanama,
 munu tjanampa maingka kanpa tjura tjana pitjala watarkungku
 ngalkula ilunytjaku.
- ¹⁰ Munu tjananya kuru patinma puṭu nyakunytjaku.
 Munu tjananya tjituru-tjituru pulka rawangku palyanma iwara
 kurangka ankunyangka.” *
- ¹¹ Tjinguru nyura ngayulu nyanga alatji wangkanytja-palku kulini
 panya Jew tjuṭangkuya Godanya wantira titutjara paṭuringu. Palu
 wiya, alatjina wangkanytja wiya! Panya Jew tjuṭa paṭuringkunyangka
 Godalu anangu kutjupa tjuṭangka tjukurpa Jesunytjara utinu Jew
 wiya tjuṭangka tjana kulira mulamularingkula wankaringkunytjaku,
 kaya nyara palulanguru Jew tjuṭangu nyakula urulyarara kulilku,
 “Ai, Mama Godalu nganannya wantira nyara tjananya wankarunu
 Jew wiya tjuṭa.” Munuya alatji kulira kunṭaringkuku alatji wangkara,
 “Munta-uwa mulapa nganaṅa alatjitu Godanya wantingu. Uti-
 lanku malaku palulakutu aruringama, kalanya nganannya kulu
 wankarunkuku.”
- ¹² Uwa, Jew tjuṭa watarkurira paṭuringu, ka nyara
 paṭuringkunytjangu Godalu anangu kutjupa tjuṭa manta winkitja
 pulkara pukulmanu. Palu kulila, ngula Jew tjuṭa malaku aruringkula
 Jesuku mulamularingkunyangka Godanya nyakula pulkara alatjitu
 pukulariku. Munu palulangurulta nganannya kulu tjungura
 uwankara mulapa pulkara pukulmankuku, Jew tjuṭa munu Jew
 wiya tjuṭa kulu.

Godalu Anangu Kutjupa Tjuṭa Kulu Wankarunkunytja

- ¹³ Uwa, kuwarina nyangatja wangkanyi nyurala Jew wiya tjuṭangka.
 Panya Godaluni nyuralakutu witura iyanu palumpa tjukurpa nyurala
 tjakultjunkunytjaku, kana kuwari nyurala pukultu warka nyanga
 palunya palyani.
- ¹⁴ Ka ngayulu nyurala Jew wiya tjuṭangka tjukurpa tjakultjunkun-
 yangka ngayuku walytja tjuṭa tjinguru nyararingkuku, Jew panya
 tjuṭa, munuya palulanguru tjinguru tjara Jesuku mulamularingkuku,
 ka Godalu tjananya wankarunkuku. Kana nyanga alatjirinyangka
 pulkara alatjitu pukulariku.
- ¹⁵ Panya Jew tjuṭa Godalanguru paṭuringkunyangka Godalu
 tjananya wantingu munu anangu kutjupa tjuṭa manta winkitja wa-
 lytjanmanu. Ka nyaaringkuku ngula Godalu Jew tjuṭa malakungku
 mantjinnyangka? Wiya, pukulpa pulka mulapa ngula ngaraku panya
 Jew tjuṭaya paṭuringkula ilungu purunypa munuya ngula malaku
 aruringkula ilunytjatjanu purunypa wankaringkuku.
- ¹⁶ Kulilaya wanyu ara nyanga nganampa. Panya nganaṅa
 mai nyuma kaṭantara Godanya-warara ungupai, ka mai panya

* 11:8 Deuteronomy 29:4 * 11:10 Psalm 69:22-23

winki palumparinyi.* Ka palu purunypatu punu aturu Godaku ngaranyangka mina nyalpi winki kulu palumparinyi.*

¹⁷ Kulilaya ara nyangatja, nintiringkunyitjikitjangku. Wati kaana kanyilpaingku nyanga purunypa palyalpai. Punu wiru ngaranyangka paluru tjinguru mina kutjupatjara katara waniku munu palulanguru ankuku putikutu punu mina katara ngalya-katinytjikitja. Munu palulanguru punu mina putitja katira punu panya kaanangka pakaltjingtjikitjangka kultungka tjungura karpilku.* Ka palulanguru punu mina putitja panya paluru wanka iwiringuru mantjira pulkaringkuku. Ka Jew tjuta punu nyara palu purunypa ngaranyi Godaku walytjapiti, panya paluru Jew kutjupatjara wantingu punu mina katara waninytja purunypa, munu anangu kutjupa tjuta punu mina putitja purunypa mantjira katira palumpa walytjapitingka tjungunu. Kaya palulanguru Godaku walytjaringkula wanka mantjira pulkaringanyi.

¹⁸ Ka nyura Jew wiya tjuta nyaaku kanany-kananyarira Jew tjuta kuranmananyi tjana panya punu mina katara waninytja purunypa nyinanyangka? Wiya, nyura uti kanany-kananyarinytja wiya nyinama, panya nyura kulu punu mina purunypa. Ka punu minangu wanyu wanka kanyilpai? Wiya, iwiringku kutju punu wanka kanyilpai.

¹⁹ Palu nyura tjinguru wangkaku, "Wiya, Jew tjuta panya punu mina purunypa Godalu katara waningu nganananya punu mina putitja purunypa mantjira tjunguntjikitjangku palumpa walytjapitingka. Panya Jew kutjupatjara paluru kitikitinu nganana palula tjunguringkunyitjaku."

²⁰ Uwa mulapa nyangatja tjukurpa tjukaruru. Palu wanyu nyangatja kulila, panya Godalu tjananya wantingu mulamularingkunyitja wiyangku wantinyangka. Munu nyuranya mantjira tjungura kanyini mulamularingkunyangka, nyara palulanguru kutju. Kaya kanany-kananyarinytja wiya nyinama, munuya ngulu-ngulu nyinama panya Godanya pulka mulapa nyinanyi.

²¹ Jew tjuta panya punu mina purunypa, panya punu walytja alatjitu pakara pulkaringkula mina tjutatjararingkupai, palu purunypa. Palu tjana mulamularingkunyitja wiyangku wantinyangka Godalu tjananya ngalturingkunyitja wiyangku punu mina purunypa katara waningu. Ka nyura nyaa kulini? Godalu wanyu nyuranya kutju ngalturingkula rawangku kanyilku nyura mulamularingkunyitja wiyangku wantinyangka? Wiya, nyuranya kulu punu mina purunypa katara waniku palunya wantinyangka.

²² Uwa kulinma nyangatja. Godanya ngaltunytju kutju wiya palu paluru wituwitu kulu. Paluru mirpanaripai tjanampa palula tungunpungkula wantinyangka. Munu paluru ngaltunytjungku nyuranya

* **11:16** Panya mai kutju katantara ungkunyitja Aipuramanya purunypa Godaku walytja, ka mai kutjupatjara Jew malatja malatja tjuta purunypa, kala pala palulanguru kulini tjana kulu Godaku walytja. * **11:16** Ka nyanga palu purunypa Godalu Jew tjutaku tjamu Aipuramanya palumpa walytja kanyintjatjanungku palunya tjananya kulu kanyilku titutjarangku.

* **11:17** Panya tjakangkuya kaanangka warakaripai tjutangku alatji palyalpai. Tjana punu putitja katara ngalya-katira punu panya kaanangka ngaranytjanya ankala katara ngurupa tjilpirpungkupai munuya punu panya putitja ala panya palula ngurupa tjarpatjunkturupai munuya utjura karpilpai, ka punu panya paluru punu panya kaanangka ngaranytjijanguru mina tjikira pakalpai palula tjungu.

kanyilpai palumpa mulamularingkula titutjarangku wanannyangka. Palu nyura palunya wanalwiyangku wantinyangka nyuranya punu mina purunypa katara waniku.

²³ Ka tjinguru Jew tjuta piruku Godaku mulamularingkunyangka paluru tjananya malakungku mantjilku, munu panya paluru nganmanytju kanyintja purunytju tjananya kanyilku.

²⁴ Panya nyura Jew wiya tjuta nganmanypa Godaku walytja wiya nyinangi. Panya nyura punu mina putitja purunypa ngarangi, palu mulamularingkunyangka nyuranya Godalu mantjira tjungunu palumpa walytjapitingka punu panya kaanangka ngaranytjitjangka purunypa. Kaya Jew tjuta nganmanypa Godaku walytjapiti nyinangi, punu mina tjuta purunypa panya punu kaanangka pakaltjingantja purunypa. Ka Godalu tjananya punu mina purunypa katara waningu. Ka nyura Jew wiya tjuta, punu panya mina putinguru katara ngalya-katira tjunguntja purunypa, punu panya kaanangka ngaranytjitjangka. Ka tjinguru ngula Jew tjuta piruku mulamularingkunyangka Godalu tjananya mapalkungku alatjitu punu mina tjuta purunypa malakungku tjungulku palumpa walytjapitingka.

Godalu Uwankaratu Ngaltunytjungku Kanyintja

²⁵ Walytja tjuta! Tjinguru nyura kulini Godalu Jew tjuta titutjarangku wantinytjapalku. Palu nyura alatji kulira kananykananyaryntjaku-tawarana tjukurpa nyanga kumpilitja nyurala kuwari wangkara utini. Tjukurpa nyanga paluru alatji, panya Israelkunu kutjupa tjaraya tungun-tungunpa alatjitu nyinanyi Jesuku mulamularingkunytja wiya. Munu paluru tjana rawa alatji tungun-tungunpa nyinaku, panya Godanya patani Jew wiya tjtaku palumpa mulamularingkula tjuta mulararyntjaku, nampa panya paluru nganmanytju kulira ngurkantankunytja tjtaku. Ka nampa panya paluru uwankaratu palumpa mulamularingkunyangka kutjuya Israelkunu tjuta Godalakutu malaku aruringkula pitjaku titutjara tungun-tungunpa nyinanytja wiya.

²⁶ Ka Godalu tjananya uwankara wankarunkuku. Panya nyiringka iriti walkatjunkunytja ngarinyi nyanga alatji,

“Wati Wankarunkupainya wirkankuku ngura ini Tjayanta.*

Munu paluru anangu Jacobakunu tjuta kura rawangku palyan-nyangka kampa kutjupankuku Godanya tjukarurungku kulin-
tjaku.*

²⁷ Panya paluru nganmanytjulpi kalkunu tjananya kura tjuta palyan-
tjitjanguru pungguwiyangku kalypangku wantinytjikitjangku.

Ka mulapa alatjiriku.

Kaya uwankara Godala kalypa nyinaku.” *

²⁸ Panya anangu Jew tjtangku Tjukurpa Palya Christanyatjara wantira Godalanguru paturingu munuya kuwari watarku alatjitu nyinanyi palumpa malpa wiya. Uwa, Godalu tjananya wantir'iyanu nyurampa, Jew wiya tjtaku, iwara alantjikitjangku nyura palulakutu wirkankunytjaku. Palu panya Godalu tjananya Jew

* **11:26** Tjayangga panya ini kutjupa *Jerusalemnya*, Jew tjtaku ngura pulka. * **11:26** *Jacobanya* panya ini kutjupa *Israelnja*, kaya Israelkunu tjuta panya Jacobalanguru malatja malatja tjturingkula nyinanyi. * **11:27** Aitjayaku 59:20-21; 27:9

tjuta nganmanytjulpi ngurkantanu Aipuramanya, Isaacanya, Jacobanya tjananya, munu panya palumpa tjanampa paluru rawatu mukuringanyi malatja malatjaku kulu. Panya Godalu nyara palunya tjananya kalkunu Aipuramanya, Isaacanya tjananya.

²⁹ Munu tjananya ngurkantankunyjtjanungku puṭu wantinyi munu paluru ungkunyjtjanungku malakungku mantjilpai wiya. Paluru kampa kutjuparipai wiya alatjitu.

³⁰ Panya nyura Jew wiya tjuṭangu nganmanytju Godanya wantingi. Palu kuwari nyanga Israelkunu tjuṭangu Godanya wantingu, ka Godalu nyuranya ngaltunytjungku mantjinu Israelkunu tjuṭangu palula tungunpungkunyjtjijanguru.

³¹ Uwa, Godanya nyurampa ngalturingkunyaṅka, anangu panya Jew tjuta kuwaripatu tungun-tungunpa nyinanyi. Palu ngula Godalu tjananya kulu ngaltunytjungku altira tjuṅgura kanyilku, nyanga kuwari nyuranya ngaltunytjungku mantjira kanyini, palu purunytju.

³² Uwa, anangu uwankara Jew tjuta munu Jew wiya tjuta kulu Godala tungunpungkupai nyinanyi munuya iwara kurangka titutjara ananyi. Ka alatjirinytjaku tjananya wantir'iyanu Godalu tjana walytjangu kulira kura palyantjtjanungku ngurkantankunyjtjaku munu kunṭaringkunyjtjaku. Ka nyara palulanguru Godanya tjanampa uwankaraku ngalturingkuku munu tjananya wankaru kanyilku.

Godanyala Mirawanima

³³ Uwa, Godanyala mirawanima panya paluru ngaltunytju mukulya pulka mulapa nyinanyi. Paluru kutju alatjitu ninti pulka mulapa nyinanyi munu paluru kutjungku tjukarurungku kulilpai. Panya nganana puṭu kulini paluru kulira palyantjtja uwankara, munula palumpa kulintja uwankara nganana puṭutu kulilpai.

³⁴ Panya nyiringka iriti walkatjunkunyjtja nyanga alatji ngarinyi, "Ngananya ninti Godalu kulintjtjaku?"

Wiya, uwankarangkula puṭu kulilpai.

Ka nganalu Godanya nintilpai paluru kulira tjukarurungku palyantjaku?

Wiya alatjitu, uwankarala ngurpa." *

³⁵ "Ka nganalu kutjupa kutjupa ungu Godanya paluru ngapartji ungkunyjtjaku?"

Wiya, paluru alatjitulanya kutjukampa ungkupai." *

³⁶ Panya Godalu uwankara palunu. Munu paluru uwankara wityuṅku tjukaruru kanyini. Ka uwankara alatjitu palumpa ngaranyi titutjara. Kala rawangkuṭu palunya mirawanima panya paluru wiru mulapa nganampa nyinanyi. Uwa mulapa.

12

Godakula Palyanma

¹ Walytja tjuta, Godalu ngananaṅanya ngaltunytju pulkangu kanyinyangkaṅa nyangatja kurunpa winkingku pulkara mukuringkula nyuranya wituwituṅi. Uti nyuranku kurunpa winkingku Godala kulinma paluru wangkanyaṅka wanganarangku kulira palyantjikitjangku,

* 11:34 Aitjayaku 40:13 * 11:35 Tjuupaku 41:11

paluru nyakula pukularinytjaku. Nyanga alatji palyarala kurunpa winkingu Godanya walkuni munula palunya tjukarurungku wanani.

² Palu anangu mantatja kulilpai tjuťangkaya arkara palyalwiyangku wantima munuya Godala kutjungka wanganarangku kulinma. Ka nyuranya paluru kulintja kampa kutjupankuku nyura tjukarurungku palunya kulintjaku. Ka nyara palulangurulta nyura nintingu kulilku Godaku tjukarurungku palyantjikitjangku palya tjuťa kutju, paluru nyakula pukularinytjaku.

³ Panya Godaluni mukulyangku ngurkantara witulyanu Tjukurpa Palya tjakultjunkunytjaku. Pala palulanguruna nyurala uwankarangka wangkanyi nyanga alatji nyura uti kutjungku kutjungku walytjangku pulka kulilwiyangku wantima, munuyanku purkarangku tjukarurungku kulinma, "Godalu ngayunya nyaa palyantjaku witulyanu?" Panya Godalu nyuranya kutju kutju witulyanu nyura kutjungku kutjungku Godalu witulyankunyangka mulamularingkula tjukarurungku palyantjaku.

⁴ Panya ngayulu puntu kutju ngaranyi, mununa kutjupa kutjupa tjuťatjara. Panya marangku pampura palyantjaku, tjinangku palťjura para-ngaranytjaku, kurungku nyakunytjaku, pinangku kulintjaku. Nyanga paluru tjana uwankarangku walytjangku walytjangku palyalpai kutjupa kutjupa tjuťa puntu kutjunguru, ka puntu winki palyalta ngarapai.

⁵ Ka nyanga palu purunypa Jesuku walytja tjuťa nyinanyi, panya nganaña Christala tjunguringkula puntu kutjuťu nyinanyi palu warka kutjupa kutjupa tjuťala walytjangku walytjangku palyalpai.

⁶ Panya Godalu nganañanya mukulyangku kutju kutju nintinu nganaña kutjungku kutjungku paluru nintintitja witulyangku palyantjaku. Kala uti wanganarangku kulira palyanma paluru nintinyangka warka walytjangku walytjangku. Tjinguru nyuntunya Godalu nintinu wangkatjara nyinanytjaku palumpa tjukurpa witulyangku tjakultjunkunytjaku, ka nyuntu uti mulamularingkula tjukurpa tjakultjunama alatjitu wantinytja wiyangku.

⁷ Munta tjingurunta nyuntunya nintinu wirura alpamilara palyantjaku anangu tjuťaku, ka nyuntu uti alpamilanma alatjitu. Munta tjinguru nyuntunya nintinu anangu tjuťa Godaku tjukurpa tjukarurungku nintintjaku, ka nyuntu uti nintinma alatjitu.

⁸ Munta tjinguru nyuntunya nintinu anangu tjuťa wangkara rapantjaku, ka nyuntu uti tjananya wangkara alatjitu kunpunma. Munta tjinguru nyuntunya nintinu ngaltutjara tjuťa munytjangku ungkunyntjaku, ka nyuntu uti ungama alatjitu wantinytja wiyangku. Munta tjingurunta nintinu anangu tjuťa kuranyurira tjukarurungku kanyintjaku, ka nyuntu uti pakuwiyangku tjananya mulamulangku atunymanama. Munta tjingurunta nintinu ngaltunytju pulka nyinanytjaku, ka nyuntu uti anangu tjuťa pukultjungku alpamilanma.

⁹ Ngunti wangka-kutju wangkawiya mulamula ngalturingama. Munu kura kutjupa kutjupa uwankara wantima, munu palya tjuťa kutju rawangku palyantjikitja mukuringama.

¹⁰ Munuyanku mukulya nyinama panya nyura walytjarara walytjarara nyinanyi Christalanguru. Munuyanku analwiyangku

mukulyangku kaly pangku pukultu wangkama, munuyanku walytjangku walytjangku pulkanmankunytja wiyangku wantima.

¹¹ Pulkaraya Mayatja Jesuku warakarima pakuringkuwiya. Munuya kurunpa winki mukuringkula titutarangku palunya wanama.

¹² Pukularimaya panya nyura ninti Godalu nyuranya ngura wirukutu katiku. Ka nyurala tjituru-tjituru kutjupa kutjupa tjuta wirkankunyangkampa nyura uti tjuni kuraringkunytja wiya rapa nyinama. Munuya rawangku Godala tjapinma wantinytja wiyangku.

¹³ Munuya anangu Jesuku walytjangku kutjupa kutjupa kanyintja wiya nyinanyangkampa nyakula palunya alpamilara ungama, munuya palu purunypatu malikitja pitjanyangka nyakula altira ngurangka tjunama papulankunytja wiyangku.

¹⁴ Ka kutjupangku nyuranya kurannyangkampa nyura uti tjanampa Godala tjapinma tjananya pukulmankunytjaku. Munuya Godalu tjananya kurantjaku tjapilwiyangku wantima, palu tjananya pukulmankunytjaku kutju tjapinma. Nyanga alatji palya.

¹⁵ Ka kutjupa tjuta pukularinyangka nyura uti tjanala tjunguringkula tu pukularima. Munu tjituru-tjituru ulanyangka nyura uti tjanala tjunguringkula tu ulama. ¹⁶ Munuya anangu uwankaraku kalypa mukulya nyinama unngu nyararingkunytja wiya. Munu nyuranku kanany-kananyarira wara pulka tjuta kutju palyantjikitja mukuringkunytja wiyangku wantima, palu wara tjukutjuku tjuta kuluya pukultu palyanma. Munuyanku walytjangku nintipuka mirawaninytja wiyangku wantima.

¹⁷ Tjinguru kutjupangku nyuranya kurannyangkampa nyura ngapartji kurantjikitjangku kulilwiyangku wantima. Palu purkarangkuya kulinma tjukaruru palyanyku nyinanytjikitjangku, ka anangu uwankaranku nyuranya nyakula kulilku tjukaruru mulapa nyinanyangka.

¹⁸ Uti nyura rawangku arkanma anangu uwankaraku kalypa nyinanytjikitjangku.

¹⁹ Walytja tjuta! Kutjupangku nyuranya kurannyangkampa palunya ngapartji pungkunytjikitjangku kulintja wiyangku wantima, Godalu kutjungku paintjaku. Panya nyiringka iriti walkatjunkunytja ngarinyi Godalu wangkanytja nyanga alatji,

“Ngayulu kutjungku anangungku kurannyangka ngapartji palu purunymankuku, Ngayulu kutjungku paira pungkunytjaku ngaranyi.”

²⁰ Palu tjukurpa kutjupa alatji ngarinyi,

“Anangu nyuntumpa mirpantju tjinguru paltjatjiratja nyinanyi,

Ka nyuntu uti palunya mai ungkula paltjanma.

Munta tjinguru paluru ilu nyinanyi kapi-tjiratja,

Ka nyuntu uti palunya kapi tjikintjaku ungama.

Panya nyuntu alatji kaly pangku ungkunyangka paluru walytjangku kulira kuntaringkuku.” *

²¹ Kulini nyura? Nyura uti ngapartji kura palyalwiyangku wantima. Panya nyura ngapartji kura palyarampa anangu nyara palu purunypa nyinanyi, kura palyalpaiu. Palu nyura wiru palyannyangka tjana nyakula kuntaringkula tjana ngapartji nyura purunypatu wiru

* 12:20 Proverbs 25:21-22

palyalku. Nyara palulanguru wiru kutju palyanma, munu kura wantima.

13

Mayatja Tjutangka Wanganarangku Kulintjaku

¹ Uti nyura uwankarangku kamanta mayatja tjutangka wanganarangku kulinma. Panya Godalu ara nyanga palunya palyanu mayatjarira anangu tjuta kanyintjaku, ka panya palulanguru kuwari anangu tjuta mayatja nyinanyi Godalu tjunkunyjtjangka.

² Ka tjinguru anangu kutjupa mayatjanka tungunpungkulampa, nyara paluru Godala tungunpunganyi, panya Godalu alatjitu tjananya mayatja tjunu. Ka anangu nyara paluru mayatjanka tungunpungkungangkaya palunya ngapartji pungkuku.

³ Panya wiru palyalpai tjuta mayatjaku nguluringkupai wiya, palu panya kura palyalpai tjuta kutju mayatjaku nguluringkupai. Ka nyura tjinguru mayatjaku nguluringkunyitja wiya nyinanytjikitja mukur-inkulampa wiru tjuta kutju palyanma, ka paluru tjana nyurampa pukularira nyuranya palyanmankuku.

⁴ Panya Godalu mayatja palunya tjananya tjunu mayatjarira nyuranya tjukarurungku wirura kanyintjaku. Palu nyura tjinguru tjukarurungku palyantja wiya kura palyarampa palumpa tjanampa nguluringama, panya mayatja paluru tjana mulapa nyuranya pungkuku kura palyannyangka. Panya Godanya kuranguru pulkara mirpanaripai, ka nyara palulanguru nyuranya mayatjanka kuranguru pungkunyangka nyura nintiringkula kulilku panya mulapa Godanya kuranguru mirpanaripai.

⁵ Uwa, pala palula-tawara nyura uti mayatjanka wanganarangku kulinma, nyuranya tungunpungkungangka pungkunyitjaku-tawara. Panya nyura ninti tjukaruru nyinanytjaku, pala palulanguru kulu nyura uti tjanala wanganarangku kulinma.

⁶ Nyara palulanguru panya nyura mayatja tjuta tax mani ma-ungkupai kutjupa kutjupa tjuta nyurampa palyantjaku, panya mayatja paluru tjana Godaku warakarinyi munuya nyuranya tjukarurungku wirura kanyintjikitjangu kulinma.

⁷ Ka palulanguru mayatjangu tax maniku tjapinnyangka nyura uti tjukarurungku ma-ungama. Uwa mayatja kutjupangu tjapinnyangkaya ungama alatjitu wiyannmankunyitja wiyangu. Munuya analwiyangu wantira tjanala wanganarangku kulinma kunta-kunta nguwantu panya tjana mayatja alatjitu nyinanyi.

⁸ Uwa ngapartji malakungku ungunyitjaku ngaranyangkampa nyura uti mapalkungku ungkula wiyanna.

Ngaltunytjungkuyanku Kulira Palyanma

Palu uti nyuranku titutjara ngaltunytju nyinama wiyaringkunyitja wiya. Panya nyanga alatji nyinarampa nyura tjukurpa Godalu Mosenya ungunyitjita tjukarurungku palyani.

⁹ Ka panya tjukurpa paluru tjana nyanga alatji ngaranyi Godalu paintja,

“Kuri walytjatjarangka ngariwiyangku wantima. Anangu ilun-tankuwiyangku wantima. Walytjatjara kutitjunkuwiyangku wantima. Munu kutjupangku kutjupa kutjupa wiru kanyinnyangka nyakulampa unngu kulira mukuringkuwiyangku wantima.” *

Ka tjukurpa nyanga paluru tjana, munu tjukurpa kutjupa tjuṭa kulu Godalu wangkanytja uwankara tjukurpa nyanga kutju palulanguru utiringanyi,

“Nyuntu anangu kutjupaku mukulyangku palyanma. Panya nyuntunkun walytjangku mukulyangku palyalpai, palu purunytju palumpa ngapartji mukulyangkutu palyanma.” *

¹⁰ Panya nyuntu anangu kutjupaku pulkara mukuringkulampa palunya puṭu kurani. Uwa, alatji nyuntu mukulya nyinara tjukurpa panya Mosenya Godalu ungkunyitja uwankara tjukarurungku kanyini.

¹¹ Kaya nyanga alatji mukulya titutjara nyinama, panya ilaringu Mayatja Jesulu malaku pitjala nganannya wankaru katinytjaku. Panya nganmanypalpi nganana mulamularingangi, ka Jesunya pitjanytjaku paṭu kuwaripa ngarangi.

¹² Palu kuwari nyanga ilaringu, panya nganana mungangka kunkunpa ngarira ngarira kulilpai puyi-puyinnyangka munula wankaringkula nyakupai, “Munta mulapa ngalya-utiringanyi tjitukutu.” Palu purunypa kuwari tjirirpi watalpi ilaringu Jesunya pitjanytjaku. Kala uti nganana mungawalurungka nyinapai tjuṭa arkalwiyangku wantima. Palu utila kura tjuṭa wantira kalala purunypa ala-alangku ngarala nyangama, panya tjaultji tjuṭangkuya tjirirpikutu pakara, pikakitja mantarangka tjarpara, uwankaratjarangku ala-alangku ngarala nyakupai, palu purunypala uti ala-alangku ngarala nyangama kura tjuṭangka tungunpungkunyitjikitjangku.

¹³ Panya kutjupa tjuṭangkuya mungawalurungka nyinapai tjuṭangku kura tjuṭa kutju palyalpai, kala uti palu purunypa nyinawiya tjukaruru nyinama kalalangka. Munula uti wama pulkara tjikira tarangkarira pikangku pungkuwiyangku wantima, munu kampingkatu ngariwiyangku wantima, munu nyararingkula pikaringkuwiyangku wantima.

¹⁴ Utila Mayatja Jesula Christala tjungu alatjitu nyinama, munula kura tjuṭa wantima. Panya kutjupa-ara nganana unngu kulilpai kura palyantjikitjangku, palu utila Jesula tjungu nyinara kulintja nyanga palu purunypa utiringkunyangka kulira wantima alatjitu.

14

Jesuku Walytja Tjuṭaya Kuranmankuwiyangku Wantima

¹ Ka panya Jesuku walytja kutjupa tjarangku kuwaripangkutu puṭu kulini tjukaruru nyinanytjikitjangku. Ka uti nyura palunya tjananya walytjanmara alatjitu tjungunma, munu pika-pikaringkula tjananya ngurpanmankunyitja wiyangku wantima.

² Panya anangu kutjupangku kulilpai mai kuka kutjupa kutjupa tjuṭa uwankara palya ngalkuntjikitjangku. Ka wati panya puṭu nguwanpa kulilpaingku kulilpai, “Ngayuku ngaranyi mai kutju ngalkuntjaku.”

* 13:9 Exodus 20:13-15,17 * 13:9 Leviticus 19:18

³ Ka uti wati panya mai kuka uwankara ngalkupaingku wati panya mai kutju ngalkupainya ngurpanmankunytja wiyangku wantima, ka palu purunypatu wati panya mai kutju ngalkupaingku uti wati panya mai kuka ngalkupainya uulira wangkawiyangku wantima, panya Godalu palunya pulanya walytjanmanu munu pulanya kanyintjikitja mukuringanyi.

⁴ Nyara paluru panya Godaku warakaripai nyinanyi, ka Godanya palumpa mayatja nyuntu wiya. Kan nyaaku palunya ngunti mayatarira kuranmananyi? Nyangatja palya wiya. Wantima palumpa mayatjangku kutjungku ngurkantara paintjaku kura palyannyangka, munta tjinguru tjukarurungku palyannyangka palyanmankunytjaku. Panya nyara palunya Mayatja Godalu marangku kanyini, ka paluru punkantja wiya ngaraku. Panya Godalu palunya nintilkatinyi tjukarururingkula kunpu ngaranytjaku.

⁵ Ka panya kutjupangku kulilpai, "Tjintu ini nyangatja kutju milmilpa mulapa ngaranyi nganana Godanya walkuntjaku." Ka kutjupangku kulilpai, "Wiya, tjirirpi winki milmilpa ngaranyi nganana wirura Godanya walkuntjaku." Palu utila uwankarangku walytjangku walytjangku unngu Godala kulira ngurkantana, munu kutjupa tjuta arkalwiyangku wantima.

⁶ Panya kutjupangku kulira tjintu kutjupa milmilpamakupai Mayatja Jesunya walkuntjikitjangku palumpa pukularira. Ka panya kutjupangku kulilpai, "Godalu nganannya mai kuka uwankara ngalkuntjaku ungu, kala palya ngalkuni Mayatja Jesunya walkuntjikitjangku." Munu paluru pukularira Godanya wirunmakupai mai kuka kulu ungkunyaangka. Palu kutjupangku kulilpai, "Ngayulu kuka wantinyi Mayatja Jesunya kutju walkuntjikitjangku." Munu pukularira palu purunypatu Godanya wirunmakupai.

⁷⁻⁸ Palu nganana uti palunya kutju wananma walytjangku kulira palyantja wiyangku. Nganana uti wanka nyinaralpi palula wanganarangku kulinma munu wiru tjuta kutju palyanma Godalu nyakula pukularinytjaku. Munu ngula nganana ilura palu purunypatu palula wanganarangku kulilku paluru nganampa pukularinytjaku. Uwa, nganana palumpa walytja alatjitu nyinanyi ilunytjakutu-wangkara munula ilunytjatjanu pakara palumpa walytjatu nyinaku titutjara.

⁹ Palu nyaanguru? Wiya, panya Christanya ilunytjatjanu wankaringkula pakana nganampa mayatja pulka nyinanytjikitja wanka tjutaku munu miri tjutaku kulu. Nyara palulanguru paluru nganampa mayatja titutjara nyinanyi.

¹⁰ Ka nyaaku nyura rapangku-palku tjananya kuranmakupai? Uti nyura ngurkantankunytja wiyangku wantima. Ka nyura ngapartji nyaaku tjananya nintingku-palku panyatja ngurpanmakupai tjana kuwaripatu nintiringkunyaangka? Uti nyura alatji kulira wangkawiyangku wantima. Panya Godalu kutjungku nganannya wangkanytjaku ngaranyi. Panya ngula nganana uwankara Godala kuranyu ngaraku paluru nganannya ngurkantankunytjaku.

¹¹ Panya iriti nyiringka walkatjunkunytja ngarinyi nyanga alatji Godalu wangkanytja,

"Nyangatjana mulamulangku wangkanyi, panya ngula anangu uwankara ngayula kuranyu tultjungarakatiku. Mununiya ngayunya

alatji wangkaku, 'Mulapan nyuntu uwankaraku God Mayatja pulka nyinanyi.' "

*

12 Ka palulanguru nganana walytjangku Godala tjakultjunkunytjaku ngaranyi uwankara panya nganana palyantjatjanungku mantangka nyanga nyinara, kura munu palya tjuṭa. Panya Godalu ngula nganananya uwankara kutju kutju kuranyu ngaratjura tjaṭilku, "Nyaakun nyanga alatji palyaningi?"

Kutjupa Tjutaya Tarpipungkuwiyangku Wantima

13 Nyangangurulanku nintingku-palku nyakula ngurkan-tankuwiyangku wantima. Palu nyangatjaya kulinma! Uti nyura kutjupa kutjupa palyalwiyangku wantima Jesuku walytja kutjupa tjuṭangku nyakula kuraringkula paṭuringkunytjaku-tawara.

14 Panya ngayulu Mayatja Jesula tjungu nyinara nintingku kulini mai kuka kutjupa kutjupa uwankara palya alatjitu ngaranyi ngalkuntjaku. Palu kutjupangku tjinguru unngu kulini, "Kuka nyangatja milmilpa kana puṭu ngalkuni."

15 Ka tjinguru nyuntu palula mirangka kuka ngalkuku, ka paluru nyakula urulyarara kulilku, "Nyaaku nyangangku ngalkuni? Panya paluru Jesuku walytja." Alatji paluru kulilku munu kuka panya palunya tjinguru arkara ngalkuku, munu malangka kunṭaringkula kulilku, "Mulapana kurangku ngalkunu. Utiṅa panyatja wantima." Munu alatji kulira Godalanguru paṭuringkuku panya nyuntu palula mirangka kuka ngalkunnyangka. Ka nyuntu uti palunya ngaltunytjungku kulinma munu palula mirangka kuka ngalkuwiyangku wantima, ngunti kulira Jesulanguru paṭuringkunytjaku-tawara, panya Christanya palumpa kuḷu angailungu.

16 Palya nyuntu kulini kuka ngalkuntjikitjangku, palu tjinguru kutjupangku nyuntunya nyakula Jesulanguru paṭuringkunyangka anangu tjuṭangku Christanya analku panya nyuntu ngalkuntjangu. Ka pala palula-tawara Christanya anantjaku-tawara nyuntu uti ngalkuwiyangku wantima.

17 Panya nganana Godaku walytjapiti nyinanyi kalanya paluru nganananya mayatjarira kanyini. Kala uti ngalkuntja tjikintja nyara palunya tjananya rawangku kulintja wiyangku wantima. Panya Godanya pukularinytja wiya nganana nyanga alatji rawangku kulinyangka. Palu utila nyanga alatji kulinma, panya Godalu nganananya tjukarurunmanu Jesulanguru, ka nyara palulanguru nganana pukultju wirura kalypa nyinanytjaku ngaranyi. Nyanga alatjila uti titutjarangku kulinma, panya Kurunpa Milmilṭu nyanga palu purunypa nyinanytjaku nganana nintilpai.

18 Ka alatji nganana Christanya titutjarangku wanannyangka Godalu nyakula pukularipai, kalanya anangu tjuṭangku kuḷu nyakula palyanmankuku.

19 Palulangurula uti titutjarangku wiru tjuṭa kutju kulinma nganana tjungu kalypa nyinanytjikitjangku Jesuku walytja uwankara, munulanku uti alpamilara kunpunma.

* 14:11 Aitjayaku 45:23

²⁰ Utila Godaku walytja kutjupa tjuṭa palumpa mulamularingkunyangka kurantja wiyangku wantima tjanala mirangka kuka ngalkula. Mulapa mai kuka uwankara palya ngaranyi nganaṇa ngalkuntjaku. Palu tjinguru Godaku walytja kutjupangku ngurpangku nyuntunya kuka ngalkunnyangka nyakula puṭu nguwanpa kulilku munu tjinguru puṭu kulira Jesulanguru paṭuringkuku. Ka nyuntu uti palula-tawara wantima, panya Godalu palunya kulu ngurkantara walytjanmanu.

²¹ Uwa, palya nganaṇa kuka ngalkuwiyangku wantinytjaku munu waina tjikilwiyangku wantinytjaku, Godaku walytja kutjupangku nyakula urulyarara puṭu kulintjaku-tawara. Panya nyanga alatji nganaṇa kuka, waina wantirampa palumpa ngalturingkula wantinyi. Ka palulanguru paluru paṭuringkunyitja wiya tjungu ngarala maraparingkuku.

²² Palu tjinguru nyuntu Godaku mulamularingkula kulilpai alatji, “Kuka mai uwankara ngalkuntjaku palya ngayulu kulini.” Palu alatji kulira para-tjakultjungkuntja wiyangku wantima, munu ungu kutju kulinma, Godalu kutjungku nintingku nyakuntjaku. Ka nyuntu tjukarurungku ngalkula kurunpa unngu ngulu wiya nyinanyangkampa paluru nyuntumpa pukulariku.

²³ Palu tjinguru nyuntu puṭu kulini, “Tjinguruna palya ngalkuku, munta tjinguruna wantiku.” Munun palulanguru kulini, “Wanti kaṇa palya ngalkula.” Ka nyara palulanguru Godanya nyuntumpa pukularinytja wiya panya nyuntu kulira wantira mukuringkula ngalkunnyangka. Panya alatji ngalkula nyuntu kura palyani kampa kutjara kulira. Uti nyuntu kulintja kampa kutjara nyinarampa ngalkuwiyangku wantima munu ngula kulintja kutjuringkula kutju ngalkunma tjukarurungku.

15

Jesuku Walytja Tjuṭa Alpamilanma

¹⁻² Tjinguru nyuntu kunpu ngaralampa utin Jesuku walytja kutjupa tjuṭa upa ngaranyangka alpamilanma anara wangkanytja wiyangku, panya tjana kuwaripatu kunpuringkunyitja wiya. Utilanku walytjangku pukulmankunyitja wiyangku wantima. Panya Christalunku walytjangku pukulmankunyitja wiyatu, munu paluru Mamanya kutju pukulmanangi munu paluru kulintja wiya anangu kutjupa tjuṭangku palunya kuranmankunyangka. Kala uti Jesunya purunypa Godaku walytja kutjupa tjuṭa pukulmanama tjana ma-kunpuringkula Jesunya tungun-tunguntu wanantjaku.

³ Panya iriti nyiringka walkatjungkuntja ngarinyi nyanga alatji, “Mama, kutjupa tjuṭangku nyuntunya warkira ngayunya kulu warkinyi.” *

⁴ Panya tjukurpa iriti nyiringka walkatjungkuntja wiru mulapa ngarinyi nganaṇa nyakula wangkara nintiringkuntjaku. Panya tjukurpa paluru tjana nganaṇanya nintilpai kunpu nyinanytjaku munu tungun-tunguntu palunya wanantjaku wantinytja wiyangku. Kala nyara palulanguru unngu raparingkula kulini, “Mulapa Godalu nganaṇanya wirura kanyilku titutjarangku.”

* 15:3 Psalm 69:9

⁵ Panya Godalu puntu winki rapalpai tungun-tunguntu titutjarangku palunya wanantjaku. Kaṅa palula nyurampa tjaṅilpai paluru nyuranya titutjarangku nintintjaku nyura uwankarangku Christanya wanara kulintja kutjuringkula palula kalypa nyinanytjaku.

⁶ Ka nyara palulanguru nyura uwankarangku tjungungku wangka kutjuringkula mirawanima Godanya, Mayatja Jesuku Mama nyinanytjanya.

Jesunya Pitjangu Anangu Uwankaraku

⁷ Jesuku walytja tjuṭa! Christalu panya nyuranya walytjanmara palula tjungunu, ka nyuranku uti palu purunytjuṭu Jesuku walytja kutjupa tjuṭa pukultu walytjanmara tjungunma wantinytja wiyangku. Ka alatji nyura mukulya nyinanyangka anangu kutjupa tjuṭangku nyakula kulilku, “Munta, mulapa Godanya mukulya wiru mulapa.”

⁸ Panya Christanya pitjangu nganampa Jew tjuṭaku warakarinytjikitja munu nganannya nintintjikitja panya Godanya mulapa tjukaruru nyinanyi kalkuntjatjanungku palyalpai alatjitu. Panya Christanya pitjangu Godalu nganmanytju Aipuramanya tjananya kalkuntja utintjikitja.

⁹ Munu panya Christanya pitjangu anangu kutjupa tjuṭaku kulu, Jew wiya tjuṭaku, tjana kulu Godaku mulamularingkula palunya mirawaninytjaku alatji, “Nyuntun ngaltunytju pulka mulapa nyinanyi.” Panya nyiringka iriti walkatjunkunytja ngarinyi nyanga alatji, “Kaṅa anangu kutjupa tjuṭawanu nyinanytjatjanungku nyuntunya mirawaniku.

Mununa inma kulu inkara nyuntunya walkulku.” *

¹⁰ Ka tjukurpa kutjupa piruku ngarinyi Jew wiya tjuṭangka wangkanytja nyanga alatji,

“Pitjalaya Godaku anangu tjuṭangka tjunguringkula pulkara pukularima.” *

¹¹ Ka piruku tjukurpa kutjupa nyanga alatji ngarinyi,

“Anangu tjuṭa, Godanyaya mirawanima!

Munuya inma inkara palunya walkunma, manta winkitjangku.” *

¹² Ka panya piruku tjukurpa kutjupa ngarinyi wati panya Aitjayalu Jesunyatjara iriti walkatjunkunytja nyanga alatji,

“Wati kutju utiringkuku Jesse-kunu malatja mularku.

Munu nyara paluru mayatjarira kanyilku anangu kutjupa tjuṭa ngura uwankaratja.

Kaya wati nyara palumpa mulamularingkula rapa mulapa nyinaku.” *

¹³ Uwa, mulapa panya Godalu nganannya palyanu palumpa rapa ala-ala patara nyinanytjaku. Kaṅa nyurampa palula tjaṅilpai nyanga alatji,

“Mama God, nyara tjananya pukulpa mulapa kurunpa rapa nyinanytjaku palyanma tjana nyuntumpa mulamularingkunyangka. Ka nyara palulanguru, Kurunpa Milmltu witulyankunyangka, tjana rapa mulararira ala-ala patara nyinaku ngura wirukitja.”

Paulalu Anangu Kutjupa Tjuṭangka Para-wangkanytja

* 15:9 Psalm 18:49 * 15:10 Deuteronomy 32:43 * 15:11 Psalm 117:1 * 15:12 Aitjayaku 11:10

¹⁴ Uwa walytja tjuṭa, ngayulu ninti panya nyura wirura palyanyku nyinapai. Munu nyura Godaku tjukurku munu palumpa iwaraku kulu ninti pulka nyinanyi. Munu nyuranku kunyu ngapartji-ngapartjingu wangkara tjukurungku nintilpai wirungku.

¹⁵⁻¹⁶ Palu lita nyanga palulana ara kutjupataru nyurampa tjukurungku walkatjunangi ngulurungkunyta wiyangu nyura piruku kulintjaku. Panya Godaluni ngaltunytjungku ngurkantara tjunu anangu Jew wiya tjuṭawanu tjukurtjara warakarinytjaku Jesuku Christaku, waraka panya pulka mulapa. Kana Tjukurpa Palya Godalan-guru para-tjakultjunanyi anangu Jew wiya tjuṭangka paluru tjana kulira kampa kutjuparira Jesunya wanantjaku. Nyanga alatji ngayulu nintini anangu nyanga palunya tjananya Godala wirkakatinytjik-itjangku paluru tjananya mantjira pukularinytjaku, panya Kurunpa Milmilṭu tjananya palyanu tjana Godala mirangka tjukururu ngaranytjaku. Nyara palulanguruna nyuranya tjukurungku wangkanyi lita nyanga palula nyura kulira tjukururungkunyitjaku.

¹⁷ Uwa, ngayulu pulkara pukularinyi waraka nyanga Godaku palyara, panya Jesunya Christanya ngayula tjungu ngaranyangka kutjuna tjukurungku palyani.

¹⁸⁻¹⁹ Palu ngayulu walytjangku palyantjatjanungku mirawaninytja wiya, panya Christalu ngayulawanungku palyantjitjanguru kutjuna mirawaninyi. Nyara paluru panya tjananya kampa kutjupanu Godala wanganarangku kulintjaku. Nyangatja paluru palyanu ngayulawanungku panya ngayulu tjukurpa wangkanytjita-wanungku munu ngayulu kutjupa kutjupa tjuṭa palyantjita-nguru kulu. Panya Kurunpa Milmilṭuni witulyangu nintiningi miracle kutjupa kutjupa tjuṭa palyantjaku, kaya anangu tjuṭangu nyakula Godaku mulamularingangi, Kurunpa Milmilṭu tjananya unngu nintinyangka. Uwa, ngayulu ngura winkingka Tjukurpa Palya Jesunyatjara para-tjakultjunangi Jerusalemalanguru ngura panya Ilirikamalakutu. Ngura parariwanungkuṅa wangkarinangi, ngura ngururitja tjuṭangka kulu.

²⁰ Panya ngayulu rawa mukuringkupai Jesuku ngurpa tjuṭangka tjakultjunkunytjikitja palumpa tjukurpa. Mununa tjukurtjara kutjupa nganmanypa ankunytjitjangka piruku arangkaṭu ankunytjikitjangku kulintja wiya, panya paluru tjana nganmanytju kulinu.

²¹ Panya nyiringka iriti walkatjunkunytja ngarinyi nyanga alatji, "Tjuṭangu panya tjukurpa palunyatjara nganmanytju kulintja wiya, palu nyara paluru tjana kulilku.

Uwa tjana watarku nyinanytjatjanungku kulira pina alaringkuku." *

Paulalu Rome-alakutu Ankunytjikitjangku Wangkanytja

²² Uwa, anangu panya watarkitja tjuṭangkaṅa tjukurpa para-wangkangi mununa puṭu kulininyi nyuralakutu ma-pitjanytjikitjangku.

²³ Palu kuwarina waraka nyanga palunya wiyanu ngura nyanganta, ka ngayuku kuwari alalta ngaranyi nyuralakutu ma-pitjanytjaku, panya ngayulu titutjarangu kulininyi yiya kutjupa yiya kutjupa nyuralakutu ma-pitjanytjikitjangku.

* 15:21 Aitjayaku 52:15

24 Ngayulu kuwari ngura Paintakutu ananyi mununa nyara palu-lakutu ma-pitjala ngururpa Rome-ala-warara wirkara nyurala tjunguringkuku. Mununa nyurala tjukutjuku rawa nguwanpa wirura nyinara pakuwiyaringkuku, ka nyara palulangurulta nyura tjinguru ngayunya iyalku ngura Paintakutu ankunytjaku.

25 Palu kuwari nyanga ngayuku Jerusalemalakutu-warara nganmanypa ankunytjaku ngaranyi, panya ngayulu mani tjanampa ma-katinyi mununa tjananya unguuku Godaku walytjapiti ngura nyara palula.

26 Panya Godaku walytja tjtaya utulu kutjupa kutjupa nyinanyi ngura nyanga Matja-tuniyala munu Akayala. Munuya paluru tjana walytjangku kulinu mani urara tjungura ngaltutjara tjuta ungunytjikitjangku nyara Jerusalemala nyinanytja tjuta. Panya nyara palulaya Godaku walytja kutjupa tjuta nyinanyi ngaltutjara tjuta, kana palula tjanalakutu kuwari katinyi.

27 Panya tjanaya walytja alatjitu mukuringu mani urara ungunytjikitja anangu Jew ngaltutjara tjuta. Ka nyangatja tjukururungku ungunytja ngapartji, panya Tjukurpa Palya Jesunytjara Jew tjtanguru-warara wirkanu anangu kutjupa tjtangka kaya mulamularingkula pukularingu, ka nyara palulanguru tjananya ngapartji alpamilantjaku ngaranyi alatjitu.

28 Kana kuwari Jerusalemalakutu mani nyanga palunya ma-katinyi mununa tjananya ungunytjatjanu wati-pakalku ngura nyara Paintakutu, mununa nyuranya ngururpa nyakuku.

29 Mununa alatji kulini, "Ngayulu nyurala ma-wirkara tjunguringkuyangka Christalulanya nganananya uwankara tjungu pulkara pukulmankuku."

30 Walytja tjuta, ngayulunatju tjapilpai Godala ngayunya alpamilantjaku, ka wanyu nyura kulu pulkara Godala ngayuku tjapinma kurunpa winkingku. Panya nyuntu nganana mulamularingkupai Mayatja Jesuku Christaku. Ka panya Kurunpa Milmitu nyuntunya nganananya mukulya nyinanytjaku palyalpai. Kana nyara palulanguru nyurala wangkanyi nyura ngayuku Godala pulkara tjapintjaku.

31 Alatjiya ngayuku tjapinma Godalu ngayunya atunymara kanyintjaku ngura nyara Judeala wirkankuyangka. Tjingurutjuya putu mulamularingkupai tjuta nyakula pikaringkuku, palula-tawaratjuya ngayuku tjapinma. Munuya tjanampa kulu tjapinma Godaku walytja tjtaku nyara Jerusalemala nyinanytja tjtaku, kaya mani nyangatja ngayulu katira ungunyangka mantjira pukulariku.

32 Kana nyara palulanguru pukulpa mulapa ma-pitjala nyurala tjunguringkuku ngayunya Godalu iyannyangka. Mununa nyurala tjungu nyinara nyuntu nganana uwankaratu pukulariku.

33 Uwa, ka Godanya nyurala uwankarangka tjungu titutjara nyinama, panya paluru nganananya kurunpa rapa pukulpa kanyilpai. Uwa mulapa.

¹ Kulilaya, nganampa walytja minyma panya ini Piipinya kuwari nyuralakutu ma-pitjanya. Panya nyara paluru wirungku Godaku walytja tjuta rawangku alpamilalpai ngura pala Tjantjuriyala.

² Ka paluru nyurala ma-wirkankunyangkampa nyura palunya pukultu mantjira kanyinma panya paluru Mayatja Jesuku walytja. Ka nyura panya Godaku walytja nyinarampa alatji palyantjaku ngaranya. Ka paluru kutjupa kutjupaku mukuringkunyangkampa palunya alpamilara ungama. Panya minyma nyara paluru rawangku Jesuku walytja tjuta alpamilanangi munu ngayunya kulu. Palulanguru nyura uti palunya pulkara atunymanama.

³ Palu minyma ini Puritjilanya pulanya Akuwilanya kurirara nyakulampaya wangka panya ngayulu pulanya rawangku kulilpai. Panya paluru pula ngayula tjungu rawa wararingi Jesuku Christaku.

⁴ Kana palumpa pulampa pulkara pukularinyi panya pula ilunytjikitja kulira nguluringkunyitja wiya raparingkula pula ngayunya alpamilanangi. Ka anangu panya tjuta Godaku walytjaringu ngura winkingka, nyara paluru tjana kuluya pulkara pukularinyi palumpa pulampa.

⁵ Kaya-puta Puritjilaku pulampa walingka inmaku tjungurinkupai tjutangka kulu wangka, panya ngayulu tjananya titutjarangku kulini.

Kaya wati Ipanaitjanya kulu wangka panya ngayulu palunya titutjarangku kulini. Nyara paluru panya ngayuku malpa wiru mulapa. Panya paluru-warara Jesuku mulamularingu nganmanypa manta nyara Aitjala, ka panyaya anangu kutjupa tjuta palula malangka Jesuku mulamularingu manta nyara palula.

⁶ Munuya Mary-nya kulu wangka panya ngayulu palunya rawangku kulini, panya minyma nyara paluru nyurampa pulkara wararingi.

⁷ Munuya ngayuku walytja kutjara Antura-naikanya pulanya Tjuniyanya kulu wangka panya ngayulu rawangku pulanya kulini. Panya paluru nganana tjungu tjailangka nyinangi. Ka nyara palunya pulanya panya anangu tjutangku nyakula kulilpai tjukurtjara wiru kutjara Godalu iyantja. Panya paluru pula-warara Jesuku walytjaringu, ka ngayulu malangka Jesuku walytjaringu.

⁸ Munuya wati ini Ampa-liyatanya kulu wangka panya ngayulu palunya rawangku kulini. Nyara palumpa ngayulu pulkara mukuringkupai, Mayatja Jesuku walytjaku.

⁹ Munuya Upa-natjanya kulu wangka panya palunya kuluna rawangku kulini. Nyara paluru panya nganana tjungu wararipai Jesuku Christaku.

Munuya Tjakitjinya kulutu wangka panya ngayulu palunya rawangku kulini. Nyara paluru kulu ngayuku malpa wiru mulapa.

¹⁰ Munuya Apalitjanya kulu wangka panya ngayulu palunya rawangku kulini. Wati nyara paluru panya tungun-tunguntu Christanya rawangku wanalpai.

Munuya wati ini Aritja-pulaku walytjapitingka kulu wangka panya ngayulu tjananya titutjarangku kulini.

¹¹ Munuya ngayuku walytja Yara-tiyanya kulu wangka panya rawangkuna palunya kulini.

Kana Natjitjanya tjananya kulu kulini panya paluru munu palumpa walytja kutjupa tjuta kulu Jesuku walytja nyinanyi. Kaya wanyu palula

tjanala kulu ma-tjakultjura panya ngayulu tjananya titutjarangku kulini.

¹² Munuya piruku wangka Turapinanya pulanya Turaputjanya panya ngayulu pulanya titutjarangku kulini. Panya minyma nyara paluru pula kulu Mayatja Jesuku titutjara warakaripai.

Munuya minyma panya Putjitjala kulu wangka panya ngayulu palunya rawangku kulini. Nyara paluru panya malpa wiru mulapa munu panya pulkara alatjitu warkaringi Mayatja Jesuku.

¹³ Munuya Ruputjanya kulu wangka panya ngayulu palunya titutjarangku kulini. Nyara paluru panya wirungku tungun-tunguntu wanalpai Mayatja Jesunya. Munu palumpa ngunyutju kulu palu purunypatu wangka, panya nyara paluru ngayunya wirura alpamilapai ngunyutjungku purunytju.

¹⁴ Munuya ini nyanga tjananya kulu wangka panya ngayulu tjananya titutjarangku kulini, Atjin-kuritjanya, Pilikanya, Umitjinya, Patupanya, Umatjanya, munu Jesuku walytja kutjupa tjutangka kulu wangka panya tjanala junguringkupai tjutangka.

¹⁵ Munu piruku palu purunypatu wangka Pailalukanya pulanya kurirara Tjuliyanya, munu Niriyananya pulanya nyarumpara, munu Ulimpanya kulu munu Jesuku walytja kutjupa tjutangka kulu wangka, panya palula tjanala junguringkupai tjutangka. Nyara palunya tjananyana rawangku tu kulilpai.

¹⁶ Ka nyura uti anangu kutjupa Jesuku walytja nyakulampa palumpa pukularira mara witinma.*

Kaya Jesuku walytja tjutangku ngura nyanga tjutanguru nyuranya kulini nyurampa pukularira.

Lita Nyangatja Wiyantjikitjangku Wangkanytja

¹⁷ Walytja tjuta, nyura panya nganmanypa tjukaruruku nintiringu iwara panya palyaku Jesunya wanantjikitja. Palu kutjupa tjutangku tjinguru nyuranya nintingku-palku ngunti wangkara tjaralku tjukarurungka ngaranyangka munu nyuranya kurara upalku Jesunya wanannyangka. Kana palula-tawara nyuranya pulkara ngulutjunanyi nyuranku ngulu nyakunytjaku. Ka kutjupa tjutangku alatji ngunti wangkanyangka nyura uti kulira wantira mauntalpa nyinama palula tjanala junguringkunytja wiya.

¹⁸ Panya anangu nyanga palu purunypa tjuta Mayatja Jesuku warakaripai wiya. Palu tjana walytjangku kutju kulira tjana mukuringkunytja kutju palyalpai. Munuya mukulyangku-palku wangkara ngunti wituwitura anangu ngurpa tjuta kuralpai. Palula-tawarana nyuranya ngulutjunanyi ngunti wangkapai tjutangku nyuranya kurantjaku-tawara.

¹⁹ Panya ngura winkingkaya kulinu nyura Tjukurpa Palya Jesuku wanganarangku kulinnyangka, kana nyara palulanguru nyurampa pukularinyi. Palu ngayulu mukuringanyi nyura titutjara wanganara nyinara palya kutju palyantjaku, munu kuraku mukuringkuwiya nyinanytjaku.

* **16:16** Paululu ngura nyara palunya ngurara tjutangka wangkangu nguku kutjara nyunytjuntjaku, panya tjakangkuya alatji palyalpai anangu kutjupa nyakula pukularira. Ka nganana tjinguru Jesuku walytja kutjupa nyakula mara witera pukularipai.

²⁰ Ka Godalu panya kurunpa rapa puku_lpa nyinanytjaku palyalpai munu paluru kuwari Satangga puruntara wantinyi nyuranya kurantjaku-tawara. Kana Mayatja Jesula nyurampa tjapini nyuranya ngaltunytjungku kanyintjaku.

²¹ Ka wati panya Timitjinya ngayula tjungu nyinara warkarinyi. Munu paluru nyuranya kulini nyurampa pukularira. Ka wati nyanga Lutjiyatjalu, Jasontu, Tjatjipatalu tjana kulu nyuranya palu purunypatu kulini. Nyanga paluru tjana kulu panya ngayuku walytja tju_ta.

²² Ka ngayulu ini Tutiyatjalu nyiringka nyanga walkatjunanyi Paulalu wangkanyangka. Mununa Jesuku walytja nyinara nyurala palu purunypatu wangkanyi alatji, "Ngayulu nyuranya rawangku kulilpai Jesuku walytja tju_ta."

²³⁻²⁴ Ka wati ini Kayatjalu kulu nyuranya titutjarangku kulilpai nyurampa pukularira. Panya ngayulu palumpa ngurangka nyinanyi. Kaya Jesuku walytja tju_ta ngura nyanga palula pitjala tjunguringkupai.

Ka piruku Iratjatjalu kulu nyuranya titutjarangku kulilpai. Nyanga paluru panya mani atunymara kanyilpai tawunu nyanga palumpa.* Ka nganampa malpa Kuwatatjalu kulu nyuranya titutjarangku kulilpai.*

Godanya Titutjarangku Mirawaninytjaku

²⁵ Utila nyanganguru titutjarangku Godanya mirawanima. Panya paluru mulapa nyuranya kunpura kanyilku nyura Jesunya Christanya titutjarangku wanantjaku wantinytja wiyangku. Panya nyanga palunya_na wangkangi Tjukurpa Palya Jesunyatjara wangkara utira. Tjukurpa nyanga palunya panya Godalu nganmanytju kumpilpa kanyiningi rawa mulatu,

²⁶ palu palumpa wangkatjara tju_tangku iriti nyiringka walkatjunu. Ka kuwari nyangalta utinu Godalu panya titutjara nyinapailu, munu wangkangu tjukurpa nyangatja para-tjakultjunkunytjaku anangu manta winkitjangka tjana kulira Godaku mulamularingkula palula wanganarangku kulintjaku.

²⁷ Uwa, pulkarala mirawanima Godanya kutju, panya paluru mulapa nintipuka pulka uwankarangka waintarinytja. Uwa Jesulu Christalu nganananya kanyinnyangkala Mamanya titutjarangku mirawanima. Uwa mulapa.

* **16:23-24** Tawunu nyanga paluru panya ini Karintjanya. * **16:23-24** Wati kutjupangku kunyu verse 24 walkatjunu munu mala tjungunu Paulaku tjukurta alatji - *Kana Mayatja Jesula Christala nyurampa tjapini nyuranya ngaltunytjungku kanyintjaku. Uwa, mulapa.*

Lita Nampa 1 Paulalu Walkatjura Iyantja Ngura Karintjalakutu 1 Corinthians Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjura iyantja Jesuku walytja tjutakutu ngura nyara Karintjala nyinanytja tjutakutu. Paluru ngura panya Ipitjala nyinara lita nyangatja walkatjunu.

Kaya anangu ngura nyara Karintjala nyinapai tjuta pulkara alatjitu kanany-kananyaripai tjananku walytjangku ninti pulka kulira. Munuya paluru tjana mani pulkatjara, palu paluru tjanaya kura pulka mulapa, panya wati tjutaya tjikira tarangkarira minyama kutjupa tjutangka ngunti ngaripai kunta wiya alatjitu. Ka ngura nyara palula timpula pulka mulapa ngarangi god ngalyppa-ngalyppa tjarpara walkuntjaku Godanya panya Jesuku mama walkuntjaku wiya.

Ka tjukurpa Karintjanyatjara Luke-alu walkatjunu nyiri panya *Jesulu Iyantja Tjutangka Palyantjitjangka* chapter 18-ta, panya Paulalu anangu tjutangka Tjukurpa Palya Jesunyatjara nganmanytju tjakultjungkunyitja, ka panyaya kulira mulamularingu paluru wangkanyangka munuya Jesuku walytjaringu anangu tjuta mulapa.

Palu ngula Paulalu ngura panya palunya wantikatinyangka paluru tjana malangka kuraringu munuyanku pikangku ngalytjurmara ngaparku wangkangi munuya putu tjungungku kulinigi. Ka kutjupangku lita walkatjura iyanu Paulalakutu munu tjakultjunu tjana panya pikaringkunyitja. Ka anangu kutjupa tjuta kulu pitjangu Karintjalanguru palula wangkanytjikitja munu tjukurpa kutjupa tjuta utintjaku tjapintjikitja kulu. Ka paluru lita nyanga palunya walkatjura tjanala wiru tjuta tjakultjunangi munu tjananya wituwituningi wirura palyanyku nyinanytjaku Godaku walytja mulapa.

Tjukurpa nyanganpa ngarinyi:

1:1-9 Paulalu tjukurpa nganmanyitja wangkanytja

1:10—4:21 Ngaparku pikaringkunyitja wiyangku wantinytjaku

5:1—7:40 Wiruraya tjukaruru nyinanytjaku Godala wanganarangku kulira

8:1—11:1 Kutjupa kutjupa tjuta nyaa palyantjaku Jesuku walytja nyinara

11:2—14:40 Inmangka tjunguringkula tjukarurungku palyantjaku

15:1-58 Tjukurpa Palya Jesunyatjaraku mulamularingkunyitjaku munu ilunytjatjanu wankaringkula pakantja

16:1-24 Paulalu tjukurpa malatja wangkanytja munu malpa tjutangka tjakultjungkunyitja

Paulalu Nganmanytju Wangkanytja

1-2 Uwa, Jesuku walytja tjuta, ngayuluna Paulalu nyurampa lita nyangatja walkatjunanyi ngura pala Karintjala nyinanytja tjutaku. Panya ngayulu tjukurtjara Jesulu Christalu iyantja, panya Godaluni

ngurkantanu palumpa tjukurpa anangu tjuṭangka tjakultjunkunytjaku. Kali ngali malpararangku kuwari junguringkula nyuralakutu lita nyangatja ma-iyani wati ini Tjatjanialu ngali.

Panya Godalu nyuranya ngurkantanu anangu kutjupa tjuṭanguru nyura Jesula Christala junguringkula palumpa walytja nyinanytjaku. Munu panya palu purunypa ngura kutjupa tjuṭangka tjananya kulu Godalu ngurkantanu palumpa walytjarangkunytjaku, panya tjana kulu tjukurpa Jesunyatjara kulintjatjanu mulamularingu. Kaya Jesunya Christanya mayatjanmara walkuni, panya paluru-manṭul tjanampa mayatja nyinanyi munu nganampa kulu. Kali lita nyangatja tjanalakutu kulu ma-iyani paluru tjana kulu nyakula kulintjaku.

³ Ka Mama Godalu, Mayatja Jesulu Christalu kulu nyuranya pukultju pulkangku kanyinma munu nyuranya kurunpa rapara pukulmanama.

Paulanya Tjanampa Pukularinytja

⁴ Ngayulu rawangku nyuranya kulira pukularira Godanya walkulpai, panya paluru nyuranya Jesula Christala tjungura nyurala kutjupa kutjupa tjuṭa mukulyangku nintiningi nyura palumpa waraka wirura palyantjaku.

⁵ Ka mulapa nyura Christala tjungu nyinara ninti pulkaringu munu panya raparingkula palumpa tjukurpa tjukaṣurungku wangkapai.

⁶ Palulanguru nyura nintiringkula kulini panya tjukurpa Christanyatjara ngayulu nyurala tjakultjunkunytja ngunti wiya, palatja tjukaruru mulapa.

⁷ Uwa, nyuranya panya Kurunpa Milmilṭu kutjupa kutjupa uwankara nintinu, ka nyura ninti nyinanyi Mayatja Jesunya malaku pitjanytjaku patara.

⁸ Ka Tjintu Malatjaku patannyangka Godalu nyuranya kunpu kanyilku. Ka nyara palulanguru tjintu nyara palula Jesunya pitjanyangka, kutjupangku nyuranya puṭu kuranmankuku.

⁹ Uwa mulapa Godalu nyuranya kunpu kanyilku wantinytja wiyangku, panya alatji paluru kalkunu munu paluru kalkuntjatanungku palyalku alatjitu wantinytja wiyangku. Paluru panya nyuranya ngurkantara tjungunu palumpa katjangka Jesula Christala nganampa panya mayatjangka, ka nyura palula tjungu pukulpa nyinaku.

Jesuku Walytja Tjuṭa Uti Tjungu Nyinama

¹⁰ Palu kulilaya walytja wiru tjuṭa. Ngayulu Jesuku warakarira nyuranya pulkara wangkara wituwituni tjungu kalypa nyinanytjaku. Pikaringkula ngapartji-ngapartjingu wangkawiyangkuyanku wantima, munuyanku maṅṭalpa maṅṭalpa palyalwiyangku kulu wantima. Palu junguringkulaya wangkara kulinma munuya tjungungku palyanmankula kutju palyanma.

¹¹ Alatjina kuwari nyurala wangkanyi mununa nyuranya paini panya Jesuku walytja mankurtuniya minyama ini Kalawiku nguranguru pitjala tjakultjunu nyuranku pikangku ngaparku wangkanyangka nyakunytjatanungku.

¹² Alatjina kulinu tjana wangkanyangka, kutjupa tjarangkuya kunyu wangkapai, "Nganana Paulala jungutja." Kaya kunyu kutjupa

tjarangku wangkapai, “Wiya, nganaṅa wati Apalatjala tjungutja.” Kaya kunyu kutjupa tjarangku wangkapai, “Wiya, nganaṅa Peterla tjungutja.”* Ka tjara kutjupangku wangkapai, “Wiya, nganaṅa Christala tjungutja.”

¹³ Ka nyangatja tjukaruru wiya. Christanya kutju alatjitu, tjuṭa wiya, ka uti nyuntu nganaṅa uwankarangku palunya kutju wanaṅma. Panya ngayulu nyurampa puṅu katakutjarangka ilunyta wiyatu, paluru kutju nyurampa anga-ilungu. Ka panya nyura ngayula iningka baptise-arinyta wiyatu, palula iningka kutju nyura baptise-aringu, Jesula iningka.

¹⁴ Ngayulu nyuralanguru kutjara kutju baptise-katingu wati ini nyanga pulanya Kuritjipanya munu Kayatjanya. Tjuṭaṅa baptise-katinyta wiyatu munuṅa nyanga palulanguru pukularinyi.

¹⁵ Tjinguru ngayulu nyuranya tjuṭa baptise-katinyangka nyura alatji wangkaku, “Ngayunya Paulalu baptise-katingu palula iningka, ka ngayulu pala palula tjungutja.” Alatji wangkanytjakuṅa pukularinytja wiya.

¹⁶ (Munta wanyu kaṅa kulila, mulapaṅa wati panya Tjipanatjanya, munu palumpa ngurangka nyinanytja tjuṭa kulū baptise-katingu. Palu ngayulu puṭu kulini kutjupa tjuṭa baptise-katinytjatjanungku. Munuṅa pukularinyi panya tjuṭa wiya, maṅkurpa kutjuṅa baptise-katingu, ngunti kulintjaku-tawara.)

¹⁷ Panya Christaluṅi ngayunya iyaṅu aṅangu tjuṭa baptise-katinytjaku wiya, palu tjukurpa palya palunyatjara paratjakultjungkunyitjakuṅi iyaṅu. Paluruṅi iyantja wiyatu aṅangu tjuṭa kaṅany-kaṅanytju wangkara wituwituntjaku. Palu tjukurpa Christanya puṅu katakutjarangka ilunyta tjakultjungkunyitjakuṅi wituṅu aṅangu tjuṭangku uti kulintjaku munu tjukurpa kulira mulamularingkunyitjaku.

¹⁸ Ka panya aṅangu watarku nyinapai tjuṭangku tjukurpa nyangatja wangkanyangka kulira analpai alatjitu alatji wangkara, “Wiya, kata kawakawangkuya ngunti wangkanyi.” Palu panya nganaṅanya Godalu wankarunu Jesunya puṅu katakutjarangka ilunytjitjanguru. Kala palulanguru tjukurpa palunya kulini pulka mulapa panya ara palulawanungku Godalu witulya pulkangku wankarunkupai.

¹⁹ Panya nyiringka iriti walkatjungkunyitja ngaranyi Godalu wangkanytja nyanga alatji, “Kutjupa tjuṭangkuya ninti pulkangku-palku wangkara kulilpai.

Palu wiya, ngayulu tjananya nintilku panya tjana nintipuka wiya, ninti tjukutjuku nyinanytja.

Munuya piruku kulilpai, ‘Nganaṅa uwankaraku ninti pulka.’

Palu wiya, ngayulu tjanampa tjukurpa kulilwiyangku wantiku alatjitu.” *

²⁰ Kala uti tjananya mirawaṅinytja wiyangku wantima wati panya nintipuka tjuṭa, munu tjukurku ninti pulka tjuṭa kulū, panya tjana tjukurpa pulka tjuṭa ngaparpungkula wangkapai nintingku-palku. Uwa, utila tjananya kulira wantima, panya Godalu tjananya nyakula ngurpanmankupai alatjitu.

* 1:12 Peternya ini kutjupa *Tjiipatjanya*. * 1:19 Aitjayaku 29:14

²¹ Panya anangu mantatja kulilpai tjutangkuya walytjangku nintipuka kulira Godaku putu nintiringanyi. Palu tjukurpa Christanya punu katakutjarangka ilunytjitja kulira kutju anangu Godaku nintiringkuku. Panya tjukurpa nyanga palumpa kulira mulamularingkunyangka kutju Godalu anangu tjuta wankarunkupai Christalawanungku. Kaya anangu kutjupa tjutangku nyangatja kulira analpai munuya wantipai, palu kutjupa tjarangku kulira mulamularingkunyangka Godalu tjananya wankarunkupai.

²² Kaya Jew tjutangku tjaipilpai alatji wangkara, "Nintilalanya wanyu kutjupa kutjupa witulya pulkangku palyara, kala palulangurulta nyakula tjukurpa palumpa mulamulariwa." Kaya Jew wiya tjutangku ara kutjupa wangkapai alatji, "Nganana tjukurpa ninti pulkangku wangkanyangka kulintjikitja mukuringanyi, munula pala palulangurulta kulira mulamularingkuku."

²³ Palu wiya, nganana panya tjukurpa Jesunya punu katakutjarangka ilunytjitja kutju tjakultjunkturpai. Palu Jew kutjupa tjutangku nyangatja kulira wantipai. Kaya anangu kutjupa tjutangku kulilpai, "Tjurkurpa nyangatja wiya nguwanpa, ngalya-ngalya nguwanpa."

²⁴ Palu panya Godalu anangu kutjupatjara ngurkantanu palumpa walytja nyinanytjaku Jew tjuta munu Jew wiya tjuta kulu. Panya nganana tjukurpa Christanya ilunytjitjaku mulamularingkunyangka Godalu nganananya wankarunu.

Uwa, mulapa Godalu witulya pulkangku nyanga alatji palyanu ninti pulkangku.

²⁵ Panya watarkitja tjutangku tjukurpa Jesunya ilunytjitja kulira anara wangkapai, "Godanya-manti upampa munu putu palyalpaimpa nyinanyi. Tjinguru paluru ngurpa." Palu wiya, Jesunya ilunyangka Godalu nintingku witulya pulkangku wankara pakaltjanganu, munulanya palulanguru nganananya kulu wankarunkuku. Kala nyanga palulanguru kulini Godanya mulapa witulya pulka nyinanyi, munu paluru nintipuka pulka mulapa anangungku kulintjitjangka munkara alatjitu.

²⁶ Walytja tjuta, wanyuya kulila nganmanyitja panya, panya nganmanypa nyura Godaku ngurpa nyinangi, ka panya paluru nyuranya palumparinytjaku ngurkantanu. Palu panya nyura uwankara nganmanypa ninti pulka nyinanytja wiya, mankurpa kutjuya ninti nyinangi. Munu nyura uwankaratu nganmanypa anangu tjutaku mayatja pulka nyinanytja wiya, mankurpa kutjuya mayatja nyinangi. Munu panya nyura uwankaratu wati minyma pulka wiya, mankurpa kutjuya pulka nyinangi.

²⁷ Panya Godalu nyuranya ngurpa tjuta ngurkantanu ninti pulka tjutangku nyakula tjananku walytjangku kulira kuntaringkunytjaku. Paluru nyuranya tjukutjuku tjuta ngurkantanu pulka tjutangku nyakula kulira kuntaringkunytjaku.

²⁸ Uwa, nyuranya panya ninti pulka tjutangku nyakula wantipai alatji kulira, "Wiya palatja ngurpa kurakura tjuta, nganananya purunypa wiya." Palu Godalu alatjitu nyuranya ngurpa tjuta ngurkantanu nintipuka panya tjutangku nyakula tjananku walytjangku kulira kuntaringkunytjaku.

29 Nyanga alatji Godalu ngurkantanu nyura walytjangku mirawaninytjaku-tawara.

30 Panya paluru kutjungku nyuranya palyanu palumpa walytjaringkunyitjaku Jesula Christalanguru. Panya Jesunya nyuntumpa nganampa ngalkilpa anga-ilungu Godalu ngananyanya kura palyantjitjanguru kalypangku wantinytjaku nganana karalyarira palula tjunguringkula nyinanytjaku. Alatji Godalu ngananyanya tjukarurunmankula walytjanmanu, ka nganana palunya kutju mirawaninytjaku ngaranyi.

31 Pala palulanguru nyiringka iriti walkatjunkunytja ngaranyi alatji, "Utila mirawaninytjikitja mukuringkulampa Mayatja Godanya kutju mirawanima ngananyanku mirawaninytja wiyangku." *

2

1 Walytja tjuṭa, wanyuna ngayunytjara nyurala tjakultjura nyura kulintjaku. Panya ngayuluna pitjangu nyuralakutu Tjukurpa Palya Godaku kumpilitja utira wangkanytjikitja. Tjukurpa nyara palunya ngayulu wangkara kanany-kananyaripai wiya. Mununa tjukurpa wara titutjarangku wangkapai wiya.

2 Palu nganmanytjuna unngu kulinu alatji, "Utiṭa tjukurpa Jesunytjara kutju wangkama, panya paluru punu katakutjarangka nganampa ilungu ngananyanya wankarunkunytjikitja. Tjukurpa kutjupa wangkanytjaku-manṭu wiya ngaranyi."

3 Kana nyurala wirkara upa alatjitu ngarangi mununa nguluringkula tjititingangi nyurala panya mirangka ngarala.

4 Mununa tjukurpa nyurala tjakultjura kanany-kananytju wangkara wituwituntja wiyatu. Panya ngayulu wangkara wituwituntjatjanungku nyuranya puṭu mulamularingkunyitjaku palyaningi. Palu nyura panya mulamularingu Kurunpa Milmilṭu nyuranya wityula pulkangku unngu nintinnyangka kutju.

5 Panya ngayulu mukuringangi nyura tjukurpa kulira mulamularingkunyitjaku ngayulu wangkanytjitjanguru wiya, palu Godalu wityula pulkangku nyuranya unngu nintinnyangka. Nyara palulanguruna tjukurpa kanany-kananytju wangkara wituwituntja wiyangku wantingi, Godalu kutjungku nyuranya unngu nintintjaku.

6 Palu Jesuku walytja kutjupa tjuṭangkuya palunya mulamulangku titutjarangku wanarinkupai wantinytja wiyangku. Kana nyara palula tjanala ngayulu tjukurpa pulka mulapa wangkara utilpai. Palu tjukurpa ngayulu wangkanytja wiru mulapa ngaranyi, tjukurpa mantatja tjuṭa purunypa wiya. Panya mayatja mantatja tjuṭangku tjukurpa pulka-palku kanany-kananytju wangkapai. Palu mayatja nyara palunya tjananya Godalu wiyaringkunyitjaku palyalku.

7 Palu tjukurpa nyanga ngayulu wangkanytja Godaku, panya tjukurpa Godalu nganmanytju kumpilpa kanyiningi. Panya manta paluntja kuwaripangka Godalu kuliningi tjukurpa palunya utintjikitjangku nganana Godala tjunguringkula wiru mulapa nyinanytjaku.

8 Panya mayatja mantatja tjuṭaya ngurpa nyinangi tjukurpa palunya kulintja wiyatu, munu panyaya pungkula utitjunu punu

* 1:31 Jeremiah-ku 9:24

katakutjarangka, Mayatja panya Ilkaritjanya. Tjinguruya tjukurpa palumpa nintingkumpa palunya pungguwiyangku wantima.

⁹ Palu tjana ngurpa nyinangi, panya iriti nyiringka walkatjunkunyitja alatji ngaranyi,

“Godalu wiru mulapa palyantjikitjangku kulinu palumpa mukuringku-pai tjuṭaku,

palu paluru kulintjitja anangu kutjupangku kulintja wiya alatjitu. Panya Godalu nintingku palyanu kutjupa alatjitu anangungku kulintja wiyatja.

Kaya uwankara watarku nyinangi, Godalu kutjungku kulinu.” *

¹⁰ Palu kuwari Godalu tjukurpa panya palunya nganana utinu Kurunpa Milmilṭawanungku. Panya Kurunpa Milmilṅa Godaku kurunpa munu paluru uwankaraku ninti, Godalu unngu kulintja uwankaraku kulu.

¹¹ Palu ngananya wanyu anangu kutjupangku kulintjitjaku ninti? Wiya, anangu nyara palurunku kutju walytja alatjitu ninti paluru kulintjitjaku. Ka palu purunypa Godaku Kurunpa kutju ninti Godalu unngu kulintjitjaku.

¹² Munu panya Godalu ngananya ungu kurunpa palumpa nganana unngu nyinara nintintjaku, kala palulanguru nintingku kulini Godalu nganampa wirungku ngalkilarira palyantja. Kurunpa nyara paluru panya ilkaritja, mantatja wiya, kala palulanguru mantatja tjuṭa pulkara kulilpai wiya.

¹³ Uwa, mulapa ngana anangu nintipuka tjuṭangku nintintjitjan-guru kulira wangkanyitja wiya, palu Kurunpa Milmilṭu nintinnyangka kutjula kulira wangkapai. Nyara palurulanya nintilpai kala palula kulintjatjanungku tjukarurungku utira wangkapai.

¹⁴ Ka anangungku Kurunpa Godaku mantjilwiyangku wantirampa Godanya puṭu tjukarurungku kulini, munu kutjupangku tjukurpa palunyatjara wangkanyangka kulira analpai, “Wiya, nyaratja kawakawa.” Panya anangu Kurunpa Milmilṅatjarangku kutju Godalu palyantja tjukarurungku ngurkantankupai, ka anangungku Kurunpa Milmilṅa kanyintja wiyangku puṭu ngurkantankupai.

¹⁵ Panya anangu Kurunpa Milmilṅatjarangku kutjupa kutjupa uwankara nintingku kulilpai Kurunpa Milmilṭu nintinnyangka. Palu anangu kutjupangku Kurunpa Milmilṅa wantinytjatjanungku anangu panya palunya Godalawanu nyinanyangka puṭu kulilpai.

¹⁶ Panya nyiringka iriti walkatjunkunyitja ngaranyi alatji, “Ngana uwankarangku puṭu kulini Godalu unngu kulintjitja.

Munula uwankarangku palunya puṭu wangkara tjukaruruni.” *

Uwa mulapa ngana ngurpa nyinangi, palu kuwarila Kurunpa Milmilṅatjara nyinanyi munula palulanguru Godanya tjukarurungku kulini, panya Christalu palunya kulilpai, palu purunytju.

3

Anangu Wanalwiyangku Christanya Kutju Wanama

* 2:9 Aitjayaku 64:4 * 2:16 Aitjayaku 40:13

1-2 Walytja wiru tjuṭa. Ngayulu anangu Kurunpa Milmilngatjara tjuṭangka tjukurpa pulka tjuṭa nintilpai. Ka mungatu ngayulu nyurala nyinara tjukurpa palu purunypa tjuṭa nyurala wangkangi, palu nyura puṭu kuliningi. Kaṇa palulanguru nyurala anangu mantatja kulilpai tjuṭa purunytja wangkangi tjukurpa nganmanyitja tjuṭa. Panya nyura Jesuku kuwari walytjaringkunyjtjanu iti purunypa nyinangi pulkaringkunyitja wiya, kaṇa nyurala puṭu tjukurpa pulka wangkangi iti purunypa nyinanyangka, panya iti ipi kutju ungkupai kuka wiyangku, nyara palu purunypa nyura nyinangi. Munu panya kuwari kulu nyura palu purunypaṭu nyinanyi munu tjukurpa pulka puṭu kulini.

³ Panya nyura titutjarangu walytjangku kulini mantatja kulilpai tjuṭa purunytju. Palulanguru nyura kutjupa tjuṭa nyakula nyararingkupai kutjupa kutjupa tjuṭa palyantja-tjiratja. Munu nyuranku ngaparku wangkara pika-pikaringkupai walytjangku kutju kulira palyantjikitja mukuringkula anangu Godaku walytja wiya tjuṭa purunytju, palunya tjananya arkara.

⁴ Panya nyuranku kunyu pika-pikaringkula wangkapai, “Ngayulu Paulala tjuṅgutja.” Ka kunyu kutjupangu wangkapai, “Wiya, ngayuluna Apalatjala tjuṅgutja.” Palu nyara palu purunypa wangkara nyura anangu panya mantatja kulilpai tjuṭa purunypa nyinanyi.

⁵ Palu uti nyura Jesula Christala kutjuṅka tjuṅgu ngarama munu palunya kutju kulinma, Apalatjanya ngalinya kulintja wiyangku. Panya ngali anangu alatjitu wati Godaku warkaripai kutjara palumpa tjukurpa wangkapai kutju, ka panya nyura nyara palulanguru mulamularingu Christaku. Panya Godalulinya warka kutjupa kutjupa ungu palumpa palyantjaku.

⁶ Ka panya ngayulu-warara nyurala Godaku tjukurpa tjakultjunu, panya watingku uninypa mantangka tjunkula wanalpai mai pakan-tjaku, nyara palu purunypa. Ka panya Apalatjala ngapartji malawanungku nyurala tjukurpa piruku nintiningi nyura kulira kunpuringkunyjtaku. Nyara paluru wati minangka kurpilpai purunypa, panya watingku uninypa nganmanyitju tjunkunytjitja minangka kurpira wanalpai pitiringkunyjtaku-tawara, palu purunypa Apalatjala ngayula malangka nyuranya nintiningi. Palu panya Godalu nyuranya witulyanangi palumpa walytjaringkula rawangku palunya wanantjaku. Panya paluru kutjuṅku uninypa mantangka tjunkunyangka pakaltjingalpai wati wiyangku, palu purunypa paluru nyuranya kunpuringkunyjtaku palyalpai. Panya ngali puṭu nyuranya wituwituni Godaku mulamularingkunyjtaku, palu paluru kutjuṅku nyuranya unngu nintilpai.

⁷ Ka wati panya tjukurpa nganmanyitju tjakultjungkupainya pulka wiya, munu wati panya malawanungku nintilpainya kulu pulka wiyatu. Palu Godanya kutju pulka mulapa panya paluru kutjuṅku unngu nintilpai palumpa walytjaringkula ma-kunpuringkunyjtaku.

⁸ Panya wati uninypa tjunkupainya munu minangka kurpilpainya pula tjuṅgu warkaripai, ka kutju mayatjarinytja wiya. Munu pula kutjaranguṭu warkarinytjatjanungku mani mantjilpai. Nyara palu purunypa wati tjukurpa nganmanyitju tjakultjungkupainya munu malawanungku pitjala nintilpainya pula tjuṅgu warkarinyi, ka kutju

waintarinytja wiya. Ka nyara palulanguru Godalu war̄karinyangka nyakula pukularira kutju kutju wiru ungkuku.

⁹ Uwa, Godanya kutju pulka nyinanyi, ka Apalatjalu ngali war̄ka palumpa kutju palyani ngalimpa wiya. Ka nyura palumpa anangu tjuṭa nyinanyi ngalimpa wiya, ka paluru nyuranya kunpuringkunyjtaku rawangku palyani nyura palunya tunguntunguntu wanantjaku.

Nyura Wali Pulka Purunypa

Munu nyura palu purunypatu wali pulka purunypa nyinanyi Godalu palurunku palyantja. ¹⁰ Ka panya Godalu ngayunya-warara wituṅ nyurala ankula Tjukurpa Palya nganmanytju tjakultjunkunyjtaku. Panya wati nintingu tjuminta urura tjutira waliku puluwa witu palyalpai tjukaruru mulapa ngaranytjaku, palu purunypa ngayulu nganmanytju Jesuku tjukurpa nyurala tjukarurungku tjakultjunangi. Ka puluwa panya palula katu kutjupangku wali palyalpai, palu purunypa kutjupangku ngayula malangka pitjala nyurala tjukurpa kutjupa tjuṭa nintilpai nyura kulira kunpuringkunyjtaku. Palu utiya Godaku war̄karipai uwankarangku purkarangku kulinma Godaku war̄ka tjukarurungku palyantjikitjangku, panya watingku purkarangku kulilpai wali tjukarurungku palyantjikitjangku, palu purunypa.

¹¹ Panya puluwa wirunya kutjupangku nganmanytju tjukarurungku palyara wantipai, ka mala kutjupangku puluwa panya palula tjungura wali wiru tjukarurungku palyalpai. Palu purunypa Godalu Jesunya Christanya puluwa wiru purunypa nganmanytju nganampa tjunu, ka uti kutjupangku malawanungku pitjala anangu tjuṭangka tjukarurungku wangkara nintinma tjana Christala kutjunga tjunguringkula pulkaringkunyjtaku. Panya kutjupawanu puṭu Godaku walytja nyinanyi.

¹² Panya kutjupa tjuṭangkuya puluwa wirungka wali kunpu palyalpai witu mulapa rawa ngaranytjaku, panya puli gold-nguru, kutjupa tjiilpanguru, kutjupa upulanguru. Ka kutjupa tjuṭangku puluwangka palyalpai wali upa nguwanpa tjinguru pununguru, tjinguru parkanguru, tjinguru tjanpinguru, ka mapalku warungku kampara wiyalpai. Ka ara nyanga paluru nintini Godaku war̄karipai tjuṭa, panya kutjupa tjuṭangkuya tjukurpa tjukaruru nintilpai rawangku wanantjaku Christanya, palu kutjupa tjuṭaya kura munuya tjukurpa kalikali nintilpai.

¹³ Ka tjiṅtu malatjangka Godalu war̄ka uwankara utilku kura munu palya palyantja tjuṭa, panya nganana mantangkalpi nyanga nyinara palumpa war̄karinytja. Panya tjiṅtu nyara palula waru pulkangku kampaku munu nganana kurakura palyantja kampara tjunpalku. Palu war̄ka wituwitu wiru mulapa nganana palyantja warungku puṭu kampaku, ka titutjara ngaraku. Uwa, palumpa warungku kampara war̄ka nganana palyantja uwankara utilku.

¹⁴ Tjinguru Jesuku walytjangku war̄ka wiru tjukarurungku palyan-nyangka nyakula Godalu pukularira palunya palyanmara wiru ungkuku.

¹⁵ Palu panya Jesuku walytja kutjupangku war̄ka wiru tjukarurungku palyantja wiyangku wantinyangka nyakula Godalu

palunya puṭu palyanmankuku. Wati paluru wankaringkuku, palu Godalu palunya wiru ungkunyta wiyangku wantiku.

¹⁶ Nyangatjaya kulinma, panya nyura Godaku walytja nyinara palumpa timpula purunypa nyinanyi milmilpa, ka palumpa kurunpa nyurala unngu nyinanyi.

¹⁷ Ka kutjupangku nyuranya Godaku timpula purunypa kuranyangkampa, Godalu palunya ngapartji palu purunymankuku. Panya Godaku timpula milmilpa ngaranyi wiru mulapa, ka nyura wali nyara palu purunypa nyinanyi milmilpa, Godaku walytja tjuṭa.

¹⁸ Kulilaya! Nyura tjinguru kulini, “Nganana nintipuka pulkanya mantatja kulilpai tjuṭa purunypa.” Palu wiya, nyura alatji kulira walytja ngunti kanany-kananyarinyi. Palu uti nyura wantima alatji kulintja wiyangku, kaya palya mantatja kulilpai tjuṭangku nyuranya ananma. Uti nyura tjananya kulira wantima munu tjukurpa Godaku kutju kulinma. Palulanguru kutju nyura ninti pulkaringkuku, Godalawanu.

¹⁹ Panya anangu kutjupa tjuṭangku tjinguru walytjangku kulini ninti pulkangku-palku, palu Godalu palunya tjananya uwankara ngurpa pulka nyanganyi. Panya nyiringka iriti walkatjunkunyta alatji ngaranyi,

“Panya anangu nintipuka tjuṭangku palyantjikitjangku kulinnyangka Godalu nyakula kulilpai, ‘Wiya, tjana kulintja kawakawa.’ ”

²⁰ Ka panya piruku ngaranyi nyiringka iriti walkatjunkunyta alatji, “Panya anangu nintipuka tjuṭangku kulinnyangka nyakula Godalu kulilpai, ‘Wiya, nyura kulintja ngatalpa alatjitu.’ ”

²¹ Ka palulanguru nyura uti anangu mirawaninytja wiyangku wantima. Panya Godalu kutjungku nyurampa pulka mulapa nganmanytju palyanu, ka anangungku puṭu palula waintarira nyurampa piruku palyani.

²² Panya ngayunya Godalu nyuralakutu iyanu alpamilantjaku, Apalatjanya, Peternya munu kutjupa tjuṭa kulu. Munu panya paluru nyuranya kutjupa kutjupa wiru tjuṭa kulu ungu wanka pukulpa nyinanytjaku. Munu paluru nyuranya ilunyangka wankara kanyilku. Panya kuwari nyuranya kanyini munu ngula nyuranya rawangkuṭu kanyilku wiyaringkunyta wiyangku. Mulapa paluru nyurampa pulka mulapa palyanu.

²³ Panya nyura Christaku nyinanyi, ka Christanya Godaku nyinanyi.

4

Jesuku Tjukurtjara

¹ Ka nyura uti nganannya tjukurtjara tjuṭa mayatja-palku kulintja wiyangku wantima, panya nganana Christaku warkaripai tjuṭa kutju nyinanyi. Panya palurulanya warka ungu palumpa tjukurpa kumpilitja tjuṭa utira tjukarurungku tjakultjunkunyta.

² Ka anangu nyara warkaripaingku uti palumpa mayatjangka wanganarangku kulira tjukarurungku palyanma.

³ Palu nyura kutjupa tjuṭangku ngayunya nyakula tjinguru alatji kulini, “Nyangatja ngunti-ngunti warkarinyi.” Ka nyura alatji ngayunya nyakula ngurkantara wangkanyangka ngayulu kulira wantinyi. Mununa kutjupangku palu purunypatu wangkanyangka

wantinyi alatjitu. Panya ngayulunatju walytjangku ngurkantankunytja wiyangku wantipai.

⁴ Ngayulu puṭu kulini ngayulu kura palyantjatjanungku, palu tjinguru ngayuku ngaranyi alatjitu, ka Mayatjala kutjungku ngayunya tjukarurungku ngurkantankupai ngayulu kurara warakarinytja munta palyanyku warakarinytja.

⁵ Palulanguruya anangu kutjupa nyakula kura wangkawiyangku wantima, palu patanmaya tjirirpi malatjaku Mayatja Jesulu kutjungku pitjala tjukarurungku ngurkantankunytjaku anangu uwankara, munu nganananya kulu. Panya tjinṭu nyara palula paluru utilku unngu kulintja uwankara munu kumpilpa mukuringkunytja tjuṭa kulu. Nyara palula arangka Godalu anangu tjuṭa tjukarurungku palyanyangka nyakula pukularira mirawaniku.

⁶ Uwa walytja tjuṭa, nyanganpana wangkangi Apalatjanya ngalinyatjara nyuranya alpamilantjikitjangku, nyura ngalinya nyakula munu kulira tjukurpa nyangaku tjukaruru nintiringkunytjaku panya alatji ngaranyi, "Godaku tjukurpa kutjuya wangararungku kulinma." Munuya wati tjukurtjara kutjupa nyakula ngunti mirawaniwiyangku wantima munu palu purunypaṭu wati kutjupa nyakula kuranmankuwiyangku wantima.

⁷ Panya nyura mayatja pulka wiya, anangu kutjupa tjuṭa ngurkantankunytjikitja. Kulilaya, Godalu kutjungku nyuntunya nganananya palyanu, kalanku uti mirawaniwiyangku wantima munula Godanya kutju mirawanima.

⁸ Nyura nyanga alatji kanany-kananytju walytjangku kulilpai, "Nganana Godaku tjukurku ninti pulka, panya Kurunpa Milmilṭu nganana pulka mulapa nintinu. Kala nganana mayatja pulka tjuṭa nyinanyi kutjupa kutjupa pulkatjara, Paulanya munu nintintja panya tjuṭa purunypa wiya." Palu alatji nyura ngunti kulini mayatja pulkangku-palku. Tjingurula nyura mayatja pulka tjuṭa nyinanyangkampa nyurala tjunguringkula mayatjarira nyinama, palu nyura mayatja wiya alatjitu.

⁹ Ngayulu kulini panya Godalu nganananya iyantja panya tjuṭa tjunu mungutja purunypa nyinanytjaku tjukutjuku mulapa. Panya anangu tjuṭangku nganananya kulilpai, "Wiya kurakura tjuṭa palanpa. Palyantiya iluku." Munuya paluru tjana nganananya anara ikaringkupai. Uwa, winkingkulanya nyanganyi angelpa ilkaritja tjuṭangku munu anangu tjuṭangku kulu.

¹⁰ Ka nyuranku kulilpai, "Nganana Christalawanu nyinara ninti pulka nyinanyi." Munu nyura nganananya anara ngurpanmankupai Christaku warakarinyangka. Munu nyuranku walytjangku kunpu kulilpai munu nyura nganananya upanmankupai. Munu panya nyura mukuringkupai kutjupa tjuṭangku nyuranya mirawaninytjaku, munu nyura mukuringkupai kutjupa tjuṭangku nyurala tjunguringkula nganananya anantjaku.

¹¹ Palu nganana rawa alatjitu paltjatjiratja munu mina ilu nyinanyi. Munula mantara kataly-katalypa kanyilpai. Kalanya kutjupa tjuṭangku pungkupai. Kala ngura wiya para-pitjalinkupai.

¹² Munulanku pulkara warakaripai, panya nganananya kutjupangku alpamilalpai wiya.

Ka kutjupa tjuṭangku unytjungku nganananya warkinyangka nganana ngapartji tjanampa Godala tjaipilpai tjananya pukulmankunytjaku. Ka kutjupa tjuṭangku nganananya anara kurara pungkunyangka nganana ngapartji tjananya kulira alatjitu wantipai.

¹³ Ka kutjupa tjuṭangku nganananya kuranmankunyangka nganana ngapartji kalypangku alatjitu wangkapai. Uwa mulapa, anangu tjuṭangku nganananya rawangku kulilpai raputji pulka purunypa. Panya kuka unaringkunyangkaya wanipai, palu purunypa tjana nganananya kulilpai rawangku.

¹⁴ Tjinguru nyura kulini ngayulu nyangatja walkatjunanyi nyuranya kunṭa palyantjikitjangku. Palu wiya, nyura ngayuku tjitji tjuṭa purunypa, kana nyangatja walkatjunanyi nyuranya tjukaruruntjikitjangku.

¹⁵ Panya nyuranya tjinguru anangu tjuṭa mulatu nintilkatima iwara palyaku, palu panya ngayulu kutjuna nyurampa mama purunyaringu Jesuku tjukurpa nyurala nganmanyntju alatjitu tjakultjungkunytjatjanu.

¹⁶ Munuṇa nyara palulanguru nyuranya kurunpa winkingku wangkara wituwituṇi rawangku ngayunya arkantjaku munu ngayulu purunytju Jesunya wanantjaku.

¹⁷ Kana kuwari Timitjinya nyuralakutu ma-iyani, ka paluru nyuranya ma-pitjala nintilku ngayulu purunytju nyura ngapartji Jesunya arkara wanantjaku. Panya Timitjinya ngayuku katja purunypa wiru mulapa, munu paluru wanganarangku Mayatja Jesunya kulira palumpa warṅa palyalpai. Nyara paluru nyurala tjakultjungkuku iwara panya palunya, panya ngayulu ngura winkingka Jesuku walytja tjuṭangka nintiningi Jesunya Christanya tjukarurungku wanantjaku.

¹⁸ Ka panya kutjupa tjuṭa nyura kanany-kananyaringu nyuranku walytjangku pulka kulira, munu nyura tjinguru alatji kulini, "Wiya, Paulalu ngananalakutu pitjala piruku nintintja wiyaringu."

¹⁹ Palu wiya, kuwari nguwanpana nyuralakutu ma-pitjala nyurala tjunguringkuku, Mayatja Jesulu witunnyangka. Munuṇa nyara palulangurulta wati panya kanany-kananypa nyinapai tjuṭangka wangkanyangka kulilku munuṇa tjanampa nintiringkuku tjinguru tjananya Godalu witulyananyi palumpa warṅa palyantjaku, munta tjinguru wiya.

²⁰ Panya anangungku Mayatja Godala wanganarangku kulintjatjanungku wangkangku kutju wangkapai wiya. Paluru wanganarangku kulira Godanya mukuringkunytjitja palyalpai Godalu palunya witulyankunyangka kutju.

²¹ Ka nyura nyaaku mukuringanyi? Kulatatjarangkuna ma-pitjala nyuranya wakara nintilku? Munta ma-pitjalana nyuranya purkarangku wangkara tjukarurulku, mukulyangku?

5

Jesuku Walytja Kuri Kutjupangka Ngariwiyangku Wantinytjaku

¹ Kutjupangkuni tjakultjunu panya wati nyurala tjungutjangku kunyu kurangu palumpa mamaku kuri altira kanyini, palumpa ngunytju nyuyulpa. Ka nyangatja kura pulka mulapa. Nyara paluru

Jesuku walytja wiya tjuṭangka waintaringu panya paluru tjana kura nyanga palu purunypa palyalpai wiya.

² Ka nyura nyaaku kaṇany-kaṇany nyananyi Jesuku walytjangu kura nyanga palu purunypa palyannyangka? Uti nyura pulkara kuntaringama munu wati nyara palunya painma inmangka nyurala tjunguringkuwiya nyinanytjaku. ³ Ngayuluna pulkara kuntaringanyi wati nyara palunya kulira, mununa patunguru nyanga kulintjatjanungku nyurala wangkanyi wati panya palunya ilanguru paintjaku. Ngayulu ngura pala Karintjala nyurala tjungu nyinanytja wiya, palu palya ngayulu kurunpa kutju nyurala tjungu ngaranyi mununa nyangatja patunguru litangka kutju wati panya palunya wangkara paini.

⁴⁻⁵ Ka nyura Mayatja Jesula mirangka inmangka tjunguringkula kulila lita nyangatja kutjupangu nyakula wangkanyangka, ka ngayulu nyurala kurunpa kutju tjunguringanyi. Ka Mayatja Jesula nyuranya witulyankunyangka nyura wati palunya Satangga uwa palumpa puntu kurantjaku, ka nyara palulangurulta tjinguru paluru walytjangu kulilku ilunytja kuwaripangka kura wantinytjikitjangu, ka kampa kutjuparira wantinyangkampa Godalu palunya kurunpa wankalku Tjintu Malatjanga.

⁶ Ka wati kutju nyurala tjungu kura nyinanyangka nyura nyaaku kaṇany-kaṇany nyananyi? Tjinguru nyura kulu aṇarira kuraringkuku. Panya yitja tjukutjuku tjunkupai mai ulungka munu minangka urulpai ka mai taluringkula pulkaringkupai, palu purunypa nyura wati kura nyurala tjungu kanyinnyangka kura pulkaringkula lipiringkuku, ka nyura kulu kuraringkuku.

⁷ Kaya palula-tawara wati pala kura palunya paira iyala. Panya Jew tjuṭangu inma Katuwanu Ankunytjala* ngalkula ruuru kulin-tjikitjangu yitja uwankara nguranguru mantjira wanipai munuya mai pilytja kutju ngalkupai, ka nyura palu purunypa wati panya kura palunya nyuralanguru paira iyala munuya palyanyku nyinama kuraringkunytjaku-tawara.

Uwa, Jew tjuṭangu yitja wanira mai pilytja kutju ngalkuningi, munuya palulanguru lamalama iluntara milkali mantjira wali tuwa nyitinu angelpa iluntankupailu nyakula tjanampa katja nganmanyitja wali pala palula unngu nyinanyangka wantinytjaku munu wali palula katuwanu ankunytjaku wali kutjupakutu. Ka tjanampa panya katja uwankara lamalama milkalinguru wankaringu. Ka palu purunypa Christanya nganampa lamalama, panya paluru nganampa ngalkilpa anga-ilungu Godalu ngananyanya kura palyantjitjangu kalypangu pungkuwiyangu wantinytjaku.

⁸ Ka palulangurula uti palunya ruuru kulinma, munu kura wantira ngunti wangkawiyangu tjukarurungku Jesunya wananna. Panya Jew tjuṭangu yitja wantipai munuya mai pilytja kutju ngalkula ruuru kulilpai, palu purunytjula uti kura wantima munula Jesunya ruuru kulira tjukarurungku wananna.

⁹ Panya lita kutjupangkaṇa ngayulu nyurala wangkangu nyanga alatji, "Aṇangu pirtjipai tjuṭaya malpa palyantja wiyangu wantima."

* 5:7 Exodus 12:1-42

10-11 Palu panya ngura winkingkaya anangu mantatja kutju kulilpai tjuṭa nyinanyi Godaku walytja wiya tjuṭa, panya kampangkātu ngari-pai tjuṭa, manyu pulka tjuṭa, kutitjunkturpai tjuṭa, munu god ngalypangalypa walkulpai tjuṭa. Palu ngayulu nyuranya nyanga palula tjanalanguru paintja wiya. Tjinguru nyura tjanalanguru mauntalpa nyinanytjikitja mukuringkula puṭu kulilku ngura kutjupakutu ankunytjikitjangku, panya ngura winkingkaya kura nyanga purunypa palyalpai tjuṭa nyinanyi. Palu ngayulu Jesuku walytja kutjupa tjuṭanguru kutju nyuranya paini. Uti nyura Jesuku walytja kura nyinanyangka nyakula kitikitingama palula tjunguringkunyitja wiya, tjinguru kampangkātu ngarinyangka, munta tjinguru manyu pulka nyinanyangka, munta god ngalypangalypa walkunnyangka, ngunti kuranmankunyangka, tjikira tarangkarinyangka, munta tjinguru kutitjunkturanyangka. Munuya maiku kulu palula tjunguringkuwiyangka wantima alatjitu.

12-13 Uwa, ngayulu nyuranya mantatja kulilpai tjuṭanguru paintja wiya, panya nganampa warka wiya palunya tjananya kura palyannyangka nyakula pungkunytjikitjangku ngurkantankunytjaku. Panya Godalu kutjungku tjananya nyakula ngurkantankuku. Palu nganampa ngaranyi Jesuku walytja tjuṭa kutju kura palyannyangka nyakula ngurkantara paintjaku. Panya iriti nyiringka walkatjunkturanytja alatji ngaranyi,

“Paira iyala wati kura palyalpainya nyurala tjungu nyinanytjaku-tawara.” *

Ka nyura uti tjukurpa nyanga palunya kulintjatjanungku wan-ganarangku kulira palyanma.

6

Jesuku Walytja Tjuṭangku Kutjuyanku Tjukururunma

¹ Kulilaya wanyu nyangatja, Jesuku walytja tjuṭa. Panya kutjupara kunyu anangu Jesuku walytja kutjupa nyuntumpa pikaringanyi kutjupa kutjupa-tjiratja. Ka nyuntu kunyu ankupai anangu Jesuku walytja wiyangka tjapintjikitja nyupalinya ngurkantara wangkara tjukururuntjaku. Palu palatja palya wiya. Uti nyuntu Jesuku walytjanka kutju ankula tjapinma nyupalinya wangkara tjukururuntjaku.

²⁻³ Palu nyura wanyu kulintja wiyatu? Panya ngula Godaku walytja tjuṭangku anangu manta winkitja nyakula ngurkantara tjaralku, angelpa tjuṭa kulu. Warka pulka mulapa nyangatja, ka nyura nyaaku tjukutjuku nyanga alatjitu puṭu ngurkantara tjukururuntjikitjangku kulini? Wiya nyurampa ngaranyi alatjitu mantangka nyanga nyinara nyuranku kura kutjupa kutjupa tjuṭa ngurkantara tjukururuntjaku.

⁴ Palulanguru tjinguru anangu kutju nyuralanguru kutjupaku pikaringkunyangka nyura uti anangu Jesuku walytja kutju tjunama palunya pulanya ngurkantara tjukururuntjaku. Munuya ankula tjapintja wiyangu wantima anangu Jesuku walytja wiyangu pulanya wangkara tjukururuntjaku.

⁵ Nyaratja kunṭangka. Panya nintipuka tjuṭa-manṭu nyurala tjungutja nyinanyi munuya uti kutjara pikaringkunyangka paluru tjana wangkara tjukururunma.

* 5:12-13 Deuteronomy 17:7

⁶ Palu kutjupa nyuntumpa pikaringkunyaangka nyuntu kurangu palunya katipai anangu Jesuku walytja wiyakutu nyupalinya ngurkantankunytjaku anangu panya watarku nyinapai tjutangka mirangka? Palatja palya wiya.

⁷ Uwa, nyura Jesuku walytja kutjupa nyurampa pikaringkunyaangka katipai kuutpakutu wati Jesuku walytja wiyangu nyupalinya ngurkantankunytjaku. Kana nyanga palulanguru kulini mulapa nyura kuraringu mukulya wiyaringkula. Utin kutjupangu nyuntunya kurannyangkampa wantima munun tjinguru nyuntumpa walingka tjarpara kutitjunkunyaangka wantima tu palunya ngapartji kurantjikitjangu kulintja wiyangu.

⁸ Palu nyuntu wantinytja wiyangu katipai alatjitu tjuta mirangka ngaratjungkula tjapintjaku munun palunya ngalturingkuwiyangu kurani. Uti nyuntu wantima alatji ngunti kulilwiyangu panya paluru nyupalitu Jesuku walytja kutjara.

⁹ Nyura ninti panya kura palyalpai tjuta Godalu pu tu walytjanmankupai, panya anangu pirtjipai tjuta, kuri walytjatjarangka ngaripai tjuta, munu god ngalya-ngalya walkulpai tjuta, munu wati nyitayirangka ngaripai tjuta, munu kungka kungangka ngaripai tjuta,

¹⁰ munu kutitjukupai tjuta, manyu tjuta, waina tjikira tarangkaripai tjuta, ngunti kuranmankupai tjuta, munu ngunti kuralpai tjuta, nyanga palunya tjananya uwankara Godalu pu tu walytjanmankupai.

¹¹ Kulilaya, panya kutjupa tjuta nyura nganmanypa palunya tjananya purunypa nyinangi. Ka panya Godalu nyuranya ngaltunytjungku ngalkinu Mayatja Jesula Christalanguru, ka Kurupa Milmitu nyuranya paltjira wirunu palya mulapa nyinanytjaku. Ka nyara palulanguru nyura tjukaruru nyinanyi Godala mirangka.

Godalu Nganananya Palura Tjunu Kampangka tu Ngarinytjaku Wiya.

¹² Kutjupangu tjinguru alatji wangkaku, "Ngayulu walytjangku mukuringkula palyantjaku ngaranyi alatjitu, kutjupa kutjupa uwankara." Palu uwankara pala paluru tjana palya wiya. Tjinguruna ngayulu uwankara mukuringkula palyantjikitjangu wangkama, palu ngayulu wantinyi kurangka kutju tjakarinkunytjaku-tawara.

¹³ Kutjupangu tjinguru wangkaku, "Godalu kuka mai palyanu nganampa tjuniku, munu paluru tjuni nganananya palyanu kukaku maiku kulu." Uwa mulapa, palu ngula tjintu malatjangka Godalu kuka mai tjuni uwankara wiyalku. Palu Godalu nganananya puntu palura tjunu nganana palumpa alatjitu mantangka nyanga nyinanytjaku, palya mulapa. Paluru nganananya puntu palura tjunu kampangka tu kutjupa kutjupangka ngarinytjaku wiya. Panya nganananya paluru mayatjangku wirura kanyini.

¹⁴ Panya Godalu Mayatja Jesunya ilunyangka pakaltjinganu, palu purunypa paluru nganananya ngula ilunyangka wankara pakaltjinalgku wityula pulkangu.

¹⁵ Kulila, panya nyura ninti nganana panya Jesuku walytjaringkula kurupa kutjuringu palula. Kala pala palulanguru uti piruku minyama panya wati tjutangka ngaripaingka kampangka tu ngarinytja wiyangu wantima. Panya alatji ngarirala Christanya kurani.

16 Panya watingku minyma al_tinyi munu pula tjunguringkula kutjuringanyi. Panya nyiringka iriti walkatjunkunytja uti ngaranyi alatji,

“Panya anangu kutjaritja pula al_tira kutjuringanyi.” *

17 Ka palu purunypa ngaranyi nganaṅa Mayatja Jesula tjunguringkula kurunpa kutjuringkunytjaku palula.

18 Uwa, nyara palulanguruya kuri walytjangka kutju nyinama munuya minyma kutjupaku nyakula mukuringkuwiyangku wantima. Ka minyma kutjupa nyuntumpa mukuringkunyangka kitikitiriwa walytja kuraringkunytjaku-tawara. Panya kura kutjupa tjuṅa palyara nyuntu anangu kutjupa tjuṅa kurani, palu panya minyma kutjupangka kampangkatu ngarira nyuntunku walytjangku pulkara kurani.

19 Nyura ninti panya Kurunpa Milmilnga nyurala unngu nyinanyi. Panya Godalu Kurunpa Milmilnga nyurala unngu tjarpatjunu paluru nyurala kutjungka kutjungka ngurararinytjaku. Ka kuwari nyuranku walytja nyinanytja wiya, Godalu nyuranya mayatjarira kanyini.

20 Tjinguru nyura kulini paluru nyuranya kulira kutju wankarunu. Palu wiya paluru Jesunya Christanya intjanungku iyaṅu nyurampa ngalkilpa ilunyangka nyura wankaringkula palumparinytjaku. Pala palulanguru nyura uti palyanyku nyinama anangu tjuṅangku nyuranya nyakula Godanya walkuntjaku.

7

1 Ka panya nyura mungatu lita ngayuku walkatjunu munu panya nyura ngayula tjapiningi nyurala wangkara utintjaku, kaṅa kuwari nyurala tjukurpa panya palunya utira tjakultjunanyi.

Kuri Al_tinytja

Panya nyura nganmanytju tjapiningi alatji, “Palya Jesuku walytjangku kuri al_tima, munta al_tiwiyi nyinama?” Palu ngayulu nyurala nyangatja wangkanyi palya wati al_tinytja wiya nyinanytjaku ngaranyi.

2 Palu kuraringkula kampangkatu ngarinytjaku-tawara uti wati uwankarangu al_tima munu kuri walytja walytja kanyinma. Ka palu purunypatu uti kungkawara uwankarangu kuri al_tima munu kuri walytjangka walytjangka nyinama.

3 Ka wati uti kuringka titutjara tjungu ngarima wantinytja wiya palumpa kuri mukuringkunyangka. Ka palu purunypatu miny-mangku uti palumpa kuringka titutjara tjungu ngarima wantinytja wiya. Uti pulanku rawa mukuringama wantinytja wiya alatjitu.

4 Panya minyma kuri puṅu tjirkani walytja nyinanytjikitja. Panya palumpa puntu wati palumpa kuriku. Ka palu purunypatu wati kuri puṅu tjirkani walytja nyinanytjikitja. Panya palumpa puntu palumpa wiya minyma kuriku.

5 Ka wati mukuringkunyangka minyma kuringku uti kulinma alatjitu wantinytja wiyangku, ka palu purunypatu minyma mukuringkunyangka uti wati kuringku kulinma wantinytja wiyangku. Palu tjinguru pulanku nganmanytju wangkara kulini unytjungku wantira tjungungku Godala tjapintjikitjangku, nyara paluru palya. Palu rawaringkunytja wiya uti pula tjunguringama panya pula tjinguru rawaringkula kutju kutju ngarira Satanta kulilku arkannyangka munu

* 6:16 Genesis 2:24

pula kuraringkuku kutjupaku mukuringkula. Pala palula-tawara pula uti rawaringkunyitja wiya mapalku tjunguringama.

⁶ Uwa, tjukurpa nyanga palunya wangkarana nyuranya pulkara wituwituntja wiyangku wantinyi, palu ngayulu walytjangku kulintjatjanungku wangkanyi nyura mukuringkula kulintjaku.

⁷ Panya ngayulu nyangaku pulkara mukuringanyi, nyura uwankara ngayunya purunypa altinytja wiya nyinanytjaku kunpu mulapa. Palu palya, panya Godalu nyuranya kutju kutju tjunu kutjupa tjuta kuri altinytja wiya nyinanytjaku, kutjupa tjuta kuritjara nyinanytjaku.

⁸ Kaṇa nyangatja wangkanyi wati kuri wiya tjutangka munu minyma wanakala tjutangka kulu. Nyangatja nyura wiru kuri altiwiya nyinanyi ngayulu purunypa.

⁹ Palu nyura tjinguru puṭu kutju nyinara palya kuri alṭima pulkara kulira kuraringkunyitjaku-tawara.

¹⁰ Kaṇa nyangatja wangkanyi kuritjara tjutangka ngapartji Mayatja Jesulu wangkanytja, "Uti minyma kuringku palumpa kuri wantikatinytja wiyangku wantima.

¹¹ Palu tjinguru wantikatirampa uti paluru kutju nyinama wati kutjupa altinytja wiya, munta tjinguru paluru mukuringkulampa malaku tjunguringama kuringka. Ka watingku ngapartji uti palumpa kuri wantinytja wiyangku kanyinma." Uwa, nyangatjana Mayatjala wangkanytja nyurala wangkanyi, ngayulu walytjangku kulira wangkanytja wiya.

¹² Palu kuwarina kuritjara tjutangka wangkanytjikitja mukuringanyi ngayulu kulintja. Panya nyangatja ngayulu walytjangku kulira wangkanytja, Jesulu wangkanytja wiya. Tjinguru wati Jesuku walytja nyinanyi minyma kuritjara, ka minyma palumpa kuri tjinguru Jesuku mulamularingkupai wiya, munu tjinguru paluru mukuringanyi wati kuringka rawa tjungu nyinanytjikitja. Ka wati paluru uti wantir'iyantja wiyangku palunya kanyinma palumpa mukuringkunyangka.

¹³⁻¹⁴ Panya minyma paluru kuringka tjungu nyinanyangka Godalu pulanyatu tjungura kanyini. Munta tjinguru minyma kutjupa Jesuku walytja kuritjara nyinanyi, ka wati palumpa kuri tjinguru Jesuku mulamularingkupai wiya, ka uti minymangku palunya wantikatinytja wiyangku wantima wati paluru palumpa mukuringkunyangka. Panya wati paluru kuringka tjungu nyinanyangka Godalu pulanyatu tjungura kanyini. Uwa, Godalu pulanyatu tjungura kanyini, kutju Jesuku walytja nyinanyangka tjinguru wati, munta tjinguru minyma. Munu tjananya uwankaratu tjungura atunymara kanyini tjitji kulukulu.

¹⁵ Palu tjinguru anangu puṭu mulamularingkupaingku palumpa kuri Jesuku walytja wantikatira ankunyitjikitja mukuringanyi, ka palya wantir'iyala markuntja wiyangku munu kutju nyinama. Panya Godanya mukuringanyi pilunpa kalypa nyinanytjaku.

¹⁶ Panya minyma kuri Jesuku walytja pilunpa kalypa nyinanyangka wati palumpa kuri tjinguru kampa kutjupariku munu Jesuku mulamularingkuku. Ka palu purunypatu wati kuri Jesuku walytja pilunpa kalypa nyinanyangka minyma palumpa kuri tjinguru kampa kutjupariku munu Jesuku mulamularingkuku. Palu nyura ngurpa nyaaringkuku palula malangka. Tjinguru Jesuku mulamularingkuku munta tjinguru

wiya. Ka nyura uti kuri Jesuku walytja wiya kanyirampa nyangatja kulinma munu pilunpa kalypa nyinama.

¹⁷ Uwa, Godalu nyuranya ngurkantara walytjanmankunyangka nyura yaaltji-yaaltji nyinangi? Wiya, nyura kutjupatjara kuritjara nyinangi, kutjupatjara kuri wiya nyinangi. Ka nyura kutjupatjara anangu Jew nyinangi, kutjupatjara Jew wiya nyinangi Gentile tjuṭa wangka kutjupa kutjupa. Ka nyura kutjupatjara wati mayatjaku warakaripai nyinangi manikitja wiya, ka kutjupa tjuṭa walytja warakaripai munu warakanguru mani mantjilpai nyinangi. Nyangatja Mayatja Jesulu nyuranya kutju kutju tjunu alatji-alatjitu nyinanytjaku. Ka palulanguru nyura uti Jesuku walytjaringkunyjtatjanu ara pala palulatu nyinama, panya nyura nganmanypa nyinangi, palu purunypa. Nyanga alatjina Jesuku walytja tjuṭangka wangkapai ngura winkingka, kaṅi nyura uti wanganarangku kulinma.

¹⁸ Tjinguru nyura wati Jew tjuṭa nyinangi nganmanypa itinguru watiringkunyjtatjanu, ka Godalu nyuranya ngurkantanu palumpa walytjaringkunyjtaku. Ka nyura uti paluruṭu nyinama kumpintja wiya. Munta tjinguru kampa kutjupa nyura Jew wiya nyinangi watiringkunyjtja wiya, ka Godalu nyuranya ngurkantanu palumpa walytjaringkunyjtaku. Ka uti nyura paluruṭu nyinama watiringkunyjtikitjangku kulintja wiya.

¹⁹ Panya watiringkunyjtja nyangatja tjukurpa pulka mulapa wiya, ka panya wati wiya nyinanytja pulka wiyatu. Palu nyangatja ngaranyi pulka mulapa nganana kulintjaku, panya Godalu wangkanyangka wanganarangku kulintja.

²⁰ Uwa, nyura panya nganmanypa waraka kutjupangka kutjupangka warakarini, ka panya Godalu nyuranya ngurkantanu palumparinytjaku, ka nyura uti waraka panya palulatu warakarima.

²¹ Tjinguru nyura manikitja wiya unytju maikitja warakaripai nganmanypa nyinangi, ka Godalu nyuranya ngurkantanu palumpa walytjaringkunyjtaku. Ka nyura uti palulatu warakarima, munu mayatjangku wangkara wantir'iyannyangka kutju anama.

²² Panya anangu unytju warakaripai tjuṭa Jesuku walytjaringkunyangka Godalu tjananya kampa kutjupananyi, ka tjana kampa kutjuparira waraka panya palulatu pukulpa mulapa warakarinyi. Ka tjinguru kutjupa tjuṭangka walytjangku kulira palyalpai nganmanypa nyinangi ka panya Jesuku walytjaringkunyangka Godalu palu purunypatu tjananya kampa kutjupananyi, ka paluru tjana kampa kutjuparira walytjangku kulira palyantja wiyaringanyilta munu Mayatja Godala kutjungkalta kulira warakarinyi.

²³ Panya Mayatja Jesulu nganampa ngalkilpa ilura ngananyanya maningka purunypa payamilanu palumpa milkalingka. Ka nyura palulanguru nyuranya watingku mayatjarira kanyintjaku wiyaringulta, ka Godanya kutju nyurampa mayatjarinu.

²⁴ Uwa walytja tjuṭa, nyura panya nganmanypa waraka kutjupangka kutjupangka warakarini. Ka Godalu nyuranya kutju kutju ngurkantanu palumpa walytjaringkunyjtaku. Kaya waraka panya palunya tjananyatu palyanma panya nyura nganmanypa warakarini, panya palunya.

Kuri Altinytjaku Wangkanytja

²⁵ Panya nyura ngayula tjapiningi alatji wangkara, “Anangu kuri wiya nyinara Jesuku walytjaringkula palya altinyi?” Kana nyangatja kuwari nyurala wangkanyi. Panya nyangatja Mayatjala wangkanytja wiya, ngayulu walytjangku kulira wangkanytja. Ka nyura palya ngayuku mulamularingama, panya Godalu ngayunya ngaltunytjungku kanyini kana tjukarurungku wangkanyi.

²⁶ Ngayulu kulini uti anangu kuri wiya nyinara alatji-alatjitu nyinama Jesuku walytjaringkula. Panya kuwari tjintu kura pulka ngarakatinyi.

²⁷ Tjinguru nyuntu kuritjara nyinarampa alatji-alatjitu nyinama wantikatinytja wiya. Munta tjinguru nyuntu kuri wiya nyinarampa kuriku para-ngurilwiyangku wantima munu alatji-alatjitu nyinama.

²⁸ Palu tjinguru nyuntu kungka altiku, ka palatja palya, kura wiya. Ka palu purunypatu tjinguru kungka nyitayingku *wati altiku, ka palatja kura wiya, palya. Palu kulilaya, nyura kurirara nyinanyangkampa nyurampa turapula kutjupa kutjupa tjuta ngaraku. Kana nyara palula-tawara kulini kampa kutjupa kuri wiya nyinanytjaku palya ngaranyi.

²⁹ Walytja tjuta, nyura wanyu uti kulini ngayulu wangkanyangka? Panya tjiiripi watalpi ilaringanyi Jesunya malaku pitjanytjaku, ka kuwaringuru nyanga alatjitu uti nyura kuritjara nyinarampa kuri palunya kutju kulintja wiyangku waintara Mayatja Jesunya pulkara kulinma.

³⁰ Munu nyura tjinguru kurunpa tjituru-tjituru nyinarampa tjituru-tjituru panya palunya kulintja wiyangku waintara Jesunya kulinma. Munu nyura tjinguru pukulpa nyinarampa pukulpa panya palunya kulintja wiyangku waintara Jesunya kulinma. Munu nyura kutjupa kutjupa wiru tjuta payamilarampa palunya tjananya kulintja wiyangku waintara Mayatja Jesunya pulkara kulinma.

³¹ Munu nyura tjinguru mani pulka munu kutjupa kutjupa wiru tjuta kanyirampa palunya tjananya pulkara kulilwiyangku waintara Mayatja Jesunya kulinma. Panya kuwarila manta nyanganyi, ka manta nyanga paluru kuwari nguwanpa wiyaringanyi.

³² Uwa, ngayuluna mukuringanyi nyura kutjupa kutjupa tjutanguru tjituru-tjitururira pulkara kulilwiya nyinanytjaku. Panya wati kuri wiya nyinara paluru Mayatja Jesunya kulilpai palunya pukulmankunytjikitjangku.

³³ Palu wati kuritjarangku palumpa kuri rawangku pukulmankunytjikitja mukuringkupai munu nyara palulanguru paluru kutjupa kutjupa tjuta palumpa rawangku palyalpai paluru pukularinytjaku.

³⁴ Palu paluru kampa kutjara kulini kuri pukulmankunytjikitjangku munu Mayatja Jesunya pukulmankunytjikitjangku. Ka minyma kuri wiyangku munta tjinguru kungka nyitayingku Mayatja Jesunya pukulmankunytjikitjangku kutju kulilpai. Panya paluru Mayatja Jesunya pukulmankunytjikitja mukuringanyi kurunpa winki. Palu panya minyma kuritjarangku wati palumpa kuri pukulmankunytjikitja pulkara mukuringanyi munu nyara palulanguru kutjupa kutjupa tjuta rawangku palumpa palyalpai paluru pukularinytjaku.

* 7:28 kungka nyitayingku panya kungkawara watiku ngurpa.

³⁵ Nyangatja ngayulu nyuranya alpamilantjikitjangku kutju wangkanyi, ngapaintjikitjangku wiya, panya ngayulu mukuringanyi nyura tjukaruru nyinanytjaku, munu Mayatja Jesunya rawa pukulmankunytjaku kurunpa winkingku.

³⁶ Tjinguru watingku kungka kalkuntja nyinanyi. Ka wati nyara paluru Mayatja Jesunya pukulmankunytjikitja mukuringanyi munu puṭu kulini kungkawara palunya altinytjikitjangku. Tjinguru paluru kutju nyinanytjikitjangku kulini, munta tjinguru paluru unngu mukuringanyitu palunya altinytjikitja. Uti paluru mukuringkula alṭima alatjitu. Palatja kura wiya.

³⁷ Palu wati kutjupangku tjinguru walytjangku kulini palumpa kungka panya pikatja alṭiwiyangku wantinytjikitjangku, panya paluru tjinguru puṭu nguwanpa kuri altinytjikitja mukuringanyi. Ka palatja palya paluru kutju nyinanytjikitja mukuringkunytja.

³⁸ Uwa, watingku kungka kalkuntja palya alṭinyi. Palu kungka alṭiwiyangku wantinytja, nyara paluru palya mulapa.

³⁹ Ka minyma wati kuringka rawa nyinanytjaku ngaranyi paluru wanka nyinanyangka. Palu wati kuri ilunyangka kutju palumpa ngaranyi wati kutjupa mukuringkula alṭinytjaku Jesuku walytja mulapa kutju.

⁴⁰ Palu ngayulu alatji kulini, minyma paluru kutjuringkula uti pukulpa nyinama piruku wati kuri kutjupa alṭinytjikitjangku ngurintja wiya. Nyangatja ngayulu kulintja, palu ngayulu Godaku Kuruntjara munuli paluru ngali tjungungku nyanga alatji kulini.

8

Mai, Kuka Ungkunytja God Ngalya-ngalya

¹ Ka panya nyura lita ngayuku walkatjura ngayula tjapiningi nyanga alatji, "Panya anangu tjutangku kuka katira ungkupai god ngalya-ngalya pulinguru palyantja. Kala nyuntula tjapini, nyuntun yaaltji kulini? Jesuku walytja tjutangku kuka palunya ngalkuntjaku palya ngaranyi?" Alatji nyura ngayula tjapiningi.

Palu panya nyura kutjupa tjarangku wangkapai alatji, "Nganana nintingu kulini panya Godanya kutju nganampa nyinanyi, ka apunguru palyantja tjuta ngalya-ngalya tjuta ngaranyi god mulapa wiya. Kala palulanguru palya ngalkuni kuka panya tjananya ungunytjita." Uwa, nyangatja nyura tjukarurungku wangkanyi. Nyara paluru tjana mulapa god ngalya-ngalya, god mulapa wiya. Palu nyura nyanga alatji tjukarurungku kulintjatjanungku nyuranku nintipukanmananyi munu nyara palulanguru kanany-kananyarinyi. Palu nyura uti mukulya ngaralampa Godaku walytja kutjupa tjuta kulinma tjananya kunpuntjikitjangku tjana kulu Jesunya wanantjaku titutjarangku.

² Kulila, anangu kutjupangku tjinguru kulini palurunku ninti pulkangku-palku, palu paluru ngurpa kuwaripatu uwankaraku nintiringkunytja wiya.

³ Palu anangumpa Godaku pulkara mukuringkunyangkampa Godanya palumpa ninti nyinanyi munu palumpa nyakula pukularinyi.

⁴ Ka nyara palulanguru nyura uti yaaltjiriku? Panya watarkitja tjutangku kuka katira ungkupai god ngalya-ngalya pulinguru palyantja. Kaya Jesuku walytja tjutangku wanyu kuka panya palunya

ngalkuntjaku palya ngaranyi? Wiya kulila, nyuntu nganana ninti panya apunguru palyantja tjuta god mulapa wiya ngalya-ngalya tjuta, palu panya Godanya kutju alatjitu nyinanyi, ka god kutjupa palula itingka nyinanytja wiya alatjitu.

⁵ Kutjupa tjutangu wangkapai, "Nganampa god tjuta nyinanyi ilkaringka munu mantangka kulu." Uwa mulapa tjana kutjupa kutjupa tjutaku mulamularingkupai munu tjananya wangkara godanyanmara ngunti mayatjanmankupai.

⁶ Palu panya Godanya kutju nyinanyi nganampa uwankaraku Mama. Panya paluru uwankara alatjitu palunu, kala palumpa uwankara nyinanyi. Munu nganana ninti panya Mayatja kutju uwankaraku nyinanyi Jesunya Christanya. Panya palulawanungku Godalu uwankara palunu, munu panya palulawanungku nganananya wankaru kanyini.

⁷ Uwa, nyura kutjupa tjuta ninti Godanya kutju nyinanyi, palu anangu kutjupajara Jesuku walytjaringkula ngurpatu nyinanyi kuwaripatu nintiringkunyitja wiya. Panya tjana iriti tjakaringu pulinguru palyantja tjuta walkuntjikitja, munuya kuwari kutju Jesuku walytjaringkuntjatjanungku palunya wanani, palu tjana pulinguru panya palyantjtjaku nguluringkupaitu mulapa-palku kulira. Panya watarkitja tjutangu kuka katira ungpapai god ngalya-ngalya. Kaya paluru tjana kuka panya palunya watarkungku ngalkula malangka kulira kuntaringkupai munuya kulilpai, "Kurangkula kuka nyangatja ngalkunu panya nganana Jesuku walytja. Utila ngalkuwiyangu wantima."

⁸ Palu kulila, kukangu nganananya putu Godala junguringkuntjaku palyani. Panya paluru nganananya kuka ngalkuwiyangu wantinyangka paintjikitjangu kulintja wiya, munu ngalkunnyangka palyanmankunytjikitjangu kulintja wiyatu.

⁹⁻¹⁰ Uwa, mulapa nyura tjukarurungku kulini, "Kuka nyangatja palya alatjitu ngaranyi ngalkuntjaku." Palu atatjuraya kulinma Godaku walytja kutjupa tjuta punkantjaku-tawara, panya kutjupa tjuta ninti pulka wiya kuwaripatu ngaranyi, munuya tjinguru nyuranya malpa tjutangka god ngalya-ngalya tjutaku timpulangka tjarpara unngu ngalkunnyangka nyakula nyurala aanariku munuya palulanguru ngalkuntjatjanungku kulira tjituru-tjitururiku, "Kurangkuna kuka nyangatja ngalkunu panya ngayulu Jesuku walytjaringu."

¹¹ Munu nyara palulanguru paluru nganmanytju ngalkuntjatjanungku kulira kuntaringkula ma-paturingkuku Godalanguru nyurala arkara ngalkuntjatjanu mununku walytjangu tjinguru kulilku, "Ngayulu-manti Godaku walytja wiyaringu." Panya nyura nintingku kulini kanany-kananytju, "Kuka nyangatja palya nganana ngalkuntjaku." Palu nyara paluru tjana kuwaripatu nintiringkunyitja wiya nyinanyi. Ka nyura wanyu nyaaku tjanala mirangka kuka panya palunya ngalkuni? Tjinguru paluru tjana nyuranya ngalkunnyangka nyakuntjatjanu aanarira ma-paturingkuku Godalanguru. Panya nyara palumpa tjanapa kulu Christanya anga-ilungu.

¹² Ka nyura alatji palyara kurani Christaku walytjapiti kuraringkuntjaku munu nyura Christanya kulu kurani.

¹³ Kala uti palula-tawara kuka panyatja ngalkuwiyangu wantima

Jesuku walytjapitingku arkara ngalkuntjatjanu kuntaringkula Godalanguru paturingkunyjtjaku-tawara.

9

Godaku Tjukurtjara Tjuta

¹ Kulilaya! Mayatja kutjupakuna warakarinytja wiya. Panya ngayulu mulapa nyangu Mayatja Jesunya ngayula utiringkunyaangka, kani paluru ngayunya witura iyanu tjukurpa palumpa parajtakultjunktjunktjaku anangu uwankarangka. Ka panya ngayulu nyurala tjakultjunktjunktjanga nyura kulira mulamularingu Mayatja Jesuku.

² Ka tjinguru kutjupa tjutangu alatji kulilpai ngayunya, "Nyangatja Jesulu iyantja wiyatu palumpa tjukurpa para-tjakultjunktjunktjaku." Palu uti nyura alatji kulintja wiya ngayuku mulamularingama, panya ngayulu tjakultjunktjunktjanga nyura kulira Jesuku walytjaringu. Kaya tjutangu nyuranya Jesuku walytjaringkunyaangka nyakula ngayunya kulilpai, "Mulapa wati nyanga paluru tjukurtjara Jesulu iyantja."

³ Uwa, anangu kutjupa tjutangu ngayunya anara wangkapai alatji, "Nyangatja Jesulu wituntja wiyatu." Palu wiya, paluru alatjitu ngayunya witura iyanu.

⁴ Nyara palulanguru ngayulu tjukurpa nyurala tjakultjunktjunktjanga nyura uti ngayunya mai kapi kulu ungama.

⁵ Ka ngayulu tjinguru pitjalinkunyjtjaku, panya Jesulu iyantja kutjupa tjutangkuya kuri katirinkupai Peterlu panya tjana Jesuku malanypa tjutangu kulu, palu purunypa. Palu ngayulu wantinyi.

⁶ Ka panya tjukurtjara kutjupa tjuta nyura mai ungkupai tjukurpa Jesunyatjara tjakultjunktjunktjanga. Palu Paanapatjanya ngalinya nyura unguwiyangku wantipai. Ka ngali waraka kutjupangka warakaripai maikitja, munuli tjukurpa kulu tjakultjunktjupai.

⁷ Nyaaku ngali waraka nyanga kutjarangka warakarinyi? Utili waraka kutjunga warakarima tjukurpa Jesunyatjara kutju tjakultjunktjunktjikitja, munuli palulangurulta mai nyurala mantjinma. Panya wati tjaultji tjutangkuya mayatjaku warakarira walytjangu mai mantjilpai wiya, mayatjangu ungunyanga kutju mantjilpai. Ka palu purunypa wati kiripitji pakaltjingalpaingku mai kiripitji mantjira ngalkupai palumpa pununguru. Ka palu purunypatu wati tjiipi nanikuta kanyilpaingku nanikuta ipi tjulkura mantjilpai tjikintjikitjangku. Ka nyanga paluru tjana purunytju uti ngali mai nyuralanguru mantjinma nyurala tjukurpa tjakultjunktjunktjantjanungku.

⁸⁻⁹ Uwa, ngayulu unytjungku wangkanytja wiya. Mulamulangkuwa wangkanyi panya Moseku tjukurtu kulu nyanga palu purunypa wangkanyi alatji,

"Panya pulukangku ukiri uninypatjara kantura pirpuntankupai mantangka uninypa punka-punkantjaku. Ka puluka tjaa karpil-wiyangku wantima uninypanangka warakarira ukiri ngalkukatinytjaku." *

Palu wanyu Godalu pulukaku kutju ngalturingkula wangkangi?

* 9:8-9 Deuteronomy 25:4

10 Wiya, nganananya kulu paluru wangkangi. Panya wati kutjara warkarinyi, kutjungku manta tjawara wanalpai uninypa tjunkunytjikitjangku, ka kutjupangku ngapartji ngula mai kururingkunyangka uralpai, munu pula kutjarangkutu war kanguru mai kururingkunyangka mantjilpai. Ka palu purunytju nyura uti Godaku tjukurtjara payamilanma paluru tjukurpa nyurala tjakultjunkunyangka.

11-12 Ka uti ngali ngapartji nyuralanguru mantjinma mai kuka kutjupa kutjupa tjuta mantangka nyanga paltja nyinanytjikitjangku. Panya kutjupa tjuta nyura wirura ungangi tjana Godaku tjukurpa wangkanyangka. Ka panya ngali kulu nganmanytju alatjitu Jesuku tjukurpa nyurala tjakultjunangi, ka nyura uti ngalinya kulu ungama.

Palu ngali nyurala ngatjintja wiyangku wantingi ngunti kulintjaku-tawara alatji, "Tjinguru nyanga pula manikitjangku tjukurpa Jesunyatjara para-tjakultjunanyi." Pala palula-tawarali wantingi nyurala ngatjintja wiyangku nyura ngunti kulira Jesuku tjukurpa wantinytjaku-tawara. Munuli piluntu alatjitu ngatjilwiyangku nyinara tjukurpa kutju wangkangi nyura tjukarurungku kulira Jesuku mularingkunytjaku.

13 Panya nyura ninti timpulangka war karipai tjutaku. Panya anangu tjutangku mai kuka timpulakutu katipai Godanya ungunytjikitjangku, kaya tjara pitjilta tiliwakara ungupai Godanya munuya tjara tjananku kanyilpai ngalkuntjikitjangku, timpulangka war karipai tjutangku.

14 Ka nyura palu purunypa kulinma, panya Jesulu wangkangu palumpa tjukurtjara tjuta mai kuka kulu ungunytjaku palumpa tjukurpa para-tjakultjunkunyangka.

15 Nyangatjana waktjura nyurala ngatjintja wiya nyura ngayunya ungunytjaku. Ngayulu mukuringanyi mani wiyangku rawangku tjukurpa wangkanytjikitja. Panya ngayulu pulkara pukularinyi mani wiyangku tjukurpa wangkara. Palu tjinguruni nyura ngatjinnyangka mani unkkuku, kana nyara palulanguru ngayulu putu pukulariku. Palu palyana tjinguru paltjatjiratjarira iluku nyurala ngatjintja wiya.

16 Kanatju nyaaku walytjangku mirawanima tjukurpa Jesunyatjara wangkanytjatjanungku? Panya Mayatja Jesuluni witu nu tjukurpa palunyatjara kutju tjakultjunkunytjaku. Tjinguru ngayulu wangkawiyangku wantinyangkampa ngayunya Mayatjalu ngurkantara kuranmankuku mununi tjituru-tjituru pulka palyalku.

17 Palu tjinguruna walytjangku kulira war karinytjatjanungku mani mantjintjikitjangku kulinma. Palu palyana Mayatjaku war karinyi panya paluru war ka nyanga palunya ngayunya ungu kana putu wantinyi.

18 Palu nyaana mantjini war karinytjatjanungku? Wiya, ngayulu mantjini pukulpa mulapa Tjukurpa Palya Jesunyatjara kutju para-tjakultjura. Ngayulu tjinguru ngatjinma kukaku maiku maniku, palu wiya, wantinyina tjukurpa kutju wangkanytjikitjangku.

Paulanya Mukuringkunytja Anangu Winki Wankaringkunytjaku

19 Kutjupangku ngayunya palumpa war karinytjaku putu wituwitu nu. Panya ngayulu walytjangku kulira palyalpai. Palu

ngayulu anangu uwankaraku pukulpa warkarinyi, panya ngayulu mukuringanyi tjuta mulapa Jesuku walytjaringkunyjtaku.

²⁰ Panya ngayulu tjukurpa Jesunyatjara Jew tjtangka wangkara ngayulu Jew tjuta purunypa nyinapai tjana kulu kulira Jesuku walytjaringkunyjtaku. Ngayulu Jesuku walytjaringkula Moseku ara wanantjaku wiyaringu, palu ara pala palunya ngayulu wanalpai Jew tjtangka tjungu ngarala paluru tjana kulu tjukurpa Jesunyatjara wangkanyangka kulira mulamularingkunyjtaku.

²¹ Mununa palu purunypatu Jew wiya tjtangka tjukurpa wangkara ngayulu tjananya purunypatu nyinapai paluru tjana kulu Jesunyatjara kulira palumpa walytjaringkunyjtaku. Palu ngayulu tjananya purunypa nyinara Godalu wituntjitja uwankara wantinytja wiya, panya ngayulu Christalu wangkanytjitja wanganarangku kulira palyalpai.

²² Ka Jesuku walytja kutjupa tjuta tjinguru palumpa kuntringkupai, kana ngayulu palula tjanala tjunguringkula ngaltunyjtju nyinapai tjananya wangkara kunpuntjikitja tjana Jesuku raparingkunyjtaku.

Uwa ngayulu anangu kutjupa kutjupangka tjunguringkula palunya tjananya purunypa nyinapai paluru tjana Jesulakutu malaku aruringkula palumpa walytjaringkunyjtaku.

²³ Nyanga alatjina nyinapai anangu tjtangu ngayunya nyakunytjatjanungku Tjukurpa Palya Jesunyatjara kulira wankaringkunyjtaku, kaya wirura pukulpa nyinama Jesulu tjananya pukulmara kanyinyangka.

²⁴ Kulilaya tjukurpa nyanga wirtjapakantjatjara. Panya nyura ninti wati wirtjapakalpai tjtaku, panya kutju wirtjapakara waintaripai munu kutjupa kutjupa wiru mantjilpai pakuwiya pulkara wirtjapakara waintarinytjatjanungku. Nyara palu purunytju Jesunya wanana pakuringkula wantinytja wiyangku, kanta Mamalu wirunmankula mirawaniku. ²⁵ Panya wati wirtjapakalpaingku rawangku tjintu kutjupa tjintu kutjupa arkalpai waintarinytjikitjangku, ka panya waintarinyangka mayatjangku katangka wiru tjunkupai nyalpitjara. Palu katatja nyalpitjara nyara paluru unytju kutju ngarala piltiringkupai. Palu nganana Jesuku walytja tjuta wirtjapakani purunypa wiru mulapa mantjintjikitja piltiringkupai wiyaku, titutjara ngarapaiku.

²⁶ Palulanguruna Godalakutu tjukaruru alatjitu wirtjapakani purunypa malakukutura nyakunytja wiya. Panya wati kutjarangku pulanku inkara marangku pungkupai waintarinytjikitjangku ka kutjungku tjukarurungku pungkupai kitikiti pungkunytja wiyangku, palu purunypa tjukarurungku Jesunya wanani.

²⁷ Panya ngayuku puntu ngayuku kutju wiya Godaku kulu. Kana ngayulu kulini Jesunya kutju pukulmankunytjikitjangku. Mununa ngayulu walytjangku kulira kutjupa kutjupa palyantja wiyangku wantinyi, Mayatja Jesuku kutjuku palyantjikitjangku. Panya ngayulu anangu tjuta wangkapai tjukaruru nyinanyjtaku. Mununa uti ngayulu kulu tjukaruru nyinama Godalu paintjaku-tawara.

10

Godanya Tungun-tunguntu Wanantjaku

¹ Walytja tjuṭa, ara panyatjaya kulinma, panya nganampa tjamupit-
ingku iriti Mosenya wananingi Itjipalanguru pakara. Panya tjananya
Godalu ngangkalangka katirinangi. Ka panyaya uru pulkawanu
wanka anu itipirira.

² Alatjiya ngangkali wanara urungka itipirira baptise-aringu
nguanpa, munu panyaya Mosela tjunguringu.

³ Kaya paluru tjana uwankarangkuṭu mai ilkarunguru ngalkuningi.

⁴ Munuya uwankarangkuṭu mina tjikiningi Godalu apunguru
tjutinytjaku palyannyangka. Palu apu nyara paluru panya Christanya
alatjiṭu, panya paluru alatjiṭu tjananya mina ungangi munu tjanala
tjungu pitjalinangi munu tjananya atunymanangi.

⁵ Palu tjuṭa mulatuya wanganarangku kulintja wiyangku wantingi,
ka tjanampa Godanya nyakula pukularinytja wiyaringu. Kaya palulan-
guru tjuṭa mulapa ilukatingi, ka tjanampa tarka pilangka ma-ngarira
wananingi.

⁶ Kala uti nyara palunya tjananya kulira nintiringama munula
tjananya purunyarinytjaku-tawara kuraku mukuringkuwiyangku
wantima.

⁷ Munula paluru tjana purunytju god pulinguru palyantja tjuṭa
pupakatira walkuntja wiyangku wantima, panya kutjupa tjarangku
iriti alatjinangi. Panya nyiringka iriti walkatjunkunytja ngaranyi
nyanga alatji,

“Anangu tjuṭa nyinakatingu mai kuka pulka ngalkula tjikintjikitja,
munuya mai wiyaringkula pakara ngalypa-ngalyparingkula
kunkga kutjupa kutjupangka ngaringi pukularinytjikitja.”

*

⁸ Nyanga alatji palyaraya tjuṭa mulapa ilungu nampa 23,000 tjintu
nyara palulaṭu. Kala uti kura nyanga palu purunypa palyalwiyangku
wantima.

⁹ Panya tjana kutjupa tjuṭangku kura palyaningi kulira, “Palya, Godalu
iluntankunytja wiyangku wantipai.” Palu alatji kulira tjana Godanya
ananingi, ka panya tjanalakutu liru tjuṭa iyanu tjananya patjara
iluntankunytjaku. Kala uti tjana purunytju Godanya analwiyangku
wantima.

¹⁰ Kaya tjara kutjupa panya mirpanaringi Godaku, ka paluru iyanu
angelpa iluntankupainya, ka tjananya iluntanu. Kala uti tjana
purunytju mirpanarira Godanya wangkawiyangku wantima.

¹¹ Uwa, alatji kuraringkunyangka nyakula Godalu tjananya ilun-
tanangi, ka nganana uti nyangatja kulira nintiringama. Panya
Godalu tjanala wangkangu tjukurpa nyanga palunya tjananya nyir-
ingka walkatjunkunytjaku ngananyanya ngulutjunkunytjikitjangku
nganana titutjarangku kulilkatinytjaku. Panya tjintu malatja watalpi
ilaringanyi, kala palulanguru uti wirura palyanyku nyinama.

¹² Tjinguru anangu kutjupangku kulini, “Wiya ngayulu Jesunya
wirura wanani kunpungku punkantja wiyangku.” Palu wiya,
uti paluru kanany-kananyarinytja wiyangku purkarangku kulinma
punkantjaku-tawara.

¹³ Ka tjinguru kutjupangku kulini, “Wiya ngayunya kutju ma-
mungku rawangku alatjiṭu kuraringkunytjaku wituwituni.” Palu
wiya, uwankaralanya paluru rawangku wituwitulpai kura kutjupa

* 10:7 Exodus 32:6

kutjupa tjuṭa palyantjaku. Palu Godalulanya mulapa kunṭulku nyuntu nganaṇa tungun-tunguntu palunya kutju waṇantjaku mamungka kulilwiyangku wantira. Panya mamungku nganaṇanya wituwitun-nyangka Godalu nganaṇanya nintilku alangkatjura wirtjapakantjaku. Kala palulanguru nganaṇa punkantja wiyangku tungun-tunguntu waṇalku.

God Ngalya-ngalya Tjuṭa Walkulwiyangku Wantinytjaku

¹⁴ Walytja tjuṭa, puṇunguru apunguru palyantja tjuṭaya pupakatira walkulwiyangku wantima munuya apu puṇu walkulpai tjuṭangka tjunguringkuwiyangku wantima munuya maunṭalpa nyinama tjanalanguru. ¹⁵ Nyangatjana nyurala kulilpai tjuṭangka wangkanyi, kayanku walytjangku kulinma ngayulu nyanga wangkanytja, tjinguru tjukaruru, munta tjinguru wiya.

¹⁶ Kulilaya, panya Christanya nganampa milkali tjutira ilunytja kulintjikitjangku nganaṇa waina walpayata kutjunguru tjikilpai munula palu purunytjuṭu mai nyuma kutju kaṭantara ngalkupai Christanya nganampa puntu pikatjararingkunyntja kulintjikitjangku. Munula nyanga alatji palyara nganaṇa kulilpai, "Panya nganaṇa Jesuku walytjapiti nyinanyi palula tjungu."

¹⁷ Panya nganaṇa tjunguringkula mai nyuma kutjunguru kaṭantara ngalkupai. Munula nyanga palulanguru kulilpai alatji, "Panya nganaṇa anangu tjuṭa, palu nganaṇa kutjuringanyi Jesula Christala kutjungka."

¹⁸ Wanyuya kulinma panya Israelkunu tjuṭa, panya tjana Godanya walkuntjikitjangku kuka katira tjara pitjilta tjunkula tiliwakara Godanya ungkupai munuya tjara kutjupa paluru tjana ngalkupai. Nyanga alatji ngalkulaya tjananku kulilpai, "Panya nganaṇa Godala tjungu nyinapai."

¹⁹ Palu ngayulu wanyu nyuranya wituwituni apunguru puṇunguru palyantja tjuṭa mulapa kulintjaku? Wiya, apu puṇu uritjara wiya, ngaalytjara wiya, wanka wiya. Nyara paluru tjana wanyu nyura kuka ungkunyangka nyurampa wiru palyalku? Wiya alatjitu.

²⁰ Palu nyangatjana wangkanyi, tjinguru kutjupangku apunguru palyantja kuka ungkulampa mamu unganyi munu palunya alatjitu mirawaṇinyi Godanya wiya. Kaṇa nyuranya paini mamu tjuṭangka tjunguringkuwiyangku wantinytjaku.

²¹ Panya nganaṇa Mayatja Jesuku walpayatangka tjikintjatjanungku puṭu piruku mamuku walpayatangka kulū tjikini. Munula Mayatja Jesuku mai ngalkuntjatjanungku puṭu piruku mamuku mai kulū ngalkuni.

²² Nyura mamungka piruku tjunguringkula Mayatjanya nyararingkunyntjaku palyani. Kaya nyanga palu purunypa palyalwiyangku wantima. Panya Mayatja Jesunya kutju pulka mulapa nyinanyi, kala nganaṇa tjukutjuku.

Godanya Kutju Pukulmankunyntjikitjangku Kulinma

²³ Jesuku walytja kutjupa tjuṭangka wangkapai alatji, "Nganaṇa kutjupa kutjupa uwankara mukuringkula palyantjaku ngaranyi." Palu palya wiya palatja, panya Jesuku walytja kutjupa tjuṭangka tjinguru

nganana kutjupa kutjupa tjuća palyannyangka nyakula aanariku munuya tjinguru ma-kuraringkuku.

²⁴ Utila walytjangku kulira palyalwiyangku wantima munula Jesuku walytja kutjupa tjuća waintara kulinma tjana nganannya nyakula aanarira kuraringkunyjtaku-tawara.

²⁵⁻²⁶ Panyatjaja kulila, panya nyiringka iriti walkatjunkunytja alatji ngaranyi, "Manta munu mantatja kutjupa kutjupa uwankara Godaku alatjitu ngaranyi." Ka nyara palulanguru nyura kuka tjuwangka payamilantjikitja mukuringkulampa tjařintja wiya alatji, "Kuka nyan-gatja wanyu god ngalypa-ngalypa nganmanytju ungkunyjtita munta wiya?" Palu watarkungku payamilanma tjařira kulintja wiyangku, munuya watarkungku ngalkunma, panya kuka palunya Godalu palura tjunu.

²⁷ Ka tjinguru kutjupangku Godaku walytja wiyangku nyuntunya altiku palumpa ngurangka mai ngalkuntjaku, ka nyuntu tjinguru mukuringkuku palula tjungungku ngalkuntjikitja. Palulanguru nyuntu uti ankula ngalkunma paluru mai kuka kulukułu ungkunyangka munu tjařira kulilwiyangku wantima alatji, "Kuka yaaltjinguru nyangatja?"

²⁸ Palu wati kutjupangku tjinguru Jesuku walytja kutjupangku nyupalila tjungu nyinara nyuntunya wangkaku, "Kuka nyangatja panyatja, panya god ngalypa-ngalypa ungkunyjtita." Ka wantima ngalkuwiyangku. Tjinguru nyuntu ngalkunnyangka wati paluru nyuntula aanarira ngalkuku. Munu palulanguru tjinguru ngalkuntjat-janungku kulilku, "Kuntangka kurangu ngalkunu." Munu tjinguru kuntaringkula Godalanguru ma-pařuringkuku. Ka nyuntu palula-tawara wantima ngalkuntja wiyangku.

²⁹⁻³⁰ Palu tjinguru kutjupangku kulilku, "Wiya palyana kuka palunya ngalkuni. Panya ngayulu Godanya kulini alatjitu kuka nyanga ngalkula. Kani nyaaku kutjupangku paini ngalkuwiyangku wantinyt-jaku." Uwa, palatja palya paluru kulintja. Palu uti palurunku kutju kulintja wiyangku waintara anangu kutjupa tjuća kulinma. Munu kutjupangku kuntaringkula wantinyangka nyakulampa uti paluru wantima ngalkuntja wiyangku.

³¹ Uwa, tjinguru nyura ngalkuku munta tjinguru wiya, tjinguru nyura tjikilku munta tjinguru wiya, tjinguru nyura kutjupa kutjupa tjuća palyalku munta tjinguru wiya. Palu nyura uti nyuranku walytjangku kutju kulintja wiyangku waintara kulinma Godanya palunya pukulmankunytjikitjangku. Ka paluru nyuranya nintilku tjukarurungku kulira palyantjaku anangu tjućangku nyakula Godanya mirawaninytjaku.

³² Wiruraya nyinama kutjupa tjuća kuraringkunyjtaku-tawara, panya Jew tjuća, Jew wiya tjuća munu Jesuku walytja tjuća kulukułu.

³³ Ngayunya purunypaya nyinama panya ngayulu anangu uwankara pukulmankupai walytja pukularinytjikitjangku kulintja wiyangku. Uwankarakuna kulira wiru palyani tjananya Jesulu wankarunkunytjaku.

11

¹ Ka nyura ngayunya arkanma ngayunya purunypa nyinanytjikit-jangku, panya ngayulu Christalu purunytju kulira palyani.

Inmangka Tjunguringkula Tjukaruru Nyinanytjaku

² Uwa, wirungkuṅi nyura rawangku kulini ngayunya purunypa nyinanytjikitjangku. Munu nyura tjukurpa ngayulu nyurala nganmanytju wangkanytjita rawangku wanganarangku kulini.

³ Palu nyangatjaya wanyu kulinma, panya Christanya watiku mayatja nyinanyi, ka panya wati minyma kuriku mayatja nyinanyi. Ka panya Godanya Christaku mayatja nyinanyi.

⁴ Ka inmangka tjunguringkula nyinara uti watingku kata tjutul-wiyangku Godala tjapinma, munu kata tjutulwiyangkuṅu Godaku tjukurpa tjakultjunama. Panya watingku tjtinguru kata tjutura Godala tjapirampa munu kata tjutura Godaku tjukurpa tjakultjurampa, ka Christanya palunya nyakula palumpa kunṅaringama.

⁵ Ka minymangku uti kata tjutura Godala tjapinma, munu kata tjutura Godaku tjukurpa tjakultjunama. Panya minymangku tjtinguru kata tjutuntja wiyangku Godala tjapirampa, munu kata tjutuntja wiyangku Godaku tjukurpa tjakultjurampa, ka palumpa kuringku palunya nyakula kunṅaringkuku.

⁶ Ka minyma tungun-tunguntu kata tjutuntja wiya nyinapaingku uti mangka kaṅara wiyanna. Nyara palulangurulta paluru kunṅaringkula kata tjutulku.

⁷ Palu palya uti wati kata tjutuntja wiya nyinama, panya Godalu palurunku purunypa wati palunu, kaya wati nyakula Godanya mirawaninyi. Palu minyma nyakula tjana wati alatjitu mirawaninyi, panya paluru-manṅu watinguru utiringkunyta.

⁸ Panya Godalu minymanguru wati palyantja wiyatu, minyma palyaṅu watinguru.

⁹ Munu Godalu wati minymaku palyantja wiyatu, minyma palyaṅu watiku.

¹⁰ Palulanguru uti minymangku inmangka kata tjutura nyinama panya alatji nyinara paluru nintini paluru watingka malatja. Kaya angelpa tjuṅangku nyakula pukulariku.

¹¹ Palu nganana Jesuku walytja nyinara minyma tjuṅa watiku alatjitu nyinanyi, ka wati tjuṅa ngartji minymaku alatjitu nyinanyi. Panya tjana mauṅtalpa mauṅtalpa puṅu nyinanyi.

¹² Nyangatja tjukaruru panya Godalu minyma nganmanyitja watinguru palyaṅu, palu nyara palulanguru kuwarikutu ngarakatinyi titutjara panya wati iti wirkananyi minymanguru. Panya Godalu uwankara mulapa palunu wati minyma kulu.

¹³ Walytjangkunku kulila! Uti minymangku inmangka tjunguringkula Godala tjapintjikitjangku kata tjutuntja wiyangku wantima.

¹⁴ Panya nganampa alatji ngaranya watingku mangka kaṅalpai muṅumuṅu kanyintjikitjangku. Panya wati mangka waratjara nyakulaya wangkapai, "Kungka purunypa nyaratja."

¹⁵ Kaya minyma mangka waratjara nyakula wangkapai, "Mangka wirunya nyaratja." Panya Godalu palyaṅu minyma mangka waratjara nyinanytjaku, panya mangkangku-manṅu tjutura purunypa kanyini.

¹⁶ Tjtinguruni nyura kutjupa tjuṅangku ngayunya rawangku ngarpungkula wangkanytjikitja mukuringanyi. Palu wiya, alatjituna wangkanyi. Palu purunypatula palyalpai, kaya Jesuku walytja tjuṅangku ngura kutjupangka kutjupangka palunyaṅu palyalpai.

Mayatjaku Tjapaya Watarku-watarkungku Ngalkunytja

¹⁷ Kana kuwari nyurala wangkanyi tjukurpa kutjupa. Palu nyuranya mirawaninytja wiyangku wantinyi, panya nyura kunyu inangka tjunguringkula wanganarangku kulira palyalpai wiya.

¹⁸ Nyanga palunya nganmanytju kulinu kutjupa tjutangku tjakultjungkuyangka. Panya nyura kunyu inmaku pitjala pukularira tjungu nyinanytja wiya mauntalpa mauntalpa nyinapai. Kana kulini, "Nyangatja tjinguru mulapa."

¹⁹ Mununa kulini palya tjinguru nyura mukuringkula nyura kulin-tjitja alatji palyanma. Palu Godalu nyuranya uti alatjitu nyanganyi mauntalpa mauntalpa nyinanyangka munu paluru nintingku nyanganyi anangu yaaltjitungku palunya tjukarurungku wana.

²⁰ Panya nyura Mayatjaku Tjapa ngalkuntjikitja tjunguringkula ngunti-ngunti palyalpai, Mayatjanya mulamulangku kulintjikitjangku wiya.

²¹ Panya nyura kunyu tjungungku ngalkuntja wiyangku, manyu-manyungku nganmanytju tjikira ngalkula paltjarangkupai kutjupa tjuta ungunytja wiyangku. Kaya paltjatjiratjangku putu kulilpai. Ka panya kutjupa tjutangku waina pulka tjikira tarangkaripai kutjupa tjuta ungunytja wiyangku.

²² Nyaaku nyura panyatja ngura walytjangka nganmanytju ngalkuwiyangku wantipai munu pitjapai ngura wiyatjara-palku? Nyaaku nyura pitjala tjanala tjunguringkula pulkara ngalkula tjikilpai? Tjinguru nyura mukuringanyi Godaku walytja tjuta anantjikitja, munu ngaltutjara tjuta kulu kurantjikitja. Kana nyanga alatji palyannyangka wanyu nyuranya mirawaniku? Wiya, putuna nyuranya mirawaninyi kura nyanga purunypa palyannyangka.

Mayatja Jesuku Tjapa

(Matthew-ku 26:26-29; Markaku 14:22-25; Luke-aku 22:14-20)

²³ Uwa, nganmanytju panyana nyurala nintiningi tjukarurungku, panya Mayatja Jesuluni nintinu. Ka paluru wangkanytja alatji, munga panya palula panya Judasalu Jesunya Jew tjutaku mayatja tjutangka nintintja kuwaripangka Mayatja Jesulu mai nyuma mantjinu. ²⁴ Munu Godanya walkura mai panya palunya katantara tjaranu, munu wangkangu, "Nyangatja ngayulu puntu nyurampa pikatjararingkuny-tja. Mantjiraya ngalkula, munuya ara nyanga palunya rawangku palyanma ngayunya kulintjikitjangku."

²⁵ Munu palulanguru tjapangka malangka Jesulu walpayata mantjira wangkangu, "Nyawaya walpayata nyanga wainatjara, munuya kulinma panya Godalu kuwari kalkuntjatjanungku ara kuwaritja palyani, ka ara paluru titutjara ngaraku ngayulu ilura milkali tjutinytjangu. Nyanga palunyaya tjikinma ngayunya kulintjikitjangku."

²⁶ Panya mai palunya ngalkula munu waina walpayatanguru tjikira nyaratja alatji utini, panya Mayatja Jesunya nganampa ilunytja. Kaya titutjarangku nyangatja palyanma. Munu nyura palulanguru nyakuku ngula Mayatja Jesunya malaku pitjanyaangka.

²⁷ Palulanguruya tjukarurungku Mayatjaku tjapa ngalkunma, palunya mulamulangku kulintjikitjangku. Tjinguru anangu kutjupangku watarkitjangku Mayatjaku mai ngalkunnyaangka munu wal-

payatanguru waina tjikinnyangka Jesulu nyakula kulilku, “Wiya, nyanganku ngayunya puntu munu milkali kulu kurani.”

²⁸ Ka nyanga palula-tawara uti nyuranku atunymanama munu kura palyantjanungku walytjangku unngu kulinma munu nganmanypa tjukarururingama Godala mirangka. Munuya nyara palulanguru kutjulta mai ngalkula walpayatanguru waina tjikinma.

²⁹ Tjinguru watarkitjangku Mayatja Jesunya ngalkilpa ilunytja kulin-tja wiyangku mai ngalkula, walpayatanguru waina tjikira, nyara palulanguru paluru walytjangku pika pulkani.

³⁰ Nyara palulanguru panya nyura kutjupa tjuta kuwari pikatjara nyinanyi, ka kutjupa tjuta nyurkaringu, ka kutjupa tjuta wiyaringu.

³¹ Kalanku uti walytjangku nganmanytju kulinma munu kura kulirampa nganmanypa tjukarururingama palya nyinanytjikitja, kalanya Godalu kuranmara pungkuntja wiyangku wantiku.

³² Palu panya Godalu nganananya pailpai nganana nintiringkula kulira tjukarururingkuntjaku, nganananya Godalu ngula mulamularingkupai wiya tjutangka tjungura warangka waninytjaku-tawara.

³³ Uwa walytja tjuta, nyura Mayatjaku Tjapa ngalkuntjikitja tjunguringkula warpungkula ngalkuwiyangku patanma anangu kutjupa tjutaku nyura tjungungku ngalkuntjikitja.

³⁴ Uti nyura paltjatjiratja ngaralampa ngurangku nganmanytju ngalkunma munu paltjaringkula pitjala tjunguringama tjukarurungku ngalkuntjikitja, ka Godalu nyuranya nyakula pikatjarantja wiyangku wantiku.

Uwa, panya litangkani nyura kutjupa kutjupa tjuta tjapiningi, kana ngula tjukurpa panya palunya tjananya ma-pitjala nyurala wangkara tjukarurulku.

12

Kurunpa Milmiltu Nintilpai

¹ Uwa walytja tjuta, nyura panya lita walkatjura ngayula tjapiningi nyurala Kurunpa Milmilngatjara tjakultjungkuntjaku, panya Kurunpa Milmiltulanya nintilpai munu witulyankupai Godaku waraka kutjupa kutjupa tjuta palyantjaku. Kana kuwari nyurala utira wangkanyi nyura tjukurpa nyanga palunya tjukarurungku kulintjaku.

² Nyura nintingku kulini panya nganmanypa nyura Godaku ngurpa nyinanyangka mamu tjutangu nyuranya kampa kutjupangka katirinangi god pununguru apunguru palyantja tjuta tiwilpa tjuta pupakatira walkuntjaku.

³ Kana palulanguru nyura Godaku walytjaringkunya mukuringanyi nyura nyangatja tjukarurungku kulintjaku. Panya anangungku Kurunpa Milmiltu nintinnyangka putu Jesunya anara kuranmananyi. Palu anangu Kurunpa Milmilngatjara nyinara unytjungkungku wangkanytja wiyangku mulamulangku Jesunya mayatjanmananyi.

⁴ Panya Kurunpa Milmiltu nganananya Jesuku walytja tjuta waraka kutjupa kutjupa tjuta ungu Godaku palyantjaku. Munu Kurunpa panya kutju paluru nganananya kutju kutju ungu waraka kutjupa kutjupa.

⁵ Panya war̄ka kutjupa kutjupa t̄juta ngaranyi nganana Godaku palyantjaku, palu nganana Mayatja kutjuku wanganarangku kulira palyalpai, Mayatja Jesuku.

⁶ Uwa, nganana panya kutju-kutjungku war̄ka kutjupa kutjupa palyalpai, palu Godalu kutjungku nganananya kutju kutju nintilpai munu witulyankupai war̄ka kutjupa kutjupa t̄juta palumpa palyantjaku.

⁷ Panya Kurunpa Milmil̄tu nganananya kutju kutju war̄ka kutjupa kutjupa nintilpai Godaku palyantjaku, munu witulyankupai nganana anangu kutjupa t̄juta alpamilantjaku.

⁸ Panya Kurunpa Milmil̄tu anangu kutjupangka nintilpai paluru nintingu unngu kulintjaku, munu piruku paluru anangu kutjupangka nintilpai paluru ninti pulkaringkunyjtaku.

⁹ Munu Kurunpa paluru tu piruku anangu kutjupa rapalpai pulkara mulamularingkunyjtaku, munu piruku anangu kutjupangka nintilpai pikatjara palyarunguntjaku.

¹⁰ Munu Kurunpa paluru tu piruku anangu kutjupa ngapartji witulyankupai kutjupa kutjupa witulyatjarangku palyantjaku anangu t̄jutangu nyakula nguwan̄kurinytjaku. Munu piruku anangu kutjupa nintilpai Godaku t̄jukurpa t̄jakultjungkunyjtaku. Munu anangu kutjupangka paluru nintilpai nintingu ngurkantankunyjtaku nganalu Kurunpa Milmil̄ngatjarangku wangkanyi, munu nganalu mamutjarangku wangkanyi. Munu piruku anangu kutjupangka nintilpai wangka kutjupa wangkanytjaku. Munu anangu kutjupangka piruku nintilpai wangka kutjupa wangkanyangka kulira utira mat̄jakultjungkunyjtaku.

¹¹ Palu kutjupa kutjupa uwankara nyanganpa Kurunpa Milmil̄ta kutjunguru, panya Kurunpa paluru kutjungku mukuringkula nintilpai munu witulyankupai anangu kutju kutju.

Puntu Kutjunguru Kutju Warkarinytja

¹² Ka wanyu nyangatja kulila, panya anangu puntu kutju, palu kutjupa kutjupa winkitjara manyirka, kuru, pina, tjina, kutjupa kutjupa t̄jutatjara. Munu nganana Jesuku walytja t̄juta nyinanyi, palu nganana t̄junguringkula puntu kutju purunyarinyi, panya Christanya puntu purunypa.

¹³ Ka panya Kurunpa Milmil̄nga paluru kutju tu nganana kutjungka kutjungka t̄junguringkula nyinanyi, kala uwankara kutju tu nyinanyi puntu kutju purunypa, Jew t̄juta, munu Jew wiya t̄juta, wati mayatjaku mani wiya warkaripai t̄juta, munu walytja warkaripai t̄juta. Panya nganana uwankara baptise-arira Kurunpa palunyatjaratu nyinanyi, panya Godalu nganana kutju kutjungka Kurunpa kutju palunyatjara t̄jarpatjuna.

¹⁴ Palu kulilaya, panya nganampa puntu kutjutjara wiya palu kutjupa kutjupa t̄jutatjara, panya nganana manyirka, tjina, kuru, pina, munu kutjupa kutjupa t̄jutatjara ngaranyi.

¹⁵ Ka t̄jinguru t̄jinangu wangkaku, "Ngayulu manyirka purunypa ngaranytjikitja mukuringanyi. Palu ngalt̄utjara ngayulu tjina. Utina pat̄uringkuku puntungka t̄jungu ngaranytja wiya." Palu wiya, paluru pu tu alatji wangkanyi panya paluru tjina alatjitu munu puntungka t̄jungu alatjitu ngaranyi.

16 Ka tjinguru pinangku wangkaku, “Ngayulu kuru purunypa nyinanytjikitja mukuringanyi. Palu ngaltutjara ngayulu pina. Utina paturingkuku puntungka tjungu ngaranytja wiya.” Palu wiya paluru puṭu alatjirinyi panya paluru pina alatjitu munu puntungka tjungu alatjitu ngaranyi.

17 Kulilaya, tjinguru anangumpa kuru kutju ngaranyi kutjupa kutjupa tjuṭa wiyatjara, munu yaaltjingara paluru kulilku pina wiyangku? Munta tjinguru paluru pina kutju ngaranyi, munu yaaltjingara paluru walpa paṭinma mulya wiyangku?

18 Palu wiya, Godalu nganannya alatji nyinanytjaku palyantja wiya. Paluru nintingu alatjitu nganannya kutjupa kutjupa tjuṭatjara palyanu paluru mukuringkula.

19 Tjinguru anangumpa kuru kutju ngarama, palu palatja puntu mulapa wiya.

20 Uwa, anangumpa kutjupa kutjupa tjuṭatjara ngaranyi, manyirka, tjina, kuru, pina, palu uwankara kutjuringkula puntu kutju ngaranyi.

21 Ka kurungku puṭu manyirkangka wangkapai, “Nyaakun ngayula tjungu ngaranyi? Ara, ngayula tjungu ngaranytja wiya.” Ka piruku katangu puṭu tjinangka wangkapai, “Nyaakun ngayula tjungu ngaranyi? Ara, ngayula tjungu ngaranytja wiya.” Panya puntu kutju ngaranyi, kutjupa kutjupa tjuṭatjara.

22 Ka panya nganaṅa kulilpai puntungka unngu kutjupa kutjupa upa tjuṭa ngaranyi kunpu wiya panya tjuni, kirikiri, alu, kapulpa, munu ngukunypa kulu. Nyanga paluru tjana tjina purunypa warṅa pulka palyalpai wiya, palu tjana uwankaratu warṅa wiru palyalpai puntu winki pukulpa ngaranytjaku.

23 Ka panya maṅa munu tjunta munu kutjupa tjuṭa kulu nganaṅa kulilpai kumpilpa kanyintjikitjangku munula mantarangka tjuṭura kanyilpai.

24 Munula nganaṅa nyiku, manyirka, tjina, yunpa kutjupa tjuṭa kulu uti wantipai tjuṭangu nyakunyitjaku. Palu nyanga paluru tjana uwankarangku warṅa wiru palyalpai puntu winki pukulpa ngaranytjaku. Ka nganaṅa panya utitja tjuṭa wirura kanyilpai, yunpa, kuru, mangka, tjina, manyirka palunya tjananya, palu unngutja tjuṭa wirura warṅarinyangka kutju nganaṅa wanka pukulpa nyinapai, panya kutuṭu, kirikiri, alu, kapulpa tjana wiyaringkunyangka nganaṅa ilupai.

25 Uwa, paluru panya nganannya puntu wiru palyanu kutjupa kutjupa tjuṭatjara nganaṅa palunya tjananya wirura atunymara kanyintjaku. Kala uti palu purunytju Jesuku walytja tjuṭangu tjungungku nyinara wangkara kulinma, munulanku mukulyangku atunymanama.

26 Tjinguru anangu kutjupa kata pikatjarangkuku munu paluru tjituru-tjitururiku. Ka tjinguru anangu kutjupa yunpa wiru ngaranyangka nyakulaya palunya wirunmankuku, ka paluru ipilyarira pukulariku. Palu purunytjulanku uti Jesuku walytja tjuṭangu tjungungku nyinara kulinma.

27 Ka palu purunypa nyura tjungu ngarala Christanya puntu purunypa nyinanyi. Panya anangu kutju manyirka purunypa nyinanyi, ka kutjupa tjina purunypa nyinanyi, kutjupa kuru purunypa

nyinanyi. Panya uwankarala kutjupa kutjupa, palu tjunguringkulala Christanya puntu purunypa nyinanyi.

²⁸ Ka panya Godalu palumpa walytja tjuṭa ngurkantara tjunu warḱa kutjupa kutjupa palumpa palyantjaku, nyanga alatji nganmanytju paluru wati kutjupatjara ngurkantara tjunu paluru panya iyan-tja tjuṭa munu tjananya witura iyanu tjukurpa palumpa para-wangkanytjaku. Munu palulanguru paluru anangu kutjupa tjuṭa ngapartji palu purunypatu ngurkantara tjunu palumpa wangkat-jara tjuṭa, munu palula malangka kutjupa tjuṭa ngapartji ngurkan-tara tjunu tjukurpa nintilpai tjuṭa. Munu palulanguru kutjupa tjuṭa ngapartji ngurkantara witulyanu warḱa kutjupa kutjupa tjuṭa palyantjaku. Munu paluru kutjupa tjuṭa ngurkantara tjunu miracle tjuṭa witulyangu palyantjaku, munu kutjupa tjuṭa ngurkantara tjunu pikatjara tjuṭa palyarunguntjaku, munu piruku kutjupa tjuṭa tjunu Jesuku walytja tjuṭa alpamiltjaku, munu kutjupa tjuṭa tjunu tjananya tjukarurungku atunymankunytjaku, munu kutjupa tjuṭa tjunu wangka kutjupa wangkanytjaku.

²⁹ Ka nganana uwankaratu Jesulu iyantja tjuṭa nyinanytja wiya, palu kutjupatjara kutju Godalu ngurkantanu iyantja tjuṭa nyinanytjaku. Munula uwankaratu wangkatjara nyinanytja wiya, palu kutjupat-jara kutju paluru ngurkantanu wangkatjara nyinanytjaku. Munula uwankaratu tjukurpa nintilpai nyinanytja wiya, palu kutjupatjara kutju paluru ngurkantanu palumpa tjukurpa wangkara nintintjaku. Munula uwankaratu miracle tjuṭa palyalpai nyinanytja wiya, kutjupa tjarangu kutju palyalpai.

³⁰ Munula uwankaratu pikatjara palyarungulpai nyinanytja wiya, palu kutjupa tjarangu kutju palyarungulpai. Munula uwankaratu wangka kutjupa wangkapai nyinanytja wiya, palu kutjupa tjarangu kutju wangka kutjupa wangkapai. Munula uwankaratu wangka kutjupa wangkanyangka kulira utira wangkapai nyinanytja wiya, palu kutjupa tjarangu kutju utira wangkapai. Panya Godalulanya tjunu nganana kutjungku kutjungku kutjutu palyantjaku warḱa kutjupa kutjupa.

³¹ Uwa, pulkaraya mukuringama Kurunpa Milmilṭu nyuranya pulkara mulatu nintintjaku munu witulyankunytjaku Godaku warḱa pulka mulapa palyantjaku.

Yaaltji-yaaltji Mukulya Nyinanytja?

Palu kuwarina nyuranya ara kutjupa wiru mulapa tjakultjunanyi nyura wanganarangu kulira palyantjaku.

13

¹ Utila mukulya mulapa nyinama. Panya ngayulu tjinguru wangka kutjupangu wangkapai nyinanyi, tjinguru angelpa tjuṭaku wangka purunypa. Palu mukulya wiyangu wangkanyangkaniya alatji kulilku, "Wiya, palangu tjukurpa mulapa wangkanytja wiya, panya ilding-ildingaringangkala unytjungku kutju kulilpai, palu purunypa palumpa wangka ngaranyi tjukurpa mulapa wiya."

² Munta, tjinguru ngayulu Godaku tjukurpa tjakultjunkupai nyinanyi Kurunpa Milmilṭu nintinnyangka. Mununa tjinguru ngayulu ninti pulka nyinanyi, mununa Godaku tjukurpa kumpilitja uwankara kulini.

Mununa tjinguru ngayulu Godaku pulkara mulamularingkupai nyinanyi mununa rapangku wangkaku murpu pulka kitikitingkunyjaku, ka mulapa urira kitikitingkuku. Palu tjinguru warka nyanga palunya tjananya ngayulu mukulya wiyangku palyarampa ngayulu unytju kutju warkarinyi.

³ Tjinguruna ngayulu kanyintja uwankara tjalamilara mani mantjira uwankara ma-ungkuku ngaltutjara tjuta tjana paltja nyinanytjaku. Palu tjinguru ngayulu mukulya wiyangku unukulampa ngayulu unytjungku kutju unganyi. Munta tjinguruni kutjupa tjtjangku ngayunya Jesunya wanannyangka warungka waninytjikitjangku witi, kana ngulu wiya rapa ngaranyi. Palu tjinguru ngayulu mukulya wiya ngaralampa ngayulu unytju kutju raparinganyi.

⁴ Panya mukulya mulapa nyinapainya nyanga alatji, atatjura kulira wangkapai mirpanarinytja wiyangku, munu anangu tjtaku ngalturingkupai, kutjupa kutjupa-tjiratja nyararingkupai wiya, walytjangku wangkara mirawanipai wiya, munu kanany-kananyaripai wiya.

⁵ Munu mukulya nyinapailu pika-pikangku wangkapai wiya purkarangku wangkapai, munu palurunku kutju walytjangku atunymankupai wiya kutjupa tjuta kulu atunymankupai, munu paluru mapalku waruringkupai wiya. Uwa, mukulya nyinapailu rawangku kulilpai wiya kutjupangku palunya kurantjitjanguru.

⁶ Munu mukulya nyinapailu kura palyannyangka nyakula tjturu-tjtururipai pukularinytja wiya, palu tjukarurungku palyannyangka kutju paluru nyakula pukularipai.

⁷ Mukulya nyinapainya anangu kutjupaku titutjara pulkara mukur- ingkupai wantinytja wiya. Munu tjinguru kura palyannyangka nyakula palumpa rawangku patalpai paluru malaku palyaringkuny- ytjaku, munu palunya wantinytja wiyangku mulamulangku kulilpai, "Wiya kuwari paluru palyaringanyi."

⁸ Anangu mukulya nyinapainya titutjara mukulya nyinapai wiyaringkuwiya. Panya kuwari Kurunpa Milmiltu kutjupa tjtangka nintilpai Godaku tjukurpa anangu tjtangka wangkanytjaku, palu ngula paluru piruku tjanala alatji nintintja wiyaringkuku. Kuwari paluru kutjupa tjtangka nintilpai wangka kutjupa wangkanytjaku, palu ngula paluru piruku tjanala alatji nintintja wiyaringkuku. Kuwari paluru kutjupa tjtangka nintilpai paluru tjana ninti pulkaringkuny- ytjaku, palu ngula paluru tjanala alatji piruku nintintja wiyaringkuku. Palu nyangatja paluru tjananya rawangku nintilku panya mukulya pulka titutjara nyinanytjaku.

⁹ Panya kuwari Kurunpa Milmiltu nganana tjukutjuku nguwanpa utini ngana- kulintjaku. Munu tjukurpa tjukutjuku nguwanpa nganana utini kutjupa tjtangka tjakultjunkuny- ytjaku.

¹⁰ Palu ngula uwankara wiruringkuny- ytjaku ngana- pu- kulintja wiyaringkuku, munula uwankaraku ninti nyinaku.

¹¹ Panya nganmanypala tjtji nyinaralpi tjtji purunytju wangkapai munu kulilpai, munula tjtji purunypa mukuringkupai. Palu anangu pulkaringkulala tjtji purunypa nyinanytja wiyaringkupai.

¹² Panya kuwarila Godanya pu- uti nyanganyi kalawatja ruwangka purunypa. Palu ngulala palunya ilangku uti nyakuku. Kuwarila

Godanya putu nguwanpa kulini, palu ngulala palunya ilangku nyakula ninti mularariku. Panya Godanya nganampa ninti pulka nyinanyi, palu purunypa nganana ngula palumpa ninti mularariku munula ninti pulka nyinaku.

¹³ Uwa, tjukurpa pulka mankurpa ngaranyi nyanganpa: utila Godaku mulamularingama, munula uti palumpa pukultu kulil-kuliltu nyinara patanma, munula uti anangu tjutaku mukulya pulka nyinama. Palu tjukurpa nyanga malatja pulka mulapa kutjupa nyanga kutjarangka waintarinytja, panya anangu tjutaku mukulya nyinanytjaku.

14

Kurunpa Milmiltu Nintinnyangka Nyanga Alatji Palyantjaku

¹ Uwa, rawangkuya kulinma mukulya nyinanytjikitjangku. Munuya Kurunpa Milmilku mukuringamatu paluru nyuranya kutjupa kutjupa tjuta nintintjaku, ka nintinnyangka nyura witulyangu palyalku. Munuya pulkara mukuringama Kurunpa Milmiltu nyuranya tjunkunytjaku Godaku wangkatjara nyinanytjaku, ka nyura palumpa tjukurpa anangu tjutangka tjakultjungkuku Kurunpa Milmiltu nintinnyangka.

² Panya kutjupangu wangka kutjupa wangkara anangu tjutangka wangkanytja wiya, Godala kutju wangkanyi. Ka anangu tjutangku putu kulini panya paluru tjukurpa kumpilitja wangkanyi Kurunpa Milmiltu nintinnyangka palunya kutju.

³ Palu wati panya wangkatjarangu anangu tjutangka Godaku tjukurpa uti wangkapai, munu tjananya uwankara wangkara kurunpa rapalpai Jesunya tungun-tunguntu wanantjaku, munu tjinguru upa nyinanyangka kunpulpai, munu tjituru-tjituru nyinanyangka pukulmankupai.

⁴ Panya kutjupangu wangka kutjupa wangkara palurunku kurunpa rapani Jesunya tungun-tunguntu wanantjikitjangku. Palu panya wangkatjarangu Jesuku walytja tjutangka Godaku tjukurpa wangkara palunya tjananya uwankaratu kurunpa rapani Jesunya tungun-tunguntu wanantjaku.

⁵ Uwa, ngayulu mukuringanyi nyura uwankarangku wangka kutjupa wangkanytjaku. Palu pulkarana mukuringanyi nyura Godaku wangkatjara tjuta nyinanytjaku, palumpa tjukurpa anangu tjutangka tjakultjunkunytjaku. Wangka kutjupa wangkanytjaku palya ngaranyi, palu Godaku tjukurpa tjakultjunkunytjaku warka wiru mulapa ngaranyi wangka kutjupa wangkanytjitjangka munka mulapa. Palu kulila, anangu panya utira wangkapainya nyurala nyinanyangka kutju wangka kutjupa wangkama. Panya anangu nyara paluru nyinanyi nyura wangka kutjupa wangkanyangka utira wangkanytjikitja, Jesuku walytja uwankarangku kulira raparingkula palunya tungun-tunguntu wanantjaku.

⁶ Uwa walytja tjuta, tjinguru ngayulu ma-pitjala nyurala wangka kutjupa wangkaku, ka nyura wanyu kulira kurunpa raparingkuku? Wiya, nyura putu kulilku ngayulu alatji wangkanyangka. Palu panya Godaku tjukurpa ngayulu uti wangkanyangka kutju nyura kulira

kurunpa pukulariku. Tjinguruna Godalu tjukurpa ngayula utin-nyangka nyurala tjakultjunkuku, munta tjinguruna Godaku tjukurn-guru nyakula utira wangkaku. Ka nyura tjukurpa uti kulira raparingkuku palunya tungun-tunguntu wanantjikitja.

⁷ Tjinguru kutjupangku kita wangkatjingalku ngurpangku, kaya kutjupa tjutangku putu mayu kulilku inma tjukarurungku inkanytjik-itjangku.

⁸ Munuya palu purunypatu ara nyangatja kulu kulinma. Panya wati tjaultji kutjungku turampata mayu tjukarurungku puura wangkatjingga-nyangka tjaultji kutjupa tjutangku kulilpai pika ankunytjikitjangku munuya kulira pitjapai munuya tjunguringkupai. Palu tjinguru turampata mayu kutjupa nguwanpa wangkatjingannyangkaya putu kulira watarku nyinaku.

⁹ Ka palu purunypatu ngaranyi alatji, tjinguru ngayulu wangka kutjupa wangkanyangka kutjupa tjutangku putu kulilku munuya alatji wangkaku, "Tjukurpa nyaa nyanganku wangkanyi?"

¹⁰ Panya manta winkingkala wangka kutjupa kutjupa nyinanyi, munula wangka nganampa wangkanyangka kutju uti kulilpai.

¹¹ Kana tjinguru anangu malikitjangku wangka kutjupangku wangkanyangka ngayulu putu kulilku, mununa alatji wangkaku, "Nyaa nyanganku wangkanyi?" Kani paluru ngapartji pututu kulilku ngayulu wangka walytjangku wangkanyangka, panya paluru ngali malikitja kutjara munuli wangka kutjupa kutjupa wangkapai.

¹² Ka nyura panya pulkara mukuringkupai Kurunpa Milmilu nyuranya nintintjaku kutjupa kutjupa tjuta nyura witulyatjarangku palyantjikitja. Palulanguruya kurunpa winkingku kulinma Jesuku walytja tjuta rapantjikitjangku tjana palunya tungun-tunguntu wanantjaku.

¹³ Tjinguru nyuntu Kurunpa Milmilu nintinyangka wangka kutjupa wangkapai. Uti nyuntu palula tjapinma nyuntula utintjaku anangu tjutangka utira tjakultjunkunytjikitjangku.

¹⁴ Panya ngayulu wangka kutjupa wangkara Godala kuruntu wangkanyi, kani paluru kulini. Palu ngayulu walytjangku putu kulini pinangku, panya ngayuku wangka wiya palatja.

¹⁵ Kana nyaalku putu kulintjatjanungku? Kuruntu kutjuna wanyu tjapilku wangka kutjupa wangkara? Wiya, ngayulu kutjupa-ara pinangku kulu kulira tjapilku wangka walytjangku. Mununa wanyu kuruntu kutju inma inkama wangka kutjupangku inkara? Wiya ngayulu kutjupa-ara pinangku kulu kulira inkaku wangka walytjangku.

¹⁶ Ka tjinguru nyuntu inmangka nyinara wangka kutjupa wangkara kuruntu kutju Godanya walkuni. Ka nyuntula ititjangku wanyu nyuntunya kulira palu purunypatu Godanya mirawaniku? Wiya, paluru putu kulini, panya nyuntu wangka kutjupa wangkara walkuni, ka Godalu kutjungku nyuntunya kulini.

¹⁷ Uwa, palya nyuntu Godanya walkuni wangka kutjupa wangkara, palu anangu kutjupangku putu kulini muni nyuntunya kulintjatjanu putu raparinganyi Jesunya tungun-tunguntu wanantjikitja.

¹⁸ Uwa, ngayulu Godanya walkuni, panya paluruni pulkara nintinu wangka kutjupa wangkanytjaku nyurala waintara nguwanpa.

19 Palu inmangka tjunguringkulana anangu tjuangka wangka kutjupa wangkanytja wiya, wangka utingkuṅa wangkapai. Panya ngayulu wangka utingku tjukutjuku wangkanyangkaya mapalku kulilku, palu ngayulu wangka kutjupa rawa mulatu wangkanyangkaya kulintja wiya alatjitu. Palula-tawarana wangka uti wangkapai tjananya nintintjikitja, tjana uti kulintjaku.

20 Uwa walytja tjuṭa, uti nyura iti purunypa nyinama panya iti tjuṭa kura palyalpai wiya nyinanyi, palu purunypa nyura kura wiya nyinama. Munuya tjitji tjuṭa kulū kulinma panya paluru tjana ngurpa, uwankaraku ninti wiya, ka nyura paluru tjana purunypa nyinanytja wiya, munuya nintiriwa nintipuka nyinanytjikitja kulintja tjukaruru mulapa.

21 Panya nyiringka iriti walkatjunkunytja alatji ngaranya Godalu wangkanytja,

“Ngayulu anangu malikitja tjuṭa wangka kutjupa wangkapai tjuṭa witulku ngayuku tjukurpa tjana wangkanytjaku ngayuku anangu tjuṭangka, kaya tjana ankula tjakultjunkuku.

Palu paluru tjana kulintja wiyangku alatjitu wantiku.” *

22 Uwa, nyura wangka kutjupa wangkanytja ngunti pulkara mirawanipai. Tjinguru anangu kutjupangku pitjala Jesuku walytjangu wangka kutjupa wangkanyangka kulira anangu nyara paluru puṭu tjukarurungku kulilku, munu puṭu Godaku mulamularingkuku. Palu Jesuku walytjangu Godaku tjukurpa uti tjakultjunkunyangka kutju paluru uti kulintjatjanu mulamularingkuku munu Godanya mirawaniku.

23 Tjinguru nyura Jesuku walytja tjuṭa inmangka tjunguringkula wangka kutjupangku wangkaku, ka anangu kutjupa tjuṭangu tjarpala kulilku munuya wangkaku, “Nyaaringanyiya nyanganpa? Kawakawaringuya.”

24 Palu tjinguru nyura tjunguringkula Kurunpa Milmiltu nintinyangka Godaku tjukurpa uti tjakultjunkuku, ka anangu mankurpa kutjupa watarkitja tjarpala nyinakatiku munu Godaku tjukurpa uti wangkanyangka kulintjatjanu kuntaringkuku paluru tjana kura palyantjatjanu.

25 Panya paluru tjana unngu kumpilpa kulintja uwankara wangkara utinnyangkaya paluru tjana kulira kuntaringkuku munuya Godanya walkulku wangkara, “Mulapa Godanya nyanga tjana ngaranya.”

Inmangka Tjunguringkula Tjukarurungku Palyantjaku

26 Uwa walytja tjuṭa, nyura Godanya walkuntjikitjangu tjunguringkula uti nyanga alatji palyanma. Uti kutjungku inma inkama. Ka kutjupangku Godaku tjukurpa utira nintinma. Ka kutjupangku tjakultjunama tjukurpa Godalu palula utinnyangka. Ka kutjupangku wangka kutjupa wangkama, ka kutjupangku wangka palunya kulira utira anangu tjuṭangka tjakultjunama. Nyanga palu purunypaya ngapartji-ngapartjingu palyanma Jesuku walytja uwankarangu kulira kurunpa raparingkula Jesunya tungun-tunguntu wanantjaku. Nyanga alatjiya rawangku palyanma.

27 Ka kutjupa tjuṭa tjinguru mukuringanyi wangka kutjupangku wangkanytjikitja. Palu uti tjuṭangu wangkawiyangku mankurtu

* 14:21 Aitjayaku 28:11-12

kutju wangkama ngapartji-ngapartjingu. Ka uti kutjupangku paluru tjana wangkanyangka kulira anangu tjutangka utira tjakultjunama Kurunpa Milmilu palula unngu utira nintinnyangka.

²⁸ Palu tjinguru kulira utira tjakultjunkturupainya nyinanytja wiya ngaranyangkampa uti wangka kutjupa wangkapainya inmangka pilunpa nyinama pakara wangkanytja wiya, munu walytjangku kutju tjaalymara wangkama, ka Godalu kutjungku palunya kulinma.

²⁹ Ka uti Godaku wangkatjara kutjarangku munta mankurtu Godalu wangkanyangka kulintjatjanungku palumpa tjukurpa tjakultjunama, kaya kutjupa tjutangu uti purkarangku kulinma tjana wangkanyangka alatji ngurkantankunytjikitjangku tjinguruya tjukarurungku wangkanyi munta tjinguruya ngunti wangkanyi.

³⁰ Ka tjinguru wangkatjarangku Godaku tjukurpa ngarala wangkanyi, ka paluru wangkanyangka Kurunpa Milmilu tjinguru anangu kutjupangka nintilku tjukurpa kutjupa. Ka uti nganmanytju nyara wangkanytjalu nyinakatira kulinma, ka kutjupangku ngapartji pakara Godaku tjukurpa nintinnyangka tjakultjunama.

³¹ Uwa, nyura wangkatjara tjutangu Godaku tjukurpa ngapartji-ngapartjingu tjakultjunama, kaputu winkingku pakara wangkanytja wiyangku. Kaya anangu winkingku tjukurpa uti kulilku kutjungku kutjungku wangkanyangka, munuya kulira nintiringkula kurunpa raparingkula pukulariku.

³² Panya Kurunpa Milmilu wangkatjara tjutangka utilpai Godaku tjukurpa tjakultjunkturuntjaku, kaya paluru tjana walytjangku kulilpai wangkanytjikitjangku, tjinguru kuwaritu wangkanytjikitjangku, munta tjinguru ngula.

³³ Godanya wanyu mukuringanyi nyura uwankarangku kinkinmara wangkanytjaku? Wiya, Godanya mukuringanyi nyura ngapartji-ngapartjingu purkarangku wangkanytjaku inma wiru mulapa ngaranytjaku. Panya Jesuku walytja tjutangkuya ngura winkingka inmangka tjunguringkula alatji palyalpai.

³⁴ Uwa, inmangka tjunguringkula nyinanyangkaya minyma tjuta markunma kinkinmankunytja wiyangku pilunarira kulintjaku, panya Moseku tjukurta alatji ngaranyi kaya uti wanganarangku kulinma.

³⁵ Munuya uti paluru tjana kutjupa kutjupa putu kulirampa ngula ngurangka tjapinma tjanampa kuringka, ka tjanala utira tjakultjunkturuku. Panya minyma tjutangu inmangka nyinara kinkinmara wangkara inma kuralpai.

³⁶ Tjinguru nyura kutjupa tjarangku alatji kulini, "Godaku tjukurpa nganaala-warara nganmanypa wirkanu." Munta tjinguru nyura alatji kulini, "Godaku tjukurpa nganaala kutju wirkanu kutjupa tjutangka wirkankunytja wiya."

³⁷ Ka tjinguru kutjupa tjarangku kulini, "Nganaa Godaku wangkatjara tjuta, panya paluru wangkanyangkala kulira tjakultjunkturupai." Munta tjinguru paluru tjana alatji kulini, "Kurunpa Milmilulanya ngananyanya nintinu kutjupa kutjupa tjuta palyantjaku." Palu uti paluru tjana kulinma panya nyangatja ngayulu walkatjunanyi Godalu ngayunya utira wangkanyangka.

³⁸ Palu paluru tjana tjukurpa nyanganpa kulilwiyangku wantinyangkampa nyura ngapartji palula tjanala kulintja wiyangkuṭu wantima.

³⁹ Uwa walytja tjuṭa, kurunpa winkiya mukuringama Godalu wangkanyangka kulira tjakultjungkunyjtikitja. Munu wangka kutjupa wangkanyangkaya paintja wiyangku wantima.

⁴⁰ Uwa, inma wiru mulapa kanyintjikitjangkuya kutjupa kutjupa uwankara ngapartji-ngapartjingku palyanma, panya ngayulu kuwari nyurala wangkanytja. Uti kutjungku inma inkama. Ka kutjupangku Godaku tjukurpa utira nintinma. Ka kutjupangku tjakultjunama tjukurpa Godalu palula utinnyangka. Ka kutjupangku wangka kutjupa wangkama, ka kutjupangku wangka palunya kulira utira anangu tjuṭangka tjakultjunama.

15

Tjukurpa Palya Jesunyatjara

¹ Uwa walytja tjuṭa, ngayulu mukuringanyi nyura rawangkuṭu Tjukurpa Palya kulintjaku panya ngayulu nganmanytju nyurala tjakultjunangi tjukurpa panya Jesunyatjara, ka panya nyura pukulṭu kuliningi munu panya nyura titutjarangku wanangingi palunya.

² Ka nyura tjukurpa nyara palumpa mulamularingkanyangka Godalu nyuranya wankarunu. Palu uti nyura tungun-tunguntu wanama wantinytja wiyangku, ka nyuranya titutjarangku kanyilku. Palu tjinguru nyura tjukurpa ngayulu wangkanytja wantira tjukurpa ngunti kulirampa unytju kutju mulamularingangi.

³ Palu tjukurpa nyangatja ngalya-ngalya wiya mulamula ngaranyi, panya Mayatjalu ngayula wangkanytjitja kutjuna nyurala nganmanytju tjakultjunu. Ka tjukurpa nyanganpa pulka mulapa ngaranyi alatji,

Panya Jesunya nganampa ngalkilpa anga-ilungu nganana kura tjuṭa palyantjitjanguru,
panya alatji nyiringka iriti walkatjungkunyitja ngaranyi.

⁴ Ka panyaya ilunyangka palunya kulpingka tjunu,
ka Godalu palunya wankara pakaltjinganu munga kutjara wiyaringkula,
panya alatjirinytjaku wangkatjara tjuṭangku nyiringka iriti walkatjunu.

⁵ Ka Jesunya ilunytjatjanu pakara Peterla utiringu munu nintintja panya kutjupa tjuṭangka kulu.

⁶ Palulanguru tjanala piruku utiringu palumpa mulamularingkupai kutjupa tjuṭangka kulu anangu winkingka 500-ngka,
kaya utulungku nyangu.

Ka anangu nyara paluru tjana kuwari wankaṭu nyinanyi,
ka mankurpa kutju ilungu.

⁷ Ka Jamesalu kulu nyangu palula utiringkunyangka.
Kaya palulanguru iyantja kutjupa tjuṭangku kulu utulungkuṭu nyangu uwankarangku.

⁸ Ka palula malangka paluru ngayulalpi mala utiringu. Panya kutjupara minyamongku iti mala kutju kanyilpai, palu purunypa ngayulu mala kutju Jesuku walytjaringu.

⁹ Uwa, ngayulu Jesulu iyantja nyinanyi, palu iyantja panya kutjupa tjuta Peternya tjana tjukurtjara pulka nyinanyi ngayula munkara. Ka ngayulu tjukutjuku mulapa nyinanyi, panya ngayulu nganmanytju pikangku wataparalpai Godaku walytja tjuta.

¹⁰ Kani Godalu ngaltunytju pulkangku kampa kutjupanu kana kampa kutjuparira palunya wananingi. Mununa palulanguru kampa kutjuparinytjatjanungku palumpa wara pulka mulapa palyaningi tjukurtjara kutjupa tjutangka munkara. Palu ngayulu walytjangku kulira palyantja wiya. Godalu ngaltunytju pulkangku ngayunya kampa kutjupanu, kana palumpa wara pulkara palyaningi.

¹¹ Uwa, tjinguru nyura tjukurpa ngayulu wangkanytjitja kulinu, munta tjinguru kutjupa tjutangka nyurala tjakultjunu, ka nyura kulinu. Palu palya, panya uwankarankutula tjukurpa palunya tu wangkapai. Ka nyura tjukurpa pala palunya kulintjatjanu mulamularingu.

Miri Wanka Pakantja

¹² Uwa, nganana panya tjakultjunkupai Mamalu Christanya ilunytja pakaltjingantja. Ka nyura kutjupa tjarangku panyatja nyaaku wyanmankupai anangu ilunytjitja pakantja wangkanyangka?

¹³ Tjinguru mulapa anangu ilunytjatjanu pakantja wiya ngaranyangkampa, Christanya kulu ilunytjatjanu pakantja wiya ngarama. Palu panya Christanya ilunytjatjanu pakanu alatjitu, ka anangu tjuta kulu ilunytjatjanu pakalku.

¹⁴ Palu tjinguru Christanya ilunytjatjanu pakantja wiya ngaranyangkampa nganana tjukurpa palunytjara tjakultjunkunytjaku wiyatu ngarama, ka nyura unytjulta mulamularingama.

¹⁵ Panya nganana nyurala tjukurpa tjakultjunkula wangkapai Mamalu Christanya ilunyangka pakaltjingantja, ka nyura tjinguru kulilpai nganana ngunti wangkanyangka-palku. Palu tjinguru Godalu anangu ilunytjitja tjuta pakaltjingantja wiya ngaralampa paluru nganmanytju Christanya pakaltjingantja wiyatu.

¹⁶ Tjinguru anangu ilunytjatjanu pakantja wiyangka, Christanya kulu pakantja wiyatu ngarima.

¹⁷ Ka tjinguru Christanya pakantja wiya miri kutju ngarinyangkampa nyura palumpa unytjulta mulamularingama nyuranya wankarunkunytjaku-palku, ka panya nyurampa kuranguru Godalu nyuranya pungkunytjaku alatjitu ngarama.

¹⁸ Ka tjinguru Christanya pakantja wiya miri kutju ngarinyangkampa palumpa walytja tjuta nganmanypa ilunytjatjanu titutjara ilura ngarima pakantja wiya alatjitu.

¹⁹ Uwa, tjinguru nyura alatji kulilpai, "Christalu nganananya nyanga mantangka kutju wanka atunymara kanyini, munulanya ilunyangka wankara pakaltjingantja wiya." Palu wiya, tjinguru nyuntu nganana alatji ngunti kulirampa ngaltutjara mulapa nyinaku.

²⁰ Palu mulapa Christanya ilunytjatjanu pakanu. Godalu palunya-warara pakaltjinganu, kala palulanguru kulini mulapa paluru Jesuku walytja ilunytjitja tjuta kulu pakaltjingalku.

²¹ Panya wati kutjunguru uwankara ilupairingu, munula palu purunypatu wati kutjunguru ilunytjatjanu pakalku.

²² Panya wati Adamalu Godala tungunpungkula kura palyanu munu ilungu, ka panyala nganana ngapartji Adamalanguru uwankaratu ilupairingu. Palu panya Christalu Godala wanganarangku kuliningi munu paluru ilunyjtjanutu wankaringkula pakanu, kala nganana ngapartji Christalanguru ilunyjtjanu pakalku.

²³ Panya Christanya-warara puntu winki ilunyjtjanu pakanu, kala palumpa walytja tjuta ngapartji ngula puntu winkitu pakalku Jesunya malaku pitjanyangka.

²⁴ Ka nyara palula malangka manta ilkari wiyaringkuku, ka palulanguru Christalu mayatja witulyatjara uwankara wiyalku, munu mayatja mantatja tjuta, ilkaringka para-ngarapai tjuta, mamu tjuta kulu pungkula alatjitu wiyalku, Godaku panya mirpantju tjuta. Munu palulanguru uwankara wiyantjtjanungku paluru palumpa walytja tjuta Mama Godanya ungkuku, ka paluru uwankaralta mayatjangku atunymara kanyilku.

²⁵ Panya Christanya nganampa mayatja pulka rawa nyinakatinyi Godalu palumpa mirpantju tjuta wiyantjaku patara tjintu panya malatjangka.

²⁶ Ka nyara palula-arangka Godalu nganananya ilunyjtaku-tawara wankarunanyi. Panya nganana nganampa mirpantju tjutaku nguluringkupai, palu purunypa nganana ilunyjtja kulira nguluringkupaitu. Ka panya Godalu nganampa mirpantju tjuta uwankara wiyani, palu purunypa paluru nganananya ilunyjtaku-tawara wankarunkuku titutjara wanka nyinanytjaku wiyaringkunyitja wiya alatjitu.

²⁷ Panya nyiringka iriti walkatjunkunyitja ngaranyi alatji, "Godalu uwankara tjunu Christala tjinangka paluru tjananya mayatja pulkangku kanyintjaku." *

Uwa, mulapa Godalu uwankara tjunu Christalu palunya tjananya mayatjangku kanyintjaku, palu paluru palunya mayatja tjunkunyjtjanu tjaruringkunyitja wiya Christalu palunya kulu tjungura mayatjarira kanyintjaku. Wiya, mulapa Godalu pulka mulapa nyinara uwankara palula tjunu paluru tjananya mayatjangku kanyintjaku.

²⁸ Ka palulanguru uwankara mayatjarira kanyintjtjanungku paluru katjangku Mama Godanya pupakatira walkuni. Panya Godanya mulapa uwankaraku mayatja pulka nyinaku titutjara.

²⁹ Palu ngura palangka kunyu Jesuku walytja kutjupa tjuta baptise-katinytja wiya nyinara ilunyi, ka kunyu nyura tjananya putu nganmanytju baptise-katinytjtjanungku anangu kutjupa tjuta baptise-katinyi miri pala palumpa tjanampa arangka. Palu tjin-guru anangu tjuta ilunyjtjanu wankaringkula pakantja wiya ngaranyangkampa nyura unytjungku kutju tjananya baptise-katinyi miri tjutaku arangka.

³⁰ Ka panya Godaku mirpantju tjutangku nganananya iluntankunyjtikitjangku rawangku kukanymananyi Jesuku tjukurpa wangkanyangka. Kala nyangatja nyaaku rawangku tjukurpa tungun-tunguntu wangkarinanyi? Panya ilurala kunyu pakantja wiya ngaraku, panya nyura alatji wangkapai. Palu wiya, nganana ninti panya nganana ngula ilunyjtjanu pakalku alatjitu, kala

* 15:27 Psalm 8:6

nyara palunya kulira ngana ngulu wiyangku rapangku tjukurpa wangkarinkupai.

³¹ Palu walytja tjuṭa, ngayulu mulamulangu nyangatja wangkanyi tjukarurungku, panya tjintu tjuṭangkuniya ngayunya nguwanpa iluntanangi tjukurpa Christanyatjara tjakultjungkunyaangka. Palu panya ngayulu tjukurpa nyurala tjakultjungkunyaangka nyura uwankara Mayatja Jesuku Christaku walytjaringu. Nyara palulanguruna pulkara pukularinyi mununa rapangku tjukurpa tungun-tunguntu wangkarinkupai ilunytja kulira nguluringkunytja wiyangku.

³² Palu ngura nyanga Ipitjalaniya ngayunya pauntjinalpai papa pikati tjuṭa purunytju. Kana ngayulu tungun-tunguntu alatjitu tjukurpa Jesunyatjara wangkapai panya ngayulu munkaritja rawangku kulilpai ilunytjatjanu pakantja. Palu tjinguru anangu ilunytjatjanu pakantja wiya ngaranyangkampa ngayulu unytjulta warkarima, mununa tjinguru tjukurpa wangkawiyangku wantima. Panya anangu tjuṭangku alatji wangkapai, "Wanyula tjikira ngalkula walytja pukularinytjikitjangku kutju kulinma, panya mungawinkila tjinguru ilura wiyaringkuku." Tjinguruna nyanga alatji kulirampa nyurala tjukurpa tjakultjungkunytja wiyangku wantima.

³³ Palu nyangatja tjukurpa tjukaruru wiya. Panya anangu tjuṭangku alatji wangkapai, "Anangumpa kura palyalpai tjuṭangka tjunguringkulampa tjananya purunyariku." Palulanguru nyura uti ngunti wangkapai tjuṭangka kulira wantima nyuranya ngunti kurantjakutawara.

³⁴ Kaya palula-tawara atatjura kulinma munuya kura palyantja wiyangku wantima alatjitu. Uti nyura ngunti kulintjatjanu kunṭaringama munu tjukarurungku kulinma, panya nyurala tjungu kutjupatjara nyinanyi Godaku ngurpa.

Puntu Nyaala Mantjilku Ilunytjatjanu Pakara

³⁵ Tjinguru kutjupangku tjapilku, "Yaaltji-yaaltjingu Godalu anangu ilunytja tjuṭa pakaltjinalgku? Kaya anangu paluru tjana puntu nyaa purunytjara pakalku?"

³⁶ Wiya wanyuya kulila, panya anangungku uninypa mantangka unngu tjarpatjungkupai, ka uninypa paluru wanyu titutjara paluruṭu ngaripai? Wiya, paluru ilunytja purunypa ngaripai munu palulanguru ngula miri wantikatira uninypa panya palulanguru kutjupa kuwaritja pakara nyalpitjararingkupai.

³⁷ Panya uninypa kutju tjarpatjungkupai tjinguru wiita munta tjinguru uninypa kutjupa kutjupa, palu manta unngu nyalpi tjarpatjungkupai wiya, uninypa kutju tjarpatjungkupai, ka ngula ukiri pakalpai uninypa panya palulanguru munu nyalpitjararingkupai.

³⁸ Panya Godalu nganmanytju kulira uninypa kutjupa kutjupa tjuṭa palyanu palula tjanalanguru punu walytja walytja pakantjaku.

³⁹ Ka palu purunypa ngaranya iltjanpa kutjupa kutjupa. Panya Godalu palyanu anangu iltjanpatjara, munu kuka tjuṭa mauntalpa palyanu iltjanpa kutjupa kutjupa, munu tulpu tjuṭa kulu mauntalpa palyanu iltjanpa walytjatja-tjara, munu antipina kulu. Nyanga palunya tjananya uwankara Godalu mauntalpa mauntalpa palura tjunu iltjanpa walytjatja-tjara nyinanytjaku.

⁴⁰ Kaya angelpa tjuṭa ilkarīngka nyinanyi puntu ilkaritjatjara, ka nganaṇa mantangka nyinanyi puntu mantatja-tjara. Panya Godalu angelpa tjuṭa tjunu puntu wirutjara ilkarīngka nyinanytjaku, munu nganaṇanya tjunu puntu wirutjaraṭu nyanga mantangka nyinanytjaku ilkarīngka wiya.

⁴¹ Ka panya tjirirpi, pira, kililpi tjuṭa uwankara irnyalpai wiru ngaranyi, palu paluru tjana mauntalpa mauntalpa irnyalpai. Panya tjirirpingku walytjangku kaḷala irnyalpai, ka pira ngapartji kutjupa nguwanpa munu mungangka irnyalpai wirura. Ka kililpi tjuṭa tjukutjuku munu tjana kutjupa nguwanpa, palu paluru tjana kuḷu wirura irnyalpai mungangka.

⁴² Panya uninypa mantangka tjunkuyangka kutjupa kuwaritja palulanguru pakalpai, ka palu purunypa anangu Jesuku walytja ilunytja tjuṭa kutjuparira pakalku kuwaritja. Panya anangu ilunyangka mantangka tjunutjukupai, ka ngarira mantaringkupai. Ka Godalu palunya puntu kutjupa wiru mulapa pakaltjingalku wanka titutjara nyinanytjaku.

⁴³ Panya kuwari nganaṇanya ilunyangka pitīngka tjunutjunanyi puntu kuraringkuyangka, palu ngula Godalu nganaṇanya pakaltjinginganyangka nganaṇa puntu wirutjara pakalku munula kunpu mulapa nyinaku.

⁴⁴ Panya kuwarila anangu puntu mantangurutja nyinanyi, palu ngula nganaṇa ilunyangka Godalu nganaṇanya wankara pakaltjingingalku puntu ilkaritjatjara palula tjungu nyinanytjaku.

Panya nganaṇa puntu mantatja-tjara kuwari nyinanyi, munula ngula nganaṇa puntu ilkaritjatjara nyinaku.

⁴⁵ Panya nyiringka iriti walkatjunkunytja ngaranyi alatji, “Godalu nganmanytju wati Adamanya paluṇu anangurira mantangka wanka nyinanytjaku.” Ka wati kutjupa *Adam maḷatja* pitjangu ini Christanya. Ka Godalu palunya ilunyangka wankara pakaltjinggaṇu paluru ngapartji nganaṇanya Kurunpa Milmiltawanungku wankara pakaltjingantjaku palula tjungu titutjara nyinanytjaku.

⁴⁶ Panya kuwari nyanga nganaṇa mantangka nyinanyi puntu mantatja, palu ngulala ilkarīngka nyinaku puntu ilkaritjatjara.

⁴⁷ Panya wati nganmanyitja Adamanya mantanguru palyantja. Ka maḷa wirkanu *Adam maḷatja* ini Christanya mantatja wiya, ilkaritja.

⁴⁸ Uwa, anangu mantatja tjuṭa Adamanya purunypa nyinanyi, mantanguru palyantja. Ka panya Christanya ilkarīguru pitjangu, kala palumpa mulamularingkula palunya purunyarinyi.

⁴⁹ Uwa, nganmanypala wati mantatja Adamanya purunypa nyinangi puntu mantatjanguru. Palu ngula nganaṇa wati ilkaritja Christanya purunypa nyinaku puntu ilkaritjatjara.

⁵⁰ Uwa walytja tjuṭa, nyura kulini? Panya nganaṇa ngula Godaku ngurakutu puntu nyanga nganaṇa kuwari nyinanytjanya ankunytja wiya. Panya puntu nyanga paluru ilura mantaringkupai. Palulangurula puntu winki puṭu ngura ilkaritjangka tjarpaku wanka titutjara nyinanytjikitja.

⁵¹⁻⁵² Palu kulilaya, tjukurpa nyanga kumpilitjana kuwari nyurala utini. Ngula nganaṇa Jesuku walytja uwankaraṭu kutjupariku. Kutjupa tjuṭa wanka nyinanytjatjanu ilunytja wiya wanka winkiṭu

mapalku kutjupariku. Ka kutjupa tjuṭa nganmanypa ilunytjatjanu pakalku kutjuparira. Panya ngula tjiṅtu maḷatjangka angeltu turampata puura miratjingannyangka mapalku kutjupariku, panya anangungku kurungku nyakula warpungkula pinpapai, palu purunypala mapalku kutjupariku. Ka turampata pulkara miratjingannyangka Godalu ilunytja tjuṭa wankara pakaltjingalku wanka titutjara nyinanytjaku, munu panya wanka nyinanytja tjuṭa kulū kutjupankuku.

⁵³ Uwa, puntu nyanga nganaṅa ngaranytjanya ilura wiyaringkuku munu kutjupariku. Panya Godalu nganaṅanya kutjupankuku palula tjuṅgu wanka titutjara nyinanytjaku.

⁵⁴ Uwa, ngulala kutjupariku wanka titutjara nyinanytjikitja. Ka nyara palula-arangka tjukurpa panya nyiringka iriti walkatjunkunytja utiringkuku. Panya tjukurpa paluru alatji ngaranyi, “Godalu anangu tjuṭa palyalpai titutjara wanka nyinanytjaku piruku ilunytjaku wiya.

Kala ilunytjaku piruku nguluringkunytja wiya alatjitu.” *

⁵⁵ “Awa. Nyaakula nguluringkuku, panya nganaṅa ilura wiyaringkunytja wiya alatjitu.

Nganaṅa titutjara wanka nyinaku pukulpa mulapa ilunytja wiya alatjitu.” *

⁵⁶ Nganmanypala ngulu-ngulu nyinapai ilunytja kulira. Panya nganaṅa tjukurpa Godalu Mosenya ungkunyitjjangka tungunpungkula kura palyanangi. Nyara palulangurula nguluringangi pungkula iluntankunytjaku-tawara.

⁵⁷ Palu kuwari nganaṅa nguluringkunytja wiyaringu panya Mayatja Jesulu Christalulanya ngalkinu munulanya wankaru kanyini, kala ngula ilunytjatjanu wankaringkula pakalku. Kala uti nyanga palulanguru nguluringkuwiya nyinama munula Godanya mirawanira walkunma.

⁵⁸ Uwa, walytja wiru tjuṭa, Mayatja Jesunyaya titutjarangku wananma ngunti kulira iwara kutjupangka ankunytjaku-tawara. Munuya warka panya Mayatja Jesulu nyuranya ungkunytja titutjarangku palyanma wantinytja wiyangku, panya nyura unytju warkarinytja wiya. Palulanguruya titutjarangku palyanma wantinytja wiyangku.

16

Jesuku Walytja Tjuṭangku Jerusalemala Nyinanytja Tjuṭa Mani Ungkunytja

¹ Munta-uwa, panya mungatuni nyura lita walkatjura ngayula tjapinu alatji, “Yaaltji-yaaltjingkula mani tjunkuku Jesuku Walytja tjuṭa manta nyara Judeala nyinanytja tjuṭaku? Panya paluru tjana ngaltutjara maralpa nyinanyi.” Alatji nyura ngayula tjapinu. Palu uti nyura Kalaitjiyanya ngurara tjuṭa purunytju palyanma, panya tjanalana mungatu wangkangu mani tjunkukatinytjaku Jesuku walytja kutjupa tjuṭaku.

* 15:54 Aitjayaku 25:8 * 15:55 Uutjiyaku 13:14

² Ka nyura paluru tjana purunytju Sunday kutjupa Sunday kutjupa mani nyurampanguru tjarara tjunkukatima kutjungku kutjungku. Ka mani pulkatjarangu uti pulka nguwanpa tjarara tjunama, ka mani tjukutjutjarangu uti tjukutjuku nguwanpa tjarara tjunama. Alatjiya nganmanytju mani tjunkukatima ngula ngayulu ma-wirkara mani wiya nyakula nyuranya wangkanytjaku-tawara mani urantjaku. ³ Munuya wati mankurpa ngurkantara tjura mani palunya Jerusalemalakutu katinytjaku. Kana ngula nyurala wirkara lita kulu waltjura tjananya unku'iyalku Jerusalemanya ngurara tjutangu patara nyakula tjananya ngurkantankunytjaku.

⁴ Munta, tjinguruṅa kulira tjanala tjungu ankuku.

Nganmanytju Kulintja Ankula Tjanala Tjunguringkunytjikitjangku

⁵ Uwa, ngayulu nyuralakutu ma-pitjanyi, palu tjangati manta pala Matja-tuniyala ngayulu ngura ngururitja tjutangka wirkara palula tjanala tjukutjuku nyinaku.

⁶ Munuṅa ngula Karintjala ma-wirkara nyurala rawa nguwanpa nyinaku. Munuṅa tjinguru ma-unytjunarinyangka kutju nyuranya wantikatira ankuku. Kaniya tjinguru iwaraku unku'iyalku ngura kutjupa tjutakutu ngapartji ankunytjaku.

⁷ Panya ngayulu nyurala munga kutju ngarira waaratu ankunytjikitja mukuringkunytja wiya. Palu ngayulu rawa nguwanpa nyurala nyinanytjikitja mukuringanyi Mayatjanya mukuringkunyangka.

⁸ Palu kuwarina ngura nyanga Ipitjala nyinanyi panya tjirirpi Pintikatjaku patara.

⁹ Panya kuwari anangu tjuta tjukurku pulkara mukuringanyi, katju waraka pulka mulapa ngaranyi tjanala tjukurpa tjakultjunkunytjaku. Palu kutjupa tjuta tjukurpa Jesunyatjara tjanala tjakultjunkunyangka kuraringkupai. Palu kutjupa tjaraya pulkara mukuringanyi Jesunyatjara kulintjikitja munuya pukultu kulini ngayulu wangkanyangka.

¹⁰ Palu tjinguru wati panya Timitjinya nyurala wirkankunyangkampa nyura palunya altira pukultu kanyinma, panya paluru kulu Mayatjaku warkaripai nyinanyi ngayulu purunypatu.

¹¹ Munuya palunya wantinytja wiyangu atunyanama muni iwaraku ungama paluru tjukutjuku nyurala nyinara pukulpatu aruringkunytjaku ngayulakutu. Panya ngayulu palumpa patara nyinara nyanganyi paluru ngayula malaku wirkankunytjaku Jesuku walytja panya kutjupa tjutangka tjunguringkula.

¹² Kana wanyu nyurala tjakultjura wati panya Apalatjanyatjara, panya paluru kulu Jesuku walytja nyinanyi. Ngayulu palunya wangkara mukumukulpai nyuralakutu ma-pitjanytjaku walytja kutjupa tjutangka tjungu. Palu wati panya paluru putu nguwanpa kulilpai kuwaritu ankunytjikitjangku. Kuwari palumpa wiya ngaranyi ankunytjaku palu ngula tjinguru palumpa ankunytjaku ngaranyangka paluru nyuralakutu ma-pitjaku.

Tjukurpa Malatja

¹³ Uwa, kulil-kulilpaya nyinama ngunti kulira iwara kutjupangka ankunytjaku-tawara. Munuya rawangku kulira Jesuku pulkara mularingama. Munuya palunya kulira rapa kunpu titutjara ngarama.

¹⁴ Munuya war̄ka uwankara palyanma palumpa mukulyatjarangku, anangu tjuṭaku kurunpa winki pulkara ngalturingkula.

¹⁵ Nyura tjinguru kulinu wati panya ini Tjipananya munu palumpa walytja tjuṭa kulu, panya paluru tjana-warara Jesuku walytjaringu manta nyara Akayala. Munuya paluru tjana Godaku walytja kutjupa tjuṭa rawangku atunymankupai pakuringkula wantinytja wiyangku.

¹⁶ Kana pulkara mukuringanyi nyura palula tjanala wanganarangku kulintjaku. Panya uti nyura anangu atunymankupai paluru tjana purunytju wangkanyangka wanganarangku kulira palyanma. Ka kutjupa tjuṭa kulu palula tjanala tjunguringkula Godaku war̄ka palyannyangka nyura palula tjanala kulu wanganarangku kulinma.

¹⁷⁻¹⁸ Uwa, ngayulu rawangku kulilpai, "Yaalarana nyuranya nyakuku." Palu kuwarina pulkara pukularingu wati nyanga mankurpa nyuralanguru pitjanyangka nyakula Tjipananya, Putjunatanya, Akaikanya tjananya. Paluru tjana panya wirkara ngayunya kurunpa pukulmanu panya paluru tjana nyuranya-warara pukulmara wantikatingu. Ka nyura uti wati nyanga palu purunypa tjuṭangka wanganarangku kulinma.

¹⁹ Kaya Jesuku walytja tjuṭa mulapa manta nyanga Aitjala winkingka nyinara waninyi munuya paluru tjana nyuranya kulini nyurampa pukularira. Ka wati Akuwilalu munu palumpa kuringku Puritjilalu kulu palu purunypatu nyuranya kulini, munu pulampa ngurangka inmaku tjunguringkupai tjuṭangku kulu.

²⁰ Kaya palu purunypatu ngayuku nyanga malpa tjuṭangku kulu nyuranya kulini.

Ka nyura uti anangu kutjupa Jesuku walytja nyakulampa palumpa pukularira mara witinma.

²¹ Lita nyangatja ngayuku malpangku walkatjunanyi ngayulu wangkanyangka kulira. Palu kuwari nyangana ngayulu walytjangku mutumuṭu walkatjunanyi nyanga alatji, "*Ngayulu Paulalu nyuranya kulini nyurampa pulkara pukularira.*"

²² Palu tjinguru kutjupa Mayatja Jesuku mukuringkunyitja wiya nyinanyangkampa Godanya pala palumpa pulkara mirpanariku.

Palu wanyu kana Jesula wangka nyanga alatji, "Mayatja Jesu, ngalya-pitja."

²³ Uwa alatjitupa walkatjunanyi. Ka Mayatja Jesulu nyuranya pukultju pulkangku kanyinma.

²⁴ Ngayulu nyurampa uwankaraku pulkara mukuringanyi Jesula Christalanguru. Uwa mulapa.

Lita Nampa 2 Paulalu Walkatjura Iyantja Ngura Karintjalakutu 2 Corinthians Nyangatja Nganmanytju Nyakula Wangkanytjaku

Nyangatja Godaku tjukurpa kutjupa Paulalu walkatjura iyantja ngura ini Karintjalakutu. Panya ngura nyara palulaya Jesuku walytja kutjupa tjarangku kampangkatu Paulanya wangkangi munuya palunya kuranmanangi. Ka Paulalu nyara palumpa tjanampa uwankaraku pulkara mukuringkula tjanala kaly pangku wangkangi, ka kunyu paluru tjana kulu palumpa kaly paringu, ka paluru pulkara pukularingi tjana kaly paring kunyangka.

Nganmanytju panya tjana palunya kuranmankunyangka Paulalu lita walkatjura palunya tjananya wangkara painingi, kaya kunyu Paulanya kuranmankunytjatjanungku lita mantjira nyakula pulkara kuntaringu munuya palumpa kaly paringu. Ka paluru kaly paring kunyangka kulira pulkara pukularingu tjanampa.

Munu palulanguru paluru tjanala wangkangi panya mulapa paluru Jesulu ngurkantara iyantja palumpa waraka palyantjaku. Panya kutjupa tjarangku Karintjala nyinara palunyatjara wangkangi alatji, "Wiya, Paulanya Jesulu iyantja wiyatu. Nganananya kutju Jesulu iyanu, kala nganana mayatja pulka nyinanyi Jesuku walytja tjutaku." Alatji paluru tjana ngunti wangkangi, ka lita nyanga palula Paulalu tjananya wangkara markuningi tjana ngunti wangkawiyangku wantinytjaku.

Munu paluru lita nyangangka tjanala maniku ngatjiningi tjana ngalturingkula ungkunytjaku Jesuku walytja kutjupa tjuta ngura nyara Jerusalemala ngaltutjara mani wiya nyinanyangka.

Tjukurpa nyanganpa ngarinyi:

1:1-11 Paulalu nganmanytju wangkanytja

1:12—7:16 Paulalu tjanala tjukurpa tjuta wangkara nintintja

8:1—9:15 Jesuku walytja tjutangku uti ngaltutjara tjuta mani ungama

10:1—13:10 Paulalu tjananya paintja palunya anara wangkanyangka

13:11-14 Paulalu tjukurpa malatja wangkanytja tjana kulira kunpu ngaranytjaku

Paulalu Nganmanytju Wangkanytja

¹ Uwa, Jesuku walytja tjuta! Ngayuluna Paulalu lita nyangatja nyurampa walkatjunanyi ngura pala Karintjala nyinanytja tjutaku. Panya ngayuluna tjukurpa Jesulu Christalu iyantja, panya Godaluni ngurkantanu palumpa tjukurpa anangu tjutangka tjakultjungkunytjaku. Kali Timitjilu ngali kuwari malpararangku tjunguringkula nyuralakutu lita nyangatja ma-iyani, munu Jesuku walytja kutjupa tjutakutu kulu, panya manta pala Akayala nyinanytja tjutakutu kulu.

² Ka Mama Godalu, Mayatja Jesulu Christalu kulu nyuranya pukultju pulkangku atunymara kanyinma munu nyuranya kurunpa rapara pukulmanama.

³ Uwa, kala wanyu Godanya mirawanima Mayatja Jesuku Christaku Mama, panya paluru nganananya ngaltunyutju pulkangku kanyilpai munulanya titutjarangku kunpulpai kurunpa rapa ngaranytjaku.

⁴ Panya pika munu kutjupa kutjupa tjuta kulu ngananala wirkankunyangka paluru nganananya kurunpa rapalpai nganana ngapartji anangu kutjupa tjuta kulu wangkara kunpuntjaku pika tjuta munu kutjupa kutjupa tjuta tjanala kulu wirkankunyangka.*

⁵ Uwa, panya mirpantju tjutangkuya nganmanytju Jesunya ananangi munu panyaya palunya pungangi, kaya kuwari nganananya palumpa walytja tjuta ngapartji palu purunypatu anani munu punganyi. Palu panya Mama Godalu Jesunya kurunpa rapanu munu palunya kunpuntjatjanungku nganananya kulu palu purunymananyi.

⁶ Tjinguru tjana ngalinya ananma munu pungama alatjitu Godaku waraka nyurala palyannyangka. Palu palya, panya tjana ngalimpa pikaringkunyangka ngali kulira wantira alatjitu nyurala rawa warkarinyi nyura kurunpa raparingkula wankaringkunytjaku. Panya tjana ngalinya nyanga alatjingannyangka Mamalu ngalinya kurunpa kunpulpai nyuranya ngapartji kurunpa wangkara kunpuntjaku munu rapantjaku. Ka nyara palulanguru pika palu purunypa tjuta nyurala wirkankunyangka nyura kulu ngali purunytju kunpu ngarala titutjarangku Jesunya wanalku nguluringkula wantinytja wiyangku.

⁷ Palu nintingkuli nyuranya kulini nyura kunpu nyinanyangka. Panya pika tjuta ngalila wirkananyi, pala palu purunypa nyurala kulu wirkananyi. Ka panya Godalu ngalinya kurunpa kunpuntjatjanungku nyuranya kulu kurunpa kunpu ngalinya purunypatu.

⁸ Uwa, walytja tjuta! Wanyu kali nyurala tjakultjura ngali manta nyanga Aitjala ngura tjutangka para-ngaranytjatjanungku. Panya mirpantju tjutanku ngalinya rawangku kuraningi ngali Tjukurpa Palya Jesunyatjara anangu tjutangka tjakultjunkunyangka. Panya ngalinyaya tjana ananangi munu painingi munulinyaya pulkara pungangi. Kali puwu nguwanpa kuliningi rawangku kurannyangka, munuli kurunpa paku pulkaringkula alatji kuliningi, "Ngali tjinguru iluku.

⁹ Nyangatja mulapa ngali ilunytjakutu ngaranyi." Alatjili kuliningi panya Godalu tjinguru ngalinya kurantjaku-tawara anga-kanyinma, palu paluru ngalinya wantingu pikawanu palumpa warakarira pulkara raparingkunytjaku. Palu mulapa nyanga alatjiringu ngalinku walytjangku pulkara kulira kanany-kananyarinytjaku-tawara, panya Godanya ngalimpa mukuringu palulawanu kutju ngali rapa ngaranytjaku, panya paluru kutjungku miri ilunytja wankara pakaltjinalpai.

¹⁰ Palu mulapalinya Godalu wankarunu ngalimpa mirpantju tjutanku ngalinya nguwanpa iluntankunyangka. Munulinya titutjarangku wankaru kanyilku. Ka ngali palumpa pulkara alatjitu mulamularinganyi paluru ngalinya titutjarangku tjintu kutjupa tjintu kutjupa wankaru kanyilkatinytjaku.

* 1:4 11:24-26

¹¹ Kaya wanyu nyura ngalina alpamilanma munu ngalimpa Godala rawangku tjapinma. Ka paluru nyurala kulilku munulinya pukultjungku kanyilku. Ka anangu tjuṭangku palunyalta mirawanira walkulku paluru ngalina wankaru wirura kanyinnyangka nyakula.

Paulalu Ankunytjikitjangku Kulira Wantinytja

¹² Uwa, Godalulinya pukultjungku kanyini kali palulanguru warka palumpa tjukarurungku palyani. Ngali mantangka nyanga nyinara anangu mantatja kulilpai tjuṭangka tjunguringkula palyalpai wiya, panya tjana nintipukangku-palku walytjangku kulira palyalpai. Palu ngali Godalu nintinnyangka kutju kulira tjukarurungku palyalpai palumpa mukuringkula kurunpa winkingku, munuli palulanguru pukularinyi. Ka tjinguru nyura kutjupa tjarangku kulini ngali nyuranya ngunti kurannyangka-palku. Palu wiya, ngali panya mungatu Karintjala nyinara nyurala tjukaruru alatjitu nyinangi Godalu kutjungku ngalina kunpunnyangka.

¹³⁻¹⁴ Kali lita nyangatja nyurampa walkatjunanyi nyura ngalina tjukarurungku kulintjaku ngunti kulira wantinytjaku-tawara. Kuwari nyanga nyura tjukurpa tjara kutju uti kulinu ngali wangkanyangka. Palu nyura ngula tjukurpa uwankara uti kulilku munu nyura Mayatja Jesunya malaku pitjanytja-arangka ngalimpa pulkara pukulariku, kali ngali ngapartji nyurampa pulkaratu pukulariku nyura Tjukurpa Palya kulira mulamularingkunytjitja-nguru.

¹⁵⁻¹⁶ Uwa, mulapa nyura ngalimpa ngula pukulariku. Kana palulanguru kuliningi nyuranya kutjara-arangku ma-pitjala nyakunytjikitjangku munu nyuranya kunpura pukulmankunytjikitjangku. Panya ngayulu Karintjala munkara waintara ankunytjikitjangku kuliningi manta nyara Matja-tunyalakutu mununa nyurala-warara wirkara tjunguringkunytjikitja mukuringangi nganmanypa mununa palulanguru Matja-tunyalanguru aruringkula piruku nyurala wirkankunytjikitja mukuringanyi. Kani nyuralta ngayunya Judealakutu alpamilara ma-iyalku. Alatjina kuliningi nyuranya kutjara-arangku ankula nyakunytjikitjangku, palu puṭuna kuliningi.

¹⁷ Ka tjinguru nyura kutjupa tjarangku kulini ngayulu ngunti wangkanyangka-palku munu nyura alatji tjinguru ngayunya kulini ngayulu kampa kutjara wangkanyangka-palku mantatja kulilpai tjuṭa purunypa. Palu mulapana nyuranya kutjara-arangku nyakunytjikitja mukuringangi.

¹⁸ Panya ngayulu kampa kutjara wangkapai wiya, panya Mama Godalu tjukarurungku wangkapai, palu purunytju ngayulu tjukarurungku nyurala wangkanyi.

¹⁹ Panya Jesulu Christalu Godaku katjangku kalkuntjatjanungku tjukarurungku palyalpai mala wiyankunytja wiyangku. Nyura ninti palumpa, panya Tjaalatjala Timitjilu nganana tjukurpa palunyatjara nyurala nganmanytju wangkangi.

²⁰ Panya Mama Godalu tjuṭa-arangku nganananya kalkuningi kutjupa kutjupa tjuṭaku. Palu panya Jesulu Christalu mantakutu pitjala Godalu panya kalkuntja uwankara nganampa palyanu. Kala nyara palulanguru Jesulu palyannyangka Godanya mirawanira walkura wangkapai alatji, "Mulapa Mamalu tjukarurungku kalkunu."

²¹ Ka nyuntunya nganannya Mama Godalu tjungura tjunu Jesula kutjungka tjungu titutjara nyinanytjaku. Panya palurulanya ngurkantanu munulanya mauntalpa tjunu Christala tjungu kunpu nyinanytjaku.

²² Munu panya paluru Kurunpa Milmilnga nganana kutjungka kutjungka unngu tjarpatjunu anangu tjutangku nganannya nyakula kulintjaku, alatji, "Mulapa nyanganpa kuwari Jesuku walytja tjuta nyinanyi." Panya watingku pulukangka purantatjunkupai palumpa alatjitu ngaranytjaku, palu purunypa Godalu nganana Kurunpa Milmilnga tjarpatjunu palumpa ngaranytjaku. Kala nyara palulanguru nintingku kulini, "Mulapa Godalu nganannya ngula wiru tjuta kalkuntjatjanungku ungkuku."

²³ Uwa, Mama Godanya ngayuku ninti panya ngayulu tjukarurungku wangkanyi. Tjinguru ngayulu Matja-tuniyalakutu ankunytjikitja nyurampa ngurangka-warara wirkankuku mununa nyuranya wangkara markulku ngunti-ngunti panya palyantjita tjutanguru, ka nyura tjinguru kulira tjituru-tjitururiku. Palu pala palula-tawarana wantingu ngura pala Karintjalakutu ma-pitjanytja wiyangku ngayulu nyuranya painnyangka nyura tjituru-tjitururinytjaku-tawara.

²⁴ Palu ngali panya mayatjarira wangkara nyuranya mularingkunytjaku untuntja wiyangku wantingi. Panya nyura nganmanypa alatjitu Jesuku mulamularingu munu nyura kunpungku palunya titutjarangku wanani. Nyara palulanguruli nyurala tjungu warkarinytjikitja mukuringanyi nyura pukulpa nyinanytjaku.

2

¹ Uwa, ngayulu nyuralakutu ma-pitjanytjikitjangku kulira wantingu nyura ngayulu wangkanyangka kulira tjituru-tjitururinytjaku-tawara.

² Panya ngayulu alatji kuliningi, "Tjinguruya ngayulu tjanala ma-wirkara wangkara painnyangka paluru tjana tjituru-tjitururiku, ka nyara palulanguru tjana ngapartji ngayunya pukulmankunytja wiyangku wantiku tjituru-tjitururinytjatjanungku." Alatjina kuliningi.

³ Mununa palulanguru wantira litangka kutju walkatjura nyuranya painingi munu panya nyuralakutu ma-iyanu lita panya palunya.* Tjinguruna ma-pitjalampa nyuranya wangkara pailku ka nyura ngayuku kuraringkuku kana tjituru-tjitururiku, palu ngayulu mukuringangi nyuranya nyakula pukularinytjikitja. Palulanguruna wantira lita kutju walkatjura ma-iyanu ngayulu nyurampa pukularinyangka nyura kulu pukulpa nyinanytjaku.

⁴ Panya ngayulu kurunpa winki ulara lita panyangka walkatjura nyuranya painingi nyura tjukaruru nyinanytja-tjiratjangku. Ka nyura tjinguru ngunti kuliningi ngayulu nyuranya tjituru-tjituru palyantjikitjangku lita nyurampa walkatjunkunyangka-palku. Palu wiya, ngayulu walkatjunu nyura nyakula kulintjaku alatji, "Munta-uwa, mulapa

* **2:3** Paululu lita mankurpa walkatjura iyanu Karintjala nyinanytja tjutakutu. Ka lita ngururitja tjana mantjira riitamilaningi, ka palula malangka lita paluru kawaliringu, ka kuwari nyiri nyanga Bible-ta wiya ngaranyi kutjara kutju ngaranyi. Ka verse 3 Paululu wangkanyi lita panya ngururitja.

paluru nganampa pulkara mukuringkula lita nyangatja nganampa iyanu."

Kurannyangka Kalyparingkunyitja

⁵ Panya anangu kutjungku kunyu nyurala jungutjangku kura palyanu, kana kulira tjituru-tjitururingu. Nyangatja ngayunya kutju tjituru-tjituru palyantja wiya, palu nyuranya kulu tjituru-tjituru palyanu uwankaratu, munta tjinguru tjara kutju. (Tjinguruna uwankara wangkara tjukurpa nyangatja ngunti pulkalku.)

⁶ Panya nyura palunya paira nganmanyitju tjukururunu. Kana nyuranya kuwari wangkanyi, "Palyaltaya wantima! Alatjitu nyura painu."

⁷ Uti nyura wati palunya kalypangku wantima munuya palunya pukultu kanyinma pulkara tjituru-tjitururira Godalanguru paturingkunyitjaku-tawara.

⁸ Kana nyuranya wangkara wituwituni palunya malakungku mantjira mukulyangku kanyintjaku.

⁹ Panya lita nganmanyitjana walkatjura ma-iyanu nyurampa kulira nintiringkunyitjikitjangku, tjinguru nyura wanganarangku kulira palyalku munta tjinguru nyura wantiku.

¹⁰⁻¹¹ Tjinguru nyura wati palaku nyuranya pala kuralpaiku kalyparingu palunya ngapartji kurantja wiyangku wantira, kana ngayulu kulu palumpa kalyparinganyitu. Tjinguru paluru ngayunya kuranmanu, tjinguru wiya. Palu ngayulu nyurampa mukuringkula wati palunya kurantja wiyangku wantinyi mununa Christala mirangka palumpa kalyparinganyi Satantu uwankara ngananyatu kurantjaku-tawara, panya nyuntu nganana ninti mamuku araku, panya paluru titutjarangku ngananyanya kulini munu nyanganyi kurantjikitjangku.

Paulanya Ngura Taruwatjala Tjituru-tjitururinytja

¹² Uwa, ngura nyara Taruwatjalakutuna anu Tjukurpa Palya Jesunya Christanyatjara wangkanyitjikitja mununa ngura pala palula wirkara nyangu anangu wanganara tjuta nyinanyangka, panya Mayatja Jesulu tjanala nganmanyitju kurunta wangkangu palumpa tjukurpa wanganarangku kulintjaku.

¹³ Palu putuna nyangangi wati panya ngayuku malpa Taitatjanya. Mununa palulanguru tjituru-tjitururira anangu tjuta tjakurira wantikatira anu manta nyanga Matja-tunyalakutu.

Jesunya Christanya Nganampa Kuranyitja

¹⁴ Uwa, wanyula Godaku pukularira palunya mirawanima, panya paluru Christalawanungku ngananyanya rawangku witulyankupai palumpa Tjukurpa Palya anangu tjutangka para-tjakultjungkunyitjaku, kaya palumpa mirpantju tjutangu ngananyanya putu alatjitu kuralpai Godalu ngananyanya witulyankunyangka. Kaya ngura winkingka anangu tjutangu tjukurpa palunya kulira Jesuku Christaku nintiringkupai. Tjukurpa paluru panya panti wiru purunypa ngura tjutangka lipiringkupai. Panya panti wiru pantinyangka anangu tjutangu pantilpai, palu purunypa nganana tjukurpa Jesunyatjara para-wangkanyangka anangu ngura winkitjangku kulira nintiringkupai palumpa.

15-16 Uwa, nganaṅa Jesulu iyantja tjuṅangku tjukurpa palunyatjara anangu uwankarangka tjakultjunkturpai, kaya Godalu wankarunkunytja tjuṅangku kulira pukularipai munuya paluru tjana wankaringanyi nganaṅa Godaku tjukurpa wangkanyangka kulintjatjanu. Panya anangungku panti wiru panṅira pukularipai, palu purunypaya Godaku tjukurpa kulira pukularipai. Palu Godanya wantipai tjuṅangkuya kulira alatjiṅu wantipai munuya palulanguru ngula iluku alatjiṅu. Panya anangungku kuka unṅa panṅira wantipai, palu purunypa paluru tjana nganaṅanya wangkanyangka kulira wantipai.

Uwa, warṅa pulṅa mulapa nyangatja Tjukurpa Palya Jesunyatjara para-wangkanytjaku, ka nganalu wanyu tjukarurungku palyalku? Wiya, kutjupangku walytjangku puṅu tjukarurungku palyalpai.

17 Panya tjara kutjupangkuya manikitjangku tjukurpa para-wangkapai, palu nganaṅa tjananya purunypa wiya, panya Godalu witunnyangkala palula mirangka tjukarurungku palumpa tjukurpa wangkapai Jesula wanganarangku kulira.

3

Kalkuntja Kuwaritja Wiru Mulapa

1 Tjinguru tjukurpa nyangatja wangkanyangka nyura kulini nganaṅa kulira walytjangku mirawaninytja-palku wati panya paluru tjana purunypa. Palu wiya, walytjangku mirawaninytja wiyala. Palu wati panya paluru tjana ngura tjuṅakutu ankunytjikitja mukuringkula wati tjukurtjarangka tjapilpai nyiringka walkatjura tjananya ungkunytjaku, ka walkatjunkturpai tjanampa alatji, "Wati wiru tjuṅa nyanganpa, Godaku warṅa tjukarurungku palyalpai tjuṅa." Kaya lita palunya katira nintilpai ngura kutjupangka kutjupangka, kaya nyakula tjananya palyanmankupai tjukurpa wangkanytjaku. Palu ngali lita pala palu purunypa nyurala katira nintintja wiya nyura nyakula ngalinya palyanmankunytjaku. Munuli piruku lita nyura walkatjunkturpai kulu katira anangu kutjupa tjuṅangka ngapartji nintilpai wiya ngura kutjupangka ngalinya nyakula tjana palyanmankunytjaku.

2 Panya nyura lita purunypa ngalimpa kurunta ngaranyi, panya anangu kutjupa tjuṅangku nyuranya Jesuku walytjaringkula wirura nyinanyangka nyakula kulilpai, "Munta-uwa, wati panya paluru pula tjanala tjukurpa mulapa wangkangu, kaya tjukaruru mulamularingu." Alatjiya nyakula kulilpai.

3 Panya Christalu nyuranya kurunpa wankarunu ngali nyurala tjukurpa palunyatjara tjakultjunkturanyangka, ka nyara palulanguru kutjupa tjuṅangku nyuranya nyakula ngalinya palyanmananyi alatji wangkara, "Munta mulapa Christalu wati nyanga palunya pulanya iyanu tjanalakutu." Panya Godalu Kurunpa Milmilṅu nyiringka munu tjiwangka kulu walkatjunkturpai wiyangku nyurala kurunta walkatjunu munu nyuranya kampa kutjupanu palumpa walytjaringkunytjaku.

4 Nyangatjali Godaku pulṅara mulamularingkula wangkanyi panya Christalu rapara kanyinnyangka.

⁵ Ngali waraka nyangatja walytjangku kulira palyantja wiya. Putuli kulilpai walytjangku palyantjikitjangku, palu Godalu nintinnyangka kutjuli palyalpai.

⁶ Nyara paluru nintinnyangka kutjuli tjukurpa kuwaritja paluru panya kalkuntjitja anangu tjutangka tjakultjunkupai. Tjukurpa nganmanyitja panya Mosenya walkatjura ungu nganana wanganarangku kulira kulintjaku munu tjukururu nyinanytjaku, ka nganana tjukurpa palula wanganarangku kulintja wiyangku wantinyangka Godalu nganananya pungkunytjaku ngaranya. Palu ngali tjukurpa pala nganmanyitju walkatjungkunytja nyurala wangkanytja wiyangku wantinyi munuli tjukurpa nyanga kuwaritja nyurala tjakultjunanyi Kurunpa Milmiltu nintinnyangka, ka tjukurpa nyara palulawanungku Kurunpa Milmiltu nyuntunya nganananya wankaru kanyini pungkunytja wiyangku.

⁷ Panya Godalu nganmanyitju tjukurpa pulka puli tjiwangka walkatjura Mosenya ungu, ka panya tili Godaku pitalytji pulka palula irnyanangi ka paluru yunpa pitalytjiringu. Kaya anangu tjutangka putu palunya tjukurungku nyangangi panya kuruya paulyaringu pitalytji pulkangku irnyannyangka. Tili nyara paluru Moseku panya yunpangka ma-tjukutjukuringangi palu anangu tjutangka putu alatjitu nyangangi palumpa yunpa. Palu tjukurpa pulka nyara palulanguru anangu tjuta putu wankaru nyinangi, panya paluru tjana tjukurpa palula rawa tungunpungangi ka Godalu tjananya pungkunytjaku ngarangi.

⁸ Uwa, Godalu tjukurpa palunya pitalytji winkingku Mosenya ungu, palu kuwari tjukurpa panya kutjupalta wirkanu panya Kurunpa Milmilngatjara wiru mulapa nyara Mosenya ungkunytjitjangka munkara mulapa, panya Kurunpa Milmiltu nganana unngu nintira wiru mulapalta palyanu.

⁹ Uwa, Godalu pitalytji pulkangku Mosenya tjananya tjukurpa ungu, palu tjukurpa nyara palulanguru Godalu tjananya kuranmanangi tjana tungunpungkula wantinyangka. Ka kuwari tjukurpa kutjupalta wiru mulapa ngaranya Kurunpa Milmiltu nganananya wankarunkunytjaku. Nyanga palunya Godalu wiru mulapa palyanu panya Mosenya ungkunytjitjangka munkara mulapa.

¹⁰⁻¹¹ Panya tjukurpa nganmanyitja paluru wiru mulapa ngarangi pitalytji pulkatjara. Palu kuwari tjukurpa kutjupa pitalytji pulka mulapalta utiringu tjukurpa nyara nganmanyitjangka munkara mulapa, munu paluru wiyaringkunytja wiya titutjara alatjitu ngaraku.

¹² Kali tjukurpa nyanga palunya kurunpa winkingku kulira kurunpa raparinganyi munula rapangku wangkapai.

¹³ Panya ngali Mosenya purunypa wiya, panya Moselunku yunpa tjutunu mantarangka palumpa yunpa irnyantja panya ma-wiyaringkunyangka nyakunytjaku-tawara Israelkunu tjutangku.

¹⁴⁻¹⁵ Palu paluru tjana tjukurpa Godalu Mosenya ungkunytjitja tjanala wangkanyangka kulira pina patiringu. Munuya kuwari kulu pina patitu nyinanyi. Palu panya Jesuku Christaku mulamularingkula kutju pina alaringkupai. Palu kuwari nyanga Moseku tjukurpa tjanala wangkanyangkaya pina pati mantarangka tjutuntja purunypa nyinanyi kulintja wiya alatjitu.

¹⁶ Palu tjana Mayatjalakutu malaku aruringkunyangkampa paluru tjananya pina alalku tjukurpa tjukarurungku kulintjaku.

¹⁷ Panya Mayatja paluru Godaku Kurunpa, ka Kurunpa nyara paluru nganana nyinanyangka nganana Godala tjunguringkula nyinanytjaku ngaranyi alatjitu.

¹⁸ Moselunku yunpa palurunku mantarangka tjutunu, kaya Israelkunu tjutangku yunpa palumpa irnyannyangka putu nyangangi. Ka panya nganana palunya tjananya purunypa wiya, panya nganana uti alatjitu nyanganyi Jesunya pitalytji pulka irnyannyangka mayatja pulka mulapa. Ka Mayatja Godalu Kurunpa Milmiltu nganananya titutjarangku palu purunypa palyalkatinyi wiru mulapa nyinanytjaku pitalytji wiru palunya purunypa.

4

Godalu Ngalinya Piti Kurakura Purunypa Mantjintja

¹ Uwa, Godalulinya ngaltunytju pulkangku warka nyanga wiru ungu tjukurpa palumpa wangkanytjaku, kali palulanguru pukultu palyani pakuringkula wantinytja wiyangku.

² Munuli kampakatu kura kutjupa kutjupa tjuta palyantja wiyangku wantipai alatjitu, munuli anangu kutjupa ngunti wangkara kuralpai wiya, munuli Godaku tjukurnguru kampa kutjupara ngunti wangkapai wiya. Panya Godanya ninti ngalimpa ngali tjukarurungku kutju anangu tjutangka wangkanytja paluru tjana ngalinya tjukarurungku wangkanyangka ngurkantara kulintjaku.

³ Anangu kutjupa tjarangku Godanya kulilwiyangku wantipai munuya iwara kurangka titutjara ananyi mirikutu. Munuya paluru tjana Tjukurpa Palya ngali wangkanyangka kulira putu kulilpai.

⁴ Panya manta nyangaku mayatjangku Satantu tjananya pina patira kanyini Tjukurpa Palya Jesunyatjara kulira mulamularingkunytjaku-tawara. Palu Tjukurpa Palya nyara paluru tili purunypa wiru ngaranyi, panya tili irnyalpai anangu tjutangku uti nyakunytjaku, palu purunypa Tjukurpa Palya nyara paluru ngaranyi, ka anangu tjutangku tjukurpa palunya kulira nintiringkupai Jesuku wankarunkupai wiruku, panya paluru Godanya purunypa alatjitu nyinanyi.

⁵ Panya ngali ngura tjutangka tjukurpa ngalinyatjara wangkanytja wiya, palu tjukurpa nyangatja kutjuli tjakultjunkupai panya Jesunya Christanya anangu uwankaraku mayatja nyinanyi. Kali warka nyangatja nyurampa palyani paluru ngalila wangkanyangka. Alatji kutjuli wangkapai.

⁶ Panya Godalu kuwaripatjara mungawaluru pulka ngaranyangka wangkangu kalalarinytjaku ka kalalaringu, munu God panya palurutu nyuntunya nganananya palu purunytjutu mungawalurungka nyinanyangka irnyara kalalanu nganana pina alaringkula mulamulangku kulintjaku panya Godalu nganananya Christalawanungku wankarunu.

⁷ Palu kulilaya! Tjinguru kutjupangku piti kurakura tjulpirnguru palyantja mantjini munu kutjupa kutjupa wiru mulapa tjunanyi piti palula. Ka palu purunytju Godalu ngalinya piti kurakura kutjara purunypa mantjinu, munu ngalila unngu wiru mulapa tjunu Tjukurpa

Palya Jesunyatjara ngali anangu tjutangka wangkara utintjaku. Panya ngali ngaltutjara kurakura kutjara ka nyura kulinma tjukurpa nyangatja ngalilanguru wiya, Godalanguru. Panya ngali Tjukurpa Palya wangkanyangka nyara paluru kutjungku anangu tjuta kulira wanganararingkunyjtaku palyalpai.

⁸ Panya ngali Tjukurpa Palya anangu tjutangka wangkanyangka kutjupa tjarangku ngalinya rawangku wiyankupai munuya ngalinya pailpai wangkanytja wiyangku wantinytjaku. Palu ngali wantinytja wiyangku tungun-tunguntu alatjitu wangkapai. Kutjupa-arali putuliripai Godaku waraka kulira palyantjikitja, palu ngali palumpa rawa alatjitu mulamularingkupai wantinytja wiya.

⁹ Kalinya kutjupa-ara anangu mirpantju tjutanku kuraringkula pailpai tjukurpa wangkanytjaku-tawara, palu Godalu ngalinya wantir'iyantja wiyangku rawangku alatjitu atunyttju kanyilpai. Kutjupa-araya ngalinya pungkula anta-wanipai mantangka, palu tjana ngalinya putu iluntankupai.

¹⁰⁻¹¹ Uwa, tjana rawangku ngalinya iluntankunyjtikitjangu pikangku wanarinkupai, panya nganmanyttjuya Jesunya iluntanu, palu purunytjuya kuwari ngalinya ngapartji iluntankunyjtikitjangu nyanganyi. Uwa, ngali waraka nyanga Jesuku rawangku palyannyangka tjana titutjarangku ngalinya iluntankunyjtikitjangu wanarinkupai. Palu palya, panya ngali Jesuku warakarira nguwanpa ilunyangka nyura ngapartji Jesunya kulini munu palumpa mulamularingkula wankaringanyi.

¹² Kulini nyura? Panya tjukurpa nyanga palunya wangkanyangka tjana ngalinya punganyi, kali nguwanpa ilunyi, palu nyura tjukurpa ngali wangkanytjtjanguru kulira wankaringanyi.

¹³ Panya nganmanyttju nyiringka walkatjunktjuntjuntja ngaranyi alatji, "Ngayulu Godaku mulamularingkunyttjatjanungku anangu tjutangka tjakultjunangi tjukurpa palunyatjara." *

Ka ngali palu purunypatu Godaku mulamularingkunyttjatjanungku tjukurpa palunyatjara wangkanyi.

¹⁴ Panya ngali nintjangu kulini panya Mama Godalu Mayatja Jesunya wankara pakaltjanganu munu palu purunypatu ngalinya wankara pakaltjingalku nyuranya kulu tjungura munulanya uwankara katiku Jesula tjunguringkula nyinanytjaku.

¹⁵ Panya tjana ngalinya iluntankunyjtikitjangu wanarinkupai nyurala Tjukurpa Palya Jesunyatjara wangkanyangka. Palu palya, ngali pikawanungku nyurampa palyani nyura kulira Jesuku mulamularingkunyjtaku. Ka ngura tjutangka ngali pikawanungku Tjukurpa Palya tjakultjunktjuntjuntjanga Godalu anangu tjuta ngaltunyttju pulkangku palyani palumpa walytjaringkunyjtaku, kaya nyara palulanguru paluru tjana tjuta mulararira palunya mirawanira pulkara walkulku.

Rawangku Kurannyangka Godaku Mulamularingkunyjtaku

¹⁶ Ka ngali pakuringkula wantir'iyantja wiyangku titutjarangku alatjitu Jesunya wanani. Ngali panya ma-tjilpiringkula puntu maparinganyi, palu Godalu ngalinya kurunpa rawangku kuppulkatinyi tjintu kutjupa tjintu kutjupa.

* 4:13 Psalm 116:10

17 Uwa, mantangka nyanga nyinanyangka pika kutjupa kutjupa tjuṭa ngalila rawa utiringkupai. Palu pika nyanga paluru tjana unytju ngarapai, rawa ngaranytja wiya, palu ngula ngalimpa wiru mulapa utiringkuku titutjara Godala tjungu pukulpa nyinanytjaku.

18 Panya pika paluru tjana utitja tjuṭa munuya unytju ngarala wiyaringkuku, palu panya Godaku ngura wiru arkayitja titutjara ngarapai wiyaringkunyitja wiya alatjitju. Palulanguruli utitja nyanga tjuṭa rawangku kulintja wiyangku wantinyi, munuli arkayitja tjuṭa waintara kulilpai.

5

1 Panya mantangka nyanga nyinara nganaṇa kurunpa puntu winki nyinapai, panya nganaṇa wiltjangka tjarpara nyinapai, palu purunypa nganaṇala kurunpa puntungka unngu nyinanyi. Palu ngula nganaṇa ilunyangka Godalu puntu kuwaritjangka nganaṇanya tjarpatjunkuku paluru palyantjitjangka, kala puntu palunyatjara palumpa ngurangka titutjara wanka nyinaku.

2 Panya mantangka nyanga nyinara nganaṇa puntu uparingkupai, munula puntu ilkaritja-tjiratjangku waintara pulkara kulilpai ngula Godalu nganaṇanya puntu ilkaritja ungkunyitjaku. Panya nyangatjala puntu mantatja mantara kurakura purunypatjara nyinanyi, palu ngula nganaṇa puntu ilkaritja mantjilku munula mantara wiru purunypatjara nyinaku.

3 Panya nganaṇa ngula ilunyangka Godalu nganaṇanya ungkuku puntu kuwaritja nganaṇa puntu pala palula tjarpara pukulpa nyinanytjaku.

4 Panya nganampa puntu nyanga mantatja wiltja purunypa pupanyi, panya wiltja rawa pupanytja wiya unytju kutju ngarala wiyaringkupai, palu purunypa. Panya puntu nganampa pikatjararingkula kaarn-garapai munu uparingkupai munu ilupai, kala ngula puntu palunya mantara kurakura purunypa wantikatinyi puntu kuwaritja-kitjangku. Panya puntu nyangatja wiyaringkunyangka Godalu nganampa puntu wiru kuwaritja palyalku nganaṇa puntu palula tjarpara wanka titutjara nyinanytjaku ilunytja wiya alatjitju.

5 Uwa, Godalulanya nganmanytju kalkunu puntu kutjupa ungkunyitjikitjangku ilkaritja wiru. Panya paluru Kurunpa Milmilnga-warara nganaṇala unngu tjarpatjunu nganmanytju. Kala kurunpa palunyatjarangku nitingkulta kulini, "Mulapa paluru ngula nganaṇanya puntu kuwaritja ungkuku."

6 Palulangurula pukulpa rapa nyinanyi ilunytja kulira nguluringkunyitja wiya.

Panya nganaṇa ninti puntu nyanga mantatjatjara nyinara nganaṇa mantangka nyinanyi, ngura ilkaritjangka Mayatja Jesula tjungu nyinanytja wiya.

7 Palu palya, panya nganaṇa Godalu kalkuntjitjaku mulamularingkula munkaritjaku ala-ala paṭani. Palu kuwarila nyakunyitja wiya, munula mulamularingkula kutju nganaṇa rapa paṭani palumpa.

8 Uwa, mulapa nganaṇa rapa nyinanyi ilunytja kulira nguluringkunyitja wiya. Panya nganaṇa mukuringanyi ilura puntu

nyangatja wantikatinytjikitja munu puntu kuwaritjangka tjarpara Mayatja Jesula tjunguringkula palumpa ngurangka nyinanytjikitja.

⁹ Palu nganaṅa kutjuku pulkara mukuringanyi panya Mayatja Jesunya pukulmankunytjikitja. Tjingurula mantangka nyanga nyinara palunya pukulmankuku, munta tjingurula ngura nyara ilkarangka nyinara palunya pukulmankuku.

¹⁰ Panya nganaṅa uwankaratu ngula Christala kuranyu ngaraku paluru nganaṅanya ngurkantara tjarantjaku, kalanya kutju kutju paluru ngurkantara wangkaku nganaṅa mantangka nyanga nyinara palyantjita-nguru. Munu paluru wiru nyinanytja ngurkantara palyanmankuku munu kura nyinanytja ngurkantara kuranmara pailku.

Godaku Malparingkunytjaku Jesula Christalanguru

¹¹ Uwa, Mayatja Jesunya pulka mulapa nyinanyi, kali wanganarangku palula kulilpai kurunpa winkingku. Munuli palulanguru anangu kutjupa tjuṭa kulu wangkara wituwitulpai paluru tjana kulu kulira palunya wanantjaku. Panya Godanya ngalimpa ninti nyinanyi panya ngali palumpa tjukururu warkaripai, munuli ungu kulilpai alatji, "Wanyuwi anangu nyanga Karintjala nyinanytja tjuṭangku ngali wangkanyangka tjukururungku kulinma!"

¹² Panya ngali nyurala tjukurpa wangkara ngalinku walytjangku mirawaninytja wiyangku wantinyi. Munuli mukuringkunytja wiya nyura ngalinya kulira pulkanmankunytjaku. Palu ngali mukuringanyi nyura ngalimpa pukularinytjaku kutju warka nyanga palunya palyan-nyangka. Ka tjinguru kutjupa tjuṭangku ngalinya wangkara kuran-nyangka kulira nyura ngalimpa mukuringkula tjananya wangkara painma wangkawiyangku wantinytjaku. Panya anangu nyara paluru tjana anangu kutjupa nyakula palunya yunpa munu mantara wirutjara ngaranyangka kutju nyakula wirunmankupai, munuya ungu kulintjita nyakunytja wiya alatjitu.

¹³ Tjinguru kutjupa tjarangku ngali wangkanyangka kulira ngalinya kata kawakawanmananyi ngunti wangkanyangka-palku. Palu palya, ngali wantira Godanya pukulmankunytjikitjangku kutju kawakawa purunytju tjukurpa wangkanyi. Ka tjinguru kutjupa tjuṭangku ngali wangkanyangka kulira palyanmananyi, ka ngali kulira kanany-kananyarinytja wiyangku wantinyi panya ngali nyuranya kunpuntjikitjangku kutju tjukurpa wangkanyi.

¹⁴⁻¹⁵ Panya Christalu mukulya pulkangku kanyinnyangka ngali palula wanganarangku kulira palyalpai. Munuli tjukurpa nyan-gaku ninti panya wati kutju ilungu anangu uwankaraku ngalk-ilpa. Panya Godalu nyuntunya nganaṅanya kura tjuṭa palyantjit-janguru uwankara pungkula wiyantjaku ngarangi. Palu Jesunya nyuntumpa nganampa anga-ilungu anangu uwankaraku ngalkilpa nganaṅa wankaringkula palula kutju wanganarangku kulintjaku. Panya paluru ilunytjatjanu wankaringkula pakanu nganaṅa palunya kutju wanara pukulmankunytjaku, walytjangku pukulmankunytjaku wiya.

¹⁶ Nganmanytjuli anangu tjuṭa nyangangi anangu mantatja kulilpai tjuṭa purunytju. Panya nyara paluru tjana anangu kutjupa nyakula utitja tjuṭa kutju nyakupai yunpa munu mantara munu anangu paluru wangkanyangka kulu kulilpai munuya utitja nyanga palula

tjanalanguru kutju anangu palunya wirunmankupai, munta tjinguru palunya kuranmankupai. Ka panya ngali palu purunytju Christanya nganmanytju nyangangi. Palu kuwarili nintiringkula palunya tjukarurungku kulini, munuli anangu tjuta kulu tjukarurungku kulini utitja tjuta kutju nyakunytja wiyangku.

¹⁷ Panya anangu kutjupa Jesuku walytjaringkunyangka Godalu mulapa kampa kutjupankupai kuwaritjaringkunyjtaku. Panya nganmanypa paluru iwara kurangka anangi, palu paluru Jesuku walytjaringkunyangka Godalu palunya iwara palyangka tjunu, ka paluru kura wantira kampa kutjuparingu munu kulintja kuwaritjaringu.

¹⁸ Uwa, Godalulanya kampa kutjupanu, panya paluru Jesunya Christanya iyanu nganampa ngalkilpa ilunytjaku, ka nyara palulanguru nganaṅa wankaringu ka Godanya nganampa kalyparingu. Munu paluru nganaṅanya wituṅu anangu kutjupa tjutangka parajtakultjunktunytjaku Tjukurpa Palya Jesunyatjara tjana kulira mulamularingkunyangka Godanya tjanampa kulu kalyparingkunyjtaku.

¹⁹ Panya Godanya Jesula Christalanguru anangu uwankaraku kalyparingu paluru nganampa ngalkilpa ilunyangka munu paluru nganaṅanya pungkunytjaku wiyaringu. Munulanya paluru wituṅu tjukurpa nyanga wiru palunya anangu tjutangka para-wangkanytjaku tjana kulira mulamularingkunyangka Godanya tjanampa kulu kalyparingkunyjtaku.

²⁰ Uwa, ngali Godaku tjakulpa para-ngaranyi, panya paluru ngalilawanungku wangkanyi tjukurpa Jesunya Christanyatjara anangu tjutanku kulira palumpa mulamularingkunytjaku. Palulanguruli nyurala kurunpa winkingku wangkanyi Godanya nyurampa kalyparingkunyangka nyura wanganarangku kulintjaku, panya Christanya nyanga palumpa mukuringanyi.

²¹ Panya paluru palya mulapa kura palyantja wiyatja alatjitu, ka nganaṅa anangu mantatja kura palyalpai tjuta, ka Godalu nganaṅanya pungkunytjaku ngarangi. Palu paluru Christanya tjunu nganaṅa kura palyantjitjanguru nganampa ngalkilpa anga-ilunytjaku. Ka nyara palulanguru Christanya nganampa ngalkilarinyangka nganaṅa wankaringu Godalu nganaṅanya tjukarurunmara walytjanmankunytjaku.

6

¹ Uwa, ngali Godala tjungurinkula warkarinyi nyuranya wangkara kunpuntjikitja. Panya Godalu nyurampa pukultju pulkangku palyanu, kali nyuranya wangkara pulkara wituwituṅi nyura mulamulangku kulira palunya rawangku wanantjaku wantinytja wiyangku.

² Panya Godalu iriti wangkanytja alatji ngaranyi nyiringka, "Ngayulu nganmanytju kulinu ngula nyuranya wankarunkunytjikitjangku.

Mununa tjinṅu panya paluru wirkankunyangka nyuranya tjukarurungku wankarunu." *

Alatji Godalu wangkangu tjukurpa nyanga palunya. Ka mulapa kuwari ngaranyi Godalu nyuranya pukultju pulkangku wankarunkunytja. Kaya kulira rawangku palunya wananna wantinytja wiyangku.

* 6:2 Aitjayaku 49:8

³ Uwa, ngali Godaku war̄ka tjukarurungku kulira palyani nyura nyakula tjukarurungku kulintjaku palunya. Tjinguru ngali nguntin-gunti palyannyangka nyakula nyura ngalina wiyamanama muntu Godanya kulu wantima. Palula-tawarali tjukarurungku palyalpai.

⁴ Panya anangu winkingku nyanganyi ngali Godaku war̄ka palyannyangka, kali mukuringanyi tjana ngalina rawa tjukaruru war̄karinyangka nyakuntjaku. Munu palulanguru pika kutjupa kutjupa tjuṭa ngalila wirkankunyangka ngali wantinytja wiyangku Godaku war̄ka tungun-tunguntu titutjarangku palyani.

⁵ Panya kutjupa-araya Jesunya wantipai tjuṭangku ngalina pulkara pungkupai, kutjupa-araya ngalina tjailangka tjarpatjukupai, kutjupa-araya anangu kutjupa tjuṭa tjunguringkula kaputurira wangkara ngalimpa pikaringkupai. Ka ngali pulkara war̄karipai mungangka kalala, munuli kutjupa-ara paltjatjiratja nyinapai munuli kunkunpa wiya nyinapai. Palu ngali pulkara kulira tjituru-tjitururinytja wiyangku Godaku war̄ka rawangku palyalpai wantinytja wiyangku.

⁶ Munuli tjukaruru palyanyku nyinapai munuli Godaku tjukurpa nintingu kulilpai, munuli purkarangku kulilpai mirpanarinytja wiyangku, munuli anangu tjuṭaku ngaltunytju pukultju nyinapai. Ka panya Kurunpa Milmilnga ngalila tjungu nyinanyi, kali anangu tjuṭaku pulkara mukuringkupai kurunpa winki. Kaya anangu tjuṭangku ngalina alatji palyannyangka nyakula kulilpai, "Mulapa nyanga pula Godaku war̄ka tjukarurungku palyani."

⁷ Uwa, ngali panya tjukurpa tjukaruru anangu tjuṭangka wangkapai, munuli Godalu witulya pulkangku nintinnyangka palumpa war̄ka tjukarurungku palyalpai. Ka anangu tjuṭangku ngalina kurannyangka ngali kuraringkunyitja wiya tjukaruru alatjitu nyinapai, kalinya tjana puṭu kurara nyakupai tjukaruru nyinanyangka. Panya wati kulatatjara kutitjitarara ngaranyangka warmalangku puṭu wakalpai, palu purunypaya ngalina tjukaruru Godalawanu nyinanyangka puṭu kuralpai pikaringkunyangka nyakuntjikitjangku.

⁸ Kaya anangu kutjupa tjuṭangku ngalina wangkara walytjanmara walkulpai. Kaya tjara kutjupangku ngalina analpai. Kaya tjara kutjupangku ngalila wanganarangku kulilpai. Kalinya tjara kutjupangku warkipai, kaya tjara kutjupangku ngalina nguntinmankupai, palu ngali Godaku war̄karira tjukarurungku kutju wangkapai ngunti wangkanytja wiyangku.

⁹ Panya anangu winkiya ngalimpa ninti nyinanyi, palu kutjupa tjaraya ngalimpa ngunti ngurparingkupai. Kutjupa-arali nguwanpa ilungi, palu wiya, wankatuli nyangatja nyinanyi ilunytja wiya. Kalinya kutjupa tjuṭangku kura palyannyangka-palku pulkara pungangi, palu ngali ilu wiya alatjitu nyinara Godaku war̄ka tungun-tunguntu palyani.

¹⁰ Uwa, rawangkuya ngalina kuralpai tjituru-tjituru palyantjikitjangku, palu ngali kurunpa pukularipai alatjitu. Kutjupa-arali maralpa nyinapai mani munu mantara wiya. Palu palya, panya ngali maraltu anangu tjuṭangka Godaku tjukurpa wangkapai, kaya kulira pulkara pukularipai kurunitja pulka mantjintjatjanungku. Uwa, kuwarili maralpa nyinanyi kutjupa kutjupa tjuṭa kanyintja wiya,

palu palya panya ngali Jesuku walytja nyinara uwankara kanyini Godalanguru.

¹¹ Palu walytja wiru tjuṭa, ngura pala Karintjala nyinanytja tjuṭa! Nyangatjali utingku nyurala wangkanyi kumpilpa wiyangku, panya ngali nyurampa pulkara mukuringkula nyurala wangkanyi.

¹² Uwa, ngali rawa nyurampa mukuringangi kurunpa winki, nyuranyali watarkurira wantinytja wiya alatjitu. Palu tjinguru nyura ngalimpa nganmanypa kurunpa winki mukuringkunyttatjanungku nyura kuwari ngalinya wantinyi nguwanpa.

¹³ Palu kulilaya! Ngali nyurampa pulkara mukuringanyi, panya wati palumpa tjtji tjuṭaku pulkara mukuringkupai, palu purunypa ngali nyurampa pulkara mukuringanyi mama purunypa. Ka uti nyura ngapartji kurunpa winkitu ngalimpa mukuringama.

Godanya Wantipai Tjuṭa Munu Godaku Walytja Tjuṭa Putu Tjungu Nyinapai

¹⁴ Walytja wiru tjuṭa! Tjunguringkuwiyangkuya wantima Jesuku mulamularingkupai wiya tjuṭangka! Wanyu tangkiyingku munu pulukangku tjungungku wakina ilara katipai? Wiya. Nyara palu purunypa Jesuku walytja tjuṭa munu anangu mulamularingkupai wiya tjuṭa putu tjungu ngaranyi. Panya anangu Godala wanganrangku kulilpaingku munu anangu Godala tungunpungku-paingu tjungungku putu wirura palyalpai. Panya kalala munu munga tjungu ngaranytja wiya, palu purunypatu.

¹⁵ Ka wanyu Christalu pula Satantu tjukurpa tjungungku wangkara kulira palyalpai? Wiya alatjitu. Ka palu purunypa Jesuku walytjangku munu Jesuku walytja wiyangku putu tjungungku kulira palyalpai.

¹⁶ Kaya Godaku walytja tjuṭangu wanyu Godaku timpulangka god ngalya-ngalya pununguru palyantja tjuṭa tjunkula walikulpai? Wiya. Palu kulilaya! Nyuntu nganana Godaku timpula purunypa ngaranyi, panya paluru nganana ungu nyinanyi. Panya Godalu iriti wangkanytja nyiringka ngaranyi alatji, "Ngayuluna tjanala ngurararira nyinaku, mununa tjanala tjungu para-pitjalinkuku.

Ngayuluna tjanampa God pulka nyinaku, kaya anangu nyanga paluru tjana ngayuku walytjapiti mulapa nyinaku." *

¹⁷ Munu palulanguru Godalu piruku alatji wangkangu, "Ngayuku mirpantju tjuṭangkaya tjunguringkuwiya mauntalpa nyinama.

Munuya kutjupa kutjupa kura ngaranyangka pampulwiyangku wantima.

Kana nyuranya pukultu altira kanyilku.

¹⁸ Mununa nyurampa Mama alatjitu nyinaku.

Ka nyura ngayuku katjapiti untalpiti nyinaku."

Alatji Godalu mayatja witulya pulkangku wangkangu. *

7

¹ Uwa, walytja wiru tjuṭa! Tjukurpa nyanga palunya tjananya Godalu nganannya wangkara kalkunu. Kala palulanguru uti

* 6:16 Itjikilku 37:27 * 6:18 2 Samuelku 7:14

kura kutjupa kutjupa uwankara wantima pampuntja wiyangku kuraringkula Godalanguru pařuringkunyťjaku-tawara. Utila Godaku nguluringkula palula wanganarangu kulira tjukaruru mulapa nyinama munula palunya kutju walkunma.

Paulanya Pukularinyťja

² Palu uti nyura ngalimpa mukulya nyinama wantinyťja wiya. Panya ngali nyuranya kurantja wiya, munuli nyuranya wituwituntja wiyatu kura palyantjaku, munuli nyuranya ngunti kurantja wiyatu kutjupa kutjupa mantjintjikitjangku. Alatji nyura kutjupa tjuťangku ngalina ngakara wangkara wantipai kulintja wiyangku.

³ Kaņa lita nyangangka nyuranya anangura wangkanyťja wiyatu, panya ngayulu nyurampa pulkara mukuringanyi, panya alatjina nyurala nganmanyťju wangkangu, mununa rawangkuťu nyuranya mukulyangku kulini. Tjinguru ngayulu iluku, tjinguruna wankatu nyinaku, palu tituťjarangka nyuranya kulini watarkurinyťja wiyangku.

⁴ Uwa, ngayulu nyurampa mulamularinganyi alatjitu. Mununa anangu tjuťangka nyuranyatjara wangkara mirawanipai mununa nyuranya kulira pulkara pukularipai kurunpa winki. Panya pika kutjupa kutjupa tjuťa ngayula wirkankupai ngayunya tjituru-tjituru palyantjikitja, palu nyuranya kulirana pulkara alatjitu pukulariny.

⁵ Mungatu ngali manta nyanga Matja-tuniyala wirkanu, kali kuliningi nyinara pakuwiyaringkunyťjikitjangku. Palu wiya, panya anangu tjuťa ngalimpa pikaringangi munulina rawangku kuraningi, kali nguluringangi.

⁶⁻⁷ Palu Godalu panya tjituru-tjitururinyangka pukulmankupai munu wati panya Taitatjanya ngalilakutu wirkakatingu. Kali nyakula pulkara pukularingu, munuli tjukurpa nyuranyatjara wangkanyangka kulira pulkara pukularingu, panya nyura kunyu palunya pukulmara kanyiningi palangka. Ka paluru ngayula wangkangi alatji, "Nyara paluru tjana panya nyuntunya nganmanyťju kurantjatjanu kuwari nyuntumpa pulkara ngalťuringanyi munuya kalyparingkula pulkara mukuringanyi nyuntunya piruku nyakunyťjikitja." Alatji Taitatjalu ngayula tjakultjunu kaņa kulira pulkara pukularingu.

⁸ Uwa, lita nganmanyitja panyana walkatjura ma-iyana nyurampa. Ka nyura tjinguru lita nyara palunya nyakunyťjatjanu tjituru-tjitururira ngayuku kuraringu. Kaņa kuliningi, "Uťina panyatja wantima lita walkatjura iyantja wiyangku." Mununa palulanguru piruku kuliningi, "Wiya palya, tjana rawa tjituru-tjituru nyinanyťja wiya."

⁹ Mununa kuwari pulkara pukularingu tjukurpa nyuranyatjara kulira, panya mulapa nyura lita ngayuku mantjira unyťju kutju ngayuku kuraringkula tjituru-tjitururingu munu nyara palulanguru nyura kulinu, "Munta-uwa, mulapa nganana kura palyaningi." Munu nyura kunťaringkula kura wantingu. Nyara palulanguru kutjuna nyurampa pulkara pukulariny nyura kura wantinyťjtjanguru, tjituru-tjitururinyťja-nguru wiya. Panya nyura ngayuku lita nyakula tjituru-tjitururinyangka Godalu nyuranya nintinu, ka nyura kulira kunťaringkula kura wantingu munu nyura kampa kutjuparingu palunya tjukarurungku wanantjikitja.

¹⁰ Uwa, panya ngali Godaku tjukurnguru nyuranya wangkara tjukaruruningi ka nyura kulira mirpanarira tjituru-tjitururingu. Palu tjituru-tjitururinytja nyangatja palya, panya Godalu tjituru-tjitururinyangka nyuranya kampa kutjupanu kura wantira wanar-inkunyjtaku. Palu tjinguru ngali tjukurpa mantatjanguru nyuranya wangkara painnyangka nyura kulira mirpanarira tjituru-tjitururiku munu palulanguru kurunpa wituwuringkuku alatjitu Godalakutu aruringkunyjtja wiya munu nyura ngula ilura ngura kurakutu ankuku.

¹¹ Palu nyura panya Godaku tjukurpa kulira mirpanarira tjituru-tjitururinyangka Godalu nyuranya wiru mulapa palyanu. Panya wati kutjungku nyuralanguru ngayunya kuranmanangi, ka nyura palula kutjunguru ngayuku kuraringu. Ka pala palulanguru Godalu nyuranya uwankara kuntaringkunyjtaku palyanu lita panya ngayulu iyantjitjangu. Ka nyura tjituru-tjitururira kampa kutjuparingu munu nyura wati panya palumpa mirpanarira palunya pungkula nintintjikitja mukuringangi paluru rawangku kurantjaku-tawara. Uwa, Godalu nyuranya tjituru-tjituru palyannyangka nyura kulira tjukarururingu munu nyura kuwari wirura tjukarurungku palyani. Kana kulini, "Mulapa paluru tjana ngayunya kurantjatjanu piiwiyaringu munuya kuwari ngayuku pulkara mukuringanyi."

¹² Ka panyana lita palatja nyurampa walkatjunu wati panyangu ngayunya kurantjitjanguru wiya. Palu ngayulu lita palatja walkatjunu nyura Godanya kulira pina alaringkula kulintjaku alatji, "Munta, kurangkula Paulanya ngunti kuraningi, panya nganana palumpa pulkara mukuringanyi."

¹³⁻¹⁴ Ka wati Taitatjalu kuwari pitjala ngalila tjakultjunu nyura ngalimpa pulkara mukuringkunyjtja. Kali palulanguru kulira pulkara pukularingu nyurampa.

Munuli wati nyanga Taitatjanya nyurampa pukularinyangka nyakula ngali kulu pukularingi. Panya ngayulu lita panyatja wati palunya unku'iyanu nyuralakutu alatji wangkara, "Taitatja! Nyuntu tjanala wirkara ngayulu tjukurpa wangkanytjita tjakultjura, kaya nyuntula wanganarangku kulilku." Alatjina wati panya palunya wangkara iyanu nyuralakutu. Mununa lita panya palula nyurala tjukarurungku wangkangi, panya ngayulu titutarangku nyurala tjukurpa tjukururu kutju wangkapai.

Palu Taitatjalu ma-pakara unngu kulinini, "Tjinguruniya wantiku ngayulu Paulaku tjukurpa tjanala wangkanyangka." Munu paluru nguluringangi nguwanpa lita panya palunya nyurala nintintjaku. Palu nyurala nintinnyangka nyura wanganarangku alatjitu kulinu Taitatjala, munu nyura ngayulu tjukarurungku wangkanytja kulinu. Ka nyara palulanguru Taitatjanya pulkara pukularingu, munu paluru malaku wirkara ngayula tjakultjunu nyura panya palumpa ngalimpa pukularinytja. Kana ngayulu ngapartji nyurampa pulkara pukularingi.

¹⁵ Uwa, Taitatjalu nyuranya rawangku kulini nyurampa pulkara mukuringkula, panya nyura paluru ma-pitjanyangka kulira tjuni kura tjulpilypa nguwanpa palumpa pataningi. Munu panya nyura paluru wirkankunyangka pukultu altira tjarpatjunu nyurampa ngurangka munu wirura kanyiningi. Munu panya nyura palula wanganarangku

kuliningi paluru wangkanyangka. Nyara palulanguru paluru kuwari nyuranya rawangku mukulyangku kulini.

¹⁶ Kaņa ngayulu kulu nyuranya pukultu kulini nyura rawangku Godanya wanganarangku wanannyangka munu ngayulu mulamularinganyi nyura rawangku wanjantjaku wantinytja wiyangku.

8

Matja-tunianya Ngurara Tjutangku Intjanungku Ungkunyitja

¹ Palu walytja wiru tjuća! Tjukurpa nyangatjaya kulinma! Panya manta nyanga Matja-tunialaya Jesuku walytja tjuća ngura tjućangka tjunguringkupai utulu kutjupa utulu kutjupa. Munu Godalu tjananya pukultju pulkangku kanyinnyangka tjana anangu Jesuku walytja kutjupa tjuća ngaltutjara nyinanyangka nyakula intjanungku ungpai.

² Munuya anangu mirpantju tjućangku tjananya rawangku kurannyangka tjana wituwituwanu alatjitu pukulpa nyinapai, munuya mani tjukutjuku kanyintjatjanungku paluru tjana ngaltutjara kutjupa tjuća palťjatjiratja nyinanyangka kulira intjanungku mani ma-iyangingi ngura nyara Jerusalemala nyinanytja tjućakutu.

³ Mulapaya tjukutjuku kanyintjatjanungku tjana pulka mulapa ungangi kurunpa ngaltunytjungku, kaņa ngayulu nyangu palunya tjananya, panya tjana mani ungpunytjatjanungku tjara kutjupa kanyintja wiya. ⁴ Ngayulu panya tjanala ngatjintja wiyatu anangu nyara Jesuku walytja tjućaku mani iyantjaku Jerusalemalakutu, panya paluru tjana alatjitya kurunpa winki mukuringkula ngayula tјapinu mani palumpa tjanampa ngayunya ungpunytjikitjangku. Panya tjana ungpunytjikitja pulkara alatjitu mukuringangi.

⁵ Ka ngali kuliningi, "Tjinguruya mani tjukutjuku kanyintjatjanungku mani tjukutjuku ungpuku." Palu wiya, tjana intjanungku alatjitu pulka mulapa ungu. Panya tjana nganmanypa Mayatja Jesuku walytjaringkunyťjatjanungku palula wanganarangku kulira palyantjikitja mukuringu. Munuya nyara palulanguru Godalu tjanala wangkanyangka ngalila wanganarangku kulintjikitja mukuringangi.

⁶ Kali wati panya Taitatjanya wituņu nyuralakutu malaku mapitjanytjaku, panya paluru nganmanytju nyurala wangkangu mani tjunkukatinytjaku anangu nyara Jerusalemala nyinanytja tjućaku. Munu kuwari paluru nyurala ma-pitjala piruku wangkaku nyura rawangku tjunkukatira pulkantjaku. Panya nganmanytjuli nyurala wangkangu intjanungku ungpunytjaku ngaltutjara tjuća.

⁷ Ka panya nyura mulapa kutjupa kutjupa tjuća wirura palyalpai anangu kutjupa tjućangka waintara nguwanpa, panya nyura Godaku pulkara mulamularingkupai, munu nyura tjukurpa wirura wangkapai, munu nyura tjukurpa tjućaku ninti pulka mulapa nyinanyi, munu nyura pukultu Godaku warka palyalpai pakuringkuwiyangku, munu panya nyura ngalimpa kulu pulkara mukuringkupai. Uwa, mulapa panya nyura kutjupa kutjupa uwankara wirura palyalpai. Palulanguru nyura uti Jerusalemala nyinanytja tjuća wantinytja wiyangku intjanungku ungama.

⁸ Palu ngayulu nyuranya mani pulka ungpunytjaku wituwituntja wiya, palu nyuralana tjakultjunanyi kutju alatji panya ngura nyara

Matja-tuniyalaya anangu muntjja tjuta nyinanyi intjanungku ungkupai. Ka tjinguru nyura kulu kulira tjana puruntju intjanungku ungama, kana nyakula kulilku, "Munta-uwa! Mulapa nyanganpa ngaltutjara tjutaku pulkara ngalturinganyi."

⁹ Nyura ninti Mayatja Jesuku Christaku panya paluru nganampa mukulya pukultju pulkanya nyinanyi. Paluru panya mantakutu pitjanytja kuwaripangka ngura ilkaringka Mama Godala tjungu wirura nyinangi kutjupa kutjupa winkitjara alatjitu. Palu paluru nganampa mukuringkula palumpa mama munu kutjupa kutjupa uwankara wantikatira pitjala mantangka itiringkula nganannya purunypa alatjitu nyinangi. Paluru Mamanya wantikatira maralpa pitjangu ngananalakutu munu panya ngaltutjara nyinangi, ka nyara palulanguru nganana palulawanu wankaringu Mamala tjunguringkula pukulpa nyinanytjikitja.

¹⁰ Panya nganmanytju yiya kutjupa nyura-warara Jesuku walytja tjutaku kulira ngalturingu nyara Jerusalemala paltjatjiratja nyinanyangka. Munu panya nyura ngaltunytjungku mani tjunkukatingi pulkaringkunyaangka tjanampa iyantjikitjangku. Palu nyura tjara kutju palyara tjunu munuya kuwaripangkutu iyantja wiya. Kana kuwari nyurala wangkanyi nyura panya tjunkunytjitjanga piruku pulka nguwanpa tjunkula iyantjaku.

¹¹ Ala! Wanyuya nyura kanyintjatjanungku mapalkungku tjunkula pukultu iyala, panya nyura nganmanytju pulka iyantjikitjangku kuliningi tjanampa ngalturingkula. Palulanguruya kulira mani mapalku iyala.

¹² Panya nyura pukultu muntjjangku ungkunyitjikitja mukuringkunyaangka Godanya nyurampa pukulariku. Kutjungku tjinguru mani pulka kanyintjatjanungku uti intjanungku pulka nguwanpa ungama. Ka kutjupanguku tjinguru tjukutjuku kanyintjatjanungku uti palu purunypatu intjanungku ungama tjukutjuku nguwanpa, ka Godanya kutjarakutu nyakula pukularinyi intjanungku ungkunyaangka, panya paluru nintjangu nyanganyi.

¹³ Palu ngayulu mani pulka ungkunyitjaku nyuranya wituwituntja wiya. Tjinguru nyura winki ungtulampa paltjatjiratjarira putu kulilku, kaya anangu nyara Jerusalemala nyinanytja tjuta mai pulka ngalkula paltja nyinaku.

¹⁴ Palu nyura kuwari pulka nguwanpa kanyintjatjanungku tjananya ungama, panya tjana paltjatjiratjangku kuwari putu kulini. Ka tjinguru tjana ngapartji ngula pulka kanyintjatjanungku nyuranya ngapartji alpamilalku nyura paltjatjiratja nyinanyangka.

¹⁵ Panya nyiringka iriti walkatjunkunytja ngaranyi Israelkunu tjutanguku palyantja nyanga alatji,

"Panya tjana mai ini 'manna' ilytjingga uraningi kutjupa tjutanguku pulka nguwanpa, kutjupa tjutanguku tjukutjuku nguwanpa. Palu uwankaratuya paltja pukulpa nyinangi." *

Paulalu Taitatjanya Tjananya Karintjalakutu Iyantja Mani Urantjaku

* 8:15 Exodus 16:18

¹⁶ Uwa, ngali nyurampa pulkara mukuringanyi, ka Godalu wati nyanga Taitatjanya kulu palu purunypatu palyanu nyurampa pulkara mukuringkunyjtaku. Kali pala palulanguru Mama Godanya walkuni.

¹⁷ Panya wati paluru pulkara mukuringu nyuralakutu ankunytjikitja, kali palula tjaminu paluru ankunytjaku, ka kulira pukułtu uwanmanu.

¹⁸ Ka wati kutjupa kulu ngali nyuralakutu ma-iyani Taitatjala tjungu. Panya wati nyara palunyaya Jesuku walytja tjutangku ngura winkinguru mirawanipai, panya paluru Tjukurpa Palya Jesunyatjara wirura titutjarangku wangkanyangka.

¹⁹ Nyara palunyaya Jesuku walytja tjutangku ngurkantanu ngalila tjunguringkula ankunytjaku munu nganaņa jungungku mani panyatja mantjira ma-katinyjtaku Jerusalemalakutu. Panya nyara palulaya ngaltutjara tjutangku Godanya pulkara mirawaniku nganaņa mani katira ungkanyangka munuya kulilku, "Munta-uwa, mulapa nyan ganpa nganaņanya alpamilantjikitja pulkara mukuringanyi."

²⁰ Ka ngali mani nyanga pulkanya atunymara tjukarurungku kanyini kutjupangku ngalina ngunti ngukantjaku-tawara.

²¹ Panya ngali Godala mirangka titutjarangku tjukarurungku palyantjikitja mukuringanyi munu anangu tjutangka mirangka kulu.

²² Munuli wati Jesuku walytja kutjupa kulu Taitatjala pulala tjungu ma-iyani. Panya wati nyanga palunyali warka kutjupa kutjupa rawangku ungangi, ka paluru warka uwankara wanganarangku kulira palyanangi pakuringkuwiyangku. Munu paluru nyurampa pulkara mulamularingu nyura Jerusalemala nyinanytja tjuța mani ungkunyjtikitja mukuringkunyangka kulira, munu kuwari pulkara pukularira nyuralakutu ma-pitjala nyuranya alpamilantjikitja mukuringanyi.

²³ Ka Taitatjanya panya ngayula tjungu warkaripai malpa wiru nyuranya alpamilantjikitja. Ka wati panya kutjupa kutjara Jesuku walytja tjutangku ngura nyanga Matja-tunyalanguru ngurkantanu Taitatjala tjunguringkula nyuralakutu ankunytjaku. Ka paluru pula nyurampa pulkara warkarinyangka nyakula nyura Christanyalta mirawanira walkulku.

²⁴ Uwa, paluru tjana nyurala ma-wirkankunyangkampa ngaltunytjungku tjananya atunymara kanyinma. Ka nyura alatji palyannyangka Jesuku walytja tjutangku manta nyanga Matja-tunyalawanu nyinanytja tjutangku kulira nintiringkuku nyura mukulya pulka nyinanyangka, panya ngali tjanala nganmanytju tjakultjunangi nyuranya mirawanira.

9

Wanganarangku Alpamilantjaku

¹ Palu nyaakupa nyuranya piruku wangkara wituwitunma mani tjunkunytjaku Jesuku walytja tjutaku nyara Jerusalemala ngaltutjara nyinanyangka?

² Alatjitu nyura kurunpa winki kulira mukuringu tjananya ungkunyjtikitja. Kaņa ngura nyanga Matja-tunyalala Jesuku walytja tjutangka wangkara nyuranya mirawaningi panya nyura mani rawangku tjunkukatinytja. Kaya kuwari tjana kulu nyuranya kulira nyura

purunyjtutu ungunyjtikitja mukuringanyi anangu nyara Jerusale-
mánya ngurara tjuta.

3-4 Kana kuranyungku wati nyanga mankurpa Taitatjanya tjananya
nyuralakutu ma-iyani nganmanytju nyurala wangkanytjaku. Kana
ngayulu ngula ma-pitjala mani riti ngarinyangka nyakuku. Pa-
nya ngayulu nyanga Matja-tunianya ngurara tjutangka nyuranya
mirawaningi, kaya tjinguru kuwari kutjupajara ngayula tjungu
nyuralakutu ma-pitjaku nyuranya nyakunyjtikitja. Kana kulinigi,
“Munta tjinguruya anangu nyangantu ma-pitjala mani putu nyaku-
lampa ngayunya analku, kana kunaringkuku nyuranya ngunti mi-
rawaninytjatjanu, ka nyura kulu palulanguru kunaringkuku.”

5 Pala palula-tawarana Taitatjanya tjananya kuranyungku ma-iyani.
Ka paluru tjana ma-wirkara nyurala wangkaku mani panya nyura
nganmanytju kalkuntjatjanungku utulura tjunkunyjtaku. Kanawi
ngula ma-pitjala nyawa uwankaratu utulu ngarinyangka ngayulu
Jerusalemalakutu katinytjaku. Mununa kulilkulta, “Munta, mulapaya
nyangantu mani munytjangku alatjitu unganyi tjana walytjangku
kulira mukuringkula.”

6 Uwa, mani ungunyjtikitjangkuya wanyu tjukurpa kampa kutjupa
kulila tjukurpa nyangatja! Tjinguru ngayulu uninya mankurpa man-
tangka tjunkuku mununa ngula mai kururingkunyangka mankurpatu
mantjilku. Palu ngayulu uninya tjuta tjunkunyjtatjanungku mai
kururingkunyangka tjuta mulapalta mantjilku.

7 Panya anangungku intjanungku ungunyangka Godanya pulkara
pukularipai. Ka nyura uti pukultu ungama tjituru-tjitururinytja
wiyangu, panya kutjupangu nyuranya ungunyjtaku pulkara
wituwituntja wiyatu. Palu nyura uti kutjungku kutjungku walytjangku
kulinma mani yaaltjitu tjananya ungunyjtikitjangku munuya nyura
kulintjatjanungku pukultu alatjitu ungama, tjinguru tjukutjuku, tjin-
guru pulka. Ka Godanya nyurampa pukulariku nyura intjanungku
ungkunyangka.

8 Panya paluru nyuranya pukultju pulkangu kanyilpai nyura
pukulpa palya alatjitu nyinanytjaku munu paluru nyuranya intja-
nungku ungupai pulka mulapa nyura anangu kutjupa tjuta kulu
ngaltutjara nyinanyangka nyakula ngapartji intjanungku ungunyt-
jaku.

9 Panya nyiringka iriti walkatjunkunyjtja ngaranyi alatji,
“Wati nyara paluru ngaltutjara tjuta rawangu intjanungku ungupai.
Ka Godalu palumpa watarkurinytja wiyangu rawangu kulilpai
paluru intjanungku ungunyjtija.” *

10-11 Panya Godalu nyuranya uninya tjuta ungupai mantangka
tjunkula mai pakaltjingantjaku munu mai kururingkunyangka
ngalkuntjaku. Uwa, paluru nyuranya ungupai paltja nyinanytjaku.
Munu paluru nyuranya pulka mulapalta ungunyjtaku nyura anangu
kutjupa tjuta ngapartji rawangu intjanungku ungunyjtaku. Ka
nyura ungunyangka nganana ngapartji tjananya katira ungunyjtaku
nyara Jerusalemala nyinanytja tjuta, kaya nyura nyanga ungunyjtjan-
guru Godanyalta pulkara pukularira mirawanira walkulku.

* 9:9 Psalm 112:9

¹² Uwa, nyura mani ungknyangkaya Jesuku walytja tjuṭangku mai kuka mantara kuḷu mantjira pulkara pukulariku, munuya Godanya titutarangku pukultu mirawaniku nyura ungknytjtjanguru.

¹³ Panya nyura nyanga alatji intjanungku ungknyangka anangu tjuṭangku pukularira Godanya mirawanira walkulku munuya kulilku alatji, “Mulapaya Tjukurpa Palya Jesunyatjara kulilpai, panya paluru tjana wanganarangku kulira ngaltutjara tjuṭa intjanungku ungkupai, nyara Jerusalemala nyinanytja tjuṭa munu ngura kutjupitja tjuṭa kuḷu.” Alatjiya nyuranya kulilku.

¹⁴ Munuya nyara palulanguru nyurampa pulkara mukuringkula kurunpa winkingku Godala nyurampa tjapilku paluru nyuranya pukultju mukulya pulkangku kanyinyangka.

¹⁵ Uwa, utila Godanya mirawanima panya nganannya paluru pulka mulapa ungu Jesunya Christanya wiru mulapa kutjupa uwankarangka waintara.

10

Paulalu Tjananya Paintja Kampangkaṭu Wangkanyangka

¹⁻² Palu nyura kutjupa tjuṭangku ngayunya alatji wangkapai, “Paulanya ngura nyangangka wirkara ngananaḷa tjuṅgu nyinara paluru kalypangku purkarangku alatjitu wangkapai, palu ngura kutjupangka patu nyinara paluru lita walkatjura nganannya pailpai rapangku alatjitu.” Palu wiya, nyangatja nyura ngunti kulintja. Wanyuya Jesunya kulila! Panya paluru kalypa munu kananykananypa nyinapai wiya. Ka ngayulu mukuringanyi nyurala ma-wirkara palu purunytju nyuranya purkarangku kalypangku wangkanytjikitja nyura ngayunya wanganarangku kulintjaku. Palu kutjupa tjarangkuni wangkapai ngayulu mantatja kutju kulilpai anangu tjuṭangku nyakula ngayunya mirawaninytjaku. Palu nyan-gatjaya tjana ngunti kulini, ka ngayuku ngaranyi nyurala mirangka palunya tjananya rapangku anangura tjukarurungku wangkara paintjaku.

³⁻⁴ Mulapa nganana mantangka nyinanyi anangu mantatja kulilpai tjuṭangka tjuṅgu, palu nganana palunya tjananya purunypa wiya. Panya tjana mantangka nyanga nyinara kulata tjiliratjara pikaringkupai anangu utitja tjuṭaku. Palu nganana kulata kutjupatjara pikaringanyi arkayitja kurunitja tjuṭaku. Panya nganana mamu arkayitja tjuṭangka pikaringknyangka Godalu nganannya witulyankupai tjanampa pikaringkula tjananya upa palyantjaku.

⁵ Panya mantatja kulilpai tjuṭangku tjukurpa ngunti tjuṭa kananykananytju wangkara anangu tjuṭa Godalanguru mauntankupai paluru tjana palumpa nintiringkunyitjaku-tawara. Palu alatji ngunti wangkanyangka nganana tjukarurungku wangkara nintilpai anangu tjuṭangku tjukurpa tjukaruru kulira kampa kutjuparira Jesuku nintiringkunyitjaku munu palumpa walytjaringkula palula wanganarangku kulintjaku.

⁶ Uwa, nyura kulini? Panya ngayulu nyuranya tjukurpa tjukaruru nintiningi, ka panya nyura kulira Jesuku nintiringu munu palula wanganarangku kulinigi. Kana mukuringanyi nyura rawangku

palula wanganarangku kulira palyantjaku. Palu tjinguru nyura palula rawa tungunpungama, ka ngayulu nyuranya pailku alatjitu.

⁷ Palu nyura utitja tjuta kutju nyakula ngunti kulilpai. Tjinguru kutjupangku kulini, "Mulapa ngayulu Jesuku Christaku walytja nyinanyi." Uwa palya-manu palatja, palu uti paluru piruku kulinma panya ngayulu kulu palu purunypa Jesuku walytjatu nyinanyi.

⁸ Panya Mayatja Jesuluni ngurkantara witu nu tjukurpa palumpa wangkara nyuranya kunpuntjaku. Ka warka nyanga palunya rapangku palyara ngayulu kunta wiya ngaranyi. Ka nyura tjinguru ngayunya kulilpai kanany-kananytju wangkanyangka-palku, munu nyura tjinguru kulini, "Mayatja Jesulu tjinguru palunya iyanu nganananya upantjaku." Palu wiya, paluru ngayunya witu nu nyuranya kurunpa rapantjaku nyura palunya titutjarangku wanantjaku.

⁹ Kutjupa tjutangkuniya wangkapai, "Nyarangku lita walkatjura nganananya ngulutjingani." Palu wiya, ngayulu ngulutjingantjikitjangku lita nyurampa walkatjungkunyta wiya.

¹⁰ Palu kutjupa tjarangkuya ngunti wangkapai alatji, "Paluru nganananya litangka patunguru mirpanarira pailpai, palu nganana la Wirkara paluru kalypanku kitikiti nguwanpa wangkapai nganampa ngulurinkula nguwanpa." Alatjiniya kutjupa tjutangku wangkapai.

¹¹ Palu utiya paluru tjana kulinma! Panya ngayulu tjananya litangka pulkara painu mununa palu purunytjutu ma-pitjala utingku tjananya wangkara pailku, panya ngayulu litangka walkatjungkunytjita purunypatu.

¹² Panya kutjupa tjarangkuya walytjangku kulira tjananku wirunmankupai, palu ngayulu paluru tjana purunypa wiya. Panya paluru tjana walytjangku kulira tjukurpa tjananku walytjangku kutju palyalpai munuya tjukurpa palunya tjananya kutju kulira mirawanipai. Palu tjana ngurpangku walytjangku wirunmankupai munuya nyara palulanguru kata kawakawaringkupai.

¹³ Ka ngayulu nyanga purunypa mirawanira wangkapai wiya, panya Godaluni witu nu ngura tjutakutu ankula Tjukurpa Palya Jesunyatjara kutju tjakultjungkunytjaku nyurala kulu. Kana warka nyanga palunya kutju ngayulu mirawanipai.

¹⁴ Kaya kulinma, panya Godalu ngayunya witunnyangka ngayulu Tjukurpa Palya Jesunyatjara nyurala tjakultjunu, mununa nyara palulanguru kutju walytjangku mirawaninyi.

¹⁵ Palu anangu kutjupangku warka wiru palyantjitjaku ngayulu nyakula kanany-kananyarira walytjangku mirawanipai wiya. Palatja tjanampa warka Godalu tjananya ungkunyta. Palu mulapa ngayulu lita nyangatja nyuralakutu iyani nyura nyakula kulira kunpuringkula rawangku Jesunya wanantjaku pakuringkuwiyangku. Kani tjinguru ngula Godalu ngayunya piruku nyuralakutu iyalku nyurala munu kutjupa tjutangka kulu pulkara warkarinytjaku, kaya anangu tjuta mulapa piruku Jesuku mulamularingkuku.

¹⁶ Mununa palulanguru nyurala waintara kulu wilurara ma-pitjala ngura kutjupa tjutangka Tjukurpa Palya tjakultjungkuku anangu watarkitja tjutangka. Panya wati kutjupangku nganmanytju wangkanytjitjangka ngayulu malawanungku ankula wangkapai

wiya ngayulu palyantjatjanungku-palku walytjangku ngunti mirawaninytjaku-tawara.

¹⁷ Panya nyiringka iriti walkatjungkuntja ngaranya nyanga alatji, "Nyuntu mirawaninytjikitja mukuringkulampa Mayatja Godanya kutju mirawanima paluru palyantjitja tjutanguru." *

¹⁸ Ka tjinguru anangungku kutjupa kutjupa wiru palyantjatjanungku walytjangku mirawaniku, ka nyura tjinguru kulilku Godanya anangu nyara palumpa pulkara pukularinytja-palku. Palu wiya! Nyaratja paluru walytjangku kulira mirawaninytja, kaya kulira mulamularingkuwiyangku wantima. Palu tjinguru Godalu anangu palunya palyanmankunyangka kulira kutju uti nyura anangu palunya palya kulinma.

11

Paulalu Ngunti Kuralpai Tjuta Paintja

¹ Uwa, nyura tjinguru mulamularingkuwiyangku wantinyi Jesulu ngayunya iyantjitjaku, kaniya mirpanarinytja wiyangku kulinma ngayulu kawakawa purunyaju nyurala wangkanyangka, panya ngayuluna piruku tjukutjuku wangkanytjikitja mukuringanyi.

² Panya Godalu nyuranya atunymara kanyini, palu purunypa ngayulu nyuranya atunymankunytjikitja mukuringanyi, panya wati kulypalpangku kungka ukari atunymara kanyilpai wati panya pikatjangku altinytjaku patara kutjupangku kurantjaku-tawara, palu purunypa nyuranya atunymankunytjikitja mukuringanyi nyura Christanya kutju wanantjaku.

³ Palu ngayulu nyuranya rawangku kulini tjinguru kutjupangku nyuranya kurannyangka nyura Christaku watarkurira iwara kutjupa wanalku, panya kungkawara Eve-anya iriti mulamularingu lirungku ngunti kurannyangka, nyara palu purunyarinytjaku-tawarana nyuranya kulini nyura Christaku pulkara mukuringkuntjaku.

⁴ Panya nganana tjukarurungku nyurala tjakultjunangi Tjukurpa Palya Jesunyatjara, ka panya nyura wanganarangku kulira Kurunpa Milmilngatjararingu. Palu panya kutjupa tjutangku pitjala tjukurpa Jesunyatjara-palku ngunti wangkara mukumukunnyangka nyura palumpa tjanampa mulamularingangi, munu kurunpa kutjupa ungkunyitjikitjangku wangkanyangka nyura kurunpa palunya mantjintjikitja mukuringangi Kurunpa Milmilnga wantira.

⁵ Panya nyara paluru tjananku kanany-kananytju wangkapai, "Nganana Jesulu iyantja tjuta, kutjupa tjutangka waintara." Palu tjana ngunti wangkapai, panya paluru tjana ngayula waintara nyinanytja wiya.

⁶ Uwa, tjana tjinguru kunta wiyangku anangu tjutangka wangkapai rapangku, ka ngayulu tjana purunypa wiya panya ngayulu kananykanany wiyangku kunta-kuntangku wangkapai. Palu ngayulu Godaku tjukurku ninti pulka nyinanyi, munu panya nyurala tjuta-arangku tjakultjunangi, ka panya nyura kulira ngayunya alatji kulinigi, "Mulapa wati nyangatja nintipuka nyinanyi. Tjinguru Godalu palunya nintiningi."

* 10:17 Jeremiah-ku 9:24

7 Munu panya ngayulu Godaku Tjukurpa Palya nyurala tjakultjunktjantjanungku maniku ngatjintja wiyangku wantingu, kani nyara palulanguru ngunti wangkapai tjutangku ngayunya ngunti kuranmanangi, "Nyuntu-manti tjukurtjara pulka wiya, wati kurakura nguwanpa." Alatjiniya wangkangi, panya paluru tjana tjukurpa wangkara nintintjantjanungku kananykananytju nyurala maniku ngatjilpai walytjangku tjukurtjara pulkanmara, ka panya nyura kulintjantjanungku tjananya mirawanira wanganarangku untkupai. Palu ngayulu wantingu nyurala tjukurpa Godaku wangkanytjantjanungku kananykananyarira nyurala ngatjintja wiyangku. Munu panyaniya ngayunya anara tjukutjukunmankunyangkana tjituru-tjitururinytja wiya nyinangi, panya ngayulu nyurampa pukularinyi nyura Jesuku mulamularingkula pulka nyinanytjaku.

8 Ka panya Jesuku walytja ngura kutjupitja tjutangku tjunguringkula ngayuku mani tjunangi mununiya ungangi nyurala ankula warakarinytjaku. Nyangatja panya ngayulu tjanala mantjinu mununa nyurala wirkara ngatjintja wiyatu Tjukurpa Palya nyurala tjakultjunktjantjikitjangku.

9 Mununa mani panya tjana untkunytja wiyaringkunyangka ngayulu nyurala ngapartji ngatjintja wiyangku wantingi. Palu Jesuku walytja kutjupa tjutangkuniya manta panya Matja-tuniyalanguru ngayunya mani katira ungu. Uwa, nyura kaar-kaararinytjaku-tawara panyana nyurala ngatjintja wiya alatjitu rawa nyinangi, mununa ngula kulu nyurala ngatjintja wiyangku wantiku.

10 Uwa, ngura tjutangka panyana nyangatja tjakultjunktupai, ka panya nyura manta pala Akayala nyinanytja tjutangku ngayunya putu markulku. Panya ngayulu tjukurpa Christanyatjara titutjarangku tjukarurungku para-wangkapai, palu purunypa para-wangkanyi tjukurpa panya nyurala maniku ngatjilwiyangku wantinytjanyatjara.

11 Ka nyangatja para-wangkanyangka nyura tjinguru kulini ngayulu nyurampa kuraringkunyangka-palku. Palu wiya, Godanya ninti ngayuku, panya ngayulu nyurampa pulkara mukuringanyi mununa rawangku nyuranya kulilpai.

12 Uwa, anangu tjutangka Tjukurpa Palya wangkanytjantjanungkuna maniku ngatjintja wiya alatjitu. Tjinguru ngayulu mani tjanalanguru mantjinnyangkampa anangu ngunti panya wangkapai tjutangku alatji wangkaku, "Mulapa Paulalu tjanala mani mantjiningi. Kala palya nganana ngapartji palu purunytjutu mani mantjini." Alatjingaraya tjinguru paluru tjana ngunti wangkara walytjangku tjananku mirawaniku, ka nyanga palula-tawara ngayulu anangu tjutangka ngatjintja wiyangku wantipai.

13 Panya nyara paluru tjanaya wangkatjara ngunti tjuta kuwari nyinanyi, panya tjana anangu tjuta ngunti kurantjikitja mukuringkupai tjukurpa tjukarurungku wangkara-palku Jesulu Christalu ngurkantara iyantjijangku-palku. Palu Jesulu tjananya iyantja wiyatu.

14 Ka ngayulu alatji wangkanyangka nyura tjinguru kulira urul-yaralku. Palu wiya, kulila! Panya mamu Satannga ayinayiniripai munu kutjuparira angelpa purunypa ngarapai tili pitalytji pulkatjara

nganana nyakula mulamularingkula kulintjaku alatji, "Nyangatja mulapa Godalanguru."

¹⁵ Kaya Satanku walytja tjuća kuwari palu purunypaťu nyinanyi munuya tjukururungku-palku ayinayinirira Godaku warķa-palku palyalpai. Palu ngula Godalu tjananya ngura kurakutu pařa iyalku kuralpai panya palunya tjananya.

Paulalu Palurunku Wangkanytja

¹⁶ Uwa, nyangatjana nyurala piruku wangkara mirawaninyi. Ka nyura tjinguru kulilku ngayulu kawakawaringkula wangkanyangka-palku, palu wiya. Kaya ngayuku mirpanarinytja wiyangku wantima, kana piruku mirawanira wangkama kawakawangku purunytju.

¹⁷ Palu Mayatja Jesuluni nyanga palu purunypa wangkanytjaku wituntja wiyatju. Palulanguruntju ngayulu walytjangku mirawaninyi kawakawa purunytju.

¹⁸⁻¹⁹ Panya kutjupa tjutangkuya kutjupa kutjupa tjuća palyantjanungku walytjangku mirawanipai, kana ngayulu ngapartji palu purunytjuťu walytjangku mirawaninyi nyura ngapartji ngayula kulin-tjaku. Wanyumpa kunyu nyura nintipukampa! Panya wati kawakawa tjuťangku nyurala ngunti wangkanyangka nyura pukultu kulilpai, palu tjana panya ngunti kuralpai tjuća.

²⁰ Ka paluru tjana nyuranya mayatjarira pauntjingara wituwitun-nyangka nyura mirpanaripai wiya, munu panya nyura ngunti kurara maniku ngatjinnyangka wanganarangku alatjitu ungkupai. Munu paluru tjana nyuranya ngunti wangkara kanany-kananytju warkira kurannyangka nyura kulilpai mirpanarinytja wiyangku alatjitu. Nyaaku nyura tjanala kulilpai?

²¹ Palu ngayulu paluru tjana purunytju palyantja wiya alatjitu, ka panyańi nyura palulanguru upa nyinanyangka-palku kulini. Palu wiya, ngayulu paluru tjana purunytju nyuranya pauntjingara wituwituntjikitjangku kulintja wiya.

Nyara paluru tjanayanku walytjangku mirawaninyangka ngayulu ngapartji walytjangkuťu mirawaninyi. Palu nyangatjana kawakawa purunytju wangkanyi unytjungku.

²² Palyaya paluru tjana wati lipuru tjuća nyinanyi, kana ngayulu kulu wati lipuru. Kaya palya paluru tjana Israelku pakalipiti nyinanyi, ka ngayulu kulu palumpa pakali nyinanyi. Palyatuya Aipuramalanguru nyinanyi, kana ngayulu palulanguruťu nyinanyi.

²³ Palyatuya Christaku warķaripai nyinanyi, palu ngayulu pulka mulapa palumpa palyalpai palula tjanala munkara nguwanpa. (Nyangatjanatju kata kurangku purunytju mirawaninyi unytjungku.) Panya ngura kutjupangka kutjupangka tjukurpa wangkanyangkaniya mirpanťju tjuťangku rawangku tjailangka tjarpatjunangi nyara tjananya purunypa wiya. Mununiya tjuća-arangku wiipangka pulkara alkaningi, kana tjuća-ara nguwanpa ilungu, panya ngayulu-mantu nyara tjananya purunypa wiya.

²⁴ Ka panyańiya Jewku mayatja tjuťangku pika pulka mulapa alkaningi wiipangka 39-arangku, mununiya piruku ngula tjinťu kutjupa palu purunypaťu pungangi 39-arangku. Mununiya palu purunypaťu ngula tjinťu mankurpa kutjupa piruku pungangi 39-arangku.

25 Kani mayatja Rome-anya ngurara tjutangku mankurarangu punungka pungu, kaniya kutjupa tjarangku kutjupa-ara pulingka atura nguwanpa iluntanu. Kana mankurara pautangka urungka ankula ngururpa katakatira minya-minyaringkunyaangka nguwanpa ilura wankaringu. Mununa kutju-ara pauta katakatira tjarpanyangka ngayulu punu kutju witera urungka ngarira tjinturingkula ngarira mungaringu. Tjinguruna nyara palula ara iluma.

26 Uwa, ngayulu panya ngura tjutangka tjukurtjara rawa parangarangi, kani kutjupa-ara uru pulkangku karungka ukalingkula nguwanpa iluntanu. Ka kutjupa-ara ngayulu iwarangka ankunyaangka wati kutitjunkturpai tjutangku ngayunya nguwanpa iluntanu. Ka panya kutjupa-ara Jew tjutangku ngayunya iluntankuntjikitja mukuringangitu, kutjupa-ara malikitja tjutangku ngayunya nguwanpa iluntanangi. Uwa, ngayulu pikawanu nguwanpa ilungi tawunu pulka tjutangka, munu ilytjinka, uru pulkangka kulukulu. Ka kutjupa tjutangku kulu Jesuku ngunti walytjaringkula ngayunya nguwanpa iluntanangi.

27 Kana nguwanpa ilunytjatjanungku warka nyanga palunya wantir'iyantja wiyangku pulka mulapa palyalpai titutjarangku. Kutjupa-araņa mungangka kulu warkaripai kunkunpa wiya alatjitu. Mununa kutjupa-ara mai mina kulu wantira warkaripai kutju. Mununa kutjupa-ara paltjatjiratja nyinapai, mununa wari pulkangka mantara unytjunpa kanyintja wiya tjititingkupai puyinnyangka walpa warangka.

28 Ka nyanga palu purunypa tjuta wirkankunyaangka ngayulu Jesuku walytja tjuta ngura tjutatja rawangku pulkara kulilpai tjana Jesunya rawangku wanantja-tjiratjangku.

29 Tjinguru Jesuku walytja kutjupa putu nguwanpa rapa nyinanyi, ka ngayulu palumpa pulkara ngalturingkupai mununa palunya rapantjikitja mukuringkupai. Ka kutjupangku tjinguru Jesuku walytja ngunti kurani kura palyantjaku, kana ngayulu kulira mirpanaripai.

30 Uwa, panya kutjupa tjutangkuyanku walytjangku mirawanipai pulka nyinara-palku, palu ngayulunatju upa nyinanyatjanungku wangkanyi, panya ngayulu upa nyinanyangka ngayunya Godalu wityankupai palumpa warka kumpangku palyantjaku, kanatju ngayulu nyara palulaguru kutju mirawanipai.

31 Kana nyangatja tjukarurungku nyurala wangkanyi, Godanya panya Jesuku Mama ngayuku ninti nyinanyi, panya ngayulu tjukarurungku wangkapai. Kala wanyu nyuntu nganaņa Godanya titutjarangku walkunma.

32 Panya ngura nyara Tamatjakala nyinanyangkani nguraku mayatjangku wangkangu tjaultji tjutangka kaita panya pulkangka ngarala nyakunytjaku, ngayulu kampangkatu pakara ankunytjaku-tawara. Munu paluru tjanala wangkangu pakara ankunyaangka nyakula ngayunya witintjaku.

33 Kani ngayuku malpa tjutangku wall-pa alawanungku katunguru pitingka ukalilyinu ruupangka karpira, kana mantangka wirkara kumpira wirtjapakanu, kani mayatja paluru putu nguriningi.

12

Mayatjalu Paulanya Kurunpa Ilkarikutu Katira Nintintja

¹ Utina wantima walytjangku mirawaninytja wiyangku, panya walytjangku mirawaninyangka nyura kulira kunpuringkuntja wiya Jesunya wanantjikitja. Palu wanyuna nyurala tjakultjunama ngayulu nyakuntjatjanungku, panya Mayatja Jesulu ngayunya nintinu.

² Panya Godalu mungatu ngayunya katingu ilkarikutu. Tjinguruni kurunpa katingu, munta tjinguruni puntu winki katingu. Ngayulu ngurpa, palu Godanya kutju ninti. Panya ngayulu anu mununa malaku pitjanytjanu kuli 14 nyinangi.

³ Ngayulu mulapa anu Godaku ngurakutu. Tjinguruna kurunpa kutju anu, tjinguruna puntu winki anu. Ngayulu ngurpa. Godanya kutju ninti.

⁴ Ka ngayulu ngura nyara palula tjukurpa kumpilitja tjuta kulinu Godalu nintinnyangka. Tjukurpa nyanga paluru tjana milmilpa ngayulu kulintjatjanungku putu tjakultjunanyi.

⁵ Uwa, mulapa ngayulu Godala ilkarangka nyinara pukultu kuliningi, palu ngayulunatju ilkarangka nyinanytjatjanungku walytjangku mirawaninytja wiya. Nyangatja kutjuna wangkanyi alatji, "Ngayulu wati upa, kunpu wiya."

⁶ Mununa nyurala rawangku wangkanytja wiya ilkarikutu ankuntjatjanungku nyura ngayunya mirawana ngunti pulkanmankuntjaku-tawara. Palya nyura ngayulu mantangka nyanga palyantja munu wangkanytja kulu kulini munu nyura nyara palula tjanalanguru ngayunya palya mirawanyini, palu nyara ilkarangka nyakuntjanguru ngayunya mirawaninytja wiyangku wantima. Tjinguruna ngayulu nyurala tjakultjunama nyakuntjatjanungku, ka nyura kulira ngayunya kawakawangku ngunti wangkanyangka-palku kulilku. Palu wiya, ngayulu mulapa anu ngura ilkaritjakutu.

⁷ Ka ngura nyara palula Godalu ngayunya wiru tjuta nintiningi, kana tjinguru palunya tjananya nyakuntjatjanungku kanany-kananyarira walytjangku mirawanima. Ka nyara palulanguru Godalu Satannga markuntja wiyangku wantingu ngayunya rawangku pikantakuntjaku, ngayulu walytjangku mirawaninytjaku-tawara.

⁸ Kana Mayatja Jesula mankurarangu tjapiningi pika nyanga palunya wiyantjaku.

⁹ Kani mankurarangu wiyanmanu Jesulu alatji wangkara, "Wiya, alatjitunanta ngayulu pukultju pulkangku kanyini, panya nyuntu putu kulinnnyangka ngayulu nyuntunya witulyananyi, kan ngayulanguru kutju kunpuringkuku." Alatji paluru ngayunya wangkangi, kana pukularira kuliningi, "Palyanatju pika winkingku putu kulini, palu Christaluni witulyankuku."

¹⁰ Ngayulu Jesuku Christaku rawa warkarinyangka niya anara nyiinyiipungkupai mununiya paira pungkula wataparalpai kana ngayulu putu nguwanpa kulilpai. Palu putu kulira ngayulu pukularinyi panya putu kulinnnyangka Godalu kutjungku ngayunya witulyankupai, kana palulanguru kunpuringkupai. Uwa, wituwitu tjuta ngayula utiringkupai kana putu nguwanpa kulilpai. Palu palya, panya ngayulu putu kulinnnyangka ni Godalu witulyankupai.

Paulalu Tjananya Karintjanya Ngurara Tjuta Pulcara Kulintja

11 Palu nyura tjananya tjukurtjara ngunti wangkapai tjuta mirawaningi munu panya nyura ngayunya ananingi, kana nyangatja palulanguru lita nyangangka walkatjunanyi mununatju ngayulu walytjangku mirawaninyi kawakawa purunytju. Utina wantima walytjangku mirawaninytja wiyangku panya ngayulu tjukutjuku alatjitu pulka wiya. Palu uti nyura tjananya kutju mirawaninytja wiyangku ngayunya kulu mirawanima, panya ngayulu tjukurtjara mulapa Jesulu iyantja, ka panya tjukurtjara kutjupa tjuta ngayula waintara pulka mulapa nyinanytja wiya.

12 Panya ngayulu nyurala mungatu nyinara warakarinyangka Godalu ngayunya witulyanu, kana kutjupa kutjupa pulka tjuta nyurampa rawangku witulyangku palyaningi, kani nyura nyakunytjatjanungku kulini, "Mulapa wati nyangatja Jesulu iyantja."

13 Palu nyura tjinguru watarkuringu ngayuku munu panya nyura ngayunya kulilpai alatji, "Nyara paluru ngura kutjupitja tjutaku kutju mukulya nyinapai." Palu wiya, ngayulu nyuranya kulu mukulyangku kulilpai. Palu nyuralana wanyu maniku munu maiku kulu ngatjiningi? Wiya, panyana nyinangi kaniya nyara paluru tjana kutju ngayunya unggangi ngura kutjupitja tjutangku kutju, ka panyani nyura ungunytja wiyatu. Nyanga palulanguru nyura tjinguru ngayunya kuranmananyi. Wanyu kana piiwiyariwa nyura ngayuku kalyparingkunytjaku! Palu wiya, nyura uti piiwiyaringama.

14 Uwa, kutjara-ara panyana nyurala ma-pitjala nyinangi, mununa kuwari kulini piruku ma-pitjala nyinanytjikitjangku. Palu wirkankulana nyurala maiku maniku ngatjintja wiya, panya ngayulu nyura kanyintjtjaku mukuringkunytja wiya, nyurampana mukuringanyi. Panya nyura ngayuku tjitji tjuta purunypa nyinanyi, ka wanyu tjitji tjutangku mama ngunytju maingka paltjara kanyilpai? Wiya, ngunytjungku mamangku kutju tjitji tjuta maingka paltjara kanyilpai.

15 Ka ngayulu mani kanyira nyuranya pukultu alatjitu ungunku, panya ngayulu nyuranya mukulyangku atunymankunytjikitja mukuringanyi mununa pakuringkunytja wiya nyurampa pulcara warakarinytjikitjangku kulini. Uwa, ngayulu nyurampa pulcara mukuringanyi. Ka nyura wanyu ngayuku ngapartji tjukutjuku guwanpa mukuringkuku?

16 Uwa, nyura ninti panya ngayulu nyurala nyinara maniku ngatjilpai wiya. Palu kutjupa tjutangku tjukurpa ngayunytjara ngunti para-wangkapai alatji, "Wati nyara paluru ayinayiningku ngananyanya wangkara ngunti mukumukuningi manikitjangku." Palu wiya, tjana alatji ngunti wangkapai.

17 Ka panya wati kutjara ngayulu witura nyuralakutu ma-iyanu, paluru pula kulu wanyu nyuranya ngunti kuraningi manikitjangku? Wiya alatjitu.

18 Panya wati ini Taitatjanya ngayulu witura ma-iyanu nyuralakutu munu wati Jesuku walytja kutjupa kulu palula tjungu. Ka Taitatjala wanyu nyurala ngunti wangkara mani mantjiningi? Wiya. Nyara paluru ngali kulintja kutjutjara tjungu alatjitu munu paluru ngayulu purunypa alatjitu ngunti manikitjangku kuralpai wiya.

¹⁹ Tjinguru nyura rawangku ngayunya kulini alatji, “Paulalu lita nyangangka nganananya pulkara anangura wangkanyi nganana palunya wangkanyangka-palku.” Palu wiya, ngayulu Godala mirangka wangkanyi Jesuku Christaku mulamularingkula. Walytja wiru tjuta! Nyanga uwankarana nyurala wangkangi nyuranya kumpuntjikitjangku.

²⁰ Palu ngayulu nyuranya pulkara kulini, mununa kulini, “Tjinguruna tjanala kuwari ma-wirkara tjananya nyakula tjituru-tjitururiku, ka tjana ngapartji ngayunya nyakula pukularinytja wiyangku wantiku.” Alatjina kulini, panya ngayulu tjinguru ma-pitjala nyuranya nyakuku nyuranku pikaringknyangka, munta tjinguru nyararingknyangka munu mirpanpa nyinanyangka. Tjinguruna nyuranya manyu nyinanyangka nyakuku munytjangku ungkunyitja wiya. Tjinguruna kampangatu tjaalymara wangkanyangka nyakuku, tjinguruna warkinyangka kulilku, tjinguruna kanany-kanany pa nyinanyangka nyakuku, tjinguruna utulurira pulkara miranyangka nyakuku. Uwa, alatji tjinguru nyura kuraringu, kana ma-pitjala nyuranya nyakula pulkara tjituru-tjitururiku.

²¹ Panya ngayulu nganmanypa nyuralakutu anknyangka nyura kutjupa tjarangku kura tjuta palyanangi titutjarangku, munuya kuri kutjupangka kutjupangka kampangatu ngunti tjunguringangi tjukaruru nyinanytja wiya. Kana nyakula pulkara tjituru-tjitururingu mununa wangkangi nyura piiwiyaringkula kura nyara palunya tjananya wantira Godanya mulamulangku wanantjaku. Palu tjinguru ngayulu kuwari nyuralakutu piruku ma-pitjaku mununa tjinguru nyuranya palu purunypatu nyinanyangka nyakula pulkara kuntaringkuku Godala mirangka mununa pulkara ulaku. Palulatawaraya kura uwankara wantima ngayulu nyurampa tjituru-tjitururira ulanytjaku-tawara.

13

Paulalu Tjananya Ngulutjunkunyitja

¹ Uwa, panya kutjara-araña nyurala nyinangi mununa kuwari piruku kulini nyurala ma-pitjala nyinanytjikitjangku. Kaya wanyu kulinma, panya nyiringka iriti wakatjunkunyitja ngaranya alatji,

“Tjinguru anangungku kura palyani. Ka anangu kutjupangku palunya nyakunytjatjanungku tjinguru kutjupa tjutangka tjakultjunkuku. Palu kutjungku nyakunytjatjanungku wangkanyangkaya palumpa mapalku mulamularingkunyitja wiyangku wantima, palu tjinguru kutjarangku, munta mankurtu nyakunytjatjanungku wangkanyangka nyara palulanguru kutjuya mulamularingama.” *

² Panya nganmanytjuna nyurala wangkangu kura palyalpai tjutangka munu nyangana piruku wangkanyi lita nyangangka wakatjura alatji. Panya ngayulu ma-pitjala nyurala wirkara wantinytja wiyangku nyuranya nyanganyi tjinguru nyura palyaringkula tjukaruru nyinanyi, tjinguru nyura kura panya palu purunypatu palyani. Kana nyura kura tjuta palyannyangka nyakulampa pulkaralta mirpanariku nyurampa.

* 13:1 Deuteronomy 17:6

3-4 Ka nyara palulanguru nyura nintingku kulilku panya mulapa Christalu ngayulawanungku nyurala wangkanyi. Panya Christanya nyurampa nguluringkunyitja wiya, paluru nyurala rapangku alatjitu wangkapai. Panya palunyaya upa ngaranyangka punu katakutjarangka wakara utitjunu munu iluntanu. Palu kuwari paluru wanka nyinanyi panya Godalu palunya witulya pulkangku wankara pakaltjinganu. Uwa, Christanya punu katakutjarangka upa ngarangi, ka palu purunypa ngayulu kulu upa nyinanyi. Ka panya Godalu Christanya witulyanu, palu purunypatu paluru ngayunya kulu witulyananyi. Kana palulanguru nyuralakutu ankula kurunpa rapangku nyuranya wangkara tjukarurulku.

5 Uwa, walytjangkuyanku atatjura tjapira kulinma nyanga alatji, "Mulapa ngayulu Jesunya kutju tjukarurungku wanani?" Alatjiyanku tjapinma, panya nyura nintingku kulini Jesunya nyurala unngu nyinanyangka. Munu panya nyura nintingku tu kulini Jesunya nyurala nyinanyitja wiyangka.

6 Munu nyura uti ngayunya kulu atatjura kulinma, munu nyura nyara palulangurulta kulira ngayunya ngurkantankuku alatji, "Munta, wati nyangatja mulapa Jesulu wituntja."

7 Palu tjinguru nyura kutjupa tju tangku ngayunya kulira wiyankuku, kana palunya tjananya kulira wantira ngayulu rawangku Godala nyurampa uwankaraku tjapilpai nyura kura wantira tjukarururingkunyitjaku. Palu tjinguru nyura kulini, "Wiya, paluru nganampa tjapilpai anangu tju tangku palunya mirawaninyitjaku." Palu wiya, ngayulu nyurampa mukuringkula tjapini nyura tjukarururingkunyitjaku.

8 Panya ngali tjukurpa tjukaruru kutju wangkapai kampa kutjupara ngunti wangkanyitja wiyangku.

9 Tjinguru ngayulu upa nyinanyi putu nguwanpa kulilpai. Palu ngayulu ma-pitjala nyurampa pukulariku nyura Jesunya kunpungku wanannyangka nyakula. Panya ngayulu nyurampa Godala rawangku tjapilpai nyura palyaringkula rawangku palunya tjukarurungku wanantjaku.

10 Panya Mayatja Jesuluni wituṅa anangu tjuṅa wangkara kunpuntjaku, paira mauntankunyitjaku wiya. Palulanguruṅa lita nyangatja nganmanytju walkatjunanyi ngayulu nyurala wirkankunyitja kuwaripangka nyura kura wantinyitjaku. Kaya nganmanytju kuntaringkula kura wantima Jesunya mulamulangku wanantjikitjangku. Palulanguruṅa nyuranya ngula ma-wirkara nyakula nyurampa pukulariku, munuṅa nyuranya nyakula paintja wiyangku wantiku.

Tjukurpa Malatja

11 Uwa, walytja tjuṅa! Alatjituna nyangatja nyurampa walkatjunanyi. Kaya ngayulu nyurala wangkanyitja uwankara wanganarangku kulinma munuya Jesunya purunypa tjukaruru nyinama. Munuyanku ngaparku ngalytjurmara pikangku wangkanyitja wiyangku wantima kulintja kutjuringkunyitjikitjangku. Munuyanku kalypa nyinama pikaringkunyitja wiya. Ka Godanya panya mukulya pulka nyurala titutjara nyinaku munu nyuranya kurunpa rapa kanyilku.

¹² Ka nyura uti anangu kutjupa Jesuku walytja nyakulampa palumpa pukularira mara witinma.

¹³ Kaya Jesuku walytja tjuṅangu ngura nyangangka nyinapai tjuṅangu nyuranya kulini nyurampa pukularira.

¹⁴ Uwa alatjuna walkatjunanyi. Ka Mayatja Jesulu nyuranya rawangu pukultju pulkangu kanyinma. Ka Mama Godalu nyuranya mukulya pulkangu atunyanama. Ka Kurunpa Milmilnga nyurala uwankarangka tjungu titutjara nyinama.

Lita Paulalu Walkatjura Iyantja Manta ini Kalaitjiyalakutu Galatians Nyangatja Nganmanytju Nyakula Wangkanytjaku

Nyangatja Godaku tjukurpa Paulalu Jesuku walytja tjutakutu walkatjura iyantja tjana tawunu ini Akani-yamala, Litjurala, Tuupila, Antiyakala tjanala nyinanyangka. Ngura nyara paluru tjana panya manta ini Kalaitjiyala ngarangi Israelta alinytjara munu kakarara. Panya Paulanya nganmanytja anu ngura nyara palula tjanalakutu munu Tjukurpa Palya Jesunyatjara tjanala tjakultjunangi. Kaya tjuta mulapa kulira mulamularingkula Jesuku walytjaringangi, kutjupa tjuta Jew tjuta, kutjupa tjuta Jew wiya tjuta Moseku tjukurpa kulilpai wiya kulu.

Ka Jew wiya tjuta Jesuku walytjaringkunyangka Jew kutjupa tjarangku Jesuku walytjangku tjananya ngunti wangkara wituwituningi tjana Moseku tjukurpa wanantjaku munu tjananya purunypa arakara nyinanytjaku. Munuya paluru tjana Paulaku kulu kuraringangi panya tjana kulinigi Jesulu palunya ngurkantara iyantja wiya palumpa tjukurpa para-wangkanytjaku.

Palulanguru Paulalu lita nyangatja walkatjuru Jesuku walytja tjutaku manta nyara Kalaitjiyala nyinanytja tjutaku. Munu palurunku wangkangi panya tjukurpa paluru wangkanytja Jesulu kutjungku palula nintinu anangungku palula wangkara nintintja wiyatu. Munu paluru Jew wiya tjutangka wangkangi alatji, "Jew tjutangu nyurala ngunti wangkanyangkaya kulilwiyangu wantima. Munuya mulamularingama Jesuku Christaku kutjuku. Panya tjana nyurala ngunti wangkanyi alatji, 'Godalu nyuranya palumpa walytjaringkunytjaku palyanmankuku nyura Jesuku mulamularingkunyangka kutju wiya, palu Moseku tjukurpa kulu wanganarangku kulinnyangka.' Palu nyangatjaya ngunti wangkanyi. Panya Jesunya nyura kura palyantjitjanguru anga-ilungu nyurampa ngalkilpa ka nyara palulanguru Godalu nyuranya kalypangu wantinyi pungguwiyangu. Ka nyura Jesunya ilura wankaringkula pakantjitjaku mulamularingkunyangka kutju Godalu nyuranya palumpa walytjanmankuku. Palulanguruya Jesunya wananna munuya Kurunpa Milmilta wanganarangku kulira Jesunya purunypa wirura palyanyku nyinama." Alatji Paulalu tjanala wangkangi lita nyangangka.

Tjukurpa nyanganpa ngarinyi:

1:1-10 Paulalu nganmanytju wangkanytja

1:11—2:21 Paulalu palurunku wangkanytja panya Jesulu palunya ngurkantara iyantja

3:1—4:31 Paulalu tjananya wituwituntja Jesuku kutjuku mulamularingkunytjaku

5:1—6:10 Jesuku walytja tjuta uti palyanyku nyinama nyanga alatji

6:11-18 Utila Mayatja Jesunya kutju mirawanima panya nganampa punu katakutjarangka anga-ilunytja

Paulalu Nganmanytju Wangkanytja

¹ Uwa, Jesuku walytja tjuṭa, ngayuluṅa Paulalu nyurampa lita nyangatja walkatjananyi manta pala Kalaitjiyala nyinanytja tjuṭaku. Panya ngayuluṅa tjukurtjara Jesulu Christalu iyantja. Anangungkuṅi ngurkantara wituntja wiyatu, palu Jesulu Christaluṅi wituṅu Mama Godalu kuḷu palumpa tjukurpa tjakultjunkunyjtaku. Panya Godalu Jesunya ilunyangka wankara pakaltjinganu, nyara paluruṅi wituṅu wara nyanga palunya palumpa palyantjaku.

² Kala nganana ngura nyanganguru Jesuku walytja tjuṭangu nyuranya pukularira kulini manta pala Kalaitjiyala nyinanytja tjuṭa, panya nyura manta pala palula ngura kutjupangka kutjupangka Jesuku walytja tjuṭa nyinanyi.

³ Ka Mama Godalu, Mayatja Jesulu Christalu kuḷu nyuranya pukultju pulkangu kanyinma munu nyuranya kurunpa rapara pukulmanama.

⁴ Panya Mama Godalu iyannyangka Jesunya wanganara pitjangu munu nganampa kuranguru anga-ilungu nganana kura wantinytjaku. Panya manta winkingkaya anangu uwankarangku kura palyani, ka palu purunypa rawa nyinanytjaku-tawara Jesunya nganampa ngalkilpa ilungu nganana karalyarira Godala tjungu nyinanytjaku.

⁵ Kala uti Godanya titutjarangu mirawanira walkunma wantinytja wiyangu. Uwa mulapa.

Tjukurpa Palya Kutju Ngaranyi Anangu Tjuṭa Wankaringkunyjtaku

⁶ Uwa, nyuranya kulirana pulkara tjituru-tjitururingu panya malku alatjitu nyura Godanya wantira paturingu tjukurpa ngunti tjuṭa kulintjatjanu. Panya paluru alatjitu pukultju pulkangu nyuranya ngurkantara walytjanmanu Jesunya Christanya nyurampa ngalkilpa ilunyangka. Ka panya nyura wantingu tjukurpa kutjupa palya-palku kulintjatjanungku.

⁷ Palu tjukurpa pala paluru palya wiya. Panya anangu kutjupa tjuṭangu Tjukurpa Palya Jesunyatjara kampa kutjupara tjukurpa kutjupa wankara nyuranya ngunti kurani palunya tjananya kulira wanantjaku. Kaya palunya tjananya kulira wantima.

⁸⁻⁹ Panya tjukurpa palya kutjupa ngaranytja wiya alatjitu kulira wankaringkunyjtaku. Tjukurpa nyanga palunya kutjula nyurala wangkangu Jesunyatjara, ka panya nyura kulira kurunpa winki mulamularingu. Palu tjinguru wati kutjupangu nyurala tjukurpa kutjupa wangkaku, ka uti Godalu palunya paira iyanma ngura kurakutu. Tjinguru nganana tjukurtjara Jesulu iyantja tjuṭangu nyurala ngunti wangkaku, ka palu purunypa Godalu uti ngananyanya kuḷu ngura kurakutu paira iyanma. Tjinguru angeltu ilkaranguru pitjala tjukurpa kutjupa nyurala wangkaku ka nyara palunya kuḷu uti Godalu paira iyanma ngura kurakutu. Panya nganmanytjuna nyurala wangkangu mununa kuwari pirukutu nyurala wangkanyi alatji anangungku Tjukurpa Palya Jesunyatjara wantira tjukurpa kutjupa nyurala wangkanyangkampa uti Godalu palunya ngura kurakutu paira iyanma alatjitu.

¹⁰ Kulilaya, tjinguru ngayulu tjukurpa ngunti wangkama anangu tjuṭa pukulmankunyjtikitjangku tjana kulira ngayuku pukularinytjaku. Palu wiya, ngayulu anangu tjuṭa kulintja wiyangu

Godaku tjukurpa tjukarurungku kutju wangkapai paluru nyakula pukularinytjaku. Tjinguruna palyanma anangu tjuťangku nyakula ngayuku pukularinytjaku. Palu alatji palyarana Jesuku warķa mulamulangku palyantja wiya.

Godalu Paulanya Ngurkantanu Tjukurpa Palumpa Wangkanytjaku

¹¹ Walytja tjuťa kulilaya! Tjukurpa Palya Jesunyatjara ngayulu wangkanytjita Godalanguru alatjitu ananguku tjukurpa wiya.

¹² Panya anangungkuŋi wangkara nintintja wiyatu palu Jesulu Christalu kutjungkuŋi nintinu.

¹³ Nyura panya ngayuku ninti panya ngayulu wati Jew mununa nganmanypa Jew tjuťaku ara kutju kulira wanalpai, munu panyana ngayulu Jesuku walytja tjuťa ngalturingkunyitja wiyangku wataparara pungangi tjana Jesunya wanalwiyangku wantinytjaku.

¹⁴ Panya ngayulu mulapa Jew tjuťaku tjukurku ninti pulka nyinangi ngayuku ngalungku tjuťangka waintara, munu ngayulu tjamuku tjanampa araku pulkara alatjitu mukuringangi.

¹⁵ Palu Mama Godaluni ngayunya pukultju pulkangku ngurkantanu iti wirkankunyitja kuwaripangka palumpa warķa palyantjaku.

¹⁶ Munu palumpa katja ngayula nintinu ngayulu mulamularingkula ankula malikitja tjuťangka Tjukurpa Palya palunyatjara tjakultjunkunytjaku, panya Jew wiya tjuťangka. Kana paluru ngurkantara tjunkunyangka ngayulu wati kutjupangka tjanintja wiyatu ngayunya wangkara nintintjaku.

¹⁷ Mununa Jerusalemalakutu ankunyitja wiyatu Peternya tjananya nyakunytjikitja panya Jesulu iyantja tjuťa, panya tjananya-warara ngurkantara tjunu ngayula kuwaripangka. Palu anuna manta ini Arapiyalakutu mununa nyara palula kuli tjuťa nyinanytjatjanu ngula mulapa malaku anu ngura Tamatjakalakutu.

¹⁸ Palulanguruna kuli mankurpa wiyaringkula Jerusalemalakutu malaku anu Peterla tjunguringkula paluru ngali wangkanytjikitja mununa nyara palulalta wirkara rawa nguwanpa nyinangi tjirirpi 15.

¹⁹ Palu nyara palula nyinarana ngayulu Jesulu iyantja kutjupa tjuťa nyakunytja wiyatu, palu Jamesanya kutjuna nyangu Mayatja Jesuku panya malanypa. Mununa palulangurulta anu malaku Tamatjakalakutu.

²⁰ Palu kulilaya, nyanga palunyaŋa walkatjunanyi Mama Godala mirangka mununa ngunti wangkanyitja wiyangku tjukarurungku kutju nyurala tjakultjunanyi.

²¹ Nyara palulanguruna ankula tjukurpa para-wangkarinangi anangu tjuťangka manta Tjiriyala pulala Tjilitjiyalawanungku.

²² Katjuya Jesuku walytja kutjupa tjuťa manta nyara Judeala nyinanytja tjuťa ngayuku ngurpatu nyinangi panya paluru tjana ngayunya nyakunytja wiyatu.

²³ Palu kutjupa tjuťangku tjakultjunkunyangka kutjuya kunyu kulinu, "Wati panya paluru kunyu kampa kutjuparingu, panya paluru nganmanytju nganananya wataparara pungangi munu panya tjukurpa Jesunyatjara wiyantjikitja mukuringangi. Palu kuwari kunyu wati panya paluru tjukurpa panya palunyalta wangkarinanyi." Alatjiya kunyu kuliningsi ngayunyatjara kutjupangku wangkanyangka.

²⁴ Munuya palulanguru Godanyalta mirawaningsi ngayulanguru.

2

Peterlu Tjana Paulanya Pukultu Palyanmankunyaja

¹ Mununa kuli 14 wiyaringkula piruku anu Jerusalemalakutu. Mununa wati kutjara katingu Paanapatjanya pulanya Taitatjanya.

² Panya Mamaluni ungu nintinu Jerusalemalakutu ankunytjaku, kana ankula Jesuku walytja atunymankupai tjutangka tjunguringkula wangkangi. Mununa tjanala tjakultjunangi ngayulu Jew wiya tjutangka Tjukurpa Palya Jesunyatjara wangkanytjatjanungku. Uwa, ngayulu tjanala tjakultjunangi ngayuku warka tjana ngunti kulira ngayunya anara wiyankunytjaku-tawara. Panya tjinguru alatji tjana ngayuku warka anannyangka anangu tjutangka Tjukurpa Palya kulira wantiku. Palula-tawarana ngayulu warkarinytjatjanungku tjanala tjakultjunangi kulira tjana palyanmankunytjaku.

³ Munuya ngayuku malpa Taitatjanya wituwituntja wiyatu Jewku arawanu watiringkunytjaku, panya paluru wati Jew wiya nyinangi.

⁴ Kaya Jew kutjupa tjuta mukuringangi wati panya paluru Jew tjuta purunyarinytjaku. Panya Jew paluru tjana nganana ngunti tjunguringkula Jesuku walytja purunypa nyinangi nganananya nyakula wangkanytjikitja nyanga alatji wangkara, "Nyara tjana Jesuku walytja tjuta palu tjana Moseku ara wantipai." Tjukurpa nyanga palunyaya wangkangi panya paluru tjana mukuringangi nganana Jew tjutaku arawanu nyinanytjaku munuya nyara palulanguru Taitatjanya wituwituningi Jew tjutaku arawanu watiringkunytjaku. Palu wiya, nganana Jesuku Christaku mulamularingkula putu malaku ara panya nganmanyitjawanu nyinanyi.

⁵ Munula tjanala tungunpungkula tjananya kulira alatjitu wantingu nyura ngunti kulintjaku-tawara. Tjinguru tjana Taitatjanya Moseku arawanu watinnyangkampa nyura kulilku, "Munta-uwa, mulapa nganana uti Moseku arawanu nyinama Godalu nganananya wankarunkunytjaku." Alatji ngunti kulintjaku-tawarala wati panya palula tjanala tungunpungu nyura Tjukurpa Palya Jesunyatjaraku kutju mulamularingkunytjaku.

⁶ Kutjupa tjutangkuya tjinguru alatji kulini Jamesanya, Peternya, Johnnga tjana pulka nyinanyangka-palku Jesuku walytja kutjupa tjutangka waintarira. Tjinguru mulapa, tjinguru wiya, palu Godalu utitja nyakula ngurkantankunytja wiyanku unngutja nyakula ngurkantankupai. Ka ngayulu Tjukurpa Palya Jesunyatjara Jew wiya tjutangka wangkanytjatjanungku pitjala tjanala tjakultjungkunyangkaya palya kulinu, mununiya wituwituntja wiyatu tjukurpa kutjupa wangkanytjaku.

⁷ Palu paluru tjana kulira nintiringu panya Godaluni ungu warka nyangatja tjukurpa Jew wiya tjutangka wangkanytjaku, panya paluru nganmanytju Peternya witu nu Jew tjutangka wangkanytjaku, palu purunypa.

⁸ Panya Godalu Peternya tjukurtjara witura iyanu Jew tjutakutu munu palunya nintiningi munu witulyanangi palula tjanala warkarinytjaku. Munu palu purunypatu ngayunya tjukurtjara ngurkantara witura iyanu Jew wiya tjutakutu mununi ngayunya nintiningi munu witulyanangi palula tjanala warkarinytjaku.

⁹ Uwa, panya Jamesanya, Peternya, Johnnga tjana Jesuku walytja tjuṭa atunymankupai nyinanyi. Munuya ngayunya ngurkantara kulinu alatji, “Mulapa warḱa nyangatja Godalu palunya ungu.” Munulinya paluru tjana mara witiṇu Paanapatjanya ngalinya, munuya wangkangu, “Nyuntu nganaṇa tjukurpa kutju palunyaṭu wangkanyi. Panya nyupali Jew wiya tjuṭangka tjukurpa wangkanyi, ka nganaṇa palu purunypatu Jew tjuṭangka wangkanyi.” Alatjiya ngalinya pukuṭu wangkangi.

¹⁰ Munulinya paluru tjana piruku alatji wangkangu, “Palu kulinma pula Jesuku walytja kutjupa tjuṭa nyanga Jerusalemala nyinanytja tjuṭa ungkunyjtikitjangku panya paluru tjana ngaltutjara maralpa nyinanyi.” Palu ngayulu nyangatja rawangku kuliningi panya ngura kutjupa tjuṭangka mani mantjira katira tjananya ungkunyjtikitjangku.

Paulalu Peternya Tjukaruruntja

¹¹⁻¹² Palulanguru ngulalta Paanapatjanya ngali Antiyakalakutu anu munuli tjunguringkula nyinangi Jesuku walytja kutjupa tjuṭangka panya Jew wiya tjuṭangka. Ka palula malangka Peternya wirkanu Antiyakala munu nganaṇala tjunguringkula nyinangi Jew wiya tjuṭangka kulu. Munu paluru Jew tjuṭaku ara wantira nganaṇala tjungungku mai ngalkuningi mauntalpa nyinara ngalkuntja wiyangku. Ka ngura nyara Jerusalemala wati ini Jamesanya tjana Jesuku walytja tjuṭa atunymankupai nyinangi, ka Jamesanya panya wati kuranyitja tjanampa mayatja. Palu ngura nyara Jerusalemala panya Jesuku walytja kutjupatjara Jew tjuṭa nyinangi, munuya kutjupa tjarangku alatji kulilpai, “Utiya Jew wiya tjuṭa Jesuku walytjaringkunyjtikitja mukuringkulampa Moseku arawanu watiringama nganaṇanya purunypa.” Ka anangu nyanga palula tjanalanguru Jamesalu wati mankur-mankurpa ngurkantara iyanu Antiyakalakutu. Ka tjana ngura nyara palula wirkankunyangka Peterlu tjananya nyakula kuntaringu, panya paluru alatji walytjangku kuliningi, “Tjunguru tjana ngayunya Jew wiya tjuṭangka nyinanyangka nyakula ankula tjakultjungkuku Jerusalemala nyinanytja tjuṭangka.” Alatji Peterlu kuliningi munu palulanguru Jew wiya tjuṭanguru paṭuringu munu tjanala piruku mai ngalkuntjikitja tjunguringkunyitja wiya mauntalpa nyinangi.

¹³ Ka ngura nyara Antiyakala Jesuku walytja kutjupatjara Jew tjuṭa nyinangi. Munuya paluru tjana Peternya Jew wiya tjuṭanguru paṭuringkunyangka nyakula palu purunypa tjana kulu paṭuringu munuya tjanala piruku tjunguringkula mai ngalkuntja wiyaringu. Ka wati panya Paanapatjalu kulu Peternya arkanu munu tjanalanguru paṭuringu.

¹⁴ Kaṇa alatji palyannyangka nyakula kuliningi, “Nyangatjaya ngunti kulini Peterlu tjana.” Panya nyanga alatji palyaraya Tjukurpa Palya Jesunyatjara puṭu tjukarurungku kulini. Ka Jesuku walytja Antiyakanya ngurara uwankara tjunguringkunyangka ngayulu Peternya wangkara tjukarurunu tjanala mirangka. Alatjina palunya wangkara tjukaruruningi, “Kulinin Peter? Panya nyuntun wati Jew, munu panyan nganmanytju Moseku ara kulira waṇaningi. Nyaratja palya. Palu panyatja kulila, panya nyuntu Antiyakalakutu pitjala Jew wiya tjuṭangka tjunguringkula nyinara mai ngalkuningi. Munun

tjinguru walytjangku unngu kuliningi, 'Wiya, palyana ngalkuni Jew wiya tjuangka.' Palu wati panya Jew mankur-mankurpa Jerusalemalanguru pitjanyangka nyakula nyuntu kuntaringu munu panyan Jew wiya tjuanguru paturingu. Munu nyuntu tjananya wangkara wituwituningi Jew tjuata purunypa nyinanytjaku. Nyangatja ngunti tjukaruru wiya.

¹⁵ "Peter kulila, nyuntu ngali Jew alatjitu iti ngaringu. Ka Jew wiya tjuangka Moseku ara wanantja wiya nyinapai. Palu nyuntu ngali anangu Jew kutjara nyinanyi ngalimpa walytjapitingka tjungu.

¹⁶ Nyuntu ngali ninti Godaku munuli nintingku kulini panya anangu Moseku arawanu nyinanyangka Godalu palunya tjukarurunmankula walytjanmankunytja wiya. Palu paluru Jesuku Christaku mulamularingkunytjatjanu kutju karalyarinyi munu Godaku walytjaringanyi. Kala nyara palulanguru Moseku ara wantikatingu, panya nganana Jesuku Christaku kutju mulamularinganyi, kalanya nyara palulanguru Godalu walytjanmananyi Moseku arawanungku wiya."

¹⁷ Palulanguruna tjukurpa nyangatja Peterla wangkangu, "Kulila, Jew wiya tjuangkuya tjukurpa Mosenya Godalu ungunytjitja kulira wanantja wiyatu ngurpa nyinanyi. Kaya nyara palulanguru Jew tjuangka tjananya kuranmankupai. Ka panya nyuntu ngali nganmanypa Jesuku walytjaringkula Moseku araku wiyaringkula Jew wiya tjuata purunyaringu, ka panyalinya kuranmanangi Jew tjuangka. Palu palya. Tjinguru Jew kutjupangku ngalinya wangkaku alatji, 'Jesulu-manti nyupalinyampa wituwituni Godanya wantira Jew wiya tjuata purunyarira kurangka nyinanytjaku. Uti nyupali Moseku arawanu kutju nyinama ngananyanya purunypa.' Alatji tjinguru tjana ngalila wangkaku. Palu wiya, paluru tjana ngunti wangkanyi, kali kulira wantima. Panya Jesulu wituwituntja wiya nganana Godanya wantinytjaku.

¹⁸ "Panya nganmanytjana Moseku ara arkara wananingi Godala tjunguringkunytjikitjangku, palu ngayulu Jesuku mulamularingkula kuwari Godala tjunguringu alatjitu, mununa palulanguru Moseku arawanu Godala tjunguringkunytjikitjangku kulin-tja wiyangku wantinyi. Palu ngayulu tjinguru piruku Moseku arawanu Godala tjunguringkunytjikitjangku kulirampa palula tungunpungkuku, panya ara nyara palulawanu nyinanyangka Godalu ngayunya nyakula tjukarurunmankula walytjanmankunytja wiya.

¹⁹ Kana Moseku arawanu Godala tjunguringkunytjikitjangku kulin-tja wiyaringu, mununa Jesuku mulamularingkula kutju Godala tjunguringu palulawanu kutju tjukaruru nyinanytjikitja.

²⁰ "Uwa, ngayulu panya Jesula tjunguringkula palunya tungun-tunguntu wanani ilunytja kulira nguluringkuwiyangku. Mununa kuwari walytja nyinanytja wiya, panya Christanya Godaku katja ngayula unngu nyinanyi. Paluru panya ngayuku pulkara mukur-ingkula anga-ilungu ngayuku ngalkilpa. Ka ngayulu palumpa mulamularingkunyangka paluru kuwari ngayula tjunguringkula nyinanyi.

²¹ Tjingurula Moseku arawanu nyinanyangka Godalu ngananyanya tjukarurunmankula walytjanmanama, ka Jesunya nganampa ngalkilpa ilunytjaku wiya ngarama, kala kulinma, 'Munta, paluru tjinguru unytju ilungu.' Palu wiya, panya Moseku arawanu nyinanyangka

Godalu nganana walytjanmankunytja wiya. Palu ngana Jesuku Christaku mulamularingkunytjatjanu kutju karalyarinyi kalanya Godalu tjukarurunmankula walytjanmananyi, panya paluru pukultju pulkangu nganampa palyanu. Ka nganampa wantinytjaku wiyalta ngaranyi." Alatji ngayulu Peterla wangkangi.

3

Jesunya Kutjula Kulinma

¹ Palu Kalaitjiyanya ngurara tjuta, nyura nyaanguru kata kuraringkula palunya wantingu? Nganalu nyuranya kulinlja kampa kutjupanu? Panya nyuralana nganmanytju utingku wangkangi Jesunya punu katakutjarangka wakara utitjunkunytja, ka panya nyura kulinljatjanu palumpa mulamularingu. Nyara palulanguru panya Godalu nyuranya tjukarurunmankula walytjanmanu. Ka nyura nyaanguru wantira Moseku arawanu Godala tjunguringkunytjikitjangku kulini? Nganalu nyuranya tjaa kuranu?

² Palu wanyuna nyurala tjarpilku. Nyaanguru wanyu Kurunpa Milmilnga panyatja nyurala tjarpangu? Moseku ara wanganarangku kulira palyannyangka? Wiya, nyura panya Tjukurpa Palya Jesunyatjara kulira mulamularingkunyangka Kurunpa Milmilnga nyurala tjarpangu.

³ Ka nyura nyaanguru kata kuraringu? Panya nganmanypa nyura Jesuku walytjaringu Godalu palyannyangka. Palu kuwari nyura kulini, "Nganana Moseku arawanu nyinara kunpuringkuku Jesunya mulamulangku wanantjikitja." Palu wiya, nyura ara nyara palunya wanara putu kunpuringanyi, panya Godalu nganmanytju walytjanmankunytjatjanungku nyuranya rawangku kunpulpai palunya wanantjaku. Palu nyaaku nyuranku wanyu piruku kulini walytja kunpuringkunytjikitjangku ara panya palulawanu?

⁴ Panya nyura nganmanytju Jesunya tungun-tunguntu wananingi palumpa mirpantju tjutangu nyuranya pulkara kurannyangka kulinlja wiyangu. Palu kuwari nyanga nyura Moseku arawanu piruku nyinanytjikitja mukuringanyi, kana alatji kulini, "Ai, nyaanguruya nyanganpa alatjirinyi? Panya tjana nganmanytju Jesunya tungun-tunguntu wananingi, munuya kuwari wantinyi. Unytjungku-mantiya panyatja nganmanytjumpa wananingi."

⁵ Kulilaya, Godalu Kurunpa Milmilnga nyurala unngu tjarpatjunu paluru nyuranya witulyankunytjaku nyura kutjupa kutjupa pulka tjuta witulyatjarangu palyantjaku. Panya Godalu nyuranya Moseku ara wanganarangku kulira palyannyangka Kurunpa Milmilnga nyurala tjarpatjunkunytja wiya. Palu nyura Tjukurpa Palya Jesunyatjara kulira mulamularingkunyangka kutju paluru nyurala tjarpatjunu. Ka nyura wanyu putu nintiringangi?

⁶ Panyatjaya kulinma wati panya Aipuramanya, panya nyiringka iriti walkatjunkunytja ngaranyi alatji, "Aipuramanya mulamularingu Godaku. Ka nyara palulanguru Godalu palunya mulamularingkunyangka nyakula tjukarurunmankula walytjanmanu." *

* 3:6 Genesis 15:6

7 Kulini nyura? Ngananya tjana wanyu Aipuramanya purunypa nyinanyi? Wiya, panya paluru tjana, panya Godaku mulamularingkupai tjuṭa.

8 Panya nyiringka iriti walkatjungkunyitja tjukurpa paluruṭu ngaranyi Godalu panya kalkuntja, panya paluru wangkangu anangu manta winkitja palumpa mulamularingkunyangka tjukururunmankula walytjanmankunytjikitjangku. Nyangatja tjukurpa palya mulapa nganmanytju Godalu Aipuramala tjakultjungkunyitja. Alatji paluru wangkangu, "Ngayulu anangu manta winkitja pukulmankuku nyuntulanguru."*

9 Ka panya Aipuramanya mulapa Godaku mulamularingu. Ka nyara palulanguru palunya atunymara kanyiningi. Ka anangu kutjupa tjuṭa Aipuramanya purunypa mulamularingkunyangka Godalu palunya tjananya kulu atunymara kanyilku.

10 Panya Godaku tjukurpa iriti Moselu nyiringka walkatjungkunyitja ngaranyi alatji,

"Utiya tjukurpa Godalu ngayunya ungkunyititja uwankara, wanganarangku kulira palyanma, tjukurpa uwankarangka tungunpungkuwiyangku. Tjinguru nyura tjukurpa kutjungka tungunpungkunyangka, Godalu nyuranya kukanymananyi, ngula pungkunytjikitjangku." *

Alatji ngaranyi nyiringka. Ka tjinguru anangu kutjupa Godanya pukulmankunytjikitja mukuringkula tjukurpa Godalu Mosenya ungkunyititja uwankara wanganarangku kulinma. Palu paluru tjinguru tjukurpa kutjungka tungunpungkula ngatalarinyi alatjitu, ka Godalu palunya pungkunytjaku alatjitu ngaranyi.

11 Ka nganalu tjana wanyu tjukurpa uwankara wanganarangku kulira palyalpai nyinanyi kutjungka tungunpungkunytja wiyangku? Wiya alatjitu. Kala pala palulanguru kulini anangu tjuṭa Moseku tjukurwanu puṭu tjukururu ngaranyi Godalu nyakula pukularinytjaku. Panya nyiringka iriti walkatjungkunyitja ngaranyi alatji,

"Anangu mulamularingkunyangka kutju, Godalu palunya walytjanmankuku. Ka paluru Godala tjunguringkula wanka titutjara nyinaku, panya mulamularingkunytjanguru." *

12 Palu tjukurpa Godalu Mosenya ungkunyititja nyanga purunypa wiya, ara mauntalpa ngaranyi munu alatji wangkanyi,

"Anangungku tjukurpa nyanganpa uwankara wanganarangku kulira palyara kutju Godala tjunguringkula wanka titutjara nyinaku." *

13 Uwa, nganana tjukurpa Godalu Mosenya ungkunyititja uwankara puṭu wanganarangku kulira palyalpai munula nyara palulanguru kukanyaringu. Palu Jesunya Christanyalampa ngalkilpa anga-ilungu punungka, panya nyiringka iriti walkatjungkunyitja tjukurpa ngaranyi nyanga alatji,

"Panya anangu pungkula punungka utitjungkunytjanya, nyara paluru kukanyapa." *

14 Alatji Jesunya kukanyaringu munu panya nganampa ngalkilpa ilungu, Jew wiya tjuṭaku kulu. Panya Godalu Aipuramanya mula-

* 3:8 Genesis 12:3; 18:18; 22:18 * 3:10 Deuteronomy 27:26 * 3:11 Apakukaku 2:4 * 3:12

Leviticus 8:5 * 3:13 Deuteronomy 21:23

mularingkunyangka kalkunu palunya pukulmankunytjikitjangku, palu purunypa paluru Jew wiya tjuṭa kuḷu kuwari pukulmananyi Aipuramanya purunypa Godaku mulamularingkunyangka. Munu panya Godalu nganmanytju kalkuntjatjanungku nganaṅala uwankarangka Kurunpa Milmilnga tjarpatjunu nganaṅa Jesuku mulamularingkunyangka.

Godalu Kalkuntja munu Moseku Tjukurpa

¹⁵ Uwa walytja tjuṭa, kuwarina ara kutjupa nyurala wangkanyi nyura uti kulintjaku. Tjinguru anangu kutjarangku wangkara kulilpai kutjupa kutjupa palyantjikitjangku munu pulanku wangkara kalkulpai. Ka nyara pula nganmanytju wangkara kalkuntja kutjupangku malangka putu wiyani munu putu kampa kutjupa palyani.

¹⁶ Ka tjukurpa nyanga palu purunypa nyiringka iriti walkatjunkunytja ngaranya Godalu kalkuntja Aipuramanya. Panya paluru palunya kalkunu munu palumpa tjitji kuḷu kalkunu. Palu panya nyiringka tjukurpa nyangatja ngaranya *tjitji kutju*, tjuṭa wiya. Kala nyanga palulanguru kulini panya tjitji kutju paluru ini Jesunya Christanya.

¹⁷ Nyaṅa wanyu wangkaku nyura uti kulintjaku? Wiya, nyangatjaya kulila. Panya nganmanytju alatjitu Godalu Aipuramanya kalkunu, munu palulanguru yiya 430 ngarala wiyaringkunyangka malangka kutju tjukurpa pulka Mosenya ungu. Palu tjukurpa panya mala ungkunyjtalu putu kampa kutjupa palyanangi tjukurpa panya nganmanytju kalkuntjanya. Panya kalkuntja paluru waintara alatjitu ngaraku titutjara.

¹⁸ Panya nganaṅa Moseku arawanu nyinanyangka Godalu nganaṅanya kalkuntjatjanungku putu unganyi. Palu paluru nganaṅanya ungkupai paluru kalkuntjatjanungku kutju. Panya Aipuramalu wanka nyinaralpi Moseku ara kanyintja wiya ngurpa nyinangi. Ka Godalu pukultju pulkangku palunya ungu paluru kalkuntjatjanungku.

¹⁹ Ka nyaaku wanyu Godalu tjukurpa pulka tjuṭa ungu Mosenya? Wiya, tjukurpa palunya ungu anangu tjuṭangku kura palyantjatjanungku nintingu kulintjaku. Palu tjukurpa nyanga paluru ngarangi Aipuramaku tjamu malatja malatjanguru utiringkunytjaku patara Godalu panya kalkuntjitja. Ka tjukurpa panya palunya Godalu palumpa angelpa witunu Mosenya ungkunyjtaku, ka paluru anangu tjuṭangka wangkara nintinu.

²⁰ Palu Godalu kutjupawanungku Aipuramanya kalkuntja wiyatu palunya alatjitu kalkunu. Panya Godanya kutju alatjitu munu kutju palurutu Mosenya tjukurpa ungu munu Aipuramanya kutju palurutu kalkunu.

²¹ Palu kutjupa tjuṭangku tjinguru kulini alatji, "Godalu tjinguru Mosenya tjukurpa panya pulka tjuṭa ungkula Aipuramanya panya kalkuntjatjanungku wantingu." Palu wiya, Godalu Mosenya ungkula kalkuntjitja panyatja wantinytja wiyangku kuliningi alatjitu, panya kalkuntjitja nyara palulanguru kutju paluru nganaṅanya tjukarurunmankula walytjanmankupai. Tjinguru nganaṅa Moseku arawanu tjukaruru mulapa nyinanyangkampa Godalu nganaṅanya

tjukururunmankula wankarunama palula tjungu titutjara nyinanytjaku. Palu wiya, tjukurpa nyara palulawanula puṭu alatjitu tjukururu nyinapai.

²² Panya tjukurpa iriti nyiringka walkatjunkunytja alatji ngarinyi, “Manta winkingkaya anangu uwankarangku kura rawangku palyani munuya puṭu wantinyi.” Uwa mulapa nganana puṭu kura wantinyi, palu nganana Jesuku Christaku mulamularingkunyangka kutju Godalu kalkuntjatjanungku nganananya tjukururunmankula walytjanmankuku.

²³ Panya nganmanypa nganana Moseku tjukurwanu nyinangi Godalu nganananya tjukururu nyinanyangka nyakula tjukururunmankunytjaku, palu wiya, puṭula kura wantira tjukururu nyinangi, kalanya paluru puṭutu tjukururunmanangi. Panya pulitjumunungku anangu tjuṭa tjailangka kanyilpai, kaya puṭu pakalpai, palu purunypa nganana nganmanypa Moseku tjukurwanu nyinara puṭu tjukurururingangi Godalu nganananya nyakula tjukururunmankula walytjanmankunytjaku. Panya Jesunya pitjanytja kuwaripangka nganana puṭu kuliningsi palumpa mulamularingkunytjikitjangku munula kuwari kutju kulira mulamularingu paluru pitjala nintinnyangka.

²⁴ Uwa, Godalu nganananya Jew tjuṭa tjukurpa pulka ungu Moselawanungku nganana wanganarangku kulira palyantjaku. Tjukurpa nyanga palurulanya kutangu purunytju tjukururuningi Jesuku Christaku patara. Panya paluru pitjangu nyuntu nganana palumpa mulamularingkunyangka Godalu nganananya tjukururunmankula walytjanmankunytjaku.

²⁵ Uwa, nganmanytjulanya Moseku tjukurtu nganananya tjukururuningi palulawanu tjukururu nyinanytjaku, palu kuwarila Jesuku mulamularingkula palulawanu wankaru nyinanyi.

²⁶ Ka panya nyura Jesuku Christaku mulamularingkunytjatjanu Godaku katja unṭalpa nyinanyi, Moseku arawanu wiya.

²⁷ Panya nyura minangka baptise-arinkula kuwari Christala tjungu nyinanyi.

²⁸ Panya nyura kutjupa tjuṭa Jew tjuṭa nyinanyi, ka kutjupatjara Jew wiya tjuṭa, ka panya kutjupa tjuṭa wati mayatjaku unytju warakaripai, ka tjara kutjupangku walytjangku kulira warakaripai. Ka panya kutjupa tjuṭa wati, ka kutjupa tjuṭa minyma. Nyangatja palya, palu nyura uwankara kutjuringu Jesula Christala kutjunga palumpa walytjaringkula.

²⁹ Uwa, nyura Christaku mulamularingkula palumpa walytjapiti nyinanyi. Nyara palulanguru nyura Aipuramanya purunypa nyinanyi. Ka Godalu nyuranya kalkuntjatjanungku ungkuku alatjitu, panya iriti Godalu Aipuramanya wangkara kalkunu anangu tjuṭa palulawanungku pukulmankunytjikitjangku.

4

¹⁻² Palu walytja tjuṭa, wanyuna ara kutjupa nyurala wangkama panya Moseku aratjara nyura tjukururu mulatu kulintjaku tjukurpa nyanga alatji, panya watingku kalkulpai tjilpiringkula katja ungkunyitjikitjangku paluru kanyintja uwankara. Palu katja paluru kuwaripa tjukutjukutu nyinanyi mantjintja wiya munu kalkuntja kutju kulini.

Munu paluru war̄karipai tjuṭa purunypa nyinanyi kutjupa kutjupa mantjintja wiyatu, panya paluru ngula kutju pul̄karingkulalta mantjira kanyilku tjiṅtu panya mamangu ungunyjtikitjangku wangkanyjtijangka kutju. Paluru tjukutjuku nyinanyangka anangu kutjupangu palunya atunymara kanyilpai munu kalkuntja tjuṭa kulu atunytju kanyilpai paluru ngula mantjintjaku.

³ Ka Jesuku walytja tjuṭa palu purunypa nyinangi. Panya Jesuku mulamularingkunyitja kuwaripangka nganaṇa mamu arkayitja tjuṭangka wanganarangku kuliningi munula palunya tjananya puṭu wantingi. Panya wati war̄karipaingku palumpa mayatjangka wanganarangku kulilpai, palu purunypa nganaṇa ara palula tjanala kutju wanganarangku kuliningi.

⁴ Palu tjirirpi panya palula panya Godalu kulintjitjangka alatjitu palumpa katja mantakutu witura iyaṇu. Ka minyma Jew-ngku palunya iti kanyinu Moseku tjukurwanu nyinara.

⁵ Paluru pitjangu nganaṇanya Moseku ara wanalpai tjuṭa wankarunkunyjtikitja nganaṇa palumpa walytjaringkula Godaku katja unṭalpa mulapa nyinanytjaku. Kala nyara palulanguru kuwari Jesunya wanani munula alatji kulini, "Godalu nganaṇanya Moseku arawanu nyinanyangka nyakula tjukarurunmankula walytjanmankunyitja wiya."

⁶ Ka nyuntu nganaṇa Godaku katja unṭalpa nyinanyangka paluru nganaṇala palumpa katjaku kurunpa tjarpatjunu nganaṇala unngu nyinanytjaku. Kurunpa nyara paluru panya Kurunpa Milmilnga, ka nganaṇa kurunpa nyara palunyatjarangu Godanya walkura wangkapai, "Abba." Panya alatji wangkanyi, "Mama."

⁷ Uwa, nyura nganmanypa wati war̄karipai tjuṭa purunypa nyinangi nyurampa mayatjangka mantjintjikitja wiya, palu kuwari nyanga nyura Godaku katja unṭalpa nyinanyi. Ka nyara palulanguru Godalu nyuranya kalkuntjatjanungku unjkula pul̄kara pukulmankuku.

Paulanya Tjanampa Kulira Tjituru-tjitururinytja

⁸ Panya nganmanypa nyura Godaku ngurpa nyinara mamu arkayitja tjuṭangka kulira wananingi. Panya wati war̄karipaingku palumpa mayatjangka wanganarangku kulilpai, palu purunypa nyura mamu palula tjanala wanganarangku kuliningi. Palu mamu nyara paluru tjana kurakura tjuṭa god mulapa wiya.

⁹ Ka kuwari nyanga nyura Godaku nintiringu, panya Godalu nyuranya palumpa nintiringkunyitjaku palyaṇu. Ka nyura nyaaku piruku mukuringanyi mamu palula tjanala kulintjikitja? Nyara paluru tjana palya wiya kurakura tjuṭa, ka nyura tjananya kulira kurunpa kunpuringkula pukularinytja wiya alatjitu. Kaya wantima mamu palula tjanala piruku mayatja purunytja kulintja wiyanguku.

¹⁰ Nyura panya Jew wiya tjuṭa, munu nyura nyaaku Jew tjuṭa purunypa Moseku arawanu nyinanyjtikitja mukuringanyi? Panya kuwari nyura kutjupa tjarangu Jew tjuṭaku ara titutjarangu kulilpai munu Saturday kutjupa Saturday kutjupa tjanala inmangka tjunguringkupai. Munu nyura piruku tjiṅtu milmilpa kutjupa tjanampa ngaranyangka tjanala tjunguringkupai, tjinguru pira kutjupangka kutjupangka, tjinguru piriyakutu, tjinguru kulingka, tjinguru nyinngangka kulu.

¹¹ Tjinguru nyura kulini Godalu-manti alatji palyannyangka nyakula nyuranya tjukarurunmankula walytjanmankuku. Palu wiya. Panyaku nyura watarkuringu? Panya ngayulu nyurala rawangku tjakultjunangi Tjukurpa Palya Jesunyatjaraku mulamularingkunyangka Godalu nyuranya tjukarurunmankula walytjanmankunytjaku. Palu tjinguruna unytjungku panyatja nyurala tjakultjunangi nyura malaku aruringkunytjaku-palku.

¹² Uwa walytja tjuta, uti nyura ngayunya arkanma, munuya kulinma panya Moseku tjukurtu nganannya puu tjukaruruni Godala tjun-guringkula nyinanytjaku, palu panya Jesuku mulamularingkunyangka kutju Godalu nganannya tjukarurunmankula walytjanmankupai. Panya mungatu ngayulu nyurala tjungu nyinara nyuranya purunypa nyinangi Jew wiya purunypa munu panya nyuranya Moseku arawanu nyinanytjaku wituwituntja wiyatu. Ka nyura nyaaku ara pala palulawanu nyinanytjikitja mukuringanyi?

Panya ngayulu mungatu nyurala tjungu nyinanyangka nyura ngayunya kurantja wiyangku wirura kanyiningi.

¹³ Nyura ninti panya nyara palula ara ngayulu pikatjarangku nyurala Tjukurpa Palya Jesunyatjara tjakultjunangi.

¹⁴ Ka panya ngayulu pikatjara nyinanyangka nyura kuraringkula tungunpungkunytja wiyangku ngayunya altira nyurampa ngurangka pukultu kanyiningi angelpa ilkaritja purunypa munta Jesunya purunypa.

¹⁵ Panya nyura ngayuku pulkara pukularingi munu nyura nyaaringu kuwari? Ngayulu ninti panya wirurani nyura pukultu kanyiningi. Tjinguruna nyurala kutjupa kutjupaku ngatjinnyangka nyura ngayunya ungama alatjitu. Uwa, nyura panya ngayuku nganmanypa pulkara mukuringkupai nyinangi, munu panya nyura wirura pukultu ungkupai ngaltunytjungku.

¹⁶ Palu kuwari nyanga nyura ngayuku kuraringu. Nyaanguru nyura alatjiringu? Tjinguru ngayulu nyuranya tjukarurungku wangkanyangka nyura ngayuku kuraringu.

¹⁷ Uwa, anangu nyara paluru tjana nyuranya rawangku pulkara wituwituni Moseku arawanu nyinanytjaku munu ngayuku kuraringkula palula tjanala kutju kulintjaku. Tjinguru nyura ngunti kulini tjana nyurampa mukuringkunyangka-palku, palu wiya tjana mukuringanyi nyura Jesunya wantira tjanala kutju kulintjaku.

¹⁸ Nganmanypa panya nyurala nyinara tjukurpa tjukaruru wangkangi, palu kuwarina ngura kutjupangka nyinanyi. Ka palya nyura tjinguru anangu kutjupangku Tjukurpa Palya tjukarurungku wangkanyangka kulira palumpa mukuringama. Nyaratja palya, palu kutjupangku nyuranya mukumukura ngunti kurannyangkaya tjananya kulira wantima.

¹⁹ Uwa walytja wiru tjuta, nyura ngayuku tjitji tjuta purunypa, panya ngayulu tjukurpa Jesunyatjara nyurala wangkanyangka nyura palumpa mulamularingu. Palu nyura Moseku arawanu piruku nyinanytjikitja mukuringkunyangkana pulkara tjituru-tjitururira nyuranya rawangku kulini panya nyura kuwaripatu tjukarurungku kulin-tja wiya.

20 Nyaalkuna nyuranya? Ngayulu putu kulini nyuranya tjukaruruntjikitjangku nyanga patu nyinara. Nyangatjana lita kutju wakatjura nyuranya pulkara wangkanyi. Palu mukuringanyina mapitjala nyuranya ilangku purkarangku wangkanytjikitja. Palu putuna kulini.

Tjukurpa Aikanya Pula Tjiiranya

21 Kulilaya, panya nyura kutjupa tjutangku Moseku ara kutju kulira wana ni kuwaripangku. Munu nyura palulanguru putu tjukarurungku kulini. Wanyu kana nyurala tjapila, "Nyura kulini panya Moseku tjukurtu nganana wangkanytja?"

22 Panya nyiringka iriti wakatjungkuntja alatji ngaranyi Aipuramalu katja kutjara utinu minyma kutjarangka ini panya Itjumailnga pulanya Isaacanya. Ka panya Itjumailku nguntju ini Aikanya munu paluru Aipuramaku kuriku warkaripai Tjiiraku, ka panya Tjiiranya Isaacaku nguntju panya paluru walytja warkaripai.

23 Palu Tjiiranya panya tjitji wiyatu pampa mulararingu munu panya palumpa kuri Aipuramanya wituwitunu palumpa warkaripaingka Aikala ngarinytjaku, ka panya nyara palulanguru paluru katja kanyinu ini Itjumailnga. Ka palula malangka Godalu Aipuramanya kalkunu alatji wangkara, "Nyuntumpa kuri Tjiiranya kuwari nguwanpa pakuringkuku munu katja kanyilku." Ka ngulalta Godalu panya kalkuntja wirkanu katja ini Isaacanya.

24 Ka minyma nyanga kutjaranguru nganana tjukurpa kampa kutjupa kulini. Panya minyma kutjaranguru nganana ara kutjara kulini Godalu ungkuntja. Munula minyma Aikalanguru kulini tjukurpa Godalu Mosenya ungkuntja puli panya ini Tjaniyala. Ka anangumpa nyanga Moseku arawanu nyinara minyma Aikanya purunypa nyinanyi, Tjiiraku warkaripai purunypa walytja warkaripai wiya.

25 Minyma nyara Aikanya kulira nganana kulini puli panya Tjanियanya manta nyara Araipiyala ngururpa. Ka panya palumpa katja Itjumailnga nguntju purunypa walytja warkaripai wiya ka palumpakunu malatja malatja kulu palu purunypa nyinanyi. Munula Aikanya kulira nganana Jerusalemanya kulu kulilpai panya Jew tjutaku ngura pulka. Uwa, Aikanya kulira nganana Jew tjuta kulilpai tjana Moseku arawanu nyinanyangka, panya tjana alatji kulilpai, "Godalu ngananyanya ara nyanga palulawanu nyinanyangka nyakula tjukarurunmankula walytjanmankuku."

26 Ka minyma panya Tjiiranya kulirala nganana kulini paluru kutjupaku wara unytjungku palyalpai wiya, Aikalu puruntju. Nyara palunya kulira nganana Jerusalema kutjupa kulini panya ngura ilkaritja. Panya ngura nyara paluru ngaranyi Jesuku mulamularingkupai tjutaku, Godalu tjananya tjukarurunmankula walytjanmara kanyintjaku.

27 Panya tjukurpa Tjiiranyatjara nyiringka iriti wakatjungkuntja ngaranyi alatji,

"Nyuntu pukularima minyma tjitji wiya nyinara, mulyararinytja wiya. Nyuntu iti kanyintja wiya, palu kuwari pukulpa mirama.

Nyuntunya panya kuringku wantingu tjitji wiya.
Palu kuwari nyuntu tjitji tjutataringkuku.

Ka nyura minyama kuritjara tjuṭangku rawa nyinara tjitji mankurpa kutju kanyilku.” *

Alatji panya Aitjayalu iriti walkatjunu nyiringka.

²⁸ Uwa walytja tjuṭa, nyura panya Godaku katja untalpa nyinanyi Isaacanya purunypa, panya Tjiiralu nyinara rawangku paṭanangi Isaacaku munu Godalu kalkunnyangka kutju katja mantjinu, palu purunypa nyuranya Godalu katja untalpa kanyini kalkuntjatjanungku. ²⁹ Ka panya Itjumailnga iti wirkanu Aipuramanya pula Aikanya tjungurinkula ngarinyangka. Palu Isaacanya iti ngaringu Godalu Aipuramanya kalkuntjitjanguru. Nyara palulanguru kutju Isaacanya wirkanu Kurunpa Milmilṭu palyannyangka. Palu tjitji paluru pula tjungu pulkaringangi, ka Itjumailtu Isaacanya rawangku uulinkupai. Ka palu purunypa kuwari ngaranyi panya Jew tjuṭaya Jew wiya tjuṭaku pulkara kuraringkupai, panya tjana nintingku kulilpai alatji, “Godalu nganananya Jesuku mulamularingkunyangka kutju tjukarurunmankula walytjanmanu.” Kaya nyara palulanguru Jew tjuṭa tjanampa kuraringkupai.

³⁰ Panyatja kulinma panya nyiringka iriti walkatjunkunytja ngaranyi alatji Godalu Aipuramanya wangkanytja,

“Nyuntu ilunyangka Aikaku katjangku Itjumailtu nyuntulanguru kutjupa kutjupa mantjintja wiya alatjiṭu. Palu Isaacalu kutjungku nyuntumpa uwankara mantjiṭku. Nyara palulanguru Aikanya pulanya Itjumailnga ngura kutjupakutu paira iyala panya paluru pula walytja warkaripai wiya mayatjangku wangkanyangka kutju palyalpai.” *

Alatji Godalu Aipuramala wangkangu.

³¹ Uwa walytja tjuṭa, tjukurpa nyanga palulanguruṭa nyaa kulini? Wiya, nganaṭa kulini Jesuku Christaku mulamularingkupai tjuṭa Aikaku katja purunypa wiya, panya minyama paluru mayatjangku wituwitunnyangka warkaripai. Palu nganaṭa panya Tjiiraku tjitji purunypa nyinanyi, panya paluru Aipuramaku kuri mulapa nyinangi walytja warkaripai.

5

Paulalu Wangkanytja Kutju Wanantjaku

¹ Palu kulilaya, Jesunya nganampa ngalkilpa ilunyangka nganaṭa karalyaringu. Panya nganaṭa Moseku arawanu araka nyinanyangka Godalu nganananya nyakula tjukarurunmankula walytjanmankunytja wiya. Panya paluru nganananya pungkunytjaku ngaranyi putu tjukaruru nyinanyangka. Palu Christalu panya nganananya ngalkinu karalyarira palulawanu nyinanytjaku. Ka nyanga palulanguru kutjupa tjuṭangku nyuranya Moseku arawanu Godaku walytjaringkunytjaku wituwitunnyangkaya tjananya kulira wantima, panya tjana nyuranya ngunti kurani.

² Kulilaya, ngayulu Paulalu nyurala wangkanyi, panya tjana mukuringanyi nyura Moseku arawanu tjana purunypa watiringkula nyinanytjaku. Palu nyura tjanala wanganarangku kulira watiringkunyangkampa Jesulu nyuranya putu ngalkini nyura palula karalyarira

* 4:27 Aitjayaku 54:1 * 4:30 Genesis 21:10

nyinanytjaku, panya nyura palumpa mulamularingkunyitja wiyangku wantinyi.

³ Wanyu wanti kana piruku nyurala utira wangka. Panya nyura Jew tjuta purunypa watiringkunyitjikitja mukuringkula nyura uti Moseku tjukurpa uwankara kulira palyanma watiringkula kutju nyinanytja wiyangku, panya uwankara palyalwiyangku wantinyangkampa Godalu nyuranya putu tjukarurunmankula walytjanmananyi.

⁴ Tjinguru nyura Moseku arawanu nyinanytjikitja mukuringkula alatji kulini, "Nganana ara nyanga palunya wanannyangka Godalu nganannya tjukarurunmankula walytjanmananyi." Palu nyangatja tjukaruru wiya. Munu nyura tjinguru alatji rawangku kulirampa nyura Jesuku mulamularingkunyitja wiyaringkuku munu palunya wantiku, ka palulanguru Godalu nyuranya putu walytjanmananyi.

⁵ Palu Kurunpa Milmitu nganannya Jesuku Christaku mulamularingkunyangka unngu nintilpai, kala kulil-kulilpa patara nyinanyi Godalu nganannya Christaku mulamularingkupai tjuta tjukarurunmankula walytjanmara kanyintjaku.

⁶ Panya tjintu malatjangka Godalu nganannya nyaa tjapilku? Paluru wanyu alatji tjapilku, "Nyura Moseku arangka watiringu, munta wiya?" Palu wiya, Godalu nyanga alatji tjapintja wiya. Nyanga alatji paluru nganannya kutju kutju tjapilku, "Nyuntu mulapa Jesuku Christaku mulamularingu? Munun palunya wanara anangu kutjupa tjuta mukulyangku atunymara kanyiningi?" Nyanga palunya paluru tjapilku watiringkunyitja kulintja wiyangku.

⁷ Nganmanytju panya nyura Tjukurpa Palya Jesunyatjara tjukarurungku kuliningi munu palunya wanangingi. Ka nyuranya nganalu kuranu tjukurpa tjukaruru wantinytjaku?

⁸ Godalu nyuranya kurantja wiyatu. Paluru panya nyuranya ngurkantanu palunya wanantjaku.

⁹ Ara nyangatja kulila, panya yitja tjukutjukungku mai winki taltulpai, palu purunypa wati mankurtu tjukurpa ngunti wangkara nintirampa nyuranya uwankara kurani.

¹⁰ Palu nyura mulapa Mayatja Jesuku walytja nyinanyi kana palulanguru nyuranya nitingku kulini alatji, "Mulapa tjana lita nyangatja mantjira nyakula wangkara nintiringkuku munu ngayula wanganarangkulta kulilku, munuya kutjupa tjuta ngunti wangkanyangka kulira wantiku." Alatjina nyuranya kulini. Ka panya Godanya ninti wati panya nyuranya kuralpai tjutaku munu palunya tjananya ngurkantara pungkuku.

¹¹ Palu walytja tjuta, kutjupa tjutangkuya kunyu ngayunya ngunti wangkapai alatji, "Tjinguru Paulalu Jew wiya tjutangka wangkanyi Jesuku walytjaringkunyangka tjana Moseku arawanu watiringkunyitjaku." Palu wiya, tjana ngunti kulini. Tjinguru ngayulu alatji wangkanyangkaya Jew tjuta ngayuku pukularima. Palu wiya, tjana rawangku ngayunya kuralpai munuya ngayunya rawangku pailpai tjukurpa Jesunya punu katakutjarangka ngalkilpa ilunytjitja anangu Jew wiya tjutangka wangkanytja wiyangku wantinytjaku. Tjinguruna Jew wiya tjuta watiringkunyitjaku wangkanyangkaya ngayunya wantima paintja wiyangku. Palu tjana rawangku ngayunya mirpanu wantipai.

¹² Uti wati panya nyuranya kuralpai tjutangkuyanku watiringkunyitjikitja mukuringkula uwankara alatjitu wiyannya!

¹³ Uwa walytja tjuṭa, Jesulu nyurampa ngalkilpa ilura nyuranya karalyarinytjaku palyanu, nyura palulawanu pukulpa nyinanytjaku. Ka tjinguru nyura kulini alatji, "Uwa, panya nganana Moseku arawanu nyinara Godaku walytjaringkunyitja wiya. Palulanguru nganampa ngaranya walytjangku kulira palyantjaku kura tjuṭa kulukuṭu." Palu alatji kulintja wiyangkuya wantima. Uti nyuranku pulkara mukuringama munu nyuranku mukulyangku ngapartji-ngapartjingu alpamilanma.

¹⁴ Panya alatji Moselu iriti nyiringka walkatjunu tjukurpa tjuṭa mulapa palu purunypa. Panya nyuntunku walytja pulkara mukuringkunyitja purunypa anangu kutjupa tjuṭaku pulkara mukuringama.

¹⁵ Palu nyura kuwari nyanga purunypa nyinanytja wiya. Nyura papa inura purunypa pikati nyinanyi, panya papa kutjarangku pulanku ngapartji-ngapartjingu pulkara patjalpai, palu purunypa. Kaṅa kuwari nyuranya pulkara wangkanyi alatji, uti nyuranku atunyanama kuraringkula Godalanguru paturingkunyitjaku-tawara.

Kurunpa Milmilngatjara Nyinanytja

¹⁶ Uwa, kaṅa nyuranya wangkanyi alatji Kurunpa Milmilṭu nintinyangkaya wanganarangku kulira palyanma, munu nyura palulanguru puṭu mukuringkuku kura palyantjikitja.

¹⁷ Panya nganana walytjangku kulirampa kura kutju palyantjikitja mukuringkupai. Palu Kurunpa Milmilṭu nganannya nintilpai wiru tjuṭaku kutju mukuringkunyitjaku. Ka nganana tjinguru walytjangku kulira kutjupa kutjupa kura tjuṭa kutju palyalku. Palu nganana Kurunpa Milmilṭa wanganarangku kulirampa wiru tjuṭa kutju palyalku, panya paluru nganannya unngu markulpai walytjangku kulira kura palyantjaku-tawara.

¹⁸ Ka panya nyura Kurunpa Milmilngatjara nyinanyi, ka palulanguru paluru nintinyangka nyura wanganarangku kulira tjukaruru nyinanytjaku alatjitu ngaranya, panya nyura kuwari kulini alatji, "Munta-uwa, mulapa Godalu nganannya Moseku arawanu nyinanyangka nyakula puṭu tjukarurunmankula walytjanmananyi."

¹⁹ Uwa, anangungku Kurunpa Milmilṭa kulira wantira palurunku mukuringkunyitja kutju kulira palyalpai. Munu paluru kuri walytjatjarangka ngaripai, munu kawakawangku kulilpai kurakura tjuṭa kungka kutjupangka kutjupangka palyantjikitjangku kunṭa wiyangku papangku purunypa. Panya anangu nyanga palu purunypa inura alatjitu nyinapai.

²⁰ Munu paluru puli puṅu pupakatira walkulpai, munu anangu tjuṭa initjukupai, kutjupa tjuṭaku kuraringkupai, kalypa nyinapai wiya, nyararingkupai, munu mapalku waruringkula pulkara mirpanaripai. Paluru panya palurunku mukuringkunyititja kutju kulira palyalpai, munu paluru ngalytjurmankupai munu anangu tjuṭa pikangku wangkara mauntankupai kayanku ngaparku pikaringkula wangkapai.

²¹ Uwa, anangu nyanga palu purunytju tjinguru kutjupangku wiru kanyinnyangka nyakula pulkara mukuringkupai, munu paluru

waina tjikira tarangkaripai, munu kutjupa tjuṅangka tjuṅuringkula manyu pulkangku mai ngalkula wiyalpai munu kura kutjupa kutjupa tjuṭa tjanala tjuṅuringkula palyalpai. Panya anangu nyanga palu purunypa tjuṭana nganmanytju nyurala wangkangu munuṅa piruku nyanga wangkanyi palunyaṭu panya Godalu anangu nyanga palu purunypa nyinapai tjuṭa ngurkantankunytja wiya alatjiṭu palumpa walytjaringkunytjaku.

²² Palu anangungku Kurunpa Milmilṭa wanganarangku kulin-nyangka paluru palunya nintilku nyanga purunypa nyinanytjaku, panya mukulya pukulpa mulapa nyinanytjaku kurunpa rapa, munu purkarangku kulintjaku mapalku waruringkunytja wiyangku, munu kutjupa tjuṭa ngaltunytjuṅku atunymara kanyintjaku munu palyanyku nyinanytjaku, munu kalkuntjatjanungku tjukarurungku palyantjaku.

²³ Munu anangu kutjupa purkarangku wangkanytjaku pauntjingara wituwituntja wiyangku, munu purkarangku kuliratjarakuliratjarangku palyantjaku warpungkula palyantja wiyangku munu kutjupangku arkannyangka tungun-tunguntu kura wantinytjaku alatjiṭu. Uwa, Moseku tjukurtu nganananya paintja wiyatu nyanga purunypa tjuṭa palyantjaku.

²⁴ Nganmanytjula walytjangku kulira kura kutju palyantjikitja mukuringkupai, palu panya Jesuku Christaku walytjaringkunytjatjanungkula wantingu alatjiṭu piruku kulintja wiyangku.

²⁵ Ka panya Kurunpa Milmilnga ngananala tjarpara nyinanyangka nganana uti palula kutju wanganarangku kulira titutjarangku palyanma.

²⁶ Munula uti kanany-kananyariwiya nyinama ngunti palyangku-palku mirawaninytjaku-tawara. Munula uti kutjupangku wiru kanyinnyangka nyakulampa pulkara mukuringkunytja wiyangku wantima.

6

Nyuranku Atunymankunytjaku

¹ Uwa walytja tjuṭa, tjinguru Jesuku walytja kutjupangku kura palyalku, ka nyura uti Kurunpa Milmilngatjarangku anangu palunya wangkara tjukarurunma. Palu purkarangku wangkama, munuyanku walytjangku kulinmatu nyura kulu kuraringkunytjaku-tawara.

² Alpamilanmayanku, panya yakutja kunpu pulka tjalira katinytjatjanu pakuringkupai ka kutjupangku alpamilara katipai, nyanga palu purunytjuyanku atunymanama. Panya nyura alatji palyarampa tjukurpa panya Jesulu nganmanytju wangkanytja wanganarangku kulilku.

³ Ka tjinguru kutjupangku walytjangku kulini, “Ngayuluna mulapa pulka nyinanyi kutjupa tjuṅangka munkara.” Palu paluru alatji ngunti kulini.

⁴⁻⁵ Panya Godalu nganananya warka kutju kutju ungu walytjangku walytjangku palyantjaku palumpa. Palulangurula uti warka palyara anangu kutjupa tjuṭa tjana warkarinyangka nyakula wangkanytja wiyangku wantima. Tjinguru kutjupangku alatji wangkanyi, “Ngayulu warka wiru mulapa palyani Godaku, palu nyarangku warka kurakura tjuṭa palyani.” Palu utila nyanga palu purunypa nyakula

wangkanytja wiyangku wantima. Utilanku war̄ka nganana palyantja walytjangku walytjangku kulinma, tjinguru nyangatja palya ngaranyi, munta tjinguru kurakura ngaranyi. Ka tjinguru kutjupangku Godaku war̄ka tjukarurungku palyantjatjanungku palurunku palyanmananyi, nyaratja palya.

⁶ Ka anangu kutjupangku Jesuku tjukurpa nyurala nintinyangkampa nyura ngapartji palunya ungama kutjupa kutjupa wiru tjuṭa, panya paluru Tjukurpa Palya nyurala tjakultjunangi.

⁷ Ka tjinguru anangu kutjupangku kulilku, "Godalu ngayunya kura palyannyangka nyakunytja wiya." Palu wiya, nyangatja paluru ngunti kulintja. Panya wati kaana kanyilpaingku uninypa tjunkupai mantangka, ka ngula pakara maitjararingkupai, ka mai palunyaṭu alatjitu uralpai uninypa panya paluru nganmanytju tjunkunytjatjanungku. Ka palu purunypa anangungku kura tjuṭa palyannyangka kura palula ngapartji wirkankuku paluru tjituru-tjitururinytjaku, munu wiru tjuṭa palyannyangka palula wiru tjuṭa wirkankuku paluru pukularinytjaku.

⁸ Panya anangungku tjinguru walytjangku palurunku mukuringkunytjtja kutju kulira palyalpai, nyara paluru ngula ilura Godalan-guru titutjara mauntalpa nyinaku ngura kurangka. Palu tjinguru anangungku Kurunpa Milmilṭa wanganarangku kulira palyarampa paluru Godala tjungu wanka titutjara nyinaku.

⁹ Kala uti titutjarangku wiru tjuṭa kutju palyanma pakuringkula wantinytja wiyangku, panya nganana pakuwiyangku titutjarangku palyantjatjanungku ngula wiru mulapa mantjilku palulanguru, panya wati kaanangka war̄karipaingku paku wiya war̄karinytjatjanungku mai kururingkunyangka uralpai, palu purunypa. ¹⁰ Ka kuwari nganampa ngaranyi wiru tjuṭa palyantjaku anangu uwankaraku. Munula uti Jesuku walytja tjuṭaku wiru mulapa palyanma tjanampa pulkara mukuringkula.

Jesunya Kutjuya Kulinma

¹¹ Nyawaya nyanga walka pulka ngayulu mara walytjangku walkatjunanyi alatji, "*Nyangatja ngayulu walkatjunanyi, Paulalu.*"

¹² Uwa, anangu panya kutjupa tjuṭangkuya nyuranya mayatjarira wituwituṇi Jew tjuṭaku arawanu watiringkula nyinanytjaku tjananya purunypa, anangu Jew kutjupa tjuṭangku tjananya nyakula pukularinytjaku. Panya tjana wangkanytja wiyatu Jesunya punu katakutjarangka utitjunksunytja. Tjinguruya tjukurpa palunyaṭjara wangkanyangkampa Jew kutjupa tjuṭa tjanampa pulkara mirpanariku. Kaya palumpa tjanampa ngulungku Jew wiya tjuṭa wituwitulpai nyanga alatji wangkara, "*Kulilaya, nganana nyuranya Jesuku walytjarangkunyangka palyani Moseku arawanu watiringkunytjaku.*" Alatjiya ngulungku wangkapai.

¹³ Palu Jew paluru tjana Moseku tjukurpa uwankara tjukarurungku kulira palyantja wiyangku wantipai. Munuya nyaa kutju kulilpai nyura palunya tjananya purunyarinyangka mirawaninytjikitjangku, munuya alatji wangkapai, "*Wirungkula mulapa tjananya nganannya purunymanu.*"

¹⁴ Palu ngayulunatju walytjangku mirawaninytjikitjangku kulintja wiya, Mayatja Jesunya Christanya kutjuṇa mirawaninyi nganampa

punu katakutjarangka anga-ilunytja. Mununa nyara palulangurulta mantatja tjuta mukuringkula palyantjaku wiyaringu alatjitu.

¹⁵ Panya Godalu alatji kulintja wiya anangu tjuta, "Nyara tjana Moseku arangka watiringu, ka nyanga tjana Moseku ara kulintja wiya nyinanyi." Alatji kutju paluru nyakula kulilpai, "Nyara tjana kuwari ara kuwaritjangka nyinanyi."

¹⁶ Ka nyura palu purunypatu kulinma, kana alatji nyura tjukarurungku kulinnyangka nyurampa Godala tjapini nyuranya ngaltunytjungku kurunpa rapara pukulmankunytjaku, anangu Godaku walytja uwankara kulu.

¹⁷ Ka panya nyura kutjupa tjarangku ngayunya kurara pungkupai. Palu kulila, ngayulu Jesuku waraka palyannyangkaniya palumpa mirpantju tjutangu ngayunya pungangi ka nyanganpa pika palakuntjara nyinanyi tjana pungkunytja, ka pika nyanganpa kulira nyura uti nintingku kulinma alatji, "Munta-uwa, wati nyanga paluru mulamulangku Jesunya wanani unytjungku wiya." Nyara palulanguruni nyura uti ngayunya piruku kurara pungkunytja wiyangu wantima.

¹⁸ Uwa walytja tjuta, alatjituna walkatjunanyi. Ka Mayatja Jesulu Christalu nyuranya pukultju pulkangku kurunpa pukulmara kanyinma. Uwa mulapa.

Lita Paulalu Walkatjura Iyantja Ngura Ipitjalakutu Ephesians Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjunkunyntja tjailangka unngu nyinara, munu paluru Jesuku walytja tjutakutu iyanu ngura nyara Ipitjala nyinanyntja tjutakutu. Ka tjukurpa Ipitjanyatjara Luke-alu walkatjunu nyiri panya *Jesulu Iyantja Tjutangku Palyantjitjangka* chapter 19 munu 20-ngka, panya Paulalu ngura nyara palula tjukurpa Jesunyatjara nganmanyntju wangkanyntja.

Ka lita nyangangka Paulalu tjananya wangkara nintini panya Jesuku walytja tjuta ngura uwankaranguru walytjapiti kutjutu nyinanyntja, ka panya Christanya palumpa walytjapiti uwankaraku Mayatja nyinanyi. Munu Paulalu alatji kulu wangkangi lita nyangangka, panya Godalu anangu palumpa walytja tjuta witulyankunyangka mamu panya kuralpailu tjananya putu kurara mauntankupai Jesulanguru.

Tjukurpa nyanganpa ngarinyi:

1:1-2 Paulalu nganmanyntju wangkanyntja

1:3—3:21 Jesuku walytjapiti uwankara palula tjungu kutjutu nyinanyi

4:1—6:9 Jesuku walytja tjuta uti wirura palyanyku nyinama nyanga alatji

6:10-20 Godalu Jesuku walytja tjuta kunpulpai mamungku kurantjaku-tawara

6:21-24 Paulalu tjukurpa malatja wangkanyntja

Paulalu Nganmanyntju Wangkanyntja

¹ Uwa, Jesuku walytja tjuta, ngayuluna Paulalu nyurampa lita nyangatja walkatjunanyi ngura nyara Ipitjala nyinanyntja tjutaku nyura Jesunya Christanya mulamulangku wanannyangka. Panya Godaluni ngurkantara tjunu Jesuku Christaku tjukurtjara warkarinyntjaku mununi witura iyanu palumpa tjukurpa anangu tjutangka tjakultjunkunyntjaku.

² Ka Mama Godalu Mayatja Jesulu Christalu kulu nyuranya pukultju pulkangku kanyinma munu nyuranya kurunpa rapara pukulmanama.

Godalu Nganananya Pukulmankunyntja Christalanguru

³ Godanya Mayatja Jesuku Christaku mama nyinanyi, panya nyara paluru palumpa God. Kala wanyu palunya pulkara walkunma, panya palurulanya Christalawanungku kurunpa winki pukulmanu, panya ngura ilkaritjangka tjananya pukulpa mulapa kanyini, palu purunypa.

⁴ Palulangurula uti palunya walkunma panya kuwaripatjara mulapa uwankara wiyangka paluru nganananya ngurkantanu palumpa walytja nyinanyntjaku munu Christala junguringkula palula mirangka

palya alatjitu nyinanytjaku. Kalanya kutjupangku nyakula putu kuranmananyi Christala tjungu ngaranyangka.

⁵ Panya Godalu mukulya pulkangku ngananyanya ngurkantanu palumpa katja untalpa nyinanytjaku, Jesula Christalanguru. Paluru alatjitu nganampa mukuringu munulanya paluru kutjungku kulira ngurkantanu.

⁶ Kala uti palunya pulkara walkunma paluru nganampa pulkara mukuringkunyitjanguru, panya paluru palumpa katjaku pulkara mukuringkupai munu paluru pukultju pulkangku nganampa palyanu katja palumpa intjanungku mantakutu iyara.

⁷ Ka nyara paluru punu katakutjarangka ilura milkali tjutira ngananyanya ngalkinu, kalanya Godalu mukulya pulkangku nganana kura palyantjitjanguru kalypangku pungkuwiyangku wantinyi.

⁸⁻⁹ Kala pulkara alatjitu pukularingu Godalu alatji nganampa pukultjungku palyannyangka.

Uwa panya Godalu ninti pulkangku nganmanytju kuliningsi palumpa katja mantakutu iyantjikitjangku ngananyanya wankarunkunyitjaku, munu alatji kulira palyanu alatjitu. Nyanga palunya paluru kutjungku kuliningsi nganmanytju munu kuwari utinu nganana tjukarurungku kulintjaku kulintjitja panya palunya.

¹⁰ Munu ngula Tjintu Malatjangka Godalu nganmanytju kulin-tja uwankara palyalku, ka Christalu uwankara kutjuringkunyitjaku palyalku Godalu panya palyantjitja uwankara ilkaringuru munu mantanguru, munu paluru uwankara mayatjangku kanyilku.

¹¹ Panya Godalu kulira uwankara palyantjikitjangku paluru palyalpai alatjitu. Munu nganmanytju paluru kulintjatjanungku ngananyanya ngurkantanu palumpa walytja nyinanytjaku Christala tjungu. Nyangatja paluru kuwaripatjaranguru alatjitu ngurkantankunyitjikitjangku kulinu.

¹² Kala nganana Jew tjuata-warara Christaku mulamularingkula pukulpa patara nyinanyi. Palulangurula uti nganana-warara Godanya pulkara mirawanima wiru mulapa witulya pulkanya.

¹³ Ka panya nyura kulu tjukurpa tjukaruru palya mulapa kulinu munu palumpa mulamularingu, tjukurpa panya wankarunkupaitjara kulira. Ka panya nyura mulamularingkunyangka Godalu nyurala walka purunypa tjunu nyura palumpa walytja nyinanytjaku, panya watingku pulukangka walka tjunkupai kutjupa tjutangu ngurkantankunyitjaku, palu purunytju Godalu Kurunpa Milmilnga nyuranya ungu kutjupa tjutangu ngurkantankunyitjaku, panya nyura palumpa walytjaringkunyangka paluru Kurunpa Milmilnga nyuranya ungunytjikitjangku kalkunu.

¹⁴ Kala nyara palulanguru nganana mulapa alatji kulini, "Panya Godalu ngananyanya wiru mulapa unguuku paluru panya kalkuntja." Panya Godalu ngananyanya nganmanytju Kurunpa Milmilnga ungu munulanya piruku ngula unganyitu ilkarangka wiru mulapa. Uwa, Mayatja Godanya palya mulapa witulya pulkanya, kala wanyu palunya walkura mirawanima.

Paulalu Godala Tjapintja Tjanampa

¹⁵ Ngayulu kulinu nyura Mayatja Jesuku pulkara raparingkunyangka munu Godaku walytja tjutaku pulkara mukuringkunyangka.

¹⁶ Munuṅa nyara palulanguru ngayulu kulira pukularira Godanya rawangku mirawaninyi nyuralanguru wantinytja wiyangku.

¹⁷ Godanya panya Mayatja Jesuku Christaku mama nyinanyi, panya nyara paluru palumpa God nyinanyi palya mulapa witulya pulkanya. Kana palula rawangku nyurampa tjaipilpai nyuranya Kurunpa Milmilnga ungkunyjtjaku. Ka paluru nyurala unngu nyinara pulkara nintilku nyura Godaku ninti mulararinytjaku. ¹⁸ Uwa, rawangkuna nyurampa tjaipilpai paluru nyurampa kulintja tjukaruruntjaku. Ka nyura nintiringkula uti kulilku panya paluru nyuranya ngurkantanu nyura ngula ilunytjatjanu pakara wanka titutjara nyinanytjaku palula tjungu, palumpa mulamularingkunyjtjanu. Munu nyara palulanguru nyura nintiringkula kulilku, "Mulapa Godalu kalkuntjatjanungku palyalpai alatjitu munu palumpa walytjapiti pulkara pukulmankupai witulya pulkangku."

¹⁹⁻²⁰ Uwa ngayulu tjaipilpai nyurampa paluru nyurala unngu nintintjaku nyura alatji kulintjaku, "Mulapa Godaku witulya pulka alatjitu nganana ngaranya palumpa mulamularingkupai tjutangka." Panya Godalu witulya pulkangku Jesunya ilunyangka pakaltjingga munu ngura ilkaritjangka tjunu palula kampa wakungka nyinanytjaku mayatja pulka. Ka witulya nyara paluru panya nganana ngaranya munulanya kunpulpai.

²¹ Uwa, Godalu panya Christanya pulka mulapa tjunu uwankaraku mayatja pulka nyinanytjaku ilkaritja tjutaku, munu mayatja mantatja uwankaraku kulu. Christanya panya pulka mulapa angelpa tjutangka munkara, munu mamu tjutangka munkara munu mayatja kutjupa tjutangka munkara pulka alatjitu nyinanyi munu titutjara mayatja pulka nyinara mayatjangku uwankara kanyilku.

²² Uwa, Godalu palunya Mayatja pulka tjunu, ka uwankara palula tjaru ngaranya, ka paluru uwankara mayatjangku kanyini. Munu palulanguru uwankara mayatjangku kanyira paluru palumpa walytjapiti mauntalpa wirura atunymara kanyini.

²³ Panya Christalu nganannya palumpa walytjapiti palurunku alatjitu kanyini. Panya puntu kata winkitjara anangu wanka ngarapai, palu purunypa Christanya nganampa kata ngaranya, ka nganaṅa palumpa puntu ngaranya, munula palula tjungu ngarala kutju wanka nyinanyi.

2

Ilunytjatjanu Wankaringkunyitja

¹ Panya nganmanypa nyura Godanya kulintja wiya nyinangi kura kutju palyalpai, Godanya wiyangka-palku.

² Munu nyura iwara kurangka anangi ngunti tjutaku mukuringkula munu nyura mamu arkayitjangka wanganarangku kuliningi. Mamu nyara paluru panya mamu kurunitja tjuta mayatjangku kanyini munu anangu Godala tungunpungkupai tjuta kulu kanyini mayatjangku.

³ Panya nganmanypa nganaṅa palu purunypa nyinangi munula walytja pulkara mukuringkula kura tjuta kutju palyalpai Godanya kulilwiyangku. Nyara palulangurula Godanya nganampa mirpanarinytjaku palyanangi, ka nganannya uwankara ngurkantara pungkunyjtjaku ngarangi.

⁴ Palu Godanya ngaltunytju pulkanya munu paluru nganampa pulkara mukuringkupai.

⁵ Panya nganana kura kutju palyalkatingi Godanya wiya-palku kulira munula palula rawa mulapa tungunpungkula watarku alatjitu nyinangi ilunytja purunypa. Palu Godalu ngananyanya ngaltunytju pulkangku wankarunu Christala tjungura. Tjinguru paluru ngananyanya wantima, palu paluru nganampa pulkara mukuringkula ngananyanya mukulyangku wankarunu.

⁶ Nganana kurunpa watarku nyinangi ilunytja purunypa, ka paluru Christalanguru ngananyanya wankarunu kurunpa wanka palula tjunguringkula mayatjarira nyinanytjaku ngura ilkaritjangka.

⁷ Paluru nyanga alatji palyanu nganampa ngaltunytju mukulya pulka nyinara, panya paluru nganampa pulkara mukuringkula Jesunya Christanya iyanu mantakutu nganampa ngalkilpa ilunytjaku. Kala nyanga palulanguru palumpa mukulya pulka nintingku kulini, titutjarangku watarkuriwiyangku.

⁸ Panya nyura kurunpa watarku wankarunu ilunytja purunypa nyinanyangka Godalu nyuranya mukulyangku wankarunu, nyura palumpa rparingkunyangka kutju. Nyura walytja kurunpa wankaringkunyitja wiyatu, palu Godalu ngaltunytju pulkangku nyuranya kurunpa wankarunu, nyurampa pulkara mukuringkula.

⁹ Ka nyara palulanguru nyuranku uti walytjangku ngunti kananykananytju mirawaninytja wiyangku wantima, panya nyura kutjupa kutjupa palyantja wiya alatjitu Godalu nyuranya nyakula kurunpa wankarunkunytjaku, panya nyura palumpa mulamularingkunytjaku kutju ngaranya.

¹⁰ Ka Godanya nganampa mukuringanyi wirura palyanyku nyinanytjaku palula kulira. Palulanguru paluru Jesunya Christanya nganampa iyanu ngananyanya kurunpa wankarunkunytjaku. Kala palulanguru kutju wirura nyinanyi Christalu ngananyanya kurunpa palyannyangka.

Christala Kutjuringkunyitja

¹¹ Kaya wanyu kulila panya nyura nganmanypa nyinanytja. Panya nyura anangu Gentile tjuta nyinangi Jew wiya, panya Godalu Aipuramala iriti wangkanytja nyura kulira palyantja wiyatu. (Ka panya wati Jew tjutangku nyuranya analpai tjananya purunypa watiringkula nyinanytja wiyangka.)

¹² Nyara palula arangka nyura mauntalpa nyinangi Christala tjungu wiya, munu nyura Israelkunu tjutaku walytja wiyatu nyinangi. Munu nyura Godalu tjananya kalkuntjitjaku ngurpau watarku nyinangi. Munu nyura munkaritja Godalu ngula wiru nyurampa palyantjaku kulintja wiya alatjitu watarku nyinangi, Godanya wiyangka-palku.

¹³ Mulapa panya nyura mauntalpa nyinangi, ka panya Jesunya Christanya nyurampa anga-ilungu munu milkali tjutira nyuranya Godala tjungunu palumpa walytjaringkunytjaku.

¹⁴ Panya paluru alatjitu ngananyanya uwankara mauntalpa nyinanyangka kalypara tjungunu Jew tjuta munu Jew wiya tjuta kulukulu. Panya nganmanypa nyuntu nganana patupatu nyinangi mirpantju tjuta wall-pa pulka purunypa ngururpa ngaranyangka. Palu Christalu palurunku puntu walytjangku iluntankunytjaku

ungkula mirpanpa panya palunya wiyaṅu munu nyuntunya ngananaṅa kalyapaṅu.

¹⁵ Panya nganaṅa Jew tjuṅangku tjukurpa pulka tjuṅa nganaṅanku kanyiningi kunpu mulapa, palu Christalu ilura tjukurpa pulka tjuṅa palunya tjananya wiyaringkunyjtaku palyaṅu. Munu paluru nganaṅanya Jew tjuṅa munu nyuranya Jew wiya tjuṅa palula tjuṅuringkunyjtaku palyaṅu nyuntu nganaṅa kalyparingkula kutjuringkunyjtaku.

¹⁶ Panya nyuntu nganaṅa nganmanypa mauntalpa mauntalpa nyinangi mirpanṅtju tjuṅa. Palu Christalu punu katakutjarangka ilura nganampa mirpanṅtju panya palunya wiyaṅu alatjitu. Palurunku anangu kutjara ngaranytja kutjuṅu palula, panya paluru mukuringangi anangu panya palunya tjananya malakungku Godala tjuṅuntjikitja. Nyanga alatji paluru palyaṅu punu katakutjarangka ilura.

¹⁷ Panya paluru pitjangu munu Tjukurpa Palya wangkangi nyurala anangu Jew wiya tjuṅangka Godalanguru paṅu nyinanyangka nyura kalyparingkunyjtaku. Munu paluru palu purunyjtjuṅu Tjukurpa Palya wangkangi nganaṅala anangu Jew tjuṅangka kulū Godala ila nyinanyangka nganaṅa kulū kalyparingkunyjtaku.

¹⁸ Uwa, mulapa Christalanguru nyuntu nganaṅa uwankara Jew munu Jew wiya tjuṅa Mamala tjuṅuringkula kutjuringkupai Kurunpa Milmilngatjararangkula.

¹⁹ Ka nyanga palulanguru nyura Jew wiya tjuṅa kuwari malikitja purunypa wiya, palu nyura Godaku walytjapitingka tjuṅuringu munu nyura kuwari Godaku walytja alatjitulta nyinanyi.

²⁰ Panya nyura mulamularingkupai tjuṅa Godaku alatjitu nyinanyi. Ka paluru nyuranya walytjanmara kanyini. Panya nintintja tjuṅangku munu wangkatjara kuwaritja tjuṅangku kulu nyurala Godaku tjukurpa tjakultjunangi. Ka nyura kulira Christaku mulamularingu munu palumpa walytjaringkula kunpu ngaranyi palula tjuṅu. Panya paluru alatjitu-manṅul witulya pulka nyuntumpa nganampa nyinanyi.

²¹ Munu paluru alatjitu nyuntunya nganaṅanya tjuṅura kanyini witulya pulkangku nganaṅa palunya tjukarurungku walṅuntjaku.

²² Ka panya Christalu nyuranya kulū altira tjuṅunu munu anangu kutjupa tjuṅa kulū palula tjuṅuringkunyjtaku palyaṅu. Ka Godaku kurunpa nyuntula nganaṅala uwankarangka nyinanyi, palumpa walytja tjuṅangka.

3

Paulalu Jew Wiya Tjuṅangka Warṅarinytja

¹ Palu ngayulu kuwari tjailangka nyinanyi, panya Jesulu Christalu ngayunya nyuralakutu iyaṅu nyurala Jew wiya tjuṅangka Tjukurpa Palya tjakultjunkunyjtaku. Kaniya mirpanṅtju tjuṅangku nyurala tjakultjunkunyangka witiṅa nyangangka tjuṅu.

² Ka panya nyura ninti ngayuku, panya Godalu ngayunya ngaltunytju pulkangku ngurkantara tjuṅu warṅa nyanga palunya palyantjaku munu nyuranya alpamilara kunpuntjaku.

³ Munuṅi paluru tjukurpa kumpilitja uwankara nintinu, kaṅa nyangatja tjukutjuku nguwanpa nyurampa walkatjunanyi.

⁴ Ka nyura tjukurpa nyanga kumpilitja ngayulu utira walcakujunkunytja nyakula wangkarampa kulilku, "Mulapa paluru nintiringu tjukurpa Christaku panya kumpilitja tjuṭaku."

⁵ Panya nganmanyitja tjuṭaya tjukurpa nyanga kumpilitjaku ngurpa nyinangi, panya kutjupangu tjanala tjakultjunkunytja wiyatu. Palu kuwari nyanga Kurunpa Milmitawanungku Godalu tjukurpa panya palunya utinu, wati panya Jesulu iyantja tjuṭangka, munu panya wangkatjara kuwaritja tjuṭangka kulu tjana tjukarurungku tjakultjunkunytjaku.

⁶ Ka tjukurpa panya kumpilitja paluru nyangatja panya Godalu iriti kalkunu Jew tjuṭa walytjanmara wirura kanyintjikitjangku. Palu kuwari Jesulanguru paluru kalkunu kutjupa tjuṭa kulu walytjanmara kanyintjikitjangku Jew tjuṭa kutju wiya. Kala nyara palulanguru Jesula Christalawanu tjukurpa palyaku mulamularingkula tjunguringkuku Godaku walytjapiti, Jew tjuṭa munu kutjupa tjuṭa kulu.

⁷ Panya Godaluni ngaltunytjungku ngurkantara witulyanu palumpa warkarinytjaku mununi tjukurtjara tjunu witulya pulkangu.

⁸ Palu ngayuluna tjanala pulka wiya alatjitu tjukutjuku mulapa ngaranyi, Godaku walytja kutjupa uwankarangka waintarinytja wiya. Palu Godaluni ngurkantara witulyanu kutjupa tjuṭangka Tjukurpa Palya Jesunytjara tjakultjunkunytjaku, panya tjukurpa nyanga paluru pulka mulapa uwankarangka waintarinytja.

⁹ Panya paluru alatjituni ngurkantara witulyanu anangu winkingka tjukurpa nyanga kumpilitja palunya utira tjakultjunkunytjaku tjana kulintjaku alatji, "Munta-uwa, nyanga alatjingara Godalu anangu tjuṭa wankarunkupai." Panya tjukurpa nyara palunya Godalu uwankara paluntjatjanungku kumpilpa kanyiningi kuwaripatjaranguru alatjitu ngula Jesuku walytja tjuṭawanu utiringkunytjaku.

¹⁰ Kaya ilkarangka angelpa tjuṭangka mayatja ilkaritja kutjupa tjuṭangu kulu Jesuku walytja tjuṭa nyakula kulilku, "Munta-uwa, Godanya mulapa ninti pulka nyinanyi munu kutjupa kutjupa uwankara witulyangu palyalpai."

¹¹ Ka mulapa Godalu nyangatja nganmanyitju kulinu nyanga alatji palyantjikitjangku munu panya Mayatja Jesunya Christanya mantakutu iyanu nganampa ngalkilpa ilunytjaku. Munu palulanguru Jesulu palyannyangka Godalu nganannya wankarunu.

¹² Kala Christaku mulamularingkula palula tjungu nyinara nganana ngulu wiya rapa ngaraku Godala mirangka.

¹³ Kana nyuranya wangkanyi kurunpa tjituru-tjitururinytja wiyaya nyinama ngayulanguru, panya nyangatjaniya ngayunya tjailangka tjarpatjunu, ngayulu nyurala Jesuku tjukurpa tjakultjunkunyangka. Kaya pukulpa nyinama panya ngayulu tjukurpa tjakultjunkunyangka nyura Jesuku mulamularingu munu Godaku walytjaringu, kaniya nyanga palulanguru tjailangka tjunu.

Christanya Nganampa Mukuringkunytja

¹⁴ Uwa, Mama Godalulanya Jew tjuṭa munu kutjupa tjuṭa kulu tjungura kanyini. Kana nyanga palulanguru tultjungarakatira Mamala tjapini.

¹⁵ Panya paluru kutjungku paluntja uwankara wankarunu ilkaritja tjuṭa munu mantatja tjuṭa kulu.

¹⁶ Kaṇa palula tḡapini paluru witulya pulḡangku nyuranya witulyankunytjaku, Kurunpa Milmilḡawanungku, nyura kurunpa kunḡu ngaranytjaku.

¹⁷ Ka nyara palulanguru Christanya nyurala unngu nyinaku nyura palumpa rapa ngaranyangka. Kaṇa piruku palula tḡapini nyura kurunpa mukulyatjarangku kutjupa kutjupa uwankara rapangku palyantjaku.

¹⁸ Ka nyanga palulanguru nyuntu nganaṇa Godaku walytja uwankarangku kulilku panya Christanya nganampa mukulya pulḡa mulapa ngaranyi uwankarangka waintarinytja.

¹⁹ Uwa, Jesunya Christanya nganampa pulḡara alatjitu mukuringkupai ngaltunytju pulḡa mulapa, kaṇa mukuringanyi nyura kulḡ mukulya nyanga pulḡa palula ngaranytjaku, ka nyura mukulya nyanga palula ngarala palya mularariku Godanya purunypa.

²⁰ Uwa, Godanyala mirawanima. Panya paluru witulya pulḡangku ngananaḡa unngu nyinara pulḡa mulapa palyalpai. Panya nganaṇa Godala tḡapilpai ka paluru kulira nganaṇa mukuringkunytjitjangka waintara pulḡa mulapa palyalpai. Tjingurula kutjupa kutjupaku mukuringkula tḡapintjikitjangku kulilku, ka paluru kulinyangka nyakula palyalku pulḡa mulapa waintara alatjitu.

²¹ Kala wanyu Jesuku Christaku walytja uwankarangku tḡungungku Godanya titutjarangku walḡura mirawanima wiru mulapa witulya pulḡa nyinanyangka. Uwa, mulapa.

4

Christalu Nganaṇanya Warḡa Kutju kutju Ungkunytja

¹ Uwa ngayuluṇa kuwari tḡailangkaḡu nyinanyi panya Mayatja Jesuku warḡarinyangkaṇiya witiḡa tḡarpatjunu. Kaṇa lita nyangangka nyuranya wangkara wituwituni nyura Godaku walytja nyinara wirura palyanyku nyinanytjaku. Panya Godalu nyuranya ngurkantanu palumpa walytjaringkula tḡukaruru nyinanytjaku.

² Munuyanku titutjara kaṇany-kaṇanypa wiya purkara nyinama munya purkarangku wangkama mapalku mirpaṇarinytja wiyangku, munuya anangu kutjupa tḡutaku mukulya pulḡa nyinama.

³ Panya Kurunpa Milmilḡu nyuranya kurunpa kunḡura kanyini tḡungu kutjuḡu nyinanytjaku. Kaya palulanguru kalypa nyinama rawa tḡungu nyinanytjikitja.

⁴ Panya nganaṇa Jesuku walytja uwankara kutjuringkula nyinanyi. Ka Kurunpa Milmilḡu kutjungku nganaṇanya wirura kanyini. Ka nganaṇa kutjuku paḡara nyinanyi kulil-kulilpa, panya Godalu nganaṇanya ngurkantanu ngula ilunytjatjanu pakara wanka titutjara nyinanytjaku, kala nyanga palumpa paḡara nyinanyi.

⁵ Panya nganampa Mayatja kutju nyinanyi, Jesunya Christanya. Ka nganaṇa tḡukurpa kutjuku mulamularingkupai, tḡukurpa panya Jesunyatjaraku. Munula baptise-katinytja kutju kulilpai.

⁶ Ka panya Godanya Mamanya kutju alatjitu nyinanyi nganampa uwankaraku. Nyara paluru uwankaraku mayatja, munu nganaṇalawanungku palyani paluru mukuringkula, munu nganaṇala uwankarangka unngu nyinanyi.

⁷ Panya Christalu pukultjungku nganananya kutju kutju nintinu warka palumpa nganana kutjungku kutjungku witulyangku palyantjaku.

⁸ Panya nyiringka iriti walkatjunkunyitja ngaranya alatji, "Paluru katu mulapa tatira anangu karpintja mungilyi katingu, munu paluru anangu tjuta mukulyangku nintinu witulyangku palyantjaku." *

⁹ Ka nyanga katu ankunyitja wangkara alatji nintini panya paluru nganmanypa katunguru tjaru mulapa ukalingu manta unngutjakutu.

¹⁰ Munu ukalingkunyitjatjanu panya paluru tu piruku malaku katu mulapa tatinu ilkarangka waintara pulka mulapa nyinanyitjikitja uwankarangku palunya nyakula mayatjanmara walkuntjaku manta winkitjangku.

¹¹ Nyanga paluru panya nganananya kulu nintinu palumpa warka kutjupa kutjupa witulyangku palyantjaku, munu panya kutjupatjara ngurkantara tjunu palumpa iyantja tjuta, munu kutjupatjara tjunu wangkatjara tjuta Godalu wangkanyangka anangu tjutangka tjakultjunkunyitjaku, munu kutjupatjara tjukuritjara tjuta tjunu Tjukurpa Palya Jesunyatjara ngura tjutangka paratjakultjunkunyitjaku anangu tjuta Jesuku walytjaringkunyitjaku, munu kutjupatjara tjunu atunymankupai tjuta Jesuku walytja tjuta atunymara kanyintjaku, munu kutjupatjara tjunu nintilpai tjuta Godaku walytja tjutangka wangkara nintintjaku.

¹² Nyanga alatji Jesulu nganananya tjunu warka kutjupa kutjupa tjuta palumpa palyantjaku nganana Jesuku walytja uwankara palula tjungu kunpuringkunyitjaku.

¹³ Kala warka nyanga palunya tjananya rawangku palyara nganana uwankara junguringkula Godaku katjaku tjukururu mulamularingkuku palumpa pulkara nintiringkula. Munula piruku tjitji purunypa rawa nyinanyitja wiya anangu pulkaringkula Christanya purunyarira palyanyku nyinaku.

¹⁴ Munula palulanguru kutjupangku ngunti wangkanyangka kulira wantiku. Panya wati ngunti palya-palku nyinapai tjutangkuya tjukurpa kura tjuta wangkapai anangu tjuta kawantjingantjikitjangku. Palu nganana Christanya purunyarira palunya tjananya ngunti wangkanyangka nintingku ngurkantankuku munula tjananya kulira wantiku ngunti kurantjaku-tawara.

¹⁵ Kala uti tjukururungku wangkama Godaku mukulyatjarangku munula nyara palulanguru pulkaringkuku munu Christanya purunyariku panya paluru nganampa Mayatja pulka nyinanyi, Jesuku walytja uwankaraku.

¹⁶ Munu paluru nganananya uwankara tjungura kanyini kutjuringkula warka nyinanyitjaku. Munulanya paluru wanka kanyira nintilpai urira warka palumpa kutjupa kutjupa tjuta palyantjaku. Kala nganana warka walytjangku walytjangku paluru nintinyangka palyara ma-kunpuringkula mukulya pulkaringkupai.

Wanka Kuwaritja Christalanguru

¹⁷ Kulilaya! Ngayuluna Mayatjanya wanarira kulilpaingku nyuranya wangkara paini nyura anangu watarkitja tjuta purunypa nyinanyitja

* 4:8 Psalm 68:18

wiyangku wantinytjaku, panya paluru tjana Godaku ngurpangku tjukurpa kurakura tjuṭa kutju kulilpai.

¹⁸ Panya tjanampa kulintja mungawaluru mauntalpa alatjitu ngaranyi wankakitjangku kulintja wiya. Godalu tjananya wankarunkunyjtaku ngaranyi alatjitu, palu wiya, tjana kurunpa wituwitungkula kulira wantinyi munuya tungun-tungunpa alatjitu nyinanyi.

¹⁹ Munuya kunṭa wiyangku kura kutju alatjitu palyalkatipai kura pulka mulapa, munuya tjukaruru wantira kuraku manyu nyinapai.

²⁰ Wanyu Christanya nyanga tjana purunypa nyinapai? Wiya alatjitu.

²¹ Ngayulu nyurampa ninti, panya nyura tjukurpa tjukaruru Jesunyatjara nganmanytju kulinu. Kutjupa tjuṭangku panya nyurala tjukarurungku nintiningi tjukurpa panya palunya.

²²⁻²³ Nyara palulanguru nyura palumpa nintiringkunyjtjanungku uti kura tjuṭa wantima rawangku palyantja wiyangku. Panya nganmanytju nyura kura tjuṭaku mukuringkula nyanga palu purunypa tjuṭa palyaningi, munu nyura kuraringkula kura kutju palyalkatingi ilunytjakutu-wangkara alatjitu.

²⁴ Palu kulilaya munuya mukuriwa palyanyku nyinanytjikitja kurunpa winki kampa kutjuparira. Panya Godalu nyuranya kurunpa kuwaritja palyanu palunya purunypa nyinanytjaku, ka nyara palulanguru nyura uti tjukaruru palyanyku nyinama paluru nyakula pukularinytjaku.

Kurunpa Kuwaritjatjara Nyinanytja

²⁵ Munu nyura uti ngunti wangkanytja wiyaringama munu kutjupangka wangkarampa tjukarurungku kutju wangkama, panya nganana uwankara Godaku walytjapiti munula Christala kutjungka tjungu nyinanyi. Nyara palulangurula uti tjukarurungku kutju wangkama ngunti wangkanytja wiyangku.

²⁶⁻²⁷ Palu tjinguru nyura mirpanarirampa pikaringkuwiyangku wantima. Munuya kalala wara titutjara mirpanpa nyinawiya mapalku kalyparingama mamungku nyuranya rawa mirpanpa ngaranyangka wituwitura kurantjaku-tawara.

²⁸ Tjinguru anangu kutjupa kutitjukupai nyinara, uti paluru kutitjunksytjikitjangku kulintja wiyaringama munu tjukarururungkula warkarima palumpa maiku munu anangu ngaltutjara tjuṭa kulu ungunytjikitja.

²⁹ Munu nyura uti anangu kutjupangka wangkarampa tjukurpa kura wangkawiyangku wantima. Munuya tjukurpa palya kutju wangkama anangu tjuṭangku kulira pukularinytjaku.

³⁰ Munuya Kurunpa Milmilnga tjituru-tjiturunkunyjtja wiyangku wantima, panya paluru nyurala unngu nyinara nintilpai nyura Godaku walytja nyinanyangka. Panya Godalu Kurunpa Milmilnga nyurala unngu tjarpatjunu paluru nyurala nyinara nintintjaku alatji, "Mulapa Godalu ngananyanya ngula Tjintu Malatjangka kuranguru wankarunkuku."

³¹ Ka nyura mirpanpa rawangku kanyilwiyangku wantima, munu anangu kutjupaku pikaringkula mirpan-mirpanṭu wangkanytja wiyangku wantima, munu ngalytjurmara warkinytja wiyangkuṭu

wantima, munuya anangu kutjupaku kuraringkuwiyangu wantima alatjitu.

³² Palu ngaltunytjuya nyinama, munuya anangu kutjupa tjutaku kulu pulkara mukuringama. Munu kutjupangu nyuranya kuran-nyangkampa nyura uti palunya kalypangu kulira wantima. Panya Godalu nyuranya kura palyantjitjanguru kalypangu wantingu Jesula Christalawanungku, palu purunypa nyura uti kalypangu wantima.

5

¹ Panya Godalu nyuranya mukulyangu walytjanmara kanyini, ka nyura palumpa tjitji tjuta nyinanyi. Kaya nyanga palulanguru pulkara arkanma Godalu purunytju palyantjikitjangku.

² Panya Christanya nganampa pulkara mukuringkula ngalkilpa ilungu ka Godanya palumpa pulkara pukularingu. Ka nyura kulu uti palu purunypa anangu kutjupa tjutaku pulkara mukuringama.

³ Nyura panya Godaku walytja tjuta, ka palulanguru nyura uti kuri walytjatjarangka kampangatu ngariwiyangu wantima, munuya ngunti-ngunti tjunguringkuwiyangu wantima, munuya walytjatjaraku nyakula manyuringkula mukuringkuwiyangu wantima.

⁴ Munu nyura Godaku walytja nyinarampa uti tjaangu warkinytjatjara wangkanytja wiyangu wantira wiru tjuta kutju wangkama. Munu Godanya kutju walnunma nyuranya wirura kanyinnyangka.

⁵ Kulila, panya anangu tjutangu kura nyanga palunya tjananya palyantjatjanu putu Christala tjunguringkula Godaku walytjaringanyi, ka paluru putu tjanampa mayatja nyinaku. Panya paluru tjana kura nyanga palunya tjananya palyara Godanya wantira god ngalypa-ngalypa tjutaku pulkara mukuringanyi.

Tilingka Uti Nyinanytjaku

⁶ Uwa, anangu kutjupangu nyuranya ngunti wangkara kuran-nyangka nyura uti palula tjanala kulira mulamularingkuwiyangu wantima, panya Godanya mirpanaripai ngunti wangkapai tjutaku, panya paluru tjana palula tungunpungkupai.

⁷ Ka nyura palulanguru tjanala tjunguringkuwiyangu wantima, munuya tjananya arkalwiyangu wantimatu.

⁸ Panya nganmanypa nyurampa kulintja mungawaluru nguwanpa ngarangi ka nyura kura tjuta kutju palyalpai. Palu kuwari nyanga nyura Christaku walytjaringkula kulintja utiringu munu nyura tilingka purunypa nyinanyi. Palu tilingka nyinapai tjuta tjukaruru nyinapai, ka nyura tjananya purunypa nyinama tilingka.

⁹ Panya nyura tilingka uti nyinara nyura wiru tjuta kutju palyalku munu palyanyku nyinara tjukarurungku kutju wangkaku.

¹⁰ Munuya Mayatja Godala tjapinma, ka nyuranya nintilku wiru tjuta kutju tjukarurungku palyantjaku.

¹¹ Munuya anangu panya mungawalurungka nyinapai tjuta arkalwiyangu wantima, panya paluru tjana kurakura tjuta kutju palyalpai. Palu panya nyura wiru tjuta kutju palyanma anangu panya paluru tjana ngunti palyantjatjanungku nyuranya nyakula kulira kuntaringkunytjaku.

¹² (Panya tjana kampangkaṭu palyantjanya kura pulka mulapa, ka kutjupangku tjinguru kulira kunṭaringkula unngu kutju kulini, “Wanti, ka ngarama kampangkaṭu.”)

¹³ Palu uwankara mungawalurungka palyantja tjuṭa tilingku utilku uti nyakunytjaku.

¹⁴ Panya tilingku irnyara utilpai, ka uwankara utiringkupai, palu purunypa kurakura tjuṭa utiringkuku. Panya iriti nyiringka walkatjunkunytja ngaranyi alatji,

“Kunkuntjanuya wankariwa munuya ilunytjatjanu pakanma.

Ka Christalu nyuranya irnyara utilku.”

¹⁵ Kaya wanyu anangu ngurpa tjuṭa purunypa nyinawiyangku wantima munuya palyanyku nyinara tjukaṭurungku ngurkantanama.

¹⁶ Nyangatja panya kuwari tjintu kura, munu nyanga palulanguru tjintu kura tjuṭa ma-ngarala wanani, panya mamu tjuṭangku nyuranya ilangku nyanganyi kawantjingantjikitjangku. Kayanku nyara palula-tawara purkarangku nyakukatima palyanyku nyinanytjikitjangku.

¹⁷ Munuya ngunti kawakawaringkunytja wiyangku nyangama, munuya Godala tjapinma paluru mukuringkunytjitja nyurala nintintjaku.

¹⁸ Munuya wama pulka tjikintja wiyangku wantima puntu nyuranku kurantjaku-tawara, palu pulkara mukuringama Kurunpa Milmilṭu nyurala unngu nyinara titutjarangku mayatjarira kanyintjaku.

¹⁹ Munuya nyuranku tjunguringkula inma wiru tjuṭa inkama irititja munu kuwaritja, psalm tjuṭa kulukulu, munuya pukularira Mayatja Jesunya kurunpa winkingku inkara walkunma.

²⁰ Munu nyura uti Mama Godalu nyuranya wirura kanyinnyangka palunya pukulṭu titutjarangku walkunma Mayatja Jesula Christalangu.

Wati Minyma Kurirara Nyinanytjaku

²¹ Nyura panya Christanya walkuni. Palulanguru nyuranku uti ngapartji-ngapartjingku wanganarangku kulinma.

²² Kulilaya! Minyma kuringku uti palumpa kuringka wanganarangku kulinma, panya paluru Mayatja Jesula wanganarangku kulilpai, nyara palu purunypa.

²³ Christalu panya palurunku Godaku walytja tjuṭa wankarunkupai, munu panya tjananya uwankara mayatja wirungku atunymara kanyilpai, ka palu purunytjuṭu Godalu wati tjunu palurunku kuri atunymara kanyintjaku.

²⁴ Ka panya Godaku walytja uwankarangku Jesula wanganarangku kulilpai, palu purunytju uti minyma kuri tjuṭangku wati kuringka wanganarangkuṭu kulinma.

²⁵⁻²⁶ Ka wati kuritjara tjuṭa, kulinmaya! Nyura uti nyurampa kuriku pulkara mukuringama, panya Christanya palumpa walytja tjuṭaku pulkara mukuringkula tjananya wirura kanyilpai, palu purunypa nyura uti nyurampa kuriku pulkara mukuringama munu wirura kanyinma. Panya Christanya palumpa walytja tjuṭaku ngalkilpa ilungu munu tjananya palumpa walytjaringkunyangka mantjira Godala tjunṭunu, panya paluru tjananya wiruntjikitjangku minangka paltjijnu Tjukurpa Palya tjanala wangkara. ²⁷ Panya Christalu alatji palyanu

palumpa anangu tjuṭa wiru mulapa palyara puntu winki irnyara ngaranytjaku pal̄kunpatjara wiya, kura kutjupa kutjupatjara wiya.

²⁸ Uwa, alatji Christanya palumpa walytja tjuṭaku pul̄kara mukuringanyi, ka palu purunypa wati kuritjara uti palumpa kuriku pul̄kara mukuringama palurunku walytja mukuringkunyitja purunypa, panya paluru minyma kuriku pul̄kara mukuringkula palurunku mukuringkunyitja nintini.

²⁹ Panya anangu kutjupangu puntu palurunku walytjangku nyakula kuranmankupai wiya, palu walytjangku palurunku pul̄kara atunymankupai munu paltjalpai. Ka palu purunytju Christalu palumpa walytja tjuṭa palumpa puntu purunypa nyakupai munu pul̄kara atunymara paltjalpai.

³⁰ Panya nganaṇa-manṭu uwankara palula tjungu ngaranyi kutjuṭu, palumpa puntu purunypa.

³¹ Ka panya iriti nyiringka walkatjunkunyitja ngaranyi alatji,

“Watingku mama ngunytju wantikatira kungka kuri altira paluru pula tjunguringanyi, munu pula kutjara wiyaringkula kutjuringanyi alatjitu.” *

³² Uwa, wati minyma tjunguringkula kutjuringkupai, ka palu purunypa Christanya munu palumpa walytjapiti uwankara tjunguringkula kutjuringkupai. Ka tjukurpa nyanga paluru pul̄ka mulapa ngaranyi puṭu nguwanpa kulintjaku.

³³ Ka wati kuri uti minyma kuriku pul̄kara mukuringama munu palunya wirura atunymara kanyinma, panya palurunku walytjangku atunymara kanyintja purunypa. Ka minyma kuringku ngapartji uti wati kuringka wanganarangku kulinma.

6

Tjitji Tjuṭa Munu Ngunytju Mama

¹ Tjitji tjuṭa, kulinmaya! Uti nyura Jesuku walytja nyinara ngunytjunga mamangka wanganarangku kulinma, panya Mayatjanya pul̄kara mukuringanyi nyura palula tjanala wanganarangku kulintjaku.

²⁻³ Panya iriti Godalu tjukurpa pul̄ka tjuṭa Mosela wangkangu, munu tjukurpa kutju paluru alatji wangkangu, “Uti nyura ngunytjunga mamangka wanganarangku kulinma.” Munu paluru nyangatja wangkanytjatjanungku kalkunu alatji, “Nyura ngunytjunga mamangka wanganarangku kulirampa rawa nguwanpa wanka pukulpa nyinaku manta nyangangka.”*

⁴ Kaya mamangu ngunytjunku ngapartji kulila! Uti nyuranku nyurampa tjitji tjuṭa palyanyku kanyinma pauntjingara wangkanytja wiyangu tjana mirpanarinytjaku-tawara. Palu wirura tjananya mukulyangu pul̄kara nintinma Mayatjaku nintiringkula palula wanganarangku kulintjaku.

Wati Warkaripai Tjuṭa Munu Mayatja

⁵ Kaya anangu warkaripai tjuṭangu ngapartji kulila! Uti nyura mayatja mantatja tjuṭangu wanganarangku kulinma munu tjanampa

* 5:31 Genesis 2:24 * 6:2-3 Exodus 20:12

ngulu-ngulu tjukaruru warakarima ngunti palyantja wiyangku, panya nyura Christala kulintja purunypa.

⁶ Uwa, mayatjangku wangkanyangka tjukarurungku palyanma paluru nyakula pukularinytjaku. Munu tjinguru paluru warkarinytjaku wangkara wantikatinyangka nyura uti palu purunytju tu wara rawangku palyanma ankunyangka wantinytja wiyangku. Panya nyura Jesuku Christaku warkarinyi palumpa walytja nyinara. Ka paluru mukuringanyi nyura palulawanu tjukaruru nyinanytjaku. Ka palulanguru nyura uti Jesula wanganarangku kulira mayatja mantatja tjutaku wirura tjukaruru warakarima kurunpa winki.

⁷ Panya nyura wara palyara Mayatja Jesuku kulu warkarinyi mayatja mantatjaku kutju wiya. Pala palulanguru mayatja paluru nyuranya warakaku wituwitunnyangka nyura uti pukultu palyanma wanganarangku.

⁸ Munuya kulinma panya Mayatja Jesulu nyuranya ngula ungkuku nyura wirura tjukaruru warkarinyangka. Tjinguru anangu kutjupa tjuta mani wiya unytju warkaripai, palu ngula Godalu tjananya wirura warkarinyangka ungkuku. Tjinguru kutjupa tjuta manikitja warkaripai, ka Godalu palunya tjananya kulu ungkuku wirura warkarinyangka.

⁹ Kaya mayatja tjutangku ngapartji kulila! Wati panya warkaripai tjutaya wirungku mukulyangku kulinma munu tjananya pauntjingtja wiyangku wantima, panya nyurampa Mayatja pulka nyinanyi nyara ilkarangka, munu tjanampa kulu. Panya Mayatja nyara paluru uwankaraku mukuringkupai munu paluru palu purunypatu palyalpai anangu uwankaraku.

Godalu Nyuranya Kunpulpai Mamungku Kurantjaku-tawara

¹⁰ Ala, Mayatjalu nyuranya witulyankunyangkaya kunpu ngarama wantinytja wiya.

¹¹ Panya Godalu nyuranya kutjupa kutjupa tjutangka kunpulpai mamungku kurantjaku-tawara, kaya nyanga palula tjanala kunpuringama Satantu ngunti kurannyangka tungunpungkula ngaranytjikitja.

¹² Tjinguru nyura kulinma nganana mantangka nyanga nyinanyangka anangu mirpantju tjutangku kutju ngananyanya rawangku Godalanguru arkara mauntananyi. Palu wiya, uti nyura anangu tjuta pulkara kulintja wiyangku wantima munuya waintara kulinma mamu tjuta. Panya paluru tjana pulkara warkarinyi ngananyanya Godalanguru mauntankunytjikitja, panya katutja witulya tjutangku munu mungawaluruku mayatja tjutangku munu kura kurunitja ilkaritja winkingku kulu ngananyanya rawangku arkalpai.

¹³ Ka Godalu nyuranya witulyankunyangkaya wantinytja wiya kuwaritu kunpuringama. Ka tjintu kutjupa Satantu tjana nyuranya kurantjikitjangku arkannyangka nyura punkantja wiya ngaraku kunpu. Munu rawangku arkannyangka nyura kunpu alatjitu ngaraku.

¹⁴ Kaya riti ngarama Godalu nyuranya witulyankunyangka. Tjukurpa tjukarurukuya pulkara nintiriwa munuya watarkuri-wiyangku kulinma, panya tjaultjingku piltangka karilpa karpilpai araltjarinytjaku-tawara, palu purunypaya tjukurpa tjukaruru

rawangku kulinma tarilarantjaku-tawara. Munuya tjukaruru palyanyku nyinama, panya tjaultjingku pilpirta anga-tjutulpai warmalangku wakantjaku-tawara, palu purunypaya tjukaruru mulapa palyanyku nyinama, ka Satantu nyuranya putu kuralku. ¹⁵ Munuya riti ngarama Godaku Tjukurpa Palya anangu tjutangka tjakultjunktunytjikitja. Panya tjaultjingku tjinatjanga tjarpara riti ngarapai ankunytjikitja, palu purunypaya riti ngarama Tjukurpa Palya wangkanytjikitja.

¹⁶ Munuya titutjara Godaku mulamularingama munu nyura pala palulanguru rapa ngaraku kura kutjupa kutjupa tjuta wirkankunyangka. Panya tjaultjingku kutitji kanyilpai angatjunktunytjikitjangku warmalangku kulatangka wakantjaku-tawara, palu purunypa nyura pulkara mulamularingkunyangka mamungku nyuranya putu ngunti wangkara kuralku.

¹⁷ Munuya Godalu nyuranya wankarunkunyangka titutjara kulira mulamularingama. Panya tjaultjingku mukata wituwitu katangka kanyilpai kata wakantjaku-tawara, palu purunypa nyura wankarunkunytja kulira mulamularingkunyangka Satantu nyuranya kulintja putu kurani. Munuya Godaku tjukurpa wanganarangku kulinma Kurunpa Milmilu nintinnyangka. Panya tjaultjingku tjula wara kanyilpai warmala wakantjikitjangku, palu purunypaya Godaku tjukurpa kanyinma Satantu ngunti wangkanyangka tjukurpa tjukaruru wangkanytjikitjangku.

¹⁸ Munuya watarkuriwiyangku titutjarangku Godala tjapinma nyuranya alpamiantjaku. Palu Kurunpa Milmilu paluru nintinnyangka kutju tjapinma. Munuya wankangku ala-alangku titutjarangku nyangama kampangkatu pitjala kurantjaku-tawara. Munuya anangu Godaku walytja uwankarakutu palula rawangku tjapinma.

¹⁹ Munuya ngayuku kulu Godala tjapinma ngayunya paluru tjukurpa kumpilitja Jesunyatjara utintjaku. Kana palulanguru anangu uwankarangka tjukurpa palunya rapangku utira tjakultjunktuku tjana uti kulintjaku.

²⁰ Nyanga palumpa panyani paluru ngurkantara tjunu warka nyanga palunya palyantjaku. Kana kuwari nyanga tjailangka nyinanyi. Kaya ngayuku Godala tjapinma ngayulu ngulu wiyangku rapangku Tjukurpa Palya Jesunyatjara wangkanytjaku.

Tjukurpa Malatja

²¹ Palu kuwarina wati Titjikatjanya nyuralakutu ma-iyani nganampa panya malpa wiru. Wati nyanga palumpa panya nganana pulkara mukuringkupai. Nyanga paluru Mayatjaku warka wanganarangku kulira palyalpai palumpa mulamularingkula, munu raparingkula. Ka paluru nyurala wirkara tjukurpa ngayunyatjara uwankara tjakultjunktuku. Ka nyura kulilku yaaltji-yaaltji ngayulu nyinanytja, munu warka nyaa ngayulu palyantja.

²² Uwa, palulanguruna palunya ma-iyani nyuralakutu nyuranya kurunpa rapantjaku tjukurpa wangkara.

²³ Uwa, alatjituṅa walkatjunanyi. Ka Mama Godalu munu Mayatja Jesulu Christalu nyuranya Jesuku walytja uwankara kurunpa rapara pukulmanama, munu nyuranya mukulya pulka nyinanytjaku palyanma palumpa pulkara mulamularingkula.

²⁴ Uwa, Godalu nyuranya pukultju pulkangku kanyinma nyura
Jesuku Christaku rawa alatjitu pulkara mukuringkunyaangka.

Lita Paulalu Walkatjura Iyantja Ngura Pilipailakutu Philippians Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjunkunytja tjaila unngunguru anangu Jesuku walytja tjutaku tawunu nyara ini Pilipaila nyinanytja tjutaku. Panya nyara paluru tjana palumpa mani iyalpai tjailangka nyinanyangka. Ka paluru lita nyangatja tjanampa pukularira walkatjura tjanalakutu iyanu palunya tjananya wirunmankunytjikitjangku, panya paluru tjananya rawangku kuliningi watarkurinytja wiyangku.

Palu Paulanya tjaila unngu nyinara tjituru-tjitururinytja wiya, panya paluru alatji wangkangu, “Ngayunyaniya tjailangka tjarpatjuna kana kuwari nyanga unngu nyinara ngayulu titutjara alatjitu pukulpa nyinanyi. Panya nyura ngayuku rawangku Godala tjapini, kana Jesulu Kurunpa Milmitu ngayunya atunytju kanyini. Kana nyara palulanguru kulini, ‘Mulapa Godalu ngayunya wankarunkuku.’ Kana pukulpa nyinaku tjituru-tjitururinytja wiya alatjitu.” (Nyawa 1:19.)

Ka Pilipainya panya tawunu pulka manta ini Matja-tuniyala kampa alinytjara. Ka panya Paulanya nganmanypa manta nyara palula para-ngarangi ngura tjutangka munu panya Pilipaila-warara wirkanu. Munu ngura nyara palula anangu tjutangka Tjukurpa Palya Jesunyatjara tjakultjunangi, kaya tjarangku kulira Jesuku mulamularingu. Munuya palulanguru inmangka rawa tjunguringkupai ngura nyara palula.

Ka lita nyangangka Paulalu tjanala wangkangi alatji, “Tjinguruya anangu tjutangu nyuranya pikantankuku panya nganmanytjuya Jesunya pikantanu, palu purunypa. Munu panyaya ngayunya kulu rawangku pikantanangi, palu purunypa.” Alatji paluru wangkangi tjaila unngunguru munu tjanala piruku wangkangi Jesunya rawangku kulintjaku wantinytja wiyangku munu anangu uwankaraku pukultju kalypa nyinanytjaku pikaringkunytja wiya, munu palunya arkara tjukaruru titutjara nyinanytjaku Jesunya purunypa.

Tjukurpa nyanganpa ngarinyi:

1:1-11 Paulalu nganmanytju wangkanytja

1:12-30 Paulalu palurunku tjailangka nyinanytjatjanungku tjakultjunkunytja

2:1-18 Jesunya purunypa nyinanytjaku

2:19-30 Paulalu Timitjinya pulanya Papa-tayatjanya tjanalakutu iyantja

3:1—4:9 Paulalu tjukurpa kutjupa tjuta tjanala wangkara nintintja

4:10-20 Paulalu tjananya wirunmankunytja palunya alpamilan-nyangka

4:21-23 Paulalu tjukurpa malatja wangkanytja

Paulalu Nganmanytju Wangkanytja

¹ Uwa Jesuku walytja tjuṭa, ngayuluna nyurampa Paulalu lita nyan-gatja walkatjunanyi ngura pala Pilipaila nyinanytja tjuṭaku. Panya nyura Godaku nganmanypa walytjaringu Jesuku Christaku mulamula-ringkunyjtjanu. Kali Timitjilu ngali Jesuku warkaripai kutjarangku lita nyangatja nyuralakutu ma-iyani nyura uwankarangku kulintjaku. Ka panya nyuranya atunymara kanyilpai tjuṭangku kulu uti lita nyan-gatja nyakula wangkama, munu anangu panya nyuranya alpamilalpai tjuṭangku kulu.

² Ka Mama Godalu pula Mayatja Jesulu Christalu nyuranya pukultju pulkangku kanyinma munu nyuranya kurunpa rapara pukulmanama.

Paulalu Tjanampa Godala Tjapintja

³ Uwa, ngayulu nyuranya rawangku kulilpai mununa nyuranya kulira pukularira Godala wangkapai alatji, "Ngura nyara Pilipaila nyuntumpa walytja tjuṭa wirura nyinanyi."

⁴⁻⁵ Mununa palulanguru nyurampa uwankaraku pukultu rawangku tjapilpai, panya nyura ngayunya rawangku alpamilalpai Tjukurpa Palya Jesunyatjara anangu tjuṭangka tjakultjungkunyjtjaku. Nyara palulanguruna nyurampa pulkara pukularira nyurampa Godala tjapil-pai. Panya nyura nganmanypa Jesuku walytjaringkunyjtjanungku ngayunya alpamilanangi munu nyura kuwari kulu alpamilalpai nyi-nanyi ngururpa wantinytja wiyangku.

⁶ Panya nyura Jesuku mulamularingkunyangka Godalu nyu-ranya kampa kutjupanu palumpa palyanyku warkarinytjaku. Ka ngayulu ninti panya Godalu mulapa nyuranya rawangku wirulkatinyi titutjarangku, Mayatja Jesunya Christanya malaku pitjanytjakutu-wangkara. Munu nyara palula aralta nyuranya palyara wiru mula-rmankukulta palula tjunguringkula titutjara nyinanytjaku.

⁷ Kana nyurampa pulkara mukuringanyi kurunpa winki. Palu-languruna nyuranya rawangku kulilpai. Panya Godaluni wirungku warka nyanga palunya ungu Tjukurpa Palya Jesunyatjara anangu tjuṭangka tjakultjungkunyjtjaku. Ka panya nyura kulu ngayunya alpamilara Tjukurpa Palya para-tjakultjunangi. Kana nyuranya rawangku pukultu kulilpai, panya nyura ngayunya titutjarangku kulilpai wantinytja wiyangku munu panya nyura ngayuku mani iyalpai. Kana palulanguru Tjukurpa Palya tjakultjungkupai anangu tjuṭangka, mununa mirpantju tjuṭangku ngayunya katira kuutpangka wangkanyangka ngayulu Tjukurpa Palya tjanala kulu rapangku wangkapai tjana tjukarurungku kulintjaku. Mununa kuwari nyanga tjailangka nyinara rawangkuṭu tjukurpa palunyaṭu tjakultjunanyi anangu nyanga kutjupa tjuṭangka kulu. Ka panya nyura wirungku ngayunya rawangku kulira alpamilalpai warka nyangatja palyantjaku.

⁸ Uwa, Godanya ninti panya ngayulu nyurampa pulkara alatjitu mukuringkupai kurunpa winki, panya Jesunya nyurampa mukur-inkupai, palu purunypa.

⁹ Uwa, ngayulu ninti panya nyura kurunpa mukulya nyinanyi, palu ngayulu nyurampa Mamala tjapini nyuranya mukulya pulka rawangku nintintjaku, ka nyura palumpa titutjara pulkara mukuringkuku munu nyuranku kulu rawangku mukulyangku

aṭunymankuku. Munuṅa nyurampa piruku Mamala tḡapini tḡukurpa pulka nyurala nintintḡaku, ka nyura palunya nintingku kulilku munu tḡukarurungku ngurkantankuku kura munu palya.

10-11 Ka nyara palulanguru nyura Godaku pulkara nintiringkula uwankara tḡukarurungku kulilku. Munu kutjupa kutjupa tḡuṭa utiringkunyaṅka nyura nintingku kulilku tḡukarurungku palyantḡik-itḡangu. Munu nyura Godalawanu tḡutḡjara palyanyku nyinaku tḡukaruru alatḡitu Christanya malaku pitḡanytḡakutu-wangkara. Panya ngayulu Jesula Christala tḡapini nyuranya nintintḡaku, ka nyura palula tḡungu nyinara rapangku wiru tḡuṭa kutju palyalku. Ka nyara palulanguru anangu kutjupa tḡuṭangku nyuranya wirura nyinanyangka nyakula Godanya walkura mirawaniku.

Christalu Paulanya Tḡailangka Nyinanyangka Rapara Kanyintḡa

12-14 Uwa, walytḡa tḡuṭa, kulilaya! Nyanga kuwarina tḡailangka nyinanyi, ka nyura tḡinguru kulini ngayulu nyangangka nyinara Tḡukurpa Palya Jesunyatḡara anangu tḡuṭangka puṭu wangkanyangka-palku. Palu wiya, ngayulu tḡaila unngu kulu nyinara wangkanyi tḡaultḡi tḡuṭangka munu kutjupa tḡuṭangka kulu. Kaya kuwari tḡaultḡi uwankarangku nintiringkula kulinu, “Munta-uwa, wati nyanga palunya tḡailangka tḡarpatḡunu paluru tḡukurpa Jesunyatḡara anangu tḡuṭangka tḡakultḡunyaṅka.” Ka panya Jesuku walytḡa kutjupa tḡuṭaya nguluringangi Godaku tḡukurpa para-wangkanytḡaku tḡanala anangu panya ngura nyangangka nyinanytḡa tḡuṭangka. Panya tḡana alatḡi kuliningi, “Tḡingurulanya tḡaultḡi tḡuṭangku witira tḡailangka tḡarpatḡunkuku.” Munuya palulanguru nguluringangi. Palu ngayulu nyanga tḡailangka unngu nyinanyangkaya paluru tḡana nyangangi Mayatḡalu ngayunya pulkara aṭunymankunyaṅka, munuya nyara palulanguru tḡana nguluringkunyṭḡa wiyaringu, munuya kuwari rapangku wangkanyi anangu tḡuṭangka, kaya tḡuṭangku kuwari kulini Tḡukurpa Palya Jesunyatḡara ngayulu nyanga tḡailangka nyinanytḡitḡanguru.

15-16 Palu panya Jesuku walytḡa kutjupa tḡuṭa ngayuku nyararingkupai tḡukurpa Jesunyatḡara tḡakultḡunyaṅka. Panya paluru tḡana mukuringkupai anangu tḡuṭa palula tḡanalanguru kutju Jesuku walytḡaringkunyṭḡaku, tḡukurpa paluru tḡana tḡakultḡunyaṅka kutju kulira. Palu Jesuku walytḡa kutjupa tḡuṭangkuya ngayuku mukuringkula ngayunya alpamilalpai munuya tḡukurpa Jesunyatḡara para-tḡakultḡukupai. Paluru tḡanaya nintingku kulini panya Godalu ngayunya ngurkantara tḡunu nyanga tḡailangka ungu nyinara palumpa anga-wangkara Tḡukurpa Palya Jesunyatḡara tḡukarurungku wangkanytḡaku.

17 Ka panyaya anangu ngayuku nyararingkupai tḡuṭangku kanany-kananytḡu Jesuku tḡukurpa wangkapai, panya paluru tḡana nyanga alatḡi kulilpai, “Utiya anangu tḡuṭa nganalanawanu Jesuku walytḡaringama tḡuṭa mulapa, ka Paulalawanu mankurpa kutju.” Tḡanaya alatḡi ngunti kulilpai, panya paluru tḡana ngayuku nyararinganyi ngayunya kurantḡikitḡa mukuringkula nyanga tḡailangka nyinanyangka. Munuya tḡinguru kulini ngayulu palumpa tḡanampa kuraringkunyaṅka-palku.

18 Palu wiya, ngayulu palumpa tjanampa pukularinyi tjana tjukurpa Jesunyatjara anangu tjutangka tjakultjunkunyangka kulira. Panya tjana unngu nyararingkula tjukurpa wangkanyi, palu anangu tjutangu tjukurpa Jesunyatjara kulini alatjitu tjana wangkanyangka, kana nyara palulanguru pulkara pukularinyi anangu tjutangu tjukurpa Jesunyatjara kulinnyangka. Ka panyaya ngayuku mukuringkupai tjutangu wirura wangkapai Godanya kutju pukulmankunytjikitjangku, kaya anangu tjutangu kulilpai paluru tjana wangkanyangka. Kana palumpa tjanampa kulu uwankarakutu pukularinyi tjukurpa Jesunyatjara tjakultjunkunyangka.

19 Nyangatjaniya tjailangka tjarpatjunu, palu palya, ngayulu titutjara pukulpa nyinanyi. Panya nyura ngayuku rawangku Godala tjapini, kani Jesulu Kurunpa Milmilu ngayunya atunytju kanyini nyanga tjailangka unngu. Kana nyara palulanguru kulini, "Mulapa Godalu ngayunya wankarunkuku." Kana pukulpa kutju nyinaku tjituru-tjitururintja wiya alatjitu.

20 Palu tjinguruniya kuwari kuutpangka wangkanytjaku tjunkuku, ka ngayulu kulini mulapa Godaluni nintilku tjukarurungku wangkanytjaku. Panya ngayulu pulkara mukuringanyi kuutpangka tjuta mirangka kuranyu ngarala rapangku wangkanytjikitja nguluringkunytja wiyangku, panya purunytjutu, panya ngayulu rawangku ngulu wiyangku Godaku tjukurpa wangkapai. Kaniya tjinguru iluntankuku, munta tjinguruniya walatjunkuku. Palu pulkara mukuringanyi panya anangu tjutangu ngayula kulira Jesunya Christanya waintara nyakunytjaku munu palunya kutju walkuntjaku.

21 Alatjina kulini. Tjinguruna wanka nyinarampa Jesula kutjunga wanganarangku kulinma panya paluru kutjunku ngayunya wankaru kanyilpai. Palu tjinguruna ilurampa ngayulu ngura panya wiru mulata wirkara Jesula tjunguringkula titutjara nyinaku.

22 Palu putuna kulini. Yaaltjirikuna? Tjinguru ngayulu wanka nyinarampa Godaku wara rawangkutu palyalkatima anangu tjuta palumpa walytjaringkunytjaku. Munta tjinguruna ilurampa ngayulu Christala tjunguringkula pulkara pukulariku ngura nyara ilkarangka nyinara.

23 Kampa kutjarana kulini, tjinguruna wanka nyinaku, munta tjinguruna iluku. Putuna walytjangku ngurkantananyi. Panya ngayulu pulkara kulini ilura ngura ilkarangka wirkara Jesula tjunguringkula nyinanytjikitjangku.

24 Mununa piruku alatji kulini, "Wiya, utina wanka nyinama panya tjana ngayuku mukuringanyi tjananya alpamilantjaku."

25 Kana nyara palulanguru kulini, "Munta-uwa, mulapa Godalu ngayunya wankaru kanyilku tjana ngayuku mukuringkunyangka." Kana wankaru alatjitu tjailanguru pakara nyuralakutu ma-pitjaku mununa nyurala wirkara piruku Godaku tjukurpa nintilku nyura kulira pulkara mulamularingkula pukulpa mulapa nyinanytjaku.

26 Ka nyura ngayuku pukularira Jesunya Christanya pulkara mirawaniku paluru ngayunya nyuralakutu malakungku Wirkakatinyangka nyakula.

Christala Wanganarangku Kulintjaku

27 Uwa, walytja tjuṭa! Uti nyura Tjukurpa Palya Jesunyatjara kulint-jatjanungku wanganaranku palula kulira palyanma Jesuku walytja mulapa tjukaruru nyinanytjikitjangu. Kaṇa tjinguru tjailanguru pakara ma-pitjala nyuranya nyakuku, munta tjinguruna nyanga palulatu nyinama pakantja wiyatu. Palu nyura tjukaruru nyinanyangka kulirampana pukularira nyanga alatji kulilku, "Munta-uwa mulapaya paluru tjana wirura tjungu alatjitu nyinanyi munuya tjungungku Godaku warka palyani anangu kutjupa tjuṭangu Tjukurpa Palya kulira mulamularingkunyjtaku."

28 Palu tjinguru ngura nyara Pilipaila anangu kutjupa tjuṭa nyurampa kuraringanyi nyura Tjukurpa Palya wangkanyangka. Kaya palumpa tjanampa nyakula nguluringkuwiyangku wantima. Panya nyura tjanampa nguluringkuwiya ngaranyangkampa tjana nyakula kulilku nyanga alatji, "Munta-uwa, mulapa tjinguru Godalu nganannya iluntara wiyalku." Ka nyura nguluringkuwiya rapa ngarala kampa kutjupa kulilku alatji, "Munta, mulapa Godalu nganannya wankarunkuku." Ka Godalu kutjungku nyuranya ngulu wiya rapa ngaranytjaku palyalku.

29 Uwa, Godalu panya mukulyangku nyuranya ngurkantanu Jesuku Christaku mulamularingkunyjtaku kutju wiya palu pikatjararingkunyjtaku kulu anangu Jesuku mirpantju tjuṭangu pungknyangka.

30 Panya nyura nyangangi ngura panya Pilipaila tjana ngayunya pungknyangka ngayulu panya Jesuku Tjukurpa Palya tjanala wangkanyangka. Ka nyura ninti panya tjukurpa nyanga palulanguruniya miilarara kuwari tjailangka tjunu. Ka kuwari nyurampa palu purunypatu ngaranyi nyuranya kurara pungknyjtaku Tjukurpa Palyanguru. Ka nyura uti wantinytja wiyangku tjukurpa palunya wangkama alatjitu.

2

Jesunya Mayatja Puljanya

1 Kulilaya walytja wiru tjuṭa! Nyura panya Christala tjungu nyinanyi, ka pala palulanguru nyura kunpu nyinanyi paluru nyuranya rapannyangka. Munu nyura pukulpa kulu nyinanyi paluru nyuranya mukulyangku kanyinnyangka. Ka panya Kurunpa Milmilnga nyurala tjungu nyinanyi malpa wiru. Ka nyara palulanguru nyuranku mukulya ngaltunyjtju nyinanyi.

2 Uwa, mulapa nyura wirura nyinanyi, palu wanyuya piruku ngayula kulinma munuya kulintja kutjuringkula tjungu pukulpa nyinama nyararingkunyjtja wiya, munuyanku ngaltunyjtju mukulya pulka nyinama kurunpa kutjuringkula. Ka nyura alatji wirura tjungu nyinanyangkaṇa kulira nyurampa pulkara alatjitu pukulariku.

3 Uwa, uti nyura kutjupa kutjupa wiru palyara kananykananyarinytja wiyangku wantima anangu kutjupa tjuṭangu nyuranya nyakula mirawaninyjtaku-tawara. Palu nyura uti kurunpa ngaltunyjtju nyinara Jesuku walytja uwankarangka tjungu nyinama kutju nyakula wantinytja wiya.

4 Uti nyuranku walytjangu kulira nyurampa kutju palyantja wiyangku anangu kutjupa tjuṭaku kulukulu palyanma tjana mukuringknyangka, munuya tjananya kulu nyakula atunymanama.

⁵ Munuya tjukarurungku kulinma, panya Jesulu Christalu tjukarurungku kulilpai, palu purunypa.

⁶ Panya Jesunya kuwaripatjara mulapa Godanya alatjitu nyinangi witulya pulka mulapa.

Munu panya Mama Godalu palunya mantakutu iyantjikitjangku wangkanyangka paluru wanganarangku alatjitu kulinu wantinytja wiyangku.

⁷ Panya paluru pulka nyinanytjatjanu tjukutjukuringkula mantakutu pitjangu,
munu itiringkula nganannya purunypa ananguringu.

Panya paluru mayatja pulka mulapa nyinanytjatjanu mantakutu pitjangu munu wati unytju warikapai purunypa nyinangi.

⁸ Munu paluru kanany-kanany pa nyinanytja wiyangku palumpa Mamangka wanganarangku kulira palyaningi,
munu paluru wanganara alatjitu nyinara pataningi punu katakutjarangka ilunytjikitja.

Panya palunyaya wati kura tjutangku punungka wakara utitjunu wati kura-palku kulira.

⁹ Ka panya Godalu palunya tjukutjukuringkula ilunyangka wankara pakaltjinganu munu ngura wirungka tjunu mayatja pulka mulapa nyinanytjaku.

Ka paluru kuwari mayatja kutjupa uwankarangka waintara nyinanyi pulka mulapa.

¹⁰ Uwa, Godalu alatji tjunu uwankarangku Jesunya kutju mirawanira walkuntjaku anangu mantangka nyinapai tjutangku, munu miri tjutangku kulu, munu angelpa ilkaritja tjutangku kulu uwankarangku tjungungku tultjungarakatira palunya walkuntjaku panya paluru pulka mulapa nyinanyi.

¹¹ Uwa, anangu winkingkula Jesunya Christanya walkura pukultu wangkaku,

“Nyuntun uwankaraku Mayatja pulka mulapa nyinanyi.”

Munula palulanguru anangu uwankaranguku Mama Godanya pulkara mirawanira walkulku.

Kililpi Purunypaya Mungawalurungka Irryanma

¹² Uwa, Jesulu panya palumpa Mamangka wanganarangku kulinu. Nyara palulanguru panya Godalu nyuranya kuranguru wankarunu iwara tjukarurungka kutju ankunytjaku. Ka walytja wiru tjuta, nyura uti wankarunkunyangka kulintjatjanu iwara pala palula titutjara anama munuya iwara kutjupangka ankunytja wiyangku wantima. Panya nyura nganmanytju Godala wanganarangku kulira iwara palyangka kutju anangi ngayulu panya nyurala tjungu nyinanyangka. Palu kuwari nyanga ngayulu patu nyinanyangka nyura uti iwara pala palula kutjungkatu titutjara anama kutjupangka ngunti ankula kawankatinytjaku-tawara.

¹³ Panya Godalu Kurunpa Milmilu nyurala unngu nyinara nyuranya rawangku nintilkatinyi nyura wanganararingkula palula kulintjaku, panya nyuranya wityulanyani nyura Godanya mukuringkunytjitja tjukarurungku palyantjaku.

14 Kaya iwara pala palula ankula mulyarariwiyangku puku^ltu wanaⁿma munuya ngaparku pikaringkula ngalytjurmara wangkawiya kalypa nyinama tjungu pukulpa.

15 Panya nyura alatji wirura nyinanyangka nyakulaya kutjupa tjutangku nyuranya pu^tu kuranmankuku. Panya tjukurpa kurakura kulilpai tjutangkuya iwara kurangka ankula kura kutju palyalkatipai. Nyara paluru tjana panya mungawalurangka titutjara ngaranya. Palu nyura Godaku katja untalpa tjuta nyinarampa kililpi tjuta purunypa irnyani palula tjanala ngurur-ngururpa munu nyura uti wiru tjuta kutju palyara iwara palya tjananya nintinma. Panya paluru tjana nyuranya nyanganyi wirura palyanyku nyinanyangka.

16 Ka nyura uti Tjukurpa Palya Wankarunkupainyatjara tjanala rawangku tjakultjunama, ka paluru tjana kulira mulamularingkunyangka Godalu tjananya kulu wankarunkuku palula tjungu titutjara wanka nyinanytjaku.

Uwa, nyura uti rawangku Godala wanganarangku kulira tjakaruru nyinama ngula Christanya malaku pitjanyangka ngayulu palula mirangka nyuranya palyanmankunytjaku. Panya ngayulu palula puku^ltu wangkanytjikitja mukuringanyi alatji, "Uwa Mayatja, ngayulu Pilipaila nyinanytja tjutangka pulkara alatjitu warkaringi, kaya mulapatu wanganararingkula nyuntula kulira titutjara wirura palya nyinangi." Alatjina tjinu malatjangka Godala wangkanytjikitja mukuringanyi.

17 Kaya kulinma panya nyura Jesuku mulamularingkunytjatjanu palumpa walytjaringu, munu nyura Godaku iwarangka ankula palula wanganarangku kulira palyanangi. Ka panya kutjupa tjutangku kuwari nyuranya kurakurani munu nyuranya tjituru-tjitururinytjaku palyani nyura iwara palyangka tungun-tungunpa ankunyangka. Palu Godalu nyuranya nyakula pukularinyi nyura wantinytja wiyangku palunya kutju titutjarangku kulinyangka. Kaya tjinguru ngayunya iluntankuku ngayulu tjukurpa Jesunyatjara rawangku wangkanyangka. Palu palyantiniya iluntankuku, panya Godalu ngayunya nyakula pulkara pukularinyi ngayulu palunya kutju titutjarangku wananyangka. Palu ngayulu pukularinyi alatjitu, mununa nyuranya kulu kulira pukularinyi.

18 Ka nyura uti palu purunypatu pulkara pukularima, panya nyuntu nganana tjungungku Godanya kulilpai nyinanyi munula palumpa iwarangka titutjara ananyi.

Timitjinya Pula Papa-tayatjanya

19 Uwa, ngayulu mukuringanyi wati panya Timitjinya nyuralakutu iyantjikitja, ka paluru ma-pitjala nyurala wirkara tjungur-inkula ngayunyatjara tjakultjunkuku, ka nyura kulira pukulariku. Munu ngula paluru ngapartji malaku pitjala nyuranyatjara ngayula tjakultjunkuku, kana ngayulu kulu palu purunypatu kurunpa pukulariku nyuranya kulira. Palu ngayulu kuwaripangku^tu palunya iyantja wiyangku Mayatja Jesula-wararangku tjapini. Mununa paluru palyanmankunyangka kutju palunya nyuralakutu ma-iyalku.

20 Tjinguruna wati kutjupa iyanma palumpa arangka, palu wati kutjupa Timitjinya purunypa nyinanytja wiya ngura nyangangka.

Palu wati nyanga paluru nyurampa pulkara mukuringkupai munu nyuranya rawangku kulilpai.

²¹ Palu kutjupa tjuťangkuya nyuranya kulilpai wiya, munuya Jesuku warķa palyantjikitjangku kulu kulintja wiyangku wantira tjana mukuringkuntja kutju palyantjikitjangku kulilpai.

²² Palu nyura ninti wati nyanga Timitjiku, panya paluru Jesuku warķa rawangku palyalpai. Munu nyanga paluruni pulkara alpamilalpai munuli kutararangku purunytju Tjukurpa Palya para-wangkapai ngura tjuťangka.

²³ Palu kuwari nyangana tjailangkaťu nyinanyi mununa kulini, "Yaaltjinalgkuniya? Tjinguruniya walatjungkuku, munta tjinguruniya iluntankuku." Palu tjana kulira ngayunya ngurkantara wangkanyangkaťa Timitjinya nyuralakutu mapalku ma-iyalku.

²⁴ Palu ngayulu mulamularingkula kulini panya Mayatja Jesulu kuwari nguwanpa ngayunya nyanganguru pakaltjingalku nyuralakutu ma-pitjanytjaku.

²⁵ Palu kuwarina nyuntumpa nganampa malpa kutjupa nyuralakutu malakungku iyantjikitjangku kulini, wati panya Papa-tayatjanya. Panya paluru ngananaťa junguringkula Godaku warķa wiru palyalpai. Ka kutjupa tjuťangku Godaku tjukurpa anannyangka paluru tunguntunguntu wangkara tjukarurulpai ngulu wiyangku. Palu panya nyura paťu nyinara puťu kulinigi ngayunya tjailangka nyinanyangka alpamilantjikitjangku. Nyura palulanguru panya nyura wati nyanga palunya ngayulakutu iyanu ngayunya alpamilantjaku munu ngayula tjunguringkula warķarinytjaku.

²⁶ Palu kuwarina malakungku ma-iyani, panya paluru watjilarinyi nyuralakutu malaku ma-pitjanytjikitja. Munu paluru nyuranyatjara wangkara pulkara kulilpai alatji, "Tjinguruya ngayulu pika pulka rawa ngarinyangka-palku kulira tjituru-tjitururinyi." Palulanguru paluru nyuralakutu warpungkula ma-pitjanytjikitja mukuringanyi nyura nyakula pukularinytjaku.

²⁷ Uwa, mulapa paluru pika pulkaringkula nguwanpa ilungu. Palu Godalu ngalturingkula palunya palyarungunu, panya paluru palumpa kutju ngalturingkuntja wiya, ngayuku kulu ngalturingu ngayuku malpa ilunyangka ngayulu tjituru-tjitururinytjaku-tawara.

²⁸ Kana palulanguru pulkara mukuringanyi palunya mapalkungku nyuralakutu ma-iyantjikitja. Ka paluru nyurala ma-wirkankunyangka nyura nyakula pulkara pukulariku. Kana ngayulu kulu pukulariku panya paluru nyangangka nyinara pikatjararingkunyangkanta pulkara tjituru-tjitururingu.

²⁹⁻³⁰ Uwa, paluru nyurala ma-wirkankunyangkaya nyakula pukultu ampunma, panya paluru nyurampa kuta Jesulanguru. Nyura pala paťu nyinara ngayulakutu puťu pitjangi munu panya nyura wati nyanga palunya ngayulakutu iyanu ngayunya alpamilantjaku. Ka panya paluru wanganara pitjangu munuli tjunguringkula pulkara warķaringi Jesuku Christaku. Ka paluru warķarinytjatjanu pikatjararingkula nguwanpa ilungu. Ka nyura nyangatja kulinma munuya palunya wirunmanama munuya anangu kutjupa tjuťa kulu palu purunypaťu tungun-tungunpa Jesuku warķarinyangka nyakula wirunmanamaťu.

3

Godalu Jesuku Mulamularingkunyangka Kutju Nganananya Tjukturunmankupai

¹ Uwa, walytja wiru tjuṭa, kulilaya! Uti nyura Mayatja Jesuku walytja nyinara palumpa pulkara pukularima. Ka panya ngayulu nganmanytju nyurala wangkara ngulutjunangi wati ngunti wangkapai tjuṭa kulira waṇantjaku-tawara. Panya palunyaṇa piruku nyurala wangkanytjikitja mukuringanyi, panya ngayulu rawangku wangkanyangka nyura pulkara kulilku munu nyara palulanguru nyura nintiringkula tjananya kulira wantiku ngunti wangkapai tjuṭa tjana nyurala wangkanyangka.

² Uwa, wati panya palunya tjananyaya ngulu nyangama nyuranya ngunti kuranjtaku-tawara panya tjana wangkapai alatji, "Utiya wati Jesuku walytja tjuṭangku Moseku tjukurpa kulu kulinma munuya Jewku arawanu watiringama. Nyara palulanguru kutju tjana Godaku walytja mulapa nyinaku." Palu wiya, alatji tjana ngunti wangkanyi.

³ Paluru tjana wangkapai, "Nganana Godaku walytja alatjitu." Palu wiya, nganana Godaku walytja mulapa nyinanyi, panya nganana Godanya walkulpai Kurunpa Milmiltu ngananala unngu nyinara nintinyangka. Kala pukularinyi Jesulu Christalu nganampa wiru palyantjitjanguru, panya paluru kutjungkulanya wankarunu. Palu nganana Jewku ara tjuṭanguru pukularinytja wiya, panya ara nyara palula tjanalawanu nyinara nganana putu wankaringanyi.

⁴⁻⁶ Panya kutjupa tjuṭangkuya ngunti kulilpai Moseku tjukurpa tjukururungku wanara-manti wankaringanyi. Palu wiya. Panya ngayulu nganmanypa palu purunypatu kulilpai nyinangi, panya ngayulu wati alatjitu paluru tjana purunypa Jewku arawanu itinguru watiringkunyitja. Ka ngayuku tjamu nganmanyitja wati panya Pintjimangga panya wati Israelku katja maṭatja. Nyara palula tjanalanguruna ngayulu wati lipuru alatjitu nyinanyi. Munu panyaṇa Paratji nyinaralpi Jewku ara tjuṭa tjukururungku waṇaningi. Munu panyaṇa ara nyanga palunya tjananya kutju waṇantja-tjiratjangku Jesuku walytja tjuṭa wanara pungangi ngura tjuṭangka. Uwa, ngayulu Jewku ara tjuṭa rawangku wanganarangku kuliningsi pakuringkula wantinytja wiyangku. Mununa palulanguru kanany-kananyarira kuliningi alatji, "Godanyatju ngayuku nyakula pukularinyi alatjitu ara nyanga Moseku tjukururungku waṇannyangka."

⁷ Uwa, alatjina nganmanytju kuliningi, palu Christalu panyaṇi kampa kutjupanu palula kutju tjukururungku kulintjaku, kana kuwari nyanga alatji kulini, "Nganmanytju panyaṇatju ara panya palunya tjananya ngunti waṇaningi Godalu ngayunya nyakula tjukururunmankunytjaku-palku." Palu ngayulu Christanya kulira ara panya palumpa watarkuringu alatjitu mununa Christanya kutju waṇantjikitja mukuringanyi.

⁸ Mununatju malakukutura kulinu, "Nyaakunatju panyatja rawangku alatji palyaningsi Godalu ngayunya nyakula tjukururunmankunytjaku-palku?" Panya ara nyara palula tjanalanguru ngayulu putu tjukurururingangi Godaku walytja mulapa nyinanytjikitja. Palu kuwari ngayulu Jesuku Christaku nintiringu, panya paluru kutjungku kampa kutjupankupai Godaku

walytjaringkula tjukaruru nyinanytjaku. Ka ara nyanga paluru pulka mulapa kutjupa uwankarangka waintara alatjitu ngaranyi.

Uwa, ngayulu panya nganmanytju Jewku ara tjuta ngunti wananingi ara wiru tjuta-palku. Palu kuwarina Jesunya kutju wanantjikitjangku kulira ara nyara palunya tjananya piruku wanantja wiyaringu, panya ara nyara palunya tjananya wanannyangkani Godalu ngayunya putu wankarunkuku.

⁹ Palu Christalawanu nyinanyangka kutjuni Godalu ngayunya tjukarurunmanu palumpa walytjaringkunyjtaku, panya ngayulu mulamularinganyi Christanya ngayuku ngalkilpa ilunytjitjaku. Kani nyara palulanguru kutju ngayunya Godalu tjukarurunmanu. Nganmanytju panya mulapa Jewku ara tjuta wanganarangku kulira palyanigi, palu nyanga alatji palyannyangka nyakula Godalu ngayunya tjukarurunmankunytja wiya, palu paluru Jesuku mulamularingkunyangka kutju ngayunya tjukarurunmanu.

¹⁰ Panya ngayulu mukuringanyi Jesuku Christaku ninti mulararinytjikitja. Mununa piruku mukuringanyi Godaku witulyatjara rawa nyinanytjikitja. Panya paluru Christanya ilunyangka palunya witulya pulkangku wankara pakaltjinganu, kana witulya palunyatjara nyinanytjikitja mukuringanyi paluru ngayunya witulyankunyangka.

Uwa, ngayulu Jesuku nintiringkula palu purunypa nyinanytjikitja mukuringanyi. Panya palunyaya kurara pungangi munu pikatjaranu munu iluntanu, kaniya palya ngayunya palu purunypatu kurara pungama munu pikatjaranma panya ngayulu Jesunya purunypa nyinanyi palunya wanara. Mununiya palya ngayunya Jesunya purunypa pungkula iluntanama, panya ngayulu palula tjungutja mulapa nyinanyi.

¹¹ Uwa, ara nyanga palumpa tjanampa mukuringanyi, kani palulanguru Godalu ngayunya ngula ilunyangka wankara pakaltjingalku palula tjungu wanka titutjara nyinanytjaku.

Christaku Nintiringkula Palunya Purunypa Nyinanytjaku

¹² Palu ngayulu kuwaripatu Christanya purunyarinytja wiya mununa kuwaripatu palyaringkunytja wiyatu. Palu Christaluni ngurkantara mantjinu palumpa nintiringkunyjtaku, kana palulanguru titutjarangku pulkara arkani palumpa nintiringkula palya mulararinytjikitjangku.

¹³⁻¹⁴ Uwa, walytja wiru tjuta. Ngayulu Christanya purunyarinytja wiyatu. Palumpana kuwaripatu nintiringanyi. Palu nganmanytju panya palyantja tjutana kulira wantinyi mununa kuranyukutungku kutju kulira tungun-tungunpa Christaku pulkara nintiringanyi palunya purunyarinytjikitja. Panya watingku wala winki wirtjapakara waarangku pinkurarara nyakukatipai wiya kuranyukutungku kutju nyakula wala pulka wirtjapakalpai waintarira wiru mulapa mantjintjikitja, palu purunypa ngayulu Christanya purunyarinytjikitjangku pulkara arkani pakuringkunytja wiyangku ngula wiru mulapa mantjintjikitjangku. Ka nyara palulanguru Godalu ngayunya katiku palula tjunguringkula titutjara nyinanytjaku ngura ilkaritjangka, panya Jesunya ngayuku ngalkilpa ilunytjitjanguru.

¹⁵ Ka panya nyura kutjapatjara Jesuku walytjaringkunyjtjanu rawa nguwanpa nyinara palumpa pulkara nintiringu. Nyara palulanguru

nyura uti ngayulu nyanga wangkanytjitjaku kulira mulamularingama. Munula palulangurulta uwankarangku tjungungku kulilku. Ka nyura tjinguru kutjupa tjarangku kampa kutjupa kulini munu nyura tjukurpa kutjupa ngayulu nyanga wangkanytjitjaku puṭu mulamularinganyi. Palu palya, panya ngula Godalu nyurala utilku, ka nyara palula ara utiringkunyangka nyura tjukurpa panya palumpa mulamularingkuku.

¹⁶ Palu kulilaya, panya nganaṅa kutju kutju Godaku tjukurku nganmanypa nintiringu, panya kutjupa tjuṭala pulkara nintiringu, ka kutjupatarja tjukutjuku kutju nintiringu kuwaripatu ninti pulkaringkunyutja wiyatu. Palu utila uwankarangku tjungungku kutjungku kulira wanganarangkuṭu palyanma Godalu nganaṅanya kutju kutju nintintjitjanguru.

¹⁷ Munu walytja wiru tjuṭa, nyura uti uwankarangku arkanma ngayunya purunypa nyinanytjikitjangku. Panya nganaṅa nganmanypa nyurala nyinangi, ka panya kutjupa tjarangku nganaṅanya nyakula arkaningi wirura nyinanytjikitjangku. Ka nyura kulu uti palunya tjananya nyangama tjananya purunypatu wirura nyinanytjikitjangku.

¹⁸ Uwa, arkaraya ngayunya purunypa nyinama, munuya ngulu nyangama wati panya kura tjuṭa kulu, panya nganmanytjuṅa nyuranya wangkara ngulutjunangi palunya tjananya, munuṅa nyangatja piruku kurunpa jtjuru-tjtjururira ulatjarangku nyurala wangkanyi tjananya kulira wantinytjaku. Panya tjana ngunti Jesuku walytja-palku nyinapai munuya kura kutju kulilpai. Palu tjana alatji kura nyinara Jesunya punu katakutjarangka ilunytjtja pulkara anani.

¹⁹ Ka nyara palulanguru tjiṅtu malatjangka Godalu tjananya warungka waniku. Panya tjana Godanya wantira tjana mukuringkunyitjtja kutju pulkara kulilpai. Munuya kunṭa wiyangku kananykananytju kura rawangku palyalpai. Utiya kunṭaringama, panya tjana mantatja tjuṭa kutju kulilpai Godanya wantira.

²⁰ Ka nyara palulanguru nyura uti palunya tjananya arkantja wiyangku wantira nganaṅanya arkanma nganaṅanya purunypa nyinanytjikitjangku, panya nganaṅa mantatja tjuṭa pulkara kulilpai wiya, waintarala kulini ngura ilkaritja. Nyara paluru panya nganampa ngura mulapa. Kala ala-alangku paṭani ngura nyara palulanguru Wankarunkupainya malaku pitjanytjaku panya Mayatja Jesunya Christanya.

²¹ Panya paluru witulya pulkangku uwankara kanyini mantatja, ilkaritja uwankara tjungura, munu paluru ilkaringuru pitjala nganaṅanya puntu nyanga mantatja witulya pulkangku kampa kutjupankuku munulanya puntu palunya purunypa alatjiṅtu palyalku wiru mulapa. Panya paluru ilunyangka Godalu palunya wankara pakaltjanganu munu panya palunya puntu kampa kutjupara wiru mularmanu, palu purunypa Jesulu pitjala ngapartji nganaṅanya puntu wiru mularmankuku.

4

¹ Uwa walytja wiru tjuṭa, ngayulu nyurampa pulkara mukuringanyi kurunpa winki, munuṅa nyuranya kulira watjilaripai munuṅa mukuringkupai nyurala tjunguringkunyitjikitja. Palu nyuranya kulirana pulkaratu pukularinyi nyura Godanya wirura rawangku

wanannyangka. Kaya ngayulu panya kuwari wangkanytja nyura wanganarangku kulira Mayatjanya tungun-tunguntu wananna wantinytja wiyangku palumpa pulkara mulamularingkula.

Wirura Kalypa Nyinanytjaku

² Kana kuwari minyma pala Utiwala pulala Tjintikala wangkanyi alatji, "Panya nyupalinku kunyu kutjupa kutjupanguru rawangku pika-pikangku wangkapai. Kana mukuringanyi nyupali tjungur-ingkula kalypa nyinanytjaku kulintja kutjuringkula, panya nyupalitu Jesuku Christaku walytja nyinanyi." Nyanga palunya nyupalila wangkanyi.

³ Palu malpa wiru, kuwarina nyuntula tjapini nyuntu minyma pala kutjara wangkara kalypantjaku. Panya minyma pala paluru pula kulu ngayula tjungu nganmanypa wararingi anangu tjutangku Tjukurpa Palya Jesunytjara kulintjaku. Kaya kutjupa tjuta kulu nganana tjungu wararingi nyara palula arangka, wati panya Kilimannga tjana. Ka panya Godalu anangu nyanga palunya tjananya kulu ini nganmanytju walkatjunu palumpa nyiringka minyma pala palunya pulanya kulu. Panya nyiri pala palula Godalu anangu tjuta mulapa ini walkatjunu, ka paluru tjana uwankara palula tjungu wanka titutjara nyinaku.

⁴ Palu walytja tjuta, nyura uti Mayatja Jesuku walytja nyinara pulkara pukularima. Kana pirukutu nyurala wangkanyi, "Titutjaraya pukulpa nyinama!"

⁵ Munuya anangu uwankaraku ngaltunytju nyinama, kaya paluru tjana ngapartji kulira nyurampa pukularikutu. Munuya watarkuri-wiyangku kulinma panya Mayatja Jesunya kuwari nguwanpa malaku pitjanyi.

⁶ Kaya kutjupa kutjupa tjuta nyurala wirkankunyangka kulira tjituru-tjitururinytja wiya nyinama, munuya Godala tjapinma nyuranya atunymankunytjaku munuya palunya mirawanira walkunma nyuranya paluru wirura kanyinnyangka. ⁷ Ka nyura Jesuku walytja nyinanyangka Mama Godalu nyuranya kurunpa rapa pukulpa nyinanytjaku palyalku. Kaya kutjupa tjutangku nyuranya nyakula putu nguwanpa kulilku munuya wangkaku, "Awari! Yaaltji-yaaltji nyanganpa rapa pukulpa mulapa nyinanyi tjituru-tjituru pulka tjanala wirkankunyangkampa?"

⁸ Uwa walytja tjuta, kulilaya! Pirukuna nyurala wangkanyi. Uti nyura kulintja wirutjara nyinama. Munuya ara kura tjuta ruukulin-tja wiyangku wantira ara wiru tjuta kutju titutjarangku kulinma. Munuya titutjarangku kulinma anangu wiru tjutangku palyantja tjuta munu tjukurpa tjana wangkanytja tjuta kulu. Munuya tjukurpa tjukaruru tjuta kutju kulinma, ngunti tjuta kulintja wiyangku wantira. Munuya kutjupa kutjupa wiru tjuta utiringkunyangka nyakula pukularima. Munu kura palyannyangka nyakula pukularinytja wiyangku wantima munuya wiru palyannyangka kutju nyakula pukularima. Uwa, kutjupa kutjupa wiru tjuta nyakunytjatjanungkuya titutjarangku ruukulinma.

⁹ Ka panya ngayulu nyuranya nganmanytju nintiningi tjukurpa wiru tjuta ka panya nyura mulamularingu, panya palunya tjananyaya

rawangku kulinma watarkuriwiyangku. Munuya nganmanytju panya ngayulu palyannyangka nyakunytjatjanungku palyanma alatjitu titutjarangku ngayulu purunytju. Ka Mama Godanya nyurala titutjara tjungu nyinaku munu nyuranya kurunpa rapa pukulpa nyinanytjaku palyalku.

Paulalu Tjananya Wirunmankunytja

¹⁰ Panya nyura nganmanytju ngayuku kutjupa kutjupa iyaningi ngayunya alpamilantjikitjangku munu palulanguru nyura piruku iyantja wiyaringu. Palu nyura panya ngayunya titutjarangku kuliningi watarkurinytja wiyangku munu nyura kuwari nyanga piruku ngayuku iyanu wirungku. Kana pulkara alatjitu nyurampa pukularira Mayatja Jesunya mirawaninyi nyura ngayuku iyantjitjanguru.

¹¹ Nyangatjana manikitjangku wangkanytja wiya mani piruku iyanytjaku, panya ngayulu alatjitu mani tjukutjukutjara pukulpa nyinapai.

¹² Kutjupa-ara ngayulu maralpa nyinapai pukulpa alatjitu, mununa kutjupa-ara mai ulytja pulkatjara nyinapai pukulpaatu, panya ara nyanga palumpana nintiringu alatji titutjara pukulpa nyinanytjikitja. Ngayulu kutjupa-ara mai ngalkula paltjaringkula pukularipai. Mununa kutjupa-ara mai wiya nyinara paltjatjiratja pukulpaatu nyinapai.

¹³ Uwa, kutjupa kutjupa ngayula utiringkunyaangka ngayulu kurunpa rapa pukulpa nyinapai, panya Jesulu ngayunya kunpulpai.

¹⁴ Palu panya nyura wirungku ngayuku kutjupa kutjupa iyanu nyanga tjaila unngu nyinara putu kulinnyangka.

¹⁵ Palu panyatjaya kulinma, panya mungatuna nyurala Tjukurpa Palya Jesunytjara tjakultjunu, ka panya nyura kulira mulamularingu. Palulanguruna manta pala Matja-tunianya wantikatira ngura kutjupa tjutakutu anu. Ka panya nyura kutju ngayunya alpamilanangi ngayuku mani iyara, ngayulu anangu tjutangka Tjukurpa Palya tjakultjunktunytjaku. Ka panya Jesuku walytja kutjupa tjutangu ngura kutjupa tjutanguru ngayunya alpamilantja wiyangku wantingi, nyura kutju panya ngayunya alpamilanangi.

¹⁶ Ka panya ngayulu piruku ngura Tjitja-lanikala mani wiya nyinanyangka nyura wirungku piruku iyanu kutjara-arangku.

¹⁷ Kana nyangatja manikitjangku wangkanytja wiya, palu mukuringanyiina Godalu nyuranya pukulmankunytjaku nyura ngayunya wirungku alpamilantjitjanguru.

¹⁸ Nyangatjana nyurampa walkatjunanyi kurunpa winki pukularira nyura ngayunya wiru tjuta ungunytjitjanguru, panya kuwarina alatjitu kanyini nyura panya ungunytjantja wati nyanga Papataitjanya. Ka Godanya nyurampa pulkara pukularingu nyanga palunya palyannyangka. Nyangatja panya nyaa purunypa ngaranyi, panya anangungku paniti wiru tililpai Godanya pukularinytjaku, palu purunypa nyangatja wiru mulapa.

¹⁹ Ka panya Jesunya Christanya nyurampa ngalkilpa ilunytjitjanguru Godalu nyurampa pulka mulapa kanyini nyuranya ungunytjikitjangku. Munu panya nyura kutjupa kutjupaku mukuringkula ngatjinnyangka paluru nyuranya ungunku.

²⁰ Uwa, nganampa panya Mama wiru mulapa nyinanyi. Kala uti titutjarangku palunya walkura mirawanima. Uwa mulapa.

Tjukurpa Małatja

²¹ Uwa walytja wiru tjuṭa, ngayulu nyuranya rawangku kulilpai Jesuku Christaku walytja uwankara. Ka panya Jesuku walytja kutjupa tjuṭa nyanga ngayula kuwari tjungu nyinanyi, paluru tjana kuḷu nyuranya kulini nyurampa pukularira.

²² Uwa, Jesuku walytja ngura nyangatja ngurara uwankarangku nyuranya kulini. Ka Jesuku walytja kutjupa tjuṭa mayatja panya Romeanya nguraraku war̄karipai tjuṭa nyinanyi, paluru tjana kuḷu palu purunypaṭu nyuranya kulini.

²³ Uwa, alatjiṭuṇa walkatjunanyi. Ka Mayatja Jesulu Christalu nyuranya kurunpa pukul̄mara kanyinma pukultju pul̄kangku. Uwa mulapa.

Lita Paulalu Walkatjura Iyantja Ngura Kalatjilakutu Colossians Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjungkunyntja tjaila unngun-guru anangu Jesuku walytja tjuṭaku tawunu ini Kalatjila nyinanyntja tjuṭaku. Panya Kalatjinya ngura tjukutjuku manta ini Aitjala ngururpa ngarangi ngura panya Ipitjala kakarara. Ka Paulanya ngurpa Kalatjiku, panya paluru ankunyntja wiyatu nganmanypa. Paluru Ipitjalakutu kutju anu Jesuku tjukurpa wangkanytjikitja. Ka tjinguru kutjupa tjukurpa kulintjatjanu ngura nyara palulanguru anu Kalatjilakutu munu Jesuku tjukurpa anangu tjuṭangka tjakultjunangi tjana kulu kulira Jesuku walytjaringkunyntjaku. Ka Paulalu kulinu Kalatjila nyinanyntja tjuṭa Jesuku walytjaringkunyntja, munu paluru tjanampa rawangku Godala tjapiningi. Ka ngula Paulaku malpangku ini Papatjalu palula tjakultjunu tjukurpa tjuṭa Kalatjilanguru, tjukurpa kutjupa tjuṭa palya, ka kutjupa tjuṭa palya wiya. Ka paluru kulira lita nyangatja walkatjunu tjanampa pukularira tjananya wangkara kunpantjikitjangku. Munu paluru ungkul'iyanu wati ini Titjikatjanya katira tjananya ungkunyntjaku.

Panya ngura nyara Kalatjila kunyu anangu ngunti wangkapai mankurpa nyinangi Jesuku walytja tjuṭangka tjungu. Munuya kunyu paluru tjana wangkangi nyanga alatji, "Nyura Godala mulapa tjungurungkunyntjikitja mukuringkulampa uti nyura tjukurpa milmilpa tjuṭa pulkara kulinma munu mulamulangku wanama. Munu nyura uti tjukurpa irititja tjuṭa kulu wanganarangku kulira palyanma wantinyntja wiyangku." Alatjiya kunyu ngunti wangkara wituwituningi Jesuku walytja tjuṭa.

Ka Paulalu nyangatja kulinu Papatjalu tjakultjungkunyangka munu lita nyangatja walkatjura iyanu Jesuku walytja tjuṭa ngulutjungkunyntjikitjangku, tjana ngunti wangkapai tjuṭangka kulilwiyangku wantinyntjaku Godalanguru paturingkunyntjaku-tawara. Munu paluru tjananya wangkangi Jesunya kutju kulintjaku panya paluru kutjungku anangu tjuṭa wankarunkupai Godala tjungurungkunyntjaku. Uwa, Paulalu wangkangi tjanala Godanya tjakarurungku kulintjaku palumpa katja Jesunya kulu. Munu paluru tjananya wituwituningi tjakaruru palyanyku nyinanyntjaku Godaku walytja mulapa.

Tjukurpa nyanganpa ngarinyi:

- 1:1-2 Paulalu nganmanyntju wangkanyntja
- 1:3-14 Paulalu tjanampa Godala tjapintja
- 1:15—2:5 Christanya tjakarurungku kulintjaku
- 2:6-23 Paulalu tjananya ngulutjungkunyntja ngunti wangkapai tjuṭangka-tawara
- 3:1—4:6 Yaaltji-yaaltji Godalawanu tjakaruru wirura nyinanyntjaku

4:7-18 Paulalu tjukurpa małatja wangkanytja munu malpa tjuťaku tjukurpa iyantja

Paulalu Nganmanytju Wangkanytja

¹⁻² Uwa, Jesuku walytja tjuťa! Ngayuluna Paulalu lita nyangatja nyurampa walkatjunanyi ngura pala Kalatjila nyinanytja tjuťaku. Panya Godaluni ngurkantara tjunu Jesuku Christaku tjukurtjara warakarinytjaku mununi witura iyanu palumpa tjukurpa anangu tjutangka tjakultjunkunyťaku. Katju malpa ngayula tjungu nyinanyi kuwari Timitjinya nyuntumpa nganampa panya walytja Jesulanguru. Munuli nyanga paluru ngali tjunguringkula lita nyangatja nyuralakutu ma-iyani, Godaku walytja tjuťakutu. Nyura panya ngalimpa walytja Christalanguru munu palula tjungu nyinara palunya mulamulangku wanani.

Ka Mama Godalu nyuranya pukultju pulkangku kanyinma munu nyuranya kurunpa rapara pukulmanama.

Paulalu Tjanampa Godala Tjapintja

³⁻⁴ Panya Timitjilu ngali nyurampa Godala tjapilpai, Mayatja Jesuku Christaku Mamangka, munuli tjapira nyuralanguru palunya rawangku walkulpai panya ngali kulinu nyura Jesuku pulkara mulamularingkunyťa, munu Godaku walytja uwankaraku pulkara mukuringkunyťa. Nyara palulanguruli nyurampa pukularira Godanya walkulpai.

⁵ Panya nganmanyťulpi nyura kulinu tjukurpa wiru nyurala tjakultjunkunyangka, tjukurpa panya mulapa Jesunyatjara. Nyura panya nganmanyťu kulinu Godalu nyuranya ngura ilkaritjangka wirkakatinyťjikitjangku kalkunnyangka. Munu kalkuntja nyanga palunya kulira nyura raparingu munu panya pala palulanguru nyura rawa Jesuku mulamularingangi munu panya nyura Godaku walytja tjuťaku kulu pulkara mukuringkupai.

⁶ Palu tjukurpa wiru nyanga palunyaya ngura winkingka wangkara lipintanangi, kaya kulira mulamularingangi anangu winkingku, munuya mulamularingkula ma-tjucarururingangi. Ka nyura kulu palu purunyaringu tjukurpa wiru kulira, panya nyura mulapa nintiringu Godanya nyurampa ngaltunyťu pukultju nyinanyťa kulira.

⁷ Tjukurpa nyangatja wati panya Paparatjalu nyurala tjakultjunu watarku nyinanyangka. Paluru ngalimpa malpa wiru panya paluru nganana Christaku warka wanganarangku kulira palyalpai. Munu ngali palunya nyuralakutu iyannyangka paluru nyurala tjucaruru warparingi nyura Godaku walyťjaringkunyťaku.

⁸ Nyara paluru ngalila tjakultjunangi nyura Godaku walyťja tjuťaku wanganara mukuringkunyťa Kurunpa Milmilťu nyuranya mukulyankunyangka.

⁹ Kali nyangatja kulintjatjanungku nyurampa rawangku Godala tjapilpai wantinyťa wiyangku. Ngali tjapilpai Kurunpa Milmilťu nyurala rawangku nintintjaku nyura tjucarurungku kulintjaku uwankara Godalu panya wangkanyťitja.

¹⁰ Alatjili tjapilpai nyura nintiringkula Mayatja Godalawanu tjucaruru nyinanyťaku, paluru nyakula pukularinyťaku. Panya ngali mukuringanyi nyura rawangkuťu tjucarurungku palyantjaku

mukulyangu, munuli piruku mukuringanyi nyura Godaku rawa nin-tiringkunyjtaku. Uwa, rawangkuli Godala tjapilpai paluru nyuranya alatji palyantjaku.

¹¹ Godanya panya witulya pitalytji pulkanya nyinanyi, kali palula nyurampa tjapilpai nyuranya pulkara witulyankunyjtaku nyura kurunpa raparingkula palunya rawangu kulilkatinyjtaku wantinytja wiyangu. Munuli piruku nyurampa tjapilpai kutjupangu nyuranya kurannyangka munta tjinguru anannyangka nyura kulira kuraringkuwiya pukułpa nyinanyjtaku Godaku witulyatjara.

¹² Munuli nyurampa tjapilpai nyura Mama Godanya pukułtu walkura wirunmankunyjtaku panya paluru nyuranya kurangu wankarunu nyura ngura ilkaritjangka wirkara pitalytji pulkangka nyinanyjtaku. Panya paluru kalkunu palumpa walytja uwankara palula tjunguringkula wanka titutjara nyinanyjtaku.

¹³ Panya Satantu anangu tjuta mungawalurungka katirinkupai iwara kurangka. Kalanya Godalu iwara kurangu mantjira palumpa katjangka tjungunu paluru nganananya iwara palyangka katirinkunyjtaku. Katja nyara palumpa panya Godanya pulkara mukuringkupai.

¹⁴ Munu pala palulawanungku panya Godalu nganananya Satantangu wankarunu Jesunya nganampa kurangu ngalkilpa angailunyangka, munulanya pala palulanguru Godalu nganananya kura palyantjitjangu kalypangu pungguwiyangu wantinyi.

Christanya Pulka Mulapa Uwankarangka Waintarinytja

¹⁵ Godanya panya arkayi nyinanyi. Nganana palunya nyakuntja wiya, palu nganana palumpa katja Jesulanguru kutju Godanya kulini. Panya Jesunya pulka mulapa nyinanyi Godalu paluntjitja uwankarangka waintarira.

¹⁶ Panya palulawanungku Godalu uwankara mulapa palura tjunu mantatja tjuta, ilkaritja tjuta kulukulu, panya uti ngaranytjitja tjuta munu arkayitja tjuta kulu, angelpa tjuta, munu mayatja ilkaritja kutjupa kutjupa tjuta kulu paluru Jesulawanungku tjunu. Nyara palulanguru Jesunya pulka mulapa nyinanyi uwankarangka waintarinytja. Ka panya uwankara Godalu palyantja ngaranyi Jesuku palumpa kutjuku alatjitu.

¹⁷ Nyara paluru panya kuwaripatjara mulapa uwankara wiyangka nyinangi Jesunya, munu palulanguru mantatja ilkaritja uwankara palyantjatjanungku paluru rawangku kanyiningi palyantja uwankara, munu kuwari kulu uwankara kanyini tjungu ngaranyjtaku.

¹⁸ Uwa, Jesunya panya mayatja katutja pulka mulapa nyinanyi, panya paluru Godaku walytja uwankara kanyini mayatja pulkangu. Paluru nganananya kurunpa wankaru kanyilpai palumpa walytjapiti, panya paluru-warara ilunytjatjanu wankaringu mayatja pulka mulapa nyinanytjikitja uwankarangka waintarinytja.

¹⁹ Panya Godalu kulinu palumpa katja palunya purunypa alatjitu nyinanyjtaku, kala palulanguru Godanya uti kulini Christalanguru, panya paluru Godanya alatjitu.

²⁰ Godalu panya nganananya palumpa katjangka tjungunu, paluru nganananya mayatjangu kanyintjaku. Paluru alatjanganu panya paluru mukuringangi palumpa katjawanungku mantatja ilkaritja

uwankara wiruntjikitjangku. Paluru mukuringangi uwankara palula piruku tjunguringkunyjtaku, munu palulanguru palumpa katja mantakutu iyanu punu katakutjarangka ilura milkali tjutinyjtaku anangu tjutaku ngalkilpa.

²¹ Ka panya nyura nganmanypa Godalanguru watarku mauntalpa nyinangi, panya nyura palumpa kuraringkula kura tjuta palyanangi.

²² Palu kuwari palumpa katja puntu winki ilunyjtijanguru Godalu nyuranya ngalkinu palula kalypa nyinanyjtaku, nyura palulakutu palya mulapa wirkankunyjtaku kura wiya alatjitu.

²³ Palu nyuranya wantikatinyjtaku-tawara tjukurpa wiruku rawa mulamularingama wantinytja wiya. Munuya Jesunya kutju titutjarangu wanama wantinytja wiyangu. Munu panya Godalu nyuranya ngura ilkaritjangka wirkakatinyjtikitjangku kalkunyangkaya rawangu kulira raparingama palumpa. Kalkuntja nyanga palumpa panya nyura nganmanytju kulira mulamularingu tjukurpa wiru Jesuku nyurala tjakultjunkunyangka. Tjukurpa nyanga palunya panyaya manta winkingka ankula tjakultjunangi anangu uwankarangka. Kana ngayulu kulu tjukurpa nyanga palunya wangkapai nyinanyi.

Godalu Paulanya Wituntja Tjukurpa Para-wangkanyjtaku

²⁴ Ka Jesunya wantipai tjutangku ngayunya ngukalpai ngayulu tjukurpa Jesunyatjara anangu tjutangka para-wangkanyangka. Palu ngayulunatju pukulpa alatjitu nyinanyi, panya ngayulanguru anangu tjuta mulapa Jesuku mulamularingu. Kaniya Jesunya wantipai tjutangku ngayunya kuranmananyi, mununiya atuni munu punganyi munu tjailangka tjarpatjunanyi. Palu ngayulu nyanga pikawanu pukulpa nyinanyi Godaku walytja tjutaringkunyjtaku, panya Jesulu alatji wangkangu, "Panya ngayunya purunypatuya kutjupa tjutangku nyuranya pikantankuku ngayuku warka palyannyangka."

²⁵ Ka ngayulu Jesuku walytja tjutangka tjakultjunkupai panya Godaluni warka nyangatja ungu tjukurpa palumpa winki nyurala utira wangkanyjtaku.

²⁶ Panya tjukurpa nyanga palunya Godalu iritinguru rawangu kumpilpa kanyiningi. Palu kuwari nyanga paluru utira nintinu palumpa walytja tjutangka.

²⁷ Paluru mukuringangi tjana uti kulintjaku tjukurpa nyanga kumpilitja. Tjukurpa nyanga paluru panya Jew tjutaku kutju wiya, palu anangu ngura uwankarangguru kulira pukularinyjtaku panya Godalu tjananya kulu wankarunkunyjtaku ngaranyi.

Tjukurpa paluru alatji wangkanyi,

"Christanya panya nyurala nyinanyi, ka pala palulanguru nyura kurunpa rapangu patani Christalu nyuranya ngula Godaku ngurangka wirkakatinyjtaku pitalytji pulkangka."

²⁸ Palulangurula anangu uwankarangka tjukurpa Christanyatjara para-wangkanyi. Nganana tjananya purkarangu nintilpai Godaku tjukurpa uti kulintjaku munula tjananya markulpai iwara palyangka kutju ankunyjtaku. Panya nganana mukuringanyi Christaku walytja uwankara Godala tjukarurungku wirkakatinyjtikitja tjana palula mirangka palya mulapa ngaranyjtaku.

29 Nyanga palunyakitjana Jesuku walytja tjutangka rawa pulkara warakarinyi pakuringkuwiya, Jesulu ngayunya witulyangku kunpunnyangka.

2

¹ Ka panya nyura munu Layata-tjiyanya ngurara tjutangku kulu ngayunya nyakunyitja wiya. Ka palu purunypa ngura kutjupitja tjutangku kulu ngayunya nyakunyitja wiyatu. Palu ngayulu palunya tjananya munu nyuranya kulu pulkara alpamilantjikitja mukuringanyi nyura uwankara Godanya tjukarurungku wanantjaku mununa rawangku nyurampa Mamala tjapilpai.

² Panya ngayulu mukuringanyi nyuranku tjungu mukulya nyinanytjaku panya nyanga alatji nyinara nyura kurunpa raparingkuku. Mununa mukuringanyi nyura tjukurpa Christanyatjara kulira pulkara nintiringkula uti kulintjaku. Tjukurpa nyangatja panya Godalu kumpilpa kanyiningi palu kuwari nyanga paluru utinu katja palumpa iyara.

³ Panya Christalu kutjungku tjukurpa kumpilpa ngaranytja uwankara utira nintilpai. Ka nyura Christanya kutju kulirampa ninti mularariku Godaku tjukurpa uwankaraku.

⁴ Ka kutjupa tjutangku tjinguru nyuranya ngunti kuralku wiru-palku wangkara, kana nyurala tjukurpa nyangatja wangkanyi nyura tjukarurungku kulira tjanala kulilwiyangku wantinytjaku panya ngunti wangkapai tjutangka.

⁵ Panya ngayulu nyuranya rawangku kulini nyura ngunti kulintjaku-tawara. Ngayulu patu nyinanyi nyuralanguru palu nyuranya kulinnyangka ngayuku kurunpa nyurala tjungu nyinanyi. Munu ngayulu nyurampa pulkara pukularinyi panya nyura tjungu ngarala Jesuku Christaku titutjara mulamularingkunyangka.

Christala Titutjara Tjungu Nyinanytjaku

⁶⁻⁷ Uwa, nyura panya tjukurpa wiru kulira Jesuku Christaku mulamularingu nganampa Mayatjaku. Palulanguruya tjukurpa pala palulawanu Jesula tjungu nyinama mauntalparingkunytja wiya. Titutjarangkuya Jesuku tjukurpa wanganarangku kulinma wantinytja wiyangku, munuya tjukaruru palulawanu kutju rapa mulapa nyinama tjukurpa ngunti kulintja wiya. Munuya Godaku pulkara pukularira palunya rawangku walkunma panya nyuranya wirura kanyinnyangka.

⁸ Kulilaya! Tjinguru nyuranya anangu kutjupa tjutangku wituwitulku Godaku iwara wantira tjananya wanantjaku. Palu kuliraya wantima tjananya wanantja wiyangku, panya paluru tjana ninti pulkangku-palku tjukurpa wiru-palku wangkapai. Palu palumpa tjanampa tjukurpa ngunti alatjitu ngaranyi tjukaruru wiya, panya tjana ananguku tjukurpa tjuta kulilpai irititja tjuta, munuya tjukurpa mantatja tjuta kutju kulintjatjanungku wangkapai. Palu tjukurpa nyanga paluru tjana kura Christalanguru wiya.

⁹ Ka nyura tjananya kulilwiyangku wantima, panya tjana Christanya ngunti-palku kulilpai. Palu Christanya panya Godanya alatjitu. Mulapa paluru ananguringu nganannya purunypa, palu kurunpa

paluru Godanya alatjitu nyinangi, munu kuwari paluru tu alatjitu nyinanyi.

¹⁰ Paluru tjana tjukurpa kutjupa tjuta nyuranya nintintjikitja mukuringanyi, palu tjananya kulintja wiyangku wantima, panya nyura Christala kutjuringkula palumpa iwarangka ananyi munu palulanguru nyura yaaltji-yaaltji iwara kutjupaku mukuringkuku? Wiya nganana palumpa iwarangka ankula iwara kutjupa tjutaku mukuringkuntja wiyaringu, panya Christaku iwara wiru mulapa kutjupa tjutangka waintara alatjitu ngaranyi titutjara. Paluru mayatja pulka mulapa nyinanyi mayatja kutjupa uwankarangka waintarira, mayatja arkayitja ilkaritja tjutangka munu mantatja tjutangka kulu waintarira nyinanyi. Nyara paluru nyurala tjungu nyinanyi. Kaya palulanguru ngunti wangkapai tjuta wanantja wiyangku wantima.

¹¹ Nganmanypa panya nyura watarku nyinara kura kutju palyantjikitja mukuringkupai. Palu kuwari nyura Christala tunguringkunyaangka paluru nyuranya kulintja kampa kutjupanu nyura kuraku mukuringkuwiyangku wantinytjaku. Nyangatja Christalu kutjungku nyuranya kampa kutjupanu, panya anangu putu walytja kampa kutjuparira palyaringkupai.

¹² Ka panya nyuranya urungka baptise-katinytja kulinma! Panya urungka unngu tjarpanytja nyara paluru nintini ilunytja, panya Christanya nyurampa anga-ilungu. Munu urunguru ngalya-pakantja nyara paluru nintini wankaringkula pakantja, panya Christanya nyurampa ngalkilpa anga-ilunytjatjanu wankaringkula pakanu. Panya Godalu witulya pulkangku Christanya ilunyangka wankara pakaltjanganu, munu nyuranya kulu ara nyanga palunya kulira mulamularingkunyaangka palu purunypatu wankara pakaltjanganu palumpa walytjaringkula iwara tjukarurungka ankunytjaku.

¹³ Nyura nganmanypa miri purunypa nyinangi Godanya kulintja wiyangku wantira, panya nyura kura rawangku palyalkatingi munu nyura putu wantingi, munu panya nyura Moseku tjukurku ngurpa nyinangi munu nyura walytjangku kutju kulilpai. Uwa nyura miri purunypa nyinangi kura kutju kulira, palu Godalu nyuranya miri purunypa nyinanyangka nyakula Christalawanungku wankarunu palumpa walytjaringkunytjaku. Godalu panya nganannya kura uwankara palyantjitarunguru kalypangku pungkuwiyangku wantingu.

¹⁴ Panya nganampa kura uwankara nyiringka purunypa ngaringi nganana panya palyantja tjuta munu Godala tungunpungkuntja uwankara. Ka kura nyanga palula tjanalanguru Godalu nganannya wiyantjaku ngarangi. Palu panya Christanya nganampa ngalkilpa ilungu punu katakutjarangka. Ka Godalu punungka ngaranyangka nyakula wangkangu, "Nyangatja ngayuku katja nyurampa ngalkilpa anga-ilunyi nyura ilunytjaku-tawara. Kana palulanguru nyurampa kura uwankarunguru nyuranya kalypangku wantinyi alatjitu pungkuntjikitjangku kulintja wiyangku." Alatji paluru wankara nganampa kura uwankara wiyanu Christanya nganampa ngalkilpa ilunyangka.

¹⁵ Munu paluru Christanya ilunytjitarunguru mayatja mamu kurunitja tjuta katu ngaranyangka tjarunu uparingkuntjaku. Paluru tjananya witera itarikatingu tjuta mirangka nyakula kulintjaku, "Mulapa

Godalu tjananya upa mulapa palyanu Christalawanungku.”

Ngunti Wituwitunnyangka Kulilwiyangku Wantinytjaku

¹⁶ Kulilaya! Panya kutjupa tjuṭangku nyuranya kuranmankupai kutjupa kutjupa tjuṭa ngalkula tjikinnyangka. Panya tjana nyanga alatji kulilpai, “Utila mai, kuka ini nyanganpa ngalkuwiyangku wantima munula tjuratja ini nyanganpa kulu tjikilwiyangku wantima.” Palu alatjiya ngunti kulilpai munuya ngalkula tjikinnyangka nyakula nyuranya ngunti anangura wangkanyi. Palu nyura tjananya kulira wantima.

Munu panya nyuranya inmanguru kulu anangura wangkapai. Ka nyura tjananya kulira wantima panya tjana alatji kulilpai ngunti, “Utila inma irititja tjuṭa kulu palyalkatima panya Godalu Mosela wangkanytjitjangka inma palyantjaku ngarapai kuli kutjupa kuli kutjupa munu nyinnga kutjupa nyinnga kutjupa, kala uti wantinytja wiyangku palyanmatu. Munula uti inma panyatja kulu pira mangarinyangka palyanma, munula panya Saturday titutjarangku inma kanyinma.” Palu nyanga alatjiya ngunti kulilpai munuya inma palunya tjananya wantinyangka nyakula nyuranya anangura wangkapai. Palu nyura tjananya kulira wantima panya tjanaya nyuranya ngunti kuranmananyi nintingku-palku.

¹⁷ Panya tjana ara nyanga irititja tjuṭa ngunti pulkantjikitjangku wangkara wituwitulpai tjananya wanantjaku. Palu ara nyanga paluru tjana anangu wiltja purunypa. Panya nganana anangu wiltja wirkankunyangka nyakula kulilpai, “Munta, anangu pitjanyi.” Munula anangu panya paluru wirkankunyangka palula wangkapai wiltjangka wiya. Pala palu purunypala ara irititja tjuṭa nyakula kulilpai Christanya pitjanytjaku. Palu panya Christanya pitjangu alatjitu, kala uti ara irititja tjuṭa wantira palunya kutju waintara kulinma.

¹⁸ Uwa, ngunti wituwitulpai tjuṭangkaya kulilwiyangku wantima! Panya paluru tjanaya kanany-kananytju alatji ngunti wangkapai, “Ngananaanya purunytjuya Godanya walkunma kurunpa tjaruringkula, munuya angelpa tjuṭa kulu walkunma!” Palu alatjiya ngunti wituwitulpai, munuya kulira wantinyangka nyuranya anangura wangkapai. Ka uti nyura tjananya kulilwiyangku wantima, panya tjana tjukurmara nyakunytjatjanungku tjukarurungku-palku wangkapai. Tjana kanany-kananytju wangkapai nintingku-palku, palu tjana walytjangku kulira wangkapai Godalanguru wiya.

¹⁹ Uwa, nyanga tjananyaya kulira wantima, panya tjana Christala mayatja pulkangka tjungu ngaranytja wiyaringu. Panya Godalu Christanya tjunu palumpa walytjapitiku mayatja pulka nyinanytjaku, ka paluru ngananaanya uwankara tjungura kanyini kutjuṭu wanka nyinanytjaku. Alatji Godalu palyanu nganana Christala tjungu ngarala kunpu pulkaringkunytjaku. Panya pulyku munu tarka tjungu ngarapai nganana paltjura kunpu ngaranytjaku, pala palu purunypa Godalulanya Christalawanungku kanyini kunpu.

²⁰⁻²¹ Christanya panya nyurampa kuranguru ngalkilpa anga-ilungu munu nyuranya kampa kutjupanu palunya kutju kulintjaku ara mantatja tjuṭa wantira. Palu nyaaku nyura tjukurpa nyanga mantatja

tjuta rawangku kulilpai? Munu nyura nyaaku kutjupangku nyuranya painnyangka mai kutjupatjara ngalkuwiyangku wantipai, munu kutjupa kutjupa tjuta pampulwiyangku wantipai?

²² Panya ara nyanganpa anangungku kulintja uwankara, kaya mulamularingkuwiyangku wantima. Panya ara nyanga paluru tjana unytju ngaranytjatjanu wiyaringkuku.

²³ Kaya anangu kutjupa tjutangku ara nyanga palunya tjananya kulira angelpa tjuta pupakatira walkulpai, munuya kuntanytju-palku nyinapai, munuyanku walytjangku puntu pikantankupai. Palu wiya, ara nyanga palunya tjananya palyaraya putu kampa kutjuparira palyaringkupai. Palu anangu Christaku mulamularingkula kutju palyaringkupai.

3

Godalu Kulintjitja Tjuta Titutjarangku Kulintjaku

¹ Godalu panya Christanya ilunyangka wankara pakaltjinganu munu pala palulanguru nyuranya kulu kurunpa wankara Christala tjungunu. Kaya palulanguru Godaku ara tjuta rawangku kulinma. Panya ngura nyara ilkaritjangka Christanya mayatja pulka nyinanyi Mama Godala tjungu.

² Kaya Godalu kulintjitja tjuta titutjarangku kulinma watarkuriwiyangku, munuya mantatja kurakura tjuta kulintja wiyangku wantima.

³ Panya nganmanypa nyura kura nyinangi watarku alatjitu Godanya kulintja wiya, munu panya nyura palulanguru Godanya kulinu munu kura uwankara wantingu, panya anangu wiyaringkupai ka nganana palumpa watarkuripai, nyara palu purunypa nyura Godaku walytjaringkula kuraku watarkuringu. Munu nyura kuwari kampa kutjuparira Jesula Christala tjungu wanka nyinanyi Godala mirangka. Palu nyangatjaya watarkitja tjutangku putu kulini.

⁴ Uwa nyura Christaku mulamularingkula palula tjungu wanka nyinanyi. Ka paluru ngula malaku pitjala anangu tjutangka mirangka ngaraku, ka nyura kulu palula tjunguringkula ngaraku palya mulapa pitalytji pulkangka.

Godalulanya Kulintja Wirulpai Palyanyku Kulira Nyinanytjaku

⁵ Palu nyura kura kulilwiyangku wantima. Munu anangu kuritjaraku nyakula mukuringkuwiyangku wantima, munu kuri walytjaku kutju mukuringama. Ka nyitayirangku uti kungkawara kutjupangka kutjupangka ngariwiyangku wantima munu kuri walytja altima. Ka kungkawarangku ngapartji uti wati kutjupa kutjupangka ngariwiyangku wantima munu kuri walytjaku kutju patara nyinama. Uwa kura kutjupa kutjupa tjuta nyanga palu purunypa uwankaraku mukuringkuwiyangku wantima munu palyaku kutju mukuringama. Munuya manyuringkunyitja wiyangku wantima, panya anangu kutjupa kutjupa utitjaku manyuringkula Godalanguru paturinganyi munu utitja tjuta kutju titutjarangku wanarinanyi.

⁶ Uwa kura nyanga palu purunypa tjutaya kulilwiyangku wantima panya anangungku kura nyanga purunypa tjuta palyara Godala tungunpunganyi, ka Godanya palumpa mirpanaripai.

⁷ Nyura kulu panya nganmanytju Godala tungunpungkula kura nyanga palunya tjananya palyanangi.

⁸ Palu kuwari nyura kura nyanga uwankara wantinytjaku ngaranyi. Mapalku waruringkula mirpanariwiyangku wantima, munu anangu kutjupa ngukara wangkawiyangku wantima, munu anangu kutjupa uulira ngunti wangkawiyangku wantima, ngalytjurmara wangkawiyangku wantima, munu warkiwiyangku wiru kutju wangkama,

⁹⁻¹⁰ munu ngunti-ngunti wangkawiyangku wantima tjukarurungku kutjuya wangkama.

Uwa, alatjingantja wiyangkuya wantima alatjitu, panya nyura kuwari kulintja kampa kutjuparingu munu kuraku mukuringkunyitja wiyaringu. Nganmanytju panya nyura kura nyinara kura kutju palyalpai nyinangi. Palu kuwari nyanga nyura kampa kutjuparingu munu nyura palyanyku kulilpairingu, munu panya nyura kura tjuta palyantja wiyaringu. Godalu nyuranya kulintja wirunu nyura palyanyku kulira nyinanytjaku, munu paluru rawangku tu nyuranya wirulkatinyi nyura wiru mulararira palunya purunyarinytjaku. Ka nyura palumpa ninti mularariku.

¹¹ Nyara palulanguru nyura kulintja wiruringkula Godaku walytja uwankarangka tunguringkula kutjutu nyinanyi mauntalpa mauntalpa wiya. Panya Godaku walytja kutjupa tjuta anangu Jew tjuta, ka kutjupatjara Jew wiya tjuta, palu tjana uwankara kutjuringu. Ka kutjupa tjuta wati, ka kutjupa tjuta tjitji, palu kutjutuya. Ka kutjupa tjuta ngura kutjupitja, ka kutjupa tjuta putitja waliku ngurpa, kutjupa tjuta mayatjangka warakaripai, kutjupa tjuta walytja mukuringkula warakaripai, palu nyanga paluru tjana uwankara kutjutu nyinanyi Godaku walytjapiti. Panya Christanya Godaku walytja uwankarangka kutjungka kutjungka tunguringkula nyinanyi, kala palulanguru kutjutu nyinanyi munula palunya kutju kulini uwankarangka waintarinytja.

¹² Nyuranya panya Godalu ngurkantanu palumpa walytjaringkunyitjaku. Munu paluru nyurampa pulkara mukuringanyi. Palulanguru nyura uti mukulya pulka Christaku walytja mulapa nyinama. Tjinguru nyuralanguru kutjupa ngaltutjara nyinanyangkampa nyura nyakula ngaltunytjungku atunymara kanyinma wantinytja wiyangku. Munuyanku mukulya pukultju nyinama kurunpa tjaruringkula kanany-kananyta nyinanytja wiya. Palu purkarangkuya wangkama mirpanarinytja wiyangku, munuyanku ngapartji-ngapartjingu al-pamilanma.

¹³ Ka kutjupangku nyuranya kurannyangkampa uti nyura mapalku mirpanariwiyangku palunya kalypangku kulira wantima, panya nyura kura palyannyangka Mayatja Jesulu nyuranya kalypangku wantingu, ka palu purunypa uti nyuranku mukulya ngarala kaly-pangku kulira wantima.

¹⁴ Uwa nyuranku uwankarangku nyangama kurunpa winki mukulya ngarala, panya mukulya wiya ngarala putu nyura pukulpa nyinaku. Palu nyuranku mukulya winki ngaralampa kurunpa kutjutu nyura tjungu nyinaku.

¹⁵ Christalu panya nyuranya palyarungunu nyuranku kalypa kutjutu

nyinanytjaku. Palulanguruya kalypa titutjara nyinama piruku kuraringkunyta wiya. Godalu panya nyuranya mukuringkula walytjanmanu munu paluru mukuringanyi nyura tjungu nyinara pukulpa nyinanytjaku kutjuu ngalytjurmankunytja wiya.

¹⁶ Munuya tjukurpa Jesunya Christanyatjara rawangku kulinma kurunpa winkingku. Munuyanku tjukurpa palunya nintingku kulintjatjanungku ngapartji-ngapartjingku wangkara nintinma, munuyanku tjukarurungku kutju kulintjaku wangkara markunma. Munuya Godaku pulkara pukularira kurunpa winkingku inma tjuṭa rawangku inkama irititja tjuṭa munu kuwaritja tjuṭa, munu psalm tjuṭa kulū.

¹⁷ Palu kulilaya! Nyura panya kuwari Mayatja Jesuku walytja tjuṭa nyinanyi. Palulanguruya paluru nintinnyangka kutju kulira palyanma walytjangku kulira palyantja wiyangku. Munuya tjukarurungku kutju wangkama. Munuya Mama Godaku pukularira palunya rawangku walḱunma Jesula Christalawanungku.

Titutjara Kalypa Palyanyku Nyinanytjaku

¹⁸ Minyma tjuṭa, kungkawara tjuṭa wanyuya kulinma tjukurpa nyangatja! Uti nyura wati kuringka wanganarangku kulinma nyura Jesuku walytja nyinara.

¹⁹ Kaya wati tjuṭangku ngapartji kulila! Uti nyura minyma kuriku pulkara mukuringama munu palunya wirura atunymara kanyinma kuraringkula wangkanytja wiyangku.

²⁰ Kaya tjitji tjuṭangku ngapartji kulila! Uti nyura Jesuku walytja nyinara mamangka ngunytjungka titutjarangku wanganarangku kulinma wantinytja wiyangku. Panya nyura mamangka ngunytjungka wanganarangku kulinnnyangka Godanya nyurampa pulkara pukularinyi.

²¹ Kaya mamangku ngunytjungku ngapartji kulila! Utiya nyurampa tjitji tjuṭa palyanyku kanyinma pauntjingara wangkanytja wiyangku. Tjinguru tjitji nyurampa pulkara nguluringkula tjituru-tjitururiku rawangku painnyangka munu kuraringkuku.

²² Kaya warḱaripai tjuṭangku ngapartji kulila! Uti nyura mayatja mantatja tjuṭangka wanganarangku kulinma titutjarangku. Tjinguru mayatjangku nyuranya wangkanyangkaya tjukarurungku palyanma paluru nyakula pukularinytjaku. Munu tjinguru paluru warḱaku wangkara wantikatinyangka nyura uti palu purunytjuṭu warḱa rawangku palyalkatima ankunyangka wantinytja wiyangku. Panya nyura Mayatja Jesuku walytja nyinanyi. Palulanguru nyura uti Jesula wanganarangku kulira mayatja mantatja tjuṭaku wirura tjukaruru warḱarima.

²³ Uwa, warḱa kutjupa kutjupa uwankara wirura palyanma kurunpa winkingku. Palya nyura anangungka kulira warḱarima, palu warḱa palyara waintara kulinma Mayatja Jesunya munu paluru nyakula pukularinytjaku anangu mayatjaku wirura palyanma, panya Jesunya nyurampa mayatja pulka nyinanyi, anangungka waintara.

²⁴ Panyatjaya kulinma, panya Mayatja Jesulu nyuranya kalkuṅu ngura nyara ilkaritjangka tjukarurungku ungunytjikitjangku nyura mantangka nyanga palyanyku warḱarinytjitjangka. Panya nyura

Mayatja Christaku war̄karinyi munu nyura mulapa mantjilku kalkun-tja panyatja. Palunyakitjaya kurunpa winki wanganara war̄karima mayatja panya mantatjangka.

²⁵ Palu anangungku rawangku kura palyalkatinyangka Godalu nyakula ngurkantankuku munu palunya tjituru-tjituru palyalku. Panya Godalu nintingu tjukururungku kutju ngurkantankupai ngunti-ngunti palyanmankupai wiya.

4

¹ Kaya mayatja tjuṭangku ngapartji kulila! Nyura uti nyurampa war̄karipai tjuṭa palyanyku kanyinma kuralwiyangku, panya nyura ngapartji nyurampa Mayatja Ilkaritjanya kulintjaku ngaranyi.

Godala Titutjarangku Tjapintjaku

² Kaṇa kuwari nyurala uwankarangkalta nyangatja piruku wangkanyi. Uti nyura Godala tjapinma titutjarangku pakuringkuwiyangku. Tjanyaltuya tjapinma, munuya Godaku pukularira wangkama palula, "Wirungkunin kanyini!" ³⁻⁴ Munuya ngayuku kulū Godala tjapinma, panya ngayulu mukuringanyi anangu tjuṭangka tjukurpa kumpilitja Jesunya Christanyatjara utira wangkanytjikitja. Nyanga palulanguruniya tjailangka tjarpatjunu, tjukurpa Jesunyatjara wangkanyangka. Palu nyura anangu tjuṭaku kulū tjapinma tjana kulū wanganararingkula kulintjaku tjukurpa nyanga Christanyatjara. Munuya ngayuku kulū Godala tjapinma ngayulu tjukururungku Godaku tjukurpa utira wangkanytjaku tjanala, panya Godaluni tjunu nyanga palumpa, kaṇa putu wantir'iyani tjukurpa nyanga palunya.

Wiruraya Nyinama Nyuranya Anantjaku-tawara

⁵ Palu Jesuku walytja wiya tjuṭangkaya tjunguringkula palyanyku nyinama tjana nyuranya anantjaku-tawara. Munuya kutjupa kutjupa wiru tjanampa palyantjikitjangku kulirampa mapalkungku tjananya ungama ngulaku patantja wiyangku, tjana nyuranya Jesuku walytja kulira ngurkantankunytjaku.

⁶ Munuya tjanala wirura palyanyku wangkama. Panya alatji nyura tjanala wangkanyangkaya tjinguru nyurala tjapilku piruku wangkara utintjaku, ka palulanguru nyura uti kulinma paluru tjapinnyangka tjukururungku wangkanytjikitjangku tjana kulira nintiringkunytjaku.

Uwa alatjituṇa nyurala wangkanyi nyura kulintjaku.

Paulalu Malpa Tjuṭaku Tjukurpa Iyantja

⁷ Palu wati nyanga ini Titjikatjalu lita nyangatja nyuralakutu makatinyi ngura Kalatjilakutu, munu paluru nyurala tjakultjunkuku nganannya, munu nganampa war̄ka uwankara nganana palyantja tjuṭa kulū. Wati nyanga Titjikatjanya nganampa malpa wiru mulapa, kala palumpa pulkara mukuringanyi. Paluru ngayunya rawangku alpamilalpai wantinytja wiyangku, panya paluru ngali tjungu war̄karipai Mayatja Jesuku.

⁸ Kaṇa wati nyanga palunya ma-iyani nyuralakutu, ka paluru nyurala wirkara tjakultjunkuku nganana palya nyinanytja, munu paluru nyuranya wangkara kunpulku.

⁹ Ka wati kutjupa kulu nyurampa nguranguru panya pitjanytja palula tjungu ma-pitjanyi wati panya Anitjimanya. Nyanga paluru kulu nganampa malpa wiru, kala palumpa pulkara mukuringanyi. Ka paluru pula ma-wirkara nyurala tjakultjunkuku tjukurpa uwankara ngura nyangatjajara.

¹⁰ Ka wati ini Ari-tjakatjanya ngayula tjungu nyinanyi tjailangka, munu paluru kulu nyuranya kulini nyurampa pukularira. Ka palu purunyjtutu nyuranya kulini wati ini Markalu Paanapatjaku malanytju. Wati nyanga palunya panya nganmanytju nyurala tjakultjunu panya paluru nyurala ma-wirkankunyangka nyakulaya pukultu mantjinma.

¹¹ Ka wati panya ini Tjatjuwalu kulu nyuranya kulini. Wati nyanga paluru panya ini kutjupa Tjatjanya. Palu wati nyanga paluru tjana, Ari-tjakatjanya, Markanya, Tjatjuwanya tjana panya Jew mankurpa ngayula tjungu Godaku warkaripai, Jew kutjupa tjuta wiya. Nyanga paluru tjana panya ngayula tjungu pulkara warkaripai anangu tjutangka tjana Jesuku mulamularingkula palunya mayatjanmankunytjaku. Munuya paluru tjana ngayulu tjituru-tjitururinyangka pukulmankupai ngayunya.

¹² Ka wati panya nyurampa nguranguru pitjangu ini Paparatjanya, paluru kulu nyuranya kulini. Paluru panya pulkara Jesuku Christaku warkaripai munu nyurampa rawangku Godala tjapini nyuranya pulkara kulira. Paluru tjapilpai nyura Godaku tjukurpa rawangku kulintjaku wantinytja wiyangku, panya paluru mukuringanyi nyura Godalu wituntjtija uwankara kulira mulamularingkunytjaku munu wanganarangku kulira palyantjaku.

¹³ Ngayulu ninti wati nyanga palumpa panya nyanga paluru nyuranya pulkara anga-kulira rawangku Godala tjapilpai munu palu purunyjtutu tjapilpai Godaku walytja tjutaku ngura pala ini Layatiyala pulala Ara-palitjala nyinanytja tjutaku kulu.

¹⁴ Ka wati wiru kutjupa Luke-anya nganampa panya ngangkari, paluru kulu nyuranya kulini nyurampa pukularira. Ka palu purunyjtutu wati ini Timatjalu nyuranya kulini.

¹⁵ Kaya ma-tjakultjura Jesuku walytja tjutangka ngura nyara Layatiyala nyinanytja tjutangka panya ngayulu palunya tjananya rawangku kulini. Munu palu purunyjtutu ma-tjakultjura minyma ini Nimpala tjanala kulu panya nyara palumpa walingkaya inmaku tjunguringkupai.

¹⁶ Nyura lita nyangatja tjunguringkula nyakula kulintjatjanungku wati-iyala Jesuku walytja kutjupa tjutakutu ngura nyara Layatiyalakutu paluru tjana ngapartji tjunguringkula nyakula kulintjaku. Kaya lita panya ngayulu nganmanytju tjanampa iyantjanya tjana ngapartji nyuralakutu wati-iyalku. Kaya lita nyara palunya mantjirampa tjunguringkula nyakula wangkara kulinma!

¹⁷ Palu wanyu wangka wati panya ini Atjiputjanya rawa warkarira uwankara wiyantjaku ngatalpatu wantinytja wiyangku, panya Mayatja Jesula palunya ngurkantanu palumpa warkarinytjaku.

¹⁸ Uwa, alatjituwa wangkanyi nyurala lita nyangangka. Wati kutjupangku ngayulu tjakultjunkunyangka lita nyangatja walkatjunu nyurampa, palu kuwari nyangana marangku ngayulu alatjituwa

walkatjunanyi nyanga alatji, "**Ngayulu ini Paulanya mununa nyuranya rawangku kulilpai.**" Ka walka nyanga palulanguru nyura kulilku, "Mulapa nyangatja Paulalanguru."

Palu ngayunyaniya kulinma nyanga tjailangka nyinanyangka munutjuya ngayuku Godala tjapinma.

Uwa, alatjituna walkatjunu. Ka Godalu nyuranya rawangku pukultjungku kanyinma.

Lita Nampa 1 Paulalu Walkatjura Iyantja Ngura Tjitja-lanikalakutu 1 Thessalonians Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjunkunyntja Jesuku walytja tjutaku ngura nyara Tjitja-lanikala nyinanyntja tjutaku. Ka panya nyiri kutjupa ngaranyi ini *Jesulu Iyantja Tjutangku Palyantja* wati panya Luke-alu walkatjunkunyntja, ka panya nyiri pala palula Luke-alu tjakultjunu chapter 17-ta Paulanya Timitjinya Tjaalatjanya tjana ankula nyinanyntja ngura nyara Tjitja-lanikala. Panya paluru tjana tjiutu 21 nyinangi ngura nyara palula munuya Tjukurpa Jesunyatjara tjakultjunangi anangu nyara palula nyinanyntja tjutangka. Kaya Jew tjuta mulamularingu munu Jew wiya tjuta kulukulu. Palu Jew kutjupa tjutangku mulamularingkuwiyangku wantingi munuya mulamularingkupai tjuta kurara pungangi munuya Paulanya painu tjanampa ngura wantikatinytjaku.

Ka ngula Paulalu Timitjinya malakungku witura iyanu ngura nyara Tjitja-lanikalakutu ankula anangu panya Jesuku walytja tjuta nyakunyntjaku munu palunya tjananya wangkara kumpuntjaku. (Nyawa 3:5.) Ka Timitjilu ngura nyara palula wirkara tjananya nyakula pulkara pukularingu panya paluru tjana watarkurinyntja wiyangku rawangku Jesunya wanannyangka.

Palu kutjupa tjutangkuya kulinu Jesunya ilkaringuru malaku mapalku pitjanyntja-palku munuya palulanguru waraka wantira patara nyinangi Jesuku. Ka lita nyangangka Paulalu tjananya wangkara painingi pakara warkarinyntjaku.

Kaya kutjupa tjuta pulkara tjituru-tjitururingi panya tjanampa walytja tjutaya nganmanypa ilungu Jesunya pitjanyntja kuwaripangka. Ka Paulalu lita nyangangka walkatjura tjananya wangkara tjukaruruningi ngunti kulilwiyangku tjukarurungku kulintjaku Jesunya malaku pitjanyntja.

Tjukurpa nyanganpa ngarinyi:

1:1 Paulalu nganmanyntju wangkanyntja

1:2—3:13 Paulanya tjanampa pukularinyntja

4:1-12 Paulalu tjananya wituwituntja Godalawanu tjukaruru palyanyku nyinanyntjaku

4:13—5:11 Paulalu Jesunya malaku pitjanyntja tjakultjunkunyntja

5:12-28 Paulalu tjukurpa malatja wangkanyntja

Paulalu Nganmanyntju Wangkanyntja

¹ Uwa, Jesuku walytja tjuta, ngayuluna Paulalu lita nyangatja nyurampa walkatjunanyi ngura pala Tjitja-lanikala nyinanyntja tjutaku. Panya nyura Mama Godaku walytja mulapa nyinanyi Mayatja Jesuku Christaku kulu. Kala nyangatja Tjaalatjala Timitjilu nganana mankurtu lita nyangatja nyuralakutu ma-iyani nyurampa pukularira.

Ka Mama Godalu nyuranya pukultju pulkangku kanyinma munu nyuranya kurunpa rapara pukulmanama.

Wiruraya Palyanyku Nyinama

²⁻³ Uwa, nganana nyuranya kulira pulkara pukularipai. Panya nyura Jesuku pulkara mulamularingkupai munu nyara palulanguru nyura Godaku wirura warakaripai. Munu panya nyura mukulya pulka nyinapai munu nyara palulanguru nyura wiru tjuta palyalpai anangu tjutaku. Munu nyura ala-ala patara nyinapai Mayatja Jesulu Christalu nyuranya malakungku pitjala mantjintjaku. Nyara palulanguru nyura ala-ala patara raparingkula Godaku iwarangka tungun-tungunpa ananyi wantinytja wiya alatjitu. Ka nyura nyanga alatji wirura nyinanyangka nganana pulkara pukularipai munula Godala tjapira alatji wangkapai, "Ngura nyara Tjitja-lanikala nyuntumpa walytja tjuta wirura nyinanyi."

⁴ Uwa walytja tjuta, nganana nitingku kulini panya Godalu nyuranya pulkara mukuringkula ngurkantanu nyura palumpa walytja nyinanytjaku. Nyara palulanguru kulula Godanya walkulpai paluru nyuranya ngurkantankunytjitjanguru.

⁵ Palu nyura wanyu Jesuku mulamularingu ngayulu Tjukurpa Palya tjakultjunkunyangka kulira? Wiya, ngayulu tjakultjunkunyangka Godalu witulya pulkangku nyurala unngu nintiningi. Nyara palulanguru nyura Jesuku mulamularingu Kurunpa Milmilu nyuranya unngu nintinnyangka. Panya nyura nyangangi nganana Godaku raparingkula Tjukurpa Palya mulamulangku wangkanyangka, munu panya nyura nyakula kuliningi alatji, "Awari, mulapa nyangantu Godaku mulamularingkula tjukurpa pulka rapangku wangkanyi." Alatji nyura kuliningi.

Ka panya mungatu nganana nyurala tjungu nyinangi munu panyala nyurampa wiru mulapa palyaningi. Ka nyura nyara palulanguru nintiringkula kuliningi, "Ai, nyanga tjanaya tjukurpa mulapa wangkanyi, panya tjana tjukurpa palunyatjara alatjitu nyinanyi munuya wiru tjuta kutju palyani." Alatji nyura nyakula kuliningi.

⁶ Munu nyura nyara palulanguru nganannya purunypa arkara nyinangi panya Mayatja Jesunya purunyarira wirura nyinanytjikitja. Kala nyara palulanguru kulu kulini panya mulapa Godalu nyuranya ngurkantanu palumpa walytjaringkula nyinanytjaku. Ka panya anangu watarkitja tjutangu nyuranya kuraningi nyura Tjukurpa Palya kulira Jesuku mulamularingkunyangka. Palu nyura panya tjananya kulira wantingi munu Godaku tjukurpa kutju kulira pulkara pukularingi, Kurunpa Milmilu nyuranya pukulmankunyangka.

⁷ Uwa, nyuranya panyaya anara kuraningi, ka panya nyura palula tjanala kulintja wiyangku wantira Godalawanu kutju nyinangi. Ka panya anangu Jesuku walytja kutjupa tjutangu ngura kutjupa tjutangu nyuranya nyangangi munu kuliningi Godalawanu wirura nyinanyangka, munuya palulanguru tjana kulu nyuranya purunypa Godalawanu wirura nyinanytjikitja mukuringanyi. Anangu paluru tjana panya manta nyara ini Matja-tuniyala nyinanyi, munu kutjupa tjuta nyurala ulparira nyinanyi manta panya ini Akayala.

⁸ Panya ngura winkitjangkuya anangu tjuťangku nyuranya kulinu Godaku pulkara mulamularingkunyta, munuya nyara palulanguru nintiringu Mayatja Jesuku tjukurku.

Uwa, mulapa nyuralanguru Mayatjaku tjukurpa lipiringu munu ngura winkikutu anu Matja-tuniyala pulala Akayala kutju wiya palu ngura uwankarakutu. Ka nyara palulanguru manta winkitjangku nyuranya nganmanytu kulinu nganana tjanala tjakultjunkunyta kuwaripangka.

⁹ Panya nganana ngura kutjupangka wirkankunyangka anangu nyara palunya ngurara tjuťangku tjukurpa nyuranyatjara patara ngananala tjakultjunangi munuya alatji wangkangi, "Nyara Tjitja-lanikala nyinanyta tjuťa kunyu nyurampa pulkara pukularingi nyura Godaku tjukurpa tjanala wangkanyangka. Munuya kunyu god pulinguru pununguru palyantja tjuťa wantira God wankaku mulamularingu palula kutjupangka wanganarangku kulira warkarinytjikitja." Alatjiya ngura kutjupangka kutjupangka ngananala tjukurpa nyuranyatjara pukultu tjakultjunkupai.

¹⁰ Munuya alatji kulu wangkangi, "Nyara paluru tjanaya kunyu alalangu patani Godaku katja malaku pitjanytjaku ngura ilkaringuru." Alatjiya ngayula tjakultjunangi. Ka panya mulapa Jesunya ilunyangka Godalu wankara pakaltjinganu. Ka paluru tjintu malatjangka nganananya pitjala wankarunkuku, panya tjintu nyara palula Godalu anangu palunya wantipai tjuťa tjarara ngura kurangka waniku. Uwa, nyuranyaya ngura winkitjangku kulinu nyura Mayatja Jesuku pulkara mulamularingkunyangka.

2

Paulanya Tjitja-lanikala Nganmanypa Nyinara Warkarinytja

¹ Palu walytja tjuťa, panya nganana mungatu nyurala wirkara tjukurpa wangkanyangka nyura kulira Jesuku mulamularingu, kala palulanguru pulkara pukularingu.

² Palu panya nganana nganmanypa ngura nyara Pilipaila nyinanyangka anangu tjuťangku nganananya anara warkira painingi munulanya pungangi. Palu Godalulanya kurunpa rapanu Tjitja-lanikalakutu ma-pitjala palumpa Tjukurpa Palya Jesunyatjara nyurala tjakultjunkunyttaku. Ka panyaya nyurampa pala ngurangka tjara kutjupa palu purunypatu nyinangi munulanyaya mirpanarira pulkara painingi. Palu tjana wangkanyangka nganana kulilwiyangku tunguntunguntu alatjitu nyurala wangkangi Tjukurpa Palya Jesunyatjara.

³ Uwa, nganana panya tjukurpa palunya nyurala tjakultjunangi nyura kulira mulamularingkula Jesunya wanantjaku. Panya nganana nyurampa mukuringkula tjukurpa tjukaruru wangkangi ngunti wangkanytja wiyangku. Munula nyuranya ngunti kurantjikitjangku kulintja wiyangku tjukurpa mulapa kutju wangkangi nyuranya pukulmankunytjikitjangku.

⁴ Palu kutjupa tjuťangku nganananya anara wangkapai, "Nyara tjana nyuranya ngunti kurani, kaya tjananya kulintja wiyangku wantima." Alatjiya nganananya wangkapai. Palu tjana ngunti alatji wangkanyi nintingku-palku. Panya Godanya ninti nganana unngu kulintjtjaku, munulanya paluru alatjitu nintingku witura

iyānu Tjukurpa Palya Jesunyatjara para-tjakultjunkunytjaku. Kala tjukurpa nyanga paluya anangu tjuṭangka wangkapai Godalu nyakula pukularinytjaku, anangu tjuṭanku nganananya nyakula mirawaninytjaku wiya.

⁵ Palu anangu kutjupa tjuṭanku tjinguru nyurala tjukurpa wangkapai nyuranya ngunti pukulmankunytjikitjangku nyura tjanampa mukuringkunytjaku. Palu nyura ninti nganampa panya nganaṇa tjananya purunypa wiya, munula nyurala Godaku tjukurpa kutju tjukarurungku wangkapai. Palu tjinguruya kutjupa tjuṭanku nganananya nyanga alatji kulini, "Tjinguruya manikitjangku nyan-gantu tjukurpa wangkanyi nganaṇa kulira pukularira tjananya mani pulka ungkunytjaku." Palu wiya alatjitu. Godanya ninti nganampa panya nganaṇa nyurala tjukarurungku tjakultjunangi manikitjangku wiya.

⁶ Panya Jesulu iyannyangka nganaṇa nyurampa ngurangka Godaku warkarangi nyura kulira Godanya kutju mirawaninytjaku nganananya wiya. Munula palu purunypatu ngura kutjupa uwankarangka Godaku warkaripai anangu tjuṭanku Godanya kutju mirawaninytjaku.

⁷⁻⁸ Nganananya panya Jesulu Christalu ngurkantara witura iyaṇu tjukurpa palumpa para-tjakultjunkunytjaku. Kala palulanguru Jesulu nganananya witura iyannyangka nganaṇa uti nyurala ngatjinma ungkunytjaku. Palu wiya, nganaṇa panya nyurala ngatjintja wiyangku wantingi munula nyurala pukulpa nyinangi, panya ngunytjungku tjitji mukulyangku atunymara kanyilpai, palu purunypa nganaṇa nyurampa pulkara mukuringangi kurunpa winki. Munula palulanguru nyurala pukultu wangkangi Godaku Tjukurpa Palya. Munu panyala nyurala tjungu nyinara nyuranya mukulyangku alpamilaningi tjukurpa kutju wangkanytja wiyangku. Panya nganaṇanku walyt-jangku pukulmankunytjikitjangku kulintja wiyangku nganaṇa nyuranya kutju pukulmankunytjikitjangku kulinigi nyurampa pulkara mukuringkula.

⁹ Uwa walytja tjuṭa, nyura panya ninti nganaṇa panya nyurala nyinara Godaku tjukurta kutju warkarinytja wiya, palu panya kutjupa-arala warka kutjupa manikitjangku palyaningi kalala mungangka kulu. Munula warka pala palulanguru mani mantjira mai walytjangku payamilara ngalkuningi nyurala ngatjintja wiyangku.

¹⁰ Ka panya nyura ninti panya nganaṇa nyurala nyinaralpi tjukaruru nyinangi palya mulapa, munula kura palyantja wiya nyinangi, ka anangu kutjupangku nganananya nyakula wirunmanangi kuran-mankunytja wiyangku. Panya Godalu nganananya nintingu nyan-gangi nyurala wirura nyinanyangka.

¹¹⁻¹² Panya nyura ninti nganaṇa panya nyuranya mama purunytju wangkara kurunpa rapaningi, panya mamangku tjitjingka wirura wangkapai munu tjukarurulpai, palu purunytjula kurunpa pulkara mukuringkula nyuranya wangkara tjukaruruningi wirura palyanyku nyinanytjaku Godanya nyakula nyurampa pukularinytjaku. Panya paluru nyuranya ngurkantanu palumpa walytjaringkula tjukaruru nyinanytjaku, munu paluru Mayatja wirungku nyuranya titutjarangku kanyilku witulya pulkangku.

¹³ Uwa, nganaṅa nyurampa pulkara pukularira Godanya rawangku walkulpai, panya mungatu nganaṅa Godaku tjukurpa nyurala tjakultjungkunyangka nyura kulira pulkara mulamularingu munu nyura alatji kulinu, “Nyanga paluru tjana mulapa Godaku tjukurpa wangkanyi, walytjangku kulira wangkanytja wiyangku.” Nyara palulangurula Godanya walkulpai nyura tjukarurungku kulinnyangka. Ka panya nyura mulamularingkunyangka Godalu kuwari nyurala unngu tjukurpa panya palunya utini nyura kulira palulawanu tjukaruru wirura nyinanytjaku.

¹⁴ Ka panya kuwari nyurampa ngurangka anangu kutjupa tjuṅangku nyuranya anani munu punganyi nyura Godaku tjukurpa mulamulangku kulinnyangka. Palu kulilaya, nyanga palu purunypa ngaranya ngura nyara Israelta, panya nyara palulaya anangu Jew kutjupa tjuṅangku Jesuku walytja tjuṅaku kuraringkula tjananya analpai munuya pungkupai nyuranya purunypa.

¹⁵ Panya Jew nyara paluru tjanaya nganmanytju Mayatja Jesunya-warara pungkula iluntanu munu panyaya iriti Godaku wangkatjara tjuṅa kulu pungkula iluntara wiyaṅu. Munuya kuwari nganampa ngapartji kuraringanyi munulanya paini ngura tjuṅanguru. Palu alatji palyannyangka Godanya tjanampa pukularinytja wiya alatjitu paluru tjana anangu uwankaraku kuraringkunyangka.

¹⁶ Munuya nganaṅa anangu malikitja tjuṅangka tjukurpa wangkanyangka nganaṅanya paini wangkawiyangku wantinytjaku, tjana kulira mulamularingkula wankaringkunytjaku-tawara. Utiya mukuringama Godalu anangu uwankara wankarunkunytjaku, palu tjana nganaṅanya pairampa anangu ngura winkitja angatjunanyi Tjukurpa Palya kulira mulamularingkunytjaku-tawara munuya palulanguru tjanampa pulkara kuraringanyi nganampa kutju wiya. Ka nyara palulanguru paluru tjana kura nyanga palu purunypa rawangku palyannyangka Godanya tjanampa ngalturingkunytja wiyaringu. Munu paluru kuwari tjanampa pulkara mirpanarira tjanampa ngapartji tjituru-tjituru pulka mulapa palyalku ngula.

Paulanya Tjananya Piruku Ankula Nyakunytjikitja Mukuringkunytja

¹⁷ Palu walytja tjuṅa, mungatu panyala nyurala wirura nyinangi, ka panyaya kutjupa tjuṅa nganampa pikaringangi munulanya nyuralanguru paira iyaṅu. Ka panyala anu munula nyuralakutu putu malaku ma-pitjangi. Palu nganaṅa paṅu nyinara nyuranya titutjarangku kuliningi watarkurinytja wiyangku, munula nyurampa pulkara mukuringkula rawangku kuliningi alatji, “Yaalarala tjananya piruku nyakuku?”

¹⁸ Panya nganaṅa nyuralakutu malaku ankunytjikitja mukuringangi. Ngayulu panya rawangku kuliningi nyuralakutu ma-pitjanytjikitjangku. Palu putuliringila, panya mamu Satantulanya rawangku angatjunangi.

¹⁹ Uwa, nganaṅa nyuranya piruku nyakunytjikitja pulkara mukuringanyi, panya nganaṅa kulini mulapa nyura Jesuku walytjaringkula palunya tungun-tunguntu wanalpai wantinytja wiyangku. Palulangurula nyurampa pulkara pukularinyi. Panya ngula Mayatja Jesunya malaku pitjanyangka nyura palula mirangka kuntaringkuwiya rapa ngaraku palunya rawangku wanantjatjanu.

Kala nyara palula ara ngana nyurampa pulkara pukulariku rapa ngaranyangka nyakula.

²⁰ Panya ngana nyurala nintinnyangka nyura Godaku pulkara mulamularkula palula wanganrangku kulinigi. Kala palulanguru nyurampa pulkara pukulariku.

3

¹⁻² Ka panya ngana nyuranya nyakunytjikitja mukuringkula kurunpa tjituru-tjitururira pulkara kulinigi, panya ngayulu nyuralakutu pu tu ma-pitjangi. Mununa palulanguru piruku kulinu, "Utina Timitjinya iyanma tjanalakutu, munuli palya Tjaalatjanya ngali ngura nyanga Atjantjala nyinama. Panya Timitjinya wati wiru ngalimpa walytja Jesulanguru, munu paluru Godala warakarira Tjukurpa Palya Jesunyatjara para-tjakultjunkupai anangu tjutangka." Munuli alatji kulira palunya witura ma-iyanu nyuralakutu ma-wirkara nyuranya wangkara kunpuntutjaku nyura mulamulangku Jesunya kulira titutjarangku wanantjaku.

³ Panya nyura Jesunya wanannyangkaya anangu kutjupa tjutangku nyuranya anara kurara punganyi nyuranya tjituru-tjituru palyantjikitjangu. Palu nyura pakuringkula tjituru-tjitururira wantinytjaktawara wati nyanga Timitjilu nyuranya ma-wirkara wangkara kunpulku nyura kulira tungun-tunguntu wanantjaku wantinytjawi wiyangku. Panya nyura ninti, mulapa panya Jesuku mirpantju tjutangku nyuntunya nganannya rawangku kuralpai tjituru-tjituru palyantjikitjangu ngana palunya wanannyangka.

⁴ Panya ngana mungatu nyurala nyinaralpi tjukurpa nyanga palunya rawangku wangkangi panya anangu tjutangku nganannya rawangku analpai Jesunya wanannyangka. Ka panyaya mulapatu kuwari kulu nyuranya anani tjituru-tjituru palyantjikitjangu.

⁵ Kana nyara palulanguru nyuranyatjara kulintjikitjangu Timitjinya nyuralakutu ma-iyanu nyuranya nyakula kulintjaku alatji, "Tjinguruya rawangku Jesunya wanani, munta tjinguruya wantingu mamungku tjananya kurannyangka?" Alatji kulintjikitja mukuringkulana Timitjinya ma-witunu ankula nyuranya nyakula nintiringkula malakungku pitjala ngalila tjakultjunkunytjaku. Panya ngayulu kulinigi, "Tjinguruya watarkuringu mamungku arkannyangka, munuya pu tu tungunpungkula wantingu Jesuku mulamularkunytja wiyangku. Kala panyatja unytju alatjitu warkarangi." Nyanga alatji kulirana Timitjinya nyuralakutu ma-iyanu.

⁶ Palu kuwari nyanga paluru malaku pitjangu nyuralanguru munu paluru tjukurpa wiru tjuta ngalila tjakultjunangi, kali kulira pulkara alatjitu pukularingi. Panya nyura kunyu Jesunya titutjarangku kulira wanani ngururpa wantinytjawi wiyangku, munu Jesuku pulkara mukuringanyi palumpa walytja kutjupa tjutaku kulu. Munu kunyu nyura ngalinya rawangku kulira pukularipai munu nyura kunyu ngalinya nyakunytjikitja pulkara mukuringanyi, panya ngali nyuranya nyakunytjikitja pulkara mukuringanyi, palu purunypatu.

⁷ Uwa walytja tjuta, nyurampa tjukurpa kulirali kurunpa pulkara pukularingu. Palu ngura nyangangkaya Jesunya wantipai tjutangku nganannya tjituru-tjituru palyantjikitjangu anara paini munulanya kurani Jesuku tjukurpa tjakultjunkunyangka. Palu kuwari ngali kulinu

panya nyura kunyu Jesunya rawangku alatjitu wanani wantinytja wiyangku, kali pulkara alatjitu pukularingu.

⁸ Nganmanytju panyala nyuranya pulkara kuliningi, "Tjinguruya Jesunya rawangku wanani, munta tjinguruya wantingu." Palu mulapa nyura Mayatja Jesunya titutjarangku wanani, kala pulkara alatjitu pukularingu.

⁹ Munula Godala wangkara palunya pukultu alatjitu walkura mirawaninyi, panya nyura nganananya pulkara pukulmanu Jesunya tungun-tunguntu wanara.

¹⁰ Ka nganaa rawangku Godala tjapilpai mungangka kalala paluru nganananya wituntjaku nyuralakutu nganaa ma-pitjala nyuranya piruku nyakunytjaku, munu tjukurpa kutjupa tjuṭa nyurala piruku nintintjaku. Panya nyura ninti mulapa wiya kuwaripatu nintiringanyi Jesuku pulkara mulamularingkunytjikitja.

¹¹ Uwa, mulapa nganaa tjapini Mama Godala pulala Mayatja Jesula nganananya nyuralakutu wantir'iyantjaku nganaa tjukaruru ankula nyurala wirkankunytjaku.

¹² Munula piruku tjapini Mayatja Jesula paluru nyuranya mukulya ngaltunytju pulka palyantjaku nyura anangu kutjupa uwankaraku kulu pulkara mukuringunytjaku, panya nganaa nyurampa kurunpa winki mukuringanyi, palu purunypala tjapini Mayatjala nyuranya mukulya pulka palyantjaku.

¹³ Munula piruku tjapini paluru nyuranya kunpuntjaku. Ka nyara palulanguru nyura wirura tjukaruru nyinaku palya mulapa. Ka ngula Mayatja Jesunya palumpa walytjapiti winkitjara malaku pitjanyangka kutjupangku nyuranya Mama Godala mirangka puṭu kuranmankuku nyura mantangka nyanga palya mulapa nyinanytjitjangu.

4

Palyanyku Nyinama Godanya Nyakula Pukularinytjaku

¹ Palu wanyuya kulila walytja wiru tjuṭa, kala piruku nyurala wangkama Mayatja Jesula panya nganaaala wangkanytja. Panya nganmanytjula nyurala tjungu nyinaralpi tjukurpa wiru wangkara nintiningi nyura palyanyku nyinanytjaku Godanya nyurampa nyakula pukularinytjaku. Ka nyura mulapa wanganarangku kulira kuwari palyanyku nyinara Godanya pukulmananyi. Palu uti nyura pakuringkuwiya rawa wirura palyanyku nyinama, ka Godanya nyurampa rawatu pukulariku.

² Nyangatjana nyurala ninti tjuṭangka wangkanyi, panya nyura nganmanytju kulira nintiringu nganaa Mayatja Jesuku tjukurpa nyurala tjakultjungkuyangka, munu nyura kuwari nintingu kulini palyanyku nyinara Godanya pukulmankunytjikitjangku.

³ Panya Godanya mukuringanyi nyura palya mulapa nyinanytjaku kura uwankara wantira. Munu paluru mukuringanyi nyura kuri walytjangka kutju ngarinytjaku, anangu kutjupaku nyakula mukuringkunytja wiya.

⁴ Uti watingku kungka kutjupa nyakula wantima munu kuri walytjaku kutju mukuringama Godala mirangka palya mulapa nyinanytjikitja paluru nyakula pukularinytjaku.

⁵ Palu panya wati Godaku ngurpa tjuṭangku kungka kutjupa tjuṭa nyakula palula tjanala ngarinytjikitja kutju pulkara mukuringkupai, kuri mulapa altira wirura kanyintjikitjangu kulintja wiyangku. Ka nyura uti palu purunypa nyinanytja wiyangku wantima, munu kuri walytjaku kutju mukuringkula palula kutjungka nyinama.

⁶ Munu nyura uti wati Jesuku walytja kutjupaku kuriku nyakula mukuringkuwiyangku wantima, panya nyura alatji palyara wati palunya kurani palumpa kuriku mukuringkula. Ka panya Mayatja Jesulu pika pulka mulapa ungu kura nyanga palu purunypa palyan-nyangka. Tjukurpa nyanga palunya panyala nyurala nganmanytju wangkara ngulutjunu, kaya wanganarangku kulira kuri walytjangka kutju tjukaruru nyinama.

⁷ Panya Godalulanya ngurkantanu nganana kuri walytjangka tjukaruru palyanyku nyinanytjaku, kuri kutjupa tjuṭaku nyakula mukuringkunyitja wiya.

⁸ Ka nyura tjukurpa nyanga palunya kulintja wiyangku wantirampa Godanya anani munu palula tungunpunganyi. Panya tjukurpa nyanga ngayulu nyurala wangkanytja Godaku tjukurpa, ngayuku wiya. Ka panya Godalu nyuranya Kurunpa Milmilnga ungu nyuranya tjukarurungku nintintjaku.

⁹ Palu walytja tjuṭa, nganana nyurampa piruku nyiringka walkatjunkunyitja wiya nyura mukulya nyinanytjaku, panya alatjitu nyuranya Godalu nintinu Jesuku walytja tjuṭaku mukulya nyinanytjaku.

¹⁰ Ka panya nyura mukulya alatjitu nyinanyi Jesuku walytja uwankaraku ngura pala nyurala itingka nyinanytja tjuṭaku munu manta nyara Matja-tuniyala nyinanytja tjuṭaku kulu.

Palu walytja tjuṭa, pirukula nyuranya wangkara wituwituni nyura Jesuku walytja tjuṭaku pulkara alatjitu mukuringkunyitjaku wantinytja wiya.

¹¹ Uti nyura rawangku kulinma kalypa pilunpa nyinanytjikitjangu pikaringkula warkinytja wiya. Munuya anangu kutjupa tjuṭa nintingku-palku wituwituntja wiyangku wantima paluru tjana walytjangu kulira palyantjaku. Munuya walytja walytja warakarima mani walytjangku mantjintjikitja kutjupa tjuṭangka ngatjintjaku-tawara. Panya nyuralala nganmanytju jakultjunangi, kaya watarkurinytja wiyangku wanganarangku kulira palyanma.

¹² Munu nyura alatji nyinara palyanyku warakarira mani mantjira palitja alatjitu pukulpa mulapa nyinaku kutjupa tjuṭangka ngatjintja wiya. Kaya tjinguru Jesunya wantipai tjuṭangku nyuranya nyakula alatji kulilku, "Nyanga tjana mulapa wirura alatjitu palyanyku nyinanyi."

Jesunya Malaku Pitjanytja

¹³ Palu walytja tjuṭa wanyuya kulila, panya nyura kunyu anangu Jesuku walytja nganmanytja ilunytja tjuṭa pulkara kulilpai. Kala nyangatja nyurala wangkanyi nyura tjukarurungku kulintjaku. Panya Jesunya wantipai tjuṭangkuya alatji kulilpai anangu tjuṭa ilura wiyaringkupai alatjitu piruku wankaringkunyitja wiya. Munuya walytja tjanampa ilunyangka pulkara tjituru-tjitururira ulapai munkaritja waintara kulintja wiya. Kala mukuringanyi nyura tjananya arkantja

wiyangku tjukarurungku kulintjaku munuya Jesuku walytja kutjupa ilunyangkampa pulkara tjituru-tjitururinytja wiyangku wantima.

¹⁴ Panya nganaṅa mulamularinganyi Jesunya panya ilura wankaringkula pakantjijaku. Munula palulanguru kulini mulapa anangu panya Jesuku walytja tjuṅa nganmanypa panya ilunytjatjanu tjiṅtu maḷatjangka wankaringkula pakalku. Panya nyara palula-arangka Jesunya mantakutu malaku pitjaku, ka panya Godalu tjananya miri panya tjuṅa pakaltjingara Jesula tjungulku palula wanka titutjara nyinanytjaku.

¹⁵⁻¹⁶ Panya nyangatja Mayatja Jesulu nganaṅala wangkangu, kala kuwari nyurala tjakultjunanyi tjukurpa nyanga palunyatu. Panya tjiṅtu nyara palula Mayatja Jesunya pitjanyangka miri tjuṅa-warara, wankaringkula pakara palula tjunguringkuku, ka nganaṅa wanka nyinarampa maḷa tjunguringkuku. Panya Mayatjalu ngura ilkarṅinguru ukalingkula mirara wangkaku, kala kulilku angelpa kuranyitjangku wangkara Godaku turampata puura wangkatjingannyangka. Kaya Jesuku panya walytja tjuṅa nganmanypa panya ilunytjitja tjuṅa-warara wankaringkula pakalku.

¹⁷ Kalanya palula maḷangka Godalu nganaṅanya wanka nyinanytja tjuṅa miri tjuṅangka tjungulku, panya nganmanypa ilunytjatjanu pakantja tjuṅangka, munulanya uwankara tjungura katiku ilkarṅikutu. Panya Mayatja Jesunya nganaṅalakutu ngaparikatiku ngangkaḷangka, munulanya uwankara katiku palula tjunguringkula wanka titutjara nyinanytjaku.

¹⁸ Uwa, tjukurpa nyanga palunyaya rawangku ngapartji-ngapartjingu wangkara kulinma watarkurinytja wiyangku munuya wangkara pukularima, panya Godanya wantipai tjuṅa pulkara tjituru-tjitururipai, kaya palunya tjananya arkantja wiyangku wantima.

5

Mayatja Jesukula Ala-aḷangku Patantjaku

¹ Palu walytja tjuṅa kulilaya, panya Mayatja Jesunya maḷaku pitjaku tjiṅtu maḷatjangka. Palu nyuntu nganaṅa ngurpa tjiṅtu nyara palumpa yaalara paluru wirkankuku. Panya nyanga palunyala nyurala nganmanytju tjakultjunangi nyura kulira ninti nyinanytjaku.

² Ka panya nyura nganmanytju kulintjatjanu ninti nyinanyi panya Mayatja Jesunya urulyku wirkankuku tjiṅtu maḷatjangka anangu winki watarku nyinanyangka.

³ Panya nyara palula kuwaripangka anangu mantatja kulilpai tjuṅangu watarku nyinara pukularira alatji wangkaku, "Ai, nyangatjala kuwari manta winkingka pikaringkunyitja wiya pilunpa kalypa wirura alatjitu nyinanyi, panya nganaṅa kutjupa tjuṅaku nguluringkunyitja wiyaringu." Palu paluru tjana alatji wangkara ngunti pukularinyangka pika panya kura pulka mulapa tjanaḷa mapalku wirkankuku. Kaya kumpira wirtjapakalku wankakitja-palku.

⁴ Nyara paluru tjana panya kura tjuṅa mungawalurungka nyinapai. Munuya tjiṅtu maḷatjangka Jesunya maḷaku pitjanyangka nyakula pulkara urulyaralku watarku nyinanytjatjanu. Palu nyura panya Jesuku mulamularingkunyitjatjanu kura wantira mungawalurungka

nyinanytja wiyaringu, munu palulanguru nyura tjinu malatjangka urulyarantja wiya rapa ngaraku Jesunya malaku pitjanyangka.

⁵ Panya nyura tilitjara nyinara wiru tjuta kutju palyalpai, munu nyura tjinu nyara palula Jesunya pitjanyangka nyakula pulkara pukulariku. Nyuntu nganana panya nganmanypa mungawalurungka nyinanytjatjanu wiyaringu, munula anangu kura tjutangka tjunguringkula kura palyantjaku wiyaringutu.

⁶ Palulangurula uti watarku nyinanytja wiyangku ala-alangku patanma munula kulil-kulilpa nyinama Godalawanu kutju titutjara tjukaruru nyinanytjikitja mukuringkulampa. Palyantiya mantatja kulilpai tjuta watarku nyinama kunkunpa purunypa, palu nganana uti wankangku nyangama.

⁷ Panya mungaringkunyangka anangu tjuta kunkunarinytjikitja mukuringkula kunkunaripai. Kaya kutjupa tjutangka tjikira tarangkaripai.

⁸ Palu nganana kuwari mungangka nyinanytja wiya kalala nyinanyi Godaku walytja tjuta. Munula uti palulanguru kulil-kulilpa Godalawanu kutju tjukaruru palyanyku nyinama.

Utila titutjara Jesuku mulamularingama munula palumpa pulkara mukuringama Jesuku walytja kutjupa tjutaku kulu. Panya tjaultjingku pilpirta anga-tjutulpai warmalangku wakantjaku-tawara, palu purunypa nganana mulamularingkula mukulya pulka nyinanyangka kutjupangku nganananya putu kuralku. Kala uti mulamulangku kulira ala-alangku patanma panya ngula tjinu malatjangka Jesulu malaku pitjala nganananya wankarunkuku palula tjunguringkula wanka titutjara nyinanytjaku. Panya tjaultjingku mukata wituwitu kanyilpai kata wakantjaku-tawara, palu purunypa nganana wankarunkunyitja kulira ala-alangku patannyangka kutjupangku nganananya putu kuralku.

⁹ Panya nganananya Godalu ngurkantankunyitja wiyatu kuranmara warungka waninytjikitjangku. Palurulanya ngurkantanu Mayatja Jesulu nganananya wankarunkunyitjaku. Palulangurula uti rawa mulamularingkula mukulya nyinama Jesunya pitjanytjaku patara.

¹⁰ Paluru panya nganampa anga-ilungu nganana palula tjunguringkula titutjara tjungu nyinanytjaku. Munu paluru ngula malaku pitjala nganananya uwankara palula jungulku nganmanypa ilunyitja tjuta munu wanka nyinanytja tjuta kulu.

¹¹ Ka nyura uti palulanguru tjukurpa nyanganpa kulira ngapartj-ingapartjingku nyuranku wangkara rapanma Jesunya titutjarangku tungun-tunguntu wanantjikitjangku. Panya kuwari nyuranku wangkara kunpuni, palu purunyitjuyanku rawangku wangkara kunpunma wantinytja wiyangku.

Wiruraya Nyinama Godalu Nyakula Pukularinytjaku

¹² Palu walytja tjuta, wanyuya kulila. Panya anangu mankurtu nyuranya Jesuku walytja tjuta atunymara kanyini Godalawanu tjukaruru nyinanytjaku. Ka nyura uti atunymankupai palula tjanala wanganarangku kulinma. Panya paluru tjana nyurala pulkara warkarinyi munu panyaya nyuranya kuraringkunytjaku-tawara wangkara tjukarurulpai nyura Mayatja Jesunya tjukarurungku wanantjaku.

¹³ Ka nyura uti palula tjanala wirura kulinma munuya tjanampa pulkara mukuringama, panya tjana warka wiru mulapa nyurampa palyani. Palulanguru nyura uti tjanala wanganarangu kulinma. Munuyanku pikaringkuwiya kalypa pilunpa nyinama.

¹⁴ Walytja tjuṭa, pirukula nyurala wangkanyi. Uti nyura Jesuku walytja kutjupa warka wiya nyinanyangka nyakula palunya warkarinytjaku wangkara wituwitonma. Munuya kutjupangu nguluringkula puṭu nguwanpa kulinnyangka nyakula palunya wangkara rapanma munu palunya alpamilanma wantinytja wiyangu. Uwa, uti nyura anangu uwankarangka purkarangu mukulyangu wangkama mirpanarira miranytja wiyangu.

¹⁵ Ka tjinguru kutjupangu nyuranya kurannyangka nyura uti palunya ngapartji kurantjikitjangu kulintja wiyangu wantima. Munu nyura Jesuku walytja tjuṭangu uti ngapartji-ngapartjingu mukulyangu pukultjungku alpamilanma munuya anangu kutjupa tjuṭa kulu mukulyangu kanyinma.

¹⁶ Palu pukulpa titutjaraya nyinama.

¹⁷ Munuya Godala rawangu tjapinma.

¹⁸ Munuya Godaku pukularira palunya titutjarangu mirawanima kutjupa kutjupa wiru tjuṭa utiringkunyangka nyakula, munuya tjituru-tjituru tjuṭa kulu utiringkunyangka nyakula palu purunytjutu mirawanima wantinytja wiyangu. Uwa, alatji Godanya mukuringanyi nyura wirura titutjara pukulpa nyinanytjaku Jesula Christala tjungu.

¹⁹ Munu Kurunpa Milmilṭu nyurala nintinnyangka nyura uti wanganarangu kulinma wantinytja wiyangu.

²⁰ Ka tjinguru Jesuku walytja kutjupangu wangkaku, “Kurunpa Milmilṭuni kuwari tjukurpa nintinu. Kaṇa wanyu nyurala tjakultjunkuku?” Kaya alatji wangkanyangka purkarangu kulinma palunya mapalkungku anantja wiyangu.

²¹ Munuya paluru tjakultjunkunyangka kulira ngurkantanama alatji kulira, “Mulapa tjukurpa nyangatja Godalanguru, munta tjinguru wiya?” Munuya tjukurpa Godalanguru wangkanyangka kutju kulinma. Palu wiyangkampa kulintja wiyangu wantima.

²² Munuya kura uwankarangka tjunguringkuwiyangu wantima.

Tjukurpa Malatja

²³ Palu panya Godalu kutjungku nganananya kurunpa pukulpa rapa nyinanytjaku palyalpai. Kaṇa palula nyurampa tjapini nyuranya tjukaruruntjaku nyura palula mirangka kura wantinytjatjanu palyanyku nyinanytjaku. Munuṇa piruku tjapini paluru nyuranya anga-kanyintjaku kurangka-tawara, nyura kurunpa winki palya mulapa tjukaruru titutjara nyinanytjaku, ka tjiṇtu malatjangka kutjupangu nyuranya puṭu kuranmankuku Mayatja Jesunya malaku pitjanyangka.

²⁴ Panya Godalu nyuranya ngurkantankunytjatjanungku mulapa alatjiṇu nintilku palunya kutju tjukarurungku wanara palyanyku nyinanytjaku, panya paluru nyuranya atunymankunytjikitjangu kalkunu munu paluru kalkuntjatjanungku palyalku alatjiṇu.

²⁵ Uwa walytja wiru tjuṭa, nganampa kuluya rawangu Godala tjapinma.

²⁶ Munuya pala Jesuku walytja kutjupa tjuṯa pukularira mara witiṯa wangkama alatji, “Paulalu tjana nyuranya rawangku kulini.”

²⁷ Uwa, lita nyanga palunyaya mantjira pala Jesuku walytja uwankarangka nyakula tjakultjunama, panya Mayatja Jesunya tjukurpa nyanga palunya aṅangu palumpa walytja uwankarangka kulintjaku mukuringanyi.

²⁸ Uwa, alatjituna walkatjunanyi. Ka Mayatja Jesulu Christalu nyuranya pukultjungku wirura kanyinma.

Lita Nampa 2 Paulalu Walkatjura Iyantja Ngura Tjitja-lanikalakutu 2 Thessalonians Nyangatja Nganmanytju Nyakula Wangkanytjaku

Nyangatja lita kutjupa Godaku tjukurpa Paulalu walkatjunkunytja Jesuku walytja tjuṭaku ngura panya Tjitja-lanikala nyinanytja tjuṭaku. Paluru nganmanytju lita tjanampa walkatjura iyaṇu, ka nyangatja lita nampa 2 paluru tjanampa walkatjura iyantja.

Ka ngura nyara palula Jesuku walytja tjuṭa Godalawanu tjukururu nyinangi. Palu anangu kutjupa tjuṭangku kunyu tjananya Jesunya wanannyangka ananangi munu kuraningi. Palu Jesuku walytja tjuṭangku kunyu tjananya kulira wantingi munuya Godanya tungun-tunguntu wananingi munuya titutjara mukulya pulka nyinangi.

Palu paluru tjana Jesunya malaku pitjanytja puṭu nguwanpa kulinigi, panya anangu kutjupa tjuṭangku tjanala ngunti wangkangi Jesunya nganmanypa pitjanytja. Kaya palulanguru tjituru-tjitururingi, ka Paulalu nyanga palunya kulira lita nyangatja tjanampa walkatjunu tjananya tjukururuntjikitjangku. Munu paluru tjananya painu tjukurpa kutjupa tjuṭa kulilwiyangku wantinytjaku, panya Jesunya kuwaripaṭu nyinanyi malaku pitjanytja wiyatu. Munu paluru tjanala tjakultjunangi nyaaringkuku ngula Jesunya malaku pitjanytja kuwaripangka. Paluru wangkangu alatji, "Jesunya pitjanytja kuwaripangka anangu tjuṭa mulapa Godala tungunpungkuku munuya palunya wantiku. Ka nyara palula malangka Wati Kuralpainya pakalku munu anangu winki ngunti kurara tjananya wituwitulku palunya kutju walkuntjaku Godanya wantira. Ka palulanguru kutju Jesunya malaku pitjaku munu paluru Wati panya Kuralpainya wiyalku alatjitu." Alatji Paulalu tjananya wangkara tjukururuningi.

Munu lita nyanga palula Paulalu tjukurpa kutjupa tjanala wangkangi panya rawa manikitja warakarinytjaku maiku. Panya kutjupa tjarangku wara wantira nyinangi Jesunya malaku pitjanytjaku paṭara. Ka Paulalu tjananya painu munu tjananya wituwituṇu rawa warakarinytjaku.

Tjukurpa nyanganpa ngarinyi:

1:1-2 Paulalu nganmanytju wangkanytja

1:3-12 Paulanya tjanampa pukularinytja munu tjanampa Godala tjaṭintja

2:1-17 Paulalu Tjintu Malatja tjakultjunkunytja panya Jesunya pitjanytja kuwaripangka

3:1-5 Paulanya mukuringkunytja tjana palumpa Godala tjaṭintjaku

3:6-18 Paulalu tjananya maiku warakarinytjaku wituwituntja munu tjukurpa malatja wangkanytja

Paulalu Nganmanytju Wangkanytja

¹ Uwa, Jesuku walytja tjuṭa, ngayuluṇa Paulalu lita nyangatja nyurampa walkatjunanyi ngura pala Tjitja-lanikala nyinanytja tjuṭaku.

Panya nyura Mama Godaku walytja mulapa nyinanyi Mayatja Jesuku Christaku kulu. Kala Tjaalatjalu Timitjilu nganana mankurtu lita nyangatja nyuralakutu ma-iyani nyurampa pukularira.

² Ka Mama Godalu Mayatja Jesulu Christalu kulu nyuranya pukultju pulkangku kanyinma munu nyuranya kurunpa rapara pukulmanama.

Jesunya Malaku Pitjanytja

³ Uwa walytja tjuta, nyura kunyu Mayatja Jesuku pulkara mulamularingkula palunya titutjarangku wanalpai wantinytja wiyangku, munu kunyu nyuranku rawangku mukulyangku ngapartji-ngapartjinku alpamilalpai. Kala tjukurpa nyuranyatjara kulira pulkara pukularinyi munula rawangku Godanya walkuni nyura palunya wirura wanannyangka. Nyangatjala Godanya tjukarurungku walkuni nyuralanguru panya paluru nyuranya nintini palunya wirura wanantjaku ka nyurampa mukulya palulanguru pulkaringanyi.

⁴ Ka nyura palunya rawangku tungun-tunguntu wanannyangka nganana ngura kutjupa tjutangka para-ngarala nyuranyatjara tjakultjinkupai Jesuku walytja kutjupa tjutangka. Panya anangu kura tjutangka nyuranya Jesunya wanannyangka ananingi munu nyurampa pikaringkula nyuranya pungangi. Ka panya nyura tjananya kulira wantingi alatjitu munu panya nyura rapangku titutjarangku Jesunya wananingi wantinytja wiyangku. Kala alatji tjanala tjakultjinkupai nyuranyatjara Jesuku walytja kutjupa tjutangka.

⁵ Uwa, panya anangu kutjupa tjutangka nyurampa tjituru-tjituru palyantjikitja mukuringkupai, ka panya nyura tjananya kulira wantira Jesunya tungun-tunguntu alatjitu wanani. Palu ngula Godalu anangu uwankara palula kuranyu ngaratjinkula kutju kutju ngurkantara tjaralku, kaya nyara palula arangka uwankarangku nyakula kulilku alatji, "Munta mulapa Godalu alatjitu tjukarurungku ngurkantankupai." Ka nyuranya Godalu wangkaku alatji, "Nyuranya panyaya anara pikangku pungangi nyura ngayunya wanannyangka. Nyara palulanguruya nyuranya kuraningi ngayuku walytja nyinanyangka. Ka nyura ngayunya tungun-tunguntu titutjarangku wanannyangka ngayulu nyurampa pulkara pukularinyi mununa nyuranya walytjan-mara titutjarangku kanyilku ngayuku alatjitu nyinanytjaku." Alatji Godalu nyurampa pukularira nyurala wangkaku.

⁶ Panya Godalu tjukarurungku alatjitu ngurkantankupai. Munu paluru nyuranya anara kurara pungkuyangka nyakula anangu panya nyuranya kuralpai tjuta palu purunypatu palunya tjananya nyakula ngapartji pailku.

⁷ Munu paluru nyuranya pukulmara wirura kanyilku nganananya kulu nyurala tjungura, ka nyuntunya nganananya putu piruku pikatjaralku.

Panya Godalu nganananya alatjinkuku ngula tjintu malatjangka Mayatja Jesunya ilkaringuru pitjanyangka. Panya nyara palula ara paluru witulya pulka mulapa pitjaku angelpa mungilyitjara waru winkitjara pulkara nguluringkunytjaku.

⁸ Munu paluru pitjala tjananya ngapartji pungkuku anangu panya Godanya wantipai tjuta, panya tjana Tjukurpa Palya Jesunyatjara kulira wantira kura tjuta titutjarangku palyaningi.

⁹ Ka palulanguru Godalu tjananya paira iyalku titutjara paṭu nyinanytjaku Godala tjungu wiya. Kaya paluru tjana Godala pitalytji pulkangka nyinanytja wiya mungawalurungka nyinara puṭu palyakitja ngaraku, munuya palunya witulya pulka mulapa nyinanyangka nyakunyitja wiya alatjitu nyinaku.

¹⁰ Uwa, Jesunya pitjanyangka mulapa nyanga alatjiriku. Kala tjiṅtu nyara palula aṅangu panya palumpa walytja tjutangku palunya nyakula kurunpa winki pukularira wangkaku, “Ai, nganampa wiru mulapa wirkanu.” Munula palumpa pulkara pukularira palunya walkura mirawaniku. Ka nyura kulu nganana tjungurungkula palunya nyakula mirawanikuṭu, panya nyura palumpa mulamularingu nganmanypa nganana nyurala tjukurpa palunyatjara tjakultjungkunyangka.

¹¹ Uwa, munula nyanga palunya kulira nganana Godala nyurampa rawangku tjapilpai nyura tjukururungku palunya rawangku wanantjaku. Panya Godalu nyuranya ngurkantanu tjukururu palumpa walytja mulapa nyinanytjaku. Ka nyura panya Jesuku mulamularingkula rawa mukuringanyi kutjupa kutjupa wiru tjuṭa Godaku palyantjikitja, kala palulanguru Godala rawangku tjapilpai nyurampa paluru nyuranya witulyangku nintintjaku nyura wiru tjuṭa uwankaratu tjungungku tjukururungku palyantjaku.

¹² Nyanga palumpala tjapilpai aṅangu tjutangku nyuranya wirura palyannyangka nyakula Mayatja Jesunya Christanya pulkara walkura palunya mirawaninytjaku, ka nyara palulanguru paluru nyuranya nyakula palyanmankuku. Palu nyanga alatjiriku Godalu muna Mayatja Jesulu Christalu nyuranya pukultju pulkangku witulyankunyangka kutju.

2

Wati Kura Utiringkunyitja Jesunya Pitjanytja Kuwaripangka

¹ Uwa walytja tjuṭa, panya Mayatja Jesunya ngula malaku pitjanya nganannya uwankara palula tjunguntjikitja. Kala tjukurpa nyanga palunya nyurala tjukutjuku wangkanytjikitja mukuringanyi nyura tjukururu mulatu kulintjaku.

² Panya kutjupa tjutangku kunyu nyurala tjakultjunu alatji, “Jesunya alatjitu pitjangu.” Ka nyura kunyu kulira tjituru-tjitururingu. Palu wantima tjituru-tjitururinytja wiyangku panya paluru malaku pitjanytja wiya kuwaripa. Tjinguru paluru tjana ngunti kulinu nganana tjukurpa palatja litangka walkatjungkunytja-palku, palu nganana Jesunya nganmanypa pitjanytja walkatjungkunytja wiya. Munta tjinguru kutjupangku tjanala ngunti wangkangu alatji, “Tjukurpa palatja Kurunpa Milmitu Paulala tjanala tjakultjunu.” Palu wiya Kurunpa Milmitu nganana tjakultjungkunytja wiya Jesunya nganmanypa malaku pitjanytja. Munta tjinguru kutjupangku tjanala tjakultjunu nganana tjukurpa nyanga palunya wangkanytja-palku. Palu wiya, nganana wangkanytja wiyatu. Ka nyura uti tjanala kulintja wiyangku wantima tjituru-tjitururinytjaku-tawara.

³⁻⁴ Panya tjana nyuranya arakara ngunti kurani nyura tjanampa mulamularingkunytjaku, kaya tjananya kulira wantima.

Panya Mayatja Jesunya pitjanytja kuwaripangka anangu winkingku Godala kulira wantiku munu palula tungunpungkula palumpa mulamularingkunyitja wiyaringkuku. Ka nyara palula malangka wati kuralpai tjutaku mayatja pulka mulapa utiringkuku Godanya panya wantipainya. Wati nyara paluru panya Godala pulkara tungunpungkuku, munu paluru anangu tjutangku god kutjupa kutjupa tjuta walkunyangka munu tjukuritja kutjupa kutjupa tjuta kulinnyangka kulu tjananya pailku palunya kutju walkuntja-tjiratjangku. Mununku paluru wangkaku, "Ngayulu kutju pulka mulapa uwankarangka waintarinytja, kaniya ngayunya kutju walkunma." Munu paluru Jerusalemala Godaku timpulangka unngu tjarpara nyinaku Godaku arangka mununku walytjangku Godanyanmankuku.

Uwa, wati nyara paluru Godala pulkara tungunpungkuku, palu panya tjintu malatjangka palumpa kura pulka mulapa ngaraku waru pulkangka palunya waninytjaku.

⁵ Tjukurpa nyanga palunya panya ngayulu nyurala mungatu tjungu nyinaralpi tjakultjunangi, ka nyura wanyu kulini panyatja?

⁶ Palu walytja tjuta, nyura ninti panya kutjupangku kuwari wati panya kuralpai tjutaku mayatja pulka angatjunanyi anangu tjutangka utiringkunyitjaku-tawara. Ka ngula Godalu kulira palyanmankunyangka kutju wati nyara paluru utiringkuku.

⁷ Palu kuwari nyanga mamu panya Satantu anangu tjuta kampakatu wituwituni Godala tungunpungkunyitjaku, kaya tjutangku palula kulira kura rawangku palyani. Palu panya kutjupangku kuwaripangku markura kanyini wati panya kuralpai tjutaku mayatja pulka. Munu ngula Godalu palyanmankunyangka kutju wati panya palunya markura kanyintjatjanungku wantir'iyalku,

⁸ ka paluru anangu tjutangka utiringkula nyinaku munu Godala rawa tungunpungkuku. Palu Mayatja Jesulu witulya pulkangku pitjala wati panya palula wirkara wangkaku, ka uparingkula wiyaringkuku alatjitu.

⁹ Uwa, mamu Satantu wati nyara kuralpai tjutaku mayatja pulka iyalku witulya pulka ungkula. Ka paluru pitjala kutjupa kutjupa pulka tjuta witulyangku palyalku Satantu nintinnyangka. Kaya anangu tjutangku paluru ayinayiningku palyannyangka nyakula palunya ngunti mirawaniku Godanya-palku kulira.

¹⁰ Panya paluru kura kutjupa kutjupa tjuta palyara tjananya ngunti kuralku, panya paluru tjana iwara kurangka ankula putu tjukaruru nyinanytjikitjangku kulilpai. Tjinguruya tjukurpa tjukaruru Jesunyatjara kulira mulamularingama, ka Godalu tjananya wankarunama.

Palu tjana tjukurpa palunya kulira alatjitu wantingi, ka palulanguru Godalu tjananya paira iyalku ngura kurakutu ankunyitjaku pika pulkatjara titutjara nyinanytjaku.

¹¹ Uwa, paluru tjana tjukurpa tjukaruru Jesunyatjara kulira wantinyangka Godalu tjananya wantir'iyalku munu tjananya kulintja kampa kutjupankuku tjukurpa nguntiku mulamularingkunyitjaku, ka palulanguru wati panya kuralpai tjutaku mayatja pulkangku ngunti wangkanyangka tjana tjukurpa mulapa-palku kulilku tjukarurungku-palku.

¹² Ka palulanguru tjukurpa tjukaruruku mulamularingkuwiyangku wantinytjitjanguru Godalu tjananya ngurkantara paira iyalku ngura kurakutu ankunytjaku, panya tjana kunta wiyangku titutjarangku kura kutju pukultu palyaningi.

Jesunya Titutjarangku Kulira Wanama

¹³ Palu walytja tjuta, Mayatja Jesunya nyurampa pulkara mukuringanyi. Panya nganmanytju mulapa Godalu uwankara paluntja kuwaripangka nyuranya ngurkantanu kuranguru wankarura kanyintjikitjangku. Munu paluru Kurunpa Milmiinga nyurala unngu tjarpatjunu nyuranya tjukaruruntjaku, nyura Godala rawangku wanganarangku kulintjaku. Panya nyura Jesuku tjukurku mulamularingkunyangka paluru nyuranya wankarunu, ka panya Kurunpa Milmitu nyuranya rawangku nintilkatinyi wirura palyanyku nyinanytjaku. Ka nyanga palulanguru ngula tjintu malatjangka Godalu nyuranya wankarunkuku. Ka nyara palulanguru nganana pulkara pukularinyi munula Godanya rawangku walkulpai paluru nyuranya wirura kanyinnyangka.

¹⁴ Panya paluru nyuranya wankaru kanyintjikitjangku altingu nyura Mayatja Jesula Christala tjunguringkula titutjara nyinanytjaku witulya pulkangka. Palulanguru Godalu nganananya iyanu nyurala Tjukurpa Palya tjakultjunktunytjaku Jesunyatjara. Ka panya palulanguru paluru nyuranya altingyangka nyura kulira palumpa walytjaringu.

¹⁵ Ka walytja tjuta, pala palulanguru nyura uti kunpu ngarala Jesunya titutjarangku wanama. Munuya tjukurpa panya nganana nyurala nganmanytju wangkanytja rawangku kulinma watarkurinytja wiyangku. Panya tjukurpa nyara palunya nganana Mayatja Jesula kulintjatjanungku nyurala tjakultjunu munula nyiringka kulu walkatjunu munula nyuralakutu iyanu.

¹⁶⁻¹⁷ Uwa mulapa Mayatja Jesunya munu Mama Godanya nganampa pulkara mukuringu munulanya pukultjungku nganananya rawangku rapalpai palula tjungu pukulpa nyinanytjaku. Panya Godalu mukulyangku nganananya kalkunu ilunyangka wankara pakaltjingtjikitjangku palula tjungu titutjara nyinanytjaku. Kala nyara palulanguru mulamulangku kulira kurunpa rapa pukulpa nyinanyi palumpa ala-alangku patara. Ka Mama Godalu Mayatja Jesulu Christalu kulu nyuranya kurunpa kunpunma nyura wiru tjuta rawangku mukulyangku palyantjaku munu tjukurpa wiru tjuta kulu wangkanytjaku.

3

Paulaku Tjanampa Godala Tjapintjaku

¹ Palu walytja tjuta, wanyuya wirungku nganampa Godala tjapinma. Munuya palula tjapinma anangu ngura winkitjangku Tjukurpa Palya Jesunyatjara kulintjaku ngura tjutangka. Munuya palula tjapinma tjananya unngu nintintjaku, kaya ngura winkingka tjukurpa palya kulintjatjanu mulamularingkuku, nyura purunypa, panya nyura kulira mapalku mulamularingu, palu purunypa.

² Munuya Godala rawangku tjapinma paluru nganananya wankaru kanyintjaku wati kura tjutangku mirpanarira pungkunytjaku-tawara,

panya anangu kutjupa tjuṭangku Godaku tjukurpa kulira wantipai mulamularingkuwiyangku.

³ Palu walytja tjuṭa, kulilaya. Mayatja Jesunya nyuntula ngananala titutjara nyinanyi wantikatinytja wiya, munu panya paluru nyuranya kalkuntjatjanungku mulapa kurunpa rapa nyinanytjaku palyalku munu nyuranya mamungka-tawara atunytju wankaru kanyilku.

⁴ Uwa, nganaṇa Mayatja Jesuku pulkara mulamularinganyi munula palulanguru kulini alatji, "Mulapa Tjitja-lanikala nyinanytja tjuṭangku kuwari wiru tjuṭa palyani nganaṇa panya tjanala nganmanytju wangkanytja tjuṭa." Munula piruku kulini alatji, "Mulapa tjana titutjarangku palyalku wantinytja wiyangku."

⁵ Kala Mayatja Jesula nyurampa tjaipilpai nyuranya Godaku mukulya nintintjaku, ka nyura nintiringkula kulilku panya Godanya nyurampa pulkara mukuringanyi. Munula piruku tjaipini paluru nyuranya kurunpa rapantjaku, nyura Jesulu purunytju Godanya tungun-tunguntu wanantjaku pakuringkunyitja wiyangku.

Jesuku Walytja Tjuṭa Uti Warakarima

⁶ Palu walytja tjuṭa kulilaya, Mayatja Jesulu Christalu panya nganananya wangkangu maikitja pulkara warkarinytjaku pakuringkunyitja wiya. Kaya kulila, panya nyurampa ngurangka kunyu Jesuku walytja kutjupa tjarangku waraka wantira nyinanyi. Ka tjana waraka wantinyangka nyura uti palula tjanala tjunguringkuwiyangku wantima, panya paluru tjana kulira wantinyi nganaṇa warakaku tjananya wituwitunnyangka.

⁷ Nyura panya ninti nganampa, panya nganaṇa nyurala nyinaralpi pakuwiya warkarangi nyurala mirangka nyura nganananya nyakula nyura kulu arkara waraka wirura palyantjaku.

⁸ Munu panya kutjupangku nganananya maingka paltjara kanyinyangkala nganaṇa palunya mani ngapartji ungangi. Munu panyala kalala mungangka kulu pulkara warkarangi mani palyara mai walytjangku mantjintjikitja nyurala ngatjintjaku-tawara. ⁹ Tjingurula tjukurpa wangkarampa nyurala maiku ngatjinma, panya Jesulu nganananya witura iyanu tjukurpa nyurala tjakultjunkunytjaku. Palu wiya, nganaṇa panya nyurala ngatjintja wiyangku wantira pulkara warakarira mani palyara mai walytjangku mantjiningi nyura kulu nyakula nintiringkula warakarira mani maiku palyantjaku.

¹⁰ Panya nganaṇa nganmanytju nyurala nyinaralpi nyuranya alatji wangkara painu, "Anangungku waraka wantira nyinanyangkaya mai ungunytja wiyangku wantima."

¹¹ Alatjila wangkanyi panya kutjupangku kuwari ngananala tjakultjunu panya nyuralanguru kunyu Jesuku walytja kutjupa tjarangku waraka wantira nyinanyi, munuya kunyu waraka wantira para-ngarala anangu warkaripai tjuṭangka unytju tjunguringkula kuralpai tjanampa waraka.

¹² Kala palunya tjananya pulkara wituwituni manikitja warkarinytjaku, mai walytjangku payamilara ngalkuntjaku. Nyangatjala Mayatja Jesulu wangkanytja wangkanyi nganaṇa kulira walytjangku wangkanytja wiya, kaya uti tjana wanganarangku kulinna munuya manikitja pulkara warakarima mai walytjangku mantjintjikitja.

¹³ Palu walytja wiru tjuta, rawangkuya wiru tjuta kutju palyanma pakuringkunyntja wiyangku.

¹⁴ Uwa, nyangatjala tjukurpa tjuta walkatjunu nyura tjukarurungku kulira palyantjaku. Ka nyura tjinguru Jesuku walytja kutjupa kulira wantinyangka nyakula uti palunya tjutangka mirangka painma munuya palula tjunguringkuwiyangku wantima. Ka anangu paluru kulira kuntaringkuku munu tjinguru kampa kutjuparira pal-yaringkuku.

¹⁵ Palu nyura uti palumpa mirpanarinyntja wiyangku purkarangku kalypangku wangkara palunya tjukarurunma, panya paluru Jesuku walytjatju nyinanyi munu nyurampa kulu.

Tjukurpa Malatja

¹⁶ Uwa Mayatja Jesulu kutjungku nganananya kurunpa rapa pukulpa nyinanytjaku palyalpai. Kala palula nyurampa tjapini nyuranya kulu tjintu kutjupa tjintu kutjupa kurunpa rapantjaku, ka kutjupa kutjupa tjuta nyurala utiringkunyangka nyura titutjara pukulpa rapa ngaraku. Kala tjapini Mayatja Jesula paluru nyurala tjungu titutjara nyinanytjaku.

¹⁷ Uwa, alatjituna wangkanyi nyurala lita nyangangka. Palu wati ngayuku malpangku ngayulu wangkanyangka kulintjatjanungku lita nyangatja walkatjunanyi nyurampa, palu kuwari nyangana ngayulu alatjitulta walkatjunanyi nyanga alatji, "*Ngayulu ini Paulanya mununa nyuranya rawangku kulilpai.*" Nyanga alatji panyana tjukurpa malatja walkatjunkupai lita uwankarangka anangu uwankarangku walka ngayuku ngurkantara kulintjaku, "*Mulapa nyangatja Paulaku lita.*"

¹⁸ Uwa, alatjituna walkatjunanyi. Ka Mayatja Jesulu Christalu nyuranya pukultjungku wirura kanyinma.

Lita Nampa 1 Paulalu Walkatjura Iyantja Wati Ini Timitjilakutu 1 Timothy Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjunkunyitja wati yangupa ini Timitjiku. Panya paluru Paulaku katja purunypa munu pula ngura tjutakutu ankula tjungungku alatjitu Godaku tjukurpa parapitalira wangkapai anangu tjutangka. Ka ngula Timitjinya kutju anu ngura ini nyanga tjanalakutu Pariyala, Tjitja-lanikala, Karintjala tjanalakutu munu ngura nyara palula tjanala paluru Jesuku walytja tjuta nyangangi.

Munu palula malangka paluru anu tawunu pulka ngura ini Ipitjalakutu nyara palula nyinara Jesuku walytja tjuta atunymankunyitjikitja. Ka lita nyangatja Paulalu palumpa walkatjura iyanu ngura nyara palula paluru Jesuku walytja tjuta atunymara kanyinnyangka. Munu paluru Timitjila tjakultjunangi tjukurpa kutjupa kutjupa tjuta paluru kulira Jesuku walytja tjuta tjukarurungku atunymankunyitjaku. Munu paluru wangkangu palula, "Anangu palya mulapa kutju ngurkantara tjura Jesuku walytja tjuta atunymankunyitjaku."

Ka ngura nyara Ipitjala wati kutjupa tjutanku tjukurpa ngunti tjuta tjakultjunangi anangu panya Jesuku walytja tjutangka. Ka palulanguru Paulalu Timitjila lita nyangangka wangkangu tjukurpa palunya tjananya wiyantjaku munu tjukurpa tjukaruru kutju wangkara nintintjaku Jesuku walytja tjutangka tjana kulintjatjanu tjukarurungkunyitjaku. Munu piruku Timitjinya wangkangu wirura tjukaruru palyanyku nyinanytjaku tjukurpa paluru wangkanyitjita kutju kulira.

Tjukurpa nyanganpa ngarinyi:

1:1-2 Paulalu nganmanytju wangkanytja

1:3—2:15 Paulalu wangkanytja Jesuku walytja tjuta yaaltji-yaaltji nyinanytjaku

3:1-16 Jesuku walytja tjuta atunymankunyitjakuya wati palya ngurkantanama

4:1—6:21 Paulalu Timitjila wangkanytja waraka kutjupa kutjupa tjuta palyantjaku Jesuku walytja tjutaku

Paulalu Nganmanytju Wangkanytja

1-2 Uwa, Timitji, ngayuluna Paulalu lita nyangatja nyuntumpa walkatjunanyi. Panya Mama Godalu pula Jesulu Christaluni witura iyanu Jesuku tjukurtjara warakarinytjaku. Panya Godalulanya wankarunkupai, kala Jesuku Christaku ala-alangku patani paluru malaku pitjananytjaku. Ka Timitji nyuntu panya ngayuku katja mulapa purunypa, panya Tjukurpa Palya Jesunyatjara kulira mulamularingkunyitjatjanu.

Ka Mama Godalu Mayatja Jesulu Christalu kulū nyuntunya pukultju pulkangku kanyinma munu nyuntunya kurunpa rapara pukulmanama ngaltunytju pulkangku.

Ngunti Wangkawiyangku Wantinytjaku.

³ Uwa Timitji, mungatu panya nyuntunya ngura pala Ipitjala markura wantikatingu ngayulu ngura Matja-tuniyalakutu ankunytjik-itjangku. Ka nyuntu rawatu nyinama panya ngura pala Ipitjala wati kutjupa tjarangku tjukurpa kurakura tjuta ngunti wangkapai. Ka nyuntu uti tjananya painma alatjitu ngunti wangkawiyangku wantinytjaku.

⁴ Panya tjanaya kunyu wangkara kulilpai miri ini tjuta munuya irititja tjutanguru wangkara wanalpai miri kuwaritja tjutakutu, munuyanku tjukurpa ngunti tjuta palunya tjananyatjara wangkara wanipai. Ka tjananya paila ngunti kulilwiyangku wantinytjaku panya kutjupa tjutangku tjanala kulira ngaparku wangkara mirpanaripai. Munu panyaya palulanguru, tjukurpa nyanga kurakura tjuta kulira Godalu anangu tjuta wankarunkunytjatjara puṭu kulilpai. Palu panya Jesuku Christaku mulamularingkula kutju tjana Godalu wankarunkunyangka kulilku.

⁵ Uwa, wangka tjananya Godala wanganarangku kulira mukulya ngaltunytju pulka nyinanytjaku. Panya tjana wiru kutju kulintjatjanu munu tjukaruru nyinanytjatjanu Godala mirangka kunṭa wiya nyinaku kurunpa rapa munuya palulanguru kutju mukulya mulapa nyinaku Jesuku pulkara mulamularingkula. Nyanga palulanguruna nyuntunya wangkanyi tjananya wangkara paintjaku, panya tjana kulira mukulya mulararinytjaku.

⁶ Palu kuwariya kutjupatjara palu purunypa nyinanytja wiya. Munuya palya wantira tjukurpa ngunti ngaparku wangkanytjatjanu kawankatingu.

⁷ Paluru tjana tjukurpa panya Godalu Mosenya untkunytja anangu tjuta nintintjikitja mukuringanyi. Palu tjanaya ninti mulatu-palku tjukurpa kutjupa kutjupa watarkungku wangkapai. Paluru tjana ngurpa alatjitu Godaku tjukurku.

⁸ Ka nganaṇa panya kulini tjukurpa nyanga Mosenya untkunytjanya palya ngaranyi anangu tjuta kulira tjukaruru nyinanytjaku.

⁹ Munula kulini tjukurpa nyanga paluru ngaranyi anangu kurakura tjutaku tjana nyakula nintiringkula kura wantira palyanyku nyinanytjaku. Tjukurpa paluru palyanyku nyinapai tjutaku wiya, palu panya kuralpai tjutaku kutju, panya Godala tungunpungkupai tjutaku, kura pampulpai tjutaku, Godaku kuraringkupai tjutaku, analpai tjutaku kulū, munu mama ngunytju miripungkupai tjutaku munu miriputju tjutaku kulū tjukurpa nyangatja ngaranyi.

¹⁰ Tjukurpa nyanga Godalu Mosenya untkunytja mulapa ngaranyi anangu kura tjutaku, panya kampangkatu ngaripai tjutaku, munu wati panya watingka kampangkatu ngaripai tjutaku, munu anangu ngulutjingara witera katipai tjutaku, munu ngunti wangkapai tjutaku, munu kutjupa kutjupa palyalpai tjutaku kulū. Panya paluru tjanaya Godaku tjukurpa mulapa wangkanyangka kulira wantipai.

11 Palu Mama Godalu panya nganmanytju Mosela tjukurpa pulka wangkangu mununi kuwari malangka tjukurpa nyanga wiru Jesuny-atjara wangkara wituṅu anangu tjuṅangka tjakultjunktjaku. Palu tjukurpa nyanga paluru pula panya Moseku munu Jesuku mauntalpa ngaranytja wiya tjungu alatjitu ngaranyi kutjutu. Mulapa Godanya wiru mulapa pitalytji pulkanya miral-miralpa alatjitu. Panya paluru tjukurpa wiru mulapa palyanu nganaṅa kulira pukularinytjaku.

Paulanya Godaku Pukularinytja

12 Kaṅa ngayulu mulapa nganampa Mayatja Jesunya Christanya mirawaninyi. Panya paluru-mantuni kurunpa rapara kanyini palumpa pulkara warakarinytjaku. Kaṅa palunya ngayulu pulkara mirawaninyi ngayunya ngurkantankunytjitjangka. Panya paluruṅi ngayunya nyakula kulinu, “Wati nyangangkutju ngayuku waraka wanganarangku kulira palyalku.”

13 Palu nganmanytjuna palunya kuranmanangi mununa ananangi, mununa palumpa walytja tjuṅa kulu kurara pungangi. Katju Godanya ngayuku nyakula ngalturingu, panya watarkungkuna kura palyanangi palumpa mulamularingkuwiyangku.

14 Ka panya Mayatja Jesulu ngaltunytju pulkangku ngayula wirkara nintinu palumpa pulkara mulamularingkunytjaku. Mununi nintinu mukulya pulka nyinanytjaku, panya paluru mukulya pukultju pulka nyinanyi, palu purunypa.

15 Ka kulila wangka nyangatja,

“Jesunya Christanya mantakutu pitjangu anangu tjuṅa kura palyantjijanguru wankarunkunytjikitja.”

Wangka nyanga paluru mulapa alatjitu, nganaṅa wanganarangku kulira mulamularingkunytjaku. Palu ngayulu panya kura pulka mulapa palyanangi uwankarangka waintara.

16 Kaṅi panyatja nyaaku Godalu nganmanytju ngaltunytjungku kanyiningi kura mulapa rawangku palyannyangka? Wiya, paluru panyani kura pulkatjara purkarangku kanyiningi anangu kutjupa tjuṅangku ngayunya nyakula mulapa kulintjaku, munu tjana ngapartji Jesuku mulamularingkunytjaku. Panya tjana tjinguru ngayunya nyakula kulilpai, “Munta, nyangatja panya nganmanypa kura mulapa nyinangi. Ka Jesulu Christalu palunya purkarangku nyakukatingi munu panya palunya mulapaṅu kampa kutjupaṅu wankarunu kura pulka palyantjijanguru.” Alatjiya tjinguru tjana nyakula kulilku munuya palulanguru tjana ngapartji kulira Jesuku mulamularingkula palumpa walytjaringkuku munuya wankaru rawa mulapa nyinaku.

17 Wanyula palunya mirawanima panya iritinguru alatjitu Mayatja pulka nyinanytjanya. Paluru panya Mayatja nyinara wiyaringkunytja wiya titutjara alatjitu wanka nyinaku. Ka panyala nyuntu nganaṅa palunya putu nyanganyi arkayi nyinanyangka. Palu paluru kutju Mayatja pulka, kutjupa palu purunypa nyinanytja wiya alatjitu. Kala wanyu palunya kutju-kutjura rawangku walkunma pitalytji pulkanya. Uwa mulapa!

18 Palu Timitji, nyuntu ngayuku katja purunypa nyinanyi. Kaṅa tjukurpa nyangatja nyuntula wangkanyi nyuntu wanganarangku kulintjaku. Panya tjukurpa nyanga palunya Godaku wangkatjara tjuṅangku nyuntula nganmanytju wangkangu. Kaṅa nyuntunya

wituwituni tjukurpa panya paluru tjana wangkanytjita watarkuri-wiyangu kulintjaku. Panya nyuntu tjukurpa nyanga palunya wanganarangku kulira palyarampa Godaku wara wirura rapangku palyalku, munun anangu panya ngunti wangkapai tjutaku nguluringkuwiyangu tungun-tunguntu paillu.

¹⁹ Uwa, rawa Jesuku Christaku kulira mulamularingama paluru nyuntumpa anga-ilunyitjaku, munu palulanguru rawa kunta wiya nyinama wirura palyanyku nyinara. Panya kutjupa tjutangkuya kura palyantjatjanungku kuntaku ngurparingu munuya kuntatjaramunungku kura palyalkatinyi rawangku. Palulanguruya Godaku tjukurku watarkurira kutjupa kutjupa tjuta kutju kulini, Jesuku Christaku tjukururu mulamularingkuwiyangu.

²⁰ Panya wati Aimanatjinya pula Alikatjantanya palu purunyanguru. Kana pulanya wantira Satanta kurakutu ma-walatjunu panya pula pina alaringkula Godanya kuranmankunytja wiyaringkunytjaku.

2

Inmangka Nyinara Tjukururungku Palyantjaku

¹ Kulila! Nganmanytjuna nyangatja wangkanyi. Utila Godala pulkara tjapinma anangu uwankaraku, tjanampa pulkara pukularira.

² Munula uti nguraku mayatja pulka tjutaku, munu mayatja kutjupa tjutaku kulu tjapinmatu. Kalanya tjana tjinguru wirungku kanyinma nguluringkunytja wiya rapa pukulpa nyinanytjaku, nganana Godala mirangka tjukururu nyinanytjaku.

³ Panya nganana alatji rawangku palula tjapinnyangka Godanyalampa kulira pukularinyi, wankarunkupainya panya.

⁴ Panya paluru pulkara mukuringanyi anangu uwankara wankarunkunytjikitja nganana tjukurpa mularku nintiringkunytjaku.

⁵ Panya mulapa Godanya kutju nyinanyi. Kutjupa palu purunypa nyinanytja wiya alatjitu. Ka anangu uwankara kura nyinara palula ilaringkunytja wiyatu. Palu panya wati kutjungku ngananytja Godala tjungulpai palula kalypa nyinanytjaku, wati panya Jesulu Christalu.

⁶ Panya anangu uwankarangku kura tjuta palyantjtjanguru paluru ngalkilarira anga-ilungu nganana karalyarira wankaringkunytjaku. Panya nyara palula arangka Godalunku nganmanytju kulintjatjanungku witunu palumpa katja kutjukurutja, ka mulapa paluru pitjala nganampa ngalkilpa anga-ilungu anangu uwankara wankarunkunytjikitja.

⁷ Palu nyara palulanguruni Godalu witura iyanu ma-pitjala anangu uwankarangka wangkara tjakultjunkunytjaku. Palu ngayulu ngunti wangkanytja wiya, mulapana wangkanyi, panya mulapa Godaluni wangkangu tjukurpa mulapa nyangatja tjanala nintintjaku tjana kulira Jesuku Christaku mulamularingkunytjaku.

⁸ Uwa, kana mukuringanyi anangu tjuta nyanga purunypa in-maku tjunguringkula palyantjaku utiya wati wirungku mara katur-ingkula Godala tjapinma. Munuya uti tjananku pikangku ngaparku wangkanytja wiyangu piluntu Godala tjapinma mirpanarinytja wiyangu.

9-10 Kaya minyma tjuṭa uti kaṇany-kaṇanypa nyinanytja wiya. Panya kutjupa tjarangkuya mani pulkangka ulytja wiru tjuṭa payamilara tjarpapai anangu tjuṭangku nyakula wirunmankunytjaku. Munuyanku mangka kutjupankupai, munuyanku apu gold munu upula purunypa wiru tjuṭa mantjira liringka marangka kuḷu tanpalpai tjuṭangku nyakunytjaku. Palu utiya minyma Godaku walytja tjuṭangku palu purunytju kulintja wiyangku wantira palyanyku nyinara warakarima munuya anangu tjuṭa wirura alpamilanma. Panya palu purunypa palyannyangka Godalu nyakula pukularipai munu kulilpai tjana palyanyku warakarinytja wiru mulapa.

11 Palu uti minyma inmangka nyinarampa pilunpa nintiringama palurunku mirawaninytja wiya.

12 Panya ngayulu minyma pailpai paluru wati tjuṭangka Godaku tjukurpa nintinnyangka nyakula. Utiya minyma tjuṭangku wati tjuṭaku mayatjarinytja wiyangku wantira pilunpa nyinama.

13-14 Panya Godalu wati Adamanya nganmanytju palyanu munu malangkalta minyma palyanu, Eve-anya panya. Ka panya minyma palunya lirungku ngunti kuranu, ka panya kulira mulamularingu titura munu Godala tungunpungu. Ka wati panya Adamanya lirungka mulamularingkunytja wiya. Pala palulanguruna minyma tjuṭa pailpai wati tjuṭangka nintintjaku wiya, tjana wati tjuṭaku mayatjarinytjaku-tawara.

15 Palu Godalu minyma wankarunkuku paluru iti kanyinnyangka, munu paluru Jesuku Christaku titutjara mulamularingkunyangka, munu anangu tjuṭaku mukulyangku palyannyangka, munu tjukaruru nyinanyangka pilunytju wirura nyinanyangka kuḷu palunya wankarunkuku.

3

Jesuku Walytja Tjuṭa Atunymara Kanyintjaku

1 Palu nyangatja waraka wiru mulapa panya Jesuku walytja tjuṭa atunymara kanyintja. Ka watingkumpa waraka nyanga palunya palyantjikitjangu kulira waraka wiru mularku mukuringanyi. Uwa, tjukurpa nyangatja mulapa.

2 Palu utiya Jesuku walytja tjuṭa atunymankunytjaku ngurkantara tjunama wati palya mulapa kura palyalpai wiya. Uti paluru kuri kutjutjara nyinama. Munu uti paluru mirpanarirampa purkarangku kutju wangkama waruringkunytja wiyangku, munu pina wirungku kulira palyanma, munu palyanyku nyinama. Munu uti paluru malikitja pitjanyangka nyakula pukularira altira palumpa ngurangka tjunama. Munu uti paluru Godaku tjukurpa tjukarurungku nintilpai nyinama. ³ Uti paluru tarangkaripai wiya, pika pungkupai wiya kalypa nyinama pilunpa, mirpan-mirpanpa wangkanytja wiya. Paluru uti maniku pulkara mukuringkuwiyangku wantima.

4 Mununku uti kuri, tjitji kuḷu atunymara wirura kanyinma, munu tjitji palumpa tungunpungkunytjaku-tawara wiruratu kanyinma, tjitji paluru tjana wanganarangku mama walkuntjaku.

5 Panya wati paluru kuri, tjitji kuḷu putu palyanyku kanyirampa palu purunypatu putu Jesuku walytja tjuṭa palyanyku kanyilku.

⁶ Palu utiya wati panya nganmanypa Godaku walytjaringkunyta tjuṭa kutju tjunama Godaku walytja tjuṭa atunymara kanyintjaku. Munu wati kuwari kutju Godaku walytjaringkunyta tjunkuwiyangku wantima, panya paluru anangu tjuṭa kuwari kutju kanyira tjinguru kanany-kananyarira walytjangu mirawaniku palurunku. Ka Godalu palunya nyakula kuranmankuku munu wantiku alatjitu palunya. Panya nyanga palu purunypa iriti Godalu mamu Satannga ilkarunguru waningu palurunku ngarala kanany-kananytju mirawaninyangka.

⁷ Ka panya anangu watarkitja tjuṭangu tjinguru wati Jesuku walytja kutjupa nyakula ngurkantanama wiru nyinanytja. Kaya Jesuku walytja tjuṭangu uti wati pala palu purunypa ngurkantara tjunama tjananya wirura atunymara kanyintjaku. Panya wati wiru nyanga purunypa tjunkunyangkaya watarkitja tjuṭangu nyakula palunya putu kura ngurkantara wantiku wati palya mulapa nyakula. Kayanku Jesuku walytja tjuṭa palumpa kunṭa wiya pukulpa alatjitu nyinama. Ka mamungku panya palunya putu mukumukura putu tariltjingara wantiku. Pala palula-tawaraya Jesuku walytja tjuṭangu uti wati palya mulapa ngurkantara tjunama tjananya atunymankunytjaku.

Jesuku Walytja Tjuṭa Alpamilantjaku

⁸ Palu kulila! Utiya palu purunypatu wati palya mulapa ngurkantara tjunama Jesuku walytja tjuṭa alpamilantjaku. Wati panya nguntiwangka tjunkuwiyangku wantira Godaku mukulyatjara kutju tjunama. Palu uti wati paluru waina pulkara tjikilwiyangku wantima munu maniku manyuringkunyta wiya nyinama.

⁹ Munu uti paluru unngu tjukarurungku kulinma yaaltji palya, yaaltji kura, munu Tjukurpa Palya Godalu nganana utintjitja kanyinma alatjitu kulira wantinytja wiyangku. ¹⁰ Palu utiya wati alpamilalpai tjunkunytjikitjangu arkanma-warara munu palya mulapa kutju nyinanyangka nyakula ngurkantara tjunama tjukarurungku, nguntigungti warpungkula tjunkunytja wiyangku.

¹¹ Ka wati alpamilalpaiku kuri kulu uti palyanyku nyinama kutjupa kutjupa tjuṭa kulintja wiya, munu anangu kutjupa tjuṭangka tjukurpa kura para-tjakultjunkuwiyangku wantima. Uti paluru wirura nyinama munu tjukarurungku kutju wangkama anangu tjuṭangu palunya nyakula ngukara kuranmankunytjaku-tawara.

¹² Ka wati alpamilalpai uti kuri kutjutjara nyinama mununku kuri, tjitji kulu tjukarurungku atunymara kanyinma.

¹³ Ka wati panya alpamilalpainya wirura palyanyku warkarinnyangka nyakulaya Jesuku walytja tjuṭangu palunya mirawaniku. Ka palulanguru alpamilalpai panya paluru Jesuku Christaku mulamularingkunytjatjanungku tjukurpa Jesunyatjara anangu tjuṭangka kunṭa wiyangku rapangku tjakultjungkuku.

Tjukurpa Kumpilitja Utiringkunyta

¹⁴⁻¹⁵ Uwa, ngayulu mukuringanyi kuwari ma-pitjala nyuntunya nyakunytjikitja. Palu rawaringkunytjaku-tawarana lita nyangatja walkatjunanyi nyuntumpa. Kan lita nyangatja mantjira nyakula kulilku panya nganana Godaku walytja tjuṭa uti yaaltji-yaaltji

palyanyku nyinama. Panya nganana God panya wankaku walytjaringkula uwankara kutjuringu, munu panyala tjukurpa Jesunyatjara tjukarurungku kanyini kulira tjukarurungku wangkanytjikitjangku.

¹⁶ Nganampa tjukurpa kumpilitja, palu wiru mulapa panya kutjupangu nguntinmankunytjaku wiya. Nyangatja panya tjukurpa kumpilitja paluru,

Panya Godanya anangurira tjanala nyinangi anangu tjutangka.

Ka Kurunpa Milmiltu utinu tjananya, "Nyangatja mulapa."

Ka angelpa tjutangu nyangu palunya mantangka nyinanyangka.

Kaya anangu tjutangu tjukurpa palunyatjara para-wangkangi ngura kutjupangka kutjupangka manta winkingka.

Kaya manta lipiwanungku kulira palumpa mulamularingu.

Ka palumpa mamangu palunya mantjira katingu ngura ilkaritjakutu.

4

Ngunti Wangkapai Tjuta

¹ Palu kulila! Kurunpa Milmiltu utingku wangkangu panya ngula kunyu anangu kutjupatjara Jesuku Christaku mulamularingkunytja wiyaringkuku nganmanytju panya kulintjatjanu. Munuya kunyu mamu ngunti wangkapai tjutangka kulilku wanganarangku palumpa tjanampa tjukurpa tjutaku kutju mulamularingkula.

² Palu tjukurpa pala mamu tjutaku wati ngunti-wangka tjutangu para-tjakultjunkupai anangu tjutangka. Nyanga paluru tjana panya mamutjarangu alatjitu rapangu wangkapai kunta wiyanguku.

³ Panya tjanaya kunyu wangkapai watingku kuri altinytja wiyanguku wantinytjaku, munuya piruku wangkapai mai kuka tjara kutjupa ngalkuwiyanguku wantinytjaku. Palu utila nyanga tjananya kulil-wiyanguku wantima, panya Godalu mai kuka palunya tjananya ngalkuntjaku mantangka tjunu. Munu panya paluru mukuringanyi Jesuku walytjapitingku mai kuka palunya tjananya ngalkuntjikitjangu palunya-warara walkuntjaku panya maiku kukaku pukularira. Godalu panya mai kuka ngalkuntjaku tjunu palumpa walytjapitiku, panya paluru tjana tjukurpa mularku walytjaringu.

⁴ Panyatja-mantul tjuta mulapa Godalu palura wantingu, ka uwankara wiru mulapa ngaranyi. Kala uti wantiwiyanguku pukultu mantjinma Godanya-warara walkura.

⁵ Mai kuka uwankara paluru palura palyanmanu nganana ngalkuntjaku. Munu paluru pukularipai nganana ngalkuntjikitjangku palunya-warara walkunnyangka munu nganampa nyakula mirpanarinytja wiya.

Tjukurpa Tjukarurungku Wangkanytjaku

⁶ Timitji, nyuntu tjukurpa nyanganpa Jesuku walytja tjutangka tjakultjura tjananya tjukarurunma. Ka palulanguru nyuntu nyanga alatjingannyangka Jesunya Christanya nyuntumpa pukara pukulariku mununta nyuntunya kulilku palumpa wiru mulapa palyantja. Panya nyuntu Godaku tjukurpa mulapa tjitjingkulpi kulilkatira maingka purunypa paltjaringkukatingi. Panya nyuntunya Tjukurpa Palya nintinnyangkan wanganarangku kuliningi.

⁷ Palu panya kutjupa tjutangkuya ngunti wangkapai tjukurpa kutjupa kutjupa tjuta kulira. Palu tjukurpa nyanga paluru tjana

Godaku wiya, ka nyuntu tjananya kulira wantima. Uti nyuntu Godala kutju wanganarangku kulinma munu arkara rawa palyanyku nyinama ma-palya mulararinytjikitja Godalu nyakula nyuntumpa pukularinytjaku.

⁸ Panya wati kunpuringkunyitjikitja arkara wirtjapakalpai. Arkantja nyanga paluru palya, palu uti nyuntu waintara munkaritja kulinma panya Godanya munu palumpa tjukurwanungku rawangku arkara kulilkatima palya mulararinytjikitjangku. Panya nyuntu alatji arkan-tjatjanu kurunpa palya mulararira wanka mulapa titutjara nyinaku kuwari nyanga mantangka nyinara munu ngula kulu Godaku ngurangka.

⁹⁻¹⁰ Nyanga palulanguru nganana Godaku tungun-tungunpa pulkara alatjitu warkarinyi. Panya palumpa nganana pukulpa mulapa mulamularingkupai God wankaku, panya paluru uwankara wankarunkupainya. Paluru panya mulapa anangu palumpa mulamularingkunyangka wankalpai. Nyangatja mulapa alatjitu, uwankarungku kulira pulkara mulamularingkunytjaku alatjitu.

¹¹ Uwa, tjukurpa nyanganpa tjanala wangkara nintinma tjana kulintjatjanu tjukururungkunyitjaku.

¹² Palu nyuntu panya wati yangpala nyinanyangkaya tjara kutjupangku tjinguru nyuntunya ngunti kulira tjukutjukunmanama. Ka nyuntu alatji wangkanyangka tjananya kulira wantima munu rawa tjukaruru alatjitu nyinama. Ka nyuntu alatji nyinanyangka Jesuku walytja tjutangu tjinguru nyakula nyuntunya purunyarira arkara palya alatjitu nyinaku. Panya nyuntu wirura palyanyku wangkanyangka, munu panya tjukaruru nyinanyangka, anangu tjutaku mukulyangku alpamilannyangka, munu panya Jesuku mulamularingkula rapa nyinanyangka, munu ngunti kuralwiya palya alatjitu nyinanyangka tjana nyakula kulilku munu palu purunypatu arkara nyinaku.

¹³ Ka nyuntu ngayulu malaku pitjanytjaku patara tjanala inmaku pitjala nyinanyangka Godaku tjukurpa nyakula wangkama munu tjananya titutjarangku utira wangkama tjana kulintjaku munu tjananya pulkara nintinma ninti mulararinytjaku. ¹⁴ Ara panyatja watarkuriwiyangku kulinma panya nganmanytjunta tjukurtjara tjutangu nyuntunya kata witiira wangkanytja. Ka panya wangkatjarangku tjukurpa nyuntula tjakultjunu Godalu nganmanytju palunya wangkanytjita. Ka panya palula arangka Kurunpa Milmitu nyuntunya unngu witulyanu nyuntu rapa mulararira palumpa tjukurpa nintintjaku. Ka nyuntunya alatji witulyankunyangka tungun-tunguntu nintinma wantinytja wiyangku witulya palunyatjarangku.

¹⁵ Uwa, Godaku tjukurpa tjanala wangkara pulkara nintinma. Munu uwankara ngayulu nyuntunya wangkara wantinytja wanganarangku kulira palyanma rawangku pakuringkunyitja wiyangku. Kantaya tjutangu nyakuku nyuntu alatji tjukururungku palyannyangka, munuya kulilku, "Mulapa nyangatja ma-nintipukaringkula wiru mulararinyi."

¹⁶ Palu nyuntunku kulira atunymanama tarilarantjaku-tawara, tjukaruru nyinanytjikitjangku. Munun anangu tjutangka tjukururungku nintintjikitjangku atatjura kulinma tarilarara ngunti wangkanytjaku-tawara. Ala Timitji, titutjara alatjitu tjukaruru

nyinama ngatalpa pakuringkunyta wiya munu palu purunytjutu titutjarangu tjanala tjukurpa nintinma tjukaruru mulatu. Panya nyanga purunymankunytjatjanungkun nyuntunku wankarunkuku nyuntu panya nintilpai tjuta kulu.

5

Jesuku Walytja Tjuta Tjukaruru Nyinanytjaku

¹ Ka wati tjilpingku tjinguru kura palyannyangka nyuntu uti palunya pulkara paintja wiyangu purkarangu kalypangu wangkama panya mamangka purunypa. Munu nyuntu uti wati yangupala tjutangka wangkama kutangka purunypa pauntjinalwiyangu.

² Munu panya minyma pampa tjutangka wangkama ngunytjunga purunypa, purkarangu. Munu kungkawara tjutangka wangkama kangkurungka purunypa atatjura. Munu palula tjanala tjukaruru kunta-kunta nyinama wirura.

Minyma Wanakala Tjuta Wirura Kanyintjaku

³ Palu Timitji, nyuntu munu Godaku walytja tjutangu uti minyma panya wanakala kutju mulapa nyinanyangka wirura kanyinma walytja panya wiyatjara.

⁴ Palu panya wankala katja untalpatjara munta pakali puliritjara nyinanyangka, uti paluru tjanaku kanyinma walytjangu. Panya minyma paluru tjananya tjitjilpi atunymara kanyiningi, kaya uti tjana ngapartji palu purunypatu atunymara kanyinma wanakalarinyangka. Ka panya alatjingannyangka Godalu nyakula pulkara pukularinyi. ⁵ Ka minyma wanakala walytja wiya kutju nyinaranku Godanya kulira pukularipai munu mungawinki mungangka kulu Godala tjapilpai palunya atunymara kanyintjaku.

⁶ Palu wanakala panya pirtjiwara nyinanytja ngaltutjara, kurunpa wiya purunypa nyinanyi watarku, wankakitja wiya.

⁷ Ka nyuntu uti tjanala wangka Godaku panya walytja tjutangka wanakala tjuta atunymara kanyintjaku. Ka tjana wanganarangku atunymara kanyinnyangkampa kutjupa tjutangu kuranmankunytjikitjangu kulintjatjanungku wantiku nyakula, "Munta, wirura nyan-ganti kanyini."

⁸ Palu Godaku walytjanguka tjinguru palumpa walytja tjuta atunymankunytja wiyangu wantirampa, nyara paluru Godanya kulu wantinyi palumpa mulamularingkunytja wiyangu. Munu paluru watarkitja tjutangka waintara kura mulapa nyinanyi Godaku walytja wiya purunypa.

⁹ Palu kulila! Panya nyura Jesuku walytja tjutangu minyma wanakala ini tjuta walkatjunkupai tjananya atunymara kanyin-tjikitjangu munu wanakala paluru tjana Jesuku warkarinytjaku. Palu utiya pampa tjuta kutju tjunama panya yiya 60 nyinanytjita tjuta kutju, munu yiya 60-ngka tjangati nyinanytja tjuta tjunkunytja wiyangu, nampa panya palula munkaritja nyinanytja tjuta kutju tjunama. Munu wanakala paluru tjana nganmanypa kuri walytjanguka kutju tjukaruru nyinanyangka ini walkatjunama.

¹⁰ Munu wiru palyannyangka kutju ini walkatjunama panya tjutangu nyakula mirawaninytjanya. Panya minyma nyanga

purunytju tjitjinku wirura unglyira kanyilpai, munu malikitja nyakula ngura palumpangka wirura tjarpatjura kanyilpai, munu Jesuku walytja tjutaku waraka kurakura mukulyanguku wirura palyalpai, munu ngaltutjara tjuta alpamilara atunymara kanyilpai, munu wiru tjuta kutju palyalpai. Uwa, minyma wanakala nyanga palu purunypa kutju ini tjunama, palyanyku nyinanytja panya.

¹¹ Palu uti nyura minyma wanakala tjukutjuku tjuta ini walkatjunkunytja wiyangu wantima. Panya paluru tjana tjinguru ngula kuriku mukuringkula palulanguru Jesuku waraka kulira palyantja wiyangu wantiku.

¹² Kaya kutjupa tjutangu nyakula ngukara wangkaku, "Wiya, nyura ngunti wangkapai!" Ka Jesunya kulu nyakula tjanampa pukularinytja wiya. Panya tjana nganmanytju ngunti kalkunu Jesuku warakarinytjikitjangu, munu wiyaringkula wantingu.

¹³ Panya wanakala paluru tjanaya waraka wiya para-ngarala akatjari kutju para-nyinapai munuyanku tjapira kulilpai tjukurpa palumpa tjananku kutju wangkarinytjikitjangu. Munuya pakara ma-pitjala kutjupa tjutangka ngapartji nyinara tjukurpa kurakura tjuta utira para-wangkapai. Utija tjukurpa kurakura tjuta para-wangkanytja wiyangu wantima.

¹⁴⁻¹⁵ Pala palula-tawara ngayulu kulini utija wanakala tjukutjuku nyinapai tjuta kuritjararingama munu tjititjararingkula ngura tjananku wirura kanyinma. Palu panya watarkitja tjutangu nganananya Jesuku walytja tjuta mala kuranmankunytjikitjangu arkara nyananyi mirpantu. Alatji kuliraya tjinguru nyanganyi, panya wanakala kutjupa tjutangu Jesunya wantira Satanta junguringu, kaya panya palulanguru tjinguru nganananya kuranmananyi mirpantu panya tjutangu. Palu panya wanakala tjutaya wirura nyinanyangkampa mirpantu panya tjutangu nganananya kuranmankunytjikitjangu kulira wantiku.

¹⁶ Palu wanyu piruku kulila wanakala panya tjuta kanyintjikitjangu. Panya minyma Godaku walytjangu uti palumpa walytja wanakala nyinanyangka palunya wirura atunymara kanyinma Jesuku walytja kutjupa tjutangu ma-kanyintjaku-tawara. Panya paluru tjana uti wanakala walytja wiya mauntalpa nyinanytja tjuta kutju kanyinma.

Tjukurtjara Tjuta

¹⁷ Ka panya ilita kutjupa tjutangu Jesuku walytja tjuta wirura atunytju kanyilpai, munuya kutjupa tjutangu Godaku tjukurpa tjanala tjakultjunkupai munuya tjanala nintilpai tjukarurungku kulin-tjaku. Kaya uti ilita palunya tjananya ngapartji pulkara mirawanima munu tjananya manangka payamilanma tjanala wirura palyanyku warkarinyangka.

¹⁸ Panya nyiringka iriti walkatjunkunytja ngaranya nyanga alatji, "Nyuntu tjinguru puluka ukiri uninytjarangka warkamilani kantura pirpuntankunytjaku uninytja tjuta kutju mantjintjikitjangu. Palu alatji warkamilara puluka palunya tjaa karpintja wiyangu wantima, ka warkarira mai tjukutjuku palya ngalkukatima." *
Munu panya wangka kutjupa palu purunypa ngaranyitu nyanga alatji,

* 5:18 Deuteronomy 25:4

“Mayatjangku uti anangu kutjupa palumpa warakarinyangka mani ungama war kanguru.”

Kaya uti Jesuku walytja tjutangku tjukurpa nyangatja kulinma, munuya tjukurtjara tjuta, ilta tjuta kulu palu purunypatu mani ungama tjanampa wirura warakarinyangka.

¹⁹ Ka tjinguru anangu kutjupangku nyuntula pitjala ngukara wangkaku, “Wati tjukurtjara nyaratja kura mulapa.” Nyanga alatji kutjungku ngukara wangkanyangka kulilwiyangku wantima. Palu tjinguru mankurtu pitjala tjukarurungku ngukara wangkanyangka kutju kulira mulamularingama.

²⁰ Munu panyan wati tjukurtjarangku, tjinguru iltangku, rawangku kura palyannyangka nyakula Jesuku walytja tjutangka mirangka palunya wangkara painma. Kaya tjukurtjara kutjupa tjutangku, ilta tjutangku kulu painnyangka nyakula kura palyantjaku nguluringkuku munuya palyanyku nyinanytjikitjangku kulilku.

²¹ Uwa, ngayulu nyanga nyuntunya uwankara wangkara wituwituni. Ka nyuntu wirungku kulinma uwankara palyantjikitjangku. Panya ngayulu nyangana nyuntunya wangkanyi Godala mirangka, munu Jesula angelpa tjutangka mirangka kulu. Ka nyuntu nyangatja kulira anangu Godaku walytja uwankara wangkara tjukarurunma mauntara tjarangka kutju wangkanytja wiyangku, uwankarangkatu wangkama.

Tjinguru kutjupangku kura palyani, ka nyuntu wangkara tjukarurunma munun tjinguru piruku tjukurtjarangku, tjinguru iltangku kura palyannyangka nyakula palu purunytjutu wangkara tjukarurunma, tjukurtjara munu ilta nyinanyangka wantinytja wiyangku. Munu kutjupa-ara unytjungku paintja wiyangku wantima wirura nyinanyangka. Palu uwankara palu purunytju wangkara tjukarurunma uwankarangku tjukarurungku kulintjaku.

²² Munu wati kutjupa Godaku warakarinytjaku warpungkula ngunti tjunkuwiyangku wantima. Panya nyuntu warpungkula ngurkantara tjunkunyangka tjinguru mala kuraringkuku, ka nyuntu kulu kura pala palula tjunguringkuku panya nyuntu warpungkula ngurkantara tjunu. Pala palula-tawara nyuntu uti tjukarurungku kulinma munu purkarangku ngurkantana wati palya kutju, munu palulanguru kutju wati palula mara tjunkula milmilmanama Godaku war ka palyantjaku.

²³ Uwa Timitji, nyuntu panya tjuni ilatu-ilatu pikatjararinganyi. Pala palula-tawara nyuntu uti mina kutju tjikintja wiyangku waina tjukutjuku kulu tjikinma tjuni palyaringkunytjaku.

²⁴ Ka panya wati minyama kutjupa tjarangkuya tjuta mirangka utingku kura palyani. Ka Godalu tjananya ngula ngaratjura kuru wangkaku. Palu kutjupa tjarangkuya kampangkatu kura palyalpai, palu panya ngula nyara tjana utiringkuku kura palyantjatjanu.

²⁵ Ka palu purunypaya kutjupa tjarangku tjutangka mirangka utingku wiru palyalpai. Ka palu purunypatu kutjupa tjarangku kumpira nguwanpa wiru palyalpai. Palu kumpilitja paluru utiringkuku panya wiru palyantja, kaya tjutangku kulilku.

6

War karipai Tjuta Tjukaruru War karinytjaku

¹ Jesuku walytja kutjupa tjuṭa panya mayatjangka unytju warkaripai manikitja wiya. Ka Timitji, nyuntu uti tjanala wangka mayatja tjanampa warkira kuranmankunytja wiyangku wantinytjaku, munu mayatjangku tjananya wituwitunnyangka pukultu wanganarangku kulira palyantjaku. Panya tjinguruyanku tjanampa mayatja kuranmankuku, kaya anangu kutjupa tjuṭangku kuranmankunyangka kulira Godanya wiyamankuku wangkara, "Ai! Nyara tjana Godaku walytja tjuṭangku warkipai watarkitja tjuṭa purunytju. Tjinguru Godanya mulapa wiya." Alatjiya tjinguru nyakula kulilku munuya tjukurpa nganana wangkara nintintja kuranmankuku. Ka pala palula-tawara nyuntu uti warkaripai tjuṭangka wangka mayatjangka wanganara warkarinytjaku kutjupa tjuṭangku nyakula Godanya wirunmankunytjaku palumpa tjukurpa kulu.

² Palu mayatja kutjupa tjuṭa panya Godaku walytjatu nyinanyi. Kaya tjananya warkaripai tjuṭangku tjinguru alatji kulilku, "Nyara ngayuku mayatja Godaku walytja nyinanyi. Wanyu kana tjukutjuku nguwanpa warkarima pulkara warkarinytja wiya panya paluru ngayuku walytja Jesulanguru." Alatjiya tjinguru kulilku warkaripai tjuṭangku. Ka Timitji, nyuntu uti tjanala wangka nyanga palu purunypa kulintja wiyangku wantinytjaku munu mayatjangka kulira wirura pulkara warkarinytjaku. Panya mayatja paluru Godaku walytja tjanampa kulu walytja, munu paluru tjanampa pulkara pukularinyi palumpa wirura warkarinyangka.

Mani Kulintja Wiya Nyinanytjaku

³ Uwa Timitji, nyuntu uti anangu tjuṭangka tjukurpa nyanga palunya tjananya wangkara nintinma. Palu tjinguru wati kutjupangku tjukurpa kutjupa kutjupa nintilku mayatja Jesuku Christaku tjukurpa wiya, nyuntu nganana nintintja purunypa wiya.

⁴⁻⁵ Munu wati pala paluru kanany-kanany pa nyinanyi ninti-palku, palu paluru ngurpa alatjitu. Paluru panya ngunti-ngunti ngaparku wangkara nyinara kulintjikitja kutju mukuringkupai. Munu palulanguru paluru mirpan-mirpanṭu wangkapai pikangku. Munu paluru anangu kutjupa tjuṭa analpai munu kuranmankupai. Panya paluru tjukurpa mulapa kulira wantira pina kuraringkula pikangku rawangku wangkapai. Munu wati paluru ngunti kulilpai alatji, "Ngayulu tjinguru Jesuku walytja nyinarampa mani pulka mantjilku." Palu wiya, wati pala paluru ngunti kulilpai.

⁶ Palu panya Godaku walytjangku mantatja kutjupa kutjupa tjuṭa waintara kulilwiyangku wantirampa Godaku iwara kutju wanarampa paluru pukulpa mulapa nyinaku.

⁷ Kulila, nganana wanyu nyaatjara iti ngaringu? Panya nganana kutjupa kutjupa tjuṭa wiya iti ngaringu nikitja alatjitu. Munula ngula ilura nya katiku ilkarikutu? Wiya nganana kutjupa kutjupa tjuṭa katinytja wiya maralpa ananyi.

⁸ Ala, pala palunyala uti kulinma munula mai, mantara kutju kanyirampa pukulpa mulapa nyinama munula kutjupa kutjupa tjuṭaku waintara pulkara mukuringkunytja wiyangku wantima.

⁹ Palu panya kutjupa tjuṭangkuya maniku pulkara mukuringkunytjatjanungku mamuku wangka kulilpai ngunti arakara wangkanyangka. Munuya palulanguru ngunti kulira rawangku kura palyalpai mani

kutju kulira kura kutjupa kutjupa tjuta kulu kulira. Nyara palulan-guruya kura mulararira ma-wiyaringkula ilura kawankatipai.

¹⁰ Panya maniku manyungku-manu kura kutjupa kutjupa tjuta palyalpai. Panya kutjupa tjutangkuya manitjiratjangu tjukurpa mulapa Jesuku mulamularingkunyjtatjanungku kulira wantir'iyani munuyanku walytjangu tjuni kurani, unngu kura nyinara.

Timitjinya Wirura Nyinanytjaku

¹¹ Palu Timitji kulila! Palunya tjananya purunyarinytja wiyangu wantima panya nyuntu Godaku wati. Rawangu kulinma Godalawanu tjukaruru palyanyku nyinanytjikitjangu paluru nyakula pukularinytjaku. Munu Jesuku Christaku rawa mulamularingama panya paluru nganampa ngalkilpa ilunyjtjaku. Munu mukulya pukultju pulka nyinara anangu tjutangka purkarangu wirura wangkama. Munu rawangu Godanya tungun-tunguntu wanama pakuringkunyitja wiyangu.

¹² Palu tjukurpa mulapa rawangu palyanyku kulintja panya pulkara wirtjapakantja purunypa. Panya anangu tjuta waintarinytjikitja pulkara wirtjapakalpai winatja wiru mantjintjikitja. Panya tjana purkara wirtjapakantja wiya munu ngururpa tultjarukatinytja wiya panya tjana waintarinytjikitja mukuringkula pulkara alatjitu wirtjapakalpai. Ka Timitji, nyuntu palu purunytju tungun-tunguntu Godanya wanama palumpa tjukurpa kulintjatjanungku munun palulanguru winatja wiru mulapa mantjilku panya nyuntu wanka mulapa nyinaku Godala tjungu. Panya nganmanytjun tjutangka mirangka wangkangu Jesunya Christanya wanantjikitjangu tjukurpa mulapa kulintjatjanungku. Nyara palula aranta Godalu altingu palulakutu pitjala wanka titutjara rawa nyinanytjaku.

¹³⁻¹⁴ Uwa, Godalu panya uwankaratu wankaru kanyilpai. Kana palula mirangka nyuntula wangkara nyuntunya wituwituni Jesula Christala mirangka kulu. Panya paluru Pontius Pilate-ala ngarala tjukurpa wiru wangkangu mungatu. Uwa, palula pulala mirangkaanta wangkanyi alatji, nyuntu ngayulu wangkara wituwituntja uwankara wanganarangku kulira palyanma rawangu Mayatja Jesunya Christanya malaku pitjanytjakutu-wangkara.

¹⁵ Palu Godalu kutjungku kalkuntjatjanungku kulini yaalara Jesunya malakungku iyantjikitjangu ngananalakutu. Paluru kutju ninti ara nyara palumpa. Ka mulapa nyara palula arangka Jesunya pitjala utiringkuku nganana paluru iyannyangka. Panya Godanya Mayatja pulka mulapa wiru alatjitu, mayatja kutjupa uwankarangka waintara alatjitu nyinanyi.

¹⁶ Panya paluru kutju ilunytja wiya titutjara wanka nyinanyi. Paluru panya tili pulkangka nyinanyi pitalytji pulka mulapa, kala palulakutu putu ilaringanyi. Panya anangu kutjupangu palunya nyakuwiya alatjitu. Paluru kutju Mayatja witulya pulka mulapa anangu tjutangu pulkanmankula mirawaninytjaku rawa mulatu.

¹⁷⁻¹⁸ Ka Timitji, nyuntu uti mani pulkatjara tjutangka wangka kanany-kanany pa wiya nyinanytjaku. Utiya paluru tjana mani mantjirampa tjunkukatira pulkantja wiyangu wantima, panya alatji rawangu tjunkula tjana Godaku watarkurira maniku kutju mulamularinganyi. Ka nyuntu tjananya wangka Godanya pulkara kulintjaku

kutjupa kutjupa tjuṭa wiyangku. Panya Godalu kutjungkulanya uwankara unḡkupai nganaṇa pukuḡpa nyinanytjaku. Ka nyuntu manitjara tjuṭangka wangka anangu kutjupa tjuṭaku wiru tjuṭa palyantjaku, munu tjananya intjanungku unḡkunyjtaku.

¹⁹ Panya mantangka nyinara intjanungku ma-unḡkulaya tjana Godanya pukuḡmananyi, maniku mulamularingkuwiyangku wantira. Ka Godalu tjananya ngapartji ngula ngura ilkaritjangka wiru mulpalta unḡkuku. Alatji tjana mantangka palyantjatjanu ngula ngura ilkaritjangka wanka mulapa titutjara nyinaku Godala tjungu.

²⁰ Palu Timitji kulila! Panya Godalu nyuntunya tjukurpa unḡkunyjtanya tjukarurungku kanyira wangkama. Munu kutjupa tjuṭangka tjukurpa kurakura ngunti wangkanyangka kulintja wiyangku wantima. Panya tjukurpa palunyaya nyinara ngunti arapungkupai nintingku-palku.

²¹ Panya tjarangkuya tjukurpa palumpa tjanampa mulamularingkula pala palulanguru Jesuku Christaku mulamularingkunyjtawiyaringu ngunti panya kulintjatjanu.

Uwa alatjituna wangkanyi. Ka Godalu nyuntunya pukuḡtju pulḡkangku wirura kanyinma.

Lita Nampa 2 Paulalu Walkatjura Iyantja Wati Ini Timitjilakutu 2 Timothy Nyangatja Nganmanytju Nyakula Wangkanytjaku

Nyangatja lita kutjupa Godaku tjukurpa Paulalu walkatjunktuntja Timitjiku. Paluru panya ngura ini Rome-alanguru walkatjunu tjailangka nyinara, ka Timitjinya panya ngura ini Ipitjala nyinangi. Ka Paulalu lita nyangatja palulakutu iyanu Timitjilu mantjira nyakuny-tjaku munu nyakunyttatjanungku Jesuku walytja tjuťangka wangkanytjaku.

Palu Paulanya panya Timitjiku pulkara mukuringangi munu palunya rawangku kulilpai panya paluru Ipitjala nyinara anangu Jesuku walytja tjuťa kanyira atunymankupai. Ka ngura nyara palula anangu kutjupa tjuťa Jesuku walytja purunypa nyinapai, palu panya Satantu tjananya ngunti kuraningi, kaya mulamulangku Jesunya wanantja wiyatu. Panya wati mankurtu tjanala tjukurpa ngunti wangkara nintiningi tjukururu-palku. Ka lita nyangangka Paulalu Timitjila wangkangu Tjukurpa Palya mulapa Jesunyatjara kutju mulamulangku kulintjaku munu Jesuku walytja tjuťangka tjukurpa palunya kutju wangkara nintintjaku tjukurpa tjukururu kutju. Panya paluru mukuringangi Timitjinya tjana Godalawanu kutju nyinanytjaku tjukurpa mulata tjukururungka.

Tjukurpa nyanganpa ngarinyi:

1:1-2 Paulalu nganmanytju wangkanytja

1:3—2:13 Paulalu Timitjinya wangkara rapantja Jesunya rawangku wanantjaku

2:14—4:8 Paulalu Timitjila wangkanytja Godaku pulkara warakarinytjaku munu Godaku tjukurpa tjukururungku nintintjaku

4:9-22 Paulalu tjukurpa malatja wangkanytja

Paulalu Timitjila Nganmanytju Wangkanytja

¹ Uwa Timitji, ngayuluna Paulalu lita nyangatja nyuntumpa walkatjunanyi. Panya Godaluni ngurkantara tjunu Jesuku Christaku tjukurtjara warakarinytjaku mununi witura iyanu tjukurpa paluru kalkuntjitja anangu tjuťangka tjakultjunktuntjaku, panya paluru nganmanytju kalkunu anangu tjuťa Jesula Christala tjunguringkunya tjananya wankara titutjarangku kanyintjikitjangku.

² Uwa, nyuntu ngayuku katja purunypa, kana nyuntumpa pulkara mukuringkula lita nyangatja nyuntulakutu iyani.

Ka Mama Godalu Mayatja Jesulu Christalu kulu nyuntunya pukultju pulkangku kanyinma munu nyuntunya kurunpa rapara pukulmanama ngaltunytju pulkangku.

Paulalu Timitjilanguru Godanya Walkuntja

³ Palu ngayulu nyuntulanguru rawangku Godanya wal kulpai nyuntu palunya wirura wanannyangka. Iriti panya ngayuku tjamu tju tangku Godanya wanantjikitjangku nyanga alatji kuliningi, "Nyangatja iwara tjakaruru. Nyanga palulawanula anama." Kana ngayulu palu purunytju tu Godanya purkarangku wanantjikitjangku alatji kulilpai, "Nyangatja iwara tjakaruru. Nyanga palulawanuna anama." Mununa Godala titutjarangku tjapilpai kalala mungangka, mununa palula tjapira nyuntunya kulilpai watarkurinytja wiyangku.

⁴ Mununa nyuntunya kulira ngayulu panyatja kulilpai, panya nyuntu mungatu ngayuku ulanytja, mununa palulanguru pulkara mukuringanyi nyuntunya piruku nyakunytjikitja munu nyakula pulkara pukularinytjikitja.

⁵ Mununa nyuntunya kulira ngayulu pukultu kulilpai alatji, "Wati paluru kurunpa winki Jesuku mulamularingkupai palumpa tjukurpa tjakarurungku kulira." Alatjina kulilpai. Mununa piruku kulilpai nyuntumpa kami Lawatjanya munu nyuntumpa ngunytju kulu Yunitjanya panya paluru pula nganmanypa Jesuku pulkara mulamularingu. Mununa kulilpai, mulapa nyuntu paluru pula purunypa pulkara mulamularingkupai kurunpa winki.

Paulalu Timitjinya Wangkara Rapantja

⁶⁻⁷ Uwa, mulapa nyuntu Jesunya tjakarurungku wana ni, kana nyara palulanguru nyuntunya piruku wangkanyi ngulu wiya rapa ngaranytjaku kuntaringkunytja wiya. Kulinin panyatja? Panya mungatuna nyuntula katangka mara tjunu, kanta Godalu Kurunpa Milmiltawanungku nyuntunya witulyanu palumpa war ka rapangku palyantjaku. Ka palulanguru nyuntu uti Godaku war ka nguluringkuwiyangku palyanma, panya Godalu Kurunpa Milmiltu nyuntunya nganananya witulyankupai Jesuku walytja uwankara, nganana ngulu wiyangku rapangku palumpa war ka palyantjaku munu anangu tjutaku kulu pulkara mukuringkunytjaku. Kurunpa nyara paluru panya nganananya witulyankupai kuraku wituwitungnyangka wiyankunytjaku.

⁸ Paluru nganananya kunpulpai, ka palulanguru nyuntu uti rapangku wangkama tjukurpa Jesunyatjara kuntaringkuwiyangku. Munu ngayuku kulu kulira kuntaringkuwiyangku wantima nyanga tjailangka nyinanyangka. Panya Mayatja Jesuku tjukurpa wangkanyangkaniya tjarpatjunu nyangatja. Munuya tjinguru palangka nyuntunya kulu tjarpatjunkuku nyuntu palu purunytju tu tjukurpa wangkanyangka. Palu palya, Godalu nyuntunya kulu witulyankuku nguluringkuwiyangku palumpa tjukurpa rapangku wangkanytjaku. Ka palulanguru ngayulu purunytju tungun-tunguntu palumpa tjukurpa wangkama rapangku munu kutjupa tju tangku nyuntunya anara kurannyangka kulira wantima.

⁹ Panya Godalulanya ngurkantanu munulanya wankarunu palumpa katja untalpa palya mulapa nyinanytjaku. Palu tjingurula kulini nyanga alatji, "Godalu-mantilanya ngurkantanu palya nyinara wiru tju ta palyannyangkampa." Palu wiya, paluru alatjitu walytja mukuringkula kulira nganananya ngurkantanu ngaltunytju pulkangku. Panya kuwaripatjara manta paluntja kuwaripangkalpi paluru kulinu nganananya ngaltunytjungku kanyintjikitjangku. Nyara palula ara

alatjitu kuwaripatjara paluru kulinu palumpa katja ngula iyantjikitjangu nganampa ngalkilpa ilunytjaku.

¹⁰ Ka panya paluru mantakutu pitjangu Jesunya Christanya panya, munu nganampa ngaltunytju pulka mulapa ngalkilpa angailungu nganananya-tjiratja, munulanya kuranguru wankarunu ilura ngura kurakutu ankunytjaku-tawara. Nyara paluru panya ilunytjatjanu wankaringkula pakanu munu ngananala Tjukurpa Palya utira tjakultjunu, kala nganana kulu palumpa mulamularingkula ilunytjatjanu wankaringkula pakalku munula Godala tjunguringkula wanka titutjara nyinaku. Nyara palulangurula kulini panya Mayatja Godanya nganampa ngaltunytju mukulya pulka mulapa nyinanyi, kala ilunytjikitjangu kulira nguluringkunytja wiya rapa ngarama, panya nganana palumpa mulamularingkula ilunytjatjanu wankaringkula pakalku Godala tjunguringkula titutjara nyinanytjikitja.

¹¹ Ka panyaṅi Godalu mulapa ngurkantara tjunu Jesuku Christaku tjukurtjara warakarinytjaku, mununi witura iyanu Tjukurpa Palya Jesunyatjara anangu tjutangka wangkara nintintjaku.

¹² Ka panyaṅiya tjukurpa nyanga palulanguru ngayunya kuralpai mununya kuwari nyanga witura tjailangka tjarpatjunu. Palu ngayulu nyangangka nyinara kuntaringkunytja wiya rapa nyinanyi, panya ngayulu Jesuku mulamularingkula palumpa ninti pulka nyinanyi. Panya paluruni warka ungu palumpa Tjukurpa Palya anangu tjutangka wangkanytjaku, munu tjukurpa palunya paluru rawangku tjukururu kanyilku, tjintu malatjakutu-wangkara kutjupangku ngunti kampa kutjupankunytjaku-tawara.

¹³ Ka Timitji, ngayulu panya nyuntula tjukururungku tjakultjunu Tjukurpa Palya Jesunyatjara. Ka nyuntu nintiringkunytjatjanungku tjanala ngapartji tjukururungku wangkara nintinma tjukurpa panya palunyatju. Munu alatji warakarira Jesuku rawa mulamularingama wantinytja wiya munu anangu tjutaku pulkara mukuringama Jesulu nyuntunya witulyankunyangka.

¹⁴ Panya Godalu nyuntunya Tjukurpa Palya ungu mununta nintinu tjukururungku wangkanytjaku anangu tjutangka. Ka nyuntu tjukurpa palunya tjukururu mulatu wangkara utinma, munu anangu kutjupangku tjukurpa palunya ngunti kalikali wangkanyangkampa kulira palunya tjukururunma. Munu kulinma panya Kurunpa Milmilnga ngananala uwankarangka unngu nyinanyi mununta nyara paluru alpamilani tjukurpa palunya rawangku tjukururungku wangkara nintintjaku.

¹⁵ Uwa Timitji, nyuntu ninti panya Jesuku walytja tjutangkunya ngura nyara Aitjala nyinapai tjutangu wantingu alatjitu tjailangka tjarpatjunkunyangka alpamilantja wiyangku. Mununi wati panya Pikilatjalu pula Amatjanilu kulu palu purunypatu wantingu alatjitu alpamilantja wiyangku.

¹⁶⁻¹⁷ Palu wati kutjungkuni ini Anitji-puralu ngayunya pitjala nyangangi. Paluru kunyu ngura nyanga Rome-ala wirkara wali kutjupangka kutjupangka ngayuku para-nguriningi munu tjailangka nyinanytja kulira wantinytja wiya pitjala ngayula tjukururu wirkanu mununi kurunpa pulkara pukulmanu. Kana nyara palulanguru Mayatja Jesula tjapini wati panya palumpa walytja tjutaku

ngaltunytjungku wirura kanyintjaku.

¹⁸ Mununa palumpa kulu Godala tjepini alatji wangkara, “Mayatja Jesu, ngula tjintu malatjanga nyuntu anangu tjuta ngurkantara tjaralku nyuntumpa walytjapiti munu nyuntunya wantipai tjuta. Tjintu nyara palula Anitji-puraku ngalturingama munu palunya kulu ngurkantanama nyuntumpa walytja nyinanytjaku.” Alatjina palumpa tjepini. Ka Timitji, nyuntu ninti wati nyanga palumpa, panya paluru kutjungku ngayunya wirura alpamilaningi ngura nyara Ipitjala. Panya nyara palula nyuntu ngayula tjungu nyinara palunya nyangangi ngayuku wirura rawangku palyannyangka.

2

Jesunya Rawangku Wananma

¹ Palu wati wiru kulila, nyuntu ngayuku katja purunypa, kana nyuntunya wangkanyi Jesula Christala tjungu titutjara ngaranytjaku, ka paluru nyuntunya kunpulku. Panya nganana palula tjungu ngaranyangka paluru nganananya mukulyangku atunymara kanyilpai.

² Nyuntu panya kulinigi ngayulu anangu tjutangka mirangka Godaku tjukurpa Jesunyatjara wangkara nintinnyangka. Ka nyuntu tjukurpa nyanga palunyaatu anangu wanganara tjutangka wangkara nintinma. Ka tjana ngapartji anangu tjutangkalta ma-tjakultjunkuku.

³ Palu kulila, nyuntu anangu tjutangka Jesuku tjukurpa wangkanyangkaya kutjupa tjutanku panya ngayuku purunypa nyuntumpa ngapartji mirpanarira pikaringkuku. Ka nyuntu nguluringkuwiyangku tungun-tunguntu Jesuku warka palyanma, panya wati tjaultji puruntju, panya paluru pikaringkuyangka ngulu wiya alatjitu rapa ngarapai, palu purunypa nyuntu Jesuku warakarira rapa ngarama.

⁴ Palu wanyu kulila, kananta ara mankurpa tjakultjura nyuntu kulira nintiringkunyitjaku. Nganmanytjuna tjakultjunanyi wati tjaultji tjutaku ara. Panya tjaultji tjutaya palumpa tjanampa mayatjaku kutju wanganara warakaripai palunya kutju pukulmankunyitjikitja munuya kutjupa tjutaku warakaripai wiya alatjitu. Ka nyuntu palu purunypa Jesuku Christaku kutju pulkara warakarima palunya pukulmankunyitjikitja.

⁵ Mununa piruku ara kutjupa tjakultjunanyi wati wirtjapakan-tjatjara. Panya anangu tjutangka mirangka wati pulkara wirtjapakalpai kuranyu alatjitu wiru mantjintjikitja. Palu tjinguru paluru ngururpa wirtjapakara angatjunkunyangka anangu tjutanku palunya mirawanira wiru ungkunyitja wiyangku wantiku. Paluru tjinguru pulkara wirtjapakanma, palu wiya. Ka Timitji nyuntu pala palu purunypa arkalwiyangku wantima munu tjukarurungku Jesunya wananma, kanta paluru nyakula mirawanira wiru ungkuku.

⁶ Mununa ara kutjupa malatja tjakultjunanyi nyuntu kulira nintiringkunyitjaku wati panya kaana kanyilpaitjara. Wati paluru panya mantangka pulkara warakaripai pakuringkunyitja wiya munu mai pulka pakaltjinalpai munu ngula mai kururingkunyangka paluru katara uralpai munu paluru-warara pulkara warakarinytjatjanungku mai nganmanytju mantjilpai palurunku, kaya kutjupa tjutanku

mala mantjilpai. Ka Timitji, nyuntu palu purunypa Jesuku pulkara warakarima pakuringkuwiya, kanta paluru nyuntunya atunytju kanyilku.

⁷ Uwa, ara nyanga mankurnguru kulinma purkarangku nintiringkunytkitjangku, kanta Mayatja Jesulu nyuntunya tjukarurungku kulintjaku nintilku.

⁸ Uwa, Jesunya Christanya tungun-tunguntu wanantjikitjangku palunya titutjarangku kulinma watarkuriwiyangku, panya paluru Mayatja Davidaku pakali malatja mulapa, ka panya Godalu palunya ilunyangka wankara pakaltjinganu. Kana tjukurpa nyanga wiru palunya anangu tjutangka tjakultjunkupai.

⁹ Kaniya tjukurpa nyanga palunya wangkanyangka tjailangka witera tjarpatjunu mununiya tjiinangka karpira kanyini wati kuralpai-palku. Palu palyaya ngayunya karpira kanyini, palu tjana Godaku tjukurpa putu wiyani. Panya Tjukurpa Palya Jesunyatjara ngura winkingka lipiringanyi, kaya anangu winkingku kulini.

¹⁰ Nyara palulanguruna rawa warakarinyi kutjupa tjutangka ngayunya kurannyangka kulira tjituru-tjitururinytja wiya. Panya Godalu anangu kutjupa tjuta kulu ngurkantanu Jesulawanungku wankarunkunytkitjangku, kaya palumpa walytjaringkula palula tjungu titutjara nyinaku pukulpa mulapa. Nyara palulanguruna palula tjanala kulu Tjukurpa Palya tjakultjunanyi paluru tjana kulu kulira wankaringkunytkaku, mununa mirpantju tjutangka ngayunya markunnyangka kulira wantipai ilunytja kulira nguluringkunytkiwiwangku.

¹¹ Uwa, utila Jesunya Christanya tungun-tunguntu wananna, panya tjukurpa wiru nyanga alatji ngaranyi tjukaruru mulapa, "Nganana kura wantirampa Jesula tjunguringkula palula tjungu wanka titutjara nyinaku.

¹² Nganana palunya titutjarangku wanarampa ngula palula tjungu mayatjarira nyinaku.

Palu tjinguru nganana Jesuku ngurparingkunyangkampa, paluru ngapartji nganampa ngurparingkukutu.

¹³ Nganana kutjupa-ara kalkuntjatjanungku palyalpai wiya.

Palu Godalu kalkuntjatjanungku palyalpai alatjitu, tjukarurungku.

Panya paluru wangkanytjatjanungku walytjangku anantja wiya alatjitu."

Godaku Wara Wanganarangku Palyanma

¹⁴ Uwa Timitji, tjukurpa nyanga palunya tjananya Jesuku walytja tjutangka rawangku wangkara nintinma watarkurinytjaku-tawara. Munu Godala mirangka tjananya markunma tjukurpanguru ngaparku wangkawiya nyinanytkaku. Panya paluru tjana alatji rawangku wangkara kuraringanyi Jesula kunpuringkunytkiwiya. Kaya tjinguru kutjupa tjutangka tjanala ngaparku wangkanyangka kulira kuraringkukutu munuya palulanguru tjinguru Jesulanguru paturingkuku.

¹⁵ Ka Timitji, nyuntu Godaku pulkara warakarima pakuringkuwiya paluru nyakula pukularinytkaku. Munu tjanala Godaku tjukurpa tjukarurungku nintinma purkarangku, ngunti wangkara kunteringkunytkaku-tawara.

¹⁶ Panya anangu kutjupa tjutangkuya tjukurpa ara tjukutjuku tjuta unytjungku wangkapai, tjukurpa mantatja tjuta. Ka nyuntu palunya tjananya kulira wantima munu mauntalpa nyinama, panya alatji rawangka wangkaraya paluru tjana Godalanguru ma-paturinganyi munuya ma-paturingkula palumpa watarkurinyi.

¹⁷ Panya tjukurpa tjanampa lipiringkupai, nyaa purunypa panya pika kunmanu purunypa, panya pika paluru miringka nyinakatira miritjina wiyangka pulkaringkupai munu puntu winki kuralpai, palu purunypa tjanampa tjukurpa anangu tjutangka lipiringkupai, kaya uwankara ma-kuraringkula Godalanguru paturingkupai.

Panya wati Yama-nitjalu pula Palitalu tjukurpa kurakura nyanga purunypa tjuta anangu tjutangka ngunti nintiningi.

¹⁸ Panya paluru pula Godaku tjukurpa tjukururu wantingu munu pula kuwari tjukurpa kutjupa kulira ngunti wangkara nintini Jesuku walytja tjutangka. Munu pula ngunti wangkapai nyanga alatji, "Tjintu panya paluru nganmanypa ngarala wiyaringu panya Godalu anangu ilunytjita tjuta wankara pakaltjingantja." Alatji pula nintilpai ngunti. Kaya anangu kutjupa tjarangu kulira palumpa pulampa mulamularingu munuya palulanguru ngunti kulira Godalanguru ma-paturingu, palumpa pulampa tjukurpa kulintjatjanu.

¹⁹ Palu kulila, Godalu panya palumpa walytjapiti ngurkantanu munu tjananya atunymara kanyini palula tjungu kunpu nyinanytjaku, ka kutjupangu tjananya putu kurani. Ka nyanga palumpa tjanampa ara kutjara ngaranyi. Kutju ngaranyi alatji,

"Panya Godanya ninti palumpa walytja tjutaku."

Ka kutjupa nyanga alatji ngaranyi,

"Nyuntu Jesunya mayatjanmarampa kura uwankara wantima munu palyanyku nyinama."

²⁰ Palu kuwarina tjukurpa ara kutjupa tjakultjunanyi nyuntu kulira nintiringkunytjaku alatji, panya anangu mani pulkatjara wali wirungka nyinapai munu paluru pulita, panikina, piti kutjupa kutjupa tjuta kulu walingka kanyilpai. Ka piti kutjupatjara puli gold-nguru munu tjiilpanguru palyantja wiru mulapa ngaripai. Ka piti kutjupa tjuta pununguru tjulpirnguru palyantja kurakura tjuta ngaripai. Ka wati paluru mai ngalkuntjikitjangku pulita piti kurakura mantjilpai pununguru tjulpirnguru palyantja. Palu tjinguru paluru mai pulka palyara altiku mayatja kutjupa tjuta palumpa ngurangka tjunguringkula ngalkuntjaku. Munu paluru pulita panikina piti wiru tjuta ngurkantara taipulangka tjunkuku gold-nguru tjiilpanguru palyantjita, kaya pitjala piti wiru tjutangka ngalkula tjikilku.

²¹ Ka nyanga palu purunypa ngaranyi Jesuku walytja tjutaku. Panya kutjupangu kura wantira tjukururu palyanyku nyinanytjikitja mukuringkunyangka Godalu palunya ngurkantankuku warka wiru palumpa palyantjaku. Panya anangu nyara paluru Mayatja Jesula wanganarangku kulilpai palumpa warka kutju palyantjikitja mukuringkula. Ka Mayatjalu palumpa pukularira warka wiru tjuta palunya ungkuku paluru wanganarangku kulira palyantjaku.

²² Ka Timitji, nyuntu Godaku warka wiru palyantjikitja mukuringkula nyanganpa kulila. Panya yangupala tjuta kura kutjupa kutjupa tjuta palyantjikitja mukuringkupai, palu nyuntu palunya tjananya

arkantja wiyangku wantira palyanyku nyinama. Panya Jesuku walytja kutjupa tjutangku kura wantinytjatjanungku Godanya tjukarurungku wanantjikitja mukuringanyi, ka nyuntu tjanala tjunguringama munu tjana purunyitju rawangku kulinma Godalawanu tjukaruru palyanyku nyinanytjikitjangku munu palumpa pulkara mulamularingama, munu anangu tjutangka mukulya pukultju nyinama tjanala tjungu.

²³ Ka anangu kutjupa tjutangku tjukurpa tjukutjuku tjuta kulira rawangku ngaparku wangkapai. Ka Timitji, nyuntu tjanala tjunguringkuwiya mauntalpa nyinama, panya tjana pina pati munuya unytjungku rawangku ngaparku wangkapai wiyanguru alatjitu.

²⁴ Palu Mayatja Godaku warkaripai tjuta uti ngaparku wangkanytja wiya nyinama munuya uti anangu kutjupangku pikaringkula wangkanyangka ngapartji wangkanytja wiyangku wantima. Uti Godaku warkaripai tjuta ngaltunyitju mukulya pulka nyinama, munu anangu tjutangka purkarangku wangkara nintinma mirpanariwiyangku.

²⁵ Munuya uti kutjupa tjutangku tungunpungkula wangkanyangka palunya tjananya purkarangku wangkara tjukarurunma. Ka Godalu tjinguru palunya tjananya malakungku arurilyilku Tjukurpa Palyaku mulamularingkunyitjaku.

²⁶ Panya mamu Satantu tjananya ngunti kuranu palula wananganrangku kulintjaku munu tjananya karpira kanyini. Palu Godalu nintinyangkaya tjinguru kulira Godalakutu malaku aruringkuku.

3

Tjintu Malatja Ilingkungnyangka Anangu Tjuta Kuraringkunyitja

¹ Palu wanyu kulila, panya tjintu malatja ilaringkungnyangka kura kutjupa kutjupa tjuta wirkankunyangka wituwitu pulka ngaraku Jesuku walytja tjutaku.

² Panya nyara palula ara anangu tjutangku tjananku kutju kulira palyalku, kutjupa tjutaku ngalturingkunyitja wiyangku. Ka kutjupa tjutangku mani kutju pulkara kulilku, munuya kanany-kanany pa ngarala tjananku mirawaniku. Ka kutjupa tjuta tjaa kuraringkuku munuya ngunti tjuta kutju wangkaku, munuya mamangka ngunytjungka pulkara tungunpungkuku, munuya wiru tjuta unkungnyangka pukularinytja wiyangku wantiku, munuya rawa alatjitu Godala tungunpungkuku.

³ Kaya kutjupa tjutangku anangu kutjupa tjutaku nyakula ngalturingkunyitja wiyangku alatjitu wantiku. Ka anangu kutjupangku kutjupa tjutaku kuraringkula malangka kuntaringkula palumpa tjanampa kalyparingkunyitja wiyangku alatjitu wantiku. Kaya kutjupa tjutangku anangu tjuta ngunti ngukara kuranmankuku. Kaya kutjupa tjutangku anangu kutjupa tjutaku mapalku pikaringkula tjananya pungkuku ngalturingkunyitja wiyangku, panya tjana putu kulilku purkarangku kulira tjukaruruntjikitjangku. Munuya paluru tjana anangu kutjupa tjuta wirura nyinanyangka nyakula tjananya kurara pungkuku, panya tjintu nyara paluru ilaringkungnyangka tjana kura tjutaku kutju pulkara mukuringkuku.

⁴ Uwa, ka kutjupa tjutangku malpa tjuta ngunti kuralku panya tjanampa nganmanypa mukulya nyinanytjatjanungku tjananya

wantiku. Kaya kutjupa tjuṭangku purkarangku kulira palyantja wiyaringkuku munuya warpungkula kutju palyalku atatjura kulin-tja wiyangku. Munuyanku kaṇany-kaṇanytju walytjangku kutju mirawaniku, munuya Godaku mukuringkunyitja wiyaringkula tjana mukuringkunyititja kutju palyantjikitja mukuringkuku tjananku walytjangku pukulmankunyitjikitjangku.

⁵ Kaya kutjupa tjuṭa Jesuku walytja-palku nyinaku, palu tjana unngu palumpa mulamularingkunyitja wiyaringkuku. Ka nyuntu tjananya nyakuku rawangku tjana Godala tungunpungkula kura kutju palyan-nyangka munun nintingu kulilku, "Munta, nyanga tjana Jesuku walytja wiya." Munu palulanguru tjanala tjunguringkuwiyangku wantima alatjitu.

⁶⁻⁷ Palu anangu nyanga kuralpai tjuṭangkuya minyma kutjupatjara ngunti wangkara wituwitulku tjanala wanganarangku kulintjaku. Panya minyma nyara paluru tjanaya kawakawa ngunti kulilpai, munuya iwara kurangka kutju titutjara ngarapai. Kutjupa-araya kura palyantjatjanu kunṭaringkupai, palu malangkaya piruku kura panya palunyaṭu palyantjikitjangku kulilpai munuya titutjara Godala mirangka kunṭaringkupai. Munuya paluru tjana tjukurpa kutjupa kutjupa tjuṭa kutju rawangku kulilpai munuya putu kulilpai, "Yaaltji tjukurpa tjukaruru mulapa?" Palulanguruya anangu panya kuralpai tjuṭangku minyma panya palumpa tjanampa ngurangka tjarpara tjukurpa wiru-palku tjanala wangkapai, kaya kulira mapalku mula-mularingkupai.

⁸⁻⁹ Uwa Timitji, nyuntu anangu panya ngunti kuralpai tjuṭa tjananya wantima alatjitu, panya paluru tjana wati ini Tjanitjanya pula Tjampurinya purunypa nyinanyi. Panya iriti pula Mosela tungun-pungangi paluru Godaku tjukurpa wangkanyangka. Ka panyaya anangu uwankara palumpa pulampa nintiringu kura nyinanyangka, ka panya Godalu pulanya painu palumpa tjukurpa wantinyangka. Palu purunytju Godalu anangu nyanga ngunti kuralpai tjuṭa kulu pulkara pailku tjana palumpa Tjukurpa Palya Jesunyatjara ngunti wangkara kurannyangka. Kaya palu purunypatu anangu tjuṭangku tjanampa nintiringkula ngurkantankuku tjana kura nyinanyangka, kaya paluru tjana pulkara kunṭaringkuku munuya anangu mankur-mankurpa kutju Godalanguru kurara mauntara katiku tjukurpa ngunti wangkara.

Godaku Tjukurta Wanganarangku Kulinma

¹⁰ Palu Timitji nyuntun tjananya purunypa wiya. Panya nyuntu purkarangku kuliningi ngayulu anangu tjuṭangka Tjukurpa Palya Jesunyatjara wangkara nintinnyangka. Munu panyaṇin nyangangi ngayunya Godalawanu tjukaruru nyinara palumpa waraka rawangku palyannyangka wantinytja wiyangku. Nyara palulanguru nyuntu nintingu kulini panya ngayulu Godanya kutju kulilpai palunya pukulmankunyitjikitjangku. Nyuntu ninti panya ngayulu Jesula Christalawanu raparinganyi. Nyuntu panyaṇin nyangangi, munun nintiringu panya ngayulu Jesuku walytja tjuṭaku pulkara mukuringkupai munuṇa palunya tjananya purkarangku wangkara nintilpai mirpanarinytja wiyangku.

¹¹ Munu panyanin nyangangi anangu tjutangku anara pikaringkunyaangka ngura panya Antiyakala, Akani-yamala, Litjurala tjanala. Panya ngura nyara palula tjanalaninya painingi Godaku tjukurpa wangkawiyangku wantinytjaku. Palu ngayuluna tungun-tunguntu wangkangi kaniya pika pulka mulapa pungangi. Palu Mayatja Jesuluni rawangku wankarura kanyiningi.

¹² Palu nyangatja tjaka panya anangu tjuta Jesuku Christaku walytja nyinanyangka nyakulaya anangu kuralpai tjutangku palunya tjananya kurara pungkupai Jesunya wanalwiyangku wantinytjaku.

¹³ Panya manta winkingkaya anangu kuralpai tjuta nyinanyi. Paluru tjana wangkapai, "Nganana Jesuku walytja nyinanyi." Palu wiya tjana kura kutju rawangku palyantjikitja mukuringkupai munuya palulanguru kura rawangku palyantjatjanu pulkara mulapalta makuraringkupai. Panya palunya tjananya mamungku ngunti kuralpai, kaya palu purunytjutu anangu kutjupa tjuta ngunti kuralpai.

¹⁴ Palu Timitji, nyuntu panya paluru tjana purunypa wiya. Panya nyuntunya nganmanytju nintinu tjukurpa tjukaruru Jesuku panya walytja kutjupa tjutangku, ka panyan nintiringkunyttatjanu Jesuku Christaku mulamularingu alatjitu. Kana kuwari nyuntula wangkanyi tjukurpa tjukaruru palunya titutjarangku wanganarangku kulintjaku uparingkula wantinytja wiyangku. Nyuntu panya ninti tjanampa nyara nyuntunya nintilpai tjutaku, panya paluru tjana nyuntula tjukarurungku wangkara nintiningi.

¹⁵ Palu nyuntu panya tjitjilpi nintiringangi Godaku tjukurku panya nyiri milmilta ngarinytjitjaku. Munu panyan nyara palulangurulta nyuntu pulkaringkula tjukurpa palunya rawangku tu kuliningsi watarkurinytja wiyangku. Munu panyan tjukurpa palumpa nintiringkunyttatjanungku kuliningsi Jesuku Christaku mulamularingkunyttikitjangu, ka panya nyuntunya wankarunu.

¹⁶ Panya tjukurpa nyanga nyiri milmilpa Godaku alatjitu, panya Kurunpa Milmilta nintinnyangkaya Godaku wangkatjara tjutangku iriti nyiringka walkatjunu. Ka tjukurpa paluru palya mulapa ngaranya anangu tjutangku kulira nintiringkunyttjaku. Ka panyala tjukurpa nyanga palunya kulintjatjanungku anangu kutjupa iwara kurangka ankunyangka nyakula pailpai. Munula palu purunypatu anangu kutjupangku ngunti palyannyangka nyakula tjukurpa nyanga palulanguru wangkara palunya tjukarurulpai paluru kulira Godalawanu tjukaruru nyinanyttjaku. ¹⁷ Uwa, tjukurpa nyanga paluru wiru mulapa ngaranya nganana Godaku walytja tjutangku kulira nintiringkunyttjaku. Nyanga palulanguru kutjula pulkara nintiringkunyttatjanungku nganana wiru tjuta kutju palyalku.

4

¹⁻² Uwa, ngula Jesulu mayatja pulka mulatu malaku pitjala anangu uwankara ngurkantara tjaralku nganmanypa ilunytja tjuta munu wanka nyinanyttja tjuta kulu. Kana nyara palulanguru nyuntunya kuwari wangkanyi Godaku tjukurpa anangu tjutangka tjakultjunktunyttjaku pakuringkuwiyangku. Nyangatjana Godala munu Jesula Christala mirangka nyuntunya wangkanyi, ka mulamulangku kulira wangkama. Kaya tjtinguru kulira pukulariku, munta tjtinguruya kulira wantiku. Palu nyuntu tjanala wangkama alatjitu wantinyttja wiyangku.

Munu tjananya kura palyannyangka nyakula painma kura wantinytjaku, munu tjananya wangkara kulu tjukarurunma Godalawanu tjukaruru palyanyku nyinanytjaku. Palu tjananya purkarangku wangkara nintinma mukulyangku mirpanarinytja wiyangku tjana kulira wanganarangkula Jesunya tjukarurungku wanantjaku.

³ Kuwariya anangu tjutangku nyuntula wanganarangku kulini Godaku Tjukurpa Palya wangkanyangka. Palu ngula tjana tjukurpa tjukaruru wangkanyangka kulintja wiyaringkuku munuya tjukurpa kutjupa tjutaku mukuringkuku tjukurpa panya tjana mukuringkunyjtjtjaku kutju, munuya anangu nintilpai kutjupa tjuta altiku tjukurpa palunya tjananya kutju tjanala wangkanytjaku. Munuya kulira pukulariku tjana ngunti wangkanyangka. ⁴ Panya paluru tjana tjukurpa tjukaruru nganmanytju kulintjatjanu tjukurpa palumpa watarkuriku munuya wantiku, munuya tjukurpa mantatja tjuta kutju kulira titutjarangku wanarinkuku.

⁵ Palu Timitji, nyuntu purkarangku kulira palyanma jtjiturutjtjiturinytja wiyangku. Tjinguruya nyuntunya anara kuranma, tjinguruya nyuntunya pungama munu paira iyanma. Palu nyuntu tungun-tungunpa alatjitu ngarama pika kulintja wiya, munu Jesunya tjukarurungku wanana tjukurpa ngunti tjanampa kulintja wiyangku. Munu Tjukurpa Palya Jesunyatjara rawangku para-wangkama anangu uwankarangka munu ngururpa tu pakuringkula wantinytja wiyangku Godaku warka wanganarangku alatjitu palyanma.

⁶ Panya alatjitu tjintu ilaringu ngayulu manta nyangatja wantikatira ankunytjaku. Kanatju kuwari puntu winki Godanya unganyi, panya Moseku tjukurtjarangku kuka pungkula Godanya ungkumpai nyakula pukularinytjaku, palu purunytju ngayulu kuwari puntu winki Godanya unganyi.

⁷ Panya ngayulu Godaku pulkara warkarangi pakuringkuwiya mununa ngatalpa wantinytja wiyangku warka uwankara wyanu. Panya anangu waintarinytjikitja pulkara wirtjapakalpai munu ngururpa ngarakatinytja wiya rawa wirtjapakara waintarira mulyangka wirkankumpai, palu purunypa ngayulu kuwari wirkanu, tjukurpa Godaku anangu tjutangka rawangku tjukarurungku nintintjatjanu.

⁸ Katju Godalu ngayuku pukularira wiru mulapa kanyini ngayunya ngula ungkunyjtjikitjangku. Panya Tjintu Malatjangka Mayatja Jesulu anangu uwankara tjukarurungku ngurkantara tjaralku. Mununi nyara palula-aralta ngayunya ungkuku, kana palula tjunguringkula titutjara nyinaku. Palu paluru ngayunya kutju ungkunyitja wiya palumpa walytja uwankara kulu ungkuku palula tjunguringkula titutjara nyinanytjaku. Panya nganana uwankara ala-ala patani paluru malaku pitjanytjaku.

Tjukurpa Malatja

⁹⁻¹¹ Palu malpa wiru, wanyu warka nyuntumpa mapalku palyara wiyala munu ngayulakutu warpungkula pitja. Munu wanyu wati panya Markanya kulu altira ngalya-kati ngayunya pitjala alpamilantjaku, panya paluru wirura warkaripai.

Uwa, nyangatjali Luke-anya ngali kutjara nyinanyi panya malpa kutjupa tjuṭaya anu. Panya wati Timatjalu mantatja tjuṭaku mukuringkula ngayunya wantikatira anu ngura Tjitja-lanikalakutu, ka wati panya Karitjannga kulu anu manta nyara Kalaitjiyalakutu. Ka Taitatjanya anutu ngura ini Talumai-tjiyaku.

¹² Kana Titjikatjanya iyanu ngura nyara Ipitjalakutu.

¹³ Ka Timitji, nyuntu ngura pala Taruwatjalawanu pitjalampa wanyu mantjira ngalya-kati ngayuku panya mantara, panya wati Kaapaku ngurangkaṅa watarkurira wantikatingu. Munu ngayuku panya nyiri rulumapi tjuṭa kulu mantjira ngalya-kati, panya tjuna-tjunanguru palyantja tjuṭa munu nanikuta miringuru palyantja tjuṭa. Palu nyara miringuru palyantja tjuṭakuna pulkara mukuringanyi, ka palunya tjananya watarkurinytja wiyangu ngalya-kati.

¹⁴ Palu Timitji, nyuntu panya ninti wati panya Alike-tjantaku. Panya paluru kutjupa kutjupa tjuṭa ayananguru palyalpai. Wati nyara paluru panyaṅi pulkara kuranu. Ka palunya ngapartji Godalu pika pulka ungkuku.

¹⁵ Panya paluru tjukurpa wangkanyangka ngayunya pulkara wiyamara ananangi. Ka nyuntu palunya ngulu nyangamatu nyuntunya kulu kurantjaku-tawara.

¹⁶ Panya kuwaripatarani mayatja pulkangu ngayunya witera kuutpangka wangkanytjaku tjunu, ka kutjupangu pakara ngayulanguru alpamilara anga-wangkanytja wiya alatjitu. Panya malpa uwankarangkuniya wantikatira anu. Palu palya, ngayulu Godala tjanampa tjapini pungkunytja wiya tjanampa kalyparingkunytjaku.

¹⁷ Palu ngayulu kuutpangka ngaranyangka Mayatja Jesunya ngayula tjungu ngarangi, mununi rapara witylanu palumpa tjukurpa winki utira tjakultjanytjaku anangu nyanga Jew wiya uwankarangka. Mununi wankarunu, panya tjana ngayunya iluntankunytjikitja mukuringangi.

¹⁸ Uwa, Mayatjaluni titutjarangu atunymananyi kura tjuṭangka-tawara, mununi wankara katiku ngura ilkaritjakutu palula tjungu titutjara nyinanytjaku. Kala wanyu palunya titutjarangu walkura mirawanima wityla pulkanya. Uwa mulapa.

¹⁹ Uwa Timitji, ankula minyma panya Puritjilala munu palumpa kuringka Akuwilala kulu wangka panya ngayulu pulanya rawangu kulini. Munu wati Anitji-puraku walingka nyinanytja tjuṭa kulu palu purunypatu wangka.

²⁰ Ka wati panya Iratjatjanya pitjanytja wiya ngura nyara Karintjala ma-nyinanyi. Kana wati ini Turu-pimatjanya wantikatingu ngura nyara Mailitjala, panya paluru pikatjarangu.

²¹ Palu Timitji, wanyu mapalku pitja wari kuwaripangka.

Kaya kuwari anangu nyangantu nyuntunya kulini ini Upulatjalu, Putantu, Lainatjalu, Kulutiyalu tjana. Nyanga paluru tjana uwankarangu nyuntunya kulini nyuntumpa pukularira. Kaya Jesuku walytja kutjupa tjuṭangu kulu palu purunytjuṭu ngayunya wangkangu nyuntula wangkanytjaku.

²² Uwa Timitji, alatjituna walkatjunanyi. Ka Mayatja Jesulu nyuntula tjungu nyinara nyuntunya rapara pukulmanama, munu nyuranya uwankara pukultju pulkangu kanyinma.

Lita Paulalu Walkatjura Iyantja Wati Ini Taitatjalakutu Titus Nyangatja Nganmanytju Nyakula Wangkanytjaku

Nyangatja lita Godaku tjukurpa Paulalu walkatjura iyantja wati ini Taitatjalakutu. Wati nyanga paluru nganmanypa Paulala tjungu war̄karingi munu Tjukurpa Palya wangkangi. Munu pula tjungu anu manta tjukutjuku ini Kuritalakutu ur̄ngka ngururpa, munu pula manta nyara palula ngura tjuṭangka para-ngarala Tjukurpa Palya Jesunyatjara anangu tjuṭangka tjakultjunangi. Palulanguru Paulanya malaku anu manta pul̄kakutu munu Taitatjanya wantikatingu anangu Jesuku kuwari kutju walytjaringkunyitja tjuṭangka wangkara nintintjaku.

Ka lita nyangatja Paulalu palulakutu iyanu manta nyara Kuritala nyinanyangka. Munu paluru Taitatjala wangkangu wati nyara palunya ngurara mankurpa ngurkankunyitjaku tjana Jesuku walytja tjuṭa atunymara kanyintjaku. Munu paluru piruku wangkangi alatji, "Tjanala nintinma wirura palyanyku nyinanytjaku pikaringkuwiya munu Jesunya tjukarurungku wanantjaku. Panya Jesunya mantakutu pitjangu anangu tjuṭa wankarunkunyitjikitja tjana palumpa mulamularingkula Kurunpa Milmilngatjararingkula Godaku walytjaringkula wirura nyinanytjaku." Alatji Paulalu walkatjura iyanu Taitatjalakutu paluru Kuritanya ngurara tjuṭangka nintintjaku.

Tjukurpa nyanganpa ngaranyi:

1:1-4 Paulalu nganmanytju wangkanytja

1:5-16 Atunymankupai tjuṭa ngurkankunyitjaku munu ngunti wangkapai tjuṭa paintjaku

2:1-15 Godaku walytja tjuṭa wangkara tjukaruruntjaku

3:1-11 Godalawanu tjukaruru palyanyku nyinanytjaku munu tjukurpa kurakura tjuṭa kulira wantinytjaku

3:12-15 Paulalu tjukurpa malatja wangkanytja

Paulalu Nganmanytju Wangkanytja

¹ Uwa Taitatja, ngayuluna Paulalu lita nyangatja nyuntumpa walkatjunanyi. Ngayulu panya Mayatja Godaku war̄karipai, mununa tjukurtjara Jesulu Christalu iyantja panya. Godalu anangu tjuṭa ngurkantanu palunya wanantjaku munu panya ngayunya witura iyanu palula tjanala tjukurpa tjukaruru tjakultjunkunyitjaku. Kana palunya tjananya wangkara nintilpai Christaku tjukaruru mulamularingkunyitjaku. Mununa tjanala wangkapai tjukurpa Jesulu wangkanytja uwankaraku tjana nintiringkula tjukarurungku uti kulintjaku. Panya tjukurpa nyanga tjukaruruku nintiringkulaya tjana kulilku tjukaruru nyinanytjikitjangku Godalu nyakula pukularinytjaku.

2-3 Uwa, nganana Jesuku mulamularingkunytjatjanungku alalangka patani ngula Godalu nganannya wankara pakaltjingga palula tjungura titutjarangku kanyintjaku. Panya Godalu nganmanytju mulapa uwankara paluntja kuwaripangka kalkunu palumpa walytja tjuta wankaru titutjarangku kanyintjikitjangku. Munu mulapatu tjintu panya paluru kalkuntjatjanungku Godalu palumpa tjukurpa wiru Jesunyatjara anangu tjutangka utinu tjintu panya palula alatjitu, panya paluru ngunti wangkapai wiya. Munu paluru ngayunya witura iyanu tjukurpa nyanga palunya Jesunyatjara tjanala tjakultjungkunytjaku, kana mulapatu tjanala parajakultjunangi Godalu nganampa wankarunkupailu witunnyangka.

4 Uwa Taitatja, lita nyangatjana nyuntumpa walkatjunanyi, panya ngayulu tjukurpa Jesunyatjara nyuntula nganmanytju wangkangu ka panyan kulira mulamularingu, kana nyara palulanguru nyuntunya katjanmananyi. Ka Mama Godalu Jesulu Christalu kulu nyuntunya pukultju pulkangku kanyinma munu nyuntunya kurunpa rapara pukulmanama.

Atunymankupai Tjuta Ngurkantankunytjaku

5 Uwa Taitatja, nyuntu panya ngali manta nyara Kuritala nyinaralpi Jesuku walytja tjutangka warkarangi. Palu panya ngayulu ngatalnguru anu malaku manta pulkakutu munu panyana nyuntunya wantikatingu manta nyara palula Godaku warka rawangku tu palyantjaku. Panya nyuntunya wangkangu Jesuku walytja tjuta nintintjaku ngura kutjupangka kutjupangka manta nyara Kuritala munu tjananya tjukaruruntjaku. Munu panyananta piruku wangkangu wati atunymankupai mankurpa ngurkantara tjungkunytjaku ngura panya palula tjanala Jesuku walytja tjuta atunymankunytjaku.

6 Ka uti wati nyara paluru tjana tjukaruru nyinama kura palyantja wiya kutjupa tjutangku palunya tjananya nyakula kuranmankunytjaku-tawara. Munuya uti paluru tjana kuri walytjangka kutju nyinama kutjupaku nyakula mukuringkunytja wiya. Ka uti palumpa tjanampa tjitji tjuta kulu palu purunypatu nyinama Jesuku walytja mulapa, munuya ngunytjunga mamangka tungunpungkunytja wiyangku wanganarangku kulira palyanyku nyinama, kutjupa tjutangku tjananya nyakula kuranmankunytjaku-tawara.

7 Panya Godalu wati atunymankupai tjuta ngurkantankupai palumpa walytja tjuta atunymara kanyintjaku, kaya uti palya mulapa tjukaruru nyinama anangu kutjupa tjutangku nyakula anantjaku-tawara. Munuya uti walytjangu tjananku mirawaninytja wiyangku wantima munuya anangu tjuta kutju alpamilantjikitjangku kulinma kanany-kananytju wituwituntja wiyangku. Munuya uti mirpanarira mapalku waruringkunytja wiyangku wantima, munuya wama pulka tjikira tarangkarinytja wiyangku wantima.

Uwa, utiya atunymankupai paluru tjana anangu kutjupa tjuta pikangku pungguwiyangku wantima, munuya uti anangu kutjupa ngunti kurantja wiyangku wantima mani pulka mantjintjikitjangku.

8 Munuya uti wirura nyinama, munuya ngura kutjupanguru pitjala nyinanyangka papulara wantinytja wiyangku altira tjanampa walingka mukulyangku kanyinma. Munuya uti paluru tjana wiru tjuta

kutju pukultu palyantjikitja mukuringama anangu tjutaku. Munuya uti wala winkingku palyantja wiyangku atatjura kulira palyanma ngunti kura palyantjaku-tawara. Munuya uti Godala tjukaruru palyanyku nyinama munu palula kutju kulinma.

⁹ Uwa, utiya atunymankupai paluru tjana Tjukurpa Palya Jesunyatjara pulkara mulamularingama, panya tjukurpa paluru tjukaruru alatjitu kampa kutjuparipai wiya. Tjukurpa palunya panyali nganmanytju tjanala wangkara nintinu tjukarurungku kulin-tjaku, kaya uti tjukurpa palunya kulira titutjarangku tjukarurungku kulilkatima wantinytja wiyangku. Munu palulanguru paluru tjana Jesuku walytja tjutangka tjukurpa palunya nintingku tjukarurungku nintilku, kaya kulira raparingkuku munu kunpuringkuku. Ka tjinguru anangu kutjupangku tjukurpa palunya wiyanmarā wantiku, ka uti wati panya atunymankupaingku palunya nintingku wangkara tjukarurunma.

Ngunti Wangkapai Tjuta Paintjaku

¹⁰ Panya ngura nyara palula anangu tjutangku Tjukurpa Palya wangkanyangka tjana wiyanmarā wantipai munuya kampa kutjupara tjukurpa ngunti wangkapai anangu kutjupa tjuta ngunti kurantjikitjangku. Kutjupa tjutangkuya ngunti wangkapai alatji, "Utiya malikitja tjutangku Jesuku mulamularingkula Jew tjutaku ara kulira wananna." Alatjiya Jesuku walytja tjuta ngunti wituwitulpai.

¹¹ Ka Taitatja, nyuntu munu wati atunymankupai kutjupa tjutangku kulu uti Jew palunya tjananya wangkara markunma ngunti nintintja wiyangku wantinytjaku, panya alatji wangkara tjana anangu kutjupa tjuta ngunti kurara kawantjingani manikitjangku ngunyitju mama tjitji kulukulu. Ka nyura nyanga palulanguru uti tjananya markunma.

¹² Panya wati wangkatjara kutjungku ngura pala Kuritanya nguraringku tjukarurungku wangkangu alatji, "Kuritanya ngurara tjutangkuya ngunti wangkapai. Paluru tjana kura pulka palyalpai munuya paluru tjana inura purunypa pikati alatjitu. Munuya pakuringkula warka palyantja wiya wantira nyinapai munuya rawangku manyungku mai kuka pulka ngalkupai."

¹³⁻¹⁴ Alatji wati panya wangkatjarangku nintingku tjukarurungku wangkangu. Ka nyuntu tjananya Jesuku walytja tjuta pulkara painma tjukurpa kampa kutjupara wangkawiyangku wantinytjaku. Munu tjananya wangkara tjukarurunma Tjukurpa Palya Jesunyatjara tjukarurungku kulintjaku. Panya Jew kutjupa tjutangku ara ngunti tjuta walytjangku kulintjitja wangkapai. Tjana panya tjukurpa tjukaruru Jesunyatjara wantingu munuya tjukurpa ngunti tjuta tjana walytjangku kulintja wangkanyi munuya anangu Jesuku walytja tjuta ngunti wangkara wituwitulpai palula tjanala kutju kulintjaku. Ka nyuntu tjanala wangkama tjukurpa palumpa tjanampa kulilwiyangku wantinytjaku munu tjukurpa tjukaruru Jesunyatjara kutju kulintjaku.

¹⁵ Panya anangu palyanyku nyinapai tjutangku mai kutjupa kutjupa uwankara ngalkupai palya kulira. Palu anangu ngunti kulilpai tjutangku Jesunya wantira mai kutjupa kutjupa uwankara kanpanmankupai. Panya nyara paluru tjana kulintja kawakawa kura mulapa, munuya putu tjukarurungku ngurkantankupai kura munu palya, munuya putu tjukaruru nyinapai.

¹⁶ Uwa, paluru tjana wangkapai alatji, “Ngaranā Godaku ninti pulka munula palunya tjukarurungku wanalpai.” Palu wiya, tjana kura kutju rawangku palyalpai, kala nyara palulanguru tjananya palyanyangka nyakula mapalku ngurkantankupai munula alatji kulilpai, “Wiya, nyanganpa Godaku ninti wiya ngurpa, munuya palunya wiyankupai alatjitu.” Uwa, tjana Godala tungunpungkupai munuya puṭu alatjitu kulilpai wirura palyanyku nyinanytjikitjangku. Nyara palulangurula tjananya ngurkantankupai tjana Godaku ngurpa nyinanyangka.

2

Godaku Walytja Tjuta Wangkara Tjukaruruntjaku

¹ Uwa Taitatja, nyuntu panya Tjukurpa Palya Jesunyatjara tjukarurungku kulilpai, munu nyuntu uti tjukurpa nyanga palunyaṭu tjanala wankara nintinma tjana kulu kulira wirura palyanyku nyinanytjaku tjukurpa pala palulawanu kutju. ² Munu wati pulka tjuṭangka wankama alatji, “Wati tjuṭa kulilaya! Munuya purkarangku kulinma mirpanarinytja wiyangku munuya pukulpa wirura nyinama anangu tjuṭangka nyuranya nyakula pukularinytjaku. Munu nyura uti Godaku mulamularingkula palumpa tjukurpa titutjarangku kulinma wantinytja wiyangku. Munuya anangu kutjupa tjuṭaku pulkara mukuringkula palyanma wiru tjuṭa kutju. Munuya kutjupa tjuṭangka nyuranya anara kurannyangka wantinytja wiyangku titutjarangku tungun-tunguntu Jesunya wanānma.” Alatji-puta tjanala wankama wati panya pulka tjuṭangka.

³ Munu minyama pulka tjuṭangka kulu alatji wangka, “Kulilaya! Nyura uti Godaku mulamularingkunyttatjanu palulawanu wirura palyanyku nyinama. Munuya kampangkaṭu wankanytja wiyangku wantima, munu wama pulka tjikira tarangkarinytja wiya wirura nyinama. Munuya wiru tjuṭa kutju nintinma, kaya minyama malatja tjuṭangka nyurala kulira nintiringkuku wiru tjuṭa kutju palyantjikitja nyuranya nyakunyttatjanungku.

⁴ Panya nyura alatji wirura nyinara nintinnyangkaya minyama tjukutjuku paluru tjana tjukarurungku kulilku wati kuri tjitji tjuṭa kulu mukulyangku wirura kanyintjikitjangku.” Alatji tjanala wankama minyama pulka tjuṭangka.

⁵ Munu minyama tjukutjuku tjuṭangka kulu alatji wangka, “Kulilaya! Purkarangkuya kulinma mirpanarinytja wiyangku, munuya pukulpa wirura nyinama wati kutjupangka ngarinytja wiya kuri walytjangka kutjuya nyinama. Munuyanku ngura walytjangku wirura atunymara kanyinma, munuya anangu kutjupa tjuṭaku kulu mukuringkula wiru tjuṭa kutju tjanampa palyanma. Munuya wati kuringku wankanyangka wanganarangku kulira palyanma.” Uwa alatji tjanala wankara nintinma minyama tjukutjuku tjuṭangka. Panya paluru tjana alatji wirura nyinanyangkaya anangu kutjupa tjuṭangka tjananya nyakula Godaku tjukurpa puṭu wiyankukuku.

⁶ Munu wati tjukutjuku tjuṭangka palu purunypaṭu wangka nyanga alatji, “Purkarangkuya kulinma mirpanarinytja wiyangku, munuya titutjara pukulpa wirura nyinama.”

7 Alatji tjanala wangka munu nyuntu kulū wirura palyanma tjana nyakula nyuntu purunytju arkara palyantjaku. Munu tjanala Godaku tjukurpa mulamulangku tjukarurungku tjakultjunama tjana tjukarurungku Godanya kulintjaku, nyuntunya mirawaninytjaku wiya.

8 Munu tjananya wirura palyanyku wangkara nintinma tjukurpa tjukaruru kutju alatjitu. Panya nyura tjukurpa tjukaruru kutju wangkanyangka anangu kutjupa tjuťangku kulira nyuranya puťu kuranmankuku. Kaya nyuntumpa mirpantju tjuťangku nyakula kulira kunťaringkuku munuya puťu kulilku nyuntunya ngalinya kurara pungkunytjikitjangku.

9 Munu piruku wangka wati unytju warķaripai tjuťangka nyanga alatji, "Kulilaya, nyurampa mayatjangku warķaku witunnyangkaya wanganarangku kulira palyanma kuraringkuwiyangku. Munuya wirura warķarima nyurampa mayatjangku nyakula pukularinytjaku.

10 Munuya nyurampa mayatjaku mantara munu kutjupa kutjupa tjuťa kulū nyakula kutitjungkunytja wiyangku wantima. Wiruraya wanganara warķarima nyurampa mayatjangku nyakula nyuranya wiru kulintjaku alatji, 'Munta wati nyanganpa wiru mulapa, tjukarurungku kutju palyalpai.'" Alatji tjanala wangka wati panya unytju warķaripai tjuťangka, ka paluru tjana nyuntula kulira wirura warķariku, kaya anangu kutjupa tjuťangka tjananya nyakula kulilku, "Munta, mulapa Godaku tjukurpa pulka alatjitu, kalanku uti kulira nintiringama tjukurpa nyanga wankarunkupaiku."

11 Uwa, Jesuku walytja tjuťangka nintinma tjukaruru palyanyku nyinanytjaku, panya Godanya anangu uwankaraku pulķara mukuringu munu panya pukultju pulķangku anangu tjuťa wankarunkunytjikitjangku katja palumpa iyanu nganampa ngalkilpa ilunytjaku.

12 Munu panya Godalu nganananya rawangku nintini palunya tjukarurungku wanantjaku kura kutjupa kutjupa tjuťa wantira. Panya paluru mukuringanyi nganaņa purķarangku kulintjaku mirpanarinytja wiyangku, munu tjukaruru wirura palulawanu nyinanytjaku.

13 Uwa, Mamanya mukuringanyi nganaņa alatji titutjara nyinanytjaku Mayatja Jesunya Wankarunkupainya malaku pitjanytjaku patara. Panya nyara palula arangka nganaņa palunya nyakuku pitalytji pulķa pitjanyangka witulya alatjitu.

14 Nyara paluru panya nganampa ngalkilpa ilungu Godalu nganananya kura palyantjitjangu kaly pangku pungguwiyangku wantinytjaku. Paluru ilungu nganananya wankarunkunytjikitja nganaņa karalyarira kura wantira palula tjunguringkula palumpa walytja mulapa nyinanytjaku tjukaruru mulapa. Kala nyara palulanguru uti palula wanganarangku kulira kutjupa kutjupa wiru tjuťa ipilytju palyanma.

15 Uwa, tjukurpa nyanga palunya tjananya rawangku tjanala nintinma manta pala Kuritala nyinanytja tjuťangka. Panya Godalu nyuntunya ngurkantara tjunu palumpa warķa rapangku palyantjaku ngura nyara palula, ka nyuntu tjanala rapangku wangkama nyuntunya anannyangka kulira tjituru-tjitururinytja wiyangku. Munu tjananya

wangkara kunpunma rawangku Jesunya wanantjaku. Munu kutjupa tjutangku kura palyannyangka nyakula tjananya ngulu wiyangku wangkara tjukarurunma.

3

Wiru Tjuta Kutju Palyantjaku

¹ Uwa Taitatja, anangu Jesuku walytja tjutangka wangka tjana mayatja tjutangka wanganrangku kulintjaku wati kamanta pulka tjutangka kulu. Wangka tjananya wirura palyanyku nyinanytjaku munu anangu kutjupa tjutaku kulu rawangku wirura pukultu palyantjaku.

² Munu tjanala wangka anangu kutjupa tjuta nyakula wangkawiyangku wantinytjaku munu pikaringkuwiya kalypa nyinanytjaku uwankaraku mukulya. Uti tjananku mirawaniiwiyangku wantira anangu tjutangka pilunpa pukulpa nyinama.

Godalu Ngaltunyttju Pulkranku Nganananya Kuranguru Wankarunu

³ Panya nganmanypa nyuntu nganana watarku nyinangi Godaku ngurpa, munula palula tungunpungkula palumpa tjukurpa wanganrangku kulira palyalpai wiya. Kaya kutjupa tjutangku nganananya ngunti kurara wituwitulpai tjanala tjunguringkula kura palyantjaku. Kala iwara kuraku pulkara mukuringkula kura putu wantingi munula walytjangku kulira kura kutju palyaningi munula anangu kutjupa tjutangku kutjupa kutjupa wiru tjananku walytjangku kanyinnyangka nyakula nyararingkupai. Kaya kutjupa tjuta nganampa pulkara kuraringkupai, ka nganana ngapartji kuraringkupaitu tjanampa.

⁴⁻⁵ Uwa, nganana kura mulapa nyinangi Godanya kulintja wiya alatjitu, kalanya uti pungkula iluntanama. Palu Godanya nganampa pulkara mukuringu ngaltunyttju pulka munu panya palumpa katja iyanu mantakutu nganampa ngalkilpa anga-ilunytjaku. Nyara palulanguru, nganampa ilunyangka Godalu nganananya kura tjuta palyantjitjanguru kalypangu wantinyi pungkuwiyangku. Tjinguru nyura kulini paluru nganananya wiru tjuta palyantjitjanguru wankarunu. Palu wiya, paluru nganampa pulkara ngalturingkula nganananya wankarunu palula tjungu titutjara nyinanytjaku. Paluru Kurunpa Milmilnga nganana unngu tjarpatjunu, ka paluru nganananya kurunpa kampa kutjupanu nganana kura palyantja wiyaringkunytjaku. Kala nyara palulanguru wankaru nyinanyi wanka kuwaritjatjara.

⁶⁻⁷ Uwa, Godalu intjanungku Kurunpa Milmilnga nganana unngu tjarpatjunu Jesunya Christanya nganampa ngalkilpa ilunyangka. Alatji paluru nganampa pulkara mukuringkula palyanu ngaltunyttjungku kutjukampa alatjitu, munulanya alatji wangkangu, "Ngayulu kuwari nyuranya kura tjuta palyantjitjanguru pungkunytjaku wiyaringu, panya Jesunya nyurampa ngalkilpa ilunyangka." Ka nyara palulanguru nganana mulamularingkula ala-ala patara nyinanyi paluru nganananya kalkuntjatjanungku ngura wirukutu katinytjaku, panya ngura nyara palulala nganana palula tjungu wanka titutjara nyinaku.

⁸ Uwa Taitatja, tjukurpa nyanganpa ngayulu nyanga nyuntula wangkanytja uwankara tjukaruru mulapa ngaranyi. Ka nyuntu

Jesuku walytja tjuṭangka rapangku wangkara nintinma mulamulangku, kaya nyuntula kulira wiru tjuṭa kutju titutjarangku palyantjikitjangku kulilka anangu tjuṭa alpamilantjikitjangku. Panya tjukurpa nyanga ngayulu nyuntula wangkanytja tjuṭa wiru mulapa ngaranya, kaya anangu tjuṭangku wanganarangku kulirampa Godanya tjukaṭurungku wanantjikitja nintiringkuku.

Tjukurpa Kurakura Tjuṭa Kulira Wantinytjaku

⁹ Palu anangu kutjupa tjuṭangkuya tjukurpa ara tjukutjuku tjuṭa unytjungku rawangku ngaparku wangkapai. Ka nyuntu palunya tjananya kulira wantima, panya tjana tjukurpa miri tjuṭatjara rawangku ngaparku wangkapai tjamu tjuṭaku ara tjuṭa kulukulu unytjungku alatjitu, munuya tjukurpa nyara palunya tjananya kutju kulilpai. Munuya paluru tjana Moseku tjukurnguru kulu wangkara pika-pikaringkupai. Palu tjana tjukurpa nyanga palu purunypa tjuṭa ngaparku wangkara Jesuku walytja tjuṭa puṭu wangkara kunpuni pukulpa rapa nyinanytjaku, ka nyuntu tjananya kulira wantima tjana wangkanyangka munu tjanala tjunguringkunyitja wiyangku wantima.

¹⁰ Palu tjinguru anangu kutjupa tjuṭangku tjukurpa nyanga purunypa Jesuku walytja tjuṭangka rawangku wangkama, kaya kulira kulira pika-pikaringkula tjararingkula mauntalpa mauntalpa nyinaku. Nyara palula-tawara anangu palunya tjananya rawangku painma wantinytjaku. Ka tjinguru paluru tjana wantinytja wiyangku rawangku ngaparku wangkanyangka nyuntu uti palunya tjananya paira iyanma nyurala piruku tjunguringkula kurantjaku-tawara.

¹¹ Kulinin Taitatja? Panya anangu nyanga palu purunypa tjuṭa kura nyinanyi kulintja kawakawa. Kaya anangu tjuṭangku palunya tjananya Godala tungunpungkungangka nyakula nintingu kulilpai, "Mulapa paluru tjana tjukurpa kurakura ngunti wangkapai." Ka nyuntu Jesuku walytja tjuṭangka wangka anangu nyanga palu purunypa tjuṭa kulira wantinytjaku.

Tjukurpa Malatja

¹² Palu Taitatja, wanyu kulila. Ngayulu kulini wariringkungangka ngura ini Nika-palitjala ankula nyinanytjikitjangku piriyakuturingkunyitjaku paṭara. Palu ngayulu ankunyitja kuwaripangkaṅa wati kutju nyuntulakutu ma-iyalku tjinguru Atimatjanya munta tjinguru Titjikatjanya. Ka wati kutju nyuntula ma-wirkankungangka nyakulampa nyuntu ngalya-pakala ngayulakutu munu ngaparikatira wirkara ngura panya Nikipala kaṅanta nyara palula nyakuku.

¹³ Ka nyangatja wati kutjara Apalatjanya pula Tjinatjanya kuwari nyanganguru ma-pakaṅi ngura tjuṭakutu ankunytjikitja. Tjinatjanya panya lawyer, tjukurpa ara tjuṭaku ninti. Ka pula ma-wirkankungangkampa palunya pulanya nyakula alpamilanma munu mai, mani, kutjupa kutjupa tjuṭa kulu ungama ngura kutjupa tjuṭakutu ankunytjaku. Palya?

¹⁴ Uwa Taitatja, ngura nyara palula Jesuku walytja tjuṭangka rawangku wangkara nintinma tjana titutjarangku wiru tjuṭa kutju palyantjaku anangu ngaltutjara tjuṭa atunymankunytjikitjangku. Utiya wiruṭa pakuringkuwiya warakima, munuya palulanguru pukulpa nyinaku Godala mirangka.

¹⁵ Uwa, alatjituṅanta wangkanyi. Ka nyanga ngayula tjungu nyi-nanytja tjuṅangku nyuntunya kulini nyuntumpa pukularira. Ka ngura nyara palula panya Jesuku walytja tjuṅa nganampa mukuringanyi, ka-puta palula tjanala wangka panya nganaṅa tjananya rawangkuṅu kulini.

Uwa, ka Godalu nyuranya uwankara pukultjungku wirura kanyinma.

Lita Paulalu Walkatjura Iyantja Wati Ini Paalimantakutu Philemon Nyangatja Nganmanytju Nyakula Wangkanytjaku

Wati panya Paalimangga Paulaku malpa mulapa nyinangi. Ka Paulalu lita nyangatja palumpa walkatjuru ngura panya Rome-ala nyinara munu palulakutu iyanu ngura ini Kalatjilakutu. Munu paluru tjakultjunangi lita nyangangka wati panya Anitjimanya-tjara, panya nganmanytju Paalimantu wati nyanga palunya maningka payamilanu palumpa warakarinytjaku. Ka paluru tjukutjuku rawa nguwanpa warakarira kumpira wirtjapakanu ngura kutjupakutu parari mulapa, munu wirkanu ngura panya Rome-ala. Ka Paulanya ngura nyara palula nyinangi munu paluru wati panya Anitjimala tjakultjunangi tjukurpa Jesunyatjara, ka paluru kulira Jesuku mulamularingkula palumpa walytjaringu. Ka lita nyangangka Paulalu Anitjimaku anga-wangkangi wati panya Paalimangga palumpa kalyparingkunyitjaku munu wirkankunyangka nyakula patara pukultu mantjintjaku munu kanyintjaku palumpa ngurangka.

Tjukurpa nyanganpa ngaranyi:

- 1-3 Paulalu nganmanytju wangkanytja
- 4-7 Paulalu Godala tjapintja Paalimanku
- 8-21 Paulalu wati Anitjimaku anga-wangkanytja
- 22-25 Paulalu tjukurpa malatja wangkanytja

Paulalu Nganmanytju Wangkanytja

¹ Walytja wiru! Ngayulu Paulalu kuwari nyuntumpa lita walkatjunanyi, panya nyuntu nganana uwankara Jesuku warakaripai tjuta nyinanyi. Kana ngayulu kuwari tjailangka unngu nyinanyi panya Jesuku tjukurpa para-wangkanyangkaniya witera tjarpatjuru. Ka Timitjinya kulu ngayula tjungu nyinanyi kuwari, munuli nyanga paluru ngali tjunguringkula lita nyangatja nyuntulakutu walkatjura ma-iyani. Nyanga paluru panya nyuntumpa ngalimpa walytja nyinanyi Jesulanguru.

² Uwa, munu lita nyanga palunya nyuntumpa kuri Apiyala kulu nintila, panya nyara paluru kulu nganampa kangkuru nyinanyi Jesulanguru. Munu piruku nintila wati ini Akipala kulu paluru kulu nyakula wangkanytjaku, panya wati nyara paluru kulu Jesunya tungun-tunguntu wanalpai nganana purunytju. Munu anangu kutjupa tjutangka kulu nintila panya nyuntumpa ngurangkaya tjunguringkula Godanya walkulpai nyinanyi, nyara palula tjanala kulu lita nyangatja nyakula wangka tjana kulu kulintjaku.

³ Ka Mama Godalu Mayatja Jesulu Christalu kulu nyuranya pukultju pulkangku kanyinma munu nyuranya kurunpa rapara pukulmanama.

Paulalu Godala Tjapintja Paalimanku

4-5 Ka ngayulu Godala tjapira nyuntunya kulu rawangku kulilpai mununa nyuntulanguru Godanya titutjarangku walkulpai, panya ngayulu kulinu nyuntu Godaku walytja tjutaku pulkara mukuringkunyangka, munu Mayatja Jesuku pulkara mulamularingkunyangka.

6 Panya nyuntu kuwari tjanala Jesuku walytja tjutangka tjunguringkula wangkara kulilpai nyinanyi. Kana palulanguru Godala nyuntumpa tjapini, nyuntu tjanala tjunguringkula wiru tjutaku nintiringkunyajaku, panya nganana kutjupa kutjupa wiru tjuta palyantjaku ngaranya Christanya pukulmankunyitjikitjangku.

7 Uwa mulapa nyuntu mukulyangku tjananya pukulmanangi Godaku walytja tjuta, kana nyangatja kulira kurunpa raparingu mununa pulkara pukularingu.

Paulalu Wati Anitjimaku Anga-wangkanytja

8-9 Palu kulila wanyu! Tjukurpa kutjuna nyuntula wangkanytjikitjangku kulinigi, panya nyuntu Jesuku walytja tjutaku mukuringkupai. Kana nyuntula purkarangku tjapini tjukurpa kutjupa kulintjaku munu palyantjaku.

Tjinguruna nyuntunya tjukururungku wangkama, panya ngayulu Christaku walytja, ka nyuntu kulu palumpa walytja nyinanyi munu palula wanganarangku kulilpai palumpa tjukurpa kulu. Palu ngayulu nyuntunya purkarangku tjapini ka nyuntu walytjangku kulila. Panya ngayulu kuwari wati tjilpiringu, mununa puritjina nyinanyi tjaila ungu panya tjananiya tjailangka tjarpatjuna Jesunya wanannyangka. Kana nyuntula purkarangku tjapintjikitjangku kulinigi.

10 Kan yaaltji kulini? Wati panyakuna tjapini panya nyuntumpa nganmanypa wararingi, wati panya Anitjimaku. Nyanga palunya tjailangka nyanga ungu nyinara nyangu, mununa alpamilanu palunya, ka paluru Jesuku mulamularingu, ka ngayulu kuwari palunya katjanmananyi paluru Jesuku walytjaringkunyangka. Wati nyanga palumpana nyuntula tjapini nyanga palunya kulintjaku.

11 Nganmanypa panya nyanga paluru nyuntula kulilpai wiya nyinangi, palu kuwari nyanga paluru kampa kutjuparingu munu wanganararingu. Munu paluru kuwari ngayula kulilpai nyinanyi munu nyuntula kulu kulilku wanganarangku.

12-14 Kana kulinigi wati nyanga palunya kanyintjikitjangku nyangangka. Panya ngayulu pulkara mukuringanyi wati nyanga palumpa. Tjinguru paluru ngayula tjungu nyinara ngayunya alpamilanma nyuntumpa arangka nyinara, panya nyuntu kuwari ngura parari nyinanyi. Palu kuwarina palunya nyuntulakutu malakungku ma-iyani. Panya ngayulu nyuntula-wararangku tjapintjikitjangku kulinigi, panya wati nyanga paluru nyuntumpa alatjitu kuwari nyinanyi ngayuku wiya. Ka paluru nyuntula malaku wirkankunyangkampa nyuntu mukuringkula palula wangkama munu walytjangku ngurkantankula palunya malakungku iyala ngayulakutu paluru nyuntumpa arangka nyinakatinytjaku nyangangka munu ngayunya alpamilantjaku. Uwa, ngayulu nyuntula anga-angara pauntjingara mayatja-mayatjangku wangkanytja wiya. Palu tjukurpa kutju nyanga palunya nyuntula tjananyi, ka nyuntu walytjangku kulila munu ngurkantara.

15-16 Paluru panya nyuntunya wantikatingu munu nyuntulanguru anu. Palu palya, panya nyangangka wirkara paluru kulinu tjukurpa

Jesunyatjara munu kulira palumpa mulamularingu. Nyanga paluru nyuntumpa warkaripai panya nyinangi munu nyuntunya wantikatingu, palu kuwari paluru Jesuku walytjaringu munu nyuntulakutu malaku wirkankuku nyuntumpa warkaripai kutju wiya palu Jesuku walytjaringkula paluru nyuntumpa kulu walytjaringu. Panya paluru kampangkatu kumpira wirtjapakanu munu nyuntulanguru patu nyinanyi, palu kuwari paluru malaku nyuntulakutu ma-pitjanyi munu titutjara nyuntula tjungu nyinaku mantangka munu ngula ngura ilkaritjangka kulu. Wati nyanga palumpana kuwari pulkara pukularinyi, ka nyuntu kulu palumpa pulkara mulapa pukulariku panya paluru kuwari nyuntumpa walytja mulararingu Jesulanguru.

¹⁷ Ka nyuntu ngayunya malpa wiru mulapa kulini. Palulanguru nyuntu uti wati nyangatja pukultu mantjinma nyuntula wirkankunyangka munu palunya kanyinma. Ngayulu tjinguru nyuntula wirkankunyangkampa nyuntu ngayunya pukularira mantjilku, palu purunyitju wati nyanga palunya mantjila munu kanyinma nyuntumpa ngurangka.

¹⁸ Mulapa panya nyuntun palunya mani pulkangka payamilanu, ka paluru panya nyuntunya wantikatira tjituru-tjituru palyanu. Tjinguru paluru kutjupa kutjupa kutitjura katingu nyuntumpa, kan tjinguru palulanguru nyuntunya malakungku payamilantjaku mukuringanyi. Palu wati palula nyuntunya malakungku payamilantjaku wangkanytja wiyangku ngayula ngatjila, kananta ngayulu nyuntunya uwankara ungkuku, ngayuku maninguru.

¹⁹ Nyawa, ngayuluna Paulalu kuwari mara walytjangku walkatjura kalkuni alatji, *“Mulapana nyuntunya mani panya nampa palunya untkuku.”* Palu ngayulu nyuntula ngatjintja wiya panyanguru, panya ngayulunanta Jesunya nyuntula tjakultjunu, kan palulanguru palumpa walytjaringu.

²⁰ Palu ngayulu nyuntunya tjapini nyuntu wati nyanga palumpa kalyparingkula palunya pukultu malakungku mantjintjaku, panya nyuntu Mayatja Jesunya kulilpai kuwari nyinanyi. Kana palulanguru kulira pulkara pukulariku nyuntu palunya malakungku mantjira kanyinnyangka.

²¹ Palu ngayulu lita nyangatja walkatjura kulini panya mulapa nyuntu palyalku ngayulu nyanga nyuntula tjapintjanya munun tjinguru piruku munkara palyalku pulka mulapalta.

²² Wanyu kulila! Nguratju nganmanyitju palyara wanti ngayulu nyuntumpa ngurangka ma-pitjala ngarinytjaku, panya nyura Godala tjapiningi ngayuku, kana tjinguru kuwari nguwanpa tjailanguru pakalku mununa nyuralakutu ma-pitjaku.

Paulalu Tjukurpa Malatja Wangkanytja

²³ Ka wati nyanga Papatjanya ngali kuwari nyinanyi nyanga tjaila unngu. Wati nyanga palunya kuluya Jesuku tjukurpa tjakultjunkunyangka tjailangka witera tjarpattjunu. Ka paluru ngayula wangkangu nyuntula ma-tjakultjunkunytjaku panya paluru nyuntunya kulini nyuntumpa pukularira.

²⁴ Ka wati nyanganpa kulu kuwari nyinanyi ngura nyangangka Jesuku tjukurtjara tjuta wati panya Markanya, Ari-tjakatjanya, Timatjanya, Luke-anya tjana kulu. Munuya nyanga paluru tjana palu

purunypatu ngayula wangkangu nyuntula ma-tjakultjunkunytjaku
panya tjana nyuntunya kulilpai.

²⁵ Uwa alatjituna wangkanyi. Ka Mayatja Jesulu Christalu nyuranya
pukultju pulkangku kanyinma.

Lita Iipuru Tjutakutu Iyantja Hebrews Nyangatja Nganmanytju Nyakula Wangkanytjaku

Putula kulini nganalu walkatjunu tjukurpa nyangatja, panya ini kuranyu ngaranytja wiya Paulaku lita tjuta purunypa. Palu nintipuka tjutangku kulilpai tjinguru Paanapatjalu walkatjunu, munta tjinguru Apalatjalu, munta tjinguru Tjaalatjalu walkatjunu.

Panya Jesunya malaku ilkarikutu ankunyangka palumpa nintintja tjutangku Tjukurpa Palya Jesuku para-tjakultjunangi anangu Israelkunu Jew tjutangka. Kaya tjara mulamularingu Jesuku munuya palumpa walytjaringu. Kaya palunya tjananya wangkapai alatji, *Jesuku walytja Iipuru tjuta*, panya tjanampa wangka Iipuru. Kaya Jew kutjupa tjutangku mulamularingkunyitja wiyangku wantingi panya paluru tjana Moseku tjukurpa kutju pulkara kulilpai Jesunya wantira.

Munuya paluru tjana Jesuku walytja Iipuru tjuta pulkara kuraningi Jesunya wanannyangka, munuya pulkara mukumukuningi tjananya malaku pitjanytjaku tjanalakutu. Kaya Iipuru kutjupa tjutangku tjinguru kulinigi tjanala munuya nguwanpa malaku anangi ara panya nganmanyitjangka piruku nyinanytjikitja.

Ka pala palulanguru tjukurpa nyangatja wati kutjupangku kulira walkatjunu tjanampa tjananya kumpuntjikitjangku Jesunya wantinytja wiyangku tungun-tunguntu wanantjaku. Paluru alatji tjanala wangkangi lita nyangangka,

“Ara nganmanyitja panya Godalu Mosenya ungkunyitja, nyara paluru unytju ngarangi munu putu anangu tjuta palyanigi tjana Godala mirangka tjukururu ngaranytjaku. Palu Jesunya pitjangu munu punu katakutjarangka ilura palumpa milkali tjutira ara kutjupa palyanu kuwaritja, ara panya nganmanyitjangka waintarinytja alatjitu. Ka ara nyanga palunya wanannyangka kutju Godalu nganannya palyalku palula mirangka tjukururu ngaranytjaku, nganana Jesuku mulamularingkunyangka.”

Ka lita nyangangka ngaranyi tjukurpa nganana kulu kulintjaku panya Jesunya pulka mulapa uwankarangka waintarinytja, ka iwara panya paluru alantja nganana Godala wirkankunyitjaku wiru mulapa ngaranyi iwara kutjupa tjutangka waintarinytja.

Tjukurpa nyanganpa ngarinyi:

1:1—2:18 Angelpa tjuta palya, palu Godaku katja pulka mulapa tjanala waintara.

3:1—4:13 Mosenya palya, palu Godaku katja pulka mulapa palula waintara.

4:14—7:28 Jesunya tjukurtjara pulka nganampa nyinanyi kutjupa tjutangka waintara alatjitu.

8:1—9:22 Godalu Jesulawanungku kalkuntja pulka mulapa ngaranyi Moselawanungku kalkuntja purunypa wiya.

9:23—10:18 Christanya nganampa ngalkilpa ilura milkali
 tjutinyangka kutju Godalu nganananya kura tjuṭa
 palyantjitjanguru kalypangku wantipai
 10:19-39 Palulangurula uti raparingkula Godala ilaringkula palula
 titutjara tjungu nyinama
 11:1-40 Nganmanyitja tjuṭangku nganananya nintintja Godaku rawa
 mulamularingkunyjtaku wantinytja wiya alatjitu
 12:1-13 Godanya nganampa mama nyinanyi munu nganananya
 tjukarurulpai.
 12:14-29 Godanya kulira wantinytjaku-tawara
 13:1-8 Anangu kutjupa tjuṭa mukulyangku wirura kanyintjaku
 13:9-19 Tjukurpa kurakura tjuṭa ngunti wangkara nintinyangka
 kulira wantinytjaku
 13:20-25 Tjukurpa malatja

Godalu Ngananala Wangkangu Palumpa Katjawanungku

¹ Uwa, nganmanytju Godalu wangkatjara tjuṭawanungku
 wangkangi tjamula tjanala. Paluru tjuṭa-arangku wangkangi
 wangkatjara kutjupa kutjupangka, tjukurpa kutjupa kutjupa tjuṭa.

² Palu kuwari nyanga tjintu malatja ilaringkunyangka Godalu
 ngananala wangkangu palumpa katjawanungku. Panya palumpa
 katja kuwaripatjara mulapa nyinangi palula tjungu munu pula tjuṅ-
 gungku uwankara palunu ilkari, manta kulū. Ka katja palunya Godalu
 wangkara tjunu uwankara mulapa mayatjangku kanyintjaku.

³ Godanya panya wiru mulapa nyinanyi pitalytji pulkanya, ka
 paluru pitalytji nyanga palunya ngananala nintini panya paluru Mama
 purunypa alatjitu nyinanyi, wiru mulapa. Munu paluru manta
 ilkari uwankara tjukarurungku kanyini witulya pulkangku. Munu
 paluru nganampa ngalkilpa ilungu Godalu nganananya kura tjuṭa
 palyantjitjanguru kalypangku pungguwiyangku wantinytjaku. Munu
 panya palula malangka paluru ilkarikutu ankula Godala witulya
 pulkangka tjunguringkula mayatja pulkaṭu nyinanyi.

⁴ Uwa, paluru angelpa tjuṭa purunypa wiya. Panya Godalu palunya
 angelpa tjuṭangka waintara tjunu pulka mulapa. Munu angelpa tjuṭa
 pulkanmankunyitja wiyangku palunya kutju katjanmankula tjunu
 mayatja pulka.

⁵ Panya nyiringka iriti walkatjunkunyitja ngaranyi Godalu
 wangkanyitja nyanga alatji,
 “Nyuntun ngayuku katja, kana nyanganguru nyuntunya titutjarangku
 katjanmankuku.” *

Ka nyangatja wanyu Godalu angelta wangkangu? Wiya, Godalu
 angelta nyanga alatji wangkanyitja wiya. Palu palurunku palumpa
 katja kutju tjakultjunangi Jesunya. Godalu Davidala iriti wangkangi
 nyanga alatji,

“Palatja ngayuku katja, ka ngayulu palumpa Mama.” *

Ka nyangatja wanyu Godalu angelpa tjakultjunangi Davidala?
 Wiya, paluru angelpa wangkanyitja wiya, palurunku palumpa katja
 wangkangi.

* 1:5 Psalm 2:7 * 1:5 2 Samuelku 7:14

6 Panya palumpa katja kutjukurutja mantakutu iyantjikitjangku kulira Godalu wangkangu alatji,
 “Angelpa uwankarangkuya kulinma munuya nyanga palunya walkunma.” *

7 Palu nyaa wanyu Godalu angelpa tjuta wangkangi? Wiya, iriti panya paluru wangkanytja nyiringka ngaranyi tjukurpa nyanga angelpatjara alatji,

“Panya Godalu angelpa tjuta witulpai kutjupa kutjuparira palumpa warkarinytjaku,

panya walpa purunyarira munu waru tili purunyarira.” *

8 Palu tjukurpa kutjupa ngaranyi Godalu palumpa katja wangkanytja nyanga alatji,

“Nyuntun mayatja pulka mulapa munun nyuntumpa anangu tjuta titutjarangku kanyilku wiyaringkunyitja wiyangku.

Nyuntu tjananya tjukarurungku kanyilku kurara kanyintja wiyangku.

9 Munu tjana tjukarurungku palyannyangka kutju nyuntu pukularipai palu kura palyannyangka nyuntu puu pukularipai.

Ka panya nyara palulanguru nyuntu tjukarurungku kulinnyangka Godalu nyuntunya nganmanytju mayatja pulka mulapa tjunu panya nyuntumpa malpa tjutangka waintarinytjaku,

kan pulkara pukularinyi.” *

10 Ka tjukurpa kutjupa ngaranyitu nyanga alatji Godalu wangkanytja, “Mayatja, nyuntun kuwaripatjara mulapa uwankara wiyangka manta ilkari palunu,

11-12 Ka panya ngula manta ilkari wiyaringkuku, palu nyuntu wiyaringkunyitja wiya titutjara alatjitu nyinaku.

Wanyu kulila panya mantara anangitja anangungku rawangku kanyinnyangka katakatipai ka araltjara wanipai munu kuwaritjangka tjarpapai.

Palu purunypa manta ilkari ngula wiyaringkunyangka nyuntu ilkari kuwaritja manta kuwaritja tjunkuku.

Palu nyuntu kampa kutjuparinytja wiya panya paluruu alatjitu rawa nyinaku wiyaringkunyitja wiya.” *

Alatji nyiringka iriti walkatjunkunyitja ngaranyi Godalu tjukurpa Jesunyatjara wangkanytja.

13-14 Uwa, mulapa Godalu angelta wangkanytja wiya mayatjarinytjaku, palu palumpa katjangka kutju wangkangu nyanga alatji,

“Pitja munu ngayula tjunguringkula mayatjari,

kana nyuntumpa mirpantju tjuta tjarulku,

ka nyuntu tjanala waintarira mayatja pulka mulapa nyinaku.” *

Uwa, nyangatja Godalu palumpa katjangka wangkangu. Ka angelpa tjuta wanyu nyaa? Wiya, tjana kurunpa tjuta nyinanyi munuya Godanya kulira walkulpai, ka panya tjananya Godalu witura iyalpai anangu palumpa walytja tjuta atunymankunyitjaku. Panya anangu palunya tjananya Godalu ngula wankarunkuku.

* 1:6 Psalm 97:7 * 1:7 Psalm 104:4 * 1:9 Psalm 45:6-7 * 1:11-12 Psalm 102:25-27

* 1:13-14 Psalm 110:1

2

Tjukurpa Nganampa Wankakutu Mulapa

¹ Uwa, Jesunya pulka mulapa angelpa tjutangka waintara, kala uti Jesuku tjukurpa nganaṅa nganmanytju kulintjatjanungku purkarangku kulinma watarkurinytja wiyangku. Panya nganaṅa tjukurpa nyanga palumpa watarkurirampa Jesulanguru paṭuringkuku.

² Panya iriti puli panya ini Tjaniyala angelpa tjutangka Mosenya ungu Godaku tjukurpa. Ka tjukurpa nyara paluru panya tjukururu mulapa, panya anangungku tungunpungkula tjukurpa palunya kulira wantinyangka palumpa kura ngapartji utiringu.

³ Ka tjukurpa nyanga pulka Jesuku nganaṅa kulira wantinyangka nganampa kura pulka palu purunypatu ngaraku, panya tjukurpa nyanga paluru pulka mulapa kulira mulamularingkula wankaringkunyjtaku. Palu nganaṅa kulira wantirampa puṭu wankaringanyi. Panya tjukurpa wanka nyanga palunya Mayatja Jesulu-wararangku tjanala tjakultjunu, ka tjana ngapartji kulintjatjanungku nganaṅala utingku ngalya-tjakultjunu kulira mulamularingkunyjtaku.

⁴ Ka tjana tjukurpa nyanga palunya nganaṅala wangkanyangka Godalu miracle kutjupa kutjupa tjuṭa nintipukangku palyanangi witulya pulkangku, nganaṅa nyakula tjukurpa nyanga palumpa mulamularingkunyjtaku. Munu Godalu Kurunpa Milmilnga nganaṅala unngu tjarpatjunu, ka nganaṅanya witulyananyi Kurunpa Milmilṭu kutjupa kutjupa tjuṭa witulya pulkangku palyantjaku paluru nintinnyangka. Kala nyanga alatji witulyatjararingkula tjukurpa panya palumpa pulkaratu mulamularinganyi. Kala wanyu tjukurpa pulka nyanga palunya kulira wantima? Wiya, utilanku kulira wantinytja wiyangku wantima wankakitjangu.

Jesunya Anangurira Ngananyanya Purunyaringu

⁵ Ka panya Godalu angelpa tjuṭa tjunkunytja wiyatu mayatjarira uwankara kanyintjaku ngula manta ilkarī kuwaritja utiringkunyangka.

⁶ Palu Godalu anangu tjuṭa tjunu mayatjarira kanyintjaku, panya nyiringka iriti walkatjunkunytja alatji ngaranyi wati kutjupangku wangkanytja,

“God, nyuntu panyan pulka mulapa, ka panya anangu tjuṭa minga purunypa.

Palu nyuntu tjananya ngaltunytjungku kulilpai,

Munun tjananya atunymara kanyilpai.

⁷ Panya nyuntu anangu palyanu pulka mulapa nyinanytjaku angelpa tjutangka itingka, pitalytji pulkatjara.

⁸ Munu panyan nyuntu anangu tjunu mayatjarira nyuntu panya paluntja uwankara kanyintjaku.” *

Panya alatji ngaranyi iriti walkatjunkunytja, kala nyanga palulanguru kulini mulapa Godalu anangu tjunu uwankara mulapa atunymara kanyintjaku.

Palu kuwarila puṭu nyanganyi anangu kutjupangku uwankara tjukururungku kanyinnyangka. Wiya alatjiṭu.

* 2:8 Psalm 8:4-6

⁹ Palu nganaṅa Jesunya kutju nyanganyi. Paluru kutju mayatja pulka nyinara uwankara kanyini. Nyara palunya panya Godalu angelpa tjuṅguru unytjungkungku tjarunu pula tjungu nyinanytjatjanungku paluru anangurira ngalkilpa ilunytjaku anangu uwankaraku. Godalu panya mukulya pulkangku iyanu anangu tjuṅa ngalkintjaku, ka panya paluru pikatjararingkula anga-ilungu nganaṅa kura tjuṅa palyantjitjanguru. Nyara palulanguru paluru ilunytjitjanguru Godalu palunya pulka mulapa tjunu uwankarangku palunya walkuntjaku.

¹⁰ Nyangatja Godalu tjukarurungku palyanu nganaṅanya palumpa tjitji tjuṅa wankaru malakungku wirkakatinytjikitjangku. Panya paluru kutjungku uwankara paluntjatjanungku wirura kanyilpaingku kulira Jesunya iyanu anangu tjuṅaku iwarankunytjaku Godalakutu, tjana palumpa walytjarangkula wirkankunytjaku palumpa pitalytjingga. Panya Jesunya iyanu pikatjararingkula ilunytjaku, ka nyara palulanguru kutju paluru nganaṅanya wankaru wirkakatinyi Godalakutu.

¹¹ Panya Jesunya nganaṅa walytjarara walytjarara Mama kutjutjara nyinanyi palumpa walytja kutjupa tjuṅa kulukulu. Nyara paluru nganaṅanya wankarunu kura nganampa paltjira wiyara, munulanya palulangurulta kunta wiyangku pukultu malanypanmananyi.

¹² Panya Jesulu iriti Mama Godala wangkangu nyanga alatji, "Ngayuluna ngayuku malanypa tjuṅangka nyuntunya tjakultjunkuku. Mununa tjana tjunguringkunyangka tjanala ngurur-ngururpa ngarala nyuntunya inkara walkulku." *

¹³ Munu alatji piruku wangkangu,

"Ngayuluna mulamularingkuku Godaku." *

Munu nyangatja kulu wangkangu alatji,

"Nyanga ngaranyiṅa Godaku tjitji tjuṅangka tjungu,

panya paluruni wituṅu tjananya atunytju kanyintjaku." *

¹⁴ Godaku tjitji tjuṅa panya anangu nyinanyi iltjanpa milkalitjara. Palulanguru Jesunya nganaṅanya purunypatu ananguringu munu iltjanpatu milkalitjararingu. Alatji paluru ananguringu nganampa anga-ilura mamu Satangga wiyantjikitja, panya paluru nganaṅanya ilunytjaku kuralpai.

¹⁵ Uwa, Jesunya pitjangu nganaṅanya ngalkintjikitja Satantaguru munu paluru nganaṅanya raparingkunytjaku palyanu. Panya ngananytjula mamungka kulira nganaṅa titutjara nguluringkupai ilunytjaku-tawara.

¹⁶ Palu Jesunya angelpa tjuṅa ngalkintjikitja pitjanytja wiya. Paluru nganaṅanya wankarunkunytjikitja pitjangu Aipuramaku tjamupiti malatja malatja.

¹⁷ Nyanga palunyakitja panya paluru mantakutu pitjala ananguringu munu mantangka nyanga nyinangi anangu alatjitu nganaṅanya purunypa. Munu panya Godaku warakarira nganampa tjukurtjara pulka nyinangi ngaltunytju pulkanya munu paluru tjukarurungku palyanu nganampa ngalkiltu Godalu nganaṅanya kura palyantjitjanguru pungkunytjaku-tawara nganaṅa karalyarira Godalakutu malaku aruringkunytjaku.

* 2:12 Psalm 22:22 * 2:13 Aitjayaku 8:17 * 2:13 Aitjayaku 8:18

18 Panya mamu tjuṭangku munu anangu tjuṭangku kulu Jesunya kuraringkunyjaku rawangku arkaningi, palu paluru tungunpungkula alatjitu wantingi. Nyanga palulanguru paluru nganannya nintini nganaṇa palu purunypatu kura palyalwiya tungun-tungunpa nyinanyjaku.

3

Jesunya Pulka Mulapa Mosela Munkara

1-2 Walytja wiru tjuṭa, nyangangurula uti Jesunya pulkara kulinma, panya Godalu nganannya alingu palula tjungurungkula nyinanyjaku. Kala uti palunya rawangku kulinma, panya palunya Godalu tjukurtjara pulka ngurkantara iyanu nganampa ngalkilpa pulka nyinanyjaku. Ka paluru wanganarangku Godala kulira palumpa warka palyanu wantinytja wiyangku Moselu purunytju, panya paluru Godala wanganarangku kulinigi Godaku walytjapiti tjukarurungku kanyira.

3 Palu Jesunya Mosela waintara nyinanyi mayatja pulka mulapa, panya Mosenya Godaku walytja tjuṭangka tjungu nyinanyi anangu alatjitu, ka Jesunya panya palula tjanala waintara nyinanyi panya paluru anangu tjuṭa Godaku walytjaringkunyjaku palyanu.

4 Panya anangu watarku nyinara putu Godaku walytjaringanyi, palu Jesulu palyannyangka kutju palumpa walytjaringanyi. Uwa, Godalu uwankara mulapa palyanu.

5 Ka Mosenya panya Godaku warkaripai nyinangi munu palula wanganarangku kulira warkaringi Godaku walytja tjuṭangka. Munu panya tjanala tjakultjunangi alatji, "Ngula Godalu kutjupa kutjupa tjuṭa wangkara utilku."

6 Ka panya Christanya palu purunypatu Godala wanganarangku kulira warkaripai Godaku walytjapiti atunytju kanyira. Palu panya paluru Godaku katja, ka Mosenya Godaku katja wiya wati warkaripai kutju anangu tjuṭa purunypa. Ka panya nganaṇa Godaku walytjapiti nyinanyi. Munula pakuwiyangku Jesunya rawangku wanarampa titutjaralta palumpa walytja nyinaku. Utila rawa pukulpa ala-ala patara nyinama palumpa, panya palurulanya ngula ngura wirukutu katinyi. Uwa-manṭu nganaṇa palumpa walytjapiti titutjara nyinaku nyanga palunya rapangku kulirampa.

Ngura Kalkuntjitjanka Wirkara Pakuwiyaringkunyjaku

7-8 Kaya nyangatja kulinma Kurunpa Milmilku tjukurpa panya nyiringka iriti walkatjunkunyjta ngaranya nyanga alatji, "Nyura kuwari Godalu wangkanyangka kulira tungunpungkunyjta wiyangku wantima.

Panya iriti pilangka nyurampa walytjapitingku Godala tungunpungkula kulintja wiyangku wantingi.

Ka nyura palunya tjananya arkalwiyangku wantima."

9 Godalu panya wangkangu alatji,

"Panya tjana iriti pilangka rawa para-ngarangi kuli 40, kana kutjupa kutjupa wiru tjuṭa tjanampa palyanigi nyakula mulamularingkunyjaku.

Palu paluru tjana nyakula mulamularingkuwiyangku wantingi, munuya ngayunya rawangku wituwituningi piruku palyan-nyangka nyakunyjtikitjangu.

10 Kana palulanguru tjanampa pulkara mirpanaringi mununa kulinigi alatji, 'Nyaakuya ngayunya titutjarangku wantira kampa kutjupa kulini munu ngayulu wangkanyangka wangnarangku kulintja wiyangku wantinyi?'

11 Mununa palulanguru tjanampa mirpanarira mulamulangku tjananya kalkunu nyanga alatji, 'Paluru tjana ngura panya ngayulu kalkuntjitjangka wirkankunytja wiya alatjitu ngaraku ngayula tjungu nyinara pakuwiyaringkunytjikitja.' " *

12 Walytja wiru tjuta, pulkarayanku nyangama munuyanku atunymanama. Tjinguru kutjupangku nyuralanguru kuraringkula kutjupangka ngunti kulira Godalanguru paturingkuku, ka nyuranku palula-tawara pulkara atunymanama, panya Godanya wanka alatjitu nyinanyi.

13 Uti nyuranku ngapartji-ngapartjingu wangkara kunpunma kura ngunti kulira tarilarantjaku-tawara, panya kuranku nganannya ngunti kuralpai Godala tungunpungkunytjaku. Palu rawangkuyanku kunpunma tjintu kutjupa tjintu kutjupa ngulaku patantja wiyangku, panya nyura ngulaku patarampa tjinguru ngururpatu iluku tjukurta kunpuringkunytja wiyatu.

14 Uwa, pulkarayanku atunymanama, panya nganana uwankara Christala tunguringu munula titutjarangku tungun-tunguntu palunya wanarampa nganana rawa palula tjungu nyinaku. Panya nganana nganmanytju palumpa pulkara mulamularingkula palunya wananingi, palu purunytjula uti wananna ilunytjitjakutu-wangkara, munula mulapa palula tjungu nyinaku.

15 Panya nyiringka iriti walkatjunkunytja ngaranya alatji, "Nyura kuwari Godalu wangkanyangka kulira tungunpungkuwiyangku wantima.

Panya iritiya nyurampa walytjapitingku Godala tungunpungangi, ka nyura palunya tjananya arkalwiyangku wantima." *

16 Ka nganalu tjana wanyu panyatja Godala kulintja wiyangku wantira tungunpungangi? Wiya panya paluru tjana, panya Moselu tjananya Itjipalanguru katingu.

17 Palu nganaku tjanampa Godanya rawa mirpanaringi kuli 40? Wiya panya palumpa tjanampa, panya pilangkaya tungunpungkula kura palyaningi, munu panyaya nyara palula arangka pilangka ilungi.

18 Godalu panya mirpanarira kalkunu alatji, "Paluru tjana ngura panya ngayulu kalkuntjitjangka wirkankunytja wiyatu ngayula nyinara pakuwiyaringkunytjikitja." Palu ngananya tjananya wanyu paluru alatji wangkangu? Wiya panya palula tjanalatu, panya palula tungunpungkupai tjutangka.

19 Kala kulini panya tjana Godaku mulamularingkuwiyangku wantira ngura panya pakuwiyaringkupainga putu wirkanangi.

4

1 Palu ngura panya paluru ala alatjitu ngaranya nganana Godala wirkara nyinara pakuwiyaringkunytjaku. Kala uti purkarangku kulinma, ngunti kulira ngura panya palula ngatalarinytjaku-tawara.

² Panya nganana kulinu Tjukurpa Palya, panya Godalulanya alinyi palula tjunguringkula pakuwiyaringkunyjtaku. Ka palu purunytjuya anangu Israelkunu tjtjangu iriti kulinu Godalu palula tjanala tjukurpa palu purunypatu wangkanyangka. Palu paluru tjana panyaya kulira wantingu munuya wantinytjatjanu putu wirkanu ngura panya Kainanta, panya tjana Godaku mulamularingkunyjtja wiyangku wantingi paluru kalkunnyangka.

³ Palu nganana palumpa tjukurpa wiruku tjukaruru mulamularingkula palula tjungu ngaranyi pakuwiyaringkunyjtikitja. Panya Godalu kuwaripataranguru alatjitu uwankara palura wiyaringkunyjtjanungku rawangkutu altingi anangu tjuta palula tjunguringkula pakuwiyaringkunyjtaku. Kaya uti iriti miri panya tjuta mulamularingama, palu tjana kulira wantingi. Ka palulanguru Godalu tjananya painu panya nyiringka alatji ngaranyi Godalu wangkara kalkuntja, "Ngayuluna tjanampa mirpanarira mulamulangku tjananya kalkunu nyanga alatji,

'Paluru tjana ngura panya ngayulu kalkuntjitjanga wirkankunyjtja wiya alatjitu ngaraku ngayula tjungu nyinara pakuwiyaringkunyjtikitja.' " *

⁴ Panya iriti walkatjunkunyjtja nyiringka ngaranyi nyanga alatji, "Tjintu 6 uwankara palura wiyara Godanya pakuwiyaringu tjintu panya 7-ta." *

⁵ Munu piruku Godalu wangkanyjtja nyiringka ngaranyi nyanga alatji, "Paluru tjana ngura panya ngayulu kalkuntjitjanga wirkankunyjtja wiya alatjitu ngaraku ngayula tjungu nyinara pakuwiyaringkunyjtikitja." *

⁶ Panya nganmanyitja tjtjangu Tjukurpa Palya kulira wantingi munuya palulanguru ngura panya palula wirkankunyjtja wiya. Palu ngura paluru kuwari ala alatjitu ngaranyi kutjupa tjuta wirkara pakuwiyaringkunyjtaku.

⁷ Nyanga palunyala kulini panya ngula kuli tjuta mulapa ngarala wiyaringkunyangka Godalu panya palunypatu piruku kalkunu Davidala, ka paluru anangu tjtjangu kulintjaku walkatjunu nyiringka alatji, "Nyura kuwari Godalu wangkanyangka kulira tungunpungkunyjtja wiyangku wanganarangu kulinma." *

⁸ Uwa, ngura panya pakuwiyaringkupainya kuwaritu ala ngaranyi, panya Tjatjuwalu tjananya Kainanta wirkakatinyangka Godalu malangka rawangkutu wangkangi, "Tjintu kutjupa ngaranyitu anangu tjuta wirkara pakuwiyaringkunyjtaku panya ngayulu kalkuntjitjanga." Kala nyanga palulanguru kulini alatji, "Munta-uwa, Tjatjuwalu tjananya Kainanta wirkakatinyangkaya mulamula pakuwiyaringkunyjtja wiyatu nyinangi."*

⁹⁻¹⁰ Munula kulini mulapa ala ngaranyi kuwaripatu nganana Godaku walytja tjuta palula tjunguringkula pakuwiyaringkunyjtaku, panya Godanya purunypa, panya paluru tjintu 7-itja pakuwiyaringu, palu purunypa. Panya Godanya tjintu 6 pulkara warkaringi munu waraka wiyaringkula pukulpa alatjitu nyinara pakuwiyaringu. Ka

* 4:3 Psalm 95:11 * 4:4 Genesis 2:2 * 4:5 Psalm 95:11 * 4:7 Psalm 95:7-8

* 4:8 Tjatjuwalu panya Moseku arangka mayatjarira Israelkunu tjuta katirinangi Mosenya ilunyangka malangka.

nyara palu purunypa nganana Godalu kalkuntjitjangka wirkara nyinara pakuwiyaringkuku, warika nganampa palyantjatjanu.

¹¹ Kala palulanguru uti kurunpa winkingku Godaku iwara tungun-tunguntu arkara wananma Godalu kalkuntjitjangka wirkara pakuwiyaringkunyjtjikitjangku. Panya tjanaya iriti mulamularingkuwiyangku wantingi munuya Godala tungunpungkula paturingu. Kala uti pala palula-tawara tjukaruru mulamularingama munu Godala titutjarangku wanganarangku kulinma.

¹² Panya Godaku tjukurpa wankakutu alatjitu anangungku wangkanytja purunypa wiya, panya Godalu wangkanytja uwankara mulapa alatjitu utiringkupai. Palumpa wangka tjula iri kampa kutjaratjara, pulka mulapa. Panya tjula iri pulkangku anangu wakara tarka unngutja miiltjingalpai munu katara ala lipilpai, palu purunytju Godaku tjukurtu nganananya unngu kulintja uwankara tjukarurungku miiltjingalpai. ¹³ Panya Godanya uwankaraku ninti, ka nganana putu palula kumpini. Paluru uwankara nintingku nyakula kulini nganana unngu kulintja kulu, kala putu kutitjura kanyini. Munu ngula paluru kutjungku nganananya unngu nyakula puntura wangkaku, ka nganana putu palula wiyanmankuku.

Pala palulangurula uti Godaku iwara tungun-tunguntu wananma paluru kalkuntjitjangka wirkara pakuwiyaringkunyjtjikitjangku.

Jesunya Tjukurtjara Pulka

¹⁴ Uwa, nganana panya Jesuku mulamularinganyi. Panya paluru nganampa tjukurtjara pulka Godaku katja munu paluru ankula Godala tjunguringkula nganampa ngalkilpa nyinanyi. Kala pala palulanguru nganana uti palumpa mulamularingkula wantinytja wiyangku palunya tungun-tunguntu wananma.

¹⁵ Panya anangu tjutangku mamu tjutangku kulu nganananya rawangku arkalpai kuraringkunyjtjaku. Palu nganampa ngalkilpa pulkangku nyanganpa nintingku kulini panya nganmanytjulpiya mantangka nyinanyangka palu purunytjufu palunya mukumukura arkaningi kuraringkunyjtjaku. Palu paluru kulira wantingi kura palyantja wiyangku. Munu paluru nganampa ngalturinganyi panya nganana putu kulira wantipai kutjupangku mukumukunnyangka.

¹⁶ Kala uti palulanguru raparingkula Godala ilaringama nguluringkunyjtja wiya. Panya paluru ngaltunytju mukulya mulapa nganampa nyinanyi munu nganana kura palyantjatjanu piiwiyaringkunyangka nganampa kalyparingkupai. Kala uti kurantjikitjangku arkannyangka palula tjapinma nganananya angakanyintjaku kuraringkunyjtjaku-tawara, kalanya mulapa paluru ngaltunytjungku anga-kanyilku.

5

¹ Godalu panya wati tjukurtjara pulka anangu tjutanguru ngurkantara tjunkupai palumpa tjanampa ngalkilpa nyinara warkarinytjaku.* Ka tjukurtjara pulka nyara paluru inmangka kuka pungkula tiliwakara Godanya ungkupai mai kulu, paluru nyakula anangu tjuta kalypangku pungguwiyangku wantinytjaku tjana kura palyantjitjanguru. ² Ka

* 5:1 Panya Aarontanguruya wati tjukurtjara pulka tjuta nyinakatingi wanapari wanapari Godalu wati tjutanguru ngurkantara tjunkunyjtja.

anangu tjutangku tjinguru watarkungku kura palyannyangka tjukurtjara paluru ngaltunytjungku tjananya purkarankupai, panya paluru kulu upa kunpu wiya tjana purunypatu.

³ Pala palulanguru tjukurtjara paluru kuka pungkula tiliwakara Godanya ungpupai palumpa kuranguru kulu anangu tjutaku kuranguru kutju wiya, ka Godalu palunya kulu kaly pangku wantipai paluru kura palyantjtjanguru anangu kutjupa tjuta purunypa.

⁴ Palu anangu nyara palurunku walytjangku pulkanmankupai wiya tjukurtjara pulka nyinanytjikitjangku, palu paluru Godalu ngurkantan kyunyangka kutju tjukurtjararingkupai, Aaronnga purunypa, panya palunya Godalu ngurkantara tjunu tjukurtjara pulka nyinanytjaku.

⁵ Ka nyara palu purunytjutu Christalu palurunku walytjangku pulkanmankunytja wiya tjukurtjara pulka nyinanytjikitjangku. Palu Godalu palunya ngurkantara tjunu alatji wangkara, "Nyuntun ngayuku katja, kana nyanganguru nyuntunya titutjarangku katjanmankuku." *

Wangka nyangatja nyiringka walkatjunkunytja ngaranyi.

⁶ Ka nyiri palulatu tjukurpa kutjupa ngaranyi Godalu wangkanytja nyanga alatji,

"Nyuntun tjukurtjara pulka titutjara nyinaku milmilpa mulapa, wati Milkitja-tikanya purunypa, panya paluru tjukurtjara pulka mulapa iriti nyinangi, palu purunypa."* *

⁷ Ka Godalu panya Jesunya ilunytjaku-tawara wankarunkunytjaku ngarangi alatjitu. Ka panya Jesulu mantangka nyinaralpi Godala pulkara mirara tjapira ulangi palunya rapantjaku ngulu wiya ilunytjikitjangku. Palu paluru Godala titutjarangku wanganarangku kuliningi palurunku pulkanmankunytja wiyangku, ka nyara palulanguru Godalu palunya ngapartji kulinu paluru ulara tjapinnyangka, munu palunya rapanu ngulu wiya ilunytjaku.

⁸ Ka nyura tjinguru kulini palunya pikantankunytja wiya nyinanytjaku-palku. Palu palunyaya pungu alatjitu, ka pikatjararingkula ilungu. Panya paluru Godala wanganarangku kuliningi ka pika palumpa wirkanu. Munu paluru nintiringkula kulinu panya anangungku Godala wanganarangku kulinyangka pika palumpa utiringkupai.

⁹ Panya Godalu Jesunya witunu ankula mantangka kutjupa kutjupa tjuta palyantjaku. Ka paluru wanganarangku kulira palyanu munu panya ilungu, ka nyara palulanguru anangu tjuta kuwari wankaringkunytjaku tjanampa ngaranyi alatji, tjana palula wanganarangku kulirampa. Nyara palulanguruya anangu tjuta Godala tjungu titutjara nyinaku.

¹⁰ Palu Godalu Jesunya tjunu tjukurtjara pulka mulapa titutjara nyinanytjaku, panya wati Milkitja-tikanya tjukurtjara pulka nyinangi, palu purunypa.

¹¹ Tjinguruna piruku nyurala tjakultjunama tjukurpa nyangatja panya Jesunya Christanya Milkitja-tikanya purunypa nyinanytja. Palu

* 5:5 Psalm 2:7 * 5:6 Tjukurpa Milkitja-tikanya-tjara ngaranyi nyiri ini Genesis-ala 14:17-20.

* 5:6 Psalm 110:4

putuṅa nyurala utingku wangkanyi panya nyura tjukurpa pulka putu nguwanpa kulilpai.

¹² Nyura nganmanypa Godaku walytjaringu munu kuwari nyura tjinguru palumpa tjukurku ninti pulka nyinama munu nyura tjinguru anangu kutjupa tjuta ngapartji nintinma kuwari kutju Jesuku walytjaringkunyitja tjuta. Palu wiya, nyura nintiringkunyitja wiyatu nyinangi munu nyura tjukurpa nganmanyitjaku watarkuringu, ka nyuranya nganana piruku nintintjaku ngaranyi, nyura iti purunytju kuwaripangu ipi tjikinnyangka. Panya iti tjutangu mai kuka putu ngalkupai munuya paluru tjana ipi kutju tjikilpai, palu purunypa nyura tjukurpa pulka tjuta putu kulilpai, munu nyura tjukurpa panya nganmanyitja utitja tjuta kutju titutjarangu kulilpai.

¹³ Panya iti tjutangu putu ngurkantankupai tjukarurungku palyantjikitjangu. Ka nyura nyara palu purunytjutu putu ngurkantankupai tjukarurungku palyantjikitjangu.

¹⁴ Palu uti nyura anangu pulka tjutampa tjukurpa pulka tjutaku nintiringama. Munu nyura nyara palulanguru nintingku kulilku palya tjukaruru nyinanytjikitjangu munu kula wantinytjikitjangu.

6

¹⁻² Palu nyaaku nyura tjukurpa nganmanyitja tjuta Christanyatjara rawangu wangkara kulintjikitja mukuringanyi? Wanyuya tjukurpa nganmanyitja tjutaku nintiringkunyitjatjanungku waintara kulinma tjukurpa kutjupa tjutaku nintiringkunyitjikitjangu. Panya anangu tjuta Jesuku walytjaringkunyangka nganana palula tjanala nganmanyitju nintilpai iwara kurangka ankunytjanu kampa kutjuparinytjaku ilunytjaku-tawara, munu Godaku mulamularingkula palumpa iwarangka ankunytjaku. Munula tjanala nintilpai minangka baptise-katinytja, munu katangka mara tjunkunytja kula panya Godalu witulyankunytjaku. Munula tjanala nintilpai panya ngula Godalu ngananyanya ilunyangka wankara pakaltjingantja, munu paluru anangu uwankara ngurkantara tjarantja, munu kura tjuta paira iyantja ngura kurakutu titutjara nyinanytjaku. Alatji-alatjila tjanala nintilpai kuwari kutju Jesuku walytjaringkunyitja tjuta. Ka nyura nyaaku tjukurpa nyanga palumpa tjanampatu piruku nintiringkunyitjikitja mukuringanyi? Uti nyura Godanya wanarampa tjukurpa kutjupa tjutaku kula rawatu nintiringkukatima munkaritja tjutaku kula.

³ Uwa, wanyula tjukurpa kutjupa tjutaku kula rawa nintiringama Godalu nintintjikitja mukuringkunyangka.

⁴⁻⁶ Kulilaya! Tjinguru anangu kutjupa Jesuku walytjaringanyi. Ka panya Godalu palula utini palumpa tjukurpa, ka kulilpairinganyi munu palula tjunguringkula kurunpa pukularinyi panya palunya wankarunu Godalu. Ka panya Kurunpa Milmilnga palula pitjala unngu tjarpara nyinakatinyi. Ka paluru unngu kulini panya Godalu kalkuntjita mulapa tjukaruru ngaranyi. Munu kulini, "Mulapa Kurunpa Milmilnga witulya pulkanya ngayula unngu warkarinyi." Palu tjinguru paluru nyanganpa uwankara kulintjatjanungku Jesunya wantiku munu ala kutjupangka ankuku, kala yaaltjingara palunya Godalakutu malakungku katiku kampa kutjuparira palunya wanantjaku? Wiya alatjitu, panya paluru nganmanypa Jesuku

mulamularingu munu palulanguru ngulalta palunya ngunti kurara wantingu. Ka nyangatja panya Jesunya piruku panya katakutjarangka utitjungkuntja purunypa. Panya anangu tjutangu Godaku katakutjarangka utitjungkuntjaku, palu purunypa paluru palyani Jesunya wantikatira, kaya anangu tjutangu palunya nyakula Jesunya anani.

⁷⁻⁸ Tjukurpa nyangatjaya kulila! Wati kaanangka warkaripaingku uninypa tjunkupai mantangka mai pakaltjingantjikitjangku. Ka minangku puyira manta tulykulpai ka mai pulka pakalpai. Ka Godalu manta nyara palunya nyakula palyanmankupai. Ka manta nyanga paluru anangu kulilpai tjuta purunypa. Palu manta kutjupa kulu ngaranyi, ka nyara palunya kulu minangku puyilpai palu kutjupa kutjupa tjuta pakalpai manta nyara palula tjilka, ukiri kurakura tjuta kulukulu. Ka manta nyanga palunya tjinguru Godalu nyakula kuranmankuku. Ka ngula warungku kampara wiyalku manta nyanga palunya. Palu manta nyanga paluru anangu kulira wantipai tjuta purunypa, panya nganmanypaya Jesuku mulamularingu munuya malangka palunya wantikatira kurangka anu.

⁹ Palu nyanganpana nyurala nganmanytju tjakultjunanyi nyura Godanya wantinytjaku-tawara. Ka walytja wiru tjuta, ngayulu nyuranya kulini panya nyura iwara palyangka kutju ananyi wantinytja wiya.

¹⁰ Ka panya Godanya palya mulapa tjukaruru ngaranyi, munu nyuranya nyanganyi palumpa wirura warkarinyangka munu paluru nyurampa pukularinyi. Paluru nyanganyi nyuranya palumpa mukuringkuyangka, panya nyura palumpa walytja tjutaku mukuringkupai munu tjananya alpamilalpai. Munu nyura kuwari nyanga alatjitu nyinanyi.

¹¹⁻¹² Palu ngayulu mukuringanyi nyura uwankarangku rapangku warka wiru palyalkatinytjaku kurunpa winkingku ilunytjakutu-wangkara. Panya Godalu nyuranya wirura kalkunu, ka nyura pukulpa patani palumpa pakuringkuntja wiya. Nyara palulanguru nyura uti rapangku titutjarangu Jesunya wananna munu nyura wiru mulapa mantjilku Godalanguru. Uwa, nganmanyitja tjuta purunytjuya wananna pakuringkuwiyangka, panya tjana iriti Godaku titutjara mulamularingangi pakuringkuntja wiya munuya nyara palulangurulta kuwari mantjini kalkuntja panya palunya.

¹³⁻¹⁴ Panya iriti mulapa Godalu Aipuramanya kalkunu alatji wangkara, "Ngayulu nyuntunya kalkuni pukulmankunytjikitjangku. Ka nyuntulanguru malatja malatja ma-tjutaringkuku." Munu paluru Aipuramanya palumpa mulamularingkunytjaku ini palurunku wangkara kalkunu. Tjinguru ini kutjupa pulka mulapa ngaranyangkampa paluru ini palunya wangkara kalkunma. Palu wiya, ini kutjupa pulka mulapa palula waintara ngaranytja wiya alatjitu. Ka nyara palulanguru Godalu palurunku ini wangkara kalkunu.

¹⁵ Ka Aipuramanya rawa alatjitu Godaku mulamularingangi ngururpa watarkurinytja wiya alatjitu. Ka Godalu palunya mulapatu ungu panya paluru kalkuntjatjanungku.

¹⁶ Kaya panyatja kulinma, panya kutjupangu kalkunnyangka anangu kutjupa tjinguru putu mulamularingkupai, ka anangu nyara

paluru mulamularingkunyjtaku wati pulkaku ini wangkapai, ka anangu pulka ini wangkanyangka kulira mulamularingkupai.

¹⁷ Ka palu purunypatu Godalu tjananya ini pulka mulapa wangkara kalkunu ini palurunku tjana palumpa mulamularingkunyjtaku. Panya paluru mukuringangi tjana palumpa mulamularingkunyjtaku. Panya kalkuntja kutjuparinytja wiya ngaranyjtaku. Munu palurunku ini wangkangu kalkuntjatjanungku tjana mulapa kulintjaku.

¹⁸ Uwa, panya Godalu mulapa tjukarurungku kalkulpai ngunti wangkanytja wiyangku, munu paluru kalkura palurunku ini wangkanytjatjanungku kampa kutjuparinytja wiyangku ungupai. Kala nyanga palulanguru nganana pulkara raparingkula pukultu alalangu patani paluru nganananya kalkuntjatjanungku ungunyjtaku, panya nganana Godala tjunguringu palula wankaru nyinanyjtikitja.

¹⁹⁻²⁰ Palu nganana panya Godalu kalkuntja titutjarangku kulira mulamularingkula kutju kunpu tungun-tungunpa nyinaku Jesuku patara. Panya paluru Mamaku ngurakutu nganmanypa anu ilkarikutu nganampa ngalkilpa ilunytjatjanu. Panya wati tjukurtjara pulka tiinta milmilta tjarpapa waintara ma-tjarpapai ngura milmilpa mulata, nyara palu purunypa Jesunya waintara tjarpangu ngura panya ilkaritjangka munu nganampa alanu ngalkilarinytjatjanungku, nganana ngapartji malawanu tjarpapa nyinanyjtaku palula tjungu. Panya paluru tjukurtjara pulkaringkula titutjara nyinanyi wati panya Milkitja-tikanya purunypa.

7

Tjukurtjara Milkitja-tikanya

¹⁻³ Panya Milkitja-tikanya ngura ini Salemake mayatja nyinangi munu paluru wati tjukurtjara pulka nyinangi God Katutjaku. Ka ini panya Milkitja-tikanya tjaa lipuru ngaranyi munu ini paluru wangkanyi alatji, *Iwara tjukaruruku mayatja*. Ka ngura ini Salemanya wangkanyi alatji, *Kalya nyinanyjtanya*. Kala palulanguru Milkitja-tikanya kulilpai nyanga alatji, "Paluru-mantu mayatja pulkangku anangu tjuta kalya nyinanyjtaku palyalpai." Palu ngananya wanyu palumpa mama ngunytju, tjamu kami kulu? Ngurpala nyara palumpa. Palu wanyu ngura yaaltjingka iti paluru wirkanu? Munu ngura yaaltjingka paluru ilungu? Nganana ngurpa. Panya tjanaya nganmanytju nyiringka walkatjunkunyjtja wiyatu. Palu nganana kulini panya paluru wati tjukurtjara pulka titutjara nyinapai, Godaku katja purunypa.

Panya nganana ninti Milkitja-tikaku pulampa Aipuramaku, panya iriti Aipuramalu tjana palumpa malpa tjutangku kulu pikangku pungkula wiyanu mayatja kutjara kutjara tjanampa tjaultji tjuta kulukulu. Munuya tjanampa kutjupa kutjupa tjuta mantjira katingu ngurakutu. Ka panya ngururpa wati Milkitja-tikanya ngalyangaparikatingu Aipuramanya wati-pitjanyangka nyakula munu palunya pukulmanu alatji wangkara, "Godalu nyuntunya wirura kanyinma marangku."*

* 7:1-3 Genesis 14:17-20

Ka palulanguru Aipuramalu kutjupa kutjupa tjuṭa tjana mantjira katinytja tjarara tjukutjuku ungu Milkitja-tikanya mayatja pulka kulira.*

⁴ Panya Milkitja-tikanya-manṭu mayatja pulka mulapa kutjupa tjuṭangka waintarinytja, ka Aipuramalu Israelkunu tjuṭaku tjamu nganmanyitjangku palunya ungu tjarara warmalanguru tjulyara katinytjatjanungku. Tjinguru Aipuramanya palu purunypa pulka mulapa nyinanyangkampa Milkitja-tikalu tjarara ungama palunya. Palu wiya, Aipuramalu palunya tjarara ungu mayatja pulka kulira.

⁵ Ka panya nganana Israelkunu tjuṭangu wati tjukurtjara tjuṭa ngurkantankupai anangu Levikunu tjuṭangu.* Munula Moseku tjukurpa kulira nganana kutjupa kutjupa tjuṭa kanyintjatjanungku tjarara tjukutjuku ungkupai palunya tjananya tjukurtjara tjuṭa.* Uwa, tjana walytjangu mantjilpai, panya paluru nganana uwankara Aipuramalangu.

⁶⁻⁷ Palu wati tjukurtjara nyanga Milkitja-tikanya Aipuramaku walytja wiya, wati malikitja, Levilangu wiya. Munu paluru mantjiniu Aipuramalu tjarara ungkuyangka, munu palunya wangkara pukulmanu. Palu panya Godalu Aipuramanya nganmanytju kalkunu pulka nyinanytjaku, kala tjinguru kulini paluru mayatja pulka mulapa Milkitja-tikala waintarinytja. Palu wiya, nyangatja Milkitja-tikalu palunya wangkara pukulmanu nganmanypa pulka mulapa nyinanytjatjanungku. Panya nganana ninti wati malatjangku wati pulkanya alatji wangkara pukulmankupai wiya, palu wati pulkangu kutju pukulmankupai wati malatja.

⁸ Kulini nyura? Panya Milkitja-tikanya Aipuramala waintara pulka mulapa nyinangi, wati tjukurtjara tjuṭangka kulū. Panya paluru tjana mantjilpai Israelkunu tjuṭangu tjarara ungkuyangka palu tjukurtjara paluru tjana ilura wiyaringkupai. Ka Milkitja-tikalu Aipuramala mantjiniu kutju-ara paluru tjarara ungkuyangka, munu palulanguru paluru yaaltjiringu? Wiya nyiringku tjakultjunanyi paluru wanka nyinanytja, ilunytja wiyatu.*

⁹⁻¹⁰ Uwa, nganana rawangu tjarara ungkupai wati tjukurtjara tjuṭa. Palumpa tjanampa tjamu nganmanyitja ini panya Levinya, panya Aipuramaku pakaliku katja. Ka panyaya tjukurtjara tjuṭa nyinakatingi malatja malatja Aipuramalangu. Ka panya Aipuramalu Milkitja-tikanya tjarara ungu Levila kuwaripangka paluru tjana nyinanytja wiyangka. Paluru kutjungku ungu Milkitja-tikanya, palu tjanampa kulū ungu nganmanytju watarku-watarkungku, panya Leviku tjanampa palumpa walytjapiti malatja malatjaku kulū.

Jesunya Tjukurtjara Nyinanyi Milkitja-tikanya Purunypa

¹¹ Ka Moselu nintiningi tjukurpa panya Godalu palunya ungkunyntja, munu paluru wangkangi war̄ka wati tjukurtjara tjuṭaku kulū. Ka

* **7:1-3** Alatji Aipuramalu tjarara ungu kutjupa kutjupa uwankara paluru tjana katinytja utulura lipula tjunu utulu kutjupa utulu kutjupa 10-pa, munu palulanguru palunya utulu kutjutja ungu 10-nguru Milkitja-tikanya, munu utulu 9 palurunku kanyinu. * **7:5** Levinya panya Aipuramaku pakaliku katja, panya Jacobaku, iriti mulapa nyinanytja. * **7:5** Tjukurpa panya Godalu Mosenya ungkunyitjangku alatji wangkanyi, "Kutjupa kutjupa uwankara nyura kanyintjatjanungku tjarara tjukutjuku ungama wati tjukurtjara tjuṭa." * **7:8** Genesis 14:17-20

palumpa kuṭa Aaronnga tjukurtjara nganmanyitja nyinangi. Wati panya paluru Levilanguru. Ka ngulalta palula malangka palumpa walytjapiti malatja malatja tjukurtjara tjuṭaringangi. Nyanga paluru tjana panya uwankara Leviku tjamupiti malatja malatja wanapari wanapari. Palu Israelkunu tjuṭangku tjukurpa panya Godalu Mosenya ungkunyjtanguru nintiringu yaaltji-yaaltji tjukururu nyinanytjikitja, munuya nintiringu kura palyantjatjanungku kuka katira ungkunyjtikitja wati tjukurtjarangku pungkula Godanya ungkunyjtaku paluru tjananya kura palyantjitjanguru kaly pangku pungkuwiyangku wantinytjaku. Palu nyanga alatji palyaraya Godala mirangka tjukururu ngaranytja wiya. Panya ara nyanga nganmanyitja wanaraya puṭu nguwanpa palyaringangi tjukururu ngaranytjikitja Godala mirangka.

Ka nyara palulanguru Godalu tjukurtjara kutjupa iyanu ini Jesunya, panya tjukurtjara nganmanyitja tjuṭangku anangu tjuṭa puṭu palyaningi Godala mirangka tjukururu ngaranytjaku. Palu Jesunya tjukurtjara kutjupa mulapa, Aaronnga tjana purunypa wiya, palu Milkitja-tikanya purunypa.

¹² Panya Godalu Jesunya tjukurtjara iyara ara panya nganmanyitja kampa kutjupanu. Munu paluru wati tjukurtjara tjuṭaku waraka wiyanu munu kampa kutjupanu. Ka nganana kuwari ara kutjupangka nyinanyi ara kuwaritjangka.

¹³⁻¹⁴ Panya ara nganmanyitjangkaya Levilanguru kutju tjukurtjara nyinapai, palu Jesunya tjukurtjara kutjupa Leviku walytjapitinguru wiya, palu Judah-ku walytjapitinguru. Panya Judah-nya tjana walytjarara walytjarara tjukurtjara nyinanytja wiyatu, panya Moselu tjananya wangkanytja wiya kuka pungkula Godanya ungkunyjtaku paluru anangu tjuṭaku kalyparingkunyjtaku. Wiya, paluru Levikunu tjuṭa kutju wangkangu. Kala nyanga palulanguru kulini ara panya nganmanyitja wiyaringu, kala ara kuwaritjangkalta nyinanyi.

¹⁵ Uwa, mulapa Godalu ara nganmanyitja kampa kutjupanu, panya paluru tjukurtjara kutjupa mulapa ngurkantanu Milkitja-tikanya purunypa, Aaronnga tjana purunypa wiya.

¹⁶ Panya ara nganmanyitjangkaya tjukurtjara tjuṭa ngurkantara tjunkupai Leviku walytjapitinguru. Palu tjukurtjara nyangatja Levikunu wiya. Paluru panya wanka titutjara nyinanyi wiyaringkunyjtja wiya alatjitu, ka nyara palulanguru Godalu palunya ngurkantara tjunu tjukurtjara nganampa nyinanytjaku.

¹⁷ Panya iriti nyiringka walkatjungkunyjtja nyanga alatji ngaranyi, "Nyuntun tjukurtjara pulka titutjara nyinaku Milkitja-tikanya purunypa ilunytja wiya." *

Alatji Godalu Jesunya wangkangu.

¹⁸⁻¹⁹ Uwa, ara nganmanyitja wiyaringu, panya ara nyara paluru kunpu wiya kurakura ngarangi, panya ara nyara palulawanu nyinara anangu tjuṭa puṭu tjukururu nyinangi. Ka nyara palulanguru Godalu ara panya palunya kampa kutjupanu munu ara kuwaritja wiru mulapa palyanu nganana mulamularingkula palula tjunguringkunyjtaku.

²⁰⁻²¹ Pirukula wanyu nyangatja kulinma! Panya Jesunya tjukurtjararingkunyangka Godalu palunya wangkangu alatji,

* 7:17 Psalm 110:4

“Ngayuluna nyuntunya mulamulangku kalkuni
mununa ngayulu piruku walytjangku kulira kampa kutjuparinytja
wiya.

Panya nyuntun tjukurtjara pulka titutjara nyinaku wiyaringkunyitja
wiya.” *

Palu panya tjukurtjara nganmanyitja tjuta kalkuntja wiyatu tjana
titutjara tjukurtjara nyinanytjaku. Wiya, paluru Jesunya kutju
kalkunu.

²² Ka nyara palulanguru Jesulu ara kuwaritja titutjara ngaranytjaku
kanyini. Ara nyara paluru panya Mosenya ungkunyitja purunypa wiya,
ara kutjupa wiru mulapa.

²³⁻²⁴ Kaya nyangatja kulu kulila kutjupa ngapartji. Panya tjukurt-
jara tjuta mulapaya nyinakatingi, munuya tjukutjuku warakarira
tjilpiringkula ilungi, kaya kutjupa tjuta ngapartji warakaringi. Palu
Jesunya kulinma paluru titutjara nyinaku ilunytja wiya alatjitu. Nyara
palulanguru panya paluru kutju tjukurtjara pulka titutjara nyinaku
wiyaringkunyitja wiya.

²⁵ Ka pala palulanguru anangu uwankara palumpa
mulamularingkula Godalakutu pitjanyangka paluru tjananya mulapa
wankarunkuku Godala tjungu pukulpa nyinanytjaku. Panya paluru
wanka titutjara nyinanyi munu tjanampa rawangku Mamala tjapini
wiyaringkunyitja wiyangku.

²⁶ Panya ara nyanga kuwaritjanga Jesunya kutju nganampa tjukurt-
jara pulka nyinanyi munu nganampa kutjupa kutjupa uwankara
tjukururungku palyalpai. Paluru nganmanyitja tjuta purunypa
wiya. Paluru panya tjukururu mulapa nyinanyi munu kuralpai
wiya alatjitu. Paluru kuraku ngurpa anangu tjuta purunypa wiya.
Paluru kutjupa alatjitu, palya mulapa. Munu paluru mayatja pulka
mulapa uwankarangka waintara nyinanyi Godala tjungu ngura nyara
ilkaringka.

²⁷ Paluru wati tjukurtjara pulka purunypa wiya, panya tjukurtjara
paluru putu palya mulapa nyinapai munu kura palyalpai. Palulanguru
paluru kuka pungkula tiliwakalpai Godalu nyakula palunya munu
anangu tjuta kulu kura tjuta palyantjitjanguru kaly pangku wantinyt-
jaku. Munu tjukurtjara panya paluru alatji titutjarangku palyalpai
tjintu kutjupa tjintu kutjupa. Palu panya Jesunya palu purunypa wiya,
panya paluru kutju-arangku palyanu munu ngalkilpa ilungu anangu
uwankaraku kuranguru, ka nyara palulanguru Godanya anangu
tjutaku kalyparingkupai.

²⁸ Nyura uti kulini? Panya Moseku tjukurtu wangkangi wati tjukurt-
jara pulka anangu tjutanguru ngurkantara tjunkunyitjaku. Palu wati
paluru tjana titutjara upa nyinangi, panya paluru tjana nganana
purunypa anangu alatjitu. Uwa, Godalu ara panya nganmanyitja
tjananya ungu, palu malangkalta paluru mulamulangku kalkunu
ara kuwaritjaku, munu ngurkantara tjunu palumpa katja tjukurtjara
pulka nyinanytjaku ara nyanga kuwaritjanga. Ka paluru panya
Godanya mukuringkunyitja uwankara tjukururungku palyara wiyara
wiru mulapa titutjara nyinanyi.

* 7:20-21 Psalm 110:4

8

Jesunya Tjukurtjara Pulka Ara Kuwaritjaku

¹⁻² Palu tjukurpa nyangatjana nyurala nyaaku wangkanyi? Wiya panya nyura kulira tjukurpa pulka kulintjaku nyangatja Jesunya panya nganampa tjukurtjara pulka nyinanyi Mayatja Godala tjungu ngura ilkaritjangka. Munu paluru warkarinyi ngura milmilpa mulata panya Godalu palyantjitjangka ngura panya ilkaritjangka. Paluru tiinta milmilpa panya Moselu tjana nganmanytju palyantjitjangka warkarinytja wiyatu.

³ Panya nyura ninti Godalu tjunu wati tjukurtjara tjuṭa anangu tjuṭanguru mai kuka kulu mantjira palunya ma-ungkunyjtaku. Ka uti nganampa tjukurtjarangu Jesulu kulu palu purunytjuṭu Godanya ungama panya paluru nganampa tjukurtjara pulka nyinanyi ilkaritjangka.

⁴ Palu tjinguru Jesunya mantangka rawatu nyinarampa tjukurtjara wiyatu nyinama, panya tjukurtjara tjuṭaya nganmanytja nyinangi wati Levilanguru munu panya paluru tjana Moseku tjukurwanu nyinara Godaku warkarinyi tiinta panya milmilpa.

⁵ Palu tiinta nyara palunyaya unytjungku mantangka kanyiningi. Panya tiinta nyara paluru ngananyanya nintini ngura kutjupa ilkaritjangka ngaranytja milmilpa mulapa. Panya iriti Mosenya tiinta panya palunya palyantjikitja palyany-palyanyaringangka Godalu palula wangkangu alatji, "Ngayulu panyananta apu katu wangkara nintinu tiinta milmilpa palyantjaku. Ka panya palu purunypa alatjitu palyala tjukarurungku." Ka panya Moselu tjana palyanu tiinta mantangka, ka tiinta nyanga mantatjangku ngura ilkaritjangka ngaranytja nintini.

⁶ Palu Godalu Jesunya warka wiru mulapa ungu, ka paluru ara kuwaritja pakaltjanganu palya mulapa, panya wati tjukurtjara kutjupa tjuṭangku palyantja purunypa wiya. Panya palurunku walytjangku ungunytja pulka mulapa tjukurtjara kutjupa tjuṭangku kuka ungunytja purunypa wiya. Panya Godalu Jesulanungku kalkuntja pulka mulapa ngaranyi, Moselawanungku kalkuntja purunypa wiya. Ka nyara palulanguru Jesunya tjukurtjara pulka mulapa nyinanyi tjukurtjara kutjupa tjuṭangku waintarira.

⁷ Panya anangu tjuṭangku ara irititja wanara puṭu wankaringangi. Ka nyara palulanguru Godalu ara kutjupa kuwaritjalta pakaltjanganu.

⁸ Palu Godalu nyangu palumpa anangu tjuṭa kuraringkunyangka, panya anangu nyara paluru tjanya palumpa ara Mosenya panya ungunytjita wanalwiyangku wantinyangka. Munu paluru tjana wangkangu nyanga alatji,

"Kulilaya Jew tjuṭangku ngura Israelta munu Judah-la nyinanytja tjuṭangku!

Ngayulu ngula palyalku nyurampa ara kutjupa kuwaritja.

⁹⁻¹⁰ Palu ara kuwaritja panya nganmanyitja purunypa wiya.

Panya iriti ngayulu ara nganmanyitja wangkangu Mosela tjana ngura panya Itjipalanguru katinytjatjanungku.

Ka panya paluru tjana kulira wantira tungunpungu, kana palulanguru tjanya wantingu.

Palu nyangatja panya ara kuwaritja ngayulu kalkuni Israelkunu tjuṭa tjana titutjarangu kulikatinytjaku.

Ngayulu ngayuku tjukurpa tjanala unngu nintilku tjana ara nyanga palunya pina alaringkula tjukururungku kulintjaku.

Kaniya ngayunya kutju mulamulangu walkulku munuya ngayuku walytjapiti mulapa nyinaku.

11 Palu uwankarangkuniya ngayunya tjukururungku ngurkantankuku, ka kutjupangu anangu kutjupa araka wituwituntja wiya Mayatjaku nintiringkunyitjaku.

Panya uwankarangkuniya alatjitu ngurkantankuku, anangu kuranyitja tjutangu munu anangu malatja tjutangu kulukulu.

12 Kana ngayulu ngaltunytjungku tjana kura palyantjitjanguru tjananya kalypangku wantiku,

mununa tjana kura palyantjitjaku watarkuriku alatjitu piruku kulintja wiya." *

Alatji Godalu iriti wangkangu anangu tjutangka ara kuwaritja palyantjikitjangku.

13 Ka nyura kulini? Panya ara nyanga kuwaritja wangkara utira Godalu ara nganmanyitja wiyaringkunyitjaku wangkangu, ka panya kuwari nguwanpalta wiyaringanyi.

9

Tiinta Milmilpa Mantatja Munu Ilkaritja

1-3 Palu ara nganmanyitjangka Godalu tjukurpa tjuta wangkara ungu tjana kulira tjukururungku palunya walkuntjaku inmangka. Munu tjukurpa kutjupa tjuta wangkara ungu tiinta milmilpa tjukururungku palunya tu palyantjaku inmaku. Kaya mulapatu palyantu tiinta panya palunya munuya pala palula inma kanyiningi. Ka tiinta panya paluru kampa kutjaratjara, kampa tjangatitja ngura milmilpa, ka kampa kutjupa munkaritja ngura milmilpa mulapa, ka ngurur-kutjara mantara wiru waraly-waralyngarala angatjunangi kampa nyara munkaritja. Ka kampa tjangatitjangka punu tili tjutatjara ngarangi. Ka taipula kulu ngarangi mai nyumatjara panya milmilmarra Godanya ungunytja.

4 Ka kampa munkaritjangka ngura panya milmilpa mulata piti gold-nguru palyantja ngarangi. Ka piti unngu kutjupa kutjupa ngaringi panya tjana kutjalpai wiru pantinytjaku. Ka pakutja pulka panya kalkuntjitja kulu kampa pala palula ngaringi pununguru gold-nguru palyantja. Ka pakutjangka unngu walpayata purunypa gold-nguru palyantja ngarangi mai panya manna-tjara. Ka Aaronku tjukara kulu ngaringi pakutjangka unngu. Panya iriti punu tjalytjaruru tjuta pakanu tjukara pala palula. Ka apu tjiwa kutjara kulu pakutja palula unngu ngaringi, tjukurpa panya pulka tjutatjara panya Godalu walkatjara ungunytja.

5 Ka pakutja pala palula katu angelpa purunypa kutjara nyinangi nyalpitjara gold-nguru palyantja. Nyanga paluru pula panya Godanya nyinanytja utini. Munu pula nyalpi kutjara lipiringkula ngaparku nyinara pakutja anga-tjutura nyinangi. Ka palula pulala ngururpa nyinara Godalu anangu tjutaku ngalturingkupai, munu tjukurtjara pulkangku pakutja palunya milkalingka kurpinnyangka

* 8:12 Jeremiah-ku 31:31-34

paluru anangu tjuṭa kura tjuṭa palyantjitjanguru kaly pangku wantipai pungkunyta wiyangku. (Uwa, tjinguruna tjukurpa kutjupa tjuṭa wangkama tiinta nyanga palunyatjara, palu kuwarina wantinyi mutumuṭu walkatjungkunytitjikitjangku.)

⁶ Ka panya tjana tiinta, munu pakutja panya, kutjupa kutjupa tjuṭa kulū tjukarurungku palyara wiyanu. Kaya palulanguru tjintu kutjupa tjintu kutjupa wati tjukurtjara tjuṭa tjarpangi tiinta panya kampa tjangatitjangka, ngura panya milmilta, munuya waraka tjanampa palyaningi.

⁷ Palu kampa panya munkaritja milmilpa mulapa, ka wati tjukurtjara pulka kutju tjarpapai nyara palula, kulangka kutju tjuṭa-ara wiya, kutju-ara. Munu paluru maralpa tjarpanytja wiya, kukaku milkali pitangka katira kutju tjarpapai, munu Godanya nintipai paluru nyakula palunya munu anangu tjuṭa kulū kaly pangku pungkuwiyangku wantinytjaku paluru tjana kura tjuṭa watarkungku palyannyangka.

⁸ Ka ara nyanga palula tjanalanguru Kurunpa Milmilu nganananya nintini nyanga alatji kulintjaku, panya ara nganmanyitja tiinta milmilpatjara ngaranyangka nganaṇa puṭu tjarpanyi kampa munkaritjangka panya milmilpa mulata. Nyanga paluru nganananya nintini panya nganaṇa puṭu Godala tjunguringanyi.

⁹ Ka pala palulanguru nganaṇa kuwari kulini ara panya nganmanyitjangku nganananya puṭu kurunpa palyani Godala tjungurungkunyitjaku. Panya tjana kuka mai katira ungkuyangka Godalu tjananya kura palyantjitjanguru kaly pangku wantipai, palu kurunpaya Godala tjungu mulapa nyinanytja wiya ngarangi.

¹⁰ Panya ara nganmanyitjatangku kutjupa kutjupa tjuṭa wangkapai, panya mai kuka kutjupa kutjupa tjuṭa ngalkuntjaku munu kutjupa kutjupa tjuṭa wantinytjaku, munu kutjupa kutjupa tjuṭa tjikintjaku, kutjupa kutjupa tjuṭa tjikilwiyangku wantinytjaku. Munu piruku wangkapai yaaltjingara tjananku puntu tjukarurungku paltjintjaku, munu kutjupa kutjupa tjuṭa kulū paltjintjaku. Palu ara nyangantu uwankarangku puntutja wangkapai kurunitja wiya, panya ara nyanga paluru tjana unytju paṭara ngarangi Godalu ara kuwaritja utintjaku.

¹¹⁻¹² Palu panya Christanya tjukurtjara pulka nyinanyi ara panya kuwaritjaku. Panya paluru tjarpangu Godaku ngura milmilta nganananya ngalkira wiru tjuṭa nganampa palyantjikitja. Palu ngura nyara palunya watingku palyantja wiyatu, panya nyaratja ngura mantatja wiya, ilkaritja wiru mulapa. Ka panya Jesulu milkali nanikutanguru puluka kulunypanguru mantjira katinytja wiyatu ngura nyara palulakutu. Palu palurunku ilura milkali palurunku tjutingu, munu ngura panya milmilta ma-tjarpangu kutju-ara alatjitu, tjuṭa-ara wiya, munu nyara palulanguru paluru nganananya kuranguru wankarunu nganaṇa Godala mirangka kunṭa wiya nyinanytjaku titutjara.

¹³⁻¹⁴ Ara panya nganmanyitjangku alatji wangkanyi panya watingku kutjupa kutjupa pampuntjatjanu puṭu tiinta milmilta tjarpapai, palu uti paluru wati tjukurtjarangka nganmanypa wirkanama, ka paluru nanikutaku milkalingka, munu puluka nyitayiraku milkalingka kulū mantjira palunya puntu winki kurpinma, munu tjinguru puluka kungka kulunypa kampara tjunparingkunyitjita tjunpa mantjira minangka urura palunya kurpinmatu. Ka nyara palulangurulta wati

paluru palyaringanyi Godanya walkuntjikitja tiinta nyara milmilta tjarpara.

Uwa, panya kukaku milkalingku tjunpangku kulu wati nyara palunya palyani Godanya walkuntjaku. Palu milkali nyanga kuka tjutanguru unytju kutju ngaranyi mantatja. Palu Christaku milkali palya mulapa uwankarangka waintarinytja. Panya Kurunpa Milmiltu titutjara nyinapailu Jesunya kunpunnyangka paluru wiru mulapa nyinanytjatjanungku punu katakutjarangka ilura palurunku puntu winki Godanya ungu milkali tjutira. Nyara palulanguru paluru nganannya unngu tjukaruru, kala ara panya nganmanyitja tjuta palyantja wiyaringu, panya ara palunya tjananya wanara nganana putu palyaringangi kuka pungkula rawangku untkula untkula. Palu panya Jesulu nganannya mulapa kulintja tjukaruru nganana kunta wiya Godala tjunguringkula rapa nyinanytjaku munu palula wanganarangku kulira warkarinytjaku, panya paluru wanka alatjitu nyinanyi witulya pulkana.

15 Uwa, Christalu ara kutjupa wirkakatingu kuwaritja Godalanguru nganampa palumpa walytja tjutaku, nganana mulamularingkula Godalu kalkuntjita mantjintjaku. Panya Godalu nganannya ngurkantara kalkunu palula tjungu titutjara nyinanytjaku. Palu nyan-gatjala mantjini nganampa anga-ilunyangka kutju. Panya ara nganmanyitjangkala nyinakatira putu kuliningi kura wantinytjikit-jangku, palu panya Jesunya nganampa ngalkilpa ilunyangka kutjula karalyarira wankaringu.

16-17 Ara nganampa alatji ngaranyi, panya nganana nyiringka walkatjura kalkulpai wanka nyinaralpi nyanga alatji ngayulu ilunyangka malangka uti ngayuku tjitji tjutangku mantjinma ngayulu kanyintja uwankara. Nyanga alatjila kalkulpai. Palu tjitji tjutangku ngayulu wanka nyinanyangka putu ngayuku uwankara mantjini panya nganana tjungu nyinanyi, palu kalkuntja nyanga paluru utiringkuku ngayulu ilunyangka kutju.

18 Ka nyanga palu purunypa ngarangi ara panya nganmanyitjangka, panya Godalu kalkuntja utiringangi kuka pungkunyangka kutju, palu kuka pungkunytja wiyangka wiyatu ngarangi. Panya kuka pungkula kutju milkali mantjira Godanya untkupai, ka nyara palulanguru kutju Godanya tjanampa kalyparingkupai.

19 Panya Moselu tjukurpa uwankara Godalu untkunytja tjanala wangkangu anangu panya uwankarangka. Munu palulanguru iluntanu puluka kulunypa, nanikuta kulunypa munu mantjira milkali minangka tjungunu. Munu palulanguru punu mina tjukutjuku mankurpa katantanu nyalpitjara munu karpira tjungunu nyalpi winki puturu tjin-tjintinta. Munu punu panya nyalpi winki karpintjita kukaku milkalingka tjalatjunu munu nyiri Godaku tjukurtjara kurpinu milkalingka, munu anangu uwankara kulu.

20 Munu paluru wangkangu, "Nyawaya milkali nyangatja, panya Godalu nyuranya tjukurpa pulka tjuta ungu nyura wanganarangku kulintjaku. Ka nyanga kukaku milkalingku nyuranya nintini panya tjukurpa nyanganpa kuwaringuru ma-ngaranyi." Alatji Moselu tjanala wangkangu mulamulangku kulintjaku.

21-22 Ka panya Moselu kukaku milkali katingu tiinta milmilpa unngu munu tiinta kurpinu munu unngu panya ngaranytja uwankara kulu. Panya Godaku tjukurtu alatji wangkanyi, "Milkalingka kurpinnyangka kutju kutjupa kutjupa uwankara palya ngarapai Godala mirangka. Ka panya milkali ilura tjutinyangka kutju Godalu anangu tjutangku kura palyantjitjanguru kalypangku pungkuwiyangku wantipai."

Christanya Milkali Tjutira Ilunyangka Kutju Godalu Nganananya Kalypangku Wantipai

23 Ka panya tiinta nyara palunya munu unngutja tjuta kulu tjana arkara palyanu nyara ngura ilkaritjangka ngaranytja purunypa. Ka wati tjukurtjarangku kukaku milkalingka kurpilpai tiinta munu unngu ngaranytja uwankara kulu Godala mirangka palya mulapa ngaranytjaku. Palu tiinta nyara ilkaritja kukaku milkalingku putu palyani. Wiya, Christaku milkalingku kutju ngura nyara palunya palyani nganana tjarpara Godala tjungu nyinanytjaku.

24 Panya Christanya tjarpanytja wiya watingku palyantjitjangka tiinta panya milmilpa. Nyaratja arkara palyantja ngura panya ilkarangka ngaranytja purunypa. Palu Christanya ngura ilkaritja mulata tjarpangu munu paluru Godala anga-wangkanyi nganampa ngalkiltu.

25-26 Palu wati tjukurtjara pulka kampa panya munkaritjangka milmilpa panya mulata waintara tjarpapai kukaku milkalitjara kuli kutjupa kuli kutjupa. Palu Jesulu yaaltjitu arangku palurunku ungu? Paluru wanyu rawa ilatu-ilatu ilukatingi kuwaripatjaranguru alatjitu panya Godalu manta palyantjalanguru? Wiya, ngula mulapa tjintu watalpi ilaringkunyangka paluru pitjangu munu palurunku ungu iluntankunytjaku kutju-ara alatjitu Godanya nganampa kalyparingkunytjaku.

27-28 Anangu uwankara kutju-ara ilunytjaku ngaranyi. Ka ilunyangka malangka Godalu nganananya ngurkantankuku. Ka panya palu purunypa nganana kura palyantjitjanguru Christanya kutju-ara ilungu nganampa ngalkilpa. Uwa, paluru walytja intjanuringu iluntankunytjaku Godalu nganananya kalypangku pungkuwiyangku wantinytjaku. Munu paluru ngula malaku pitjala piruku kuranguru ilunytja wiya anangu panya palumpa patara nyinanytja tjuta wankaru katiku.

10

1 Tjukurpa panya Godalu Mosenya tjananya ungunytja, nyara paluru ngatalpa ngaranyi ruwa nguwanpa. Panya tjukurpa paluru kuranyukutungku nintiningi ara kutjupa wiru mulapa Godalu kalkuntjita. Palulanguru, ngatalpa ngaranyangka, Moseku tjukurtu anangu tjuta putu tjukarurulpai tjana Godala mirangka palya ngaranytjaku. Panya tjukurpa paluru wangkapai Godanya ilaringkula walkuntjikitjangku kuka katira pungkula ungunytjaku palunya. Palu nyanga alatjiya rawangku kuli kutjupa kuli kutjupa ungkula ungkula putu tjukarururingangi munuya kura winkitu ngarangi Godala mirangka.

2 Tjinguruya kuka ungkula tjukarururingkulampa Godala mirangka palya ngarama kuntarangkuwiya munuya palulanguru tjinguru kuka

piruku katinytja wiya ngarama palyaringkunyjtjanungku. Palu tjana ungkula palyaringkunyjtja wiya munuya rawatu kuranguru kuntarangangi Godala mirangka,

³ munuya kuli kutjupa kuli kutjupa ungkula rawangku kuliningi panya tjana kura palyantjatjanungku.

⁴ Panya nanikutaku pulukaku milkalingku Godanya puu kaly-palpai paluru nganananya kura palyantjitjanguru pungguwiyangku wantinytjaku.

⁵⁻⁶ Ka palulanguru Christalu mantakutu pitjanytjikitjangku wangkangu alatji Godala,

“Nyuntu mukuringkunyjtja wiya anangu tjutangku nyuntunya rawangku kuka katira ungkunyjtjaku.

Panya tjana kuka pitjilpangka tjunkula katu kurkaltjura wantipai kampara mulururinytjaku nyuntu tjanampa kalyparingkunyjtjaku.

Palu nyanga kuka pungkunyjtjitjanguru nyuntu pukularipai wiya.

Panya nyuntuin witunu anangurira ilunytjaku.

⁷ “Kana palulanguru nyuntula wangkangu, ‘Uwa, nyangatjana ngaranyi ngayulu nyuntu witunnyangka wanganarangku kulira palyantjikitja nyuntu mukuringkunyjtja uwankara.

Panya alatjiya iriti walkatjunu nyiringka, ngayulu nyanga alatjirinytjaku.’ ” *

Nyanga palunya Christalu wangkangu Godala.

⁸ Palu ara Godalu Mosenya ungkunyjtjitjangku wangkangu alatji kuka mai katira palunya ungkunyjtjaku, kaya wanganarangku kulira palyaningi. Ka panya Christalu wangkangu, “Nyanga palumpa Godanya pukularinytja wiya, muni paluru kuka katira palunya ungkunyjtjaku mukuringkunyjtja wiyatu.”

⁹ Muni palulanguru wangkangu Godala, “Uwa, nyangatjana ngaranyi ngayulu nyuntula wanganarangku kulira palyantjikitja nyuntu wangkanyangka.” Alatji Christalu Godala wangkangu. Ka nyura kulini nyanga palunya? Panya Godalu ara irititja wiyanu muni kutjupalta tjunu kuwaritja palumpa katjawanungku.

¹⁰ Panya Jesulu wanganarangku kulira palyanu Godalu wangkanyangka, ka nyara palulanguru Godalu nganananya kura palyantjitjanguru kalypanngu wantingu pungkunyjtja wiyangku. Panya palumpa katja walytja alatjitu intjanuringu muni nganampa ngalkilpa kutju-ara ilungu. Ka nyara palulanguru nganana Godala mirangka kuntu wiya kalyparingkula nyinanytjaku ngaranyi.

¹¹ Panya wati tjukurtjara tjutangkuya rawangkuu tjinu kutjupa tjinu kutjupa kuka pungkula Godanya ungkupai anangu tjutangku kura palyantjitjanguru. Palu anangu tjutaya rawatu kuntu ngarapai Godalu tjananya kura palyantjitjanguru pungkunyjtjaku patara. Panya tjukurtjara tjutangku kuka pungkula Godanya ungkula palunya puu kalyalpai paluru anangu tjuta pungguwiyangku wantinytjaku.

¹² Palu Jesunya walytja intjanuringu kutju-ara alatjitu ilura, muni palula malangka paluru wankaringkula anu muni nyinakatingu Godala itingka mayatja pulka mulapa. Panya paluru kutju-ara ilunytjatjanungku Godanya kalypanu,

* 10:7 Psalm 40:6-8

13 munu paluru kuwari patara nyinanyi Godalu palumpa mirpantju tjuta tjaruntjaku tjanala waintarira mayatja pulka mulapa nyinanytjikitjangu.

14 Uwa, paluru kutju-ara ilura anangu uwankara kutju kutju palulakutu pitjanangka kuranguru piranmanu palula tjunguringkula titutjara kalypa nyinanytjaku. Panya palunya tjananya Godalu ngurkantanu palumpa walytjaringkunyjtaku.

15 Ka Kurunpa Milmilu tjukurpa nyanga palunya tu nganana tjakultjunanyi, panya paluru alatji wangkangu,

16 "Nyangatja ara kuwaritja ngayulu ngula nintilku.

Panya ngayulu ngayuku tjukurpa tjanala unngu nintilku tjana ara nyanga palunya pina alaringkula tjakarurungku kulintjaku."

17 Ka piruku Godalu nyangatja wangkangu,

"Ngayulu tjana kura palyantjijtaku watarkuriku alatjitu piruku kulin-tja wiya." *

18 Uwa, paluru anangu tjutaku kalyparingu munu tjananya kura palyantjijtangu kalypangu wantipai. Kala wanyu Godanya kuka rawangu katira ungama nganampa kalyparingkunyjtaku? Wiya, ara panya nganmanyitja wiyaringu panya paluru alatjitu nganampa kalyparingu.

Uti Raparingkula Godala Titutjara Tjunga Nyinama

19 Uwa, walytja wiru tjuta! Nyanga palulangurula uti raparingkula Godala tjunguringama, panya Christalunku milkali palumpa tjutira alana nganana Godaku ngura milmilpa mulata rapa tjarpanytjaku.

20 Panya Jesunya ilunyangka kutju mantara panya timpulangka waraly-waralyngaranytjanya tjilpiraranu munu alaringu ngura panya milmilpa mulata nganana waintara tjarpanytjaku. Nyangatja paluru ilura iwara kuwaritja palyanu wankakutu Mamala tjunguringkula wankaru nyinanytjaku.

21-22 Kala uti raparingkula Godala ilaringama, panya Jesulu tjukurtjara pulkangu Godaku ngura milmilpa kanyini. Munu panya paluru nganannya kurunpa paltjiru Jesulu palumpa milkalangka nganana kunta wiya nyinanytjaku, munulanya piranmanu kapi kalara wirungka palumpa walytja mulapa nyinanytjaku. Kala uti alatjinkunyangka kurunpa winki pukularira Godala ilaringama palumpa pulkara mulamularingkula kutju.

23 Munula uti mulamularingkula Godaku ala-alangu patanma panya paluru nganannya kalkunu wirura kanyintjikitjangu munu palumpa ngurakutu katinytjikitjangu. Kala uti tungun-tunguntu kulinma watarkurinytja wiyangu titutjarangu, panya Godalu ngunti kalkulpai wiya tjakarurungku kutju wangkapai.

24 Wanyula kulinma wirura nyinanytjikitjangu, munulanku wituwitunma anangu uwankaraku pulkara mukuringkunyjtikitjangu, munulanku ngaltunytjungku alpamilantjikitjangu kulinma.

25 Munula uti Godanya walkuntjikitja rawa tjunguringama, panya kuwari nyura kutjupattara ngurangka nyinapai tjunguringkunyitja wiya. Palu wanyuya Tjintu Malatja kulinma panya watalpi ilaringanyi Jesunya malaku pitjanytjaku, kalanku uti

* 10:17 Jeremiah-ku 31:33-34

uwankara rawatu tjunguringama munulanku kunpunma Christanya titutjarangku wanantjikitjangku.

26-27 Ka ngana panya ninti Christaku munu palumpa tjukurku kulu. Palu tjingurula nyanganpa kulira wantira kura titutjarangku palyannyangkampa Godanya yaaltjingara nganampa piruku kalyparingkuku? Wiya, panya Christanya nganmanypa ilungu, ka kutjupa munkara palu purunypa ngaranytja wiya nganampa kuranguru piruku ilunytjaku. Kala yaaltjiriku palunya wantirampa? Wiya kutju nganampa ngaranyi panya ngana ngulu-ngulu patara nyinanytjaku Godalu ngananyanya ngula ngurkantara tjarantjaku Tjintu Malatjangka. Panya Godanya pulkara mirpanariku palula tungunpungkupai tjutaku munu paluru tjananya wiyalku, panya waru pulkangku kampara nyarulpai, palu purunytju uwankara wiyalku.

28-29 Panya anangu kutjupangku Moseku tjukurta tungunpungkunyangka palunya pungkula iluntankunytjaku ngarapai. Panya anangu kutjarangku, tjinguru mankurtu, anangu palunya tungunpungkunyangka nyakula wati mayatjangka tjakultjunkturupai, ka palunya iluntankunytjaku wangkapai ngalturingkunyitja wiyangku. Palu anangu kutjupangku tjinguru Godaku katja anannyangkampa Godalu palunya tjituru-tjituru pulka mulapa palyalku. Munu tjinguru paluru Jesunya milkali tjutinytja nguntinmankunyangka Godalu palunya mapalku alatjitu pungkuku. Munta tjinguru paluru Godaku Kurunpa ngaltunytjunya analku, ka Godalu palu purunypatu palunya pungkuku. Panya anangu nyara palumpa alatjitu Jesunya ilura tjutingu milkali, ka nyara palulanguru Godanya palumpa kalyparingu ara nyanga kuwaritjangka. Ka paluru ara nyanga palunya tungunpungkula wantinyangkampa Godalu wantinytja wiyangku palunya pungkuku.

30 Panya ngana ninti Godalu alatji wangkangu, "Ngayuku ara ngaranyi, panya anangungku ngayula tungunpungkunyangka ngayulu palunya pikantankunytjaku ngaranyi." Munu piruku paluru wangkangu, "Ngayuluna tjukarurungku ngurkantara tjaralku ngayuku walytja tjuta."

31 Kaya wanyu kulinma! Godanya wanka alatjitu nyinanyi witulya pulkanya munulanya paluru kuwari nyanganyi. Kala wanyu ngulu-ngulu nyinama anannyangka pitjala ngananyanya pungkunytjaku-tawara.

32 Kulilaya panyatja, panya nyura nganmanypa Jesuku walytjar-ingkunyitja Godalu nintinyangka. Nyara palula arangka panya kutjupa tjutangku nyuranya pulkara kurara pungangi, ka nyurampa ara wituwitu mulapa ngarangi. Palu ara nyara palulawanungku nyura tungun-tunguntu Jesunya wananingi wantinytja wiyangku.

33 Panya kutjupa-ara tjana anangu tjutangka mirangka nyuranya anara kurara pungkupai. Munu tjana Jesuku walytja kutjupa tjuta kulu palu purunymankupai. Palu nyura panya palunya tjananya nyakula nguluringkula paturingkunyitja wiyangku wantira palula tjanala tjunguringangi.

34 Munuya Jesuku walytja kutjupa tjuta tjailangka tjunkunyangka nyura panya ngalturingkula tjananya wirura kanyiningi. Munu panya kutjupa tjutangku nyurampa ulytja uwankara tjulyara katinyangka nyura pukulpa nyinangi tjanampa mirpanarinytja wiya, panya nyura

nintingku kuliningi, “Ngayuku pukuḷpa kutjupa ngaranyi mantan-gurutja wiya palu Godalanguru, paluru kalkuntjitja. Ka pukuḷpa nyara paluru wiyaringkupai wiya titutjara ngarapai.”

³⁵⁻³⁶ Uwa, nyura panya Christanya rawangku rapangku wananingi, palu pakuringkuntja wiyangkuya wantima. Panya Godalu nyuranya kalkunu wiru ungkuntjikitjangku nyura rawangku rapangku wanannyangka. Kaya tungun-tunguntu wananna, munuya palulanguru Godala wanganarangku kulirampa nyura Godalu kalkuntjitja mantjilku alatjitu.

³⁷⁻³⁸ Panya nyiringka iriti walkatjungkuntja alatji ngaranyi, “Paluru kalkuntjatjanu mulapa pitjaku alatjitu kuwari nguwanpa, rawa ma-nyinanytja wiya.

Kaya ngayuku walytja tjuṭa mulamularingkula titutjara nyinaku, palu tjinguruya ngayulanguru paturingkunyangka ngayulu tjanampa pukularinytja wiya.” *

Nyanga palunya Godalu wangkangu.

³⁹ Ka nganana Godanya wanarampa paturingkuntja wiya panya anangu kutjupa tjuṭa purunypa wiya, panya tjana Godanya wantira ma-paturingkula kawankatipai mirikutu alatjitu. Palu nganana rawa mulamularingama Godaku, kalanya wankaru kanyilku.

11

Godaku Mulamularingkuntja

¹ Palu nyaa Godaku mulamularingkuntja? Wiya, panya anangu Godaku mulamularingkuntja nyanga alatji panya paluru rapangku kulintjatjanungku nyinara patani Godalu kalkuntjitja utiringkuntjaku. Paluru panya putu nyanganyi kurungku Godalu kalkuntjitja wirkankuntjaku, palu paluru nintingku kulini, “Mulapa paluru kalkuntjatjanungku palyalku alatjitu.”

² Panya iriti Godaku walytja tjuṭa palumpa mulamularingkunyangka Godanya tjanampa pulkara pukularingi.

³ Ka nganana Godaku mulamularingkula nintingku kulini panya paluru ilkari manta kulu wangkara palunu. Kala nyanganyi paluru paluntjitja uwankara, palu putula nyanganyi yaaltjinguru paluntja, panya paluru arkayitjanguru palunu wangkangu kutju.

⁴ Uwa, wanyula kulinma anangu irititja tjuṭa Godaku mulamularingkupai tjuṭa.

Abelnga

Panya Godaku mulamularingkula Abeltu tjukarurungku kuka pungkula ungu Godanya palumpa kutangku Kaintu purunypa wiya. Ka Godanya palumpa pukularingu munu Kainnga wantingu munu paluru mulamularingkunyangka wangkangu Abelnga, “Nyuntu ngayula mirangka tjukaruru ngaranyi.” Palu Abelnga iriti mulapa ilungu munu paluru nganannya kuwari nintini Godaku mulamularingkuntjaku.

Iinakanya

⁵ Ka Godaku mulamularingkula Iinakalu palunya pukuḷmanu, ka Godalu palunya wanka katingu. Panya nyiringka ngarinyi alatji,

* 10:37-38 Apakukaku 2:3-4

“Godanya pukularingu palumpa munu ilunytja wiya wanka katingu.” Kaya anangu tjutangu palunya putu nguriningi Godalu palunya katinyangka.

⁶ Palu ngayulu tjinguru Godaku mulamularingkunytja wiya nyinarampa palunya putu pukulmananyi. Panya ngayulu Godalakutu ilaringkunytjikitja mukuringkulampa uti palumpa mulamularingama panya paluru mulapa nyinanytjtjaku, mununa uti ngayulu mulamularingkula kulinma panya mulapa paluru anangu tjutaku wiru mulapa palyalpai palulakutu pitjanyangka.

Noah-nya

⁷ Ka Noah-lu Godaku mulamularingkula pauta pulka palyanu, panya Godalu palula nganmanytju wangkangu mina pulka mulapa iyantjikitjangku, mina panya tjana nganmanytju nyakunytja wiyatja. Ka paluru Godala kulintjatjanungku pauta palyanu munu walytja tjutatjara uru pulkangka-tawara tjarpara wankaruringu. Kaya anangu tjutangu Noah-nya purunypa mulamularingkunytja wiyangu wantingi, munuya Noah-nya wankaringkunyangka wiyaringu alatjitu kura nyinanytjatjanu. Palu Noah-nya Godaku mulamularingkunyangka Godalu palunya walytjanmara wangkangu, “Mulapa nyuntu ngayula mirangka tjukaruru ngaranya.”

Aipuramanya

⁸ Ka panya Aipuramanya Godaku mulamularingkula parari anu ngura ngurpatjakutu. Panya Godalu ngura palumpa wantikatira ankunytjaku alatji wangkara kalkunu, “Ngayuluna ngura kutjupa nyuntunya unkkuku.” Ka Godalu wangkanyangka paluru kulira wanganara pakara watarku anu munu putu kuliningi, “Yaaltjikutuna nyangatja ananyi?”

⁹⁻¹⁰ Munu paluru Godaku mulamularingkula malikitja purunypa nyinangi tiinta palyara ngura panya kalkuntjitjangka wirkara. Ka palumpa katja Isaacanya munu palumpa pakali Jacobanya kulu ngura nyara palula wirkara nyinangi, panya Godalu tjananya kulu kalkunu ngura nyara palula nyinanytjaku. Palu Aipuramanya tiintangka pukulpa nyinangi malikitja purunypa ngura panya palula panya paluru nintangku kuliningi, “Nyangatjana unytju nyinanyi ngura nyanga mantangka, panya Godalu ngura kutjupa pulka palyanu ngayuku wiru mulapa, kana ngura nyara palumpa patara nyinanyi. Ka ngura nyara paluru panya kampa kutjuparinytja wiya paluru tu ngaraku titutjara.”

¹¹⁻¹² Munu paluru Godaku mulamularingkula tjitji utinu, panya paluru wati tjilpi ka palumpa miita Tjiiranya minyma pampa iti putu kanyilpai. Palu panya Godalu kalkunu tjitjiku, ka Aipuramanya mulamularingu palumpa panya paluru tjukarurungku wangkapai. Uwa, Aipuramanya panya wati tjilpi nyinangi tjitji putu utilpai, palu palula kutjunguruya walytjapiti mungilyiringu kililpi ilkaritja tjuta purunypa, munu paki kuluny-kulunypa tjuta panya karungka ngarinytja purunypa, mungilyi mulapa.

¹³ Uwa, wati panya paluru tjana munu Aipuramanya tjana kulu Godaku rawa mulamularingangi titutjara wiyaringkunytja wiya ilunytjakutu-wangkara. Palu panya tjana wanka nyinara mantjintja

wiya Godalu panya kalkuntja. Palu tjana nganmanytju kuliningi ngula utiringkunyjtaku munuya pulkara pukularira wangkangi, “Nganana nyntju akatjari mantangka nyanga nyinanyi.”

¹⁴ Ka panya tjana alatji wangkanyangka nganana kulilpai, “Munta-uwa, tjana nyinara pataningi ngura kutjupaku.”

¹⁵ Tjinguru wati nyangantu ngura tjananku wantikatinytjatjanu kulira watjilarima, munuya mukuringkula malaku wantira anama.

¹⁶ Palu wiya, paluru tjana ngura nyara palunya kulintja wiya panya tjana ngura kutjupaku mukuringangi ngura wiruku, panya ilkaritjaku. Ka palulanguru Godanya palunya Mama walkunyangka tjanampa pukularipai kuntaringkunyjtja wiya, panya paluru tjanampa ngura pulka mulapa palyanu.

¹⁷⁻¹⁹ Ka Aipuramalu Godaku mulamularingkula katja palumpa Isaacanya katingu iluntara Godanya ungkunyjtikitjangku. Panya Godalu palula wangkangu arakara nyakunyjtikitjangku wanganarangku kulinyangka. Palu panya nganmanytju Godalu Aipuramanya kalkuntjtja ngarangitu palumpa katja Isaacalanguru walytjapiti tjturingkunyjtaku. Ka nyara palulanguru paluru katja palumpa iluntankunyjtja kuwaripangka kuliningi, “Godalu mulapa ilunyangka wankalku.” Ka Godalu mulapatu ungu palumpa katja malakungku. Panya wati ilunyangka Godalu wankalpai, palu purunypa Godalu palunya nguwanpa iluntankunyangka wankanu.

Isaacanya

²⁰ Ka Isaacalu Godaku mulamularingkula katja kutjara pukulmanu Jacobanya pulanya Iitjanya alatji kalkura, “Panya Godalu nyupalimpa wiru tjuta ngula palyalku.”

Jacobanya

²¹ Ka Jacobalu Godaku mulamularingkula palu purunytjtutu pukulmanu palumpa katja tjuta alatji wangkara, “Panya Godalu nyurampa wiru tjuta ngula palyalku.” Alatji paluru nganmanytju wangkangu malangka ilunytjikitjangku. Munu paluru patanytjanantjtu ngarala tjukatjarangku walkuningi Godanya.

Josephanya

²² Ka Josephalu Godaku mulamularingkula nintingku kuliningi panya Israelkunu tjtutangku ngula ngura Itjipanya wantikatiku. Munu tjiipiringkula paluru palumpa walytja tjtutangka utingku wangkangu nguwanpa ilura palunya tarka ngula katinytjaku Itjipalanguru Israeltakutu.

Mosenya

²³ Ka Moseku ngunytjungku mamangku Godaku mulamularingkula palunya kutitjunu pira mankurpa iti wirkankunyangka. Panya Itjipaku mayatjangku Piiralu palumpa tjaultji tjtutangka wangkangu iti nyitayira tjuta iluntankunyjtaku. Palu mamangku ngunytjungku pula nguluringkuwiyangku kutitjunu iti panya palunya, panya paluru pula nintingku ngurkantanangi, “Iti nyangatja wiru mulapa.”

²⁴⁻²⁶ Ka ngula Mosenya pulkaringkula paluru kulu Godaku mulamularingkula Mayatja Piiraku ngura wantikaira palumpa walytja tjtutakutu anu. Panya paluru alatji kuliningi, “Tjinguruna

Piiraku walytja tjuṭangka tjungu rawatu nyinarampa ngayulu Godaku watarkurira kura tjuṭa unytjungku kutju pukularira palyanma. Palu ngayulu tjananya wantikatira Godaku walytja tjuṭangka tjunguringkula pikangka alatjitu nyinanyi panya Itjipanya ngurara tjuṭangu nganannya kurara punganyi. Tjinguruna Itjipanya ngurara tjuṭangka tjungu nyinarampa kutjupa kutjupa wiru tjuṭa mantjinma. Palu ngayulu wantira pikawanu nyinanyi ngayuku walytja tjuṭangka tjunguringkula, panya ngananaṅalangu mayatja pulka ngula utiringkuku nganampa wankarunkupainya.” Uwa, Mosenya nyanga alatji nyinangi panya paluru piruku kutjupa munkaritja kulinigi ngula Godalu kalkuntjatjanungku ungtjunytjaku.

²⁷ Munu piruku Godaku mulamularingkula Moselu ngura Itjipanya wantikatingu. Panya paluru nguluringkuntja wiya Mayatja Piiranya palumpa mirpanarinyangka. Paluru tungun-tunguntu wananingi Godanya uti nyakula purunytju. Palu kurungku nyakuntja wiya unngu kutju mulamularingangi.

²⁸ Munu Godaku mulamularingkula Moselu wangkangu anangu tjuṭangka kukaku milkalingka wali tjananku tuwa urilitja nyitintjaku angeltu pitjala nyakula katuwanu ankunytjaku tjanampa katja nganmanyitja tjuṭa iluntankunytjaku-tawara. Nyara palula arangka paluru palyanu inmangka tjunguringkula angelpa katuwanu ankunytjanya rawangku kulintjaku.

²⁹ Kaya Godaku mulamularingkula Mosenya tjana anangu tjuṭa kulu ngura uru ini Tjitin-tjitinta ngururwanu itipiringu manta pitlingka. Kaya wati panya Itjipanya ngurara tjuṭangu tjananya malawanungku wataparara urungka ngururpau ilungu urungku malakungku tjananya tjutunnyangka.

Tjatjuwanya Tjana

³⁰ Ka Tjatjuwanya tjana Israelkunu tjuṭa kulu Godaku mulamularingu munuya Godalu wangkanyangka wanganarangku kulira tawunu panya Jerichola tjintu 7-ara para-arintanangi, ka wall panya pulka para-arintara ngaranytja pilukatingu.

Rayapanya

³¹ Ka minyma panya wati tjuṭangka kampangkatu ngaripainya ini Rayapanya Godaku mulamularingkula wankaringu. Panya pilukatinytja kuwaripangka Tjatjuwalu wati kutjara iyanu Jerichola tjarpara kampangkatu para-nyakula malaku pitjala tjakultjunktunytjaku. Ka pula Jerichola wirkankunyangka, Rayapalu palunya pulanya Jerichonya ngurara tjuṭaku ngulungku mantjira kutitjunu palumpa ngurangka iluntankunytjaku-tawara. Nyara palulanguru paluru wankaringu, panya malangkalta Israelkunu tjuṭangu Jerichonya ngurara kutjupa uwankara iluntanu Godanya kulira wantinyangka.

Godaku Mulamularingkupai Tjuṭa Iriti Nyinanytja

³² Wanyuna piruku nyurala tjakultjunktuku anangu mulamularingkupai kutjupa tjuṭa? Wiya wanti, panya tjuṭa mulapa ngaranyi wangkara wiyantjaku wiya, panya Kitiyannga, Parakanya, Samsonnga, Tjaipatjanya, Davidanya, Samuelnga munu wangkatjara kutjupa tjuṭa kulukulu panya winki mulapa.

³³ Wati nyanga paluru tjana Godaku mulamularingkula ngura walytjangku anga-kanyiningi warmalangu pitjala tjulyantjaku-tawara ngura kutjupitja tjutangku. Munuya ngura tjananku tjukarurungku kanyiningi anangu tjuṭa pukulpa palya nyinanytjaku. Munuya nyangangi Godalu panya kalkuntjitja tjuṭa utiringkunyangka.

Panya kutjupa tjutangku Godaku mulamularingkula lion tjuṭa tjaa patiningi patjantjaku-tawara.

³⁴ Kaya tjara kutjupa Godaku mulamularingkula waru pulkangka wankaru ngarangi kampanytja wiya. Kaya kutjupa tjuṭa Godaku mulamularingkula wankaringangi tjananya tjuṭangka wakara iluntankunytjikitjangku arunnyangka. Kaya kutjupa tjuṭa upa ngarala Godaku mulamularingkula kunpuringangi. Kaya tjaultji tjuṭa Godaku mulamularingkula witulya pulkatjararingkula warmala ngura kutjupitja tjuṭa pika pitjanyangka pungkula wiyaningi.

³⁵ Kaya minyama tjuṭangku purkutjararingkula Godaku mulamularingkula nyangu Godalu tjanampa tjitji malakungku wankannyangka.

Kaya tjara kutjupa Godaku mulamularingkula ilungi, panya mirpantju tjuṭangkuya tjananya nguluningi wangkara, "Nyura Godanya wantinyangkala nyuranya walatjungkuku iluntankunytja wiyangu." Kaya kuliningi, "Wiya, nganaṅa Godanya wantinytja wiya. Palyantilanyaya nganaṅanya pungkula iluntanama panya Godalu nganaṅanya wankalku palula tjungu wanka mulapa titutjara nyinanytjaku." Alatjiya kuliningi, kaya mirpantju tjuṭangku tjananya puṭu ngulutjingara pungkula iluntanangi.

³⁶ Munuya mirpantju tjuṭangku Godaku walytja kutjupa tjuṭa ananangi, munuya wiipangka alkanangi, munuya kutjupa tjuṭa tjinangka karpira tjailangka tjarpatjura kanyiningi.

³⁷⁻³⁸ Munuya kutjupa tjuṭa pulangka atura iluntanangi, munu kutjupa tjuṭa wanka winki kultu karilpa kaṭara kutjaranangi, munuya kutjupa tjuṭa wakara iluntanangi tjula pulkangka.

Kaya tjara kutjupangu tjiipiku nanikutaku miringuru ulytja palyara tjarpangi munuya ngaltutjara tjuṭa purunypa para-ngarangi mani wiya mai wiya paltjatjiratja alatjitu. Kaya anangu tjuṭangku tjananya nyakula analpai munu kurara pungkupai. Panya tjanaya mantatjaku mukuringkula puṭu ngurkantanangi palya mulapa nyinanyangka. Kaya tjana ilytjingka waara para-ngarangi pilangka puli katu kulukulu. Munuya kulpingka pitingka kulu nyarkara nyinangi.

³⁹⁻⁴⁰ Ka Godanya pulkara pukularingi anangu nyanga palumpa tjanampa, panya tjanaya palumpa pulkara mulamularingangi. Palu panya Godalu kalkuntja tjana nyakunytja wiyatu munuya nganmanypatu ilungi palumpa mulamularingkula kutju. Panya Godalu nganmanytju nganampa palyara wantingu wiru mulapa. Panya paluru mukuringangi nganaṅanya tjanala tjungura wirura palyarungura kanyintjikitja palumpa mulamularingkupai uwankara.

12

Godanya Nganampa Mama Nyinanyi munu Nganaṅanya Tjukarurulpai

¹⁻² Ka tjana kuwari nganaṅanya ngarala nyanganyi winkingku Godaku mulamularingkupai miri tjuṭangku. Kala nganaṅa kulu

uti Jesunya tungun-tunguntu wananma. Panya watingku paluru-warara wirtjapakara wirkankunytjikitjangu mantara arara tjunkupai tarpipungkula punkatjingantjaku-tawara. Palu purunypala uti kura kutjupa kutjupa uwankara wantira Jesunya wananma pakuringkunytja wiyanguk tūtutarangu ilunytjakutu-wangkara. Panya Jesulu iwara alana nganana kulu Godala wirkankunytjaku munulanya alpamilani pakuwiyanguk palunya wanantjaku munu panya paluru patani ngura nyara palula nganana ngapartji ma-wirkankunytjaku.

Ka panya kutjupa kutjupa tjutangu mantatjangku nganannya angatjunkunyangkala uti wantima munula tūtutaranguk Jesunya wananma. Panya paluru pakuringkunytja wiyanguk palumpa Mamaku palyaningi munu punu katakutjarangka ilunytjikitja nguluringkunytja wiya. Ka panya anangu tjutanguk palunya ananangi wati kura-palku kulira.* Palu paluru rapa alatjitu ilungu panya paluru waintara kulinigi palumpa Mamanguk palunya pukulpa pulka mulapa ungunytjaku. Munu alatji palyantjatjanu paluru kuwari Godala itingkalta nyinanyi mayatja pulka mulapa.

³ Ka nyura uti palunya kulira raparingama, panya Jesunya mantangka nyinanyangkaya anangu kura tjutanguk palunya pulkara kuraningi munu ananangi, ka paluru tungun-tunguntu alatjitu ngarala palyaningi palumpa mamanguk wituntjitja pakuringkunytja wiyanguk. Ka nyuranya palu purunypatu kurannyangka Jesunya kulinma, munuya palu purunypatu tungun-tungunpa ngarama tjituru-tjitururira wantinytja wiya.

⁴ Uwa, anangu kura tjutanguk nyuranya arkara kurani Godanya wantinytjaku, ka panya nyura tungun-tunguntu tjananya kulira wantinyi. Palu tjana nyuranya Jesunya purunypa pungkula iluntankunytja wiya palunya wanannyangka. Tjinguruya nyuranya ngula pungkula iluntankuku rawanguk wanannyangka.

⁵ Palu tjinguru nyura watarkuringu nyiringka panya iriti walkatjunkunytjitjaku. Panya tjukurpa paluru ngaranya nganana kulira raparingkunytjaku, panya Godalu katja tjuta paintja nyanga alatji ngaranya,

“Kulila! Mayatja Godalu nyuntunya tjitji purunypa tjukarurulpai palulawanu nyinanytjaku,
kan uti palula wanganarangku kulinma panya paluru nyuntunya ngunti palyannyangka pallpai.

Uti nyuntu kuranguru painnyangka kulira tjituru-tjitururinytja wiyanguk wantima.

⁶ Panya paluru pulkara mukuringanyi palumpa katja untalpa tjutaku, munu pala palulanguru tjananya tjukarurulpai,
munu kuraringkunyangka tjananya pungkupai tjana tjukaruru nyinanytja-tjiratjangku.” *

⁷ Kulini nyura? Nyurampa kutjupa kutjupa wituwitu ngaranyangkaya mirpanariwiyanguk Godanya kulinma panya paluru nyuranya Mama wirungku tjukaruruni. Panya wati mamanguk palumpa katja tjukarurulpai, palu purunypatu Godalu tjukarurulpai palumpa tjitji tjuta.

* 12:1-2 Ngura nyara palula anangu tjutanguk kulilpai wati kura tjuta kutjuya iluntankupai punu katakutjarangka. * 12:6 Proverbs 3:11-12

⁸ Palu tjinguru ngayunya Godalu wantima tjukaruruntja wiyangku, kana palulanguru kulilku, "Munta, tjinguruna ngayulu palumpa tjitji wiya, mungutja, mamatjara wiya." Panya Godalu palumpa tjitji uwankara tjukarurulpai kutjupa tjuta wantinytja wiyangku.

⁹⁻¹⁰ Panya nganana tjukutjuku nyinanyangka nganampa mama tjutangu nganannya tjukaruruningi tjana wiru kulintjatjanungku mama panya mantatja tjutangu. Kala tjana wangkanyangka nganana wanganarangku kulinigi. Palulangurula uti Mama ilkaritjangka ngapartji pulkaratu kulinma mulamulangku palula tjungu pukulpa nyinanytjikitjangku. Panya paluru nganannya alpamilantjikitjangku tjukaruruni nganana kulira palunya purunypa tjukaruru mulapa nyinanytjaku.

¹¹ Ka panya Godalu nganannya tjukarurunnyangka nganana pukularinytja wiya kulira tjituru-tjitururipai. Palu utila kulinma panya Godalu nganannya tjukaruruni palya mulapa nyinanytjaku, kala palulanguru nganana nintiringkula pukulpa nyinapai tjukarururingkula.

¹² Uwa, kulinmaya nyangatja munuya kunpungku tungun-tunguntu Jesunya wananma. Tjinguru nyura mara walpa-walparingkula muti tjititingkula pakuringanyi, palu paku nyanga palunya kulintja wiyangku wantira Jesunya rawangku tungun-tunguntu wananma.

¹³ Munuya tjukaruru titutjara nyinama kurunpa uparingkula punkantjaku-tawara, panya nyura tjukaruru nyinara kunpuringkula witulya ngaraku.

Godanya Kulira Wantinytjaku-tawara

¹⁴ Rawangkuya kulinma mirpantju wiya kalypa nyinanytjikitjangku munuyanku pulkara arkanma Godalawanu wirura tjukaruru nyinanytjikitjangku. Panya nyura tjukaruru wiya nyinarampa Mayatjanya putu nyakuku.

¹⁵ Godanya panya ngaltunytju mukulya pulka, ka nyuranku uti pulkara atunymanama Godalanguru paturingkula punkantjaku-tawara. Munuyanku ngulu nyangama anangu kutju nyuralanguru kuraringkunyitjaku-tawara, panya paluru tjinguru alatjirira nyuranya uwankara kuralku.*

¹⁶ Munuyanku atunymanama kuri walytjatjarangka ngarinytjaku-tawara panya alatji wiru wiya. Munuyanku anga-nyangamatu wati panya litjunya purunyarinytjaku-tawara panya paluru Godaku watarkuringu palumpa mamangku Isaacalu palumpa kalkura pukulmankunytjaku ngaranyangka, munu panya paluru tjintu kutjupa paltjatjaratjarira ngatjinu palumpa malanyangka Jacobala alatji wangkara, "Maini uwa, kanta nyuntunya Mamalu kalkura pukulmankuku ngayunya wiyangku." Paluru kalkuntja panya wantingu maikitjangku, ka Isaacalu Jacobanya kalkura pukulmanu litjuku arangka.*

* **12:15** Panya ukiri palya pakalpai, ka tjinguru ukiri kutjupa kutjupa tjuta unngu-unngu pakani munu panya paluru tjana pakara ukiri palya tjuta tjulkura iluntananyi, ka wiyaringanyi alatjitu. Kalanku nganana uti nyanga palu purunyarinytjaku-tawara ngulu nyangama. * **12:16** Uti litjulu kalkuntja panya palunya kulinma Godalu ungkuntja. Palu paluru Godaku watarkuringu munu wantira palurunku walytjangku kutju kulinigi maingka paltjarangkunytjikitjangku. Tjukurpa nyangatja nyawa Genesis 27-ta.

17 Ka nganana ninti panya paluru ngulalta malaku mukuringu kalkuntja panya palumpa munu palula puṭu ulara pulkara ngatjiningi mamangka, piruku palunya kalkuntjaku. Palu mamangu wantingu. Ka nyuranku wanyu anga-nyangama litjunya purunyarira Godaku ara wantinytjaku-tawara.

18 Panya nyura kuwari ara kutjupangka nyinanyi arkayitjangka, ara panya irititjangka wiya. Panya iritiya Israelkunu tjuṭa puli panya ini Tjaniyala wirkara nyinangi, munu panyaya nyangu puli panya palula waru pulka pinpanyangka, munu mungawaluru pulkangu tjutura ngaranyangka ngangkali maru pulkangu.

19-20 Munuya kulinigi turampata pulkara wangkatjinganyangka. Munuya Godaku wangka kulu kulinigi, panya paluru tjananya pulkara wangkangu alatji, "Puli nyangatjaya pampulwiyangu wantima. Munu kutjupangu pampunnyangka nyakulampaya palunya atura iluntanama, munu tjinguru kukangu pampunnyangka nyakulaya palunya kulu atura iluntanama." Kaya anangu tjuṭangu kulira pulkara nguluringkula wangkangu, "Wiya, nyangatja wituwitu pulka mulapa. Wanyu piruku nganana ala wangkanytja wiyangu wantima."

21 Ka Moselu kulu nyanganpa uwankara nyakula wangkangu, "Tjititinganyina pulkara nguluringkula."

22 Uwa, puli panya palulakutu nyura kuwari ankunytja wiyatu, palu nyura wirkanu puli kutjupangka puli ini Tjayanta, panya God wankaku ngurangka, ini kutjupa Jerusalemala ngura panya ilkaritjangka. Ka ngura nyara palula panya angelpa winki mulapa pukulpa alatjitu nyinara waninyi utulu kutju.

23 Uwa, ngura pala palula nyura wirkanu Godaku walytja kutjupa tjuṭangka tjungurangkunytjikitja. Panya nyara palunya tjananya Godalu ngurkantara ini tjuṭa walkatjunu ngura panya ilkaritjangka titutjara nyinanytjaku. Uwa, nyura pitjangu God Ngurkantanku-pailakutu panya paluru anangu uwankara tjukarurungku ngurkantara tjaralku. Ka ngura nyara palula miri tjuṭa kurunpa nyinanyi panya tjana mantangka Godalawanu tjukaruru nyinangi munuya ilungu, ka Godalu tjananya wiru mulapa palyanu.

24 Uwa, nyura pitjangu Jesulakutu panya paluru nganampa ngalkilarira ara kuwaritja palyanu paluru milkali tjutira. Panya paluru nganananya palumpa milkalangka paltjinu Godanya nganampa kalyparingkunytjaku. Uwa, Jesuku milkalangu wiru mulapa palyanu, Abelku milkalangu purunytju wiya.*

25 Ka palulanguru nyura uti tungunpungkuwiyangu kulinma Godalu wangkanyangka. Panya iriti paluru mantangka Israelkunu tjuṭangka wangkangi, kaya tungunpungkula palunya kulira wantingi, ka nyanga palunya tjananya Godalu pikantanangi, kaya puṭu kumpiningi wankakitja. Ka panya Godalu nganana ilkaringuru wangkanyangka uti nganana wanganarangku kulinma. Panya ilkaringuru wangkanyangka nganana kulira wantirampa, ka paluru mulapa nganananya pulkara pikantankuku, kala puṭu alatjitu kumpilku palulanguru.

* 12:24 Panya Kaintu Abelnga iluntankunyangka palumpa milkalangu mantangka tjutira mirara wangkangi ngapartji iluntankunytjaku. Palu Jesuku milkalangu tjutira wangkangi Godanya nganampa kalyparingkunytjaku.

²⁶ Panya iriti puli nyara Tjaniyala Godalu manta uritjinganu wangkangu wangkara. Palu kuwari nyanga paluru kalkunu alatji wangkara, “Ngayuluna kutju-aralta piruku manta ilkari kulu uritjingalku.”

²⁷ Kala nyanga palulangurulta kulini, “Mulapa Godalu kutjupa kutjupa uwankara paluru paluntja uritjingara wiyalku. Ka panya putu uritjingalpai tjuta titutjara ngaraku wiyaringkuntja wiya panya paluru kalkuntja munu palumpa ngura kulu ngaraku titutjara.”

²⁸⁻²⁹ Ka kutjupangu Godanya putu uritjingara wiyalku munu palumpa walytja tjuta kulu putu wiyalku. Panya Godalu ngura nganmanytju palyara wantingu nganampa palula titutjara nyinanytjaku. Palulanguru nganana uti Godaku pulkara pukularima, munula palunya tjukarurungku walkura pulkanmanama palumpa nguluringkula, panya paluru pulka mulapa munu waru pulka purunytju kura uwankara kampara wiyalpai.

13

Nyanga Alatjiya Nyinama Godanya Pukularinytjaku

¹ Uti nyura Jesuku walytja nyinarampa nyuranku rawa pulkara mukuringama watarkurinytja wiya.

² Munu nyura uti anangu ngura kutjupitja pitjanyangka nyakula papulankuntja wiyangu mantjira nyurampa ngurangka pukultu kanyinma. Panya iriti anangu kutjupangu anangu-palku angelpa mantjira kanyiningi palumpa ngurangka.* Ka nyura uti palu purunytju malikitja mantjira pukultu kanyinma nyurampa ngurangka.

³ Munu nyura uti tjailangka nyinapai tjuta kulu watarkuriwiyangu kulinma munu tjanampa ngalturingkula tjarpara tjananya alpamilanma.* Munuya Jesuku walytja kutjupa tjuta kulu kulinma panya anangu mirpantju tjutangu tjananya kurani. Pulkaraya tjanampa ngalturingama munuya tjananya alpamilanma.

⁴ Munu nyura uti kuritjarangu tjukarurungku kulinma munu palyanyku nyinama, munuya kuri altira wirura kanyinma. Uti nyura kuri walytjanga kutju ngarima walytjarangka ngarinytja wiya. Panya Godalu kura nyanga palu purunypa palyannyangka nyakula ngurkantara wiyalku. Panya paluru anangu kampangka ngaripai uwankarara pukularipai wiya munu tjananya ngurkantara wiyalku.

⁵ Munuya maniku pulkara mukuringkuwiyangu wantima. Palu panya nyura kanyintjikitjakuya pukularima, munuya piruku waintara mantjintjikitjangku kulintja wiyangu wantima. Panya Godalu wangkangu alatji,

“Ngayuluna nyuranya wantikatinytja wiya nyurala tjungu titutjara nyinaku.

Mununa nyuranya watarkurinytja wiyangu titutjarangu kanyilku.” *

* **13:2** Nyawa Genesis chapter 18-ta, panya Aipuramalu anangu-palku angelpa mankurpa pukultu mantjira tjunangi palumpa ngurangka. * **13:3** Panya iritiya tjailangka nyinangi mai wiya, kutjupa kutjupa wiya, tjituru-tjituru pulka, pikatjara pungkuntja pungkuntja. Kaya walytja tjutangu kutju mukuringkula tjarpara alpamilanangi. * **13:5** Deuteronomy 31:6

Nyara palulanguru Godalu nyuranya rawangku kanyinnyangkaya maniku pulkara mukuringkunyitja wiyangku wantima.

⁶ Munu alatji wangkama kurunpa raparingkula,
 “Mayatjala ngayunya atunymara kanyilpai
 kana ngulu wiya nyinanyi,

Kani ngayunya anangungku putu kurani.” *

⁷ Kaya kulinma wanyu tjana panya nyuranya atunymara kanyilpai tjuta, panya tjanaya nyurala tjakultjunu Godaku tjukurpa. Uwa, ara tjanampa kulinma panya tjana mantangka nyinaralpi Jesunya tunguntunguntu wananingi munu panyaya rapa alatjitu ilungu. Ka nyura nyangatja kulira uti tjananya arkanma munuya Jesunya titutjarangku wanama tjana purunytju.

⁸ Panya Jesunya Christanya kutjupariwiya kuwari paluru alatjitu nyinanyi. Panya paluru iriti mulapa nyinangi, munu kuwari paluru nyinanyi, munu paluru titutjara nyinaku wiyaringkunyitja wiya alatjitu.

⁹ Palu kutjupa tjutangku nyurala tjukurpa kutjupa kutjupa tjuta ngunti wangkara nintinnyangkaya kulira wantima ngunti iwara kutjupangka katinytjaku-tawara. Panya nganana kurunpa kunpuringkupai Godalu nganananya ngaltunytjungku rapannyangka kutju. Palu nganana kuka mai kutjupatjara ngalkula kutjupatjara wantira putu kurunpa raparingkupai. Panya kutjupa tjutangkuya ara nyanga palunya tjananya wananingi munuya kurunpa kunpuringkunyitja wiya alatjitu.

¹⁰ Kaya tiinta milmilta warkaripai tjuta putu nganana tjunguringkupai Godanya walkuntjikitja. Panya nganana Jesuku mulamularingkula kutju Godanya rapangku walkulpai, panya Jesunya nganampa ilura milkali tjutingu. Kala palulanguru kuka katira ungunytja wiyangku palumpa mulamularingkula palunya walkulpai.

¹¹ Panya kuli kutjupa kuli kutjupa wati tjukurtjara pulkangku kukaku milkalingka para-kurpilpai ngura milmilpa mulapa panya tiinta unngutja Godalu nyakula anangu uwankara kura tjuta palyantjijanguru kalypangku pungkuwiyangku wantinytjaku. Palu iltjanpaya urilta katira ngurangka patu nguwanpa kutjalpai kampara mulururira tunparingkunyitjaku.

¹² Ka panyaya palu purunypa Jesunya urilta katira ngurangka patu nguwanpa iluntanu. Palu paluru nganampa anga-ilungu nganananya palumpa milkalingka paltjintjikitja nganana Godala mirangka palya mulapa nyinanytjaku.

¹³ Uwa, Jesunya nganampa pikatjararingu ngurangka urilta patu, kala uti palu purunypa ara nganmanyitja tjuta wantikatira Jesula tjunguringkula nyinama, kalanya tjana palyalta palunya nganananya ananma.

¹⁴ Panya mantangka ngura wiru ngaranytja wiya nganana palula tjungu wanka titutjara nyinanytjaku. Palu nganana panya ngura kutjupaku patara ala-ala nyinanyi, munula ngura nyara palula Godala tjungu titutjara nyinaku.

¹⁵⁻¹⁶ Palulangurula uti Jesulawanungku Godanya rawangku walkunma puntu winkingku, panya Jesunya alatjitu nganampa

* 13:6 Psalm 118:6

ilungu. Ka nyura uti watarkurinytja wiyangku palyanyku nyinara anangu kutjupa tjuṭa kulū alpamilanma intjanungku ungkula. Panya alatjingannyangka Godanya pulkara pukularipai.

¹⁷ Ka nyura uti wanganarangku kulinma anangu panya nyuranya atunymara kanyilpai tjuṭangka. Panya paluru tjana nyuranya rawangku atunymananyi nyura Jesunya tjukarurungku wanantjaku. Panya Godalu tjananya ungu waraka nyanga palunya, munu tjananya nyanganyi nyuranya wirura kanyintjaku. Ka nyura tjanala wanganarangku kulinma tungunpungkuwiyangku, ka tjana nyuranya pukuṭtu wirura kanyilku. Palu tjinguru nyura tungunpungkuwanyangka tjana tjituru-tjitururira nyuranya puṭu wirura kanyilku.

¹⁸ Palu wanyuya rawangku nganampa Godala tjapinma. Panya nganana palumpa waraka tjukarurungku palyani kunṭa wiyangku, munula nganana titutjara mukuringanyi tjukaruru palyanyku nyinanytjikitja.

¹⁹ Ka ngayulu nyuranya pulkara ngatjini nyura ngayuku Godala tjapintjaku paluru ngayunya nyuralakutu kuwari nguwanpa malakungku iyantjaku.

Tjanampa Godala Tjapintja

²⁰⁻²¹ Uwa, Mama Godalu anangu tjuṭa palumpa kalypa nyinanytjaku palyalpai. Munu paluru Mayatja Jesunya pakaltjinganu ilunytjitjangu. Panya paluru tjapata pulkangku nganananya tjiipi purunypa atunymara kanyilpai. Munu paluru alatjitu walytja puntu winki intjanuringu munu ilura milkali tjutingu nganampa uwankaraku. Ka nyara palulanguru Godalu Jesunya pakaltjinganu milkali tjutinytjitjangu, ka ara panya Godalu nganmanytju kalkuntjitjalta utiringu, munu titutjara ngaraku wiyaringkunyitja wiya. Kana nyurampa tjapini nyanga alatji,

“Mama God, nyanga tjananya nintinma wiru tjuṭa palyantjaku, panya nyuntu mukuringkunyitja uwankara wanganarangku kulira palyantjaku. Ka Mayatja Jesu, nyuntu tjananya kunpunma tjukaruru nyinara Godanya kutju pukulmankunyitjaku.”

Alatjina nyurampa tjapilpai. Kala wanyu uwankarangku Jesunya Christanya titutjarangku mirawanima! Uwa, mulapa.

Tjukurpa Malatja

²² Walytja tjuṭa, tjukurpa nyanga ngayulu nyurampa walkatjunktjytja purkarangku palyanyku kulinma. Panya ngayulu alatji walkatjunu nyuranya rapantjikitjangku tjukurpa mutumuṭu.

²³ Ka nganampa panya malpa Timitjinya tjailanguru pakanu, ka nyura kulinu? Ka tjinguru paluru ngayula nyangangka warpungkula wirkara tjunguringkunyangka ngali kutjaratu ma-pitjaku nyuranya nyakunyitjikitja.

²⁴ Palu nyura tjakultjura anangu panya nyuranya atunymara kanyilpai tjuṭangka munu Godaku walytja kutjupa uwankarangka kulū, panya nganana tjananya kulini tjanampa pukularira. Ka panya Italinya ngurara tjuṭangu kulū palu purunypatu nyuranya kulini.

²⁵ Uwa, alatjituna wangkanyi. Ka Godalu nyuranya pukuṭjungku wirura kanyinma.

Lita Jamesalu Walkatjunkunytja James Nyangatja Nganmanytju Nyakula Wangkanytjaku

Nyangatja Godaku tjukurpa wati ini Jamesalu walkatjunkunytja Jesuku panya malanytju. Panya paluru ngula kutju Jesuku mulamularingu paluru ilunytjatjanu pakannyangka malangka munu nyara palulanguru kutju mulapa kulinu Jesunya Godaku katja nyinanytja. Ka ngula paluru ingkata pulka nyinangi munu Jesuku walytja tjuṭa atunymanangi Jerusalemala nyinanytja tjuṭa. Ka wati panya Paululu palunya ngurkantanu tjukurtjara Jesulu panya iyantjanya.

Ka Jamesalu lita nyanga palunya walkatjura iyanu ngura parari nyinanytja tjuṭakutu anangu Jew Jesuku walytja kutjupa tjuṭakutu. Munu paluru alatji wangkangu palula tjanala, "Palya nyura Jesuku mulamularinganyi, palu uti nyura mulamularingkunytjatjanungku palula wanganarangku kulira palyanma paluru wangkanytjitja uwankara." Alatji Jamesalu Jesunya wanapai tjuṭangka wangkangi munu paluru tjanala tjukurpa tjuṭa tjakultjunangi tjana kulira tjukurpa Jesunyatjara tjukururungku kulintjaku munu palunya mulamulangku wanantjaku.

Tjukurpa nyanganpa ngarinyi:

- 1:1-18 Godanya pakuringkuwiyangu wanantjaku
- 1:19-27 Godaku tjukurpa wanganarangku kulira palyantjaku
- 2:1-13 Anangu uwankaraku tjungu mukuringkunytjaku
- 2:14-26 Mulamularingkupai tjuṭangu wiru tjuṭa kutju palyantjaku
- 3:1-18 Tjukurpa wiru tjuṭa kutju wangkanytjaku tjaa kura nyinawiyangu
- 4:1—5:6 Godala wanganarangku kulintjaku tjukurpa mantatja tjuṭa wantira
- 5:7-12 Kurara pungknyangka pukulpa nyinanytjaku
- 5:13-20 Godala tjukururungku tjapintjaku

Jamesalu Nganmanytju Wangkanytja

¹ Ngayuluna Jamesanya panya Mama Godaku Mayatja Jesuku Christaku warkaripai nyinanyi. Mununa lita nyangatja nyurampa walkatjunanyi Godaku walytja tjuṭaku, panya nyura ngura kutjupa kutjupa tjuṭangka parari nyinanyi.

Godanya Pakuringkuwiyangu Wanantjaku

²⁻³ Walytja tjuṭa, kura kutjupa kutjupa tjuṭa nyurala wirkankunyangkampa nyura uti pukularima. Munu kutjupa tjuṭangu nyuranya kurantjikitja ngunti wituwitunyangkampa nyura uti tjananya kulira wantima, munuya tjituru-tjitururinytja wiya pukulpa nyinama. Panya nyuranya kurannyangka nyura nintiringkuku Jesunya kutju tunguntunguntu wanantjikitja.

⁴ Munu nyura uti pakuringkunytja wiyangu titutjarangu wanama munu nyara palulanguru nyura paluru mukuringkunytja uwankara rawangu palyara ma-kunpuringkula witu ngaraku.

5 Tjinguru kutjupa-ara nyurala alatjirinyangka nyura putu kulilku alatji, "Nyaalkuna? Yaaltjingarana palyalku?" Palu utin putu kulintja wiyangku Godala tjapinma panya paluru tjapinnyangka wantinytja wiyangku wangarangka kulilpai munu alpamilalpai.

6-8 Ka nyura Mama Godala tjapirampa uti palumpa mulamularingama alatjitu kampa kutjara kulintja wiya munu kulinma alatji, "Godaluni mulapa alpamilalku." Panya kampa kutjara kulilpai tjuṭa uru purunypa, panya walpangku untunnyangka para-uripai titutjara, nyara palu purunypa kampa kutjara kulilpai tjuṭa nyinanyi, tjukaruru wiya, kalikali. Munu tjinguru tjana kulilpai alatji, "Ngayulu Godala tjapinnyangka mulapa paluru ngayunya alpamilalku." Palu wiya, kampa kutjara kulinnyangka Godalu putu alpamilalpai.

9 Tjinguru Jesuku walytja kutjupa titutjara mani wiya nyinanyi, munu uti paluru pukularima tjituru-tjitururinytja wiya, panya Godalu palunya Christala tjungura walytjanmanu.

10 Ka palu purunypa Jesuku walytja kutjupa tjinguru mani pulkatjara nyinanyi munu uti paluru pukularima Godalu palunya Christala tjungura walytjanmankunyangka kutju maninguru wiya. Tjinguru Godalu palumpa mani winki wiyalku, ka paluru ngaltutjara nyinaku mani tjukutjukutjara. Palu uti paluru mani wiya pukulpaṭu nyinama, panya paluru mani pulkatjara pukulpa nyinangi, palu purunypaṭu uti paluru pukulpa nyinama. Panya mani pulkangku putu Godaku walytjaringkunyjtaku palyani. Palu panya anangu mani pulkatjara nyinanytjatjanu inuntji purunypa ilura wiyaringkupai.

11 Panya tjintungku pakara katuringkula uwankara kampapai. Ka palulanguru inuntji panya wiru tjuṭa piltiringkula punkalpai kampanyangka. Nyara palu purunypa anangu mani pulkatjara wiyaringkuku watarku warkarinytjatjanu.

12 Uwa, kutjupa tjuṭangku nyuranya kurara pungkunyangka nyura uti kulira wantima munu tungun-tunguntu Godanya wananna. Ka Godanya nyakula nyurampa pulkara pukulariku, munu nyuranya wanka titutjara nyinanytjaku wangkaku, panya alatji paluru kalkunu palumpa mukuringkupai tjuṭangka.

13 Ka tjinguru kutjupa tjuṭangku nyuranya kura palyantjaku wituwitunnyangka nyura uti ngunti wangkawiyangku wantima alatji, "Godaluni untuni kura palyantjaku." Panya Godalu kura palyantjaku untulpai wiya, panya kutjupangku putu Godanya arkani kura palyantjaku.

14 Panya anangu nyara paluru alatjitu kura palyantjikitja mukuringkupai, paluru kutju, munu paluru unngu kulira mukuringkula palyalpai alatjitu.

15 Uwa, paluru alatjitu mukuringkula kura palyalpai, munu palulanguru kura titutjarangku palyalkatinyi wantinytja wiyangku munu kurangka kutju tjakaringanyi. Ka Godalu palunya ngula paira iyalku palula tjungu nyinanytja wiya, ngura kurangka nyinanytjaku.

16 Ngayuku walytja tjuṭa, anangu kutjupa tjuṭangku ngunti kurannyangka nyura uti kulilwiyangku wantima, munu ngayulu panya wangkanytja kutju tjukarurungku kulinma.

17 Uwankara panya Godalu nganampa palyantja palya alatjitu ngaranyi, kura wiya. Godalu panya tjintu, pira, kililpi palulpaingku

wiru tjuṭa nganampa palyalpai. Munu paluru kutjuparinytja wiya paluruṭu alatjitu nyinanyi, munulanya titutjarangku wirura kanyilpai wantinytja wiyangku.

¹⁸ Panya paluru nganampa pulkara mukuringangi nganaṇa palumpa walytja mulapa nyinanytjaku. Munu panya palulanguru tjukurpa tjukaruru Christanyatjara nganaṇala utinu nganaṇa mula-mularingkula palumpa walytja mulapa nyinanytjaku.

Godaku Tjukurpa Wanganarangku Kulira Palyantjaku

¹⁹ Walytja tjuṭa, wanyuya kulinma. Anangu kutjupangku wangkanyangkaya mapalku waruringkula mirpanarinytja wiyangku wantima. Palu purkarangkuya kulinma munu mapalku wangkanytjik-itjangku kulintja wiyangku wantima.

²⁰ Tjinguru nyura mirpanarirampa Godaku tjukurpa puṭu tjukarurungku palyalku.

²¹ Nyura uti kura kutjupa kutjupa uwankara wantima nyura unngu kulintja uwankara. Panya Godalu nyurala unngu tjunu palumpa tjukurpa kutju nyura tjukarurungku kulintjaku, panya watingku uninypa tjunkupai mantangka pakantjaku, palu purunypa Godalu tjukurpa nyurala unngu tjunu. Ka nyura palula kutjunga wanganarangku kulinyangkampa paluru nyuranya wankarunkuku palula tjungu titutjara nyinanytjaku. Palulanguruya kura kutjupa kutjupa uwankara nyura unngu kulintja wantima alatjitu.

²² Nyura uti Godaku tjukurpa wanganarangku kulira palyanma, pinangku kutju kulintja wiyangku. Panya nyura pinangku kutju kulira nyuranku Godaku walytjanmankupai, palu wiya, nyura alatji ngunti wangkapai.

²³⁻²⁴ Tjinguru anangungku palurunku yunpa walytjangku kalawatjanga purkarangku nyakupai. Munu palulanguru paluru ankula mapalku watarukupai palumpa yunpaku. Ka nyara palu purunypa anangu kutjupa tjuṭangku Godaku tjukurpa nyakula wangkara purkarangku kulilpai munuya palulanguru ankula mapalku watarukurira palyantja wiyangku wantipai. Nyanga alatji tjana pinangku kutju kulini wanganarangku kulira palyantja wiyangku.

²⁵ Panya Godaku tjukurpa kalawatja purunypa, munu nganaṇanya nintilpai yaaltjingara Godalu nganaṇanya kuranguru wankarunu nganaṇa palula wanganarangku kulintjaku. Ka anangungku palumpa tjukurpa rawangku nyakula wangkara purkarangku kulinyangka munu wanganarangku kulira palyannyangka kulu Godalu palunya pulkara pukulmankuku.

²⁶ Tjinguru anangungku kulilpai alatji, "Ngayulu Jesuku walytja mulapa tjana purunypa wiya, tjukarurungku palyalpai." Palu tjinguru tjalinypa kurangku wangkara palurunku ngunti rawangku mirawanipai tjukarurungku-palku.

²⁷ Palu nyanga alatji Jesuku walytja mulatu palyalpai panya tjitji tjitula, minyama wanakala tjuṭa munu ngaltutjara tjuṭa kulu mukulyangku alpamilara atunymankupai, munu kura tjuṭangka tjunguringkupai wiya mauntalpa nyinapai. Nyara palu purunyku Godanya nyakula pukularipai.

2

Anangu Uwankaraku Mukulya Nyinanytjaku

¹ Walytja tjuṭa, nyura uti anangu uwankaraku mukulya nyinama tjara wantinytja wiya, panya nganana uwankara Jesuku walytjapiti, ka paluru nganampa Mayatja witulya pulka mulapa. Wanyuya kulila, kana ara nyangatja nyurala wangka nyura kulintjaku.

² Nyura tjinguru tjunguringkula nyinaku Godanya walkuntjikitja, ka wati kutjara pitjaku nyuralakutu nyurala tjunguringkula walkuntjikitja. Kutju mantara wiru mulartjara munu manyirkitja wirutjara panya gold-nguru palyantjitja. Palu panya wati kutjupa ngaltutjara mulapa, mantara kurakuratjara.

³ Ka tjinguru anangu kutjungku nyuralanguru pukularira wangkaku wati panya mantara wirutjarangka, "Pitjala nyangangka nyinakati wirungka nyanga." Munu wati panya ngaltutjarangka kurara wangkaku, "Nyuntu nyarangka wati-pitjala ngarama nyara paṭu." Ka alatji palya wiya.

⁴ Panya paluru wirutjaraku kutju ngurkantara pukularinyi munu wati ngaltutjara papulara paini. Ka nyura nyanga alatji palyara puṭu tjukarurungku ngurkantananya, palu nyura uti pulampaṭu pulkara mukuringama kutju kurantja wiya.

⁵⁻⁷ Uwa, walytja tjuṭa, kulilaya. Nyaaku nyura Jesuku walytja tjuṭangu ngaltutjara tjuṭa ngunti mirpaṅtu kurani? Panya nyura mani pulkatjara tjuṭa pitjanyangka nyakula pukularira altira kuranyu nyinatjunkupai wirungka. Palu anangu nyara paluru tjana nyuranya pauntjingara wangkapai, munuya nyuranya ngalturingkuwiyangu witira kuutpakutu katipai munu wati ngurkantankupaiangka kuranyu ngaratjunkula nyuranya kuranmankupai. Wiya, anangu nyara paluru tjana panya nyurampa mayatja analpai, Jesunya panya. Palu panya Godalu anangu ngaltutjara tjuṭa ngurkantanu paluru tjana palumpa pulkara mulamularingkunyitjaku. Munu paluru tjananya walytjanmara wirura atunymara kanyini palula tjungu, panya paluru alatji kalkunu palumpa mukuringkupai tjuṭa wirura kanyintjikitjangku. Ka nyura palu purunypaṭu ngaltutjara tjuṭa kurantja wiyangu wirura kanyinma.

⁸ Panya Godalu tjukurpa pulka tjuṭa iriti walkatjunkunyitja ngarinyi nyiringka, palu tjukurpa kutju pulka mulapa uwankarangka waintarinytja nyanga alatji,

"Anangu kutjupa uwankaraku pulkara mukuringama, panya nyuntunkun walytja mukuringkupai, palu purunypa." *

Ka tjukurpa nyanga palunya wanganarangku kulira palyarampa nyura tjukaruru palyanyku nyinaku.

⁹ Tjinguru nyura anangu kutjupa tjaraku kutju nyakula pukularinyi munu tjara kutjupa nyakula wantinyi, ka alatji palya wiya. Panya nyura tjukurpa nyara palunya kulintja wiyangu wantira kurani.

¹⁰ Uwa, Godalu tjukurpa paintjitja tjuṭa nganampa wangkara tjunu. Ka tjinguru anangu kutjupangu tjukurpa kutju kulilwiyangu wantinyi, ka anangu kutjupangu tjukurpa uwankara kulilwiyangu wantinyi. Palu Godalu palunya pulanyaṭu tjungu kura ngurkantananya munu paini.

* 2:8 Leviticus 19:18

11 Panya Godalu wangkangu alatji, “Anangu kutjupangka kam-pangkaṯu ngariwiyangu wantima, munu kuri walytjangka kutju ngarima.” Munu piruku kutjupa kulu wangkangu nyanga alatji, “Anangu iluntankunyitja wiyangu wantima.” Ka tjinguru nyu-pali kurirara tjungu ngarinyi palatja palya, palu nyuntu piruku anangu kutjupa iluntankunyangkampa Godalu nyuntunya paini alatjitu wantinytja wiyangu, panya tjukurpa palumpa nyuntu kuranu alatjitu.

12 Panya Godalu nyuranya kurangka nyinanyangka mantjinu nyura palumpa tjukurpa kutju kulintjaku. Munu tjukurpa nyara palu-languru paluru nyuranya ngula ngurkantankuku, tjinguru nyura palumpa tjukurpa kulinu, munta tjinguru wiya. Kaya palulanguru purkarangu kulinma nyura wangkanytja, munu kulintja, munu palyantja uwankara, panya ngula Godalu nyuranya kutju kutju ngurkantananyi.

13 Tjinguru nyura anangu kutjupaku nyakula ngalturingkunyitja wiya nyinanyi, ka Godanya ngapartji nyurampa ngalturingkunyitja wiyaringkuku tjiṯtu panya malatjangka. Palu tjinguru nyura anangu tjutaku ngaltunyitju nyinanyangkampa Godalu ngapartji palu purunytjutu nyuranya ngaltunytjungku altiku, ka nyura palula mirangka ngulu wiya rapa ngaraku.

Mulamularingkupai Tjutangu Wiru Kutju Palyantjaku

14 Kulilaya tjukurpa nyangatja. Panya anangu kutjupa tjinguru mukulya wiya nyinanyi munu paluru tjinguru wangkaku alatji, “Ngayulu mulamularinganyi Godaku.” Palu wiya, paluru alatji ngunti wangkanyi panya paluru Godaku tjukurpa tjukarurungku kulilpai wiya munu anangu tjutaku ngalturingkupai wiya. Paluru tjaangu kutju ngunti wangkanyi. Ka Godalu wanyu palunya wankalku alatji wangkanyangka? Wiya alatjitu.

15-16 Wanyu kana tjukurpa nyangatja nyurala wangka nyura uti kulintjaku. Tjinguru Jesuku walytja kutjupa mantara wiya mai wiya nyinanyi. Ka tjinguru nyuntu palunya nyakula pukulmankuku alatji wangkara, “Pukulpa nyinama, panya Godalunta mai untkuku man-tara kulu unytjunpa nyinanytjaku.” Palu nyuntu alatji wangkangu kutju wangkanyangka paluru paljtjaringkunyitja wiya munu unytju-narinytja wiya. Kulila, nyuntu palunya pukulmankunytjikitja mukur-ingkula mai mantara ungama tjukurpa kutju wangkanytja wiyangu. Nyara palulanguru kutju paluru pukulariku.

17 Uwa, uti nyura Godaku mulamularingkunytjatjanungku wiru tjuṯa palyanma anangu tjutaku. Panya wiru tjuṯa palyantja wiyangu wantirampa nyuranku ngunti Godaku walytjanmananyi.

18 Palu anangu kutjupangu tjinguru alatji wangkaku, “Wiya, palya nyuntu wiru tjuṯa palyalpai, palu ngayulu mulamularingkupai kutju.” Palu wiya, panya ngayulu Godaku mulamularingkunytjatjanungku wiru tjuṯa palyalpai alatjitu pukultju pulkangu. Ka nyara palu-languru wiru tjuṯa palyannyangka nyakulaya ngayunya ngurkantara kulilpai, “Ai, nyara paluru Godaku walytja mulapa, panya paluru wiru tjuṯa pukultjungku palyalpai.”

19 Uwa, nyuntu mulamularinganyi Godaku, panya paluru kutju pulka mulapa nyinanyi. Palu kulila, mamu tjuṯa kulu Godaku

mulamularingkupai, palu nyara paluru tjana Godala wanganarangku kulilpai wiya munuya pulkara nguluringkula tjititingkupai. Ka nyuntu mulamularingkunyjtjanungku wiru tjuṭa palyantja wiya nyinarampa mamu palunya tjananya purunypaṭu nyinanyi.

²⁰⁻²² Uwa, nyuntu ngunti wangkapai nyinanyi.

Palu wanyu nintiringkunyjtjikitjangku kulila tjukurpa panyatja, panya Aipuramanya Godalu walytjanmankunyjtja. Palu nyaanguru palunya walytjanmanu? Wiya, wati nyara paluru panya mulamularingkula wanganarangku kulinu Godalu palunya wangkanyangka, munu paluru palumpa katja katingu alatjitu pitjilta katu tjunkula pungkula Godanya ungkunyjtjikitjangku, munu panya nguwanpa wakara iluntanu. Ka nganaṇa tjukurpa nyangatja kulintjatjanungku kulini panya mulapa paluru kutjaratu kulinungi mulamularingkunyjtja munu wanganarangku kulira palyantja.

²³ Ka tjukurpa nyanga paluru nyiringka ngaranyi iriti walkatjunktjytja nyanga alatji,

“Aipuramanya mulamularingu Godaku. Ka nyara palulanguru Godalu palunya mulamularingkunyangka nyakula tjukarurunmankula walytjanmanu.” *

Munu Godalu Aipuramanya wangkangu, “Nyuntu ngayuku malpa nyinanyi, walytja mulapa.”

²⁴ Ka ara nyanga palulangurula uti nintiringama munula Godaku mulamularingkunyjtjanungku wanganarangku kulira titutjarangku palyanma wiru tjuṭa kutju. Ka nyara palulangurulta Godalu nganaṇanya walytjanmankuku nganaṇa mulamularingkunyangka nyakula munu tjukarurungku wiru tjuṭa palyannyangka kulu.

²⁵ Wanyuya kulinma minyma panya Rayapanya. Panya paluru wati tjuṭangka ngunti ngaripai. Palu nyara palulanguru paluru wati Godaku walytja kutjara kutitjura kanyiningi wati nguratja tjuṭangka iluntankunyjtjaku-tawara. Munu pulanya minyma paluru nintinu iwara kutjupawanu kumpira ankunyjtjaku. Ka Godalu nyangu minyma nyara paluru wirura atunymankunyangka, munu palunya walytjanmanu palula mirangka wirura palyannyangka.

²⁶ Kaya nyangatja kulinma panya anangu kurunpa wiya puṭu wanka nyinapai munu paluru ilupai alatjitu. Ka palu purunypa anangu kutjupangku mulamularingkunyjtjanungku wiru tjuṭa palyalwiyangku wantira ilunytja purunypa nyinanyi. Ka nyura uti mulamularingkunyjtjanungku wantinytja wiyangku wiru tjuṭa palyalkatima.

3

Tjaa Kura Nyinawiyangku Wiru Kutju Wangkanyjtjaku

¹ Walytja tjuṭa, wanyuya kulila. Panya Godalu anangu nintilpai tjuṭa pulkara alatjitu nyanganyi palumpa tjukurpa tjukarurungku nintinyangka ngurkantankunyjtjikitjangku. Ka nyara palulanguru nyura uwankarangku tjukurpa nintintjikitja mukuringkunyjtja wiyangku wantima, ka tjarangku kutju nintinma atatjura kulira. Panya Godalu nintilpai tjuṭa pulkara nyanganyi anangu kutjupa tjuṭangka waintara.

* 2:23 Genesis 15:6

² Nganana kutjupa-ara uwankarangku kura palyalpai. Palu panya anangu palya mulapa nyanga alatji nyinapai paluru kutjupa tjuta kuralpai wiya munu kampangkatu wangkapai wiya, wiru kutju wangkaruru. Uwa, anangu paluru wiru kutju wangkarampa palyanyku tjukaruru nyinapai. Kala uti palu purunypatu tjalinyapa urira wiru kutju wangkama.

³⁻⁵ Palu tjalinyapa panya nyanytjuku purala purunypa, panya wat- ingku nyanytju tjaangka purala tjunkupai, ka nyanytjunku wan- ganarangku kulilpai wati paluru ilara pinkurtjingannyangka. Purala paluru tjukutjuku, palu nyanytju pulkanya puralangku pinkurtjingal- pai. Ka palu purunypa nganampa tjalinyapa tjukutjukutu ngaranyi, palu tjukutjuku nyanga paluru wangka pulkalpai, ka pulkaringkula lipiringkupai, ka anangu tjutangu kulilpai.

Munuya pauta kulu palu purunypa kulila. Panya pauta nyara paluru pulka, palu wati kutjungku urungka pinkurtjingara katirinkupai paluru mukuringkunyitjakutu. Panya paluru malarkunguru punu tjukutjuku uritjingalpai, ka punu tjukutjuku paluru pauta panya pulkanya pinkurtjingalpai. Ka palu purunypatu nganampa tjalinyapa tjukutjukutu ngaranyi, palu tjukutjuku nyanga paluru wangka pulkalpai, ka anangu tjutangu kulilpai.

⁶ Wanyuya kulila waru ngapartji. Panya purku tjukutjuku puura tilinnyangka tilingarala pulkaringkupai. Ka palu purunypa nganana tjalinyapa tjukutjuku urira wangkanyi, ka wangka pulkaringanyi, ka panya anangu tjutangu kulini. Ka mamungku panya tjalinyapa kura tjuta wangkanytjaku palyalpai, ka wangka paluru waru purunytju lipiringkula anangu tjuta kuralpai.

⁷ Munu kuka tjuta kuluya ngapartji kulila. Panya kuwaripat- jaranguru anangu tjutangu kuka kutjupa kutjupa tjuta witera nin- tiningi tjulpu, liru, urutja tjuta kulukulu tjananya wanganarangku kulintjaku, ka kuwari nintintjaku ngaranyitu.

⁸ Palu wanyu kulila. Kutjupangku tjalinyapa nyangatja nintintjaku ngaranyi? Wiya alatjitu. Kutjupangku putu nintini tjalinyapa nyanga palunya wiru tjuta kutju wangkanytjaku. Panya tjalinyapa nyangatja kura pulkatjara anangu mukuringkunyangka titutjara urira wangka pulkalpai munu anangu iluntankupai alatjitu, panya lirungku patjara iluntankupai, palu purunypa.

⁹ Ka nganana kutjupa-ara tjalinyapa urira Mayatja Godanya walkulpai, munula piruku anangu tjuta warkipai tjalinyapa panya palunya urira, anangu panya Godalu palunya purunypa nyinanytjaku paluntja tjuta.

¹⁰ Ka alatji palya wiya. Uti nganana palya munu kura tjungura wangkawiyangku wantima.

¹¹ Panya warngalyku kutjunguru mina palya munu kura tjungu pakalpai wiya.

¹² Ka palu purunypa mai alipa tjuta punu ilingka pakalpai wiya, munu ili tjuta punu kiripitjingka pakalpai wiya alatjitu. Nganana mina palya putu mantjilpai mina tjaltutjaranguru. Kala uti ara nyan- ganpa kulintjatjanungku tjalinyapa urira palya munu kura tjungura wangkawiyangku wantima.

13 Anangu kutjupa wanyu nyuralanguru nintipuka nyinanyi tjukarurungku kulilpai? Munu uti paluru tjukaruru nyinama, munu anangu uwankaraku mukuringama munu pukultu alpamilanma kurunpa tjaruringkula, kanany-kananyarira walytjangku mirawaninytja wiyangku. Ka nyara palulanguru kutjupa tjutangku nyakula kulilku, "Mulapa paluru nintipuka nyinanyi, tjukarurungku kulilpai."

14 Palu tjinguru nyura anangu kutjupa tjutaku nyakula rawa nyararingkupai munu tjananya kuranmankupai. Munu tjinguru nyura anangu ngaltutjara nyakula kutjupa kutjupa nyura kanyintja ungkunyitja wiyangku ngurtjungku kanyilpai. Munu tjinguru nyura alatji mukulya wiya nyinara kanany-kananytju wangkara walytjangku wirunmankupai palya-palku nyinara. Palu wiya, nyangatja kura. Uti nyura mukulya wiya nyinanytjanungku ngunti walytjangku mirawaniwiyangku wantima munuyanku tjukarurungku kulinma.

15 Godalu wanyu nyuranya nintinu alatji kulintjaku? Wiya alatjitju. Nyangatja nyura mamungka kulira nintiringu ara mantatja, panya mamungka alatji nintilpai, Godalu wiyangku.

16 Panya anangungku walytjangku pulkanmara kutjupa tjutaku nyararingkula pikaringkunyangka pika paluru lipiringkupai anangu winkingka, ka nyara palulanguru kura pulkaringkupai.

17 Palu panya Godalu nintipuka pulkangku nganananya nintilpai palya mulapa nyinanytjaku pukulpa kalypa mulapa anangu tjutangka tjungu. Nyara paluru kutjungku nintilpai anangu tjutangka purkarangku kulintjaku, munu kuranyitja tjutangka wanganarangku kulintjaku munu tjungungku palyantjaku, munu ngaltunytjungku atunymara kanyintjaku, munu anangu uwankaraku pulkara mukuringkunyitjaku tjara wantinytja wiya, munu wangkara kalkuntjanungku tjukarurungku palyantjaku, tjaangku kutju wangkanytja wiyangku.

18 Uwa, Godalu kutjungku nganananya nintilpai anangu tjutangka tjunguringkula pukulpa kalypa nyinanytjaku. Ka nganana anangu tjuta ngapartji-ngapartji pikaringkunyangka markulku pika wantira kalypa nyinanytjaku. Kaya palulanguru kalyparingkula pukulpa tjungu nyinaku Godalu nyakula pukularinytjaku.

4

Godala Wanganarangku Kulintjaku

1 Nyaanguru nyuranku pikaringkula pungkula waninyi, nyaatjiratjangku? Munta tjinguru nyura alatji titutjara pukulpa-palku nyinanytjikitja mukuringanyi munu nyura ngunti titutjarangku kura palyalpai nyuranku pukulmankunytjikitjangku.

2-3 Panya nyura anangu kutjupangku kutjupa kutjupa tjuta kanyinyangka nyakula mukuringkupai munu nyura anangu panya palunya iluntankupai palumpa kutjupa kutjupa tjuta mantjintjikitjangku. Munu nyura anangu kutjupa tjutaku kulu nyakula nyararingkupai panya nyura anangu nyara paluru tjana purunytju wiru tjuta kanyintja wiya. Nyara palulanguru nyura pikaringkula titutjarangku ngaparku wangkapai.

Palu nyaanguru nyura pala mukuringkunyitja palunya putu mantjini? Wiya, nyura Godala tchapintja wiyangku wantira putu mantjini. Munta tjinguru nyura Godala tchapini, palu Godalu nyuranya kulintja wiyangku wantinyi, panya nyura tjinguru nyuranku kutju walytjangku tchapini walytja pukularinytjikitjangku.

⁴ Mulapa nyura Godanya wantinyi. Nyara palulanguru nyura mantatja kura kutjupa kutjupa tjutaku mukuringkula Godaku kuraringkupai. Nyura panya watingku kuri wantikatinytja purunypa nyinanyi, panya paluru kuri wantira kutjupa tjutangka ngaripai, palu purunypa nyura Godanya wantikatira kutjupa tjutangka tjunguringkupai. Munu nyura kura tjutangka ngunti pukularinytjikitja mukuringkula Godaku kuraringanyi munu palumpa malpa nyinanytja wiyaringanyi.

⁵ Panya nyiringka Godaku tjukurpa tjukururu ngaranyi munu tjakultjunanyi alatji Godalu palumpa panya kurunpa nganana nyinanytjaku tjunkunytjatjanu nyararingkupai ngana kutjupa tjutangka kulinnyangka palula kutju kulintja-tjiratja. Panya paluru mukuringkupai ngana palula kutju kulintjaku. Munu ngana kutjupa tjutangka kulinnyangka paluru pukularipai wiya.

⁶ Godanya ngaltunytju mukulya pulka mulapa titutjara nyinanyi munulanya kanyini. Panya nganmanytju nyiringka walkatjunkunytja ngaranyi alatji, "Anangu kanany-kananyaryangka Godalu kulintja wiyangku wantipai, palu paluru ngaltunytjungku kanyilpai kurunpa tjaruringkula kanany-kanany pa wiyangku kulinnyangka."

⁷ Ka nyura uti nyanga palulanguru Godalu wangkanyangka wanganaranku kulira palyanma. Munu mamungku wangkanyangka kulintja wiyangku wantima. Ka mamu paluru nyuranya putu wituwitura mapalku wantikatira ankuku nyuralanguru.

⁸ Ka nyura Godala ilaringkuangka paluru ngapartji nyurala ilaringkuutu. Kaya kura wantira kampa kutjaparira Godanya kutju kulira mulamulangku wanama.

⁹ Pulkaraya piiwiyariwa kura tjuta palyantjatjanu munuya kuran-guru pukularira ikaringkunyitja wiyangku wantima munuya pulkara kuntaringkula tjituru-tjitururira ulama. ¹⁰ Kulilaya, uti nyura Mayatja Godala mirangka kanany-kananyaryantja wiya tjukutjukuringama, ka nyuranya paluru nyakula pukularira pulkanma.

¹¹ Nyura uti Jesuku walytja tjutangu walytja kutjupa tjuta nyakula kuranmankuwiyangku wantima. Panya nyura tjukurku nitingkupalku Jesuku walytja kutjupa tjuta kura ngurkantara Godaku tjukurpa kurani. Munu nyura tjinguru kulini tjukururungku wangkara-palku. Palu wiya, nyura Godaku tjukurku mayatja wiya. Nyurampa ngaranyi mulamularingkula palunya kutju wanantjaku, kaya ngunti mayatjarira Jesuku walytja kutjupa tjuta kuranmankuwiyangku wantima.

¹² Panya Godanya kutju nyinanyi tjukurpa tjunkunytjatjanu, munu paluru kutjungku ngurkantara wangkaku tjukururu munu kura nyinanytjanguru. Munu paluru kutjungku tjara wankalku, munu tjara wiyalku. Nyanga alatji paluru kutjungku palyalku. Ka nyura nyaaku mayatjangku-palku ngurkantara kuranmananyi anangu kutjupa tjuta, panya nyura nyakula ngurkantara kuranmankunytjaku wiya ngaranyi.

Nitingku-palku Nganmanytju Kulira Wangkanytja Wiya

¹³ Ala, wanyuya kulila, panya nyura kutjupa kutjupa tjuṭatjara anukupai ngura tjuṭakutu tjalamilara mani palyantjikitja. Munu nyura wangkapai alatji, “Munta-uwa, kuwarila ma-wirkananyi munta tjingurula mungawinki ngura pala palula wirkankuku. Munula pala palulalta nyinaku yiya kutju tjalamilara mani pulka palyantjikitja.” Alatji panya nyura nganmanytju wangkara tamalmankupai.

¹⁴ Palu kulilaya, alatji wangkawiyangkuya wantima. Nyura ngurpa. Tjinguru nyura ngunti wangkaku, ka mungawinki wiya ngaraku, panya nyura watarku wangkapai nintingku-palku. Palu nyuntu nganana uwankara aruma purunypa, panya arumangku puli angatjunkturupai munu mapalku wiyaringkupai, nyara palu purunypala nyinanyi wanka tjukutjukutjara munula mapalku wiyaringkupai.

¹⁵ Ka nyanga palulanguru nganana uti alatji wangkama, “Wiya, Godanya mukuringkunyangka kutju ngayulu wanka nyinaku mununa ngura kutjupa tjuṭakutu ankula palyalku, ngayulu mukuringkunyjtjangka wiya.”

¹⁶ Wiya, utilanku nintingku-palku kanany-kananytju nganmanytju wangkawiyanku wantima, panya alatji wangkanyangka Godanya pukularipai wiya.

¹⁷ Tjinguru anangungku nintingku kulini tjukaruru nyinanytjikitjangku, palu nyara paluru tjukarurungku palyantja wiyanku wantira paluru Godala tungunpunganyi, ka Godalu ngurkantananyi palumpa kura.

5

Mani Pulkatjara Tjuṭa Ngulutjunkturuntja

¹ Kuwarina nyurala wangkanyi mani pulkatjara tjuṭangka. Nyura uti pulkara ulama, panya ngula nyurala tjituru-tjituru pulka wirkankuku.

²⁻³ Panya nyura kuwari kanyintja uwankara wiyaringkuku titutjara ngarinytja wiya. Ka nyurampa mai tjuṭa unaringkuku, munu nyurampa mantara wiru tjuṭa akulyungku ngalkuku, munu nyurampa mani tjiilpa gold kulu kuraringkuku. Ka nyura nyanganpa utiringkunyangka nyakula kulinma panya Godalu nyuranya waru pulka purunytju wiyalku alatjitu. Nyanga alatjiriku panya nyura wiru tjuṭa mantjira ngurtjungku kanyiningi munu nyuranku kutju pukulmanangi. Ka nyara palulanguru nyurampa kuwaringuru alatjitu ulanytjaku ngaranyi.

⁴ Ka panya nyurampa ngurangka nyura wati tjuṭa tjunkturupai warkarinytjaku munu nyura kalkulpai mani ungunytjikitjangku uwankara palyara wiyannyangka. Munu nyura wara uwankara palyara wiyannyangka mani tjukutjuku tjananya ungupai, panya nyura tjananya ngunti kalkunu tjukarurungku ungunytjikitjangku-palku. Kaya nyara palulanguru warkaripai panya tjuṭa kurunpa tjituru-tjitururira kulira ulangi, “Kuraralanya ungu.” Ka panya Mayatja Godalu tjananya ulanyangka kulira nyanganyi alatjitu munu witulya pulkangku nyurampa tjituru-tjituru pulka palyalku.

⁵ Palu panya nyura nyanga mantangka nyinara kutjupa kutjupa wiru tjuṭa mantjira kanyilpai nyura kutju pukulpa nyinanytjikitjangku. Palu alatji nyinara nyura Godanya mirpanpa palyani, ka ngula paluru

tjintu malatjangka nyuranya kura nyakunytjatjanungku ngurkantara tjarara ngura kurangka waniku.

⁶ Nyangatja kuluya kulinma. Panya anangu kutjupa tjuta wirura palyanyku nyinanyi, palu nyura kura nyinara tjanampa kuraringkula tjananya ngukalpai wiyanguru alatjitu, kaya paluru tjana putu wiyankupai. Palu nyura tjananya tungunpungkula wangkara iluntankupai alatjitu. Ka nyara palulanguru nyuranya Godalu kura ngurkantara wiyalku ngapartji.

Nyuranya Anannyangkaya Pukulpa Nyinama

⁷ Ngayuku walytja tjuta, kulinmaya. Anangu kutjupa tjutangu nyuranya anara kurara pungkunyangkaya ngapartji wangkawiyangu wantima. Palu pilunpa purkaraya nyinama kaar-kaaranytja wiya, munuya rawangu pukultu ala-alangu patanma Mayatjanya malaku pitjanytjaku. Wati panya kaana kanyilpai kulila. Panya paluru uninypa tjuta tjunkula wanara wantipai mantangka. Munu paluru nyinara patalpai minangu puyira uninypa panya palunya tjananya pakaltjingantjaku.

⁸ Ka nyara palu purunypa nganana rapa pukulpa patantjaku ngaranyi pakuringkunytja wiya, panya Mayatjanya mulapa pitjaku kuwari nguwanpa.

⁹ Nyuranya kutjupa tjutangu kurannyangkaya ngapartji wangkawiyangu wantira pukulpa nyinama nyuranya kulu Godalu kura ngurkantankunytjaku-tawara. Panya Mayatjanya watalpi ilaringanyi nganananya ngurkantankunytjikitja.

¹⁰ Kulinmaya wati panya wangkatjara tjuta iriti nyinanytja. Nyara paluru tjana panya Mayatjaku tjukurpa wangkangi, kaya anangu tjutangu tjananya kurara pungangi munu pikantanangi, kaya wantinytja wiyangu tungun-tunguntu alatjitu Godanya wanangingi. Ka nganana ngapartji palunya tjananya arkara Godanya wanantjaku ngaranyi.

¹¹ Panya nganana wati wangkatjara tjuta kulintjatjanungku wangkapai alatji, "Wati nyaranpaya tjukaruru mulapa pukulpa nyinangi." Munu panyala wati Tjuupanya kulu kulini.* Panya wati nyara palula pika kura tjuta wirkanangi, ka panya paluru tungun-tungunpa alatjitu Godaku mulamularingangi wantinytja wiya. Ka Godalu wati panya palunya alpamilanu munu palumpa tjukarurungku tu uwankara palyanu panya nganmanyitja purunypatu. Kala tjukurpa nyanga palulanguru kulini mulapa Godanya ngaltunytju mukulya pulkanya nyinanyi.

¹² Walytja tjuta, nyangatjana tjukurpa pulka mulapa nyurala wangkanyi kaya purkarangu kulinma. Panya anangu kutjupangu tjukarurungku wangkanytjikitja mukuringkula alatji wangkapai putu mulamularingkunytjaku-tawara, "Tjukarurungku wangkanyi Godala mirangka." Ka kutjupangu ngapartji palu purunypatu putu mulamularingkunytjaku-tawara tjinguru alatji wangkapai, "Ilkaritja tjutaya ngayuku ninti. Kana tjukarurungku wangkanyi." Ka piruku kutjupangu palu purunypatu wangkapai alatji, "Ngayuku mantatja

* 5:11 Tjukurpa Tjuupanyatjara ngarinyi Bible-ta, palu nganana Pitjantjatjara walkatjunkunytja wiyatu kuwaripa.

tjuṭaya ninti. Kaṇa nyurala tjukarurungku wangkanyi.” Palu nyan-gatja palya wiya. Uti nyura ini ilkaritja mantatja kutjupa kutjupa tjuṭa tjungura wangkawiyangku wantima. Munu nyura tjukarurungku wangkanytjikitja mukuringkula uwanmanama kutju munu wiyan-mankunytjikitja mukuringkula wiymannama kutju. Palu nyura ini kutjupa tjuṭa tjungura wangkanyangka Godalu nyuranya kura ngurkantankuku.

Mama Godala Rawangku Tjapintjaku

¹³ Tjinguru anangu kutjupa nyuralanguru tjituru-tjituru pulka nyinanyi kura kutjupa kutjupa palula utiringkunyaangka. Uti paluru Godala tjapinma palunya alpamilantjaku. Ka tjinguru kutjupa nyu-ralanguru pukulpa nyinanyi. Uti paluru inma tjuṭa inkara Godanya walkunma.

¹⁴ Ka tjinguru kutjupa nyuralanguru pikatjararingkula ngarinyi. Uti paluru anangu kutjupa iyanma wati atunymankupai tjuṭa ankula altinytjaku tjana pitjala palumpa Godala tjapintjaku. Kaya pitjala palula uwila tjutira mara tjunkula Mayatja Jesula tjapilku palunya palyarunguntjaku. ¹⁵ Panya tjana pulkara Godaku mulamularingkula tjapinnyangka anangu nyara pikatjara Godalu mulapa palyarungulku. Tjinguru anangu nyara paluru kura kutjupa kutjupa palyantjatjanu pikatjararingu, ka Godalu tjapinnyangka palunya kaly pangku wantiku paluru kura palyantjitjanguru.

¹⁶ Palulanguru nyura uti kura palyantjatjanungku piiwiyaringkula Jesuku walytja kutjupangka tjakultjunama, munu nyara palulanguru nyura Godala tjapinnyangka paluru nyuranya pikatjara ngarinyangka palyarungulku. Panya Godalu kulilpai anangu wiru tjukaruru nyinapaingku palula tjapinnyangka munu palumpa pulka mulapalta palyalku.

¹⁷ Nyura ninti wati panya Ilaitjaku. Wati nyara paluru panya anangu nganananya purunypa alatjitu. Paluru panya iriti nyinangi Godaku walytja munu paluru Godala tjapinu mina iyantja wiyangku wantinytjaku. Ka Godalu mulapaṭu kulinu palunya munu mina iyalwiyangku wantingu. Ka yiya mankurpa minangku puyintja wiya rawa ngarangi.

¹⁸ Munu nyara palula malangka Ilaitjalu piruku Godala tjapinu mina iyantjaku. Ka mapalkungku alatjitu minangku puyinu ka mai tjuṭa mantangka pakaṇu. Ka nganaṇa nyanga palulanguru nintiringkunyitjaku ngaranyi, panya anangu tjukaruru nyinapaingku tjapinnyangka Godalu kulira palyalpai pulka mulapa.

¹⁹⁻²⁰ Walytja tjuṭa kulinmaya! Tjinguru kutju nyuralanguru Je-suku walytja iwara palumpa wantira iwara kutjupangka ankuku, kurangka. Ka nyura uti nyakula palunya arkara alpamilara altima Jesulakutu malaku pitjanytjaku, ngula palunya Godalu ngurkantara paira iyantjaku-tawara. Ka tjinguru paluru kulira mulapa malaku aruringkuku, ka Godalu palunya kura tjuṭa palyantjitjanguru kaly-pangku pungkuwiyangku wantiku, ka paluru karalyarira wankar-ingkuku.

Lita Nampa 1 Peterlu Walkatjunkunytja 1 Peter Nyangatja Nganmanytju Nyakula Wangkanytjaku

Nyangatja Godaku tjukurpa Peterlu walkatjunkunytja. Paluru lita kutjara walkatjunu, ka nyangatja lita nampa 1 paluru walkatjura iyantja Jesuku walytja tjutakutu ngura kutjupa tjutangka nyinanyangka. Paluru tjana panya ngaltutjara nyinangi panya anangu kutjupa tjutangu tjananya rawangku kuraningi munu pikantanangi tjana Jesunya wananyangka. Kutjupa tjaraya tjailangka tjarpatjunangi. Ka Peterlu lita nyangatja tjanampa walkatjunu tjananya kunpuntjikitjangku tjana Godaku rapa pukulpa nyinanytjaku kurananyangka tjituru-tjitururira wantinytja wiya.

Munu paluru tjanala tjukurpa tjakultjunangi Jesunyatjara panya paluru kunpu pulka mulapa ngaranyi munu anangu tjuta wankarunkupai tjana palumpa mulamularingkunyangka. Munu Peterlu tjananya wangkangi Godala wanganarangku kulira tjukaruru nyinanytjaku munu pukulpa kalypa wirura nyinanytjaku mukulya alatjitu. Panya Jesunya kuwari nguwanpa malaku pitjanyi nyuntunya nganananya mantjintjikitja.

Tjukurpa nyanganpa ngarinyi:

- 1:1-2 Peterlu nganmanytju wangkanytja
- 1:3-12 Godalu palumpa walytja tjuta witulya pulkangku atunymara kanyintja ngula Tjintu Malatjangka wankarunkunytjikitjangku
- 1:13—2:10 Godalulanya mantjinu palya mulapa nyinanytjaku kura tjuta wantira
- 2:11—3:7 Jesunya purunypa mayatja tjutangka wanganarangku kulintjaku
- 3:1-7 Wati minyma kurirara wirura palyanyku nyinanytjaku
- 3:8—4:19 Kutjupangku nyuranya kurannyangkaya uti Godaku mulamularingama munu rawa palyanyku nyinama
- 5:1-11 Peterlu wangkanytja Jesuku walytjapiti atunymankupai tjutangka
- 5:12-14 Peterlu tjukurpa malatja wangkanytja

Peterlu Nganmanytju Wangkanytja

¹ Uwa, Jesuku walytja tjuta, ngayuluna Peternya Jesuku Christaku tjukurtjara panya paluruni witura iyanu tjukurpa palumpa anangu tjutangka wangkanytjaku. Kana lita nyangatja nyurampa walkatjunanyi Jesuku walytja tjutaku. Panya nyuranya Godalu ngurkantanu palumpa walytja nyinanytjaku. Palu panya anangu tjutangu nyuranya rawangku kurara pungkunyangka nyura ngura walytja wantikatira ngura malikitja tjutakutu anu Puntula, Kalaitjijala, Kapatutjijala, Aitjala munu ngura panya Pitjiniyala tjanalakutu. Kana nyangatja palulanguru nyurampa lita walkatjunanyi.

² Panya Mama Godalu nyuranya nganmanytju kulintjatjanungku ngurkantanu palumparinytjaku, ka panya Kurunpa Milmitu nyuranya

palyanu palumpa walytjaringkunyjtaku. Ka nyara palulanguru Godaku walytjaringkula nyura Jesula Christala wanganarangka kulini munu nyura Godala kalypa nyinanyi, panya Jesunya nyurampa ngalkilpa ilura milkali tjutingu, ka milkali nyara paluru tjutinytjijangka Godalu nyuranya kalypangku pungkuwiyangku wantingu.

Ka Godalu nyuranya titutjarangku mukulyangku kanyinma munu nyuranya kurunpa rapara pukulmanama.

Mantangka Nyangaya Nyuranya Kurara Punganyi Palu Godalu Wiru Mulapa Nyurampa Ilkaringka Kanyini

³ Uwa, mirawanimala Godanya Mayatja Jesuku Christaku Mama, panya ngaltunyjtju pulkangkulanya palumpa walytjaringkunyjtaku palyanu, palumpa katja Jesunya Christanya ilunyangka wankara pakaltjingga. Kala nyara palulanguru nganana pukulpa rapa pulka nyinanyi ilunytja kulira ngulurangkunyjtja wiya.

⁴ Munula pukultu kulini panya Godalu pulka mulapa kanyini nganananya ungkunyjtjikitjangku. Paluru ngura ilkaritjangka nganampa kanyini, panya ngura nyara palula wiru mulapa titutjara ngarapai, wiyaringkupai wiya, ka kutjupangku putu alatjitu kuralku.

⁵ Panya nganana Godaku mulamularingkunyangka paluru witulya pulkangku nganananya atunymara kanyini ngula Tjintu Malatjangka wankarunkunyjtjikitjangku.

⁶ Ka nyura ara nyanga palunya kulira pulkara pukularinyi. Kuwari nyura tjinguru tjituru-tjitururipai kura kutjupa kutjupa tjuta nyurala wirkankunyangka, palu nyanga palunya tjananya nyura kulilwiyangku wantira waitara kulini panya paluru nyuranya ngula wankarunkuku. Palulanguru nyura kuwari pukulpa titutjara nyinanyi.

⁷ Panya tjituru-tjituru nyurala wirkankunyangka Godalu nyanganyi munu kulini alatji, "Tjinguruya ngayuku mulamularinganyitu munta tjinguruya ngayuku watarkuringu." Palu tjituru-tjituru pulka nyurala wirkankunyangka nyura kulilwiyangku wantira palumpa kutju mulamularingkunyangka Godanya pulkara pukularinyi munu kulini, "Mulapaya nyanganpa ngayuku mulamularinganyi watarkurinytja wiya."

Uwa, Godaku mulamularingkunyjtaku wiru mulapa ngaranyi. Panya manta winkingka anangu tjutangku mani kutju pulkara kulilpai, palu mani nyaratja unytju ngarapai, kaya ngula mani wiyaringkunyangka palunya kulintja wiyaringanyi, palu wiru mulapa nyangatja Godaku mulamularingkunyjtja. Ka palulanguru nyuranya ngula pulkara mirawanira palyanmankuku Mayatja Jesunya malaku pitjanytja-arangka.

⁸⁻⁹ Nyura panya Jesunya nyakunyjtja wiya, palu nyura palumpa pulkara mukuringanyi. Munu nyura kuwari kulu nyakunyjtja wiya, palu nyura palumpa titutjara alatjitu mulamularinganyi, munu nyura kurunpa winki pukulpa pulka nyinanyi, panya Godalu nyuranya rawa mulamularingkunyangka wankaru kanyini.

¹⁰ Nyanga palunya panya wati Godaku wangkatjara tjutangku nganmanytju iriti walkatjunangi. Palu tjana putu kuliningi, "Yaaltjingga Godalu mukulyangku anangu tjuta wankarunkunyjtjikitjangku kulini?" Munuya palulanguru rawangku

pulkara kuliningi Godalu tjanala wangkanyangka. ¹¹ Panya Christaku Kuruntu tjanala unngunguru tjakultjunangi alatji, “Ngula Christanya Wankarunkupainya Godalu kalkuntjanya pitjanyangkaya palunya pulkara pikatjaralku munuya iluntankuku. Ka nyara palula malangka Mama Godalu palulawanungku wiru mulapa palyalku anangu tjuta pukulmankunytjikitjangku.” Kaya palulanguru wangkatjara tjutangku rawangku kuliningi alatji, “Yaaltjingara Godalu anangu tjuta wankarunkuku? Yaalara paluru tjananya wankarunkuku?” Alatjiya rawangku kulira aritiringi.

¹² Palu Godalu tjanala wangkangu alatji, “Tjukurpa nyanga nyura kuwari wangkanytja kuwari utiringkunyitja wiya, palu ngula mulapa kutju utiringkuku anangu malatja malatja tjutangku nyakunytjaku.” Ala nyangatja, tjana iriti tjukurpa Godaku tjakultjunangi nyura malatja tjutangku kuwari utiringkunyangka nyakunytjaku. Panya kuwari Godalu Kurunpa Milmilnga ilkaringuru iyanu tjukurjtara tjuta witulyankunytjaku, kaya paluru witulyankunyangka nyurala Tjukurpa Palya Jesunytjara tjakultjunu tjukurpa wiru mulapa. Ka panya angelpa tjuta kulu mukuringanyi tjukurpa nyanga palunya kulira nintiringkunyitjikitja, palu putuya kulini.

Godalulanya Mantjinu Palya Mulapa Nyinanytjaku

¹³ Palulanguruya kulil-kulilpa nyinama Godala wanganarangku kulira palyantjikitja. Munuya watarku nyinawiyangku pukultu alalangu patara kulinma panya ngula Jesunya Christanya malaku pitjanyangka Godalu mukulya pulkangku nyurampa wiru mulapa palyalku.

¹⁴ Panya nganmanypa nyura ngurpa nyinangi munu nyura kura tjutaku kutju mukuringangi. Palu kuwari nyanga nyura uti kura tjuta wantira Godala kutju wanganarangku kulira palyanma.

¹⁵ Panya Godanya palya mulapa nyinanyi. Ka palulanguru nyura uti palu purunypatu nyinama palya mulapa, panya Godalu nyuranya ngurkantanu palumpa walytja nyinanytjaku.

¹⁶ Nyanga alatji nyiringka iriti walkatjunkunytja ngaranya Godalu wangkanytja,

“Palya mulapaya nyinama. Nyanga ngayulu palya mulapa nyinanyi, palu purunypaya nyinama.” *

¹⁷ Nyura panya Godala tjapira palunya mamamara walkulpai. Nyaratja palya, palu watarkurinytja wiyangkuya kulinma panya paluru anangu tjuta tjukarurungku ngurkantankupaitu nyinanyi. Panya paluru anangu uwankara tjungu nyanganyi ngurkantankunytjikitjangku, nyuranya kulu. Munu paluru wiru palyannyangka nyakula palyanmananyi munu kura palyannyangka nyakula kuranmananyi. Palulanguru nyura uti mantangka nyanga unytju nyinaralpi Godalawanu nyinama palunya kutju rawangku mayatjanmara walkura.

¹⁸⁻¹⁹ Nyura panya tjamuku arangka nganmanypa nyinangi, palu ara nyara palulawanu nyinara nyura iwara kura putu wantikatingi. Ka panya kuwari nyuranya Godalu iwara kurangka ngaranyangka mantjira iwara palyangka tjunu palumpa walytjaringkunyitjaku.

* 1:16 Leviticus 11:44-45

Palu kulilaya, yaaltji-yaaltjingku Godalu nyuranya kurangka ngaranyangka mantjinu munu wankarunu? Paluru wanyu mani pulka ungkula nyuranya mantjinu? Wiya, panya mani mantjata kutju unytju ngarala wiyaringkupai. Palu panya Godalu nyuranya mantjinu Jesula Christalawanungku panya paluru punu katakutjarangka milkali tjutinytjitjanguru. Nyara paluru panya lamalama wiru mulapa ungkunyitja purunypa, panya wati tjukurtjarangu nganampa kuranguru lamalama pungkula Godanya ungkupai palunya pukulmankunyitjikitjangku, nyara palu purunypa Jesunya nganampa lamalama wiru mulapa ngalkilpa ilungu Godalu nganannya kura tjuta palyantjitjanguru kalypangu pungkuwiyangu wantinytjaku. Jesunya milkali tjutinytjitjanguru Godalu wiru mulapa nganampa palyanu nganana iwara kuranguru karalyarira iwara palyangka ankunyitjaku Godaku walytja mulapa.

²⁰ Panya nganmanytju manta ilkari paluntja kuwaripangka Godalu kuliningi Christanya mantakutu iyantjikitjangku nyuntunya nganannya wankarunkunyitjaku. Ka mulapa tu paluru pitjala nganampa ngalkilpa anga-ilungu.

²¹ Ka nganana palulanguru Godaku mulamularinganyi, panya paluru alatjitu Christanya ilunyangka wankara pakaltjanganu munu panya palunya ngura ilkaritjangka tjunu mayatja pulka nyinanytjaku palula itingka. Ka nyara palulangurulta nganana mulapa Godaku mulamularinganyi munula palumpa ala-alanguk patara kulil-kulilpa nyinanyi, watarkurinytja wiya.

Godalu Altinyangka Palula Wanganarangku Kulintjaku

²² Uwa, nyura panya tjukurpa tjukaruru Jesunyatjara wanganarangku kulintjatjanungku kura tjuta wantira palya mulapa nyinanyi munu nyura kuwari Jesuku walytja tjutaku pulkara mukuringanyi. Nyanga palulanguru nyuranku uti titutjara pulkara mukuringama kurunpa winki.

²³ Panya nyura Godaku katja untalpa nyinanyi palumpa panya tjukurpa kulira mulamularingkunyitjatjanu. Panya tjukurpa nyara paluru kurunpa pampulpai munu titutjara ngarapai wiyaringkunyitja wiya. Ka tjukurpa palumpa mulamularingkunyangka Godalu nyuranya katjanmara untalpanmanu. Nyura nganmanypa iti ngaringi mamanguru ngunytjunguru, ka puntu nyara paluru wiyaringkupai. Palu kuwari Godanya nyurampa mama nyinanyi titutjara nyinainya, ka nyura kulu palu purunypa titutjara wanka nyinaku.

²⁴⁻²⁵ Panya nyiringka nganmanytju walkatjunkunyitja ngaranyi nyanga alatji,

“Tjanpi panya rawa wanka ngaranytja wiya mapalku piltiringkupai, munu inuntji kulu unytju wiru ngarala punkara wiyaringkupai. Ka nyara palu purunypa anangu uwankara rawa nyinanytja wiya ilupai.

Palu Mayatja Godaku tjukurpa wiyaringkunyitja wiya titutjara alatjitu ngaraku.” *

Ka panyala tjukurpa nyanga wiru palunya nyurala nganmanytju tjakultjunu.

* 1:24-25 Aitjayaku 40:6-8

2

¹ Nyanga palulanguruya kura tjuta palyalwiyangku wantima. Munuya ngunti wangkawiyangku wantima, ngunti palya-palku nyinawiyangku wantima, munuya kutjupangku wirura palyannyangka nyakula nyararingkuntja wiyangku wantima, munuya kampangkatu tjaalmara anangu kutjupa wangkawiyangku wantira wirura nyinama.

² Munuyanku kurunpa winki Godaku tjukurku mukuringkula nintiringama, panya iti kulunyntju ipiku pulkara mukuringkula rawangku tjikilpai, palu purunypaya Godaku tjukurku mukuringama. Panya iti kulunyntju rawangku ipi tjikira pulkaringkupai munu wirura wanka nyinapai, palu purunytjuya Godaku tjukurpa rawangku kulira nintiringama, ka nyuranya Godalu wankaru titutjarangku kanyilku.

³ Panya mulapa nyura nganmanypa nintiringu Mayatja Jesunya ngaltunyntju pulka mulapa nyinanytjtija kulira.

Jesulakutu Ilaringkunyntjaku

⁴ Uwa, Mayatja Jesulakutuya ilariwa, panya paluru puli purunypa nyinanyi palu wanka. Panya anangu tjutangkuya palunya kura-palku wantingi, palu Godalu palunya ngurkantanu wiru mulapa uwankarangka waintarinyntja.

⁵ Panya paluru nyuranya Mayatja Jesulakutu pitjanyangka mantjira palula tjungura kanyilku, panya wali palyalpai tjutangku puli tjuta tjunkula tatilpai wali wiru palyantjikitjangku, nyara palu purunypa nyura Jesulakutu pitjanyangka Kurunpa Milmitu nyuranya palula tjungura utulu kutju palyani wali wiru purunypa nyura uwankara tjukurtjararingkula Godala mirangka tjukaruru wiru mulapa ngaranyntjaku. Munu nyura uwankarangku tjukurtjararingkula Godanya pukultu walkura mirawanipai. Ka paluru pulkara pukularipai nyura Jesuku Christaku mulamularingkula walkunnyangka.

⁶ Panya nyiringka iriti walkatjunkunyntja ngaranyi Godalu wangkanyntja nyanga alatji,

“Ngayulu puli tjiwa wiru mulapa ngurkantara tjunanyi kuunangka wali panya Tjayannga kunpu mulapa palyantjikitjangku.

Ka anangu kutjupa palumpa mulamularingkulampa Godala mirangka kuntaringkuwiya rapa alatjitu ngaraku.” *

⁷ Uwa, puli nyara paluru panya Mayatja Jesunya, ka nyura palumpa mulamularingkupai tjuta ninti panya paluru wiru mulapa. Kaya palumpa puu mulamularingkupai tjutangku palunya kura-palku kulilpai. Panya iriti nyiringka walkatjunkunyntja ngaranyi nyanga alatji,

“Wali palyalpai tjutangkuya wali puli tjutanguru palyanangi, munuya puli kutju nyakula waningu kura-palku kulira.

Palu nguntiya waningu, panya puli nyara paluru kura wiya, wiru mulapa wali kunpu ngaranyntjaku kanyilpai.” *

⁸ Ka tjukurpa kutjupa kulu iriti nyiringka walkatjunkunyntja ngaranyi nyanga alatji,

“Anangu tjuta puli nyanga palulawanu ankunyangka puli paluru tjananya tarpipungkula mantangka punkatjingalpai.” *

Alatji nyiringka iriti walkatjunu, ka puli paluru Jesunya, panya kuwaripatjara Godalu kutjupa kutjupa uwankara paluntja kuwaripangka paluru mukuringu anangu tjuta Jesuku Christaku mulamularingkunytjaku. Munu palulanguru piruku kulinu, "Palu anangu kutjupa tjutangkuya Tjukurpa Palya Jesuku kulira wantiku, munuya palulangurulta ngayulanguru titutjara alatjitu patu nyinaku." Nyanga alatji Godalu nganmanytju kulinigi, ka panya palumpa wangkatjarangu nyiringka iriti walkatjunu tjukurpa nyanga pulitjara.

⁹ Palu Godalu panya nyuranya ngurkantara tjunu palumpa walytjapitiringkula nyinanytjaku palya mulapa, ka nyura uwankara palumpa tjukurjtara tjuta nyinanyi, Mayatja panya pulkaku. Panya paluru alatjitu nyuranya uwankara ngurkantara tjunu anangu tjutangka tjakultjunkunytjaku paluru wiru tjuta palyantjitja. Panya Godalu nyuranya ngurkantanu mungawalurungka nyinanyangka kura wantira palula tjunguringkula nyinanytjaku tili wiru mulata.

¹⁰ Nganmanypa panya nyura mungutja purunypa nyinangi. Palu kuwari nyanga nyura palumpa walytjapiti mulapa nyinanyi. Nganmanypa panya nyura ngurpa nyinangi, palu kuwari nyanga nyura nintiringu panya paluru nyuranya ngaltunytju pulkangu atunymara kanyini.

Jesuku Walytja Wiya Tjutangka Palyanyku Nyinanytjaku

¹¹ Uwa walytja wiru tjuta, panya nyura mantangka nyanga unytju kutju nyinanyi malikitja purunypa, palu ngula nyura ngura ilkaritjangka wirkara ngurararira nyinaku. Palulanguruna pulkara nyuranya wituwituni, "Kulintja kura nyurala unngu utiringkunyangkampaya kura palyantjikitjangu kulintja wiyangu wantima. Panya kulintja kura nyanga paluru tjana nyuranya rawangu mukumukuni kuraringkunytjaku, kaya palula-tawara kulintja palunya tjananya wantima kulintja wiyangu."

¹² Panya Jesuku walytja wiya tjutaya ngura winkingka nyurala tjungu nyinara-waninyi munu nyuranya kutjupa kutjupa palyannyangka nyakula tjinguru kuranmankuku. Palula-tawaraya palya kutju tjukarurungku palyanma, kaya palulangurulta nyuranya wiru palyannyangka nyakula Godanya walkulku tjintu nyara palula panya Jesunya malaku pitjanytja-arangka.

Mayatja Tjutangka Wanganarangku Kulintjaku

¹³⁻¹⁴ Uwa, Mayatja Jesunya mukuringanyi nyura palumpa walytja uwankara mantangka nyanga nyinara mayatja mantatja tjutangka wanganarangku kulintjaku. Panya mayatja pulka nyinanyi ngura ini Rome-ala ngura tjutaku mayatja munu mayatja nyara paluru wati tjuta iyanu ngura kutjungka kutjungka mayatjarira kanyintjaku, anangu kura palyalpai tjuta pungkunytjaku munu wiru palyalpai tjuta pukularira mirawaninytjaku. Ka nyura uti mayatja nyanga paluru tjana wangkanyangka wanganarangku kulira palyanma.

¹⁵ Panya anangu ngunti wangkapai tjutangu nyuranya puntura wangkapai Godaku panya ngurpangu. Palu Godanya mukuringanyi nyura tjukaruru palyanyku nyinanytjaku. Panya nyara palulanguruya nyura tjukaruru wirura nyinanyangka nyakula ngunti wangkapai paluru tjana putu kulilku nyuranya puntura wangkanytjikitjangu.

16 Uwa, rawangkuya wiru tjuṭa kutju palyanma Godaku, panya paluru nyuranya palumpa warkarinytjaku pauntjingara wituwitulpai wiya puritjina purunypa. Palu nyura panya palula wanganaranku kulilpai pukularira, Christala tjungu nyinara. Palu tjinguru nyura ngunti kulilku alatji, “Nganana Jesuku walytja nyinyangka kutjupanku nganananya puritjina purunypa puṭu pauntjingara wituwituni. Wanyula unytjungku kutjupa kutjupa kura palyanma.” Palu wiya, nyanga alatji kulintja wiyangkuya wantima panya nyura Godaku warkaripai tjuṭa munu nyura uti palulawanu tjukaruru nyinama.

17 Munu nyura uti anangu uwankarangka purkaranku wirura wangkama pauntjingantja wiyanku. Munuya Jesuku walytja uwankaraku pulkara mukuringama wantinytja wiya. Munuya kulinma Godanya panya pulka mulapa nyinanyi nganana ngalypa ngalyparingkunyitjaku wiya. Ka panya mayatja pulka nyara Romeala nyinanyi, pala palulaya wanganarankutu kulinma kuraringkula wantinytja wiyanku.

18 Kana kuwari nyanga nyurala wangkanyi wati warkaripai tjuṭangka. Uti nyura nyurampa mayatjanka wanganaranku kulira waraka palyanma. Tjinguru nyura kutjupa tjuṭa mayatja wirungka warkarinyi panya paluru nyuranya ngaltunytjungku mukulyanku wirura kanyini. Ka tjinguru nyura kutjupatjara mayatja kurangka warkarinyi, ka nyuranya tjinguru mirpauntjungku pauntjingara wangkanyi. Palu uti nyura mayatja uwankarangkaṭu wirura wanganaranku kulinma panya mayatja mukulyangka kutju wiya, palu mayatja mirpauntjunga kulu.

19 Tjinguru nyurampa mayatjanku nyuranya mirpanarira pungkuku wiyanguru alatjitu, ka nyura uti Godanya kulira mirpanariwiya wirura rawa warkarima, ka Godanya nyakula nyurampa pukulariku.

20 Palu tjinguru nyurampa mayatjanku nyuranya kura palyannyangka pungkuku. Nyaratja palya, panya nyurampa kuranguru paluru nyuranya punganyi. Ka nyuranku uti mirawaniwiyanku wantima panya Godanya kura palyannyangka nyurampa pukularinytja wiya. Palu wiyanguru pungkunyangkaya mirpanariwiya rawatu warkarima, ka pala palulanguru Godalu nyuranya nyakula palyanmankuku.

21 Panya Jesulu Christalu nyurampa ngalkiltu pika pulka mantjinu nyura palunya ngapartji arkantjaku. Panya Godalu nyuranya ngurkantanu Jesunya purunypa ara nyanga pikawanu nyinanytjaku.

22 Panya paluru kura palyantja wiya alatjitu, munu ngunti kulu wangkanytja wiya ngarangi.

23 Ka tjana anara kurara pungkuyangka paluru ngapartji wangkanytja wiya, munu pungkuyangka ngapartji pungkunyitjikitjanku wangkanytja wiyatu. Paluru wantingi Godalu kutjungku tjananya ngula ngurkantara tjarantjaku, panya paluru tjukarurungku ngurkantankupai.

24 Palu Jesunya panya nganampa kuranguru punu katakutjarangka ilungu nganampa ngalkilpa, nganana kura wantira Godalawanu

tjukaꝛuru nyinanytjaku. Uwa, Jesulu nganampa ngalkiltu pika pulka mantjnu nganaᅇa nganampa kuranguru wankaringkunyꝛjaku.

²⁵ Panya tjiipi purunypa nyura kawankatingu. Palu kuwari nyanga nyuranya Godalu malakungku arurilyira ngalya-katingu, ka Jesulu Christalu tjapata palyangku nyuranya rawangku atunytju kanyini.

3

Kurirara Mukulya Wanganara Nyinanytjaku

¹⁻² Uwa, kana kuwari palu purunypatu nyurala wangkanyi minyma kuritjara tjuᅛangka. Uti nyura wati kuringka wanganarangku kulinma. Tjinguru nyuntumpa kuringku Godaku tjukurpa kulilpai wiya, palu nyuntu wirura nyinanyangka nyakula paluru tjinguru ngula Jesuku mulamularingkuku. Palu nyuntu palunya rawangku wangkara wituwituntja wiyangku wantima, panya nyuntu wirura tjukaꝛuru nyinanyangka kutju wati paluru nyuntunya nyakula tjinguru Godaku mulamularingkuku.

³ Panya minyma kutjupa tjuᅛangkuya wiru mulapa nyinanytjikitjangu mangka rawangku kumamilara wirulpai kutjupa kutjupa wiru tjuᅛa tjunkula, munuya liritja manyirkitja kulu tjunkupai gold-nguru palyantja. Munuya mantara wirungka tjarpapai mani pulkatjangka, munuya kulilpai, "Nyanga alatji palyarala wiru mulapa ngaranyi." Palu nyura uti alatji kulilwiyangku wantima, panya nyanga palula tjanalanguru nyura wiruringkupai wiya.

⁴ Palu nyura titutjara wiru mulapa nyinanytjikitja mukuringkulampa nyuranku kurunpa mukulya pulkatjara nyinama munuya pukultju piluntju nyinama mirpanarinytja wiya. Ka Godalu nyuranya mukulya winki nyinanyangka nyakula pulkara pukulariku, panya Godalu unngutja nyakupai munu nyara palulanguru kurunpa pukultju piluntju nyinanyangka nyakula pukularipai.

⁵ Panya iriti mulapa minyma Godaku mulamularingkupai tjuᅛa nyanga alatji nyinangi kurunpa pukultju piluntju, munuya tjanampa kuri tjuᅛangka wanganarangku kuliningsi. Nyanga palulanguruya wiru mulapa nyinangi, mantara kutjupa kutjupa tjuᅛa tjana kanyintjitjanguru wiya.

⁶ Palu minyma Tjiiranya kulinma wati panya Aipuramaku kuri, panya paluru palu purunypa nyinangi munu palumpa kuringka wanganarangku kuliningsi munu palunya mayatja kulira walkuningi. Ka nyura Tjiiranya purunypa nyinanytjikitja mukuringkulampa wirura palyanyku nyinama munu titutjara rapa nyinama nguluringkunyꝛtja wiya.

⁷ Uwa, ka wati tjuᅛa nyura uti minyma kuri tjuᅛa mukulyangku wirura kanyinma tjanampa kuraringkunyꝛtja wiyangku, panya minyma tjuᅛa upa nguwanpa wati purunypa kunpu nyinanytja wiya. Panya Godalu wati tjuᅛa kutju wankarunkunyꝛtja wiya minyma tjuᅛa kulu wankarunkuku wanka titutjara nyinanytjaku. Tjinguru watinku minyma kuri pungkuku munu tjinguru paluru Godala tjapintjikitja mukuringkuku, ka Godalu palunya kulintja wiyangku wantiku. Palula-tawarayanku minyma kuringka wirura tjungu nyinama.

Nyuranya Kurannyangka Kulira Wantinytjaku

⁸ Kaṇa nyangatja nyura uwankarangku kulintjakulta wangkanyi. Kaya kulinma, munuyanku tjungu kalypa nyinama mukulya pulkatjara, panya kuṭa maṭanyku pulkara mukuringkupai, palu purunypayanku mukulya nyinama. Munuyanku kaṇany-kaṇanyapa wiyangku ngaltunytjungku tjananya kanyinma.

⁹ Tjinguru kutjupangku nyuranya kurannyangka nyura ngapartji tjananya kurantja wiyangku wantima. Ka tjinguru kutjupangku nyuranya pauntjingara warkiku, ka nyura ngapartji palu purunymankuwiyangku wantima. Palu mukulyangkuya tjananya wangkama munuya Godala tjanampa tjapinma tjananya wirura kanyintjaku. Panya Godalu nyuranya ngurkantanu munu nyuranya pukulmankunytjikitjangku kalkunu, ka nyura ngapartji uti palulanguru anangu kutjupa tjuṭa pukulmanama.

¹⁰ Panya nyiringka iriti walkatjunkunytja ngaranyi alatji, “Nyura pukulpa wirura nyinanytjikitja mukuringkulampaya kura tjuṭa wangkawiyangku wantima, munuyanku ngunti wangkanytja wiyangku tjukarurungku kutju wangkama.

¹¹ Munuya kura tjuṭa wantira kampa kutjuparira wiru tjuṭa kutju palyanma, munuya kurunpa winkingku kulinma uwankaraku kalypa nyinanytjikitjangku.

¹² Panya Godalu tjukaruru nyinapai tjuṭa atunymara kanyilpai, munu palula tjapinnyangka tjananya wanganarangku kulilpai.

Palu paluru kura palyalpai tjuṭa kulilwiyangku wantipai.” *

¹³ Tjinguru nyura kurunpa winki mukuringanyi wirura nyinanytjikitja, ka nyara palulanguru palyanyku nyinanyangka anangu kutjupangku nyuranya kurantjikitjangku kulintjatjanungku puṭu kulira wantiku.

¹⁴ Palu tjinguru nyura tjukaruru nyinanyangka kutjupa tjuṭangku nyuranya rawangku wangkara kuranma. Palu tjanampa nguluringkula tjituru-tjitururinytja wiyangkuya wantima, panya Godalu nyuranya pukulmara kanyilku kura pala palula tjanalanguru. Ka tjananya kulira wantima.

¹⁵ Munuya Jesunya Christanya kurunpa winkingku mayatjanmara walkunma.

Ka tjinguru kutjupa tjuṭangku nyuranya tjapilku, “Nyaaku nyura Jesuku pukulpa mulamularinganyi?” Ka nyura nganmanytju kulin-tjatjanungku alatji tjapinnyangka ngulu wiyangku palula tjanala utingku tjakultjunama tjana kulintjaku Jesunya panya nganampa mayatja munu wankarunkupainya. Palu tjanala kaṇany-kaṇanytju wangkanytja wiyangkuya purkarangku wangkama mukulyangku.

¹⁶ Uwa, tjana nyuranya anannyangka tjanampa pikaringkunytja wiyangku wantima, panya Godalu pikaringkunyangka nyakula nyurampa pukularinytja wiya, ka nyura kulira kunṭaringkuku. Palulanguruya tjanala purkarangku wirura wangkama, kaya nyuranya anantjatjanungku maṭa kunṭaringkuku nyuranya Christalawanu wirura nyinanyangka nyakula.

* 3:12 Psalm 34:12-16

¹⁷ Tjinguruya nyuranya punganyi nyura tjananya kurannyangka palatja palya panya nyurampa kuranguruya nyuranya punganyi. Palu tjinguruya nyuranya wirura tjukururu nyinanyangka punganyi, ka nyara palulanguru Godanya nyurampa nyakula pulkara pukularinyi, panya nyura palula wanganarangku kulira wirura nyinanyi, kaya ngunti nyuranya punganyi.

¹⁸ Wanyuya Jesunya Christanya kulinma, panya paluru kura wiya alatjitu tjukururu mulapa munu panya nganampa ngalkilpa anga-ilungu kura palyalpai tjtaku nganananya Godala tjunguntjikitja. Paluru nyuntumpa nganampa kuranguru ilungu kutju-ara Godanya nganampa kalyparingkunyjtaku. Paluru anangu alatjitu ilungu, palu Kurunpa Milmitu palunya ilunyangka wankara pakaltjinganu.

¹⁹ Ka paluru kurunpa anu ngura kutjupakutu munu kurun-kurunpa tjtangka tjukurpa wangkangi, panya ngura nyara palula Godalu palunya tjananya tjailangka purunypa kanyini.

²⁰ Panya paluru tjana iriti Godala tungunpungangi Noah-lu panya pauta pulka palyantja-arangka, ka panya Godalu tjananya uru pulkangka uwankara iluntanu munu tjananya kurunpa tjtuta tjailangka purunypa tjunu rawa nyinanyjtaku. Nyara palula arangka Noah-lu pauta rawangku palyalkatinyangka Godanya anangu tjtaku patanangi paluru tjana malaku palulakutu aruringkunyjtaku, palu tjana wantingi. Kaya Noah-nya tjana anangu 8 kutju pautangka tjarpara wankaringu Godalu uru panya pulkangka katura katinyangka.

²¹ Ka palu purunypa kuwari Godalu nganananya wankarunanyi. Panya anangu kutjupa minangka baptise-katinyangkala nyakula kulilpai palunya Godalu wankarunkunyjtja. Palu nganananya nyaaku minangka baptise-katipai? Miri paltjira raputji kilinankunyjtaku? Wiya, ngana Godala tjapilpai paluru nganananya palula mirangka kunta wiya ngaratjungkunyjtaku. Ka mulapa Godalu nganananya baptise-katinyangka alatjingalpai, panya paluru Jesunya Christanya ilunyangka wankara pakaltjinganu, nyara palulanguru Godalu nganananya wankarunkupai.

²² Ka panya Jesunya pakantjatjanu ngura ilkarikutu anu munu kuwari nyinanyi mayatja pulka mulapa Godala tjungu palula kampa wakungka, munu paluru mayatjarira kanyini ilkaritja kutjupa kutjupa uwankara, angelpa tjtuta, mayatja kutjupa kutjupa tjtuta kulukulu.

4

Kampa Kutjuparira Tjukaruru Nyinanyjtaku

¹ Uwa, panya wati kura tjtangu Jesunya Christanya pulkara pungkula pikatjaranu mantangka nyanga nyinanyangkalpi, palu pungkunyangka paluru rapa ngarangi Mama Godanya mukuringkunyjtita kutju kulira. Ka nyura uti palu purunytjtutu kulinma munuya anangu tjtangu nyuranya pungkula pikatjarannyangka rapa ngarama. Panya anangu kutjupangku Jesunya purunypa pikangka rapa ngarala Godanya pulkara kulilpai munu kura palyalpai wiya.

² Palulanguruya nyura mukuringkunyjtija wantima munuya Godala kutju wanganarangku kulira paluru mukuringkunyjtija kutju palyanma.

³ Panya nyura nganmanypa kurangka nyinangi Godaku ngurpa. Nyaratja nyura Godaku ngurpa nyinara kunta wiya anangu kutjupa kutjupangka ngaringi nyuranku mukuringkunyjtija kutju kulira. Munu nyura tjunguringkula waina pulka tjikira tarangkarira kutjupangka kutjupangka ngaripai kuri mulapa wantikatira. Munu panya nyura kurangu god ngalya-ngalya tjuta walkulpai nyinangi.

⁴⁻⁵ Palu kuwari nyanga nyura Jesuku walytjaringkula kura tjuta wantipairingu, kaya Godanya kulilpai wiya tjutangu nyuranya nyakula urulyarani, panya nyura tjanala tjunguringkula kura palyalpai wiyaringu. Kaya kuwari nyuranya anara kura tjuta wangkara ikaringkupai. Palu nyara palunya tjananya ngula Godalu kuranyu ngaratjungkula wangkaku tjana mantangka nyinara palyantija uwankara utingku tjakultjungkunyjtaku. Panya paluru mulapa anangu uwankara ngurkantara tjaralku, wanka tjuta munu miri tjuta kulukulu.

⁶ Panya kutjupangu Tjukurpa Palya Jesunyatjara miri tjutangka kulu wangkara tjakultjunu tjana kulu kulira Godala tjunguringkula titutjara nyinanyjtaku. Paluru tjana panya nganmanypa ilura wiyaringu. Palu Godalu tjanala Tjukurpa Palya tjakultjungkunyjtaku iyanu tjana kulu kulira mulamularingkunyangka Kurunpa Milmilu tjananya kulu wankarunkunyjtaku.

Ngapartji-ngapartjingu Atunymankunyjtaku

⁷ Ka tjintu ilaringu ilkari manta uwankara wiyaringkunyjtaku. Kaya purkarangu atatjura kulilkatima tjakarurungku Godala tjapintjikitjangu.

⁸ Palu pulka mulapa ngaranyi nyanga alatji uti nyuranku pulkara mulapa mukuringama kurunpa winki. Panya nyura anangu kutjupaku nganmanypa alatjitu pulkara mukuringkulampa palumpa mapalku kalyparingkuku nyara paluru nyuranya kurannyangka.

⁹ Ka tjinguru Jesuku walytja kutjupa malikitja ngura kutjupanguru pitjanya kaya nyakulampa mapalkungku nyurampa ngurangka altira tjunama papulankuwiyangu, munu palunya pukultu kanyinma mirpan-mirpanu wangkanytja wiyangu. ¹⁰ Panya Godalu nyuranya kutju kutju pukultjungku nintilpai munu wityulankupai warka walytjangu walytjangu palyantjaku. Ka nyura uti warka nyanga palunya tjananya nintinnyangka kutjungku kutjungku wirura palyanma anangu kutjupa tjutangu kulu kunpuringkula pukultu Jesunya wanantjaku.

¹¹ Tjinguru Godalu nyuntunya nintinu tjukurpa wangkanyjtaku, ka nyuntu uti tjukurpa tjanala wangkarampa Godaku tjukurpa kutju wangkama. Tjinguru Godalu nyuntunya nintinu anangu tjuta alpamilantjaku, ka nyuntu uti tjananya pulkara alpamilanma, Godalu nyuntunya kunpunnyangka. Kaya nyara palulanguru anangu tjutangu nyuranya nyakula waintara Godanya pulkara mirawaniku munuya wangkaku, "Uwa, mulapa nyara paluru tjana Jesula Christalawanu tjakaruru mulapa nyinanyi." Munuya nyara palulanguru Godanya pulkara walkulku. Uwa, Godanya panya mayatja wityula pulka

mulapa nyinanyi pitalyjtji pulkanya. Kala wanyu wantinytja wiyangku titutjarangku palunya mirawanira walkunma. Uwa, mulapa.

Nyuranya Kurara Pungkuyangka Pukularinytjaku

¹² Uwa walytja wiru tjuṭa, kuwari anangu Jesunya wantipai tjuṭangku nyuranya anani munu tjinguru punganyi munu kutjupa kutjupa palyani nyura pikatjararingkula tjituru-tjitururinytjaku. Ka nyura tjinguru tjituru-tjitururira kulini, “Yaaltji-yaaltjingku nyan-gantu nganananya kurani? Panya nganana Jesunya Christanya kutju wanalpai. Kalanya nyaaku nganananya kutju rawangku kurani?” Palu alatji kulintja wiyangkuya wantima panya Godalu nyuranya arkara nyanganyi, “Yaaltji-yaaltji nyanga tjana kura nyanga tjutawanu kunpu ngaraku? Tjinguruya ngayunya wantinytja wiyangku titutjarangku wanama, munta tjinguruniya pakuringkula wantiku.” Alatji paluru nyuranya arkara nyanganyi panya paluru mukuringanyi nyura palunya titutjarangku tungun-tunguntu wanantjaku.

¹³ Palu pukularimaya kura nyanga palu purunypa nyurala wirkankuyangka. Panya nganmanytjuya Jesunya kuraringkula pungkula pikatjaranu munu iluntanu. Ka nyurampa ngapartji palu purunypatu ngarakatinyi. Kaya pukularima Jesunya purunypa pikatjararingkunyjtikitja. Panya ngula Jesunya Christanya malaku pitjaku witulya pitalyjtji pulka mulapa, ka nyara palula ara nyura pulkara pukulariku.

¹⁴ Panya anangu kutjupa tjuṭangku nyuranya Jesunya wanannyangka nyakula anara warkipai. Palu nyaanguruya nyuranya alatji wangkara warkinyi? Wiya, panya Godaku kurunpa nyurala unngu nyinanyi kurunpa panya wiru mulapa, kaya nyara palulanguru nyuranya anani. Kaya nyuranya warkinyangka kulira wantima munuya pukulpa nyinama.

¹⁵ Palu tjukaruruya palyanyku nyinama kura kutjupa kutjupa tjuṭa palyantja wiya. Panya nyuranya kuranguru pungkunyjtjaku ngaranyi alatjitu. Palula-tawaraya miri pungkunyjtja wiya, walytjatjara kutitjungkunyjtja wiya, irarira wangkanytja wiya, kura kutjupa kutjupa uwankara palyantja wiyangku wantima.

¹⁶ Palu tjinguru nyuranya Jesunya wanannyangka anara pungkuku, ka nyura uti kunṭaringkuwiya ngarama munuya alatji kulinma, “Munta-uwa, nganana Jesunya wanannyangkaya nyangantu nganananya kurani.” Munu nyura uti tjananya kulilwiyangku wantira Godanya pulkara walkunma, panya paluru alatjitu nyuranya Jesuku walytjaringkunyjtjaku ngurkantanu.

¹⁷ Palu kuwari nyanga Godalu anangu uwankara nyakula ngurkantanyani tjana kura munu palya nyinanyjtjtja-nguru. Munu paluru nganananya palumpa walytja tjuṭa-warara nyanganyi kura palyantjtjtja-nguru ngurkantara paintjikitjangku. Palulangurula alatji kulini, “Munta, Godalu nganananya-warara ngurkantankunyjtjtjanungku anangu panya palunya wantipai tjuṭa ngurkantara pulkara paira iyalku ngura kurakutu, panya tjana Tjukurpa Palya Jesunyatjara kulira wantingi.”

¹⁸ Panya nyiringka iriti walkatjungkunyjtja ngaranyi nyanga alatji, “Panya Godalawanu tjukaruru nyinapai tjuṭangkuya pika pulka mantjira kutju wankaringkuku.

Kaya anangu panya Godanya wantira kura palyalpai tjuta yaaltjiriku? Wiya, Godalu tjananya pulkara alatjitu pikantankuku ngalturingkunyitja wiyangku.”

¹⁹ Uwa, nyanga alatji Godalu nyurala wangkanyi, panya tjituru-tjituru kutjupa kutjupa tjuta nyurala wirkankuku. Ka tjituru-tjituru nyanga paluru tjana wirkankuyangka nyura yaaltjiriku? Wiya, uti nyura Godaku mulamularingama wantinytja wiya, panya paluru nganananya palura tjunkunyitjanungku titutjarangku atunymara kanyini. Paluru nganampa watarkurinytja wiya, kala uti mukulya tjukaruru nyinama ngananaala tjituru-tjituru nyanga paluru tjana wirkankuyangka.

5

Jesuku Walytjapiti Atunymankupai Tjutangka Wangkanytja

¹ Uwa, kana kuwari nyurala wangkanyi Jesuku walytjapiti atunymankupai tjutangka. Ngayulu kulu panya nyura purunypatu Jesuku walytja tjuta atunymara kanyilpai nyinanyi. Ngayulu panya ngarala nyangangi Jesunya wakara punu katakutjarangka utitjunksuyangka, mununa ngula tjinu malatjangka ngayulu palula tjunguringkula pukulpa mulapa nyinaku, panya nyara palula-arangka Godalu palunya uwankarangka nintilku paluru witulya pulka mulapa ngaranyangka pitalytji pulkanya. Kana kuwari nyanga nyuranya wangkanyi Jesuku walytja tjuta wirura atunymankunyitjaku.

² Panya Godalu nyuranya tjunu tjananya atunymara kanyintjaku. Ka nyura uti kurunpa winki mukuringkula tjananya wanganarangu atunymara kanyinma. Panya wati tjabatangu palumpa tjiipi tjuta wirura kanyilpai, palu purunyitju nyura uti Godaku walytja tjuta wirura atunymara kanyinma, panya Godanya mukuringanyi nyura alatji wirura kanyintjaku.

Palu tjanalanguru mani mantjintjikitjangku kulintja wiyangkuya wantima munuya Godaku tjukurpa tjanala pukultjungku nintinma tjanampa kutju palyantjikitjangku kulira.

³ Munu tjananya wirura purkarangku kanyinma pauntjingara wangkara wituwituntja wiyangku, panya Godalu nyuranya wirura kanyintjaku ngurkantanu. Ka paluru tjana nyuranya nyakula nyuranya purunypatu wirura nyinaku.

⁴ Ka nyara palulanguru ngula nyurampa tjabat pulkangku Christalu malaku pitjala nyuranya anangu winkingka mirangka mirawanira wiru mulapa ungkuku. Ka nyara paluru kuraringkunyitja wiya titutjara pitalytji pulka ngaraku wiru mulapa.

⁵ Kana nyurala ngapartji wangkanyi wati yangupala tjutangka munu kungkawara tjutangka kulu. Uti nyura tjilpi pampa tjutangka wanganarangu kulinma tjana wangkanyangka.

Uwa, uti Jesuku walytja uwankara kanany-kanany pa wiya nyinama ngaltunyitju pulka. Munuyanku pukultjungku ngapartji-ngapartjingku alpamilara palyanma, panya nyiringka iriti walkatjunksunyitja ngaranyi nyanga alatji,

“Panya Godalu kanany-kanany nyinapai tjuta wantipai.

Palu panya purkara nyinapai tjuṭa paluru mukulyangku atunymara kanyilpai kaṇany-kaṇany pa wiya nyinanyangka.” *

⁶ Pala palulanguruya Godala atunymankupai pulkangka wanganarangku kulinma kaṇany-kaṇanyariwiyangku, ka ngula tjuṭu paluru kulintjitjangka paluru nyuranya mirawanira pulka mulapa tjunkuku.

⁷ Palu nyurala kutjupa kutjupa kura wirkankunyangkaya tjituru-tjitururinytja wiyangku Godanya kulinma, panya paluru nyuranya atunymara kanyini.

⁸ Munuya kulil-kulilpa nyinama mamu Satantu pikatingku nyuranya kurara punkatjingantjaku-tawara. Panya mamu paluru lion pulka purunypa para-ngaranyi, panya lion pulkangku kuka para-ngurilpai patjara ngalkula paltjaringkunyjtikitjangku, palu purunytju mamu paluru para-ngarala ngurini anangu tjuṭa kurara punkatjingantjikitjangku.

⁹ Kaya Godaku rawa raparingkula mamu pala palula tungunpungama. Munuya kulinma panya Jesuku walytja kutjupa tjuṭa manta winkingka nyuranya purunypa nyinanyi, panya Godanya wantipai tjuṭangkuya palunya tjananya munu nyuranya kulu Jesuku mulamularingkunyangka kurara punganyi munu pulkara pikantananyi.

¹⁰ Palu nyura pika nyanga palula tjanalawanu tjukutjuku rawa nyinanyangka Godalu witulya pulkangku nyuranya wiru mularmankuku munu nyuranya kurunpa rapa kunpu alatjitu palyalku nyura palumpa pulkara titutjara mulamularingkunytjaku. Panya Godalu mukulya pulkangku nyuranya ngurkantanu nyura Jesula tjunguringkula ngura wirungka titutjara nyinanytjaku.

¹¹ Uwa, Godanya mayatja witulya pulka mulapa nyinanyi. Kala wanyu wantinytja wiyangku titutjarangku palunya kutju mirawanira walkunma. Uwa, mulapa.

Tjukurpa Malatja

¹² Uwa, nyangatja ngayuku malpa wiru ini Tjaalatjanya ngayula tjungu nyinanyi. Paluru panya Jesunya tungun-tunguntu wanalpai wantinytja wiyangku. Kali paluru ngali lita nyangatja nyurampa mutumuṭu walkatjunu nyuranya pukulmankunytjikitjangku. Nyangatjana walkatjunu nyura kulintjaku panya Godanya mulapa ngaltunytju pukultju pulka nganampa nyinanyi. Kaya nyanga palunya kulira Godaku rawa mulamularingama wantinytja wiya.

¹³ Kaya ngura nyanga Papilanta Jesuku walytja tjuṭangku nyuranya kulini nyurampa pukularira.* Panya nyanga palunya tjananya Godalu ngurkantanu nyuranya purunypa paluru tjana kulu Jesuku walytjaringkunytjaku.

Ka wati kutjupa Markanya kulu mukuringanyi ngayulu palumpa wangka nyurala tjakultjunkunytjaku. Wati nyanga paluru panya ngayuku katja purunypa.

¹⁴ Ka nyura uti anangu kutjupa Jesuku walytja nyakulampa palumpa pukularira mara witinma.

* 5:5 Proverbs 3:34 * 5:13 Ngura Papilangga kunyu ngura Rome-anya, panya kutjupa-ara anangu tjuṭangku ngura Rome-anya kitikiti wangkanyjtikitjangku ini Papilangga wangkapai.

Uwa, alatjituna wangkanyi. Ka Godalu nyuranya Christaku walyt-japiti uwankara kurunpa pukuḷpa rapa mulapa palyanma.

Lita Nampa 2 Peterlu Walkatjunktjuna 2 Peter Nyangatja Nganmanytju Nyakula Wangkanytjaku

Nyangatja Godaku tjukurpa Peterlu walkatjunktjuna Jesuku walytja kutjupa tjtutaku Jerusalemala patu nyinanytja tjtutaku. Paluru lita kutjara walkatjuna palula tjanalakutu iyanu, ka lita nyangatja alatja paluru ilunytja kuwaripangka walkatjunktjuna. Munu lita nyanga palula paluru wangkara ngulutjunangi tjukurtjara ngunti tjtutangka-tawara alatja wangkara, "Kuwari anangu kutjupa tjtuta ngunti nintilpai tjtuta nyuralanguru pakalku munuya tjukurpa kutjupa tjtuta nyurala wangkara ngunti nintilku tjukurpa Godalanguru wiyatja tjana walytjangku kulintja. Munuya nyuranya ngunti kurara mauntankuku nyura Godalawanu tjukururu nyinanyangka."

Munu Peterlu tjananya wangkara kunpuningi ngunti nintilpai tjtuta kulira wantinytjaku munu tjukurpa mulapa kutju kulintjaku munu wirura palyanyku nyinanytjaku. Munu paluru tjanala wangkangi watarkuriwiyangu kulintjaku panya mulapa Jesunya ngula malaku pitjanya palumpa walytja tjtuta ngura wirukutu katinytjikitja palula tjungurinkula wanka tjtutjara nyinanytjaku.

Tjukurpa nyanganpa ngarinyi:

1:1-2 Peterlu nganmanytju wangkanytja

1:3-21 Godalulanya ngurkantankunyitja Christanya purunypa wirura palyanyku nyinanytjaku

2:1-22 Peterlu ngulutjunktjuna ngunti nintilpai tjtutangka-tawara

3:1-18 Jesunya malaku pitjanytja tjukururungku kulintjaku

Peterlu Nganmanytju Wangkanytja

¹ Uwa, Jesuku walytja tjtuta, ngayuluna Simon Peternya Jesuku Christaku tjukurtjara, panya paluruni witura iyanu palumpa tjukurpa anangu tjtutangka wangkanytjaku. Kana lita nyangatja nyurampa walkatjunanyi, panya nyura nganana purunypa alatjitu Jesuku Christaku pulkara mulamularingu wantinytja wiya. Panya paluru Godanya, nganampa panya wankarunkupainya munu panya tjukururu alatjitu nyinanyi. Kala nyura palulanguru palula wanganarangku kulilpai panya paluru tjukururungku nganampa palyanu wiru mulapa.

² Uwa, nyura panya Godaku Mayatja Jesuku kulu nganmanypa nintiringu munu nyura kuwari palumpa walytjapiti nyinanyi. Ka Godalu nyuranya tjtutjarangu mukulyangu kanyinma munu nyuranya kurunpa rapara pukulmanama.

Christanya Purunypa Wirura Nyinanytjaku

³ Nganana ninti Godaku panya paluru witulya pulka alatjitu nyinanyi palya mulapa. Panya paluru nganananya ngurkantanu palunya arkaa tjukururu wiru mulapa nyinanytjaku. Munu paluru nganananya kutjupa kutjupa uwankara ungu wiru tjtuta, nganana kunpuringkula Jesulawanu tjukururu palyanyku nyinanytjaku.

⁴ Uwa, Godalu nganananya wirungku kalkunu atunymara kanyin-tjikitjangku nganaa Jesunya purunypa wirura palyanyku nyinanytjaku kura uwankara wantira. Panya manta winkingkaya anangu kura tjuṭa nyinanyi panya tjana kuraku unngu mukuringkunyjtjanungku titutjarangku kura palyalpai. Palu Godalu nganananya kunpuntjikitjangku kalkunu nganaa kura uwankara wantira Godalawanu tjukaruru nyinanytjaku.

⁵ Uwa, nyura panya Godalawanu nyinanytjikitja mukuringkula nganmanypa palumpa mulamularingu. Munu mulamularingkunyjtjanu nyura uti palya mulapa titutjara nyinama munuya Godaku nintiringama palumpa tjukurku kulu.

⁶ Munuya palumpa nintiringkula walytjangku kulira tjukaruru alatjitu nyinama kutjupangku ngunti wituwitunnyangka kulira wantira. Munuya tungun-tunguntu Godanya waṇanma pakuringkunyjtja wiyangku, munuya palulawanu kutju titutjara palyanyku nyinama.

⁷ Munuya Jesuku walytja tjuṭaku pulkara pukularima munuya uwankaratu mukulya ngaltunytju nyinama.

⁸ Uwa, alatji nyura uti rawa nyinama Godalawanu wiru mulararinytjikitja. Kaya kutjupa tjuṭangku nyuranya wirura tjukaruru nyinanyangka nyakula kulilku, "Ai, mulapa nyanga paluru tjana Mayatja Jesuku ninti nyinanyi, panya paluru tjananya kunpuṇu warka wiru mulapa palumpa palyantjaku." Alatjiya nyuranya nyakula kulilku.

⁹ Palu tjinguru nyura kutjupatjara palu purunypa wirura nyinapai wiya, munuya wiru mulararinytjikitjangku kulintja wiya. Kana kulini nyura kuru pati purunypa watarku nyinanyi, panya nyuranya Godalu kura tjuṭa nganmanytju palyantjitjanguru kalypangku wantingu nyura kura wantira warka wiru tjuṭa kutju palyantjaku. Palu nyura tjinguru ara nyanga palumpa watarkuringu munu panya anangu kuru pati purunypa nyinanyi kulintja wiyatja.

¹⁰ Uwa walytja tjuṭa, mulapa panya Godalu nyuranya ngurkantanu palumpa walytja mulapa nyinanytjaku, ka nyura uti palumpa walytja alatjitu nyinama munu palunya wanganarangku kulilkatima wantinytja wiyangku. Panya alatji nyinara nyura punkantja wiya kunpu titutjara nyinaku.

¹¹ Ka nyara palulanguru Mayatja Jesulu Wankarunkupailu nyuranya ngula pukultu alatjitu katiku ngura wirukutu nyara palula nyuranya titutjarangku wirura kanyintjikitjangku.

¹² Tjukurpa nyanga palumpa panya nyura ninti nyinanyi nganmanytju kulintjatjanu, munu panya nyura rawangku kulilkatinyi. Palu palya, rawangkuṇa nyurala wangkanyi nyura watarkurinytjaku-tawara.

¹³⁻¹⁴ Panya ngayulu ankunytjaku tjintu watalpi ilaringanyi, panya Mayatja Jesuluni nganmanytju tjakultjunu. Kana palulanguru tjukurpa nyangatja wanka nyinaralpi nyurala wangkanyi nyura rawangku kulilkatinytjaku.

¹⁵ Mununa palulanguru nyiri tjuṭangka kulu tjukurpa walkatjunanyi ngayulu ilunyangka nyura nyakula kulintjaku watarkurinytja wiyangku.

Jesunya Witulya Pulka Nyakunytja

16-18 Uwa, panya tjakultjunuṅa nyurala nganmanyatju Mayatja Jesunya Christanya malaku pitjanytja witulya pitalyitji pulka mulapa. Panya nganaṅa walytjangku pinangku kulira wangkanytja wiya, palu nganaṅa mankurtu kurungku nyangu Jesunya puli katu ngaranyangka Mosela pulala Ilaitjala tjungu. Munula ngarala nyan-gangi Mama Godalu Jesunya pitalyitji pulkangku irnyara kanyin-nyangka munula kulinu Godalu ilkarunguru wangkanyangka nyanga alatji, "Nyangatja ngayuku katja, kaṅa palumpa pulkara pukularinyi."

¹⁹ Panya iritiya Godaku wangkatjara tjuṅangku tjakultjunangi wati wiru mulapa mala pitjanytjaku. Kala kuwari Jesunya nyakunytjatjanu tjukurpa panya tjana wangkanytjitjaku pulkara mulamularinganyi.

Ka nyura kulu uti tjukurpa palunya tjananya pulkara kulinma, panya wangkatjara tjuṅangkuya tjukurpa tilitjara tjakultjunangi. Panya tilingku mungawalurungka irnyara utilpai, palu purunypa panya tjukurpa paluru nyurala utiringu, ka nyura utilta kulini. Ka tjukurpa paluru titutjarangku utini ngula Jesunya malaku pitjanytjakutu-wangkaru. Ka paluru pitjanytja nyaa purunypa, panya kililpi Katanya tjitukutu pakalpai kala nyakula kulilpai, "Kuwari tjturinganyi." Nyara palu purunypa Jesunya malaku wirkankunyangka nyakula nganaṅa kulilku, "Panya paluru wirkanu." Kaya nyara palumpa pitjanytjaku paṅara tjukurpa nyanga palunya rawangku kulilkatima.

²⁰⁻²¹ Palu nyangatjaya kulinma, panya wangkatjara tjuṅangku iriti tjana mukuringkula walytjangku kulintjitja nyiringka tjunkunytja wiyatu. Palu Kurunpa Milmilṅu tjanala ungu nintinnyangka kutju tjana wangkangi munu walkatjunangi. Ka nyuntu nganaṅa uwankara kulu palu purunypa nyinanyi, panya Kurunpa Milmilṅu nganaṅanya nintinnyangka kutju nganaṅa Godalu wangkanytja uwankara tjukarurungku kulilpai.

2

Ngunti Nintilpai Tjuta

¹ Palu panya wangkatjara ngunti tjuṅaya iriti nyinangi Godaku anangu tjuṅangka tjungu. Nyara paluru tjana Godalu wituntja wiyatja. Ka palu purunypatu kuwari anangu kutjupa tjuṅa ngunti nintilpai tjuṅa nyuralanguru pakalku munuya tjukurpa kutjupa tjuṅa nyurala wangkara ngunti nintilku tjukurpa Godalanguru wiyatja tjana walytjangku kulintja. Munuya nyuranya ngunti kurara mauntankuku nyura Godalawanu tjukaruru nyinanyangka. Panya Mayatja Jesunya tjanampa ngalkilpa anga-ilungu paluru tjana kura nyinanyangka munu tjananya wankarunu palumpa walytjaringkunytjaku. Palu paluru tjana Jesunya mayatja wiyanmankunyangkampa ngula tjinṅu malatjangka Godalu tjananya pika pulka mulapalta ungkuku.

² Palu Jesuku walytja kutjupa tjuṅaya tjinguru palumpa tjanampa tjukurku mulamularingkuku munuya palula tjanala junguringkula kuraringkuku munuya kuri kutjupa kutjupaku mukuringkula nguntingunti altiku. Kaya nyara palulanguru anangu tjuṅangku tjananya nyakula Godanya anara kuralku wangkara, "Godaku tjukurpa tjukaruru wiya."

³ Panya ngunti wangkapai nyara paluru tjana maniku manyu munuya nyurala ngunti wirura wangkapai palyangku-palku nyura

palunya tjananya mani ungkunyjtaku. Palu panya iritinguru alatjitu Godalu tjananya nyangangi munu kulinigi ngula palunya tjananya pika pulka mulapa ungkunyjtikitjangku.

⁴ Panya iriti angelpa kutjupa tjtjangku Godala pulkara tungunpungu munu kuraringu. Ka Godalu tjananya ngura kurakutu waningu mungawalurungka rawa nyinanyjtaku tjiinangka karpira wantinytja purunypa. Kaya ngura nyara palula rawa patara nyinaku ngula tjintu malatjangka Godalu tjananya kura ngurkantara tjarantjaku munu tjananya pika pulka mulapa ungkunyjtaku.

⁵ Ka ara kutjupa palu purunypa ngarangi, panya Noah-nya nyinanytja-arangka anangu tjtjangku Godala pulkara tungunpungkula kura kutju palyaningi. Ka wati kutjungku Noah-lu arkara tjananya wangkara putu tjukaruruningi Godalawanu tjana tjukaruru nyinanyjtaku. Palu tjana Noah-nya kulintja wiyangku alatjitu wantingi. Nyara palulanguru Godalu tjananya uwankara ngaluringkuwiyangku mina pulkangka iluntara wiyanu, palu Noah-nya munu palumpa walytja tjuta kutju wankarunu anangu panya 8 kutju.

⁶ Kaya piruku kulinma ara kutjupa ngura panya pulka kutjara ini panya Tjatamanya pulanya Kumaranya. Panya iriti tawunu nyara palula pulala anangu winki kura pulkaringu munuya kura kutju titutjarangku palyaningi rawangku. Ka nyara palulanguru Godalu panya waru pulka tjanalakutu iyanu ilkaringuru. Ka tawunu panya palunya pulanya kampara wiyanu alatjitu anangu winki. Nyanga alatji Godalu palyanu anangu ngura winkitjangku kulira nintiringkula kulintjaku, "Munta mulapa Godalu nganannya ngapartji palula tungunpungkunyangka palu purunypatu palyalku."

⁷⁻⁸ Munu nyura uti wati panya Lotanya kulu kulinma, panya wati nyara paluru ngura nyara palulatu nyinangi, Tjatamala. Palu nyara paluru wati palya Godalawanu tjukaruru nyinapai munu panya tjananya kura kutjupa kutjupa tjuta palyannyangka nyakula pulkara tjituru-tjitururingu, panya anangu nyara paluru tjana Godala pulkara alatjitu tungunpungangi. Ka panya Godalu ngura Tjatamanya pulanya Kumaranya waru pulka ilkaringuru iyara uwankara alatjitu wiyanu, palu waru iyantja kuwaripangka paluru Lotanya-wararangkku pakaltjingga iyanu ankula wankaringkunyjtaku.*

⁹ Uwa, tjukurpa nyanga palunya tjananyaya kulinma munuya nyanga tjanalanguru nintiringama nyanga alatji, panya mulapa Godalu anangu tjukaruru nyinapai tjuta kutju wankarunkupai kura kutjupa kutjupa tjuta tjanala utiringkunyangka. Munu paluru kura palyalpai tjuta wantir'iyalpai pika pulkatjara titutjara nyinakatinytjaku tjirirpi malatjakutu-wangkara, panya nyara palula ara paluru tjananya ngurkantara tjaralku munu tjananya pika pulka mulapalta ungkuku.

¹⁰ Panya kutjupa tjaraya Godala pulkara tungunpungkupai nyinanyi munuya tjana mukuringkunyjtaku kutju palyalpai kura kutjupa kutjupa tjuta kutju, munuya kuri walytjatjarangka ngaripai, ngunti wangkapai munuya kanany-kananytju ilkaritja tjuta anara warkipai kuntarinkunyjtaku wiyangku.

* 2:7-8 Genesis 19:1-29

Palu mulapa Godalu tjananya watarkurinytja wiyangku nyan-ganyi ngula tjrirpi malatjangka ngurkantara tjarantjikitjangku munu tjananya uwankara wiyantjaku.

¹¹ Panya angelpa tjtutaya wityula pulka mulapa nyinanyi ngunti nin-tilpai tjtutangka mun kara alatjitu munuya tjinguru tjananya uwankara anara warkinyangka wantir'iyalku. Palu wiya, tjana alatji palyal-wiyangku wantipai, panya nyara paluru tjanaya Godala mirangka ngaranya munuya paluru tjana ngurkantara tjaralpai wiya.

¹² Panya ngunti wangkapai tjtutangkuya putu kulilpai munuya kutjupa kutjupa tjtuta watarkungku alatjitu palyalpai tjukarurungku-palku. Munuya kutjupangku tjukurpa wiru wangkanyangka putu kulira analpai alatjitu. Paluru tjana kuka tjtuta purunypa nyinanyi, panya kuka tjtuta watarku para-ngarapai pungkula ngalkuntjaku kutju. Palu purunypatu anangu ngunti wangkapai tjtuta para-ngarapai, ka kuka purunypa tjananya pungkula wiyalku.

¹³ Panya tjana kura kutju palyalkatinyi, ka Godalu ngapartji tjananya paira iyalku ngura kurakutu pika pulkatjara titutjara nyinanytjaku.

Panya anangu nyara paluru tjana pulkara pukularinytjikitjangku tjana mukuringkunyjtjtja kutju rawangku palyalpai munuya kalala alatjitu anangu tjtutangka mirangka mai pulka tjunguringkula ngalkula tjikira tarangkarira mirapai kunta wiya alatjitu. Tjana nyurala maiku palya-palku tjunguringkula pulkara ngalkula tjikilpai ka panya nyura tjananya nyakula pulkara kuntaringkupai tjana kura tjtuta rawangku palyannyangka.

¹⁴ Munuya kungka kutjupa tjtuta titutjarangku nyakula mukuringku-pai tjanala ngarinytjiktja munuya pakuringkula wantinytja wiyangku titutjarangku kura kutju palyalpai. Munuya Jesuku walytja kutjupa tjtuta kunpu wiya ngaranyangka tjananya wituwitulpai piruku kura palyantjaku munu Godalanguru paturingkunyjtjaku. Panya tjana mukuringkula palyalpai tjana mukuringkunyjtjtja tjtuta kutju. Ka nyanga palulanguru Godalu tjananya pungkuku.

¹⁵ Panya tjana Godaku iwara tjukaruru wantira kawankatingu munuya Pailamaku arangka ngaranya. (Wati nyara paluru panya Piiyaku katja.) Panya nyara paluru manikitjangku pukultu kura palyanu.

¹⁶ Wati nyanga paluru panya Godaku wangkatjara nyinangi, palu palumpa tangkiyingku palula wangkangu munu palunya painu kura panya palunya palyalwiyangku wantinytjaku.

¹⁷ Uwa, panya wangkatjara ngunti wangkapai tjtutaya kapi tjukula pilti purunypa ngaranya, panya anangu tjtuta pitjapai tjanala tjukurpa kulintjikitja, palu putuya tjukurpa mantjilpai tjanalanguru. Munuya paluru tjana ngangkali kapi wiyatjara purunypa ngaranya, panya walpa pulkangku untulpai ka mapalku wiyaringkupai, nyara palu purunypa tjana nyinanyi tjukurpa wirura wangkanytja wiya. Ka Godalu tjananya kalkunu mungawalurungka alatjitu tjana titutjara nyinanytjaku maru mulata.

¹⁸ Panya tjana kanany-kananytju kurakura tjtuta titutjarangku wangkapai. Munuya anangu kuwari kutju Jesuku walytjaringkunyjtja tjtuta wangkara mukumulkpai paluru tjana piruku kura panya palunya tjananyatu palyantjaku, panya tjana nganmanytju Jesuku

walytja wiyangu palyanangi, panya palunya tjananya palyantjaku tjananya piruku wituwitulpai.

¹⁹ Munuya tjanala alatji wangkapai, ngunti panya wangkapai tjutangu, "Palya, nyura mukuringkulaya palyanma, nyura mukuringkunyjtija tjuta kutju." Alatji tjana wangkapai, palu paluru tjana putu palyanyku nyinapai munuya tjana kura tjuta kutju palyalpai tjana kuraku mukuringkunyjtija kutju. Panya kutjupa tjuta tjailangka unngu nyinapai kura palyantjatjanu munuya putu pakani tjailanguru, palu purunypa anangu kura palyalpai tjuta putu kuranguru pakalku.

²⁰ Panya nganmanypa tjana Godaku wangkatjara nyinangi Jesuku walytja munuya kura tjuta wantingu alatjitu Godalanguru paturingkunyjtaku-tawara. Panya tjana nintiringu Mayatja Jesuku Christaku nganampa panya Wankarunkupaiku. Palu palula malangkaya piruku kuraringkula kurangka anu, ka kurangu tjananya tjiinangka purunypa karpira kanyini. Ka nganalu tjananya wankalku? Wiya alatjitu.

²¹ Panya tjana Tjukurpa Palyaku nintiringkunyjtjanu kurakutu malaku anu, ka tjanampa wankaringkunyjtaku wiyaringu alatjitu. Anangu watarkitja tjuta iwara palyaku ngurpa nyinanyi, ka ala alatjitu ngaranyi paluru tjana kulira mulamularingkunyjtaku munu wankaringkunyjtaku. Palu nyanga paluru tjana ngurpa wiya ninti nyinanyi nganmanypa Jesuku walytjaringkula, munu panyaya iwara palya wantira Godaku tjukurpa milmilpa kulira wantingu alatjitu, munuya kurakutu malaku anu.

²² Panya nyiringka ngaranyi tjukurpa palu purunypa anangu tjutangu wangkanytja nyanga alatji,

"Papangu ulkatjungkula wantikatipai munu piruku malakungku pitjala ulkapa panya palunya tu ngalkupai." *

Ka palu purunypa tjukurpa kutjupa alatji ngaranyi,

"Panya pikipiki paltjinnyangka wirtjapakara tjuipirta malaku tjarpara kutinkatira piruku kuraringkupai."

Ka ngunti wangkapai tjuta nyanga palu purunypa ngaranyi, panya tjana Jesuku walytjaringkula iwara palyangka anangi, palu paluru tjana iwara palya wantira malaku kurakutu anu, panya papa munu pikipiki purunypa.

3

Jesunya Malaku Pitjanytja

¹ Uwa walytja wiru tjuta, ngayulu pulkara mukuringanyi nyura tjukarurungku kutju kulintjaku pina alangu. Panya ngayulu alatji nyuranya wangkara wituwitunu lita panya nganmanyitjangka, panya ngayulu mungatu nyurampa walkatjura ma-iyanu, panya palula. Munu nyangana kuwari piruku tu nyurampa walkatjunanyi nyura rawangku tjukarurungku kutju kulintjaku.

² Panyatjaya rawangku kulinma, panya Godaku wangkatjara tjutangu iriti wangkangu ngula utiringkunyjtaku, munuya piruku kulinma tjukurpa panya Mayatja Jesulu palumpa iyantja tjutangka wangkanytja, panya paluru tjana nyurala nganmanytju jakultjunu.

* 2:22 Proverbs 26:11

³ Munuya panyatja rawangkuṭu kulinma, panya Jesunya maḷaku pitjanytjaku ilaringkunyangka anangu analpai tjuṭa utiringkuku munuya tjana walytjangu kulira kutjupa kutjupa kura tjuṭa palyalku tjananku mukuringkunyitja kutju. Munuya paluru tjana nyuranya Jesuku mulamularingkunyangka wiyanmarā wangkaku alatji,

⁴ “Mulapa wanyu Jesulu kalkunu maḷaku pitjanytjikitjangku? Ka nyangatja wiyatu ngaranyi. Panya mamanya ngunyitjunya tjana puṭu patara patara ilungu. Ka nyanga manta ilkari kulu palurutu alatjitu ngaranyi wiyaringkunyitja wiya, panya Godalu nganmanyitju palyara wantinyitja alatjitu.”

⁵ Alatji tjana nyuranya anara wangkaku, palu paluru tjana kura ngunti wangkapai tjuṭa. Panya anangu nyanga palu purunypa tjuṭangkuya tjukurpa panya Godalu paluntjitja kulira wantingu mulamularingkunyitja wiyangku. Panya Godalu wangkanyangka ilkari utiringu munu paluru wangkanyangkaṭu manta utiringu uru kutju ngarinytjatjanu.

Uwa, paluru manta utiringkunyitjaku wangkangu, ka panya urunguru pakanu.

⁶ Ka panya ngulalta Godalu mina pulka iyara mantatja uwankara uru pulkangka iluntanu anangu nganmanyitja tjuṭa kulukulu.

⁷ Palu kuwari wanyu Godalu manta ilkari kutjupa kutjupa uwankara nyaalku? Wiya, paluru tjananya patara kanyini tjiṅtu maḷatjaku panya nyara palula arangka paluru tjananya uwankara palu purunypaṭu wangkaku, ka wangkanyangka warungku kampara wiyalku alatjitu. Munu paluru anangu kura uwankara ngurkantara tjaralku munu tjananya wiyalku.

⁸ Uwa walytja tjuṭa, kulinmaya nyangatja watarkuriwiyangku, panya Mayatja Jesulu kampa kutjupa kulilpai nganana purunytju wiya. Panya nganana kulilpai kuḷi 1,000 rawa mulapa ngaranyangka, palu Mayatja Jesulu kulini nyara paluru rawa wiya tjiṅtu kutju purunypa. Kala nganana kulilpai tjiṅtu kutju rawa wiya, palu Mayatja Jesulu kulini tjiṅtu paluru rawa mulapa kuḷi 1,000 purunypa. Alatji paluru wityula pulkangku kulilpai.

⁹ Tjinguru nyura kulini Jesunya rawa ma-nyinanyangka-palku, munu nyura palulanguru kulini paluru ngunti kalkuntja-palku pitjanytja wiya ngaranyangka nyakula. Palu wiya, paluru anangu uwankaraku ngaltunytjungku rawangku patani tjana uwankarangku kura wantira Godalakutu aruringkunyitjaku. Palu wiyangkampa tjiṅtu maḷatjangka paluru tjananya ngurkantara tjaralku munu tjananya wiyalku, panya paluru ngaltunytju pulka tjanampa mukuringanyi kura wantira palunya kulira wanantjaku. Palulanguru paluru rawaringkula ma-nyinara patani mapalku pitjanytja wiya.

¹⁰ Panya ngula Mayatja Jesunya urulyku wirkankuku, panya wati kutitjunkturpai walingka tjarpanyangka nyuntu urulyarpai, palu purunypa. Ka tjiṅtu nyara palula ilkari wiyaringkuku rurku winki. Panya tjiṅtu, pira, kililpi, manta winki uwankara warungku kampara urulku ka wiyaringkuku alatjitu.

¹¹⁻¹² Uwa, uwankara alatjitu warungku kampara wiyalku manta kulukulu, ka pala palulanguru nyura uti Mayatja Jesunya maḷaku pitjanytjaku patara tjakaruru nyinama Mama Godalawanu kutju, ka

paluru tjinguru mapalku pitjaku. Ka tjintu nyara palula Godalu uwankara waru pulkangka wiyalku, ka tjintu pira kililpi tjuta kulukulu uwankara waruringkula ururingkula wiyaringkuku. ¹³ Palu palya, panya Godalu kalkunu manta kuwaritja munu ilkaru kuwaritja kulu nganampa palyantjikitjangku, kala palumpa ala-ala patara nyinanyi. Panya ngura nyara palula anangu uwankarangku Godala wangararangku kulilku munu tjukaruru nyinaku titutjara.

¹⁴ Uwa walytja tjuta, nyura tjintu nyara palumpa ala-ala patarampa tjukaruru palyanyku nyinama kura kutjupa kutjupa uwankara wantira. Ka nyuranya Jesulu pitjala nyakuku Godalawanu kutju wirura kurunpa rapa pukulpa nyinanyangka.

¹⁵ Munuya panyatja kulinmatu, panya Mayatja Jesunya rawaringkula kuwaripatu nyinanyi anangu tjuta palumpa mulamularingkula wankaringkunyjtaku patara. Tjukurpa nyangatja panya nganampa kutja panya wirungku Paulalu nganmanytju nyurampa walkatjuru Godalu nintinnyangka.

¹⁶ Panya paluru lita tjuta walkatjura iyaningi Jesuku walytja tjutakutu, munu lita panya palula tjanala uwankarangka tu tjukurpa palunya tu walkatjunangi. Ka tjukurpa kutjupa tjuta lita tjutangka wituwitu nguwanpa ngaranya. Ka panya Jesuku walytja kutjupa tjuta kunpu wiya ngurpa ngaranya, munuya tjukurpa wituwitu panya palunya tjananya putu kulira ngunti kampa kutjupara wangkapai, panya palu purunypa, panya tjana Moseku tjukurpa kulu ngunti kampa kutjupara wangkapai, palu purunypa. Nyara palulanguru panya Godalu tjananya tjintu malatjangka paira iyalku pika pulkatjara titutjara nyinanytjaku.

¹⁷ Palu walytja tjuta, nyura panya nyangaku nganmanypa nintiringu. Palulanguruyanku ngulu nyangama munuyanku atunymanama anangu kura tjutangka nyuranya ngunti kurara iwara kurangka katinytjaku-tawara. Panya paluru tjana Godaku tjukurta tungunpungkula iwara kurangka ananyi munuya tjukurpa ngunti tjuta kulira wangkapai. Ka nyura tjanala kulira wantima Godalanguru paturingkunyjtaku-tawara. Panya Godalu nyuranya wankaru kanyini nyura palula tjungu nyinanyangka.

¹⁸ Uwa, titutjarangkuya Mayatja Jesunya Christanya wananna, panya paluru nganampa wankarunkupainya nyinanyi ngaltunytju pulkana. Munuya titutjara palumpa nintiringama.

Uwa, wanyula palunya titutjarangku mirawanira walkunma wantinytja wiyangku. Uwa mulapa.

Alatjituña walkatjuru. Palya.

Lita Nampa 1 Johntu Walkatjunkunyja 1 John Nyangatja Nganmanytju Nyakula Wangkanytjaku

Nyangatja Godaku tjukurpa wati panya Johntu walkatjunkunyja Jesuku panya malpangku. Paluru nganmanytju nyiri kutjupangka walkatjunu tjukurpa Jesunya mantangka nyinanytja munu paluru ilunyitja munu ilunyitjanu pakantja, (nyawa *Johnku Tjukurta*). Munu palulanguru paluru piruku walkatjunu lita mankurpa Jesuku walytja tjutaku.

Ka nyangatja lita nganmanyitja, panya nyanga palula paluru wangkara kunpu-kunpuningi Jesuku walytja tjuta tjukaruru palyanyku nyinanytjaku munu tjukurpa mulaku Jesunyatjaraku nintiringkunyitjaku munu uwankaraku mukulya pulka nyinanytjaku. Munu paluru tjananya wangkangi watarkuriwiyangku rawangku kulintjaku panya Godaku katja ananguringu munu mantangka wati alatjitu uti nyinangi anangu tjutangka tjungu.

Munu nyanga palula malangka Johntu lita kutjupa kutjara walkatjunkunyitjanungku piruku kutjulta wara mulapa walkatjunu tjukurpa malatja ini *Tjukurpa Jesulu Johnta Utira Nintintja*.

Tjukurpa nyanganpa ngarinyi:

1:1-4 Jesunya tjukurpa wankanya

1:5—2:29 Tilingka munu mungawalurungka nyinanytja

3:1-24 Godaku katja untalpa tjuta mukulya nyinanytjaku

4:1-6 Kurunpa tjuta tjukarurungku ngurkantankunyitjaku mamungka-tawara

4:7-21 Godanya purunypa mukulya pulka nyinanytjaku

5:1-21 Godaku katjaku mulamularingkula wanka titutjara nyinanytja

Tjukurpa Wankanya

¹ Nyangatjana walkatjunanyi tjukurpa wankanya panya anangu tjuta wankarunkupainya. Paluru kuwaripatjara mulapa nyinanytja manta kuwaripangka munu panya mantakutu pitjala utiringu. Kala nyangu palunya munula kulinu munula pampunu.

² Paluru anangu tjuta wankalpai pitjangu munu utiringu Godalanguru. Kala palunya nyakunyitjanungku tjakultjunanyi. Panya paluru wanka titutjara nyinapai palumpa Mamangka tjungu munu panya mantakutu pitjala nganana utiringu.

³ Kala nganana nyakunyitjanungku kulintjanungku nyurala tjakultjunanyi munu anangu uwankarangka kulu, nyura nganana tjunguringkula Mamala munu palumpa katjangka Jesula Christala tjungu pukulpa nyinanytjaku.

⁴ Uwa, lita nyangatjana walkatjunanyi nyura nyakula mulamularingkula nganana uwankaratu pukulpa mulapa nyinanytjikitjangku.

Godanya Tili Nyinanyi

⁵ Tjukurpa nyangatjala Jesula kulintjatjanungku nyurala ngapartji tjakultjunanyi alatji, panya Godanya tili irnyani wiru mulapa, ka palula mungawaluru kura ngaranytja wiya alatjitu.

⁶ Ka nganaṅa tjinguru alatji wangkapai, “Nganaṅa Mamala tjungu pukulpa nyinanyi.” Palu nganaṅa kura tjuṅa palyarampa mungawalurungka nyinanyi, munula ngunti wangkanyi Mamala tjungu pukulpa nyinanytja. Nganaṅalanku tjukarurunmananyi, palu wiya, nganaṅa tjukaruru nyinanytja wiya.

⁷ Panya Godanya tilingka nyinanyi wiru mulapa. Kala nganaṅa tjinguru palu purunypa tilingka nyinarampa wirura nyinaku munulanku pukulpa kalypa nyinaku. Ka nganaṅa kura palyannyangkampa Godalu nganaṅanya palyalku Jesuku milkalangka, panya paluru nganampa kuranguru anga-ilura milkali tjutinytjatanguru.

⁸ Palu nganaṅalanku walytjangku kura wiyamankulampa ngunti wangkanyi. Ka nyangatja tjukaruru wiya.

⁹ Palu nganaṅa kuntaringkula Godala kura palyantjatjanungku walytjangku tjakultjunksyangka kutju Godanya nganampa kalyparingkuku munu nganaṅa kura palyantjatanguru kalypangku pungkuwiyangku wantiku, panya palurulanya nganmanytju kalkunu kuranguru kalypangku wantinytjikitjangku, munulanya kalkuntjatjanungku nganampa paluru palyalpai alatjitu.

¹⁰ Palu nganaṅa tjinguru walytjangku kura wiyamankulampa Godanya anani. Munula palumpa tjukurpa tjukarurungku kulintja wiyangku wantinyi.

2

Christalulanya Alpamilpai

¹ Uwa, walytja wiru tjuṅa, tjukurpa nyangatjana walkatjunanyi nyura kulira kura wiya alatjitu nyinanytjaku. Palu tjinguru nyura kura palyarampa kulinma panyatja, panya nganampa ngalkilpa nyinanyi Jesunya Christanya, panya paluru tjukaruru nyinapailu Mamala angawangkapai nganampa ngalkiltu.

² Ka nyara palulanguru Godanya nganampa kalyparingkupai Christanya nganampa ngalkilpa ilunytjatanguru. Panya paluru kura nganampanguru kutju ilunytja wiya anangu winkiku kuranguru ilungu.

³ Nganaṅa tjinguru Godalu wituntjita uwankara wanganarangku kulira palyantjatjanungku nintingku kulilku, “Mulapa ngayulu Godaku ninti nyinanyi.”

⁴ Palu tjinguru kutjupangku Godala wanganarangku kulintja wiyangku wantira palu purunypatu wangkaku, “Ngayulu Godaku ninti.” Nyara palurunku ngunti nintinmananyi Godaku. Ka palatja tjukaruru wiya.

⁵ Palu kutjupangku Godala wanganarangku kulira palyara kutju Godaku pulkara mulapa mukuringanyi. Uwa, nyanga palulangurula kulini panya nganaṅa mulapa palumpa walytja nyinanyi.

⁶ Palu tjinguru nganaṅanku Godaku walytjanmankula uti Jesunya Christanya purunypa alatjitu nyinama.

Wituntja Kuwaritja

⁷ Walytja wiru tjuta, ngayulu nyurampa walkatjunanyi mununa nyuranya wituwituni nyuranku mukulya nyinanytjaku. Palu wituntja nyanga paluru kuwaritja wiya, palu tjukurpa irititja, panya nyura kuwaripataranguru alatjitu kanyiningi munu kuliningsi.

⁸ Palu tjukurpa nyanga paluru kuwaritja nguwanpa ngaranya, panya Christalu nganana pulkara nintinu tjukurpa nyanga palunya nganana pulkara mulapa unngu kulintjaku. Panya Christalu tilingku irnyara utinu tjukurpa nyanga palunya, ka palulanguru mungawaluru ma-wiyaringanyi panya paluru tili pulka irnyara ngaranyangka.

⁹ Ka tjinguru kutjupangku wangkanyi, "Ngayulu tilingka ngaranya, Godaku walytja." Palu nyara paluru Jesuku walytja kutjupaku kuraringkulampa mungawalurungka ngaranya munu ngunti wangkanyi tilingka ngaranytja.

¹⁰ Palu nganana kutjupa tjutaku mukulya nyinarampa tilingka titutjara nyinanyi. Ka nganana alatji nyinanyangka Jesuku walytja kutjupa tjutangku nyakula punkantja wiya nyinaku.

¹¹ Palu nganana Jesuku walytja kutjupaku kuraringkulampa mungawalurungka titutjara nyinanyi munula mungawalurungka ananyi panya kuru patingku putu nyanganyi iwarangka tjukaruru ankunytjikitjangku, palu purunypa.

¹² Uwa tjtji tjuta, lita nyangangka nyurala tjakultjunanyi panya nyura kura palyantjijanguru Godalu nyuranya pungkunytjaku ngaranya, palu Christanya nyurampa ngalkilpa ilunytjijanguru paluru nyuranya kaly pangku wantingu.

¹³ Ka wati minyma tjuta, lita nyangangka nyurala kulu tjakultjunanyi panya nyura ninti Godaku kuwaripatjara nyinanytjitjaku.

Ka wati yangupala tjuta munu kungkawara tjuta, nyangatjana nyurala kulu tjakultjunanyi panya Godalu nyuranya kunpu, ka mamungku nyuranya arkannyangka nyura kulira wantipai alatjitu.

¹⁴ Uwa tjtji tjuta, nyura panya Mamaku ninti nyinanyi. Ka wati minyma tjuta nyura kulu ninti Godaku kuwaripatjara nyinanytjitjaku. Ka wati yangupala tjuta munu kungkawara tjuta, nyura panya kunpu rapa mulapa nyinanyi Godaku tjukurpa mulamulangku kulira, munu mamungku nyuranya mukumukunnyangka nyura kulira wantipai alatjitu.

¹⁵ Uwa, nyura uwankarangku kutjupa kutjupa mantatja tjutaku mukuringkunytja wiyangku wantima. Munuya kulinma panya mantatjaku mukuringkula anangu mantatja kulilpai tjutangka tjunguringkula nyura Mamaku kuraringanyi munu palumpa mukuringkunytja wiya nyinanyi.

¹⁶ Panya mantatja kulilpai tjutangkuya walytjangku unngu kulira nyanga alatjiripai panya tjana walytjatjaraku mukuringkupai, munuya kutjupa kutjupa wiru tjutaku nyakula manyuringkupai, munuya walytjangku kulira kanany-kananyaripai. Palu Godalu tjananya alatji nyinanytjaku nintintja wiya alatjitu.

¹⁷ Ka ngula manta wiyaringanyi munu tjana mukuringkunytja uwankara kulu. Kaya Godaku tjukurpa wanganarangku kulira palyalpai tjuta kutju wanka titutjara nyinaku wiyaringkunytja wiya.

18 Uwa, walytja tjuṭa, kuwari nguwanpa Christanya malaku pitjaku, ka manta ilkari wiyaringanyi. Ka nyura panya nganmanytju kulinu Christaku mirpantju utiringanyi. Palu nganmanypa wirkanu ngura uwankarangka Christaku mirpantju tjuṭa. Kala palunya tjananya nyakula nintingu kulini panya tjiṅtu maṭatja waṭalpi wirkananyi.

19 Panya Christaku mirpantju tjuṭaya ngunti palumpa walytja purunypa ngananaḷa tjuṅuringkula nyinangi. Munuya tjukutjuku nyinara ngananaḷanya wantikatira anu. Tjinguruya Christaku walytjampa ngananaḷa nyinama, palu wiya tjana anu. Ka nyara palulanguru nganaḷa uti alatjitu kulini panya tjana ngananaḷa tjuṅutja wiya.

20 Palu nyura tjananya purunypa wiya, panya Christalu nyuralakutu Kurunpa Milmiṅga iyaṅu, ka paluru nyurala tjarpara unngu nyinanyi. Palulanguru nyura uwankarangku nintingu kulini tjukurpa tjukururu.

21 Palu tjinguru nyura kulini ngayulu nyurampa walkatjunanyi nyura tjukurpa tjukururu ngurpa nyinanyangka. Palu wiya, nyura ninti. Kaṅa nyangatja nyurampa walkatjunanyi nyura ninti nyinanyangka. Ka nyura nintinkutu kulini panya kutjupangku tjukurpa tjukururu wangkara tjukurpa ngunti tjuṭa puṭu tjuṅuni tjukurpa tjukururungka.

22 Ngananya wanyu ngunti wangkapai? Wiya, panya paluru, panya Godalu Jesunya iyantjanya wiyamankupai. Anangu nyara paluru Christaku mirpantju munu Mamanya pulanya Katjarara wantipai.

23 Panya Katjanya wantirampa Mamanya kulu wantinyi, palu katjaku mulamularingkula Mamaku kulu mulamularinganyi.

24 Uwa, rawangkuya kulinma tjukurpa palya panya nyura nganmanytju kulintjanya, munu nyura palunya kulintjatjanu Katjala Mamala kulu titutjara tjuṅu nyinaku.

25 Panya Christalulanya nganmanytju kalkuṅu palula tjuṅu wanka titutjara nyinanytjaku.

26 Nyangatjana nyurampa walkatjunanyi nyuranya angapaintjikitjangu, panya anangu kutjupa tjuṭangu nyuranya ngunti wituwitulku kutjupa kutjupa tjuṭawanungku palyantjaku. Kaya kulira wantima tjanampa mulamularingkunytja wiyangu.

27 Panya Christalu Kurunpa Milmiṅga nyurala unngu tjarpatjunu. Ka nyura palumpa kurunpa kanyintjatjanungku tjanala piruku kulin-tja wiyangu wantima. Panya Christaku kuruntu nyurala alatjitu tjukurpa uwankara nintini tjukururungku. Kaya wanganarangku kulira palyanma munu Christala tjuṅu alatjitu nyinama.

28 Uwa walytja wiru tjuṭa, Christalaya tjuṅu nyinama munu nyura kuṅta wiyangu kurunpa rapangku paluru pitjanyangka nyakuku tjiṅtu maṭatjangka.

29 Nyura panya nintingu kulini Christanya tjukururu nyinapai. Nyara palulanguruya kulinma panya tjukururungku palyalpai tjuṭa Godaku katja unṭalpa nyinanyi.

3

Godaku Katja Unṭalpa Tjuṭa

1 Palu nyangatjaya kulinma, panya Godanya nganampa mukulya pulka mulapa nyinanyi, munulanya katja unṭalpanmara kanyini.

Kala mulapa palumpa katja unṭalpa nyinanyi. Kaya mantatja kulilpai tjuṭangku nganannya puṭu tjukarurungku kulilpai, panya Godanyaya puṭu kulilpai munuya wantipai. Palu purunypaya nganannya puṭu ngurkantananyi. ² Walytja wiru tjuṭa, kuwari nganana Godaku katja unṭalpa nyinanyi munula ngula nyaaringkuku? Wiya, nganana ngurpa panya Godalu nganana wangkanytja wiyatu. Palu tjukurpa nyangaku kutjula ninti, panya ngula Christanya malaku pitjanyangka nganana palu purunyariku palunya yunpa ilangku nyakula.

³ Uwa, nyangatjala rawangku kulini Christanya purunypa ngula nyinanytjikitjangku, munula palulanguru mantangka nyanga patara nyinara arkara wirura nyinanyi Christanya wirura nyinanytja purunypa.

⁴ Anangungku kura palyara Godaku tjukurpa kurani.

⁵ Ka nyura nitingku kulini panya Christanya pitjangu nganampa ngalkilpa munu nganana kura palyantjitjanguru anga-ilungu Godalu nganannya kalypangku pungkuwiyangku wantinytjaku. Palu Christanya kura wiya alatjitu.

⁶ Ka anangumpa Christala tjungu nyinara kura rawangku palyantjaku wiyaringu. Palu tjinguru kutjupangku kura kutju alatjitu titutjarangku palyalkatira nyara paluru Christanya kulira alatjitu wantinyi munu palumpa ngurpa nyinanyi.

⁷ Walytja wiru tjuṭa, kutjupa tjuṭangkuya kura titutjarangku palyani munuyanku palyanmankupai. Ka nyura tjinguru tjanala kulira palumpa tjanampa mulamularingkuku, palu wantimaya panya tjana ngunti wangkapai. Panya anangungkumpa tjukarurungku palyara nyara paluru Christanya purunypa nyinanyi tjukaruru mulapa.

⁸ Palu panya kura palyalpai tjuṭa mamuku tjitji tjuṭa nyinanyi, panya mamu paluru kuwaripatjaranguru alatjitu kura palyalkatingi, kaya palumpa tjitji tjuṭangku palu purunypatu palyani. Palu Godaku Katja panya pitjangu mamungku palyantjitja uwankara wiyantjikitja.

⁹ Ka anangumpa Godaku walytja nyinara kura titutjarangku palyantja wiya nyinapai Godanya kurunpa palula unngu nyinanyangka. Anangu nyara paluru kuraku mukuringkunyitja wiya nyinanyi Godanya palumpa Mama nyinanyangka.

¹⁰ Uwa, nyangangurula ngurkantananyi nganannya tjana Godaku tjitji tjuṭa nyinanyi munu nganannya tjana mamuku tjitji tjuṭa nyinanyi. Panya mamuku tjitji tjuṭangku tjukarurungku palyalpai wiya, munuyanku kalypa mukulya nyinapai wiya. Nyara paluru tjana Godaku tjitji wiya tjuṭa.

Mukulyaya Nyinama

¹¹ Ka panya nyura tjukurpa nyangatja kuwaripatjaranguru kulinu nyanga alatji ngananalanku uti Godaku walytja uwankaraku kalypa mukulya nyinama.

¹² Utila wati panya Kainnga arkalwiyangku wantima panya paluru mamuku walytja nyinara palumpa malannya pungkula iluntanu. Palu nyaanguru wanyu Kaintu iluntanu? Wiya, kura palyantjatjanungku palumpa malanytju wiru palyannyangka nyakula pungkula iluntanu.

¹³ Walytja tjuṭa kulilaya, mantatja kulilpai tjuṭa nyurampa kuraringkunyangkampa alatji kulinma, "Nyangatjaya tjaka panya nganampa kuraringanyi."

14 Panya nganana tjana purunypa wiya, kutjupa nguwanpa munula Godaku walytja uwankaraku mukulya kalypa nyinanyi. Panya ngananyapa nganampa ilunytjaku ngarangi, palu kuwari nganana wankaringkulalta iwara palyangka ananyi wankakutu. Ka nyara paluru tjana mukulya wiya nyinara iwara kurangka ananyi ilunytjakutu titutjara kurangka nyinara.

15 Palu ngananya tjana walytja tjutaku kuraringkupai Godaku panya walytja kutjupa tjutaku? Nyara paluru tjana miriputju purunypa nyinanyi. Ka nyura ninti panya miriputju tjuta Godala tjungu wanka titutjara nyinanytja wiya.

16 Palu nyaa wanyu nyanga mukulya kalypa nyinanytja? Wiya, panya Christalunku ungu puntu walytjangku nganampa ngalkiltu munu anga-ilungu. Nyanga paluru mukulya mulapa. Kala uti palu purunypa Godaku walytja kutjupa tjutaku ngalkilarira iluma tjana ilunytjaku-tawara.

17 Tjinguru wati kutjupa Godaku walytja mani pulkatjara mantara wiru tjutatjara nyinanyi, munu paluru Godaku walytja kutjupa palatjatjiratja mantara wiya nyinanyangka nyakula wantinyi. Munu yaaltji-yaaltjingku paluru walytjangku palurunku Godaku mukuringkunjtanmananyi? Wiya palatja ngunti wangkanyi. Uti paluru Godaku mukuringkulampa anangu ngaltutjara ungama.

18 Kala wanyu ngunti winpinpingku wangkawiyangku wantima munula mulamulangku mukulyangku palyanma anangu kutjupa tjutaku ngalturingkula.

19 Uwa, nganana mukulya mulapa nyinara alatji tjakarurungku kulilpai, "Godaku tjukurpa tjakaruru mulapa, kala nganana mulamularingkula Godaku walytja mulapa nyinanyi." Alatji kulirala Godala kurunpa rapangku wangkapai nguluringkunyitja wiyangku.

20 Palu kutjupa-ara tjinguru nganana kura kutjupa kutjupa palyantjatjanu Godala mirangka rapa wiya ngarala kuntarangkupai munula kulilpai, "Kuranatju nyinanyi." Palu utila wantira wantara kulinma alatji, "Munta, Godanya ngayuku ninti nyinanyi, ngayulu kulintjitja uwankaraku kulu. Paluru nitingku kulini panya ngayulu palumpa walytja tjutaku mukuringkunyangka. Wanyu kanatju kurunpa rapariwa."

21 Walytja tjuta, utila Godala mirangka kunta wiya ngaralampa palula ilaringkula rapangku wangkama nguluringkunyitja wiyangku.

22 Ka nganana kutjupa kutjupaku tjapinnyangka paluru nganananya unkkuku. Panya nganana palula wanganarangku kulira palyalpai munu palunya pukulmankupai. Nyara palulanguru paluru nganananya tjapinnyangka unkkupai.

23 Panya Godalu nganananya wangkangu nyanga alatji, "Ngayuku katjakuya Jesuku mulamularingama, munuya palumpa walytja tjutaku mukulya kalypa nyinama." Nyangatja panya Jesulu kulu nganana wankangu palumpa walytja tjutaku pulkara mukuringkunyitjaku.

24 Ka nganana paluru wangkanyangka kulira tjakarurungku palyarampa palula tjungu mulapa wankaru nyinaku. Ka paluru ngapartji nganana tjungutu nyinaku. Panya paluru palumpa

kurunpa nganana unngu tjarpatjunu, ka nyara palulanguru nganana nintingku kulini, "Mulapa Godanya tjungu nyinanyi nganana."

4

Kurunpa Tjuta Ngurkantankunytjaku

¹ Uwa walytja wiru tjuta, kulinmaya panya kutjupa tjutangkuya wangkapai alatji, "Ngayulu Godaku kurunpatjarangku tjukurpa wangkapai." Ka nyura warpungkula mulamularingkuwiyangku wantira Godala-warara tjapinma alatji wangkara, "Mulapa nyangantu nyuntumpa kurunpatjarangku tjukurpa wangkanyi, munta kurunpa kutjupatjarangku?" Alatjiya Godala tjapira kulinma panya wangkatjara ngunti tjuta nganmanypa ngura winkingka wirkanu, munuya tjukurpa kampa kutjupara ngunti wangkapai Godaku tjukurnguru.

² Panya wati Godaku kuruntjarangku tjukarurungku wangkapai alatji, "Jesunya Christanya puntu nganananya purunypa nyinangi manta nyangangka." Ka nyanga palunya wangkanyangka kulintjatjanungku nyura alatji kulinma, "Munta-uwa, nyanga paluru Godaku kuruntjarangku tjukarurungku wangkanyi."

³ Ka tjinguru kutjupangku wangkaku nyanga alatji, "Wiya, Jesunya anangu nganananya purunypa nyinanytja wiya manta nyangangka." Ka nyanga palunya wangkanyangka kulintjatjanungku nyura alatji kulinma, "Wiya, nyanga paluru Godaku kuruntjarangku wangkanytja wiya, mamuku kuruntjarangku wangkanyi Christaku mirpantjungku." Panya nyura nganmanytju kulinu anangu nyanga palu purunypa tjuta ngula anangu tjutangka utiringkuku Christaku mirpantju tjuta. Palu panya tjana nganmanypa utiringu munu kuwari nyangaya anangu tjutangka nyinanyi manta winkingka.

⁴ Ka walytja wiru tjuta, nyura panya Godaku walytja tjuta nyinanyi munu palulanguru nyura mamutjara tjutaku putu mulamularingkupai, panya nyura Godaku kurunpa kanyini witulya pulkanya mamungka munkara mulapa. Ka mamutjara tjutangu nyuranya putu kurani.

⁵ Nyara paluru tjana tjukurpa mantatja kutju wangkapai, kaya anangu mantatjaku mukuringkupai tjutangu tjanala kulilpai.

⁶ Ka nyuntu nganana Godaku walytjapiti nyinanyi. Kaya Godaku ninti tjutangu nganana kulilpai. Palu Godanya wantipai tjutangu nganana kulintja wiyangku wantipai. Nyara palulangurula anangu tjuta tjukarurungku ngurkantanytja tjana kulinnyangka munu tjana wantinyangka. Panya mamuku kuruntjarangku ngunti wangkapai alatji, "Jesunya anangu nganananya purunypa nyinanytja wiya." Palu panya Godaku kuruntjarangku tjukarurungku kutju wangkapai alatji, "Jesunya nganananya purunypa nyinangi anangu alatjitu."

Godanya Purunypa Mukulya Pulka Nyinanytjaku

⁷ Uwa, walytja wiru tjuta, uti nyuranku pulkara mukuringama, panya mukulya nyangatja Godalanguru utiringu. Ka ngananalanku pulkara mukuringkula utini panya nganana mulapa Godaku tjtji tjuta nyinanytja. Munulanku mukulya pulka nyinara nganana piruku utini alatji panya nganana mulapa Godaku ninti nyinanytja.

⁸ Palu anangu mukulya wiya nyinara paluru utini alatji panya paluru Godaku ngurpa nyinanytja. Panya Godanya mukulya pulka

nyinanyi munu mukuringanyi palumpa tjtji tjuṭa mukulyatjaratu nyinanytjaku.

⁹ Ka panya Godalu mukulya palurunku nganana utinu palumpa katja mantakutu iyara ngana palulawanu wankaringkunyjtaku paluru nganampa ngalkilpa ilunyangka.

¹⁰ Paluru panya nganampa pulkara mukuringu. Panya ngana palumpa mukuringkunyjtja wiya watarku nyinangi, ka paluru palumpa katja iyanu nganampa kuranguru ngalkilarira ilunytjaku, munu palulanguru paluru nganampa kalyparingu. Kala kulilpai, "Mulapa paluru nganampa mukulya pulka mulapa nyinanyi."

¹¹ Ka walytja wiru tjuṭa, alatji Godanya nganampa mukuringkunya ngananalanku uti pulkara mukuringamatu.

¹² Panya kutjupangku Godanya nyakunyjtja wiya alatjitu, palu ngananalanku mukulya pulka nyinanyangkampa Godanya nganana tjungurungkula nyinanyi. Kala mukulya paluru nyinanyjtjtja purunypa alatjitu nyinaku.

¹³ Godalu panya nganana tjarpatjunu palumpa kurunpa, kala palulanguru nitingku kulini panya mulapa ngana Godala tjungu nyinanyi, ka paluru nganana nyinanyi.

¹⁴ Ka ngana palumpa katja nyangu, munula tjukurpa palunyatjara para-tjakultjunkupai anangu tjuṭangka alatji panya mulapa Godalu palumpa katja iyanu anangu tjuṭa wankarunkunyjtaku.

¹⁵ Ka kutjupangku tjinguru mulamularingkula wangkaku alatji, "Jesunya mulapa Godaku katja." Kala wangkanyangka kulilpai, "Mulapa Godanya nyanga palula tjungu nyinanyi, ka paluru mulapa Godala tjungutu nyinanyi."

¹⁶ Alatjila palunya kulilpai munula panya nitingku kulilpai, "Mulapa Godanya nganampa mukulya pulka mulapa nyinanyi."

Uwa, Godanya mukulya pulka. Ka ngananalanku Jesuku walytja tjuṭaku mukulya pulka nyinarampa Godala tjungu nyinaku, ka paluru ngapartji nganana tjungu nyinakutu.

¹⁷ Munu paluru ngananya nintilpai mukulya pulka nyinanytjaku. Ka ngana mulapa Jesunya purunypa mukulya pulka nyinara ngula Tjintu Malatjangka Godala kuranyu kurunpa rapa ngaraku ngurkantankunyjtaku nguluringkunyjtja wiya.

¹⁸ Uwa, Godanya nganampa pulkara mukuringkunya ngana uti ngulu wiya nyinama. Panya nganampa Godanya kurunpa winki mukuringkunya ngana putu nguluringkupai. Palu panya kutjupa tjuṭa nguluringkupai, panya paluru tjana kulintja wiya Godanya nganampa mukulya nyinanyjtja munu panyaya nguluringanyi alatji kulira, "Ngula panyalanya Godalu kuranyu ngaratjungkula ngurkantara pulkara pungkuku."

¹⁹ Ka Godanya-warara nganampa mukulya pulka nyinanyangka ngana ngapartji palumpa munu anangu kutjupa tjuṭaku kulu mukulya pulka nyinapai.

²⁰ Palu ngana tjinguru alatji wangkanyi, "Ngana Godaku mukulya nyinanyi." Munula palulanguru Godaku walytja tjuṭaku kuraringkulampa ngana ngunti wangkanyi, munula Godaku kulu kuraringanyi. Panya ngana Godanya nyakunyjtja wiya, munula palumpa walytja tjuṭa uti nyanganyi. Palulangurula uti

palumpa tjanampa ngaltuny^tju mukulya pulka nyinama munu wirura palyanma tjanampa, panya alatji palyara nganaⁿa Godaku kul^u mukulya pulka nyinanyi.

²¹ Panya Godalu nganaⁿanya wituwituⁿu alatji wangkara, “Nyuntu Godaku pulkara mukuringkulampa uti Godaku walytja tjutaku kul^u mukulya pulka nyinama.”

5

Mantatja Kulilpai Tjutangku Jesuku Walytja Tjuta Putu Kuralpai

¹ Nganaⁿa Jesuku mulamularinganyi panya paluru Wankarunkupainya Godalu panya kalkuntjanya, nyara palulanguru nganaⁿa Godaku katja un^talpa tjuta nyinanyi. Munula Mama Godaku pulkara mukuringkula nganaⁿa palumpa katja un^talpa tjutaku kul^u mukulya nyinanyi.

² Palu yaaltji-yaaltjila Godaku tjitji tjutaku mukulya nyinama? Wiya, nganaⁿa Godaku pulkara mukuringkula munu palumpa tjukurpa wanganarangku kulira nganaⁿa palumpa katja un^talpa tjutaku kul^u pulkara mukuringanyi ngaltuny^tju nyinara.

³ Panya nganaⁿa Godaku pulkara mukuringkula palumpa tjukurpa wanganarangku kulira palyalpai.

Ka tjinguru nyura wangkaku, “Wiya tjukurpa nyangatja wituwitu mulapa putu palyantjaku.” Palu wiya tjukurpa Godaku wituwitu wiya uti ngaranyi nyura nyakula kulira palyantjaku.

⁴⁻⁵ Panya nganaⁿa Jesunya Godaku katja nyinanytjitjaku mulamularingkuⁿyangka Godalu nganaⁿanya walytjanmankupai munulanya kunpulpai nganaⁿa palumpa walytja tjutaku mukulya pulka nyinanytjaku. Ka nyara palulanguru anangu mantatja kulilpai tjutangku nganaⁿanya putu kuralpai Godaku walytja tjutaku mukulya nyinanyangka. Panya nganaⁿa Jesuku mulamularingkuⁿyangka Godalu nganaⁿanya pulkara witylananyi.

Jesunya Christanya Utiringkuny^tja

⁶⁻⁸ Uwa, panya Jesunya Christanya pitjala itiringu mantangka nyanga, ka panya paluru nyinara pulkarinkuⁿyangka palunya urungka baptise-katingu. Ka panya ngula ilura milkali tjutingu. Panya paluru pitjangu minangka kutju baptise-katinytjaku wiya, palu milkali tjutinytjikitja kul^u punu katakutjarangka ilura. Kala nyangatja tjukarurungku kulini Kurunpa Milmil^tu nganaⁿala unngu nintinyangka, panya paluru tjukurpa tjukaruru kutju nintilpai. Munula Jesunya minangka baptise-katinytjanguru munu milkali tjutinytjanguru kul^u nintiringanyi panya paluru pitjala ananguringu munu nganampa ngalkilpa ilungu. Nyanga alatji Godalu nganaⁿanya nintinu.

⁹ Panya watingku nintinnyangkala mulamularingkupai. Palu Godalu nintinnyangkala pulkara mulapa mulamularingkupai. Ka paluru alatjitu nganaⁿala nintinu palumpa katja alatji wangkara, “Nyanga paluru ngayuku katja nyinanyi.” Kala uti palumpa pulkara mulamularingama wantinytja wiya.

¹⁰ Munu panya nganaⁿa Godaku katjaku mulamularingkula kutju tjukarurungku kulilpai Godalu palunyatjara nintinnyangka. Palu nganaⁿa tjinguru Godalu palumpa katjatjara nintinnyangka mulamularingkuwiyangku wantira nganaⁿa palunya nguntinmananyi.

¹¹ Godalu panya wangkangu palumpa katja nganampa ngalkilpa ilunyangka nganannya wankarunkunytjikitjangku. Munulanya wankarunu palula tjungu wanka titutjara nyinanytjaku.

¹² Kala palumpa katjaku mulamularingkula wanka nyanga palunya titutjarangku kanyini, palu palunya wantirampa wanka nyanga palunya kanyintja wiya alatjitu.

Wanka Titutjara Nyinanytjaku

¹³ Uwa, nyangatjana nyurampa walkatjunanyi nyura panya tjukarurungku kulintjaku. Panya nyura Godaku katjaku mulamularinganyi munu palulanguru nyura mulapa wanka titutjara nyinaku Godala tjungu.

¹⁴ Panya nganana Godala wangkapai kurunpa rapangku, ka paluru mulapa nganana kulilpai palula tjukarurungku tjapinnyangka palunya pukulmankunytjikitjangku.

¹⁵ Kala nitingku kulini, "Mulapa paluru tjapinnyangka kulira palyalpai."

¹⁶ Ka tjinguru nyuntu nyakuku Jesuku walytja kutjupangku kura palyannyangka. Munu nyuntu uti nyakunytjatjanungku Godala tjapila palunya wankarunkunytjaku. Palu kutjupa ngaranyi kura pulka mulapa, panya Jesunya wantira Kurunpa Milmilnga anantja. Ka nyuntu nyara palu purunpa nyakula wankarunkunytjaku tjapilwiyangku wantima.

¹⁷ Panya kura kutjupa kutjupa uwankara nganana palyannyangka Godalu nyanganyi kura mulapa. Palu kura nyanga kutjunguru Godalu nganannya putu wankarunanyi, panya Jesuku mulamularingkuwiyangku wantira Kurunpa Milmilnga anannyangka. Kura nyara palulanguru nganana ilura wiyaringanyi alatjitu. Palu kura kutjupa tjutanguru Godalu nganannya wankarunkuku nganana palumpa mulamularingkunyangka.

¹⁸ Ka nganana ninti panya Godaku walytja tjutangku kura rawangku palyalpai wiya. Panya palumpa katjangku nganannya titutjarangku atunymara kanyilpai mamungka-tawara.

¹⁹ Palu mamungku anangu mantatja kulilpai tjuta mayatjarira kanyini nganannya wiya, kala nitingku kulini panya Godalu nganannya atunymara kanyinnyangka.

²⁰ Panya Godaku katjangku ilkaranguru pitjala nganana nintinu God tjukaruru, kala mulapa nintiringu tjukurpa tjukaruruku. Munula palulanguru palula tjungu nyinanyi palumpa katja Jesula Christala kulu. Panya paluru God mulapa nyinanyi munulanya paluru wanka titutjarangku kanyini palula tjungu.

²¹ Uwa walytja wiru tjuta, kutjupa tjutangku panya pulinguru pununguru kutjupa kutjupa tjuta palyalpai munuya walkulpai. Palu nyura tjanala junguringkula punu palunya tjananya walkulwiyangku wantima munuya mauntalpa nyinara Godanya kutju walkunma.

Lita Nampa 2 Johntu Walkatjunkunytnja 2 John Nyangatja Nganmanytnju Nyakula Wangkanytnjaku

Nyangatja Godaku tjukurpa kutjupa wati panya Johntu walkatjunkunytnja Jesuku panya malpangku. Munu paluru walkatjura iyanu minyma Jesuku walytnjakutu munu palula tjungu nyinanytnja tjtutaku kulu.

Munu lita nyanga palula Johntu minyma palula tjanala wangkangu tjukurpa Jesunyatjara kampa kutjupankunytnja wiyangku wantinytnjaku munu anangu kutjupa tjtutangu ngunti wangkanyangka kulira wantinytnjaku, panya paluru tjanaya ngunti para-wangkangi tjukurpa Jesunyatjara.

Tjukurpa nyanganpa ngarinyi:

1-3 Johntu nganmanytnju wangkanytnja

4-6 Jesuku walytnja tjtutaku mukulya pulka nyinanytnjaku

7-11 Ngulu nyakunytnjaku ngunti kurantjaku-tawara

12-13 Tjukurpa malatja

Johntu Nganmanytnju Wangkanytnja

¹ Uwa, minyma wiru, Godalu nyuntunya ngurkantanu palumpa walytnja nyinanytnjaku. Kana wati Jesuku walytnja tjtuta atunymankupaingku lita nyangatja nyuntumpa walkatjunanyi munu nyuntumpa tjtiti tjtutaku kulu, panya ngayulu nyurampa pulkara pukularipai. Ngayulu kutju wiya, uwankarala nyurampa pulkara pukularipai, panya Godaku tjukurpa tjukarurungku kulilpai tjtuta kulu.

² Panya nganana tjukurpa nyanga palunya mulamulangku unngu kulintjatjanungku tjtutjarangku kulilku watarkurinytnja wiyangku. Nyanga palulangurula nyurampa pulkara pukularipai.

³ Ka Mama Godalu pula palumpa katja Jesulu Christalu nyuntunya ngananytnja pukultju ngaltunytju pulkangku kanyinma, munulanya kurunpa rapara pukulmanama. Uwa, alatji ngananytnja palyanma nganana tjukurpa tjukaruru mulamulangku kulinnyangka munu Jesuku walytnja tjtutaku mukulya pulka nyinanyangka.

Jesuku Walytnja Tjtutaku Mukulya Pulka Nyinanytnjaku

⁴ Uwa kangkuru, nyuntumpa tjtiti kutjupa tjarangkuya kunyu tjukurpa tjukaruru wanganarangku kulira palulawanu nyinapai, panya Mamalu-manntu ngananytnja wangkangu wantinytnja wiyangku rawangku kulilkatinytnjaku. Kana ngayulu nyangatja kulira pulkara pukularingu.

⁵ Uwa minyma wiru, mulamulangku wangkanyi utilanku Jesuku walytnja tjtutaku mukulya pulka nyinama. Tjukurpa nyanga palunya panya Godalu kuwari kutju wangkanytnja wiya nganmanytnju mulapa wangkangu, kana nyangatja piruku nyurala wangkanyi tjukurpa palunya.

⁶ Palu yaaltji-yaaltjinkulanku mukulyangku palyanma? Wiya, mukulyangku kulira palyantjikitjangkula uti Godalu wangkanytja uwankara wanganarangku kulira palyanma. Panya nganmanytjula kulinu Godaku walytja uwankaraku rawa mukulya nyinanytjikitjangku.

Ngulu Nyakunytjaku Ngunti Kurantjaku-tawara

⁷ Palu kulila, panya anangu ngunti wangkapai tjuta ngura winkingka tjutaringu munuya anangu tjutangka ngunti para-wangkarinkupai alatji, "Jesunya mantangka iti ngarinytja wiyatu, kurunpa kutju pitjangu." Palu wiya, alatji wangkaraya anangu tjuta ngunti kuralpai munuya paluru tjana alatjitu Jesuku mirpantju nyinanyi ngunti panya wangkapai tjuta.

⁸ Kaya ngulu nyangama kutjupangku nyuranya ngunti kurantjaku-tawara, panya nyura wirungku palyanangi Godaku waraka, munuya wantinytja wiyangku titutjarangku palyalkatima. Ka nyuranya ngula Godalu rawangku nyakunytjatjanungku wiru mulapa ungguku, panya paluru nganmanytju kalkuntjatjanungku.

⁹ Uwa, Christaku tjukurpa kutjuya wangkama tjukurpa kutjupa tjungura wangkanytja wiyangku, panya nyura tjukurpa kutjupa tjungura wangkara palumpa tjukurpa kurani munu Godanya wantinyi, munu Godanya wantira Katjanya kulu wantinyi. Palu nyura Christaku tjukurpa kutju wangkara Mamala pulala Katjala tjungu nyinaku.

¹⁰ Ka tjinguru anangu kutjupangku pitjala nyurala tjukurpa kutjupa nintilku Christanyatjara wiya. Ka nyura anangu nyara palunya nyurampa ngurangka altira tjarpatjura kanyintja wiyangku wantima.

¹¹ Panya nyura tjinguru palunya altirampa palula tjunguringanyi, munu palyanmananyi ngunti wangkanytjaku.

Tjukurpa Malatja

¹² Uwa, tjukurpa tjutana kulini nyurala wangkanytjikitjangku, palu nyiringka nyangana puwu walkatjunanyi, panya ngayulu mukuringanyi ma-pitjala nyurala tjunguringkula ilangku wangkanytjikitja. Tjinguruna kuwari nguwanpa ma-pitjaku, kala tjunguringkula pulkara pukulariku.

¹³ Ka nyangatja nyuntumpa kangkuru nyinanyi, panya Godalu palunya kulu ngurkantanu palumpa walytja nyinanytjaku. Kaya palumpa tjitji tjutangu nyuntunya kulini nyuntumpa pukularira. Palya?

Lita Nampa 3 Johntu Walkatjunkunytja 3 John Nyangatja Nganmanytju Nyakula Wangkanytjaku

Nyangatja Godaku tjukurpa kutjupa Johntu walkatjunkunytja wati ini Kayitjaku. Panya wati nyanga paluru wirungku tjananya intjanungku mani ungkupai wati Jesulu iyantja tjuṭa paluru tjana ngura tjuṭangka para-pitjalira Godaku tjukurpa tjakultjunkunytjaku ngura winkingka. Ka Johntu nyangatja kulintjatjanu pulkara pukularingu munu lita nyangangka palunya wirunmanu. Kala uti nganaṅa kulu anangu kutjupa Godaku warkarinytjaku palu purunytjuṭu mani ungama wantinytja wiyangku.

Munu lita nyangangka Johntu wati kutjupa ini Tiyatu-pitjanya wangkara painingi paluru Jesuku walytja tjuṭangka ngunti warkarinyangka. Munu paluru wangkangi ngula tjanala ma-pitjala ilangku wangkanytjikitja.

Tjukurpa nyanganpa ngarinyi:

1-4 Johntu nganmanytju wangkanytja

5-8 Johntu Kayitjanya wangkara mirawaninytja

9-10 Johntu Tiyatu-pitjanya wangkara paintja

13-15 Tjukurpa malatja

Johntu Nganmanytju Wangkanytja

¹ Uwa, malpa wiru Kayitja, ngayuluṅa wati Jesuku walytja tjuṭa atunymankupaingku lita nyangatja nyuntumpa walkatjunanyi. Ngayulu nyuntumpa pulkara pukularinyi panya nyuntu ngali Godaku tjukurpa tjukarurungku kulilpai.

² Kan malpa wiru, palyan nyinanyi? Ngayulu nintingku kulini panya nyuntu kurunpa rapa alatjitu nyinanyi Godala mirangka. Palu ngayulu nyuntumpa Mamala rawangku tjapilpai nyuntunya wirura kanyintjaku pika wiya.

³ Panya Jesuku walytja kutjupa tjuṭangkuniya pitjala tjakultjunu panya nyuntu kunyu Godaku tjukurku pulkara mulamularingkupai munu wanganarangku kulira palyalpai. Kana tjanala kulintjatjanu pulkara pukularingu.

⁴ Panya tjaka ngayulu tjukurpa nyanga palu purunypa tjakultjunkunyangka kulintjatjanu pulkara pukularipai, panya anangu tjuṭangu ngayulu wangkanytjitja kulira Jesuku walytjaringkula Godaku tjukurpa wanganarangku kulinyangkaṅa pulkara pukularinyi.

Kayitjanya Mirawaninytja

⁵ Uwa, malpa wiru, nyuntu kunyun mulapa Jesuku walytja uwankara papulankunytja wiyangku alpamilalpai.

⁶ Kaya kutjupa tjarangku nyuntu alpamilannyangka nyakunytjatjanungku pitjala nyuntunyatjara tjakultjunangi ngura nyanga palula nganaṅa inmangka tjunguringkunyangka, panya nyuntu kunyu

mukulya pulka. Ka tjananya wanyu wirungku rawangkuṭu alpamilanma iwarangka piruku ankunytjaku Godalu nyuntunya nyakula pukularinytjaku.

⁷ Panya paluru tjana tjukurtjara ma-pakanu Jesuku tjukurpa para-wangkanytjikitja ngura tjuṭakutu. Munu tjana nganmanytju wangkara kulinu alatji, “Nganaṇa Jesunya wantipai tjuṭangka mantjintja wiyangku wantima tjana nganaṇanya ungkunyaṅka.” Alatji tjana wangkara kulinu.

⁸ Palu nganampa ngaranyi Jesuku walytja tjuṭangku palunya tjananya alpamilantjaku. Panya alatji nganaṇa alpamilara tjukurpa tjukaruru tjanalawanungku lipintananyi.

Tiyatu-pitjanya munu Tumitu-ritjanya

⁹ Nganmanytju panyaṇa lita muṭumuṭu walkatjura ma-iyana nyuntulakutu nyakula nyara Jesuku walytja tjuṭangka wangkanytjaku. Palu wati kutjungku ini Tiyatu-pitjalu kunyu kulira wantingi lita palulanguru nyuntu nyakula wangkanyaṅka, panya paluru kunyu nyurampa mayatja nyinanytjikitja mukuringkupai.

¹⁰ Kaṇa ngula ma-pitjala nyurala wangkara utilku wati pala palunyatjara. Panya paluru unngu kuraringkula kunyu tjukurpa nganaṇanyatjara nyurala ngunti tjakultjunkupai. Munu kunyu Jesuku walytja kutjupa tjuṭa ngura kutjupanguru pitjanyaṅka nyakula pukularira altira tjunkupai wiya munu kunyu nyuranya angapailpai palunya tjananya altira tjunkunytjaku-tawara, munu kutjupangku tungunpungkula tjarpatjunkunyaṅka nyakula kunyu nyuralanguru palunya paira iyantjikitjangku kulilpai.

¹¹ Malpa wiru, kutjupangku kura palyannyaṅka nyakula arkalwiyangku wantima munu wiru palyannyaṅka nyakula kutju arkara palyanma. Panya kutjupangku wiru palyalpai, nyara paluru Godaku walytja. Ka kutjupangku rawangku kura kutju palyalpai, nyara paluru Godaku ngurpa munu walytja wiya.

¹² Kaya anangu tjuṭangku wati panya Tumitu-ritjanya mirawanipai tjukaruru nyinanyaṅka nyakula. Kaṇa ngayulu kulu pukulari nintingku kulira mirawaninyi, kaṇi kulinma panya ngayulu tjukarurungku kutju wangkapai.

Tjukurpa Malatja

¹³ Uwa, tjukurpa tjuṭa mulapana kulini nyuntula wangkanytjikitjangku palu nyiringka nyangana putu walkatjunanyi.

¹⁴ Panya ngayulu mukuringanyi ma-pitjala nyuntula ilangku wangkanytjikitja. Tjinguruna kuwari nguwanpa ma-pitjaku.

¹⁵ Uwa, alatjituna walkatjunanyi. Ka Godalu nyuntunya kurunpa rapara pukulmanama.

Kaya nyuntumpa malpa tjuṭangku ngura nyanganguru nyuntunya kulini nyuntumpa pukularira. Ka nyuntu ngapartji ngayuku pala malpa tjuṭangka kutju kutjungka nyakula tjakultjura, panya ngayulu tjananya kulini tjanampa pukularira. Palya!

Lita Jude-alu Walkatjunkunyta Jude Nyangatja Nganmanytju Nyakula Wangkanytjaku

Nyangatja Godaku tjukurpa wati Jude-alu walkatjunkunyta Jame-saku pulampa Jesuku maľanytju. Munu paluru lita nyangatja walkatjura iyanu Jesuku walytja tjuťakutu, panya paluru tjananya wangkara ngulutjunangi tjukurtjara ngunti tjuťanguru mauntalpa nyinanytjaku, panya paluru tjanaya tjukurpa ngunti tjuťa wangkapai Jesunyatjara-palku. Palu panya Godalu kunyu palunya tjananya nyanganyi munu paluru tjananya pikatjaralku paluru tjana kura nyinanytjitjanguru.

Ka Jude-alu Jesuku panya walytja tjuťa wangkara rapaningi munu tjanala wangkangi, "Godalu palumpa walytja tjuťa witulyankuku paluru tjana Jesulanguru paturingkunyttjaku-tawara."

Tjukurpa nyanganpa ngarinyi:

1-2 Jude-alu nganmanytju wangkanytja

3-16 Jude-alu ngulutjunkunyttja nintilpai ngunti tjuťangka-tawara

17-23 Tjukurpa Jesunyatjara rawangku wangkara kulintjaku

24-25 Godanya pulkara mirawaninytja

Jude-alu Nganmanytju Wangkanytja

¹ Uwa walytja tjuťa, ngayuluňa Jude-alu lita nyangatja walkatjunanyi, panya ngayulu Jesuku Christaku warķa palyalpai, wati panya Jamesaku maľanypa. Panya Godalu nyuranya ngurkantanu munu mukulya pulkangku kanyini. Ka panya Jesulu Christalu nyuranya atunymara kanyini. Kana nyangatja nyurampa walkatjunanyi.

² Ka Godalu nyuranya ngaltunytju pulkangku kanyinma munu nyuranya mukulyangku kurunpa rapara pukulmanama.

Nintilpai Ngunti Tjuťa

³ Uwa walytja wiru tjuťa, nganmanytjuňa kuliningi nyurampa lita walkatjunkunyttjikitjangku tjukurpa panya Jesulu nyuntunya nganananya wankarura kanyintjatjara. Palu ngayulu kulinu kutjupa tjuťangku kunyu nyurala wirkara palyangku-palku tjukurpa ngunti tjuťa nintini. Kana kampa kutjupa kulinu munuňa lita nyanga palunya kuwari walkatjunanyi nyurala wangkanyttjikitjangku nyanga alatji uti nyura ngunti nintinnyangka kulira wantima munuya tjukurpa tjukaruruku kutju nintiringkula wangkama. Panya tjukurpa nyanga palunya Godalu ungu palumpa walytja tjuťa. Kana nyangatja walkatjunanyi nyura tjukurpa nyanga palunya kutju kulintjaku munu tjana ngunti wangkanyangka kulira wantinyttjaku.

⁴ Panya tjana Godala tungunpungkupai tjuťa kunyu nyurala tjun-guringkula nyinanyi munuya Godaku tjukurpa kampa kutjupara kulira wangkapai alatji, "Godanya ngaltunytju alatjitu nyinanyi, kala palya kura tjuťjarangku palyanma munula kutjupangka ngarima

kuri wiyangka, panya Godalu nganampa ngalturingkula kura palyan-nyangka kalypangku pungkuwiyangku wantiku.” Alatjiya ngunti kulira wangkapai kura titutjarangku palyantjikitjangku. Palu kura nyanga palu purunypa tjuta palyaraya Jesunya anani. Panya nyiringka nganmanytju walkatjunkunytja ngaranyi alatji, “Anangungku kura nyanga purunypa palyannyangka Godalu palunya wiyalku alatjitu.”

⁵ Kulilaya tjukurpa panyatja, panya Godalu anangu Israelkunu tjuta wankarura katinytja ngura panya Itjipalanguru. Ka nyura ninti tjukurpa nyanga palumpa, palu pirukuna wanyu wangkanyi nyura uti mulapa kulintjaku. Panya Godalu tjananya ngura nyara palulanguru wankarura katinytjatjanungku malangka tjananya kutjupatjara wiyanu palumpa mulamularingkuwiyangku wantinyangka.

⁶ Ka piruku wanyu kulila angelpa tjuta ngapartji, panya Godalu tjananya wituningi wara palumpa palyantjaku. Kaya tjara kutjupangku palula tungunpungkula wantingi tjana walytjangku kulira palyantjikitjangku. Ka tjananya Godalu tjiina pulkangka karpira piti maru pulkangka waningu. Kaya mungawalurungka nyinara patani ngula Godalu tjintu malatjangka tjananya ngurkantara wiyantjaku.

⁷ Kaya wanyu piruku kulinma ngura panya Tjatamanya pulanya Kumaranya munu ngura ititja tjuta kulu. Ngura nyara palula tjanala panya, anangu tjuta palu purunypatu nyinangi munuya Godala tungunpungkula kuri kutjupa kutjupangka ngaringi munuya ngunti-ngunti kulu tjunguringangi panya wati kutjara pula kurirara purunypa nyinangi, ka minyma kutjara palu purunypatu nyinangi. Ka Godalu anangu tjuta kuraringkunyangka nyakula ngura nyara palula tjanala wali uwankara anangu winki tilinu waru ilkaritjangka. Alatji paluru palyanu malatja tjutangku nyakula kulira nintiringkunytjaku.

⁸ Ka panya anangu Godala tungunpungkupai tjuta nyurala tjunguringu. Nyara paluru tjana titutjarangku puntu tjananku kurani kura kutju palyara, munuya kura tjuta tjukurmankunytjatjanungku kura palunya tjananya ankula palyalpai alatjitu munuya ngunti-ngunti ngaripai munuya Godaku tjukurpa uwankara analpai, angelpa tjuta kulukulu.

⁹ Wanyuya kulila angelpa panya mayatja ini Michaelnga Godaku panya warakaripai. Panya paluru mayatja pulka nyinara kutjupa kutjupa analpai wiya. Panya iriti paluru pulanku mamurarangku ngaparku wangkangi Mosenya ilunyangka miri mantjintjikitjangku. Ka Michaeltu mamu palunya pauntjingara anara wangkanytja wiyangku alatji kutju wangkangu, “God, nyuntu palunya paila Mosenya miri mantjintjaku-tawara.”

¹⁰ Palu anangu nyara Godala tungunpungkupai tjutangku rawangku anara wangkapai munuya kutjupa kutjupa wangkanyangka putu kulira analpai alatjitu. Munuya ngultjuringkunytja wiyangku inura purunytju kulira wantira titutjarangku alatjitu kura palyalpai kulintja wiyangku. Nyara palulanguruya ilupairingu kura palyantjatjanu.

¹¹ Kana ngayulu tjanampa ngalturinganyi panya tjanala pika pulka mulapa utiringkuku. Nyara paluru tjana panya Kainku arangka alatjinanyi, panya paluru nyararingkula palumpa malanypa pungkula

iluntanu, kaya palu purunypatu kuwari palyani nyara ngunti wangka-pai tjuṭangku. Munuya paluru tjana wati panya Pailamaku arangka kulū nyinanyi, panya paluru manikitjangku anangu tjuṭa wituwituṅu Godala tungunpungkula kulira wantinytjaku. Kaya anangu nyara paluru tjana panya tjana purunytjuṭu kulira wantira kura palyani. Munuya wati panya ini Kuranya purunypatu Godala tungunpunganyi, panya paluru Mosela tungunpungangi ilytjingka katirinkunyangka, ka panya Godalu palunya iluntanu munu kuwari palu purunytjuṭu anangu nyara palunya tjananya kulū iluntankuku palula tungunpungkunyangka.

¹² Uwa, tjana kura nyanga purunypa palyantjatjanungku kunṭa wiya alatjitu nyurala maiku tjungurinkupai munuya Mayatjaku Tjapa ngunti ngalkula tjikilpai. Munu paluru tjana kutjupa tjuṭa alpamilantjikitjangku kulilpai wiya tjananku kutju walytjangku alatjitu kulira palyalpai. Anangu nyara paluru tjana ngangkali kurakura purunypa ngaranyi, panya ngangkali paluru ngarala wiyaringanyi puyintja wiya, palu purunypa tjana ngaranyi tjukurpa wiru tjakultjunkunytja wiya.

Munu piruku paluru tjana punu mai wiyatjara purunypa ngaranyi, panya mai wiya titutjara ngaranyangka watingku nyakula punu palunya waṭa winki warpura wanipai, ka piltiringkupai. Nyanga palu purunypaya anangu paluru tjana kurakura ngaranyi maitjararingkunytja wiya, panya tjana tjukurpa tjukururu mantjira kanyintja wiya. Ka panya watingku punu kurakura mai wiya warpura wanipai ka ngarira piltiringkupai, palu purunypa tjana nyinanyi tjukurpa ngunti wangkara.

¹³ Kaya anangu winkingku tjananya uti nyakupai kura palyanyangka. Panya uru witatjarangku karungka wala pulka ukalingkula unytjunytju untura karu tjartjarangka utilpai, palu purunypa tjanampa kura utiringanyi tjana palyannyangka. Munu piruku tjana kililpi punkantja purunypa nyinanyi, panya kililpi ilkaringuru tili winki punkalpai munu irnyara wiyaringkupai manta pampura. Nyanga palu purunypaya Godalanguru wirulyarara punkalpai munuya tili wiyaringkula mungawalurungka titutjara nyinaku.

¹⁴ Uwa, nyura panya wati ini linakanya kulini panya iriti mulapa nyinangi Adamaku walytja malatja. Nyara paluru panya anangu nyanga palunya tjananya kulira nganmanytju tjukururungku wangkangi alatji, "Kulinmaya, Mayatjanya pitjaku angelpa mungilyitjara.

¹⁵ Munu paluru anangu winki kuranyu ngaratjunkula ngurkantara tjaralku. Munu paluru Godala tungunpungkupai tjuṭa pungkuku, panya paluru tjana kura titutjarangku palyara Godanya analpai."

¹⁶ Anangu nyanga paluru tjana panya mulyararipai, munuya kutjupa tjuṭa nyakula wangkara ngukalpai, munuya tjana alatjitu walytjangku kulira kura palyalpai. Munuya kura palyantjatjanungku kanany-kananytju mirawanipai, munu paluru tjana anangu kutjupa tjuṭa mukulyangku-palku wangkara ngunti pukulmankupai, kaya kulira wanganararingkupai.

Tjukurpa Jesunyatjarayanku Rawangku Wangkara Kulinma

¹⁷ Palu kulilaya malpa wiru tjuṭa, tjukurpa panya mayatja Jesunyatjaraya nganmanytju tjakultjunu Jesulu panya iyantja tjuṭangku.

18 Panya tjana alatji wangkangu, "Tjintu malatja ilaringkunyangka anangu panya analpai tjuta ngura winkingka tjutaringkuku munuya walytjangku kutju kulira kura kutju alatjitu palyalku Godanya kulintja wiyangku."

19 Palu anangu nyanga palu purunypa tjuta nganmanypa tjutaringu, munuya kuwari Jesuku walytja tjuta tjungu nyinanyangka tjananya kurara punganyi munuya mauntalpa mauntalpa palyani, panya tjana walytjangku kutju kulilpai Kurunpa Milmilta kulintja wiyangku.

20 Uwa walytja tjuta, ngapartji-ngapartjengkuyanku wangkara kulinma tjukurpa Jesunyatjara watarkurinytjaku-tawara, palunya titutjarangku palyanyku wanantjikitjangku. Munuya Kurunpa Milmilta nyuranya witulyankunyangka Godala rawangku tjapinma.

21 Munuya Mayatja Jesunya malaku pitjanytjaku patara watarkuri-wiyangku titutjarangku kulinma nyanga alatji panya Godalulanya mukulya pulkangku kanyini. Kalanya Jesulu ngula malaku pitjala nganananya ngaltunytju pulkangku mantjira katiku palula tjungu wanka titutjara nyinanytjaku.

22 Uwa, Jesuku walytja kutjupa tjtaya putu nguwanpa pulkara mulamularingkupai, ka nyura uti tjanampa ngalturingama munu tjananya purkarangku wangkara tjukarurunma.

23 Ka tjinguru kutjupatjara ma-kuraringkunyangkampa nyura uti tjananya warpungkula wangkara tjukarurunma Godalanguru ma-paturingkula wiyaringkunytjaku-tawara. Panya ngunytjungku palumpa tjtji warungka tjarpanytjaku-tawara mapalku tjulyalpai, palu purunytjuya tjananya mapalku wangkara tjukarurunma, kaya nyurala junguringkuku. Uwa, kutjupa tjtangku kura palyannyangka nyakulaya tjanampa ngalturingama munu wangkara ngulutjunama, kaya kulira kura wantiku ilunytjaku-tawara. Palu nyuranku kulu ngulu nyangama kura panya tjana palyantja nyura palyantjaku-tawara.

Godanya Kutjula Mirawanima

24-25 Uwa, Godanyaya kulinma. Panya paluru kutjungku nyuranya kanyilku punkantjaku-tawara. Munu paluru kutjungku nyuranya palyanyku kanyilku. Paluru kutjungku nyuranya ngurkantara tjukarurunmara tjunkuku palula mirangka kunta wiya pukulpa ngaranytjaku. Nyara paluru kutjungku wankarunkupai, panya paluru iyanu palumpa katja Jesunya Christanya nganananya wankarura mayatjangku kanyintjaku. Uwa, mulapa Godanya witulya pulka, pitalytji wiru mulapa nyinanyi, mayatja pulka mulapa mantatja tjtaku, ilkaritja tjtaku, anangu winkiku kulu. Panya paluru kuwaripatjara alatjitu Mayatja pulka nyinangi, munu paluru kuwaritu Mayatja pulka nyinanyi munu titutjara alatjitu nyinaku wiyaringkunytja wiya. Kala uti wantinytja wiyangku palunya rawangku alatjitu walkunma. Uwa mulapa.

Tjukurpa Jesulu Johnta Utira Nintintja Revelation Nyangatja Nganmanytju Nyakula Wangkanytjaku

Nyangatja Godaku tjukurpa Johntu walkatjunkunyta Jesulu palula utira nintinnyangka. Paluru walkatjuna manta tjukutjukungka nyinara ngura ini Patamatjala, uru pulkangka ngururpa. Panya Jesuku mirpantju tjutangku palunya witiu tjukurpa Jesunyatjara rawangku para-wangkanyangka. Munuya palunya pautangka katira tjunu ngura nyara palula, ka paluru tjailangka purunypa nyinangi.

Ka ngura nyara palula nyinanyangka Kurunpa Milmitu palunya nintiningi tjukurpa tjuta, ka paluru kuruntu nyangangi munu kuliningi ngula nyaaringkuku manta winkingka. Ka Jesulu palula wangkangu tjukurpa uwankara paluru nyakunyjatjanungku nyiringka walkatjunkunyjtaku munu nyiri palunya iyantjaku ngura tjutakutu Jesuku walytja tjutakutu.

Palu nyara palula arangka ngura winkingka Jesuku mirpantju tjutangku Godaku walytja tjuta pulkara kuraningi, munuya tjananya ananangi, pungangi, iluntanangi, tjara tjailangka tjarpatjunangi, munuya tjanampa tjituru-tjituru pulka palyanangi. Ka tjukurpa nyangatja Jesulu Johnta utira nintinu paluru walkatjura tjanalakutu iyantjaku tjana kulira raparingkula kunpu ngaranytjaku Jesuku Christaku.

Jesulu tjukurpa tjuta Johnta kurunta nintinu tjukurpa wiru tjuta. Kaya Jesuku walytja tjutangku tjukurpa nyanganpa iriti riitamilara uti kuliningi ngula nyaaringkuku manta winkingka. Palu Jesuku mirpantju tjutangkuya riitamilara putu kuliningi panya tjukurpa nyanganpa kumpilpa nguwanpa. Panya Jesulu tjukurpa nyanganpa nintinu palumpa walytja tjutangku kulira raparingkunyjtaku pika pulka tjanala wirkankunyangka. Panya tjukurpa nyanga palula tjanalanguruya kuliningi Godalu yaaltjingara palumpa walytja tjuta wankarunkupai, munuya palulanguru pulkara mulamularingkula nguluringkuwiya rapa nyinangi.

Uwa, Johntu kutjupa kutjupa tjuta kuruntu nyangu panya tjiya wiru mulapa Godanya nyinapai, munu kuka ayinayini 4 nyalpi tjutatjara, munu angelpa tjuta, mamu ayinayini mankurpa, nyiri rulumapi kiti 7-tjara, angelpa 7-tu turampata puura wangkatjingannyangka, nyanytju tjuta, munu lamalama, munu kutjupa kutjupa tjuta kuluku. Ka nyanganpa uwankara Jesulu nintinu Johnta paluru nganana kulu nyakula kampa kutjupara pulkara ngurira kulintjaku, munu kulira ngulu wiya Godaku pulkara mulamularingkunyjtaku. Panya tjukurpa nyanga palula tjanalanguru nganana kulini mulapa Jesunya Christanya Mayatja pulka mulapa nyinanyi uwankarangka waintarinytja. Munula kulini mulapa Godalu palumpa mirpantju tjuta uwankara wiyalku Jesula Christalawanungku Satangga tjananya kulu piruku wanka nyinanytjaku wiya. Munula piruku kulini mulapa Godalu palumpa walytja tjuta mantjilku tjana Jesunya tungun-tunguntu

rawangku wanannyangka, kaya palula tjungu titutjara nyinaku ngura kuwaritja wiru mulata.

Tjukurpa nyanganpa ngarinyi:

1:1-8 Johntu nganmanytju wangkanytja

1:9—3:22 Jesulu wangkanytja palumpa walytja tjutaku ngura 7-ta nyinanytja tjutaku

4:1-11 Godanya walkuntja ngura ilkaritjangka

5:1—8:1 Nyiri rulumapi munu Lamalamanya

8:2—11:19 Angelpa 7-tu turampata puura wangkatjingantja

12:1—15:4 Tjukurpa 7-pa kutjupa Johntu nyakunyitja

15:5—16:21 Angelpa 7-tu ilkaringuru pika kura pitinguru mantangka tjutintja

17:1-18 Minyma kura munu mamu kata 7-tjara

18:1—19:4 Tawunu Pulka Papilangga Pilukatinytja

19:5-10 Lamalamangku kuri altinytja

19:11-21 Nyanytju piranta pitjanytja

20:1-10 Godalu Satangga warungka waninytja

20:11-15 Tjintu malatjangka Godalu ngurkantankunyitja

21:1-8 Ilkari kuwaritja munu manta kuwaritja

21:9—22:5 Tawunu Jerusalemnya kuwaritja

22:6-21 Jesunya malaku pitjanytja

Johntu Nganmanytju Wangkanytja

¹⁻² Kulinmaya Jesuku walytja tjutangka! Panya ngayuluna Johnnga, Jesuku Christaku warkaripai, mununa tjukurpa nyangatja kuwari nyurampa walkatjunanyi Jesulu ngayunya nintinnyangka. Panya Godalu palula utira tjakultjunu kuwari nguwanpa nyaaringkuku nyanga palula malangka. Munu paluru angelpa witura iyanu ngayulakutu ara nyanga palunya ngayula wirkara wangkara nintintjaku. Kana nintiringkula kuwari nyanga nyurampa ngapartji walkatjunanyi uwankara ngayulu nyakunyatjanungku kulintjatjanungku, panya Godanya mukuringanyi nyura kulu kulintjaku tjukurpa nyanga kuwari nguwanpa nyaaringkunyjanya. Nyangatjana tjukurpa Godalanguuru nyurala tjakultjunanyi, Jesulu Christalu kulu wangkanytja.

³ Ka nyura tjukurpa nyanga palunya nyakula kulinnyangka nyuranya Godalu pukulmankuku. Ka nyura tjukurpa nyangatja wanganrangku kulirampa palya alatjitu nyinaku. Panya ara uwankara nyanga ngayulu nyakula nintiringkunyjanya kuwari nguwanpa utiringkuku.

⁴ Uwa, kana ngayulu lita nyangatja kuwari nyuralakutu ma-iyani Godaku walytja tjutakutu manta pala Aitjala nyinanytja tjutakutu, panya nyura tawunu 7-ta nyinanyi munu nyura church walytja walytjangka tjunguringkupai Godanya walkuntjikitja. Ka Godalu nyuranya pukultjungku kanyinma munu kurunpa pukulpa nyinanytjaku palyanma. Paluru panya kuwaripatjara mulapa nyinanytjanu kuwari nyanga nyinanyitu munu paluru panya ngula pitjanya. Godanya panya mayatja pulka nyinanyi tjija wirungka. Ka panya palumpa Kurunpa 7 ngaranyi palula kuranyu. Nyanga paluru tjana kulu nyuranya pukultjungku kanyinma pukulpa mulapa nyinanytjaku.

⁵ Ka palu purunytjuṭu Jesulu Christalu kuḷu nyuranya pukuḷmara kanyinma. Paluru panya mantakutu pitjala palumpa mamaku tjukurpa tungun-tunguntu wangkangi munu panya ilungu. Ka panya Mamalu palunya-warara pakaltjinganu munu palulanguru ngananyalpi ilunyangka palu purunytjuṭu pakaltjingalku. Ka Jesunya mayatja pulka mulapa nyinanyi mayatja mantatja uwankarangka waintarira.

Panya paluru-manṭu nganampa pulkara mukuringkupai, ka panya ngananyanya kura palyantjitjanguru pungkunytjaku ngarangi palu paluru ngananyanya kura nyinanyangka nyakula ngalkilpa ilungu nganana karalyarira wankaru nyinanytjaku.

⁶ Munu palulanguru paluru ngananyanya walytjanmanu Godala wanganarangku kulintjaku, munu paluru ngananyanya tjukurtjara tjuṭa tjunu Godaku palumpa Mamaku nganana anangu watarkitja tjuṭangka Tjukurpa Palya tjakultjungkunytjaku tjana ngapartji kulira Jesuku walytjaringkunytjaku. Uwa, Jesunya panya wiru mulapa pit-alytji pulka witulya pulkanya nyinanyi, kala uti palunya titutjarangku mirawanima. Uwa, mulapala uti palunya kutju walkunma.

⁷ Nyawaya! Jesunya ngula ngangkalangka malaku pitjaku, kala anangu winkingku nyakuku, munu punu katakutjarangkaya wakara utitjungkunytjalu tjana kuḷu nyakuku. Munuya palunya nyakula anangu uwankara pulkara tjituru-tjitururira ulaku. Uwa, mulapa nyanga alatjiriku.

⁸ Ka Mayatja Godalu nyanga alatji wangkanyi, "Panya ngayulu kuwaripatjara mulapa uwankara wiyangka nyinanytjanya, mununa kuwari palurutu nyinanyi titutjara, mununa uwankara wiyaringkunyangka ngayulu nyinaku alatjitu palurutu. Munu panyana ngula pitjaku palurutu." Alatji Godalu palurunku wangkanyi witulya pulkangku.

Jesulu Wangkanytja Palumpa Walytja Tjuṭangka Manta Panya Aitjala Nyinanytja Tjuṭangka

⁹ Ngayulu Johnnga, nyurampa panya walytja, panya nyuntu nganana Jesuku walytja tjuṭa nyinanyi. Ka panya Godanya wantipai tjuṭangku nyuranya kuralpai, palu purunypanyi ngayunya kuḷu kuralpai, panya nganana Jesuku walytjaringkunyangka. Palu tjana ngayunya alatji kurannyangka ngayulu tungun-tunguntu rapangku Jesunya wanangingi nyura purunytju. Kaniya palulanguru witiṇu mununiya katira tjunu manta tjukutjukungka uru pulkangka ngururpa ngura ini Patamatjala. Panya ngayulu Godaku tjukurpa ngura tjuṭangka para-ngarala wangkangi, tjukurpa panya Jesunyatjara. Kaniya nyara palulanguru ngayunya ngura nyanga palula katira wantikatingu.

¹⁰ Kana manta nyanga palula nyinangi rawa alatjitu, ka Mayatjaku tjirirpi ngaranyangka Kurunpa Milmilṭu ngayunya witulya pulkangku nintiningi.* Kana palulanguru tjanangka wangka kulinu pulkara wangkanyangka, panya turampata wangkatjingalpai, palu purunypana wangka kulinu.

* **1:10** Mayatjaku tjirirpi panya Sunday, panya tjirirpi nyara palula Jesunya ilunytjatjanu wankaringkula pakanu, kala palulanguru Jesuku walytja tjuṭangku tjirirpi panya palula tjunguringkula palunya walkulpai Sunday kutjupa Sunday kutjupa.

11 Alatjini wangkangu, “Nyuntu kuwari nyanga kutjupa kutjupa tjuta nyanganyi, munun nyakunytjatjanungku nyiringka walkatjura munu iyala Jesuku walytja tjutakutu ngura nyara kutjupa tjutangka nyinanytja tjutakutu ini ngura nyangankutu Ipitjalakutu, Muunalakutu, Puukamalakutu, Tjayatiralakutu, Tjaatitjalakutu, Pila-talpiyalakutu, munu Layatiyalakutu.” Alatjini wangkangu.

12 Kaṇa kulintjatjanungku kulinu, “Ngalaluṇi nyangatja wangkanyi?” Munuṇa pinkurarara nyangu puṇu panya tili katūra kanyilpai 7 ngaranyangka. Puṇu panya paluru tjana gold-nguru palyantja.

13 Ka palula tjanala ngururpa ngarangi wati purunypa mantara waratjara munu paluru pilpirwanungku nanpa purunypa karpira kanyiningi gold-nguru palyantja.

14 Ka paluru mangka piranpa mulapa tili pulka purunypa irnyaningi ngangkali purunypa, munu paluru kuru waru tili purunypa irnya-irnyaningi.

15 Munu paluru tjina irnyaningi, panya ayana warungka tjunkunyangka waru tili winki irnyalpai, palu purunypa. Kaṇa palunya wangka kulinu kapi uru wala rurkuntja purunypa.

16 Ka paluru mara wakungku kililpi 7 kanyiningi. Munu tjaangku tjuṭa wara iri kampa kutjara kanyiningi. Ka yunpa paluru pitalytji pulkangku irnyaningi, panya tjirirpingku kalala irnyalpai, palu purunypa.

17 Munuṇa palunya nyakula punkara ngaringi palula tjinangka miri ilunytja purunypa. Kaṇi mara wakunguru pampura wangkangu, “Nguluringkuwiya rapariwa. Ngayuluṇa nganmanyitja mulapa uwankara wiyangkalpi nyinanytjanya, munuṇa titutjara mulapa nyinanyi panya manta ilkari wiyaringkunyangkana ngayulu nyinaku alatjitu wiyaringkuwiya.

18 Ngayuluṇa Wanka Nyinapainya. Ngayulu ilungu palu kuwarina wanka titutjara nyinanyi wiyaringkunytja wiya alatjitu. Ngayulu mayatja pulkangku ngurkantara wangkapai ilunytjaku munuṇa ngayulu ngurkantankupai ngananya miriku ngurakutu ankuku.

19 “Uwa John, nyuntu kuwari nyakunytjatjanungku nyiringka walkatjura panya ngayulu nyuntunya nintintja uwankara. Panya ngayulu kuwari nyuntunya nintini kuwari kuranyitja nyaaringanyi munu piruku ngula malatja nyaaringkuku. Ka nyuntu nyanganpa uwankara nyakunytjatjanungku nyiringka walkatjura.

20 Kuwarin nyanganyi kililpi nyanga 7 ngayulu mara wakungku kanyinnyangka, munun piruku nyanganyi puṇu nyanga tili katūra kanyilpai 7 ngayula para-ngarala arintankunyangka. Palu nyanga tjana nyaa nintini kililpi, tili kanyilpai 7-tu kulū? Wiya, nyanga alatjiya nintini. Kililpi 7-tu nintini angelpa 7 panya paluru tjana kanyilpai Godaku walytja tjuṭa ngura nyara 7-ta nyinanytja tjuṭa. Ka tili kanyilpai 7-tu nintini Godaku walytja tjuṭa tawunu nyara 7-ta nyinanytja tjuṭa.” Panya nyanga alatjini Jesulu kuwari nintiningi.

2

1. Tjukurpa Ipitjala Nyinanytja Tjutaku

¹ Munuṅi palulanguru piruku wangkangu alatji, “Panya angelpa kutjungku nyara tjananya kanyini Godaku walytja tjuṭa tawunu ini Ipitjala nyinanytja tjuṭa. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayulu kililpi panya 7 mara wakungku kanyintjalu nyurala wangkanyi, punu tili katūra kanyilpai 7-ta ngururwanu para-pitjalinkunytjalu panya.

² Ngayuluna nyurampa ninti. Nyura panya ngayuku pulkara warkaripai, munuṅi nyura tungun-tunguntu wanalpai wantinytja wiyangku. Munu nyura wati kura tjuṭangka tjunguringkuwiyangku wantipai wirungku. Ka panya kutjupa tjuṭangka ngunti wangka-pai, ‘Ngayunyaṅi Christalu witura iyanu.’ Ka panya alatji wangkanyangka nyura kulira wantipai alatji wangkara, ‘Nyangantuya ngunti wangkanyi.’

³ Uwa, mulapa nyura ngayunya tungun-tunguntu wanalpai. Panya nyura ngayuku mulamularingkunyangka kutjupa tjuṭangka nyuranya analpai munu kuralpai, ka alatjirinyangka nyura ngayunya wantinytja wiyangku wirungku titutjarangku wanani. Kaṅa pulkara nyurampa pukularinyi.

⁴⁻⁵ Palu kulila! Ngayulu kutjunguru tjituru-tjitururinyi, ngayuku panya nyura pukularinytja wiyanguru. Nganmanypa panya nyura ngayuku mukulya mulapa nyinangi, palu kuwari nyanga nyura nyaaku ngayuku mukuringkunytja wiyaringu? Uti nyura panya palu purunytjuṭu ngayunya kulinma, panya nganmanypa nyura ngayuku pulkara mukuringangi. Palu nyura tjinguru rawa ngayuku pukularinytja wiya nyinanyangkaṅa ngayulu pitjala nyurampa punu panya tili katūra kanyilpai mantjilku.

⁶ Palu nyangatja nyura wirura kulilpai panya nyura wati ini Nikilatjanya wanalpai tjuṭaku kuraringkupai, panya nyara paluru tjana Godaku tjukurpa ngunti-ngunti nintilpai. Ka ngayulu palu purunypatu ngunti nintilpai tjuṭaku kuraringanyi.

⁷ Uwa, nyura pina ala ngaralampa wanyu ngalya-kulinma Kurunpa Milmitu wangkanyangka Godaku walytja tjuṭangka. Palu kutjupa tjuṭangka nyuranya wangkanyangkaya ngayunya kulinma wantinytja wiyangku munuṅi titutjarangku ngayunya tungun-tunguntu wananna. Kaṅa alatji wirura wanannyangka nyuranya tjunkuku Godaku ngura wirungka mai wanka ngalkun-tjaku. Panya Mamaku ngurangka punu wankarunkupai ngaranyi, ka nyura punu palulanguru mai ngalkula wanka titutjara nyinaku.

Uwa, alatji tjanampa walkatjura ngayuku walytja tjuṭaku ngura nyara Ipitjala nyinanytja tjuṭaku.”

2. Tjukurpa Muunala Nyinanytja Tjuṭaku

⁸ Munu palulanguruṅi piruku wangkangu, “Panya angelpa kutjupangku nyara tjananya kanyini Godaku walytja tjuṭa tawunu ini Muunala nyinanytja tjuṭa. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayuluna kuwaripatjara mulapa nyinangi uwankara wiya ngaranyangka, mununa titutjara mulapa nyinanyitu, panya

manta ilkarı wiyaringkunyangka ngayulu nyinaku alatjitu wiyaringkuwiya. Ngayulu panya ilungu mununa palulanguru wankaringkula pakaṇu.

⁹ Ngayulu nyurampa ninti panya nyuranya mirpantju tjutangku rawangku anara wangkapai munu pungkula kuralpai munu nyii-nyii-pungkupai. Mununa ninti panya nyura ngaltutjara maralpa mani wiya nyinanyi. Palu pukularimaya panya ngayula nyura marangka alatjitu wankaru nyinanyi pukulpa. Ka ngayulu ninti panya kutjupa tjutangkuya nyuranya kura wangkara analpai. Paluru tjanayanku mirawanira walytjangu wangkapai, 'Nganana Jew tjuta, Godanya tjukarurungku wanalpai!' Palu wiyaya tjana Satanku walytja tjuta munuya palunya wanalpai.

¹⁰ Ka paluru tjana nyuranya rawangku anara wangkara pungkula kurannyangka nguluringkuwiyaya rapa nyinama.

Kulila! Mamu panya Satantu anangu kura tjuta wituwitulku nyuranya witera tjailangka tjarpatjunkunytjaku. Panya mamu paluru mukuringanyi nyuranya arkara punkatjingantjikitja munu paluru tjintu 10 nyuranya rawangku arkalku tjaila unngu kanyira nyura kuraringkula ngayuku watarkurinytjaku. Palu ngayunya yanyi wantinytja wiyangku titutjarangku kulinma. Tjinguruya nyuranya miri pungkunytjikitjangu wangkaku, kaniya ngayunya tungun-tunguntu wananna alatjitu ilunytjakutu-wangkara. Kana nyuranya puturu wankanya unkkuku, panya wati raitjangka wirt-japakara waintarinyangkaya palula katangka puturu nyalpitjara tjunkupai, palu purunypa, panya ngayulu nyuranya wankalku titutjara ngayula tjungu pukulpa nyinanytjaku.

¹¹ Uwa, nyura pina ala ngaralampa wanyu ngalya-kulinma Kurunpa Milmiltu wangkanyangka Godaku walytja tjutangka. Palu nyuranya anannyangka wantinytja wiyangkuni titutjarangku tungun-tunguntu wananna. Ka alatji rawangku wanannyangkaṇa nyuranya wankaru kanyilku warungka panya ilunytjaku-tawara.

Uwa, wanyu tjanampa nyanga alatji walkatjura ma-iyala panya ngayuku walytja tjutakutu nyara Muunala nyinanytja tjutakutu."

3. *Tjukurpa Puukamala Nyinanytja Tjutaku*

¹² Mununi palulanguru piruku wangkangu, "Panya angelpa kutjupangku nyara tjananya kanyini Godaku walytja tjuta tawunu ini Puukamala nyinanytja tjuta. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayuluna tjula wara iri kampa kutjaratjara kanyintjalu nyuranya wangkanyi.

¹³ Ngayuluna ninti nyurampa nguraku, panya nyara palula Satangga mayatjaringu, kaya tjutangku palunya wanani. Palu nyura tjukarurungku palunya wantira ngayunya kutju kulini. Ngura nyara palulaya panya wati ngayuku malpa ini Antipanya mungatu pungkula iluntanu tjukurpa ngayunyatjara tungun-tunguntu parawangkanyangka. Kani nyura nguluringkuwiyangku ngayunya rawangku wananingi wantinytja wiyangku ngura pala Satangga nyinanytjala, kana pulkara pukularingu.

14 Mulapa nyura ngayunya rawangku wanani. Palu kulila! Ngayulu tjituru-tjitururingu panya nyura paintja wiyangku wantinyi kutjupa tjarangku ngunti wangkanyangka. Panya tjana kulira mulamularinganyi wati miri ini Pailamalu wangkanytjitjaku. Panya iriti paluru ngunti nintiningi wati ini Pailakala, ka wati paluru ngapartji anangu Israelkunu tjuṭa kura nyinanytjaku wituwituningi. Paluru panya tjananya wituwituningi kuka panya god ngalya-ngalya ungkuntja ngalkuntjaku, kaya mulapaṭu ngalkuningi Godala tungunpungkula. Munu paluru piruku tjananya wituwituningi kutjupangka kutjupangka pirtjinytjaku, kaya palunya kuliningsi Godalu paintjitja wantira. Ka nyuralan-guru kulu palu purunypa kutjupa tjarangku kuwari palyani Pailamaku panya tjukurpa kulintjatjanungku.

15 Ka palu purunypa tjara kutjupa kulira mulamularingkupai wati ini Nikilatjalu ngunti wangkanytjitjaku.

16 Palu kulila, tjukurpa nyanga Nikilatjaku pulampa Pailamaku kura ngaranyi, ka nyura wantiwiyangku tjananya painma tjukurpa palumpa pulampa kulintja tjuṭa. Palu nyura paintja wiyangku wantinyangkampa ngayulu pitjala tjananya pikangku pungkuku tjuṭa wara panya tjaangku kanyintjitjangka.

17 Uwa, nyura pina ala ngaralampa wanyu ngalya-kulinma Kurunpa Milmitu wangkanyangka Godaku walytja tjuṭangka. Munu tjana nyuranya anara wangkanyangka ngayunya wantinytja wiyangku rawangku wananna. Ka anangungkumpa alatji ngayunya tungun-tunguntu wanannyangka ngayulu palunya ungkuku mai kumpilitja ini panya manna, mununa pirukuṭu palunya ungkuku apu piranpa ini palunyatjara, ini kuwaritja. Ka paluru kutju initjara mantjira ninti nyinaku, kaya kutjupa uwankara ngurpa nyinaku ini pala palumpa.

Uwa, wanyu tjanampa nyanga alatji walkatjura ma-iyala panya ngayuku walytja tjuṭakutu nyara Puukamala nyinanytja tjuṭakutu.”

4. *Tjukurpa Tjayatirala Nyinanytja Tjuṭaku*

18 Mununi palulanguru piruku wangkangu, “Panya angelpa kutjupangku nyara tjananya kanyini Godaku walytja tjuṭa tawunu ini Tjayatirala nyinanytja tjuṭa. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayuluna Godaku katjangku nyurala tjukurpa nyangatja wangkanyi. Ngayulu panya kuru waru tili purunypa irnyani mununa tjina ayana yalawana tjalkanyankunytja purunypa irnyani.

19 Palu kulila! Ngayulu nyurampa ninti nyura palyantjitjaku, panya nyura ngayuku pulkara mukuringanyi, munu nyura ngaltutjara tjuṭa ngaltunytjungku ungkupai. Ngayulu ninti panya nyura mulapa ngayunya kulini, munu nyura ngayuku waraka wirura palyalpai. Munu panya nyura rawangku tungun-tunguntu ngayunya kutju wanalpai. Panya nyura nganmanypa tjakaruru nyinara ngayuku wirura palyalpai, palu kuwari nyura kunpu pulkaringkula pulka mulapalta palyani, nganmanyitjangka wain-tara.

20 Palu kulila! Ngayulu kutjunguru tjituru-tjitururinyi panya nyanga alatji nyura kulira palyannyangka panya minyama ini Tjiitjipilnga nyura paintja wiyangu wantipai nyurala tjukurpa ngunti wangkara nintinnyangka. Palurunku wangkapai, 'Ngayunya Godalu wangkara iyanu.' Palu paluru ngunti nyuranya kurani nyura palumpa tjukurpa wanantjaku. Panya paluru wangkapai anangu kutjupangka kampangka ngunti ngarinytjaku munu kuka panya god ngalya-ngalya ungkuntja ngalkuntjaku.

21-22 Alatjituṅa wangkangu palunya kura wantira kampa kutjuparinytjaku, mununa patara patara, ka ngayunya wantinyi kulintja wiyangu. Kana palulanguru pikatjaralku minyama pala palunya pulkara tjituru-tjitururinytjaku, palula panya ngunti ngaripai tjuṭa kuluna pika pulka ungkuku. Palu wati nyangantu mapalkungku kampa kutjuparinytja wiyangu wantinyangkana kuwaritu nyanga palunya palyalku.

23 Mununa minyama nyanga palumpa tjukurpa lipintankupai tjuṭa kulu iluntankuku. Kaya ngayuku walytja tjuṭangu tawunu panya tjuṭanguru nyangatja kulira urulyaralku, 'Awari! Jesulu nintingu nyakupai anangu uwankaranku unngu kulinnyangka.' Alatjiya kulilku ngayuku walytja tjuṭangu. Kana ngayulu tjananya tungunpungkula kuralpai tjuṭa warungka waniku, palu tjukaruru nyinapai tjuṭana wirura kanyilku.

24 Ka ngura pala Tjayatirala kampa kutjara nyinanyi minyama panya palunya wanalpai munu ngayunya kulilpai, ka nyura ngayunya wanalpai tjuṭangu wirungku palunya kulilwiyangu wantinyi. Panya palunya kulilpai tjuṭangkuya alatji wangkapai, 'Nyangatja Satanku wangka nganana kulini, tjukurpa pulka milmilpa.' Ka nyura tjukurpa nyangaku nintiringkuwiyangu wantinyangka ngayulu pukularingu. Mununa palulanguru nyuranya piruku wangkanytja wiyangu wantinyi.

25 Palu panya nyura ngayunya tungun-tunguntu wanani palu purunytjuṅiya wanyu rawangku wananna ngayulu pitjanytjakutu-wangkara.

26-27 Palu nyura ngayuku wangka rawangku kulira tjukarurungku wanannyangkampana ngayulu nyuranya mayatja pulka tjunkuku anangu tjuṭa ngura winkingka kanyintjaku. Panya Mamaluni tjunu mayatjarira tjananya kanyintjaku, ka nyura palu purunytjuṭu tjananya mayatjarira kanyilku wirungku. Munu nyura mayatja kumpungku tjananya wituwitura kanyilku, kaya tjinguru tungun-tungunarinyangka nyura tjananya pungkula wiyalku panya piti pungkula katantara minya-minyantja purunypa.

28 Kana nyuranya mayatja tjunkula ungkuku kililpi panya Katanya tjirirpikutu pakantjanya.

29 Uwa, nyura pina ala ngaralampa wanyu ngalya-kulinma Kurunpa Milmilṭu wangkanyangka Godaku walytja tjuṭangka. Uwa, wanyu tjanampa nyanga alatji walkatjura ma-iyala panya ngayuku walytja tjuṭakutu nyara Tjayatirala nyinanytja tjuṭakutu."

5. *Tjukurpa Tjaatitjala Nyinanytja Tjutaku*

¹ Munu palulanguruṇi piruku wangkangu, “Panya angelpa kutjupangku nyara tjananya kanyini Godaku walytja tjuṭa tawunu ini Tjaatitjala nyinanytja tjuṭa. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayulu panyaṇa Godaku kurunpa 7 kanyini, kililpi panya 7 kulu. Munu ngayulu ninti nyurampa panya anangu tjuṭangku wangkapai nyura kunyu wirura ngayunya wanapai. Palu wiya, nyura iluru-ilurungku ngayunya wanani mulamulangku wiya.

² Nyura ngayuku waraka tjukarurungku palyantja wiya kana nyakula kulini Godanya nyurampa pukularinytja wiya alatji iluru-iluru nyinanyangka. Kaya kulira wankariwa munu piruku kurunpa wanganarangku kulira palyala Godaku tjukurpa nyura watarkurinytjaku-tawara.

³ Panyatjaya kulinma tjukurpa panya nyuranya nganmanytju wangkara nintintja, munu wanganarangku kulinma. Munuya kura tjuṭa kulira wantima piruku palyantja wiyangku. Ala, wankariwaya munuya tjukarurungku kulinma panya ngayulu nyurala watarkungka wirkankunytjaku-tawara, munuya alalangkku nyangama.

⁴ Uwa, ngura pala Tjaatitjala tjuṭa watarku nyinanyi, palu nyura mankurtu kutju Godanya mulamulangku kulini. Panya anangungku mantara paltjilpai ka palyaringkupai, palu purunypa nyura palya nyinanyi kura wantira. Palulanguru nyura mantara pirantjara ngayula tjungu ankuku, panya Godanya pukularinyi nyura ngayunya wirura wanannyangka.

⁵ Kaya uwankarangku ngayunya wantinytja wiyangku rawangku wanarampa nyanga palu purunypatu mantara pirantjara rawa nyinaku. Kana panya nyuranya ini kanyini ngayuku nyiringka panya wanka titutjara nyinanytjaku. Ini pala palunya tjananya ngayulu kurantja wiyangku kanyilku nyura ngayunya tunguntunguntu wanannyangka. Ngayulu Godala munu palumpa angelpa tjuṭangka mirangka wangkaku nyura panya ngayuku walytja tjuṭa nyinanyangka.

⁶ Uwa, nyura pina alangkumpa ngalya-kulinma Kurunpa Milmilu wangkanyangka Godaku walytja tjuṭangka.

Uwa, wanyu tjanampa nyanga alatji walkatjura ma-iyala panya ngayuku walytja tjuṭakutu nyara Tjaatitjala nyinanytja tjuṭakutu.”

6. *Tjukurpa Pila-talpiyala Nyinanytja Tjutaku*

⁷ Munu palulanguruṇi piruku wangkangu, “Panya angelpa kutjupangku nyara tjananya kanyini Jesuku walytja tjuṭa tawunu ini Pila-talpiyala nyinanytja tjuṭa. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayulu kutju palya mulapa, tjukarurungku kulira palyalpai munu panyaṇa kanyini tjamu Davidaku key ngayuku nguraku. Ka key nyanga palula ngayulu alannyangka kutjupangku putu patilku. Munu palu purunypatu kutjupangku putu alalku ngayulu patinnyangka.

⁸ Ngayuluna nyurampa ninti panya nyura ngaltutjara pulka wiya. Palu nyura ngayuku tjukurpa wanganarangku kulilpai, mununi

nyura tungun-tunguntu wanalpai wantinytja wiyangku. Kaṇa nyurala kuranyu ngayulu tuwa alara wantingu nyura tjarpanytjaku, ka anangu kutjupangku puṭu patilku.

⁹ Kulila! Nyara nyurampa ngurangkaya kutjupa tjuṭangku ngunti wangkapai alatji wangkara, 'Nganana Jew tjuṭa, munula Godanya tjukarurungku wanalpai.' Palu wiya, tjana Satannga wanalpai. Ka ngunti wangkapai palunya tjananya ngayulu katira tjarulku nyurala tjinangka kuranyu tultjungarakatinytjaku, kaya pina alaringkula kulilku, 'Mulapa Mayatjanya tjanampa mukuringanyi.'

¹⁰ Palu ngayulu nyurala wangkangu ngayunya rawangku wanantjaku, kaṇi nyura mulapa ngayunya tungun-tunguntu wananingi wantinytja wiyangku. Palu ngula manta winkingka Satantu anangu tjuṭa arakara kuralku Godaku watarkurinytjaku. Palu nyara palula ara ngayulu nyuranya ngalkira kanyilku nyura panya ngayunya tungun-tunguntu wanannyangka, ka nyuranya puṭu kuralku Satantu.

¹¹ Ngayulu kuwari nguwanpa malaku pitjaku. Ka panya nyura ngayunya wirura wanani, nyara palu purunytjuniya rawangku wananna, kaṇa nyuranya wiru unkkuku. Palu kutjupangku tjin-guru nyuranya mukumukura ma-katinyangka ngayulu nyuranya puṭu wiru panya unkkuku. Kaya nyanga alatjingka-tawara kulira wantima.

¹² Palu rawangkuniya wananna kaṇa nyuranya Godala tjungulku ngura panya walkulpaingka nyura titutjara palula nyinanytjaku. Ka nyura ankunytja wiya nyinaku alatjitu. Kaṇa nyurala walkatjunkuku Godanya ini, mununa piruku walkatjunkuku ini Godaku ngura, panya ngura kuwaritja Jerusalemnya. Ngura nyara paluru ilkaritjanguru ngula ngalya-ukalingkuku Godalanguru. Mununa piruku nyurala walkatjunkuku ini ngayuku, ini kuwaritja.

¹³ Uwa, nyura pina alangu kulirampa ngalya-kulinma Kurunpa Milmilu wangkanyangka Godaku walytja tjuṭangka.

Uwa, wanyu tjanampa nyanga alatji walkatjura ma-iyala panya ngayuku walytja tjuṭakutu nyara Pila-talpiyala nyinanytja tjuṭakutu."

7. *Tjukurpa Layatiyala Nyinanytja Tjuṭaku*

¹⁴ Munu palulanguruṇi piruku wangkangu, "Panya angelpa kutjupangku nyara tjananya kanyini Jesuku walytja tjuṭa tawunu ini Layatiyala nyinanytja tjuṭa. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayuluna Mamaku tjukurpa tjakultjunkupai mulapa. Ngayuluna panya tjukarurungku wangkapai mununa ngayulu panya nganmanyitja mulapa panya Mamalu ngali ilkari manta uwankara iriti palunu.

¹⁵ Ngayulu nyurampa ninti mununa nyangangi nyura kutjupa kutjupa tjuṭa palyannyangka, panya nyura ngayunya kurunpa winkingku wanantja wiya nyuuru-nyuuru purunypa nyinanyi. Kaṇa nyurampa mukuringanyi kurunpa winkingku ngayunya wanantjaku. Palu nyangatja nyura kunkuntu purunytju wanani. Utiṇi nyura mulamulangku wananna, munta tjinguru ngayuku

mukuringkuwiyangku wantirampaniya wantima alatjitu nyuuru-nyuurungku wanantja wiyangku.

¹⁶ Panya alatji nyura ngayunya ngunti wanannyangka ngayulu nyuranya ngula pailku. Panya mai kura ngalkula ulkapatjunkturpai, palu purunypa ngayulu nyuranya wantiku.

¹⁷ Nyuranku walytjangku mirawanipai nyanga alatji, 'Ngananalanku mani pulkatjara nyinanyi. Alatjitula pulka kanyini.' Palu wiya ngurpangku nyura nyanga alatji wangkanyi. Ngayulu nyuranya nyakula ngalturinganyi, panya nyura mani wiya, munu nyura nikit, munu kuru pati.

¹⁸ Palu kulilaya, munuya pitjala ngayula mantjila wiru mulapa. Panya ngayula mantjirampa nyura mani pulkatjara purunypa nyinaku. Munuya pitjala mantara piranta mantjira tjarpa kuntaringkuntjaku-tawara. Munuya mantjila kuru nyitilpai mirantjikitjangku.

¹⁹ Nyaanguruna nyurala nyangatja wangkanyi? Wiya ngayulu nyurampa pulkara mukuringkula paini nyura tjukururu nyinanytjaku. Kaya mulamula pinkurarala Godalakutu kura uwankara wantira.

²⁰ Kulilaya! Ngayuluna ngarala tuwa punga-punganyi, ka kutjupangku ngayunya wangka kulira tuwa alannyangka ngayulu palula tjarpara tjungu nyinaku munuli mai ngalkuku.

²¹ Uwa, wantinytja wiyangkuniya rawangku wananna. Kana nyuranya palyanmankuku ngayula itingka nyinara anangu tjuta kanyintjaku. Panya ngayulu Mamaku tjukurpa tungun-tunguntu palyaningi wantinytja wiyangku. Mununa ilunytjatjanu wankaringkula Mamala tjunguringkula nyinakatingu palumpa tjija wirungka. Munuli tjungungku kanyini manta winki. Ka palu purunypa nyura ngula ngayula tjunguringkula manta winki kanyilku.

²² Uwa, nyura pina alangkumpa ngalya-kulinma Kurunpa Milmilu wangkanyangka Godaku walytja tjutangka.

Uwa, wanyu tjanampa nyanga alatji walkatjura ma-iyala panya ngayuku walytja tjutakutu nyara Layatiyala nyinanytja tjutaku."

4

Godanya Walkuntja Ngura Ilkaritjangka

¹ Palunyatjanungkuna piruku nyangu nyara tuwa alaringu ilkaringka. Ka wangka pulkara wangkangu ilkaringuru turampata purunypa, panya ngayulani nganmanytju wangkangu Jesulu, panya paluru. Mununi paluru altira wangkangu alatji, "Ngalya-pitja ngayulakutu mununi ilangku nyakula kulila, kananta nintila nyaaringkuku ngula nyanganguru nyanga palula malangka."

² Kani Kurunpa Milmilu ngayunya mapalku katingu ilkarikutu, kana nyangu tjija wiru panya mayatja pulka nyinapai ilkaringka ngaranyangka. Ka tjija nyara palula kutjupa nyinangi.

³ Ka palumpa pitalytjingu irnyaningi puli kala wirutjara purunytju. Ka tjija panya wirungka tjutirangu purunypa para-arintara ngarangi kala puli ukiri-ukiri wirutjara palu purunypa.

⁴ Ka tjiya wiru kutjupa tjuṭa ngarangi panya mayatja pulka kutjupa tjuṭa nyinapai palu purunypatu, ka tjiya nampa nyangatja 24 paranyinara arintara wanangingi, ka tjiya palumpa ngururpa ngarangi. Ka tjiya nyara palula tjanala nyinangi tjilpi tjuṭa. Paluru tjana mantara pirantjara nyinangi munuya katangka puturu purunypa kanyiningi, puturu panya mayatjangku kanyilpai gold-nguru palyantja, palu purunypa.

⁵ Ka tjiya panya ngururitjanguru pinpangi wanangara tuu winki. Ka tjiya nyara palula kuranyu waru tjangi 7 ngarala kampangi nyara paluru tjana Godaku kurunpa 7.

⁶ Munu tjiya palula kuranyu uru pulka kaltara purunypa ngaringi kalawatja purunypa wiru mulapa.

Ka ngururpa kuka nyalpitjara kutjara kutjara ngarangi tjiya palula itingka. Nyara paluru tjana kuru kutjara wiya, kuru tjuṭa mulartjara pilpirta munu tjanangka kulu.

⁷ Munuya titutitu ngarangi, kutjupa lion purunypa, kutjupa puluka purunypa, munu kutjupa yunpa anangu purunypa, ka kutjupa walawuru purunypa nyalpi lipiringkula ankupaitjara ngarangi. ⁸ Palu tjana nyalpi kutjara wiya nyalpi mankur-man куртjara ngarangi, ka kuru panya tjuṭa mulapa anangungka winki alatjitu ngarangi, nyalpingka unngu kulu tjuṭa mulapa. Kuka nyara paluru tjana rawangku tjintu tjuṭangka munga tjuṭangka kulu inma inkara walkuningi alatji wangkara,

“Mayatja Godanya milmilpa alatjitu, witulya pulka mulapa uwankarangka waintarinytja titutjara nyinanyi. Paluru kuwaripatjara nyinanytjanya, munu kuwari paluruṭu nyinanyi, munu ngula pitjaku paluruṭu panya kuwaripatjara nyinanytjanya.”

⁹⁻¹⁰ Nyara paluru tjana rawangku tjuṭa-arangku inma inkara palunya walkulpai nyara tjiya wirungka wanka titutjara nyinanytjanya, munuya palunya wirunmankupai palumpa pukularira. Ka paluru tjana inma tjaatarira inkanyangka tjilpi panya tjuṭa waṭungarakatipai tjiya panya palula kuranyu munuya pala palunya walkulpai. Munuya palulanguru puturu panya mayatjaku tjananku kanyira mantjira tjunkupai tjiya panya palula kuranyu munuya paluru tjana wangkapai nyanga alatji,

¹¹ “Nyuntun nganampa Mayatja Godanya nyinanyi mayatja wiru mulapa,

ka nyuntunya uwankarangu rawangku walkuntjaku ngaranya witulya pitalytji pulkanya.

Panya nyuntu uwankara witulyangu palunu.

Munun nyuntu mukuringkula kuwaripatjara tjananya uwankara palura tjunu mantatja tjuṭa munu ilkaritja tjuṭa kulu tjana wanka nyinanytjaku.”

Uwa, alatjiya palunya wangkara walkuningi tjilpi panya tjuṭangu.

5

Nyiri Rulumapi munu Lamalama Kulu

¹ Mununa palulanguru piruku nyangu tjiya panya wirungka nyinanytjalu nyiri kanyinnyangka mara wakungka. Nyiri nyara palunya

rulumapintja kanyiningi. Ka nyiri palula walka kampa kutjara ngarangi kiti 7-ta tjakatjara wantinytja kutjupangku kampakatju alara nyakunytjaku-tawara.

² Palulanguruna nyangu angelpa pulka mununa kulinu paluru katuwanungku mirara wangkanyangka. Nyanga alatji paluru wangkangi, "Ngananya wanyu anangu palya mulapa nyinanyi nyiri nyangatja kiti lampira alantjikitja? Uti wati tjukaruru mulatu kutju alanma."

³ Kaya putu kuliningi kutjupangku nyiri panya mantjira alara nyakunytjaku, panya ilkaringka mantangka kulu kutjupa tjukaruru mulapa nyinanytja wiya alatjitu, miri tjutaku ngurangka kulu.

⁴ Kana kulintjatjanu pulkara ulangi panya wati palyaya putu nguriningi nyiri palunya alara nyakunytjaku.

⁵ Kani palulanguru tjilpi kutjungku wangkangu, "Ulanytja wiya! Nyawa nyara ngaranyi Witulya Puljanya lion purunypa wati Judah-kunu malatja. Nyara paluru nyiri nyangatja mantjira kitingka patintja alara nyakuku. Paluru panya pulka mulapa Mayatja Davidalangu wanapari wanapari ngarakatira wirkankunytja. Nyara paluru uwankarangka waintaringu munu palya mulapa nyinanytjatjanungku nyiri palunya mantjira alalku."

⁶ Kana nyangu Lamalama tjija wirungka itingka ngaranyangka kuka panya nyalpitjara 4-ngka, tjilpi 24-ngka ngurur-ngururpa.* Mununa Lamalama palunya nyakula kuliningi, "Palunya panya kutjupangku iluntankunytjanguru kuwari paluru wankarangkula ngaranyi." Mununa nyangu paluru yuruwilya 7-tjara munu kuru 7-tjara kulu ngaranyangka. Kuru nyara 7 panya kurunpa tjuta Godalu manta winkikutu iyantja.

⁷ Ka Lamalama paluru nyiri mantjinu tjiyangka nyinanytjala mara wakungku kanyinnyangka.

⁸ Ka mantjinnyangka kuka panya nyalpitjara 4 munu tjilpi 24 Lamalama palula kuranyu watungarakatingu walkuntjikitja. Munuya kutjungku kutjungku kanyiningi wangkatjingalpai kita purunypa, munu piti gold-nguru palyantjitja kulu. Palu piti palula tjanala tjau purunypa ngaringi panya tililpai puyu panji wiru pantintjaku. Tjau nyanga paluru panya Godala tjapintja purunypa panya Godaku walytja tjutangu palula tjapinnyangka Godalu kulira pukularipai puyu nyanga wiru palu purunypa pantira.

⁹ Munu paluru tjana inma kuwaritja inkangi kuka panya nyalpitjara 4-ngku munu tjilpi 24-ngku kulu nyanga alatji,

"Nyuntu kutju palya mulapa nyinanyi nyiri panya rulumapi mantjira alantjaku.

Uwa, nyuntu kutjungku kiti lampira wanira nyiri alalku.

Panya nyuntu kutju anga-ilura milkali tjutingu anangu tjutaku ngalk-ilpa

munun tjananya wankarunu wangka kutjupa wangka kutjupa, miri kutjupa miri kutjupa ngura winkinguru tjana Godaku walytjaringkunytjaku.

* 5:6 Lamalama nyanga paluru panya Jesunya Christanya

10 Munu nyuntu tjanampa mayatjarira tjananya tjukurtjara tjuṭa tjunu nyuntumpa walytjapiti uwankara tjana Godaku warka wanganarangku kulira palyantjaku.

Kaya tjana ngula mayatjarira kanyilku Christala tjungungku mantangka anangu winki.”

Alatjiya inkara walkuningi palunya kuka panya nyalpitjara 4-ngku munu tjilpi panya 24-ngku kulu.

11 Mununa palulanguru ngayulu piruku nyangu angelpa winki mungilyi mulapa ngaranyangka. Paluru tjana para-arintara ngarangi tjija panya wiru palula, ka kuka panya nyalpitjara 4 munu tjilpi panya 24 kulu tjungu ngururpa ngarangi.

12 Ka angelpa tjuṭangku inma inkangi katuwanungku nyanga alatji, “Lamalama panya pungkunyitjjanya wiru mulapa nyinanyi.

Kaya uti uwankarangku palunya walkunma.

Panya paluru-mantu mayatja witulya pulkangku uwankara kanyini, munu paluru mayatja kulintja tjukaruru, ninti pulka mulapa.

Kaya uwankarangku palunya titutjarangku alatjitu mirawaninytjaku ngaranyi.”

13 Kana palulanguru kulinu Godalu paluntja uwankarangku tjungungku inma pulkara inkanyangka, anangungku, kukangku, tjulpungku, antipinangku kutjupa kutjupa uwankarangku mantanguru, manta unngunguru, ilkaringuru munu uru unngunguru kulukulu inkangi, nyanga alatji,

“Nyara tjiyangka nyinanytjanya Lamalama kulu pitalyitji wiru mulapa tjukaruru alatjitu.

Kala pulanya titutjarangku mirawaninma panya pula mayatja pulka mulapa nyinanyi titutjara wiyaringkuwiya alatjitu.”

14 Kaya inkara wiyaringkunyangka kuka panya nyalpitjara 4-ngku wangkangu, “Uwa mulapa!” Kaya tjilpi panya 24-ngku kulu palunya watungarakatira walkunu.

6

Lalamangku Kiti Nampa 1 Lampintja

1 Palulanguruna nyangu Lalamangku nyiri panya rulumapi kiti 7-tjara mantjira kiti kutju lampira waninyangka.* Palulanguruna kulinu kuka panya nyalpitjara kutjungku wangkanyangka wangka pulka kapi tuu winki rurkuntja purunypa. Paluru kutjupa ma-altira wangkangu, “Ngalya-pitja.”

2 Kana ma-nyangu nyanytju piranpa kutju utiringkula ngaranyangka. Ka nyanytju palula nyinakatingi wati punaratjara, ka palunya ilkaritjangku puturu purunypa ungu, puturu panya pikangku pungkula waintarinyangka katangka tjunkupai, palu purunypa ungu. Ka paluru nyanytjunga ma-pakanu witulya pulkatjara palumpa mirpantju tjuṭa pungkula wiyantjikitja, panya paluru nganmanypa anu munu tjara pungkula wiyanu, munu kuwari paluru piruku ananyi mirpantju panya kutjupa tjuṭa pungkula wiyantjikitja.

Lalamangku Kiti Nampa 2 Lampintja

* 6:1 Kiti nyanga paluru nganampa kiti purunypa wiya kutjupa nguwanpa wax purunypa nyitinnyangka tjakatjungkupai munu lampinnyangka mapalku alaringkupai.

³ Ka Lamalamangku piruku lampira wañingu kiti kutjupa nampa 2, ka palulanguru kuka panya nyalpitjara kutjupangku nampa 2-ngku ma-altingu kutjupa, “Ngalya-pitja!”

⁴ Ka nyanytju kutjupa utiringu rituwana mulapa. Ka nyanytju palula katu nyinanytjana ilkaritjangku tjula wara pulka ungu munu palunya witunu anangu tjutakutu ankula tjaatamilantjaku tjananku pikangku pungkunytku pukulpa nyinanytja wiyakitjangku.

Lamalamangku Kiti Nampa 3 Lampintja

⁵ Ka Lamalamangku piruku lampira wañingu kiti kutjupa nampa 3, ka palulanguru kuka panya nyalpitjara kutjupangku nampa 3-ngku ma-altingu, “Ngalya-pitja!” Kaña nyangu nyanytju maru utiringkula ngaranyangka. Ka nyanytju palula katu nyinanytjalu marangku kanyiningi mai tjuta wayamilapai.

⁶ Kaña kulinu wangka purunypa kuka panya nyalpitjara nyara 4-wanungku wangkanyangka alatji, “Nyanga alatji ngaranytjaku palyala, panya watingku warakarira mungartjirinytjanungku mani mantjini munu mai pulka payamilantjikitjangku kulini munu titura mai kulunytku wiyani mani uwankara. Palu kulila, punu alipa tjuta munu punu kiripitji tjuta kulu katantankunytku wiyangku wantima.”

Lamalamangku Kiti Nampa 4 Lampintja

⁷ Ka Lamalamangku piruku lampira wañingu kiti kutjupa nampa 4, ka palulanguru kuka panya nyalpitjara kutjupangku nampa 4-ngku ma-altingu, “Ngalya-pitja!”

⁸ Kaña palulanguru ma-nyangu nyanytju miri apakatja nguwanpa utiringkula ngaranyangka, ka palula katu nyinakatingi wati ini *Ilunytkanya*, ka palula malarku nyinakatingi wati kutjupa ini *Warunya* panya *Miri Tjutaku Nguranya*. Ka ilkaritjangku pulanya witunu alatji wangkara, “Ankula pula palyala anangu kutjupatjara ilunytku, kaya kutjupa tjuta pikangku wakannyangka iluku, kutjupa tjuta ailuru pulkangka iluku, kutjupa tjuta pikatjararingkula iluku, kutjupa tjuta inura tjutangu patjannyangka iluku. Alatji pula palyala anangu uwankara mulapa ilunytku wiya, palu kutjupatjara kutju, aapa nguwanpa* ilunytku.”

Lamalamangku Kiti Nampa 5 Lampintja

⁹ Ka palulanguru Lamalamangku piruku lampira wañingu kiti kutjupa nampa 5. Kaña nyangu pitjilta tjaru kurunpa tjuta panya tjananya kutjupa tjutangu iluntankunytku tjuta, panya tjana anangu wanka nyinaralpi Godaku tjukurpa tungun-tunguntu para-wangkangi, ka tjananya iluntanangi.

¹⁰ Nyara paluru tjana katungku mirara wangkangu, “Mayatja God nyuntu witulya pulkanya, milmilpa tjukaruru mulapa. Yaalaran anangu mantatja tjuta nyuntula kuranyu ngaratjinkuku ngurkantankula iluntara ngapartji wiyantjikitjangku nganananya pungkunytku janguru?”

¹¹ Ka tjananya uwankara mantara piranpa ungu tjarpanytku munu tjananya wangkangu, “Pataraya nyinama, panya kutjupa tjuta nyuranya purunypa punganyitu Jesunya tungun-tunguntu wanapai

* 6:8 Aapa nguwanpa -one quarter kutju.

tjuta. Kaṇa tjananya kuḷu nyurala tjungulku. Munuṇa palulangurulta tjananya ngurkantankuku nyuranya pungkunyitja tjuta.”

Lamalamangku Kiti Nampa 6 Lampintja

¹² Kaṇa piruku nyangu Lamalamangku kiti nampa 6 lampira waninyangka. Ka palulanguru manta urira kaṭa-kaṭakatingu. Ka tjintu irnyantja wiyaringkula maruringu, ka kinara rituwanaringu milkali purunypa.

¹³ Ka kililpi tjuta ilkaringuru punka-punkaṇu mantangka, panya mai walpa pulkangku pununguru punkatjingalpai, palu purunypa.

¹⁴ Ka ilkari wiyaringu panya nyiri rulumapintja purunypa, ka puli murpu uwankara munu manta kulunypa tjuta urungka ngururpa ngaranytja tjuta kuḷu urira kampa kutjuparira arangka ngaranytja wiyaringu.

¹⁵ Kaya anangu winki kulpingka ngulu tjarpangu. Panya mayatja pulka tjuta manta winkitja, warmalaku mayatja tjuta, mani pulkatjara tjuta, wati kunpu tjuta, mayatjanga warkaripai tjuta, walytjangku kulira warkaripai tjuta, uwankara ngulu tjarpangu, kutjupatjara kulpingka munu kutjupatjara puli pulkangka kumpinu.

¹⁶ Munuya mirara wangkangu apu tjutangka, “Wanyu ngananaḷa punkala munulanya kutitjura tjia wirungka nyinanytjalu nyakunytjaku-tawara, Lamalamanya kuḷu nganampa mirpanarinytjaku-tawara.

¹⁷ Panya tjintu nganampa wirkanu paluru pula mirpanarira ngananaḷanya warungka urkuwaninytjaku, kala putu kulira utjulku, ‘Yaaltjirikulanku?’ ”

7

Israelkunu Tjuta Nampa 144,000

¹ Nyangangka malangkaṇa nyangu angelpa kutjara kutjara ngaranyangka, panya paluru tjana ngarangi nganytjarta kutjara kutjara, kutju kakarara, kutju wilurara, kutju ulparira, munu kutju alinytjara. Munu paluru tjana walpa markura anga-kanyiningi walpangku manta uru punu kuḷu pulkara uritjingantjaku-tawara.

² Kaṇa ma-nyangu angelpa kutjupa ngalya-wirkankunyangka kakararanguru. Ka paluru marangku kanyiningi punu walkatjunku-pai Godalu ungkunyitja, panya anangu Godaku tjukurta wanganarangku kulilpai tjutangka ngalyangka walkatjunkunytjikit-jangku. Munu paluru wangkangu angelpa panya 4-palangka walpa kuwaripangku anga-kanyinnyangka, panya Godalu tjananya wityanu manta uru kuḷu uritjingara kurantjaku. Alatji angelpa panya paluru tjananya wangkangu,

³ “Wanyu kuwaripa paṭala! Manta uru, munu punu kuḷu wantima kurantja wiyangku, kaṇa Godala wanganarangku kulilpai tjutangka-warara ngalyangka walkatjunkuku.” Munu mulapaṭu tjanala ngalyangka walkatjunu Godaku tjukurta kulilpai tjutangka.

⁴⁻⁸ Kani kutjupangku tjakultjunu, “Anangu nyanga paluru tjana Israelku katja panya 12-nguru tjuta mulapa nampa nyangatja 144,000.

Panya 12,000 Judah-languru, 12,000 Rupintanguru, 12,000 Kaatalanguru, 12,000 Atjalanguru, 12,000 Napatalilanguru, 12,000 Manitjalanguru, 12,000 Tjimiyantanguru, 12,000 Levilanguru, 12,000 Itjakalanguru, 12,000 Tjipulantanguru, 12,000 Josephalanguru, munu 12,000 Pintjimentanguru. Nyanga palula tjanala angeltu ngalyangka walkatjunu Israelkunu tjuťangka.”

Anangu Winki Tjiya Wirungka Kuranyu Ngaranytja

⁹ Munuņa palula malangka nyangu anangu winki mulapa mungilyi ngaranyangka watingku puťu kantamilara wiyantjaku. Paluru tjana ngura kutjupa kutjupa tjuťanguru pitjala ngarangi tjaa kutjupa kutjupa, manta kutjupanguru kutjupanguru, miri kutjupa kutjupa. Munuya pitjala ngarangu tjiya wirungka Lamalamangka kuranyu mantara pirantjara munuya marangku kutjungku kutjungku kanyiningi parka wara puņu taitanguru.

¹⁰ Palunyatjanungkuya mirara wangkangi alatji,

“Godalu tjiyangka nyinanytjalu Lamalamangku kulu nganannya wankarunu.
Kala palunya pulanya titutjarangku alatjitu mirawanira walkulku.”

¹¹ Kaya tjiya panya wiru palula angelpa tjuťa para-arintara ngarangi, ka kuka panya nyalpitjara 4 munu tjilpi panya 24 kulu tjungu ngururpa ngarangi tjiya panya palula itingka. Kaya angelpa uwankarangku watungarakatira Godanya walkuningi,

¹² munuya wangkangi,

“Mulapa Godalu anangu tjuťa wankarunu.

Paluru panya wiru alatjitu nyinanyi palya mulapa, munu witulya pitalytji pulkanya, kulintja tjukarurunya.

Kala nganana nyuntumpa pukularira nyuntunya rawangku alatjitu mirawanira walkuni,
panya Godanya alatjitu titutjara nyinapainya.

Uwa mulapa.”

¹³ Kani tjilpi kutjungku tjapinu, “Nganannya tjanaya nyanga mantara piranpatjara? Yaaltjinguru nyanganpa pitjangu?”

¹⁴ Kana ngapartji palula wangkangu, “Wiya, kuwari kutjuna nyananyi ngurpangku. Tjinguru nyuntu ninti.”

Kani paluru wangkangu, “Anangu nyanga palunya tjananya panya anangu kutjupa tjuťangku pikangku titutjarangku kuraningi, kaya nyanga paluru tjana Jesunya wantinytja wiyangku titutjarangku wananingi munuya wankaringkulalta ngaranyi. Munuya Lamalama ilura milkali tjutinytjanguru mantara piranpatjara nyinanyi palumpa milkalingka paltjira piranmankunyitja.

¹⁵ Pala palulanguruya ngaranyi Godaku timpulangka palumpa tjiyangka kuranyu munuya palunya titutjarangku walkuni mungangka kalala.

“Ka tjiyangka nyinanytjalu tjananya atunymara kanyini munu tjanala tjungu titutjara nyinanyi.

¹⁶ Kaya tjana piruku paltjatjaratjarinytja wiya kapi iluringkunyitja wiya kulu nyinaku titutjara. Ka tjananya piruku tjintungku kulingku kulu kampanytja wiyaringkuku.

17 “Panya Lamalama nyara tjiya wirungka ngururpa nyinanyi, nyara paluru tjanampa tjabat nyinanyi munu tjananya wirura atunymara kanyilku panya tjabatanku tjiipi tjuta kanyintja purunytju. Panya tjabatanku tjiipi kapikutu katipai, tjikira wanka nyinanytjaku, palu purunypa paluru tjananya atunymara kanyilku titutjara wanka nyinanytjaku. Munu paluru tjananya pukulpa mulapa titutjarangu kanyilku piruku ulanytjaku wiya. Kaya ulanytja wiya paluru tjana titutjara pukulpa alatjitu nyinaku.”

8

Lamalamangu Kiti Nampa 7 Lampintja

1-2 Munu palulanguru piruku nyangu Lamalamangu kiti malatja nampa 7 lampira waninyangka, ka ilkarangka uwankara pilunaringu ka kutjupa wangkanytja wiya alatjitu ngarangi.

Munu palulanguru tjukutjuku nyinara ma-nyangulta nyara angelpa 7 ngaranyi panya Godala kuranyu ngarapai tjuta. Ka Godala tjananya turampata 7 ungu kutjungku kutjungku kanyintjaku.

3-4 Ka angelpa kutjupangu kanyiningi piti gold-nguru palyantja tjau purunypa tjunkula tililpai puyu panti wiru pantintjaku. Munu angelpa nyara paluru pitjala ngarangu pitjilpa gold-nguru palyantjijangka itingka tjiya wirungka kuranyu. Panya pitjilpa pala palula katu waru tjau kampapai ngarangi. Ka kutjupangu angelpa palunya tjau purunypa pulka ungu waru pala palula tjunkunytjaku. Ka tjunkunyangka warungku kampangu ka puyu paluru kampara katuringkula wiru pantingu, munu Godaku walytja tjutaku pray-ngka tjunguringu tjana palula tjaminnyangka.

5 Ka angelpa paluru pitjilpa tjau kampapainguru waru mantjira tjunu palumpa pitingka munu mantakutu waningu. Ka waninyangka rurkuningi munu tuuningi munu pinpangi kulukulu munu manta kulu urira kata-katakatingu.

Turampata Puura Wangkatjingantja

6 Ka nyara palulanguru angelpa 7 ritiringangi turampata tjuta puura wangkatjingantjikitja.

7 Ka angelpa nampa 1-tu palumpa turampata puura wangkatjingangu, ka kunata munu waru milkali kulu tjungu ilkaringuru pulkara alatjitu tjutingu mantangka, munu kampangu manta kutjupajara munu punu kutjupajara kulu mankurpa nguwanpa, palu ukiri uwankara kampangu manta winkinga.

8 Ka angelpa nampa 2-ngku palumpa turampata puura wangkatjingangu, ka apu murpu pulka purunypa waru tilingku kpanytja ilkaringuru punkanu uru pulkangka, ka uru kutjupajara milkaliringu.

9 Ka uru pala palula tjanela ungu para-para-ngarapai tjuta ilura wiyaringu ka kutjupajara wanka para-para-ngarangi uru kutjupa tjutangka, ka pauta tjuta uru nyara palula tjanela ankunytja tjuta katakatira minya-minyaringu palu pauta kutjupa tjuta palya ngarangi uru kutjupa tjutangka.

10 Ka angelpa nampa 3-ngku ngapartji puura wangkatjingangu palumpa turampata. Ka kililpi pulkanya ilkaringuru waru tili winki

punkanu. Paluru punkanu uru karutjangka munu kapi walangka kulu, palu tjarangka kutju punkanu mina kutjupa tjutangka wiya.

¹¹ Ka kililpi paluru ini *Mina Kuralpainya* munu panya mina tjarangka punkara mina palunya tjananya kuranu anangungku tjikira ilunytjaku. Ka anangu tjuta ilungu mina nyara palunya tjikira.

¹² Ka angelpa nampa 4-ngku palumpa turampata puura wangkatjanganu, ka kutjupangku tjintu kampa kutjungka maruringkunyjtaku palyanu. Munu palu purunypatu pira kampa kutjungka maruringkunyjtaku palyanu. Munu piruku kililpi kutjupatjara irnyantja wiyaringkunyjtaku palyanu. Ka tjirirpi ngalya-pakara katu ngarangi munu mungartji-mungartjirira piruku irnyantja wiyaringangi tjintu tjutangka ka mungawaluru ngarangi. Ka mungangka palu purunypatu kinarangku munu kililpingku kulukulu irnyara irnyara ngatalpatu wiyaringangi munga tjutangka ka mungawaluru tu ngarangi palu purunypa.

¹³ Mununa palulanguru ira-nyakula nyangu walawuru katu mulapa para-ngaranyangka ilkarangka. Mununa kulinu paluru pulkara wangkanyangka nyanga alatji, "Ai, ngalturinganyina anangu mantatja tjtaku, panya pika pulka mulapa tjanampa uwankaraku ngaraku angelpa malatja mankurtu turampata tjanampa puura wangkatjinganyangka. Ngaltutjara tjuta! Tjanampa kuwari tjituru-tjituru pulka ngaraku manta winkingka." Alatjina kulinu walawurungku wangkanyangka.

9

¹ Ka angelpa nampa 5-ngku palumpa turampata puura wangkatjanganu, kana nyangu kililpi purunypa mantakutu punkannyangka, ka kutjupangku kililpi palunya key ungu piti ngati pulkanya alantjaku.*

² Ka kililpingku key panya mantjira piti palunya alanu, ka tjunampa pulka mulapa pakaningi piti panya pulkanguru waru pulkangku kampakantja purunypa munu tjunampa paluru anga-pitjala utuwarungku tjutunu.

³ Ka palulanguru tjintilyka tjuta ukalingu puyunguru mantakutu pitikatali purunytju wipungku wakantjikitja anangu panya Godaku walytja wiya tjuta.

⁴ Ka tjananya alatji wangkangu, "Tjanpi, puu, parka, munu ukiri kutjupa kutjupa tjtaya ngalkuwiyangku wantima, munu anangu Godaku walka ngalyangka kanyintja tjuta wakantja wiyangku wantima. Palu anangu kutjupa tjuta kutju nyakula wakanma.

⁵ Munu wipungku wakara iluntankunyjtja wiyangku wantima, palu tjananya pikatjaranma kutju rawangku pira 5-arangku, ka panya pitikatalingku wipungku wakalpai palu purunypa tjanampa pika rawa kaarngaraku."

⁶ Palu pira nyara palula tjanala anangu tjutangku putu ilunytjikitjangku kulilku palu wankatuya nyinaku munuya wangkaku, "Walawi kana mapalku ilu, nyangatjana pika pulkangka tjitjanyi kani kaarngaranyi." Alatjiya ilunytjikitja mukuringkuku, palu tjana pika pala palunyatjara ilunytja wiya wanka nyinaku.

* 9:1 Piti nyanga palula panya mamu kurunitja tjuta patara nyinanyi ngula tjintu malatjangka Godalu tjananya warungka urkuwaninyjtaku.

7 Palu tjintilyka nyara paluru tjana anangu pulka nyanytju purunypa munuya riti ngara-ngarangi, panya nyanytju tjuta riti ngarapai pika ankunytjikitja, palu purunypa. Paluru tjana wati yunpa purunypa ngarangi, munuya katangka kanyiningi puturu purunypa, panya puturu mayatjangku kanyilpai gold-nguru palyantja, palu purunypa.

8 Munuya tjana mangka wara kungka purunypa ngarangi, munuya katiti iri pulka mulapa kanyiningi lion tjuta purunytju.

9 Munu tjana pilpirpa ayanatjara purunypa ngarangi. Ka tjana nyalpi uri-uritjingannyangka kulinu pulkara rurkunyangka, panya nyanytju tjuta wakina tjutatjara rurku winki pikakitja wirt-japakalpai, palu purunypa.

10 Paluru tjana wipu pitikatali purunytjara rawa para-ngarangi anangu tjuta wakantjikitja pira mankurpa kutjara.

11 Ka tjintilyka nyanga palumpa tjanampa mayatja angelpa kutju piti ngati pulka kanyilpai ngarangi. Nyara palumpa ini wangka kutjupa Iipuru alatji, *Apatangga* munu wangka kutjupa Kuriki ini *Apaliyangga*.*

12 Uwa, pika pulka panya nganmanyitja wiyaringu, ka nyanga palula malangka pika pulka kutjupa kutjara piruku wirkankuku.

13 Ka angelpa nampa 6-ngku palumpa turampata puura wangkatjingga, kana kulinu kuuna 4-nguru pitjilpa gold-nguru wangkanyangka, pitjilpa panya Godala kuranyu ngarapailanguru.

14 Munu paluru wangkangu panya angelpa nampa 6-ngka, "Ara karu uru pulkatjarakutu ini Yupuraitilakutu munu angelpa 4 karpintja nyinanyangka nyakula araltjara."

15 Panya Godalu tjananya angelpa nyanga 4 karpintja kanyiningi patara ngula palumpa taimingka araltjankunytjikitjangku tjana anangu kutjupatjara manta winkingka iluntankunytjaku. Ka wangkanyangka angelpa panya nampa 6 mulapatu anu munu tjananya nyakula araltjanu.

16 Kani kutjupangku tjakultjunu wati warmala winki mulapa nyanytjunga tatira riti nyinanyangka mungilyi mulapa nampa nyan-ganpa 200 million.

17-18 Kana tjukurpa nyanga palunya tjananya nyangu, ka warmala paluru tjana pilpirpa kutitjitjara purunypa ngarangi. Pilpirpa nyanga paluru tjana ayananguru palyantja kala wirutjara ngarangi. Kutjupatjara rituwana waru tili purunypa, kutjupatjara puluwana ilkari purunypa, ka kutjupatjara yalawana inuntji purunypa. Ka nyanytju tjuta kata lion purunypa ngarangi, ka tjaanguru waru tili pulka pakaningi, puyu pulka kulu munu puli kala inuntji purunypa kulu tili winki kampangi tjaanguru pakara.

Kaya palula tjanalanguru anangu mungilyi mulapa ilungi manta winkingka, palu anangu mungilyi kutjupatjara wankaringu. Anangu tjuta ilungu, ka kutjupatjara wankaringu.

19 Nyanytju tjutangku tjananya iluntanangi tjuta mulapa tjaanguru munu wipunguru kulu panya wipu tjanampa liru kata purunypa ngarangi munu anangu tjuta iluntanangi panya lirungku patjara iluntankupai, palu purunytju.

* 9:11 Ini nyanga paluru pula nganapala alatji wangkanyi *Nyarulpainya*.

²⁰ Ka pika nyanga palulanguru anangu mungilyi mulapa ilungu, palu mungilyi kutjupa wanka nyinanytjatjanu pika nyanga palunya nyakula nguluringkula Godalakutu pinkurarantja wiyangku wantingi. Munuya mamu kurunitja tjuṭa wantir'iyantja wiyangku rawangku mirawanira tjananya pulkanmanangi. Munuya palu purunypatu punu tjuṭa apu tjuṭa kulukulu rawangku mukuringkula tungun-tunguntu pupakatira tjananya pulkanmanangi, panya kutjupa kutjupa tjuṭa tjananku marangku palyanu apunguru pununguru gold-nguru munu tjiilpanguru kulu. Palu nguntiya watarkungku palyanu tjana walytjangku kulira, panya nyanga tjana nyakupai wiya, kulilpai wiya, munu ankupai wiya kulu.

²¹ Munuya paluru tjana rawangku kura palyalkatingi Godalakutu pinkurarara kuranguru piiwiyaringkunyjtikitjangku kulintja wiya. Munuya miripungkukatingi, munuya ilpinytji inkangi, kutjupa kutjupa tjuṭa kuluya palyalkatingi ngangkarinku purunytju ayinayinirira, munuya kampakatu ngaringi kutjupa tjuṭangka, munuya kutitju-nangi. Munuya kura nyanga palunya tjananya palyantjatjanungku piiwiyaringkula Godalakutu pinkurarantja wiyangku alatjitu wantingi.

10

Angelpa Nyiri Kulunypatjara

¹ Palulanguruna nyangu angelpa pulkanya ilkarunguru ukalingkunya. Angelpa nyara paluru ngangkalangka tjutuntja ngarangi mantaratjara purunypa, ka tjutirangu palula katangka ngarangi. Ka paluru yunpangku irnyaningi alatjitu, panya tjiitungku irnyantja purunytju, ka tjalpa paluru waru tili purunypa irnyara ngarangi.

² Munu paluru kanyiningi nyiri rulumapi kulunypa nganmanytju alantja. Munu paluru tjina wakungku paltjunu uru pulkangka munu tjina tjampungku paltjunu mantangka.

³ Munu pulkara mirangu panya lion pulka ngaurmankupai, palu purunypa. Ka paluru mirara wiyaringkunyaangka ilkarunguru ngalya-alunu kapi pulka tuuntja purunytju 7-arangku.

⁴ Kana alunnyaangka kulira wangka palumpa nguwanpa walkatjunu nyiringka. Palu pirukuna kulinu wangka kutjupa ilkarunguru wangkanyaangka, "Nyanga 7-arangku tuura wangkanytja kumpilpa kanyinma walkatjungkunyitja wiyangku!" Kana mulapatu wantingu.

⁵ Ka palulanguru angelpa paluru mara waku ilkarikutu katunu tjakarurungku wangkanytjikitjangku.

⁶⁻⁷ Munu paluru wangkangu,

"Kulila! Mayatja Godanya titutjara nyinapai wiyaringkunyitja wiya alatjitu. Paluru manta, ilkari, uru munu anangu, kuka, kutjupa kutjupa uwankara kulu palunu. Kana palula mirangka kuwari tjakarurungku wangkanyi nyanga alatji, 'Godalu kalkuntja kuwari nyanga utiringanyi. Panya Godalu nyaa palyantjikitjangku iriti kulinu, munu kumpilpa kanyiningi wangkara utintja wiyangku. Munu palumpa wangkatjara tjuṭangka ngula utintjikitjangku kutju kalkunu. Ka kuwari nyanga angelpa nampa 7-tu palumpa turampata puura wangkatjingannyaangka uwankara alatjitu Godalu kalkuntja utiringkuku.'"

Alatji angelpa panya pulkangku wangkangu.

⁸ Kaṇa palulanguru piruku kulinu wangka panyatja, panya ilkarīnguru wangkangi. Alatjini wangkangu, “Ankula mantjila nyiri panya nğanmanytju alantja nyara angeltu kanyini, palunya.”

⁹ Kaṇa ankula tjaṇinu angelpa panya palula ngayunya nyiri palunya ungkunyjtaku. Kaṇi paluru wangkangu, “Mantjila munu ngalkula! Munun kulilku tjuratja purunypa mayu wirunya, palu kuultjuran kanta tjuni kampaku.”

¹⁰ Kaṇa nyiri palunya mantjira ngalkula mulapaṭu kulinigi, “Nyan-gatja tjuratja purunypa ngaranyi mayu wirunya mulapa.” Mununatju kuultjunktjatanu mulapaṭu tjuni pikatjararingu.

¹¹ Kaṇi nyanga palula malangka wangkangu, “Piruku tjakultjura anangu tjuṭangka Godaku tjukurpa panya nyaa wirkankuku nyangan-guru ngula nyanga palula malangka. Anangu tjuṭangka tjakultjura ngura winkingka wangka kutjupa kutjupangka, miri kutjupa kutju-pangka kulū, munu mayatja pulka tjuṭangka kulukulu.”

11

Godaku Wangkatjara Kutjara

¹ Palulanguruṇi punu kulata purunypa ungu tjunkula mitjurumilalpai mununi ungkula wangkangu, “Ma-pitjala Godaku timpulangka punu pala palunya tjunkula wanara mitjuramilala, munu palu purunypatu pitjilpa panya kampara panṭi wiru pakalpaina mitjuramilala. Munu anangu tjuṭa pala timpulangka unngu ngarala Godanya walkunnyangka nyakula tjananya kantamilala.

² Palu yaata urilitja mitjurumilantja wiyangku wantima munu timpula yaata unngutja kutju mitjuramilala. Panya yaata urilitja nyara palunya ngayulu ngura kutjupitja tjuṭa ungkuku, kaya kantura kurara pungkuku yaata palunya ngura milmilpa Jerusalemnya kulū. Alatjiya rawangku kurara pungkuku pira 42-arangku.

³ “Kaṇa wati wangkatjara kutjara witulyankuku mununa pulanya iyalku Godaku tjukurpa anangu tjuṭangka wangkanyjtaku. Ka pula tjukurpa tjituru-tjituru para-tjakultjungkuku rawangku pira 42-arangku. Munu pula mantara walyku-walykungka tjarpara para-ngaraku anangu tjuṭangu nyakula kulintjaku tjukurpa tjituru-tjituru tjuṭa wangkanyangka.”

⁴ Palu wati nyanga paluru pula panya punu alipa kutjara purunypa munu lampa tili kutjara purunypa ngaraku. Panya alipa kutjara lampa kutjara kulū tjungu Godala kuranyu ngarapai, manta winkiku Mayatjangka, palu purunypa wati paluru pula Godala mirangka ngarapai.

⁵ Ka tjinguru kutjupa tjuṭangu wati palunya pulanya pungkula pikatjarannyangka pulampa tjaanguru waru tili pakalku munu tjananya uwankara wiyalku pulampa panya mirpanṭju tjuṭa. Nyanga alatji paluru pula iluntankuku kutjupangu pulanya iluntankunyjik-itjangu kulinyangka.

⁶ Ka Godalu pulanya witulyankuku mina ilkaritja markuntjaku, ka minangu puyintja wiya alatjitu ngaraku pula Godaku tjukurpa para-tjakultjungkunyaangka pira nyara 42-arangku. Munu Godalu piruku pulanya witulyankuku mina anangungku tjikilpai uwankara

kurantjaku kampa kutjuparira milkalirinytjaku. Munu piruku pulanya witulyankuku pika kura kutjupa kutjupa tjuta wirkankunytjaku anangu tjutangka tjana nyakula kulintjaku manta ala lipingka. Alatji Godalu pulanya wangkangu, "Nyupali mukuringkula tjuta-arangku pika kura kutjupa kutjupa tjuta mulapa utila mantangka pala."

⁷ Ka pula Godaku tjukurpa pira panya 42-arangku paratjakultjunkuku, ka nyanga palula malangka piti pulkanguru ngati unngunguru mamu pulka pakalku munu pulanya pika-pikalku. Munu palumpa pulampa pikaringkula pulanya iluntankuku.

⁸ Ka pula miri ngariku iwarangka tawunu pulkala, ngura panya pulampa mayatja punu katakutjarangka utitjunkunytjitjangka. Kala tawunu nyanga palunya kulira ngura kutjupa kutjara kulilpai ini Tjatamanya munta ngura kutjupa ini Itjipanya, panya ngura nyara palula pulalaya palu purunypatu kura nyinangi anangu tjuta.

⁹⁻¹⁰ Kaya anangu uwankarangku ngura uwankaranguru nyakuku pulanya iwarangka miri ngarinyangka munuya pulampa pulkara pukulariku Godaku warkaripai nyanga kutjara ilunyangka, panya paluru pula pika kura kutjupa kutjupa tjuta tjanala wirkankunytjaku palyanigi manta ala lipingka. Munuya tjunutjunkunytja wiyangku wantiku pulanya urilta ngarinytjaku tjintu mankurpa, kaya uwankarangku nyakuku munuya pukularira mai kuka pulka ngalkulku munuyanku pukultu ngaparku ungguku ulytja tjuta, kutjupa kutjupa tjuta kulu.

¹¹ Ka tjintu mankurarinyangka malangka Godalu pulanya wanka nu ngaalypa unggula ka pula pakara ngarangu. Kaya anangu kutjupa tjutangu palunya pulanya pakannyangka nyakula pulkara alatjitu ngulu-nguluringu.

¹² Ka wangkatjara paluru pula wangka pulka kulinu ilkaranguru altinyangka nyanga alatji, "Ngalya-pitja pula nyangaku!" Kaya palumpa pulampa mirpantju tjutangu nyangu pula ilkari katu ankunyangka ngangkalingka.

¹³ Ka manta pulkara urira kata-katakatingu, ka wali tjuta aapa pilukatingu, ka anangu tjuta mulapa ilungu nampa nyangatja 7,000. Ka anangu kutjupa tjuta wankaringkula pulkara alatjitu ngulu-nguluringu munuya wangkangu, "Mulapa Godanya ilkarangka witulya pulka nyinanyi."

¹⁴ Uwa, pika kura nyanga paluru nampa 2 ngarala wiyaringu. Palu pika malatja kura kutjupa nampa 3 kuwari nguwanpa piruku utiringanyi.

Turampata Nampa 7

¹⁵ Ka palulanguru panya angelpa nampa 7-tu palumpa turampata puura wangkatjinganu, ka ilkarangka wangka tjuta purunypa pulkara wangkangi nyanga alatji,

"Kuwari Mayatja Godalu pula Jesulu Christalu witulya pulkangku manta winki nyanga mayatjarira kanyilku titutjarangu."

¹⁶⁻¹⁷ Kaya tjilpi panya 24 tjiyangka Godala kuranyu nyinapai tjuta pakanu, munuya watungarakatira Godanya pulkara walkuningi, alatji wangkara,

"Mayatja God! Nyuntun mulapa titutjara nyinapainya

munun pulka mulapa ngaranyi uwankarangka waintarinytja.

Kala pukularira nyuntunya rawangku mirawaninyi,
 panya nyuntu witulya pulka mulapa nyinanyi munun manta
 winki mayatjangku kanyini,
 ka kuwari Satantu tjana nyuntumpa mirpañtju tjuťangku nyun-
 tunya puťu alatjitu wiyalku.

¹⁸ Ka kutjupa tjuťangku panya nyuntunya wantipai tjuťangku pulkara
 nyuntumpa mirpañarira kuraringu,
 panya taimi nyuntumpa wirkanu munu ngaranyi nyuntu
 tjanampa mirpañarinytjaku
 munu miri uwankara pakaltjingara tjukarurungku wangkara
 tjarantjaku.

Ka tjiñtu nyuntumpa kuwari wirkanu munu ngaranyi nyuntu tjananya
 wiru ungkunyitjaku nyuntumpa tjukurtjara tjuťa.
 Munun nyuntumpa walytja tjuťa kulu tjananya kutju kutju
 ungkuku, anangu pulka tjuťa, tjukutjuku tjuťa kulukulu
 uwankara nyuntunya walkulpai tjuťa.

Ka kuwari nyuntumpa taimi ngaranyi nyuntu anangu kura tjuťa
 tjananya ngapartji pungkula wiyantjaku,
 panya tjana manta winkinga anangu kutjupa tjuťa iluntanangi.”
 Alatjija tjiłpi tjuťangku wangkangi Godala.

¹⁹ Ka Godaku timpula ilkarangka alaringu. Ka pakutja panya
 milmilpa paluru kalkuntjitja utiringu. Ka wanangara pinpangi munu
 kapi tuu winki rurkuningi, kunata pulka kulu punkaningi, ka manta
 urira kata-katakatingu.

12

Minyma Kutju Munu Wañampi Purunypa

¹ Ka palulanguru kutjupa kutjupa ayinayini pulka utiringu
 ilkarangka. Kana urulyarara nyangangi minyma ilkarangka nyi-
 nanyangka, ka tiritja palumpa tjiřirpi purunypa ngarangi, ka palula
 tjinangka tjaru ngarangi kinara, ka paluru katangka kanyiningi
 puťuru mayatjitja kililpi 12-tjara.

² Minyma paluru mukala nyinangi munu iti waťalpi wirkankun-
 yangka kaarngaranyangka mirara ulangi.

³ Kana piruku nyangu kutjupa kutjupa ilkarangka utiringkunyangka
 wañampi rituwana purunypa pulka mulapa kata 7-tjara munu
 yuruwilya 10-tjara munu kata kutju kutjungku kanyiningi puťuru
 purunypa 7, panya puťuru mayatjangku kanyilpai, palu purunypa.

⁴ Munu wañampi paluru wipungku kililpi kutjupatjara uritjingara
 ilkaranguru wañingu mantakutu munu paluru minyma panya palula
 kuranyurira ngarangi tjitji palumpa wirkankunyangka ngalkuntjikitja.

⁵ Ka palulanguru minyma paluru iti nyitayira kanyinu, panya
 paluru ngula pulkaringkula mayatjarira manta winki kunpungku
 kanyintjaku. Palu tjitji palunya mantangkarinyangka kutjupangku
 wañampingka-tawara tjulyara katingu Godalakutu palumpa tjia
 wirukutu.

⁶ Ka minyma paluru iti palumpa tjulyara katinyangka pilakutu wirt-
 japakanu ngura panya Godalu palumpa palyantjitjakutu, ka palunya
 atunymankuku tjiñtu 1,260 ngura nyara palula.

⁷ Ka palulanguru ilkarangka pika pulka ngarangi. Angelpa ini Michaelnga palumpa angelpa tjutatjara pikarangi wanampiku panya munu palumpa angelpa kura tjutaku kulu.

⁸ Palu wanampi palunya Michaeltu tjana ngulutjingara alatjitu wiyanu, kaya piruku ngura ilkarangka nyinanytja wiyaringu wanampinya tjana.

⁹ Panya Michaeltu tjana wanampi palunya urilta waningu. Wanampi paluru panya liru nganmanyitja ini panya Satannga munu ini kutjupa Mamunya, panya anangu manta winkitja ngunti kuralpainya. Panya palunya waningu mantakutu angelpa kura palunya wanalpai tjuta kulu.

¹⁰ Kana kulinu wangka pulka ilkaranguru wangkanyangka nyanga alatji,

“Kuwari nyanga Godalu anangu tjuta wankarunu panya paluru ilkaranguru mamu palunya waningu nyara nganampa kuta kangkuru tjuta ngukara wangkanytjanya. Paluru Godala mirangka tjanaya titutjarangku ngukara wangkapai kalala mungangka. Palu kuwari Godalu palunya waningu alatjitu witulya pulkangku.

Uwa, Godanya mayatja pulka alatjitu nyinanyi, ka palumpa katja Wankarunkupainya panya kuwari kunpu pulkaringkula mayatja pulkatu nyinanyi.

¹¹ Nganampa kutapiti kangkurupiti uwankara mamu Satanta waintaringu. Nyaanguru-puta tjananya mamungku putulinangi? Lamalama ngalkilarira milkali tjutinytjanguyaya waintaringu ka tjananya putulinu. Munuya tjukurpa nyanga palunya kulu tjukarurungku wangkara tjana waintaringu, kaya tjananya kutjupa tjutangu iluntankunyitjikitjangu kukanymanangi, palu paluru tjanaya kulira kurunpa nguluringkunyitja wiya rapa ngarangi ilunytjikitja munuya uwankara pikatjararingkula ilungi tjana pungknyangka.

¹² Palulanguruya ilkarangka nyinanytja tjuta pukulari! Palu ngaltutjara nyura mantangka nyinapai tjuta, urungka nyinapai tjuta kulu, panya Satannga nyuralakutu ukalingu nyurampa miranpa mulapa panya paluru ninti taimi nyara palumpa muturingkunyangka.”

Alatjina kulinu ilkaranguru wangkanyangka.

¹³ Ka wanampi panya paluru kulinu, “Uwa, palyani nyura mantakutu waningu.” Munu paluru kulinu minyama panya tjitji nyitayira kanyintjanya ngulura wataparantjikitjangu.

¹⁴ Ka kutjupangu minyama panya palunya walawuru pulkaku nyalpi kutjara ungu paluru parpakara wirtjapakantjaku wanampingkatawara ngura panya pilakutu panya Godalu palumpa palyantjitjakutu. Ka nyara palulaya mai ungkula palunya atunymara kanyiningi kuli panya kutjara kutjara wanampi palula-tawara.

¹⁵ Ka palulanguru wanampi paluru kapi uru pulkanya walatjunu minyama panya palunya katira ma-waninytjaku.

¹⁶ Palu Godalu manta alanu uru ngatalpatu karalukatinytjaku, ka minyama panya paluru wankaringu.

¹⁷ Ka palulanguru wanampi panya paluru pulkara mirpanaringu munu pika anu minyama panya palumpa katjapitiku munu untalpitiku

panya Godaku walytja tjutaku, panya paluru tjana Godala wanganarangku kulilpai munuya tjukurpa Jesulu wangkanytja uwankara tjukarurungku kulilpai.

Ka wanampi paluru uru pulkangka kantilytja ngarangi.

13

Mamu Kutjara

¹ Kana palulanguru nyangu mamu ngalya-pakannyangka uru pulkanguru kata 7-tjara munu yuruwilya 10-tjara. Ka yuruwilyangka kutjunga kutjunga paluru kanyiningi puturu purunypa panya puturu mayatjangku kanyilpai, palu purunypa, ka ini kura walkatjura wantinytja ngarangi kata kutju kutjungku Godanya anantja-tjara.

² Ka mamu paluru puntu gaya pulka purunypa ngarangi, ka palumpa tjina bear purunypa ngarangi munu tjaa lion purunypa ngarangi. Ka wanampingku mamu palunya palumpa kurunitjangka witulyanu ayinayiningku palyantjaku palu purunytju. Munu mamu panya palunya wangkangu palumpa tjiyangka nyinara mayatjarira uwankara kanyintjaku.

³ Mamu paluru panya kata tjuta, ka kata kutju pika pulka ngaranytjatjanu malaku palyaringkunyitja ngarangi, panya kata pika pulka nguwanpa ilunytjatjanu malaku palyaringkupai palu purunypa. Kaya anangu manta winkitjangku nyakula urulyaranu munuya palunya wananingi mayatjarinyangka.

⁴ Munuya wanampi palunya walkuningi panya paluru mamu panya palunya witulyankunyangka. Munuya mamu palunya kulu walkura wangkangi, "Anangu kutjupa mamu nyanga purunypa ngaranytja wiya alatjitu. Ka kutjupangku palunya pikangku pungkunytjaku wiya ngaranyi, panya paluru witulya pulka ngaranyi uwankarangka waintarinytja."

⁵ Ka wanampingku wangkangu mamu panya gaya puntu purunytja paluru kanany-kananytju wangkanytjaku munu Godanya anantjaku, ka Godalu palunya wantingu paluru palya palunya anantjaku rawangku pira 42-arangku.

⁶ Ka mulapaŕu paluru Godanya anara warkingi, ngura palumpa munu ngura ilkarangka nyinanytja tjuta kulukulu.

⁷ Ka wanampingku panya piruku wangkangu mamu palunya pika pungkunytjaku Godaku walytja tjuta, ka Godalu palunya wantingu paluru palya palunya tjananya pungkunytjaku rawangku pira 42-arangku ka pungkula pungkula paluru tjanala waintaringu. Ka wanampingku piruku wangkangu mamu palunya mayatjarira ngura uwankara kanyintjaku anangu winki wangka kutjupa wangka kutjupa miri kutjupa miri kutjupa kulu. Ka Godalu piruku palunya wantingu paluru palya mayatjarinytjaku munu tjananya kanyintjaku.

⁸ Kaya manta winkingka anangu uwankarangku mamu palunya walkulku, palu Godaku walytja tjutangku kutju mamu palunya mirawaninytja wiyangku wantiku. Panya palumpa tjanampa ini Lamalamangku walkatjunu palumpa nyiringka nganmanytju manta palyantja kuwaripangka tjana palula titutjara wanka nyinanytjaku. Lamalama nyanga palunya panya pungkunytjanya.

⁹ Uwa, palu nyura pina ala ngaralampa uti nyangatja mulapa kulinma,

¹⁰ "Godanya nyurampa ninti panya kutjupatjara nyuranya wit-intjaku ngaranyi munu tjailangka tjarpatjunkunytjaku kulu, kaya nyuranya mulapatu witera tjarpatjunkuku. Munu piruku Godanya ninti nyurampa panya kutjupatjara nyuranya tjula pulkangka iluntankunytjaku, kaya nyuranya mulapatu tjula pulkangka iluntankuku."

Kaya nyangatja kulira uti Godaku walytja tjutangku nguluringkuwiyangku tungun-tunguntu palunya wananma kurunpa rapangku.

¹¹ Kana palulanguru mamu kutjupalpi nyangu manta unngunguru ngalya-pakannyangka. Ka paluru yuruwilya kutjara-tjara ngarangi lamalama purunypa munu paluru wangka wanampi purunytju wangkangi.

¹² Ka mamu nganmanyitjangku wangkangu mamu panya nampa 2-ngka mayatjarira kunpu pulkangu anangu uwankara kanyintjaku. Ka paluru anangu uwankara mantangka nyinanytja tjuta wituwituningi pupakatira walkuntjaku mamu panya nganmanyitja panya kata kutju pika ngaranytjatjanu palyaringkunytjanya.

¹³ Ka mamu nampa 2-ngku ayinayiningku miracle pulka tjuta palyanangi anangu tjutangku nyakula urulyarantjaku. Paluru waru pulka ilkaringuru mantangka punkantjaku palyanangi anangu tjutangka mirangka.

¹⁴ Munu paluru mamu nganmanyitjangka mirangka kulu pulka tjuta palyanangi anangu tjuta ngunti kurantjikitjangku, kaya anangu manta winkitjangku nyakula palumpa mulamularingu, munuya palunya mayatja pulka-palku kulinu. Ka mamu paluru tjananya wituwitunu mamu-mamu palyantjaku mamu panya nganmanyitja purunypa, panya kata kutju tjula pulkanguru pika ngaranytjatjanu palyaringkunytjanya, palu purunypa. Kaya mulapatu palyanu.

¹⁵ Ka mamu panya nampa 2-ngku ngaalya ungu mamu-mamu panya tjana palyantjanya, ka mulapatu wankaringkula wangkapairingu munu anangu kutjupatjara iluntankunytjikitjangku wangkangi palunya pupakatira walkuntja-tjiratjangku.

¹⁶ Ka mamu panya nampa 2-ngku wituwitunu anangu uwankara nampatjara nyinanytjaku. Ka kutjupa tjutangku nampa kanyiningi manyirka wakungka, ka kutjupa tjutangku nampa kanyiningi ngalyangka. Uwankarangkuya nampa kanyiningi yangupalangku, tjilpingku, munu pampangku, mani pulkatjarangku munu mani kulunytjarangku, mayatjaku warakaripaingku munu walytja warakaripai uwankarangku tjana kulu nampa kanyiningi kutjungku kutjungku.

¹⁷ Ka nampa nyara paluru mamu panya palumpa ini ngarangi tjanala uwankarangka. Kaya nampa wiyatjarangku putu mai munu ulytja kutjupa kutjupa tjuta kulu payamilanangi, munuya putu kutjupa kutjupa tjuta tjalamilanangi manikitjangku.

¹⁸ Nampa nyanga palunya nganalunintingku kulilku mamu nyanga palumpa nampa? Kutjupangku ninti ngaralampa nampa nyanga palunya kantamilala munu kulila! Panya nampa nyanga paluru kampa kutjupa ngaranyi watiku ini nampa nyangatja 666.

14

Lamalama Munu Palumpa Walytja Tjuta

¹ Palulanguruna nyangu, “Nyara Lamalama ngaranyi apu murpu katu ngura ini Tjayanta.” Kaya anangu winki mulapa palula tunguringkula ngarangi nampa panya 144,000 tjuta mulapa. Munu paluru tjana ngalyangka kutjungku kutjungku kanyiningi Lamalamaku ini munu palumpa Mamaku ini kulu, walkatjura wantinytja.

² Kana wangka kulinu ilkariguru wangkanyangka kapi rurku winki warangka punkantja purunypa munu wanagara tuuntja purunypa. Wangka wiruna kulinu palunya, panya kitaya wangkatjinalgpai, palu purunypaana kulinu.

³ Kaya anangu panya 144,000 ngarangi kuranyu tjiya panya wirungka munu kuka panya nyalpitjara 4-ngka, tjilpi tjutangka kulu kuranyu. Munuya ngarala inma kuwaritja inkangi panya tjana kutju ninti inma nyara palumpa. Kutjupa tjutangu putu inkangi ngurpangu. Panya nyanga palunya tjananya mantangka nyinanyangkalpi Godalu wankarunu, kaya paluru tjana kutju inma nyanga palumpa nintiringkuntjatjanungku inkangi.

⁴ Panya nyara palunya tjananya Godalu mantangka ngalkilarira wankarunu, kaya paluru tjana-warara wirkanu Godala pulala Lamalama, munuya Godakuringkula palumpa alatjitu ngarangi. Wati nyanga paluru tjana kungkaku ngurpa nyinangi panya paluru tjana tjukaruru alatjitu nyinapai munuya Lamalama panya titutjarangu wanarinkupai.

⁵ Munuya paluru tjana tjukurpa ngunti-ngunti wangkara anantja wiya nyinapai, panya paluru tjana kuraringkuntja wiya nyinapai tjukaruru alatjitu.

Angelpa Mankurpa

⁶ Kana piruku nyangu angelpa kutjupa ilkari katu parangaranyangka. Nyara paluru Tjukurpa Palya titutjara ngaranytjanya katingi manta winkikutu anangu tjutangka tjakultjunkuntjikitjangku, wangka kutjupa kutjupangka, miri kutjupa kutjupangka kulu, ngura kutjupitja kutjupitjangka.

⁷ Munu angelpa paluru mirara wangkangu, “Godanyaya walkunma munuya palunya kutju mirawanima pitalytji pulkanya, panya palumpa taimi ilaringu paluru tjukarurungku ngurkantara tjarantjaku anangu uwankara. Palunyaya walkunma, panya ilkari manta uru munu kapi wala uwankara paluru palyara tjunu, palunya.”

⁸ Ka angelpa kutjupangu malawanungku pitjala wangkangu, “Kulila! Ngura ini Papilangga, panya tjutangu palunya mirawanipai, nyara paluru kuwari pilukatingu, kaya nguraritja tjuta uwankara wiyaringu. Panya anangu tjuta nganmanypalpi kura nyinangi ngura pala palula. Kaya anangu ngura winkinguru pitjala tjanala tunguringkula kuraringangitu pala palunya ngurara tjutangu tjananya wituwitunnyangka. Panya kutjupangu waina tjikintjaku wituwitulpai ka tjikira tarangkaripai, palu purunypatuya wituwitunnyangka kuraringangi Godanya kulintja wiya. Palu ngura pala palunya ngurara tjuta kuwari uwankara wiyaringu.”

9-10 Ka piruku angelpa kutjupangu malatjangku wirkara wangkangu wangka pulkangku nyanga alatji, "Panya tjana mamu ngaya palu purunypa pupakatira walkuni, munu tjana mamu palu purunypa mamu-mamu palyantja kulu walkuni, munu panya tjana nampa marangka ngalyangka kulu kanyini, nyara palumpa tjanampa Godanya pulkara mirpanariku. Munu tjananya warungka urkuwaniku puli yalawana waru tilitjarangka kulu, kaya pulkara ulaku pika pulka kulira. Kaya Lamalamangku munu Godaku angelpa tjutangku kulu tjananya ulanyangka nyakuku.

11 Ka warungku tjananya kampanyangka tjanampa titutjara pakalku wiyaringkunyta wiya. Kaya titutjara miraku pika kaarngaranyangka kulira tjintungka munu mungangka kulu munuya putu kulira utjulku. Panya paluru tjana mamu ngaya purunypa walkuningi, munu mamu-mamu tjana palyantja kulu walkuningi, munuya mamu palumpa nampa walka kanyiningi." Alatji angelpa malatjangku wangkangi, kana kulinigi.

12 Kaya kulinma Godaku walytja tjutangku, Godanya wan-ganarangku kulilpai tjutangku, munu Jesuku mulamularingkupai tjutangku kulu. Tungun-tunguntuya wantinytja wiyangku palunya wanama titutjarangku!

13 Kana piruku wangka kulinu ilkaringuru ngayula wangkanyangka nyanga alatji, "Walkatjura nyiringka tjukurpa nyanga palunya! 'Kuwaringuruya Jesuku walytja tjuta kutjupa tjutangku iluntankun-angka tjana pukulpa mulapa nyinaku.' "

Ka Kurunpa Milmilu kulira wangkangu, "Uwa mulapa, panya tjana Godaku wara pulka palyantjatjanu tjana paku wiyaringkula pukulpa mulapa titutjara nyinaku."

Mantangka Mai Kuru Katara Urantja

14 Nyanga palulanguruna nyangu wati purunypa nyinanyangka ngangkali piranta ilkari katu. Paluru katangka kanyiningi puturu purunypa, panya puturu mayatjangku kanyilpai, palu purunypa, munu manyirkangka kulu kanyiningi tjula kalikali iri pulkatjara.

15 Ka angelpa kutjupa timpula ilkaritjanguru ngalya-pakanu munu mirara wangkangu wati panya ngangkali piranta nyinanytjala, "Mai kururingu nyara mantangka. Ka ankula katara uwankara urala!"

16 Ka paluru mulapa tu mai panya tjuta mantangka pakantja tjulangka katara wanara uranu.

17 Mununa piruku nyangu angelpa kutjupa timpulanguru ngalya-pakannyangka, nyara paluru kanyiningi tjula panya kalikali iri pulkatjara palu purunypatu.

18 Palula malangka angelpa kutjupa pitjangu pitjilpa panya palulan-guru. Angelpa nyara paluru waruku mayatja. Munu paluru mirara wangkangu angelpa panya tjula kalikali kanyilpainya, "Mai kiripitji kururingu nyara mantangka. Ka ankula tjula palangka mai kiripitji tjuta punu tjutanguru katara urala!"

19-20 Ka mulapa tu paluru tjulangka mai tjuta katanu. Munu urara katira piti pulka kiripitji kantura tjulkulpaingka tjunu walingka urilta. Ka mai kiripitji tjuta kantura tjulku nu, ka palulanguru milkali pulka pakanu nyara kiripitji tjulkulpailanguru uru karu pulka purunypa ka uru nyara paluru ngati pulka ngarangi wati liriwanu purunypa, munu

uru paluru wara pulka ma-ukalingangi 300 kilamita. Tjukurpa kiripitji nyanga paluru kampa kutjupa wangkanyi panya Godalu anangu kuralpai tjuta palu purunypa palyalku munu tjananya mirpanarira uwankara wiyalku.

15

Angelpa 7-tu Pika Kura Tjuta Pitingka Kanyintja

¹ Munuṅa piruku nyangu kutjupa kutjupa ilkarangka utiringkungangka, panya angelpa 7 ngarangi. Kaṅa nyakula kawaru-kawaruringu, panya nyara paluru tjana kutjungku kutjungku pika kura 7 kanyiningi. Panya Godanya mirpanaringu anangu kura tjutaku munu angelpa nyanga 7 iyanu anangu tjuta pikatjarantjaku uru manta kulu kurantjaku. Pika nyanga paluru tjana kura mulapa ngarangi pika malatja, Godalu mirpanarira iyantja.

² Kaṅa piruku nyangu manta kalawatja purunypa parariwanu ngarinyangka uru kaltara purunypa, ka waru purunypa tili-tili ngarala wananingi manta pala palula unguwanu. Kaṅa manta panya kalawatja puruntja kantilytja nyangu anangu tjuta ngaranyangka. Nyara paluru tjana panya mantangkalpi nyinara mamu panya ngaya puruntja tungunpungangi, ka tjananya putu wituwituningi palunya pupakatira mirawaninytjaku, mamu-mamu panya palyantja kulu. Anangu nyara paluru tjana mamu panya palumpa walka 666 kanyintja wiyatu. Munu paluru tjana uwankarangku kita purunypa kanyiningi Godalu ungkunyangka.

³ Munuya ngarala wanara inma Moseku inkangi, panya Godaku warakaripai Mosenya wati nyara palumpa inma, munuya Lamalamaku inma kulu inkangi nyanga alatji wangkara,
“God, nyuntu mayatja wityula pulkanya nyinanyi.

Nyuntun pulka mulapa palyalpai, ka nganaṅa nyakula urulyarara nyuntumpa pulkara pukularipai.

Nyuntu ngura winitjaku mayatja pulka nyinanyi,

munun nyuntu tjananya palyanyku tjukarurungku kanyilpai.

⁴ Panya anangu uwankarangku nyuntumpa nguluringkula nyuntunya kulilpai,

munu nyuntunya pupakatira walkulpai.

Tjana uwankarangku nyuntunya mayatja pulka kulilpai.

Nyuntun kutju palya mulapa nyinanyi.

Kaya anangu winki pitjaku ngura uwankaranguru nyuntunya mirawanira pulkanmankunytjikitja,

panya nyuntu tjukarurungku palyannyangka tjutangku nyakupai.”

⁵ Nyanga palulanguruṅa nyangu ilkarangka timpula unngutja alaringkungangka tiinta panya milmilpa Godanya ungu nyinanytja.

⁶ Ka angelpa panya 7 pika panya ungkunyitjikitja timpulanguru pakanu. Nyara paluru tjana mantara piranpa mulapa kanyiningi irnyantja wiru. Kaya paluru tjana kutjungku kutjungku nanpa goldnguru palyantja pilpirwanungku karpira kanyiningi.

⁷ Ka panya kuka nyalpitjara kutjara kutjara ngarangi, ka palula tjanalanguru kutjungku angelpa panya 7 kutju kutju ungu piti goldnguru palyantja. Ka piti pala palula tjanala mirpanpa Godaku

tjaalyngarangi, panya paluru pulkara mirpanarinyi anangu tjutaku kura palyalpai tjutaku.

⁸ Ka Godanya witulya pitalytji pulka titutjara nyinapainya timpula unngu nyinangi ka puyu pulkangku anganu. Ka nyara palula arangka timpulangka uwankara puṭu tjarpaku panya tjarpanytjaku wiya ngaraku, palu angelpa 7-tu pika kutjupa kutjupa tjuta ungkula wiyaringkuyangka kutju palya nyara palula malangka tjarpaku.

16

Angelpa 7-tu Pika Tjuta Ungkunyitja

¹ Palulanguruṇa kulinu wangka pulka timpulanguru tjanala wangkanyangka angelpa panya 7-ta. Alatji tjanala wangkangu, “Ankulaya piti pala 7 nyura kanyintjanguru mantangka pupatjura Godanya mirpanarinytja.”

² Ka angelpa nganmanyitjangku ankula pupatjunu piti munu tjutinu mantangka, ka Godanya mirpanarinyangka anangu panya mamu ngaya purunypa walkulpai tjuta uwankara purtjutjararingu, munuya pulkara pikatjararinkula kaarngarangi. Panya nyara paluru tjana mamuku nampa kanyiningi munu paluru tjana mamu-mamu walkulpai mamu ngaya purunypa tjana palyantja. Nyara paluru tjana purtjutjararingu angeltu pitinguru pupatjunkuyangka.

³ Ka angelpa nampa 2-ngku piti palumpanguru ankula tjutinu uru pulkangka, ka uru paluru kuraringu milkali una purunyarira. Ka kuka kutjupa kutjupa urungka nyinapai uwankara ilura wiyaringu uru pulkangka.

⁴ Ka angelpa nampa 3-ngku piti palumpanguru tjutinu kapi tjikilpai tjutangka karu urutjara tjutangka kulu, ka uwankara milkaliringu.

⁵ Kaṇa kulinu angelpa kapi uwankaraku mayatjangku alatji wangkanyangka,
“God milmilpa, nyuntu tjukarurungku kulira nyangatja palyanu.

Nyuntu panya nganmanypalpi kuwaripatjara nyinanytjatjanu kuwari kulu nyinanyitu.

⁶ Ka panya tjana kuralpai tjutangu nyuntumpa walytjapiti munu nyuntumpa wangkatjara tjuta kulu pungkula milkalitjarara iluntanangi.

Kan palulanguru nyuntu ngapartji palumpa tjanampa kapi milkalirinytjaku palyanu tjana tjikintjaku.”

Alatji angeltu wangkangu.

⁷ Kaṇa palulanguru wangka kutjupa kulinu pitjilpa puyu wiru pakalpailanguru wangkanyangka,

“Uwa, Mayatja God nyuntu panyan pulka mulapa nyinanyi.

Nyuntu tjukarurungku kulira tjananya pikatjararinkunyitjaku palyalpai.”

⁸ Ka palulanguru angelpa nampa 4-ngku piti palumpanguru katira tjiṭungka tjutinu tjananya pulkara kampanytjaku anangu tjuta.

⁹ Ka kuli pulkaringkula mulapatu tjananya kampang, kaya Godaku pulkara mirpanarira warkingi panya tjananya pulkara kampa-nyangka. Utiya pinkurarara Godanya kulira walkunma, palu paluru tjana tungun-tunguntu kura palyalkatingi.

10 Ka angelpa nampa 5-ngku ngapartji palumpa pitinguru tjutinu mamu panya ngaya pulkaku tjiyangka paluru nyinapaingka, ka tjutinnyangka mamu palumpa ngurangka maruringu, kaya mamu palunya kulilpai tjuṅanku pika pulka tjananku kulira anḱura ulara wanangi.

11 Munuya Godaku mirpanarira anara palunya warkingi panya pika pulka tjuṭa angelpa 7-tu ungkunyjanguru. Palu panya tjana tungun-tunguntu rawangku alatjitu kura tjuṭa palyalkatingi Godalakutu malaku aruringkunyjtikitjangku kulintja wiyangku.

12 Ka angelpa nampa 6-ngku ngapartji palumpa pitinguru katira karu uru ini Yupuraitila tjutinu. Ka uru paluru wiyaringkula manta piltiringu mayatja tjuṭa warmala winki kakararanguru ngula pitjala manta pitlingka itipirira pitjanytjaku.

13 Palulanguruna nyangu mamu mankurpa nganngi purunypa utiringkunyangka. Kutju wanampi panya palumpa tjaanguru, kutjupa mamu panya ngaya pulka purunyku tjaanguru, ka kutjupa wangkatjara ngunti kuralpaiku tjaanguru kulu.*

14 Nyara paluru tjana mamu kura mulapa, kutjupa kutjupa pulka tjuṭa ayinayiningku palyalpai. Munu tjana anu manta winkikutu mayatja pulka tjuṭa altinytjikitja tjana warmala winkitjara pitjala ngura kutjungka tjunguringkula tjana Godaku mirpanarira ilkaritja tjuṭa pika pulka pungkunyjtaku. Pika pulka nyara paluru Tjintu Malatjangka ngaraku palumpa taimingka Godalu Mayatja Pulkalu wangkanyangka.*

15 Ka Mayatja Jesulu wangkangu, "Kulilaya! Panya wati kutitjukupai kampangatu pitjapai nyura watarku nyinanyangka, palu purunypa ngayulu pitjaku anangu tjuṭa watarku nyinanyangka. Palu nyura watarku nyinanytja wiya ngayuku ala-ala patara nyinama, ka ngayulu wirkankunyangka Godalu nyuranya pukulmankuku, ka nyura mantara winki rapa ngaraku watarku nyinanytja tjuṭa purunypa nikit para-ngarala kuntaringkunyitja wiya."

16 Ka palulanguru mamu panya nganngi mankurtu mayatja tjuṭa warmala winki altira katira tjungunu ngura ini Ama-kitanta. Ini pala paluru lipuru tjuṭaku wangka.

17 Ka angelpa nampa 7-tu ngapartji piti palumpanguru ilkarangka tjutinu. Ka wangka pulka Godaku tjia wirunguru timpula unngunguru wangkangu, "Alatjitu wiyaringu."

18 Ka wanagara pulkara pinpangi munu tuuningi kulu, ka manta pulkara urira tjilpi-tjilpiraranu. Nyangatja pulka mulapa manta urira tjilpirantja nganmanyitja purunypa wiya.

19 Ka tawunu pulkana ini panya Papilannga tjilpirarara ngura mankuraringu, kaya tawunu ngura kutjupitja uwankara pilukatira wiyaringangi. Panya Godalu kulinigi tawunu pulka panya Papi-lannga ngura nyara palulaya kura kutju palyalpai tjuṭa nyinangi. Munu nyanga palunya kulira pulkara mirpanaringu munu tjananya iluntanu uwankara.

* **16:13** Wangkatjara ngunti kuralpai nyanga paluru mamu nampa 2, panya anangu tjuṭa wituwituningi mamu-mamu palyantjaku. Tjukurpa nyanga palunya nganmanyitju tjakultjunangi chapter 13-ta verse 11-ta. * **16:14** Chapter 19:11-21

²⁰ Ka manta kulunypa tjuṭa uru pulkangka ngururpa ngaranytja tjuṭa arkayirira wiyaringu, apu murpu tjuṭa kulukulu uwankara wiyaringu.

²¹ Ka kunaṭa kalka pulka mulapa apu tjungari pulka purunypa punkaṇu ilkarīnguru anangu tjuṭangka, kaya Godaku mirpanarira anara palunya warkingi panya paluru kunaṭa pulka mulapa tjanalakutu iyannyangka.

17

Minyma Kura Wati Tjuṭangka Ngaripainya

¹ Uwa, angelpa 7 panya pitijara ngarangi. Ka kutju palula tjanalanguru ngayulakutu pitjangu mununi wangkangu, "Pitjala nyawa minyma panya wati tjuṭangka ngaripainya. Nyaratja paluru karu tjuṭangka itingka nyinanyi. Palu kuwari Godalu palunya tjituru-tjituru pulka palyalku ka wiyaringkuku. Palu minyma nyanga palunya kampa kutjupa kulinma, panya anangu tjuṭa tawunu panya pulka ini Papilanta nyinanytja tjuṭa, panya paluru tjana kura pulka mulapa nyinanyi. Tawunu nyara paluru panya karu tjuṭangka itingka ngaranyi, kaya ngura pala palula anangu tjuṭa kura mulapa nyinapai munuya Godanya wantira punu tjuṭa tjananku palyantja walkulpai. Panya minymangu kuri walytja wantira wati tjuṭangka pirtjipai, nyara palu purunypaya Godanya wantira punu tjananku palyantjita tjuṭaku mukuringkupai pulkara.

² Kaya mayatja tjuṭa ngura kutjupa kutjupa tjuṭanguru pitjala tawunu palula tjunguringkula kuraringu minyma kurangka ngarinytja purunypa. Ka palu purunypatu anangu tjuṭa kulu manta winkinguru pitjala kuraringu tawunu nyara palunya ngurarangku wituwitun-nyangka. Nyaa purunypa, panya kutjupangku waina tjikintjaku wituwitulpai, ka tjikira tarangkaripai, palu purunypaya wituwitun-nyangka kuraringangi Godanya kulintja wiya ngura kutjupitja tjuṭa." Nyanga alatjini nintira tjakultjunangi angeltu.

³ Ka palulanguru Kurunpa Milmilṭu ngayunya piruku nintiningi, kaṇi angeltu kurunpa katingu pilakutu. Kaṇa tjukurpa nyangu minyma nyinanyangka mamu tjitin-tjitinta katu. Ka mamu paluru puntu ngaya pulka purunypa munu kata 7-tjara, yuruwilya 10-tjara kulu ngarangi. Ka mamu pala palula anangungka ini tjuṭa ngarangi kura tjuṭa Godanya warkira anantja-tjara.

⁴ Ka minyma paluru mantara wiru tjitin-tjitinpa kanyiningi, munu paluru wiru tjuṭa kanyiningi gold-nguru munu upulanguru palyantja, maratja munu liritja, tjinatja, karilitja kulu. Ka manyirkangu paluru kanyiningi gold-nguru palyantja panikina kura kutjupa kutjupa tjuṭatjara paluru panya palyantja tjuṭa. Panya paluru wati tjuṭangka ngaripai munu kura kutjupa kutjupa tjuṭa palyalpai. Nyara palula tjanalanguru kura palumpa panikinangka tjaalyngarangu.

⁵ Ka palula ngalyangka ini ngarangi tjukurpa kumpilitja puṭu nguwanpa kulintjaku. Nyanga alatji ini paluru ngarangi, "Ngayulu tawunu pulka Papilangga. Ngayulu ngunytju pulka nyinanyi kam-pangkatu ngaripai tjuṭaku, munu kura palyalpai uwankaraku kulu."

⁶ Kaṇa nyangu minyma panya palunya tarangka nyinanyangka. Panya paluru Godaku walytja tjuṭa rawangku iluntara iluntara pulkara

pukularingi, munu tarangka purunypa nyinangi. Paluru Jesunya tungun-tunguntu wanalpai tjuta pungkula wiyantjatjanu pulkara alatjitu pukularingu.

Kana minyma nyanga palunya nyakula pulkara kawaru-kawaruringu.

⁷ Kani angeltu wangkangu, "Nyaakun kawaru-kawarurinyi? Kuwari ngayulu nyuntula utini tjukurpa nyanga kuwari nyuntu nyakunytjtj-janguru panya minyma palunya, munu mamu panya palunya kulu kata 7-tjara munu yuruwilya 10-tjara.

⁸ Mamu nyara paluru panya nganmanypa wanka nyinangi munu paluru ilungu, ka palunya piti ngati pulkangka tjarpatjunu. Ka kuwari piti nyara palulanguru piruku ngalya-pakalku, ka Godalu palunya wiyalku. Palu anangu kura tjtangku mamu palunya pitinguru piruku pakannyangka nyakula pulkara urulyaralku. Panya anangu nyanga palunya tjananya Godalu nyiringka ini walkatjunkunytja wiyatu wanka titutjara nyinanytjaku. Ka panya mamu nyara paluru wanka nyinangi nganmanypa munu panya paluru ilungu, palu piruku paluru utiringkuku, kaya nyakula kata paunaralku.

⁹ "Tjukurpa nyangatja nintipukanku kutju kulilku nyanga kumpilpa ngaranytja tjuta. Kata 7 panya apu murpu 7 nintini minyma paluru nyinanytja. Munu kata 7 paluru tjana piruku kutjupa nintini panya mayatja 7 nyinanytja tjuta.

¹⁰ Ka mayatja 5 nganmanypa wanapari wanapari nyinanytjatjanu wiyaringu, ka kuwari mayatja kutju nampa 6 nyinanyi, ka kutjupa kuwaripa mayatjarinytja wiyatu ngaranyi. Munu paluru ngula mayatjarira rawangku kanyintja wiya tjukutjuku kutju nyinara wiyaringkuku.

¹¹ Ka mamu panya wanka nyinara wiyaringkunytjanya paluru mayatja kutjupa nampa 8. Munu panya mayatja nampa 7 nyinangi, palu purunypatu paluru mala nyinaku mayatja pulka. Palu Godalu palunya warungka urkuwaniku ka paluru wiyaringkuku.

¹² "Ka panya yuruwilya 10-pa nyuntu nyakunytja. Nyara paluru tjana kampa kutjupa nintini mayatja 10-pa, palu kuwaripa paluru tjana mayatjarinytja wiyatu. Ka mamu ngaya pulka purunypa mayatjarira nyinanyangkaya palula tjunguringkula anangu tjuta mayatjarira kanyilku. Palu tjana mayatjarira rawangku kanyintja wiya 1 hour kutju nyinara wiyaringkuku tjukutjuku alatjitu.

¹³ Kaya 10 nyanga paluru tjana wangkangu mamu pala palunya, 'Nyuntu kutjungku mayatjarira uwankara kanyinma, kala nyuntula kutju kulira palyanma.'

¹⁴ Munuya mayatja paluru tjana Lamalamaku pikaringkuku, palu Lamalamanku tjananya pungkula wiyalku, panya paluru mayatja pulka mulapa uwankarangka waintarinytja nyinanyi. Kaya palumpa wanalpai tjtangku palula tjunguringkula tjananya pungkula uwankara wiyalku. Nyanga palunya tjananya panya Godalu ngurkantara altingu, kaya Lamalamanya tungun-tunguntu wanangingi." Nyanga alatjini angeltu utira tjakultjunu.

¹⁵ Mununi piruku wangkangu, "Panya nyuntu nyangu minyma panya kura wati tjtangka ngaripainya uru karu tjtangka itingka nyinanyangka. Palu karu nyara paluru tjana kampa kutjupa nintini

anangu tjuṭa ngura kutjupitja kutjupitja, wangka kutjupa kutjupa, miri kutjupa kutjupa.

¹⁶ Ka panya nyuntu nyangu yuruwilya 10-pa panya kampa kutjupa nintini mayatja 10-pa, munun mamu ngaya pulka purunypa kulu nyangu. Nyara paluru tjana kuraringkuku minyma panya palumpa wati tjuṭangka ngaripaiku. Munuya uwankara paluru kanyintja araltjara wiyalku, ka nikitiriku. Munuya minyma palunya iltjanpa ngalkuku munuya warangka urkuwaniku.

¹⁷ Panya Godalu tjananya mayatja 10-pa kutjuṇu tjana tjuṅguringkula mamu panya palunya wangkara mayatja pulkanmankunytjaku, ka mamu paluru uwankara kanyilku Godalu nganmanytju wangkanytja tjuṭa utiringkunytjaku patara.

¹⁸ “Ka minyma panya palunya kuwari nyuntu nyangu. Nyara palunya tjukurpa kampa kutjupa tjakultjunanyi tawunu pulka panya Papilannga. Tawunu nyara paluru mayatja pulka purunytju mayatjarira mayatja mantatja kutjupa uwankara kanyilpai.”

18

Tawunu Pulka Papilannga Pilukatinytja

¹ Nyanga palula malangkaṇa piruku nyangu angelpa kutjupa ukalingkunyangka ilkaringuru. Ka angelpa nyanga paluru mayatja pulka ngarangi witulya pulka mulapa. Munu paluru tili pitalytji pulkangu pitjala manta winki alatjitu irnyaningi.

² Munu wirkara paluru pulkara mirara wangkangu,

“Tawunu panya Papilannga tjuṭangu mirawanipai, palu nyara paluru kuwari punkara pilukatingu, munu anangu tjuṭa kulu wiyaringu ngura palula nyinanytja tjuṭa. Ka anangu tjuṭa wiya ngaranyangka ngura nyara palula mamu tjuṭa kutju nyinanyi munu tjuṭu kurakura tjuṭa kulu malaringkula nyinara waninyi.

³ Panya anangu tjuṭa kura mulapa nyinangi ngura pala palula, kura tjuṭa kutju kulilpai. Munuya anangu kutjupa tjuṭa ngura winkinguru pitjanytjaku altingi tjanala tjuṅguringkula kuraringkunytjaku, kaya altinyangka mulapatu tjuṭa pitjala tjanala tjuṅguringkula uwankara kuraringu munuya Godaku watarkurira palunya kulintja wiyaringu.

Kaya mayatja pulka tjuṭa kulu ngura tjuṭanguru pitjala tjanala tjuṅguringkula palu purunypatu kuraringangi.

Kaya kutjupa tjuṭa ngura tjuṭanguru kulu pitjangu kutjupa kutjupa tjuṭa tjanala tjalamilantjikitja manikitjangku, munuya tjalamilara mani pulkatjararingu. Panya tawunu nyara palunya ngurara tjuṭa kutjupa kutjupa tjuṭaku pulkara mukuringkupai kurunpa winki, munuya palunya tjananya kutju kulira pulka mulapa payamilalpai.”
Alatji angelpa nyara paluru ngayula wangkangi.

⁴ Kaṇa piruku kulinu wangka kutjupa ilkaringuru wangkanyangka nyanga alatji,

“Ngayuku walytja tjuṭa, tawunu palatjaya wantikati munuya ngalya-pakala. Nyura tjuṅguru tjanala tjuṅgu rawa nyinara tjanala aanarira kura kutju kulilpairingkuku. Ngayulu kuwari tjananya pika pulka ungguku, kaya tawunu palatja wantikati nyura kulu pika urantjaku-tawara.

⁵ Panya tawunu pala palulaya tūtutarangku kura pulka mulapa palyalpai nyinanyi. Ka Godalu nyakula palunya tjananya pungkuntjikitjangku kulini kura pulka rawangku palyannyangka.

⁶ Kuwari palunya tjananya ngapartji pungkuntjaku ngaranyi panya nyuranya pungkuntjanguru. Tjana panya nyuranya rawangku pungangi, ka kuwari palunya tjananya ngapartji pulkara mulapa pungkuntjaku ngaranyi.

⁷ Panya tawunu pala palula nyinanytja tjutangkuyanku walytjangu mirawanipai. Nyara paluru tjana ulytja pulkatjara nyinanyi munuya mani pulka kulu kanyini. Ka tjananya ngapartji uwankara pika pulka pulkara pungkuntjaku ngaranyi.

Panya tawunu nyara palula nyinanytja tjutangkuya wangkapai, 'Nganalananku minyma mayatja pulka purunypa nyinanyi wiru mulapa. Munu nganana wanakalarinytja purunypa wiya nganana pukulpa tūtutjara nyinaku.' Alatjiyanku tawunu nyara palumpa tjanampa ngura wangkara mirawaningi.

⁸ Palu nyanga tjana alatji kanany-kananytju mirawaninyangka Godalu tjananya mapalku pungkuku pika pulka tjana watarku nyinanyangka. Kaya pulkara pikatjararingkuku, munuya ilunyangka pulkara tjituru-tjitururiku, ka ailuru pulka kulu ngaraku ngura pala palula. Panya tawunu nyara palunya Godalu tililku waru pulkangka, ka kampara uwankara wiyalku. Panya Godanya mayatja pulka nyinanyi munu paluru tjukarurungku ngurkantara ngura palunya warangka tililku, ka tjananya kampaku uwankara." Alatji wangka kutjupa ilkaringuru wangkangi.

⁹ Ka mulapa tawunu paluru kampanyangka puyu pulka pakalku, kaya mayatja pulka tjutangu ngura uwankaranguru nyakula pulkara tjituru-tjitururira ulaku. Panya paluru tjana anangu ngura palunya ngurara tjutangka pukulpa tjunguringkupai. Munuya palulanguru nyakula pulkara ulaku Godalu tjananya uwankara tilira wiyanyangka.

¹⁰ Paŋunguruya ngarala ngulungku nyakuku Godalu tjananya kulu tjungu tilintjaku-tawara. Munu nyara paluru tjana ngarala ruuru kulira wangkaku,

"Ai, ngaltutjara tjuta. Tawunu nyara palula nyinapai tjuta kuwari uwankara wiyaringu. Tawunu paluru pulka mulapa ngarangi panya anangu tjutangu palunya mirawanipai. Ka Godalu kuwari tilira mapalku uwankara wiyanu."

¹¹ Kaya wati tjalamilalpai tjuta kulukulu uwankara ulaku tawunu nyara palumpa, panya tjanala payamilalpai tjuta ilunyangka.

¹² Munuya puŋu kulilku,

"Nganalulampa payamilalku gold, tjiilpa, upula, apu kutjupa kutjupa wiru tjuta? Nganalulampa payamilalku mantara kala wiru tjutatjara munu puŋu kutjupa kutjupa paŋti wirutjara tjuta? Nganalulampa kutjupa kutjupa wiru palyantja tjuta payamilalku apunguru ayananguru palyantja tjuta. Alatjitu nyaranpa kampara wiyanu anangu winki, ka uwankara wiyaringu kutjupa nyinanytja wiya.

¹³ Ka nganalu payamilalku wiru paŋtipai tjuta nyanga nganampa, munu waina, uwila, mai ulu, wiita, puluka, tjiipi, nyanytju,

wakina uwankara nyanga nganana kanyintja tjuṭa? Munu nyanga anangu nganampa warkaripai tjuṭa nganalu payamilalku? Alatjitu payamilalpai tjuṭa wiyaringu warungku kampara uwankara wiyanyangka.”

Alatjiya ngarala wangkangi wiru tjuṭa tjalamilalpai tjuṭangu ruuru kulira.

¹⁴ Munuya piruku wangkaku,

“Papilan! Alatjitu panya nyuntu wiru tjuṭa kanyiningi ka kuwari uwankara wiyaringu, mani, kutjupa kutjupa wiru tjuṭa kulu. Kan nyara palu purunypa tjuṭa nyuntu ngula kanyintja wiya ngaraku piruku.”

¹⁵ Alatjiya wangkaku tjalamilalpai tjuṭangu panya paluru tjana tawunu nyara palula tjarpara kutjupa kutjupa tjuṭa tjalamilalpai munuya mani pulkatjararingkupai. Nyara paluru tjana patu ngaraku ngulu Godalu palunya tjananya tjungu tilintjaku-tawara.

¹⁶ Munuya ulara wangkaku,

“Ai, ngaltutjara tjuṭa. Tawunu nyara palula nyinapai tjuṭa uwankara wiyaringu munu tjana kutjupa kutjupa wiru tjuṭa kanyintja kulu wiyaringu. Panya paluru tjana mantara wiru tjuṭangka tjarpapai kala wiru tjuṭatjarangka, munuya liringka tjunkupai, manyirkangka tjarpatjura kanyilpai wiru tjuṭa gold-nguru upulanguru kulu palyantja.

¹⁷ Uwankara nyara paluru tjana kanyintja tjuṭa kuwaritu wiyaringu.”

Ka palu purunypatu pautangka ankupai tjuṭangkuya patu ngarala nyakuku tawunu panya kampanyangka.

¹⁸ Panya pautaku mayatja tjuṭa, pauta katipai tjuṭa, munu tjanala tjungu pautangka ankupai tjuṭa, nyara paluru tjana puyu pulka pakan-nyangka nyakula mirara wangkaku, “Tawunu nyaratja pulka mulapa ngarangi, ka kutjupa palu purunypa ngaranytja wiya ngaraku.”

¹⁹ Munuya nyakula tjuni kuraringkula mantangka tjunpangka katanguru tjarpangu pulkara jtiture-tjitururira. Munuya ulara wangkaku,

“Ngaltutjara tjuṭa, tjananya tawunu nyarangka nyinapai tjuṭa uwankara wiyanu. Tjananya panya mirawanipai anangu tjuṭangu ngura uwankarangu. Ka panya pautatjara tjuṭangu kutjupa kutjupa tjuṭa katira tjanala tjalamilalpai munuya mani pulkatjararingkupai. Ka kuwari tjana kutjupa kutjupa wiru tjuṭa kanyintja wiyaringu munuya uwankara maralaringu.

²⁰ Kaya kuwari uwankara pukulari ilkarangka nyinanytja tjuṭa ngura nyara paluru wiyaringkunyaangka. Pukulariya Godaku walytja tjuṭa Godaku wangkatjara tjuṭa kulu munu Jesulu iyantja tjuṭa kulukulu uwankara. Panya Godalu ngura nyara palula nyinanytja tjuṭa uwankara iluntara wiyalku ngapartji nyuralanguru.”

Alatjiya wangkangi pautangka ankupai tjuṭangu.

²¹ Ka palulanguru angelpa kunpu pulkangu apu pulka mulapa katura uru pulkangka anta-waningu. Munu alatji wangkangu,

“Apu nyangatjana wanira urungka tjarpatjunu ka wiyaringu. Ka palu purunypa tawunu Papilangga wiyaringkuku, ka nyura puṭu nyakuku.

²² Anangu kita wangkatjingalpai tjuṭa munu turampata puura wangkatjingalpai tjuṭa, inma wirura inkapai tjuṭa kulu uwankara waringkuku ngura nyara palula. Munuya kutjupa kutjupa tjuṭangka warkaripai tjuṭa, mai uninyapa runyura wanalpai tjuṭa, nyanga paluru tjana uwankara wiyaringkuku.

²³ Munuya tawunu nyara palula piruku lampa tilintja wiya ngaraku, munuya piruku kuri altinytja wiya nyinaku panya uwankara wiyaringkunyangka.

Tawunu nyara palula panya wati tjalamilalpai tjuṭa nintipuka nyinangi, ka anangu manta winkitjangku tjananya mirawaningi. Kaya tawunu palula ngangkari tjuṭangku kulu anangu ngura winkitja ngunti kuraningi ayinayiningku palyara, kaya nyakula kulira mulamularingangi.

²⁴ Palu panya ngura Papilanta nyinanytja tjuṭangku Godaku wangkatjara tjuṭa iluntanangi, palumpa walytja tjuṭa kulukulu, munuya anangu kutjupa tjuṭa kulukulu iluntanangi ngura winkangka. Ka nyanga palulanguru Godalu palunya tjananya ngapartji iluntara uwankara wiyalku.”

Alatji angelpa kunpu pulkangku wangkangu.

19

¹ Nyanga palula malangka kulinu anangu tjuṭa mulatu ilkaringka tungungku mirara wangkanyangka alatji,

“Aliluya! Godanyala mirawanima!

Panya paluru nganampa wankarunkupainya, pitalytji wiru mulapa witulya pulka nyinanyi.

² Paluru tjukarurungku kulira palyalpai.

Munu nyara paluru tjukarurungku alatjitu minyama panya anangu ngura winkitja kurantjitja wiyanu.

Panya paluru tjanala pirtjingi munu tjananyatu rawangku wituwituningi kura kutju kulira rawangku palyantjaku.

Munu paluru Godaku walytja kutjupa tjuṭa iluntanangi.

Nyara palulanguru Godanya mirpanaringu munu minyama palunya ngapartji iluntanu.”

Alatjiya mirara wangkangi ilkaringka anangu tjuṭa mulatu.

³ Munuya piruku wangkangi alatji,

“Aliluya, Godanyala mirawanima!

Panya paluru tawunu nyara palunya tilinu warungka, ka kampanyangka puyu ngaranyi titutjara.”

⁴ Kaya tjilpi 24-ngku munu kuka panya nyalpitjara 4-ngku watungarakatira Mayatja Godanya walkuningi tjiya wirungka nyinanytjanya. Munuya wangkangu,

“Aliluya! Mulapala Godanya mirawanima!”

Lamalamangku Kuri Altinytja

⁵ Palulanguruna wangka kulinu tjiya wirunguru wangkanyangka nyanga alatji,

“Wanyuya Godanya mirawanima uwankarangku palunya wan-ganarangku kulilpai tjuṭangku, pulka tjuṭangku munu tjukutjuku tjuṭangku munu palunya kulira nguluringkupai tjuṭangku kulu.”

6 Kaṇa palulanguru kulinu anangu mungilyingku wangkara waṇinyangka. Nyara paluru tjana kapi pulka tuuntja purunypa wangkangi munu kapi wala wararanguru ukalingkula rurkuntja purunypa wangkangi tjuṭa mulapa. Munuya uwankarangku nyanga alatji wangkangi,

“Aliluya! Godanyala mirawanima! Panya paluru nganampa mayatja pulka mulatu uwankara kanyini.

7 Kala palumpa pukularira palunya kutju mirawanima pitalytji pulka nyinanyangka.

Panya kuwari Lamalamangku altinytjaku ngaranyi, ka panya palumpa kuri ritiringkula paṭani.

8 Ka pala palunya ungu mantara piranpa irnyalpai wiru mulapa, ka tjarpara ngarala patanangi.”

(Mantara nyanga paluru kampa kutjupa nintini tjukarurungku palyantja tjuṭa Godaku walytja tjuṭangku.)

9 Kaṇi angeltu wangkangu, “Walkatjura tjukurpa nyanga palunya alatji, ‘Godalu altingu kutjupa tjuṭa pitjala tjunguringkula mai ngalkuntjaku Lamalamangku kuri altinytjitjangka. Ka nyara tjana pukulpa mularariku tjunguringkula.’” Mununi piruku wangkangu angeltu, “Tjukurpa nyangatja tjukaruru mulapa Godaku.”

10 Kaṇa palula tjinangka watungarakatingu palunya walkuntjikitja, kaṇi markunu, “Mirawaninytja wiyangkuni wantima, Godanya kutju walkunma. Ngayuluna angelpa Godaku warka palyalpai nyuntunya purunypa, nyuntumpa kuṭa kangkuru tjuṭa purunypa, panya nyuntu nganana uwankarangku wanganarangku kulilpai tjukurpa Jesulu wangkanytja. Tjukurpa nyara palunya panya Godaku wangkatjara tjuṭangku kulira rawangku tjakultjunangi.”

Nyanytju Piranta Tatira Ankunytja

11 Palulanguruna nyangu ilkarṇi alaringkunyangka, ka nyanytju piranpa utiringu. Ka palula katu tatira nyinanytjanya ini kutjara nyanga alatji *Tjukarurungku Kulira Palyalpainya*, munu ini kutjupa *Tjurkultu Wangkapainya*. Panya paluru tjukarurungku ngurkantankupai anangu kura tjuṭa munu palya tjuṭa kulu, munu paluru tjaultji tjuṭatjara ankupai pika pungkunytjikitja munu tjukarurungku pungkupai anangu kura palyalpai tjuṭa.

12 Ka kuru palumpa waru tili purunypa kampangi munu paluru katangka kanyiningi puturu purunypa tjuṭa, panya puturu mayatja pulkangku kanyilpai, palu purunypa. Ka palula ini walkatjunktjara ngarangi palu anangu tjuṭa ngurpa ini nyara palumpa, paluru kutju ninti.

13 Ka mantara palumpa milkalingku uwankara tjutuntja ngarangi, kaya palunya ini wangkapai *Godaku Tjukurnga*.

14 Kaya ilkaritja tjuṭa pikakitja palula tjunguringkula anangi nyanytju pirantjara tjuṭa munu nyara paluru tjana mantara piranpa kanyiningi.

15 Ka wati nyara paluru kuranyu ankunytjalu tjaangku kanyiningi tjuṭa iri pulka ngura winkitja pungkula waintarinytjikitjangku. Kaya tjana palunya putu ngapartji iluntankuku. Ka paluru tjananya pauntjingara kanyilku kunpu pulkangku. Palu panya Godanya mirpanpa mulapa nyinanyi palula tungunpungkupai tjuṭaku. Ka wati paluru

tjananya wiyalku. Panya mai kiripitji kantura tjulkura wiyalpai, palu purunymankuku tjananya.

¹⁶ Ka palumpa mantarangka munu tjuntangka kulu ini nyanga alatji walkatjungkuntja ngarangi,

Milmilmankuntja Mayatja Godaku Palyantjaku.

¹⁷ Palulanguruna nyangu angelpa kutju tjintu-walara-walara ngaranyangka. Ka paluru mirara wangkangi tjulpu tjuta katu para-para-ngaranyangka, "Pitjalaya tjunguriwa panya Godalu nyuranya kuwari kuka pulka unganyi.

¹⁸ Munuya ngalkula miri tjuta iltjanpa ngarinyangka nyanytju tjuta kulukulu. Nyanga ngarinyiya mayatja pulka tjuta, munu warmala pulka, tjanampa mayatja tjuta kulu munu nyanytju tjuta, nyanytjunga pitjanytja tjuta kulu munu anangu warkaripai tjuta, walytjangku kulira palyalpai tjuta kulu, anangu winki alatjitu pulka, kulunypa, ngaltutjara, mani pulkatjara kulukulu, kaya uwankara alatjitu ngalkunma." Nyanga alatji angelpa paluru wangkangu tjulpu tjutangka.

¹⁹ Palulanguruna nyangu mamu panya gaya pulka purunypa munu mayatja mantatja uwankara warmala winki tjungurungkunyangka. Tjana tjungurungkula patara ngarangi panya palumpa nyanytju pirantjaraku palumpa warmalaku kulu pikaringkuntjikitja.

²⁰ Ka mamu panya palunya karpira katingu munu palumpa wangkatjara panya ngunti kuralpainya kulu tjungu katingu panya nyara paluru kutjupa kutjupa tjuta ayinayiningku palyaningi mamungka mirangka. Paluru panya alatji palyara ngunti kuraningi anangu nampatjara tjuta munu paluru tjananya ngunti wituwituningi mamu-mamu panya mamu gaya purunypa pupakatira walkuntjaku. Ka mamu palunya munu palumpa wangkatjara panya ngunti kuralpainya pulanya waru lipi pulkangka waningu puli tili winki kampapaingka. Ka pula rawa nyinara warungku kampanyangka pika pulka kaarngaranyangka titutjarangu kulilku.

²¹ Ka mamu panya palumpa warmala nyanytju pirantjarangu tjula tjaangku kanyintjala pungkula iluntanu, ka miri winki ilunytja ngarinyangka tjulpu tjutangku pitjala ngalkula uwankara paljaringu.

20

Kuli 1,000

¹ Palulanguruna nyangu angelpa ilkaringuru ukalingkunyangka, ka paluru marangku karpintjikitjangku kanyiningi ankapa wituwitu munu key kulu kanyiningi pitji ngati pulka patintja alantjikitjangku.

²⁻³ Munu angelpa paluru mamu panya wanampi purunypa witera ankapangka karpira tjarpatjunu pitji ngati pulkala munu angatjura key-ngka patira wantingu pitji palula rawa nyinanytjaku kuli 1,000 anangu tjuta pakara ngunti kurantjaku-tawara. Wanampi nyanga paluru ini Satangga. Ka kuli 1,000 ma-ngarala wiyaringkunyangka angeltu palunya piruku walatjungkuku unytjungku, ka wanampi nyanga paluru mantangka tjukutjuku para-ngarala piruku malaku wiyaringkuku.

⁴ Palulanguruna nyangu kutjupa tjuta nyinanyangka tjiya wiru tjutangka. Ka tjananya Godalu wangkangu anangu tjuta tjanala

kuranyu ngaratjura tjukarurungku ngurkantankunytjaku. Munuṅa piruku nyangu kurunpa tjuṅa ngaranyangka nganmanypa panya ilunytja tjuṅa. Panya tjananya kutjupa tjuṅaṅku iluntanu Godaku tjukurpa wangkanyangka munu tjukurpa Jesunyatjara kulū tjukarurungku tjakultjungkunyangka. Panya paluru tjana mamu gaya pulka purunypa walkuntja wiyangku wantingi munu mamu-mamu panya palyantja kulū pupakatira mirawaninytja wiyangku wantingi. Munuya paluru tjana panya mamuku nampa ngalyangka marangka kanyintja wiya nyinangi. Nyanga paluru tjana wankaringkula Jesula tjunguringkula mayatjarira nyinangi kuli 1,000.

⁵ Nyanga palunya tjananya-warara Godalu wankaṅu. (Palu kutjupa tjuṅa wankaringkunytja wiya kuwaripa miri ngarinyi kuli 1,000 ngarala wiyaringkunytjaku patara.)

⁶ Ka panya nganmanypa wankaringkunytja tjuṅa wiru nyinaku pukulpa mulapa. Nyanga paluru tjana panya Godaku walytja mulapa, ka tjananya warukutu piruku ilunytjaku waninytja wiyangku wantiku. Palu tjana Godaku tjukurtjara tjuṅa nyinaku Jesuku Christaku kulu munuya palula tjunguringkula mayatjarira nyinaku rawa mulapa kuli 1,000.

Satannga Warungka Tjarpatjungkunytja

⁷ Ka angeltu kuli 1,000 wiyaringkunyangka malangka ngula wanampi panya Satannga pitinguru pakaltjingara walatjungkuku.

⁸ Ka paluru ankula anangu manta winkitjangka wangkara ngunti mukumukulku tjana palula tjunguringkunytjaku. Nyanga palumpa tjanampa ini kutjara ngaraku Kaakanya munu Maikaakanya, ka tjananya ini nyanga kutjaratjara Satantu altiku anangu mungilyi mulapa palula tjunguringkula pika pulka pungkunytjaku.

⁹⁻¹⁰ Kaya pitja-pitjaku manta lipiwanu munuya pika pungkunytjikitja ngaraku Godaku walytja tjuṅa ngurutatjura ngurangka nyinanyangka tawunu nyara Godalu mukulyangku kanyintjitjangka. Palu waru pulka mulapa ilkaringuru palula tjanala punkalku munu tjananya uwankara wiyalku, panya tjana Satantu ngunti kurannyangka palunya wanangingi. Ka Godalu Satannga warungka waniku, ka panya palula pulala tjunguringkuku waru unngu mamu gaya purunytja munu palumpa wangkatjara ngunti kuralpaingka kulū. Ka paluru tjana warungku kampanyangka pika kulira miraku rawa alatjitu mungangka kalala wiyaringkunytja wiya titutjara.

Tjintu Malatjangka Godalu Ngurkantankunytja

¹¹ Palulanguruṅa nyangu tjiya piranpa pulka mayatja pulka nyinapai. Ka palula kutju nyinangi. Ka pala palula mirangka ilkari, manta, uwankara mapalku wiyaringu.

¹² Kana palulanguru nyangu anangu uwankara mulapa ilunytjatjanu pakara ngaranyangka tjiya palula kuranyu, wati, minyma, tjitji uwankara mayatja pulka munu mayatja wiya kulukulu. Ka palulanguru nyiri tjuṅa kanyintjatjanungku alara wananu munu piruku nyiri kutjupa alanutu panya nyiri palula anangu ini tjuṅa ngaranyi paluru tjana wanka titutjara nyinanytjaku. Ka palulanguru tjiyangka nyinanytjalu nyiri tjuṅanguru nyakula anangu tjuṅa

tjukaꝛurungku wangkangi panya nyiringku tjakultjunangi tjana mantangka nyinaralpi palyantja uwankara. Ka paluru tjananya uwankara tjukaꝛurungku ngurkantanangi tjana palyantjitjanguru. ¹³ Munuṅa nyangu anangu uwankara mantangkalpi ilunytja wankaringkula pakara ngaranyangka tjiyangka kuranyu. Ka tjananya tjiyangka nyinanytjalu uwankaratu tjukaꝛurungku ngurkantanangi nyiringuru nyakula tjana mantangka nyinaralpi palyantja uwankara.

¹⁴ Munu paluru *Ilunytjanya* pulanya *Miri Tjutaku Nguranya* waru pulkangka waningu.

¹⁵ Munu paluru nyiri wankalanguru anangu tjuta ini putu nyakula tjananya waru pulkangkaṅu waningu. Paluru tjana nganmanypa mantangkalpi ilungu palu nyanga warungka waningytja kutjupa tjana waru unngu nyinara titutjara miranytjaku.

21

Ilkari Kuwaritja Munu Manta Kuwaritja

¹ Palulanguruṅa nyangu manta munu ilkari kuwaritja ngaranyangka. Panya manta ilkari nganmanypa ngaranytja wiyaringu, uru pulka kulu wiyaringu.

² Kaṅa palulanguru nyangu Godaku tawunu pulkanya ngura panya Jerusalemanya ilkaringuru ukalingkunyangka. Tawunu paluru milmilpa wiru mulapa. Panya kungkanku kuri altinytjikitja paluru mantara wirungka tjarpapai, nyara palu purunypa wiru mulapa tawunu nyara paluru.

³ Kaṅa wangka kulinu tjiya wirunguru mirara wangkanyangka, “Uwa, kuwari Godanya anangu tjutangka tjunguringkula ngurararira tjanala nyinaku, kaya palumpa walytjapiti palula tjungu titutjara nyinaku. Ka paluru tjananya mayatja wiru mulatu kanyilku,

⁴ munu tjananya paluru kuru ilanypa munilku piruku tjuni katakatira ulanytjaku wiya, kaya pukulpa kutju nyinaku. Kaya piruku ilunytja wiya ngaraku munuya piruku pika kulira nyarinytja wiya nyinaku. Panya mantangkalpi nyanga palu purunypa tjuta ngarangi, nyanga paluru tjana uwankara wiyaringkuku kaya pukulpa mulapa kutju titutjara nyinaku.”

⁵ Munuṅa palulanguru wangkangu tjiya wirungka nyinanytjalu, “Ngayuluṅa uwankara kampa kutjupara wiru palyalku.” Munuṅi piruku wangkangu, “Ngayulu nyanga kuwari wangkanytja nyiringka walkatjura, panya nyanga paluru tjukaꝛuru mulapa ngaranyi winkingu kulira mulamularingkunytjaku.”

⁶ Munuṅi wangkangu, “Ngayulu wangkanytja uwankara mulapa alatjiringu. Ngayuluṅa nganmanyitja mulapa uwankara wiyangkalpi nyinanytjanya, munuṅa panya uwankara wiyaringkunyangka nyinaku titutjara wiyaringkunyitja wiya. Ka kutjupa kapi-tjiratja ilurinkunyangka ngayulu kapi intjanungku ungkuku kapi wala wankan-guru tjikira nyantulpa wanka titutjara nyinanytjaku.

⁷ Uwa, nyura wantinytja wiyangu ngayunya titutjarangu wanannyangka ngayulu nyuranya rawangu wirura atunymara kanyilku. Ngayulu nyurampa Mama Godanya nyinaku, ka nyura ngayuku tjitji mulapa nyinaku.

8 “Palu anangu kuralpai tjuṭa waru pulkangka tjarpaku. Panya kutjupa tjuṭangku wanara ngatalpatu wantipai kura kutjupa kutjupa tjanala wirkankunyangka, ka kutjupa tjuṭangku tjukutjuku mulamularingkunytjatjanungku wantipai, kutjupa tjuṭangku kura kutjupa kutjupa tjuṭa palyalpai, kutjupa tjuṭangku miripungkupai, kutjupatarajara kampangkatu kutjupangka kutjupangka ngaripai kuri wiyangka, kutjupa tjuṭangku iratingka kuralpai, kutjupa tjuṭangku pununguru apunguru palyantja walkulpai, kutjupa tjuṭangku ngunti wangkapai. Nyanga palu purunypa palyalpai uwankarana tjarpatjunkuku waru pulkangka puli yalawana kampapai-tjarangka. Panya paluru tjana mantangkalpi nganmanypa ilungu, kana tjananya wankanu piruku waru pulkangka waninytjikitjangku.”

Tawunu Jerusalemnya Kuwaritja

9 Ka angelpa 7 panyatja ngarangi panya pika tjuṭa nganmanytju ungangi pititjarangku. Kani kutjungku pitjala wangkangu, “Wanalan kananta nintila Lamalamaku kuri panya kuwari altinytjaku.”

10 Ka palulanguru Kurunpa Milmiltu ngayunya piruku nintiningi, kani kurunpa ngayunya angeltu katingu apu murpu pulkakutu mununi katunguru tjukurpa nintinu Godaku tawunu milmilpa Jerusalemnya ilkarunguru ukalingkunyangka.

11 Ka tawunu palunya irnyaningi Godaku pitalytjingu, panya upula irnya-irnyalpai kulingku kampanyangka, palu purunypa.

12 Ka Godaku tawunu ngururpa ngaranyangka wall-pa wara pulka para-ngarala arintanangi kuunatjara kuunatarajara. Ka wall-ta kaita 12 ngarangi, ka angelpa tjuṭangku kaita kutju-kutjunguru ngarala atunymanangi. Ka wati panya Jacobaku katja tjuṭa 12 ini ngarangi kaitangka kutju kutju walkatjura wantinytja. (Katja nyanga palula tjanalanguru panya anangu Israelkunu tjuṭa ma-tjuṭaringu malatja malatja.)

13 Ka kaita panya 12 wall-ta ngarangi, kakararanguru mankurpa, munu ulpariranguru mankurpa kutjupa, alinytjaranguru mankurpa kutjupa.

14 Ka puli walu 12 para-ngarala wananingi, ka palula tjanala katu wall paluru para-ngarala wananingi. Ka watiku ini tjuṭa ngarangi walkatjunkunytja walu pala palula tjanala walu panya 12-ngka, panya wati 12 Lamalamangku nganmanytju iyantja tjuṭa Tjukurpa Palya wangkanytjaku, nyara palumpa tjanampa ini tjuṭa.

15 Ka angelpa panya paluru ngayula wangkanytjalu kanyiningi punu tjukaruru mitjurumilalpai gold-nguru palyantja tawunu palula tjunkula wanara mitjurumilantjikitjangku wall-ta kaita tjuṭangka kulu.

16 Ka tawunu nyara paluru kuuna-kuuna wara pulkanya ngarangi, ka angeltu tawunu palunya kakarara mitjuramilanu wara pulka mulapa 2,400 kilamita,* munu piruku ulpariralku mitjuramilanu palu purunypatu 2,400 kilamita, munu palu purunypatu mitjuramilanu wiluraralku alinytjaralku kulu wara pulka nampa palunypatu 2,400 kilamita uwankara. Munu paluru piruku katukutungku mitjuramilanu nampa palu purunypatu wara mulapa.

* 21:16 2,400 kilamita parari mulapa nyaa purunypa, Pukatjalanguru munu Melbourne-takutu, palu purunypa.

17 Munu piruku tawunu palunya wall-pa para-arintara ngaranytjanya angeltu mitjuramilanu lipiwanu nampa nyangatja 60 metre.*

18 Kana nyangu wall-pa palunya wiru mulapa ngaranyangka panya puli ukiri-ukiri wirunguru palyantja puli ini Jasper-nguru. Ka tawunu paluru wiru mulapa ngarangi gold-nguru palyantja kalawatja purunypa panya wiitjurulypa nyakupai, palu purunypa palya mulapa.

19-20 Kana nyangu wall-ku tjinangka walu panya 12-ngka puli upula tjuta tjakatjura wantinytja kala kutjupa kutjupatjara wiru mulapa. Walu kutjungka upula kala ukiri-ukiri ngarangi, ka kutjupangka kala ilkari purunypa ngarangi, ka kutjupangka piranpa ngarangi, ka kutjupangka tjin-tjintinpa ngarangi, ka kutjupangka inuntji purunypa ngarangi ka kutjupangka maru ngarangi. Kala wiru mulapaya ngarangi walu nyanga 12-ngka.

21 Mununa kaita 12 kulu nyangu nyanga alatji ngaranyangka, upula ini pearl-nguru palyantja palu manguri-manguri pulka mulapa, kala piranpa. Mununa piruku nyangu iwara wiru mulapa mangarinyangka gold-nguru palyantja palu nyangatja kutjupa nguwanpa, panya kalawatja unnguwanungku munkaratjarara nyakupai, palu purunypa.

22 Palu putuna nyangu timpula tawunu pala palula unngu ngaranyangka Godanya walkuntjaku, panya pula Godanya Mayatja Pulkanya Lamalamanya kulu uti alatjitu nyinanyi tawunu pala palula.

23 Ka tjtintungku irnyantja wiya munu kinarangku kulu piruku irnyantja wiya tawunu nyara palunya, panya Godalu pitalytji pulkangku tjananya irnyara kanyini. Ka Lamalamangku palu purunytjutu irnyara kanyini tili purunytju, paluru pula.

24 Kaya anangu winki uti para-ngaraku kalala purunytja Godalu Lamalamalu pula irnyannyangka. Kaya mayatja tjtutangku ngura kutjupa kutjupa tjtanguru katiku mani, ulytja, kutjupa kutjupa wiru tjuta tawunu nyara palulakutu.

25 Ka kaita tjuta titutjara ala ngaraku panya tawunu nyara paluru piruku mungaringkunyitja wiya ngaraku kalala titutjara.

26 Kaya ngura kutjupa kutjupa uwankaranguru mani, ulytja, kutjupa kutjupa wiru tjuta tawunu pala palula katira tjunkuku.

27 Palu kurakura tjtaya katinytja wiyangku wantiku munuya wiru tjuta kutju katira tjunkuku. Kaya kuralpai tjuta munu ngunti wangkapai tjuta tjarpanytja wiya ngaraku tawunu pala palula. Palu panya Lamalamangku nyiringka ini walkatjunu wanka nyinanytjaku, nyara paluru tjana kutju tjarpaku ngura pala palula, munuya wanka titutjara nyinaku Godala tjungu.

22

1 Kapi angeltu piruku ngayunya nintinu kapi wala wankarunkupainya ukalingknyangka. Ka kapi paluru pirpi-pirpira ukalingangi Godaku pulampa Lamalamaku tjiyanguru.

2 Munu kapi paluru tawunungka ngururpa karuringkula iwarangka ukalingangi.

* 21:17 60 metre nyaa purunypa, panya paltjura ankunytja 60-arangku, palu purunypa.

Ka karu kantilypa kutjarangka ngarangi punu wankanya. Ka punu pala palula mai ilatu-ilatu pakaningi kinara kutjupa kinara kutjupa titutjarangu ngalkuntjaku, kaya ngura winkitjangku punu pala palulanguru nyalpi mantjira nyitilpai pika wiyaringkunyjtikitjangku.

³ Ka anangu kura tjuta kutjupa kutjupa kura tjuta kulu Godalu wantinyangka, nyara paluru tjana uwankara nyinanytja wiya ngura nyara palula, palya tjuta kutju nyinaku Godala tjungu.

Ka tawunu pala palula Godaku pulampa Lamalamaku tjiya nyinapai ngaraku, kaya Godaku walytja tjutangku palunya mirawaniku.

⁴ Munuya palunya yunpa nyakuku, munuya palumpa ini kanyilku ngalyangka walkatjura wantinytja.

⁵ Munuya ngura pala palula lampa tilira kanyintja wiya nyinaku panya munga ngaranytja wiya ngaraku ngura pala palula. Ka tjintu kulu ngaranytja wiyaringkuku, panya Mayatja Godalu tjananya irnyara kanyilku uwankara uti nyinanytjaku. Kaya mayatjarira tjana Mayatja Godala tjungu nyinaku wanka titutjara wiyaringkunyitja wiya alatjitu.

Jesunya Malaku Pitjanytja

⁶ Kani angeltu wangkangu, "Kulila, wangka nyangatja tjukururu, ka nyuntu mulamularingama. Panya Mayatja Godalu iriti wangkangi wangkatjara tjutangka tjana anangu tjutangka tjakultjunktjunktjaku, pala palu purunypana Godaku walytja tjutangka tjakultjunanyi ngula kutjupa kutjupa tjuta wirkankunyitjaku."

⁷ Ka Jesulu wangkangu, "Kulilaya! Kuwari nguwanpana malaku pitjaku. Ka anangungku tjukurpa nyanga nyiringka walkatjunktjunktjaja wanganarangku kulirampa pukulpa palya titutjara nyinaku, panya tjukurpa nyangatja Godaku."

⁸ Ka nyangana ngayulu Johntu nyanganpa uwankara nyiringka walkatjunu nyakunyitjanungku munu kulintjanungkututu tjukurpa nyanga palunya tjananya. Panya angeltuni nintira tjakultjunangi kutjupa kutjupa tjuta, kana uwankara nyakula kulira wiyaringkula angelpa pala palula tjinangka watungarakatingu palunya mirawaninyjtikitjangku.

⁹ Kani wangkangu, "Alatjinalwiyangkuni wantima! Mayatja Godanya kutju mirawanima, ngayunya wiyangku! Ngayuluna Godaku warakaripai nyuntunya purunypatu. Kaya Godaku wangkatjara tjuta kulu ngayunya purunypatu nyinanyi. Kaya kutjupa tjutangku tjukurpa nyiri nyangatja wanganarangku kulilpai, nyara paluru tjana kulu ngayunya purunypatu nyinanyi. Kani ngayunya walkuntja wiyangku wantima Godanya kutju walkunma!"

¹⁰ Nyara palulanguruni angeltu piruku wangkangu, "Tjukurpa nyangatja Godaku panya nyiri nyangangka ngarinyi ka kutitjunktjunktjaja wiyangku tjukururungku utingku wangkama, panya tjukurpa nyanga paluru tjana kuwari nguwanpa utiringkuku. Ka tjintu mutumuturingu watalpi anangu tjuta kampa kutjuparinytjaku.

¹¹ Kaya kuralpai tjutangku titutjarangu tungunpungkula kura palyalkatima, munuya kurakura kutjupa kutjupa tjuta palyalpai tjutangku palu purunypatu rawangku palyalkatima. Kaya wiru palyalpai tjutangku titutjarangu wiru palyalkatima, munuya Godala

tjukururu nyinapai tjuṭa palu purunypaṭu tjukururu nyinakatima.” Alatji angeltu wangkangu.

¹² Ka Jesulu wangkangu, “Kulilaya! Ngayulu kuwari nguwanpa malaku pitjaku. Munuṇa pitjala anangu uwankara ngayula kuranyu ngaratjungkuku tjananya mantangka nyinara palyantjitjanguru tjukururungku ngurkantankunytjikitjangku. Munuṇa palulanguru tjanampa uwankaraku tjukururungku palyalku – ngayunya rawangku wanalpai tjuṭana mantjilku ngayula tjunguringkula nyinanytjaku, munuṇa watarkitja tjuṭa mauntalpa iyalku ngura kurakutu.

¹³ Ngayuluṇa nganmanyitja mulapa uwankara wiyangkalpi nyinanytjanya, munuṇa panya uwankara wiyaringkunyangka nyinaku titutjara wiyaringkunytja wiya.

¹⁴ “Panya anangungku mantara paltjilpai ka kilina mulapa ngarapai, pala palu purunypa nyuntu kurunpa kilina palya mulapa kanyira pukulpa mulapa nyinaku munu nyara palulanguru mai ngalkuku punu wankanguru munuya kaitawanu tjarpara pukulpa mulapa nyinaku tawunu pala palula.

¹⁵ “Kaya kuralpai tjuṭa tjarpanytja wiya ngaraku, panya tjana kura kutjupa kutjupa tjuṭa palyalpai, iratingka kuralpai munu miripungkupai, kutjupa kutjupangka ngunti ngaripai, pununguru apunguru palyantja ngunti walkulpai, ngunti wangkapai munu ngunti kulu kuralpai, nyara palu purunypa palyalpai tjuṭa ngura nyara palula puṭu tjarpaku.”

¹⁶ Mununi piruku Jesulu wangkangu, “Ngayuluṇa angelpa nyuntulakutu witunu tjukurpa nyangatja nyuntula tjakultjungkunytjaku nyuntu ngapartji ma-tjakultjungkunytjaku tjanala ngayuku walytja tjuṭangka ngura kutjupa kutjupangka nyinanyangka. Panya iriti Davidanya mayatja pulka nyinangi, nyara palumpa pakali malatja ngayulu nyinanyi. Ngayuluṇa kililpi panya tjiṅtukutu pakalpainya, palu purunypa.”

¹⁷ Palulanguru Kurunpa Milmiltu pula Lamalamaku kuringku wangkangu, “Ala, pitjaya!”* Kaya nyangatja kutjupa tjuṭangu kulirampa uti palu purunypaṭu wangkama, “Pitjaya!” Uwa, anangu kutjupa kapi ilu nyinarampa uti pitjama munu paluru tjikila kapi wankanya Godalu intjanungku ungkunytja.

Tjukurpa Malatja

¹⁸ Kulilaya! Tjukurpa nyanga nyiringka ngarinytja nyangatja Godaku alatjitu. Kaṇa ngayulu Johntu mulamulangku wangkara paini tjukurpa nyiri nyangangka tjukurpa kutjupitja tjungulwiyangu wantima. Panya anangungku tjukurpa kutjupitja tjukurpa nyangangka tjungunyangka Godalu palunya pikatjaralku, panya nyiri nyangangka tjukurpa ngarinyi Godalu anangu kura tjuṭa pikatjarantjaku, nyara palu purunypaṭu palunya pikatjaralku.

¹⁹ Kaṇa piruku wangkanyi nyura ngatalarinytjaku-tawara winki utingku tjakultjungkunytjaku. Tjinguru nyura tjukurpa nyangatja tjukutjuku ngatalpa wangkaku winki utingku wangkanytja wiyangu, ka nyuranya Godalu mai punu wankanguru ungkunytja wiyangu wantiku munu nyuranya tjarpatjungkunytja wiyanguṭu wantiku

* 22:17 Lamalamaku kuri panya Jesuku walytja tjuṭa.

tawunu nyara wiru palula ngura panya milmilta. Panya tjukurpa nyangangu tjakultjunanyi punu wankanya munu tawunu panya ngura milmilpa, palu nyura aru kulirampa tjukurpa nyanga palunya ngatalpa wangkarampa nyura ngura nyara palula putu tjarpaku.

²⁰ Ka Jesulu wangkangu, "Tjukurpa nyangatja tjukaruru mulapa." Munu piruku alatji wangkangu, "Uwa, mulapa kuwari nguwanpana ngayulu malaku pitjaku nyuranya mantjintjikitja."

Kana ngayulu Johntu kulintjatjanungku wangkanyi, "Uwa mulapa, Mayatja Jesu, warpungkula pitja."

²¹ Uwa, alatjituna wangkanyi. Ka Mayatja Jesulu nyuranya Godaku walytja uwankara pukultjungku wirura kanyinma. Uwa mulapa.

Inma Psalm Tjuta Psalms Nyangatja Nganmanytju Nyakula Wangkanytjaku

Nyangatja Godaku tjukurpa inma tjuṭatjara munu Godala tṭapintjara kulu. Ka uwankara tṭjunguringkula inma tjuṭa ngarinyi nampa nyangatja 150. Palu nyiri nyangangkala 13 kutju palyara tjunu. Kala uti Godanya walkuntjikitjangku inma nyanga tjuṭa nyakula wangkama.

Wati panya Mayatja Davidalu inma tjuṭa mulapa walkatjunu. Paluru kutjupa tjuṭa walkatjunangi pukulpa nyinara Godanya walkura mirawaninytjikitja mukuringkula, munu kutjupa tjuṭa paluru walkatjunangi tjituru-tjituru palumpa wituwitu utiringkunyangka. Munu piruku paluru inma kutjupa tjuṭa walkatjunangi kura pulka palyantjatjanungku Godala mirangka kuntaringkula wangkanytjikitjangku.

Uwa, inma nyanga paluru tjana Godanya wangkanyi, panya paluru uwankara mulapa palunu, munu wiru mulapa witulya pulkanya nyinanyi mayatja pulka mulapa uwankarangka waintarinytja.

Ka panyaya tjukurpa panya maṭatjangka Matthew-lu, Luke-alu, Paulalu tjana kulu inma nyanga tjuṭanguru tjukurpa walkatjunu. Panya Matthew-lu walkatjunu tjukurpa panya psalm 91-nguru tjukurpa palu purunypa, (nyawa Matthew-ku 4:6 munu Psalm 91:11-12). Ka panya Paulalu lita walkatjura iyanu ngura Rome-alakutu munu lita pala palula paluru Psalm 51-nguru tjukurpa palu purunypa walkatjunu, (nyawa Romans 3:4 munu Psalm 51:4).

Inma psalm nampa nyanganpa nyiri nyangangka ngarinyi:

1, 3, 6, 8, 13, 19, 20, 23, 40, 46, 51, 61, 63, 91, 121, 131, 133, 136, 146

1

¹ Godalu pukulmankupai palula wanganarangku kulilpai tjuṭa.

Nyara paluru tjana panya kulira wantipai anangu kurangku tjananya wituwitunnyangka, munuya iwara kurangka ankunytjaku altinyangka wantipai, munuya Godanya kanany-kananytju analpai tjuṭangka tṭjunguringkupai wiya.

² Paluru tjana pukularipai Godaku tjukurku munuya wanganarangku kulilpai, munuya nyakula wangkara titutjarangku kulilpai kalala mungangka kulu.

³ Munuya tjana kunpu ngarapai, panya punu tjuṭa urungka itingka ngarala wanalpai, palu purunypa. Panya punu paluru tjana titutjara maitjararingkupai munu nyalpi piltiringkupai wiya.

Palu purunypa nyanga tjana Godaku tjukurpa titutjarangku mulamulangku kulilpai, munuya palulanguru kunpu ngarapai, ka Godalu wiru tjuṭa tjanampa palyalpai.

⁴ Palu anangu kura palyalpai tjuṭa tjana purunypa wiya.

Panya paluru tjana unytjuntju purunypa nyinanyi,
 panya kanira mai uninypa tjarara unytjuntju ma-unura
 wanipai,
 nyanga palu purunypa tjananya Godalu waniku tjarara.
 5-6 Uwa, tjanampa kuranguru Godalu ngula tjananya ngurkantara
 tjaralku palumpa walytja tjutanguru mauntalpa nyinanytjaku,
 kaya ngura kurangka titutjara nyinaku.
 Ka Godalu palumpa walytja tjuta atunymara kanyilku palula wan-
 ganarangku kulilpai tjuta.

3

Inma nyangatja Davidalu walkatjunkuntja panya paluru palumpa
 katja Absalomalanguru ngulu wirtjapakantjatjanungku.
 1 Mayatja, anangu panya tjuta mulapa ngayuku kuraringanyi,
 mununija kuwari winkingku pikangku wataparani.
 2 Tjana kunyu anara wangkapai ngayunytjara alatji,
 "Godalu palunya wankarunkuntja wiya alatjitu."
 3 Palu Mayatja, nyuntun ngayunya kutitji puruntju anga-kanyilpai.
 Mununin ngayunya witulyankupai tjananya pungkula wain-
 tarinytjaku,
 mununin rapa ngaranytjaku palyalpai.
 4 Panya ngayulu nyuntula ulara tjapilpai wankarunkuntjaku,
 ka nyuntu mulapatu ngayunya puli milmiltanguru alpamilalpai
 ngura pala Tjyantanguru.
 5 Mayatja, nyuntu panyan ngayunya atunymara kanyilpai,
 kana mungangka wirura kunkunaripai
 mununa mungawinki wankaringkula pukulpa pakalpai.
 6 Ngayuku mirpantju mungilyingkuniya para-angatjura wanara
 pikangku wataparani.
 Palu ngayulu tjanampa nguluringkuntja wiya rapa alatjitu
 ngaranyi.

7 Mayatja God, pitjalanitju wankarunama!
 Munu ngayuku nyanga mirpantju tjuta katiti pungkula minya-
 minyanma.
 8 Mayatja, nyuntu panya nyuntumpa walytja tjuta wankaru kanyilpai.
 Wanyu tjananya mukulyangku pukulmanama.

6

1 Mayatja, ngayuku pulkara mirpanariwiyangkuni wantima,
 Mununi pulkara ngayunya pikantankuntja wiyangku kulu wan-
 tima.
 2 Panya ngayulu kuwari paku pulkaringu,
 katju Mayatja, wanyu ngalturingama mununitju kunpunma.
 Panya ngayulu uparingkula nyanga kuwari paku pulkaringu,
 3 mununa puntu winki kulu kuraringu.
 Palu Mayatja, nyaakun ngayunya rawangku nyakula wantinyi alpami-
 lantja wiyangku?
 4 Wanyunitju pitjala wankarura!

Mununitju ngaltunyjtju pulkangku atunymara kanyinma ilunytjaku-tawara.

⁵ Panya miriku ngurangka anangu ilunytjitja tjuta nyinara nyuntunya kulintja wiyaringkupai, munuya nyuntunya walkuntja wiya alatjitu.

⁶ Ka ngayulu kuwari paku pulkaringkula uliringkula nyuntula tjapini. Panya ngayulu mungangka ngarira pulkara ulapai, ka ilanypa pulka ngayula kurunguru mantarangka punkalpai.

⁷ Panya ngayuku mirpantju tjutangkuya kuwari ngayunya rawangku nyii-nyii-pungkula ulatjingalpai.

Kana nyangatja palulanguru kuwari rawa ulara ulara kuru utjuringkula pikaringu mununa putu nguwanpa palyanyku nyakupai.

⁸ Mayatja, nyuntu wirungku ngayunya ulanyangka kulinu. Munu wanyu kura nyanga palyalpai tjuta paila ngayunya wantikatinytjaku!

⁹ Panya nyuntu kulilpai ngayulu nyuntula ngatjinnyangka.

¹⁰ Munun ngayuku mirpantju tjuta paira iyalku, Kaya mulapa paluru tjana kuntaringkula mapalku nguļu wirt-japakalku.

8

Davidalu inma nyangatja walkatjunu Inmaku Mayatjaku inma inkapai tjutangku kitangka tjungu inkanytjaku.

¹ Mayatja God, anangu manta winkitjangkula nyuntunya kulini nyuntu panyan mayatja witulya pulka nyinanyi wiru mulapa munun ilkaringka pitalytji pulkangku uwankara alatjitu irnyani.

² Kaya tjitjingu itingku kulu nyakula inma inkara nyuntunya mirawanipai.

Ka nyuntumpa kuraringkupai tjutangku nyuntunya putu analpai nyuntu witulya pulkangku markunnyangka.

³ Panya mungangkana ilkari ira-nyakupai nyuntu panya paluntja, panya kinara, kililpi kulu nyuntu tjunkunytja.

⁴ Mununa nyakula kulilpai, "God, nyuntu panyan pulka mulapa, ka panya nganana anangu tjuta minga purunypa.

Palu nyuntu nganananya ngaltunytjungku kulilpai, Munulanyan atunymara kanyilpai.

⁵ Panya nyuntu nganananya tjunu pulka mulapa nyinanytjaku nyuntula* itingka pitalytji pulkatjara.

⁶ Munu panyan nganananya tjunu nyuntu panya paluntjitja uwankara mayatjarira kanyintjaku.

⁷ Panya nyuntu nganananya tjunu uwankara atunymara kanyintjaku tjiipi puluka inura tjuta kulu,

⁸ munu tulpu ilkaringka para-ngarapai tjuta munu uru ungu para-ngarapai tjuta kulu."

⁹ Mayatja God, anangu manta winkitjangkula nyuntunya kulini nyuntu panyan mayatja witulya pulka nyinanyi wiru mulapa.

* **8:5** Nyangangkala ini panya lipuru *Elohim* translate-amilana *Godanya* munula panya nyuntula tjunu *Godanya* kulintjaku. Palu kutjupara ini nyanga *Elohim* wangkanyi *angelpa*.

13

- ¹ Mayatja, nyaakunin rawangku ngayunya kulira wantinyi?
² Nyangatjana rawa alatjitu tjituru-tjituru nyinanyi mungangka kalala.
 Panya ngayuku mirpantju tjuangkuni kuwari rawangku nyii-nyiiipunganyi.
 Kani nyuntu yaalara wankarunkuku?
³ Mayatja God, wanyunitju nyuntu kulinma rawangku wantinytja wiyangku ngayulu nyuntula tjapinnyangka.
 Munu ngayunya wankaru kanyinma ngayulu ilunytjaku-tawara.
⁴ Panya ngayulu tjinguru iluku, kaya ngayuku mirpantju tjuṭa ngayuku pulkara alatjitu ikaringkula pukulariku munuya wangkaku alatji, "Awa! Nganana palya alatjitu wiyanu!"
 Kani pala palula-tawara ngayunya wankarunama tjana ngunti pukularinytjaku-tawara.
⁵ Ngayulu ninti panya nyuntu ngayuku pulkara mukuringanyi titutjara alatjitu, kana nyanga palulanguru ngayulu rapa pulka nyuntula tjungu nyinanyi.
 Mununa pulkara pukularinyi nyuntu ngayunya wankarunkunyangka.
⁶ Uwa, nyuntu panya ngayunya pulkara pukulmanu,
 kana pala palulanguru inma tjuṭa inkara nyuntunya pulkara walikulku.

19

- ¹ Godanya wiru mulapa,
 panya nganana ilkari nyakula palunya kulini uti, panya mulapa nyanganpa Godalu paluntja uwankara.
² Tjintu kutjupa tjintu kutjupa nganana ilkari nyakula Godanya mulapa kulini.
 Ka mungangka palu purunypatu ilkarinku nganana nintini Godalu witulya pulkangku palyantja.
³⁻⁴ Ilkarinku wangkapai wiya.
 Palu ilkarinku nintini nganana Godanya kulira mirawaninytjaku.
 Nganana ilkarinku wangkanyangka kulintja wiyatu.
 Palu manta winkingka anangu uwankarangku ilkari nyakula Godanya kulira walkuntjaku ngaranya.
⁵ Godalu ilkarinka ngura tjintuku palyanu mungaringkunyangka tjarpara ngarinytjaku purunypa,
 kala mungangka puṭu nyakupai.
 Ka mungawinki tjintu paluru wiru mulapa ngalya-pakalpai, panya watingku kuwari kutju altinytja purunypa,
 panya paluru kungkawara altira mungawinki pukulpa mulapa pakalpai, palu purunypa.
 Uwa, tjintu ngalya-pakara wirura ankupai, wati wala pulka purunypa,
 panya wati paluru wirtjapakantjikitja pulkara pukularipai, palu purunypa.
⁶ Tjintu paluru pakalpai ilkari kampa kakararanguru,
 muni ilkarinka katakutjara ankula ma-tjarpapai ilkari kampa wilurara.

- Munu paluru manta winkingka kampapai wiltjanga nyinanytjaku.
- Uwa, mulapa ilkarinku tjiŋtungku munu Godaku tjukurtu kulu nganaŋala Godanya nintilpai.
- ⁷ Panya Godaku tjukurpa pulka mulapa, munu nganaŋa uparingkunyangka tjukurpa paluru nganaŋanya piruku kunpulpai.
- Godalu tjukarurungku wangkapai, kala uti palumpa tjukurku pulkara mulamularingama.
- Panya palumpa tjukurtu anangu ngurpa nyinanyangka nintipukaringkunyjtaku nintilpai.
- ⁸ Uwa, mulapa Mayatjaku tjukurpa tjukaruru mulapa. Ka panya anangungku tjukurpa nyara palunya kulira pukularipai, panya palumpa tjukurpa wiru mulapa.
- Ka tjukurpa nyara paluru nganaŋala utilpai Godaku iwara tjukarurungku wanantjaku.
- ⁹ Nyangatja wiru alatjitu ngaranyi nganaŋa Mayatja Godanya walkuntjaku.
- Kala rawangku palunya kutju walkunma, panya palumpa kulintja tjukaruru alatjitu titutjara ngaranyi.
- ¹⁰ Pulɪ gold wirunya mani pulka mulapa, palu Godaku tjukurpa wiru mulapa goldpangka munkara alatjitu.
- Ka tjuratja panya mayu wiru, palu Godaku tjukurpa wiru mulapa wantinytjaku wiya tjuratjanga munkara mulapa.
- ¹¹ Ngayulu Mayatjala wanganarangku kulilpai, kani palumpa tjukurtu tjukarurungku palyantjaku nintilpai.
- Ka ngayulu palumpa tjukurpa kulinyangka Godalu ngapartji ngayunya wirura kanyini.
- ¹² Nganaŋa uwankarangku walytjangu putu ngurkantananyi kura uwankara nganaŋa palyantjatjanungku.
- Ka Mayatja, ngayuku kalyparingama ngayulu watarkungku kura palyannyangka.
- ¹³ Munu ngayulu nintingku kura palyantjikitjangu kulinnyangkampa ngayunya markunma kura kutju titutjarangku palyalkatinytjaku-tawara.
- Kana palulanguru kunta wiya palya nyinama.
- ¹⁴ Mayatja, nyuntu ngayunya kunpu pulkangku anga-kanyilpai kurantjaku-tawara.
- Kana mukuringanyi nyuntu pukularinytjaku ngayulu nyanga wangkanytja munu kulintja uwankaraku, panya nyuntun ngayuku ngalkilpa nyinanyi.

20

- ¹ Nganaŋa Mayatja Godala tjapini, Jacobaku panya Godangka, paluru kura nyuntula utiringkunyangka, nyuntunya kulira anga-kanyintjaku
- ² Palulala tjapini paluru ngura nyara Jerusalemalanguru* nyuntumpa alpa iyantjaku ngura panya milmiltanguru.

* **20:2** Jerusalemanya ini kutjupa Zionnga ngura milmilpa panya nyara palula Godaku timpula ngaranyi.

- ³ Uwa, Godalala tјapini nyuntumpa pukularinytјaku nyuntu wiru tјuta palunya ungkula walkunnyangka.
- ⁴ Nganana Godala tјapini nyuntu mukuringkunyтja uwankara palyantјaku,
munu nyuntumpa kulintja uwankara tјukaruru utiringkunyтјaku.
- ⁵ Munula nyuntu pikaringkula waintarinyangka kulira pukulpa mulapa miraku.
Munula Godanya mirawanira kulata kutitјi tјutinypa winkitјara pukularira para-ngaraku.
Uwa, nganana mukuringanyi Godalu nyuntunya palula tјapinyangka kulintјaku.
- ⁶ Uwa, kuwari nyangala nintiringulta, “Munta-uwa! Mulapa Mayatјa Godalu kinga nyanga palunya pikaringkula waintarinyтјaku palyaningi.
Mulapa Godalu kulilpai paluru tјapinnyangka.
Munu paluru ilkaringuru kunpu pulkangku palunya wankarunanyi.”
- ⁷⁻⁸ Ngura kutјupitja tјutangku kulilpai alatјi, “Nganana wakina tјutatјara munu nyanyтјu tјutatјara. Palulangurula pikaringkula waintarinyi.”
Palu wiya. Tјanaya punkalku putu waintarira.
Ka nganana titutјara kunpu alatјitu ngaraku,
panya nganana Mayatјa Godaku mulamularingkupai alatјi kulira,
“Nganampa God Mayatјa witulya pulkanya.”
- ⁹ Uwa Mayatјa, kinga nyanga palunya wankarunama,
munulanya kulinma nyuntula tјapinnyangka.

23

- ¹ Mayatјa nyuntu panyanin atunymara wirura kanyilpai.
Panya wati tјapatangku tјiipi tјuta wirura kanyilpai,
palu purunytјunin nyuntu ngayunya atunymankupai.
- ² Nyuntu ngayunya ngura wirungka kanyilpai, mai pulkatjarangka ngalkula paltјa nyinanyтјaku.
Mununin ngayunya mina wirukutu katipai tјikira nyantulpa nyinanyтјaku.
- ³ Ka panya ngayulu kurunpa uparingkunyangka nyuntu ngayunya kunpulpai.
Munun ngayunya katirinkupai iwara tјukarurungka nganmanyтјu kalkuntјatјanungku.
- ⁴ Tјinguru ngayuku tјituru-tјituru pulka wirkankunyangkana nguluringama ilunytјaku-tawara.
Palu nyuntu ngayula tјungu nyinanyi,
kana palulanguru ngulu wiya rapa ngaraku.
Panya tјapatangku tјukaratјarangku tјiipi tјuta atunymankupai,
palu purunytјun nyuntu ngayunya atunymara kanyini.
- ⁵ Nyuntu panya ngayuku pulkara mulapa mukuringkupai.
Munun ngayuku mai pulka purunypa palyalpai ngayuku mukuringkula.
Munutјun palu purunytјutu ngayuku walpayatangka tјaalyn-garatјunkupai titutјara ngarinytјaku.

Palu ngayuku mirpantju tjuṭaku nyuntu alatji palyalwiyangku wan-
tipai.

Uwa, nyuntu pukultjungku ngayunya wirura atunymankupai,
kaṇa pulkara pukularipai.

- ⁶ Mulapa ngayuku nyuntu titutjara pulkara mukuringanyi,
munun wiru kutju alatjitu ngayuku palyani.
Kaṇa nyuntula junguringkula titutjara nyuntula kutju nyinaku
mantangka nyanga wanka nyinaralpi.

40

- ¹ Mayatja God, ngayuluna purkara patalpai nyuntu alpamilantjaku,
Kaṇin nyuntu ulara tjaminnyangka kulilpai alatjitu.
- ² Ngayuluna tjulpirpangka karalukatingu ngati pulkangka mununa
putu pakara nguwanpa ilungu,
kaṇi nyuntu mantjira apu walungka tjunu wankaru rapa
ngaranytjaku.
- ³ Mununin nyuntu inma kuwaritja nintinu inkara nyuntunya
walkuntjaku.
Kaya anangu tjuṭangku nyuntu palyantja nyakula kulilku,
“Munta-uwa, mulapa Godanya witulya pulka nyinanyi.”
Munuya palulanguru nyuntumpa mulamularingkuku.
- ⁴ Mayatja God, anangu panya nyuntumpa mulamularingkupai
pukulpa mulapa nyinaku.
Anangu nyanga palu purunypa panya kaṇany-kaṇany pa nyinapai
tjuṭangka putu tjunguringkupai.
Munu palumpa tjanampa god ngalypa-ngalypa tjuṭa tjungur-
ingkula walkulpai wiya.
- ⁵ Mayatja God, nyuntu pulka mulapa nganampa palyanu kutjupa
kutjupa wiru tjuṭa.
Ka nyanga palu purunypa kutjupangku putu alatjitu palyalpai.
Ka panyan piruku wiru tjuṭa palyantjikitjangku kalkunu.
Uwa nyuntu palyantja winki mulapa ngaranyi,
kaṇa putu nguwanpa uwankara tjakultjunkuku nyuntu panya
palyantjitja tjuṭa.
- ⁶ Tjinguruna puluka munu tjiipi ngalya-katira pungkula tiliwakara
nyuntunya ungama ngayuku kalyparingkunyjtaku,
palu nyuntu mukuringkunyjtja wiya ngayulu nyanga alatji palyan-
tjaku.
Panya nyuntu ngayunya pina palyanu nyuntunya wanganarangku
kulintjaku.
- ⁷ Kaṇa nyuntula wangkangu, “Nyangatjana ngayulu pitjangu,
panya iriti nyuntu nyiri milmilta walkatjunu tjukurpa ngayunyat-
jara.
- ⁸ Uwa Mayatja God, ngayulunatju pulkara pukularipai nyuntu mukur-
ingkunyjtita tjuṭa palyantjikitja,
panya ngayuluna nyuntumpa tjukurpa kurunpa winkingku
titutjarangku kulilpai.”

9 Ka panya nyuntumpa walytja tjuṭa nyuntunya walkuntjikitja tjun-guringangi,
kaṇa tjanala tjakultjunangi panya nyuntu palyantja uwankara tjukaruru alatjitu.

Nyuntu ninti Mayatja, panya ngayulu nyuntunyatjara rawangku wangkapai wantinytja wiyangku.

10 Ngayuluṇa anangu tjuṭangka tjakultjunangi panya nyuntu ngayunya mulapa alatjitu wankarunu.

Alatjina tjanala wangkangi, "Nganampa mayatjangku nganannya ngaltunytjungku kanyilpai titutjarangku.

Panya paluru kalkuntjatjanungku palyalpai alatjitu."

11 Mayatja God, wanyutju titutjara ngaltunytju ngarama.

Mununi wankaru kanyinma panya nyuntun titutjarangku mukulyangku atunymankupai,

munu panyan kalkuntjatjanungku palyalpai alatjitu.

12 Kura winki mulapa nyangatja ngayula utiringanyi mununi puuntananyi.

Kaṇa puṭu alatjitu kulini.

Ngayuluṇa kura tjuṭa mulapa palyaṇu, munuṇa kuwari puṭu nyanganyi iwara palyangka ankunytjikitjangku.

Kuwarina uparingkula rapa ngaranytja wiyaringu.

13 Mayatja God, wanyunitju warpungkula pitjala ngayunya alpamilala wankaru nyinanytjaku.

14 Anangu tjuṭangkuya ngayunya iluntankunytjikitjangku kulini, ka mayatja, wanyu tjananya painma kaya kunṭaringkula anama alatjitu.

15 Paluru tjana panya ngayunya kurara pungangi munu ananingi.

Ka wanyu mayatja, tjananya pulkara painma,

kaya kunṭaringkula wangkama, "Munta, kurangkula palunya kurara pungangi."

16 Kuwarina nyuntula tjapini anangu panya nyuntunya walkulpai tjuṭaku,

paluru tjana nyuntumpa pulkara pukularinytjaku,

panya nyuntun palunya tjananya wankarunkunytjanguru.

Wankarunkunytja nyara palulanguru tjana uti titutjarangku mirawanira alatji wangkama, "Mayatja Godanya pulka mulapa."

17 Ngayulu ngaltutjara,

munuṇa kurunpa uparingu.

Palu Mayatja God, wanyunitju titutjarangku kulinma,

mununin wankarura atunymara mukulyangku kanyinma.

Wanyunitju warpungkula pitjala alpamilala!

46

1 Godanya nganampa ngalkilpa nyinanyi kunpu pulka.

Munu nganampa tjituru-tjituru kura pulka wirkankunyangka paluru ilatu ngarapai nganannya kurunpa rapantjikitja.

2-3 Palulanguru nganana ngulu wiya nyinapai,

- panya Godalulanya atunytju kanyini manta urinyangka, munu puli murpu pulka tjuṭa katakatira urungka tjarpanyangka. Munula uru witatjara walpatjara kulu pulkara rurkunnyangka nganaṅa ngulu wiyatu nyinapai.
- 4 Palu ngura wirunya nyaratja ngaranya Jerusalemnya anangu tjuṭa pukulpa nyinanytjaku ngura karu uru wirutjarangka. Ngura nyara palula panya Godanya nyinapai. Paluru mayatja pulka mulapa uwankarangka waintarinytja.
- 5 Ka kutjupangku puṭu wiyani ngura nyara palunya, panya Godanya nyinanyi nyara palula, munu paluru titutjarangku atunymankupai palumpa walytja tjuṭa.
- 6 Ngura kutjupangka kutjupangka tjanayanku pikangku punganyi, munu anangu kutjupa tjuṭa ngulutjingani. Palu Godalu mirara wangkanyangka manta katakatira minyaminyingkuku.
- 7 Mayatjanya pulka mulapa nganaṅala tjungu nyinanyi. Paluru nganampa tjamu Jacobaku mayatja, munulanya atunymara kanyilpai.
- 8 Pitjalaya nyawa Mayatja Godalu palyantja pulka mulapa manta winkingka.
9 Paluru ngura winkingka pikangku pungknyangka pilunmankupai, munu kulata tjuṭa katantara wiyalpai, munu warungka kutjalpai kutitji tjuṭa.
- 10 Munu paluru wangkapai,
“Wiyariwaya munu pilunarira kulila ngayunya, panya ngayulu kutju God Mayatja Puljanya uwankarangka waintarinytja manta winkingka.”
- 11 Uwa, God Mayatja Puljanya nganaṅala tjungu nyinanyi. Paluru nganampa tjamu Jacobaku mayatja, munulanya atunymara kanyilpai.

51

- 1 Mayatja God, nyuntu panyan titutjara ngayuku pulkara mukuringkupai wiyaringkunyitja wiya. Nyanga palulanguruni ngaltunytjungku wirura kanyinma. Panya nyuntula kulira wantirana kura pulka palyanu, katju wanyu ngalturingkula ngayunya kalypangku wantima kura palyantjitjanguru pungkunyitja wiyangku.
- 2 Panya kutjupa-arana walytjangku kulira kura mukuringkula palyalpai. Mununa kutjupa-ara watarkungku palyalpai palya-palku kulira. Kani kura nyanga uwankaranguru ngayunya pungkunyitja wiyangku wantima.
- 3 Uwa, ngayulunatju kura palyantjatjanungku kulira walytjangku ngurkantanyani, mununa nyuntula kulira wantinytjatjanungku rawangku kulilpai mununa tjituru-tjitururipai.
- 4 Mayatja, ngayulu panya kura palyara nyuntunya pulkara kuranu,

panya painunin, kana kulira wantira pampunu,
kan ngayunya tjukarurungku kuranmananyi, mununin palya
wiyani.

5 Uwa, ngayulu itinguru alatjitu kura nyinangi.

Panya kura alatjitu ni ngunytjungku tjuningka kanyiningi.

6 Ka nyuntu panya mukuringanyi ngayulu tjukarurungku unngu
kulintjaku.

Palulanguru ni wanyu ngayunya unngu nintila nyuntu kulintjitja
tjuta,

kana kulira nyuntu mukuringkunyutja kutju wanganarangku
palyalku.

7 Uwa, ngayulu kura palyantjitjanguru ni kaly pangku wantima munu ni
tukarurunma.

Kana pala palulanguru palya mulapa nyinama.

8 Wanyu ni tjakultjura nyuntu ngayunya kaly pangku wantinytjatja-
nungku, kana kulira pukulari.

Pulkarana kunaringu, panya kura pulka mulapa nyuntu ngayula
utinu.

Kani wanyu piruku pukulmanama kura nyanga palula tjanalan-
guru nyuntu ngayunya kaly pangku wantinytjatjanungku.

9 Uwa, nyuntu nitingku ngayunya nyangu kura palyannyangka.

Palu nyakunytjatjanungku wanyu ngayunya kaly pangku wantima
pungkunytja wiyangku,

munu kura nyanga uwankara ngayulu nyuntula tungunpungkula
palyantjitjaku watarkurima rawangku kulintja wiya.

10 Mayatja God, wanyu ni kulintja kampa kutjupara,

munu ni tjukarurula nyuntula kutju wanganarangku kulintjaku.

11 Palu nyuntulanguru ni paira iyantja wiyangku wantima.

Munu Kurunpa Milmilnga ngayulanguru mantjilwiyangku wan-
tima,

panya paluru ngayunya wankaru kanyini.

12 Panya nganmanypa pukulpa mulapa nyinangi nyuntu ngayula
tjungu nyinara alpamilannyangka.

Kani wanyu malakungku pukulmanama panya nganmanyitja
purunypa nyinanytjaku.

Munu ni kunpula, kana nyuntula kutjungka wanganarangku
kulinma.

13 Alatji nyuntu ngayunya pukulmankunyangkana tjakultjunkuku
anangu panya nyuntunya wantipai tjutangka.

Kaya ngayulu purunypatu tjana kulira kunaringkuku munuya
aruringkula pitjaku nyuntunya tjukarurungku wanantjikitja.

14 Mayatja God, nyuntu kutjungku ngayunya wankarunkuku.

Panya ngayulu kurangku iluntanu, katju ngalturiwa munu ni
kaly pangku wantima pungguwiyangku.

Kana anangu tjutangka tjakultjura katungku mirara wangkara
nyuntu ngayunya wirungku tjukaruruntja.

15 Uwa Mayatja, ngayunya wangkanytjaku nintila,

kana nyuntunya mirawanira walkunma.

16 Tjinguru na ngayuku kuranguru kuka tjiipi katima pitjilta pungkula
paura muluru na ungunytjikitjangku nyuntunya.

- Palu ngayulu ninti panya nyuntu pukularinytja wiya kuka kutju pungkula ungunyangka.
- 17 Palu ngayulu kurunpa tjaruringkula piiwiyaringkunyangka kutju nyuntu ngayuku pukulariku.
- Munuṅi paira iyantja wiyangku wantira kanyilku.
- 18 Palu wanyu ngalturingkula alpamilala anangu nyanga Jerusalemala nyinanytja tjuṭa wall-pa para-ngarala wanantja piruku palyantjaku panya nganmanytju piluntankunytja.
- 19 Nyuntu tjinguru alatji alpamilannyangkaya nyuntumpa anangu tjuṭa tjukaruru nyinaku,
munuya mulamulangku kuranguru piiwiyaringkula kuka katiku pungkula paura mulurura ungunytjikitjangku nyuntunya.
- Ka nyuntu palumpa tjanampa pulkara pukulariku.

61

- 1 God, kulinmanitju! Kuruntunanta ulara tchapini.
Mununitju wanyu kulira alpamilanma.
- 2 Ngura nyanga parari-nguruna nyuntula ulara ma-tchapini alpamilantjaku,
panya ngayulunatju kuwari kurunpa wawanyarira uparingu.
Nyuntu panyan puli pulka purunytju angatjura kanyilpai, kani ngayunya wankaru anga-kanyinma.
- 3 Nyuntu panyanitjun mukulya wirungku mirpantju tjuṭangka-tawara anga-kanyilpai.
Panya wall-pa ngurangka para-arintara ngarapai kunpu alatjitu mirpantju tjuṭa tjarpanytjaku-tawara, palu purunytjunin rawangku anga-kanyilpai.
- 4 Wanyunitju tjunama nyuntumpa Tinta Milmita unngu,
kana nyara palula titutjara mulapa rapa nyinaku nyuntu anga-tjutura kanyinnyangka,
panya tjulpu ngunytjungku nyalpingka anga-tjutura kanyilpai atunypa nyinanytjaku,
palu purunytjuni atunymara kanyinma.
- 5 God, nyuntunin kulinu ngayulu nyuntunya kalkunnyangka, munu panyanitjun wirungku kulintjatjanungku pukulmanu.
Panya nyuntu anangu nyuntunya walkulpai uwankara kulira pukulmankupai,
palu purunypain nyuntu ngayunya ngapartji pukulmanu.
- 6 God, ngayulu nyuntula tchapini nganampa kinga wanka kanyintjaku,
paluru wanka rawa nyinanytjaku.
Munu palula malangka palumpa tjitji malatja malatja tjuṭa kulu kingarinyangka kanyilkatima titutjarangku alatjitu.
- 7 Uwa Mayatja God, nganampa kingangka titutjara tjungu ngarama paluru anangu tjuṭa mayatjangku atunymara wirura kanyintjaku.
Munu palunya mukulyangku wankaru kanyinma titutjarangku,
panya mulapa nyuntu wantinytja wiyangku kanyilpai alatjitu.
- 8 Kananta ngayulu titutjarangku nyuntunya inma inkara walkura mirawaniku.

Munuṅanta nyuntunya kalkuntjatjanungku rawangku palyalku,
tjintu kutjupa tjintu kutjupa.

63

- ¹ Ngayulu nyuntunya kuwari walkuni, panya nyuntu ngayuku God.
Kaṅa ngayulu nyuntumpa pulkara mukuringanyi.
Munuṅa kuwari nyuntunya-tjiratja kapi ilu purunyju nyinara nyuntunya rawangku pulkara kulini.
Panya ailuru pulkangka manta piltiringkupai mina wiyangka,
palu purunypa ngayulu kurunpa winki uliringkupai nyuntula wiyangka,
panya ngayulu nyuntumpa pulkara alatjitu mukuringanyi.
- ² Panya ngayulu nyuntunya nyangangi wali milmita nyinanyangka,
munuṅa nyangu nyuntunya witulya pulkangku palyannyangka
munu pitalytji pulka alatjitu irnyannyangka.
- ³ Palu panya nyuntumpa mukulya pulka mulapa rawa alatjitu
ngaranyi wanka nyanga mantatjangka waintara mulapa,
kaṅa palulanguru nyanga kuwari nyuntunya inkara walkuni.
- ⁴ Munuṅa nyanga alatji kulini, "Utiṅa wanka nyanga nyinaralpi
nyuntunya titutjarangku walkunma,
munuṅa nyuntunya ini wangkara mara katuringkula walkura
tjapinma.
- ⁵ Munuṅa uti kurunpa winki pulkara pukularima,
panya mai wiru ngalkuntjatjanuṅa paltjaringkula pukularipai,
palu purunypa.
Uwa, utiṅa inma tjuṭa pukultu inkara nyuntunya pulkara mi-
rawanima."
- ⁶ Panya ngayulaṅa mungangka ngarikatira nyuntunya rawangku
kulilpai,
munuṅanta kulira alatjitu tjinturingkupai.
- ⁷ Panya nyuntu kutjungkun ngayunya titutjarangku alpamilalpai,
kaṅa palulanguru nyuntumpa inma tjuṭa pukultu inkara kulilpai,
panya nyuntu ngayula tjungu alatjitu nyinanyangka.
- ⁸ Uwa, panya ngayulu nyuntumpa pulkara mukuringkula nyuntula
tjungu alatjitu nyinaku wantinytja wiya,
kaṅin nyuntu wirungku witulya pulkangku alatjitu atunytju
kanyini.
- ⁹⁻¹⁰ Panya kuwariniya tjana ngayunya ngurini iluntankunytjikitjangku,
kaṅa mukuringanyi nyuntu palunya tjananya wiyantjaku.
Panya palunya tjananyaya kuwari pika pulkangka pungkula ilun-
tankuku,
ka inura tjuṭangku tjananya pitjala ngalkuku.
Kaya paluru tjana miri tjuṭaku ngurangka tjarpara titutjara
alatjitu nyinaku.
- ¹¹ Uwa, panya Godalu ngayunya mulapa Israelku mayatja witulyanu
warmala tjuṭa pungkula waintarinytjaku,
kaṅa palulanguru palumpa pulkara pukularinyi.
Kaya anangu tjuṭangku panya Godala mirangka wangkara kalkunt-
jatjanungku palunya pulkara mirawaniku.
Palu panya anangu ngunti wangkapai tjuṭa Godalu tjaa patilku.

91

- 1 Uti nyuntu Mayatja Godala tjungu nyinama Witulya Pul कांगका,
kanta paluru nyuntunya titutjarangu atunymara kanyilku.
- 2 Ka nyuntu nyanga palunya kulira nyanga alatji palula wangkaku,
“Wirungkunin ngayunya atunymara kanyilpai mununin kutitji
purunytju angatjura kanyilpai, ngayuku ngalkiltu,
kana ngayulu pulkara mulamularingkula nyuntunya walkulpai.”
- 3 Ka paluru nyuntunya atunymankuku kutjupangu nyuntunya ngunti
kurantjaku-tawara,
munu paluru nyuntunya wankaru kanyilku pikatjararingkula
ilunytjaku-tawara.
- 4 Uwa, palurunta wirura kanyilku,
panya tjulpungku kulunypa tjuta nyalpingka unngu angatjura
kanyilpai, palu purunytjunta angatjungkula kanyilku,
kan ngulu wiya rapa alatjitu nyinaku paluru
atunymankunyangka.
- 5 Munun mungangka kura kutjupa kutjupa nyuntula utiringkunyangka
nyakula nguluringkunyitja wiya nyinaku,
munun kalala kulu kutjupangu kulata waninyangka nyakula
nyuntu nguluringkunyitja wiyatu, rapa alatjitu ngaraku.
- 6 Munun mamu panya kura mungangka para-ngarapai tjutaku
nguluringkunyitja wiya rapa nyinaku,
munun kalala kulu tjana iluntankunyangka nyakula nyuntu
nguluringkunyitja wiyatu ngaraku.
- 7 Ka nyuntula itingka anangu tjuta mulapa pikatjararingkula iluku,
palu Godalu nyuntunya atunymara kanyinnyangka nyuntu pikat-
jararingkunyitja wiya palya alatjitu nyinaku.
- 8 Munu nyuntu kuru alaringkula nyakuku Godalu anangu kura
palyalpai tjuta pungkunyangka.
- 9 Munu nyuntu rapangu kulilku, “Mayatjaluni ngayunya atunymara
kanyini katutja pulkangu.”
- 10 Ka nyara palulanguru kura kutjupa kutjupa nyuntula wirkankunyitja
wiya ngaraku.
- 11 Panya Godalu witulku palumpa angelpa tjuta nyuntunya atunymara
kanyintjaku kalala mungangka kulu, munu nyinanyangka
ankunyangka kulu.
- 12 Munuya nyara paluru tjana nyuntunya marangu katjura kanyilku
punkara apungka tjina katakatinytjaku-tawara.
- 13 Ka nyuntu lion pikati tjutangka liru tjutangka kulu ngururpa rapa
para-ngaraku,
kaya nyuntunya patjantja wiyangu wantiku.
- 14 Panya Godalu wangkanyi nyanga alatji, “Nyuntu ngayuku pulkara
mukuringkunyangkana nyuntunya wankarunkuku,
mununanta nyuntunya atunytju kanyilku nyuntu ngayuku mula-
mularingkunyangka.
- 15 Palu kura kutjupa kutjupa nyuntula utiringkunyangkampa
ngayunya alti,
kana ngayulu kulira nyuntula tjunguringkula nyuntunya
wankarunkuku,

kaya anangu kutjupa tjutangku nyuntunya wankarunkonyangka nyakula wangkaku, 'Ai, wati nyangatja wiru mulapa.'

- 16 Uwa, nyuntu ngayula tjungu nyinanyangkaḅa ngayulu nyuntunya wankaru kanyilku,
ka nyuntu manta nyangangka rawa wanka nyinaku munun ngula tjilpiringkula kutju iluku."

121

Inma nyangatjaya Jerusalemalakutu ankula inkakatipai.

- ¹ Nganalunitju alpamilalku? Tjinguruna murpu nyara pulkanya iranyakula tjapilku, panya paluru tjana titutjara kunpu ngarala iritiringu. Tjinguruni paluru tjana ngayunya alpamilalku.

Palu wiyampal nyangatja. Wiya alatjitu.

- ² Panya Mayatja Godalunitju ngayunya alpamilalku, panya paluru kutjupa kutjupa uwankara palyanu murpu tjuta kulu.

- ³⁻⁴ Uwa mulapa Mayatjalu uwankara rawangku kanyilpai pakuringkula kunkunarinytja wiyangku.

Munulanya atunymankupai punkantjaku-tawara.

Uwa, paluru nganananya Israelkunu tjuta kunkunpa wiyangku atunymankupai.

- ⁵⁻⁶ Mayatjalulanya anga-kanyilpai panya punu wiltja pulkunpa wiru ngarapai kalanya tjintungku putu kampapai, palu purunytju.

Munu paluru mungangka kulu anga-kanyilpai kinarā panya wiya ngaranyangka.

- ⁷ Ka Mayatja Godalulanya atunymara kanyini panya kutjupa kutjupa uwankarangku kurantjaku-tawara.

Uwa mulapa nyangatjalanya atunymananyi wankaru nyinanytjaku.

⁸ Panya palurulanya titutjarangku ilangku nyakula kanyini ngurangka nyinanyangka munu ngura parari ankunyangka kulu.

Munulanya titutjarangku alatjitu atunytju kanyira iritiriku.

131

- ¹ Mayatja, ngayulu nyuntumpa kutjuku pulkara mulamularinganyi.

Munuatju walytjangku ngayulu kanany-kananytju pulkanmankupai wiya.

Nyuntu panya pulka mulapa palyalpai,

kanā putu kulilpai.

Tjinguruna arkarampa putu palyanma,

panya nyuntu kutjungku nyanga purunypa palyalpai nintingku.

- ² Uwa, putuna kulilpai.

Palu palya, kurunpani pukulpaḅu ngaranyi tjitji tjukutjuku purunypa,

panya ngunytjungku ampura kanyinnyangka pilunpa ngaripai, palu purunypa.

- ³ Ka nyura Israelkunu tjuta Mayatja Godaku kutjuku mulamularingama.

Munuya titutjarangku palunya kutju mulamulangku kulinma.

133

- ¹ Anangu tjuṭa kutjuringkula tjungu pukulpa nyinanyangka nyakula nganaṅa kulilpai, “Awari, nyangatja wiru mulapa. Godalu-manti nganaṅanya anangu uwankara tjungura pukulmananyi.”
- ² Panya Godalu palumpa anangu tjuṭa pukulmankunytjikitjangku wangkangu tjananya tjukurtjara pulka palumpa tjunkunytjaku Aaronnga panya.
Munu wangkangu tjananya, “Uwila wiru mulapa milmilpa palula katangka tjukutjuku tjuṭila paluru tjukurtjara pulka kuranyitja nyinanytjaku.”
Kaya mulapaṭu Aaronta katangka uwila tjuṭinu, palu pulka nguwanpaya tjuṭinu,
ka katanguru ukalingkula ngankurpawanu tjuṭingu piningka.
Alatji Godalu Aaronnga tjananya pulkara pukulmanu,
munu palu purunypaṭu Godalu palumpa walytja uwankara pulkara pukulmankupai.
- ³ Uwa, anangu tjuṭa tjungu pukulpa nyinanyangkala kulini panya Godalu mulapa pukulmananyi palumpa walytja tjuṭa, minanguk puyintja purunypa.
Panya mina pulkangku ngura ailurungka puyira punu ukiri wiru pakaltjingalpai,
palu purunypa Godalu pukulmankupai palumpa walytja uwankara.
Panya Mayatja Godalu wiru palyantjikitjangku wangkangu palumpa walytja Jerusalemala nyinanytja tjuṭaku,
kaya ngura nyara palula titutjara mulapa nyinaku.

136

- ¹ Mayatja Godanyala walkunma,
panya paluru wiru mulapa.
Panya palumpa mukulya pulka titutjara ngaraku.
- ² Paluru kutju god pulka mulapa kutjupa uwankarangka waintara alatjitu.
Kala palunya kutju walkunma.
Panya palumpa mukulya pulka titutjara ngaraku.
- ³ Paluru kutju mayatja pulka mulapa mayatja kutjupa uwankarangka waintara.
Kala palunya kutju walkunma.
Panya palumpa mukulya pulka titutjara ngaraku.
- ⁴ Paluru kutjungku kutjupa kutjupa pulka mulapa palyalpai witulya pulkangku.
Panya palumpa mukulya pulka titutjara ngaraku.
- ⁵ Paluru nintipuka mulapa munu palulanguru nintingku ilkari palura kutjupa kutjupa tjuṭa tjunu.
Panya palumpa mukulya pulka titutjara ngaraku.
- ⁶ Paluru manta lipira tjunu urungka katu.
Panya palumpa mukulya pulka titutjara ngaraku.
- ⁷⁻⁹ Paluru palunu tjintu munu pira,
munu tjintu tjunu kalala irnyantjaku,
munu pira kililpi tjunu mungangka irnyantjaku.
Panya palumpa mukulya pulka titutjara ngaraku.

- 10-12 Paluru Itjipanya ngurara tjutaku katja nganmanyitja tjuta iluntanu.
Munu paluru Isra elkunu tjuta witulya pulkangku pakaltjingara katingu ngura Itjipalanguru.
Panya palumpa mukulya pulka titutjara ngaraku.
- 13-15 Paluru uru ini Tjuna-tjunatjaranya tjaranu Isra elkunu tjuta itipirinytjaku, munu tjananya ngururwanungku katingu.
Munu paluru urungka iluntanu Piiranya tjananya warmala winki.
Panya palumpa mukulya pulka titutjara ngaraku.
- 16-22 Paluru katirinangi anangu tjuta ilytjiwanungku.
Munu paluru pungangi mayatja pulka tjuta.
Paluru iluntanu anangu Amurkunu tjutaku mayatja ini Tjiyannga.
Munu piruku pungu anangu Patjanta nyinapai tjutaku mayatja ini Akanya.
Munu tjanampa manta tjananya ungu palumpa walytja tjuta Isra elkunu tjuta.
Panya palumpa mukulya pulka titutjara ngaraku.
- 23-24 Kutjupa-ara warmalangu nganananya pauntjingara pungangi, kala pulkara tjturu-tjturingi.
Palu paluru nintingu nganananya nyangangi watarkurinytja wiyangku,
munulanya walatjunu mirpantju tjutanguru.
Panya palumpa mukulya pulka titutjara ngaraku.
- 25 Paluru kutjungku anangu tjuta, kuka mantatja urutja tjuta kulu uwankara paltjalpai.
Panya palumpa mukulya pulka titutjara ngaraku.
- 26 Walkunmala pukularira Mayatja Godanya ilkarangka nyinapainya.
Panya palumpa mukulya pulka titutjara ngaraku.

146

- 1 Walkunmala Mayatjanya kurunpa winkingku.
2 Munula palunya kutju inkara mirawanima titutjarangu mantangka nyanga wanka nyinaralpi.
- 3 Munula mayatja mantatja tjutaku mulamularingkuwiyangku wantima,
panya tjana anangu tjuta putu tjukarurungku atunymara kanyilpai.
- 4 Mayatja panya paluru tjana unytju nyinanytjatjanu ilura malaku mantaringanyi.
Ka tjintu nyara palula tjana palyantjikitjangku wangkara kulintja uwankara kulu wiyaringkuku palyantja wiyatu.
- 5 Mayatja Godanya nganampa tjamu tjutaku, mayatja Jacobaku tjanampa, munu nganampa kulu.
Ka nganana palunya kulira mulamularingkungangka paluru nganananya alpamilalku.
Nyara palulanguru kutju nganana pukulpa nyinaku.
- 6 Panya paluru ilkari manta uru kulu palunu munu mai kuka kutjupa kutjupa uwankara kulu palunu.
Munu paluru kalkuntjatjanungku palyalpai alatjitu.

- 7 Munu ngaltutjara tjuṭa ngunti kurannyangka nyakula paluru tjukarurungku ngurkantankupai munu tjananya atunymankupai.
 Paluru palṭjatjiratja nyinanyangka tjananya palṭjalpai.
 Munu kuranguru pulkara kulira tjituru-tjitururinyangka nyakula ngaltunytjungku alpamilara unngu pukulmankupai.
 Panya tjailangka nyinanyangka mayatjangku wangkara walatjungkupai, palu purunypa Mayatja Godalu nyakula alpamilalpai.
- 8 Munu paluru kuru pati alalpai munu tjaruringkula punkannyangka piruku pakaltjingara kunpulpai.
 Mayatja Godanya tjukaruru nyinapai tjuṭaku mukuringanyi.
- 9 Godalu malikitja tjuṭa atunymankupai ngura kutjupanguru pitjala nganampa ngurangka nyinanyangka,
 munu wanakala tjitula tjuṭa kulu atunymankupai.
 Palu anangu tjuṭangku titutjarangku kura kutju palyannyangka Godalu paira iyalpai walytjangku kulira kuraringkula ilunytjaku.
- 10 Uwa, mulapa Israelkunu tjuṭaku God kutju mayatja pulka mulapa titutjara nyinaku. Kala palunya kutju walṭkunma Mayatja pulkanya.